


Ew Testamento:
Chipay Tawkquiztan



New Testament in Chipaya (BL:cap:Chipaya)

**Ew Testamento: Chipay Tawkquiztan
New Testament in Chipaya (BL:cap:Chipaya)**

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

Contents

SAN MATEO	1
SAN MARCOS	70
SAN LUCAS	111
SAN JUAN	187
HECHOS	243
ROMANOS	312
1 CORINTIOS	342
2 CORINTIOS	373
GÁLATAS	392
EFESIOS	403
FILIPENSES	414
COLOSENSES	422
1 TESALONICENSES	430
2 TESALONICENSES	437
1 TIMOTEO	441
2 TIMOTEO	450
TITO	456
FILEMÓN	460
HEBREOS	462
SANTIAGO	485
1 SAN PEDRO	493
2 SAN PEDRO	502
1 SAN JUAN	507
2 SAN JUAN	515
3 SAN JUAN	516
JUDAS	518
APOCALIPSIS	521

EL SANTO EVANGELIO SEGUN SAN MATEO

¹ Jesucristuqui Davidž majchmajtquiztan, nižaza Abrahamž majchmajtquiztan tjoñitača. Jesucristuž tuquita atchi ejpnacača tinacaqui.

² Abrahamqui Isaacž ejptača. Isaacqui Jacobž ejptača. Jacobqui Judaž ejptača, niž jilanacžtanpacha.

³ Judaqui Fares ejptača, Zaratanpacha. Tamarqui Fares Zara maatača. Faresqui Esromž ejptača. Esromqui Aramž ejptača.

⁴ Aramqui Aminadabž ejptača. Aminadabqui Naasonž ejptača. Naasonqui Salmonž ejptača.

⁵ Salmonqui Booz ejptača. Rahabqui Booz maatača. Boozqui Obedž ejptača. Rutqui Obedž maatača. Obedqui Isaiž ejptača.

⁶ Isaiqui David cjita chawc jilirž ejptača. Davidqui Urías tjunatan zalžcu Salomonž ejptača.

⁷ Salomonqui Roboamž ejptača. Roboamqui Abías ejptača. Abiasqui Asaž ejptača.

⁸ Asaqui Josafatž ejptača. Josafatqui Joramž ejptača. Joramqui Uzías ejptača.

⁹ Uziasqui Jotamž ejptača. Jotamqui Acaž ejptača. Acazqui Ezequías ejptača.

¹⁰ Ezequiasqui Manasés ejptača. Manasesqui Amonž ejptača. Amonqui Josías ejptača.

¹¹ Josiasqui Jeconías ejptača, niž jilanacžtanpacha. Nii timpuqui Israelit žoñinacaqui preso chjitztatača Babilonia cjita yokquin.

¹² Jalla nekztanaqui Jeconiasqui Salatielž ejptača. Salatielqui Zorobabelž ejptača.

¹³ Zorobabelqui Abiudž ejptača. Abiudqui Eliaquimž ejptača. Eliaquimqui Azorž ejptača.

¹⁴ Azorqui Sadocž ejptača. Sadocqui Aquimž ejptača. Aquimqui Eliudž ejptača.

¹⁵ Eliudqui Eleazarž ejptača. Eleazarqui Matanž ejptača. Matanqui Jacobž ejptača.

¹⁶ Jacobqui Josež ejptača. Josequi María lucutača. Mariiqui Jesús majtchinča. Nižaza Jesusaqui Yooz cuchanžquita Cristo cjitazakazza.

¹⁷ Tunca pusin atchi ejpnacaž kamta wachquichiča Abrahamž timpuquiztan Davidž timpucama. Nižaza tsjii tunca pusin atchi ejpnacaž kamta wachquichiča Davidž timpuquiztan Israel žoñinacaž Babilonia cjita yokquin preso chjichta timpucama. Nižaza tsjii tunca pusin atchi ejpnacaž kamta wachquichiča Babilonia yokquin chjichta timpuquiztan Cristuž nasta tjuñicama.

JESUCRISTUZ NASTA

¹⁸ Jalla tužuča Jesucristuž nastaqi. Niiž maa María cjitiqui Josižtan zalzjapa kazzintača. Ima lucžtan kamcan ica cjissinča Yooz Espíritu Santuž cjen.

¹⁹ Naaža lucu José cjitaqui Yooz kuzcama kamñitača. Niiž tjun María icaž cjen Josequi kuz turwaysi cjissiča. Nekztan jamazit jaljtis pecatča. Kjanacama ultimu jaljtitasaz niiqui, Maríiqui žoñiž chjaawjkatta cjitasacha, ana honorchiz.

²⁰ Jalla nuž jaljtis pinsan, Yooz Jilirž anjilaqui wiiquin nižquiz tjonziča, tuž cjican:

—José, Davidž majchmaati, Yooz Espíritu Santuqui am maataka t'icziča. Jalla nižtiquiztan ana jiwjata naatan zalzqui.

²¹ Nižaza majttanaqui, wawž tjuuqui Jesús cjitaž cjequiča. Jalla niiqui niž wajtchiz žoñinaca ujnacquiztan liwriyaquiča. —Nuž cjichiča anjilaqui.

²²⁻²³ Tuqui timpuquiztanpacha Yooz Jiliri qui profetžquiz chiikatchiča, tuž cjican:

“Tsjaa tunsill turqui icaquiča. Nekztan lucmajch wawa mataquiča. Nii wawaqui Emanuel cjitaž cjequiča”.

Emanuelqui tuž cjiča: učumnacatanča Yoozqui. Nii profetž takucama cumplissiča Jesucristuž nastanaqui.

²⁴ Jalla nekztan Josequi tjaji wajtžcu, Yooz anjilaž mantitacama ojkchiča. Mariatan zalziča. Nižaza persun tjunjapa ricujchiča.

²⁵ Naaža majtz tjuñicama Josequi Mariatan anapan ultimu lucutiñi paasiča. Jalla nižtiquiztan ana zalzi cjichucatača, pero chicapan kamñitača. Wawa majttan, Jesús cjita tjuužtan tjuuzkatchiča.

2

MAGONACA RISPITI TJONCHICHA

¹ Belén cjita wajtquiz nižaza Judea cjita yokquin Jesusaqui majttatača. Nii nacionž chawjc jiliritača Herodes cjitaqui. Jalla nii tuquita timpuquiz jalla tužu watchitakalča. Nii nacionquin Jerusalén cjita wajtquin tuwanchuctan tsjii kjaž žoñinacaqui irantižquichiča. Mago cjita žoñinacatača ninacaqui, warawar puntu istutiñi.

² Jerusalén wajtquiz irantižcu pewcpewczyča tuž cjican:

—Uzca nassiča judío žoñinacž chawjc jiliri qui. ¿Jakziquintaya? —jalla nuž cjican pecunchiča. Nižaza cjichiča, —Wejrnacqui tuuna žejlcan niž nastiquiztan warawara cherchinča. Jalla nižtiquiztan nii rispiti tjonchinča, —jalla nuž cjican mazziča.

³ Herodes cjita jiliri qui magonacaž quint'ita nonžcu, ancha pinsamintu apazziča persun kuzquiz. Nižaza Jerusalén wajtquiz kamñi žoñinacami ancha kuzquiz pinsatča.

⁴ Jalla nekztanaqui nii rey jiliri qui timplu chawjc jilirinaca, nižaza lii tjajjiñi maestrunaca kjawziča. Ninacžquiz pewczyča:

—¿Jakziquint Cristuqui majtta cjesaya? —jalla nuž cjican pewczyča.

⁵ Ninacaqui kjaaziča tuž cjican:

—Belén wajtquinča, Judea yokquin. Tsjii profetaqui cji rchiča, tuž cjican:

⁶ “Judá yokquinča Belén watjaqui. Jalla nii watjapanča chekanaqui, parti watjanacquiztan Judá yokquin. Jalla nekztan tsjii chawc jiliri qui ulnaquiča. Jalla niiqui wejt Israel žoñinacaz mantaquiča; nižaza cwitaquiča”.

⁷ Jalla nekztanaqui Herodes jiliri qui magonaca jamazit kjawziča. Nekztanaqui zumpacha pewczyča, čjul timpuquiztan nii warawaraqui paristčaja, jalla nii.

⁸ Jalla nekztanaqui Herodesqui magonaca cuchanchiča Belén watja, jalla tuž cjican:

—Nii Belén watja oka, nižaza nii wawž puntu zumpacha pjurwiit'aquiča. Wawa watžcuqui, wejtquiz mazcaquiča. Wejrmi zakal ojkz pecuča, wawa rispiti.

⁹ Jalla nekztan Herodes jiliriž chiižinta taku nonžcu, magonacaqui ojkchiča. Jerusalén watja ulantan, nii tuuna cherta warawaraqui ninacž tucquin wilta okatča. Jakziquin nii wawa želatčhaja, jalla nii juntuñ tsijsiča warawaraqui.

¹⁰ Nii warawara tsijsi cheržcu, magonacaqui ancha wali cuntintutača.

¹¹ Nekztanaqui kjuya luzcu, wawa cherchiča Marii maatanpacha. Jalla nekztanaqui ninacaqui quillziča wawa rispitsjapa. Paaz caja cjetžcu, wawžquiz zuma cusasanaca onanchiča, kori, insinzu, mirra. Jalla nuž nii wawžquiz rispitičiča.

¹² Jalla nekztanaqui wiiquin Yoozqui magonacžquiz chiižinčiča, ana Herodes kjutni quepajo. Jalla nižtiquiztan persun watja quejpchiča yekja jicz kjutni.

EGIPTO YOKQUIN ATIPASSICHA

¹³ Jalla nekztanaqui nii magonacž ojkta tsjii Yooz Jilirž anjilaqui wiiquin Josežquiz parisiquičiča. Nekztan tuž cjichiča:

–Zaazna, tii wawa chjicha maatanpacha. Egipto yokquin oka, atipasjapa. Herodes jiliriqi tii wawaž kjuraquiča konzjapa. Jalla nii Egipto yokquin am želaquiča, čhjulorat wejrqui amquiz wilta chiyačhaja, jalla niicama. – Jalla nuž wiiquin chiichiča anjilaqui.

¹⁴ Jalla nuž anjilaž chiitiquiztan Josequi nii orapacha žaaziča. Nekztan wawžtan maatan chjitchiča. Nii weenpacha ulanchiča Egipto yok kjutni.

¹⁵ Jalla nicju kamchiča Herodes ticzcama. Niiž tuquitanpacha Yooz Jiliriqi profetžquiz chiikatchiča, tuž cjican: “Egipto yokquiztan wejt persun Maati kjawznacha”. Jalla nii profetž chiita takuqui cumplissiča.

HERODESQUI JESUSA CONKATZ PECATCHA

¹⁶ Herodesqui kuzquiz tantiyassiča, “Magonacaqui wejttanž burlaskalak” cjican. Jalla nižtiquiztan walja žawjziča. Jesucristo majtta timpu tantiichiča magonacž maztiquiztan. Jalla nuž tantižcu mantichiča Belén wajtquin nižaza nii wajtž tjiyaran tjapa lucmajch wawanaca pizc watquiztan kozzuc conajo.

¹⁷ Jalla nuž cumplissiča Jeremías cjita profetž cjiirta takuqui.

¹⁸ Tuqui timpuqui Jeremiasqui cjiirchiča, tuž cjican: “Ramá cjita wajtquin wali chawc llaqui želaquiča nižaza alto joržtan kaaquiča. Raquel cjitiqui ancha kaaquiča naaža maatinacžquiztan. Ana wira kuztami ch'uj cjequiča. Nižaza naaža maatinacaqui ticziž cjequiča”.

Jalla nuž cjiirchiča Jeremías cjita Yooz taku paljayni profetaqui.

¹⁹ Wiruñaquei Herodes cjita jiliriqi ticziča. Jalla nekztanaqui tsjii Yooz Jilirž anjilaqui Josežquin wilta parisiquičiča wiiquin. Nii oraqui Josequi Egiptuquin tira želatča. Anjilaqui cjichiča:

²⁰ –Zaazna, tii am uza chjicha maatanpacha. Israel yoka quepa. Am wawa konz pecni Herodes jazic ticziča.

²¹ Jalla nuž cjen Josequi žaažcu Israel yokquin nii uztan maatan chjitchiča.

²² Israel yokquin Judea provinciquin Arquelao cjita jiliritača mantiñiqui. Jalla niča Herodes majchqui. Niiž ejpž puestuquizpacha luzzitača. Josequi nii quintu zizcu, Judea yokquin kamz jiwjatchiča. Nekztan tsjii anjilaqui wiiquin Josežquiz paljaychiča, Judea yokquiz ana kamajo, antiz Galilea yokquin okajo. Jalla nekztan Galilea yok kjutni ojkchiča.

²³ Jalla nii yoka irantižcu, Nazaret cjita wajtquiz kamchiča. Tuqui timpuqui Yooz cuntiquiztan chiiñi profetanacaqui mazinčiča, Jesusaqui

“nazareno” cjitazakaz cjequiĉha, jalla nuŝ cjican mazinĉiĉha. Nazaret wajtquiz kamcan profetanacaŝ ĉiĉta taku cumplissiĉha.

3

JUAN BAUTISTA YOOZ TAKU PALJAYÑI

¹ Niiŝ wiruĉaqui Juan Bautistaqui Judea provinciquin ŝelatĉha, ĉ'ekti yokquin. Yooz taku paljayatĉha,

² tuŝ cjican:

–Kuznacaŝ campiya. Arajpach Yoozqui waj mantaquiĉha. Nii timpuqui ŝcatŝinŝquiĉha.

³ Tuqui timpuqui Isaías cjita profetaqui Juanŝ puntuquiztan cjiŝrĉiĉha, tuŝ cjican:

“Ĉ'ekti yokquin tsjii ŝoĉŝ joraŝ nonŝta cjequiĉha. Alto jorquiztan tuŝ cjican ĉiyaquiĉha: ‘Tsjiĉ ĉawjĉ Jiliriŝ tjonauquiĉha. Jaziqui zuma kamaĉ jicŝ tjacŝna. Tsjiĉ jicŝtakaz anĉhuca kuznaca zumpacha azquiĉha, niŝzaza zuma lijitumapanŝ ĉjee’ ”.

Jalla nuŝ cjiŝrtataĉha Juanŝ puntuquiztan.

⁴ Juanŝ zquitiqui camello cjita animalŝ ĉomquiztan watŝtataĉha. Niiŝ cinturonaqui ŝkizitaĉha. Niŝzaza langosta cjita kolŝta animalanaca lujlĉitaĉha. Munti miŝq'uinaca lujlĉizakaztaĉha.

⁵ Walja ŝoĉinacaqui Juanŝ taku nonŝĉi tjonĉitaĉha, Jerusalén ĉawĉ wajtquiztan, niŝzaza Judea yokquiztan, niŝzaza Jordán cjita puŝ ŝcatirantan. Walja ŝoĉinaca tjonĉitaĉha.

⁶ Jakŝiltat niiŝ persun ujnaca mazzaja jalla ninacŝquiz Juanqui bautissiĉha Jordán cjita puŝquiz.

⁷ Nii tama ŝoĉinacŝtanpacha walja fariseonacami, niŝzaza saduceonacami jalla nii jilirinacami Juanŝquin tjonĉizakazza bautista ĉjiŝjapa. Jalla ninaca ĉerŝĉu, Juanqui tuŝ ĉiĉiŝinĉiĉha:

–Zkoraŝtakaz incallĉi ŝoĉinaca. Yooz Ejpqui ujĉiz ŝoĉinaca wajillaŝ caŝticaquiĉha. ¿Ject anĉhucaquiz nii mazzejo? ¿Nii caŝticu atipŝjapa wejtquinŝ tjonkaya?

⁸ Kuz campiĉinĉucŝlaj niiqui, zumapankaz kamaquiĉha, anĉhuca campiĉta kuz kjanapacha tjeeŝjapa.

⁹ Anĉhucqui anaŝ mit kuzziz porapat ĉiyasaquiĉha, tuŝ cjican: “Wejŝnacqui Abrahamŝ majĉmaatinacŝquiztanpacha tjonĉiĉha, Yoozqui anaŝ wejŝnaca caŝticasacĉha”. Jalla niŝta ana ĉiĉiĉiiz waquisiĉha. Yoozqui tii maznacquiztan ŝoĉiŝ ĉjiŝkatasacĉha, Abrahamŝ majĉmaatinaca ĉjiŝjapa.

¹⁰ Anĉhucqui tsjii frut muntiŝtakazza. Ana zuma fruta pookĉi muntiqui k'aatztaŝ cjequiĉha jir aĉŝtan. Jalla nuŝ k'aatztiquiztanaqui, ujtaŝ cjequiĉha. Jalla niŝta irataŝ anĉhucaquiz wataquiĉha. Ana zuma kamaĉĉiz ŝoĉinaca caŝtica cjequiĉha.

¹¹ Wejŝrqui weraral ĉiyuĉha. Kjaztangkal bautisuĉha, anĉhuca kuznaca campiĉtiquiztan. Tsjiĉqui wejt wirquin tjonĉha. Jalla niiqui Espĉritu San-tuŝtanami niŝzaza arajpach ujŝtanami bautisaquiĉha. Jalla niĉha wejtquiztan tsjan juĉ'ant poderĉizqui. Niiŝquiz atintiŝjapa anal waquisuĉha, niiŝ ĉjyata jerŝĉu ĉjoiĉkzinimi. Inakaztĉha wejŝrqui.

¹² Anĉhucqui trigo ŝkalaŝtakazza. Nii tjoĉi jiliriĉqui trigonaca kjojaquiĉha. Nekŝtan itzanacami zuma trigumi pjalznaquiĉha. Nii zuma triguqui ricujtaŝ cjequiĉha. Niiŝ persun kjuyquin majĉtaŝ cjequiĉha. Nii itzanacazti liwŝ ujtaŝ cjequiĉha, ana wira tjeŝi ujquiz. Jalla niŝta irataŝ anĉhucaquiz wataquiĉha.

JESUSAQUI BAUTISTATACHA

¹³ Niiž wiruñaqi Jesusaqui Galilea yokquiztan Jordán cjita pujquin ojkchiča, jakziquint Juan želatčaja, jalla nicju. Bautiskatzjapa Juanžquin ojkchiča.

¹⁴ Jesusiž irantitan, Juanqui ana nii bautis pecatča. Jalla tuž cjichiča:

–Amž wejr bautis waquiziča. ¿Am wejtquiz tjonkaya? ¿Weriž bautista cjisjapaya? –Jalla nuž cjichiča Juanqui.

¹⁵ Nekztan Jesusaqui kjaaziča, tuž cjican:

–Anzikam wejr bautisaquiča. Yooz mantitacama liwj cumplis waquiziča učumqui. –Jalla nuž kjaaztiquiztan Juanqui “iyaw” cjichiča.

¹⁶ Nekztanaqui Juanqui Jesusa bautissiča. Kjazquiztan ulnan, nii orapacha arajpacha cjetziča. Nekztan Jesusaqui cherziča Yooz Espíritu Santo palomažtakaz chjijwžquiñi. Jalla niiž juntuña pacha Espíritu Santuqui iran-tižquichiča.

¹⁷ Nekztanaqui arajpachquiztan tsjii jora paljayžquiñi nonziča, jalla tuž cjiñi:

–Tiiča wejt ultim k'ayi Maatiqui. Tiiž cjen ancha cuntintutča wejrqui.

–Jalla nuž cjichiča nii tsewctan chiižquiñi joraqui.

4

JESUSAQUI DIABLUZ YANZTA

¹ Jalla nekztanaqui Jesusaqui Jordán cjita pujquiztan ojkchiča. Nuž okan, Espíritu Santuqui Jesusa chjitchiča ch'ekti yokquin, Satanás diabluž yanzta cjisjapa. Satanasqui Jesusa ujquiz tjojtskatz pecatča.

² Jalla nijwc žejlcan, Jesusaqui pusi tunc tjuñi pusi tunc arama ana čjjeri lujlchiča. Jalla nii pusi tunc tjuñi wattiquiztan ancha čjjeri eeskatchiča.

³ Jalla nekztanaqui diabluqui Jesusižquiz macjatchiča ujquiz tjojtskatz yanzjapa. Jalla tuž cjichiča:

–Amqui ultim Yooz Maatimžlaj niiqui, tii maznacquiztan t'anta tuckatalla.

⁴ Jesusaqui kjaaziča, tuž cjican:

–Cjirta Yooz takuqui tuž cjiča: “Zoñinacaqui anaž čjjeržtan alaja žetasacha. Yooz takuča chekanaqui, jalla niiča ultim čjjerižtakazqui”. Jalla nuž kjaaziča Jesusaqui.

⁵ Jalla nekztanaqui diabluqui Jesusa chjitchiča Jerusalén, Yooz illzta chawjc watja. Jalla nicju timplu tsewcta pjurniguin yawkatchiča.

⁶ Nekztan diabluqui cjichiča:

–Cjirta Yooz takuqui tuž cjiča:

“Yooz Ejpqui niiž anjilanaca mantaquiča am cwitajo. Ninacž persun kjaržtan am cwitaquiča, ana am kjojcha chjojričta cjeyajo mazquiz-imi”.

Jazic, ultim Yooz Maatimžlaj niiqui, tsewctan kozzuc tii yokquiz layzca. – Jalla nuž cjichiča nii diabluqui.

⁷ Nekztanaqui Jesusaqui kjaaziča tuž cjican:

–Cjirta Yooz takuqui zakaz cjiča: “Zoñiqui ultim arajpach Yooz ana inakaz nuž yanznaquiča”. Jalla nuž cjirtača.

⁸ Jalla nekztanaqui wilta ujquiz tjojtskatz yanzjapa, diabluqui Jesusa chjitchiča pajk cur puntiquin. Jalla niwjc chjitžcu, diabluqui tjapa tii muntuquiz žejlñi nacionanaca nižaza tjapa ninacž cusasanacžtanpacha, nižaza tjapa ninacž honoranacžtanpacha jalla ninaca diabluqui Jesusižquiz tjeeziča.

⁹ Nekztan nii diabluqui cjichiča:

–Tjapa tinaca amquiz tjaasača, wejtquizim quillzaja, nižaza wejr rispitchaja, niiqui.

¹⁰ Jalla nižtiquiztan Jesusaqui kjaaziča, tuž cjican:

–Satanás, wejtquiztan zaraka amqui. Cjirra Yooz takuqui tuž cjiča: Yooz Jiliržquinkaz rispita, nižaza nii alaja sirwa. Niikazza am Yooz Jiliriqui.

¹¹ Jalla nuž Jesusiž chiitiquiztan diabluqui Jesusižquiztan zarakchiča. Nekztan tsjii kjaž anjilanacaqui Jesusižquin atinti tjonchiča.

JESUSAQUI GALILEA YOKQUIN OJKCHICHA

¹² Niiž wiruñaquí Jesusaqui quintu nonchiča, Juan carsilquiztača, jalla nii. Jalla nii quintu nonžcu, Galilea yokquin ojkchiča.

¹³ Pero Nazaret waitquin ana kamchiča; antis Capernaum waitquin kami ojkchiča. Capernaum watjaqui kot atquiztača, Žabulón yokquin nižaza Neftalí yokquintača.

¹⁴ Jalla nuž ojktiquiztan Isaías profetaž cjirra taku cumplissiča.

¹⁵ Jalla tuž cjirchiča Isaías profetaqui:

“Žabulón, nižaza Neftalí, am yokaqui kot atquizza, nižaza jiczquizza Jordanquiztan tuwanchuc. Nižaza Galilea yokquinča. Jalla nii Galiliiquinaqui yekja waitchiz žoñinacaž kamča.

¹⁶ Am yokquin žejlñi žoñinacaqui zumchiquiz kamča, ana zuma kamañquiz. Ninacaqui tsjii žoñi cheraquiča. Nii žoñiqui zuma kamaña tjeznaquiča, zuma kjanažtakaz. Ticzi žoñinacažtakaz kamča; anaž Yooz kamaña zizza. Pero kjanapachaž Yooz zuma kamaña tjeezta cjequiča.”

¹⁷ Jalla nekztanaqui Jesusaqui Yooz puntu kjanzt'i kallantichiča, tuž cjican:

–Kuznaca campiya. Arajpach Yooz waj mantaquiča. Jalla nii timpuqui žcatžinžquiča. –Jalla nuž paljaychiča.

PAJKPIC CH'IZ TANÑI ŽOÑINACA JESUSIZ KJAWZTA

¹⁸ Jesusaqui Galilea cjita kot at tjiyaranž okatča. Jalla nuž ojkan pucultan jilazullca žoñinaca cherchiča. Tsjiiqui Simón cjitatača, nižaza Pedro cjitazakaztača. Tsjiiqui Andrés cjitatača. Jalla ninacaqui ch'iz tanñinacatača. Nii oraqui ninacaqui ch'iz tanz kjazquiz tjojtsi želatča.

¹⁹ Jalla ninacžquiz Jesusaqui tuž cjican paljaychiča:

–Wejttan chica ojklayñi cjee. Jaknuž ch'iz juntichamžlaja, jalla nižta irata ančhucqui Yooztajapa žoñinaca juntaquiča.

²⁰ Jalla nuž chiitiquiztan nii pucultan žoñinacaqui nii orapacha ch'iz tanz eccu, Jesusižtan chica ojklaychiča.

²¹ Jalla nekztanaqui tsjii koloculla najwcjapa ojžcu Jesusaqui tsjii pucultan jilazullca žoñinaca cherchizakazza. Tsjiiqui Jacobo cjitatača. Tsjiiqui Juan cjitatača. Zebedeož majčtača. Niiž ejpžtanpacha warcuquiz želatča, ch'iz tanz azquichcan. Jalla nii cheržcu, Jesusaqui ninaca kjawziča.

²² Nekztan nii orapacha warcumi niiž ejpmi eccu, Jesusižtan chica ojklaychiča.

ŽOÑINACA JESUSA APZA

²³ Tjapa nii Galilea cjita yokaran ojklaychiča, zapa ajcz kjuyquiz Yooz puntu tjajincan. Nižaza paljaychiča, Yooziž mantita žoñinacaž cjee, cjican. Nižaza tjapaman laanaca čhjetinchiča.

²⁴ Jesusiž ojklayta, jalla nii quintuqui tjapa Siria yokquin ojkchiča. Jalla nižtiquiztan, tjapaman conchiz žoñinacami, nižaza tjapaman laa ayiñi žoñinacami, nižaza zajraž tanta žoñinacami, nižaza t'ucur žoñinacami,

nižaza ana ojklayi atñi zuch žoñinacami, tjapaman laanaca Jesusižquin chjitztatača. Nekztanaqui Jesusaqui nii laanaca čhjetinchiča.

²⁵ Galilea žoñinacaqui niizquin walja apžquichiča, nižaza Decápolis watjanacquiztan žoñinacami, nižaza Jerusalén wajtquiztan žoñinacami, nižaza Judea yokanacquiztan žoñinacami, nižaza Jordán pužž tuwanchuctan žoñinacami. Tjapa nii žoñinacami jalla nuž Jesusa apziča.

5

JECTNACAT CUNTINTU ŽOÑINACA

¹ Walja tama žoñinaca cheržcu, Jesusaqui tsjii kolta curulla yawchiča. Jalla nekztan nii curullquin julziča. Nižaza niiz kjawžta žoñinacaqui niiz muytata ajcziča.

² Jalla nekztan Jesusaqui ninacžquiz tjaažni kallantichiča, tuž cjican:

³—Jecnacat “wejrqui ujchizpanča” cjican persun kuzquiz sint'ičaja, jalla ninacaž Yooz wajtchiz žoñinaca cjequiča. Nekztanqui cuntintuž cjequiča.

⁴ Jecnacat persun ujquiztan llaquita žejlčaja, jalla ninacžquiz Yoozqui kuznaquiča. Nekztan cuntintuž cjequiča ninacaqui.

⁵ Jecnacat humilde kuzziz cječaja, jalla ninacžquiz Yoozqui irinsaž tjaaquiča, ew yoka. Nekztan cuntintuž cjequiča.

⁶ Jecnacat Yooz kuzcamakaz kamz ancha pecčaja, jalla ninacžquiz Yoozpanž zuma kamzjapa yanapaquiča. Nekztan cuntintuž cjequiča.

⁷ Jecnacat parti žoñinacžtajapa oksni kuzziz cječaja, jalla ninacžquiz Yoozqui zakaz oksnaquiča. Nekztan cuntintuž cjequiča.

⁸ Jecnacat ancha zuma kuzziz cječaja, jalla ninacaqui Yooz cheraquiča. Nekztan cuntintuž cjequiča.

⁹ Jecnacat pasinsis kuzziz kamni cječaja, jalla ninacaqui Yooz maati cjitaž cjequiča. Nekztan cuntintuž cjequiča.

¹⁰ Jecnacat Yooz kuzcama kamtiquiztan chjaawjta sufračaja, jalla ninacaž Yooz wajtchiz žoñinaca cjequiča. Nekztan cuntintuž cjequiča.

¹¹ Jecnacat weriž cjen žoñinacaž chjaawjta cječaja, nižaza kijchta cječaja, nižaza tjapaman toscar tawkžtan quintra ch'aanita cječaja, jalla ninacami cuntintuž cjequiča.

¹² Jecnacat weriž cjen jalla nižtanaca sufrichi cječaja, jalla ninacžquiz Yoozqui arajpachquin wali pajk honora tjaaquiča. Jalla nižtiquiztan tii muntuquiz kamcan, cuntintukaž cjee. Ančhucqui cjuñzna. Yooz cuntiquiztan chiiñi profetanacaqui nižta zakaz sufrichiča tuqui timpuquiztanpacha.

CRICHINACZ PUNTU

¹³ Jesusaqui tjaažinchizakazza:

—Ančhucqui tii muntuquiz kamcan yacu cuntažtakazza, parti žoñinacžtajapa. Pero yacuqui lak'až cjesaž niiqui, ¿kjažpant wilta walipan cjisnasajo? Anapanž cjesača. Nekztan anaž čhjuljapami sirwasača; tjojtapanž cjesača; nekztan žoñinacaž tječtaž cjequiča.

¹⁴ Ančhucqui tii muntuquiz kamcan, parti žoñinacžtajapa kjana cuntažtakaz cjesača, zuma kamaña zizajo. Tsjii curquiz kjuyta watjaqui, ana chjojžta cjesača.

¹⁵ Tsjii lamparaqui tjeežtaž cječaj niiqui, anapanž cajón koztan nonžta cjesača. Lamparaqui tjeežtaž cječaj niiqui, tsewc tsijjapanž cjesača, tjapa nii kjuyquiz žejlñi žoñinacžtajapa kjanajo.

¹⁶ Jalla nuž ančhucqui lamparažtakaz cjee, žoñinacžtajapaqui. Kjanapacha zuma kamañchiz cjee. Nekztan žoñinacaqui ančuca zuma kamaña cheržcu, ančuca arajpach Yooz Ejpžquin honora tjaaquiča.

LII PUNTU

¹⁷ Jesusaqui tjaajinchizakazza:

–Wejrqui ana tjonchinča Moisés lii tjatanskatzjapa, nižaza profetanacaž tjaajintanaca tjatanskatzjapami. Jalla nižta anaž pinsa ančhucqui. Wejrqui ana tjonchinča nii tuquita Yooz tjaajintanaca tjatñiqui; antis tjonchinča cumpliskatzjapa.

¹⁸ Weraral chiižinuča. Tuquita Yooziž tjaata liiquiztan tjapa puntumi tjapa letrami anaž tjatanta cjequiča, tjappacha cumpliscama. Ima tii muntumi arajpachami tucuzinžnan, nii liiqui anapanž tjatantaž cjequiča.

¹⁹ Jalla nižtiquiztan jequit tuquita Yooziž tjaata liiquiztan tsjii mantita, kolta lii cjenami, ana pajz pecchaj niiqui, nižaza yekjap žoñinacžquiz nižtapacha tjaajinchaja, jalla nii žoñiqui arajpach Yooz wajtquin anaž čjul honorchiz cjequiča. Pero jequit nii tuquita lii mantita cazačhaja, nižaza yekjap žoñinacžquiz nižtapacha tjaajinchaja, jalla nii žoñiqui arajpach Yooz wajtquin chekan honorchiz žoñiž cjequiča.

²⁰ Ančhucquiz wejr chiižinuča. Lii tjaajiñi maestrunacami, nižaza fariseo žoñinacami žejlča. Pero ančhucqui ninacžquiztan anaž juc'anti Yooz mantitacama kamačhaj niiqui, anapanž arajpach Yooz wajtquin luzasača. Yooz mantitacama kamstanča, arajpach Yooz wajtquin luzjapa.

ZAWJZ PUNTU

²¹ Jesusaqui tjaajinchizakazza:

–Ančhucqui tuquita atchi ejpnacžquiztan tuž nonzinčhucča. Ninacaqui cjiñitača, tuž cjan: “Anača žoñi conzqui. Jequit žoñi conačhaja, niiqui juzjitaž cjequiča”.

²² Pero wejr chiižinuča, jequit tsjii jilžjapa zawjwačhaj niiqui, jusjitaž cjequiča. Nižaza jequit tsjii jilžtan ch'aachaj niiqui, Junta Suprema cjita chawjc jilirinacaž jusjitaž cjequiča. Nižaza jequit tsjii jilžquiz “ana zumamča” cjican ch'aančhaj niiqui, infiernuquin chjatkattaž cjequiča.

²³ Nižaza tii puntu zakal cjeeča. Jequit niíž ofrenda Yooz yujcquin chjichačhaj niiqui, nižaza chjichcu niíž jilžtan quintra tanasta cjuñsnačhaj niiqui,

²⁴ jalla nekztan ima ofrenda tjaacan, nii timpluquizpacha ecla. Nekztanaqui niíž jilžquin pertuna mayiza ojkla. Niižtan jilžtan walikaz cjila. Jalla nekztanaqui timpluquin quejpžcu, ofrenda Yoozquin tjaasača.

²⁵ Jequit am quintra quijchi cječhaj niiqui, nižaza jilirž kjuya chjichačhaj niiqui, jalla nii quijchi žoñžquiz pertunam mayizaquiča ana enenzcu, ima jilirž kjuya irantican. Pertunazta cjequiž niiqui, anam juez jiliržquin intirjita cjequiča jusjita cjsjapa. Amqui ultimpacha juez jiliržquin intirjita cjesaž niiqui, nii juez jiliričiqui am tsjii policiiquin zakaz intirjasača; carsilquiz chawjcta cjesača.

²⁶ Weraral chiižinuča. Carsilquiz chawjctam cjesaž niiqui, anam ulanasača, liwj pacañcama.

ADULTERIO PUNTU

²⁷ Jesusaqui tjaajinchizakazza:

–Ančhucqui tuquita atchi ejpnacžquiztan tuž nonzinčhucča: “Anača adulteriuquiz ojklazyqui”.

²⁸ Pero wejrqui tuž chiižinuča, jakzilta luctakat yekja maataka “wejt maatakaj cjejaa” cjican pinsičhaja, jalla niiqui persun kuzquiz niwjctanaqui adulterio paachizakazza Yooz yujcquiziqui.

²⁹ Am žew latu čhujquiqui ujquiz tjojtskatčhaj niiqui, nii čhujqui leczna, nižaza nawjk tjojtta. Jalla nuž tsjii čhujquiqui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača.

³⁰ Nižaza am žew kjaragui ujquiz tjojtskatčhaj niiqui, nii kjarapootzna, nižaza nawjk tjojtta. Jalla nuž tsjii kjaragui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača.

TJUNATAN JALJTIS PUNTU

³¹ Jesusaqui tjaajinchizakazza:

–Ančuca tuquita atchi ejpnacaqui tuž cjiñitača: “Jecmiž niž persun tjunatan jaljtasaž niiqui, primiruqui tsjii ultim jaljtita cjiirta papel certificado tjaasa”.

³² Pero wejrqui tuž chiižinuča, jakziltamiž persun tjunatan jaljtasaž niiqui, nižaza ana čjul adulterio motivo želan, jalla nijwctanaqui naa ultimu jaljtita tjunqui adulterio cjiskatasacha. Nižaza jakziltami naa ultimu jaljtita tjunatan zalznačhaj niiqui, adulterio ujpant pača.

JURAMENTO PUNTU

³³ Jesusaqui tjaajinchizakazza:

–Nižaza ančhucqui tuquita atchi ejpnacžquiztan tuž nonzinčhucča: “Anača toscar tawkžtan juramento paazqui. Juramento paaquič niiqui, tjapa nii juramentužtan compromitta takupanž cumplisnaquičha Yooz yucquiziqui”.

³⁴ Pero wejrqui tuž chiižinuča, anaž čjulquiztanami juramento paasača, werara chiizpanča. Nižaza anača “arajpacha zizza” cjican juramento paazqui. Yooztajapača arajpachaqui.

³⁵ Nižaza anača “tii yoka zizza” cjican juramento paazqui. Yooztajapača tii yokaqui. Nižaza Jerusalén wajtž tjuu aynakcan anača juramento paazqui. Chawjc Yooz Jiliržtajapača nii watjaqui.

³⁶ Nižaza anača “wejt persun acha zizza” cjican juramento paazqui. Amqui anam zinta tsok charquiztan chiw charquin tuckatasacha. Nižaza anam zinta chiw charquiztan tsok charquin tuckatasacha.

³⁷ Jalla nižtiquiztan, “Jesalla” cjicanaqui, “Jesalla” cjispanča; nižaza “Anaž” cjicanaqui, “Anaž” cjispanča. Zajra diabluz cjen juramento paazqui žejlča.

ANA WALI TJEPUNTA PUNTU

³⁸ Jesusaqui tjaajinchizakazza:

–Ančhucqui tuquita atchi ejpnacžquiztan tuž nonzinčhucča: “Tsjii žoñiqui yekja žoñž čhujqui pjatžinasacha, nekztan nii pjatni žoñž čhujqui pjatžintazakaz cjesača. Nižaza tsjii iżke chjatkatzinasaz niiqui, nii chjatkatni žoñž iżke chjatkatzintazakaz cjesača”.

³⁹ Pero wejr chiižinuča, anača kijtžni žoñiqui nižtapacha kijtžqui. Nižaza am quintra tsjii yujc latu kijchasaž niiqui, kijchta cjiskazza, tsjii yujc latužtanpachami.

⁴⁰ Nižaza jakziltamiž am tanžcu am almilla kjanž pecčhaj niiqui, kjañaj cjiskazza, irztanpachami.

⁴¹ Jakziltamiž niž kuzi tsjii tupucama, amquič chjitskatasaz niiqui, juc'anti tupucama chjichna.

⁴² Jakziltamiž amquičtan mayasaž niiqui, tjaa amqui. Nižaza jakziltamiž amquičtan tomžni tjonasaž niiqui, onzna amqui.

QUINTRA ZOÑINACŽTANAMI ZUMA MUNAZIZA

⁴³ Jesusaqui tjaajinchizakazza:

–Nižaza ančhucqui tuquta atchi ejpnacžquiztan tuž nonzinčhucča: “Mazinacžtan zuma munaziza. Nižaza am quintra žoñinacžtan chjaawjkata”.

⁴⁴ Pero wejr chiižinuča, am quintra žoñinacžtanami zuma munaziza. Nižaza am quintra laykiñi žoñinacžtajapa zuma kuztan Yoozquiztan maynaquiča. Nižaza am quintra chjaawjkatñi žoñinacžquin zumapan paa. Nižaza am quintra ch'aañinacžquinami kichñinacžquinami zumapan Yoozquiztan mayt'ižina.

⁴⁵ Jalla nuž zuma kamcan ančhucqui tjeeža, arajpach Yooz Ejpž maatičhucča, nii. Yoozqui zuma žoñinacžquizimi ana zuma žoñinacžquizimi liwj tsjiikaz niž paata tjuñi tewkkatča. Nižaza niž kuzcama kamñinacžquizimi nižaza ana niž kuzcama kamñinacžquizimi tjapa ninacžquiz chijñi apayžquiča.

⁴⁶ Ančhucqui persun okzñi žoñinacžquizkaz okznaquiž niiqui, jalla nuž paatiquiztan ěhjul premio Yoozquiztan tanznaquejo? Jalla nižtazakaz kamča ana wali impuesto cobriñinacami.

⁴⁷ Nižaza ančhucqui persun jilanacžquizkaz tsaanaquiž niiqui, jalla ni-jwctan ěhjul zumaž ančhuc paajo? Jalla nižtazakaz paača ana Yooz pajñinacami.

⁴⁸ Ančhucqui walja zuma kuzziz kama, jaknužt ančhuc arajpach Yooz Ejp walja zuma kuzzizpančhalaja, jalla nuž.

6

ZUMA KAMZ PUNTU

¹ Jesusaqui tjaajinchizakazza:

–Ančhucqui anača persunpacha honorchizkaz cjis peczqui. Anača žoñinacž yujcquiz ančuca Yooz custurumpinaca paazqui, žoñinacžquiztan honorchiz cjisjapa. Ančhucž jalla nuž persun honorchizkaz cjis pecaquiž niiqui, nii honorchiz kaz cjequiča. Ančuca arajpach Yooz Ejpqui ana iya honora tjaaquiča.

² Ana zum kuzziz žoñinacaqui t'akjir žoñinacžquiz onanžcu žoñi žoñinacžquin mazmazñiča, “onanchinča” nuž cjicanaqui. Ajcz kjuyaranami calliranami jalla nižta paañiča, žoñinacaž ninacžjapa zuma chiyajo. Pero wejrqui weraral chiižinuča. Jalla nižta paañi žoñinacaqui nii honorchizkaz cjequiča. Ančhucqui anača nižta iratapacha kama.

³ Ančhuczi t'akjir žoñinacžquiz onanžcu, jalla nii ančuca onantaqui anaž jeczquizimi mazmaznaquiča, “onanchinča”, cjicanaqui.

⁴ Nižaza t'akjir žoñinacžquiz jamazit onaquiča. Aunquimi ančucaž jamazit paachiž cjenami, ančuca Yooz Ejpqui cherča. Jalla nuž cheržcu ančucaquiz kjanacama honora tjaaquiča, tsjii premiužtakaz.

MAYIZIZ PUNTU

⁵ Nižaza nii ana zum kuzziz žoñinacaqui Yoozquin mayizican jalla tuž jutzazñiča. Ajcz kjuyquizimi call isquinqizimi tsijtchi Yoozquin mayiziñiča, tjapa žoñinaca cherajo. Wejrqui weraral chiižinuča, jalla nuž paažcu ninacaqui nii honorchizkaz cjequiča. Ančhucqui anača nižta irata mayizizqui.

⁶ Ančhuczi Yooz Ejpžquin mayizizjapaqui, kjuyquiz luz waquiziča, nižaza kjuy chawjcz waquiziča. Jalla nekztan ančuca Yooz Ejpžquin mayizasača. Jalla nuž zinalla mayizan ančhucatan chicaž cjequiča Yooz Ejpqui. Jalla nuž jamazit mayiztiquiztan Yooz Ejpqui ančucaquiz honora tjaaquiča, tsjii premiužtakaz.

⁷ Yoozquin mayizcan, anača wiltan wiltan takunaca quejpžcu quejpžcu mayizizaqui. Jalla nuž mayizaquiž niiqui, inapanikazza. Jalla nižtaž mayizza ana Yooz pajñi žoñinacaqui. Jalla nuž wacchi chiican mayizitiquiztan “nonznaqueeka Yoozqui” cjican.

⁸ Jalla nižta anaž ančhuc cjeella. Ančuca Yooz Ejpqui zizza, čhjulut ančhuc pecčhaja, jalla nii. Ima ančucaž mayizan, panž zizza Yooz Ejpqui.

⁹ Jaziqui ančhucqui jalla tuž mayizaquiča:

“Yooz Tata, amqui arajpachquin žejlča. Am tjuu honorchiz aptitaj cjilalla.

¹⁰ Nižaza am mantiz timpu tjonchej cjilalla. Nižaza tii muntuquiz žejlñi žoñinacaqui am kuzcamaj kamlalla. Jaknužt am kuzcama kamčhaja arajpachquin žejlñinaca, jalla nižta.

¹¹ Nižaza tonjiqui čhjeri tjaažcalla čhjeržtan kamzjapa.

¹² Nižaza wejtnacaž paata ujnaca pertunalla, jaknužt wejrnacqui wejtnaca quintra paañi pertunučhaja, jalla nižaza.

¹³ Nižaza anaž anawalinacžquiz tjojtskatalla, antis anawalinacquiztanž liwriyalla. Amča wiñaya juc'ant mantiñamqui, nižaza amča wiñaya juc'ant azzizqui, nižaza amča wiñaya juc'ant honorchizqui. Jalla nužoj cjila. Amén.”

¹⁴ Ančuca quintra paañinacžquiz pertunaquiča. Nekztan Yooz Ejp zakaz ančuca ujnaca pertunaquiča.

¹⁵ Ančuca quintra paañinacžquiz ana pertunaquiž niiqui, nekztan ana zakaz Yooz Ejpqui ančuca ujnaca pertunaquiča.

AYUNAS PUNTU

¹⁶ –Ančhucqui ayunascan anaž llaquit chercherchiz cjee. Ana zum kuzziz žoñinacaqui llaquit chercherchiz ayunasñiča, žoñinaca ninaca ayunasñi cherajo. Wejrqui weraral chiižinuča, jalla nuž paatiquiztan ninacaqui inapanikaz cjequiča.

¹⁷ Ančhuczi ayunascanacqui zumpacha yujcmiž awjzna, nižaza zumpacha achami čhjiczna,

¹⁸ žoñinaca ančhuc ayunasñi ana nayajo. Yooz Ejpqui ana cherta cjenacqui tjappacha cherča, jamazit paatami. Yooz Ejpqui ančucaquiz zuma honoraž tjaaquiča, tsjii premiužtakaz.

CUSASANAC PUNTU

¹⁹ Jesusacqui tjaažinchizakazza:

–Tii muntuquiz kamcanacqui anača muzpa cusasanaca juntizqui. Kjuri-nacakaz ančuca juntita cusasanaca lulaquiča. Nižaza parti ančuca juntita cusasanaca inapankaz chjijtaquiča. Nižaza tjañiqui kjuyaž luzasača, ančuca cusasanaca tjangzjapa.

²⁰ Nonžna, arajpachquin muzpa cusasanaca juntaquiča. Arajpachquin cusasanaca lujlñimi, nižaza cusasanaca akziñimi, nižaza cusasanaca tjangziñimi ana žejlča.

²¹ Jakziquizt ančuca cusasanaca juntita žejlčhaja, jalla nicjukaž ančhuc kuz tjaača.

ZUMA KAMAÑCHIZ, ANA ZUMA KAMAÑCHIZ PUNTU

²² Jesusacqui tjaažinchizakazza:

–Žoñž čhjuiquiqui persun curpuž lamparažtakazza. Jaziqui žoñž čhjuiqui zuma cjequiž niiqui, zuma cheraquiča. Jalla nižtakaz žoñž kuzqui zuma cjequiž niiqui, zuma kamaquiča.

²³ Žoñž čhjuiquizti ana zuma cjequiž niiqui, zumchiquiztakaz ojk-layaquiča. Ančuca kamaña zumchiquiz panž cjequiž niiqui, juc'anti juc'anti zumchiquiz cjisnaquiča. Nekztan ¿jaknužt zuma kamasajo?

PAAZ PUNTU

²⁴ Jesusaqui tjaajinchizakazza:

—Anaž jakziltami pizc patruna sirwasača. Pizc patrunchiz cjesaž niiqui, tsjii patrunchiz ana pectaž cjesača. Tsjii patrunchiz pectaž cjesača. Tsjii patrunchizkaz zuma sirwasača. Jalla nižtiquiztan Yoozquiz sirwican anaž ancha paazquiz kuz tjaasača. Nižaza paazquiz kuz tjaaquiz niiqui, anaž Yoozquin ancha kuzziz cjesača.

YOOZ EJPQUI NIZ MAATINACA CWITICHA

²⁵ Jesusaqui tjaajinchizakazza:

—Ančhucaquiz tuž chiižinuča, žejtzjapaqui kjaz liczmi lujlz čhjerimi pecča. Jalla nuž cjenami ančhucqui anača kuzquizic čhjerquiztan llaquita cjisqui. Nižaza curpu wali cjisjapa zquti pecča. Jalla nuž cjenami ančhucqui anača zquitquiztan llaquita cjisqui. Čhjul čhjerquiztanami žoñž žetiž juc'anti importiča. Nižaza čhjul zquitquiztanami persun curpuž juc'anti importiča.

²⁶ Laylayni wežlanacaž cherna. Jalla nii wežlanacaqui ana zkalami čhjacča, nižaza ana zkalquiztanami ricujča, nižaza ana čhjeri yaaz zquitčizza. Jalla nuž cjenami ančhuca arajpach Yooz Ejpqui wežlanaczquiz čhjeri tjaacha. Yooz yujcquiziqui ančhucqui čhjul wežlanacquiztanami juc'antiž importiča.

²⁷ Anaž jec kolta žoñimi persunpacha tsjan lajcha paki atasacna, llaquiziñi kuzziz cjenami ancha lajcha pecni kuzziz cjenami.

²⁸ ¿Kjažtiquiztan ančhucqui zquitquiztankaz llaquit kuzziz cjesajo? Plantanacz pjajkjallaž cherna, jaknužt pajkčhaja, jalla nii. Ninacaqui anaž langza, nižaza anaž kawanča.

²⁹ Jalla nuž cjenami nii pjajkjallanacaqui ancha c'achjallača. Finu zquti cujtzcumi ricachu Salomón cjita jiliriQUI anaž juc'ant c'achja nii pjajkjallanaczquiztanami.

³⁰ Plantanacaqui tsjii upacamakaz žejlča. Nekztanaqui jakatažu kattažu jurnuquiz tjutjunzjapa ujžtača. Jalla nižta cjenami Yooz Ejppacha nii plantanaca cwitiča. Ančhucqui čhjul plantaquiztanami juc'antipanž importiča. Jalla nižtiquiztan Yoozqui ančhuc juc'ant cwitiča, Yoozquin ana tjapa kuzziz cjenami.

³¹ Jalla nižtiquiztan ančhucqui anača llaquita kuzziz cjisqui, čhjul čhjerquiztanami, nižaza kjaz liczquiztanami, nižaza čhjul zquitquiztanami.

³² Ana criichi žoñinacaqui tii muntu cucasanaczquin kuzziz ojklajča. Ančhuczi ana nižta kuzziz cjeella. Ančhucača arajpach Yooz Ejpchizqui. Čhultakiča ančhucqui pecčaj niiqui, liwj zizza Yooz Ejpqui.

³³ Jalla nižtiquiztan Yooz Ejpžquinpankaz walja kuzziz cjee. Nižaza niž mantita zuma kamañquiz kuzziz cjee. Jalla nekztanaqui ančhucaltaqui cawalikaz cjequiča čhjulumi.

³⁴ Jakatan čhjulut anawalinaca watačaj niiqui, jalla nii ana juyzu paa tonjiqui. Jakaqui čhjulut watačaj niiqui, jakapachaž jaknužquinami wataquiča. Zapuru čhjul anawalinacaqui žejlñipanča.

7*ZOÑINACŽTAN ZUMA KAMA*

¹ Jesusaqui tjaajinchizakazza:

—Ančhucalaqui anača žoñinacz uj chii chiižqui. Jalla nuž žoñinacz uj chii chiyaquiz niiqui ančhucqui juc'ant ujchiz cjequiča Yooz yujcquiziqui.

² Nižaza žoñinacžquizimi “Amqui Yooziž castictaj cjila”, cjican chiyaquiž niiqui anchucqui Yooziž casticta zakaz cjequiča. Zoñinacžtan zuma kama. Nekztan Yooz Ejpqui ančhucatan zumaž cjequiča.

³ Nižaza amqui am jilž čhjujcquiz tsjii cjujchilla cherasaž niiqui, ¿kjažtiquiztan am persun čhjujcquiz pajk cjujchi ana cherjo?

⁴ Am persun čhjujcquiz nii pajk cjujchi ana cherasaž niiqui, ¿kjažtiquiztan am jilžquiz chiijo, “Jila, am čhjujcquiztan cjujchilla apakžinača”, cjicanajo?

⁵ Ana zum kuzziz žoñimča amqui. Am persun čhjujcquiztan pajk cjujchi apakalla. Nekztan zuma cherasača, y nižaza am jilž čhjujcquiztan cjujchilla apakasača.

⁶ Yoozquin criichi žoñinaca, ančhucqui Yooz taku anapan nonz pecñi žoñinacžtan Yooz puntu ana paljayaquiča. Ninacaqui pacunacažtakazza. Nižta žoñinacaqui ančhucaltan ch'atñi pacužtakaz cjesača. Nižaza nii Yooz taku anapan nonz pecñi žoñinacaqui cuchinacažtakazza. Yooz puntu nonžcu, kuzquizkaz žawjča.

YOOZQUIN MAYIZIZQUI

⁷ Jesusaqui tjaajinchizakazza:

–Yooz Ejpžquiztan mayaquiž niiqui, Yooz Ejpqui tjaaquiča. Nižaza Yoozquin kjuraquiž niiqui, Yooz wachaquiča. Nižaza kjuy zanzuiztan t'oc t'ocaquiž niiqui, cjetžintaž cjequiča.

⁸ Jequit mayačhaja, risiwaquicha. Nižaza jequit Yoozquin kjuračhaja, wachaquiča. Nižaza jequit kjuy zanzuiztan t'oc t'ocačhaja, cjetžintaž cjequiča. Jalla nužuča Yoozquiz mayizizqui.

⁹ Anaž jakziltami ančuca majch t'anta mayanaqui maz chjalznasača.

¹⁰ Nižaza anaž jakziltami ančuca majch ch'iz mayanaqui zkora chjalznasača.

¹¹ Ančhucqui ana zum kuzziz cjenami zuma cusasanaca tjayinčhucča persun maatinacžquiz. Jaziqui ančuca arajpach Yooz Ejpqui mayñi maatinacžquiz juc'ant zumaž tjaasača.

¹² Jaknužt ančhucqui parti žoñinaca ančhucatan zuma munaziz pecčhaj niiqui, jalla nižtapacha parti žoñinacžtan zuma munaziz waquiziča ančhucqui. Jalla niipan Moisés liiquiz chiichiča, nižaza Yooz cuntiquiztan chiiñi profetanacaž cijrtanacami.

ZKOZ JICZ, PAL JICZ

¹³ Jesusaqui tjaajinchizakazza:

–Yoozquin ojkz pecčhaj niiqui, zkoz zanzuiztan luzza. Infiernuquin ojkñi jicz palača, nižaza pal zanchizza. Jalla nijwecchuc ojkñi žoñinacaqui muzpača.

¹⁴ Tsjiic zakaz žejlča. Arajpachquin ojkñi jicz zkozača, nižaza zkoz zanallchizza. Nižaza c'ujlcullača arajpachquin ojkñi jiczqui. Jalla nii jiczquinaqui koluckaz žoñi ojkča.

KAMAÑQUIZTAN PAJTA CJESACHA ZOÑINACAQUI

¹⁵ Jesusaqui tjaajinchizakazza:

–Ančhucqui zumpacha cwitasaquiča toscar taku chiichiiñi žoñinacžquiztanami. Jalla ninacaqui “Yooziž tjaata taku chiyučha” cjiñizakazza. Ninacaqui ančucaquiz tjonža, tsjii uuzi zkizi tjutžta kitižtakaz. Ninacž kuzqui anawira zumača.

¹⁶ Ninacž ana zuma kamañquiztan pajtaž cjequiča, ultimu ana zum žoñinacaqui. Tsjii ch'ap muntiqui uwas frutchiz anaž cjesača. Nižaza tsjii

ch'ap plantaqui higo frutchiz anaž cjesača. Jalla nižtapanča ana zum kuzziz žoñinaca. Zuma kamañchizqui anapanž cjesača.

¹⁷ Tjapa zuma muntinacaqui zuma fruta pookñiča. Nižaza tjapa ana zuma muntinacaqui ana zuma fruta pookñiča.

¹⁸ Zuma muntiqui anapanž ana zuma frutchiz cjesača. Nižaza ana zuma muntiqui anapanž zuma frutchiz cjesača.

¹⁹ Jakzilta muntit zuma fruta ana pookzaja, k'atžtaž cjequiča nižaza ujtaž cjequiča.

²⁰ Jalla nižtanacquiztan ančhucqui ana zum kuzziz žoñinaca pajaquiča, ninacaž ana zuma kamañquiztan.

ANA YOOZ WAJTQUIN OJKŃI ZOŃI

²¹ Jesusaqui tjaajinchizakazza:

—Yekjap žoñinacaqui wejtquiz “wejt Jiliri, wejt Jiliri” paljayča. Pero nuž chiicanami, anaž wejt arajpach Ejpž mantuquiz kamaquiž niiqui, anapanž arajpach wajtquin okasača, nižaza anapanž arajpach Yooz Ejpž mantuquiz želasača.

²² Ultim žoñi pjalz tjuñquiziqui wacchi žoñinacaqui wejtquiz paljayaquiča, tuž cjican: “Wejt Jiliri, wejt Jiliri, am tjuu aynakcan Yooz taku paljaychinča, nižaza am tjuu chiican zajranaca chjatkatchinča, nižaza am tjuu aynakcan wacchi milajrunaca paachinča”. Jalla nuž cjican wejtquiz paljayaquiča.

²³ Jalla nuž paljaytiquiztanami wejrqui cjeeča, “Ančhuc anawira pajchinla pero. Wejtquiztan zaraka. Ančhucča ana zuma paañinacaqui”.

PIZC PUNTA ZOŃINACAQUI

²⁴ Jesusaqui tjaajinchizakazza:

—Jakziltami weriž chiita taku nonžaja, nižaza weriž chiita tawk jaru kamčhaja, jalla niiqui zuma intintazñi žoñinacača. Intintazñi žoñiqui jalla tužuča. Tsjii maz lum juntuñ kjuya kjuyča.

²⁵ Nekztanaqui chijñi chijinčiča. Nekztan puj kjazqui walja tsijtchiča, nižaza pjatziča, nižaza tjamiqui walja tjamchiča nii kjuya quintra. Pero nii chijñimi, tjamimi, kjazmi ana nii maz juntuñ kjuyta kjuyaqui pali atchiča.

²⁶ Jaziqui jakziltami weriž chiita taku nonzcanpacha ana wejt tawk jaru kamčhaja, jalla niiqui zumzu žoñiča. Zumzu žoñiqui jalla tužuča. Ana zuma yokallquiz pjil yok juntuñ kjuya kjuyčiča.

²⁷ Nekztanaqui chijñi chijinčiča. Jalla nekztan puj kjazqui walja tsijtchiča, nižaza pjatziča, nižaza walja tjamchiča nii kjuya quintra. Jalla nekztanaqui nii pjil yok juntuñ kjuyta kjuyaqui muzpa tsucchuca pajlziča.

²⁸ Jesusaž jalla nuž tjaajñi žeržtan, nonžñi žoñinacaqui walja ispantichiča niž tjaajintiquiztan.

²⁹ Jesusaqui walja zizñi zizñi tjaajinčiča. Lii tjaajñi maestrunacaqui ana nižta tjaajñitača.

8

MOJKCHI JANCHICHIZ LAA ZOŃI CHJETINTA

¹ Jalla nekztanaqui Jesusaqui curquiztan chjijwžquichiča. Nižaza muzpa žoñinaca apziča.

² Tsjii mojkchi janchichiz laa žoñiqui Jesusižquiz macjatžquichiča. Jesusiž yujcquiz quillžcu, tuž cjichiča:

—Wejt Jiliri, tii laaquiztanž čhjetnalla. Am wejr čhjetinzim pecchaj niiqui, wejr čhjetinzim atča.

³ Jalla nekztanaqui Jesusaqui kjaržtan lanžcan, tuž cjichiča:

—Wejr am čjetnasachiya. Čjetintam cjissa.

Jesusaž jalla nuž chiitiquiztan, nii mojkchi janchichiz žoñiqui laaquiztan žejtchi quirchiča.

⁴ Nekztanaqui Jesusaqui niižquin chiižinchiča, tuž cjican:

—Wejr am tsjii cjesača. Jalla tii čjetintiquiztanaqui anam jeczquizimi maznaquiča. Timpluquin oka. Jalla nicju timplu jiliržquin persunpacha tjeežca, žejtchi, jalla nii. Nižaza Moisés mantita ofrenda tjaaquiča, tjapa žoñinaca zizajo, laaquiztan čjetinta, jalla nii.

TSJII CHJETINTAQUI

⁵ Jalla nekztanaqui Jesusaqui Capernaum cjita watja luzziča. Jalla nuž luzan tsjii roman sultat capitán jiliri qui niižquin macjatžquichiča. Nekztanaqui roct'ichiča,

⁶ tuž cjican:

—Wejt Jiliri, kjuyquiz wejt piyuna ajpzquiz žejlča, ana tsijtñi. Nižaza walja ana wali ayiñča.

⁷ Nekztanaqui Jesusaqui cjichiča:

—Nii čjetñi okasača.

⁸ Nii sultat capitán jiliri qui kjaaziča, tuž cjican:

—Wejt Jiliri, anal wejt kjuyquiz am tjonžca cjiyi atasača. Wejrqui amquiztan inakaztča. Jaziqui takukaz chiya čjetinzjapa. Nekztan wejt piyunaqui čjetinta cjequiča.

⁹ Wejrpacha wejt pajk jilirž mantuquiz želuča. Niiž mantitacama ojk-layiñča. Nižaza wejt mantuquiz sultatunaca žejlča, čjulut wejr mantučhaja, jalla nuž cjen zultatunaca ojkča. Nižaza zultatu kjawznučhaja, zakaz tjonča. Nižaza wejt piyuna čjulu paajumi mantučhaja, zakaz paacha.

¹⁰ Jalla nuž nonžcu, Jesusaqui nii jiliri ancha zuma kuzziz naychiča. Nekztanaqui nuž nayžcu Jesusaqui niiž apzñinaczquiz cjichiča:

—Wejrqui wereral cjiwča. Chekapan tii žoñiqui juc'ant Yoozquin kuzzizza, tjapa Israel wajtchiz žoñinaczquiztanami.

¹¹ Nižaza wejrqui cjiwča, tuwantan tajatan muzpa žoñinacaqui tjon-aquiča, arajpach Yooz wajtquin luzjapa. Jalla nii Yooz wajtchiz žoñinacaqui Abrahamžtan, Isaacžtan, Jacobžtan, jalla ninacžtan juntupacha cuntintuž cjequiča.

¹² Israel žoñinacazti arajpach Yooz wajtquin žejlchucatača. Pero Yooz wajt zawntan zumchiquiz chjatkattaž cjequiča. Jalla nicjuž kaaquiča, nižaza ižke jojcan želaquiča.

¹³ Jalla nekztanaqui Jesusaqui capitán jiliržquiz tuž cjichiča:

—Am kjuya oka. Jaknužt am tjapa kuztan criiçhaja, jalla nižtapachaž cjequiča.

Jalla nii orapacha niiž piyunaqui žejtchi quirchiča.

ZOÑINACA CHJETINTA

¹⁴ Nekztanaqui Jesusaqui Pedruž kjuya ojkchiča. Jalla nicju ajpzquiz Pedruž ajmuž maa cherchiča ch'ujlñi conžtan laa cjichi.

¹⁵ Naaža kjara lanžinchiča. Nuž lanztiquiztan nii ch'ujlñi conquiztan žejtchinča. Nii orapacha žaažcu, ninaca atinti kallantichinča.

¹⁶ Nii čjetinta quintu nonžcu tjuñiž kattan muzpa zajraž tanta žoñinaca Jesusižquiz zijctatača. Jesusaqui tsjii taku chiižcu zajranaca chjatkatchiča. Nižaza tjapa laanaca čjetinchiča.

17 Nii čhjetintanacaqui Isaías profetaž chiita taku cumplissiča. Isaíasqui cjiŕchiča tuž cjican: “Tsjii žoñiqui učum laa curpunaca tjupi cjiskataquiča, nižaza conanacquiztan učum čhjetnaquiča”.

JESUCRISTUZZAN CHICA OJKLAYZ PUNTU

18 Wiruñiqui tsjii noojiqui muzpa žoñinacaqui walja muytata Jesusižquiz ajcziča. Jalla nižta cheržcu, Jesusaqui mantichiča, kotž tsjii latuquiztan okajo.

19 Jalla nekztanaqui tsjii lii tjaajiñi maestruqui Jesusižquiz macjatžquichiča, tuž cjican:

—Tjaajiñi Maestro, jakzitchum okačhaja, amtan chicapachal ojklayasača.

20 Jesusaqui nižquin kjaaziča, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

21 Tsjiiqui nižquiz apzñi žoñinacžquiztan zakaz paljaychiča, tuž cjican:

—Wejt Jiliri, amtan chica ojklayasača. Pero wejt ejpča ticziqui. Nekztan iyal wejt ejp tjatsñi okaž cjeella.

22 Jesusaqui kjaaziča, tuž cjican:

—Wejttan chicaka am ojklaya. Ticzižtakaz žoñinacaqui, jalla ninacaj ticzinaca tjažlani.

JESUSAQUI TJAMIMI KJAZ LJOJKIMI MANTICHA

23 Jalla nuž chiyžcu Jesusaqui warcuquiz luzziča. Niiž tjaajinta žoñinacaqui luzzizakazza.

24 Ninacaž kotquiz okan, tjamiqui walja tjamichiča. Jalla nuž tjaman kjaz ljojkiqui warcu tjananz pecatča. Jesusazti tjajatča.

25 Nii kjaz ljojkiž cjen tjaajinta žoñinacaqui Jesusa žinchiča, tuž cjican:

—¡Wejt Jiliri! ¡Liwriyalla! Tii warcu kjazquiz julzmayača. Ticznačhani učumqui.

26 Jesusaqui kjaaziča, tuž cjican:

—¿Kjažtiquiztan ančhucqui ancha tsuctsucjo? Ančhucqui anača wejtquin tjapa kuzziz.

Jalla nekztan Jesusaqui žaažcu, tjamimi kjaz ljojkiimi ujziča. Jalla nuž čhiitiquiztan tjamimi kjaz ljojkiimi apaltichiča.

27 Nii apaltiñi cheržcu nižtan ojklayñi žoñinacaqui ispantichiča, nižaza tuž cjichiča:

—¿Čhjul žoñit teejo? Tjamimi tii kot kjaz ljojkiimiž tiiž chiita takukaz cazla.

ZAJRAZ TANTA ŽOÑINACA

28 Nii kotž nawjctuñtan irantižcu, Jesusaqui Gadara cjita yokquin ulanchiča. Ulantan pucultan žoñinacaqui campu santuquiztan tjonchiča. Nii pucultan žoñinacaqui zajraž tantatača walja ana walinacatača, žoñinacžtan kichasñipanikaztača. Jalla nižtiquiztan nii jiczquiz ana jecmi ojklayñitača.

29 Jesusižquiz macjatžcu nii zajranacaž tanta žoñinacaqui kjawchiča, tuž cjican:

—¿Kjažtiquiztan wejtnacaquiz mitisejo? Ima casticz timpu irantižcan amqui tekz tjonchamča, wejrnaca sufriskatzjapa. ¿Kjažtatajo? —Nuž cjican kjawchiča.

30 Nižaza nii nawjkchuc cuchinacaqui ojklayča lujlcan.

31 Zajranacaqui Jesusižquiz rocchiča tuž cjican:

—Amqui wejrnaca chjatkataquiž niiqui, nii cuchinacžquin wejrnaca luzkatalla.

³² Jalla nekztanaqui Jesusaqui cjichiča:

–Nižtaqui, oka. Cuchinacžquin luzca.

Jalla nuž chiitiquiztan zajranacaqui zoñinacžquiztan ulanchiča; cuchinacžquin luzziča. Zajranacaž luztiquiztan cuchinacaqui tsjii barranc k'awquin tjojtsiča, kotquizpachatača. Jalla nužquiz kjaztan tsamžcu, ticziča nii cuchinacaqui.

³³ Jalla nii cuchi itzñinacaqui ancha tsucchi zajtchiča. Watja irantižcu, nii pucultan zajraž tanta zoñinacž puntuquiztan quint'ichiča, nižaza tjapa nižta watchinacami.

³⁴ Jalla nii quintu nonžcu tjapa nii wajtquiz žejlñi zoñinacaqui ulanchiča, jakziquin Jesusa želatčhaja, nicju. Jesusižtan zalžcu, ninacaqui rocchiča, ninacž yokquiztan okajo.

9

ZUCH ZOÑI CHJETINTA

¹ Jalla niž wiruñpachaqui Jesusaqui wilta warcuquiz luzziča. Nekztan kotž tsjii latuquiztan kajkchiča. Nižaza niž persun watja irantichiča.

² Jalla nijwc zoñinacaqui Jesusižquin tsjii zuch zoñi chjitchiča. Tjajz zquitinacžtanpacha ajpchi chjitchiča. Ninacž tjapa kuz cjicjiñi cheržcu, Jesusaqui laa zoñžquiz paljaychiča, tuž cjican:

–Jila, ana llaquisa; tjup kuzziz cjee. Am ujnacac pertuntača.

³ Jalla nižta chiiñi nonžcu yekjap lii tjaajiñi maestrunacaqui kuzquiz tuž pinsichiča: “Yooz quintrala; tii zoñž takuqui anawalipanla”.

⁴ Pero Jesusaqui ninacž kuzquiz pinsita zizatča. Jalla nekztan ninacžquiz cjichiča:

–¿Kjažtiquiztan ančhucqui nižta ana zuma pinsamintuchiztajo?

⁵ ¿Jakzilta takut pjasila chiiz cjesajo? ¿“Am ujnaca pertuntača” chiiz pjasila cjesaya? Už ¿“Tsijsna, oka”, jalla nuž chiiz pjasila cjesaj?

⁶ Tsewctan cuchanžquita Yooz Zoñtča wejrqui. Tii muntuquiz jiliritča, ujnaca pertunzjapami. Razunal chiyuča. Nuž zizjapa, ančhucqui tiiž chera.

Jalla nekztanaqui nii zuch zoñžquiz cjichiča:

–Tsijsna, am tjajz zquiti apta; nižaza am kjuya oka.

⁷ Jalla nii orapacha tsijsiča, nižaza niž kjuya ojkchiča.

⁸ Zoñinaca nii cheržcu, tsucchi quirchiča, nižaza “Yoozqui honorchiz cjilalla” cjican chiichiča. Yoozqui zoñinacžquiz nižta chjetinñi azi tjaachiž cjen, nuž chiichiča.

MATEO KJAWZTA

⁹ Nii kjuyquiztan ulanžcu Jesusaqui Mateo cjita zoñi cherchiča. Mateoqui impuesto cobriñi puestuquiz julzi želatča. Jesusaqui nižquiz cjichiča:

–Wejttan chica ojklaya.

Jalla nekztan Mateoqui tsijtsu, Jesusižtan ojkchiča.

¹⁰ Niž wiruñ Jesusaž Mateož kjuyquin lulan, muzpa impuesto cobriñinacami nižaza ujchiz zoñinacami irantichiča. Nižaza ninacaqui Jesusižtan niž tjaajinta zoñinacžtan chica julziča tsjii mizquiz.

¹¹ Fariseo zoñinacazti jalla nii cheržcu, Jesusiž tjaajinta zoñinacžquiz pewcziča, tuž cjican:

–¿Kjažtiquiztan ančuca tjaajiñi maestruqui impuesto cobriñinacžtan nižaza ujchiz zoñinacžtan čhjeri lujljo?

¹² Jesusaqui jalla nižta pewczñi nonžcu ninacžquiz cjichiča:

–Zuma wiw zoñinacaqui anaž medicu kullñimi pecča. Antiz laa zoñinacž medicu kullñimi pecča.

¹³ Yooz takuqui tuž cjiča: “Oksni kuzziz žoñinaca juc'antil pecučha wilana jawkni žoñinaczquiztan”. Tantiya čjul puntut tii Yooz taku chiičhaja, nii zumpacha intintaza. Jaziqi wejrqui “Zuma kamuča” cjiči žoñinaczquiz anal kjawsni tjonchinča. Antiz “Ujchizpanča” cjiči žoñinaczquiz kjawsni tjonchinča, ninacz kuz campiita cjisjapa.

AYUNAS PUNTU

¹⁴ Juan Bautistaž tjaajinta žoñinacaqui Jesusižquiz macjatžquichiča. Nekztan pewcziča, tuž cjican:

–Wejrnacmi fariseo žoñinacami walja ayunasińča. Amiž tjaajinta žoñinacazti ana ayunasniapanla. ¿Kjažtiquiztan nižtajo?

¹⁵ Nekztanaqui Jesusaqui kjaaziča, tuž cjican:

–¿Kjažt weriž tjaajinta žoñinaca llaquit kuzziz ayunasasajo, weriž želanpachajo? Wejrqui zalz kazzi tjowažtakaztča. Ninacaqui zalz pjiistiquiz invittanacažtakazza. Zalz kazzi tjowaž želan, niž zalz pjiistiquiz invittanacaqui ana llaquit kuzziz ayunasasača. Pero tsjii timpuž tjonaciča. Jalla nii timpuquiz zalzni tjowa kjańtaž cjequiča; jalla nekztanž ayunasasača.

¹⁶ ‘Anaž jakziltami tsjel zquiti ew rimintužtan rimintasacha. Ew rimintuqui jaljtapasacha, nižaza nii ach zquitiqui juc'anti wjajržcu tsjelan-nasacha.

¹⁷ Nižaza anaž jakziltami ach zkiz luuzquiz ew vinu alznasacha. Jalla nižtaž alznasaž niiqui, zkiz luuz panž wjajrskatasacha ew vinuqui. Nekztan vinumi zkiz luuzmi pertisnasacha. Ew vinu ew zkiz luuzquiz panž alznasacha. Jalla nuž zumpacha cjesacha vinumi zkiz luuzmi.

JESUCRISTUCHA LAA ZOÑI CHJETINÑIQUI

¹⁸ Jesusaž tjaajnan, tsjii judío žoñinacz jiliriqi irantichiča. Jesusiž yujquin quillziča, tuž cjican:

–Wejt majtqui ticznil jičha. Amqui wejt kjuya okasaž niiqui, naaquiz am persun kjaržtan lanznasacha. Nekztan naaqui žetaquiča.

¹⁹ Nekztanaqui Jesusaqui tsijsu nii jiliržtan ojkchiča tjaajinta žoñinacztanpacha.

²⁰ Jalla nuž okan, tsjaa laa maatak žonqui Jesusižquiz wirquiztan macjatžquichinča. Tunca paan wata ljok tjawksni laakaz t'akjiri želintača. Jesusižquiz macjatžcu Jesusiž zquit puntallquiz lanzinča.

²¹ Ima macjatcan pinsichinča, “Wejrqui niž zquitilla lanžcu žetaka wejrqui” cjican.

²² Jalla nuž lanztiquiztan Jesusaqui jalla naaža kjutni kjutžcu naa maatak žoñ cherziča. Nekztan tuž cjichiča:

–Cullaca, tjup kuzziz cjee. Amiž tjapa kuztan criichiž cjen, žejtchi cjis-samča.

Jalla nii orapacha žejtchin cjissinča.

²³ Jalla nekztanaqui Jesusaqui tira ojkchiča. Nii jilirž kjuya irantican Jesusaqui cherchiča, nii jilirž majt tjazjapa banda pjujñinacaqui listutakalča, jalla nii. Nižaza žoñinacaqui ančaž kaacan aranchiča.

²⁴ Nuž cheržcu Jesusaqui ninaczquiz cjichiča:

–Ančhucqui tekztanž ulna. Taa uzqui anača ticzinqu, antiz tjaičha.

Jalla nuž Jesusiž chiitiquiztan, žoñinacaqui nižquin tjassiča.

²⁵ Nekztanaqui Jesusaqui ninaca ulanskatchipanča. Nekztan luzcu, naaža ticzi uza kjarcu tanžcu, žinziča; žejtchinpacha.

²⁶ Jalla nekztanaqui tjapa kjutni nii yokquin nii milajru quintu ojkchiča.

ZUR ZOÑINACA CHJETINTA

²⁷ Jalla nijwctan ulanžquitiqiztan pucultan zur zoñinacaqui nižquin apžquichiča, kjawcan:

–Davidž majchmaatqiztan tjoñi, wejrnača okznalla, –cjican.

²⁸ Nekztan Jesusaž kjuya luztan nii zur zoñinacaqui nižquin macjatchiča. Nekztan Jesusaqui ninacžquiz pewcziča, tuž cjican:

–Wejrqui ančhuc cherkatasacha, ¿jalla nii crii ančhucya?

Ninacaqui kjaaziča, tuž cjican:

–Wejt jiliri, criyuča.

²⁹ Jalla nekztanaqui Jesusaqui ninacž čhujqui lanlanžinchiča. Nižaza cjichiča:

–Ančhucaž tjapa kuztan criitiquiztan cherñi cjisna.

³⁰ Nii orapacha ninacž čhujquiqui cherñi cjissiča. Nekztanaqui Jesusaqui ninacžquiz zumpacha chiižinchiča, tuž cjican:

–Tii čhjetintaqui anaj jecmi zizla; ančhucmi anaž jecžquizimi chichiyaquiča.

³¹ Jesusaž nuž chiižinchiž cjenami, ninacaqui ulanžcu, tjapa yokaran nii čhjetinta quintu parličiča.

ANA CHIIÑI ZOÑI CHJETINTA

³² Nii kjuyquiztan ulnan yekjap zoñinacaqui tsjii zajraž tanta zoñi zjičhiča. Zajraž tantiquiztan ana chiiñi atatča.

³³ Nekztanaqui Jesusaqui nii zajra chjatkatchiča. Jalla nuž chjatkattiquiztan nii ana chiiñi zoñiqui chiyi kallantichiča. Zoñinacazti jalla nii cheržcu walja ispantichi cjissiča, tuž cjican:

–Tii Israel yokquiz ana wira tižtanaca cheriñtača wejrnacqui.

³⁴ Pero fariseo nžoñinacazti tuž cjetča:

–Tiiqui zajranacž jilirž aztankaz zajranaca chjatkatñiča.

³⁵ Jesusaqui tjapa wajtquiztan watja nižaza jochquiztan jochi ojklaychiča, judío ajcz kjuyquizimi tjaajincan. Yooz mantuquiz kamz puntu chiižinchiča. Nižaza tjapaman laanacami nižaza jallc'a curpuchiznacami čhjetinchiča.

³⁶ Zoñinaca cheržcu, ninaca okziča. Ana awatirchiz uzanacažtakaz želatča.

³⁷ Zoñinaca okzcu, Jesusaqui niž tjaajinta zoñinacžquiz paljaychiča, tuž cjican:

–Wereral cjiwča. Zkalaqui walja žejlča. Pero zkala ajžñi zoñinacača upaqui.

³⁸ Yooz Ejpqui zkal Patrunača. Jalla nižtiqiztan Yooz Patrunžquiztan mayiza, zkala ajžñi zoñi cuchnajo.

10*TUNCAPAN APOSTOLONACA ILLZTA*

¹ Jalla nekztanaqui Jesusaqui niž tuncapan illzta zoñinaca kjawziča. Nekztan ninacžquiz mantiz poder tjaachiča, zajranaca chjatkatzjapa, nižaza tjapaman laanacami jallc'a curpuchiznacami čhjetnajo.

² Nii tuncapan illzta apostolonacaqui jalla tižta tjuuchiznacatača: Primiruqui Simonatača, nižaza niž tsjii tjuuqui Pedro cjitazakaztača. Nekztan niž lajkača, Andrés cjita. Nekztan Jacobotača, nižaza niž jila Juan. Nii pucultanaqui Zebedeož majchwichtača.

³ Nekztan Felipitača, Bartolometača, Tomastača, nižaza Mateotača. Nii Mateozti impuesto cobriñitača. Nekztan Jacobotača, Alfeož majchtača. Nekztan Lebeotača nižaza niiz tsjii tjuuqui Tadeo cjitzakaztača.

⁴ Nekztan Simonatača, niiqui cananista cjita partiquiztantača. Ulimquiziqui Judas Iscariotetača, jalla niiqui Jesusiž quintra tarasunchiča.

ILLZTA ZOÑINACA CUCHANTA

⁵ Jesusaqui nii tuncapan illzta zoñinaca cuchanzquichiča, niiz cuntiquiztan ojklajajo. Ima cuchanzcan tuž chiižinchiča:

–Judío yokquinpanž ojklayaquiča, Samaria yokquin nižaza yekja yokanacquin ana ojklayaquiča.

⁶ Israel wajtchiz zoñinaczquinkaz okaquiča. Jalla ninacaqui katchi uuzinacažtakaz žejlča.

⁷ Arajpach Yooz mantuquiz kamz timpu žcatžinžquiča. Jalla nii paljaycan ojklajžcaquiča.

⁸ Nižaza laanaca čhjetnaquiča. Nižaza ticzinaca jacatatskataquiča. Nižaza mojkchi janchichiz zoñinaca čhjetnaquiča. Nižaza zajranaca chjatkataquiča. Tii mantiz poderaqui ančhucacqui nužukaz tjaatača. Jalla nižtiquiztan tii poderžtan zoñinaczquiz yanapžcu anaž čhjulumi mayaquiča pacajo.

⁹ Paaz ana chjichaquiča, kor paazmi, chiw paazmi, cobre paazmi.

¹⁰ Nižaza ana chjichaquiča žak quelzmi. Tsjii almilla alaja chjichaquiča. Nižaza ana iya čhjulumi chjichasača, ana yekja čhjatami, nižaza atsmi. Yooztajapa langzñinaczquiziqui čhjeriqui tjaata cjis waquiziča.

¹¹ Ančhucqui wajtquizimi jochquizimi irantižcuqui, zuma zoñipanž kjurznaquiča. Nuž zuma zoñi wachcuqui, niiz kjuyquiz alujasaquiča, nii wajtquiztanami jochquiztanami ulanzcama.

¹² Tsjii kjuya luzcu, tsaanaquiča, “Ančhuc walipaj cjila”, cjican.

¹³ Nii kjuychiz zoñinaca zumažlaj niiqui, jalla ninacztaqui walipanž cjequiča. Yekjapa zoñinacaqui ana zumažlaj niiqui, jalla ninacztaqui čhjulumi anawalikaz cjequiča.

¹⁴ Jakziltat ančhuc ana risiwaquiž niiqui, nižaza ančhuc ana nonz pecaquiž niiqui, ninaczquiztan okaquiž ančhucqui. Nii kjuyquiztan ulnaquiča nižaza nii wajtquiztanaqui. Nekztan nii wajtquiztan kjojchquiz žcatchi pulpunaca tsajt tsajtsnaquiča. Jalla nii tsajt tsajttaqui siñalaž cjequiča ninacz quintra, ančhuc ana risiwchiž cjen.

¹⁵ Weraral cjiwčha. Casticz tjuñquiziqui nii ančhuc ana zuma risiwñi zoñinaczti juc'anti castictaž cjequiča, Sodoma cjita Gomorra cjita, jalla nii wajtchiz zoñinaczquiztan.

CHJAAWJKATÑINACA ZELAQUICHA

¹⁶ Jesusaqui tjaajinchizakazza:

–Tii weriž chiižinta taku nonžna. Wejrqui ančhuc cuchnuča. Ančhucqui kitinacz taypiquiz ojklayaquiča, uuzanacažtakaz. Jalla nižtiquiztan ančhucqui walja kuzziz cjee. Listuž cjequiča žkoražtakaz, pero zuma paazjapa.

¹⁷ Ančhucqui persunpachaž walja cwitazaquiča. Ančhucqui jilirinaczquin intirjita cjequiča; nižaza ajcz kjuyquiz wjajttaž cjequiča.

¹⁸ Nižaza ančhucqui wejt puntuquiztan parličiž cjen chjichtaž cjequiča prefectonaczquinami, nižaza tsjan chawjc jilirinaczquinami. Nekztan ančhucqui wejt puntuquiztan chiyacquiča, nii jilirinacz yujcquizimi, nižaza ana judío wajtchiz zoñinacz yujcquizimi.

19 Jilirinacžquiz intirjitaž cjenami, ana kuz turwaysi cjequiča, čjulut ančhuc kjaaznačhaja, nižaza jaknužt kjaaznačhaja, jalla nii. Jilirinacž yujcquiz prisintiz ora, Yoozqui ančhuca kuzquiz chiiz taku tjaaquiča, jaknužt chiizalaj, nii.

20 Ančhuca persun kuzquiztan anaž chiyaquiča. Antiz ančhuca Yooz Ejpž Espiritu Santuqui ančhuc chiikataquiča.

21 'Nii timpuquiziqui žoñinacaqui persun jilž quintra aptjapznaquiča persun jila conkatzjapa. Nižaza ejpnacaqui persun maatinacž quintra aptjapznaquiča. Maatinacazti persun maa ejpnacž quintra zakaz aptjapznaquiča, persun ejpnaca conkatzjapa.

22 Tjapa ana criichi žoñinacaqui ančhucaquiz ch'aanaquiča wejt puntu parliñiž cjen. Pero jakziltat ticzama wali tjurt'iñi kuzziz cječhaj niiqui, liwriitaž cjequiča, Yooztan wiñaya kamzjapa.

23 Tsjii wajtchiz žoñinacaqui ančhuc chjatkataquiž niiqui, ninacžquiztan yekja wajtquin okaquiča. Weraral cjiwčha, wejrqui arajpachquiztan cuchanžquita Zoñtčha. Ima weriž tii muntuquiz wilita tjonan, ančhucqui tjapa Israel watjanacžquin anaž iranti atasacha.

24 'Tjaajinta žoñiqui niiz tjaajiñižquiztan anaž juc'anti cjesača. Nižaza piyunaqui niiz patrunžquiztan anaž juc'anti cjesača.

25 Tsjii tjaajinta žoñiqui niiz tjaajiñiž irata, jalla nižta tjaajiñiž cjisnaquiž niiqui, cuntintuž cjis waquiziča. Nižaza tsjii piyunaqui niiz patrunž irata, jalla nižta patrunaž cjisnaquiž niiqui, cuntintuž cjis waquiziča. Nonžna ančhucqui, quintra žoñinacaqui "Beelzebú" cjican zajra jilirž tjuužtan wejtquiz tjuuskataquiž niiqui, ančhucaquiz juc'ant anawal tjuužtanž tjuuskataquiča. Wejrqui kjuychiz patrunžtakaztčha, ančhuczti wejt kjuy familiažtakazza.

26 'Jalla nižtiquiztan ančhucqui anaž žoñi eksna. Tjapa chjozakuñ tjaajintami zuma kjana ziztaž cjequiča. Nižaza tjapa jamazit tjaajintami nižtazakaz zuma kjana ziztapankaz cjequiča.

27 Tjapa weriž chjozaka tjaajintanacami ančhucqui žoñinacž yujcquiz kjanacama paljayaquiča. Nižaza tjapa weriž jamazit tjaajintanacami ančhucqui paljayaquiča, tjapa žoñinaca nonzjapa.

28 Nonžna ančhucqui, anača eksqui tii curpu alaja conñinacžquizimi. Ninacaqui animuqui anaž conasača. Antiz Yoozquizpan eksna. Jalla niičha curpumi animumi infiernuquin wiñaya t'akjisiskatñiqui.

29 'Tsjii paaztan pizc wežlanaca kjayasača. Jalla nuž koluc valorchiz kjayžcumí ančhuca Yooz Ejpqui ninaca cwitiča. Yooz Ejpž ana munan, tsjii wežlaqui anaž ticznasača.

30 Jilanaca, Yooz Ejpqui tjapa ančhuca ach charanaca kanžintača.

31 Jalla nižtiquiztan anaž čjulquiztanami eksna. Wežlanacžquiztan ančhucčha juc'ant valorchizqui. Yooz Ejpqui ančhuc juc'anti cwitaquiča wežlanacžquiztan.

32 'Jakziltat parti žoñž yujcquiz wejt favora cječhaj niiqui, nižazakal wejrqui wejt arajpach Yooz Ejpž yujcquiz nii žoñž favora chiyača.

33 Nižaza jakziltat parti žoñž yujcquiz wejr ana pajñi nicačhaj niiqui, nižaza wejrqui wejt arajpach Yooz Ejpž yujcquiz nii žoñž quintra ana pajñi zakal chiyača.

34 'Tii taku nonžna. Weriž tjontiquiztan žoñinacaqui ana zumquin cjequiča; quintrasñi cjequiča. Nekztan aptjapznaquiča. Ana criichinacaqui criichi žoñinacž quintra cjequiča.

³⁵ Weriž tjontiquiztan tsjii maatiqui persun ejpžjapa quintraž cjequiča. Nižaza tsjaa majtqui persun maajapa quintra cjequiča. Nižaza tsjaa wazmi persun kjan maajapa quintra cjequiča.

³⁶ Jalla nižta zapa mayni familianacaqui ninacporaž quintraž cjequiča.

³⁷ Jakziltat persun maa ejpžquizkaz kuzziz cječhaja, jalla niiqui anaž wejt partiquiz cjichuca cjesača. Nižaza jakziltat persun ocjalžquizkaz kayazt'ačhaja, jalla niiqui anaž wejt partiquiz cjichuca cjesača.

³⁸ Jakziltat wejt partiquiz cjis pecčhaj niiqui, tjapa kuztanž wejtquiz cjistanča. Sufrijsapaqui listoj cjila, ticzcama. Ana nižta wejtquin tjapa kuztan cječhaj niiqui, anaž wejt partiquiz cjichuca cjesača.

³⁹ Jakziltat weriž cjen persun anazum kamañquiztan ana jaytačhaja, jalla niiqui ultimquiziqui ana liwriita cjesača. Nižaza jakziltat weriž cjen persun anazum kamañquiztan jaytačhaja, jalla niiqui ultimquiziqui liwriitaž cjequiča; Yooztan wiñaya zuma kamaquiča.

⁴⁰ Jequit ančhuc risiwčhaja, nižaza wejrmi zakaz risiwča. Nižaza jequit wejr risiwčhaja, jalla niiqui nižazakaz wejt Yooz Ejpmi risiwča.

⁴¹ Jequit tsjii Yooziž cuchanta profeta risiwaquiz niiqui, jalla niiqui profetažtakaz honorchiz zakaz cjequiča. Nižaza jequit tsjii Yooz kuzcama kamñi žoñi risiwačhaja, jalla niiqui Yooz kuzcama kamñiž premio, jalla nižtazakaz honorchiz cjequiča.

⁴² Nižaza jequit tsjii wejtquin kuzziz žoñžquiz yanapačhaja, jalla niiqui honorchiz zakaz cjequiča. Jequit wejtquin criichi žoñžquiz tsjii tasa kjaz onačhaja, jalla niiqui honorchiz zakaz cjequiča. —Jalla nuž chiichiča Jesusaqui.

11

JUAN BAUTISTAZ CUCHANZQUITA ZOŇI

¹ Niiž tuncapan illzta žoñinacžquiz tjaajinz žeržcu, nekztan Jesusaqui ojkičiča, yekja watjanac kjutñi. Wajtquiztan watja ojklayčiča, žoñinacžquiz tjaajñi, nižaza Yooz taku paljayi.

² Juanqui nii oraqui carsilquiztača. Jalla nicju Cristuž ojklaytanaca quintu nončiča. Nekztanaqui Juanqui tsjii kjažt mazinaca Jesusa pewczñi cuchanžquichiča. Nekztan irantižcu Jesusižquiz

³ pewczičha, tuž cjican:

—Cristuqui tjoniž cjispača; ¿Amj Yoozquiztan cuchanžquita Cristumkaya? ¿Už yekjaž tjewznasa, jaa?

⁴ Jesusaqui ninacžquiz kjaaziča, tuž cjican:

—Jaknužt cherčhaja nonžaja, jalla nii tjappachaž Juanžquiz quint'ižcaquiča ančhucqui.

⁵ Zur žoñinacac cherča, Zuch žoñinacaqui ojklayča. Mojkchi janchichiz žoñinacaqui čhetintača. Oñi žoñinacaqui nonža. Nižaza ticzi žoñinacaqui jacatatskattača. Nižaza pobre žoñinacžquiz Yooz liwriiñi taku paljaytanča.

⁶ Jakziltat weriž paatanaca cheržcu, nižaza weriž chiitanaca nonžcu, ana kuz turwayzižlaj niiqui, walipanikaz cjequiča.

JUAN BAUTISTA PUNTU

⁷⁻⁸ Jalla ninacaž ojktan, Jesusaqui chiyi kallantichiča Juanž puntuquiztan. Žoñinacžquiz tuž cjichiča:

—Ch'ekti yokquin, ¿chjulu chertzni ojkchinchuctaya? ¿Tjamiž tjizinta caña chertzni ojkchinchuctajo? Anačhay. ¿Fino zquiti cujtchi žoñi chertzni ojkchinchuctajo? Chawjc jilirž kjuyquin zuma zquiti cujtchi žoñi žejlča. Jalla nii zizza ančhucqui.

⁹ ¿Chjulu chertzni ojkchinchuctaya? ¿Yooz cuntiquiztan chiiñi profeta chertzni ojkchinchuctaya? Jesalla, ultim werara nuž ojkchinchucča. Juanqui tuquita profetanacžquiztan juc'ant chekanča.

¹⁰ Juanž puntuquiztan Yooz takuqui tuž cjiča:

“Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristu zuma tjewskataquiča”.

¹¹ Weraral cjiwča. Juan Bautistača parti žoñž maatinacžquiztan tsjan juc'antiqui. Pero chjul Yooz maatimi žoñž maatiquiztan tsjan juc'antiča. Arajpach Yoozquin kuzziz žoñinacača Yooz maatinacaqui.

¹² Juanž tjontiquiztan anzcama muzpa žoñinacaqui ts'acjazcan arajpach Yooz mantuquiz luz pecča; walja tjapa aztan nižaza tjapa kuztan luz pecča.

¹³ Juanž tjonzcama, tjapa tuquita profetanacž chiitanacami nižaza Moisés liinacami arajpach Yooz cuchanžquita puntuquiztan chiiča.

¹⁴ Elías cjita profetaqui wilta tjoniž cjispacha; nii Elias tjonz cuntiquiztanča Juan Bautistaqui. Jalla niic werarača. Nuž criiz waquiziča.

¹⁵ Jakziltačhalaj nonzñi cjunčhiz, jalla niiqui tii chiitaqui nonžna.

¹⁶ ¿Kjažtat tii timpuquiz žejlñi žoñinacajo? ¿Jecnaca iratat tinacajo? Jalla tižta ocjalanacažtakazza tinacaqui. Yekjap ocjalanacaqui palazquin julzi uzinča, nižaza ninacž mazinaca kjawkjawža, tuž cjican:

¹⁷ “Tsajstjapa pincallu pjujchinča. Ančhuczi ana tsajtchinchucča. Nižaza kaayikaayi wirzu itzinča. Ančhuczi ana kaachinčhucča”. Jalla nuž cjichiča ocjalanacaqui. Jalla nižta iratača tii timpuquiz žejlñi žoñinacaqui.

¹⁸ Juan tjonchiča. Niiqui zumanaca ana lujlñiča, nižaza ana licñiča. Jalla nižtiquiztan ančhucqui tuž cjiñchucča, “Juanqui zajraž tantača” cjican.

¹⁹ Niiž wiruñiqui wejrqui tjonchinča, arajpach Yooz Ejpž cuchanžquita Zoñi. Wejrqui zumanaca luluča, nižaza licuča. Jalla nižtiquiztan ančhucqui wejt puntuquiztan cjiča: “Niiča ancha lujlñiqui, nižaza licñiqui, nižaza niiča ujchiz žoñinacž maziqi, nižaza anawali impuesto cobriñinacž maziqi”. Jalla nuž cjiñchucča wejt puntuquiztan. Tuž zakal cjiwča: Yooz puntu zuma zizñi žoñinacaqui Yooz tjaa jintacama kamča.

ANA YOOZQUIN KUZZIZ ZOÑINACA

²⁰ Jalla nekztanaqui Jesusaqui chiichiča, chojru kuzziz žoñinacž puntu. Tsjii watjanacquiz ancha milajrunaca paachiča. Pero nii wajtchiz žoñinacazti persun uj ana pajchiča; nižaza kuznaca ana campiichiča. Jalla nižtiquiztan Jesusaqui ninacžquiz ayjatchiča, tuž cjican:

²¹ —Corazín wajtchiz žoñinaca, ančhucacquiz ancha anawaliž wataquiča. Nižaza Betsaida wajtchiz žoñinaca, ančhucacquiz ancha anawalizakaz wataquiča. Ančhucac watjanacquiziqui walja milajrunaca paachinča. Tiro cjita nižaza Sidón cjita watjanacquiz nii milajrunaca paataž cjitasaz niiqui, nii ortanpacha nii wajtchiz žoñinacaqui Yoozquin kuzziz cjitasacha; nižaza “ujchizpanča wejrnaqui, pertunalla”, cjitasacha. Nižaza uj zint'ižcu nii wajtchiz žoñinacaqui llaquita kuz kjanapacha tjeežñi cjitasacha, lutu zquiti cujtžcu, nižaza achquiz kjupžtan tjajlžcu.

²² Jalla nižtiquiztan ančhucqui juyzu casticz tjuñquiziqui juc'anti castictaž cjequiča nii Tiro cjita nižaza Sidón cjita watjanacchiz žoñinacžquiztan.

²³ Capernaum wajtchiz žoñinaca, ¿kjažtiquiztan ančhucqui pinsejo, “Yoozqui učhum honorchiz cjizkataquiča”, cjicanajo? Anaž nuž cjesača. Pero ančhuczi kozzuc tjojtaž cjequiča infiernuquin sufrisjapa, ujchiz žoñinacžtan chica. Ančuca wajtquiziqui walja milajrunaca paachinča. Sodoma cjita wajtquiz nii milajrunaca paataž cjitasaj niiqui, nii watjaqui anz tii tjuñinaca žejltašača.

²⁴ Jalla nižtiquiztan nii juyzu casticz tjuñquiziqui ančhucqui juc'anti castictaž cjequiča, Sodoma wajtchiz žoñinacžquiztan.

YOOZQUIN KUZZIZ ZOÑINACA

²⁵ Jalla nii orazakaz Jesusaqui chiichiča:

—Wejt Yooz Tata, amqui honorchizam cjilalla. Arajpachquin žejlñinacami tii muntuquiz žejlñinacami amča mantiñamqui. Amqui humilde žoñinacžquiz chjozaka tjaajinta tjezamča. Zizñi žoñinacžquizimi intintazñi žoñinacžquizimi nii chjozaka tjaajintanacami ana zizkatchamča.

²⁶ Yooz Tata, amiž muntaqui nužuča.

²⁷ Yooz Tata, tjapa amiž ziztanacaqui wejtquiz tjaajinchamča. Ultimquiziqui anaž jecmi wejr am Majch zumpacha pajča. Am alaja wejr zumpacha pajča. Nižaza anaž jecmi am Yooz Ejp zumpacha pajča. Wejr alaja am zuma pajuča. Nižaza jakziltižquiz wejrqui zizkatz pecachaja, jalla ninacazakaz am zuma pajasača.

²⁸ Ančhucqui jakziltat ana zumanacquiztan otchižlaj niiqui, wejtquizza macjatžca. Nižaza jakziltat persun aztan Yooz watja irantiz otchižlaj niiqui, wejtquizza macjatžca. Weril ančucaquiz jeejzkatača.

²⁹ Wejrqui pasinsis kuzziztča, nižaza humilde kuzziztča. Jalla nižtiquiztan weriž tjaata kamaña catoka; nižaza wejt puntuquiztan zizñi cjee. Nekztan persun kuz jeejz wachaquiča.

³⁰ Weriž tjaata kamañaqui anača ch'ama, nižaza wejt manta paazqui cježakazza.

12

JEEJZ TJUÑI QUINTU

¹ Tsji jeejz tjuñquiziqui Jesusaqui niž tjaajinta žoñinacžtan čhjecta zkalanac taypiranž okatča. Tjaajinta žoñinacaqui čhjeri eeckatchičha. Nekztan ninacaqui tric oz chjojlunaca kjajpžcu, triculučičha.

² Fariseo žoñinacaqui jalla nižta paañi cheržcu, Jesusižquiz cjichiča:

—Chera, tii amiž tjaajinta žoñinacaqui trabajla. Jeejz tjuñquiziqui nižta trabajzqui učhum lii quintrala. —Jalla nuž chiican ujchiz jwes pecatča.

³ Nekztanaqui Jesusaqui ninacžquiz kjaaziča, tuž cjican:

—Ančhucqui tuž liichinčhucča, ¿anajaa? Chjeri eeczanaqui David cjita žoñiqui niž mazinacžtan tižta paachiča.

⁴ Niiqui Yooz timpluquin luzcu Yooz yujcquin nonžta t'antanaca lujlčiča. Čhjul žoñimi anapantača permitta nii t'antac lujlziči. Lii quintrala niiqui. Timplu jilirinacapankaz lulasča. Pero nii Davidzti lujlčipanča. Nižaza niž mazinacaqui nii t'anta lujlchizakazza.

⁵ Nižaza Moisés liiquiz tižta liichinčhucž, ¿ana jaa? Jeejz tjuñquiziqui timplu jilirinacaqui ana jeejžla. Jalla nuž ana jeejztiquiztanaqui, ninacžtajapa anaž ujchiz cjesača.

⁶ Ančucaquiz cjiwča. Tekz tsjičiča timpluquiztan juc'ant chekanaqui.

7 Nižaza ančhucqui cjiirta Yooz taku ana intintazzinčhucča. Yooz taku tuž cjiča: “Wejrqui wilana jawkñi žoñinaca anal pecuča. Okzñi kuzziz žoñinacapan pecuča”. Tii Yooz taku intintaztasaz niiqui, anaž ančhucqui tii žoñinaca ujchiz jwes pectasača. Tii žoñinacaqui jaziqui anaž uj paača.

8 Wejrqui tsewctan cuchanžquita Yooz Zoñtča. Wejrpanikal jeez tjuñquizimi mantasača.

KJARA KJONCHI ZOÑI CHJETINTA

9 Jalla nekztanaqui najwcchuc ojkžcu judío ajcz kjuyquiz luzziča.

10 Jalla nicju tsjii žoñi želatča kjara kjonchi. Tsjii quintra žoñinacaqui uj jwesjapa Jesusižquiz pewcziča tuž cjican:

—¿Jeez tjuñquiziqui žoñi čhjetinz cjesaya, už anapan cjesaj? nuž cjican pewcziča.

11 Jesusaqui ninaczquiz kjaaziča tuž cjican:

—Jeez tjuñquiziqui uuzac tujquiz tjojtsiž cjesaž niiqui, ¿kjaža ančhuczti tujquiztan uuzac joožni ana okasajo?

12 Pero žoñiqui uuzižquiztan juc'antiž walča. Jalla nižtiquiztan jeez tjuñquizimi anača lii quintra zuma paazqui.

13 Jalla nekztanaqui Jesusaqui laa žoñžquiz cjichiča:

—Am kjara zjijca.

Nekztan žejtchi cjissiča, nii tsjii kjara wiwuž nižtapacha.

14 Jalla nekztanaqui fariseo žoñinacaqui ulanžcu, Jesusiž conzjapa kazziča.

15 Jalla nii zizcu Jesusaqui najwcchuc ojkchiča. Nižaza muzpa žoñinacaqui Jesusižquiz apziča. Jesusaqui tjapa nii apžni laanaca čhjetinčiča.

16 Nekztan ninaczquiz mantichiča, ana jeczquizimi Jesusiž čhjetinñi puntuquiztan parlajo, nii.

PROFETAŽ CHIITA TAKU CUMPLITA

17 Jalla nižta ojklaycan, Jesusaqui Isaiás profetaž cjiirta taku nužquiz cumplissiča. Yoozqui Isaiasquiz tuž cjiirkatchiča:

18 “Jalla tiiča weriž illzta žoñiqui, weriž mantitacama ojklayni žoñi. Jalla nižquin kayazt'uča. Niiž cjen cuntintutča wejrqui. Jalla nuž cjiča Yoozqui. Wejt Espiritu Santuqui niž kuzquiz cjequiča. Niiqui yekja watjanacchiz žoñinaczquin Yooz liwriiñi taku paljayaquiča.

19 Žoñinaczquizimi ana ch'aanaquiča, nižaza ana kjawaquiča. Calliran alto joržtan ana paljayaquiča.

20 Tsjii tjuwanta cañami anaž kjolaquiča. Nižaza ch'aman asni michami anaž tjesaquiča, niž ultimpacha legal mantiz tjuñicama.

21 Niiž cjen yekja watjanacchiz žoñinacaqui zuma liwriiz tjuñi tjewznaquiča”.

Jalla nuž Jesusiž puntuquiztan Yooz takuqui cjiča.

JESUSIZ QUINTRA CHIICHA

22 Jalla nekztanaqui tsjii laa žoñiqui Jesusižquin chjichtatača. Nii žoñiqui zajraž tantaž cjen zuratača, nižaza ana chiiñitača. Jesusaqui nii žoñi čhjetinčiča. Jalla nižtiquiztan cherñi chiiñi cjissiča.

23 Jalla nuž čhjetintiquiztan tjapa žoñinacaqui ispantichiča tuž cjican:

—¿Tiiž Davidž majchmajtquiztan tjonni cjesaya? ¿Tiipan Cristo cjesaya?

24 Nii nonžcu fariseo žoñinacaqui tuž cjichiča:

—Tiiqui ana wal žoñikalala. Zajranacz Beelzebú jilirž aztankaz yekja zajranaca chjatkatča.

²⁵ Jesusaqui ninacž pinsitanaca zizziča, jalla nižtiquiztan ninacžquiz cjichiča:

–Jakzilta nacionamiž partira partira t'akznaquiž niiqui, nižaza t'aka t'aka kichasaquiž niiqui, k'ala tjatantaž cjequiča. Tsjii watjamiž nižaza tsjii kjuya familiamiž nižta t'aka t'aka cjisnaquiž niiqui, anaž tjurasacha.

²⁶ Jalla nižta irata Satanás diabluqui persun partira chjatkattasaž niiqui, niipacha t'akztasacha. Jalla nuž t'akžtiquiztan niž mantiz azi anaž tjurasacha.

²⁷ Ančhucqui wejt puntuquiztan cjiñčhucča, “Beelzebú diabluž aztan zajranaca chjatkatča”. Jalla nuž cjiñčhucča. Jalla nužuzlaj niiqui, ¿ject ančuca partira žoñinacžquiz azi tjaazjo, zajranaca chjatkatzjapajo? Jalla nižtiquiztan kjanapachaž wejt puntuquiztan tsjii kjutni chiichinčhucča, nii.

²⁸ Wejrzi Yooz Espiritu Santuž aztan zajranaca chjatkatiñča. Jalla niicž cjiča, Yooz mantiz timpu ančucaquiz žcatžinžquiča, nii.

²⁹ ‘Tsjilla cjesacha. Anaž jecmi tsjii azziz žoñž kjuyquiziqui luzi atasacha; nižaza anaž niž kinakunacami jwesi atasacha, ima čhejlcanaqui. Nii čhejlžcu, nekztan tjapa kinakunaca jwesi luzasacha.

³⁰ ‘Jecchalaj ana wejt favora, niiqui wejt quintrača. Nižaza jequit wejtan chica Yooz kjutni žoñinaca ana macjatskatčaja, jalla niiqui žoñinacaž Yoozquiztan tirkatča.

³¹ ‘Jazic ančucaquiz chiyuča, tuž cjican: tjapa ujnacami nižaza tjapa ana zum takunacami pertuntaž cjesacha. Pero jakzilta žoñit Yooz Espiritu Santuž quintra chiyachaj niiqui, anaž pertuntaž cjesacha. Nii žoñiqui wiñaya ujchiz cjequiča.

³² Jakzilta žoñit wejt quintra chiyachaj niiqui, pertuntaž cjesacha. Pero jakzilta žoñit Yooz Espiritu Santuž quintra chiyachaj niiqui, anaž pertuntaž cjequiča. Nii žoñiqui wiñaya ujchiz cjequiča; anawira pertuntaž cjequiča.

FRUTANAC PUNTU

³³ Nekztan Jesusaqui tjaajinchiča, tuž cjican:

–Zuma muntizlaj niiqui, zuma frutaž pookča. Nižaza ana zuma muntizlaj niiqui, ana zuma frutaž pookča. Jalla nižtiquiztan muntiqui niž frutquiztan pajza, zuma ana zuma, jalla nii.

³⁴ Zkoražtakaz ančhucqui, ana zum žoñčhucča. ¿Kjažža ančhucqui zumanaca chiyasajo? Ančuca kuzquiz pinsitaqui ana zuma parijula. Jaziqui ančhucča anazumanacapan chiiñinacaqui.

³⁵ Tsjii zuma žoñiqui zuma chiiča, niž zuma kuzquiztan. Nizaza tsjii ana zum žoñizti ana zumapaž chiiča, niž ana zuma kuzquiztan. Jaknužt kuzquiz pinsičhaja, jalla nuž chiiča žoñinacami.

³⁶ Ančucaquiz cjiwča, juyzu casticz tjuñquiziqui zapa mayni cwinta tjaastanča, tjapa ana zuma chiitanacami.

³⁷ Ančucaž chiitiquiztan jama jusjitaž cjequiča, ujchiz cječhaja, ana ujchiz cječhaja, nuž.

ANA CRIICHI ŽOÑINACA

³⁸ Jalla nekztanaqui yekjap fariseo žoñinacaqui lii tjaajiñi maestruncžtan Jesusižquiz cjichiča:

–Maestro, am milajru paañi chertz pecuča.

³⁹ Jesusaqui ninacžquiz kjaaziča tuž cjican:

–Ana zum žoñinacčhucča. Ana Yoozquin kuzziz žoñinacčhucča. ¿Kjažt tsjii milajru mayča, zinalažtakaz? Jonáz cjita profetž zinala, niikaz ančucaquiz tjaata cjequiča.

⁴⁰ Jonasqui pajk ch'iz pjuchquiz žejlchiča čhjep majžtan čhjep aramžtan. Jalla nižta irata wejrqui tii yok koztan kamača čhjep majžtan čhjep aramžtan.

⁴¹ Juyzu tjuñquiziqui, jalla nii casticz tjuñquiziqui Nínive wajtchiz žoñinacaqui jacatataquiča. Nekztan ninacaqui tii timpuquiz kamñi žoñinacž uj tjeeskataquiča. Jonás Yooz taku paljaytiquiztan ninacaqui Yoozquin kuzziz cjissiča. Pero wejrtča Jonasquiztan juc'ant chekanaqui. Tii timpuquiz kamñi žoñinacazti anaž Yoozquin kuz tjaača.

⁴² Nižaza casticz tjuñquiziqui tsjaa waruta maatak jilirqui jacatataquiča. Nekztan naaqui tii timpuquiz kamñi žoñinacž uj tjeeskataquiča. Naaqui najwka yokquiztan tjonchinča Salomonžtan zali, nižaza niž zuma razunchiz taku nonžni. Pero tejcz wejrtča Salomonquiztan tsjan juc'ant chekanaqui. Pero tii timpuquiz kamñi žoñinacazti wejt taku anaž nonz pecča.

ZAJRA PUNTU

⁴³ 'Tsjii zakal quint'asača. Tsjii zajraqui žoñžquiztan ulanžcu kjoñ yokaran ojklayñitača, jeejzjapa kjurcan. Ana jeejz watžcuqui, kuzquiz pinsichiča, tuž cjican:

⁴⁴ “Jaziqui wejr quepaka jakziquiztan ulanzquitučhaja, jalla nicju”. Jalla nuž quejpžcu nii žoñžtan wilta zalchiča. Nii žoñiqui pewžta kjuyažtakaztača, cuza žcayi, azquitžta, pero laachitača.

⁴⁵ Jalla nuž zaltiquiztan nii zajraqui pakallak juc'ant anawali zajranaca zji-jqui ojkiča. Zajranaca zjičžcu, tjappacha nii žoñž kuzquiz luzziča. Jalla nižtiquiztan nii žoñiqui juc'ant ana waliž cjissiča tuquita kamzquiztan. Jalla nižta irata tii ana zum žoñinacžquiz wataquiča. —Jalla nuž quint'ichiča Jesusaqui.

JESUSIZ FAMILIA

⁴⁶ Jesusaqui iyapanž žoninacžquiz chiyatča. Jalla nuž chiyan niž maaqui lajknacžtan irantižquichiča. Žoñinacž tjiiquin želan, nižtan parlis pecatča.

⁴⁷ Tsjii žoñiqui Jesusižquiz mazziča, tuž cjican:

—Am maa lajknacžtanpacha tii tjiiquiz žejlča. Am kjawž, amtanž parlis pecča.

⁴⁸ Jesusaqui mazni žoñžquiz kjaaziča, tuž cjican:

—¿Ject wejt maaya? ¿Ject wejt jilanacaya?

⁴⁹ Jalla nuž chižžcu tjaažinta žoñinacž kjutni kjaržtan tjeziča, nižaza cjichiča:

—Tinacača wejt maami, wejt jilanacami.

⁵⁰ Jecnacami wejt arajpach Yooz Ejpž kuzcama kamčhaja, jalla ninacača wejt jilanacami, wejt cullaquinacami, wejt maami.

13

ZKALA CHJACZ QUINTU

¹ Nii noojpacha Jesusaqui kjuyquiztan ulanchiča. Kot kjutni ojžžcu kot atquiz julziča.

² Jakziquin nii želatčhaja, jalla nicju žoñinacaqui walja ajcziča. Jalla nižtiquiztan tjaažinzjapa tsjii warcuquiz luzziča. Nekz julziča. Tjappacha žoñinacaqui kot at tjiiquiz žejlchiča.

³ Jalla nekztanaqui Jesusaqui žoñinacžquiz walja Yooz puntunaca tjaažinchiča, tjapaman quintunacžtan. Jalla nuž tjaažincan tuž cjichiča:

—Tsjii žoñiqui zkal čhjaqui tewcchiča.

⁴ Zkala čhjaccan, parti simillaqui jicz latuquiz tjojtsičha. Nekztan wežlakaz nii simillac ilziqui.

⁵ Parti simillazti maz yokaran tjojtsičha. Nekziqui anaž wacchi pjila želatčha. Nekztan koloculla pjila želan ratulla jeczīčha.

⁶ Jalla nuž jecztiquiztan sii kjakiqi ujchičha; koluc sep'allchiztačha nekztan. Ratulla kjonchičha.

⁷ Parti simillazti ch'ap ch'ap yokaran tjojtsičha. Ch'apinacakazza ancha pajkchiqui, nižaza atipchiqui.

⁸ Parti simillazti zuma yokquiz tjojtsičha. Nekztan zuma pookchičha. Yekjap simillaqui patac čhjerchiz zapa zkal ozquiz pookchičha; nižaza yekjap simillaqui sojta tuncan čhjerchiz zapa zkal ozquiz pookchičha; yekjap simillaqui quinsa tuncan čhjerchiz pookchičha.

⁹ Jakziltažlaja nonzñi cjuñchiz niiqui, nonžla.

¹⁰ Jalla nekztanaqui tjaajinta žoñinacaqui Jesusižquiz macjatchičha, nižaza pewczičha, tuž cjican:

—¿Kjažtiquiztan am nižta quintunacžtankaz žoñinacžquiz tjaajinya?

¹¹ Jesusaqui kjaazičha tuž cjican:

—Arajpach Yooz mantuquiz kamz puntuquiztan ch'aman intintazzuca quintunacžtan tjaajnučha. Ančhucaquizkaz Yoozqui zizkatz munčha nii puntunacquiztanaqui. Parti žoñinacžquiziqui Yoozqui ana zizkatz munčha.

¹² Jequit zizačhaja, jalla nižquiziqui juc'ant tjaajinz tjaataž cjequičha. Nekztan zumpacha zizñiž cjequičha. Jequit ana zizačhaja, jalla niž kuzquiztan kjañtaž cjequičha nii ana intintaztanacaqui.

¹³ Jalla nižtiquiztan wejrqui tižta quintunacžtan paljajučha. Parti žoñinacaqui weriž paata cheržcumī ana cherchižtakaz cjissa. Nižaza weriž chiita taku nonžcumī, ana nonzñižtakaz tucčha; ana intintazñi žoñinacačha ninacaqui.

¹⁴ Jalla nižta cjissiž cjen, Isaías profetž taku cumplissa. Jalla tuž Isaiasqui cjiirchičha:

“Ančhucqui nonznaquičha. Nonžcu, ana intintazaquičha. Nižazaž cher-aquičha. Cheržcu, anaž tantiyasaquičha.

¹⁵ Tii žoñinacž kuznacaqui chojru cjissičha; ana zumaž nonža. Nižaza čhjucchiz cjenami ana cherzñi atčha, zur žoñižtakaz. Jalla nuž cjisnaquičha, ana cherzñi cjisjapa, nižaza ana nonzñi cjisjapa, nižaza ana kuzquiz intintiñi cjisjapa, nižaza ana wejtquin macjatzjapa. Ana wejtquin tjontiquiztan, ana liwriita cjesačha”.

¹⁶ ‘Ančhucčha cuntintu. Ančhucqui cherzñi žoñinacčhucčha. Nižaza nonzñi žoñinacčhucčha. Ančhucčha Yooziž wintižtaqui.

¹⁷ Weraral cjiwčha. Wacchi profetanacami nižaza zuma kuzziz žoñinacami ančhucaž chertanaca cherz zakaz pecatčha. Pero ana cherchičha. Nižaza ančhucaž nonžtanaca nonz zakaz pecatčha. Pero ana nonzičha. Ančhuczi cherchinčhucčha, nižaza nonzinčhucčha.

¹⁸ Jazic ančhucž nonžnalla. Jalla tuž cjičha nii zkala čhjacz quintuqui.

¹⁹ Nii jicz latuquiz tjojtsi simillaqui jalla tižta žoñinacačha. Ninacaqui arajpach Yooz mantuquiz kamz puntuquiztan nonzcanpacha, ana intintazza. Diabluqui ninacž kuzquiz tjonžcu, ninacaž intintazta kjañčha.

²⁰ Nižaza nii maz yokquiz tjojtsi simillaqui jalla tižta žoñinacačha. Ninacaqui Yooz taku nonžcu nii ora cuntintuž nonža; cuntintuž catokčha.

²¹ Pero ninacaqui ana tjapa kuztan catoktiquiztan zkoluc zep'ichiz zkalažtakazza. Jalla nižtiquiztan ana tjuraquičha. Yooz taku criičiž cjen,

sufraquiča; nižaza chjaawjkattaž cjequiča. Jalla nekztan orallaž quejpsnaquiča.

²² Nižaza nii ch'ap yokquiz tjojtsi simillaqui jalla tižta žoñinacača. Ninacaqui Yooz taku nonžcu, catokča. Pero nekztan juc'anti kuz tjaača tii muntu cusasanacquiz. Wali jiru kamzpanž pecča. Persun kuzquiz pec-tiquiztanaqui Yooz taku tjažta ninacž kuzquiz. Jaziqui ana zuma kamča; ana pookñi zkalažtakaz kamča.

²³ Nižaza nii zum yokquiz tjojtsi simillaqui jalla tižta žoñinacača. Ninacaqui Yooz taku nonžcu, zuma tjapa kuz catokča; zuma intintiča. Jalla nižtiquiztan zuma kamañchiz cjissa, zuma pookchi zkalažtakaz. Nii zuma pookñi žoñinacaqui zuma kamañchizpanž cjissa, jaknužt tsjii simillaqui patac čhjerchiz, sojta tunc čhjerchiz, quinsa tunc čhjerchiz pookčhaja, jalla nižtača.

ANA WAL PASTU QUINTU

²⁴ Tsjii quintužtan quint'ichiča Jesusaqui, tuž cjican:

–Arajpach mantiñi Yooz puntuqui jalla tužuča. Tsjii žoñiqui zuma similla čhjacchiča zkal yokquiz.

²⁵ Tjapa niž kjuychiz žoñinacž tjajan, tsjii quintra žoñiqui tjonchiča. Nekztan zkalquiz ana wal pastunaca čhjacchiča. Jalla nuž ana wal čhjaczcu, ojkchiča.

²⁶ Nii tric zkala jecztan, chicapacha pajkchiča nii ana wal pastunacaqui. Nižaza pizcpacha pookchiča.

²⁷ Jalla nii cheržcu, nii piyunanacaqui patrunžquin mazñi ojkchiča. Niižquin mazziča, tuž cjican: “Wejt Patruna, amiž čhjacta simillaqui zumažlaj niiqui, ¿jakziquiztan tii ana wal simillanaca pajkchitaya?”

²⁸ Patrunaqui kjaaziča, tuž cjican: “Tsji quintra žoñiqui nižta paačhani”. Jalla nekztanaqui piyunanacaqui pewcziča tuž cjican: “¿Wejrnacqui nii ana wal pastunaca k'achasaya?”

²⁹ Nii patrunaqui cjichiča: “Ana k'achaquiča. Ana wal pastu k'achcan yekjap tricžtanpachaž k'achnasača.

³⁰ Antiz pizcpacha pajkla, kujich timpu tjonzcama. Jalla nekztan wejt piyunacnacaqui cuchantaž cjequiča. Ninacaqui anawal pastunaca ricujaquiča. Nekztan kojchquiz čhejlznaquiča ujjjapa. Jalla nekztanaqui tricuz ricujžcu, wejt tiric yaaz kjuyquiz majcznaquiča”.

³¹ Nižaza Jesusaqui tsjii puntuzakaz quint'ichiča, tuž cjican:

–Arajpach Yooz mantiz puntuqui tužuča. Tsjii žoñiqui niž yokquiz mostas similla čhjacchiča.

³² Mostas simillaqui parti simillquiztan juc'ant zkoltallača. Jalla nuž cjenami pajkžcuqui tjapa zkalanacquiztan tsjan pakjiča. Pajk muntižtakaz cjissa. Nekztan wežlanacaqui nii mostas munti itzquiz tjuraž tjacñiž tjonča.

LIWATUR QUINTU

³³ Jesusaqui tsjii quint'ichizakazza, tuž cjican:

–Arajpach Yooz mantiz puntuqui jalla tužuča. Tsjaa maatak žonqui čhjep medida tupžcu nii liwatura jac'uquiz utchinča; nižaza t'ajzinča, tjapa nii t'anti maza tsijtkatzjapa.

³⁴ Tjapa tjaajintanacami quintunacžtan paljaytatača. Arajpach Yooz puntuquiztan tjaajincan, Jesusaqui quintunacžtankaz tjaajinchiča.

³⁵ Jalla nuž tjaajincan, Jesusaqui tuquita profetaž chiita takuqui cumplisicha. Profetaqui jalla tuž cjjirchiča:

“Quintunacžtankaz chiyučha. Tii muntu kallantitiquiztan weriž chiita tjaajintanaca ana intintazzucača. Jalla nii ana intintaztanaca paljayučha”.

ANA WAL PASTU QUINTU INTINTAZKATTA

³⁶ Jalla nižta puntunaca chiiz žeržcu, Jesusaqui žoñinacžquiztan ojkchiča; kjuyquiz luzziča. Jalla nicju niž tjaajinta žoñinacaqui macjatchiča, tuž cjican:

–Nii zkal yokquiz čhjecta ana wal pastu, jalla nii puntuquiztan wejt-nacaquiz intintazkatalla.

³⁷ Jalla nekztanaqui Jesusaqui intintazkatchiča tuž cjican:

–Wejrqui tsewctan cuchanžquita Yooz Zoñtča. Wejrtča zuma similla čhjaciñtqui.

³⁸ Nii zkal yokaqui tii muntuča. Nii zuma zkalanacaqui cjiča, arajpach Yooz mantuquiz kamñi žoñinacača nii. Ana zuma pastunacaqui diabluz mantuquiz kamñi žoñinacača.

³⁹ Nii ana wal pastu čhjaciñimi diablupachača. Zkala ajz timpuqui tii muntu tucužinz timpuča. Nii zkala ajzñi piyunanacaqui Yooz anjilanacača.

⁴⁰ Jaknužt nii ana wal pastunaca ricujžcu, ujquin ujzjapa tjojttaž cječhaj niiqui, jalla nižta irataž wataquiča tii muntu tucužinzcan, ultim juyzuž nekz.

⁴¹ Jalla nii oraqui wejt anjilanaca cuchanžcača, tii muntuquiztan tjapa ana wal žoñinaca ricuji. Wejt anjilanacaqui tjapa ujnaca paakatñi žoñinacami, nižaza tjapa ana wali paañinacami ricujaquiča.

⁴² Jalla nuž ricujžcu, infiernuquin tjojttaž cjequiča kjakchi jurnuquiz-takaz. Jalla nekzi ančaž kaaquiča, nižaza waljaž iżke kjojnaquiča.

⁴³ Yooz kuzcama kamñi žoñinacazti arajpach Yooz wajtquiz želaquiča, tjuñižtakaz kjancan. Jakziltat nonzñi cjuñchizčhucžlaja, nonžna.

IYA QUINTUNACA

⁴⁴ Arajpach Yooz mantuquiz kamañaquei jalla tužuča. Tsjii yokquiz pajk paaz čhjojztatača. Tsjii žoñiqui nii čhjojzta paaz wajtchiča. Nii wajtžcu, wilta čhjojziča nekzpacha. Anča cuntintutača. Nekztanaqui tjapa niž cusasanaca tuyi ojkchiča. Niiž cusasanaca tjuyžcu, nii yoka kjaychiča. Jalla nužuča arajpach Yooz kamañquiz luzqui. Nii kamañaquei čhjulquiztanami juc'anti valorchizza.

⁴⁵ Nižaza arajpach Yooz mantuquiz kamañaquei tužuča. Tsjii tintichiz žoñiqui zuma valorchiz perlanaca kjayi ojkchiča.

⁴⁶ Nekztan tsjii anča zuma valorchiz perla wajtchiča. Jalla nekztanaqui tjapa niž cusasanaca tuychiča, nii perla kjayzjapa.

⁴⁷ Nižaza arajpach Yooz mantiz puntuqui tužuča. Tsjii ch'iz tanñi žoñinacaqui niž ch'iz tanz pajk kotquiz tjojtziča. Jalla nuž tjojtztiquiztan tjapaman ch'iznaca tanchiča.

⁴⁸ Nekztan ch'iz tanz chjijpztanaqui, kot at tjiiquin jwessiča. Jalla nekztanaqui ninacaqui nijwc julžcu, ch'iz pjalziča. Zuma ch'iznaca canastiquiz yaaziča. Ana zuma ch'iznacazti tjojtchiča.

⁴⁹ Jalla nižta irataž tii muntu tucužinztanaqui wataquiča. Anjilanacaqui ulanžcaquiča žoñinaca pjali, zuma žoñinaca ana zuma žoñinaca, nii.

⁵⁰ Nii ana zuma žoñinacaqui infiernuquin tjojttaž cjequiča tsjii kjakchi jurnuquiztakaz. Jalla nekzi anča kaaquiča, nižaza iżke kjojaquiča.

⁵¹ Jalla nekztanaqui Jesusaqui žoñinacžquiz pewcziča, tuž cjican: — ¿Ančhucqui tjapa tii weriž chiita quintunaca intintiya?

Nii žejlñi žoñinacaqui kjaazičha, tuž cjican:

—Wejt Jiliri, wejrnacqui intintasučha.

⁵² Nekztan Jesusaqui cjichičha:

—Tsjii lii tjaajiñi maestruqui arajpach Yooz mantuquiz cjisnaquiž niiqui, tsjii kjuya patrunažtakaz cjissa. Jalla nuž cjistiquiztan niž ziztanacquiztan zuma tjaajintanaca zizkatasučha, tuquita tjaajintami nižaza anzta tjaajintami.

⁵³ Jalla tii arajpach Yooz mantiz puntuquiztan chiiz žeržcu, jalla nekztan Jesusaqui ojkchičha, niž persun yoka.

⁵⁴ Jalla nicju irantižcu, ajcz kjuyquiz tjaajñi kallantichičha. Nii nonžñi žoñinacaqui ispantichičha tuž cjican: —¿Jakziquin tii žoñizti ancha tižtanaca zizñi cjissitajo? ¿Kjažt ancha tižta milajrunaca paasajo?

⁵⁵ Carpinterož majchkazza tiiqui. Tiiž maaqui María cjitičha. Nižaza tiž lajknacaqui Jacobočha, Josečha, Simonačha, nižaza Judassa.

⁵⁶ Nižaza tiž cullaquinacaqui učumnacžtan kamčha. Jalla nižtiquiztan, ¿jakziquin tiiqui tižtanaca zizzitajo?

⁵⁷ Jalla nižta pinsitiquiztan ninacaqui Jesusižjapa quintra cjissičha. Pero Jesusaqui ninacžquiz cjichičha:

—Persun wajtchiz žoñinacami, nižaza persun kjuychiz žoñinacami tsjii Yooziž uchta profetžquiz ana rispitcha. Parti žoñinacazti nižquiz rispitcha.

⁵⁸ Jalla nižtiquiztan nekzi ana ancha milajrunaca paachičha, nii wajtchiz žoñinacaqui Jesusižquiz ana criichiž, nekztan.

14

JUAN BAUTISTA CONTA

¹ Jalla nii oranaca Herodes cjita jiliri qui Jesusiž quintu nonchičha.

² Jalla nuž nonžcu, niž piyunanacžquiz cjichičha:

—Juan Bautistala tiiqui. Ticziquiztan jacatatchila. Jalla nižtiquiztan walja milajrunaca paazjapa poderchizlani.

³ Jalla nuž tsucchičha Herodes jiliri qui. Tuquiqui Herodesqui Juan tankatchičha. Chejlžcu carsilquin chjitchičha. Jalla nuž paachičha, niž tjunaž cjen. Niiž tjunqui Herodías cjitičha. Tuquiqui naaqui niž jilž tjuntačha. Felipe cjitatačha Herodes jilaqui.

⁴ Jalla nižta anawali zalziž cjen, Juanqui Herodižquiz chiižinchicha tuž cjican:

—Naa maatak žon anaž am tjun cjichuca. Felipež tjunčha naaqui.

⁵ Jalla nuž chiižintiquiztan Herodes Juan conz pecatčha. Pero žoñinaca eksucu ana atchičha. Tjapa žoñinacaqui Juanžquiz rispitchičha tuquita Yooz taku parliñi profetažtakaz.

⁶ Nii Herodesqui niž persun cumpleañ tjuñquiziqui pijjsta paachičha. Jalla nuž pijjsta paan, naa Herodías majtqui ulanžquichinčha, invittaž žoñinacž yujcquiz tsati. Jalla nuž tsatan ancha justassičha Herodesqui.

⁷ Zuma tsattiquiztan Herodesqui taku onzičha, tuž cjican:

—Chjulum mayčhaja, jalla nii tjaasačha.

⁸ Ima mayan maaqui mataquiz mantichinčha, Juanž acha mayzjapa. Jalla naaža maaž chiita takucama Herodesquiztan maychinčha, tuž cjican:

—Tsjii chwquiz Juan Bautistaž acha tjaalla.

⁹ Jalla nuž maytiquiztan Herodesqui llact'azzičha. Pero invittaž žoñinacž nonznan taku onzičha. Jalla nižtiquiztan naaža maytacama mantichičha.

¹⁰ Juanqui carsilquiz želatčha. Jalla nijwc cuchanchičha, Juanž acha pooti.

¹¹ Jalla nekztanaqui tsjii chuwquiz acha zjiczcucu, naaquiz tjaatatacha. Nekztan naaqui maaquinž tjaachincha.

¹² Jalla nii quintu nonžcu, Juanž tjaajinta žoñinacaqui Juanž curpu chjichi tjonchiča. Nekztanaqui nuž chjichcu niž curpu tjatziča. Jalla nuž tjatžcu, Jesusižquin mazni ojkchiča.

LUJLZ CHJERI TJAATA

¹³ Nii quintu nonžcu Jesusaqui najwk ojkchiča, ana žoñi žejlž yokquin. Warcuquiz ojkchiča. Pero žoñinacaqui nuž ojkchi quintu nonchiča. Jalla nekztanaqui ninacaqui nii yokaranpacha wajtanacquiztan ulanchiča. Jesusižquin wila zali kjojchin ojkchiča.

¹⁴ Warcuquiztan ulanžcu Jesusaqui tama žoñinaca cherchiča. Jalla nuž cheržcu niž kuzquiz sint'ichiča ninacžtajapa. Nekztan zjijcta laanaca čhjetinchiča.

¹⁵ Waj zezi cjisnan niž illzta žoñinacaqui Jesusižquin tjonchiča, tuž cjican:
–Waj zezilla. Chjeri pecča. Tii yokquiziqui anaž čhjeri žejl-la. Jalla nižtiquiztan tii žoñinaca cutzna. Okaj cjee, joch kjuyaran čhjeri kjayžcumi lulačhani tinacacni.

¹⁶ Jesusaqui ninacžquiz cjichiča:

–Anaž cuchta cjesača. Ančucaž čhjeri tjaaquiča.

¹⁷ Nekztanaqui ninacaqui kjaaziča, tuž cjican:

–Wejtnacalta ana lujlž čhjeri žejlča. Pjijska t'antalla pizc ch'iztankaz žejlča.

¹⁸ Jesusaqui ninacžquiz cjichiča:

–Nii čhjeri wejtquiz zjijca.

¹⁹ Jalla nekztanaqui Jesusaqui žoñinacžquin mantichiča, pasturan julzna cjee. Jalla nuž julzkatžcu nii pjijska t'anta nii pizc ch'iz persun kjaržtan tanziča. Tanžcu tsewcchuc arajpach kjutni cherziča, nižaza Yooz Ejpžquin gracias cjican chiichiča. Nekztanaqui t'anta kjolžcu tjaajinta žoñinacžquiz tojunchiča. Nekztan ninacaqui parti žoñinacžquin partir paychiča.

²⁰ T'antanaca ch'iznaca lujlžcu liwjpacha nii žoñinacaqui chjekchi cjissiča. Nižaza nii t'antiquiztan nii ch'iznacquiztan žejtchinacaqui tuncapan canasta chjijpi ricujtača.

²¹ Jalla nii t'anta ch'iz lujlchi žoñinacaqui pjijska warank luctakanacatača. Maatakanacami ocjalanacami ana kantatača nii oraqui.

JESUSAQUI KJAZ JUNTUÑ OJKCHA

²² Nekztanaqui Jesusaqui niž tjaajintanaca warcuquiz luzkatchiča, niž tuqui kota kakjayajo tsjii latu kotquin irantizcama. Jesusazti nii žejlni žoñinacžquiz persun kjuyquin okaj cjican nijwctan najwkchuc cuchanchiča.

²³ Jalla nuž cuchanžcu Jesusaqui curulla yawchiča, zinalla Yooz Ejpžtan parlisjapa. Jalla nuž mayizan ween cjissiča. Nicju zinatača Jesusaqui.

²⁴ Nii oraqui niž tjaajinta žoñinacaqui kotž taypiquin okatča. Tjamiqui warcuž quintra walja tjamatča. Nižaza kjaz ljojkimi warcu waljaž aytin-quiskatatča.

²⁵ Wali chawc kjantati Jesusaqui ninacžquin žcatžinchiča, kjaz juntun ojkcan.

²⁶ Niž tjaajinta žoñinacaqui, Jesusa kjaz juntun tjoñi cheržcu, ancha tsuchiča, nižaza kjawchiča, tuž cjican:

–Cuntinažlani –cjican kjawchiča.

²⁷ Pero ninacaž kjawan Jesusaqui ninacžquiz paljayžquichiča, tuž cjican:

–Tjup kuzziz cjee. Wejrpanča. Anaž tsuca.

²⁸ Nekztanaqui Pedruqui paljaychiĉha, tuž cjican:
—Wejt Jiliri, amžlaj niiqui, wejr kjawznalla kjaz juntuč ojkzjapa am iran-tiscama.

²⁹ Jesusaqui niižquiz cjichiĉha:

—Pichalla amqui.

Nekztanaqui Pedruqui warcuquiztan ulanžcu, kjaz juntuč oki kallantichiĉha, Jesusa jakziquin tjenatĉhaja, jalla nicju.

³⁰ Nii walja tjamiž cjen tsucchiĉha. Tsucžcu, kjazquiz luzi kallantichiĉha. Nekztan kjawchiĉha, tuž cjican:

—Wejt Jiliri, wejr yanapalla, wejr žejtkatalla.

³¹ Nii orapacha Jesusaqui Pedruž kjara tanzichĉha, nižaza niižquiz cjichiĉha:

—Ancha upa kuzzizamĉha amqui. ¿Kjažtiquiztan am kuz turwayskatcham-taya?

³² Ninacaž warcuquin luztan, tjamiqui zekchiĉha.

³³ Jalla nii cheržcu warcuquiz žejlŋi žoñinacaqui Jesusiž yujcquiz quillziĉha, tuž cjican:

—Chekapan werara Yooz Maatimkalala amqui.

LAANACA CHJETINTA

³⁴ Jalla nuž kota kajžcu, Genesaret cjita yoka irantichiĉha.

³⁵ Nii yokchiz žoñinacaqui Jesusa pajchiĉha. Jalla nekztan “Jesusa tekz žejlĉha”, cjican liwj nii yokaran mazmazziĉha. Nii quintu maztiquiztan tjapa laanaca zjiĉchiĉha, jakziquin Jesusa želatĉhaja, jalla nicju.

³⁶ Nii žoñinacaqui Jesusižquiz walja rocchiĉha, tuž cjican: —Am zquit puntalla mekaz lanzkatžinalla. Tjapa lanzŋi žoñinacaqui žejtchi cjissiĉha.

15

UJ PUNTU

¹ Jalla nekztanaqui tsjii kjaž fariseo žoñinacaqui nižaza tsjii kjaž lii tjaajiŋi maestruncžtanpacha Jesusižquiz macjatchiĉha. Ninacaqui Jerusalén wajtquiztan tjonchiĉha. Jesusižquiz pecunchiĉha, tuž cjican:

² —¿Kjažtiquiztan amiž tjaajintanacaqui učum tuquita atchi ejpnacž custurumpi ana cazjo? Ana kjara awjžcu, lujl-la.

³ Pero Jesusaqui ninacžquiz pewcziĉha, tuž cjican:

—Anĉhuczi, ¿kjažtiquiztan Yooz mantita lii ana cazjo? Nii lii caz cjenpacha persun custurumpinacakaz paala anĉhucqui.

⁴ Yoozqui tuž cjichiĉha: “Am maa ejpmi rispitaquiĉha”. Nižaza cjichiĉha: “Jequit persun maa ejpž quintra chjaawjkataĉhaja, jalla niiqui contaj cjila”.

⁵ Pero anĉhuczi tuž tjaajiŋĉhucĉha: Zoñiqui persun maa ejpžquin chiyasaĉha, tuž cjican: “Am anal yanapasaĉha. Tjapa wejt cusasanaca Yoozquin tjaataĉha nekztan”.

⁶ Jequit nižta chiyāĉhaj niiqui, niiž persun maa ejpžquiz anaž yanapchuca cjesaĉha. Jalla nuž tjaajincan anĉhucqui Yooz mantita ana walkatchinĉhucĉha, persun custurumpi jarukaz ojkzjapa.

⁷ Ana wal kuzziz žoñinaca. Isaías cjita profetaqui anĉhuca puntuquiztan zuma kjana cjiŋrchiĉha, tuž cjican:

⁸ “Tii žoñinacaqui atžtankaz wejtquiz rispitcha. Pero tinacž ultim kuzzti wejtquiztan ažquinĉha. Nižaza wejr anaž rispitcha.

⁹ Tinacaqui inakaz wejtquin custurumpi paĉha. Tinacž tjaajintanacaqui žoñiž mantitakazza”.

¹⁰ Jalla nekztanaqui Jesusaqui žoñinaca kjawziĉha, nižaza tuž cjichiĉha:

—Nonžna, nižaza intintazŋi kuzziz cjee.

¹¹ Anaž zawnctan kjuylchuc žoňž atquiz luzñiqui uj cjesača žoňžquiziqui. Antiz žoňž atquiztan ulanñi, jalla niž uj cjesača žoňžquiziqui.

¹² Jalla nuž chiitiquiztan Jesusiž tjaajinta žoñinacaqui nižquin macjatchiča, nižaza cjichiča:

—Nii fariseo žoñinacaqui am chiita taku nonžcu ancha žawjwatča. ¿Nii ana naychamjo?

¹³ Pero Jesusaqui ninacžquiz kjaaziča, tuž cjican:

—Jakzilta zkalat wejt arajpach Yooz Epiž ana čhjacta cječhaja, jalla nii zkalaqui zep'ižtanpacha kajlžtaž cjequiča.

¹⁴ Ninacžquiz ana chjijquiza. Ninacaqui zur žoñinacažtakazza. Yekja zuranacžquiz irpican, pucultanpacha wali ojtquiz tjojtsnasača.

¹⁵ Pedruqui Jesusižquiz cjichiča:

—Tii puntuquiztan wejtnacaquiz tjaajznalla.

¹⁶ Jesusaqui cjichiča:

—¿Ančhucqui zakaz ana intintiya?

¹⁷ Tjapa atquiz luzñi čhjeriqui pjuchquiz luzza, nekztan wir kjutñiž ulanča. ¿Jalla nii ana intintiya?

¹⁸ Pero atquiztan ulanñi chiitaqui kuzquiztan tjonča. Jalla nii žoňžquiziqui uj cjesača.

¹⁹ Kuzquiztanpanž ulanča tižtanaca, ana wali pinsisnacaqui, nižaza žoñi conzqui, nižaza adulteriuquiz ojklayzqui, nižaza yekja maatakžtan žejlzqui, nižaza cusasanaca kjañzqui, nižaza toscar taku chiizqui, nižaza ana wal taku joojoozqui.

²⁰ Jalla nižtanaca uj cjesača žoňžquiziqui. Pero ana kjara awjžcu, jalla nižta lujlžcu, anapan uj cjesača. Jalla niiqui žoňž custurumpikazza.

YOOZQUIN KUZIZ MAATAKA

²¹ Jalla nekztanaqui Jesusaqui nijwctan ojkchiča Tiro nižaza Sidón cjita yokquin.

²² Jalla nijwc želan tsjaa cananea yokchiz žoňqui Jesusižquiz tjonzinča, kjawcan:

—Wejt Jiliri. Davidž majchmajtquiztan tjonñi. Wejr oksnalla. Wejt majtqui zajraž tantača. Jalla nižtiquiztan ana wira wali laača.

²³ Jesusaqui ana čhjulumí kjaaziča. Jalla nekztan niž tjaajinta žoñinacaqui roqui tjonchiča, tuž cjican:

—Tsjiika oka cjee. Učhum wirquiz kjaw jawi apžquiča.

²⁴ Nekztanaqui Jesusaqui cjichiča:

—Yooz Ejpqui wejr cuchanžquichiča Israel wajtchiz žoñinacžquin, ninacžquinkaz. Nii Israel žoñinacaqui katchi uuzanacažtakazza.

²⁵ Pero naa maatak žoňqui macjatžquichinča, nižaza niž yujcquiz quillzinča, tuž cjican:

—Wejt Jiliri, wejr yanapt'alla.

²⁶ Nekztan Jesusaqui naaquiz cjichiča:

—Maatinacž t'anta ana kjañasača, pawcžquin tjaazjapaqui. Jalla niiqui ana wali cjesača.

²⁷ Jalla nuž chiižinta cjenami naaqui cjichinča:

—Jesalla, wejt Jiliri. Pero pacunacami patrunaž mizquiztan tjawkzi čhjerilla lujlča.

²⁸ Jalla nekztanaqui Jesusaqui cjichiča:

—Cullacalla, walja Yoozquin kuzzizamča. Jaknužum am pecčhaja, nužoj cjila.

Jalla nii orapacha naaža majtqui žejtchi cjissinča.

LAANACA CHJETINTA

²⁹ Jalla nekztanaqui Jesusaqui nijwctan ulanchiĉha, Galilea cjita kot ata watchiĉha. Nekztan tsjii curulla yawŷcu julziĉha.

³⁰ Tama ŷoñinacaqui irantiŷquichiĉha, jakziquin nii ŷelatĉhaja, jalla nicju. Ninacaqui laanaca zjijcchiĉha, zuch ŷoñinaca, zur ŷoñinaca, ana chiiñi ŷoñinaca, ĉhjojritŷta ŷoñinaca, tĵapaman laanaca, jalla ninaca zjijctataĉha, Jesusiŷ yujcquin. Jesusaqui ninaca liwj ĉhjetinchiĉha.

³¹ Jalla nuŷ cherŷcu, ŷoñinacaqui ancha ispantichiĉha. Ana chiiñi ŷoñinacaqui chiiñi cjissiĉha. ĉhjojritŷta ŷoñinacaqui ŷejtchi cjissiĉha. Zuch ŷoñinacaqui ojklayñi cjissiĉha. Zur ŷoñinacaqui cherñi cjissiĉha. Jalla nuŷ cherŷcu ŷoñinacaqui walja Yooz honora waytichiĉha, “Israel ŷoñinacŷ Yooz ancha honorchiz cjilalla”, cjican.

JESUSAQUI CHJERI TJAACHA

³² Jalla nekztanaqui Jesusaqui niŷ tĵaajinta ŷoñinaca kĵawŷcu, tuŷ cjichiĉha:

–Tii ŷoñinacŷtajapa kuzquiz anchal sint'uĉha. ĉĵep maj wejttan chica ŷejlĉha, niŷaza ana ĉĵul ĉĵerchizza. Persun kĵuyanacquin anal cutz pecuĉha ana lujlchi cĵen. Tinacaqui ana lujlchi okaquiŷ niŷqui, jiczaraniŷ tismayasacĉha.

³³ Nekztan niŷ tĵaajinta ŷoñinacaqui cjichiĉha:

–ĴJaknuŷt ĉĵeri cuncicas, tii wacchi ŷoñinacŷtajapajo? Tii yokquizic anaŷ kĵayzmi ŷejlĉha.

³⁴ Jesusaqui ninacŷquiz pewcziĉha, tuŷ cjican:

–ĴKĵaŷ t'antichizt anĉhucjo?

Ninacaqui kĵaaziĉha, tuŷ cjican:

–Pakallak t'antaĉha, niŷaza tsjii kĵaŷ ch'iznacŷtan.

³⁵ Jalla nekztan Jesusaqui nii ŷoñinacŷquiz mantichiĉha, yokquiz julznajo.

³⁶ Nekztan persun kĵarŷtan nii pakallak t'anta ch'iztanpaĉha tanzicĉha. Jalla nekztan Yoozquin gracias cjican tĵaachiĉha. Nekztan nii t'antanaca ch'iznaca kĵolkĵolziĉha. Nekztan niŷ tĵaajinta ŷoñinacŷquiz toj tojziĉha. Nekztan ninacazti partir paychiĉha nii tama ŷoñinacŷquiz.

³⁷ Tĵapa nii tama ŷoñinacazti ĉĵeri lujlŷcu ĉĵjekchi cjissiĉha. Niŷaza ŷejtchinacaqui pakallak canasta ĉĵĵipi ricujtataĉha.

³⁸ Pusi warank luctak ŷoñinacataĉha lujlchiĵui. Niŷaza nii oraqui maatakami ocjalami muzpa ŷelatĉhay, pero ana kantataĉha.

³⁹ Jalla nekztanaqui Jesusaqui nii ŷoñinacŷquiz liwj cuchanchiĉha okajo. Niimi warcuquin luzziĉha. Nekztan Magdala cjita yokquin ojkiĉha.

16**JESUSIZ QUINTRA ZOÑINACA**

¹ Fariseo ŷoñinacami, saduceo ŷoñinacami Jesusa cherzñi ojkiĉha. Jesusiŷ quintra uj jwes pecatĉha. Jalla niŷtiquiztan Jesusiŷquiztan maychiĉha, arajpach milajru tĵeeznajo, tsjii sinalaŷtakaz.

² Jesusaqui ninacŷquiz kĵaaziĉha, tuŷ cjican:

–Zezilla arajpach tsjiri ljoc cjissi cĵen, “Jakac zuma tĵuñiŷ cĵequiĉha” cĵiñĉhucĉha.

³ Niŷaza wentan tĵuñi tĵewktan arajpach tsjiri ljoc cjissi cĵenaqui, walja tsjiri cĵenaqui, “Tonĵiqui ana zum tĵuñiŷ cĵequiĉha” cĵiñĉhucĉha. Ana zum kuzziz ŷoñinaca. Anĉhucqui tsewcta tsjiri cherŷcu, zuma tĵuñi ana zuma tĵuñi cĵeĉhaja, jalla nii zumpacha zarayiñĉhucĉha. Pero anĉhucqui weriŷ paata sinalanaca cherŷcu, ana zuma zarayiñĉhucĉha.

⁴ Ana zum kuzziz žoñinacaqui Yoozquiztan zarakchiž cjen, sinala sinala mayča. Ančhucžtajapa Jonás puntuqui siñalažtakaz žejlča. Ana iya tježta cjequiča. —Jalla nuž chiižcu Jesusaqui ninacžquiztan zarakchiča.

⁵ Niiž tjaajinta žoñinacaqui kotquin tsjii latu kajkchiča. Nižaza t'anti žaka chjitz tjatstkalča.

⁶ Nekztanaqui Jesusaqui ninacžquiz cjichiča:

—Tii taku nonžna. Fariseo žoñinacž liwaturžquiztanami nižaza saduceo žoñinacž liwaturžquiztanami zumpacha cwitasaquiča.

⁷ Jalla nii chiita nonžcu, tjaajinta žoñinacaqui ninacpora parlassiča, tuž cjican:

—Učhumqui ana t'anta zjijtača, jalla nižtiquiztan nižta chiiča.

⁸ Jesusaqui ninacž pinsita zizcu, ninacžquiz paljaychiča tuž cjican:

—¿Kjažtiquiztan ančhucqui t'antiquinkaz pinsejo? Ančhucqui ancha upa kuzzizčhucča.

⁹ Anapanž ančhucqui wira intintas, ¿tižta ana cjuñzjo? Pjijska t'antiquiztan pjijska warank luctak žoñžquiz partir payžcu lujlkatchinla. Nekztan ¿kjaž canasta nii žejtchi t'antanaca ricujtataya?

¹⁰ Nižaza pakallak t'antiquiztan pusi warank luctak žoñžquiz partir payžcu lujlkatchinla. Nekztan ¿kjaž canastat nii žejtchi t'antanaca ricujtataya?

¹¹ Fariseo žoñinacž puntuquiztanami nižaza saduceo žoñinacž puntuquiztanami, jalla nii liwatur puntu chiichinča. Jalla nii chiitaqui anača ultim t'anti puntuquiztanaqui. ¿Anaž nii intintas, ančhucya?

¹² Jalla nekztanaqui ninacaqui zumpacha intintazziča. Jesusaqui ultim t'anti liwaturquiztan ana nii puntu chiižinchiča. Pero fariseož tjaajinta puntuquiztan nižaza saduceož tjaajinta puntuquiztan, jalla nii puntu chiižinchiča, jalla nii tjaajintanacquiztan cwitasaquiča, cjican.

¿JECT JESUSAQUI?

¹³ Jalla nekztanaqui Jesusaqui Cesarea de Filipo cjita yokquin ojkchiča. Nii irantižcu, niiž tjaajinta žoñinacžquiz pewczyča, tuž cjican:

—Wejrqui tsewcta cuchanžquita Yooz Zoñtča. Žoñinacaqui wejt puntuquiztan ¿kjažt cjeejo?

¹⁴ Ninacaqui kjaaziča, tuž cjican:

—Yekjapanacaqui am puntuquiztan tuž cjicha: “Juan Bautistača niiqui”. Yekjapanacaqui cjiča, “Eliassa niiqui”. Nižaza yekjapanacaqui cjiča, “Jeremiassa niiqui”. Nižaza yekjapanacaqui cjiča, “Tsjii yekja profetača niiqui”.

¹⁵ Jalla nekztanaqui Jesusaqui ninacžquiz pewczyča, tuž cjican:

—Ančhuczti wejt puntuquiztan ¿kjažzaž cjeejo?

¹⁶ Simón Pedruqui tuž cjichiča:

—Yooziž uchta Cristumča amqui, žejtñi Yooz Maatimča.

¹⁷ Jesusaqui nekztan cjichiča:

—Simón, Jonás maati, jalla nuž chiitiquiztanaqui cuntintum cjee amqui. Anaž jakzilta žoñimi amquiz nii tjaajinchiqui. Wejt arajpach Yooz Ejp-pankazza am zizkatchiqui.

¹⁸ Amquiz cjiwča. Tekztan najwkchuc amqui Pedro cjitam cjequiča. Nižaza tii maz simintuchiz wejrqui wejt icliza kjuyača. Wejt iclizaqui wejtquin kuzziz žoñinacača. Ticzmi wejt iclizquiztan ana atipasača.

¹⁹ Wejrqui amquiz llawižtakaz poder tjaača žoñinaca arajpach Yooz mantuquiz luzkatzjapa. Tii muntuquiz amqui jequit Yooz mantuquiz luzkatačhaja, jalla niiqui arajpach Yooz wajtquin luzkatta zakaz cjequiča.

Nižaza tii muntuquiz jequit Yooz mantuquiz ana luzkatačhaja, jalla niiqui arajpach Yooz wajtquin ana luzasača.

²⁰ Jalla nekztanaqui Jesusaqui niiz tjaajinta žoñinacžquiz mantichiča, tuž cjican:

–Anaž jecžquizimi maznaquiča, “Niiča Cristuqui” cjicanaqui.

JESUSAQUI NIIZ TICZ PUNTU CHIICHA

²¹ Nekztan najwkchuc Jesusaqui tjaajinta žoñinacžquiz niiz ticz puntuquiztan paljayi kallantichiča, tuž cjican:

–Wejrqui Jerusalén watja ojkstanča. Jalla nicju nii wajtchiz jilirinacami, nižaza timplu jilirinacami, nižaza lii tjaajiñi maestruncami jalla ninacaqui wejr walja sufriskataquiča. Ultimquiziqui wejr conaquiča. Jalla nuž contiquiztan čhjep majquiztan jacatatača.

²² Nekztanaqui Pedruqui Jesusa tsjii latu chjitchiča, chiižinzjapa. Chiižinžcan, tuž cjichiča:

–Wejt Jiliri, amiž nuž chiiacama Yooz Ejpqui anaj niic nuž munlalla. Amquiz anaj nižta watlalla.

²³ Jalla nuž chiiquiztan Jesusaqui Pedruž kjutñi kjutziča, tuž cjican:

–Satanás, wejtquiztan zaraka. Amqui wejr ujquiz tjojtskatz pecča. Am kuz pinsitaqui anaž Yooz pinsita, antiz žoñiž pinsitakazza.

²⁴ Jalla nekztanaqui Jesusaqui niiz tjaajinta žoñinacžquiz cjichiča:

–Jequit wejttan chica kamz pecčhaj niiqui, primiruqui persun kamañ wiraqui tjatza. Sufrijsapaqui listoj cjila, ticzama. Nekztan wejttan chicaž kamaquiča.

²⁵ Jakziltat persun kamañ wira ana tjats pecčhaj niiqui, arajpach kamañqui ana tjaataž cjequiča. Jakziltat wejt laycu persun kamañ wira tjatznačhaja, jalla niiqui arajpachquin wiñaya kamaquiča.

²⁶ Tsjii žoñiqui tjapa tii muntuquiz žejlñi cusasanaca kanasača. Pero nekztan infiernuquin okaquiz niiqui, tjapa nii kanta cusasanaca, čhjuljapat sirwejo? Inakaz cjequiča. Arajpachquin Yooztan kamzqui persun livrizqui anaž paasztanac kjayasača.

²⁷ Wejrqui tsewtan cuchanžquita Yooz Zoñtča. Tsjii noojiqui wejrqui wejt anjilanacžtan quejpžcača; wejt Ejpž wali aztan quejpžcača. Jalla nuž quejpžcu, wejrqui zapa maynižquiz tjaača, jaknužt kamčhaja, jalla nii jaru tjaača.

²⁸ Weraral cjiwča. Tsjii noojiqui wejrqui mantiz poderžtan tjonacha. Yekjap tekzi žejlñi žoñinacaqui nii noojcama ana ticznaquiča.

17

JESUSAQUI TSJEMATAZ CJISSICHA

¹ Sojta tjuñquiztan Jesusaqui Pedružtan, Jacobžtan, Juanžtan, Jacobož lajk, jalla ninaca chjitchiča. Ninacžtan alaja nuž pajk curquin ojkžcu, yawchiča.

² Jalla nicju ninacž yujcquin tsjemat chercherchiz cjissiča. Jesusiž yujcqui walja c'ajñi cjissiča tjuñižtakaz. Nižaza niiz zquitimi muzpa llijñi cjissiča, nižaza ancha chiwi.

³ Nii orapacha Mojestan Eliastan parizichiča. Nii pucultan žoñiqui Jesusižtan parlican želatča.

⁴ Jalla nekztan Pedruqui Jesusižquiz cjichiča:

–Wejt Jiliri, tekz žejlzqui walikazza. Am pecaquiz niiqui, čhjep chjulli kjuyaž kjuyača wejrnacqui, tsjiiqui amta, tsjiiqui Mojestan, tsjiiqui Eliasta.

⁵ Pedruž nuž chiyan, zuma kjañi tsjiriqui ninacžquiz urpuntichiča. Tsjirquiztan tsjii jora chiižquichiča, tuž cjican:

—Tiiča wejt k'ayi Maatiqui. Tiiž cjen anchal cuntintutča. Jalla tiiž takunaca catoka.

⁶ Jalla nii chiižquita nonžcuqui, nii čhjep tjaajinta žoñinacaqui yokquiz tuzi t'okziča. Muzpa tsucchiča.

⁷ Jalla nuž tuzi t'okzi želan, Jesusaqui ninacžquiz macjatžquichiča. Ninacžquiz kjaržtan lanlanžinchiča, tuž cjican:

—Tsijsna. Anača tsuca.

⁸ Ninacaqui acha waytižcu Jesusa alajakaz cherziča, ana iya jecmi cherchiča.

⁹ Nekztanaqui curquiztan chjijwžcan, Jesusaqui ninacžquiz mantichiča, tuž cjican:

—Anaž jeczquizimi nii ančucaž cherta maznaquiča, weriž ticziquiztan jacatatta, jalla niicama.

¹⁰ Nekztanaqui niž tjaajinta žoñinacaqui Jesusižquiz pewcziča, tuž cjican:

—Lii tjaajiñi maestrunacaqui cjiñiča, primero Elías profetaqui tjonstanča, nii. ¿Kjažtiquiztan nii maestrunacaqui nižta chiiya?

¹¹ Jesusaqui kjaaziča, tuž cjican:

—Ultimupanž Eliasqui wejt tuqui tjonchiča. Niiqui tjappachaž tjacziča, wejr tjonzjapa.

¹² Wejrqui cjiwča. Eliasqui tjonchitala. Pero lii maestrunacaqui nii Elías ana pajchila. Antiz ninacž kuzcama nii Elías čhjulumu sufriskatchiča. Nižaza ninacaqui wejrzakaz ancha sufriskataquiča.

¹³ Jalla nuž Jesusiž chiitiquiztan nii tjaajinta žoñinacaqui tantiyazziča, Juan Bautistača Eliasqui, nii.

TSJII MAJCHQUI ZAJRAZ TUCKATTA

¹⁴ Jalla nekztanaqui curquiztan chjijwžcu, parti žoñinacžquiz irantižquichiča. Nekztan tsjii žoñiqui Jesusižquiz macjatžcu, niž yujcquiz quillziča. Nižaza tuž cjichiča:

¹⁵ —Wejt Jiliri, wejt majchquiz okžnalla. Niiqui t'ucñipanča. Ancha sufričha. Avisac ujquiz tjojtsa, nižaza kjazquiz zakaz tjojtsa.

¹⁶ Tekz zjijcchinča am tjaajinta žoñinacžquiz. Ninacaqui ana čhjetñi atchiča.

¹⁷ Jesusaqui kjaaziča, tuž cjican:

—Tii timpuquiz kamñi žoñinacaqui ana Yoozquin kuzzizza, ana zumača. ¿Čhjulorcamat wejr ančucatan želaqui? ¿Čhjulorcamat ančucaquiz awantaqui? Wejtquin zjijca nii am majch.

¹⁸ Jalla nekztanaqui Jesusaqui nii majch tanñi zajra ujziča; nekztan chjatkatchiča. Jalla nii orapacha žejtchi cjissiča.

¹⁹ Jalla nekztanaqui tjaajinta žoñinacaqui Jesusižquiz zinapora pewcziča, tuž cjican:

—¿Kjažtiquiztan wejrnacqui zajraž tanta žoñi ana čhjetñi atchintaya?

²⁰ Jesusaqui kjaaziča, tuž cjican:

—Ančucqui anača Yoozquin tjapa kuzziz. Jalla nižtiquiztan ana chjatkati atča. Weraral cjiwča. Tsjii mostasa cjita simillaqui koltallača. Chjactiquiztan walja pakjiž pakčha. Yoozquin tjapa kuzzizčhuc cječhaj niiqui, jalla tuž paasača. Tii curumiž mantasača, tuž cjican: “Tekztan najwk oka”. Jalla nuž mantitiquiztan curucz okasača. Tjappacha čhjulumu paasača ančucqui, ultimu Yoozquin tjapa kuztan cječhaj niiqui.

²¹ Pero tii punta zajra chjatkatzjapa, Yoozquin mayiziz waquiziča. Nižaza ayunas waquiziča.

²² Galilea yokaran juntupacha ojklaycan, Jesusaqui niž tjaajinta žoñinacžquiz chiichiča, tuž cjican:

–Wejrqui tsewctan cuchanžquita Yooz Zoñtča. Wejrqui žoñinacž kjarquin intirjital cjeeča.

²³ Nižaza contal cjeeča. Nižaza čhjep majquiztanzti jacatatača.

Jalla nuž chiitiquiztanaqui ancha llaquisiskatchiča nii tjaajintanacžquiz.

TIMPLU IMPUESTO

²⁴ Nekztan Jesužižtan niž tjaajintanacžtanpacha Capernaum watja iran-tichiča. Nekztan timplujapa impuesto cobriñinacaqui Pedružquin chertzni ojkičiča. Jalla nižquin zalžcu pewcziča tuž cjican:

–¿Ančuca tjaajiñi maestruqui timplu impuesto ana pacñikaya?

²⁵ Pedruqui kjaaziča, tuž cjican:

–Impuesto pacñipančhay.

Jalla nekztanaqui Pedruqui kjuyquiz luzziča, jakziquin Jesusac želatčhaja, jalla nicju. Ima Pedruž chiyan, Jesusaqui nižquiz paljaychiča, tuž cjican:

–Simón, ¿tii tantiya? Tii muntuquiz žejlñi jilirinacaqui impuesto cobriñiča. ¿Jakziltižquiztan cobriya? ¿Persun wajtchiz žoñinacžquiztankaya? už ¿yekja wajtchiz žoñinacžquiztan, ja'?

²⁶ Pedruqui kjaaziča tuž cjican:

–Yekja wajtchiz žoñinacžquiztanpanča.

Nekztan Jesusaqui cjichiča:

–Jalla nižtiquiztan nii jilirinacž persun wajtchiz žoñinacaqui impuesto ana pacasača.

²⁷ Jalla nuž cjenami, anaž jecmi učum quintra iñiziñi cjiskatz pecuča. Jaziqui kotquin oka. Nekztan ch'iz tanzjapa kjazquiz anzuelo tjojtznaquiča. Primiru tanzi ch'iz lecznaquiča. Nii ch'iz ata waakatžcu, tsjii paaz wachaquiča. Nii paazqui wejt impuestojapa, nižaza am impuestojapa wachaquiča. Nii paaz chjicha, učum impuestojapa paczjapa.

18

¿JECT TUCQUIN CJES?

¹ Jalla nii orapacha tjaajinta žoñinacaqui Jesužižquiz macjatžcu pewcziča, tuž cjican:

–Arajpach Yooz wajtquiz, ¿ject juc'ant pajk puestuquin uchtaž cjeequi?

² Jalla nekztanaqui Jesusaqui tsjii uza kjawziča. Nii uza ninacž taypiquiz tsijtskatchiča.

³ Nekztanaqui Jesusaqui cjichiča:

–Weraral cjiwča. Ančhucqui tii ocjalž kuz irata, nižta kuzziz pecča. Ančuca kuz ana campiita cječhaj niiqui, arajpach Yooz wajtquiz anapan luzasača.

⁴ Jalla nižtiquiztan tii ocjalž kuz irata, jalla nižta humilde kuzziz cjis waquiziča. Jakziltat nižta kuzziz cjisnaquiž niiqui, jalla ničha arajpach Yooz wajtquiz juc'ant honorchizqui. Juc'ant zuma puestuquiz uchtaž cjequiča.

⁵ Jequit weriž cjen tsjii ocjalažtakaz humilde kuzziz žoñi risiwčhaja, jalla niiqui wejrzakaz risiwča.

PAAZQUIZTAN CWITASA

⁶ 'Nižaza jakzilta humilde kuzziz žoñit wejtquin tjapa kuztan criyačhaja, jalla niižquiz ana jakziltami ujquiz tjojtskatz waquizičha. Ujquiz tjojtskataquiž niiqui, nii ujquiz tjojtskatñi žoñž jorquiz tsjii pajk molinu tjaaž mokžcu, koz kotquiz jacuntiz waquizičha. Jalla nii tsjan cusaž cjesačha nii ujquiz tjojtskatñi žoñžtaqui.

⁷ ;Žoñinacajay! Ujquiz tjojtaquičha, nižaza ujquiz tjojtskataquičha. Pero nekztan ana walinaca tjonaquičha. Tii muntuquiz ujquiz tjojtskatñinaca panž želaquičha, pero nii ujquiz tjojtskatñinacaqui ninacžtajapa ana waliž cjequičha.

⁸ 'Jalla nižtiquiztan am kjarazłaj uż kjojchažłaj ujquiz tjojtskatčhaja, nii uj paañi kjara cjicu uż kjojcha cjicu pootzna, nižaza najwk tjojta. Jalla nuž tsjii kjara cjicu uż tsjii kjojcha cjicu pertissi cjenami am parti curpuqui ana infiernuquin tjojttaž cjesačha. Jalla nuž waliž cjesačha.

⁹ Nižaza am čhujcquiqui ujquiz tjojtskatčhaja, jalla nii čhujcqui lecžna, nižaza najwk tjojta. Yooztan wiñaya kamzjapaqui tsjii čhujquiqui pertisiž cjequiž niiqui, waliž cjequičha. Tjapa curpuqui infiernuquin tjojttaž cjequiž niiqui, ana waliž cjequičha.

ZARAKCHI UUAZ QUINTU

¹⁰ 'Humilde kuzziz žoñinacžtan ana chjaawjkata. Ančhucaquiz cjiwčha, ninacž anjilanacaqui wejt arajpach Yooz Ejpž yujcquiz žejlñipančha.

¹¹ Wejrqui tsewctan cuchanžquita Yooz Žoñčha. Wejrqui tii muntuquiz tjonchinčha, ujquiz kamñi žoñinaca liwriizjapa.

¹² '¿Jalla tii tantiya? Tsjii žoñiqui patac uuzichiztačha. Patac uuziquiztan tsjiillaqui yekjaquin zaraktan, nii žoñiqui nii llatuntunc llatuncani uuzinaca curquin ecaquičha, zarakchi uuaz kjuržquizjapa.

¹³ Nižaza katchi uuaz wachaquiž niiqui, nekztan walja chipznaquičha ana zarakchi uuzanacžquiztan juc'anti.

¹⁴ Jalla nižta irata ančhuca arajpach Yooz Ejpqui humilde kuzziz žoñinacžquiztan anapan jakziltami pertita cjis munčha.

UJ PERTUNZ PUNTU

¹⁵ 'Am jilaqui am quintra ana wali paaquiž niiqui, jalla nižtan zinapora palt'a, niž ana wali paata ujquiztan "ujchizpančha" cjican cjeequi. Jalla nuž amiž chiižintiquiztan catokaquiž niiqui, nii jilaqui ricujta cjequičha.

¹⁶ Zinapora chiižintiquiztan ana nonz pecaquiž niiqui, nii uj paañi jilžquiztan okaquičha. Nekztan iya pucultan jila kjawžcu, wлта nii uj paañi jilžquin okaquičha, niž paata uj tjeezjapa. Jalla nuž paažcu pucultan cjicu uż čhjepultan cjicu testicž taypiquiz niž paata uj tjeežta cjequičha.

¹⁷ Nii uj paañiqui anapanž niž uj maz pecaquiž niiqui, jalla nii puntuquiztan tjapa icliz jilanacžquin maznaquičha. Anapan niž uj maz pecaquiž niiqui, ana Yoozquin criiči jilažtakaz čhejlnaquičha, nižaza impuesto cobriñi žoñižtakaz.

¹⁸ Ultim weraral cjiwčha. Tii muntuquiz jequit am čhelačhaja, jalla niiqui arajpach Yooziž čhejlta zakaz cjequičha. Nižaza tii muntuquiz jequit am cutznačhaja, jalla niiqui arajpach Yooziž cutžta zakaz cjequičha.

¹⁹ Tii zakal chiižinučha. Tii muntuquiz pucultan ančhucqui tsjiikaz Yoozquiztan mayaquiž niiqui, ančhucaquiz tjaataž cjequičha. Wejt arajpach Yooz Ejpqui ančhucaž mayta tjaaquičha.

²⁰ Nižaza tsjii pucultanami čhjepultanami wejtquin kuzziz cjen wejt tjuuquiz ajcznaquiž niiqui, jalla ninacž taypiquiz wejrzakaz želačha.

²¹ Wiruñaquí Pedruqui Jesusižquin pewczñi ojkchičha. Zalžcu, jalla tuž pewczičha:

–Wejt Jiliri, ¿Kjaž wiltamiž wejt jilaqui wejt quintra uj paažcu pertuna mayisasaya? ¿Nižaza wejrqui kjaž wiltat pertunasaya? ¿Pakallak wilita pertunasaya?

²² Jesusaqui nižquiz kjaaziča, tuž cjan:

–Wejrqui cjiwča, anaž pakallak wilita cjesača. Antiz pakallak tunc pakallakuni wiltan wiltan pertunasača.

KAJCHIZ ZOŇI QUINTU

²³ Arajpach Yooz mantiz puntuquiztan jalla tuzuča. Tsjii chawc jiliri qui piyunanacžquiz kaja packatz pecatča.

²⁴ Jalla nuž packatan tsjii kajchiz žoñiqui zjičtatača. Nii žoñiqui walja kajanacchiztača, tsjii kjaž millona.

²⁵ Nii piyunžtaqui anaž pacz paaz želatča. Nekztan patrunaqui jalla tuž mantichiča: “Tii žoñi tuya, paaz cunsiczjapa. Nižaza niž tjunmi, ocjalanacami, tjapa niž cusasanacami liwj tuyła kaja pacz paaz cunsiczjapa”.

²⁶ Nekztanaqui nii piyunaqui patrunž yujcquiz quillziča, nižaza roct'ichiča, tuž cjan: “Wejt patruna, pertunalla. Tjappachal pacača”.

²⁷ Nižtami patrunaqui ancha okziča; nižaza nii kaja ana cobrichiča. Jalla nižtiquiztan liwrii cjišičiča nii kajquiztan.

²⁸ Wajilla nii piyunaqui nijwctan ulanžcu tsjii piyun maztan zalchiča. Nii piyun mazi qui tsjii kjažtalla kajatača nii pertunta piyunžquiz. Nekztan nii pertunta piyunaqui jor t'ullcu tanchiča, nii packatzjapa, tuž cjan: “Kajquiztan tjappacha paca”.

²⁹ Jalla nekztanaqui nii piyun mazi qui niž yujcquiz quillziča, nižaza roct'ichiča, tuž cjan: “Pasinsis kuzziz cjee. Nii kajallquiztan tjappachakal pacača”.

³⁰ Nii kaja cobriñizti ana munchiča. Antiz carcilquin uchantichiča, jalla nii kaja paczcama.

³¹ Parti piyunanacaqui nižta paañi cheržcu ancha sint'ichiča. Nekztan patrunžquiz mazñi ojkchiča. Jalla nicju tjappacha quint'ichiča, jaknužt watčaja, nii.

³² Jalla nekztanaqui patrunaqui nii pertunta piyuna wilita kjawžkatchiča. Nekztan cjičiča: “Ana zum kuzziz piyuna, wejrqui tjapa am kajanaca pertunchinča, amiž roct'iñiž cjen.

³³ Jaknužt wejrqui am kajquiztan, pertunchinčaja, jalla nužuzakaz amlaqui am piyun mazquiz pertunstanča”.

³⁴ Jalla nekztanaqui patrunaqui juc'anti žawziča. Nižaza mantichiča, nii piyuna casticzjapa, tjapa niž kaja paczcama.

³⁵ Jesusaqui nii quintu quint'ican jalla tuž žerziča:

–Jakzilta ančucaquiztan niž jilžquiz kuzquiztan ana pertunačaja, jalla nužuzakaz wejt arajpach Yooz Ejpqui ančucaquiz ana pertunaquiča.

19

MAATAKZTAN JALJTIZ PUNTU

¹ Jalla nuž tjajinžcu Jesusaqui Galilea yokquiztan ojkchiča. Judea yokquin irantichiča, Jordán cjita puž tuwanchuc.

² Muzpa žoñinacaqui nižquiz apziča. Jalla nicju muzpa laanaca čhjetinčiča.

³ Jalla nekztanaqui yekjap fariseo žoñinacaqui Jesusižquiz macjatchiča, ujquiz tjojtskatzjapa. Nekztan tuž pewcziča:

–¿Čhjul uj paatiquiztanaqui persun maatakžtanaqui jaljtasaya?

⁴ Jesusaqui ninacžquiz kjaaziča, tuž cjan:

–Yoozqui tii muntu paacan, luctakžtan maatakžtan paachiča. ¿Cjijrta Yooz takuqui ana liichinčucjo?

⁵ Yooz takuqui tuž cjiča: “Jalla nižtiquiztan tsjii žoñiqui tjunatan zalzjapa, maa ejpžquiztan zarakstanča. Zalžcu pucultan tsjii lucutiñi cjissa”.

⁶ Jalla nuž kjanapacha tježa, anaž iya pucultan žoñi, pero tsjiikazza. Jalla nižtiquiztan anaž jaljtasača. Yoozza tsjii luctakžtan tsjaa maatakžtan chjalziqui, tsjii lucutiñi cjisjapa. Yooz chjalžtaqui ana jaljta cjesača.

⁷ Nekztanaqui pewcziča tuž cjican:

–Moisesqui jalla tuž mantichiča. Tsjii certificado de divorcio tjaaquiž niiqui, tjunatan jaljtasača. ¿Kjažtiquiztan nižta mantichejo, ana jaljtiz želanajo?

⁸ Jesusaqui ninacžquiz kjaaziča, tuž cjican:

–Ančucaž chojru kuzziz cjen Moisesqui tjunatan jaljtis lii tjaachiča. Primirquiztanpacha anataž nižta.

⁹ Wejrqui ančucaquiz chiižinuča. Adulteriuquiz ojklayñiž cjenkaz am maatakžtan jaljtasača. Jequit ana adulterio paachiž cjenaqui niž persun maatakžtan jaljtačhaja, nižaza yekja maatakžtan zalznačhaja, jalla niiqui adulterio uj paača. Nižaza jequit divorcita maatakžtan zalznačhaja, nii zakaz adulterio paača.

¹⁰ Tjaajinta žoñinacaqui nižquiz cjichiča:

–Luctakžtan persun maatakžtan jalla nižta cjesaž niiqui, anaž cumpinča zalzqui.

¹¹ Jesusaqui nekztan cjichiča:

–Tjapa žoñinacaqui tii tjaajinta anaž catokaquiča. Jakziltižquiz Yoozqui tjaajnačhaja, jalla niiqui tii tjaajintaqui catokaquiča.

¹² Žoñinacaqui punta punta ana zalzi cjiča. Yekjapanacaqui nastiquiztanpacha ana zalzucacha. Yekjapanacazti capunapantača, jalla nižtiquiztan ana zalzñi atasača. Yekjapanacazti ana zalz pecča, arajpach Yooz Ejpžtajapa langzjapa. Jecmiž tii takucama kami catokaquiž niiqui, paj kamla.

OCJALANACZ PUNTU

¹³ Žoñinacaqui ocjalanaca Jesusižquiz zijicchiča, ocjalanacžquiz kjaržtan lanznajo, nii ocjalanacžtajapa Yoozquin mayižinajo. Pero tjaajinta žoñinacaqui zijicñi žoñinacžquiz atajchiča.

¹⁴ Nekztan Jesusaqui cjichiča:

–Tii ocjalanaca wejtquin tjonaj cjee, ana ataja. Tii ocjalanacž kuz irata jalla nižta kuzzizza arajpach Yooz mantita kamañchiz žoñinacaqui.

¹⁵ Nekztan Jesusaqui ocjalanacžquiz kjaržtan lanziča. Jalla nekztan nii yokquiztan ojkičiča.

RICACH TJOWAQUI TJONCHICHA

¹⁶ Wiruñiqui tsjii tjowaqui Jesusa cherzñi ojkičiča. Nekztan pewcziča, tuž cjican:

–Zuma Maestro, Yooztan wiñaya kamzjapa, ¿chjul zumanacat wejr paasaya?

¹⁷ Jesusaqui kjaaziča, tuž cjican:

–¿Kjažtiquiztan “Zuma Maestro” cjee amjo? Tsjii alajača zumaqui. Yoozkazza niiqui. Yooztan wiñaya kamz pecchaj niiqui, Yooz Epiž mantitanac jaru kama cjee.

¹⁸ Nii tjowaqui jalla nekztan kjaaziča, tuž cjican:

–¿Chjul mantitanacaya?

Jesusaqui nižquiz cjichiča:

–Anača žoñi conzqui. Anača adulteriuquiz ojklayzqui. Anača tjangzqui. Anača toscara chiizqui, jeczquizimi.

¹⁹ Am maa ejpmi rispitaquiča. Jaknužum persunpachquiz okzñamzłaja, jalla nižta okzñi kuzziz cjispanča žoñinaczquizimi, lijitum mazižtakazza.

²⁰ Nii tjowaqui nekztan cjichiča:

–Tjapa nii mantitanacami cumpliñča koltiquiztanpacha. ¿Jaziqui čhjulut wejtta pjaltasa?

²¹ Jesusaqui tuž cjichiča:

–Ancha wali cjissim pecčhaj niiqui, oka, nižaza amta žejlñi cusasanaca tuyzna. Jalla nii tuyžcu, porinacz ona. Jalla nižtiquiztan arajpachquin cusasanacažtakaz zuma honora tjaatam cjequiča. Jalla nii cumpliscu wiltam tjonaquiča wejtta chica ojklayzjapa.

²² Jalla nižta chiita nonžcu, nii tjowaqui walja llaquita kuzziz ojkiča. Ancha ricachutača.

²³ Jalla nekztanaqui Jesusaqui niž tjaajinta žoñinaczquin cjichiča:

–Weraral ančhucaquiz cjiwča. Tsjii ricachu žoñi arajpach Yooz mantuquiz luzjapa ancha ch'amaž cjesača.

²⁴ Tsjii camello cjita animala žejlča. Nii camelluqui ch'aman acuj cjuñ pjetquiz luzasača. Jalla nižtaž ricachunacaqui tsjan ch'amača Yooz kamañ jiczquiz luzqui, Yooz wajtchiz žoñi cjisjapa.

²⁵ Jalla nuž nonžcu, tjaajinta žoñinacaqui walja ispantichiča. Nekztan ninacpora pewcsarassiča, tuž cjican:

–¿Jectpan liwriita cjesajo?

²⁶ Jesusaqui ninacz kjutñi cherziča. Jalla nekztan cjichiča:

–Žoñinacaqui anaž persunpacha liwrii atasača. Yoozpankazza liwriiñiqui. Yoozqui jecmi liwrii atasača.

²⁷ Jalla nekztanaqui Pedruqui Jesusižquiz cjichiča:

–Wejt Jiliri, wejrnacqui tjapa persun cusasanaca jaytichinča, amtan chica ojklayzjapa. ¿Jalla nižtiquiztan wejrnacqui čhjulut canas?

²⁸ –Jesusaqui kjaaziča, tuž cjican:

–Weraral ančhucaquiz cjiwča. Ew muntuquiz želan, wejrqui poderchiz puestuquiz luzača. Ančhucakaz poderchiz puestunacquiz luzaquiča, tuncapan Israel partira mantizjapa.

²⁹ Jakzilta žoñit weriž cjen kjuyanaca, jilanaca, cullaquinaca, maa ejp, tjun, ocjalanaca, yokanaca ecačhaja, jalla ninacaž walja zuma kamañ wirchiz cjequiča. Nižaza arajpachquin Yooztan wiñaya kamaquiča.

³⁰ Arajpachquin Yoozqui wacchi tii timpuquiz tucquin cjiñi žoñinaca wirquin cjiskataquiča. Nižaza Yoozqui wacchi tii timpuquiz wirquin cjiñi žoñinaca tucquin cjiskataquiča.

20

PIYUNANACZ QUINTU

¹ 'Arajpach mantiñi Yooz puntuquiztan jalla tužuča. Wentanalla tsjii yokchiz wali pajk patrucaqui piyunanaca kjuri ulanchiča, uwas frut zkala ajzjapa.

² Piyunanacztan acuerduquiz luzziča, zita langžtan tsjii denario cjita paaz paczjapa. Jalla nekztanaqui langžñi cuchanzquichiča.

³ Nekztan wenzlaka wilta ulanchiča. Palazquin inakaz žejlñi žoñinaca cherchiča.

⁴ Ninaczquiz paljaychiča, tuž cjican: “Ančhucqui wejt zkal yokquin langžñi oka. Wejrkal zumpacha pacača”. Nekztanaqui ninacaqui ojkiča.

⁵ Taypuru patruñaqui wilta ulanchiĉha, iya piyunanaca kjuri, niĉaza langznajo. Niĉaza taypuru zezi cjeella wilta ulanchiĉha, piyunanaca kjuri, niĉaza langznajo.

⁶ Nii noojpacha zezi cjee wilta palaz kjutņi ulanchiĉha. Niĉaza palazquin inakaz Źejlņi Źoņinacĉtan zalchiĉha. Ninacĉquiz paljaychiĉha tuĉ cjican: “ĉKjaĉtiquiztan anĉhucqui tonj zita ana langz Źejljo?”

⁷ Ninacaqui patrunĉquiz kjaaziĉha, tuĉ cjican: “Anaĉ jecmi wejrnac langznajo rocchiĉha”. Nekztanaqui patruñaqui cjichiĉha: “Anĉhucqui wejt yokquin zakaz langzņi oka. Wejrkal jakniizlaj niil pacaĉha”.

⁸ Tjuņiz kattan nii yokchiz patruñaqui niiz langzkatņi encargado mantichiĉha, tuĉ cjican: “Kjawĉca langzņi piyunanaca, paczjapa. Primiruqui wiri tjonchi piyunanacĉquiz pacaquiĉha; wirquin, tuqui tjonchi piyunanacĉquiz pacaquiĉha”.

⁹ Jalla nekztanaqui nii wiri luzzi piyunanacaqui langzkatņizquiz macjatchiĉha. Zapa mayni ninacĉquiz pactaĉha, tsjii nooj lanzataĉ niĉtapacha. Tsjii denario cjita paaz tanzicha.

¹⁰ Jalla nekztanaqui wirquin paczquita primiru piyuna luzzi Źoņinaca kjawĉtataĉha. Jalla nii primiru piyuna luzzi Źoņinacaqui pinsichiĉha jila paca tanzjapa wiri piyuna luzzi Źoņinacĉquiztan. Jalla nekztanaqui pacchiĉha tsjii denario cjita paaz zakaz.

¹¹ Jalla nii paca tanĉcu patrunĉ quintra quijchiĉha,

¹² tuĉ cjican: “Tii wirquin piyuna luzzi Źoņinacaqui tsjii orakaz langziĉha. Wejrnacĉti primirquiztanpacha langzinĉha, niĉaza zita ancha sii kjakquiz otĉcan langzinĉha. Ninacĉquizimi wejtnacaquizimi tsjiikaz pacchamĉha”. Jalla nuĉ cjican quijchiĉha.

¹³ Nii patruñaqui tsjii ninacĉquiz kjaaziĉha, tuĉ cjican: “Jila, amquiz anal incallchinĉha. Jalla nuĉ tsjii acuerduquiz luztapanla, tsjii denario paaz paczjapa.

¹⁴ Tii paca tanzna, niĉaza oka. Tii wirquin piyuna luzzi Źoņinacĉquiz niĉazakaz pacz pecuĉha, amquiz pactala, jalla nuĉ zakaz.

¹⁵ Wejt persun paaztan jaknuĉut wejr pinsuĉhaja, jalla nuĉ wejt mu-naņpiquez pacasaĉha. Weriz zuma pacņi kuzziz cjen amqui iņiziņi kuzziz cjissamla”.

¹⁶ Jalla niĉta irataĉ wirquin cjiņinacaqui tucquinĉ cjequiĉha. Niĉaza tucquin cjiņinacaqui wirquinĉ cjequiĉha. Kjawĉta Źoņinacaqui wacchiĉha. Illza Źoņinacĉti kolucullaĉha.

JESUSAQUI NIIZ TICZ MAZZICHA

¹⁷ Wiruņaqui Jesusaqui niiz tjaajinta Źoņinacĉtan Jerusalen ojkchiĉha. Jalla nuĉ jiczquiz ojkan, Jesusaqui tsjii latu niiz tuncapan illza Źoņinaca chjitchiĉha, niĉaza ninacĉquiz tuĉ cjichiĉha:

¹⁸ –Anĉhucqui zizza, tii jiczqui Jerusalen kjutņiz ojkĉha, nii. Jerusalen wajtquin wejrqui intirjital cjeeĉha timplu jilirinacĉquizimi lii tjaajiņi maestrunacĉquizimi. Jalla ninacaqui wejr conaquiĉha. Wejrqui tsewtan cuchanĉquita Yooz Zoņtĉha.

¹⁹ Niĉaza wejrqui yekja wajtchiz Źoņinacĉquiz intirjital cjeeĉha, ana wali burla paata cjisjapa. Niĉaza wejrqui wjajttal cjeeĉha. Ultimquizequi cruzquiz ch'awcta contal cjeeĉha. Jalla nekztan ĉhjep majquiztanzi jatacataĉha.

TSJII FAVORA MAYTA

²⁰ Jacobžtan Juanžtan ninacž maaqui Jesusižquiz macjatžquichinča. Jacobžtan Juanžtan ninacž ejpqui Zebedeo cjitatača. Jalla naa maaqui maatinacžtanpacha Jesusižquin macjatchinča. Nekztanaqui naaqui Jesusiž yujcquiz quillzinča, tsjii favora mayzjapa.

²¹ Nekztan Jesusaqui naaquiz cjichiča:

—¿Amqui čhjulum pecya? —cjican.

Naaqui kjaazinča, tuž cjican:

—Amqui am mantis puestuquin luzcu tii wejt pucultan majchnaca am latuquiz uchnalla, tsjiiqui žew latuquiz nižaza tsjiiqui zkar latuquiz.

²² Jesusaqui tuž kjaaziča:

—Ančhucqui čhjulut mayčhaja ana intintazza. Wejrqui walja sufris tanča. ¿Nižtapacha ančhuc sufrasaya? Nižaza tsjii nooj ancha sufrican watača tsjii bautismožtakaz. ¿Jalla nižtapacha ančhuc sufrasaya?

Ninacaqui tuž kjaaziča:

—Nii sufris watimi atasača.

²³ Nekztan Jesusaqui cjichiča:

—Weraral cjiwča. Ančhucpacha sufris tanznaquiča, tsjii licz wazužtakaz. Nižaza sufris wataquiča, tsjii bautismožtakaz. Pero wejrqui mantis puestuquin luzcu, žew latuquizimi zkar latuquizimi ana jecmi uhasača. Wejt Yooz Ejpkaz nii puestunaca tjaaquiča jecžtajapa tjacžtakazlani, jalla ninacžta.

²⁴ Parti nii tuncapan illzta žoñinacaqui nii mayta puntu nonžcu nii pucultan jilazullcaž quintra žawjchiča.

²⁵ Pero Jesusaqui tjappacha nii tjaajintanaca kjawziča, nekztan tuž cjichiča:

—Ančhucqui zumpacha zizza, jalla tužu. Tii muntuquiz nación jilirinacaqui patruñažtakaz mantičiča, nižaza chawc jilirinacaqui parti žoñinacžquiziqui niž mantita cazkatñipankazza.

²⁶ Ančhucqui ana nižta irata cjee. Tsjii kjutniča nii irat kuzqui. Ančhucquiztan jequit chawc jilirižtakaz cjis pecčhaja, jalla niiqui piyunažtakaz cjis waquiziča parti žoñinacžquiziqui.

²⁷ Nižaza jequit ančhucquiztan tucquin mantiči cjis pecčhaja, jalla niiqui wirquin cjis waquiziča, parti žoñinacž mantitacama cjisjapa.

²⁸ Wejrqui tsewctan cuchanžquita Yooz Zoñtča. Wejrpacha tii muntuquiz ana tjonchinča, sirwita cjisjapa. Antiz wejrča tjonchini, žoñinacžquiz sirwisjapa, wejr ticzcama. Jalla nuž ticžcu walja preciochiztakal cjeeča, žoñinaca liwriizjapa. —Jalla nuž cjichiča Jesusaqui.

ZUR ZOÑINACA CHJETINTA

²⁹ Jalla nekztanaqui Jericó wajtquiztan ulnan, muzpa žoñinacaqui Jesusižquiz apziča.

³⁰ Jicz latuquin pucultan zur žoñi julzi želatča. Ninacaqui Jesusaž watni nonžcu, kjawchiča tuž cjican:

—Wejt Jiliri, Davidž majchmajtquiztan tjonni, wejrnacž okznalla.

³¹ Nekz žejlñi žoñinacaqui ninacžquiz ujziča, ch'uj cjeyajajo. Ninacazti juc'anti kjawchiča, tuž cjican:

—Wejt Jiliri, Davidž majchmajtquiztan tjonni, wejrnacž okznalla.

³² Jalla nekztan Jesusaqui tsijtscu, ninaca kjawziča. Kjawžcu ninacžquiz tuž pewcziča:

—¿Čhjuluž werj paaj cji ančhucya?

³³ Nii zur žoñinacaqui kjaaziča, tuž cjican:

—Wejt Jiliri, wejtnaca čhjuiž čjetinžinalla.

³⁴ Nekztanaqui Jesusaqui ninacžquiz sint'izcu čhjujqui lanlanžinchiča. Jalla nii orapacha cherñi cjissiča. Jalla nekztanaqui Jesusižquiz apziča.

21

JESUSAQUI JERUSALEN WAJTQUIN LUZZICHA

¹ Jerusalén watja žcatžincan, Betfagé watja irantichiča. Betfagé watjaqui Olivos cjita curu žcatitača. Nicju irantican Jesusaqui pucultan tjaajinta žoñinaca cuchanchiča, tuž cjican:

² –Jalla nii najwkta watja oka. Jalla nicju mokta ljat azni wachaquiča, nižaza pajk zjijc maltum wawchizza naa azniqui. Mokta jeržcu wejtquin akžcaquiča.

³ Jakzilta žoñimiž atajasaž niiqui, nižquiz ančhucqui “Wejt Jiliriž pecča. Wajilla tjepunta cjequiča tii azniqui”, nuž cjican nii žoñžquiz cjequiča. – Jalla nuž mantichiča Jesusaqui.

⁴ Jalla nii watchiqui profetaž cijirta taku cumplissiča. Tuquitan nii profetaqui tuž cijirchiča:

⁵ “Sión wajtchiz žoñinacžquiz tuž chiya: Chera, ančuca chawc Jiliri tjonča, humilde kuzziz. Nižaza zjijc maltum aznuquiz yawchi tjonaquiča, nižaza nii zjijc aznuž maatanpacha tjonaquiča. Jalla ninacaqui carga kuzñi aznunacača”.

Jalla nuž cijirchiča nii profetaqui.

⁶ Jalla nekztanaqui nii pucultanaqui ojkchiča. Nižaza jaknužt Jesusaqui mantitčhaja, jalla niicama paachiča.

⁷ Ninacaqui ljat azni naaža pajk zjijctanpacha akžquichiča. Jalla nuž akžcu, zquitinaca aznunacž juntuñ caruntichiča. Nekztan Jesusaqui yawchiča.

⁸ Niiž ojkz jicz latuquiz muzpa žoñinaca želatča. Ninacž zquiti jiczquiz chjinziča. Yekjapaqui ramuz čhjañinaca murchiča jiczquiz chjinzjapa.

⁹ Tucquin ojkni žoñinacami wirquin tjonni žoñinacami chipcan walja wiwi kallantičiča, tuž cjican:

–¡Viva tii Yooz tjuuquiz tjonchi žoñi! ¡David cjita chawc Jilirž majchmajtquiztan tjonni! ¡Amqui rispittaj cjila! ¡Amquiz honora tjaataj cjila! ¡Yooz Ejpžquin zakaz honora tjaataj cjila! –Jalla nuž wiwchiča.

¹⁰ Jesusaž Jerusalén watja luztan, tjapa nii chawjc wajtchiz žoñinacaqui walja ispantichi tjojkknakchiča. Nižaza walja pewcpewcziča, tuž cjican:

–¿Jectpan teejo?

¹¹ Žoñinacaqui tuž kjaaziča:

–Tiiqui Jesusa cjita profetala. Nazaret de Galilea, jalla najwkthan tjonchiča.

JESUSAQUI TIMPLU PEWZICHA

¹² Jalla nekztan Jesusaqui Yooz timpluquin luzziča. Jalla nicju tuyñinacami kjayñinacami timpluquiztan liwj tirkatchiča zancchuccama. Nižaza paaz campiiñi žoñinacž mizami pjocžinchiča; paloma tuyñinacž sillami pjocžinchizakazza.

¹³ Jalla nuž paažcu tuž cjichiča:

–Yooz Takuqui tuž cjiča: “Wejt kjuyaqui Yoozquin mayiziz kjuyača”. Ančhuczti tjañinacž kjuyažtakaz paachinčhucča.

¹⁴ Jalla nicju tsjii kjaž zur žoñinaca Jesusižquiz macjatžquichiča, nižaza tsjii kjaž zuch žoñinaca. Jesusaqui ninaca čhjetinchiča.

¹⁵ Pero timplu jilirinacami lii tjaajiñi maestruncami jalla nii čhjetiñi milajru cheržcu, žawjchiča. Nižaza ocjalanacaqui timpluquin Jesusižquiz

tuž wiwchiča: “;David cjita chawc jilirž majchmajtquiztan tjonñi! ;Rispi-taj cjila!” Jalla nuž nonžcu timplu jilirinacami lii maestruncami ancha žawjchiča Jesusiž quintra.

¹⁶ Nekztan Jesusižquiz paljaychiča, tuž cjican:

—¿Tinacaž chiita taku ana nonžjo?

Jesusaqui ninacžquiz kjaaziča, tuž cjican:

—Nonznuča. Nižaza nii puntu Yooz takuqui tuž cjiča:

“Ocjalanacami piz itzñi wawanacami wejttajapa honora zumpachaž tjaaquiča. Jalla nuž paaquiča Yoozqui”.

¿Jalla nii cjiirta Yooz taku liichinčuckaya; ana jaa?

¹⁷ Jalla nekztanaqui ninacžquiztan ojkchiča. Betania watja ojkchiča. Jalla nicju alujassiča.

ANA FRUTCHIZ MUNTI

¹⁸ Jakatažuqui wenzlaka Jerusalén watja quejpcan čhjeri eeskatchiča.

¹⁹ Jicz latuquiz higo munti cherchiča. Jalla nii muntiquin macjatchiča, fruta apakžcu lujljapa. Pero fruta ana wajtchiča, čhjañchiz alajatača. Jalla nižtiquiztan Jesusaqui nii muntiquiz cjichiča:

—Jazic anam iya fruta pookñi cjequiča.

Jalla nii orapacha nii muntiqui kjonchiča.

²⁰ Jalla nižta munti kjonñi cheržcu, tjaajinta žoñinacaqui ispantichiča, nižaza Jesusižquiz pewcziča, tuž cjican:

—¿Kjažtiquiztan nii higo munti ratulla kjonja?

²¹ Jesusaqui tuž kjaaziča:

—Weraral ančhucaquiz cjiwča. Ančhucqui Yoozquin tjapa kuztančhucčhalaj niiqui, nižaza ana payznakñi kuzzizčhucčhalaj niiqui, tii irata zakaz paasača. Nižaza juc'ant pajk milajru paasača. Tii curumi mantasača, tuž cjican: “Tekžtan oka. Pajk kotquin tjojtsna”. Jalla nuž mantižcu nižta zakaz okasača.

²² Nižaza ančhucqui čhjulumi tjapa kuztan Yoozquiztan mayačhaja, jalla niit jama ančhucaquiz tjaataž cjequiča.

¿JEC JESUSIZQUIZ MANTICHI?

²³ Jerusalén irantižcu Jesusaqui wilta timpluquin luzziča. Jalla nicju tjaa-njan, timplu jilirinacami wajtchiz jilirinacami nižquiz macjatzquichiča. Nekztan pewcziča, tuž cjican:

—¿Jec am mantichi tii paazjapajo? ¿Jec jilirit am utchi jilirižtakaz cjisjapajo?

²⁴ Jesusaqui ninacžquiz tuž kjaaziča:

—Wejrzal ančhucaquiz tsjii pewcznača. Ančhucqui wejtquiz kjaaz-naquiž niiqui, wejrzakal ančhucaquiz maznača, jec wejr mantichi, nii.

²⁵ Wejtquiz kjaaznalla. ¿Ject Juan mantižquichi bautisjapaya? ¿Yoozkaya, žoñinaca, ja'?

Jalla nekztanaqui ninacpora parlatča, tuž cjican:

—¿Jaknužum cjeequi? Učhumž “Yoozqui Juan mantichiča” cjicanž kjaaz-naquiž niiqui, jalla tiicni učumnacaquiz kjaaznačan, cjican: “Nižtiquiztan ¿kjažtiquiztanž ančhucqui ana nii criichinčucta?”

²⁶ Nižaza učhumž “Žoñiqui Juan mantichiča” cjicanž kjaaznaquiž niiqui, žoñinacaqui učumnacaquiz ¿kjaž cjiqejjo? —Jalla nuž parlatča. Žoñinacaqui Juanž puntu cjiñiča, Yooz parti parliñi profetača niiqui. Jalla nižtiquiztan ninacaqui žoñinaca eksiča, “Učhum conačhani”, cjican.

²⁷ Jalla nuž parližcu ninacaqui Jesusižquiz cjichiča:

—Ana zizuča wejrnacqui.

Jalla nižta kjaaztiquiztan Jesusaqui cjichiča:

–Wejrmi ana zakal ančhucaquiz maznača, jec wejr mantichi tii paazjapa.

PUCULTAN MAJCHWICH QUINTU

²⁸ Wiruñaquí Jesusaquí tsjii puntu chiichiča, tuž cjican:

–Tii puntu tantiya. Tsjii zoñiqui pucultan majchwichtača. Tsjiižquiz cjichiča: “Wejt maati, tonjiqui uwas frut ajzñi oka”.

²⁹ Nii mantita maatiquí tuž kjaaziča: “Anača”. Jalla niiz wiruñalla niiz kuz campiichiča. Nekztan uwas frut langzñi ojkchiča.

³⁰ Nižaza nii ejpquí tsjii maati cheri ojkchiča. Niižtan zalžcu, nižtazakaz uwas frut ajzñi mantichiča. Jalla niiqui kjaaziča, tuž cjican: “Tata, okasača”. Ultimquiziqui nuž cjiscuquí ana ojkchiča.

³¹ Nii pucultanquiztan ¿jakzilta maati niiz ejpž mantitacama paachiya?

Ninacaquí kjaaziča tuž cjican:

–Primiru mantitaž, jalla niiča.

Jalla nekztanaquí Jesusaquí cjichiča:

–Weraral ančhucaquiz cjiwča. Impuesto cobriñinacami, nižaza ujchiz maatakanacami arajpach Yooz wajtquíz ančhucž tuquí luzaquíča.

³² Juan Bautistaquí tjaajñi tjonchiča, jaknužt ančhucalaquí kamžtažlaja, jalla nii tjaajinchiča. Pero ančhucquí niiz tjaajinta ana criichinčhucča. Impuesto cobriñinacazti nižaza ujchiz maatakanacazti niiz tjaajinta criichiča. Jalla nii cherchinčhucča ančhucquí. Jalla nižtanaca cheržcumí, ančhucquí ana Yoozquin cjisjapa kuz campiichinčhucča. Ančhucča niiz taku ana criichinčhucquí.

ANA WAL PIYUNANACZ QUINTU

³³ Jalla tii quintu zakaz nonžna. Tsjii yokchiz patruñaquí uwas zkala čhjacchiča. Nekztan uwas zkal muytata pirka pirkichiča. Nižaza tsjii maz ojt paachiča, uwas kjaz spjiťzjapa. Nižaza tsjii campanturiž cherchi kjuychiča, nii zkala itzjapa.

Nekztan nii patruñaquí zkal yoka alquílchiča piyunanaczquíz. Nekztan jicz ojkchiča.

³⁴ Zkala ajz timpu irantižcan, patruñaquí tsjii kjaž piyuna cuhanžquichiča, niiz parti zkala ricujajo.

³⁵ Pero nii zkala alquílñi zoñinacazti nii cuhanžquita piyunanaca tanchiča. Tsjiíquí kitžtača. Tsjiíquí contača. Tsjiíquí maztan čhajtača.

³⁶ Nekztanaquí patruñaquí wilta piyunanaca cuhanžquichiča, primirquiztan juc'anti. Pero nii zkala alquílñi zoñinacazti nižtapacha ana wali paachizakazza.

³⁷ Ultimquiziqui patruñaquí niiz persun majch cuhanžquichiča, tuž tantiican: “Wejt ultim maatiquí rispítžinaa” cjican.

³⁸ Niiz majch cheržcu, nii alquílñi zoñinacaquí ninacpora palt'ichiča, tuž cjican: “Jalla tiikat liwj tii irinsa tanznačani. Jalla nižtiquiztan ž-conla, učumnacaltajapa tii yok irinsa cjejajo”.

³⁹ Jalla nekztanaquí nii zoñinacaquí majch tanchiča; nekztan yokquiztan jwescu conchiča.

⁴⁰ Jalla nekztanaquí Jesusaquí pewcziča, tuž cjican:

–Jalla nii patruncha tjonžcu, ¿čhjulukat nii alquílñi zoñinaczťajapa pačhani?

⁴¹ Zoñinacaquí kjaaziča tuž cjican:

–Nii ana wal zoñinacaquí contaž cjequiča, ana importayžcu. Nekztan nii zkal yoka yekja piyunanaczquíz alquílaquíča, zkala ajz timpu niiz parti zkala ricujžcu niizquíz tjaata cjisjapa.

⁴² Nekztan Jesusaquí ninaczquíz cjichiča:

–Yooz takuqui tuž cjiča:

“Kjuy pirkiñinacaqui tsjii maz tjojtchiča. Nii tjojta mazqui isquinquiz cjissiča. Juc'ant chekan mazqui cjissiča. Yoozqui nuž utchiča. Učhumqui jalla nii cheržcu ispantichiča”.

Jalla nuž cjiča cijrta Yooz takuqui. Ančhucqui nii Yooz taku liichinčhucča, ¿ana jaa?

⁴³ Ančhucquiz chiižinuča, ančhucqui nii ana wal alquilni žoñinacžtakazza. Jalla nižtiquiztan ančhucqui Yooz kjuychiz famillquiztan chjatkattaž cjequiča. Yekja žoñinacaqui Yooz famillquiz luzaquiča. Yooz kuzcama kamni žoñinacaqui luzaquiča.

⁴⁴ Nonžna. Maz puntuquiztan zakal chiyuča. Jakziltat nii maz cjen ujquiz tjojtsnačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtsnaquiž niiqui, pulpužtakaz t'okuntaž cjequiča. Nii žoñinacaqui k'ala akžtaž cjequiča.

⁴⁵ Jalla nii Jesusiž chiita takunaca nonžcu, timplu jilirinacami, fariseo parti jilirinacami tantiichiča, ninacž puntu chiiñi, nii.

⁴⁶ Jalla nuž tantižcu, Jesusa tanz pecatča. Pero ana atchiča, parti žoñinaca ekscu. Parti žoñinacaqui Jesusiž puntu tantiyatča, Yooz taku parliñi profetača, nii.

22

YOOZ KJUYCHIZ FAMILIA

¹ Jalla nekztanaqui Jesusaqui wilta tjaajinchizakazza. Jalla tuž cjican quint'ichiča:

² –Arajpach Yooz kjuychiz familiaqui jalla tužuča. Tsjii chawjc jiliri qui niž majchtajapa zalz pijjsta paachiča.

³ Niiž piyunanaca cuchanchiča, invitta žoñinaca kjawzñi. Nii kjawžta žoñinacaqui ana tjonz pecchiča.

⁴ Nekztanaqui yekja piyunanaca cuchanchizakazza, tuž cjican: “Invitta žoñinacžquin mazca, ‘Chjeri lujlz tjacztača. Wejt wacanaca conkatchinča, nižaza cjew animalanacami. Tjappacha listuča, jaziqui pijjstiquin tjonla’”.

⁵ Jalla nuž chiyanami nii invitta žoñinacaqui ana cazquichiča. Tsjiiqui zkal yoka ojkchiča. Tsjiiqui tuyžtan ojkchiča.

⁶ Parti invitta žoñinacaqui kjawzñi cuchanta piyunanaca tanziča. Nekztan kitchiča, conañcama.

⁷ Jalla nekztanaqui nii chawc jiliri qui ninacž quintra žawjziča. Nekztan zultatunaca cuchanžquichiča, nii piyuna conñinaca conžcajo. Nižaza, ninacž watja ujžcajo.

⁸ Jalla nižta paažcu chawc jiliri qui piyunanacžquiz cjichiča: “Tjappacha zalz pijjstac listuča. Nii primir invitta žoñinacaqui ana tjonz waquiziča.

⁹ Jalla nižtiquiztan ančhucqui pajk calliranž ojklayžca. Jecnacžtanami zalačhaja, jalla ninacžquiz tjonajum cjequiča tii zalz pijjstiquin”.

¹⁰ Jalla nekztanaqui piyunanacaqui call kjutni ulanchiča, nižaza tjapa niž zaltanaca kjuyquiz ajcskatžquichiča, zuma žoñimi, ana zuma žoñimi. Jalla nekztanaqui pijjsta paaz kjuyaqui chjijpsi cjissiča.

¹¹ Jalla nekztanaqui chawc jiliri qui luzquichiča invitta žoñinaca cherzñi. Tsjii žejlñi žoñi naychiča, ana pijjsta paaz zquiti cutchi želatča.

¹² Jalla nuž nayžcu nii chawc jiliri qui nižquin paljaychiča tuž cjican: “Jila, ¿kjažtiquiztan amqui ana pijjsta paaz zquiti cajtchi luzquichamtajo?” Nii žoñiqui ch'uj quirchiča.

¹³ Nekztanaqui chawjc jiliriQUI pijsta atintiñi žoñinacžquiz mantichiča, tuž cjican: “Kjojchanacami kjaranacami čhejlžina. Zawnc zumchiquiz tjojta, jalla nicju kaala, nižaza niiž izke kjojla”.

¹⁴ Jesusaqui cjichizakazza:

–Kjawžta žoñinacaqui tamača. Illzta žoñinacaqui kolucullača.

IMPUESTO PACZ PUNTU

¹⁵ Jalla nekztanaqui fariseo žoñinacaqui ojkchiča. Ninacaqui acuerduquiz kazziča, Jesusiž quintra tsjii ujchiz cjiskatzjapa. Jaknužumi Jesusa tsjii ana wali chiikataquiča; jalla nii ujchiz cjiskatz pecatča.

¹⁶ Jalla nekztan ninacž partiquiztan yekjap žoñinaca cuchanžquichiča, Herodes parti žoñinacžtanpacha. Jalla nii cuchanta žoñinacaqui Jesusižquiz cjichiča:

–Maestro, wejrnac zizuča, amqui werarapan chiiča, nižaza Yooz kamañ puntuquiztan weraram tjajinamča, kjažtami žoñiqui chiičhani, nižaza kjažta žoñimi želačhani.

¹⁷ Jaziqui amqui tii tantiižinalla. ¿Roman chawc jiliržquin impuesto pacz wali cjesaya? už ¿anaž wali cjesaj? Jalla nii ziz pecuča.

¹⁸ Pero Jesusaqui ninacž ana zuma pinsita intinzuna zizziča. Jalla nižtiquiztan ninacžquiz kjaaziča tuž cjican:

–Ana zum kuzziznaca, ¿kjažtiquiztan ančhucqui wejt quintra uj jwes pecjo?

¹⁹ Impuesto pacz paaz tjeezna.

Jalla nekztan tsjii denario cjita paaz zjijcchiča.

²⁰ Jalla nii paaz cheržcu, Jesusaqui ninacžquiz pewcziča, tuž cjican:

–Tii paazquiz ¿jecž yujctaya? Nižaza tii cjiirta tjuu, ¿jecž tjuutaya?

²¹ Nii quintranacaqui kjaaziča, tuž cjican:

–Roman chawc jiliržtača.

Jesusaqui nekztan cjichiča:

–Roman chawc jiliržtaqui jalla nii jiliržquin tjaasa. Nižaza čhjulut Yooztaqui Yoozquinpan tjaasa.

²² Jalla nuž nonžcu, nii quintranacaqui ispantichiča. Nekztan Jesusižquiztan zarakžcu ojkchiča.

JACATATZ PUNTU

²³ Jalla nii noojpacha yekjap saduceo parti žoñinacaqui Jesusa cheri ojkchiča. Saduceo parti žoñinacaqui ana criiñitača, ticziquiztan jacatatz, nii. Jalla nuž cjenami Jesusižquiz pewcziča. Tii quintu quint'ican, pewcziča, tuž cjican:

²⁴ –Maestro, Moisesaqui učumnacalta cjiirtkalča, tuž cjican: “Tsji žoñi ticznasaž niiqui, niiž tjun ana ocjalchiz cjesaž niiqui, nekztan nii ticzi žoñž jilaqui naa žewatan zalz waquiziča, nii ticzi jilž cuntiquiztan ocjala paazjapa”.

²⁵ Jaziqui wejrnacporquiz pakallak jilazullca želatča. Jilir jilaqui zalsiča. Nekztan ticziča ana ocjalchiz. Jalla nekztan jilirž jar jilaqui naa žewatan zalsizakazza.

²⁶ Nii jilaqui ticzizakazza ana zinta ocjala ecžcu. Nekztan yekja taypir jilžtan nižtazakaz watchiča. Nižaza tjappach nii pakallak jilazullquizquiz nižta watchiča.

²⁷ Tjapa nii pakallak jilazullcaž ticztan, naa žewqui ticzinzakazza.

²⁸ Jaziqui ticziquiztan jacatatzcu, naa žewqui ¿jakziltiž tjun cjequejo? Tjapacha naatancama zalzitača.

²⁹ Jesusaqui ninacžquiz tuž kjaaziča:

–Ančhucqui tsjii kjutñi kiwkchinčhucča. Ančhucqui Yooz takumi ana zuma zizza. Nižaza Yooz azimi ana pajča.

³⁰ Ticzi žoñinacaž jacatattanaqui zalzqui ana želaquiča. Žoñinacami žoñž maatinacami ana zalznaquiča. Nii timpuquiz žoñinacaqui arajpach Yooz anjilanacažtakaz cjequiča.

³¹ Pero nii ticziquiztan jacatatz puntu, ¿Yooz tawkquiz ana tuž liich-inčhucjo? Tii puntuquiztan Yoozpachaž chiichiqui. Jalla tuž cjican Yoozqui cjichiča:

³² “Wejrqui Abrahamž Yoozza, nižaza Isaacž Yoozza, nižaza Jacobž Yoozza”. Anača ticzi žoñž Yoozqui. Antiz žejtñi žoñž Yoozza.

³³ Jalla nuž chiita nonžcu, nekž žejlñi žoñinacaqui Jesusiž chiitiquiztan ispantichiča.

JUC'ANT CHEKAN MANTITAQUI

³⁴ Jalla nuž chiižcu Jesusaqui saduceo parti žoñinaca ch'uju paachiča. Jalla nuž ch'uj paatiquiztan fariseo parti žoñinacaqui wilta ajczyča.

³⁵ Tsjii lii maestruqui nižaza fariseo partinaczquiztan uj jwesjapa yanz pecatča. Jesusižquiz pewczyča, tuž cjican:

³⁶ –Maestro, učum liiquiztanaqui ¿čhjul mantitat juc'ant chekanaya?

³⁷ Nekztan Jesusaqui kjaaziča, tuž cjican:

–Tii mantitača juc'ant chekanaqui. “Ančuca Yooz Ejp Jiliržquiz sirwa, tjapa kuztanami, tjapa animužtanami, tjapa pinsamintužtanami”.

³⁸ Parti mantitanacquiztan cjenaqui jalla niiča chekanaqui.

³⁹ Niiž jaru tii mantitaqui žejlča. “Jaknužum persunpachquiz okzñamžlaja, jalla nižta okzñi kuzziz cjistanča žoñinaczquizimi, liijitum mazižtakaz”.

⁴⁰ Jalla nii pizc mantitanacača chekanaqui. Nižaza tjapa Moisés tjaata liimi, nižaza tjapa profetanacaž tjajintanacami nii pizc mantitanacz partiquiztan chiiča.

CRISTUZ PUNTU

⁴¹ Fariseo žoñinacaž ajczy želan, Jesusaqui ninaczquiz pewczyča tuž cjican: –Ančhucqui Cristumž puntuquiztan tantiya. ¿Cristuqui jecz majch niiqui?

⁴² Nekztanaqui ninacaqui Jesusižquiz kjaaziča, tuž cjican:

–Davidž majchmajtquiztan tjonñiča niiqui.

⁴³ Jalla nuž kjaaztiquiztan Jesusaqui ninaczquiz cjichiča:

–David jiliriqui Cristuž puntuquiztan chiican, “Chawc Jiliri” cjichiča. Jalla nuž chiižcu, Yooz Espíritu Santuž chiikatchiqui.

⁴⁴ Davidaž cjiirta Yooz takuqui tuž cjiča:

“Yooz Jiliriqui wejt chawjc Jiliržquiz cjichiča: ‘Wejrqui am kjojch koztan am quintri žoñinaca tjeckkatača. Nii oracama wejt žew latuquiz julzna’.”

⁴⁵ Jaziqui Davidaqui “chawjc Jiliri” cjichiča Cristuž puntuquiztan. Jalla nižtiquiztan ¿jaknužt nii chawjc Jiliri Davidž majchqui cjesajo? –Jalla nuž pewczyča Jesusaqui.

⁴⁶ Anaž jecmi kjaazñi atchiča, ana zinta takumi. Jalla nužquiztanpacha ana čhjulumu pewczñi atchizakazza iya. Jalla nii orquiztanpacha pecunz eksipanča nii quintra žoñinacaqui.

23

ANA ZUM TJAAJINACŽ PUNTU

¹ Jalla nekztanaqui Jesusaqui nekž žejlñi žoñinaczquizimi niiž tjajinta žoñinaczquizimi tuž cjichiča:

²—Lii tjaajiñi maestrunacami nižaza fariseo žoñinacami persun puntuquiztan tuž tantičha, tjaajinz puestuquiz uchtačha Moisés liiquiztan punta punta tjaajinzjapa, nii. Jalla nuž tantičha persun amtiquiziqui.

³ Ančhucqui ninacaž tjaajintacama oka. Nižaza ninacaž chiitacama paa. Pero ninacž kamz jaru, ana kama. Ninacaqui tjaajinčha, pero persun tjaajinta jaru ana ojkčha, ana cumpličha.

⁴ Ninacaqui walja mantitanaca paačha, walja kuzižtakaz žoñinacžquiz jepčha. Tjapa ninacž mantitanacaqui anapan atchucačha. Jalla nuž cjenami tjapa mantitanaca žoñinacžquiziqui tirapanž ijsijčha. Pero ninacapacha anaž čhjulquizimi yanapčha nii cumplisjapa.

⁵ Ninacaqui čhjulu paatami paačha, žoñinacakaz cherajo. Yujc ayquizimi kjarquizimi cijirta Yooz taku jweranchiž ojklajčha, nižaza parti žoñinacžquiztan juc'anti lajch chjajlchiz zquiti cujtchiž ojklajčha. Jalla nižtaž ojklajž juztazza.

⁶ Pjijstiquiz cjen tucquin panž julz pecčha. Nižaza ajcz kjuyquiz cjen tucquin panž julz pecčha honorchiz cjisjapa.

⁷ Ninacaqui žoñinacž taypiquiz cjen rispitztan tsaanta cjis pecčha, nižaza “Maestro” cjita cjis pecčha.

⁸ Ančhucqui anačha žoñinacžquiz “maestro” cjita cjis peczqui. Tjapa ančhucqui jilazullquičhucčha. Tsjii Maestruchizčhuckazza. Cristučha nii Maestruqui.

⁹ Nižaza ančhucqui tii muntuquiz kamcan anaž jecžquizimi “ejp” cjican chiiz waquizičha. Tsjii Ejpchizčhuckazza. Arajpach Yooz Ejpčha niiqui.

¹⁰ Nižaza ančhucqui anačha žoñinacžquiz “jiliri” cjita cjis peczqui. Tsjii jilirchizčhucčha. Cristučha niiqui.

¹¹ Ančhucquiztan jequit jilirižtakaz cjis pecčhaja, jalla niiqui piyunažtakaz cjis waquizičha parti žoñinacžquiziqui.

¹² Jequit persun honora waytiz pecčhaja, ultimquiziqui ana honorchiz cjequičha. Nižaza jequit humilde kuzzizlaja, jalla niiqui ultimquiziqui honorchiz cjequičha.

¹³ Lii tjaajiñi maestrunaca, nižaza fariseo parti žoñinaca, ana zuma kuzziz žoñinacčhucčha. Ančhucqui anawalipanž cjisnaquičha. Žoñinaca atajiñčhucčha, arajpach Yooz wajtchiz ana luzajo. Ančhucpachaž ana luzza, nižaza pecchi cjenami parti žoñinacžquizimi ana luzkatiñčhucčha.

¹⁴ Lii tjaajiñi maestrunaca, nižaza fariseo žoñinaca, ana zuma kuzziz žoñinacčhucčha. Ančhucqui anawalipanž cjisnaquičha. Zew maatakanacžquiztan kjuy cusasanaca kjañiñčhucčha. Jalla nuž paažcumi nii maataka incallzjapa ažka ažka Yoozquin maytažoka payiñčhucčha ninacžtajapažtakaz. Jalla nuž paatiquiztan ančhucqui juc'anti castictaž cjequičha.

¹⁵ Lii tjaajiñi maestrunaca, fariseo žoñinaca, ana zum kuzziz žoñinacčhucčha. Jaziqui ančhucqui anawalipanž cjisnaquičha. Ančhucqui jaknužumi ančuca cuzturumpi jaru žoñinaca ojkkatzkaz pecčha. Jalla nuž ojkkatzcuqui ančhucqui nii žoñinaca ančucaquiztan pizc wilta wilta juc'anti anawaliz cjis katčha, infiernuquin casticta cjisjapa.

¹⁶ Ančhucqui anawalipanž cjisnaquičha, zur žoñižtakaz irpiñinaca. Ančhucqui cjiñčhucčha: “Jakziltat timplu tistiwcchiz juramintu paaquiz niiqui, jalla nii juramintuqui anaž walčha. Pero jakziltat timplu kor paaž tistiwcchiz juramintu paaquiz niiqui, jalla nii juramintuqui walčha”.

¹⁷ Zumzu zur žoñinaca. ¿Jakziltat juc'ant chekanaqui, timpluquin žejlñi korinacakaya, už timplupanej? Timpluž cjen nii korinacaqui walčha.

18 Nižaza ančhucqui cjiñčuczakazza: “Jakziltat timplu altar tistiwcchiz juramintu paaquiž niiqui, jalla nii juramintuqui anaž walča. Pero jakziltat altarquin uchta ofrenda tistiwcchiz juramintu paaquiž niiqui jalla nii juramintuqui walča”.

19 Zumzu zur žoñinaca. ¿Jakziltat juc'ant chekanaqui, ofrendakaya, už altarapanej? Altaraž cjen nii ofrendaqui walča.

20 Jakziltat altar tistiwcchiz juramintu paaquiž niiqui, nižaza tjapa nii altar juntuñ žejlñinaca tistiwcchiz juramintu paača.

21 Nižaza jakziltat timplu tistiwcchiz juramintu paaquiž niiqui, nižaza timpluž Yooz tistiwcchiz juramintu paača.

22 Nižaza jakziltat arajpach tistiwcchiz juramintu paaquiž niiqui, nižaza arajpach Yooz tistiwcchiz juramintu paača. Yoozqui arajpachquin žejlča, nižaza arajpachquiztan mantiča.

23 'Lii tjaajiñi maestrunaca, nižaza fariseo žoñinaca, ana zum kuzziz žoñinacčhucča. Ančhucqui anawalipanž cjisnaquiča. Ančhucqui diezmos tjaayiñčhucča mentquiztan, anizquiztan, cominquiztan. Jalla nii kolta plantanacquiztan ančhucqui diezmos tjaayiñčhucča. Pero ančhucqui liiž chekan mantitanac jaru ana kamiñčhucča. Yooz kuz jaru ana kamiñčhucča, nižaza ana okzñi kuzzizčhucča; nižaza ana Yoozquin kuzzizčhucča. Jalla nižta chekan lii jaru ana kamiñčhucča. Jalla nižta jaru kamz waquiziča, diezmos tjaacanami.

24 Ančhucqui zur irpiñinaca. Tižta irata paayiñčhucča. Tsjii žoñiqui kolta zmoyalla culčiča ana lujljapa. Jalla nuž cjenami pajk ana wali animala ana culžcu lujlchiča. Jalla nižta irata paayiñčhucča.

25 'Liy tjaajiñi maestrunaca, nižaza fariseo žoñinaca, ana zum kuzziz žoñinacčhucča. Anawalipanž cjisnaquiča ančhucqui. Wazumi chuwami zawnctanaqui ajuntaž cjesača. Jalla nuž cjenami kjuyltan cjujchiž cjesača. Jalla nižtaž ančhucqui. Zawncta curpuqui walikaz chercherča. Ančuca kuzquizti cjujchinacažtakaz žejlča. Tjañi zaazmi anawali paazmi jalla nižta kuzzizčhucča ančhucqui.

26 Zur fariseo žoñinaca, primiruqui zuma kuzziz cjisna ajunta chuwažtakaz; nekztanaqui zuma žoñiž tsijtchizakaz cjequiča.

27 'Lii tjaajiñi maestrunaca, nižaza fariseo žoñinaca, ana zum kuzziz žoñinacčhucča. Anawalipanž cjisnaquiča ančhucqui. Chiw ljocžtan tjarta sipulturužtakazza ančhucqui. Ančuca tsitiqui walikazza. Ančuca kuzzti ana walipanča. Sipultura ticzi žoñinacž tsijjnacžtan chijjpsi, nižta ana waliča.

28 Jalla nižtaž ančhucqui. Žoñinacaqui ančhuc zuma žoñižtakaz nayča. Pero ančuca persun kuzquizti juc'ant anawalinaca žejlča.

29 'Lii tjaajiñi maestrunaca, nižaza fariseo žoñinaca, ana zum žoñinacčhucča. Anawalipanž cjisnaquiča. Ančhucqui profetanacž sipulturunaca azquichiñčhucča, nižaza Yooz kuzcama kamñita žoñinacž monumentunaca c'achjalla cjiskatiñčhucča.

30 Nižaza nii zuma žoñinacž puntuquiztan tuž cjiñčhucča: “Učhum tuquita atchi ejpnacaqui anawali kamčiča. Wejrnacqui nii tuqui timpuquiz kamtasajž niiqui, anaž profetanaca conzjapa yanaptasača”.

31 Jalla nuž chiican, ančhucpacha chiča, profeta conñi žoñinacž majchmaatičhucča, nii.

32 Jaknužt ančuca tuquita atchi ejpnacaqui anawali paatčhaja, jalla nižtakaz payiñčhucča.

33 'Zkoražtakaz žoñinaca. Zkoražta sarchiz žoñinaca. Ančhucqui anapanž wira atipasača infiernuquin casticzquiztanaqui. Castictapanž cjequiča.

³⁴ Ančhuc juc'ant casticta cjisjapa, ančhucaquiz cuchanžcača profetanaca, nižaza Yooz puntu zuma zizñinaca, nižaza Yooz puntu tjaajinñinaca. Jalla nii žoñinaca cuchanžquichiž cjen, ančhuczti tsjii yekjanaca conaquiča, yekjanaca cruzquiz ch'awcznaquiča, yekjanaca ajcz kjuyquizpacha wjajtaquiča. Nižaza yekjanaca wajtquiztan watja tanzjapa apznaquiča.

³⁵ Jalla nuž paatiquiztan ančhuca ujnacquiztanami nižaza ančhuca tuquita atchi ejpnacž ujnacquiztanami caztictaž cjequiča. Ančhuca atchi ejpnacaqui zuma žoñi conchiča, Abelquiztanpacha asta Berequías majch Zacarías, jalla niicama. Zacariasqui timpluquizpacha contatača, altar žcati.

³⁶ Ančhucaquiz weraral cjiwča. Tjapa nii uj paatanacquiztan casticta cjequiča tii timpuquiz kamñi žoñinacaqui.

JERUSALEN WAJTCHIZ ŽOÑINACŽ PUNTU

³⁷ Nekztan Jesusaqui chiichiča, tuž cjican: Jerusalén wajtchiz žoñinaca, Jerusalén wajtchiz žoñinaca. Profetanaca coničhucča. Nižaza Yooz cuchanžquita profetanaca maztan čhaciñhucča. Kjaž wilta wejrqui tii žoñinaca juntis pecchinča, cwitisjapa. Jaknužt wallpiquei kjar koztan ozmachanaca cwitichaja, jalla nižta irata tii žoñinaca cwitis pecchinča. Tii žoñinacazti wira ana nuž cwitiskatz pecchiča.

³⁸ Tii taku nonžna. Ančhuca kjuyanacaqui jaytitaž cjequiča.

³⁹ Ančhucaquiz cjiwča. Tsjii noojiquei ančhucqui wejt puntuquiztan chiyaquiča, tuž cjican: “Yooz Jilirž tjuuquiz tjonñi, amqui honorchiz cjila”. Jalla nii noojcama ančhucqui ana wejr wilta cheraquiča.

24

JUDIO TIMPLU PUNTU

¹ Nekztanaqui Jesusaqui timpluquiztan ulanchiča. Nekztan niiž tjaajinta žoñinacaqui niižquin macjatžcu, tuž cjichiča:

–Cherzna. Ancha c'achjača tii timplu kjuyanacaqui.

² Jesusaqui kjaaziča, tuž cjican:

–Tjapa tii timplu kjuyanaca zumpacha cherzna. Ančhucaquiz weraral cjiwča. Tsjii noojiquei tii kjuyanacaqui k'ala pajltaž cjequiča. Ana zinta tii maznaca pirkita želaquiča.

TII MUNTU TUCUZINZ PUNTU

³ Nekztan ninacaqui Olivos cjita curullquin ojkičiča. Nicju Jesusaž julzi želan, tjaajinta žoñinacaqui niižquiz jamazit tuž cjichiča:

–Maznalla. ¿Čhjulorat nii amiž chiita wataqui? Nižaza am tjonz siñala, ¿jakziltat cjeequiya? Nižaza tii muntu tucuzinz siñala, ¿jakziltat cjeequiya?

⁴ Nekztanaqui Jesusaqui kjaaziča tuž cjican:

–Ančhucž cwitaza, ana jecmi ančhucaquiz incallskata.

⁵ Muzpa žoñinacaqui wejt tjuužtan tjonaquiča, “Wejrtča Cristutqui” cjican. Jalla nuž chiižcu tama žoñinaca incalltaž cjequiča.

⁶ Nižaza ančhucqui quira žejlž quintunaca zizaquiča; nižaza yekja quira quintunaca arawasaquiča. Jalla nuž cjenami anaž tsuca. Nuž watstanča. Imaziča tii muntu tucuzinzqui.

⁷ Nacionpora talznaquiča; nižaza quira paaquiča. Nižaza mach'a želaquiča, nižaza conanaca ojklayaquiča, nižaza walja yoka chekjincan terremotož wataquiča, wacchi yokaran.

⁸ Tjapa tii wattanaqui juc'anti t'akjiziz želaquiča.

⁹ Jalla nekztanaqui ančhucqui jilirinacžquiz intirjitaž cjequiča sufriskatzjapa. Nižaza contaž cjequiča ančhucqui. Nižaza ančhucaž

wejtquiz criichiž cjen, tjapa ana criichi žoñinacaqui ančhuca quintraž cjequiča.

¹⁰ Jalla nuž watan, muzpa Yoozquin criichi žoñinacaqui quejpsnaquiča. Yoozquin criichi žoñinacž quintra cjisnaquiča, jilirinacžquin intirjizcama. Criichi žoñinacžquiz ancha chjaawjkataquiča nii quejpsñinacaqui.

¹¹ Muzpa toscara chiiñinaca ojklayaquiča, tuž cjican: “Yooziž tjaata takuča tiiqui”. Nii toscar takunacžtan muzpa žoñinacžquiz incallaquiča.

¹² Anawalinacaž miraquiča. Zoñinacpora ana zuma munasaquiča.

¹³ Jakziltat wejt tjonzcama tjurt'iñi kuzziz želačhaja, jalla niiqui ultimquiz-i qui liwriitaž cjequiča.

¹⁴ Yooziž liwriita žoñinacača Yooz kjuychiz familiaqui. Jalla nii zuma taku tjapa kjutñi tii muntuquiz parlitaž cjequiča, tjapa žoñinaca zizajo. Jalla nii wattanaqui tii muntuqui tucuzinzaquiča.

¹⁵ ‘Tii zakal cjiwča. Tii puntuquiztan Daniel cjita profetaqui cjiirchiča: “Tsjii noojiqui tsjii juc'ant ana wali akñi žoñi parizaquiča. Yooz chekan kjuyquinkaz luzaquiča”. (Tii taku liiñiqui intintaza.)

¹⁶ Jalla nuž cheržcu Judea yokquin žejlñi žoñinacaqui curunacžquin atipz waquiziča.

¹⁷ Nižaza nuž cheržcu kjuy juntuñ žejlñi žoñinacaqui chjujžcu ana kjuya luzla, cusasanaca chjitzjapa.

¹⁸ Nižaza pampiquin žejlñi žoñinacaqui persun zquiti apti ana quejppžquila.

¹⁹ Nii tjuñquiziqui ic maatakanacami k'azllu wawchiz maatakanacami ancha t'akjiri želaquiča.

²⁰ Yoozquinča mayiza ančhucqui, anaj zac timpuquin nižtanaca watsjapa, nižaza anaj jeejz tjuñquiz nižtanaca watsjapa.

²¹ Tii sufris timpu juc'anti sufris cjequiča yekja sufrisnacquiztanami. Yooz tii muntu paatiquiztan jecchuc anapanča tižta sufrisnacaqui watchiqui. Nižaza tekžtan najwchuc anaž iya juc'anti sufrisqui cjequiča.

²² Yoozqui anaž tii sufrisnaca tucuskatasaz niiqui, tjapa žejlñi žoñinacaqui ticznasača. Yoozqui niž illžta žoñinacž laycu nii sufrisnaca tucuskataquiča.

²³ ‘Nižaza yekjap žoñinacaqui ančhucaquiz chiyasača, tuž cjican: “Tekziča Cristuqui”. Yekjapac chiyasača, “Nii nacjuča Cristuqui” cjican. Jalla nuž chiyanami anapanča nii taku criyaquiča ančhucqui.

²⁴ Incallñi žoñinacaž tjonaquiča. Yekjapaqui “Cristutča wejrqui” cjequiča. Yekjapaqui “Yooziž tjaata taku mazniñtča wejrqui” cjequiča. Ninacaqui walja ispantichuca milajrunacaž paaquiča, incallzjapa. Tjapa žoñinacaž incallz pecaquiča, asta Yooziž illžta žoñinacami.

²⁵ Ima tižtanacaž tjonan wejrqui ančhucaquiz ultim weraral maznuča, ana incallta cjisjapa.

²⁶ Zoñinacaqui “Ch'ekti yokquin cheržquilalla, nicjuča Cristuqui” cjequiča. Jalla nii quintu nonžcu, anapanž okaquiča. Nižaza “Tii kjuyquizza Cristuqui” cjequiča. Jalla nii quintu nonžcu, anapan criyaquiča.

JESUCRISTUQUI WILTA TJONAQUICHA

²⁷ ‘Ančhucaquiz cjiwča. Jalla tižtal irata tjonača wejrqui. Wejrqui tsewctan cuchanžquita Yooz Zoñtča. Jaknužt lliwjlliwiñi tuwantan tajachuc lliwjčhaja, jalla nuž tjonača.

²⁸ Jakziquin zerwi žejlčhaja, jalla nekzi zkaranacaž ajcznaquiča.

²⁹ ‘Nekztanaqui tii sufris timpu wattan, tjuñiqui zumaquiča; kataquiča, ana iya kjanaquiča. Jiizmi nižazakaz ana iya kjanaquiča.

Warawaranacami pachquiztan tjojtснаquiĉha. Niżaza tseecu azziz Źejlĉinacaqui chjekinskattaŹ cjequiĉha.

³⁰ Jalla nektanaqui arajpachquin wejt siĉalaqui parisaquiĉha. Wejrqui tsewctan cuchanŹquita Yooz Zoĉtĉha. Jalla nuŹ wejt siĉala cherŹcu tjapa ana criichi Źoĉinacaqui kaaquiĉha. Ninacaqui wejt tjonz cheraquiĉha. Wejrqui tsjir taypiqueiz tjonacĉha walja aztan, niżaza Yooz EpiŹ aziŹ tjeeŹcan.

³¹ Niżaza wejt anjilanaca cuchanŹcaĉha weriŹ illzta Źoĉinaca juntjapzjapa, trompeta tjawŹcu. Illztanacaqui tjapa tii muntuquiztanpacha juntaptaŹ cjequiĉha.

³² 'Anĉhucqui higuera munti puntuquiztan zizza, jalla tuŹ. Higuera muntiqui ch'ojĉantiz kallantaquiŹ niiqui, waj kutunz timpuŹ kallantaquiĉha. Jalla nii zizza anĉhucqui.

³³ Jalla niŹta irataŹ tjapa weriŹ chiita wattan, tii muntuqui waj tucuz-inznaquiĉha. Jalla nuŹ anĉhucaquiz zizkatz pecuĉha. JaknuŹt tsjii Źoĉiqui kjuy zana ŹcatŹinĉhaja, luzjapa, jalla niŹta irataŹ ŹcatŹinĉiĉha tii muntu tucuzinzqui.

³⁴ Anĉhucaquiz weraral cjiwĉha. Ima tii timpuquiz kamĉi ŹoĉinacaŹ ticznан, tjapa weriŹ chiitanaca wataquiĉha.

³⁵ Arajpachami tii yok muntumi liwj tucuzaquĉha. Wejt takunacazti wiraŹ ana tucuzaquĉha.

³⁶ 'Pero wejt tjonz tjuĉimi, wejt tjonz orami anaŹ jecmi zizasacĉha, anaŹ arajpach Yooz anjilanacami, anaŹ Yooz Majchmi. Yooz Ejp alajakaz zizza.

³⁷ 'JaknuŹt NoeŹ timpu watĉhaja, jalla nuŹ wataquiĉha wejt tjonz tjuĉiquiziqui.

³⁸ NoeŹ timpuquiz ima tii muntu kjaztan tuzkatta cjen, Źoĉinacaqui tuŹ kamĉitaĉha, lujlcan, liccan, zalzcan, zalzjapa majtnaca tjaacan. Jalla nuŹ kamĉitaĉha NoeŹ warcuquiz luz tjuĉicama.

³⁹ Kjaz juyzu tjonzcama Źoĉinacaqui ana ĉhjul tantiyassi Źejlĉiĉha. Nekztan kjaz tjontiquiztan tjappacha Źoĉinacaqui kjazquiz kuzta ticziĉha. Jalla niŹta irataŹ wataquiĉha wejt tjonŹ tjuĉiquiziqui.

⁴⁰ Jalla nii noojiqui pucultan Źoĉiqui pampiquin cjeĉhani. Tsjiiqui arajpach kjutĉi waytiŹcu ĉjitiŹtaŹ cjequiĉha. Tsjiiqui ectaŹ cjequiĉha.

⁴¹ Niżazakaz pucultan maatakanacaqui jawuncan Źelaĉhani. Tsjaaqui arajpach kjutĉi waytiŹcu ĉjitiŹtaŹ cjequiĉha. Tsjaaqui ectaŹ cjequiĉha.

⁴² 'Jalla niŹtiquiztan anĉhucqui walja naynay Źelaquiĉha. ĉjulorat wejr, am Yooz Jiliri, tjonacĉhaja, jalla nii ora ana zizzuca.

⁴³ Anĉhucqui tii zizza. Kjuychiz Źoĉiqui tjaĉi tjonz ora zitzasaŹ niiqui, walja naynay Źejltasaĉha, niiz kjuya ana tjaĉiŹ luzta cjisjapa.

⁴⁴ Jalla niŹta irataŹ anĉhuqui naynay Źelaquiĉha. Tiripintit, ana pinsita orquiz tjonacĉha. Wejrqui tsewctan cuchanŹquita Yooz Zoĉtĉha.

PIZC PUNTA PIYUNANACA

⁴⁵ Tsjii kjuychiz Źoĉiqui piyunanacŹquiz kjuya tjiisiĉha, cwitisjapa, niżaza lujlz ora ĉjjeri tjaazjapa. ĆJakzilta piyunat zuma cumpliĉi, niżaza zuma cwitiĉiya? Nii tantiya.

⁴⁶ Jalla tiŹtaŹ piyunanacaqui. Kjuychiz ŹoĉiŹ irantiŹcan tsjii piyunaqui cwitican Źejlĉiĉha, jaknuŹt cumpjiitaŹlaja, jalla nuŹ cumplican Źejlĉiĉha. Jalla niĉha zuma piyunaqui. Niżaza nii piyunaqui cuntintuŹ cjequiĉha.

⁴⁷ Anĉhucaquiz weraral cjiwĉha. Nii kjuychiz Źoĉiqui tjapa niiz cusasanaca cumpjiyaquiĉha nii zuma piyunŹ kjarquiz.

⁴⁸ Nii kjuy cumpjiita piyunaqui ana zuma cjeĉhaj niiqui, pinsasaĉha jalla tuŹ: "Aaaa, wejt patrunaqui ana uri tjonasaka", cjican cjequiĉha.

⁴⁹ Jalla nekztan parti piyunanacžquiz wjajtasachä. Nižaza ana zum žoñinacžtan cumpant'asachä, lujlcanami liccanami.

⁵⁰ Jalla nuž kaman, nii kjuychiz patrunaqui tiripintitž tjonaquičha, tsjii ana zizta orquiz.

⁵¹ Jalla nekztanaqui nii ana zum piyunaqui zuma castictaž cjequičha. Nižaza nii ana zuma piyunaqui chjatkattaž cjequičha. Nižaza infiernuquin žejlcan, kaaquičha, nižaza iżke kjojaquičha.

25

TUNCA TURTKANACZ QUINTU

¹ 'Tii zakal chiyučha. Arajpach Yooz mantis puntuqui jalla tužučha. Tunca turtakanacaqui micha tanžcu tsjii zalzñi tjowžquin ojkchičha.

² Pjijskaltanaqui ima ojkcan ana zuma tantiichičha. Tsjii pjijskaltanaqui zuma listu tjaczitačha.

³ Nii pjijskaltan ana zuma tantiitazzi turtakanacazti michaka chjitchičha, ana iya parafina chjitchičha, tsjiižtan camzjapaqui.

⁴ Nii pjijskaltan zuma listu ojkchinacaqui wilta camzjapami parafina chjitchičha.

⁵ Nii zalzñi tjowaqui ana uri tjonchičha. Jalla nižtiquiztan tjaji tjonkatchičha tjappacha. Nižaza tjajchičha.

⁶ Jalla nekztanaqui chica arama kjawñi jora nonzičha, tuž cjican: "Cherzna. Zalzñi tjowa tjonžca. Ulanžca nižaza risiwžca".

⁷ Tjapa nii turtakanacaqui žaazičha, nižaza micha teezjapa tjaczičha.

⁸ Niiž upaquiztanalla nii pjijskaltan ana zuma tantiyazzi turtakanacaqui tsjii pjijskaltan turtakanacžquiz cjichičha, "Parafina tojnalla, wejtnaca parafina upzičha. Nižaza wejtnaca micha tjessa".

⁹ Pero nii walja tantiitazzi turtakanacaqui tuž kjaazičha: "Ana atchuca. Wejtnacaltami ančhucaltami anaž wacasačha. Jalla nižtiquiztan ančhucaž oka, jakziquin parafina tuyčhaja, jalla nicju. Ančhucaltajapa kjayžca".

¹⁰ Nii pjijskaltan turtakanacaz parafina kjayi ojktan, zalzñi tjowaqui iran-tizquichičha. Nekztan nii tantitazzi turtakanacaqui zalzñi tjowžtan kjuyquiz luzzičha, zalz pjijska paazjapa. Jalla nekztanaqui kjuya chawczičha.

¹¹ Wiruñiqui nii kjayi ojkchi turtakanacaqui quejpžquichičha, tuž cjican: "Wejt Jiliri, Wejt Jiliri, cjetznalla, cjetznalla".

¹² Pero niiqui kjaazičha, tuž cjican: "Ančhuc anal pajučha".

¹³ Jalla nižtiquiztan Jesusaqui ninacžquiz chiižinchičha tuž cjican:
–Anchucqui walja zuma listu tjacziž cjequičha. Wejt tjonz tjuñi orami ana zizza.

TJAATA PAAZNACA QUINTU

¹⁴ 'Arajpach Yooz kamañiqui jalla tužučha. Tsjii žoñiqui jiczquin ojkz cjen, niiž piyunanaca kjawzičha. Piyunanacžquiz paaz tjiizičha.

¹⁵ 'Tsjii tsjižquiz pjijska warank paaznaca tjaachičha. Tsjižquiz paa warank paaznaca tjaachičha. Tsjižquizqui tsjii warank paaznaca tjaachičha. Zapa maynižquiz ninacž negocio paaz atñi jama tjaachičha. Jalla nekztanaqui ojkchičha.

¹⁶ Nii tsjii pjijska warank paaznaca tanzñi piyunaqui paaztan negocio paachičha. Jalla nuž paažcu tsjii pjijska warank paaznacžtan canchičha.

¹⁷ Nižazakaz nii tsjii paa warank paaznaca tanzñi piyunaqui paaztan negocio paachičha. Jalla nuž paažcu tsjii paa warank paaznacžtan canchizakazza.

¹⁸ Nii tsjii warankalla paaznaca tanzñi piyunazti patrunž paaz chjojziča. Yokquiz ojt jwetžcu, jalla nezk chjojziča.

¹⁹ 'Azktan niž wiruñ nii paaz kajžñi patruaqui quejpžquichiča. Jalla nekztanaqui piyunacžquiztan kaja cobrichiča.

²⁰ Primiruqui nii tsjii pjijska warank paaznaca tanzñiqui tjonchiča. Jalla niiqui patrunžquiz paaznaca intirjichiča, tuž cjican: "Wejt Jiliri, wejtquiz pjijska warank paaznaca tjaachamča. Nii paaztan trabajžcu, iya pjijsk warank paaztan canchinča. Jalla tiiča amiž tjaatami nižaza weriž cantami".

²¹ Patrunaqui nižquiz cjichiča: "Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača". Nižaza cjichiča: "Luzca. Wejttan chica chjipzna. Cuntintum cjee".

²² Jalla niž wiruñ nii tsjii paa warank paaznaca tanzñi piyunaqui tjonchiča, tuž cjican: "Wejt Jiliri. Wejtquiz paa warank paaznaca tjaachamča. Iya tsjii paa warank paaztan canchinča. Jalla tiiča amiž tjaatami nižaza weriž cantami".

²³ Niž patruaqui nižquin cjichiča: "Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača". Nižaza cjichiča: "Luzca. Wejttan chica chjipzna. Cuntintum cjee".

²⁴ Pero nekztan nii tsjii warank paaznaca tanzñi piyunaqui tjonchiča. Niiqui patrunžquiz cjichiča: "Wejt Jiliri. Amqui c'ar patruamča. Jalla nii zizzatuča. Amqui ana čjulumi paažcumi canñamča. Nižaza ana čjacžcumi, ajžnamča.

²⁵ Jalla nižtiquiztan ekzinča, nižaza ojkžcu am paaznaca yokquiz chjojchinča. Pero tekziž am paazqui".

²⁶ Patrunaqui nii piyunžquiz tuž kjaaziča: "Ana zum piyuna. Jayri piyuna. Wejrqui ana čjacžcu ajžñinpanča, nižaza ana čjulumi paažcu canñinpanča. Jalla nižtapanim zizla amqui.

²⁷ Jalla nižtiquiztan wejt paaz bancuquiz mekaz uchanchucataž, jalla. Jalla nuž paatasaz niiqui, wejrqui quejpžcu bancuquiztan paaz majchtanpacha ricujtasacha".

²⁸ Jalla nekztanaqui nii patruaqui nekzi žejlñi žoñinacžquiz cjichiča: "Tii piyunžquiztan nii warank paaznaca kjaña. Nii tunca warank paaznacchiz piyunžquiz tjaa.

²⁹ Jakziltat želinchižlaja, jalla nižquiz iya tjaataž cjequiča, jilacama. Nižaza jakziltat zkoluc želinchižlaja, nižaza ana zuma trabajchižlaja, jalla nižquiztan tjappacha kjañtaž cjequiča.

³⁰ Tii ana zum piyuna chjatkata, zawncta zumchiquin. Jalla nicju kaaquiča, nižaza ižke kjojaquiča".

ZOÑINACA PJALZTAZ CJEQUICHA

³¹ 'Wejrqui tsewtan cuchanžquita Yooz Zoñtča. Tsjii noojiqui wejrqui wilta tjonacha, wejt azi tjeežcan. Rey cjita Jiliri cjeeča. Tjapa wejt anjilnacžtanpacha tjonacha. Poderchiz tjonacha žoñinaca pjalzjapa. Tsjan chekan juez Jiliritča wejrqui.

³² Wejt yujcquin tjapa tii muntuquiz kamñi žoñinaca juntjaptaž cjequiča. Jalla nekztanaqui wejrqui ninaca pjalznača, jaknužt tsjii awatiriqui uuza yekja nižaza cabra yekja pjalznačhaja, jalla nuž.

³³ Pjalžcu uuzanacaqui žew latuquiz cjequiča, cabranacazti zkar latuquiz cjequiča.

³⁴ Wejrtča chekan juez jiliritqui. Nekztanaqui wejt žew latu pjalžtanacžquiz tuž cjeeča: “Wejt Epiž k'aachita žoñinaca, pichalla ančhucalta tjaczta kamaña tanzjapa. Tii muntu paata ora, niwjctanpacha ančhucalta nii kamaña tjacztača, Yooztan kamzjapa, nii kjuychiz familia cjisjapa”.

³⁵ Nižaza cjeeča, “Ančhucqui zumanaca paachinčhucča. Weriz čhjeri eeciž cjen, ančhucqui wejtquiz čhjeri tjaachinčhucča. Nižaza weriz kjaz pecan, ančhucqui wejtquiz kjaz onanchinčhucča. Nižaza yekja yokquin ojklayan, ančhucqui wejtquiz tjajz kjuyquiz kjawzinčhucča.

³⁶ Weriz ana zquitchiz cjen ančhucqui zquiti onanchinčhucča. Nižaza laaquichi cjen, wejtquin tjonzinčhucča. Nižaza carsilquiz chajwcta cjen, ančhucqui wejtquin chertzni tjonchinčhucča”.

³⁷ Jalla nekztanaqui zuma kamañchiz žoñinacqui wejtquin cjequiča: “Wejt Jiliri, čhjulora am čhjeri eeci chercintaya? Nižaza čhjeri lujljapa, čhjulora onanchintaya? Čhjulora am kjaz pecan, onanchintaya?

³⁸ Čhjulora am yekja yokquin ojklayan tjajz kjuyquiz kjawzintaya? Čhjulora am ana zquitchiz cjen, zquiti onanchintaya?

³⁹ Nižaza čhjulora am laaquichi cjen, tjonzintaya? Čhjulora am carsilquiz cjen, amquin tjonzintaya?”

⁴⁰ Jalla nekztanaqui zuma kamañchiz žoñinacžquiz kjaaznača, tuž cjican: “Anchucaquiz weraral cjiwča. Wejrtča chekan juez Jiliritqui. Chjulora wejt jilanacžquiz yanapčhaja, humilde jilanacaž cjenami, jalla niiqui wejtquiztakaz yanapchinčhucča”. Nuž chiyacha pjalz tjuñquiz.

⁴¹ Jalla nekztanaqui wejrqui, chawc juez Jiliri cjican, nii zkar latu pjalžtanacžquiz cjeeča: “Ančhucqui, Yoozqui ančhuca quintracha. Jaziqui wejtquiztanž infiernuquin oka. Diablužtami niž anjilanacžtami tjacztača nii infiernuqui. Ančhucqui zakaz nii infiernuquin wiñaya sufraquiča.

⁴² Weriz čhjeriz eeciž cjen, ančhucqui ana wejtquiz čhjeri onanchinčhucča. Weriz kjaz pecan, ančhucqui ana wejtquiz kjaz onanchinčhucča.

⁴³ Weriz yekja yokquin ojklayan, ana tjajz kjuyquiz kjawzinčhucča. Weriz ana zquitchiz cjen, ana zquiti onanchinčhucča. Weriz laa cjen, nižaza carsilquiz cjen, ančhucqui ana wejr chertzni tjonzinčhucča”.

⁴⁴ Jalla nekztanaqui ninacaqui cjequiča: “Wejt Jiliri, čhjulora am čhjeri eeci cjen, kjaz pecchi cjenami, yekja yokquin ojklaychi cjen, ana zquitchiz cjen, laa cjen, carsilquiz chawcta cjen, jalla čhjulora am nižta chercintaya? Nižta chertučhaja, yanaptasača”.

⁴⁵ Jalla nektanaqui wejrqui, chawc juez Jiliri cjican, ninacžquiz kjaaznača, tuž cjican: “Anchucaquiz weraral cjiwča. Chjulora wejt jilanacžquiz humilde cjenami ana yanapchižlaja, wejtquiztakaz ana yanapchinčhucča”.

⁴⁶ Jalla nekztanaqui nii ana zuma kamañchiz žoñinacaqui infiernuquin cuchantaž cjequiča, wiñaya casticta cjisjapa. Nii zuma kamañchiz žoñinacazti Yooztan chica wiñaya kamzjapa okaquiča.

26

JESUSA TANZ TANTIITA

¹ Tjappacha nii chiitanaca žeržcu, Jesusaqui niž tjaajinta žoñinacžquiz cjichiča:

² –Ančhucqui zizza, puc majčha pascua pjijsaqui. Jalla nii pjijsa ora wejrqui intirjital cjeečha cruzquiz ch'awcta cjisjapa. –Jalla nuž cjichičha Jesusaqui.

³ Jalla nii oraqui timplu jilirinacami, liy tjaajiñi maestrunacami judío wajtchiz jilirinacami ajczičha, Caifás jilirž kjuy patiuquiz. Caifás cjitaqui timplu jilirinacžquiztan chawc jiliritičha.

⁴ Jalla nicju ninacaqui palt'ichičha, nižaza kazzičha mañžtan Jesusa tanzjapa. Jalla nuž tanžcu, Jesusa conzjapa kazzičha.

⁵ Nuž kazcu tuž cjichičha:

–Pjijsa paan Jesusa tanz anaž cjichuca. Zoñinacaqui aptjapznasačha.

JESUSIZ ACHQUIZ ASIITI ALZTA

⁶ Jesusaqui Betania wajtquiz želatčha, Simonž kjuyquiz. Niiž tuqui qui Simonaqui janchi mojkchi laatačha.

⁷ Jalla nekz želan, tsjaa maatak žonqui Jesusižquiz macjatžquichinčha. Naaqui tsjii putilla chjitchinčha. Nii putillquiz cuza mazk'a ulurchiz asiiti želatčha, ancha jila walurchiz. Nii putilltačha zuma alabastro cjita maztan paataqui. Jesusa mizquiz želan naa maatak žonqui niiž achquiz zuma asiiti alžinčinčha.

⁸ Niiž tjaajintanacaqui nii cheržcu, žawjzičha, naa žoña quintra. Jalla nekžtan tuž cjichičha:

–¿Kjažtiquiztan tii walurchiz asiiti pertejo?

⁹ Jalla tiiqui antis tuchucatačha walja jiluñ, nižaza pori žoñinacžquiz yanapzjapa.

¹⁰ Jesusaqui nii chiiñi nonžcu tjaajintanacžquiz ujzičha:

–¿Kjažtiquiztan taa žonatan chjiicjisejo? Anačha taa žon kjaž cjisqui. Jalla tuž taa žoñaž paataqui wejtquiztan walikazza.

¹¹ Porinacžquiz yanapz pecaquiz niiqui, porinacaqui ančhucatan panž želaquičha. Wejrzi ančhucatan ana žejlžtanpančha.

¹² Jalla taa maatak žoñqui wejtquiz tii zuma ulurchiz asiiti alžinžcu, wejt curpu tjaczinčha, tjatta cjisjapa.

¹³ Ančhucaquiz weraral cjiwčha. Jakziquinami tii muntuquiziqui liwriiñi Yooz taku parlita cječhaja, jalla nižtazakaz taa maatak žonaž paataqui parlita zakaz cjequičha, jalla naaquiztan cjuñta cjisjapa.

JUDASQUI JESUS TARAZUNAQUICHA

¹⁴ Tuncapan illzta žoñinacžquiztan tsjiiqui Judas Iscariote cjitatačha. Jalla niiqui ojkchičha timplu jilirinacžtan parli.

¹⁵ Jalla nuž parlican cjichičha:

–Ančhucaquiz Jesusal intirjasaž niiqui, ančhucqui ¿kjaž paaz pacas?

Jalla nii orapacha quinsa tunc paaznaca Judasquiz pacchičha.

¹⁶ Jalla nužquiz Judasqui čhjulator Jesusa tankatchuca cječhaja, jalla nii ora walja kjurchičha.

SANTA CENA PAACHICHA

¹⁷ Jalla nekžtanaqui ana liwaturžtan t'anta lujlz pjijsa, jalla nii pjijsaž primir tjuñquiz tjaajinta žoñinacaqui Jesusižquin macjatžcu tuž pewczičha:

–¿Jakziquin wejrnacqui tjaczni ojkz pecya, pascu čjjeri lujlzjapaya?

¹⁸ Jesusaqui tuž kjaazičha:

–Watja oka. Tsjii žoñžtan zalaquičha. Niižquiz cjee, “Maestruqui ž-cjičha. ‘Wejt ticz ora wajillačha. Am kjuyquiz pascua pjijsa paačha wejt tjaajinta žoñinacžtan’”.

¹⁹ Nekžtanaqui Jesusaž mantitacama ojkchičha. Nii tokinz't'ita kjuyquiz pascu čjjeri tjaczicaha.

²⁰ Weenjapa cjistan Jesusaqui nii kjuyquiz žejlcan mizquiz julziča niiž tuncapan tjaažinta žoñinacžtan.

²¹ Jalla nuž čhjeri lujlcan, ninacžquiz cjichiča:

–Ančhucaquiz weraral cjiwča. Tsjii tsjii ančhucqui wejt quintra paaquiča, nižaza tarazunaquiča.

²² Jalla nuž chiitiquiztan tjaažinta žoñinacaqui walja llaquita cjissiča. Jalla nekztan ninacaqui tsjiiza tsjiiza pewcziča, tuž cjican:

–Wejt Jiliri, ¿wejr cjesajo?

²³ Nekztanaqui Jesusaqui tuž kjaaziča:

–Anziqui wejttañ chicaž tii chuwquiztan lujlča nii tarazunñi žoñiqui.

²⁴ Wejrqui tsewctan cuchanzquita Yooz Zoñtča. Jaknužt cjiirta Yooz takuqui cjičhaja, jalla niicama okača. Nii tarazunñi žoñiqui anaj maa pjuchquiztan nastčhaja, waliž cjitasacha niižtaqui. Wejr tarazuntiquiztan wali chawc ujchiz cjequiča.

²⁵ Jalla nekztanaqui Judasqui, nii tarazunñi žoñiqui, tuž cjichiča:

–Maestro, ¿wejr cjesajo?

Jesusaqui tuž kjaaziča:

–Jesalla, amchiya.

²⁶ Jalla nuž pascua čhjeri lujlcan Jesusaqui niiž persun kjaržtan t'anta tanzičha. Nekztan Yooz Ejpžquin gracias cjican tjaažcu, t'anta kjolziča. Jalla nuž kjolžcu, niiž tjaažinta žoñinacžquiz tjaachiča, tuž cjican:

–Lujlzna. Jalla tiiča wejt curpu cuntaqui.

²⁷ Jalla nekztan persun kjaržtan tsjii wazu tanzičha. Yooz Epžquin gracias cjican tjaachizakazza. Nekztan tjaažinta žoñinacžquin čhjalžcu zapa mayni licchiča. Jalla nuž čhjalžcu, tuž cjichiča:

–Tii wazquiztan tjapa ančhucqui liczna.

²⁸ Wejt ljocquiztanž cjiča tiiqui. Wejt ljocžtan tsjii ew acta tjulžtaž cjequiča. Wacchi žoñinacž laycu wejt ljocqui tjawktaž cjequiča ninacž uj pertunta cjisjapa.

²⁹ Wejr cjiwča. Uwas kjaz ana iya licača, čhjulorcama wejt Yooz Ejp tjapa mantačhaja, jalla nekztan ančhucatan wila uwas kjaz licača.

TJAAJINTA ZOÑINACAQUI WICHANZNAQUICHA

³⁰ Nekztan Yooz wirzu itzcu, Olivos cjita curulla ojkchiča.

³¹ Jalla nekztanaqui Jesusaqui niiž tjaažinta žoñinacžquiz tuž cjichiča:

–Jalla tii weenqui tantal cjeeča. Nekztan tjapa ančhucqui ana wejtquin kuzziz tucaquiča. Jalla nuzpan cjiirta Yooz takuqui cjiča: “Uza awatiri contanaqui uuzanacaqui wichanznaquiča”.

³² Wejr jacatatžcuqui ančhuca tuqui okayača Galilea cjita yoka.

³³ Nekztanaqui Pedruqui cjichiča:

–Tjappacha ana amquin kuzziz tucačhani. Wejrzi ana wira nižta cjesača.

³⁴ Jalla nuž chiitiquiztan Jesusaqui tuž kjaaziča:

–Amquiz weraral cjiwča. Jalla tii weenpacha čhjep wila amqui ana wejr pajñi chiican k'otaquiča, ima wallpaž kjawan.

³⁵ Nekztan Pedruqui Jesuzquiz kjaaziča, tuž cjican:

–Wejrqui amtan chicami waztal ticznasača. Anapan amquiztan k'otasača.

Nižaza tjapa nii tjaažintanacaqui tsjiika chiichiča.

JESUSAQUI GETSEMANI CJITA YOKQUINCHA

³⁶ Jalla nekztan Jesusaqui niiž tjaažintanacžtan Getsemaní cjita yoka iran-tichiča. Jalla niwjc irantižcu, ninacžquiz cjichiča:

—Tekz julzna ančhucqui. Wejrqui nii nawcju Yooz Ejpžtan parli okača.

³⁷ Jalla nekztan Pedružtan nižaza Zebedeož pucultan majchnacžtan chjitchiča. Nekztanaqui Jesusaqui kuzquiz walja llaquisatča, nižaza ančaž llaclazatča.

³⁸ Jalla nižtiqiztan Jesusaqui nii čjepultan chjichta tjaajintanacžquiziqui cjichiča:

—Wejt kuzqui ancha llaquissa, ticzmayača. Ančhucqui tekzi žela. Wilaquiča, anača tjaajiquiča.

³⁹ Jalla nekztanaqui Jesusaqui tsjii koluc nawjcchuc ojkchiča. Yokquizkaz tuzi t'okžcu Yoozquin mayizichiča, tuž cjican:

—Wejt Yooz Ejp. Tii juc'ant sufris timpu anal watz pecuča. Tii sufrisquiztan liwriichucažlaj niiqui, amqui wejr liwriyalla. Pero anal wejt kuzcama cjis pecuča. Antiz jaknužt am kuz amtičhaja, am munañpakaj cjila.

⁴⁰ Jalla nekztanaqui tjaajintanacžquin quejpžquichiča. Tjajchi zalchiča. Jaziqui Jesusaqui Pedružquiz cjichiča:

—¿Ančhucqui anapanz wejttan tsjii orami wilasi atya?

⁴¹ Tjaji watzi žela, nižaza wilazaquiča. Yoozquin mayizaquiča, ana ujquiz tjojtsjapa. Chekapan, ančuca kuzqui wilasača. Pero ančuca curpuzti anaž awantasača.

⁴² Nekztan Jesusaqui wilta Yooztan parli ojkchiča. Tuž cjican, mayizichiča:

—Wejt Yooz Ejp, tii sufrisquiztan ana liwriita cjichucažlaj niiqui, am kuz munañpaj cjila.

⁴³ Nekztan wilta tjaajintanacžquin quejpžcu tjajchi zalchiča. Ancha tjaji tjonatča.

⁴⁴ Čjepquiziqui wilta ninacžquiztan ojkchiča, Yooz Ejpžquin parli. Primiru jaknužt parličhaja, jalla nuž zakaz parličiča.

⁴⁵ Jalla nekztanaqui tjaajintanacžquin quejpchiča. Ninacžquin paljaychiča, tuž cjican:

—Jaziqui tjajchinčhucča ančhucqui, nižaza jeejzinčhucča. Nužkazza. Wejrqui ujchiz žoñinacž kjarquiz intirjital cjeeča. Anz nii ora irjatžquiča.

⁴⁶ Zaazna. Ojkla. Wejr tankatni žoñiqui nii najwcž tjonča.

JESUSA PRESO CHJICHTA

⁴⁷ Jesusa nuž chiyan, Judasqui irantižquichiča. Niitača Jesusiž tunca-pan illzta žoñinacžquiztanqui. Judastan tama žoñinacaqui tjonchiča pajk cuchillunacchiz, nižaza wjajtz carotinacchiz. Timplu jilirinacami wajt jilirinacami ninaca cuchanžquichiča.

⁴⁸ Tarazunni Judasqui niž tuquilla nii žoñinacžtan kazzitača, tuž cjican:

—Wejrqui nii žoñžquiz chjulznača. Jalla niž cjequiča nii žoñiqui. Jalla nekztan zuma tanžcu chjichaquiča.

⁴⁹ Jalla nuž kazcu Judasqui Jesusižquiz macjatchiča, tuž cjican:

—Tjaajiñi Maestru, ¿walikazkay?

Jalla nuž tsaanžcu, chjulziča.

⁵⁰ Jesusaqui nižquiz kjaaziča, tuž cjican:

—Jila, ¿chjulquin am tjonjo?

Jalla nekztanaqui žoñinacaqui žcatžinžquichiča, nižaza preso chjichi tanchiča.

⁵¹ Jalla nuž paan, tsjii tsjii Jesusiž tjaajinta žoñiqui pajk cuchillu joožcu, quintri žoñž cjuñi čhajtžinchiča. Nii cjuñi čhajtžinta žoñiqui timplu jilirž piyunatača.

⁵² Jalla nekztan Jesusaqui tuž cjichiča:

–Am pajk cuchillu čhjojzna, nii cuchill čhjojzquiz. Jakziltat pajk cuchillu joojoočhaja, jalla ninacaqui pajk cuchillžtan conta zakaz cjequičha.

⁵³ Wejt Yooz Ejpžquiztan mayasačha, wejtquiz yanapzjapa. Jalla nuž maytiquiztan wejt Yooz Ejppqui anzpachaž wacchi anjilanaca cuchanžcasačha, tuncapan walja tama ejércitonacacama. ¿Nii ana zizya?

⁵⁴ Pero jalla nižta anal mayačha. Jalla tižta watstančha, jaknužt cjiirta Yooz taku chiičhaja, jalla nii cumplistančha.

⁵⁵ Jalla nekztanaqui Jesusaqui nii tjonchi žoñinacžquiz cjichičha:

–Ančhucqui pajk cuchillunacžtan wjajtz carotinacžtan wejr tani tjonchinčhucčha, wejr tjañi cjes, nižtažtakaz. ¿Kjažtiquiztan nižta tjonchinčhuctajo? Zapurupan ančhucatan žejlchinčha, timpluquiz tjaaajincan. Jalla nii oranacaqui anaž wejr tanchinčhucčha.

⁵⁶ Tjapa tii watñinacaqui jaknužt tuquita profetanacaž cjiirčhaja, jalla niit jama cumplistančha.

Jalla nekztanaqui tjapa Jesusiž tjaaajinta žoñinacaqui tsucaña wichanzičha. Jesusa zinalla ecchičha.

CHAWC JILIRINACZ YUJCQUIN CHJICHTA

⁵⁷ Jalla nii Jesusa tanñi žoñinacaqui Caifás cjita jiliržquin chjitchičha. Caifasqui timplu jilirinacž chawc jiliritičha. Caifás kjuyquin liy tjaaajiñi maestrunacami wajt jilirinacami ajczitačha.

⁵⁸ Pedruqui nii chawc jilirž kjuy patiucama apzičha ažquiztanalla. Nii patiuquin luzcu, julzi želatčha wijilñi policianacžtan. Jaknužt Jesusa watčhaja, jalla nii chertzjapa želatčha.

⁵⁹ Timplu jilirinacami, wajt jilirinacami, tjapa mantiñi jilirinacami Jesusiž quintra uj jwes pecatčha, toscaraž cjenaqui, conkatzjapa.

⁶⁰ Wacchi žoñinacami toscar tawkžtan prisintižquichičha Jesusiž quintra uj tjojtunzjapa. Pero ana čhjul uj jwesi atchičha. Ultimquiziqui pucultan toscar tisticunacaqui apantižquichičha,

⁶¹ tuž cjican:

–Tii žoñiqui cjiñičha, “Yooz timplu t'ezinžu, čhjep majquiz wiltal tsijt-snasačha”.

⁶² Jalla nekztanaqui timplu chawc jiliriqui tsijtsičha. Jesusižquiz cjichičha: ¿Kjažtiquiztan am ana kjaazjo? ¿Kjaž cjican tii žoñinacaqui am quintra chiijo?

⁶³ Jalla nuž chiižinanami Jesusaqui ch'uju žejlchičha. Jalla nekztanaqui nii timplu chawc jiliriqui niižquiz cjichizakazza:

–Zejtñi Yooz tjuuquiz am juramintu paakatačha, werara chiizjapa. Mazna. ¿Amqui Cristumkaya? ¿Nižaza Yooz Majchpanikaya?

⁶⁴ Jesusaqui kjaazičha, tuž cjican:

–Wejrčhay. Amqui jaknužum chiičhaja, jalla nužučha. Wejr zakal ančhucacajquiz cjeečha. Wejrqui tsewctan cuchanžquita Yooz Zoñtčha. Tsjii noojiqui ančhucqui wejr cheraquičha, juc'anti azziz Yooz žew latuquiz julzi. Nižaza arajpachquiztan tsjir taypiquiz wilta tjonačha.

⁶⁵ Jalla nuž kjaaztiquiztan timplu chawc jiliriqui niiž persun zquiti wja-jržinchičha, žawjchi kjanapacha tjeezjapa. Nižaza cjichičha:

–Tii žoñiqui persun tawkžtan Yooz quintra chiichičha. ¿Kjažt iya tisticunaca pecznasajo? Ančhucpacha tiiž ana wal takunaca nonzinčhucčha.

⁶⁶ ¿Kjažtat cjees?

Ninacaqui kjaazičha, tuž cjican:

–Tiiqui ujchizpančha. Paj ticzla.

⁶⁷ Jalla nekztanaqui Jesusiž yujcquiz llawzižtan tjujti kallantichiča, nižaza wjajtchiča. Partinacaqui yujcquiz čhajcziča,

⁶⁸ tuž cjican:

—Amqui Cristumžlaj niiqui, jazic ¿jequit am čhajczjo? Jalla nii pajalla.

PEDRUQUI K'OTCHICHA

⁶⁹ Nii ora Pedruqui zancu kjuy patiuquin julzi želatča. Nekz želan tsjaa piyuni qui nižquiz macjatžcu paljaychinča, tuž cjican:

—Amqui ojklayñamla nii Galilea yokchiz Jesusižtan, ¿ana jaa?

⁷⁰ Pedruqui parti žoñinacž yujcquiz k'otchiča, tuž cjican:

—Chjulquiztankam chiičhani, anal intintazuča.

⁷¹ Nekztanaqui Pedruqui zan kjutñi žcatžinchiča. Nekztan tsjaa piyuni qui nii cheržcu parti žoñinacžquiz cjichinča:

—Tii žoñipan ojklayatla tii Nazaret wajtchiz Jesusižtan chica.

⁷² Pedruqui wilta k'otchiča. Juramintužtan tuž cjichiča:

—Nii žoñi anapan pajuča.

⁷³ Jalla niž upaquiztan nekz žejlñi žoñinacaqui Pedružquiz macjatžcu, cjichizakazza:

—Chekapan, amqui zakaz Jesusiž parti žoñinacžtan chica ojklayñamla. Am takuqui kjanapachala, ninacaž takukam chiila.

⁷⁴ Nekztanaqui Pedruqui wilta k'otchiča, juramintu paacan.

—Anapal nii žoñi pajuča. Toscana chiičinžlaj niiqui, Yooz wejr castičanani. —Nuž cjichiča Pedruqui. Jalla nii orapacha tsjii wallpi jora kjawchiča.

⁷⁵ Jalla nii wallpa kjawñi nonžcu, Pedruqui Jesusiž chiita taku cjuñziča. Niiž tuquiqui Jesusaqui cjichiča: “Ima wallpaž kjawan, čhejp wilta amqui ana wejr pajñi chiičan k'otaquiča”. Jalla nuž cjuñžcu Pedruqui nekztan ulanchiča. Nižaza walja kuzquiz sint'ican kaachiča.

27

JESUSAQUI CHAWC JILIRIZQUIN CHJICHTA

¹ Kjanžquitan tjapa timplu jilirinacami, wajtchiz jilirinacami tsjii acuerduquiz luzziča Jesusa conkatžjapa.

² Jalla nekztan Jesusa chejlžcu chjitchiča Poncio Pilato cjita chawc jiliržquin. Nii oraqui naciona mantiñi gubernutača Pilatuqui.

JUDASQUI TICZICHA

³ Jesusa tarazunñi Judasqui Jesusa conata cheržcu, kuzquiz walja sint'ichiča. Jalla nuž sint'izcu nii quinsa tunc tjaata paaz tjepunchiča timplu jilirinacžquizimi wajtchiz jilirinacžquizimi.

⁴ Paaz tjepunžcu, tuž cjichiča:

—Wejr uj paachinča. Ana čjul ujchiz žoñi tarazunchinča.

Ninacazti nižquiz tuž kjaaziča:

—Jalla niiqui, ¿čjul importejo wejnacaquiztanajo? Niiqui amtakazza.

⁵ Jalla nekztanaqui Judasqui timpluquinpacha nii paaz tjojtunchiča. Nekztan ojkičiča. Persunpacha jora mokžcu, tsjijpscu ticziča.

⁶ Nekztanaqui timplu jilirinacaqui paaz ricujžcu, tuž cjichiča:

—Tii paazqui anaž učumqui ofrend cajquiz učasacha. Tiiča žoñž ljok kjayta paazqui.

⁷ Nekztanaqui ninacaqui kazziča nii paaztan yoka kjayzjapa. Nii yokaqui Campo del Alfarero nižta cjita tjuuchiztača. Yekja wajtchiz ticzi žoñinaca tjatžjapatača nii yokaqui.

⁸ Nužquiz tii timpucama nii yokž tsjii tjuuqui Campo de Sangre cjitazakaztača.

⁹ Jalla nuž Jeremías profetž takuqui cumplissiča. Tuqui timpu Jeremiasqui cjiirčiča, tuž cjican: “Israel žoñinacaqui nii žoñi tankatz precio utčiča, quinsa tunc paaznaca, jalla nii.

¹⁰ Nii quinsa tunc paaznacžtan Campo del Alfarero cjita yoka kjayaquiča, jaknužt Yooz Jiliriž mantičhaja, jalla nuž”.

JESUSAQUI CHAWC JILIRZ YUJCQUIN ZEJLCHA

¹¹ Nekztanaqui Jesusaqui naciona mantiñi chawc jiliržquin chjichtatača. Nii mantiñi jiliriqi Jesusižquiz tuž pewcziča:

—¿Amqui judionacž chawc jilirimkaya?

Jesusaqui tuž kjaaziča:

—Am jaknužum chiičhaja, nužuča.

¹² Timplu jilirinacami wajtchiz jilirinacami, jalla ninacaž uj tjojtuntan, Jesusaqui anaž čjulumi kjaaziča.

¹³ Jalla nekztanaqui Pilato jiliriqi tuž cjichiča:

—¿Anam am kjaaznaquiya tjapa tii am quintra chiyanauqi?

¹⁴ Jesusazti jalla nuž chiyanami ana čjulumi kjaaziča. Jalla nižtiquiztan nii mantiñi chawc jiliriqi ispantichiča. Ana čjul pinsimi atčiča.

¹⁵ Jalla nii pascu pjiztiquiz Pilato chawc jiliriqi tsjii cuzturumpichiztača. Tsjii priz žoñiqui cutzpanikaztača žoñinacaž chiitacama.

¹⁶ Tsjii ana wal žoñiqui Barrabás cjita prisu zakaztača.

¹⁷ Žoñinaca ajcziž cjen Pilatuqui ninacžquiz pewcziča, tuž cjican:

—¿Jakzilta tii tanta žoñinacat liwrii cutžta cjeequi? ¿Barrabás cjeequi? už ¿Jesus, Cristo cjita cjeeja?

¹⁸ Pilato jiliriqi zizziča, Jesusa chjaawjcu judío žoñinacaqui nii intirjichiča, jalla nii.

¹⁹ Pilatuqui niiž jusjiis mizquiz julzi želatča. Jalla nicju želan niiž tjunqui tsjii žoñi mazñi cuchanžquichinča. Nii mazñi žoñiqui tuž chiichiča: “Am tjun cjiča: ‘Nii zuma žoñžquiz ana mitisaquiča. Nii žoñiž cjen tižwan juc'ant ana wali čjuuzinča. Nii žoñžquiz ana mitis waquiziča”.

²⁰ Pero timplu jilirinacami wajtchiz jilirinacami, nii žejlñi žoñinacžquiz intintiskatchiča, Barrabás cutzna cjeyajo, nižaza Jesusa contaj cjila cjeyajo.

²¹ Jalla nekztanaqui nii mantiñi jiliriqi wilta žoñinacžquiz pewcziča, tuž cjican:

—¿Jakzilta pirit tii pucultan tantanacquiztan liwrii cutznaqui?

Žoñinacaqui kjaaziča, tuž cjican:

—Barrabás cutzna.

²² Pilato jiliriqi wilta ninacžquiz pewcziča, tuž cjican:

—Tii Cristo cjita Jesusižquiz, ¿čjulut wejr paa-aqui?

Tjappacha nii žoñinacaqui kjaaziča, tuž cjican:

—¡Cruzquiz ch'awczna!

²³ Nekztanaqui Pilato jiliriqi cjichiča:

—¿Čjul uj paachi teejo?

Nii žoñinacazti juc'anti kjawchiča:

—¡Cruzquizka ch'awczna! —cjican.

²⁴ Jalla nekztanaqui Pilato jiliriqi naychiča, nii žoñinaca ana intintiskachuca. Nii žoñinacaqui walja žawjchiž ch'ajrapatča. Jalla nekztanaqui Pilato jiliriqi kjaz zjičkatchiča. Nii zjičta kjazquiz kjara awjziča žoñinacž yujcquiz, tuž cjican:

—Tii zuma žoñž ticzqui anaž wejt uj cjequiča. Ančuca už cjequiča.

25 Tjapa nii žoñinacaqui kjaazičha, tuž cjican:

—Wejtnacaltazat uj cječhani, nižaza wejtnaca ocjalanacžtami.

26 Jalla nekztanaqui Pilato jiliriQUI Barrabás liwrii cutzičha. Nekztanaqui Jesusa wjajtzjapa mantichičha. Nižaza cruzquiz ch'awcta cjeYajo, zultatunacžquiz intirjichičha.

27 Jalla nekztanaqui nii mantita zultatunacaqui jilirž palacio kjuyquin Jesusa chjitchičha. Nekztanaqui tjapa nii zultatž tropanaca kjawsassičha, Jesusa muytata.

28 Nekztanaqui Jesusa čhjojkchičha. Jalla nuž čhjojkžcu tsjii ljoc murat zquti tjtuzičha.

29 Nekztan niž achquiz ch'ap pillužtakaz paažcu scaržinchičha, nižaza žew kjarquiz wara tanskatchičha. Jalla nuž paažcu niž yujcquiz quillzičha, tuž cjican:

—¡Viva tii judío žoñinacž chawc jiliri! —Jalla nuž chiican burla paachičha.

30 Nižaza llawzižtan nižquiz tjujtchičha. Niiž kjarquiztan wara kjañcan, achquiz wjajtchičha.

31 Jalla nuž burla paažcu, nižquiztan ljoc murat zquti čhjojkchičha. Nekztan wilta niž persun zquti tjtuzičha. Jalla nekztanaqui cruzquiz ch'awczjapa Jesusa chjitchičha.

JESUSAQUI CRUZQUIZ CH'AWCTA

32 Jalla nuž Jesusa chjichcan tsjii Cirene wajtchiz žoñi zalžquichičha. Simón cjitatačha. Jalla nii žoñiqui Jesusiž cruza kuzkatchičha.

33 Jalla nuž Gólgota cjita yokquin irantichičha. Nii yokaqui “Ach Tsijj yoka” cjitazakaztačha.

34 Jalla nicju tsjii vinžtan jaržtan t'ajžta lickatchičha. Pero nii mallžcu, ana licz pecchičha.

35 Cruzquiz ch'awczcu, zultatunacaqui Jesusiž zquti tanzjapa surtiasičha. Jalla nuž paatan profetž takuqui cumplissičha. Nii tuquita profetaqui tuž cjichičha: “Wejt zquti tanzjapa surtiasaquičha”.

36 Jalla nekztanaqui nijwcpacha ninacaqui wilzjapa julzičha.

37 Kjažtiquiztan Jesusa cruzquiz ch'awctatažlaja, jalla nii tabliquiz cjiirtatačha, tuž cjican, “Tiičha Jesusaqui, judío žoñinacž chawc jiliri”. Jalla nuž cjiiržcu ach tsewctuñ nii tabla ch'awczinchičha.

38 Nižaza pucultan tjañinaca cruzquiz ch'awctatačha, tsjiiqui žew latu tsjiiqui zkar latu.

39 Nekz watñi žoñinacaqui iñarcan, acha wewcžiñitačha.

40 Nižaza tuž cjichičha:

—Amqui cjiñamla, “Timplu t'ezinžcu čhjep majquiztan tsijtsnasačha”. Jalla nižta payi atasaž niiqui, jazic persunpacha liwriisalla. Yooz Maatimžlaj niiqui, cruzquiztan apakscu, chjijwžcalla.

41 Jalla nižta irata zakaz iñarchičha timplu jilirinacami, liy tjaajiñi maestrunacami, fariseo parti žoñinacami, wajtchiz jilirinacami. Jalla ninacaqui porapat parlassičha tuž cjican:

42 —TiiQUI yekja žoñinaca liwriichičha, pero persunpacha anaž liwrii atčha. Israel žoñinacž chawc jilirižlaj niiqui, cruzquiztan apakscu, chjijwžquila. Nekztan nižquiz criyasačha.

43 “Tiičha cjiñiqui, Yoozquin tjapa kuzziztčha. Wejrtčha Yooz Maatiqui”, cjican. Yoozqui tii k'aachichižlaja, jaziqui anzpacha Yooz tiij liwriila.

44 Nii cruzquiz ch'awcta tjañinacami Jesusižquiz quintru chiichizakazza.

JESUSAQUI TICZICHA

⁴⁵ Taypurquiztan majña kak oracama tjapa nii yokaqui zumchi cjissičha.

⁴⁶ Jalla nii orapacha Jesusaqui tjapa aztan kjawchiča, tuž cjican:

—Elí, Elí, ¿lama sabactani? —Jalla nii takuqui cjiča: “Wejt Yooz, wejt Yooz, ¿kjažtiquiztan wejr jaytichamtajo?”

⁴⁷ Yekjap nekz žejlñi žoñinacaqui jalla nii kjawñi nonžcu, cjichiča:

—Nonžna. Tiiqui Elías profetaž kjaw kjawla.

⁴⁸ Nekztan tsjii tsjiiqui esponja cjita kjaz ch'umñi apti zajtchiča. Jar vinu ch'umkatžcu zjicchiča. Nekztanaqui war puntižtan chjapžcu, Jesusižquin chjalziča, liquinzjapa.

⁴⁹ Parti žoñinacaqui cjichiča:

—Zela cjee. Antiz chekžla, Elías tii liwrii cunamit tjonachan.

⁵⁰ Nekztanaqui Jesusaqui altu joržtan wilta kjawchiča. Jalla nuž kjawžcu ticziča.

⁵¹ Jalla nii orapacha pajk timplu cortina chicatquiz juystokaz wjajrziča, tsewctan kozzuc. Nižaza yokac chjekinchiča. Nižaza cur akjinacaqui c'acchiča.

⁵² Nižaza sipulturanacaqui cjetsi cjissičha. Muzpa Yoozquin criichi ticzi žoñinacaqui jacatatchiča.

⁵³ Jesusaž jacatattiquiztan nii parti jacatatchi žoñinacaqui Jerusalén wajtquiz luzquichiča. Jalla nicju muzpa žoñinacaqui ninaca cherchiča.

⁵⁴ Zultat capitanaqui nii Jesusa wijilñi zultatunacžtanpacha yoka chjekiñi cheržcu, nižaza tjapa nii watñi cheržcu, walja tsucchiča. Jalla nekztan cjichiča:

—Chekapan tii žoñiqui werar Yooz Maatitakalala.

⁵⁵ Jalla nicju wacchi maatakanacaqui želatča, ažquiztan chekžcan. Nii maatakanacaqui Galilea yokquiztanpacha Jesusa apziča, nii atintizjapa.

⁵⁶ Jalla nii maatakanacaqui tuž cjita tjunchiztača: María Magdale-natača; nižaza Mariiqui Jacob Josež maatača; nižaza Zebedeož tjun želatča. Naaqui majchwichchiztača.

JESUSIZ CURPU TJATZTA

⁵⁷ Waj zumznan, tsjii ricach žoñi, José cjita tjonchiča. Arimatea wajtchiz žoñitača. Nižaza Jesusa cumpañ'iñi žoñitača.

⁵⁸ Jalla nii žoñiqui Pilato jiliržquin zali ojkchiča. Nuž zalžcu, Jesusiž curpu maychiča. Nekztan Pilato jiliričiqui mantichiča nii curpu intirjajo.

⁵⁹ Josequi Jesusiž curpu chjichcu, limpu saban pañžtan capziča.

⁶⁰ Niižta ew sipultura želatča, mazquiztan jwetta. Jalla nii sipulturquiz Jesusiž curpu tjatchiča. Jalla nuž tjatžcu, sipultur zana pajk maztan pjucziča. Nekztan ojkchiča.

⁶¹ Jalla nicju María Magdalena, nižaza tsjaa María julzi želatča, sipulturž yujcquiz.

SIPULTURA ZUMPACHA PJUCZTA, NIZAZA WIJILTA

⁶² Jakatažuqui, jeejz tjuñijapa tjaczcu, timplu jilirinacami, fariseo parti žoñinacami Pilato jiliržquin zali ojkchizakazza.

⁶³ Jalla nuž zalžcu tuž cjichiča:

—Wejt Jiliri, wejrnacqui tuž cjuñžnuča. Tii toscar chiiñi žoñiqui, žejtcanaqui, tuž cjichiča: “Chjep maj ticziquiztan jacatatača wejrqui” cjican chiiñitača.

⁶⁴ Jalla nižtiquiztan mantizinalla chjep majcama sipultura zumpacha wijilta cjila. Ana zuma wijilta cjequiz niiqui, niž tjaajinta žoñinacaqui ween niž curpu chjichi tjonasača. Jalla nekztanaqui žoñinacžquiz k'otasača:

“Jesusaqui ticziquiztan jacatatchiċha” cjican. Niċta toscara juc'ant anawaliċ jjesaċha, primira toscara chiitiquiztan.

⁶⁵ Jalla nektanaqui Pilato jiliriċqui ninacċquiz cjichiċha:

—Jalla tekz zultatunaca ųejlċha wijilċijapaqui. Anċhucqui oka, nii sipultura zumpachaċ chawjcċca, jaknuċt atċhaja, jalla nuċ.

⁶⁶ Jalla nektanaqui ojkċcu, sipultura zumpacha chawjcċquichiċha. Niċaza nii chawjcċta maz latuquiz sinalt'izcu ecchiċha. Niċaza nekzpacha nii sipultura wijilċi zultatunacami ecchiċha.

28

JESUSAQUI JACATATCHICHA

¹ Kjantati jeejz tjuċi watċcu Mariá Magdalena cjitiċqui tsjaa Mariatan sepultura chertzċi ojkchiċha, primir siman tjuċi kallznan.

² Tsċii Yooz anjilaqui arajpachquiztan chċijwċquichiċha. Nektan yoka walja chċekinchiċha. Anjilaċ nii sipultura pjucċta maz cjewċzinchiċqui. Nektan Yooz anjilaqui nii maz juntuċ julziċha.

³ Anjilaqui ancha kċaċniċha liwċliwċniċtakaz. Niċaza ancha chiwitaċha niċz zqutiċqui, kċatċniċtakaz.

⁴ Jalla nuċ chertzcu wijilċi zultatunacaqui walja tsucchiċha chċekinzcama. Ticzi ųoċniċtakaz cjissiċha.

⁵ Jalla nektanaqui nii anjilaqui maatakanacċquiz cjichiċha:

—Anaċ anċhuc eksna. Wejrċqui zizuċha, anċhucqui Jesusaċ kjurċha, cruzquiz ch'awceta Jesusa.

⁶ Anaċ tekz ųejlċha. Niiċqui jacatatchiċha, jaknuċt chiitċhaja, jalla nuċ. Pichay, tii sipultura chertzna.

⁷ Nektanaqui apuraċ oka. Niiċ tċaajinta ųoċinacċquiz mazca, tuċ cjican: “Jesusaqui ticziquiztan jacatatkalċha. Anċhuca tuċqui Galilea yokċquin okaychiċha. Jalla niċjuċ anċhucqui Jesusa jacatatchi cheraquiċha”. Wejrċqui cuċhanċquitaċha tii puntuquiztan anċhucaquiz maznajo. —Nuċ cjican paljaychiċha anjilaqui.

⁸ Jalla nektanaqui sipultur kjuya chertzcu, maatakanacaqui apura ojkchiċha, ispantichi niċaza walja cuntintu. Zati parċju ojkchiċha tċaajintanacċquin mazċi.

⁹ Jalla nuċ okan Jesusaqui ninacċquiz parizichiċha. Nektan ninacċquiz tsaanchiċha. Nii maatakanacaqui Jesusiċquiz macjatċcu rispċtcan, quilljatchiċha, Nektan niċz kċojcha ųcojrziċha.

¹⁰ Jalla nektanaqui Jesusaqui cjichiċha:

—Anaċ anċhucqui eksna. Wejt jċlanacċquin mazca, Galilea yok kċutċi oċkla ninacaqui. Jalla niċju ninacaqui wejr cheraquiċha. Jalla nii maznakuċha.

ZULTATZ QUINTU

¹¹ Jalla nuċ nii maatakanacaċ okan wijilċi zultatunacaqui watja ojkchiċha. Nektan timplu jilirinacċquin tċapa watchinaca quint'ichiċha.

¹² Jalla nektanaqui timplu jilirinacaqui wajtchiz jilirinacċquin parli ojkchiċha. Nuċ parliċcu tsċii acuerduquiz luzziċha. Jalla nektanaqui nii quint'iċi zultatunacċquiz paaz tċaachiċha,

¹³ tuċ cjican:

—Anċhucqui tii wajtchiz ųoċinacċquiz cċequiċha: “Ween wejtnacaċ tċajan, niċz tċaajinta ųoċinacaqui Jesusiċ curpu kċaċzcu chċitchiċha”. Jalla nuċuċ cċequiċha.

¹⁴ Chawc jiliriċqui anċhucaċ quint'ita nonznaquiċz niiċqui, wejrnacċqui niċztan parlaċha anċhucqui ana casticta cjċsjapa.

¹⁵ Jalla nekztanaqui nii zultatunacaqui nii ch'iizinta paaz tanžcu, ojkchiča. Jalla nekztan nii paaz laycu toscara chiichiča. Jalla nižta toscar quintu judío žoñinacaqui chiichiiñiča anz tii timpuquiziqui.

JESUSIZ MANTITANACA

¹⁶ Jalla nii maatakanacaž maztiquiztan nii tuncaman tjaajinta žoñinacaqui Galilea yoka ojkchiča, Jesusaž t'okinzt'ita curquin.

¹⁷ Jalla nicju Jesusa cheržcu, nižquiz rispitchiča. Yekjapa kuz turwaysi zelatča, ultimu werara Jesucristo, už anaj Jesucristo.

¹⁸ Jalla nekztanaqui Jesusaqui ninacžquin macjatžcu, tuž cjichiča:
–Wejtquizpacha tjapa mantiz poder tjaatača, arajpachquin žejlñinaca mantizjapami, nižaza tii yok muntuquiz žejlñinaca mantizjapami.

¹⁹ Jaziqui ančhucqui cuchnuča. Tjapa tii muntu nacionacžquin oka. Tjapaman nacionchiz žoñinacžquiz wejtquin kuzziz cjisjapa tjaajinžca. Nižaza Yooz Ejp, Yooz Majch, Yooz Espíritu Santo, jalla wejtnaca tjuužtan criichi žoñinaca bautizaquiča.

²⁰ Nižaza tjapa weriž mantitanaca nii žoñinacžquiz tjaajnaquiča ninaca cazajo. Zapuru wejrqui ančhucatan chica cjeeča, tii muntu tucuzinžcama. Jalla nii ančhucqui tiraž cjuñaquiča. Jalla nužoj cjila. Amén.

EL SANTO EVANGELIO SEGUN SAN MARCOS

¹ Liwriiñi takuqui Jesucristo Yooz Majch puntuquiztan jalla tužuča. Jesucristuča Yooz Majchqui.

JUAN BAUTISTAZ PUNTU

² Tuqui timpuqui tsjii Yooz cuntiquiztan chiiñi profeta želatča, Isaías cjita. Nii profetaqui cjiŕchiča tii takunaca:

“Nonžna. Yoozqui Jesucristuž tuqui tsjii žoñi cuchanžcaquiča, tjappacha tjacznažo.

³ Jaziqui ch'ekti yokquin nii žoñž joraqui altu tawkžtan paljayaquiča, tuž cjican: ‘Tsjii chawc jiliriqui tjonaučiča. Jaknužt jicz zuma tjacznačhaja, jalla nižta ančuca kuznaca zuma tjaczna. Ančuca kamañanacaqui zuma lijitumapanž cjee’ ”.

Nuž cjiŕchiča Isaías cjita žoñiqui.

⁴ Jalla nižtapan Juan Bautistaqui ch'ekti yokquin parizizquichiča. Nižaza žoñinaca bautissiča. Nižaza paljaychiča, tuž cjican:

–Kuznacaž campiya, ujnaca pertunta cjisjapa. Nekztan ančhuc bautisasača.

⁵ Tama žoñinaca Juanžquin ojkchiča, Judea cjita yokquiztan, nižaza Jerusalén cjita wajtquiztan. Jakzilta žoñit persun ujnacquiztan “ujchizpanča” cjican kuzquiz zint'ičhaja, jalla niiqui bautistatača Jordán cjita puj kjazquiz.

⁶ Juanž zquitiqui camello chomquiztan watstatača. Nižaza Juanqui zkiz tsjaychiztača. Niiž čhjeriqui tižtatača: langosto cjita kolta animalanaca, nižaza misq'ui. Jalla nii lujlñitača.

⁷ Juanqui ojklaycan žoñinacžquiz paljaychiča, tuž cjican:

–Tsjiiqui wejt wirquin tjonča. Jalla niiča wejtquiztan tsjan juc'anti poderchizqui. Niižquiz atintisjapa anal waquisuča, niiž čhjata jeržcu chjojkinimi. Inakaztča wejrqui.

⁸ Kjaztanka bautisuča. Nii tjonñi jilirizti Espiritu Santužtan bautisaučiča.

JESUSAQUI BAUTISTATACHA

⁹ Nekztanaqui Jesusaqui Nazaret cjita wajtquiztan ojkchiča. Nazaaret watjaqui Galilea cjita provinciuintača. Jesusaqui Juanžquin ojkchiča, Jordán cjita pujquin. Nekz Juanqui Jesusa bautissiča.

¹⁰ Jesusaqui kjazquiztan ulancan arajpacha cjetzi cherchiča, nii orapacha. Yooz Espiritu Santo palomažtakaz chjiwžquiñi cherziča. Niiž juntuñpacha irantižquichiča.

¹¹ Nekztan arajpachquiztan tsjii jora paljayžquiñi nonziča, tuž cjican:

–Amča wejt k'ayi Maatimqui. Amiž cjen ancha cuntintutča wejrqui.

JESUSIZTAN DIABLUZTAN

¹² Nekztanaqui Espiritu Santuqui ch'ekti yokquin Jesusa ojklayskatchiča.

¹³ Jalla nicjuž pusi tunc tjuñi kamchiča Jesusaqui. Nekziqui q'uit animalanaca zakaz želatča. Jaziqui Satanás cjita diablui Jesusižquiz tjonziča; ujquiz tjojtskatz pecatča. Pusi tunc tjuñi ujquiz tjojtskatz yanzatča. Nekztan Yooz anjilanacaqui tjontjonžquiñitača Jesusa atintizjapa.

JESUSAQUI TJAAJINCHICHA

¹⁴ Wiruñaquí Juanquí carsilquíz chawjctatacha. Nekztan Jesusaquí Galilea cjita yokquin ojkchiča. Nii yokquin Yooz liwriiñi taku paljaychiča, jaknužt žoñinaca Yooz wajtchiz žoñi cjissaja, nii.

¹⁵ Tuž cjican, paljaychiča:

– Tii timpumiž otča. Anzpacha žoñinacaquí Yooz wajtchiz žoñi cjesača. Kuznaca campiya, “ujchizpanča”, cjican. Nekztan tii liwriiñi takuž tjapa kuztan catoka. Tii takuž criya.

CH'IZ TANÑI ZOÑI KJAWZTA

¹⁶ Tsjii pajk kota želatča, Galilea cjita. Jesusaquí kot ataran ojklaycan pucultan jilazullca cherchiča; Simón, nižaza Andrés cjitatača. Ninacatača ch'iz tanñinacaquí. Nii ora ch'iz tanz kjazquíz tjojtznatča.

¹⁷ Nekztan Jesusaquí ninacžquíz cjichiča, tuž cjican:

– Ančhucquí, wejttan chicaž ojklayñiž cjee. Anziquí ch'iz tanz langzzizza. Pero wejrquí ančucaquíz yekja langzquin utznača, Yooztajapa žoñinaca kjawzquí, nii.

¹⁸ Nekztanaquí nii orapacha ninacaquí ch'iz tanz eccu, Jesusižtan chica ojklayñi cjissiča.

¹⁹ Jesusaquí tsjii koloculla nawjčjapa ojkžcu, tsjii pucultan žoñinaca cherchizakazza; Jacobo, nižaza Juan cjitatača. Ninacž ejpquí Zebedeo cjitatača. Nii pucultan žoñinaca warcuquíz želatča, ch'iz tanz azquichcan.

²⁰ Jaziquí Jesusaquí ninaca kjawziča, nižtan chica ojklayñi cjisjapa. Ninacž ejp warcuquíz želatča, piyunanacžtan. Pero Jacobžtan Juanžtan ejp ecchiča, Jesusižtan ojklayzjapa.

ZAJRAŽ TANTA ZOÑI

²¹ Nekztanaquí jeejz tjuñi Capernaum cjita watja luzziča Jesusižtan ninacžtan. Nekziquí judío žoñinacž ajcz kjuyquíz luzziča. Nekztan Jesusaquí tjaajinchiča.

²² Chawc jiliri irata tjaajnatča, zuma zizñi. Judiuž lii tjaajiñinacažtakaz ana nuž tjaajnatča. Jesusiž tjaajintiquiztan žoñinacaquí ispantichiča:

– ¡Ancha cuzala! – cjican.

²³ Nii ajcz kjuyquízpacha tsjii zajraž tanta žoñi želatča. Nii žoñiquí kjawchiča, tuž cjican:

²⁴ – Jesusa, Nazaret wajtchiz žoñimla. ¿Kjažtiquiztan am wejtnacaquíz mitizi? Wejrnaca aki tjonchamžlani. Jaziquí am pajuča. Zuma Yooz Žoñimla. – Nuž cjican, kjawchiča.

²⁵ Nekztan Jesusaquí zajrižquíz ujziča, tuž cjican:

– ¡Ch'uj žela! Tii žoñžquiztan ulna.

²⁶ Nekztan zajraquí nii tanta žoñi chekjinskatzcu, nižaza altu tawkžtan kjawžcu, ulanchiča.

²⁷ Nižta cheržcu, žoñinacaquí ancha tsucchiča. Ninacpora parlassiča, tuž cjican:

– ¿Chjulut nižta teejo? Tsjemataž tjaajinla. Walja azziz tawkchizla. Tii žoñiquí zajramiž mantila. Nižaza zajrami tiiž taku cazla. – Nuž ispantichi parlassiča.

²⁸ Oralla Jesusiž paataquí mazmztatača tjapa nii yokaran.

SIMON PEDRUZ AJMUZ MAA

²⁹ Nekztanaquí ajcz kjuyquiztan ulanžcu, Jesusaquí Simón, nižaza Andrés, jalla ninacž kjuyquíz luzziča, Jacobžtan Juanžtan, nuž.

³⁰ Simónž ajmuz maaquí ajpsquíz ch'ujlñi conchiz laaquichi želatča. Tjapa curpu walja jakatča. Jaziquí Jesusižquíz mazziča.

³¹ Jesusaqui macjatžcu, naaža kjara tanžcu, tsijtskatchičha. Nekztanaqui naaža kjakñi cona zarakchiča. Nekztan naa žonqui ninaca atintichinča.

ANCHA ZOÑINACA CHJETINTA

³² Nekztanaqui nii zez tjuñiž kattan Jesusižquiz tjapa laaquichi žoñinacami, nižaza zajraž tanta žoñinacami zjijctatača.

³³ Nižaza Jesusaž alujta kjuy zanaran tjapa nii wajtchiz žoñinacaqui ajcziča.

³⁴ Nekztanaqui Jesusaqui tjapaman laa žoñi čhjetinchiča. Žoñinacžquiztan muzpa zajranaca čhjatckatchičha. Zajranacaqui Jesusa pajchiča; pero Jesusaqui ana chiikatchičha.

YOOZ TAKU PARLITA

³⁵ Jakawenz tažuqui ima kjanžcan Jesusaqui žaaziča, iya zumchi zumchi cjican. Wajtquiztan ulanžcu, ana žoñž žejlz yokquin ojkchiča, Yooz Ejpžtan parli.

³⁶ Wiruñaquei Simonaqui niiž mazinacžtan Jesusa kjuri ojkchiča.

³⁷ Jesusižquiz zalžcu cjichiča:

—Tjapa žoñinacaqui am pewc pewcža.

³⁸ Nekztan Jesusaqui cjichiča, tuž cjican:

—Nacjuñž ojkla, visin watjanacquin. Nicju zakaz Yooz taku paljayzquiztanča wejrqui. Jalla nijapa tii muntuquiz tjonchinča.

³⁹ Nekztanaqui Galilea yokaran ojklaychiča, ajcz kjuyanacquin Yooz taku paljaycan, nižaza zajranaca čhjatkatcan.

MOJKCHI JANCHICHIZ ZOÑI

⁴⁰ Tsji mojkchi janchichiz žoñi želatča. Niiqui Jesusižquiz tjonchiča. Quillžcu, rocchiča, tuž cjican:

—Wejr čhjetinzim pecčhaj niiqui, wejr čhjetinzim atča amqui.

⁴¹ Nekztan Jesusaqui nii žoñi okžcu, niižquiz lanziča, tuž cjican:

—Wejr am čhjetnasachiya. Jaziqui čhjetintam cjissa.

⁴² Jalla nuž chiitiquiztanaqui nii orapacha nii žoñiqui žejtchi cjissiča, mojkchi janchi laa cjitiquiztan.

⁴³⁻⁴⁴ Nekztanaqui Jesusaqui nii žoñžquiz iwjt'ichiča, tuž cjican:

—Jaziqui tii čhjul am chiichijay! Anača jeczquizimi chiichiizqui. Timpluquin oka amqui. Nekztan timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantičhaja, jalla nuž ofrenda uchaquiča. Jalla nižtiquiztan žoñinaca am žejtchi zizaquiča. Jazic oka amqui. —Nuž mantichiča Jesusaqui.

⁴⁵ Nekztan nii žejtchi žoñiqui tjapa kjutñi ojklaychiča, nii žejtta quintu parlican. Tjapa žoñinacžquin nii quint'ichiča. Jalla nekztanaqui tjapa žoñinacaqui Jesusižtan zalz pecatča. Jalla nižtiquiztan Jesusaqui anaž jakzi wajtquizimi luzi atchiča, žoñiž zizan. Ana žoñž žejlz yokuñ ojklaychiča. Nižtami tjapa kjuttan žoñinacaqui niižquin tjonñitača.

2

ZUCH ZOÑI CHJETINTA

¹⁻² Tsji kjaž majquiztan Jesusaqui Capernaum wajta quejpcchiča, persun kjuyquiz. Nii zizcuqui, tama žoñinacaqui ajcziča, kjuya chjiipscama. Nižaza anatača campo kjuy zanaran. Nekztan ajczi žoñinacžquiz Jesusaqui Yooz taku tjaajinchiča.

³ Nuž tjaajnan, pakpaltan žoñinaca tjonchiča, tsji zuch žoñi kuzi.

⁴ Muzpa žoňi ajcziž cjen, Jesusižquin ana macjati atchiča. Nekztanaqui tsewctan kjuya pjetžcu, pjetquiztan zuch žoňi kjuylchuc chjijunžquichiča, niž tjajz zquitquiziqui.

⁵ Ninacaqui Jesucristužquin tjapa kuztan tjonchiča. Nii nayžcu, Jesusaqui zuch žoňžquiz paljaychiča, tuž cjican:

—Jilala. Jaziqui am ujnaca pertuntača.

⁶⁻⁷ Kjuyquiz julzi yekjap žoňinaca želatča, judiuž lii tjaajiňi žoňinaca. Ninacaqui kuzquiz pinsatča, tuž cjican:

—¿Kjažtiquiztan tiiqui nižta chiijo? Anawalipanča tiiž takuqui. ¿Ject ujnaca pertunasajo? Yoozpanikazla ujnaca pertunñiqui. —Jalla nuž pinsichiča lii tjaajiňi žoňinacaqui.

⁸ Jesusaqui persun kuzquiz ninacž pinsita zizziča. Nekztan ninacžquiz paljaychiča, tuž cjican:

—¿Kjažtiquiztan ančuca kuz nižta pinsejo?

⁹ ¿Jakzilta takut pjasila chiiz cjesajo? Tii zuch žoňžquiz chiižinsjo, “Am ujnacami pertunta”, ¿cjis pjasila cjesaya? už “Tsijsna. Am tjajz zquiti aptižcu oka”, ¿nuž chiiz pjasila cjesaj?

¹⁰ Tsewctan cuchanžquita Yooz Žoňtča wejrqui. Tii muntuquiz jiliritča, ujnaca pertunzjapami. Jalla nii zizjapa, ančhucqui tiiž chera.

Nekztanaqui zuch žoňžquiz cjichiča:

¹¹ —Amquiz cjiwča, tsijsna. Am tjajz zquitinaca aptaza. Oka am kjuya. —Nuž cjican chiichiča Jesusaqui.

¹² Nekztanaqui nii zuch žoňiqui tsijsiča. Tjajz zquiti aptichiča. Liwjjappachaž cheran, ulanchiča. Jalla nižta cheržcu tjapa žoňinacaqui walja ispantichi quirchiča, tuž cjican:

—Tižta wira ana cheriňča.

Nekztanaqui Yoozquin honora waytichiča.

LEVI CJITA ŽOŇI

¹³ Nekztanaqui Jesusaqui wajtquiztan ulanžcu, pajk kot ataran wilta ojklayatča. Nuž ojklayan, žoňinacaqui nižquin macjatžquichiča. Nekztan Jesusaqui ninacžquiz tjaajinchiča.

¹⁴ Wiruňaqui nawjcjapa ojkiča. Jiczquiz ojkan, Leví cjita žoňi cherchiča, aduanž kjuyquiz julznan. Levíž ejpqui Alfeo cjitatača. Jesusaqui nižquiz paljaychiča, tuž cjican:

—Wejttan chica ojklayňim cjequiča.

Nekztan tsijscu, Jesusižtan ojkiča Leviqui.

¹⁵ Nižaza Levíž kjuya luli ojkiča. Nicju Jesusižtan niž tjaajintanacžtan nuž lulan, aduanerunacžtan nižaza ujchiz žoňinacžtan nekzizakaz lulatča. Muzpa žoňinacaqui Jesusižquin apzitača.

¹⁶ Tsjii kjažt judiuž lii tjaajiňi žoňinaca zakaz želatča, fariseož partinacami. Jaziqui Jesusižtan anazum žoňinacžtanuntu lulan, naychiča. Nekztan pewcziča niž tjaajinta žoňinacžquiz, tuž cjican:

—¿Kjažtiquiztan tii Jesusa aduanerunacžtan nižaza ujchiz žoňinacžtan lujljo?

¹⁷ Ninacž chiita nonžcu, Jesusaqui kjaaziča, tuž cjican:

—Zuma žejtchinacaqui anaž kullňi pecasača. Laa žoňinacaž kullňic pecča. Wejrqui “Zumal kamuča” cjiňi žoňinacžquiziqui ana kjawzňi tjonchinča. Antiz “ujchizpanča” cjiňi žoňinacžquiz kjawzňi tjonchinča.

AYUNAS PUNTU

¹⁸ Juanž tjaajintanacžtan fariseož parti žoñinacžtan, jalla ninacaqui ayunasñipantača. Jaziqui žoñinacaqui Jesusižquiz pewczñi tjonchiča, tuž cjican:

—¿Kjažtiquiztan Juanž tjaajintanacžtan nižaza fariseož tjaajintanacžtan ayunasñejo? Amiž tjaajintanacazti ana ayunasñipanla.

¹⁹ Nekztan Jesusaqui ninacžquiz tuž cjichiča:

—Zalz pijstiquiz impittaž cjenacqui, ¿kjažt ayunasasajo? Zalsñi žoñžtan pijstaž paača. Zalsñi žoñi želanpacha, anaž ayunasasača.

²⁰ Tii jarquin nii zalsñi žoñiž kjantaž cjequiča. Nekztanž ayunasasača.

²¹ Jesusaqui tii takuzakaz chiichiča:

—Anaž jakziltami zijzi zquitquiziqui ew rimintižtan rimintasacha. Nižta rimintasaž niiqui, zijzi zquti juc'anti wjajrskatasacha. Ewqui zijziquiztan jaljznasacha. Nekztan juc'antiž tsjelanznasacha.

²² Nižaza anaž jakziltami zijzi zkiz luusquiz ew vino alznasacha. Nižta alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizcpacha pertisnasacha. Ew vinuqui ew zkiz luusquizpanž alznasacha. —Nuž cjichiča Jesusaqui.

JEEJZ TJUŃI QUINTU

²³ Nekztanaqui tsjii jeejz tjuñi Jesusaqui tiric zkal taypiran okatča tjaajintanacžtan. Zkal taypiran ojkan tjaajinta žoñinacaqui tiric oza kjajpchiča.

²⁴ Nii cheržcu, yekjap fariseonacaqui Jesusižquiz paljaychiča, tuž cjican:

—Cherzna. ¿Kjažtiquiztan nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

²⁵ Nekztan Jesusaqui kjaaziča, tuž cjican:

—Ančhucqui Yooz taku liichinčhucča, ¿ana jaa? Cjijrta Yooz takuqui tuž cjiča: učhum tuquita atchi ejp, David cjitaqui, niž mazinacžtan čhjeri eesckatchiča. Ana čhjul čhjerchiz cjen,

²⁶ Yooz timpluquiz luzziča. Nii ora timplu chawc jiliritača Abiatar cji-taqui. Timpluquin Yooz yujcquiz nonžta t'antanaca želatča. Jalla nii t'anta aptižcu, lujlchiča David cjitaqui. Nižaza niž mazinacžquiz tojunchiča. Anapantača permitta nii t'anta lujlžqui ina žoñžlaqui. Nižta lujlžcuqui lii quintrala niiqui. Timplu jilirinacžtapankaz nii t'anta lulaj cjitaqui.

²⁷ Nekztanaqui Jesusaqui ninacžquiz chiižinchizakazza:

—Žoñž laycu jeejz tjuñiqui uchtatača. Nii jeejz tjuñquiztanaqui žoñiča juc'ant chekanaqui.

²⁸ Wejrqui tsewctan cuchanžquita Yooz Žoñtča. Jeejz tjuñquizimi čhjulu paaz cjenami weril mantasacha. —Nuž cjichiča Jesusaqui.

3

KJARA KJOŃCHI ŽOŃI

¹ Nekztanaqui Jesusaqui wilta tsjii judionacž ajcz kjuyquiz luzziča. Nekz tsjii kjara kjoñchi žoñi želatča.

² Ujchiz jwesjapa quintri žoñinacaqui Jesusa awayt'atča, jeejz tjuñquiz čhjetnaquiya, už anaž čhjetnasaj.

³ Nekztanaqui Jesusaqui kjara kjoñchi žoñžquiz paljaychiča, tuž cjican:

—Tsijsna. Tii taypiquin cjisna.

⁴ Nekztan parti žoñinacžquiz paljaychizakazza, tuž cjican:

—¿Jeejz tjuñquiziqui učhum liiqui kjažt cjeejo? ¿Žoñžquiz zuma paasaya uz žoñžquiz ana zuma paasaja; žoñž wira liwriyasaya uz žoñž wira ticskatasaja? —Nuž pewcziča Jesusaqui.

Ninacazti ch'ujukaz želatča.

⁵ Nekztan Jesusaqui niiz muytata žejlñi žoñinacž kjutñi chercherziča. Ninacžjapa žawjchiča; nižaza ninacž chojru kuzziz cjen, llaquitatača. Nekztan laa žoñžquiz paljaychiča, tuž cjican:

—Am kjara chjinzna.

Nuž kjara chjinžcu, žejtchi quirchiča.

⁶ Nekztanaqui fariseo žoñinacaqui ulanchiča. Ulanžcu Herodes partinacžtan Jesusiž quintra parličiča:

—¿Jaknužt Jesusa conas? —cjican.

JESUSAQUI TJAAJINCHICHA

⁷ Nekztanaqui Jesusaqui niiz tjaajintanacžtan ojklaychiča pajk kot ata. Muzpa tama žoñinacaqui apziča.

⁸ Tjapa kjuttan yokquiztan tjonchiča, Galilea yokquiztan, Judea yokquiztan, Jerusalén wajtquiztan, Idumea yokquiztan, Jordán puž najwctan yokquiztan, Tiro Sidón wajtanac kjuttan, tjapa tii yokanacquiztan Jesusižquin tjonchiča, niiz ancha wali paatanaca cheri.

⁹ Nekztanaqui Jesusaqui niiz tjaajintanacžquiz chiižinchiča:

—Wejtta warcuž tjaczina, tii tama žoñinaca ana wejtquiz ts'acjasajo.

¹⁰ Muzpa žoñinacaž čhjetintaž cjen, tjapa laa žoñinacaqui Jesusižquin tjonchiča. Niižquiz lanzjapa, ancha ts'acjassiča.

¹¹ Nižaza čhjulorami zajranacaqui nii cherčhaja, niiz yujcquiz quillziča. Kjawcan, chiichiča:

—Yooz Matimča amqui, —cjican.

¹² Jalla nekztanaqui Jesusac ninacžquiz walja iwjt'ichiča, tuž cjican:

—Wejtquiztanac anača ančhucqui chiizqui, “Yooz Maatimča”, cjican.

TUNCAPAN APOSTOLONACA ILLZTA

¹³ Nekztanaqui Jesusaqui tsjii curullquin yawchiča. Niiž kuz pecta žoñinaca illžcu ninaca kjawziča. Nekztan niižquin macjatchiča illzta žoñinacaqui.

¹⁴ Tuncapan žoñi utchiča niiztan kamajo, nižaza Yooz taku parlajo.

¹⁵ Ninacžquiz poderchiz cjiskatchiča, Yooz aztan laa žoñinaca čhjetnajo, nižaza zajrami chjatkatajo.

¹⁶ Nii illzta žoñinacaqui tinacatača; Simonatača; niiqui Pedro cjitazakaztača.

¹⁷ Jacobotača; Zebedeož majchtača niiqui. Juantača; Jacobož lajktača niiqui. Jacobžtan Juanžtan altu jorchiz cjen Boanerges cjitazakaztača.

¹⁸ Andrestača. Filipitača. Bartolomitača. Mateotača. Tomas tača. Yekja Jacobotača; Alfeož majchtača niiqui. Tadeotača. Yekja Simonatača; tsjii politicutača niiqui, cananiž partitača.

¹⁹ Judas Iscariotitača; Jesusiž quintra tarazunchiča niiqui. Jalla nužuča Jesusiž illzta žoñinacaqui.

JESUSIŽ QUINTRA CHIICHICHA

Nekztanaqui Jesusaqui kjuyquin ojkičiča niiz illzta tjaajintanacžtan.

²⁰ Nekziqui muzpa žoñinacaqui ajcsizakaztača. Jesusaqui niiz tjaajintanacžtanaqui ana čhjeri luli atchiča, žoñinacaž muzpa ajcziž cjen.

²¹ Nekztanac yekjap žoñinacaqui cjichiča:

—Lucurataž niiqui, —cjican.

Jaziqui žoñiž lucurata cjiñiž cjen Jesusiž parintinacaqui tjonchiča Jesusa chjichi.

²² Nižaza Jerusalenquiztan judiuž lii tjaajiñinacaqui tjonchiča, tuž cjican:

—Jesusaqui Beelzebú cjita zajraž tantača. Nii zajriž jilirž aztan yekja zajranaca chjatkatñiča tiiqui. —Nuž cjichiča.

Beelzebú cjitaqui zajriž jiliritača.

²³ Nekztanaqui nižta chiiñi žoñi kjawžcuqui, Jesusaqui paljaychiča, tuž cjican:

—¿Jaknužt Satanás cjita zajraqui persunpacha chjatkatasajo?

²⁴ Tsjii wajtchiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii wajtaqui tjatantaž cjequiča.

²⁵ Nižaza tsjii kjuychiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii kjuychiz žoñinaca wichansnasača.

²⁶ Satanasaqui persuna t'aknsasaž niiqui, ezasača. Niiž aziqui miransnasača. Anaž azziz cjesača.

²⁷ Jaziqui anaž jecmi tsjii azziz žoñž kjuyquiziqui luzi atasača, ima azziz žoñi čejlcanaqui. Anaž niiž kinakunacami jwesi atasača. Čejlžcu, nekztan kinakunaca jwesi luzasača.

²⁸ Čeka ultimu werara chiyuča, tjapa ujnacami tjapa anazum takunacami pertuntaž cjesača.

²⁹ Pero jakzilta žoñit Yooz Espirituž quintra chiičhaj niiqui, anaž pertunta cjesača. Nii žoñiqui wiñaya ujchiz cjequiča.

³⁰ Žoñiž “Zajraž tantamča amqui,” cjiñiž cjen, nuž paljaychiča Jesusaqui.

JESUSIZ MAATAN LAJKNACZTAN

³¹ Nekztanaqui Jesusiž maatan lajknacžtan tjonchiča. Kjuj zanquiztan tsijsu, Jesusa kjawskatchiča.

³² Kjuyltan žoñinacaqui Jesuižquiz muytata julzi želatča. Ninacaqui Jesusižquiz mazziča:

—Tekz am maa tjonchinča am lajknacžtan. Am kjawža, —cjican.

³³ Nekztanaqui Jesusaqui kjaaziča:

—¿Ject wejt maajo, wejt jilanacajo?

³⁴ Nii muytata julzi žoñinacž kjutñi cheržcu, Jesusaqui cjichiča:

—Tinacača wejt maaqui, wejt jilanacaqui.

³⁵ Jakziltat Yooz mantitacama ojkčhaja, niiča wejt jilaqui, wejt cullaqui, wejt maaqui.

4

ZKALA ČHJACZ QUINTU

¹ Wilta Jesusaqui kot atquiz tjaajinchiča. Nekztanac muzpa žoñinacaqui nižquiz macjatžquichiča. Jalla nekztan Jesusaqui walsiquiz luzziča kot kjutñi. Žoñinacazti kot atquiz žejlchiča.

² Nekztan nii walsiquiztan žoñinacžquiz muzpa tjaajinchiča, tuž cjican:

³ —Nonžna ančhucqui. Tsjii žoñiqui zkal čhjaqui tewcchiča. Nekztan zkal semilla wichcan wichcanka čhjaczchiča.

⁴ Nuž čhjacan, parti semillanacaqui jicz latuquiz tjojtsiča. Nekzi wežlanacaqui tjonchiča nii semilla luli.

⁵ Parti semillanacaqui maz yokaran tjojtsiča. Maz juntuñaqui ljawalatača yokaqui. Nekztan ratulla jeczīča nii čhjactaqui.

⁶ Pero sii kjakiqui nii čhjactaqui ujsiča. Ana kozi zep'i atžcu, ratulla kjoñchiča.

⁷ Parti semillanacaqui ch'ap yokaran tjojtsiča. Nekztan ch'apinacakaz pajkchi, nii čhjactaqui tjatanchiča. Ana pookchiča.

⁸ Parti semillanacazti zuma yokquiz tjojtsiča. Nekztan cuza jeczīča, pajkchiča, čhjerchiča. Jaziqui nii semillanacaqui quinsatunca sojtatunca, patac čhjerchiz zapa zkal ozquiz, nuž pookchiča.

⁹ Jalla nekztanaqui Jesusaqui chiižinchiča:

–Jakziltažlaja nonzñi cjuñchiz niiqui, nonžla.

CHJACZ QUINTU INTINTISKATTA

¹⁰ Wiruñaquí Jesusa zinalla želan, niž tuncapan tjaajinta žoñinacžtan nekž žejlñinacžtan, ninacaquí Jesusa pecunchičha čhjacz quintu.

¹¹ Nekztanaquí Jesusaquí kjaazičha, tuž cjan:

–Ančhucaquí Yooz tjaajnaquíčha ančhuca kuzquí, niž mantita kamaña puntuquíztan zizjapa. Yekjap žoñinacžquizzti quintunacžtankaz nii puntuquíztan chiyučha, ana criiči kuzziz cjen.

¹² Jalla nižta chiyučha, chercanpacha ana zizajo, nonzcanpacha ana intinjajo, ana kuz campiizkatajo, ujquíztan ana pertunta cjisjapa.

¹³ Nekztanaquí Jesusaquí tjaajinta žoñinacžquí pewczičha, tuž cjan:

–¿Anačha tii zkala čhjacz quintu ziz, ančhucjo? ¿Jaknužt parti weriž chiita quintunaca zizasajo?

¹⁴ Ančhucaquí tjaajnučha. Zkala čhjacz quintuquí jalla tuž cjičha: Jakzilat Yooz taku paljayčhaja, jalla ničha nii zkala čhjaczni žoñiquí.

¹⁵ Tsjii semillanacaquí jicz latuquí tjojtsičha. Čhjulatorat tsjii žoñinacaquí Yooz taku nonžaja, oralla Satanasaquí tjončha, kuzquíztan nonžta taku kjañzjapa. Jalla nižtačha nii jicz latuquí yokažtakaz žoñinacaquí.

¹⁶ Nižaza tsjii semillanacaquí maz yokaran tjojtsičha. Nii maz yokažtakaz žoñinacaquí Yooz taku nonžcu, orallaž catokčha. Pero tsjii upacamakaz Yooz tawk jaru kamčha.

¹⁷ Ana koz zep'ichiz zkalažtakazza ninacaquí. Yooz taku catoktíquíztan yekjap žoñinacaquí quintrassa, ninaca čjaawjčha. Nižaza pruebanacac tjončha. Nekztan ratulla Yooz taku tjažza, quejpsa.

¹⁸ Nižaza tsjii semillanacaquí ch'ap yokaran tjojtsičha. Nii ch'ap yokažtakaz žoñinacaquí Yooz taku nonža.

¹⁹ Nekztanaquí čhjulkwinami pinsičha. Wali jiru cjis pecčha; čhjultakimiž pecčha. Nekztan kuzquí turwaysa. Nižta kuzziz cjen, Yooz taku tjananñičha. Ch'ap yokaran čhjacta semillanaca ch'apiž atipta, anaž pakji atčha. Jalla nižtaž nii ch'ap yokažtakaz žoñinacaquí. Nužquí nii žoñž kuzquí Yooz takuquí anaž pookčha.

²⁰ Tsjii semillanacaquí zuma yokquí tjojtsičha. Nii zuma yokažtakaz žoñinacaquí Yooz taku nonžcu, tjapa kuztan catokčha. Nekztanaquí ninacž kuzquí Yooz takuquí cusaž pookčha. Nii zum yokquí čhjactaquí cusaž čjerčha –quinsatunca, sojtatunca, patac čjerchiz zapa zkal ozquí. Jalla nižta Yooz takuquí pookčha zuma žoñinacž kuzquiziquí.

MICHA TJEEZ QUINTU

Jesusaquí tsjiižtan quint'ičičha, tuž cjan:

²¹ –Micha ana tjeznasačha cajun kjuyltan nonzjapa, nižaza tjaž zquit koztan nonzjapa. ¿Jalla nižta cjesajo? Anaž cjesačha. Micha tjezquí iztacž juntuñ nonznasačha, zuma kajajo.

²² Čhjulu čhjojtami wažtapanikaz cjequíčha. Nižaza Yooz puntu ana ziztanacami kjanapacha ziztapanikaz cjequíčha.

²³ Jakziltažlaj nonzñi cjuñchiz niiqui, nonžla.

²⁴ Jesusaquí cjichizakazza:

–Weriž chiita taku zuma nonžnalla ančhucquí. Jaknužt ančhuc tjaáčhaja, jalla nižtakaz Yoozquí ančhucaquí tjaasačha; iya zakaz yapznasačha Yoozquí.

²⁵ Jakziltažlaj catokñi kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokñi kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča. —Nuž tjaajinchiča Jesusaqui.

ZKAL QUINTU

²⁶ Nižaza Jesusaqui iya tjaajinchiča, tuž cjican:

—Yooz wajtchiz žoñinacaqui jalla tužuča. Tsji žoñiqui zkala čhjacača.

²⁷ Nekztan ween tjajča, majiñ žaaža. Jaknužt zkalaqui jeczaja, pajkčhaja, nii ana zizza žoñiqui.

²⁸ Zkal yokaqui juyžtokaz pookča. Primiruqui zkalaqui jecža, nekztan pjajkjallča, nekztan ozziz cjissa, nekztan čhjerchizza. Nuž pookča.

²⁹ Nekztan zkala wejlziž cjen pajk cuchillžtan zkala ajza. Zkala ricujz timpuča.

MOSTAZA CJITA SEMILLA PUNTU

³⁰ Jesusaqui tsjii quintužtan tjaajinchiča.

—Yooz wajtchiz žoñinaca, žjalla nii puntu irata čhjulut cjesajo? Ančucaquiz cjiwča, tii quintu irata cjesača, mostaz quintu.

³¹ Tsjii semillaqui mostaza cjitača. Tjapa semillquiztan juc'ant zkoltal-lača.

³² Pero čhjecta mostaz semillaqui walja pakji pajkča, čhjul zkalquiztanami juc'anti. Pajk itzzizza. Layñi wežlanacami itzquiz julžcu, ziwžquiz jeejznasača. —Nuž tjaajinchiča Jesusaqui.

³³ Jalla nižta quintunacžtan žoñinacžquiz tjaajinchiča, quintu nonžñi otčaňcama.

³⁴ Quintunacžtankaz tjaajinchiča. Nekztan niž persun tjaajinta žoñinacžquiz zapa quintumi intintiskatchiča, parti žoñinacaž ana želan.

JESUSAQUI TJAMIMI KJAZ LJOJKIMI MANTICHA

³⁵ Tsjii nooj tjuñiž kattan, Jesusaqui niž tjaajinta žoñinacžquiz paljay-čiča, tuž cjican:

—Tii kotž najwktuňtanž ojklaj, —cjican.

³⁶ Nekztan parti žoñinaca eccu, Jesusaqui tsjii walsiquiz ojkičiča niž tjaajintanacžtan. Nižaza yekja walsanacaqui ninacžtan chica ojkičiča.

³⁷ Nekztanaqui tsjii wali pjursanti tjami zalčiča. Jaziqui juc'anti tjamiž cjen walsiquiz ancha kjaz luzziča. Walsaqui jozipan kjaz chjijsiča.

³⁸ Jesusaqui walsa kjuyltan tsjii azquiz tjajatča, wirquin. Tjaajinta žoñinacaqui Jesusa žiñziča, tuž cjican:

—¡Tjaajiñi Maestro! ¡Ticzmayala učumqui! ¿Anam llaquisya?

³⁹ Wajtžcuqui Jesusaqui tjami mantichiča, apaltajo. Kjaz ljojki mantichizakazza:

—¡Ch'uj žela! —cjican.

Nekztanac tjamimi nižaza kjaz ljojkincami apaltichiča.

⁴⁰ Nekztan Jesusaqui ninacžquiz cjichiča:

—¿Kjažtiquiztan ancha tsucchinčhuctajo? ¿Ana wejtquiz kuzzizčhuckaya?

⁴¹ Tjaajinta žoñinacaqui ancha ispantichi cjissiča. Ninacpora parlassiča, tuž cjican:

—¿Čhjul žoñit teejo? Tiiž takucama tjamimi nižaza kjaz ljojki kazla.

5

ZAJRAZ TANTA ZOÑI

¹ Nekztanaqui kotž najwctuňtan irantichiča Gadara cjita yokquin.

2-3 Jesusaqui walsiquiztan ulantan, tsjii zajraž tanta žoñiqui campu santuquiztan tjonchiča. Campu santuquin kamñitača. Nižaza anaž jecmi nii zajraž tanta žoñi čheli atatča, jir carinžtanami.

4 Kjaž wilta kjojchami kjarami carinžtan čhejlžinzpantača. Čhejlžtiquiztan carinaqui kjoksñipankaztača; t'una kjolzñipankaztača. Anaž jecmi nii žoñž azquiziqui alcansatča, nii atipzjapaqui.

5 Ween majiñ campu santuran cururan ojklajñitača kjawcan. Maztan persun janchi chjojritsñitača.

6 Ažquiztan nii žoñiqui Jesusa cheržcu, zajtžquichiča, Jesusiž yujcquiz quillzlaki.

7 Nekztan altu joržtan chiichiča, tuž cjican:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'uča, anaž wejr tjatnalla, anaž wejr sufriskatalla.

8 Tuquiqui Jesusaqui mantichiča, tuž cjican:

—Zajra, tii žoñžquiztan ulna.

Nuž mantiquiztan zajraqi chiichiča.

9 Nižaza Jesusaqui pewcziča:

—¿Čhjul tjuuchizamta? —cjican.

Nii zajraqi kjaaziča, tuž cjican:

—Tama cjitaž wejt tjuuqui. Tamača wejrnacqui.

10 Nekztan nii zajranacaqui Jesusižquiz ancha rocchiča, ana najwcuñ ojklayskatajo.

11 Nekziqui tsjii lumquiz tama cuchinacaqui lulatča.

12 Nižtaqui Jesusižquiz rocchiča, tuž cjican:

—Cuchinacžquin wejrnac cuchnalla. Cuchinacžquizkaz luzkatalla.

13 Nekztanac Jesusac cjichiča:

—Oka nižtaqui.

Ulanžcu zajranacami cuchinacžquiz luzziča. Tsjii pizc waranka cuchinaca želatča. Zajranacaž luztan cuchinacaqui ispantichiča. Kot kjutñi jira pariju chjujcuttichiča. Kjajquiz luzcu, ticziča.

14 Nekztanaqui nii cuchi itzñi žoñinacaqui tsucaña zajtchiča. Wajtquinami jochquinami cwint'ichiča cuchi kjajquiz katta quintu. Nekztan žoñinacaqui ojkičiča, nii paatanaca cherzñi.

15-16 Jesusižquin irantižcu, zajraž tanta žoñi žejtchi cherchiča. Julzi, zquitimi kujtzi, žejtchi, nižta cherchiča. Jalla nuž cheržcu nii žoñinacaqui ancha tsucchiča. Ispantichiča. Nekztan nii cherzñi žoñinacaqui yekja žoñinacžquiz mazziča. Jaknužt nii zajraž tanta žoñi watčhaja, jaknužt nii cuchinacami watčhaja, nii mazmazziča.

17 Nekztanaqui žoñinacaqui Jesusižquiz rocatča:

—Tii yokquiztan okalla amqui, —cjican.

18 Nekztan Jesusa walsiquiz luznan nii žejtchi žoñiqui Jesusižquiz rocatča:

—Amtanpan tira žejlz pecuča, —cjican.

19 Jesusaqui ana munchiča, tuž cjican:

—Am kjuya oka amqui, am jamillanacžquin. Ninacžquiz mazca, “Wejr okziča Yoozqui. Yooz čhjetintitča wejrqui”, cjican.

20 Nekztanaqui Tunca Wajtanaca cjita yokaran ojklajchiča nii žejtchi žoñiqui. Nicjuñ jaknuž Jesusaqui nii čhjetinčizlaja, jalla nii mazmazquichiča. Jalla nekztanaqui nii maztiquiztan tjapa žoñinacaqui tsucchiča.

JESUCRISTUCHA LAA ZOÑI ČHJETINÑIQUI

²¹ Nekztanaqui Jesusaqui kot najwctuñtan quejppžquichiča walsiquiz. Kot ataran želan, nekzi qui muzpa tama žoñinacaqui niž muytata ajcziča.

²² Jalla nekztan tsjii Jairo cjita žoñiqui tjonchiča. Judionacz ajcz kjuy jiliritača ni qui. Jesusa cheržcu niž yujcquiz ezlaki quillziča.

²³ Nekztan Jesusižquiz ancha rocchiča, tuž cjican:

–Ticzmayaz wejt kolta uzqui. Tjonžcalla amqui. Wejt uzaquiz am persun kjaržtan lanžinalla, wejt uz žetajo, ana ticznajo.

²⁴ Nekztanac Jesusaqui nižtan chica nii žoñž kjuya ojkchiča. Okan tama žoñinacaqui Jesusiž wirquiz apziča, ts'acjascan tejwc tejwewarascan.

²⁵ Žoñinacz taypiquiz tsjaa laa žon želatča. Tuncapan wata ljoc okiñtača.

²⁶ Tsjii kjaž kullñi žoñinaczquin ojkchinča. Juc'anti sufriskatchiča ninacaqui. Nužquiz inapankaz tjappacha naaža cusasa castassinča. Naa žonqui juc'anti laa cjisnatča; ana wira zeti atatča.

²⁷⁻²⁸ Jesusiž paata quintunaca nonchinča. Nekztan Jesusiž wirquiztan macjatchinča. Tama žoñinacz taypiquiz želan, tuž cjican pinsichinča:

–Niž zquitikaj lanžnučhaj ni qui, žetaka.

Nekztan niž zquiti lanžinča.

²⁹ Lanžcu nii orapacha tsijtsiča naaža ljoc ojkñiqui. Zejtchinča. Persun janchi quiz naychinča, nii laaquiztan žejtchi.

³⁰ Jesusaqui persun kuzquiz naychiča, niž aztan naa žon čjetinchiča, nii. Nayžcu wir kjutñi cherziča. Nekztan pewcziča, tuž cjican:

–¿Ject wejt zquiti lanzejo?

³¹ Nekztanac niž tjaajinta žoñinacaqui cjichiča:

–Cherzna. Tama žoñinaca ancha amquiz ts'acjassa. ¿Kjažtiquiztan am nuž pewczjo, “Ject wejr lanzejo?” cjicanajo.

³² Nekztan Jesusac žoñinacz kjutñi chercherziča, jectčhalaj nii lanzi, nii pajzjapa.

³³ Nekztan naa žonqui persun curpu žejtchi nayžcuqui, ekekscan cjarcatcan macjatchinča, Jesusiž yujcquiz quillzinča. Nekztan naaqui tjapa werara mazzinča.

³⁴ Nekztan Jesusaqui cjichiča:

–Cullacalla. Tjapa kuztan criichž cjen, čjetinta cjissamča. Jaziqui žejtchipanim cjequičha. Cuntintum okaquičha.

³⁵ Nekztanaqui Jesusiž naa žonaquiz chiyan, tsjii žoñinacaqui tjonchiča; Jairo cjita judio jilirž kjuyquiztan tjonchiča. Nii jiliržquiz cjichiča:

–Am uzqui ticzinča. Anam iya tii maestružquiz molistis waquiziča.

³⁶ Jesusazti nii žoñinacz chiita taku ana catokchiča. Nekztan nii jiliržquiz cjichiča:

–Ana am niic kuz turwayskata. Yoozquin tjapa kuztanpan cjeella.

³⁷ Nekztan Jesusaqui Pedružtan Santiagužtan Juanžtan (Santiaguž lajk) ninacakaz apskatchiča. Partinaca ana apskatchiča Jesusaqui.

³⁸ Nekztan judío jilirž kjuyquin irantižquichiča. Nekzi žoñinacaqui ancha kjawcanž kaatkalča. Nižta cherchiča Jesusaqui. Ancha arnatča nii kaañi žoñinacaqui.

³⁹ Kjuyquin luzcu, Jesusaqui cjichiča:

–¿Kjažtiquiztan ancha aranjo, nižaza kaajo? Taa uzqui anača ticzin, tjajča.

⁴⁰ Nekztan nii žejlñi žoñinacaqui tjassiča, nii nonžcu. Jesusazti zancuñ nii žoñinaca ulanskatchiča. Nekztanaqui Jesusaqui maa ejpžtan niž mazinacztan luzziča, jakziquin naa uz želatčaja, nicju.

⁴¹ Nekztan Jesusaqui naa uza kjara tanzicha. Nižaza altu tawkžtan chichiča:

–Talita cumi, –cjican.

Nii takuqui cjiča, “Usalli, žaazna”.

⁴² Nekztanac nii orapacha naa uzqui žaaziñča. Ojklaychiñča. Tuncapan watchiztača naa uzqui. Nekztanaqui nii žoñinacaqui kuz kata tsucchiča. Ancha ispantichiča.

⁴³ Nekztan Jesusaqui zuma iwjt'ichiča, tuž cjican:

–Ana jeczquizimi tii čhjetinta quintu chii chiyauquiča.

Nuž mantižcu, ninaczquiz mantichizakazza, naa uzaquiz čhjeri tjaajo, nii.

6

NAZARET CJITA WAJTQUIN OJKCHICHA

¹ Nekztanaqui Jesusaqui najwctan persun wajtquin ojkchiča niiž tjaajintanacztan.

² Jeejz tjuñquiziqui judionacz ajcs kjuyquiz tjaajinchiča. Nii nonžcuqui žoñinacaqui ispantichiča, tuž cjican:

–¿Jakziquin zizzit tii žoñi tii tjaajinznacaya? ¿Jaknuž zizzit tii tjaajinznacaya? ¿Jaknuž paachit tii milajrunacaya? ¿Jaknužupan teejo?

³ Tiiqui carpintirukazla, María majchča tiic, ¿ana jaa? Tiiž lajknacaqui Jacobo, José, Judas, Simón cjitača. Ninacztan tiiž cullaquinacztan tii wajtquiz učhumnacztan kamča. –Nuž cjichiča.

Nekztanaqui nii wajtchiz žoñinacaqui Jesusiž quintra muzpa žawjziča.

⁴ Nekztan Jesusac chiichiča:

–Tjapa žoñinacaqui Yooziž uchta profetžquiz rispitle. Pero persun wajtchiz žoñinacami persun parintinacami persun familianacami profetžquiz anaž rispitz pecñiča.

⁵ Nekziqui nii wajtquiz tsjii kjažultan žoñi čhjetinchiča, kjaržtan lanžcu. Ana iya milajru paayi atchiča.

⁶ Ana criiñiž cjen Jesusaqui cjichiča:

–¿Kjažtiquiztan tii žoñinacaqui ana criižo? ¿Kjažt cjisnaquejo?

Nekztanaqui nii wajtquiztan ulanžcu, visinunacz wajtquiztan wajta tjaajinñi ojklaychiča Jesusaqui.

TJAAJINTA ŽOÑINACA CUCHANTA

⁷ Jesusaqui niiž tuncapan tjaajinta žoñinaca kjawžcu, pucultan pucultan cuchanchiča:

–Ančhucqui Yooz aztan zajranaca chjatkataquiča, –cjican.

⁸ Jalla nekztanac mantichiča, tuž cjican:

–Ančhucqui anaž čhjulumi chjichaquiča jiczjapaqui, anaža žak quelzmi anaza čhjerimi anaza paazmi. Tsjii atskaz chjichaquiča.

⁹ Chjata čhjatžcuča okaquiča. Nižaza tsjii zquitillchizkaz okaquiča, ana pizc zquitichiz.

¹⁰ Ančhucqui jakziquinž alujasačhaja, nekziž kamaquiča, čhjulatorat nii wajtquiztan ulnačhaja, niicama.

¹¹ Jakzilta watjat ančhuc ana cherz pecčhaja, nižaza ančuca takumi ana nonz pecčhaja, jalla nii wajtquiztan ulnaquiča. Nekztan nii yok pulpu ančuca kjojchquiztan tsajt tsajtsnaquiča, ninacz uj tjeezjapa. Ultim weraral cjiwčha, juyzu tjuñquiziqui Sodomo nižaza Gomorra cjita watjanaczchiz žoñinacaqui castictaž cjequiča. Pero nii ana ančhuc pecñi žoñinacazti juc'anti castictaž cjequiča. –Nuž cjichiča Jesusaqui.

¹² Jalla nekztanaqui niiz tuncapan tjaaajinta zoñinacaqui Yooz taku paljayi ulanchičha, tuž cjican:

—Ančhucqui tjappacha kuz campiya. Ančuca uj paaznacaqui eca.

¹³ Nekztanaqui zmali zajranaca chjatkatchičha. Nižaza asiitižtan achquiz tjawkžcu, muzpa laanaca čhjetinčičha.

JUAN BAUTISTA CONTA

¹⁴ Tjapa kjutñi nii yokaran zoñinacaqui Jesusiž ancha wali paata milajrunaca zizzičha. Herodes cjita nacionž chajwc jilirimi zizzizakaztača. Nii Jesusiž paata milajrunacž puntu nonžcuqui, Herodesaqui cjichičha:

—Juan Bautistala tiiqui. Ticziquiztan jacatatchižlani. Jalla nižtiquiztan walja milajrunaca paazjapa poderchizlani.

¹⁵ Yekjap zoñinacaqui cjichičha:

—Elías cjita profetila tiiqui.

Yekjapaqui cjichičha:

—Tuquitan Yooz taku parliñi profetažtakazla tiiqui.

¹⁶ Jesusiž quintu nonžcu Herodes cjita nacionž chawc jiliriqui cjichičha:

—Juan Bautistala tiiqui. Wejrqui tiiz acha pootkatchinčha. Anziqui jacatatchila tiiqui. —Nuž cjichičha Herodesaqui.

¹⁷ Tuquiqui tužu watchičha. Herodiy cjita žonqui Felipež tjuntača. Felipitača Herodes jilaqui. Nekztan Herodesaqui Felipež tjunatan zalsičha. Nekztan Herodiy cjita tjunqui Herodižquiz paljaychičha:

—Nii Juan tankata. Carsilquiz chawjczna. —Nuž cjichinčha naaqui.

¹⁸ Tuquitan Juanqui Herodes cjita jiliržquiz chiižinčičha, tuž cjican:

—Am persun jilž tjunatan zalsamčha amqui. Nuž ana waquisičha. Jaziqui liy quintram kamčha amqui.

¹⁹ Nekztanaqui naa Herodiiqui Juanž quintra ancha žawjchinčha. Conkatzpan pecatčha. Pero ana atchinčha.

²⁰ Juanqui zuma kuzziztača, ana ujchiz zoñi. Nekztan Herodesaqui Juanžquiz eksičha. Nekztan Herodiyqui ana conkati atchinčha. Herodesaqui Juanž taku nonžcu, walja paysnakchičha. Jalla nuž cjenami Juanž taku jutzazñipankaztača.

²¹ Wiruñiqui niiz cumpliaños pjijztiquiz Herodesaqui cusa čhjerinaca luli kjawzičha. Wajt jilirinaca, sultatž jilirinaca, Galiliquiztan ricach zoñinaca, ninaca kjawzičha. Nii tjuñquiz naa Herodiyqui ancha kuz tjutzinčha, Juan conkatzjapaqui.

²² Nii nooj jakziquin čhjeri lujlčhaja, nicju Herodiyž turqui tsati luzzinčha. Nekztanaqui naa turaž ancha tsajtchinčha. Nii cheržcu, jutzazzičha Herodižtan niiz invitta zoñinacžtanaqui. Nekztan nii Herodes jiliriqui naa turaquiz paljaychičha, tuž cjican:

—Chjulum pecchaj niiqui, wejtquiztan mayaquičha. Amquiz tjaača.

²³ Jaziqui Herodesac turaquiz juramentužtan chiichičha, tuž cjican:

—Chjulu pecanami amiž maytacama chicat wejt nacionami amquiz tjaasača.

²⁴ Nekztan ulanžcu naa turqui maa pewczinčha:

—¿Chjulut wejr mayas, mama? —cjican. Maaqui kjaazinčha:

—Juan Buatistiž acha maya.

²⁵ Nekztan apura jiliržquiz luzquichinčha naa turqui. Maychinčha maaž mantitacama, tuž cjican:

—Anzpacha tsjii chuwwquiz Juan Bautistiž achal pecučha.

²⁶ Nekztanaqui nii jiliriqui ancha llactazzičha. Juramentužtan chiichiz cjen, nižaza niiz mazinacaž nonziž cjen, ana kjaž cjiyi atchičha.

27 Nekztan sultatu cuchanchiĉha JuanŹ acha zjiĉajo.

28 Carsila oĉkchiĉha mantita sultatuqui. Nekztanaqui JuanŹ acha pootŹcu chuwwquiz zjiĉchiĉha. Naa turaquiz acha tjaatataĉha. Nekztan naaqui maaquin acha tjaaŹquichinĉha.

29 Jalla nekztanaqui JuanŹ acha poota nonŹcuqui, JuanŹ tjaajintanaqui niiz curpu mayi tjonchiĉha, chjitzjapa, yokquiz tjatzjapa.

LUJLZ CHJERI TJAATA

30 Wiruĉnaqui JesusiŹ cuchanta Źoĉinacaqui quejpŹquichiĉha. JesusiŹquiz cwint'ichiĉha tjapa oĉklaytanacami tjapa tjaajintanacami. Nekztan Jesusaqui ninacŹquiz paljaychiĉha, tuŹ cjican:

31 —Jakziĉuint ana Źoĉinaca Źejlĉhaja, nicju tjappachaŹ ojklalla. Nicju jeejŹcaquiĉha. Ancha ŹoĉinacaŹ tjontjonŹtiquiztan wira ana ĉherimi lujlzu-cataĉha.

32 Nekztanaqui JesusiŹtan niiz tjaajinta ŹoĉinacŹtan, jalla ninacakaz oĉkchiĉha; ana Źejlz yokquin walsiquiz oĉkchiĉha.

33 Pero eclichi Źoĉinacaqui ninaca oĉkĉi cherchiĉha. Źoĉinacaqui ninaca pajŹcu tjapa wajtquiztan kjoĉchuĉ zajtchiĉha. Jaziĉui nii Źoĉinacaqui JesusiŹ tuqui irantichiĉha.

34 Jesusaqui nii yokquin irjatŹcuqui walsiquiztan ulanchiĉha. Nekztan tama Źoĉinaca cherziĉha. Nii Źoĉinaca okziĉha. Ana awatirchiz uuzanacaŹtakaz nii Źoĉinaca Źelatĉha. Nekztanac Jesusac walja tjaajinchiĉha.

35 Ima tjuĉ katalla JesusiŹ tjaajintanaqui tjonchiĉha, tuŹ cjican:

—Ana Źejlz yokquizla uĉhumqui. Tjuĉiqui wajillaŹ kataquiĉha.

36 Jaziĉui tii Źoĉinacaqui joch kjutĉimi wajt kjutĉimi cuchnalla, nicju ĉherimi kjajŹcajo. NinacŹta ĉheri ana Źejlĉha.

37 Jesusaqui kjaaziĉha:

—Anĉhucĉha tinacŹquiz ĉheri tjaa.

Ninacaqui cjichiĉha:

—ĉTinacŹquiz ĉheri tjaazjapa, paa patac paaztan t'anta kjayi okas?

38 Nekztan Jesusac kjaaziĉha:

—ĉKjaŹ t'antat anĉhucalta Źejljo? CherŹca anĉhucqui.

Nekztan cherŹcu quejpŹquichiĉha ninacaqui. Nekztan chiichiĉha, tuŹ cjican:

—Pjijska t'anta pizc ch'iz Źejlĉha.

39 Jalla nekztanaqui Jesusaqui ninacŹquiz cjichiĉha:

—Jaziĉui pastu yokaran t'aka t'aka tii Źoĉinaca tjulŹna,

40 patacquiztan pataca, pjijska tuncquiztan pjijska tunca.

Nekztan nuŹupan julziĉha Źoĉinacaqui.

41 Nekztanaqui Jesusaqui nii pjijska t'anta pizc ch'iz niiz kjarquiz tanzcuqui, tsewcchuc cherziĉha. Nekztan Yooz EjpŹquin gracias cjican chiichiĉha. Nekztan t'anta kjolziĉha. T'una t'una kjolŹcu, tjaajintanacŹquiz tojziĉha, parti ŹoĉinacŹquiz onajo. NiŹaza nii pizc ch'iz tojzizakazza Źoĉinaca lulajo.

42 Nekztan tjapa Źoĉinacaqui chjeki cjissiĉha.

43 Nekztanaqui Źejtchi t'anti t'unanacami ch'iz t'unanacami tuncapan canasta chjiĉpi ricujchiĉha.

44 Nii t'anta lujlĉi luctak Źoĉinacaqui pjijska warankataĉha.

JESUSAQUI KJAZ JUNTUĉ OĉKCHICHA

⁴⁵ Nekztanaqui Jesusaqui niiž tjaajintanaca walsiquiz luzkatchičha, nii kota kakajo, Betsaida cjita wajtquin kotž najwcchaktan. Ninacž ojektan Jesusaqui parti žoñinacžquiz cjichiča:

—Ančhuca kjuyaž okaquiča.

⁴⁶ Zoñinaca cuchanžcuqui Jesusaqui cur kjutñi yawchiča, Yooz Ejpžtan parlisjapa.

⁴⁷ Nii oraqui zumchitača. Curquin Jesusaqui zinallatača. Pajk kotquiz-iqui nii tjaajinta žoñinaca walsiquiz kjaz kot taypiquintača.

⁴⁸ Jesusaqui curquiztan walsa cherchiča. Tjamiqi pjursantitača. Nii tjaajinta žoñinacaqui tjapa aztan langznatča, najwcchaktan walsa tjakzjapa. Ima kjantatiž cjen ninacžquin ojkchiča Jesusaqui. Kjaz juntun ojkchiča, tsjii latu watzjapa.

⁴⁹ Nii tjaajintanacazti Jesusa kjaz juntun ojkñi cherchiča. Nekztanac kjawchiča:

—Cuntinaž caa, almaž caa, —cjican.

⁵⁰ Ancha tsucchiča. Nekztanaqui Jesusaqui paljaychiča, tuž cjican:

—Anača tsuca ančhucqui. Wejrtča. Tjup kuzziz cjee.

⁵¹ Nekztanaqui walsiquiz luzziča Jesusaqui. Nii oraqui tjamiqi zekziča. Jalla nekztanaqui tjaajintanacaqui ispantichiča. Inakaz cjissiča.

⁵² Ninacatača ana nii t'anta milajru intintazñinacaqui. Imazi ninacž kuznacatača zizñi.

JESUSAQUI LAZ ZOÑINACA ČHJETINCHICHA

⁵³ Nekztanaqui pajk kota kajžcuqui Genesaret cjita yokquiz irantichiča. Nekztan walsa kjaz kot atquiz mokžcu ecchiča.

⁵⁴ Walsiquiztan ulnan žoñinacaqui Jesusa pajchiča.

⁵⁵ Jalla nekztanac nii žoñinacaqui tjapa kjutñi ojkchiča, laanaca zjiiczjapa. Jakziqunt Jesusa želatčhaja, nicju laa žoñinaca zjiicchiča zquitquiz callžcu.

⁵⁶ Jochiran kolta watjaran pajk watjaran ojklayatča Jesusaqui. Jakziqunt ojklayatčhaja, nekzi laa žoñinaca zjiicñipankaztača. Nižaza žoñinacaqui Jesusa rocchiča, laa žoñinaca Jesusiž zquiti lanznajo. Jesusiž zquiti lanzñinacaqui žejtchiča.

7

¿ČHJULUT UJ CJES ZOÑŽQUIZQUI?

¹ Nekztanaqui fariseo žoñinacaqui Jesusižquiz macjatchičha, tsjii kjažt judiuž lii tjaajiñinacžtan Jerusalenquiztan tjonchi. Jakziquin Jesusa želatčhaja, jalla nicju ajcsiča.

² Nižaza nekzi Jesusiž tjaajinta žoñinacaqui čhjeri lulatča, kjara awjz costumbre ana paažcu. Nuž ana kjara awjžcu lulan, cherchiča parti žoñinacaqui. Nekztan quintra chiichiča.

³ Nii fariseo žoñinacaqui ana kjara awjžcu, wira ana lujlñitača. Parti judio žoñinacaqui nižtazakaztača. Jaziqui tuquita žoñinacž costumbre nužupan chjojñitača.

⁴ Nižaza čhjeri kjayžcu ana kjara awjz costumbre paažcu, ana wira lujlñipantača. Nužupan ancha costumbre cumpliñinacatača. Wazunacami mazcanacami jir mazcanacami catrinacami nižtanaca ajunñipankaztača.

⁵ Nuž cjen nii fariseo žoñinacaqui judiuž lii tjaajiñinacžtan Jesusižquiz pewcziča, tuž cjican:

—¿Kjažtiquiztan am tjaajintanacaqui tuquita costumbre ana cumplejo? Ana kjara ajwžcu lujl-la.

⁶ Jesusaqui ninacžquiz kjaaziča, tuž cjican:

—Anazum kuzziz zoñinacchuccha anchucqui. Ultim werara anchuca pun-
tuquiztan chiichiicha tuquita Isaías cjita zoñiqui. Tuž cjican cjiirtkalcha:
“Tii zoñinacaqui tawkžtankaz Yooz rispitcha; juntučkazza. Ultimu kuzquiz
ana Yooz rispitcha.

⁷ Inapankaz Yooz sirwiicha tii zoñinacaqui. Tinacaqui zoñž taku tjaajiñicha,
‘Tiiicha Yooz takuqui’, cjican”.

—Nuž cjiirtkalcha Isaías cjita zoñiqui.

⁸ Jesusaqui cjichizakazza:

—Nižtapan anchucqui Yooziž mantita ana cumpliñchuccha. Zoñž cuz-
turumpi cumpliñchucpankazza. Mazcanacami wazunacami ajunz nižta
costumbrenaca cumpliñchucpankazza.

⁹ Anchucqui Yooziž mantita tjatancha. Anchuca costumbrekaz tucquin
utcha.

¹⁰ Tuquita Moisés cjita zoñiqui chiižinchiicha:

“Am maa ejp rispita. Nižaza jakziltami niž maa ejpž quintra ch-
jaawjkatachaja, jalla niiqui, contaj cjila”. Nuž mantichiicha Moisesaqui.

¹¹ Anchuczti tuž cjiñchuccha: “Jakzilta zoñit niž maa ejpžquiz chiyasača,
tuž cjican, ‘Wejrqui amquiz anal yanapi atasacha. Tjapa wejt cusasanaca,
Yoozquiz tjaatača’.

¹² Nuž chiyachaj niiqui, maa ejp yanapz anaž waquisiicha”. Nuž
cjiñchuccha anchucqui.

¹³ Nižtiquiztan anchuca costumbre ana tjatzñiž cjen, Yooz mantitaqui
tjatza. Jalla nižta paayiñchucpankazza anchucqui. —Nuž chiižinchiicha
Jesusaqui.

¹⁴ Nekztanaqui Jesusaqui wilta zoñinaca kjawziicha, tuž cjican:

—Anchucqui, tjappacha nonžna. Wejt taku intintazñi cjee.

¹⁵ Anaž zawnctan kjuylchuc luzñiqui uj cjesača zoñžquiziqui. Zoñž
kuzquiztan ulanñi niž uj cjesača zoñžquiziqui.

¹⁶ Jakziltažlaj nonžni cjuñchiz niiqui, nonžla.

¹⁷ Nekztanac Jesusac zoñinaca eccu kjuya ojkchiicha. Kjuya luzcu niž
tjaajintanaqui Jesusižquiz nii ana intintazta takunaca pewcziicha.

¹⁸ Jalla nekztan Jesusaqui kjaaziicha, tuž cjican:

—¿Anchucqui nižtazakaz anaž naazya? ¿Anapanž intintiya? Tužuča niiqui.
Anača zawnctan kjuylchuc luzñiqui uj cjesača zoñžquiziqui.

¹⁹ Nii lujltaqui kuzquiz ana luzasača; pjuchquizpanž luzza. Nekz-
tan pjuchquiztan wir kjutñi ulanča zawncchuc. Jalla nižtiquiztan čjul
čhjeripankaz lulasača zoñinacaqui.

²⁰ Nekztan cjichizakazza:

—Kuzquiztan ulanñi niž uj cjesača zoñžquiziqui.

²¹ Zoñž kuzquiztan tižta ana walinaca ulanča: anawali pinsiz, adulteri-
uquiz ojklaz, yekja maatakžtan žejlz, zoñi conz,

²² tjañi cjis, wali jiru cjis pecz, uj paaz, incallz, anawali kamañchiz cjis,
čhjultaki zmaz, anazum takunaca joojooz, mita cjis, anazum kuzziz cjis.

²³ Nižtanaca kuzquiztan ulanča. Jalla nižtanaca uj cjesača zoñžquiziqui.

JESUSIZQUIN KUZZIZ MAATAKA

²⁴ Nekztanaqui Jesusaqui tsijtsiicha. Jakziquin Tiro Sidón cjita watjanaca
žejlchaja, nijcchuc ojkchiicha. Nicju tsjii kjuyquiz alujassiicha. Ana zoñiž
pajta kamz pecatča. Pero ana pajta kamzqui anapantaž atchuca.

²⁵ Jesusiž tjonta zizcu nii orapacha tsjaa žonqui Jesusiž yujcquiz quillzlaki
macjatžquichinča. Naaža uzqui zajraž tantatača.

²⁶ Sirofenicia cjita yokchiz žontača naaqui. Grecia cjita taku chiyiñtača. Jaziqui naa žonqui Jesusa rocchinča:

–Wejt uzaquiztan zajra chjatkatzinalla, –cjican.

²⁷ Nekztan Jesusaqui kjaaziča:

–Primiru maatinaca čjjeri chjeki lujlsa. Maatinacz čjjeriqui kjañžcu pawczquin tjojtanz anaž waquiziča.

²⁸ Naaqui kjaazinča, tuž cjican:

–Nužupanzača. Weraram chiiča. Pero pacunacami mis koztan ocjalž tajwka čjjerinaca lujlča.

²⁹ Nekztanac Jesusac chiichiča:

–Amiž zuma chiitiquiztan zajraqui ulanskatchinča am uzaquiztanaqui. Jaziqui am kjuya quepa.

³⁰ Nekztanaqui kjuya quejpchinča naa žonqui. Nii kjuyquin naaža uz ajpsquiz želanami, zajraqui chekapanž ulantkalča.

OÑ ZOÑI CHJETINTA

³¹ Nekztan Jesusaqui Tiro cjita yokquiztan quejpžquichiča. Sidón cjita watja, Decápolis cjita yoka watžcu Galilea cjita kot ataran ojklaychiča.

³² Nicju tsjii oñ zoñi Jesusižquiz zjičtatača. Cjacija chiiñizakaztača. Nekztan žoñinacaqui Jesusižquiz rocatča:

–Am kjaržtan tii zoñi lanžinalla, –cjican.

³³ Nekztanaqui Jesusaqui nii zoñi chjitchiča tsjii latu. Nekztan nii oñ žoñž cjuñquiz loc'anžtan čjapziča. Nekztan llawsiztan tjujtžcu nii žoñž las lanziča.

³⁴ Nižaza Jesusaqui tsewcchuc cheržcu:

–Aayj, –cjican llactazziča.

Nekztan chiichiča,

–Efata, –cjican.

Nii tsjemat taku cjiča, “Cjetzi cjee”, nii.

³⁵ Nekztanac nii žoñž cjuñinacaqui cjetzi cjissiča. Niiž lasqui žejtchizakazza. Cusa chiiñi cjissiča.

³⁶ Nekztanaqui Jesusaqui mantichiča, tuž cjican:

–Tii anam jeczquizimi maznaquiča.

Nekztanaqui žoñinacaqui nii taku ana cassiča. Nekztan Jesusaqui juc'anti ana chiychijajo mantichiča. Nekztan nii žoñinacasti juc'anti mazmazziča tjapa kjutři.

³⁷ Jaziqui walja ispantichiča nonzñi žoñinacaqui, tuž cjican:

–Tjapa niiž paatanacaqui ancha zumača. oñ žoñimi nonskatñiča. Up žoñimi chiikatñiča. Ancha cusača.

8

JESUSAQUI CHJERI TJAACHICHA

¹ Tsjii nooj muzpa žoñinacaqui wilta ajcsiča. Čjjeri miranzcama žejlchiča. Nekztan Jesusaqui niiž tjaažintanaca kjawžcu, ninaczquiz paljaychiča, tuž cjican:

² –Čjep maj tii žoñinacaqui wejttan kamchiča. Jaziqui tinacaqui ana čjjerchizza. Tinaczquiz okžnuča.

³ Ana čjjeri tjaažcu kjuya cuchnasaž niiqui, jiczquiz čjjerž kjara tismayasacha. Yekjap žoñinacaqui ažquiztan tjonchiča.

⁴ Jesusiž tjaažintanacaqui kjaaziča:

–Wazquizza učumqui; anaž čhjulumu žejlča tekziqui. ¿Čhjul čjjeri tii žoñinaczquiz tjaažajo, wejrnacjo?

⁵ Nekztan Jesusaqui ninacžquiz cjichiča:

—¿Kjaž t'antat ančhucalta žejlya?

Tjaajintanacaqui kjaaziča:

—Pakallaku.

⁶ Jazi qui Jesusaqui nii žoñinacžquiz chiichiča:

—Ančhucqui, yokquiz julzna.

Nekztanaqui t'anta tanžcu Yooz Ejpžquin gracias cjican chiichiča. Nekztan t'anta kjolkjolžcu, niiž tjaajintanacžquiz tjaachiča, žoñinacžquiz tojznajo. Nekztan partir paychiča tjaajinta žoñinacaqui.

⁷ Nii tjaajintanacaqui tsjii kjaž chi'iznacchiztača. Nii tanžcu Jesusaqui wilta Yooz Ejpžquin gracias cjican chiichiča. Nekztan tjaajintanacžquiz chiichiča:

—Tii žoñinacžquiz tii ch'iznaca tojzna, ančhucqui.

⁸ Nii žoñinacaqui lujlchiča, chjekañcama. Nekztan žejtchi čhjerinaca tjapacha juntičcu, pakallaku canasta chjijsiča.

⁹ Nii lujlñi žoñinacaqui tsjii pusi warankatača. Nekztan Jesusaqui žoñinacuchanchiča, kjuya okajo.

¹⁰ Jesusaqui tjaajintanacžtan walsiquiz luzcu, Dalmanuta cjita yokquin ojkchiča.

JESUSIZ QUINTRA ZOÑINACA

¹¹ Fariseo žoñinacaqui tjonžcu, Jesusižquiz ch'ayi kallantichiča, tuž cjican:

—Amqui Yooztamčhalaj niiqui, milajru tekz paalla nižtaqui.

¹² Nekztan Jesusaqui walja llactazcan ujrsiča. Nekztan chiichiča, tuž cjican:

—¿Kjažtiquiztan milajrukaz pecjo? ¿Tii žoñinacajo? Weraral cjiwča, milajru ana paasača.

¹³ Nii žoñinaca eccu, walsiquiz luzcu, ojkchiča, wilta kot nawjktuñtan kajkjzjapa.

¹⁴ Jesusiž tjaajintanacaqui t'anta chjitz tjatsiča. Tsjii t'antakaz želatča walsiquiz.

¹⁵ Nekztan Jesusaqui ninacžquiz chiižinchiča:

—Cwitazaquiča fariseož liwaturžquiztan nižaza Herodiž liwaturžquiztan.

¹⁶ Nekztan nii tjaajinta žoñinacaqui Jesusiž chiižintiquiztan palt'ichiča, tuž cjican:

—Učhumqui ana t'anta zjičtala. ¿Kjaž cjeequejo?

¹⁷ Nekztan ninacaž nuž parlan, Jesusaqui pewcziča:

—¿Kjažtiquiztan t'antiquiztan parli ančhucjo? ¿Anapanž intintiy? ¿Kjažtat ančhucjo? ¿Ančuca kuzqui ana naažñipan, kjažtatajo?

¹⁸ ¿Ančuca čhujquiqui anaj cherchiya? ¿Ančuca cjuñimi anaj nonziya? ¿Tii anapanž cjuñkaya?

¹⁹ Wejrqui pjijska t'antižtan pjijska warank luctak žoñinaca lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Tuncapani.

²⁰ Nekztan Jesusaqui pewczizakazza:

—Wejrqui pakallaku t'antižtan pusi warank žoñi lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Pakallaku.

²¹ Nekztan Jesusaqui pewczizakazza:

—¿Anapanž zuma intintas, ančhucjo?

ZUR ZOŃI CHJETINTA

²² Nekztan Betsaida cjita yokquin irantichiča. Nekzi tsjii kjažu žoñinacaqui Jesusižquiz tsjii zur žoñi zjijcchiča. Zjijczcu rocchiča:

—Tii lanžinalla, —cjican.

²³ Nekztan Jesusaqui nii zur žoñž kjarcu tanžcu, wajtž tjiya chjitchiča. Nekztan niiž čhjucquiz llawsižtan t'awziča. Kjaržtan lanžcu pewczyča:

—¿Jaziqui čhjultakinacam cherya?

²⁴ Zur žoñiqui acha waytižcu chercherziča. Nekztan kjaaziča:

—Žoñi cherchuchača, ojklayñi. Pero ana cusal cherucha; muntinacažtakaz nii žoñinaca cherucha.

²⁵ Jesusaqui nii žoñž čhjucquiz wilta kjaržtan lanziča, zuma cherajo. Nekztan niiž čhjucqui zuma žejtchiča. Nii žoñiqui zuma calaru cherchiča ažkquin.

²⁶ Jesusaqui čhjetinžcu niiž kjuya cuchanchiča, tuž cjican:

—Anam wajtquiz luzaquiča. Anaž jeczquizimi tii čhjetinta chiyacquiča.

¿JECT JESUSAQUI?

²⁷ Nekztan Jesusaqui tjaajintanacžtan ojkchiča, Cesarea de Filipo cjita yok kjutñi. Ojkcan Jesusaqui pewczyča:

—¿Ject wejrjo? ¿Kjažt cji žoñinaca wejt puntuquiztanajo?

²⁸ Niiž tjaajinta žoñinacaqui kjaaziča:

—Yekjap žoñinaca, “Juan Bautistala”, cjiča. Yekjapac, “Eliasla”, cjiča. Yekjapac, “Tsji Yooz taku parliñi profetala”, cjiča.

²⁹ Nekztan Jesusaqui pewczyča:

—¿Ančhuczti, jaknuž cji wejt puntuquiztanajo?

Pedruqui kjaaziča:

—Yooziž cuchanžquita Cristumča amqui, —cjican.

³⁰ Nekztan Jesusaqui mantichiča:

—Anaž jeczquizimi nii maznaquiča.

JESUSAQUI MAZINCHICHA NIIŽ TICZ

³¹ Nekztan niiž tjaajinta žoñinacžquiz wilta tjaajñi kallantichiča, tuž cjican:

—Wejrqui tsewctan cuchanžquita Yooz Žoñtča. Jaziqui ancha t'akjisača. Wajt jilirinacami timlu jilirinacami judio tjaajinacami, ninacaqui wejtquiz chjaawjkataquiča. Wejrqui contal cjeeča. Nekztan čhjep majquiztan jacatatača.

³² Jesusaqui nuž kjanacama niiž ticz mazinchiča. Tii mazintiquiztan Pedruqui tsjii latu Jesusa chjitchiča. Nekztan paljaychiča, tuž cjican:

—¿Kjažtiquiztan nižta chiijo? Anapan nižta chiyalla amqui.

³³ Jesusaqui wir kjutñi parti tjaajinta žoñinacžquin cherziča. Nekztan Jesusaqui Pedro ujziča, tuž cjican:

—Satanás, zaraka wejt yujcquiztan. Amiž pinsita anača Yooziž pinsita, žoñiž pinsitakazza.

³⁴ Nekztan Jesusaqui nekz žejlñi žoñinaca kjawžcu, chiižinchiča, tuž cjican:

—Jequit wejttan chica ojklayz pecchaj niiqui, primiraqui persun kamañ wiraqui tjažla. Sufrijsapaqui listoj cjila, ticzcama. Nekztan wejttan chicaž kamaquiča.

³⁵ Jakziltat persun kamañ wira ana tjažt pecchaj niiqui, arajpach kamañequi ana tjaataž cjequiča. Jakziltat tii muntuquiz Yooz tawk laycu

nižaza wejt laycu persun kamañ wira tjatznačhaja, jalla niiqui arajpachquin wiñaya kamaquiča.

³⁶ Tsjii zoñiqui tjapa tii muntuquiz žejlñi cusasanaca canasača. Pero nekztan infiernuquin okaquiž niiqui, tjapa nii canta cusasanaca, ¿chjuljapat sirwasajo? Inakaz cjequiča.

³⁷ Arajpachquin Yooztan kamzqui persun liwriizqui anaž paaztanac kjayasača.

³⁸ Wejrqui cjiwča, tii muntuquiz zoñinaca žejlča, ana Yooz kuzcama ojklayñi, persun kuzcama ojklayñi, ujchizza. Nii zoñinacžtan želan, jakziltat wejtquiztan nižaza wejt tawkquiztan asačhaja, nižaza ana pajñi chiyachaj niiqui, jalla niižquiztan wejrzal ana pajñi chiyacha. Tsjii nooj wejrqui wejt Ejpž aztan tjonača zuma arajpach Yooz anjilanacžtan. Nii ora wejtquiztan asñi ana pajñi zoñinacžquiztanaqui wejrzal ana pajñi chiyacha. Wejrqui tsewctan cuchanžquita Yooz Zoñtča. —Nuž cjichiča Jesusaqui.

9

¹ Jesusaqui cjichizakazza:

—Ultimu werara wejr cjiwča, tsjii nooj Yoozqui aztan mantaquiča. Ima nii tjuñi tjonan yekjap tekzta zoñinacaqui anaž ticznaquiča.

JESUSAQUI TSJEMATA CJISSICHA

² Sojta tjuñquiztan Jesusaqui čhjepultan tjaaajinta zoñinaca chjitchiča, Pedro, Jacobo, Juan, jalla ninacžtan. Pakpaltan tsjii curu yawchiča. Nicju nii čhjepultanž yujcquiz Jesusaqui tsjemat chercherchiž cjissiča.

³ Niiž zquitiqui ancha llijatča. Ancha chiw kjatñižtakaztača. Anaž jec zoñimi nižta chiwi zquiti cjiskati atča.

⁴ Nekztan pucultan zoñinaca jecžquichiča; Elías nižaza Moisés cjitatača ninacaqui. Jesusižtan parličiča.

⁵ Nekztan Pedruqui Jesusižquiz paljaychiča:

—Wejt Tjaajiñi. Walikazza tekz žejlzqui. Chjep chjujlli kjuya kjuyznasača, tsjiiqui amta tsjiiqui Moiesta, tsjiiqui Eliasta.

⁶ Nekztan nii tjaaajinta zoñinacaqui ancha tsucchiča. Pedruqui čhjulut chiyi ana zuma tantiuchucatača.

⁷⁻⁸ Nekztan ninacžquiz tsjiriqui urpuntichiča. tsewctan tsjirquiztan tsjii joraqui chiižquichiča:

—Wejt k'ay Majchča tiiqui. Tiižquiz nonžna.

Nekztan tjaaajinta zoñinacaqui tjapa kjutñi chercherziča. Anazaka čhjulumi tjenchiča. Jesusapankaz želatča nii čhjepultan zoñinacžtan.

⁹ Jesusaqui nii curquiztan chjijwžquican ninacžquiz paljaychiča, tuž cjican:

—Ančucaž cherta ana jecžquizimi chiichiyaquiča. Weríž jacatattan, nekztan chiichiyaquiča ančhucqui. Wejrqui tsewctan cuchanžquita Yooz Zoñtča.

¹⁰ Ninacpora pewcsarassiča:

—¿Chjulut tii jacatatz puntu cjeejo?

Nižtami Jesusiž chiitacama ojkchiča.

¹¹ Nekztan Jesusižquiz pewcziča:

—Judiuž lii tjaaajiñinacaqui cjiñiča, “Primiruqui Elías profetaqui tjonstanča”, nii. ¿Kjažtiquiztan nižta chiiya?

¹² Jesusaqui kjaaziča, tuž cjican:

—Ultimupan Elías profetaqui primiru tjonchiča, tjappacha tjaczjapa. Nižaza cjiirta Yooz takuqui tuž cjiča, wejr tsewctan cuchanžquita Yooz

Zoňž puntuquiztan. Tekziqui ancha sufrača wejrqui. Chjaawjtaza iñartaza cjeeča.

¹³ Jaziqui wejr cjiwča, Eliasahui tjonchila. Nekztan zoñinacahui Elías ninacz munañparu paachiča. Nužupan cjiirta Yooz takuqui cjiča Elías puntuquiztan. –Nuž cjichiča Jesusaqui.

ZAJRAZ TANTA UZA CHJETINTA

¹⁴ Nekztan parti tjaajinta zoñinaczquiz irantichiča. Nekzi muzpa zoñinacahui želatkalča. Parti tjaajintanacztan judiuž lii tjaajiñinacztan ch'aazatkalča.

¹⁵ Tjappacha Jesusa cheržcu ispanti ch'uj cjichiča. Nekztan tsaani zajtchiča.

¹⁶ Jesusaqui pewczyča, tuž cjican:

¿Ninacztan čjulut chiyas?

¹⁷ Tsjii zoñiqui kjaaziča:

–Tjaajiñi Maestro, wejrqui wejt uza amquiz zjijcchinča. Zajraž luztan, upa cjissiča.

¹⁸ Jakziquinami zajraqui wejt uzquiz pankaz luzza. Nekztan t'uckatča. Nekztan yokquiz tjojtsa. Atquiztan č'utukaž jup'okiča. Izkekaž jojča. Ljajtikaž cjissa. Jaziqui amiž tjaajintanaczquiz rocchinča, zajra chjatkatajo. Ninacahui ana chjatkati atchiča.

¹⁹ Jaziqui Jesusaqui kjaaziča:

–Ančhucqui, ana criiñi zoñinacchucpanča. ¿Čhjuloracamat ančhucatan kamac wejrjo? ¿Čjuloracamat ančhucatan awantac wejrjo? Nižtac nii uza zjijczca.

²⁰ Nekztan nii uzac zjijctatača. Nii zajraqui Jesusa cheržcu uza t'uckatchiča. Nekztan nii uzaqui yokquiz tjojtsiča. Yokquizpacha zunt'ichiča, atquiztan č'utu jup'okcan.

²¹ Jesusaqui ejpžquiz pewczyča:

–¿Čhjuloratanpacha am uza laacjichitajo?

Niiž ejpqui kjaaziča:

–Koltallquiztanpacha.

²² Tii zajrapan wilta wilta tjojt tjojtskatčani ujquizimi kjazquizimi tic-skatzjapaqui. Am cunam atčani. Tii kullžinalla. Okžnalla wejrnacqui.

²³ Nekztan Jesusaqui nii ejpžquiz chiichiča:

–¿Kjažtiquiztan am nuž cjeejo, “Am cunam atčan”, cjicanajo? Yoozquin tjapa kuzziz zoñiqui čhjulumpankaz atasača.

²⁴ Nii uz ejpqui altu joržtan chiichiča:

–Tjapa kuzziz wejrqui! ¡Juc'anti Yoozquin kuzziz cjis yanapt'alla!

²⁵ Jesusaqui naychiča, muzpa zoñinaca ajcsquiñi. Nekztan zajra ujziča, tuž cjican:

–Zajra, amqui tii uza upa oñi cjiskatchamča. Wejrqui am mantuča. Tiižquiztan ulna. Anam iya tii uza tanaquiča.

²⁶ Nii zajraqui uza wilta t'uckatchiča. Nekztan ancha kjawcan, ulanchiča. Nii uza ticzižtakaz cjissiča. Nekztan jila parti zoñinacahui chiichiča:

–¡Ticzila tii uzaqui!

²⁷ Nekztan Jesusac kjarallcu tanžcu žinziča. Nekztan nii uzaqui tsijtsiča.

²⁸ Nekztanac tjaajinta zoñinacahui kjuy luzcu jamazit Jesusižquiz pewczyča, tuž cjican:

–¿Kjažtiquiztan wejrnacqui ana nii zajra chjatkati atajo?

²⁹ Jesusaqui kjaaziča:

—Ana Yooztan parliscu ana ayunascu, anaž tii zajranacaqui chjatkati atasacha.

JESUSAQUI NIIŻ TICZ MAZINCHICHA

³⁰ Nekztanaqui Jesusaqui niiž tjaajintanacžtan ojkchiča Galilea yoka nuž. Ana žoñiž zizan nekz žejlz pecatča, niiž tjaajinta žoñinacžquiz iya tjaajinzjapa.

³¹ Tuž cjican tjaajinchiča:

—Wejrqui tsewctan cuchanžquita Yooz Zoñtča. Tsjii žoñiqui wejr tarazu-naž paaquiča, wejr tankatzjapa. Nekztan tantapal cjeeča. Contal cjeeča. Nekztan čhjep majquiztan jacatatača.

³² Tjaajintanacaqui Jesusiž takunaca ana cusa intintazi atchiča. Nižaza Jesusa iya pewcz eksiča:

—¿Kjažt cjiy, nii am takunacajo? —Nuž cjican, pewcz pecatča, pero.

¿JEC ZOÑIT TUCQUINAQUI?

³³ Nekztan Capernaum cjita wajta irantichiča. Kjuyquiz luzcu Jesusaqui niiž tjaajintanaca pewcziča:

—¿Ojkcan ančhuc čhjuluča parliya?

³⁴ Nekztan anaž čhjulumi kjaaziča. Ojkcan tii puntu parlatča, “¿Ject tucquinaqui cjes?” cjican.

³⁵ Nekztan Jesusaqui julziča. Niiž tuncapan tjaajinta žoñinaca kjawžcu, paljaychiča:

—Jakziltat tucquinac cjis pecčhaj niiqui, wirquinpankaz cjis waquiziča. Mantapaazpankaz waquiziča.

³⁶ Jesusac tsjii uza kjawžcu, taypiquiz tsijtskatchiča. Nii uza žcojrziča, tuž cjican:

³⁷ —Jakzilta žoñit wejt laycu tsjii ocjala sirwičhaja, jalla niiqui wejr sirwiča. Nižaza anaž wejr alaja sirwiča; wejrž cuchanžquiñi nii zakaz sirwiča.

CRISTUZ FAVORA PAAÑI ZOÑI

³⁸ Nekztan Juanqui cjichiča:

—Tjaajiñi, am tjuužtan tsjii žoñiqui zajranaca chjatkatatča. Niiqui ana učumtan chica ojklayñiča. Nekztan wejrnacqui ujzinča, “Nižta anača paazqui”, cjican.

³⁹ Jesusaqui cjichiča:

—Ana nižta chiya. Jakzilta žoñit wejt tjuužtan tsjii milajru paačhaj niiqui, wejt quintra ana pjazila chiyaquiča.

⁴⁰ Jakzilta žoñizlaja ana učum quintra niiqui, učumnaca partizakazza.

⁴¹ Weraral chiyuča, ančhucqui Cristuž illzta žoñinacpančhucča. Jakzilta žoñit weriž cjen ančhucaquiz tsjii kjazllami onančhaja, jalla niiqui nekztan ultimu juc'ant zumanaca tanznaquiča arajpachquin.

UJQUIZTAN CWITASA

⁴² Nekztan Jesusaqui tjaajinchiča, tuž cjican:

—Wejtquiz criichi žoñinaca žejlča, humilde kuzziz cjiñi. Jakzilta žoñit nižta criichi žoñinaca ujquiz tjojtskatačhaja, jalla niiqui ana wali paača. Nii paañi žoñž jorquiz pajk tjaaj mokžcu, koz kotquiz jacuntiz waquiziča. Jalla nižta tsjan cusaž cjesača nii žoñžtaqui.

⁴³ Am kjarat ujquiz tjojtskatz pecčhaj niiqui, pootzna. Infiernuquin pizc kjarchiz ojkzqui, nii ana waliž cjesača. Juc'anti cusaž cjesača tsjii kjarchizkaz arajpachquin luzqui. Infiernuquin ujqui wira ana tjesnasača.

⁴⁴ Infiernuquiziqui žoňi lujlňi lak'unacami anaž ticznaquiča. Nii asňi ujqui anaž wira tjesnaquiča.

⁴⁵ Nižaza am kjojchat ujquiz tjojtskatz pecčhaj niqúi, pootzna. Infiernuquin pizc kjojchchiz Yooz cuchnasaž niqúi, ana waliž cjesača. Juc'anti cusaž cjesača tsjii kjojchchizkaz arajpachquin ojkzqui. Infiernuquin ujqui wira ana tjesnasača.

⁴⁶ Infiernuquiziqui žoňi lujlňi lak'unacami anaž ticznaquiča. Nii asňi ujqui ana wira tjesnaquiča.

⁴⁷ Am čhujquit ujquiz tjojtskatz pecčhaj niqúi, leczna. Infiernuquin pizc čhujcchiz Yooz cuchnasaž niqúi, ana waliž cjesača. Juc'anti cusaž cjesača tsjii čhujcchizkaz arajpachquin ojkzqui.

⁴⁸ Infiernuquiziqui žoňi lujlňi lak'unacami anaž ticznaquiča. Nii asňi ujqui ana wira tjesnaquiča.

⁴⁹ Tjapa žoňinacaqui ujžtan tjacžtaž cjequiča. Zapa wilananacaqui yawcžtan tjacžtapanča, jalla nižta.

⁵⁰ Yacuqui zumača. ¿Yacuž lak'anznasaž niqúi, kjažt wilta ch'uyi cjisnasa? Yawcchizpanž ančhuc želaquiča. Porapat zumaž kamaquiča.

10

JALJTIZ PUNTU

¹ Nekztan Jesusaqui Capernaum wajtquiztan ulanžcu, Judea yokquin ojkchiča; nižaza Jordán cjita puž najwctuňtan ojkchiča. Nicju muzpa žoňinacaqui wilta ajcsiča. Nekztan Jesusaqui wilta tjaajinchiča, jaknužt tjaajiňitažlaj, nii.

² Fariseo žoňinacaqui tjonchiča, Jesusa ujquiz tjojtskatzjapa. Nekztan pewcziča, tuž cjican:

—¿Učhum liiqui kjažt cjeejo? ¿Tsjii luctakaqui persun tjunatan jaljtiz waquizasaya? Tjaajnalla.

³ Jesusaqui ninacžquiz pewcziča:

—¿Moisés cjita žoňiqui, jaknužt ančhucaquiz mantichiya?

⁴ Nekztan ninacaqui kjaaziča:

—Moisesaqui tuž mantichiča, “Tsjii luctakaqui certificado de divorcio tjaasača tjunatan jaljtizjapa. Nekztan jaljtasača.”

⁵ Nekztanaqui Jesusaqui chiižinchiča:

—Ančhuca chojru kuzziz cjen nuž mantitatača.

⁶ Niiž tuquiqui ana nižta mantitatača. Tuqui timpuqui Yoozqui tjappacha paacan, žoňi paachiča luctaka maataka.

⁷ “Nižtiquiztan žoňiqui maa ejpžquiztan zarakaquiča, tjunatan kamzjapa.

⁸ Nekztan nii lucutiňi žoňiqui tsjiikaz cjissa”. Anaž iya pucultan žoňi, pero tsjiikazza.

⁹ Yoozqui tsjii lucutiňi cjiskatchiča. Nekztan lucutiňi žoňiqui anapan jaljtiz waquiziča.

¹⁰ Wiruňaqui niiž tjaajinta žoňinacaqui kjuyquiz Jesusa jamazit pewcziča nii jaljtiz puntuquiztan.

¹¹ Jesusaqui kjaaziča:

—Jakzilta žoňit tjunatan jaljtizcu yekja maatakatan zalžaj niqúi, ujž paača, tuquita tjuna quintra.

¹² Nižaza jakzilta žont persun luctakžtan jaljtizcu, yekja luctakžtan zalžaj niqúi, użakaz paača, tuquita lucž quintra.

JESUSAQUI OCJALANACA KAACHICHA

¹³ Tsjii nooj žoñinacaqui Jesusižquin ocjalanaca zjijcchiča, kjaržtan lanznajo. Nuž zjijcan Jesusiž tjaajintanacaqui nii ocjala chjaawjchiča.

¹⁴ Nižta chjaawjñi nayžcu Jesusaqui žawjchiča. Nekztan tjaajinta žoñinaczquiz chiižinchiča, tuž cjican:

–Tii ocjalanacaqui wejtquiz tjonaj cjee. Anaž chjaajwa. Tii ocjalanacz kuzziz irata, jalla nižta žoñinacača Yooz wajtchiz žoñinacaqui.

¹⁵ Ultim weraral chiyučha, ocjalanacaqui maa ejpž mantitanaca cazza. Jalla nižta irata žoñinacaqui Yooz mantitanaca caz waquiziča. Ana cazaquiz niiqui, wira ana Yooz wajtchiz žoñinaca cjequiča.

¹⁶ Nekztan Jesusaqui ocjalanaca žcojrzcu k'aachichiča. Zapa maynižquiz kjaržtan lanžcu:

–Yooz am wintijla, –cjichiča.

RICACH ZOÑIŽ QUINTU

¹⁷ Nekztanaqui žoñinaczquiztan Jesusaž zaraktan tsjii žoñiqui zati pariju tjonchiča, niž yujcquiz quillslaki. Nii žoñiqui cjichiča:

–Tjaajiñi Maestro, zumamž amqui. Yooztan wiñaya kamzjapaqui, ħhjul zumanacat wejr paasaya?

¹⁸ Jesusaqui kjaaziča:

–Ĥkjažtiquiztan, “Zumamž amqui”, cjeejo? Anaž jec žoñimi zumaqui, Yoozpankazza zumaqui.

¹⁹ Amqui Yooz mantitanaca zizñamča: “Anača adulteriuquiz ojklayzqui. Anača conzqui. Anača tjañi cjisqui. Anača toscara chiizqui. Anača incallzqui. Am maa ejpča rispitzqui”.

²⁰ Nii žoñiqui kjaaziča:

–Tjaajiñi Maestro, koltallquiztanpacha tjapa tinaca caziñča.

²¹ Jesusaqui nii žoñž kjutñi cherziča, k'aachtican. Nekztan cjichiča:

–Tsjii cusasa pjaltiča amtaqui. Tjappacha am ħhjultaki žejlñinaca tuyzna. Poris žoñinaczquiz nii paaz ona. Oka jaziqui. Nekztan am arajpachquin juc'anti ricachum cjequiča. Nuž paažcu wejtquin tjona. Sufrijsjapa listu cjee. Nekztan wejtan chica ojklayñi cjequiča.

²² Walja ricachutača nii žoñiqui. Nekztan nii chiitiquiztan ancha upa kuz cjissiča. Llaquita ojkičiča.

²³ Nekztan Jesusaqui tjapa kjutñi chercherziča. Nekztan tjaajintanaczquiz paljaychiča, tuž cjican:

–ĤRicachunacztaqui walja ch'amača Yooz wajtchiz žoñinaca cjisqui!

²⁴ Niž tjaajintanacaqui Jesusaž chiitiquiztan ancha tsucchiča. Nekztanaqui Jesusaqui wilta paljaychiča, tuž cjican:

–Jilanaca. ĤJakzilta žoñit tii wir cusasanacquiz kuz tjaačhaja, jalla nacžtaqui walja ch'amača Yooz wajtchiz žoñinaca cjisqui!

²⁵ Tsjii camello cjita animala žejlča. Nii camelluqui ch'aman acuj cjuñquiz luzasača. Ricachunacazti tsjan ch'aman Yooz wajtquiz luzasača, Yooz mantita žoñinaca cjisjapa.

²⁶ Nii chiitiquiztan tjaajinta žoñinacaqui juc'anti tsucchiča.

–ĤJequit liwriita cjesajo? –cjican, pewcsassiča.

²⁷ Jesusaqui ninaczquiz cherziča. Nekztanac cjichiča:

–Žoñiqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁸ Nekztan Pedruqui Jesusižquiz paljaychiča:

–Nonžna. Wejrnacqui tjappacha ecchinča, amtan chica ojklayzjapaqui.

²⁹ Nekztan Jesusaqui cjichiča:

–Weraral ančhucaquiz cjiwčha. Jakzilta zoñit Yooz tawk laycu wejt laycu kjuya, jilanaca, cullacanaca, maa, ejp, maatinaca, zkalanaca, jalla ninaca ecačhaj niiqui,

³⁰ tii muntuquiz kjuyanaca, jilanaca, cullacanaca, maanaca, maatinaca, zkalanaca, nižtanaca patac wлтаž ninacžtajapa želaquičha. Pero chjaawjta iñartazaž cjequičha. Jalla nuž cjenami, arajpachquin wiñaya Yooztan zuma kamaquičha.

³¹ Walja anžic tucquin zoñinacaqui wirquin cjisnaquičha ultimquiziqui. Nižaza walja anžic wirquin zoñinacaqui tucquin cjisnaquičha ultimquiziqui.

JESUSAQUI NIZ TICZ MAZINCHICHA

³² Nekztan Jesusaqui Jerusalén cjita wajtquin okatčha tjaajintanacžtan. Jesusačha ninacž tuqui ojckhiqui. Nii tjaajinta zoñinacaqui tsucchi okatčha. Nii parti apžninacaqui ekscan okatčha. Nekztanac Jesusac niž tuncapan tjaajintanaca kjawžcu, tsjii kjutni chjitchičha. Nekztan jaknužt nižquiz watačhaja jalla nii mazinchičha.

³³ Jesusac cjichičha:

–Nonžna. Wejrqui tsewctan cuchanžquita Yooz Zoñtčha. Jerusalén watjaž ojckčha učhumqui. Jalla nii wajtquin tarazuna paatal cjeečha. Timlu jilirinacžquiz nižaza judío tjaajiñinacžquiz tantal cjeečha. Nekztan ninacaqui, “Ticzla tiiqui”, cjequičha. Nekztan yekja wajtchiz zoñinacžquiz intirjital cjeečha.

³⁴ Nekztan wejr munu paatal cjeečha. Llawsižtan tjujttal cjeečha. Wjajttal cjeečha. Ultimquiziqui contal cjeečha. Nekztan ticžcuqui čhjep majquiztanac jecatatačha.

JACOBZTAN JUANZTAN

³⁵ Nekztanaqui Zebedeož majchnacaqui Jacobžtan Juanžtan Jesusižquin macjatchičha tuž cjican:

–Tjaajiñi Maestro, čhjulut amquiztan pecučhaj niiqui, tjaalla.

³⁶ Jesusaqui pewczičha:

–Čhjuluž pecya?

³⁷ Nii pucultan zoñiqui kjaazičha:

Čhjuloram am tjappacha mantačhaj niiqui, wejrnac julskatalla, tsjiiqui žew kjuttan, tsjiiqui zkar kjuttan.

³⁸ Nekztan Jesusaqui cjichičha:

–Ančhucqui tii mayta ana intintichiñčhucčha. Wejrqui tsjii wasu licznačha. Nižaza tsjii bautismo bautista cjeečha. ¿Jalla nižtapacha ančhuc sufri atasajo?

³⁹ Ninacaqui kjaazičha:

–Atasačhay.

Nekztan Jesusaqui cjichičha:

–Wejr irata ančhucqui tsjii wasu licznaquičha. Nižaza tsjii bautismo bautista cjequičha.

⁴⁰ Pero žewquiztan nižaza zkarquiztan julznaj cjičhaj niiqui, wejr ana nii atasačha. Jakziltižtažlaj nii julz tjacžta niiqui, ninacžtaž cjequičha.

⁴¹ Nekztan nii parti tunca tjaajintanacaqui nuž nonžcu, žawjchičha Jacobuž nižaza Juanž kjutni.

⁴² Nekztan Jesusaqui tjaajinta zoñinaca kjawzičha, tuž cjican:

–Ančhucqui zizza. Tsjii nacionž chawjc jiliričha nacion nužpachaž cazkatčha. Tsjii c'ari patrunažtakaz cjissa jilirinacaqui. Jilirinacaqui tjapa zoñinaca rispitskatčha.

⁴³ Ančhuczti anača nižta cjisqui. Jakziltat ančhucaquiztan juc'ant chekan žoñi cjis pecchaj niiqui, partinacz piyuna cjis waquiziča.

⁴⁴ Jakziltat ančhucaquiztan ancha tucquin cjis pecchaj niiqui, tjapa žoñinacz mantuquizpanž cjis waquiziča.

⁴⁵ Jalla nižtijapa wejr tjonchinča. Tsewctan cuchanžquita Yooz Zoñtča. Pero ana žoñiž sirwita cjisjapa tjonchinča. Antiz žoñinaca sirwisjapa tjonchinča. Zoñinacz cuntiquiztan ticzjapami, žoñinaca liwriizjapami, nijjapa tjonchinča wejrqui.

ZUR ZOÑI CHJETINTA

⁴⁶ Nekztan Jesusaqui Jericoquiztan ulanžquichiča tjaajinta žoñinacztanami tama žoñinacztanami. Jicz latuquiz tsjii zur žoñi julzi želatča, tomangžcan. Bartimeo cjitatača, Timeož majch.

⁴⁷ Nii Nazaret wajtchiz Jesusa macjatžquiñi nayžcu, nii zur žoñiqui kjawchiča, tuž cjican:

—Jesusa, Davidž Majchimča! ¡Wejr okžnalla!

⁴⁸ Nekztan žoñinacaqui nii zur žoñi ujsiča:

—¡Ch'uj žela! —cjican.

Nekztan nii zur žoñiqui juc'anti kjawchiča:

—¡Davidž Majch, wejrpanž okžnalla!

⁴⁹ Nekztan Jesusaqui tsijtsiča.

—Nii žoñi kjawžca, —cjichiča. Zoñinacaqui nii zur žoñi kjawziča, tuž cjican:

—Tsijsna. Zuti cjee. Jesusaž am kjawža.

⁵⁰ Nekztan niiž zquti cujtžcu, tjojtichiča. Jesusižquin macjatchiča.

⁵¹ Nekztan Jesusaqui nii žoñi pewczyča:

—¿Chjulum pecya? ¿Kjažum wejr paljay-ya?

Nii zur žoñiqui kjaaziča:

—Tjaajiñi Maestro, ancha zurtča wejrqui. Cherz pecuča.

⁵² Jesusaqui cjichiča:

—Am tjapa kuztan cjen žejtchamča. Jazic oka.

Nii orapacha nii žoñž chjuiquiqui cjetsiča. Cherñi cjissiča. Nekztan Jesusaž okan nii žoñiqui apziča.

11

JESUSAQUI JERUSALEN WATJA LUZZICHA

¹ Nekztanaqui pizc wajtquin irantichiča Tsjiiqui Betfagé cjitača, tsjiiqui Betania cjita. Jerusalén wajtž žcatillatača, Olivos cjita cur zanquiz. Jesusaqui tsjii pucultan tjaajinta žoñinaca tuqui cuchanchiča,

² tuž cjican:

—Jerusalén watja oka. Irantižcu tsjii mokžta aznu cheraquiča. Nii aznuqui ana zinta žoñiž yawztača. Jalla nii aznu jweržcu wejtquin zji-caquiča.

³ Yekjap žoñiž pewcznanaqui, “¿Kjažtiquiztan nižta paa?” cjenaqui, ančhucqui tuž kjaaznaquiča, “Chawjc jiliriž pecča”, cjican. “Upaquiztan tii aznuc tjepuntaž cjequiča”.

⁴ Nekztan nii pucultanaqui ojkchiča. Tsjii aznu cherchiča, kjuy zanquiz mokžta; callquiztača. Nekztan ninacaqui aznu jwersiča.

⁵ Yekjap nekz žejlñi žoñinacaqui pewczyča:

—¿Kjažtiquiztan ančhuc nii aznu jwerjo?

⁶ Jesusiž chiitacama kjaaziča. Nužquiz nii žoñinacaqui cutziča.

⁷ Jesusižquin nii aznu zjijcchiča. Nekztan zqutinaca carunsiča, Jesusiž yawzjapa.

⁸ Yekjap žoñinacaqui ch'ojña ramuzanaca pootžcu, nii jiczquiz chjinchiča. Zqutinaca chjinchizakazza. Nuž paachiča rispitsjapa.

⁹ Jesusiž tucquin ojkñi žoñinacami Jesusiž wirquin apzñi žoñinacami tjapacha wiwchiča, tuž cjican:

–¡Viva tii Yooz tjuuquiz tjonchi žoñi! ¡Yooz wintijla!

¹⁰ ¡Tiiž mantaquiča, učum tuquita žoñiča David cjita, jalla nižta! ¡Yooz wintijla! ¡Viva učum Yooz!

¹¹ Jalla nužu Jesusaqui Jerusalén watja luzziča. Nižaza timpluquiz luzziča. Tjapa kjutñi chercherchiča. Nekztan tjuñiž zeziž cjen Betania cjita wajtquin ojkchiča niiž tuncapan tjajinta žoñinacžtan.

ANA FRUTCHIZ MUNTI

¹² Jakatažuqui Jesusaqui Betania wajtquiztan ulanžcan, čhjeri eecskatchiča.

¹³ Ažquiztan higuier munti cherchiča, ch'ojña chjañchiz. Nii munti cherzñi ojkchiča, “Frutaj žejlž”, cjican. Nii munti irantan, chjañkaz želatča. Anatača frut timpu.

¹⁴ Nekztan Jesusaqui nii muntiž quintra chiichiča:

–Tii muntiquiztan anaž jecmi iya fruta lulaquiča.

Niiž tjajintanacaqui nii chiita nonziča.

JESUSAQUI TIMPLU PEWZICHA

¹⁵ Nekztan Jesusaqui niiž tjajinta žoñinacžtan Jerusalén watja iran-tižcu timpluquiz luzziča. Nekztan timpluquiztan zawncchuc liwj tuyñi žoñinacami kjayñi žoñinacami tjirkatchiča. Paaz campiiñi žoñinacž mizami paloma tuyñiž zillami k'ala pjokžinchiča.

¹⁶ Jesusaqui nii timplu patiuran kužñi žoñinaca k'ala jarq'uichiča.

¹⁷ Nekztanac chiižinchiča, tuž cjican:

–Cjijrta Yooz takuqui tuž cjiča: “Wejt kjuyača Yooztan parlis kjuyaqui. Jakzilta žoñimi Yooztan parlasača tekziqui.” Ančhucqui tii timplu tjangz kjuyažtakaz paachinčhucča.

¹⁸ Nekztan timplu chawjc jilirinacaqui judio lii tjajiiñinacaqui nii quintu zizcu parličiča:

–¿Jaknužt tii Jesusa conas? –cjican.

Tjapa žoñinacazti Jesusiž tjajintiquiztan ispantichiča:

–Ancha cusala, –cjican.

Nižtiquiztan nii quintri žoñinacaqui Jesusižquiztan eksñitača.

¹⁹ Tjuñiž kattan Jesusaqui wajtquiztan ulanchiča niiž tjajinta žoñinacžtan.

ANA FRUTCHIZ MUNTIQUI KJOÑCHIČHA

²⁰ Jakawenztažuqui nii higuier cjita munti wilta watchiča. Waaa, kjoñchi cherchiča, žep'anacžquiztanpacha.

²¹ Pedruqui Jesusiž tuquita chiita taku cjuñžcu cjichiča:

–Tjajiiñi Maestro, cheržca. Amqui tii muntiž quintra chiichamča. Jaz-iqi kjoñchiča.

²² Jesusaqui kjaaziča:

–Yoozquiz tjapa kuztan cjee.

²³ Weraral cjiwčha, jakzilta žoñit nii najwc curquiz, “Curu, tekztan zaraka. Pajk kotquiz luzca”, nuž cjican chiyasaž niiqui, nižtapachaž curu okasača, ana paysnakasaž niiqui, tjapa kuztan cjesaž niiqui.

²⁴ Jaziqui ančhucaquiz chiyučha, čhjulumi Yoozquiztan mayizaquič ni-
iqui, tjaataž cjequičha, Yoozquin tjapa kuztanž cjee.

²⁵ Nižaza ančhucqui čhjulatorat Yoozquiztan mayisaja, nii orac ančhuca
quintra žoñinacz uj pertunaquičha. Nekztan ančhuca Yooz Ejpqui ančhuca
ujmi zakaz pertunaquičha.

²⁶ Ančhucqui ana žoñž uj pertunasaž niiqui, nižaza arajpach Yooz Ejpqui
ančhuca ujnaca anazakaz pertunasača.

¿JECT JESUSIZQUIZ MANTICHI?

²⁷ Nekztanaqui Jesusaqui Jerusalén watja wilta quejpcchiča niiž tjaaajinta
žoñinacztan. Jesusaž timpluran ojklayan timplu jilirinacztanami lii tjaa-
jiñinacztanami wajt jilirinacztanami jalla ninacaqui Jesusizquin tjonchiča.

²⁸ Nekztan pewczičha:

—¿Ject jilirit am mantichi, tii paazjapajo? ¿Jec jilirit am utchi jilirižtakaz
paazjapajo?

²⁹ Jesusac nekztan kjaaziča:

—Wejrmi jazic ančhucaquiz zakal pewcznača. Ančhucaž kjaaztan, wejr
zakal ančhucaž pewcznac kjaaznača, jec jilirit wejr utchi, nii.

³⁰ Tiil pewcznača ančhucaquiz. ¿Ject Juan mantichi, bautisjapajo?
Yoozkaya už žoñej. Jazicz kjaazna.

³¹ Nekztanac ninacpora ancha ch'aasi kallantichiča, tuž cjican:

—¿Kjažum kjaaznaquejo? “Yooz mantitača”, cjequič niiqui, nekztan
“¿Kjažtiquiztan ančhuc nii Juan ana criichinčhuctajo?” nuž cječhan tiicni.

³² Učhumqui anapanča chiyi atasača, “Žoñiž mantitacha”, cjican.

Žoñinacaqui walja nii Juanžquin rispittiquiztan, cjichiča:

—Werara Yooz taku parliñi profetača Juanqui.

Nižtiquiztan nii jilirinacaqui žoñinaca ekskcu,

³³ ana kjaazñi atchiča. Ninacaqui chiichiča:

—¿Jaknužukazlan? Nekztanac Jesusac cjichiča:

—Nižaza wejr ana zakal maznasača, jec jilirit wejr utchi, nii.

12

ANA ZUM PIYUNANACZ QUINTU

¹ Nekztan Jesusaqui tsjii quintu paljaychiča, tuž cjican:

—Tsjii žoñi želatča, patruna. Nii žoñiqui uwas zkala čhjaczchiča. Nekztan
pajk uyu pirkichiča nii zkal muytata. Nižaza maz ojt paachiča, uwas kjaz
spjiitzjapa. Nekztan campanturi cherchi torre pirkichiča, zkala itzjapa.

‘Nekztan nii patrunaqui zkala partira tjaachiča piyunanaczquiz. Nekz-
tan ažkquin ojkičiča.

² Nekztanaqui zkala ricujz timpuž tjontan nii patrunaqui tsjii piyuna
cuchanzquichiča, niiž partir zkala ricujzjapa.

³ Nii partira tanzñi žoñinacaqui patrunaž cuchanzquita piyuna tanžcu
kijtchiča. Wjajtchiča. Ana čhjulchiz cuchanchiča patrunžquin.

⁴ Nekztan nii patrunaqui tsjižtan wilta cuchanzquichiča. Nii partira
tanzñi žoñinacaqui nii patrunž piyuna maztan čhajcchiča. Achquič chjo-
ritchiča. Chjaawjkatchiča.

⁵ Nekztan nii patrunaqui wilta tsjii piyuna cuchanzquichiča. Čhjep
wiltiquiziqui piyuna conchiča. Nižta anawali paachiča tsjii kjaž cuchanta
piyunanaczquiz. Partiqui wjajttatača. Partiqui contatača.

⁶ ‘Iya tsjii želatča nii patrunž k'ay majch. Ultimquiziqui nii patrunaqui
k'ay majch cuchanzquichiča, “Wejt majch rispitta cjequičha”, cjican.

⁷ Nii partira tanzñi žoñinacazti ninacpora parlassičha tuž cjican, “Tsjii nooj tii majchqui ejpž irinsa tanznasača. Tii zkal yokanaca k'alaž ricujasača. Ojklay tiiž conla. Nekztan tsjii nooj učumnacaltaž tjappacha tii zkal yokanaca cjequiž, jalla”.

⁸ Nekztanaqui nii majch tanžcu conchiča. Nekztan nii yokquiztan niž ticzi curpu jwescu, tjojtchiča.

⁹ Nekztan Jesusaqui pewcziča:

—¿Nii uwas zkalchiz patrunaqui, čhjulut paačhaja? Wejr cjiwcha, nii patrunaqui tjonaquiča. Nekztan nii partira tanzñi žoñinaca conaquiča. Nekztan niž uwas zkal yokanaca yekjanacžquiz tjaaquiča.

¹⁰ ‘Ančhucqui Yooz taku liichinčhucča, ¿ana jaa? Tsjii Yooz takuqui tuž cjiča:

“Kjuy pirkiñinacaqui tsjii maz tjojtchiča. Nii tjojta mazqui isquinqiz cjis-sičha. Ultimquiziqui tucquin cjissičha.

¹¹ Yoozqui nuž cjiskatchičha. Nii cheržcu ancha ispantichinčhumča”.

Nuž cjiča cjiirta Yooz takuqui.

¹² Nekztanaqui nii quintri žoñinacaqui Jesusa tanz pecatča:

—Tii quintu wejtnaca quintraž, —cjican.

Nekztan nii žejlñi žoñinaca ekskcu, quintri žoñinacaqui Jesusa ecchiča, ana kjaž cjiscu. Nužquiz ojkchiča.

TASA TJAAZ PUNTU

¹³ Yekjap fariseo žoñinacaqui Herodes žoñinacžtan cuchanžquitatača, Jesusa pewcžñi. Niž čhiitiquiztan tsjii anazum taku jwes pecatča.

¹⁴ Jaziqui cjichiča:

—Tjaajiñi Maestro, zizuž wejrnacqui, am werarapan chiiñamča, žoñinacaž am quintra čhiichiž cjenami. Nižaza am taku anaj tsjii tsjii čhiichila žoñinacž laycu. Yooztan kamz puntuquiztan werarapan tjaajiñamča. Jazic tjaajznalla tii puntu. Wejrnacqui César cjita jiliržquiz tas paaz tjaayiñča. ¿Nuž walikazkay už anaž wali cjesaj? ¿Nii tas paaz tjaaz waquizasaya, už anaž waquizasaj, jaa?

¹⁵ Jesusaqui ninaca pizc kuzziz zizatča. Nekztan kjaaziča:

—¿Kjažtiquiztan ančhucqui wejr ujchiz jwes pecjo? Tsjii paaz zijca, chertzjapa.

¹⁶ Tsjii paaz zijcchiča. Nekztan Jesusac pewcziča:

—¿Tii paazquiz, jecž yujctaya? ¿Jecž tjuu cjiirrataya?

Ninacaqui kjaaziča:

—César cjita jilirž tjuučha. Niž yujcča niiqui.

¹⁷ Nekztan Jesusaqui čhiichiča.

—Chjulumi jiliržta cjenauqui jiliržquiz tjaa. Nižaza čhjulumi Yoozta cjenauqui Yoozquiz tjaa.

Nuž čhiitiquiztan ninacaqui ancha ispantichiča.

JACATATZ PUNTU

¹⁸ Nekztan yekjap saduceo žoñinacaqui Jesusa chertzñi ojkchiča. Jacatatz puntu ana criiñipantača. Jesusižquin macjatžcu pewcziča:

¹⁹ —Tjaajiñi Maestro, Moisesaqui učumnacalta cjiirtkalča, tuž cjican: “Tsjii žoñi ticznasaž niiqui, niž tjun ana ocjalchiz cjesaž niiqui, nekztan nii ticzi žoñž jilaqui naa žewatan zals waquiziča, nii ticzi jilž cuntiquiztan ocjala paazjapa”.

²⁰ Jaziqui pakallak jilazullca želatča. Nii jilir jilaqui zalsičha. Nekztan ticziča ana ocjalchiz.

²¹ Nekztan tsjii taypir jilaqui naa žewatan zalsizakazza. Nekztan ana ocjalchiz ticzizakazza. Nekztan yekja taypir jilaqui naa žewatan zalsizakazza. Nekztan ana ocjalchiz ticzizakazza.

²² Tjappach nii pakallak jilazullcanacaqui naa žonatan zalsičha. Nekztan tjappacha ana ocjalchiz ticzičha. Ultimquiziqui naa žonqui ticzinčha.

²³ Jaziqui žoñinaca jacatattanaqui wilta žeti tantanaqui ¿jakzilta jilž tjun naa žon cjequejo? Pakallakuqui naa žonatan zalsičha.

²⁴ Jesusaqui kjaazičha:

–Ančhuca takuqui tsjii kjutñi chiyiñčhucpančha. Ančhucqui Yooz takumi Yooz azimi anapan zizza.

²⁵ Ticzi žoñinacáž jacatattanaqui anaž zals želaquičha. Anaž tjtjowami turtakanacami zalznaquičha. Arajpach anjilanaca irataž kamaquičha.

²⁶ Jacatatz puntuquiztan Moisesaqui liwruquiz cijjrtkalčha. Liich-inčhucčha, ¿ana jaa? Tsjii ujsñi kalquiztan Yoozqui Moisesquiz paljaychičha, tuž cijcan: “Abrahamž Yooztčha wejrtčha. Nižaza Isaacž Yooztčha, nižaza Jacobž Yooztčha”.

²⁷ Yooz Ejpqui anačha ticzi žoñž Yoozqui, žejtñi žoñž Yoozqui. Nižtiquiztan ančhuca takuqui ancha tsjii kjutñipankazza.

¿JAKZILTA YOOZ MANTITAT CHEKANAQUI?

²⁸ Nekztanaqui žoñinacžtan Jesusižtan ch'aasñi nonžcu tsjii judiuž lii tjajjiñi žoñiqui macjatžquichičha. Jesusaž zuma kjaaztiquiztan nii žoñiqui pewczizakazza, tuž cijcan:

–¿Jakzilta Yooz mantitat chekanaqui?

²⁹ Jesusaqui kjaazičha:

–Tii Yooz mantitačha chekanaqui: “Nonžna ančhucqui, Israeli wajtchiz žoñinaca. Tsjan chawjc jiliričha učhum Yoozqui. Ana iya yekja Yooz žejlčha. Yoozqui Jiliripančha.

³⁰ Ančhucqui tii ančhuca Yoozquiz tjapa kuztan sirwaquičha, nižaza tjapa animužtanami, nižaza tjapa pinsamintužtanami, nižaza tjapa aztanami”. Jalla nii Yooz mantitačha chekanaqui.

³¹ Nižtazakaz nii jaru tii Yooz mantitac žejlčha. Tuž cijčha: “Jaknužum persunpachquiz okžñamžlaja, jalla nižta okžñi kuzziz cjistančha žoñinacžquizimi, lijitum mazižtakaz”. Tii pizc mantitanacačha juc'ant chekanaqui čjul mantitanacquiztanami.

³² Nekztan nii judío tjajjiñiqui cijichičha:

–Tjajjiñi Maestro, werara čiichamčha. Am čiitaqui cusačha. Tsjii Yoozpankaz žejlčha; ana iya želasačha.

³³ Tii Yoozquiz sirwispanž waquizila, tjapa kuztan, nižaza tjapa animužtan, nižaza tjapa pinsamintužtan nižaza tjapa aztan. Nii jaruqui jaknužum persunpachquiz okžñamžlaja, jalla nižta okžñi kuzziz cjistančha žoñinacžquizimi, lijitum mazižtakaz. Yoozquin ujta wilana puntu mantitami nižaza ofrenda tjaz mantitami jalla nii mantitanacžquiztan tii pizc Yooz mantitanacačha juc'ant chekanaqui.

³⁴ Nii judío tjajjiñi žoñiqui zuma intintazzi razunchiz čiichičha. Nižta nayžcu Jesusaqui čiichičha:

–Amqui Yooztan kamz jicz cježullačha, Yooz mantita žoñi cjisjapa.

Nekztan žoñinacaqui iya pecunchi Jesusižquiz pewczñi anaž atatčha.

¿CRISTUQUI JECZ MAJCHTATA?

³⁵ Jaziqui Jesusaqui timpluquiz tjajjincan, cijichičha:

–Nii judío tjajjiñinacaqui tuž cijčha: “Davidž majchkazza Cristuqui”. ¿Kjažtiquiztan nuž cjeejo?

³⁶ Arajpach Yooz Espirituqui David chiikatchiĉha, tuŝ cjican:
 “Yooz Ejpqui wejt chawjc jilirŝquiz cjichiĉha: ‘Tsjii ora wejrqui am kjojch
 koztan am quintri ŝoñinaca t'okskataĉha. Nii oracama wejt ŝew latu
 julzna’ ”.

³⁷ Jaziqui Davidaqui persunpacha cjichiĉha: “Chawjc jiliriĉha tiiqui”.
 ¿Niŝtiquiztan jaknuŝt niŝ chawjc jiliri niŝ majchqui cjesajo? –Nuŝ cjichiĉha
 Jesusaqui.

Nii tama ŝejlñi ŝoñinacaqui Jesusiŝ taku nonz jutztazziĉha.

JUDIO LII TJAAJINAC

³⁸ Niŝaza tjaaŝincan Jesusaqui cjichiĉha:

–Judío lli tjaaŝinacŝquiztan cwitazaquiĉha. Ninacac tol zquitchiz ojklaz
 jutztazñiĉha. Ninacaqui palazquiz tsaanskatzmi rispitskatzmi jalla niika
 pecñiĉha.

³⁹ Ninacaqui ajcz kjuyquiz tucquin julz pecñiĉha. Niŝaza pjijstiquiz lujlcan
 ancha tucquin cŝicŝis pecñiĉha.

⁴⁰ Ninacpacha ŝewŝewanaca t'akjiri cŝiskatñiĉha. Niŝaza ŝoñinaca incal-
 lzjapa aŝka Yooztan parlitaŝoka cŝiñiĉha. Jaziqui ninacaŝ juc'anti caŝticta
 cjequiĉha.

OFRENDA PUNTU

⁴¹ Nekztan Jesusaqui ofrenda tjaaŝ cajun yujcquin julziĉha. Nekzi ŝoñinaca
 paaz uchan cherĉiĉha. Yekjap ricachunacaqui muzpa paaz utĉiĉha.

⁴² Nekztan tsjaa poris ŝewqui tjonchinĉha. Pizc paazalla utchinĉha, kolu-
 culla.

⁴³ Jalla nekztanaqui Jesusaqui niŝ tjaaŝinta ŝoñinacŝquiz kjawziĉha. Nekz-
 tan intintiskatchiĉha:

–Weraral chiyuĉha, naa poris ŝewqui nii cajunquiz juc'anti utchinĉha,
 tjapa nii parti ŝoñinacŝquiztan cjen.

⁴⁴ Nii parti ŝoñinacaqui ĉhjetinta paaz utĉiĉha. Naa poris ŝewzti tjappacha
 naatan kamñi paaz utĉiñiĉha.

13

JUDIO TIMPLUZ PUNTU

¹ Nekztan timpluquiztan ulnan tsjii tjaaŝinta ŝoñiqui Jesusiŝquiz paljay-
 ĉiĉha, tuŝ cjican:

–Tjaaŝiñi Maestro, cherŝca. Tii pajk maznacami tii pajk kjuyanacami
 ancha cusaĉha.

² Jaziqui Jesusaqui niŝquiz ĉiichiĉha:

–Tii pajk kjuyanaca cherĉha amqui. Wejrqui cjiwĉha, tsjii nooj ana zinta
 tii maznacaqui pirkita ŝelaquiĉha. Tjappacha pajlŝtaŝ cjequiĉha.

TII MUNTU TUCUZINZ PUNTU

³ Nekztan Olivos cŝita curu ojkiĉha, timpluŝ zanquiz. Nekzi Jesusac julzi
 ŝelatĉha; ana iya ŝoñi ŝelatĉha. Nekztan Pedruŝtan, Jacoboŝtan, Juanŝtan,
 Andrestan, ninacaqui Jesusiŝquiz pewcziĉha, tuŝ cjican:

⁴ –Maznalla wejtnacaquiz. ¿ĉhjulorat nii amiŝ ĉiita wataquejo? ¿Ima
 amiŝ ĉiita watan, ĉhjulunacat wataquejo?

⁵ Nekztan Jesusaqui kjaaziĉha:

–Anĉhucqui persunpachquiz cwitaza, anaĉha jeczquizimi incallskata.

⁶ ŝoñinacaqui wejt tjuu aynakcanŝ tjonaquiĉha, tuŝ cjican: “Wejrtĉha
 Cristutqui”, Jalla nekztanaqui muzpa ŝoñinacaqui incallskataquiĉha.

7 'Ančhucqui quintunaca nonznaquiča, quira žejlz quintunaca, ch'ajwa quintunaca. Nekztan anača tsucaquiča ančhucqui. Nižtapanž wataquiča. Tii muntu tucuzinzqui imaž irjatžquiča.

8 Nacionporaž kichjasaquiča. Wajtporaž kichjasaquiča. Tjapa kjutñi yokac chjeknaquiča. Mach'anaca želaquiča. Zoñipora kichjasaquiča. Ancha zoñinaca t'akjisaquiča tjapa kjutñi. Sufrisnaca uzcakaž kallza. Wiruñac juc'ant sufrisnaca želaquiča.

9 'Ančhucqui persuna waljaž cwitazaquiča. Zoñinacaqui ančhuc tanžcu jilirinacžquin chjichaquiča. Nekztan ajcz kjuyquiz wjajtažakaz cjequiča ančhucqui. Weriz cjen chawjc jilirž yujcquizimi wajt jilirž yujcquizimi apantitaž cjequiča. Nekztan wejt puntuquiztan ninacžquiz maznaquiča ančhucqui.

10 Ima tii muntuž tucuzan, Yooz takuqui tjapa nacionquin maz maztaž cjequiča.

11 Chjulator ančhucqui jiliržquiz apantita cječhaja, jalla nii ora anača eksnaquiča, ¿kjažt wejr cjeequejo? –cjicanaqui. Nižaza anača ancha čhjulu chiismi pinsaquiča ančhucqui. Nii oraqui Yooz ančhucaquiz tjaažnaquiča, čhjul takut chiyačhaja, nii. Ančhuca persun pinsita inapankazza. Nii oraqui Yooz Espirituqui ančhucaquiz chiikataquiča.

12 Tsjii jilaqui persun jila tarasunaquiča conkatzjapa. Ejpnaqui persun maati tarasunaquiča conkatzjapa. Maatinacami maa ejpž quintra tsijt-snaquiča conkatzjapa.

13 Ančhuc weriz cjen tjapa zoñinacaž chjaawjtaž cjequiča. Jakzilta zoñit ticzcama wejtquiz tjurt'ačhaja jalla niiqui liwriitaž cjequiča.

14 'Daniel cjita Yooz taku parliñi profetaqui cjiirtkalča, tuž cjican: "Tsjii nooj tsjii juc'ant anawal akñi zoñi želaquiča". Jakziquin niiqui ana žejlsalaja, nicjuñ želaquiča tii anawaliqui. Chjulator ančhucqui nižta cheračhaja, nii ora curunacquin atipas waquiziča tjapa Judea yokquin žejlñinacaqui. Liiñi zoñiqui intintazla.

15 Nii kjuy juntuñ žejlñi zoñinacaqui chjijwžcu ana kjuya luzla, čhjulumu chjichi jwesjapa.

16 Nii zkalquin žejlñi zoñinacaqui ana kjuya quejpla, zquiti apti.

17 Nii timpuquiziqui ic maatakanacami k'azllu wawchiz maatakanacami ancha t'akjiri cjequiča.

18 Yoozquinča mayiza ančhucqui, anaj zak timpuquin tižtanacac tjonla, nii.

19 Tii sufris timpu yekja sufrisnacquiztan juc'anti sufris cjequiča. Tuqui timpuqui Yoozqui tii muntu paachiča. Nekztan jecchuc anapanž tižta sufrisnacac watchiqui. Tekztan najwčchuc anaž iya juc'anti sufrisqui cjequiča.

20 Yoozqui anaž tii sufrisnaca tucuskataquiž niiqui, tjapa zoñinacaž ticznaquiča. Yoozqui niž illzta zoñinacž cjen tii sufrisnaca tucuskataquiča.

21 'Nižaza yekjap zoñinacaqui ančhucaquiz chiyaquiča: "Chera. Ticjuča Cristuqui". Yekjapac chiyaquiča: "Nacjuča Cristuqui" cjican. Nuž chiichiž cjenami, anapanča nii taku criyaquiča ančhucqui.

22 Incallñi zoñinacaž tjonaquiča. Tsjii incallñinacaqui: "Cristutča wejrqui", cjequiča. Yekjapazti: "Yooz taku parliñtča wejrqui", cjequiča. Ninacaqui walja ispantichuca milajrunacaž paaquiča, incallzjapa. Tjapa zoñinacaž incallz pecaquiča, Yooz illzta zoñinacami.

23 Ima tižtanacaž tjonan wejrqui ančhucaquiz mazinchiñča. Nižtiquiztan walja cwitazaquiča ančhucqui. Nižta kuzziz cjee.

¿JAKNUŽT CRISTUQUI TJONAQUI?

²⁴ 'Nekztanaqui tii sufris timpu wattan, tjuñiqui zumaquiča. Nižaza jizmi anaž iya kjanaquiča.

²⁵ Warawaranacami tsewctan tjojtснаquiča. Tseecu azziz žejlñinacaqui chjekinskattaž cjequiča.

²⁶ Jalla nekztanaqui žoñinacaqui tii tsewctan cuchanžquita Yooz Zoñiž cher-aquiča. Wejrqui tsjir taypiquiz tjonacha, walja aztan, ancha ispantichuca.

²⁷ Nekztanaqui tjapa kjutni nii arajpach Yooz anjilanacaqui cuchanta cjequiča, weriž illztanaca juntjapžcajo. Tjapa yok tjyquiztanpacha tjapa arajpach tjyquiztanpacha juntjapžtaž cjequiča.

²⁸ 'Ančhucqui tii puntu zizaquiča higuera cjita muntiquiztan. Chjulator nii muntiqui ch'ojñantis cjissaja, jalla nii ora waj kutunz timpu žcatiča. Nužupanž zizza ančhucqui.

²⁹ Jalla nižtapacha tii weriž chiita watan, ančhucqui tuž zizaquiča; tii tsewctan cuchanžquita Yooz Zoñiqui wajillaž tjonaquiča, nii. Nižaza tii muntu tucuzinzqui žcatillača.

³⁰ Weraral cjiwča, tjapa tii timpuquiz žejlñi žoñinacaqui ana ticznaquiča, ima tii weriž chiita watan.

³¹ Arajpachami yokami tucuzaquiča. Wejt takunacazti wiraž ana tucuzaquiča. Nužupanž cumplisnaquiča.

³² 'Wejt tjonz tjuñimi wejt tjonz orami anaž jecmi zizasacha, anaž nii arajpach Yooz anjilanacami, anaž Yooz majchmi. Yooz Ejp alajakaz zizza.

³³ 'Ančhucqui, persuna naazna, cwitaza, Yoozquin mayiza. Chjulator nii tjuñi tjonachaja, nii ora ana zizza ančhucqui.

³⁴ Jalla tii quintuž iratača wejt tjonz tjuñi. Tsji žoñiqui ažkquin ojkz tantiičiča. Ima niž kjyquiztan zarakcan zapa mayni niž piyunanacžquiz langz tjaacha. Kjy cwitiñi žoñžquiz zuma cwitajo mantiča.

³⁵ Nekztan ojkžcu, čjulator nii kjyčhiz žoñiqui quepačhaja, jalla nii ora, piyunanacaqui ana zizza, niit už zeztan tjonachaja, niit už chica arama tjonachaja, niit už kjantat ora tjonachaja niit už wentan tjonachaja. Chjulator tjonachaja, ninacaqui anaž zizza. Nižtiquiztan piyunanacaqui listuž cjila.

³⁶ Jalla nii irata ančhucqui listuž cjee. Tiripintit ančucaž tjajan tjonasacha.

³⁷ Wejrqui ančhucquizimi tjapa žoñinacžquizimi chiyuča, listupanča cjee.

14*¿JAKNUŽUM JESUSA TANAS?*

¹ Puc majkaz pjaltiča pascu pjiztiquinaqui. Nii orazakaz yekja pjiztaqui kalltiznatča, ana liwaturchiz t'anta lujlz pjizta. Jalla nii ora timplu jilirinacžtan judio tjaajiñinacžtan palt'ichiča, tuž cjican:

—¿Jaknužum Jesusa incallžcu tanas?

Nižaza nuž tanžcu, Jesusa conzjapa kazziča.

² Ninacaqui tantiižcu, cjichiča:

—Pjiztiquiz anaž tanz waquizasacha. Zoñinacaqui učhum quintraž cjisnasača.

JESUSIZ ACHQUIZ ASIITI ALZTA

³ Jesusaqui Betania cjita wajtquiz želatča, Simonž kjyquiz. Nii Simon-aqui tuqitan mojkchi janchichiz žejlñitača. Nekzi lulan tsjaa maatak žonqui tsji putillžtan tjonzinča. Nii putillquiz cusa mazk'a ulurchiz asiiti

želatĉha, nardo cjita, ancha jila walurchiz. Nii putillaqui zuma alabastro cjita maztan paatataĉha. Nekztan naa maatak žonqui putilla kjolžcu Jesusiž achquiz asiiti alsinĉha.

⁴ Yekjap nekz žejlñi žoñinacaqui žawjziĉha. Ninacpora palt'ichiĉha, tuž cjican:

—¿Kjažtiquiztan nii mazk'a ulurchiz asiiti pertejo?

⁵ Naalaqui asiiti tuysalani quinsa patac denario cjita paazuñ. Nekztan nii paazqui poris žoñinacžquiz onansalani.

Naaža quintra chutchiĉha.

⁶ Nekztan Jesusaqui chiichiĉha:

—¿Kjažtiquiztan taa žonatan chjijcisejo? Anaĉha taa žon kjaž cjisqui. Wejtquiziqui walika paachinĉha.

⁷ Poris žoñinacami panž žejlĉha. Chjulorami ninacžquiziqui yanapasaĉha. Wejrqui anal anĉhucatan tira želaĉha.

⁸ Taa žonqui jaknužt payi atĉhaja, nii paachinĉha. Ima wejt curpu tjatan asiitižtan alsinĉha.

⁹ Chekpacha weraral cjiwĉha, jaksiquinami tjapa kjutñimi Yooz taku parlita cjeĉhaja, jalla nicju taaža paata parlita cjequiĉha, taa maatak žon cjuñznajo.

JUDASQUI JESUSA TANKATZ PINSICHICHA

¹⁰ Nekztanaqui Judas Iscariotiqui timplu jilirinacžquin palt'i ojkchiĉha. Jesusiž tuncapan tjaaajinta žoñinacžquiztantaĉha Judasqui.

¹¹ Judas taku nonžcu jilirinacaqui ancha chipchiĉha:

—Paaz tjaasaĉha, —cjican.

Nekztanaqui Judasqui tantiichiĉha, ĉjulorat wali cjeĉhaja, Jesusa tankatzjapa, nii.

PASCU ĆHJERI LUJLCHICHA

¹² Pjijzta kallñi tjuñi, ana liwaturžtan t'anta lujlz pjijzta, nii tjuñi judio wajtchiz žoñinacaqui pascu uuza conñiĉha. Nii noojpacha tjaaajinta žoñinacaqui Jesusižquiz pewcziĉha:

—¿Jakziquin wejrnacqui ojkz waquiziya, pascu ĉhjeri luli tjaczjapaya?

¹³ Nekztan Jesusaqui pucultan tjaaajintanaca cuchanchiĉha, tuž cjican:

—Wajtquin oka. Nekzi tsjii žoñžtan zalaquiĉha kjaz luuz kužži. Nii žoñž wirquiz apznaquiĉha.

¹⁴ Jakziquin nii žoñiqui luzaĉhaja, jalla nicju nii kjuychiz žoñžquiz paljayaquiĉha, tuž cjican: “Tjaajiñiqui cjichiĉha: ¿Jakziquin wejt tjaaajintanacžtan pascu ĉhjeri lulasaya? ¿Jaknit nii kjuyajo?”

¹⁵ Nekztan nii kjuychiz žoñiqui tsewcta pisuquin tsjii pajk kjuya tjeznaquiĉha anĉhucaquiz. Nii kjuya listu tjaczta cjequiĉha. Jalla nicju uĉhumqui ĉhjeri kiswaquiĉha. —Nuž mantichiĉha Jesusaqui.

¹⁶ Nužquis nii pucultan tjaaajintanacaqui zarakchiĉha. Watja ojkchiĉha. Jesusiž chiitacama nižtapacha watchiĉha. Nekztanaqui pascu ĉhjeri kissiĉha.

¹⁷ Tjuñiž kattan Jesusaqui tjonchiĉha tuncapan tjaaajintanacžtan.

¹⁸ Ćhjeri lujlcan Jesusaqui chiichiĉha:

—Weraral cjiwĉha, anĉhucaquiztan tsjii wejtĉan lujlñiqui wejr tarazunaquiĉha.

¹⁹ Ninacaqui nužquiz llaquita cjissiĉha. Nekztan ninacaqui Jesusižquiz pewcziĉha. Tsjiiqui:

—¿Wejr kay? —cjichiĉha.

Tsjiiic:

—¿Wejr kay? —cjichizakazza.

²⁰ Nekztanac Jesusac kjaaziča:

–Tuncapaniž ančhucqui tsjiiqui wejr tarazunaquiča. Anziqumi niiča wejttan chica čhjeri lujlchi.

²¹ Wejrqui tsewctan cuchanžquita Yooz Zoñtča. Wejr okača, Yooz taku cjiirtacama. Jakziltat wejr tarazunačhaja, jalla niiqui juc'anti castictaž cjequiča. Nii tarazuñi žoñiqui anaj maa pjuchquiztan nastčhaj niiqui, juc'ant cusaž cjitasača.

²² Nekztanaqui čhjeri lujlcan, Jesusaqui t'anta tanžcu Yoozquin gracias cjican chiichiča. Nekztan t'anta kjolžcu, tjaajintanacžquiz tojziča, tuž cjican:

–Tanzna. Tii t'antača wejt curpu cuntaqui.

²³ Nekztan tsjii wazu tanziča. Yoozquin gracias cjican chiichizakazza. Nekztan ninacžquiz tjaatan, tjappacha ninacaqui nii wazquiztan licziča.

²⁴ Jesusaqui chiichiča:

–Wejt ljocquiztan cjiča tiiqui. Wejt ljocžtan tsjii ew acta tjulžta cjequiča. Wejt ljocqui tjapa žoñinacž cuntiquiztan tjawktaž cjequiča.

²⁵ Weraral cjiwča, uwas kjaz ana iya licača, čhjulatorat Yooz tjapa mantačhaja, jalla nii oracama.

PEDRUQUI JESUSA ANA PAJÑI TUCAQUICHA

²⁶ Tsjii Yooz wirsu itscu ojkchiča Olivos cjita curullquin.

²⁷ Nekziqumi Jesusaqui chiichiča:

–Tii weenaqui tjapa ančhucqui ana wejtquin kuzziz tucakuča. Nižtapan cjiirta Yooz takuqui cjiča:

“Wejr arajpach Yoozqui awatiri conača. Nekztan uuzanacaqui wichansnaquiča”.

²⁸ Jesusaqui cjichizakazza:

–Nekztan jacatatžcuqui ančuca tuqui okjayača Galilea cjita yokquin

²⁹ Nekztan Pedruqui chiichiča:

–Tjappacha ana amquin kuzziz cječhani. Wejrqui ana wira nižta cjesača.

³⁰ Jesusaqui kjaaziča:

–Weraral cjiwča, tii weenpacha amqui ana wejr pajñi tucakuča, Ima wallpaž pizc wiltaž kjawan, amqui čhjep wilta wejr ana pajñim chiyaquiča.

³¹ Pedruqui juc'anti tjurt'ichiča, tuž cjican:

–Wejrqui amtan chicami waztal ticznasača. Anapan amquiztanac zarakasača.

Tjapa nii tjaajintanacaqui nižtapacha tjurt'ichiča.

JESUSAQUI YOOZTAN PARLICHICHA

³² Nekztan Getsemani cjita yokquin ojkchiča. Nicju Jesusaqui niž tjaajinta žoñinacžquiz chiichiča:

–Tekzi julzna. Wejrqui Yooztan parli okača.

³³ Nekztan Pedružtan Jacobžtan Juanžtan chjitchiča. Jesusaqui walja llaquita kuzziz turwaysiča.

³⁴ Niiž tjaajintanacžquiz paljaychiča:

–Wejt kuzqui ancha llaquita, ticzucacha. Ančhucqui tekzi žela. Wilazaquiča; anača tjajaquiča.

³⁵ Nekztan tsjii koluc tuquinalla ojkchiča Jesusaqui. Yokquizkaz tuzi t'okziča. Yoozquiztan mayizichiča, tuž cjican:

–Tii juc'ant sufris timpu anal wats pecuča. Tii sufrisquiztan liwriychucažlaj niiqui, amquiž liwriyalla.

³⁶ Tira maycan cjichiča:

–Yooz Ejp, amqui čhjulumpankam atasacha. Tii sufrisnacquiztan li-wriyalla. Pero anal wejt kuzcama paaz pecucha. Jaknužt am kuz amtičhaj niiqui, jalla nuž am munañpaj cjila.

³⁷ Nekztanaqui tjaajintanaczquin quejpžquichiča. Tjajchi zalchiča. Nekztanaqui Jesusaqui Pedružquiz cjichiča:

–¿Simona, amquim tjajya?

³⁸ ¿Anam tsjii orami wilazi atya? Wilaza. Yoozquiztan mayiza, ana ujquiz tjojtjapa. Ančhucqui ancha kuztanča. Pero ančuca curpuzti anaž awantasača.

³⁹ Nekztan Jesusaqui wilta Yooztan parli ojkchiča. Tuquiqui jaknužt parličhaja, nižtazaka parličiča.

⁴⁰ Wilta tjaajintanaczquin quejpžquichiča. Wilta tjajchi zalchiča. Ancha tjaji atipskatchiča. Ninacaqui Jesusižquiz ana kjaazñi atchiča.

⁴¹ Jalla nekztan Jesusac čhjep wilta ojkžcu quejpžquichiča. Nekztan chiichiča:

–Jaziqui tjajchinčhucča, ančhucqui, nižaza jeejzinčhucča. Nužukaz. Wejrqui tsewctan cuchanzquita Yooz Zoñtča. Wejrqui ujchiz zoñinacz kjarquiz tankattal cjeeča. Nii ora anziqum irjatžquichiča.

⁴² Zaazna. Ojkla. Cheržna. Wejr tarazuñi zoñiqui nii nacjuž tjonča.

JESUSAQUI TANTATACHA

⁴³ Nii ora Jesusaž nuž chiyan, tsjiiqui tuncapan tjaajinta zoñinaczquiztan tjonchiča, Judas cjita. Tama zoñinacaqui Judastan tjonchiča pajk cuchillunacchiz, nižaza wjajtz carotinacchiz. Timplu chawjc jilirinacztan judío lii tjaajiñinacztan wajt jilirinacztan ninacaž cuchanzquita tjonchiča.

⁴⁴ Tuquitan nii tankatñi Judasqui kazziča Jesusa tankatzjapa. Nuž kazcu, cjichiča:

–Tsjii zoñil chjulznača. Niiž niic cjequiča. Nekztan zuma tanžcu chjichaquiča.

⁴⁵ Nii ora Judasqui Jesusižquiz macjatchiča:

–Tjaajiñi Maestro, –cjican.

Nekztan nii chjulziča.

⁴⁶ Nekztan zoñinacaqui Jesusa tanchiča, preso chjitzjapa.

⁴⁷ Tsjii nekz tsijtchi zoñiqui pajk cuchillu jwessiča. Jalla nekztan tsjan chawjc jilirž piyuna chjojritchiča. Tsjii cjuñi pootžcu apakchiča.

⁴⁸ Nekztan Jesusac chiichiča:

–Ančhucqui cuchillunacztan carotinacztan wejr tani tjonchinčhucča, tsjii tjañi cjes, nižtažtakaz.

⁴⁹ Zapuru ančhucaltan žejlchinča, timpluquiz tjaajincan. Wira ana wejr tanchinčhucča. Pero anziqum jaknužt Yooz taku chiichaja, nužupanž cumplita cjila.

⁵⁰ Nekztanaqui tjapa niiž tjaajinta zoñinacaqui tsucaña wichanziča. Jesusa zinalla eclichiča.

⁵¹ Tsjii tjowaqui Jesusa apziča, tsjii zquiti irzi. Nii tjowac tantazakaztača.

⁵² Nekztan nii zquiti cutžcu, k'alapacha tsucaña atipchiča.

JESUSA CHAWJC JILIRINACZQUIN CHJICHTA

⁵³ Nekztanaqui Jesusaqui chjichtatača timplu tsjan chawjc jilirž kjuya. Nekziqui timplu chawjc jilirinacztan wajt jilirinacztan judío lii tjaajiñinacztan ajczitača.

⁵⁴ Pedruqui ažquiztan apziča, chawjc jilirž kjuy patio luzcama. Nii patiuquiz zultatunacztan julzi želatča, uj latuquiz kutuncan.

⁵⁵ Kjuyquiziqui timplu jilirinacaqui tjapa jiliri mazinacžtan Jesusiž quintra chiiñi žoñi kjuratča, Jesusa conta cjisjapa. Ana zinta uj wajtchiča.

⁵⁶ Muzpa tama žoñinacaqui Jesusiž quintra toscara chiichiča. Pero ninacž toscar takuqui anaž wira casatča.

⁵⁷ Yekjap žoñinacaqui tsijtsu toscara chiichiča, tuž cjican:

⁵⁸ –Wejr nonziñča, tii žoñi tuž chiiñi, “Tii žoñiž kjuyta timplu pajznača. Nekztan čhjep majquiztan yekja timplu kjuyača, ana žoñiž kjuyta”. Nuž chiiñi nonzinča wejrqui.

⁵⁹ Anaž nižtami žoñinacž takuc casatča.

⁶⁰ Ultimquiziqui nii timplu chawjc jiliričiqui tsijtsiča žoñinacž taypiz. Jesusižquiz pewčiča:

–¿Anam kjaazñi at, kjažtatajo? ¿Kjaž cjican am quintra chii tii žoñinacajo?

⁶¹ Jesusaqui ana čhulu tawkžcu, želatča, ana kjaaziča. Nekztan nii tsjan chawjc jiliričiqui wilta pewčiča:

–¿Amqui Cristumkaya? ¿Arajpach Yooz Machimkaya?

⁶² Jesusaqui kjaaziča:

–Jesalla. Wejrtča Cristutqui. Wejrqui tsewctan cuchanžquita Yooz Žoñtča. Tsii nooj ančhucqui wejr cheraquiča, juc'anti azziz Yooz latuquiz julzi. Nekztan arajpachquiztan tsjirquiz tjonača.

⁶³ Nižta chiiquiztan nii timplu chawjc jiliričiqui niž zquiti wjajrzinčiča, žawjchi tjeezjapa. Nekztan cjichiča:

–¿Kjažtiquiztan iya quintra chiiñi žoñi pecasajo?

⁶⁴ Ančhucqui nonzinčhucča. Tiiž takuqui Yooz quintrača. Ana wali-panča. ¿Čhulučhum paaqui, kjažum cjeequi? ¿Tantiyalla?

Nekztan tjappacha quintra chiichiča:

–Tii žoñi contaj cjila, –cjican.

⁶⁵ Nekztan yekjapaqui Jesusižquiz llawsižtan tjajtčiča, wjajtchizakazza. Nekztan niž yujc pañžtan tjožinžcu, cjichiča:

–¡Pajalla, jazičiqui! ¿Ject am wjajtchejo?

Nižaza zultatunacaqui Jesusiž yujcquiz čhajčiča.

PEDRUQUI JESUSA ANA PAJÑI TUCCHICHA

⁶⁶ Nii ora Pedruqui kjuy patiuquiz želatča. Nekzi tsjaa žonqui tjonchinča. Naa žonqui timplu tsjan chawjc jilirž piyunitača.

⁶⁷ Pedruž uj latuquiz kutnan, cherchinča. Nekztan paljaychinča:

–Amqui nii Nazaret wajtchiz žoñžtan chica ojklayñamla, nii Jesusižtan.

⁶⁸ Pedruqui Jesusa ana pajñi chiichiča:

–Nii žoñi anal pajuča. Am takumi anal intintuča.

Nuž chiižcu, zancu ulančiča.

⁶⁹ Nicju naa žonqui wilta cherchinzakazza. Nii žejlñi žoñinacžquiz maazinča, tuž cjican:

–Tii žoñiča ninacžtan chica ojklayñi.

⁷⁰ Pedruqui wilta Jesusa ana pajñi chiichiča. Nekztan tsii upaquiztan nii žejlñi žoñinacaqui Pedružquiz cjichizakazza:

–Chekapan amqui ninacžtan chica ojklayñi žoñimla. Amqui Galilea wajtchiz žoñimla. Nii žoñinacž irataž chiiñamla.

⁷¹ Nekztan Pedruqui juramintužtan chiichiča, tuž cjican:

–Wejr toscara chiichinžlaj niiqui, Yooziž castictal cjila. Tii amiž chiita žoñi ana wira pajuča.

⁷² Pizcquizic nii orapacha tsii wallpaqui kjawčiča. Nekztanaqui Pedruqui Jesusiž chiita taku cjuñiča. Tuž mazinčitača, “Ima wallpaž pizc

wiltaž kjawan, amqui čhjep wilta wejr ana pajñim tucaquiča”. Nekztanaqui Pedruqui nii cjuñzcu, ancha llaquita cjissiča. Nekztan ancha kaachiča.

15

JESUSA PILATUZQUIN CHJICHTA

¹ Kjantati timplu chawjc jilirinacžtan wajt jilirinacžtan judío lii tjaa-jiñinacžtan tjappacha jilirinacžtan ajczitača. Nekztan Jesusa čhejlžcu Pilato jiliržquin chjitchiča. Nekztan niižquiz intirjichiča.

² Nekztan Pilatuqui pewcziča:

—¿Am judionacž chawjc jilirimya?

Jesusaqui kjaaziča:

—Nužupanzača, amiž chiitacama.

³ Nekztan nii timplu jilirinacaqui Jesusiž quintra čhjultaki tjojtunchiča.

⁴ Pilatuqui pewczizakazza:

—¿Kjažtiquiztan am ana kjaazñi atjo? Tjapamanaž am quintra chiila, pero.

⁵ Jesusaqui ana čhjulu tawkžcu želatča. Nužquiz Pilatuqui ana iya čhjulumi chiižiñi atchiča.

ZOÑINACAQUI JESUSIZ QUINTRA CHIICHICHA

⁶ Pilatuqui pascu pjiztiquiz tsjii piriz žoñi cutzñipantača žoñinacaž chiitacama.

⁷ Carsilquiz tsjii kjažultan gobierno quintri žoñinacaž chawjcta želatča. Barrabás cjita ujchiz žoñi carsilquiz chawjctazakaztača. Revolucionquiz žoñi conchiča Barrabás cjita žoñiqui.

⁸ Jaziqui žoñinacaqui Pilatu pewczñi tjonchiča, tuž cjican:

—Wejtnacalta tsjii žoñi cutžinalla. Tuquitanpacha nuž cutzñampanla amqui.

⁹ Pilatuqui kjaaziča:

—¿Ančhucqui pecya, tii judionacž chawjc jiliri cutzta cjisjapajo?

¹⁰ Jesusa čhjaawjcu, nii timplu jilirinacaqui Pilatužquiz intirjichiča; nii zizziča Pilatuqui.

¹¹ Nekztan nii timplu jilirinacaqui Jesusiž quintra žoñinaca aptjapchiča. Nekztan žoñinacaqui maychiča, Barrabspankaz cutzta cjisjapa.

¹² Pilatuqui wilta pewcziča:

—¿Tiizti? ¿Jaknužt wejr paaj cjii ančhucjo? Ančhucqui tii judionacž jiliriča cjinčucla.

¹³ Nii žoñinacaqui kjawchiča:

—¡Tii žoñi conzna! ¡Cruzquiz ch'awczna!

¹⁴ Nekztan Pilatuqui chiichiča:

—¿Kjažtiquiztan, čhjul uj paachit teejo?

Nii žoñinacazti juc'anti kjawchiča:

—¡Cruzquiz ch'awczna!

¹⁵ Pilatuqui nužquiz žoñinacž kuz wali cjisjapa Barrabás cutziča. Jesusa cusa wjajtkatžcuqui, Pilatuqui zultatunacžquiz intirjichiča, cruzquiz ch'awcta cjisjapa.

¹⁶ Nekztan nii zultatunacaqui jilirž kjuy patiuquin Jesusa chjitchiča. Nekzi parti zultatunaca ajcznajo kjawziča.

¹⁷ Nekztan Jesusižquiz tsjii morat zquti tjutziča. Nižaza tsjii ch'apirar pillu irata nižtižtan Jesusiž achquiz scarzinchiča.

¹⁸ Nekztan ararcan kjawchiča:

—¡Viva tii judío nacionž chawjc jiliri! —cjican.

19 Nekztan tsjii paržtan Jesusiž achquiz t'etkatchiĉha; llawsižtan tjujtchiĉha; rispittažoka quillsiĉha.

20 Nekztan burla paažcuqui Jesusižquiztan nii morat zquiti chjojĉzinĉiĉha. Niiž persun zquiti tjutziĉha. Nekztanaqui Jesusa chjitchiĉha cruzquiz ch'awczjapa.

JESUSAQUI CRUZQUIZ CH'AWCTATACHA

21 Tsjii Cirene wajtchiz žoñi želatĉha, Simón cjita. Pucultan žoñž ejptaĉha niiqui, Rufo, nižaza Alejandruž ejp. Jochquiztan kajĉžcatĉha. Nekz watan mantichiĉha, Jesusiž cruza kužajo. Nužquiz uytissiĉha.

22 Nekztan Jesusaqui Golgota yokquin chjichtataĉha. Golgota cjitaqui tuž cjiĉha: “Ach Tsji Yokaĉha”.

23 Nekztan Jesusižquiz vinu mirržtan t'ajžta tirinĉiĉha. Jesusazti ana licz pecchiĉha.

24 Jalla nekztanaqui cruzquiz ch'awczcu, sultatunacaqui zurtiyĉiĉha niiž zquitinaca tanzjapa, jakzilta sultatut nii zquiti tanznaĉhaja, nii zizjapa.

25 Wenzlaka Jesusaqui cruzquiz ch'awctataĉha.

26 Kjažtiquiztan tii žoñi cruzquiz ch'awctatažlaja, niiqui cjiirĉiĉha tsjii tawliquiz, tuž cjican: “Tiiqui judionacž chawjc jiliriĉha”.

27 Jesusižtan chicapacha tsjii pucultan tjañinaca yekja cruzanacquiz ch'awctazakaztaĉha, tsjiic žew kjuttan tsjiic zkar kjuttan.

28 Nužupan tuquitan cjiirta Yooz taku cjiĉha. Nii Yooz taku tuž cjiĉha: “Ujchiz žoñinacžtan chica uchtaĉha”. Nužquiz nii Yooz takuqui cumplissiĉha.

29 Žoñinacaqui nekz watcan acha wewczinĉiĉha; ancha žawjchi, tuž cjican: —ĵAaj! Amqui timplu pajltasaĉha. Nekztan ĉhjep majquiziqui wilta kjuytasaĉha, jalla nuž cjichamĉha, ĵana jaa?

30 Jaziqui persunpacha am cruzquiztan zarakalla. Persunpacha liwriyalla amqui.

31 Nižaza nii timplu chawjc jilirinacžtan judío tjaajiñinacžtan parlassiĉha, Jesusa iñarcan, tuž cjican:

—Yekjapanacžquiz liwriiĉiĉha tiiqui. Persunpachazti anaž liwrii atĉha.

32 Cristužlaj niiqui, Israel nacionž chawjc jilirižlaj niiqui, persunpachaj cruzquiztan apakscu, chjiwžquila. Nekz criyaquič uĉhumqui.

Žoñinacaqui Jesusa iñarchiĉha. Niižtan chica ch'awcta žoñimi iñarchizakazza.

JESUSAQUI TICZICHA

33 Taypurquiztan tjapa nii yokac zumchi cjissiĉha, majñakak oracama.

34 Nii ora Jesusaqui tjapa aztan kjawĉiĉha:

—Eloi, Eloi ĵlama sabactani? —Tii takuqui cjiĉha: “Wejt Yooz, wejt Yooz ĵkjažtiquiztan wejr ecchamtajo?”

35 Yekjap nekz žejlñinacaqui nii taku nonžcu cjichiĉha:

—Nonžna. Elías kjawža tiiqui, nii tuquitan Yooz taku parliñi profetaqui.

36 Tsjiiqui ninacžquiztan zajtchiĉha. Nekztan tsjii esponja cjita kjaz licñiquiz jar vinu licskatchiĉha. Nekztan quejpžcu tsjii parquiz tsjiipchi Jesusižquiz macjatskatchiĉha nii jar vinu ch'umznajo. Nekztan nii žoñiqui parti žoñinacžquiz ĉiichiĉha:

—Tjewžla uĉhumqui. Jaknužukat Eliasac cruzquiztan apaki tjonachani, niiž chekžla.

37 Jesusaqui juc'anti kjawĉiĉha. Nužquiz ticziĉha.

38 Nii oraqui pajk timplu pañu juystokaz chicatquiz wjajrsiĉha, tsewctan kozzuc.

39 Nii romanž sultatunacž jiliriĉqui Jesusiž yujc kjuttan želatĉha. Tjappacha niiž wattanaca cheržcu cjichiĉha:

—Chekapan Yooz Majchtakalča tii žoñiqui.

⁴⁰ Nižaza tsjii kjažultan maatakanacaqui ažquiztan chekziča. Nii maatakanacaqui tinacatača: María cjititača, Magdalena wajtchiz žonqui. Nekztan María cjitizakaztača, Josež maa, nižaza Jacobž maa (lajktača Jacoboqui). Nekztan Salomé cjititača.

⁴¹ Nii maatakanacaqui Jesusa apzitača, nižaza yanapchitača, Jesusa Galilea yokaran ojklayan nii ora. Nekztan ninacaqui Jesusižtan chica Jerusalenquin tjonchiča. Nii cruzaž nekziqui muzpa maatakanaca želatča.

JESUSAQUI TJATZTATAČHA

⁴² Nii noojiqui pjijzta tjacz tjuñitača. Jeejz tjuñi ispirazakaztača.

⁴³ Nižtiquiztan tjuñiž kattan tsjii José cjita Arimatea wajtchiz žoñiqui walja tjup kuzziz Pilatužquin ojkchiča. Nekztan Jesusiž curpu maychiča. Walja rispitta jiliritača nii Josiqui. Yooz tjapa mantiz timpu tjewznatča.

⁴⁴ Niiž tjontiquiztan, Pilatuqui ispantichiča, tuž cjican:

—¿Kjažt waj ticzi cjesajo?

Nekztan zultatž jiliri kjawziča, nii pewczjapa.

⁴⁵ Nii zultatž jiliriqui kjaaziča:

—Jesalla, ticziča, —cjican.

Nekztan Pilatuqui Jesusiž curpu chjitzjapa permiso tjaachiča José cjita žoñžquiz:

—Nižtaqui niž curpu chjichalla, —cjican.

⁴⁶ Nekztan Josiqui zuma chiw pañu kjaychiča. Jesusiž curpu chjijunžcu nii pañquiz tejlziča. Nekztan tsjii sipulturquiz majkziča. Nii sipulturaqui pajk mazquiz pjettatača. Nii sipulturž zana tsjii pajk maztan pjuczica.

⁴⁷ Pucultan maatakanacaqui Jesusiž curpu tjatni cherchiča. Tsjaaqui María Magdalena cjititača. Tsjaac María cjitizakaztača, yekja Josiž maa.

16

JESUSAQUI JACATATCHIČHA

¹ Judionacz jeejz tjuñi jakatažu María Magdalenatan Jacobž maa Mariatan Salomatan, nii čhjepultan maatakanacaqui cusa ulurchiz asiiti kjaychiča, Jesusiž ticzi curpu tjajlinzjapa.

² Ancha wentan ninacaqui sipultura cherzni ojkchiča tjuñiž tewctanalla.

³ Sipultura ojkcan ninacpora parlassiča tuž cjican:

—¿Jequit učumtaqui cjetžinaquejo? ¿Nii pjuczta pajk mazjo?

⁴ Nekztan irantižcu, nii pajk pjuczta mazqui cjetžta cherziča.

⁵ Sipultura luzcu, žew latu kjuyltan tsjii tol chiw zquitchiz tjowa julzi cherchiča. Nužquiz nii maatakanacaqui ancha tsucchiča.

⁶ Nii tjowaqui paljaychiča, tuž cjican:

—Anaž tsuca maataka. Ančhucqui Jesusaž kjurča, nii cruzquiz ch'awcta žoñi. Niiqui jacatatchiča jaziqui. Anača tekzi. Cherznalla. Tii sipulturquiz ana žejlča.

⁷ Jazic ančhucqui oka. Niiž tjaajinta žoñinaczquin mazca. Pedružquizimi zaka mazna. Tuž cjican ančhuc maznaquiča: “Jesusaqui ančucaž tuqui okjayaquiča Galilea cjita yokquin. Nekzi Jesusižtan zalaquiča ančhucqui. Jaknužt tuquitan chiižinchipančhaja, jalla nužuča”.

⁸ Nekztanaqui nii maatakanacaqui sipulturžquiztan ulanžcu, zati pariju quejpchiča, tsucaña chjekincan. Tsucaña ana čhjulumu chiyi atchiča jeczquizimi.

JESUSAQUI MARIA MAGDALENAQUIZ PARIZICHICHA

⁹ Jesusaqui kjantatilla jacatatźcuqui primiraqui María Magdalenaquiz parizichiča. Tuqitan Jesusaqui naaquiztan pakallaku zajranaca chjatkatchitača.

¹⁰ Naa žonqui Jesusiž mazinacźquin mazñi ojkchinča. Ninacaqui llaquita želatča, kaacan.

¹¹ Nekztan mazzinča:

–Jesusaqui jacatatchiča. Wejrqui nii cherchinča, –cjican.

Nii nonžcu nii tjaajinta žoñinacaqui ana criichiča. Inapanka chiitažoka naychiča.

¹² Wiruñaqi pucultan tjaajinta žoñinacaž wajtquiztan okan, Jesusaqui parizichizakazza, tsjemata cjissi.

¹³ Nekztan quejpžcu, nii pucultanaqui parti tjaajintanacźquiz mazziča. Nii mazta ana zakaz criichiča.

JESUSAQUI WILTA PARIZICHICHA

¹⁴ Wiruñaqi Jesusaqui nii tuncamani tjaajinta žoñinacźquiz parizichiča, čhjeri lulan. Ninacaqui jacatatta maztaqui ana criichiča. Nekztan ninacž ana criiñi kuzziz cjen ninacźquiz iwjt'ichiča Jesusaqui.

¹⁵ Nižaza Jesusaqui mantichiča, tuž cjican:

–Jazic ančhucqui okaquiča tjapa kjutñi tii muntu intiru. Tjapa žoñinacźquizimi liwriiñi taku paljayaquiča.

¹⁶ Jakziltat tii taku criičhaja, jalla niiqui liwriitaž cjequiča; nižaza bautista cjequiča. Jakziltat tii taku ana criičhaj niiqui, ancha castictaž cjequiča.

¹⁷ Yooz taku criichinacaqui tii milajrunaca paaquiča. Wejt tjuuquiz zajranaca chjatkataquiča. Yekja takunaca chiyaquiča.

¹⁸ Zkora tanžcu zkoržquiz ana chjojrichtaž cjequiča. Tsjii veneno licžcu, ana ticznaquiča. Kjaržtan lanžcu, laa žoñinaca čhjetnaquiča. Nižta paaquiča Yooz taku criichi žoñinacaqui.

JESUSAQUI ARAJPACHA OJKCHICHA

¹⁹ Nii taku chiižcu chawjc jilir Jesusaqui arajpacha ojkchiča. Nekzi Yooz žew latuquiz julziča.

²⁰ Nekztanaqui nii tjaajinta žoñinacaqui ulanžcu, tjapa kjutñi Yooz liwriiñi taku paljaychiča. Chawjc jiliripanča Jesucristuqui. Jalla niiča ninacźquiz yanapñiqui. Nii Yooz aztan paata milajrunacaqui tuž cjiča: “Tii Yooz takuqui werarapanča”. Nužupanž cjila. Amén.

EL SANTO EVANGELIO SEGUN SAN LUCAS

¹⁻² Ancha zuma Teófilo, tii cartal amquin cjiŕŕcuĉha, Jesucristuĉ pun-
tuquiztan. Jesucristuĉ nasta tjuŕquiztanpacha jaknuĉt watchaja, jalla niiqui
ana tŕatziĉha cherchi ŕoŕinacaqui. Nii cherchi ŕoŕinacaqui wejtnacaquiz
tjaajinchiĉha. Niĉaza yekja ŕoŕinacĉquiz tjaajinchizakazza Jesucristuĉ pun-
tuquiztan. Nekztan tsjii kjaĉ ŕoŕinacaqui Jesucristuĉ puntuquiztan cji-
ŕrchiĉha niĉĉ jaru niĉĉ jaru.

³ Niĉaza wejrqui zumpacha pewcpewczinĉha jaknuĉt Jesucristuĉ nasta
tjuŕquiztanpacha watchaja, jalla nii. Jalla nuĉ pewcpewczcu wejrqui pinsich-
inĉha Jesucristuĉ puntuquiztan cjiŕŕzŕapazakaz niĉĉ jaru niĉĉ jaru. “Jalla
niic waliĉ cjesaĉha”, cjican pinsichinĉha wejt kuzquiz. Jaziqui walja zuma
Teófilo, amquin tii cartal cjiŕŕcuĉha,

⁴ Jesucristuĉ puntu tjaajintanaca zumpacha zizajo.

JUAN BAUTISTAZ NASTAQUI

⁵ Ima Juan Bautistaĉ nasan jalla tuĉ watchiĉha. Judea yokquin Herodes
cjita pajk jiliriŕqui mantiŕitaĉha. Niĉaza Zacariás cjita timplu cwitiŕiŕi ŕoŕi
ŕelatĉha. Niiqui Abías cjita t'akquiztantaĉha. Niiĉ tjun cjititaĉha Elisabet.
Ninacaqui Aarón cjita tuquita atchi ejpĉquiztan tjonŕitaĉha.

⁶ Nii pucultan lucutiŕi ŕoŕiŕqui Yooz yujcquiziqui zuma kamaŕchiztaĉha.
Yooz Epiĉ mantitacama kamŕitaĉha. Jalla nuĉ kaman ana ĉhjul ujmi ninacĉ
quinaŕa tjeezŕi atasaĉha jecmi.

⁷ Ninacaqui ana zinta majchchiztaĉha. Elisabet cjitiqui ana wira
matiŕitaĉha. Nii oraqui pucultan lucutiŕiŕi chawc chawcwataĉha.

⁸ Tsjii nooj Zacariás t'akquiztan turnuĉ tjonatĉha, Yooz sirwizjapa tim-
pluquiz. Jalla niĉtiquiztan Zacariasqui Yooz sirwatĉha timpluquiz.

⁹ Nii timplu cwitiŕinacaqui tsjii ŕoŕiŕi inzinzu tjaazŕi illzŕipantakalĉha. Nekz-
tan Zacariĉĉquiz illziĉha. Jalla nuĉ illztaĉ cjen Zacariasqui Yooz timpluquiz
luzziĉha, inzinzu tjaazŕi.

¹⁰ Jalla nii inzinzu tjaazŕi oraqui tama ŕoŕinacaqui Yoozquin mayizican
ŕelatĉha timplu zancu.

¹¹ Jalla nekztanaqui tsjii Yooz anjilaqui Zacariĉĉquiz parisquichiĉha tim-
pluquiz. Nii anjilaqui inzinzu altarĉ ŕew latuquiz tsijtsiĉha.

¹² Anjila cherĉcu Zacariasqui kuz turwaysi cjissiĉha, ancha tsucchiĉha.

¹³ Anjilaqui cjichiĉha:

–Zacariás, ana am tsuca. Yoozqui amiĉ mayizitaqui nonziĉha. Jalla
niĉtiquiztan Yoozqui am Elisabet cjiti tjunaquiz lucmajch wawaĉ ma-
jtkataquiĉha. Jalla nuĉ majttan am wawaqui Juan cjita tjuuchiz cjequiĉha.

¹⁴⁻¹⁵ Jalla nii am majchqui walja pajk jiliriĉ cjequiĉha Yooz Ejpĉ yujc-
quiziqui. Jalla nii majttiquiztanaqui, amqui cuntintum cjequiĉha, walja
chipsnaquiĉha. Niĉaza walja ŕoŕinacami chipsnaquiĉha, am tjunaĉ majt-
tiquiztanaqui. Am majchqui vinumi awarintimi ana licaquiĉha. Ima maa
pjuchquiztan ulnan Yooz Espíŕitu Santuqui am majch kuzquiz luzaquiĉha.

¹⁶ Am majchqui walja Israel wajtchiz ŕoŕinaca Yooz Ejpĉquin wilta sirwiz-
kataquiĉha.

¹⁷ Niĉaza am majchqui ima Jesucristuĉ ojklayan ojklayaquiĉha, Yooz taku
paljaycan. Cjuŕzna. Tuqui timpuqui tsjii Yooz puntu paljayŕi profeta
ŕelatĉha, Elías cjita. Yooz Espíŕitu Santuqui nii Eliasquiz Yooziĉ tjaata taku

paljayskatchiĉha. Jalla nii tjaata taku paljaychiĉha Eliasqui, ana ekskui. Yoozquin tjurt'iĉni kuzziztaĉha. Jalla niĉtapacha Yooz Espiritu Santuqui am majchquiz Yooziĉ tjaata taku paljayskataquiĉha. Niiĉ paljaytiquiztan ejpĉžtanami maatinacĉžtanami wilta zumanskataquiĉha. Niĉzaza am majch paljaytiquiztan ana Yooz kuzcama kamĉni ŉoĉinacami Yooz kuzcama kamĉni cjisnaquiĉha. Jalla niĉtiquiztan Israel wajtchiz ŉoĉinacaqui Yooz Majch tjonz tjuĉni tjewznaquiĉha. Zuma kamcan, ninacaqui tjewznaquiĉha, Yooz Majch zuma risiwt'isjapa. —Jalla nuĉ Zacariizquiz paljaychiĉha nii Yooz anjilaqui.

¹⁸ Nekztan Zacariasqui anjilĉquiz pewcziĉha, tuĉ cjican:

—¿Ultim werara amiĉ chiitajo? ¿Jaknuĉt zizasajo? Wejrqui walja chawc ŉoĉtla pero. Wejt maatakami chawc ŉon zakazza.

¹⁹ Nii anjilaqui kjaaziĉha, tuĉ cjican:

—Wejrqui Gabriel cjititĉha. Yooz manta payiĉtĉha. Yoozqui wejr mantiĉquiĉha amquiz tii zuma takunaca maznajo.

²⁰ Amqui weriĉ chiita ana criitiquiztan, upam cjisnaquiĉha, am maati majtcama. Yooziĉ pinsita tjuĉniquiz weriĉ chiita takuqui cumplisnaquiĉha. —Jalla nuĉ chiichiĉha anjilaqui.

²¹ Zacariás timplu kjuyltan aĉka ŉelatĉha, ulanĉquiz oraqui watatĉha. Jalla niĉtiquiztan tjewzĉni ŉoĉinacaqui kuzquiz pinsichiĉha, kjaĉtiquiztan ana ulanĉquejo, jalla nii. ŉoĉinacaqui zancu muzpa tjewznatĉha, Zacariás ulanĉquizcama.

²² Nekztanaqui Zacariasqui aĉktanalla ulanĉquiĉha. Pero ana jaknuĉt chii atchiĉha. Jalla niĉtiquiztan nii zawnc ŉejlĉni ŉoĉinacaqui ispantichiĉha. “Timplu kjuyltan anjilĉžtan zalziĉłani”, jalla nuĉ cjeyassiĉha. Upa cjissiĉ cjen Zacariasqui ŉoĉinacĉžquiz kjarĉžtan paljaychiĉha.

²³ Tsjii kjaĉ majquiztan Zacariasqui timplu cwitis turnu cumplichiĉha. Nii tjuĉninaca ŉerĉcu, persun kjuya ojkchiĉha.

²⁴ Wiruĉnaqui niĉ Elisabeth cjiti tjunqui ica cjissinĉha. Nekztan Elisabeth tsjii pjijska jiiz kjuyaran ŉelatĉha. Ana kjuyquiztan kjuya ojklaychinĉha. Naaqui persun kuzquiz pinsichinĉha tuĉ cjican:

²⁵ “Yooz Jiliriĉqui wejr cjuĉĉcu, wejtquiz ickatchiĉha. Jaziĉqui ŉoĉinacaqui anaĉ iya wejr iĉarasaĉha”.

JESUCRISTUZ NASTAQUI MAZINTACHA

²⁶ Nekztanaqui soĉta jiizquiztan Elisabeth ickattanaqui, Yoozqui Gabriel cjita anjila cuchanĉquiĉha Galilea cjita yokquin, Nazaret cjita wajtquiz.

²⁷ Nii wajtquiz tsjaa tunsill tur ŉelatĉha Mariá cjiti. David cjita atchi ejpĉžquiztan tjoninĉtaĉha. Mariiĉqui Josė cjita ŉoĉĉžtan kazzintaĉha zalzjapa. Yoozqui naa Mariaquiz anjila cuchanĉquiĉha.

²⁸ Naaquiz tjonĉcu, anjilaqui paljaychiĉha, tuĉ cjican:

—Cullacalla, Yooz k'ayamĉha amqui. Yooz kjarquizza. Niĉzaza Yoozqui amtan chicapachaĉha. Yoozqui tjapa maatakĉquiztanam amquiz juc'ant wali favoraĉ paaquiĉha. —Jalla nuĉ tsaanchiĉha anjilaqui.

²⁹ Anjilĉ taku nonĉcu Mariiĉqui ispantichinĉha. Kuzquiz pinst'ichinĉha, nii tsaantaqui anal intintasĉha, cjican.

³⁰ Nekztanaqui anjilaqui naaquiz cjichiĉha:

—Mariá, ana tsucaquiĉ amqui. Yoozqui amquiz wali pajk favora paaquiĉha.

³¹ Jalla niĉtiquiztan amqui icaquiĉha. Lucmajch wawchizim cjequiĉha. Nii wawaqui Jesúś cjita tjuuchiz cjequiĉha.

³² Tsjii noojiĉqui nii am majchqui wali pajk jiliriĉ cjequiĉha. Arajpach Yooz Ejpĉ Majchpanĉha niiĉqui. Werar Yooz Ejpqui niĉ Majchquiz pajk mantiĉni

cjiskataquiĉha, Israel wajtchiz ŷoñinacŷjapa. Am David cjita atchi ejptaĉha tuquita pajk mantiñiqui. Jalla niŷta pajk mantiñi cjequiĉha am majchqui.

³³ Israel wajtchiz ŷoñinaca wiñayaŷ mantaquiĉha. Niiŷ mantitaqui wiñayaŷ ŷelaquiĉha. Anaŷ tucuzinznaŷaĉha. –Nuŷ paljaychiĉha anjilaqui.

³⁴ Nekztanaqui Mariiqui anjilŷquiz pewczinĉha, tuŷ cjican:

–¿Jaknuŷt tii cjesaya? Wejrqui ana luctaka pajuĉha.

³⁵ Nii anjilaqui kjaaziĉha, tuŷ cjican:

–Yooz Espíritu Santuqui amquiz tjonznaquiĉha. Jalla nuŷ tjonan arajpach Yoozqui niiŷ aztan tsjiriŷtakaz weezcaquiĉha am juntuiñ. Nii oraqui Yooz Espíritu Santuqui am t'icznaquiĉha. Jalla niŷtiquiztan nii am maatiqui juc'ant zuma lijítum kamañchiz cjequiĉha. Yooz Majchpanĉha niiqui.

³⁶ Niŷaza amquiz maznuĉha tuŷ, am jamillquiztan Elisabet cjítiqui ick-atĉhitaĉha, chawc ŷon cjenami. Tuquiqui ŷoñinacaqui Elisabet puntuquiztan cjiñitaĉha: “Naa ŷonĉha ana matiñqui” cjicanaqui. Jaziqui sojta jiizkaz icĉhinĉha.

³⁷ Yoozqui ĉhjulumpankaz paasaĉha. –Jalla nuŷ ĉiichiĉha anjilaqui.

³⁸ Nekztanaqui Mariiqui cjichinĉha:

–Wejrqui Yooz Jiliriz mantitacama kamiñ ŷontĉha. Yoozqui wejtquizimi amiŷ ĉhiitacama paaj cjila.

Jalla nuŷ Mariaŷ ĉhiitan, anjilaqui ojkĉhiĉha.

MARIAZ ELISABETAQUIN OJKTA

³⁹ Nekztanaqui tsjii kjaŷ majquiztan Mariiqui zati pariju ojkĉhinĉha Judea cjita kolta curunacĉhiz yokquin.

⁴⁰ Jalla nicju Zacarías kjuya luzzinĉha. Kjuya luzcu Elisabetaquiz tsaanchinĉha.

⁴¹ Nuŷ Mariaŷ tsaanan Elisabeta wawaqui pjuch kjuyl cjenpacha kissiĉha. Nekztanaqui nii oraqui Espíritu Santuqui naa Elisabetaquiz luzziĉha niŷaza ĉhiikatchiĉha.

⁴² Jalla nekztan naaqui alto tawkŷtan Mariaquiz paljaychinĉha, tuŷ cjican:

–Yoozqui amquiz tjapa maatakŷquiztanami wali pajk favora paachiĉha. Niŷaza nii am majchqui walja honorĉhiz cjesaŷ cjila.

⁴³ ¿Kjaŷtiquiztan taa arajpach Jiliriz maaqui wejtquin tjonŷquejo? Wejrqui inakztĉha. Anal waquisuĉha.

⁴⁴ Amiŷ tsaanta taku nonŷcu, wejt wawaqui pjuchquiz anĉha cuntintu kis kissiĉha.

⁴⁵ Yooziŷ apayŷquita taku criĉhamĉha, nii Yooziŷ ĉhiita takucama cumplisnaquiĉha, jalla nii criĉhamĉha. Jalla niŷtiquiztan zuma cuntintum cjequiĉha. Nuŷ cjichinĉha Elisabetqui.

⁴⁶ Nekztanaqui Mariiqui ĉhiichinĉha, tuŷ cjican:

“Wejt Yooz Jiliriz honoral waytaĉha.

⁴⁷ Wejt Liwriiñi Yooziŷ cjen, wejt kuzmi anĉaŷ ĉhipĉha.

⁴⁸⁻⁴⁹ Wejrqui inakztĉha. Yooz mantitacama kamiñ ŷontĉha. Yoozqui wejtquiz cjuñzquichiĉha. Jaziqui walja azziz Yooz Ejpqui wejtquiz t'icziĉha. Jalla nuŷ wejtquiz pajk obra paachiĉha. Tekztan nawjĉchuc tjapa ŷoñinacaqui wejt puntuquiztan parlaquiĉha: ‘Yoozqui naaquiz zuma favora paachiĉha’, cjican. Werar Yoozqui jecŷquiztanami juc'anti zumapankazza.

⁵⁰ Yoozqui tjapa niŷŷquin rispítñi ŷoñinacŷquiz okzñipanĉha, watay wata okzñipanĉha.

⁵¹ Yoozza walja pajk obranaca paañiqui. Mit kuzziz ŷoñinacaŷ pinsitanaca inakaz cjissa.

⁵² Walja azziz jilirinaca jwessa ninacŷ puestuquiztan. Antiz humilde kuzziz ŷoñinaca honorĉhiz cjiskatĉha.

53 Nižaza jakziltat ana cusasanacchiz t'akjiri žejlčhaja, jalla nii t'akjirinacžquiz walja cusasanaca tjaaquičha Yoozqui. Antiz ricachunzcazti laachi kjarquiz ana čhjulchiz quejpkataquičha.

54-55 Nižaza Yoozqui učum tuquita atchi ejpnacžquizimi, Abrahamžquizimi, Abrahamž majchmaatinacžquizimi, jalla ninacžquizimi taku tjaachičha, ninaca tirapan okznajo. Jalla nuž okžcu Yoozqui walja yanapčha Israel wajtchiz Yooz sirwiñi žoñinacžquin, ninaca ana tjatsñičha”.

Jalla nuž chiichinčha Mariiqui.

56 Tsjii čhjep jiiz Mariiqui Elisabetatan kamchinčha. Nekztan quejpcchinčha naaža persun kjuya.

JUAN BAUTISTAZ NASTA

57 Naa Elisabeta majtz tjuñiqui irantižquichičha. Nekztan lucmajch wawa majtchinčha.

58 Jalla nuž cjen, Yoozqui Elisabetaquiz ancha zuma favora paachičha. Jalla nii quintu zizcuqui, Elisabeta wisinunacami jamillanacami naaquin tjonžni ojkchičha. Nekztan ninacaž tjonžtan, Elisabetaqui ancha cuntintutakalčha. Ninacami cuntintuzakaztačha.

59 Jalla nekztan quinsakal tjuñiquiztan Zacariastan Elisabetatan timplu ojkchičha wawa chimpus cuztrumpi paakatzjapa. Nii cuztrumpi paatan ejpž tjuužtan tjuuzkatz pecatčha, Zacarías cjican.

60 Wawž maaqui cjichinčha:

—Anaž. Tii wejt maatiqui Juan cjita tjuuchizpanž cjequičha.

61 Partinacazti pewczičha:

—¿Kjažtiquiztan nižta tjuuskatz pecjo? Am jamillanacquiztan anaž nižta tjuuqui žejlčha.

62 Jalla nekztanaqui wawž ejpžquiz kjaržtan pewczičha, čhjul tjuuchizim pecas, jalla nii.

63 Ejpqui tsjii maychičha, tjuu cijrjzjapa. Nekztanaqui cijrchičha, tuž cjican: “Wejt maatiqui Juan cjitaž cjequičha”. Nekztanaqui tjappacha ispan-tichičha nii puntuquiztan.

64 Nii orapacha Zacariasqui wilta chiiñi cjissičha. Jalla nuž wilta chii atcan, Yooz honora paljaychičha.

65 Jalla nuž cjen wisinunacami ispan-tichi quirchičha. Tjapa kjutñi nii Judea yokaran nii quintu ojkchičha.

66 Tjappacha nii quintu zizñi žoñinacaqui kuzquiz pinsichičha: “¿Tii uzaqui čhjulut cjisnaquejo?” cjican. Yooz kjarquizpantačha nii wawaqui.

67 Nekztanaqui Yooz Espiritu Santuqui Zacarižquiz chiikatchičha. Jalla nižtiquiztan Zacariasqui Yooziž tjaata takucama paljaychičha, tuž cjican:

68 “Yooz Jiliri honorchiz cjilalla. Niičha Israel žoñinacž Yoozqui. Učhum Yoozqui niž mantitacama kamñi žoñinacžquin cjuñzičha. Jaziqui liwriita cjequičha učhumqui.

69 Yoozqui walja azziz Liwriiñi cuchanžquichičha, učumnacaquiz. Davidž majch maatinacžquiztanpacha majttačha nii Liwriiñiqui. David cjitaqui Yooz mantitacama kamñitačha.

70 Tuqui timpuquiztanpacha jalla nužupan Yoozqui taku tjaachičha. Yooz taku paljayñi žoñinacaqui niž jaru niž jaru nii Yooziž tjaata taku mazmazzičha.

71 Nii maztaqui tužutačha: ‘Liwriitačhumž cjequičha, učhum quintra žoñinacžquiztanami, učhum chjaawjkatñi žoñinacžquiztanami’.

⁷² Yooz Ejpqui učum tuquita atchi ejpnacžquiz taku tjaachiča, tuž cjican: ‘Wejrqui ančucaquiz tira okzničha. Weriž zuma tjaata taku anal tjat-snača’.

⁷³ Nižaza Yooz Ejpqui učum tuquita Abraham ejpžquiz taku juramintužtan tjaachiča, nijapami učumjapami.

⁷⁴ Učum quintra žoñinacžquiztanami liwriitanaqui, učumqui ana ekskcu Yoozquin sirwasača.

⁷⁵ Nižaza učumqui Yooz kuzcamakaz zuma lijituma kamaquiča. Jalla nuž kamcan učumqui Yooz sirwaquiča ticzcama”.

⁷⁶⁻⁷⁷ Nižaza Zacariasqui tira paljaychiča, tuž cjican: “Juan, wejt maati, amqui Jesús Jilirž tjonz tuqui ojklayaquiča, Israel žoñinaca nii zuma tjewznajo. Amqui jaknužt žoñinacž ujnacami pertunta cječhaja, jalla nii intintiskataquiča. Zoñinacž ujnaca pertunta cjen, liwriitaž cjequiča. Jalla nuž intintiskattiquiztanaqui profeta cjitam cjequiča amqui, arajpach Yooziž tjaata taku paljayni profeta.

⁷⁸ Yoozqui učum ancha okzñiž cjen učum liwriyaquiča. Tsewctanpacha tsjii Liwriiñi cuchanžquichiča, učum kuzquiz tjuñižtakaz kjanajo. Jalla nižtiquiztan ew timpužtakaz cjequiča.

⁷⁹ Jalla nii Liwriiñiqui zuma kjanacamapanž Yooz zuma kamañ jicz tjeeznaquiča, zumchiquiztakaz kamñi žoñinacžquizimi, ticzquiztan eksñi žoñinacžquizimi. Nižaza nii Liwriiñiqui učum zuma irpaquiča, Yooz Ejpžtanami učumtanami zumanznajo”.

Jalla nuž cjichiča Zacariasqui.

⁸⁰ Nekztanaqui nii Juan cjita uzaqui pajkchiča. Zapuru juc'anti Yoozquin tjurt'iñi kuzziztača. Jalla nekztanaqui tsjii ch'ekti yokquin ojklayatča, Israel wajtchiz žoñinacžquiz niž obra tjeezcama.

2

JESUCRISTUZ NASTA

¹ Jalla nii timpuquiz tsjii walja chawc jiliri želatča, Augusto cjita. Nii chawc jiliriqui mantichiča, tuž cjican:

–Tjappacha žoñinacaqui tjuu apuntiskataquiča.

² Nii timpuquiz Cirenio cjita jiliri želatča, Siria yokchiz žoñinaca mantiñi. Jalla nii timpuquiz primir censuqui watchiča.

³ Nekztanaqui tjapa žoñinacaqui persun watja ojkspantača, persun tjuu apuntiskati.

⁴ Jalla nuž cjen José cjita žoñiqui Galilea cjita provinsiquiztan, Nazaret cjita wajtquiztan ulanžquichiča. Judea cjita provinsiquin, Belén cjita wajtquin ojkiča. Jalla nicju David cjita tuquita atchi ejpqui nassitača. Davidž majchmaatquiztan tjonñitača Josequi.

⁵ Jalla nuž cjen nicju ojkiča, tjuu apuntiskati. María cjiti turatan zalzjapa kazzitača Josequi. Nii oraqui naa Mariiqui Espiritu Santuž t'icžtatača. Juztan Mariatan pucultan ojkiča, tjuu apuntiskati.

⁶ Belén wajtquin irantižcu, María majts oraqui tjonchiča.

⁷ Jalla nicju Mariiqui primir wawa majtchinča, Belén wajtquiz, animalž tjajz kjuyquiz. Wawaqui pañ awallžtan capžtatača. Jalla nuž capžcu animalž tjajz kjuyquiz t'apžtatača. Anaž iya alujamintu wajtchucatača.

AWATIRINACAQUI JESUSIZQUIZ RISPITI TJONCHICHA

⁸ Belén wajt žcatiran uuzi itzñi awatirinaca želatča. Awatirinacaqui pakara uuzi itzñitača pamparanpacha.

⁹ Jalla nuž želan tiripintit Yooz anjilaqui jeczquichiča. Tsewctan ninacz kjutni walja kjanžquichiča. Nuž cheržcu ninacaqui ancha tsucchiča.

¹⁰ Jalla nekztanaqui nii anjilaqui cjichiča:

—Ana tsuca ančhucqui. Zuma quintul zjicžcuča. Tsjii Liwriiñiqui tjapa žoñinacztajapa cuchanžquitača. Jalla niiž cjen žoñinacaqui zuma cuntintuž cjequiča.

¹¹ Tii zeziqiu Davidž wajtquiziqui tsjii wawa majttača. Jalla niiqui Jesucristo Yoozza, ančhuc Liwriiñi.

¹² Ančhucqui nii wawa wachaquiča pañ awallžtan capžta; nižaza animalž tjajz kjuyquiz t'apžta wachaquiča. Jalla nuž wažtaž cjen siñala cuntažtakaz cjequiča. Jalla nuž cjenauqui ančhucqui zizaquiča, chekapan wereraž chiitkalala, niiqui. —Nuž cjichiča anjilaqui.

¹³ Jalla nekztan anjilžtan chica tama Yooz anjilanacaqui tsewctan jeczquichizakazza. Yooz anjilanacaqui Yooz honora waytichiča, tuž cjican:

¹⁴ —Tsewcta arajpach Yooz honorchiz cjilalla. Nižaza tii yokquiziqui Yooz okžta žoñinaca zuma cuntintu kuzziz cjilalla.

¹⁵ Jalla nuž chiižcu, Yooz anjilanacaqui tsewc arajpacha quejpciča. Nekztan nii awatirinacaqui porapat parlassiča, tuž cjican:

—Anjilaž maztaqui arajpach Yoozquiztan tjonchikalala. Tsjii Liwriiñi majttakalala. Jalla nii cheriž Belén watjaž ojklalla.

¹⁶ Jalla nekztanaqui awatirinacaqui zati pariju ojkchiča. Belén wajtquin animalž tjajz kjuyquiz luzziča. Nekzpacha awatirinacaqui zalchiča Mariatan Juztan wawa t'apzi.

¹⁷ Ninacztan zalžcu tjappacha Yooz anjilaž chiitanaca nii wawž puntuquiztan quint'ichiča.

¹⁸ Awatirinacaž nuž maztiquiztan, tjappacha nonžni žoñinacaqui ispan-tichiča.

¹⁹ Mariizti persun kuzquiz nii mazta chjojchinča. Nii mazta puntuquiz pinsican walja pinsamintu aptazzinča.

²⁰ Awatirinacaqui uuzi ichi quejpciča. Nižaza Yooz honora paljaychiča, tuž cjican:

—Yoozza chekanaqui. Ancha waliča učumž nonžtanaca, učumž chertanacami. Yooz anjilaž chiitacama nižtapacha cherchinčhumla. —Jalla nuž cjican Yooz honora waytissiča awatirinacaqui.

JESUSAQUI TIMPLUQUIN CHJICHTACHA

²¹ Majttiquiztan quinsakal tjuñquiziqui jalla nekztan nii wawžquiz chim-puz cuztrumpi paachiča. Ima Mariaž ican, Yooz anjilaqui Mariaquiz chiichiča, “Jesús cjita cjequicha amiž primir majtta wawaqui”. Jalla nižtiquiztan nii anjilaž chiita tjuužtan tjuuzkatchiča.

²² Tuquitanpacha tsjii taku mantichiča Moisesqui, tuž cjican: “Majtžcu ima pusi tunc tjuñiž cjen, maatakanacaqui Yooz sirwiz cuzturumpinaca ana payi atasacha. Pusi tunc tjuñiž tjonan, timpluquiz tsjii cuztrumpi paazpanča. Jalla nekztanaqui wilta Yooz sirwiz cuztrumpiž paasacha”. Jalla nižtiquiztan majtta tjuñquiztan pusi tunc tjuñi pjojkan Juztan Mariatan ninacz wawa chjitchiča Jerusalén cjita watja. Jalla nicju timpluquin ojkchiča wawa Yoozquin cumpjii.

²³ Tsjii Yooz liiqui tuž cjichiča, “Primir lucmajch wawa majtžcu, Yoozquin cumpjitaž cjequiča Yooz sirwajo”. Nuž Yooz lii ut'aysiž cjen lii jaru cumplichica.

²⁴ Yooz mantita lii jaru nii lucutiñiqui ojkchiča. Yooz liiqui zakaz cjiča: “Tsji pariza paluma uz tsji pariza wežla palomažtakaz Yoozquin tjaaspanča”. Jaziqui nužupan Yoozquin tjaachiča.

²⁵ Nii timpuqui Jerusalenquiz tsji Simeón cjita zoñi želatča. Nii zoñiqui Yooz kuzcama kamñitača; Yooz lii jaru kamñitača. Nižaza Israel wajtchiz zoñinacž Liwriiñi tjewziča. Simeonqui Espíritu Santuž irpita zoñipantača.

²⁶ Espíritu Santuqui Simeonžquiz taku tjaachiča, tuž cjican: “Ima ticzan, amqui Yooz cuchanžquita Liwriiñi Jiliri cheraquiča”.

²⁷ Jalla nuž taku tjaatiquiztanaqui Espíritu Santuqui Simeón irpichiča timplu kjutñi. Nii oraqui Jesusiž maa ejpqui nii timpluquin chjitchiča. Nekziqui Jesusižquiz mantita lii jaru cumplichiča.

²⁸ Jesusa cjita wawa cheržcu, Simeonqui kjaržtan kaaziča. Jalla nuž kaažcu, Yooz honorchiz cjeyajo, tuž cjichiča:

²⁹ –Yooz Tata, wejrqui amiž mantitacama kamiñ zoñtča. Tuquiqui wejtquiz taku tjaachamča. Anziqui amiž chiita taku cumplichamča. Jaziqui tižtiquiztanaqui cuntintul ticznasača.

³⁰ Jaziqui wejt persun čhjujčtan tii amiž cuchanžquita Liwriiñi cherchinča.

³¹ Tjappacha tii muntuquiz žejlñi zoñinacžtajapa tii Liwriiñi cuchanžquichamča.

³² Tii Liwriiñiž cjen, Israel zoñinacžquizimi parti zoñinacžquizimi Yooz kamañ jicž tjeežtaž cjequiča, liwriita cjeyajo. Nižaza tii Liwriiñiž cjen, Israel wajtchiz zoñinacaqui zuma honorchiz cjisnaquiča. –Jalla nuž chiichiča Simeonaqui.

³³ Simeonž chiitiquiztan Jesusiž maa ejpqui ninacž kuzquiz ispantichiča.

³⁴ Nekztanaqui Simeonaqui ninacžta Yoozquin mayizichiča walikaz cjeyajo. Nižaza Jesusiž maaquiz paljaychiča, tuž cjican:

–Werarapančhay, tii wawaž cjen walja Israel wajtchiz zoñinaca liwriitapanž cjequiča. Nižaza tii wawaž cjen yekjapa Israel wajtchiz zoñinacžti ujquin tjojtznaquiča. Tiiqui walja chawc jiliripanž cjequiča. Pero walja zoñinacaqui nii anaž rispitaquiča, Yooziž cuchanžquita cjenami.

³⁵ Tii wawaž cjen zoñinacž kuzquiz pinsitanacaqui pajtaž cjequiča. Nižaza María, amqui tii wawaž cjen ancha llaquitam cjequiča. –Jalla nuž mazziča Simeonaqui.

³⁶⁻³⁷ Nii oraqui tsjaa Ana cjiti žon želatča, timpluquiz zakaz. Naatača Yooz taku paljayiñ profetqui. Jalla naaqui Fanuelž majttača, Aser cjita t'akquiztan. Pakallawk wata zalztiquiztan, naaža lucuqui ticziča. Anziqui walja chawc žontača. Quinsakalc tunca pusin watchiztača naa žewqui; timpluquiztan anapan ulniñtača. Ayunascan Yoozquin mayizican, Yooz Ejpžquin sirwiñtača majiñami weenami.

³⁸ Jesús cjita wawa timpluquiz želan, nii orapacha Ana cjiti žonqui nii wawžtan zalchinča. Nuž zalžcu Yoozquin sparaquiž cjichinča. Nekztan nii wawž puntu paljayi kalltichinča Jerusalén watja liwriiz tjuñi tjewzñinacžquiz.

JESUSAQUI PAJKCHICHA

³⁹ Tjapa Yooz mantita lii cumpliczuqui Jesusiž maa ejpqui Galilea yokquin quejpchiča. Niiž persun watja Nazaret cjita quejpchiča.

⁴⁰ Jalla nii wajtquinaqui nii uzaqui pajkchiča. Tsjan tjupi y nižaza tsjan čhultaki zizñi cjissiča. Yooz Ejpqui nii walja cwitichiča, nižaza yanapchiča.

⁴¹ Zapa wata niž maa ejpqui Jerusalenquin ojkchiča, pascua pjijsta payi.

⁴² Jesusaqui tuncapan wajtchiz cjen, niiž jamillžtan Jerusalenquin ojkchiča pascua pjijsa cuztrumpi payi.

⁴³ Jalla nekztan pjijsa žeržcuqui, quejpciča ninacaqui. Jesús uzazti Jerusalén wajtquiz eclichiča. Niiž maa ejp ana eclini naychiča.

⁴⁴ Niiž maa ejpqui pinsatča, “Niiž mazinacžtanž caa”, cjan. Jalla nuž cjen niiž maa ejpqui ojkchiča tsjii nooj intiru. Pero tjuñi kattan, Jesusa kjurchiča jamillanacžquin nižaza ocjalž maziran.

⁴⁵ Maa ejpqui Jesusa ana wači atchiča. Jalla nekztanaqui Jerusalén watja quejpciča, jalla nicju kjurzjapa.

⁴⁶ Tsjii čjep majquiztan, maa ejpqui Jesús watchiča timplu kjuyla. Timpluquiz Israel lii tjaajiñi maestrunacžtan želatča. Maestrunacž takunaca nonznatča. Y nižaza maestrunacžquiz pewcznatča Jesusaqui.

⁴⁷ Nii uzaž paljayta taku nonžcu tjapa žoñinacaqui ispantichiča, nii uzaž nuž čjulumi zizniž chiyan.

⁴⁸ Jalla nekztanaqui nuž žejlñi cheržcu, ispantichi cjijsiča maa ejpmi. Nekztanaqui niiž maaqui chiižinčinča:

–Aay, tii wejt uza jay. ¿Kjažtiquiztan am nižta eclichamta? Am ancha llaquita kjurchinča wejrnacqui. –Jalla nuž maaqui niižquiz chiižinčinča.

⁴⁹ Jalla nekztanaqui Jesusaqui maaquiz kjaaziča, tuž cjan:

–¿Wejr tjapa kjutñi kjurchamkaya? Wejt persun Ejpž kjuyquiz žejlstanpantača wejtlaqui. ¿Jalla nii ana zizzat amya?

⁵⁰ Jalla nuž chiyan niiž maa ejpqui ana intintazziča.

⁵¹ Nekztanaqui Jesusaqui maa ejpžtan Nazaret cjita watja ojkchiča. Nicju irantižcu maa epiž mantitanaca cazñipanikaztača. Maaqui jalla niiž nuž wattanacquiztan kuzquiz chjojchinča.

⁵² Jalla nekztan Jesusaqui tsjan pajkchiča. Nižaza tsjan zizni pinsam-intuchiztača. Yooz Ejpmi žoñinacami niiž cjen cuntintutača.

3

JUAN BAUTISTAQUI YOOZ TAKU PALJAYCHICHA

¹ Zacarías Juan cjita majchqui Yooz taku paljayi kallantichiča. Jalla nii timpuquiz tii jilirinaca želatča. Tsjiiqui Tiberio cjitatača, juc'ant chawc jiliritiča niiqui. Tunca pjijskan wata jiliri cjan mantichiča. Nižaza tira mantiñipantača. Tsjiizuñqui Poncio Pilato cjitatača. Niiqui mantichiča Judea cjita yokquin. Tsjiizuñqui Herodes cjitatača. Niiqui Galilea yokquin chawc jiliritiča. Niiž lajkqui Felipe cjitatača. Nii Felipiqui Iturea cjita yoka, Traconite cjita yoka, jalla nii pizc yokquin mantiñitača. Tsjiizuñqui Lisania cjitatača. Niiqui Abilinia cjita yokquin mantiñitača. Nii timpuqui ninacatača pajk jilirinacaqui.

² Nižaza nii timpuqui Anastan Caifastan timplu chawc jilirinacatača. Nii timpuqui Juanqui želatča tsjii ch'ekti yokquin. Jalla nuž želan Yoozqui Juanžquiz takunaca paljaychiča.

³ Nekztan Juanqui tjapa kjutñi Jordán puj yokaran ojklaychiča. Nicju žoñinacžquiz paljaychiča, tuž cjan:

–Ančhucqui kuznacaž campiya; Yoozquin kuzziz cjisna. Nekztan ančuca ujnaca pertunta cjequiča. Jalla nekztanaqui bautistaž cjesača. –Jalla nuž paljaychiča Juanqui.

⁴ Tuquita tsjii Isaías cjita Yooz taku paljayni profeta želatča. Niiž cjiirta takucama watchiča. Jalla tuž cjan, cjiirchiča:

“Ch'ekti yokquin tsjii zoñiqui altu tawkžtan paljayžcaquiča, tuž cjican: ‘Tsjii chawc jiliriž tjonacuica. Jaziqui zuma kamañ jicz tjaczna. Tsjii zuma jicztakaz ančuca kuznaca zumpacha tjaczna, y nižaza zuma lijitumapanž cjee.

⁵ K'awanaca liwj tjattjatzna. Curunacami lumanacami zumpachaž wjajržna, nii jicz zuma zok'o okajo. Nižaza nii t'ojonacaqui zumpacha kujjzcatzna. Jalla nuž zuma kamañ jicz tjacznaquiča.

⁶ Nii chawc jiliriž tjontan, tjapa tii muntuquiz žejlñi zoñinacami Yooz Epiž cuchanžquita Liwriiñiž cheraquiča’ ”.

Jalla nuž cjican cjiŕchiča nii Isaías cjita zoñiqui.

JUAN BAUTISTAQUI ZOÑINACŽQUIZ CHIIZINCHICHA

⁷ Nekztanaqui zoñinacaqui tjapa watjanacquiztan ulanžquichiča, Juanž bautista cjisjapa. Juanqui nii zoñinacžquiz cjichiča:

—Zkora irata incallñi zoñinaca. Yooz Ejpqui ujchiz zoñinaca wajillaž casticaquiča. ¿Ject ančucaquiz nii mazzejo? ¿Nii casticu atipzjapa wejtquinž tjonja?

⁸ Kuz campiichinčuczłaj niiqui, zumapankaz kamaquiča, ančuca campiita kuz kjana tjeezjapa. Ančucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoniñča. Yoozqui anaž wejrnaca casticasača”. Jalla nižta ana chiichiiz waquisiča ančucqui. Yoozqui tii maznacquiztan Abrahamž majchmaatinaca paasača.

⁹ Ančucqui tsjii frut muntižtakazza. Ana zuma fruta pookñi muntiqui k'aačtaž cjequiča jir ačtan. Jalla nuž k'aačtiquiztanaqui, ujtaž cjequiča. Jalla nižta irataž ančucaquiz wataquiča. Ana zuma kamañchiz zoñinaca castictaž cjequiča. —Nuž cjican paljaychiča Juanqui.

¹⁰ Jalla nekztanaqui zoñinacaqui Juanžquiz pewcziča:

—¿Jaziqui čhjulut paaqui wejrnacjo?

¹¹ Nekztanaqui Juanqui kjaaziča, tuž cjican:

—Jequit pizc almillačiz cječhaj niiqui, tsjii almillaqui ana almillačiz zoñžquin tjaasača. Tsjii wacchi čhjerchiz zoñiqui tsjii ana čhjerchiz zoñžquin niž čhjeri tojnaquiča. —Nuž cjichiča Juanqui.

¹² Jalla nekztanaqui tsjii impuesto cobriñi zoñinacaqui Juanžquin tjonchiča, bautista cjisjapa. Nekztanaqui Juanžquiz pewcziča, tuž cjican:

—Tjaajiñi, ¿wejrnacqui čhjulut paaquiya?

¹³ Juanqui kjaaziča, tuž cjican:

—Lii jaruž cobraquiča. Anaž juc'anti cobraquiča ančucqui.

¹⁴ Nižaza tsjii zultatunacaqui Juanžquiz pewcziča, tuž cjican:

—¿Wejrnaczi čhjulut paaquiya?

Juanqui kjaaziča, tuž cjican:

—Ančucqui zoñžquiztan anaž čhjulumi kjañasača. Nižaza anaž fuerziyasača. Nižaza zoñžquizimi ana inapankaz tjojtñasača, tsjii cusasa packatzjapami. Nižaza ančuc persun suelduchiz cuntintupanž cjee. —Jalla nuž cjican kaaziča Juanqui.

¹⁵ Tjapa zoñinacaqui Yooziž cuchanžquita Cristuž tjonz ancha tjewznatča. Jalla nižtiquiztan zoñinacaqui kuznacquiz pinsichiča: “Juanqui Cristužłani” cjican.

¹⁶ Pero Juanqui tjappacha nii zoñinacžquiz cjichiča:

—Nonžna. Wejrqui kjaztankal bautisuča. Tsjiiuñ wejt wirquin tjonča. Jalla niiqui Espiritu Santužtanami arajpach ujžtanami bautisaquiča. Jalla

niičha wejtquiztan tsjan juc'ant poderchizqui. Anal niiz čhjata chjojkinimi atasacha, niizquiz atintisjapa. Inakaztcha wejrqui.

¹⁷ Juanqui tira paljaychiča, tuž cjican:

–Ančhucqui trigo zkalažtakazza. Nii tjoñi jiliriqumi trigonaca kjojaquiča. Nekztan itsanacami zuma trigumi pjalznaquiča. Nii zuma triguqui ricujtaž cjequiča. Niiž persun kjuyquin majcžtaž cjequiča. Nii itsanacazti liwj ujžtaž cjequiča, ana tjesñi ujquiz. Jalla nižta irataž ančhucquiz wataquiča.

¹⁸ Jalla nuž žoñinacžquiz chiižinchiča Juanqui. Nižaza yekja chiižintanacami paljaychiča, zuma Yooz taku paljaycan.

¹⁹ Nižaza wiruñaqumi Juanqui Herodes cjita jiliržquiz iwjt'ichizakazza. Herodes cjita jiliriqumi niiz jilž tjunatan zalsiča. Felipe cjitatača niiz jilaqui. Nižaza Herodesqui iya anawalinaca paachitakalča. Nekztan Juanqui Herodesquiz iwjt'ichiča tjapa niiz anawali paatiquiztan.

²⁰ Herodeszti ana nonziča. Juc'anti anawalinaca paachiča, Juan carsilquiz chawjzcama.

JESUCRISTUZ BAUTISTA

²¹ Juanqui ima carsilquiz chawcta želan, walja žoñinaca bautissiča. Nižaza Jesusa bautissizakazza. Jesusaqui bautista cjiscu Yooz Ejpžquin mayizatča. Nii orapacha arajpacha cjetziča.

²² Yooz Espiritu Santuqui tsji palumažtakaz chjijwžquichiča Jesusiž juntuñ. Nižaza arajpachquiztan tsji altu jora paljayžquini nonziča. Nii joraqui tuž cjican chiižquichiča:

–Amča wejt ultim k'ayi Maatimqui. Amiž cjen anchal cuntintutča wejrtqui.

JESUCRISTUZ TUQUITA ATCHI EJPNACACHA TINACAQUI

²³ Jesusaqui nii oraqui quinsatunc watchiztača. Jalla nekztanaqui niiz Yooz Epiž tjaata trabajo kallantichiča. Jesusiž tuquita atchi ejpnacaqui tinacača. Primero Josež maati cjitažtakaztača. Josequi Eliž majhtača.

²⁴ Eliqui Matatž majhtača. Matatqui Leviž majhtača. Leviqui Melquiž majhtača. Melquiqui Janaž majhtača. Janaqui Josež majhtača.

²⁵ Josequi Matatías majhtača. Matatiasqui Amós majhtača. Amosqui Nahumž majhtača. Nahumqui Esliž majhtača. Esliqui Nagaiž majhtača.

²⁶ Nagaiqui Maatž majhtača. Maatqui Matatías majhtača. Matatiasqui Semeiž majhtača. Semeiqui Josež majhtača. Josequi Judaž majhtača.

²⁷ Judaqui Joanaž majhtača. Joanaqui Resaž majhtača. Resaqui Zorobabelž majhtača. Zorobabelqui Salatielž majhtača. Salatielqui Neriž majhtača.

²⁸ Neriqui Melquiž majhtača. Melquiqui Adiž majhtača. Adiqui Cosamž majhtača. Cosamqui Elmodamž majhtača. Elmodamqui Erž majhtača.

²⁹ Erqui Josuež majhtača. Josuequi Eliezerž majhtača. Eliezerqui Jorimž majhtača. Jorimqui Matatž majhtača.

³⁰ Matatqui Leviž majhtača. Leviqui Simeonž majhtača. Simeonqui Judaž majhtača. Judaqui Josež majhtača. Josequi Jonanž majhtača. Jonanqui Eliaquimž majhtača.

³¹ Eliaquimqui Meleaž majhtača. Meleaqui Mainanž majhtača. Mainanqui Matataž majhtača. Matataqui Natanž majhtača.

³² Natanqui Davidž majhtača. Davidqui Isaiž majhtača. Isaiqui Obedž majhtača. Obedqui Booz majhtača. Boozqui Salmonž majhtača. Salmonqui Naasonž majhtača.

³³ Naasonqui Aminadabž majhtača. Aminadabqui Aramž majhtača. Aramqui Esromž majhtača. Esromqui Fares majhtača. Faresqui Judaž majhtača.

³⁴ Judaqui Jacobž majhtača. Jacobqui Isaacž majhtača. Isaacqui Abrahamž majhtača. Abrahamqui Tarež majhtača. Tarequi Nacorž majhtača.

³⁵ Nacorqui Serugž majhtača. Serugqui Ragauž majhtača. Ragauqui Pelegž majhtača. Pelegqui Heberž majhtača. Heberqui Salaz majhtača.

³⁶ Salauqui Cainanž majhtača. Cainanqui Arfaxadž majhtača. Arfaxadqui Semž majhtača. Semqui Noež majhtača. Noequi Lamecž majhtača.

³⁷ Lamecqui Matusalenž majhtača. Matusalenqui Enocž majhtača. Enocqui Jaredž majhtača. Jaredqui Mahalaleelž majhtača. Mahalaleelqui Cainanž majhtača.

³⁸ Cainanqui Enós majhtača. Enosqui Staž majhtača. Setqui Adanž majhtača. Adanqui Yooziž paatiquiztan Yooz maatitača.

4

SATANAS CJITA DIABLUQUI JESUSA UJQUIZ TJOJTSKATZJAPA PECATCHA

¹ Jesusiž kuztan Yooz Espíritu Santuž kuztan tsjii kuzziztača. Jalla nuž cjen Jesusaž Jordán cjita pujquiztan okan, Espíritu Santuqui Jesusa chjitchiča ch'ekti yokquin.

² Jalla nii ch'ekti yokquin žejlchiča pusi tunc tjuñi. Jalla nuž želanaqui nii Satanás cjita diabluqui Jesusa ujquiz tjojtskatzjapa pecatcha. Jalla nii pusi tunc tjuñi Jesusaqui ana čhjeri lujlchiča. Jalla nižtiquiztan pusi tunc tjuñquiztan ana lujlchiž cjen čhjeri eeskatchiča.

³ Jalla nekztanaqui nii diabluqui cjichiča:

—Ultim Yooz Maatimžlaj niiqui, amqui tii mazquiztan t'anta tuckatalla. — Nuž diabluqui chiichiča.

⁴ Jesusaqui kjaaziča, tuž cjican:

—Cjirta Yooz takuqui tuž cjicha: “Zoñinacaqui anaž čhjeržtan alaja žetasača. Yooz takuča chekanaqui, jalla niiča ultim čhjerižtakazqui, Yooztan wiñaya žetzjapaqui”.

⁵ Jalla nekztanaqui nii diabluqui Jesusa chjitchiča tsjii pajk cur puntiquin. Jalla nicju tjapa tii muntuquiz žejlñi yokanaca tjeeziča tsjii ratukaz.

⁶⁻⁷ Nekztanaqui diabluqui Jesusižquiz cjichiča:

—Wejt yujcquiz quillsnaquiž niiqui, nižaza wejr rispitaquiž niiqui, tjapa tii yokquiz žejlñinaca amquiz tjaataž cjequiča. Wejrqui tjapa tii yokanaca tjaača, am mantisjapa. Tii yokquiz žejlñinaca amtaž cjequiča tjappacha. Tii tjappacha wejtquiz tjaatatača. Jaziqui wejrqui jakziltižquiz tjaaz pecučaja, jalla nižquin tjaasača. —Jalla nuž cjichiča diabluqui.

⁸ Nekztanaqui Jesusaqui kjaaziča, tuž cjican:

—Satanás, wejtquiztan zaraka. Cjirta Yooz takuqui tuž cjicha: “Ultim arapach Yoozquinkaz rispita. Nižaza nii alaja sirwa. Niikazza Yooz Jiliriča”, nuž cjican cjirtača.

⁹⁻¹¹ Nekztanaqui nii diabluqui Jesusa chjitchiča Jerusalén cjita watja. Nicju timplu pjurniquin chjitchiča. Nekztan cjichiča:

–Cjirta Yooz takuqui tuž cjiča: “Yooz Ejpqui niiž anjilanaca man-taquičha, am cwitisjapa. Ninacž kjaržtan am cwitaquiča, ana am kjojcha čhjojritžta cjejajo čhjul mazquiztanami”. Nuž cjirtača. Jaziqui ultim Yooz Maatimžlaj niiqui, tsewctan kossuc tii yokquiz layžcalla.

¹² Nekztanaqui Jesusaqui kjaaziča, tuž cjican:

–Cjirta Yooz takuqui tuž cjiča: “Zoñiqui ultim arajpach Yooz ana inakaz nuž yanznaquiča”.

¹³ Jalla nekztanaqui diabluqui ana čhjululy iyas pinsiñi cjissiča, Jesusa ujquiz tjojtskatzjapaqui. Nekztanaqui tsjii kjažtapacha niižquiztan zarakchiča. Wiruñ wilita ujquiz tjojtskatz yanznaquiča.

JESUCRISTUQUI YOOZ PUNTU PALJAYCAN OJKLAYCHICHA

¹⁴ Nekztanaqui Jesusaqui quejpžquichiča Galilea cjita yokquin. Walja Espiritu Santuž azziztača. Tjapa yok kjutñi niiž quintuqui ancha ojkchiča.

¹⁵ Galilea yokquin želan judío ajcz kjuyanacquizimi tjaajiñitača. Niiž tjaajintiquiztan tjapa zoñinacaqui niiž honora waytichiča.

NAZARET CJITA WAJTQUIN OJKCHICHA

¹⁶ Nekztanaqui niiž persun watja ojkchiča, Nazaret cjita. Jalla nitača niiž pajkta watjaqui. Jeejz tjuñ nojiqui ajcz kjuyquin luzziča, niiž cuztrumpi jaru. Jalla nii ajcz kjuyquin žejlcan, tsijtsiča Yooz taku liizjapa.

¹⁷ Nekztanaqui Isaías cjita profetaž cjirta Yooz taku, jalla nii libruqui chjalžtatača Jesusa liyajo. Nii libro cjetžcu wajtchiča tii cjirta taku. Nekztan liičiča, tuž cjican:

¹⁸ “Yooz Espiritu Santuqui wejt kuzquiz žejlča. Wejrqui illztača, pori zoñinacžquiz zuma taku maznajo. Nižaza wejrqui cuchanžquitača llaquizni zoñinaca ana llaquiz llaquizajo. Nižaza wejrqui cuchanžquitača tanta zoñinacžquiz maznajo, ‘Liwriitaž cjequiča ančhucqui’ cjican. Nižaza wejrqui cuchanžquitača zur zoñinacž čhjujqui čhjetnajo. Nižaza wejrqui cuchanžquitača ana zuma langzkatta zoñinaca liwriyajo.

¹⁹ Yooz Ejpqui zoñinacžquiz zuma favora paaquiča. Jalla nuž nii zumanaca paazjapa Yooz Espiritu Santuqui wejttañ chicapachača”.

Jalla nuž Yooz taku cjirtača.

²⁰ Jalla nekztanaqui Jesusaqui nii libro pjucžcu ajcz kjuya atintiñi zoñžquiz intirjichiča. Nekztan nužquiz julziča. Tjappacha nekz žejlñi zoñinacaqui tira niižquin chekznatča.

²¹ Nekztanaqui paljayi kallantichiča, tuž cjican:

–Tonjpacha tii cjirta Yooz taku cumplissiča ančhucadž nonžnan.

²² Nekztanaqui zoñinacaqui chiichiča, tuž cjican:

–Walikazza tii Jesusaqui.

Niiž zuma chiita takunacquiztan ispantichiča. Ninacpora parlassiča, tuž cjican:

–¿Anaj tiic Juz maatiya?

²³ Nekztan Jesusaqui tuž chiichiča:

–Ančhucacquiztan zoñi wejtquiz chiyačhani, “Am kullñi zoñimžlaj niiqui, ima wejr kullcan, am persunpacha kullalla”. Wejrqui Capernaum wajtquin milajrunaca paachinča, jalla nii quintu nonzinčhucča. Jaziqui ančhucqui wejtquiz tuž chiyačhani: “Nižtapacha tii am persun wajtquin paažinalla”. Nuž wejtquiz chiyačhani.

²⁴ Jesusaqui tirapan paljayichiča, tuž cjican:

—Weraral chiyučha. Yekja wajtchiz zoñinacaqui tsjii Yooz taku paljayñi profeta zuma risiwasača. Persun wajtchiz zoñinacazti nii Yooz taku paljayñi profetžquiz anaž juyzu paača.

²⁵ Tuquiqui tsjii Elías cjita Yooz taku paljayñi profeta želatča. Nii timpuqui walja žewžew maatakanaca želatča Israel wajtquinaqui. Chjep wata sojta jiizziz ana wira chijinčiča. Jalla nižtiquiztan walja mach'atača. Ana čjjeri želatča nii wajtquinaqui.

²⁶ Israel wajtquin walja žewžew maatakanaca želanami, Eliasqui ni-nacžquin ana cuchantatača. Pero Sarepta cjita wajtquin tsjaa žew želatča, Sidón cjita wajtž žcati. Jalla naa yekja wajtchiz žewaquin cuchantatača Eliasqui. Jalla nužupan cjetča.

²⁷ Nižaza tuqui timpuzakaz tsjii Eliseo cjita Yooz taku paljayñi profeta želatča. Nii timpuqui walja mojkchi janchichiz laa zoñinaca želatča; lepra cjita conača niiqui. Pero Eliseuqui persun wajtchiz laa zoñinacžquiz ana čhjulumi čhjetinčiča. Antiz tsjii Naamán cjita Siria wajtchiz zoñžquiz čhjetinčiča. —Jalla nuž chiichiča Jesusaqui.

²⁸ Jalla nuž chiita nonžcu, tjappacha nii ajczñi zoñinacaqui muzpa žawjčiča Jesusiž quintra.

²⁹ Ninacaqui walja tsijsiča. Nekztanaqui wajtquiztan Jesusa ulan-skatchiča. Nii watjaqui pajk waranc k'aw žcati želatča. Jalla nuž k'aw kjutñi Jesusa chjitchiča, nii k'awquiztan kossuc tjojtsjapa.

³⁰ Ultimquiziqui Jesusazti ninacž taypi watchiča. Ana čhjulumi kjaž cjita ojkchiča.

TSJII ZAJRAŽ TANTA ZOŃI CHJETINTA

³¹ Nekztanaqui Jesusaqui ojkchiča Capernaum cjita watja Galilea cjita yokquin. Jalla nicjuqui jeejz tjuñ nooj Jesusaqui tjaajinčiča ajcz kjuyquin.

³² Niiž tjaajintiquiztan zoñinacaqui walja ispantichiča. Jesusaqui pajk jilirž tawkžtan tjaajinčiča.

³³ Jalla nii ajcz kjuyquiz tsjii zajraž tanta zoñi želatča. Nii zoñiqui kjawčiča, tuž cjican:

³⁴ —¡Ay! Jesusa, Nazaret wajtchiz zoñimča. ¿Kjažtiquiztan am wejt-nacaquiz mitizi? ¿Kjažtiquiztan wejrnac aki tjon amjo? Wejrqui am pajuča. Yooziž zuma cuchanžquita Zoñimča amqui. —Jalla nuž cjichiča nii za-jraqui.

³⁵ Nekztanaqui Jesusaqui nii zajrižquiz ujziča, tuž cjican:

—¡Ch'uj žela! ¡Tii zoñžquiztan zaraka!

Jalla nekztanaqui zoñi tjojtcu zajraqui ulanchiča zoñinacž cheranpacha. Ana nii zoñi čhjojritžcu, ecchiča.

³⁶ Nekztan tjapa zoñinacaqui ispantichiča. Jalla nekztan parlassiča, tuž cjican:

—¿Čhjul mantiñi takumekaz chiila tiiqui? Walja azziz tawkchizza. Tii zoñiqui zajramiž mantila. Tiiž mantitiquiztan zajramiž ulanla. —Nuž ispantichi parlassiča.

³⁷ Tjapa kjutñi nii yokaran Jesusiž ispantichuca paatanacquiztan walja parlasñitača.

SIMON PEDRUZ AJMUZ MAA CHJETINTA

³⁸ Nekztanaqui Jesusaqui nii ajcz kjuyquiztan ulanžcu ojkchiča. Nekztan Simonž kjuyquin luzziča. Jalla nekz Simonž ajmuž maa ch'ujlñi cona laacjichi želatča. Tjapa curpu walja kjakchi želatča. Nii žejlñi zoñinacaqui Jesusižquiz roct'ichiča:

–Chjetinžinalla, –cjican.

³⁹ Nekztanaqui Jesusaqui naa laa žona kjutñi chutjatchičha. Nekztan laa žon čhjetinchiča. Ch'ujlñi conaqui apaltichiča nužquiz. Nii orapacha naa žonqui žaazinča, nekztanaqui ninaca atinti kallantichinča.

TJAPAMAN LAA ZOÑINACA CHJETINTA

⁴⁰ Nekztanaqui tjuñiz kattan, žoñinacaqui tjapaman laa žoñinaca zjjicchiča, Jesusa čhejtnajo. Nekztan Jesusaqui zapa maynižquiz persun kjaržtan lanziča. Jalla nuž lanžcu čhjetinchiča.

⁴¹ Nižaza tsjii kjaž laa žoñinaczquiztan zajranaca ulanskatchičha. Jalla nuž ulanskatan zajranacaqui kjawchiča:

–Yooz Maatimča amqui, –cjican.

Nii zajranacaqui zizatča, Yooziž cuchanžquita Cristupankazza Jesusaqui, jalla nii. Jalla nižtiquiztan Jesusazti zajranaczquiz ujziča, tuž cjican:

–Jalla wejt puntuquiztan anapanča chiichiisqui.

JESUSAQUI YOOZ ZUMA KAMAÑ PUNTU PALJAYCHICHA

⁴² Niiž jakakattaž wentan Jesusaqui wajtquiztan ulanchičha, ana žoñž žejlz yokquin. Pero nii wajtchiz žoñinacazti walja nii kjurchičha. Nižtami kjurñi žoñinacaqui irantichiča jakziquin Jesusa želatčhaj, jalla nicju. Nii žoñinacaqui Jesusaž atajs pecatča, ana jakziquinami okajo.

⁴³ Pero Jesusaqui ninaczquiz cjichiča:

–Yekjap watjanacquin jaknužt žoñinacaqui Yooz zuma kamañchiz kamz waquizichaja, jalla nii paljayzquiztanča wejrqui. Jalla niijapa wejrqui tii muntuquiz cuchanžquitača.

⁴⁴ Jalla nuž paljaycan Jesusaqui ojklaychiča Galilea yokaran. Jalla nuž ojklaycan ajcz kjuyquizimi paljayñitača.

5

JESUCRISTUQUI MILAJRU PAACHICHA

¹ Tsjii nooj Jesusaqui tsjii pajk kot atquin želatča. Genesaret cjitača nii pajk kotaqui. Jalla nekz želan walja žoñinacaqui niižquin tjonchiča. Yooz taku nonzjapa niiž muytata ancha ts'acjasatča.

² Jesusaqui pizc laachi warcu cherchiča kot atquiz. Tsjii ch'iz tanñi žoñinacaqui warcunaca ecchitača. Ninacaqui ch'iz tanz rednaca awjnatča.

³ Jalla nekztanaqui Jesusaqui Simón cjita žoñž warcuquiz luzziča. Simonžquiz nii warcu koluc atskatchičha kot mor kjutñi cheechi. Jesusaqui warcuquiz julžcu, žejlñi žoñinaczquin tjaañi kallantichiča.

⁴ Jalla nuž žoñinaczquiz tjaañi žeržcu, Simonžquiz cjichiča:

–Tii warcu am chjicha tsjan kos kjutñi. Jalla nekztan am ch'iz tanz rednaca tjojtžna.

⁵ Simonaqui kjaaziča tuž cjican:

–Wejt Tjaañi Maestro, zeziqui wejrnacqui pakara langzinča, pero ana zinta ch'iz tanchinča. Nižtaqui amiž mantanaqui wejt ch'iz tanznaca tjojtžnača.

⁶ Nekztanaqui ch'iz tanz tjojtžcu, walja muzpa ch'iz tanchi jooziča, redmi wjajrzñi kallantichiča.

⁷⁻⁸ Nii oraqui ninacz mazinaca yekja warcuquintača koluc ažkquinalla. Ch'iz tanz wjajrzñi kallantiquiztan mazinaca kjaržtan wilzcu, kjawziča yanapi tjonajo. Nii mazinacaqui irantižcu, nii pizc warcuquiz ch'iztan chji-jpsiča. Ch'iztan jos nii kotquiz kos julžni tjurchičha nuž wacchi ch'iz taniž

cjen. Nii cheržcu, Simón Pedruqui Jesusiž yujcquiz quillziča. Nekztan cjichiča:

—Wejt Yooz Jiliri, ancha ujchiz zoñtča wejrqui. Amtan chica ojklayzqui anal waquizuča.

⁹ Jalla nii wacchi ch'iz tanchiž cjen, Simonaqui walja ispantichiča, nižaza niž mazinacami.

¹⁰ Tsjii pucultan mazinacaqui Jacobžtan Juanžtan cjitatača. Ninacaqui Zebedeož majchnacatača. Jacobžtan Juanžtan nižaza ispantichi cjišiča. Jesusaqui Simonžquiz cjichiča:

—Ana am tsuca. Jalla tekztan nawjkchuc jaknuž ch'iz juntichamžlaja, jalla nižta irata amqui zoñinacam juntaquiča Yooztajapaqui.

¹¹ Jalla nekztanaqui warcunaca yokquin irantiskatžcu, ninacaqui tjapacha ecchiča. Nižaza nii ch'iz tanz langz jaytichiča Jesusižtan chica ojklayzjapa.

MOJKCHI JANCHICHIZ LAA ZOÑI CHJETINTA

¹² Tsjii noojiqui Jesusaž tsjii wajtquiz želan, tsjii mojkchi janchichiz laa zoñi tjonchiča. Jesusa cheržcuqui, niž yujcquiz puct'ichiča yokquizpacha. Jalla nekztanaqui rocchiča, tuž cjican:

—Wejt Jiliri, wejr čhjetnalla. Am wejr čhjetinzim pecchaj niiqui, wejr čhjetinzim atča amqui.

¹³ Nekztanaqui Jesusaqui kjaržtan lanziča, tuž cjican:

—Wejr am čhjetnasachiya. Jaziqi čhjetintam cjišsa.

Jalla nuž chiitiquiztanaqui nii orapacha nii zoñiqui žejtchi cjišiča mojkchi janchi laaquiztan.

¹⁴ Nekztanaqui Jesusaqui nii zoñi mantichiča ana jeczquizimi nuž nii čhjetinta puntu chiichiyajo. Nižaza cjichiča:

—Timpluquin oka amqui. Timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantichaja, jalla nuž ofrenda uchaquiča. Jalla nižtiquiztan zoñinaca am žejtchi zizaquiča. Jazic oka amqui. —Nuž mantichiča Jesusaqui.

¹⁵ Jalla nuž ana chiyajo mantichiž cjenami, Jesusiž paata puntu juc'anti juc'anti parlita cjišiča tjapa kjutni zoñinacžquin. Jalla nii quintu nonžcuqui, ju'anti zoñinacaqui ajcsquichiča Jesusiž taku nonzjapa. Nižaza laanacami ajczquichiča Jesusaž čhjetinta cjisjapa.

¹⁶ Jalla nižtiquiztanaqui Jesusaqui nii zoñinacžquiztan zarakžcu ana zoñinacž žejlz yokquin ojkchiča. Jalla nii yokquin Yooz Ejpžquin mayizichiča.

ZUCH ZOÑI CHJETINTA

¹⁷ Tsjii nooj niž wiruñ Jesusaqui tjajnatča. Jalla niiran fariseo cjita zoñinacaqui julzi želatča, nižaza judiuž kamañ lii tjajni zoñinaca želatča. Jalla ninacaqui tjapa Galilea watjanacquiztan tjonchiča, nižaza Judeaquiztan, nižaza Jerusalenquiztan. Nižaza Jesusaqui laa zoñinaca čhjetincan, Yooz azi tjeeziča.

¹⁸ Jalla nekztanaqui tsjii kjaž zoñinacaqui tsjii zuch zoñi zjičchiča tjajz zquitquiz callžcu. Irantižcu kjuyquiz majcz pecatča. Jesusiž yujcquiz nonzinz pecatča.

¹⁹ Pero muzpa zoñinacacaz ajcsiž cjen, ana Jesusižquin macjati atchiča. Nekztanaqui kjuya yawžcu, tsewctan kjuya pjetchiča, tejanaca apakžcu. Pjetquiztan nii zuch zoñi tsewctan kjuyłchuc majcchiča tjajz zquitquiz callžcu. Kjuyltan žejlñi zoñinacž taypi nuž Jesusiž yujcquin apjatchiča.

²⁰ Ninaca tjapa kuztan tjonchi nayžcu Jesusaqui laa zoñžquiz cjichiča:

—Jilala, jaziqui am ujnacaqui pertuntača.

²¹ Jalla nekztanaqui judiuž kamañ lii tjaajiñinacžtan fariseonacžtan kuzquiz pinsi kallantichiča, tuž cjican: “¿Ject tii žoñejo? ¿Kjažtiquiztan nižta chiijo? Yooz quintra anawalipanla tii žoñž takuqui. ¿Ject ujnaca pertunasajo? Yoozpanikazla ujnacaqui pertunñiqui”. Jalla nuž pinsichiča nii žoñinacaqui.

²² Jesusaqui persun kuzquiz ninacaž pinsita naychiča. Nekztan ninacžquiz paljaychiča, tuž cjican:

—¿Kjažtiquiztan anchuca kuz nižta pinsejo?

²³ ¿Jaksilta takut pjasila chiiž cjesajo? Tii zuch žoñžquiz chiižinsjo, “Am ujnacami pertunta”, ¿cjis pjasila cjesaj? už “Tsijsna. Am tjajz zquiti aptižcu oka”, ¿nuž chiiž pjasila cjesaj?

²⁴ Tsewtan cuchanžquita Yooz Žoñčha wejrqui. Tii muntuquiz jiliritča, ujnaca pertunjapa. Razunal chiyučha. Jalla nii zizjapa ančhucqui tiiž chera. Nekztanaqui zuch žoñžquiz cjichiča:

—Amquiz cjiwčha, tsijsna. Am tjajz zquitinaca aptaza. Oka am kjuya. — Nuž cjican chiichiča Jesusaqui.

²⁵ Nii orapacha nii zuch žoñiqui tsijsiča, žoñinacaž cheranpacha. Tjajz zquiti aptižcu, persun kjuya ojkchiča. Yooz honora waytican ojkchiča.

²⁶ Jalla nižta cheržcu tjapa žoñinacaqui walja ispantichi quirchiča. Ekeksan ninacaqui Yooz honora waytichizakazza. Nižaza ninacpora parlassizakazza:

—Tonj tjuñiqui walja ispantichucanaca cherchinčhumčha.

LEVI CJITA ŽOÑIQUI JESUSIZQUIN KUZIZ CJISSICHA

²⁷ Jalla nekztanaqui Jesusaqui ulanchiča. Jalla nuž ulanžcu tsjii Leví cjita žoñi cherchiča. Impuesto cobriñi žoñitača niiqui. Impuesto cobriñi puestuquiz julzi želatča žoñinacžquiz cobrican. Jesusaqui nii žoñžquiz cjichiča:

—Wejttanž ojkla.

²⁸ Nekztanaqui Leví cjita žoñiqui tsijsiča. Impuesto cobriz langz apatatžcu, Jesusižtan chica ojkchiča.

²⁹ Nekztanaqui Jesusižtan pijista paazjapa, Leviqui persun kjuyquiz zuma čhjeri tjacziča. Čhjeri lujlcan Jesusaqui impuesto cobriñinacžtan nižaza yekja ujchiz žoñinacžtan chica julzi želatča.

³⁰ Jalla nii cheržcu, fariseo žoñinaca nižaza judiuž lii tjaajiñi maestrunaca jalla ninacaqui Jesusiž tjaajinta žoñinacžquiz chuchi kallantichiča, tuž cjican:

—¿Kjažtiquiztan impuesto cobriñinacžtanami ujchiz žoñinacžtanami čhjeri lujl ančhucjo?

³¹ Nekztanaqui Jesusaqui nuž nonžcu kjaaziča ninacžquiz, tuž cjican:

—Wiw žoñinacaqui kullñi žoñi anaž pecasača. Antiz laa žoñinacaž pecchiya.

³² Wejrqui “zumal kamučha” cjiñi žoñinacžquiziqui anal kjawzñi tjonchinča. Antiz “ujchizpanča” cjiñi žoñinacžquiz kjawzñi tjonchinča, ninaca Yoozquin kuzziz cjisjapa.

AYUNAS PUNTU

³³ Jalla nekztanaqui žoñinacaqui Jesusižquiz chiichiča, tuž cjican:

—Juanž tjaajintanacami fariseož tjaajintanacami walja ayunasñiča. Y nižaza ninacž cuzturumpi jaru walja Yoozquin mayiziñiča. Pero amiž tjaajinta žoñinacazti ana ayunasñipanla. ¿Kjažtiquiztan nižtajo? Čhjeriž lujlžla, nižaza mazk'a kjaz licžla, nižtakazla. —Nuž cjican uj tjojtunz pecchiča nii žoñinacaqui.

³⁴ Nekztanaqui Jesusaqui ninacžquiz kjaaziča, tuž cjican:

—Zals pjijstiquiz žoñinacaž impittaž cjenacqui, ¿kjažt zalsñi žoñžtajapa ayunasasajo? Nii zalsñi žoñi želanpacha anaž ayunasasača.

³⁵ Tii jarquin nii zalsñi žoñiž kjañtaž cjen, jalla nekztanž ayunasasača.

³⁶ Tsjiu taku chiichizakazza, tuž cjican:

—Anaž jecmi tsjiu ew zquitquiztan riminta apakasača, tsjelanzi zquiti rimintisjapa. Jalla nuž paaquiz niiqui, nii ew zquiti pertisnaquičha. Nižaza nii ew riminta apjattaquui tsjel zquitquiztan tsjemata cjequičha.

³⁷ Nižaza anaž jecmi tsjiu zijzi zkiz luusquiz ew vino alznasača. Nižta alznasaž niiqui, zkiz luus wjajrskatasaca ew vinuquui. Nekztanaqui zkiz luusmi vinumi pizcpacha pertisnasača.

³⁸ Ew vinuquui ew zkiz luusquizpanž alznasača. Nekziquui zkiz luusmi vinumi zumapanž cjesača.

³⁹ Y nižaza t'amchi vinu licžcu, anaž ew vinu pecasača. “Wejtta t'amchi vinuquui walikazza”, cjican cjequičha. Nižtazakaz žoñinacaquui Yooziž tjaata ew kamaña ana pecasača.

6

TSJII JEEJZ TJUÑQUIZ WATTA

¹ Tsjiu jeejz tjuñ noojiqui Jesusaqui zkal taypiranž okatča niž tjaajinta žoñinacžtan. Jalla nuž ojkan niž tjaajinta žoñinacaquui tric oza kjajpchiča. Nuž kjajpžcu kjaržtan kojchiča. Nekztan lujlchiča.

² Nii cheržcu tsjiu kjažultan fariseo žoñinacžti ninacžquiz pewcziča, tuž cjican:

—¿Kjažtiquiztan ančhucquui nižta paajo? Jeejz tjuñquiziqui nižta anapanča paazquui. Učhum lii quintrala, ¿ana jaa?

³ Nekztanaqui Jesusaqui ninacžquiz kjaaziča, tuž cjican:

—Ančhucquui Yooz taku liichinčhucpanča, ¿ana jaa? Cjijrta Yooz takuquui tuž cjiča: učhum David cjita tuquita atchi ejpquui niž mazinacžtan čjeri eecskatchičha.

⁴ Čjeri eecznanacuui arajpach Yooz timpluquin luzziča. Nicju Yooz yujcquiz nonžta t'antanaca želatča. Jalla nii t'anta aptižcu, lujlchiča. Nižaza niž mazinacžquiz tojunchičha. Anapantaca permitta nii t'anta lujlsquui ina žoñžlaquui. Nižta lujlžcuquui, lii quintrala niiqui. Timplu jilirinacžtapankaz nii t'anta lulaj cjitaquui.

⁵ Nižaza Jesusaqui ninacžquiz cjichiča:

—Wejrquui tsewctan cuchanžquita Yooz Zoñtča. Jeejz tjuñquizimi čhjulu paaz cjenami mantasača. —Nuž cjichiča Jesusaqui.

KJARA KJOŃCHI ZOŃI ČHJETINTA

⁶ Niž wiruñ jeejz tjuñquiziqui Jesusaqui luzziča judionacž ajcz kjuyquiz. Jalla nii ajcz kjuyquin tjaajni kallantichičha. Nicju tsjiu žoñi želatča žew kjara kjoñchi.

⁷ Nižaza judiuž lii tjaajiñinacžtan, fariseonacžtan želatča. Nii žoñinacaquui Jesusaž awayt'atča, jeejz tjuñquiziqui čhjetnaquui anaž čhjetna, jaa, jalla nii. Jalla nuž awayt'atča, Jesusiž quintra nii jaru aptisjapa.

⁸ Pero Jesusaqui nižta ana wali pinsitanaca kuzquiz naychipanča. Jalla nekztanaquui kjara kjoñchi žoñžquiz paljaychiča, tuž cjican:

—Tsijsna. Tii taypiquin cjisna.

Nuž chiitiquiztanaquui nii žoñiquui nii taypiquin tsijsičha.

⁹ Nekztanaquui Jesusaqui parti žoñinacžquiz paljaychizakazza, tuž cjican:

—Wejrqui ančhucaquiz tsjii pewcsnasača. ¿Jeejz tjuñquiziqui učum li-iqui kjažt cjeejo? žoñžquiz zuma paasaya uz žoñžquiz ana zuma paasaja. Žoñž wira liwriyasaya uz žoñž wira ticskatasaja. Ančhucqui zumpacha zizza, zuma paazqui učum lii jaručha jeejz tjuñquizimi. —Jalla nuž cjican, chiižinchiča Jesusaqui.

¹⁰ Jalla nekztanaqui Jesusaqui niiz muytata žejlñi žoñinacž kjutñi chercherziča. Nekztan kjara kjoñchi žoñžquiz cjichiča:

—Am kjara chjinzna.

Nii žoñiqui nuž kjara chjinžcu niiz kjara žejtchi quirchiča.

¹¹ Quintra žoñinacazti nii cheržcu walja žawjchiča Jesusiž quintra. Jalla nekztanaqui ninacpora pewcsarassiča, jaknužt Jesusiž quintra paa-as, jalla nii.

TUNCAPAN APOSTOLONACA ILLZTA

¹² Niiž wiruñiqui Jesusaqui tsjii curullquin ojkchiča Yooz Ejpžquin mayizi. Ween pakara Yooz Ejpžquin mayizichiča.

¹³ Tjuñiž tjewctanalla, niiz tjaažinta žoñinaca kjawziča. Kjawžcu, Jesusaqui tuncapani illziča niiz mantita apostolonaca cjisjapa.

¹⁴ Nii illzta apostolonacaqui tuž cjita tjuunacchiztača: Simonatača; nižaza niiz tsjii tjuuqui Pedro cjitazakaztača. Andrestača, Simonž lajk Jacobotača. Juantača. Felipetača. Bartolometača.

¹⁵ Mateotača. Tomasatača. Jacobotača; niiqui Alfeo cjita žoñž majchtača. Simonatača, nižaza niiqui Canaan t'akquiztantača.

¹⁶ Judastača, Jacobž lajk; nižaza Judas Iscariotitača; jalla niiqui Jesusiž quintra tarazunchiča.

¹⁷ Jalla nekztanaqui Jesusaqui niiz illztanacžtan chjijwžquichiča curullquiztan. Pampiquin irantižcu, niiz tjaažinta žoñinacžtan tsijsiča. Nicju wacchi žoñinaca želatča, tjapa kjuttan Judea yokquiztan, nižaza Jerusalén wajtquiztan, nižaza Tiro yokquiztan, nižaza Sidón yokquiztan, jalla nii yokanacquiztan tjonchiča. Nii žoñinacaqui Jesusiž takunaca nonžni irantižquichiča. Yekjapanacaqui tjonchiča laanacquiztan čhjetinta cjisjapa.

¹⁸ Nižaza yekjapanacaqui tjonchiča zajranacaž tantiquiztan liwriita cjisjapa. Jalla nekztanaqui Jesusaqui ninaca čhjetinchiča.

¹⁹ Jesucristuqui čhjetinz azziztača. Nižaza Jesusaqui tjapa nii žejlñi laanaca čhjetinchiča niiz aztan. Tjappacha laa žoñinacaqui Jesusa lanz pecatča, čhjetinta cjisjapa.

JESUSIZ TJAAJINTANACA

²⁰ Nekztanaqui Jesusaqui niiz tjaažinta žoñinacž kjutñi cherziča. Nekztan paljaychiča, tuž cjican:

—Ančhucqui porinaca, Yooz mantita zuma kamañiqui ančhucaltajapača. Jalla nižtiquiztan cuntintuž cjee.

²¹ 'Chjeri eecsñinaca, wiruñ Yoozqui ančhucaquiz wali cjiskataquiča, tsjii čhjeržtan chjekchižtakaz. Jalla nižtiquiztan cuntintuž cjee.

'Llaquitanaca, anžic ančhuc kačan. Wiruñiqui ananiiž chipchipaquiča. Jalla nižtiquiztan cuntintuž cjee.

²²⁻²³ 'Ančhucqui, Yooz Majchquin sirwiñi žoñinacčhucča. Quintra žoñinacaqui ančhucaquiz chjaawjkatča. Nižaza jakurpayaquiča. Nižazaž ch'aanaquiča. Nižaza iñaraquiča. Ančhucaquiz ana zumapanž nayaquiča. Jalla nuž cjenami ancha cuntintuž cjee. Ančhuczti arajpachquin ojkžcu, wali kamañ wira tanznaquiča, tsjii chawc premiužtakaz. Nižtapan tuquitanpacha tii žoñinacž tuquita atchi ejpnacaqui

Yooz sirwiñi profetanacžquiz chjaawjkatñipantača. Jalla nižtiquiztan anziqiu cuntintuž cjee.

²⁴ 'Ančhucqui ricachunaca, cuntintukaz tii wirquiz kamchinčhucča. ¡Wiruñ anawalipanž ančhucacquiz wataquiča!

²⁵ 'Ančhucqui zuma cusasanacchiz kamchinaca, poriztakaz cjisnaquiča. Yoozquin ana cjuñziž cjen t'akjiriž cjisnaquiča. Ana walinacquiztan chipchinaca tsjii noojiqui ananiž kaaquiča nižaza llaquitaž cjequiča.

²⁶ 'Ančhucqui, Yooz taku chiitažoka cjiñi žoninacčhucča. Tjapa žoñinacaqui ančhucua honora waytaquiž niiqui ančhucacquiz juc'ant anawaliž cjequiča. Tuquitanpacha tii žoñinacž tuquita atchi ejpnacaqui nižtapan honora waytichiča toscara chiichiñinacžquiz.

QUINTRA ŽOÑINACŽTANAMI ZUMA KUZIZPANŽ CJEE

²⁷ 'Ančhucqui, wejt taku nonžñinaca, ančhucacquiz tuž cjiwča: Ančhucua quintra žoñinacžtanami zuma kuzizpanž cjee. Y nižaza zumapanž ninacžtan paa, nižaza ančhucua chjawjkatñinacžtanami zumapanž cjee.

²⁸ Nižaza ančhucua quintra laykiñi žoñinacžquiz zuma tawkžtan paljaya ančhucqui. Nižaza ančhucua iñariñi žoñinacžtajapa zuma tawkžtan Yoozquin mayt'ižina.

²⁹ Jakziltamiž am yujcquiz kichasaž niiqui, ana nižtapacha amqui kicha. Anača cutjatzqui. Nižaza jakziltamiž am ira kjañasaž niiqui, nii kjañaj cjee.

³⁰ Nižaza jakziltamiž amquiztan mayi tjonasača, nuž tjaa. Jakziltamiž amquiztan kjañasača, nuž kjañaj cjee. Anam amqui quijasacha.

³¹ Jaknužt ančhucqui parti žoñinaca ančhucatan zuma kamz pecchaj niiqui, jalla nižtapacha ančhucqui žoñinacžtan zuma kama.

³² 'Yekjapanacaqui ančhucatan zumaž munaziča. Ančhucqui ninacžtan alajapankaz zuma munazaquiž niiqui, ¿kjažtiquiztan ančhucqui "Zumal paa-uča" cjican chiyasajo? Nižta iratazakaz paača anawal kuziz žoñinacami.

³³ Yekjapanacaqui ančhucacquiz yanapča. Ančhucqui ninacžtan alajapankaz yanapaquiž niiqui, ¿kjažtiquiztan ančhucqui "Zumal paa-uča" cjican chiyasajo? Nižta iratazakaz paača anawal kuziz žoñinacami.

³⁴ Yekjapanacaqui ančhucacquiz onza. Ančhucqui ninacžtan alajapankaz onznaquiž niiqui, ¿kjažtiquiztan ančhucqui "Zumal onznuča" cjican chiyasajo? Nižta irata zakaz paača anawal kuziz žoñinacami. Nekztan tsjii onžñizakaz tjewza.

³⁵ Pero ančhucqui quintra žoñinacžtanami zuma munazizpanž waquiziča. Nižaza ančhucqui quintra žoñinacžquizimi yanapz panž waquiziča. Nižaza ančhucqui onžcumi anaž tjewz waquiziča "Niimiž onz, jaa" cjicanaqui. Jalla nuž kamtiquiztanaqui Yoozqui ančhucacquiz tsjii pajk honora tjaaquiča. Nižaza nuž kamtiquiztan ančhucqui tjeēža werar arajpach Yooz maatinacaž, nii. Nižaza nuž kamcanaqui Yooz irataž kamča. Yoozqui okžñizakazza quintra žoñinacžquiziui.

³⁶ Yooz Ejpqui walja okžñipanča. Nižta irata ančhucqui okžñi kuziz cjee.

ZUMA KAMAQUICHA

³⁷ 'Ančhucalaqui anača žoñinacž uj paatanaca chii chiizqui. Jalla nuž žoninacž uj paatanaca chii chiyauiž niiqui ančhucqui juc'ant ujchiz cjequiča Yooz yujcquiziui. Nižaza žoñinacžquizimi "Amqui Yooziž castictaj cjila", cjican chiyauiž niiqui ančhucqui Yooziž casticta zakaz cjequiča. Nižaza jakzilta žoñit ančhucua quintra uj paačhaja, jalla nižquiz pertunz waquiziča. Nekztan Yoozqui ančhucacquiz ujnaca zakaz pertunaquiča.

³⁸ Ančhucqui okzñi kuzziz žoñinacžquizimi tjaa. Jalla nuž tjaan Yoozqui ančhucaquiz juc'anti tjaaquiča. Jalla tuž Yoozqui tjaaquiča. Ančhuca quelzquiz chjippi tjaaquiča. Tsajtscu tsajtscu nižaza walja kala ts'aczu tjaaquiča. Jakziltat tuptalla tjaačhaja, jalla nižquiz nuž tuptalla zakaz Yoozqui tjaaquiča. Nižaza jakziltat čjuñi kuzziz tjaačhaja, jalla nižquiz nuž čjuñi zakaz Yoozqui tjaaquiča.

³⁹ Jesusaqui tsjii takunacžtan chiichiča, tuž cjican:

—¿Jaknužt zur žoñiqui yekja zur žoñi irpiñižtakaz zuma chjichasajo? Pucultanpachaž ojtquiz tjojtsnasača. Jalla nižtaž ana zuma cjicjiñi žoñinacaqui.

⁴⁰ Tsjiilla cjesača. Tsjii tjaajinta žoñiqui niž tjaajiñižquiztan anaž juc'anti cjesača, aunquimi istutiižcu tjaajiñi maestrupanikaz cjequiča. —Jalla nuž tjaajinchiča Jesusaqui.

UJ PUNTUQUIZTAN

Nižaza Jesusaqui tjaajinchiča, tuž cjican:

⁴¹ —Amqui am jilž čhujcquiz tsjii cjujchilla cherasaž niiqui, ¿kjažtiquiztan am persun čhujcquiz pajk cjujchi ana cherjo?

⁴² Am persun čhujcquiz nii pajk cjujchi ana cherasaž niiqui, ¿kjažtiquiztan am jilžquiz chiijo, “Jila, am čhujcquiztan nii cjujchilla apakžinača”, cji-canajo? Ana zum žoñiča amqui. Primeruqui am persun čhujcquiztan pajk cjujchi apakalla. Nekztan zuma cherasača. Y nižaza am jilž čhujcquiztan cjujchilla apakasača. —Jalla nuž tjaajinchiča Jesusaqui uj puntuquiztan.

ZOÑINACAQUI PAJTAZ CJESACHA NINACZ KAMTIQUIZTAN

⁴³ Nižaza žoñinacž kamañ puntuquiztan Jesusaqui tjaajinchiča tuž cjican: —Tsjii zum muntiquiztan ana zum frutanaca anawira pookasača. Nižaza tsjii ana zum muntiquiztan zum frutanaca anazakaz pookasača.

⁴⁴ Nižaza zapa muntinaca niž frutanacquiztan pajza. Jalla nižtiquiztan tsjii ch'ap muntiquiztan higo fruta anaž pooki atasacha. Nižaza tsjii ch'ap muntiquiztan uwas fruta anaž pooki atasacha.

⁴⁵ Tsjii zuma kuzziz žoñiqui zuma takunaca paljayñipanča. Tsjii ana zuma kuzziz žoñizti ana zuma takunaca paljayñipanča. Jaknužt kuzquiz pinsičhaja, jalla nuž chiiča žoñinacami.

⁴⁶ Jesusaqui cjichizakazza:

—Ančhucqui anaž weriž chiitacama kamča. Jaziqui, ¿kjažtiquiztan ančhucqui wejt tjuu aynakjo, wilta wiltajo, “Wejt Jiliri, wejt Jiliri”, cjicanajo?

⁴⁷ Yekjap žoñinacžti wejtquin tjonžcu wejt takunaca tjapa kuz nonža Nižaza weriž chiitacamaž kamča. Jalla tižtaž nii žoñiqui.

⁴⁸ Jalla nii žoñiqui kjuya kjuychiča. Primeraqui yoka jwetchiča, maz zalzjapa. Nii mazquin zalžcu, jalla nii maz juntuñ chjucziča nii kjuy simintu. Nekztan kjuya pirkichiča. Wiruñiqui tsjii puju kjaz chjippi ojkchiča, walja pjatsi. Nekztanaqui nii kjazqui ojkchiča, kjuya t'eznata. Pero anapan t'ezñi atchiča. Nii kjuyaqui maz juntuñ kjuytatača.

⁴⁹ Yekjap žoñinacžti wejt taku ana tjapa kuz nonža. Nižaza weriž chiitacama anaž kamča. Jalla tižtaž nii žoñiqui. Jalla nii žoñiqui kjuyazakaz kjuychiča, ana maz simintuchiz. Wiruñiqui nižazakaz tsjii puju pjatzi, kjazqui kjuya t'ezinsjapa ojkchiča. Nekztanaqui nii kjuyaqui ezziča. K'ala kuztača. Jalla nižtaž nii ana weriž chiitacama kamñi žoñiqui.

7

TSJII CHJETINTAQUI

¹ Jesusaqui nuž paljayz žeržcuqui, Capernaum cjita watja ojkchiča.

² Nicju tsjii romano zultat jiliri želatča. Niiž ancha zuma piyunaqui ancha laatača, ticzmayatača.

³ Nii zultat jiliri qui Jesusiž quintu zizcu, tsjii kjažultan judionacž jilirinaca cuchanžquichiča, Jesusižquiz rocžcajo niiž piyuna čhjetnajo.

⁴ Jalla nekztanaqui mantita žoñinacaqui Jesusižquiz macjatchiča. Nekztanac ancha roct'ichiča, tuž cjican:

–Tii zultat jiliri qui ancha zumača. Jalla nižtiquiztan yanapchucapanča.

⁵ Učhum watja walja rispitiča. Nižaza tsjii učhumž ajcz kjuya kjuykatchiča niiqui.

⁶⁻⁷ Nekztanaqui Jesusaqui nii rocñinacžtan ojkchiča. Kjuya žcati cjisnan, nii zultat jiliri qui tsjii niiž mazinaca cuchanžquichiča, Jesusižquiz chii, tuž cjican:

–Wejt jiliri, am yujcquizic anal waquizuča, am wejt kjuyquiz luzajo. Wejrqui persunpacha eksinča am kjuri ojkzjapa. Am ojkzqui ch'amaž cjesača. Tekztanpacha tsjii taku chiyalla. Nuž amiž chiitiquiztanac žetaquiča wejt piyunaqui.

⁸ Wejrmi wejt jiliriž mantitacama ojklayińča. Nižaza wejt zultatunacaqui weriž mantitacama ojklayińča. Jazi qui tsjiimil mantuča, “Oka” cjican. Nekztan ojkča. Nižaza tsjiimil kjawznuča. Nekztanac tjonča. Nižaza tsjiimil mantuča, “Tižta paa” cjican. Niimi zakaz paača. Nižtazakaz amqui mantasača, wejt piyuna žetajo.

⁹ Jalla nižta taku nonžcu, Jesusaqui, chiichiča:

–Cusapachaž chiiča nii žoñiqui, –cjican.

Nekztanaqui apsni žoñinacž kjutni chersiča. Cheržcu tuž cjichiča:

–Chekapan tii žoñiqui juc'ant Yoozquin kuzzizza tjapa Israel wajtchiz žoñinacžquiztanami.

¹⁰ Nii jiliriž cuchanta žoñinacaqui jilirž kjuya irantižcu chekapan laa piyuna žejtchi zalchiča.

TSJII ZOŃI JACATATCHI

¹¹ Wiruńaqui Jesusaqui tsjii Naín cjita watja ojkchiča, niiž tjaaajinta žoñinacžtan nižaza tama žoñinacžtan.

¹² Wajt žcati irantižcu, tsjii alma callni cherchiča. Jalla nii ticzi qui zinta maatitača. Niiž maaqui žewtača. Walja nii wajtchiz žoñinacaqui cumpańtatča.

¹³ Cheržcu, Jesucristu Jiliri qui naa maatak žonaquiz okziča, tuž cjican:

–Ana kaa amqui.

¹⁴ Nekztanaqui Jesusaqui žcatžinchiča. Almiž cajuna lanziča. Alma callninaqui nužquiz tsijtsiča. Nekztanaqui Jesusaqui ticzi žoñžquiz cjichiča:

–Jilala, amquiz cjiwča, “Zaažna”.

¹⁵ Jalla nii chiitiquiztanaqui nii ticzi žoñiqui žaaziča. Nekztanac chii kallantichiča. Nekztanaqui Jesusaqui niiž maaquiz intirjichiča.

¹⁶ Jalla nuž cheržcu, tjappacha tsucchiča. Nižaza tjappacha Yoozquin honora waytichiča, tuž cjican:

–Učhum wajtquizpacha tsjii chawc Yooziž cuchanžquita žoñiqui jecsila, oré. Yoozqui niiž wajtchiz žoñinaca yanapi tjonchiča.

¹⁷ Jalla nekztanaqui tjapa Judea yokaran nižaza nii yok tjiyaran Jesusiž zuma paata quintu ojkchiča.

JUAN BAUTISTAQUI JESUCRISTUZ PUNTU ZIZ PECCHICHA

18 Juan Bautistaž tjaajinta žoñinacaqui nii žoñi jacatatchi quintu quint'ichiča Juanžquiz. Jalla nižtiquiztan Juanqui Jesusiž quintu zizzizakazza. Nekztanaqui pucultan niž tjaajintanaca kjawziča.

19 Nekztan Jesusižquin cuchanžquichiča, nižquin pewcznajo, tuž cjican: —Cristuqui tjonitaž cjila. ¿Amqui Yoozquiztan cuchanžquita Cristumpankaya; uz yekjaž tjonasaj?

20 Juanž cuchanta žoñinacaqui Jesusižquin žcatžinchiča. Jalla nekztanaqui irantižcu, cjichiča:

—Juan Bautistaqui wejrnacž cuchanžquiča amquiz pewcznajo: “Cristuqui tjonitaž cjila. ¿Amqui nii Cristumkaya, uj yekjaž tjonasaj?”

21 Nii orapacha nuž irantitiquiztan Jesusaqui walja žejlñi laanaca čhjetinchiča. Nižaza zajraž tanta žoñinaca čhjetinchiča. Nižaza zur žoñinacž čhjujqui čhjetinchiča.

22 Jalla nekztanaqui Jesusaqui ninacžquiz kjaaziča, tuž cjican:

—Juanžquin quepa. Amiž chertanaca nonžtanaca quint'ižca. Weriž paatanaca mazca. Zur žoñinaca chertzñi cjissila. Nižaza coj žoñinaca zuma kjojchchiz ojklajñi cjissila. Nižaza mojkchi janchichiz žoñinacami zuma janchichiz žejtčhi cjissila. Nižaza oñ žoñinacami nonžñi cjissila. Nižaza ticzi žoñinaca jacatatchi cjissila. Nižaza pori žoñinacžquiz Yooz liwriiñi taku paljaytapanča.

23 Jakziltat weriž paatanaca, chiitanaca nonžcu ana kuz turwayzižlaj niiqui, walipanikaz cjequiča.

JUAN BAUTISTAŽ PUNTU

24 Juanž cuchanžquita žoñinacž ojktan, Jesusaqui Juanž puntuquiztan chiichiča. Tjapa žoñinacžquiz tuž cjichiča:

—¿Čhju lu ch'ekti yokquin chertzñi ojkcchinčhuctaya? ¿Tsjii tjamiž tjizinta kalu chertzñi ojkcchinčhuctaya? Anapanž jaz.

25 ¿Tsjii finu zquitichiz žoñi chertzñi ojkcchinčhuctaya? Anapanž, jaz. Finu zquitichiz žoñinaca chawc jilirž kjuyquiz žejlča. Nižaza wali jiru kamñi cusasanacchiz žoñinaca chawc jilirž kjuyquiz žejlča.

26 Nekztanac, ¿čhju lu chertzñi ojkcchinčhuctajo? Yooz taku paljayñi profeta chertzñi ojkcchinčhucča. Nužupancha. Juanqui Yooz yujcquiz juc'antiča parti Yooz taku paljayñi profetanacžquiztanaqui.

27 Juanž puntuquiztan Yooz tawk libruquiz cijirtača tuž cjican: “Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristo zuma tjewskataquiča”.

28 Juan Bautistača parti žoñž maatiquiztan tsjan juc'antiqui. Pero tjapa Yoozquin kuzziz žoñimi Yooz maati cjequiča. Čhju lu Yooz maatimi žoñž maatiquiztan tsjaa juc'antiča. —Jalla nuž cjichiča Jesucristuqui.

29 Jalla nuž nonžcuqui tjapa Juanž bautistaž žoñinacami cjichiča:

—Zumapanča Yooz Ejpqui, —cjicanaqui. Nužuzakaz cjichiča impuesto cobriñi žoñinacami, Juanž bautista cjicanaqui.

30 Pero fariseo žoñinacazti judiož lii tjaajiñinacžtanpacha Yoozquin kuzziz puntuquiztan chiižinta ana juyzu paachiča. Nižaza Yooziž cuchanžquita Juan Bautista ana rispitchicha. Nižtiquiztanaqui ana Juanž bautistatača.

31 Jesucristo Jiliriqui cjichiča:

—¿Kjažtat tii timpuquiz žejlñi žoñinacajo? ¿Jectnaca iratatajo tinacajo?

32 Ocjala irataž tiinaca, ¿ana jaa? Ocjalanacaqui palazquin uzincan niž mazinacžquiz altu tawkžtan kjaw kjawča, tuž cjican: “Wejrnacž pincallu pjujan, ana tsajtchinčhucča ančhucqui. Wejrnacž llaquita itsan, ana kaachinčhucča”. Jalla nižta ocjala iratača tii timpuquiz žejlñi žoñinacaqui.

³³ ¿Kjažtiquiztan nižta iratajo? Juan Bautistaqui tjonchiča. T'anta ana lujlñitača. Vinumi ana licñitača. Jalla nižtiquiztan ančhucqui chiich-inčhucča: “Zajriž tantača niiqui”, cjan.

³⁴ Wiruñaquí wejrqui tjonchinča. Chjulumi lujlchinča. Nižaza čhjulumí licchinča. Jalla nižtiquiztan ančhucqui wejt quintra chutča: “Walja lujlñiča licñiča tiiqui. Jalla tiipanča ujchiz žoñinacž maziqúya, nižaza impuesto cobriñinacami”. Nuž chiyiñčhucča.

³⁵ Tuž zakal cjiwča: Yooz puntu zuma zizni žoñinacaqui Yooz tjaajinta puntu tjeeža.

JESUSAQUI TSJII FARISEO ŽOŃŽ KJUYQUIN LUJLCHICHA

³⁶ Wiruñaquí tsjii fariseo žoñiqui Jesusa luli kjawziča. Nekztanaqui niž kjuya ojkchiča Jesusaqui. Niž kjuya irantižcu misquiz julziča lujljapa.

³⁷ Nii wajtquizpacha tsjaa ancha ujchiz maatak žonqui želatča. Jesusa luli ojkchi quintu zizcu, fariseo žoñž kjuya irantižquichiñča alabastro cjita maz putillžtan. Nii putillaqui zuma uluraz aceiti chjippitača.

³⁸ Nižaza naaqui ancha kaacan Jesusiž kjojch latuquiz julzinča. Jalla nekztanaqui naaža čhujc kaj čhjojcan Jesusiž kjojcha awjzni kallantichinča. Nekztan naaža persun charžtan Jesusiž kjojcha chjuzinčinča, zuma kjoñipacha. Nekztan Jesusiž kjojcha chjulsinča. Nekztanaqui Jesusiž kjojchquiz nii zuma uluraz aceitižtan tjalzinčinča.

³⁹ Jalla nuž cheržcuqui, fariseo impitni žoñiqui persun kuzquiz pinsichiča, tuž cjan: “Tii žoñiqui ultim werar Yooz taku paljayni žoñizlaj niiqui, tiiqui zizkalal, taa maatak žoñ ancha uj payiñča, jalla nii. Taa žoñzti tiž kjojcha zakal lanlanžla”.

¿JAKZILTAT JUC'ANTI YOOZQUIN K'AACHIŃI CJESAYA?

⁴⁰ Jalla nekztanaqui Jesusaqui fariseo žoñžquiz cjichiča:

–Simona, amquiz tsjii taku chiyasača.

Nekztan nii Simón cjita fariseuqui kjaaziča, tuž cjan:

–Tjaajiñi, wejtquiz chiyalla.

⁴¹ Jalla nekztanaqui Jesusaqui cjichiča:

–Tsji pucultan žoñiqui denario cjita paaz kajatača. Tsji žoñiqui 500 denario cjita paaz kajatača. Tsjižuzni 50 denario kajatača.

⁴² Jalla nekztanaqui nii pucultanaqui ana wira pjojki atchiča. Nižtami ana wira pjojki atchiž cjen nii kajni žoñiqui nii pucultan žoñinacžquiz cjichiča: “Ančucaž kajžta paazqui anal cobrača. Jaziqui nužquizpanikal pertunača”.

Nekztanaqui Jesusaqui fariseo žoñžquiz pewcziča, tuž cjan:

–Jaziqui kjaaznalla amqui. ¿Jakziltat nii pucultan žoñžquiztan nii ana cobriñi žoñžquiz juc'anti k'aachiñi cjesaya?

⁴³ Jalla nekztanaqui Simón cjita fariseuqui kjaaziča, tuž cjan:

–Nii pajk kaja ana cobrita žoñiqui juc'ant k'aachiñi cječhani.

Nekztanaqui Jesusaqui cjichiča:

–Razunam chiiča.

⁴⁴ Nekztanaqui naa maatak žona kjutni cheržcu Jesusaqui Simonžquiz cjichiča:

–Wejrqui am kjuya luzquichinča. Amqui anam kjaz onanchamča, tii wejt kjojcha awjzjapa. ¿Taa maatak žon cherkay? Taa maatak žonzti persun čhujc kajližtan wejt kjojcha awjzinča. Nekztanaqui persun charžtan chjuzinča.

⁴⁵ Amqui wejtquiz anam chjulzamča. Naazti nuž luzcu wejt kjojchami chjul chjulzinčinča.

⁴⁶ Amqui wejt achquiz ana aceitimi alžinchamča. Naazti wejt kjojchquiz-imi zuma uluraz aceite alzinča.

⁴⁷ Jalla nižtiquiztan amquiz chiižinuča tužu. Walja naaža ujnaca pertuntiquiztan taa maatak žonqui juc'anti wejr k'ayachtičha. Jakziltat ujlliquiztan pertunta cječhaja, jalla niiqui anaž juc'anti k'ayachtičha.

⁴⁸ Jalla nekztanaqui Jesusaqui naa maatak žonaquiz cjichiča:

—Am ujnacaqui pertuntača.

⁴⁹ Nekztan parti impitta žoñinacaqui nii nonžcu ninacpora parla kallantas-
siča, tuž cjican:

—¿Ject tii žoñejo? Wali ujnacamiž pertunla. Ujquiztan žoñinacamiž per-
tunča.

⁵⁰ Jesusaqui naa maatak žonaquiz cjichiča:

—Amiž criitiquiztan jaziqui amqui liwriitača. Jaziqui cuntintum
okaquiča.

8

MAATAKANACAQUI JESUSIZQUIZ YANAPCHICHA

¹ Wiruñaquei Jesusaqui wacchi watjanacaran jochinacaran ojklaychiča. Jalla nuž ojklaycan Yooz mantita zuma kamaña, jalla nii puntu paljaychiča. Niiž tuncapan illzta apostolonaca niižtan chicapachatača.

² Nižaza tsjii kjažultan niiž čhjetinta maatakanaca cumpañtichiča, ni-
nacžtan chica. Niiž tuquiqui nii maatakanacaqui zajraž tantatača, y nižaza
conanacchiztača. Jalla nii maatakquiztan tsjaaqui María Magdalena cjiti-
tača. Jalla naaquiztan pakallak zajranaca ulanchitača.

³ Nižaza tsjaa žon želatča, Juana cjiti, Chuza cjita žoñž tjuntača. Naaža
lucuqui Herodes cjita jiliri yanapñi secretariotača. Nižaza tsjaa Susana
cjiti žon želatča. Nižaza tsjii kjažultan iya maatakanacaqui apsñitača. Nii
maatakanacaqui persun cusastan atintiñitača Jesusižquiz.

CHJACZ QUINTU

⁴ Walja žoñinacaqui watjanacquiztan Jesusa cheri ulanžquichiča. Walja
žoñinacaž nuž juntazziž cjen, Jesusaqui tsjii quintu quint'ichiča, tuž cjican:

⁵ —Tsji zkala čhjacñi žoñiqui zkal čhjaqui ojkiča. Nekztan zkal semilla
wichcan wichcan čhjacchiča. Chjaccan, parti semillanacazti jiczaran tjojt-
siča. Nii tjojtsi semillaqui tjecantatača, y nižaza wežlanacaž lujltatača.

⁶ Tsji parti zkal semillanacazti maz yokaran tjojtsiča. Nii tjojtsi semil-
lanacaqui jeczcanpacha nužquiz kjoñchiča. Anaž umit yoka želatča.

⁷ Parti zkal semillanacazti ch'ap yokaran tjojtsiča. Nužuntu pakan
ch'apinacakazza atipchiqui.

⁸ Parti zkal semillanacazti zum yokquiz tjojtsiča. Nekztan pajkchiča.
Nuž pajkžcu, zuma čhjeri pookchiča, patac čhjerchiz zapa chjojlluquiz. —
Nuž quint'izcu Jesusaqui altu tawkžtan cjichiča:

—Jecčhalaj cjuñchiz niiqui, ž-nonžna.

⁹ Jalla nekztanaqui niiž tjaajinta žoñinacaqui Jesusižquiz pewcziča:

—¿Jaknužt chii tii am takojo? —cjican pewcziča.

¹⁰ Jalla nekztanaqui Jesusaqui kjaaziča tuž cjican:

—Ančucaquiz Yoozpachaž tjaajnaquiča ančuca kuzquiz, niiž man-
tita kamañ puntuquiztan, nii. Yekjap žoñinacžquizzti quintunacžtankaz
chiyučha Yooz mantita kamaña puntuquiztan. Jalla nužquiz weriž chiita
quintu nonžcuqui parti žoñinacaqui ana wira intintiñiž cjissa. Weriž chii-
tiquiztanaqui ana wira tantiiñiž cjissa.

¹¹ Nekztanaqui Jesusaqui niiž tjaajinta žoñinacžquiz cjichiča:

—Jalla tižta puntunacquiztanž chiiča wejt zkala čhjacz quintuqui. Yooz takučha nii zkal semillanacaqui.

¹² Nii jiczaran žejlñi žoñinacaqui Yooz taku nonziča. Yooz taku nonžtanaqui, diablu cjita zajraqui tjonza, ninacz kuz turwayžinzjapa. Jalla nuž paača diabluqui, nonžni žoñinacz Yooz taku ana criyajo, y nižaza ninacz ana liwriita cjeyajo.

¹³ Nižaza nii maz yokaran žejlñi žoñinacaqui Yooz taku nonziča. Yooz taku nonžcupacha cuntintuž catokča. Pero Yoozquin tjapa kuzzizpan ana nonža. Tsjii pacamakaz catokča. Chjul pruebaž tjonanami ratullaž quejpsa.

¹⁴ Nižaza nii ch'ap yokaran žejlñi žoñinacaqui Yooz taku nonziča. Yooz taku nonžcu anaž tjapa kuztan catokča. Cusasanacapankaz cherza; nižaza wali jiru kamspanž pecča; nižaza pijstanacapankaz pecča. Jalla nižtiquiztan čjul ana walinaca tjontan, ninacz kuznaca turwayskatča. Persun kuzquiz pectiquiztanaqui Yooz taku tjatža. Jalla nižtiquiztan ana zuma kamasacha. Ana pookñi zkalažtakaz kamča.

¹⁵ Nii zum yokquiz žejlñi žoñinacaqui Yooz taku nonziča. Tjapa kuztan Yooz taku nonža. Tjapa kuztanž catokča. Nižaza Yooz takucama zuma kamča Yoozquin tjurt'iñi kuzziz. Jalla nižtiquiztan zuma pookñi zkalažtakaz kamča, zumapankaz kamča.

MICHA TJEEZ QUINTU

¹⁶ Jesusaqui tjaajinchiča tuž cjican:

—Anaž jecmi micha tjeznasacha cajun kjuyltan nonzjapa, už tjajz zquit koztan nonzjapa. Micha tjeez nonz juntuñpanž nekzipan tewznasacha kjuyquiz luzñi žoñinaczquin kjanajo.

¹⁷ Čjulu čhjojžtami wažtapanikaz cjequiča. Nižaza ana Yooz puntu ziztanacami kjanapacha ziztapanikaz cjequiča.

¹⁸ Weriž chiita taku zuma nonžnalla ančhucqui. Jakziltažlaj catokñi kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokñi kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča, “intintučha wejrqui” chiičiz cjenami. —Jalla nuž tjaajinchiča Jesusaqui.

JESUCRISTUZ FAMILIA PUNTU

¹⁹ Wiruñaquei Jesusiž maatan niž lajknacžtan irantižquichiča, jakziquin Jesusac želatčhaja, jalla nicju. Pero nižquin ana macjati atchiča. Kjuyquiz walja žoñinaca želatča.

²⁰ Jalla nekztanaqui tsjii žoñiqui Jesusižquiz mazziča, tuž cjican:

—Am maami am jilanacami kjuj zancu žejlča. Am cherz pecča.

²¹ Jesusaqui nekztan kjaaziča, tuž cjican:

—Yooz taku nonžni žoñinacaqui y nižaza Yooz takucama kamñi žoñinacaqui, ninacapanča wejt familia cuntaqui, wejt maa cuntaqui, y nižaza wejt jilanaca cuntaqui.

JESUSACHA TJAMIMI KJAZ LJOJKIMI MANTIÑIQUI

²² Tsjii nooj Jesusaqui niž tjaajinta žoñinacžtan luzziča tsjii warcuquiz. Nekztanaqui tuž cjichiča:

—Tii kotž nawjktuñtanž ojklaj.

²³ Jalla nuž ojkan Jesusaqui tjajchiča. Nekztanaqui tiripintit wali pjur-santi tjami zalchiča. Jalla nii tjamiž cjen warcuqui kjaz ljojkižtan julzmayaž cjisnatča, kjaz chjijpi.

²⁴ Nekztanaqui Jesusiž tjaajinta žoñinacaqui Jesusa žinchiča, tuž cjican:

—Tjaajiñi Maestro, Tjaajiñi Maestro, kotquiz julzmayaž cjis učumqui. Ticznačan učumni. —Jalla nuž chiitiquiztanaqui Jesusaqui žaaziča. Nekztanaqui tjamžquiz nižaza kjaz ljojkiimi mantichiča apaltajo. Jalla nuž mantitiquiztanaqui tjamimi kjaz ljojkiimi apaltichiča. Ch'ujupan cjissiča. Nužquiz walikaztača.

²⁵ Jalla nekztanaqui Jesusaqui niž tjaajinta žoñinacžquiz chiižinchiča, tuž cjican:

—¿Ana wejtquin kuzziz cjissinčuckaya? —Nuž pewcztiquiztan, nii tjaajinta žoñinacazti tsucchi ispantichi cjissiča. Nižtiquiztan ninacpora parlasiča, tuž cjican:

—¿Ject tii žoñejo? Tjamimi kjazmi tiiž mantitacamaž ojkča, tiiž chiita takukaz cazza.

TSJII ZAJRAŽ TANTA ZOŃI CHJETINTA

²⁶ Nižtami Gadara cjita yokquin irantichiča, kotž nawjktuñtan, Galilea cjita yokž nawjktuñtan.

²⁷ Jesusa yokquiz chjijwžtan tsjii nii wajtchiz žoñiqui macjatžquichiča. Ažk watanaca zajraž tantapantakalča nii žoñiqui. Zajraž tantiquiztan ana zquti cutñitakalča. Nižaza ana kjuyquizimi kamñitakalča. Campu santuran kamñitakalča.

²⁸⁻²⁹ Jesusa cheržcu, niž yujcquiz tuzi t'okziča yokquizpacha; kjawcan puč'ichiča. Nekztanaqui Jesusaqui žoñi tanñi žajra mantichiča žoñžquiztan ulnajo. Nii chiitiquiztan zajraqi kjawchiča, tuž cjican:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'uča, anaž wejr tjatnalla, anaž wejr sufriskatalla.

Tuquiqui wilta wilta zajraqi nii žoñi tanñitakalča. Nižaza nii wajtchiz žoñinacaqui zajraž tanta žoñi čejlñitakalča, y nižaza carinžtan mokñitakalča. Jalla nuž maktiquiztanami čejltiquiztanami carina kojžcu atipasñipankaztakalča. Jalla nekztan zajraqi nii žoñi ch'ekti yokaran zajt zajtskatchiča.

³⁰ Nekztanaqui Jesusaqui nii pewcziča, tuž cjican:

—¿Čhjul tjuuchizzamta?

Nii zajraqi kjaaziča:

—Tama cjitaž wejrqui, —cjican.

Tama zajranacaqui nii žoñžquiz lusñitakalča.

³¹⁻³² Zcati cururan wacchi cuchinacaqui lujlcan žejlñitakalča. Jalla nižtiquiztan zajranacaqui Jesusižquiz rocchiča, tuž cjican:

—Anaž wejr nac casticta cjeyajo mantalla. Nii cuchinacžquin luzkatalla. — Jalla nuž mantiskatz pecchiča zajranacaqui. Nekztanaqui Jesusaqui nuž mantichiča.

³³ Jalla nekztanaqui nuž mantitiquiztan zajranacaqui žoñžquiztan ulanžcu cuchinacžquin luzi ojkchiča. Cuchinacžquin luzcuqui cuchinaca tjiiranchiča tsjii k'aw kjutñi. Nekztanaqui nii cuchinacaqui kossucpacha tjojtsiča nii barranc k'awquiz. Nižaza kotquin tjojtsiča. Jalla nužquiz tjapa ticziča.

³⁴ Cuchi itzñinacaqui nii cheržcu walja tsucchi zajtchiča. Watjaran jochiran quintu quint'ican ojklajchiča.

³⁵ Nii quintu nonžcu walja žoñinacaqui ojkchiča nii paatanaca cheri. Jesusižquin irantižcu, nii zajraž tanta žoñi žejtchi cherchiča. Nii žoñiqui julzi želatča Jesusiž kojch latuquiz, zquti kujtchi. Nižaza zuma tawkchiztača, ana lucuratžtakaztača. Jalla nuž cheržcu, nii cheri tjonchi žoñinacaqui nužquiz ispantichiča.

³⁶ Nii zoñi čhjetiñi cherchi zoñinacaqui quint'ichiča parti zoñinaczquiz, jaknužt Jesusaqui zoñi čhjetinčhaja, jalla nii.

³⁷ Nii quintu nonžcu, tjapa Gadara cjita yokquiz žejlñi zoñinacaqui Jesusižquiz roqui kallantichiča nawjk okajo. Nii zoñinacaqui cuchinacaž pertis-siž cjen waljaž eksnatča. Jalla nižtiquiztanaqui Jesusaqui tsjii warcuquiz luzziča, ojkzjapa.

³⁸ Nii zajriquiztan čhjetinta zoñiqui Jesusižquiz rocchiča, tuž cjican:

—Amtan chical ojkkatalla.

Pero Jesusaqui kjaaziča, tuž cjican:

—Tekz am žela.

³⁹ Am kjuya oka. Zoñinaczquizim amqui quint'aquiča jaknužt Yoozqui am čhjetintčhaja, jalla nii.

Nekztanaqui nii zoñiqui ojkchiča. Jalla nuž ojkžcu tjapa kjutñi watjaran quint'ichiča, jaknužt Jesusaqui nii čhjetintčhaja, jalla nii.

JESUCRISTUCHA LAA ZOÑI ČHJETINŃI

⁴⁰ Jalla nekztanaqui Jesusaž kotž nawjktuñtan quejpžquitan, žejlñi zoñinacaqui tjapa kuz risiwchiča. Tjappacha Jesusiž tjonz tjewsitača. Nekztanaqui niž tjontiquiztan cuntintutača.

⁴¹ Jalla nekztan tsjii Jairo cjita zoñiqui irantižquichiča; ajcz kjuy jiliri-tača. Nii zoñiqui Jesusiž yujcquiz puct'ichiča. Nekztanaqui rocchiča niž kjuya okajo.

⁴² Nii oraqi nii zoñž zinta majtqui ticzmayatača. Tuncapan watchiz-tača naa majtqui. Nekztan Jesusaqui jilirž kjuya ojkchiča. Jesusaž okan, walja zoñinacaqui ts'acjascan apziča.

⁴³ Jalla ninacztan juntu tsjaa laa maatak žonqui okatča. Tuncapan wata inturu ljok ojkñi laa t'akjisichintakalča. Nižaza medicunaczquiz kullkat-jawi ancha castassinča, ana čhjulchiz cjissintača. Nuž kullkatžcumu ana wira žetatča.

⁴⁴ Nekztanaqui naa laa žonqui Jesusiž wir kjuttan macjatchinča. Niž zquit tjiiquiz lanzinča. Nii orapacha nuž lanžcuqui žejtchinča. Nižaza ljok ojkñimi tsijtsiča.

⁴⁵ Jalla nekztanaqui Jesusaqui pewcziča, tuž cjican:

—¿Ject wejr lanzejo?

Tjappacha ninacaqui ana zizñi chiichiča, nuž pewcžtiquiztan. Jalla nuž cjen Pedruqui niž mazinacztan cjichiča:

—Tjaajiñi Maestro, tii zoñinaca ancha amquiz ts'acjassa, nižaza tjapa kjuttanž am tewjctewjcča. Jaziqui ¿kjažtiquiztan am nuž pewcžjo, “¿Ject wejr lanzejo?” cjicanajo?

⁴⁶ Nekztanac Jesusaqui cjichiča:

—Tsjii tsjiiqui wejr lanziča. Wejr persun kuzquiz naychinča wejt aziqui tsjii čhjetinchiča, jalla nii.

⁴⁷ Naa maatak žonqui waj nuž Jesusiž kuzquiz pajta ziztiquiztan, cjarcatcan macjatchinča. Nekztan Jesusiž kjojchquiz quillzinča. Tjapa zoñinaca želan naaqui mazzinča, nii orac lanzintaž naaqui, jalla nii. Nižaza nii lanžcu nii orapacha žejtchi quirchinča naaqui. Jalla nuž cjican mazzinča Jesusižquiz.

⁴⁸ Jalla nekztanaqui Jesusaqui cjichiča:

—Cullacalla, tjapa kuztan criichiž cjen čhjetinta cjissamča. Jaziqui cuntintum am okaquiča.

⁴⁹ Jesusaž ima naatan parla žeržnan, tsjii žoñiqui tjonchiča Jairo cjita žoñž kjuyquiztan. Nii Jairuqui ajcz kjuy jiliritača. Tjonchi žoñiqui Jairužquiz cjichiča:

—Am majtqui ticzinpanča. Anam iya tii Maestružquiz molistis waquiziča.

⁵⁰ Jalla nii takunaca nonžcuqui, Jesusaqui Jairužquiz cjichiča:

—Ana am nic kuz turwayskata. Yoozquin tjapa kuzziz cjee. Nekztan am uzqui žetaquiča.

⁵¹ Jairuž kjuya irantižcu, Jesusaqui anaž jecmi kjuyquiz luzkatchiča. Jesusižtan Pedružtan, Jacobžtan, Juanžtan, naa uza maa ejpžtan jalla ninacakaz luzkatchiča.

⁵² Nii kjuyquiz žejlñi žoñinacaqui tjappachaž kaatkalča. Nižaza naa uzaž ticziž cjen walja llaquitatakalča. Pero Jesusaqui ninacžquiz cjichiča:

—Anaž kaa. Taa uzqui anača ticzin, antiz taa uzqui tjajča.

⁵³ Nuž Jesusiž chiitiquiztan nii žejlñi žoñinacaqui tjassiča nii nonžcu. Ticzinpanča nuž zizziča parti žoñinacaqui.

⁵⁴ Jalla nekztanaqui Jesusaqui naa uza kjara tanzinchiča, y nižaza altu tawkžtan chiichiča, tuž cjican:

—Kolta cullacalla, žaazna.

⁵⁵ Nii orapacha wilta žejtchin cjissinča. Nižaza nii orapacha tsijsinča. Nekztan Jesusaqui mantichiča naa uzaquiz čhjeri tjaaznajo.

⁵⁶ Naaža maa ejpqui nuž jacatatchiž cjen ancha ispantichiča. Nekztanaqui Jesusaqui ninacžquiz paljaychiča:

—Anaž jeczquizimi chiichiyaquiča tii čhjetinta quintu, —nuž cjichiča Jesusaqui.

9

APOSTOLUNACA CUCHANTA

¹ Jalla nekztanaqui Jesusaqui niž tuncapan illzta apostolonaca kjawziča. Nekztan ninacžquiz mantiz azi tjaachiča, tjapaman zajranaca chjatkatzjapa, nižaza tjapaman laanaca čhjetinzjapa.

² Nižaza Jesusaqui ninacžquiz mantichiča Yooz zuma kamañ puntuquiztan paljayajo, y nižaza laa žoñinaca čhjetnajo.

³ Nižaza cjichiča:

—Ančhucqui anaž čhjulumi chjichaquiča, jiczquin ojkan. Anaza ajtsmi, anaza žak quelsmi, anaza čhjerimi anaza paazmi. Nižaza zinta zquitikaz chjichaquiča.

⁴ Jakzi kjuyquinami irantižcuqui nii kjuyquin alujasaquiča. Jalla nicjuž kamaquiča, nii yokquiztan ojkcama.

⁵ Yekjap wajtchiz žoñinacaqui ančhuc anaž risiwz pecaquiž niiqui, nii wajtquiztanž ulnaquiča. Nižaza ančuca kjojchquiz zcatchi pulpunaca tsajt tsajtsnaquiča. Jalla nii tsajt tsajtstaqui siñalaž cjequiča ninacž quintra, ančhuc ana risiwchiž cjen.

⁶ Jalla nekztanaqui Jesusiž nuž taku tjaatiquiztan apostolonacaqui niž mantitacama ojkičiča. Tjapa jochinacž kjutñi ojkičiča, liwriiñi Yooz taku paljaycan, y nižaza laanaca čhjetincan.

JUAN BAUTISTAZ PUNTU

⁷ Tsjii chawc jiliriqui Herodes cjita želatča. Jesusiž quintu zizcu, ana čhjulumi naazipanča nii oraqui. Inakaz želatča. Jesusiž quintu nonžcu yekjapanacazti cjichiča:

—Juanqui ticziquiztan jacatatchižlani.

⁸ Yekjapanacazti chiichiča tuž cjican:

–Tiila Eliasqui; jeczquichila.

Elías cjitaqui tuquita Yooz taku paljayñi profetatača. Yekjapanacazti Jesusiž puntu chiichiča, tuž cjican:

–Tiila tsjii tuquita Yooz taku paljayñi profetaqui, jacatatchila.

Jalla nuž cjenami Herodes cjita jiliriqúi inakaz cjissiča.

⁹ Nii Herodesqui tuž cjichiča:

–Wejrpanča mantichintqui, Juanž acha muržcajo. Anziqúi wacchi milajru paata quintunaca nonznuča. ¿Jectpan nii milajrunaca paañejo? ¿Juanpan cjesajo?

Jalla nekztanaqui Herodesqui Jesusižtan walja zalz pecchiča.

ZOÑINACŽQUIZ CHJERI TJAAS MILAJRU

¹⁰ Wiruñaqúi Jesusiž illzta apostolonacaqui cutjatchiča. Nekztan Jesusižquiz quint'ichiča jaknužt kamtčhaja, jalla ninaca. Jalla nekztanaqui Jesusaqui ninaca chjitchiča tsjii ana žejlz yokquin, Betsaida cjita wajtž žcati.

¹¹ Nuž ojka zizcu, žoñinacaqui walja apziča. Nekztanaqui nuž apžtiquiztan Jesusaqui zuma risiwchiča. Ninacžquiz paljaychiča Yooz mantita zuma kamañ puntu. Nižaza laanaca čhjetinchiča.

¹² Zezi cjee ora Jesusiž tuncapan illzta apostolonaca nižquin macjatchiča, tuž cjican:

–Tii žoñinaca cuchna joch kjutñi wajt kjutñi okaj cjee; tjajz kjuya kjuržcaj cjee; nižaza lujlz čhjeri kjuržcaj cjee. Tekziqúi anaž čhjulumi žejlča. Jalla nuž cuch waquiziča amqui.

¹³ Pero Jesusaqui niž illzta apostolonacžquiz chiižinchiča, tuž cjican:

–Ančhucž antiz čhjeri tjaa.

Ninacaqui kjaaziča, tuž cjican:

–Anaž wejtnacalta čhjulumi žejlča. Pjijska t'antallžtan pizc ch'izlližtan, nižtallakaz wejtnacalta žejlča. Tinacžquiz tjaazjapa anapan wacasača. Tinacžquiz tjaasjapa, ččhjeri kjayi okasaya?

¹⁴ Nii žejlñi žoñinacaqui pjijska warank luctakatača. Nekztanaqui Jesusaqui niž tjaajintanacžquiz cjichiča:

–Tjulžna tii žoñinacaqui pjijska tuncquiztan pjijska tunca jalla nuž t'aka t'aka tjulžna.

¹⁵ Jalla nuž niž mantitacama paachiča. Nekztan tjappacha julziča.

¹⁶ Nekztanaqui Jesusaqui persun kjarquiz nii pjijska t'anta nii pizc ch'iz tanzicha. Nuž tanžcu arajpach kjutñi cherziča. Nekztan Yooz Ejpžquin sparaqúiz cjichiča, jalla nii t'antiquiztan, ch'izquiztan. Jalla nekztanaqui t'unžcu niž tjaajintanacžquiz chjalziča, parti žoñinacžquiz tojnajo.

¹⁷ Nekztanaqui tjapa nii žoñinacaqui chjekañcama lujlchiča. Jalla nuž lujl-tanaqui žejtchi t'anta ch'iz t'unanaca tuncapan canasta chijipi ricujchiča.

JESUSACHA YOOZIZ CUCHAÑŽQUITA CRISTUQUI

¹⁸ Tsjii nooj ana žoñinaca želan, Jesusaqui Yooz Ejpžquin mayizatča. Niiž tjaajinta žoñinacapanatača nižtan chicapachaqui. Jesusaqui ninacžquiz pewcziča:

–¿Jaknužt pinsi žoñinacaqui wejt puntuquiztanajo?

¹⁹ Nekztanaqui nii tjaajintanacaqui kjaaziča, tuž cjican:

–Yekjap žoñinacaqui cjiča, Juan Bautistaž amqui. Yekjapanacazti zakaz cjiča, Elías amqui. Yekjapanacazti cjiča, tuquita Yooz taku paljayñi profetažlani jacatatchini, –jalla nuž cjiča.

²⁰ Jaziqúi nekztanaqui Jesusaqui wilita pewcziča, tuž cjican:

—Ančhuczti, ¿wejt puntuquiztan kjažzaž cjeejo?

Pedruqui kjaaziča, tuž cjican:

—Yooziž cuchanžquita Crustumča amqui.

²¹ Jalla nekztanaqui Jesusaqui zumpacha niiz tjaajintanacžquiz iwjt'ichiča, ana jeczquizimi nižta maznajo.

JESUSAQUI NIZ PERSUN TICZ MAZZICHA

²² Nižaza Jesusaqui cjichiča:

—Yooz cuchanžquita žoñtča wejrqui. Pero walja sufristanča; nižaza wajt jilirinacami timplu chawc jilirinacami judiož lii tjaajiñinacami wejr ana jilirižtakaz nayaquiča. Nižaza wejr conta cjistanča. Nižaza čhjep majquiztan jacatatača.

²³ Wiruñauqui tjapa nii žejlñi žoñinacžquiz paljaychiča, tuž cjican:

—Jequit wejttan chica kamz pecchaj niiqui, primiraqui persun kamañ wira tjatžla. Nižaza čhjul pruebanaca watanami zapuru wejttan chicapacha cjee, aunquimi persun wirami apt'ačhani.

²⁴ Jakziltat persun kamañ wira ana tjats pecchaj niiqui, arajpach kamañauqui ana tjaataž cjequiča. Jakziltat wejt laycu persun kamañ wira tjatznačhaja, jalla niiqui arajpachquin wiñaya kamaquiča.

²⁵ Arajpachquin wiñaya kamañ wira pertaquiž niiqui, ¿tii muntuquiz žejlñi cusasa čhjuljapat sirwasajo?

²⁶ Nižaza quintra žoñinacaž želan, jakziltat wejtquiztan wejt tawkquiztan ana pajñi chiyaquiž niiqui, wejrqui nižtakal niizquiztan ana pajñi chiyača wejt mantiz timpuquiz, nekziqui. Tsji nooiqui walja poderchiz quejpžcača wejt Yooz Ejpž aztan, nižaza wejt Yooz Ejpž anjilanacžtanpacha. Mantizjapa quejpžcača.

²⁷ Weraral cjiwča. Tsji žoñinaca tekz žejlcanpacha anaž ticznaquiča ima Yooz mantiz timpuquiz kallantan.

JESUSAQUI TSJEMATAZ CJISSICHA

²⁸ Tsjii quinsakal tjuñquiztan Jesusaqui curulla yawchiča Yooz Ejpžtan parli. Nižaza čhjepultan niiz illzta žoñinaca chjitchiča, Pedružtan, Jacobžtan, Juanžtan; jalla ninacaqui Jesusižtan chica ojkchiča.

²⁹ Yooz Ejpžtan parlican, Jesusiž yujcni niiz cujtta zquitimi walja llijñi kjanapanikaz cjissiča, chiwicamatača.

³⁰ Nii orapacha pucultan luctak žoñiqui parisizquichiča, Jesusižtan parlisjapa. Nii pucultanaqui Moiestan Eliastantača.

³¹ Nii pucultanaqui walja chiw kjana llijñi taypiquiz tjonatča. Jesusiž ticz puntu parlatča. Jerusalén wajtquiz jaknužt ticznačhaja jalla nii puntu.

³² Nii oraqui Pedružtan niiz mazinacžtan ančaž tjaji tjonkatatča pero nii cheržcu ninacž tjajimi zajtchiča. Jesusiž tjeežta honora cherchiča nii pucultan žoñinacaž niiztan želan. Walja chiwi llijñi kjanñi cherchiča.

³³ Pucultan žoñinacaž Jesusižquiztan zarkan, Pedruqui cjichiča:

—¡Wejt Tjaajiñi Maestro, tekz žejlžqui walipankazza! Jaziqui čhjep chjujlli kjuya kjuysla, tsjiiqui amta, tsjiiqui Moiesta, tsjiiqui Eliasta, jalla nuž.

Pedruqui ana zuma tantiižcu chiichiča.

³⁴ Jalla nuž Pedruž chiyen, tsjii tsjirižtakaz macjatžquichiča. Nekztan ninacžquiz urpuntichiča. Jalla nuž urpuntitiquiztan nii čhjepultan illzta žoñinacaqui walja tsucchiča.

³⁵ Tsjirquiztan tsjii jora chiižquiñi nonziča, jalla tuž cjican:

—Jalla tiča wejt k'ayi Maatiqui. Jalla tiž čiita taku nonžna.

³⁶ Jalla nuž nii joraž chiitan, Jesusaqui zinalla želatča. Nii čhjepultan illztanacaqui nužquiz ch'uju quirchiča. Ana jeczquizimi nii cherta puntu chiichiča.

TSJII ZAJRAZ TANTA ZOŇI CHJETINTA

³⁷ Niiž jaka tažu curquiztan chjijwžquichiča. Walja žoñinacaqui Jesusižtan zali tjonchiča.

³⁸ Nii tama žoñinaczquiztan tsjii žoñiqui altu tawkžtan paljaychiča, tuž cjican:

—Wejt Tjaajiñi Maestro, wejt zinta majch cheržinžcalla.

³⁹ Wilta wilta zajraž tantača. Nii zajraqui ančaž kjaw kjawkatča. Nižazaž t'uckatča. Atquiztan ch'utuž jupokskatča. Persun janchiž čhjojritskatča. Niižquiztan ana zarakz pecča.

⁴⁰ Amiž tjaajinta žoñinaczquiz rocchinča, wejt majch čhjetžinajo. Ana atchipanča.

⁴¹ Jalla nekztanaqui Jesusaqui kjaaziča, tuž cjican:

—Tii žoñinacajay ana criñipanča. ¡Walja ujnacchizčhucpanča ančhucjay! Čhjul oracamat ančhucatan wejr želaquiya? Čhjul oracamat ančuca ujquiztan wejr awantaquiya? Nižtaqui am majch zjijczcalla.

⁴² Nii žoñž laa majch Jesusižquiz macjatan, zajraqui yokquiz tjojtchiča. Wilta t'uckatchiča. Jalla nekztanaqui Jesusaqui zajra ujziča. Nii žoñž majch čhjetinžcu, niž persun ejpžquiz intirjichiča.

⁴³ Nii Yooz aztan paata obra cheržcu tjapa žoñinacaqui ispantichiča. Žoñinacaz ispantichi želan, Jesusaqui niž tjaajinta žoñinaczquiz paljaychiča, tuž cjican:

⁴⁴ —Tjapa kuztanž tii weriž paljayta nonžna ančhucqui. Anaž tjazna. Wejrqui tsewctan cuchanžquita Yooz Žoñtča. Quintra žoñinaczquiz wejr intirjital tarazuntal cjeeča.

⁴⁵ Jalla nuž chiyan niž tjaajinta žoñinacaqui ana intintazziča. Nižaza nii chiitaqui ana kjanzt'itatača, ninaca intintajo. Ana intintazcumi, pewcz eksnatča niž chiita taku kjana intintisjapa.

YOOZ YUJCQUIZ, ¿JECT TUCQUIN CJES?

⁴⁶ Wiruñaque niž tjaajinta žoñinacaqui ninacpora ch'aassi kallantichiča, jakziltat ninaczquiztan tucquin cjes, jalla nii.

⁴⁷ Ninacz kuz pinsita zizcu Jesusaqui tsjii uza tsijtskatchiča niž latuquiz.

⁴⁸ Nekztan ninaczquiz paljaychiča:

—Jequit wejt cuntiquiztan tsjii uza risiwčhaj niiqui, wejrpacha risiwča. Nižaza jequit wejr risiwčhaja, nižaza risiwča wejr cuchanžquiñi. Jakziltat ančucaquiztan wirquin nayta cjicjiyačhaja, jalla niičha tucquin zuma honorchizqui.

⁴⁹ Wiruñaque Juanqui cjichiča:

—Wejt Tjaajiñi Maestro, tsjii žoñiqui am tjuu chiican zajranaca ch-jatkatchiča. Nii cheržcu wejrnacqui ujinča, “Ana nižta paa”, cjican. Nii žoñiqui anača učumnacatan ojklajñi.

⁵⁰ Pero Jesusaqui cjichiča:

—Anaž nuž atajča, jalla. Nižta paañiqui anača učumnacatan quintra. Jakziltažlaja ana učumnacatan quintra, jalla niiqui učum favoraž paača.

TSJII OJKTA PUNTU

⁵¹ Jalla nekztanaqui Jesusiž arajpacha ojcz tjuñi žcatžinžcatča. Jalla nižtiquiztan walja p'ektichiča Jerusalén watja ojczjapa.

⁵² Niiž tuqui zoñinaca cuchanchiĉha, alujamint kjuya kjurzĉajo. Jalla nekztanaqui nii cuchanta zoninacaqui Samaria cjita yokquin tsjii watja macjatchiĉha.

⁵³ Nii Samaria wajtchiz zoñinacazti ana kjuyquiz kjawz pecatĉha Jesusaž Jerusalén watja ojkz cjen.

⁵⁴ Nii quintu nonžcu Jacobžtan Juanžtan Jesusižquiz cjichiĉha:

–Wejt Jiliri, ĉkjažt cjes? Wejrnacqui arajpachquiztan uj mantižquila, cjiwĉha, ninaca tjatanzjapa. Jaknužt tuqui timpu Elías cjita Yooz taku paljayñi profeta paatĉhaja, jalla nuž. Jalla nuž waliž cjesaž, ĉana jaa?

⁵⁵ Jalla nuž chiitiquiztan Jesusaqui ninacaž kjutñi cherziĉha. Nekztanaqui ujziĉha, tuž cjican:

–Anĉhuca kuzqui ana waliĉha. Anaž tantiyassa anĉhucqui.

⁵⁶ Wejrqui tsewctan cuchanžquita Yooz Zoñtĉha. Wejrqui tsewctan tjonchinĉha, ujchiz zoñinaca liwriizjapa. Ana tjonchinĉha ujchiz zoñinaca tjatanzjapa.

Jalla nekztanaqui yekja watja ojkchiĉha.

JESUCRISTUZTAN CHICA OJKLAYZ PUNTU

⁵⁷ Jiczquiz okan, tsjii zoñiqui Jesusižquiz cjichiĉha:

–Wejt Jiliri, jakziquinam ojkĉhaja amqui, wejrqui chicapachal ojklayz pecuĉha.

⁵⁸ Nekztan Jesusaqui nižquiz kjaaziĉha, tuž cjican:

–Kitinacami kjuychizza. Nižaza wežlanacami tjurchizza. Wejrzti anal kjuychizza, tjajzjapami.

⁵⁹ Wiruñaquei Jesusaqui yekja zoñžquiz tuž cjichiĉha:

–Wejtta chicaž ojklaya.

Nii zoñiqui kjaaziĉha, tuž cjican:

–Wejt Jiliri, primiraqui wejt ticzi ejp tjatznaĉha.

⁶⁰ Nekztan Jesusaqui kjaaziĉha, tuž cjican:

–Ticzižtakaz ana zuma kamañchiz kamñi zoñinacaqui, jalla ninacaj ticzinaca tjatžla. Amqui ojkla, Yooz mantita zuma kamañ puntuquiztan paljayzjapa.

⁶¹ Wiruñaquei yekja zoñiqui Jesusižquiz cjichiĉha:

–Wejt Jiliri, amtan chica ojklayz pecuĉha. Pero primiraqui wejt familianacžquiz wejt ojklayz puntu mazinžquiz pecuĉha.

⁶² Nekztan Jesusaqui kjaaziĉha, tuž cjican:

–Jakziltat Yooztajapa langzñi kalltiĉhaja, jalla niiqui tirapan Yoozta langz waquiziĉha, ana wir kjutñi cheržcu. Jakziltat wir kjutñi chernasaž niiqui, nižaza tuquita kamañ wirquiz quejps pecasaž niiqui, jalla niiqui anaž Yooz mantita zuma kamaña tanznasaĉha.

10

JESUSAQUI YOOZ LANGZQUIN ZOÑINACA CUCHANCHICHA

¹ Jalla wiruñaquei Jesusaqui pakallak tunc zoñinaca illziĉha. Jalla nuž illžcu Jesusaqui niž tuqui tjapa kjutñi pucultan pucultan cuchanchiĉha, jakziquint okaĉhaja, jalla nii.

² Ima cuchancan ninacžquiz cjichiĉha:

–Tsjii puntul chižzinasaĉha. Zkalaqui walja žejlĉha. Pero zkala ajžñi zoñinacaĉha upaqui. Yooz Ejpqui zkal Patrunaĉha. Jalla nižtiquiztan Yooz Ejpžquiztan mayiza, zkala ajžñi zoñinaca cuchanžĉajo.

–Jalla nuž paljaychiĉha Jesusaqui, zoñinacaĉha zkalažtakaz.

³ Nižaza Jesusaqui niž cuchanžquita zoñinacžquiz cjichiĉha:

—Ančhucqui uuzanacažtakaz cuchnuča. Tanñi kitinacaž cheechi žoñinacž taypiquin ojklayaquiča ančhucqui. Jaziqui persunpachaž cwitazaquiča.

⁴ Nižaza anaza quelsmi chjichaquiča, anaza paaz pulsami. Ana enenžcu jiczquizic okaquiča.

⁵ Tsjii kjuya luzcu, ančhucqui tsaanaquiča, tuž cjican: “Tii kjuychiz žoñinacaqui walipankaj cjila”.

⁶ Nicju zuma kamñi žoñinaca želaquiž niiqui, walipankaz cjequiča nii kjuychiz žoñinacaqui. Nižaza nii kjuyquiz zuma kamñi žoñinaca ana želaquiž niiqui, ančucaž tsaanta takuqui nužquizkaz cjequiča.

⁷ Kjuyquiztan kjuya ana ojklayaquiča. Tsjii kjuya irantižcu, nekzpachapan kamaquiča. Chjulut nii kjuychiz žoninacaqui onačhaja jalla niicž lujlznaquiča. Langzñi žoñinaca pacta cjis waquiziča.

⁸ Tsjii watja irantižcu nii wajtquiz jakziltakat ančhuc kjawžnačhaj niiqui, jalla nekziqui lujlznaquiča čjulu onanami.

⁹ Nižaza nekž žejlñi laanaca čhjetnaquiča. Nižaza paljayaquiča, tuž cjican: “Yooz mantita zuma kamaña ančucaquiz žcatžinžquiča”.

¹⁰⁻¹¹ Nižaza tsjii wajtquiz irantižcuqui, jalla nii wajtquiz anaž ančhuc kjawznaquiž niiqui, calli kjutñiž ulnaquiča, nii wajt žoñinacžquiz tuž cjican: “Tii wajt pulpu wejnaca kojchquiz zcatchipan cjen, jalla tii wajt pulpu tjappacha tsajt tsajtsnača. Jalla tii tsajtstaqui siñalaž cjequiča ančuca quintra. Pero ančhucqui tuž zizla, Yooz mantita zuma kamaña ančucaquiz žcatžinžquichitača”. Jalla nuž chiižcuqui, nii ana ančhuc kjawzñi wajtquiztan okaquiča.

¹² Wejr cjiwča ančucaquiz; casticz tjuñquiziqui nii wajtchiz žoñinacaqui juc'anti castictaž cjequiča, nii tuquita Sodoma cjita wajtchiz žoñinacžquiztanaqui.

YOOZQUIN ANA JUYZU PAAÑI ZOÑINACŽ PUNTU

¹³ ¡Corazín wajtchiz žoñinaca, ančucaquiz anawaliž wataquiča! ¡Nižaza Betsaida wajtchiz žoñinaca, ančucaquiz anawaliž wataquiča! Ančuca watjanacquiziqui walja milajrunaca paatatača. Tiro Sidón cjita watjanacquiz nii milajrunaca paataž cjitasaz niiqui, walipan nii wajtchiz žoñinacaqui werar Yoozquiz cjuñžñiž cjitasacha, “Ujchizpantča; pertunalla”, cjicanaqui. Nižaza ninacž uj sint'ižcu nii wajtchiz žoñinacaqui llaquita kuz kjanapacha tjeesñi cjitasacha, lutu zquitchiz cujtžcu, nižaza achquiz kjupžtan tjajlžcu, jalla nuž.

¹⁴ Jalla nižtiquiztan ančhucqui casticu tjaz tjuñquiziqui juc'anti castictaž cjequiča nii Tiro Sidón cjita watjanacchiz žoñinacžquiztanaqui.

¹⁵ Capernaum wajtchiz žoñinaca, ¿kjažtiquiztan ančhucqui pinsejo, “Yoozqui učum honorchiz cjiskataquiča”, cjicanjo? Anaž nuž cjesača. Pero ančhuczi kozzuc tjojttaž cjequiča infiernuquin sufrisjapa, parti ujchiz žoñinacžtan chica.

¹⁶ Nekztan Jesusaqui niž tjaajinta žoñinacžquiz tuž cjichiča:

—Jakziltat ančuca taku nonžaj niiqui, nižaza wejt takumiž nonža. Nižaza jakziltat ančuca taku ana nonz pecčhaj niiqui, nižaza wejt taku anaž nonz pecča. Nižaza jakziltat wejt taku ana nonz pecčhaj niiqui, nižaza werj cuchanžquiñi Yooz Ejp anaž nonz pecča.

CUCHANTA ZOÑINACAQUI QUEJPZQUICHICHA

¹⁷ Wiruñaquei nii pakallak cuchanta žoñinacaqui ancha cuntintu quejpžquichiča, tuž cjican:

–Wejt Jiliri, am tjuu chiižcu, am aztan zajranacami ulanskatchinča.

¹⁸ Nekztanaqui Jesusaqui ninacžquiz cjichiča:

–Jesalla, tsjii rayužtakaz Satanás cjita diabluqui arajpachquiztan tjojt-sičha. Jalla nuž cherchinča.

¹⁹ Wejrqui ančhucaquiz wejt azi tjaazinča. Jalla nižtiquiztan ančhucqui zkorami yek'achuncami tjecznaquiž niiqui anaž kjaž cjisnasača. Nižaza nii wejt aztan tjapa quintranaca atipaquiča.

²⁰ Zajranacaž ulantiquiztan ančhucqui anaž ancha chipchipasača. Antiz ančuca tjuunaca arajpachquin apuntitiquiztan, nekztanž ančhucqui chipchipz waquiziča.

CUNTINTU ZOŇINACA

²¹ Nii orapacha Jesusaqui ancha cuntintutača Yooz Espiritu Santuž cjen. Nekztan cjichiča:

–Yooz Tata, arajpachquinami yokquizimi ampanča wali chawc jilir-imqui. Am puntunaca humilde zoñinacžquiz tjeezamča, intintajo. Pero tii muntuquiz wali estudiantinacami zizñinacami am puntunaca anaž intintazziča, čhjojžtažtakaz ninacžquiziqui. Jalla nužupanča am munañpaqui, Yooz Tata. Jalla nižtiquiztan am honora waytuča.

²² Nižaza Jesusaqui cjichiča:

–Yooz Tata, tjapa amiž ziztanacami wejtquiz tjaajinchamča. Anaž jecmi wejt kuz zizza. Yooz Tata, am panikaz wejt kuz zizza. Nižaza am kuz anaž jecmi zizza. Wejr panikal zizuča. Nižaza Yooz Tata, jakziltižquiz wejrqui am kuz zizkatz pecučaja, jalla ninacazakaz am kuz zizaquiča.

²³ Jesusaqui niž tjaajinta zoñinacžtan zina želatča. Ninacžquiz cheržcu cjichiča:

–Anchucqui zuma paatanaca cherchinčhucča. Jakziltat weriž paatanaca persun čhjujčžtan cherchižlaja, cuntintuž cjesača.

²⁴ Wacchi tuquita Yooz taku paljayñinaca nižaza tuquita chawc jilirinaca, jalla ninacaqui weriž zuma paatanaca cherz pecatča. Pero ana cherchiča. Nižaza ninacaqui Yooz puntu takunaca nonz pecatča. Pero ana nonziča. Jaztankaz ančhucqui tii cherchinčhucča, nižaza nonzinčhucča. Jaziqui cuntintuž cjee.

ZUMA KUZIZ ZOŇINACA

²⁵ Wiruñaquei tsjii judiož lii tjaajiñi zoñiqui tsijtsičha. Nekztanaqui Jesusižquiz paljaychiča, Jesusa lii quintra chiikatzjapa. Nekztan pewcziča, tuž cjican:

–Wejt Tjaajiñi Maestro, Yooztan wiñaya kamzjapa ¿chjulut paaz waquizisaya?

²⁶ Nekztanaqui Jesusaqui nižquin kjaaziča, tuž cjican:

–¿Kjaž cijjrtat učum liiquiziya? ¿Jaknuž liichamtajo?

²⁷ Nii lii tjaajiñiqui kjaaziča, tuž cjican:

–Zoñinacžlaqui Yoozquin tjapa kuzziz cjistanča. Yoozquin tjapa animužtanami sirwistanča, nižaza tjapa aztanami, nižaza tjapa pinsamintužtanami. Tjapa kuzziz Yoozquin cjistanča. Nižaza jaknužt persunpachquiz okzñamžlaja, jalla nižta okzñi kuzziz cjistanča zoñinacžquizimi, lijitum mazižtakaz.

²⁸ Jalla nekztanaqui Jesusaqui cjichiča:

–Walikam kjaaza. Jalla nuž amiž kjaaztacama kamaquiž niiqui, Yooztan wiñayam kamaquiča.

²⁹ Jesusiž chiitiquiztan nii lii tjaajiñiqui atipz pecatča. Jalla nekztanaqui Jesusižquiz pewcziča, tuž cjican:

—¿Jec žoñinacžquiz wejr laqui okstankaya?

³⁰ Nekztanaqui Jesusaqui kjaaziča, tuž quint'ican:

—Tsjii žoñiqui Jerusalén wajtquiztan okatča, Jericó cjita wajt kjutni. Nuž jiczquiz okan, tsjii kjažultan tjañinacžtan zalziča. Tjañinacaqui nii žoñi ki-jtchiča, nižaza tjapa niž zquitinaca niž paaznaca kjañchiča. Nekztanaqui zuma chjojricama ana žaañipacha ecchiča. Nužquiz ticzmaya želatča.

³¹ Nekztan tsjii icliz jiliri qui nii jicziñpacha okatča. Pero chjojrichta žoñi cheržcu, tsjii latu chjuužcu watchiča.

³² Niiž jarupachaqui tsjii timpluquiz sirwiñi žoñiqui nii jicziñpacha ojkchizakazza. Nižaza nii chjojrichta žoñi cheržcu, nawcjuñ zakaz chjuuziča.

³³ Jalla nekztanaqui tsjii Samaria wajtchiz žoñiqui nii jicziñpacha tjonchizakazza. Jalla nuž nii kijchta chjojrichta žoñi cheržcu, ancha okziča.

³⁴ Jalla nekztanaqui kijchta žoñžquiz macjatchiča. Chjojricama cheržcu kullzinchiča aceitižtan vinžtan. Nuž kullžcu chjojri jeržinchiča zumpacha. Nekztanaqui persun aznuquiz tewžcu chjitchiča, tsjii alujamintuquin. Jalla nicju cwitichiča.

³⁵ Jaka tažquiqui ima wilta jicz ojkcan nii Samaria wajtchiz žoñiqui persun paaz jescu, pizc billete pacchiča alujamintuchiz žoñžquiz. Nekztan cjichiča, “Tii chjojrichta žoñi am cwitižinalla. Tii paaz ana alcansaquič žoñi, wejr qui pjojkača, quejpžcuqui”.

³⁶ Jaziqui, ¿jakzilat nii čhjepultiquiztan chjojrichta žoñžquiz zuma okzikaya, lijitum mazižtakazya? ¿Jaknužum am tantii? Kjaaznalla.

³⁷ Jalla nekztanaqui nii lii tjaajiñiqui kjaaziča, tuž cjican:

—Nii oksni žoñipanča zuma mazižtakazqui.

Nekztanaqui Jesusaqui cjichiča:

—Jaziqui oka, nužuzakaz ammi paalla.

³⁸ Jalla nekztanaqui Jesusaqui tira ojkchiča. Ojkcan tsjii wajtquin luzziča. Jalla nicju Marta cjiti žonqui naaža kjuyquiz Jesusa kjawzinča.

³⁹ Martiqui cullacchiztača, Mariá cjititača. Mariiqui Jesusiž kjojch latuquiz julzinča, nii chiiñi nonzjapa.

⁴⁰ Martizti naaža kjuy lurañquiz kuz tjaatča. Nekztan Jesusižquiz macjatchinča, tuž cjican:

—Wejt Jiliri, taa cullaquiqui wejr zinallakal tii kjuya lurañanacquiz jakjurpayča. Ana wejr yanapča. ¿Anam wejtquiztan sint'iya? Am chiižinalla, wejr yanapajo.

⁴¹ Nekztanaqui Jesusaqui naaquiz kjaaziča, tuž cjican:

—Marta, Marta, kjuy lurañanacžquiz kuz tjaachiž cjen am kuzqui turwayzikalala. Jalla nižtiquiztan ancha llaquitamkalala amqui.

⁴² Tsjii zintallapanikaz žejlča chekanaqui. Mariiqui nii zuma illzinča. Naaqui kuz tjaača wejt taku nonzjapa. Anaž jecmi taa cullaqui wejt taku nonžtiquiztan apaki atasacha.

11

YOOZ EJPŽQUIN MAYIZIZ PUNTU

¹ Tsjii nooj tsjii yokquin Jesusaqui Yooz Ejpžquin mayizatča. Nuž mayiziz žeržtanaqui niž tjaajintanacžquiztan tsjii tjaajinta žoñiqui pewcziča tuž cjican:

—Jaziqui wejt Jiliri, Yooz Ejpžquin mayiziz tjaajznalla. Jaknužt Juanqui niž tjaajinta žoñinacžquiz Yooz Ejpžquin mayiziz tjaajinchižlaja, jalla nuž.

² Nekztanaqui Jesusaqui tjaajinchiča, tuž cjican:

–Yoozquin mayizizqui tužuča:

“Učhum arajpach Yooz Ejp, am tjuuqui zuma honorchiz cjilalla. Nižaza am mantiz timpu irantižquilalla. Nižaza am munañpaj cjilalla tii yokquizimi tsewc arajpachquinami.

³ Nižaza tonjtijapa nižaza zapurutijapa čhjeriž tjaažcalla, azziz cjisjapa.

⁴ Wejrnacqui pertunchinča wejtnacaquiz ana zuma paañi žoñinaca. Jalla nižtiquiz amqui wejtnaca ujnacaž pertunalla. Nižaza čhjul anawalinacami wejtnacaquiz ana watkatalla. Antiz čhjul anawalinacquiztanami liwriyalla”.

⁵ Nekztan Jesusaqui ninacžquiz cjichizakazza:

–Tsji žoñiqui amiguchiztača. Nii amiguqui chica aramaž kjuyquiz tjonchiča, tuž cjican: “Amigo, čhjep t'antaž kajžnalla.

⁶ Wejt kjuyquiz tsji žoñi irantižquichiča jiczquiztan. Anaž wejtac čhjulum žejlča nižquiz tjaazjapa”.

⁷ Nekztanaqui nii žoñiqui kjaaziča kjuyltan, tuž cjican: “Anaž wejr chiižina. Kjuyami zuma chawjcztača. Nižaza wejt ocjalanacaqui ajpžquiz wejtan čicaž tjajča. Anaž žaazñi atasacha. Nekztan anal čhjulum tjaayi atasacha”.

⁸ Amiguž cjenami ana tjaayi žaaz pecchiča. Pero nižtami tjaayi žaaziča, ana iya molistita cjeajo.

⁹ Jaziqui cjiwča, Yooz Ejpžquiztan maya, nekztan Yooz Ejpqui ž-tjaaquiča. Nižaza zuma kamaña kjurzna, nekztan wačaquiča. Nižaza kjuy chawjczquiztan t'oc t'ocžcaquiča, nekztan cjetžtaž cjequiča.

¹⁰ Mayñi žoñinacami ninacž mayta tjaataž cjequiča. Nižaza kjurñi žoñinacami nuž kjuržcu wachaquiča. Nižaza chawjczquiztan t'oc t'ocñi žoñinacžquizimi cjetžtaž cjequiča. Jalla nužuča Yooz Ejpžquin mayizizqui.

¹¹ ¿Kjažt tsji ejpqui ančhucporquiz t'anta mayñiž majchquiz “Tiž t'antaqui” cjican tsji maz chjalznasajo? Anapanž nuž cjesača. Nižaza, ¿kjažt ejpqui ch'iz mayñi majchquiz “Tiž ch'izqui” cjican zkorakaz chjalznasajo? Anaž nužupan chjalznasacha.

¹² Nižaza ¿kjažt ejpqui wallpi ziñi mayñi majchquiz “Tiž wallpi ziñiqui” cjican yek'achunca chjalznasajo? Anaž nužupan chjalznasacha.

¹³ Jaziqui ančhucqui ana zum kuzziz cjenami zuma cusasapanikaz tjaasača persun maatinacžquiziqui. Ancha zuma kuzziz Yooz Ejpqui juc'ant zumanaca ančhucacquiz tjaasača. Jakziltat Espiritu Santo mayačhaja, jalla nižquiz arajpach Yooz Ejpqui Espiritu Santo cuchanžcaquicha, nii mayñinacž kuzquiz.

JESUSIZ QUINTRA CHIICHICHA

¹⁴ Wiruñaquei zajraqui tsji žoñi upa cjiskatchiča. Nekztanaqui Jesusaž nii zajra ulanzkattan, nii upa ana chiiñi žoñiqui chii kallantichiča. Nekztan nuž paatiquiztan nekž žejlñi žoñinacaqui walja ispantichiča.

¹⁵ Yekjap žoñinacaqui Jesusiž quintra chutchiča, tuž cjican:

–Tiiqui anawal žoñikalala. Zajranacž Beelzebú jilirž aztan yekja zajranaca chjatkatča.

¹⁶ Yekjap quintra žoñinacaqui yanz pecatča, arajpach Yooz aztan milajru paañi, ana arajpach Yooz aztan paañi, jalla nii. Yanzjapa pewczyča:

–Jaziqui arajpach milajru paala, –cjican.

¹⁷ Pero Jesusaqui ninacž kuz zizziča. Jalla nižtiquiztan paljaychiča, tuž cjican:

–Tsji nacionchiz žoñinacaqui t'aka t'aka cjisnaquiž niiqui, ninacaž kichasiž cjen, nii nacionaqui tjatantaž cjequiča. Nižaza tsji famillchiz

žoñinacaqui chaasaquiž niiqui, ninacaž kichassiž cjen nii familiaqui tjatantaž cjequiča.

¹⁸ Nižaza Satanás cjita zajraž partimi t'aka t'aka cjesaž niiqui, ultimu tjatantaž cjesača. ¿Kjažt nii zajranacž azi tjurasajo? Anaž azziz cjesača. Anapanž tjurasacha. Jaziqui ančhucqui tuž cjiča, wejrqui zajranacž Beelzebú cjita jilirž aztan yekja zajranaca chjatkatča, jalla nuž cjiča ančhucqui.

¹⁹ Pero wejrqui anaž nužu jalla. Nonžna. Ančuca partinacami zajranaca chjatkatñizakazza. ¿Jecž aztan ninacac chjatkatjo? ¿Beelzebú cjita zajriž aztan chjatkatjo? Anaž cjesača. Ančuca parti žoñinacaž paatiquiztan intintiz waquiziča, zajriž aztan anapan zajranaca chjatkatasača, jalla nuž intintiz waquiziča. Jalla nižtiquiztan ančhucqui kjanapachača ana zuma razunchizqui.

²⁰ Jaziqui ultim werara Yooz aztanpankal wejrqui zajranaca chjatkatuča. Yooz aztan chjatkatiquiztan, kjanapacha tjeeža, Yooz mantiz kamañ timpu irantižquiča, jalla nii.

²¹ 'Tsjilla quint'asača. Tsjii walja armichiz žoñiqui persun kjuya walja tjurt'iñitača. Jalla nižtiquiztan kjuyquiz chjojtanaca segurotača.

²² Nuž armichiz cjen cuntintu želatča. Nekztanaqui tsjii tsjan tjup žoñiqui tjonchiča. Armichiz žoñi atipžcu, tjapa niž armanaca kjañchiča. Nekztan tjapa niž chjojta cusasanaca kjañchizakazza. Nekztan tjup žoñiqui niž mazi-nacžquiz kjañta cusasanaca tojunchiča.

²³ 'Nonžna. Jakziltat ana wejt favora cječhaj niiqui, wejt quintracha. Nižaza jakziltat Yooztajapa žoñinaca ana juntjapi yanapčhaj niiqui, wejt quintraj Yoozquiztan žoñinacaž wichanskatča.

ZAJRIZ PUNTU

²⁴ Nižaza Jesusaqui cjichiča:

–Tsjii zakal quint'asacha. Tsjii zajraqui žoñžquiztan ulanžcu kjoñ yokaran ojklaychiča, jeejzjapa kjurcan. Ana jeejz watžcuqui, niž kuzquiz pinsichiča, tuž cjican: “Jaziqui wejr quepaka jakziquiztan ulanžquitučaja, jalla nicju”.

²⁵ Jalla nuž quejpžcu niž ulanta žoñžquiz zalchiča. Nii žoñž kuzqui tsjii zuma pewžta kjuyažtakaztakalča, nižaza zuma žcayi azquitžta kjuyažtakaztakalča.

²⁶ Jalla nuž zaltiquiztan nii zajraqui pakallak juc'ant anawali zajranaca zjijqui ojkchiča. Ninaca zjijčcu, tjapa nii zajranacaqui žoñž kuzquiz luzziča. Jalla nižtiquiztan nii žoñiqui juc'ant anawaliž cjissiča tuqita kamzquiztan, tsjan ana zuma.

²⁷ Jesusaž nuž quint'an, tsjaa maatak žonqui nii žejlñi žoñinacžquiztan altu joržtan paljaychiča, tuž cjican:

–Honorchiz cjila am matiñ maaqui, am jwessinž cjen.

²⁸ Nekztanaqui Jesusaqui cjichiča:

–Juc'ant honorchiz cjila Yooz taku nonžñinaca. Nižaza Yooz tawk jaru kamñinaca.

ZOÑINACAQUI SIÑALA CHERZKAZ PECATCHA

²⁹ Tsjan tsjan žoñinacaqui Jesusiž muytataž ajcizatča. Nekztanaqui Jesusaqui paljayi kallantičiča, tuž cjican:

–Jazta timpu žoñinacaqui ana zum kuzzizza. Milajru siñala paañipankaz pecča. Tuqui timpuqui Jonás cjita žoñiqui želatča, Yooz taku paljayñi. Jalla nižta paljayzqui tsjii siñalažtakazza, Yooziž cuchanžquita cjican. Wejrzakal Yooz taku paljayuča. Anaž iya čhjul siñalami želasača tii žoñinacžtaqui.

³⁰ Yooz Ejpqui Nínive cjita wajtchiz žoñinacžquiz Jonás cjita žoñi cuchanžquichiča, casticu tjaaz tjuñi maznajo. Jalla niitača siñalaqui, nii timpuquiz kamñi žoñinacžtaqui. Nižaza Yooz Ejpqui arajpachquiztan wejr cuchanžquichiča. Jalla wejrtča siñalaqui, jazta timpuquiz kamñi žoñinacžtaqui. Anaž iya čjul siñalami tjaataž cjequiča.

³¹ Pjalz tjuñquiziqui, jazta timpuquiz kamñi žoñinacaqui pjaltaž cjequiča, zuma, ana zuma, jalla nii. Ana zuma žoñinacaqui castictaž cjequiča. Nonžna. Tuqui timpuqui tsjaa maatak jilir želatča, wartuñtan watja mantiñ. Pjalz tjuñquiziqui naaqui jakatatžcu jazta timpuquiz kamñi žoñinacž uj kjana tjeeznaquiča, jazta žoñinaca casticta cjejajo. Naaqui muzpa ažkquiztanpacha tjonchinča Salomón cjita jiliržquiz zali, niž zuma razun taku nonžni. Pero tekzi wejrqui želuča Salomonžquiztan tsjan chekan jiliriui. Pero jazta timpuquiz kamñi žoñinacaqui wejt taku anaž nonz pecča. Nižtiquiztan juc'ant ujchizza, nižaza juc'ant castictaž cjequiča.

³² Nižaza pjalz tjuñquiziqui Nínive wajtchiz žoñinacaqui jacatatžcu jazta timpuquiz kamñi žoñinacž uj kjana tjeeznaquiča. Jonás cjita žoñiž Yooz taku paljaytiquiztan, nii Nínive wajtchiz žoñinacaqui Yoozquin kuzziz cjissiča. Pero tekzi wejrqui želuča Jonasquiztan tsjan chekan jiliriui. Nižaza wejrtča tsjan chekan Yooz taku parliñtqui. Pero jazta timpuquiz kamñi žoñinacžti anal Yoozquin kuzziz cjissiča, weriž paljayta Yooz taku nonžcu. Nižtiquiztan juc'ant ujchizza. Nižaza juc'ant castictaž cjequiča.

KJANQUIZ KAMZ QUINTU

³³ Nekztanaqui Jesusaqui quint'ichiča tuž cjican:

—Anaž jecmi tsjii lámpara tjeezcu, chjozakquiz nonznasača, nižaza anaž tsjii cajon kjuylami nonznasača. Nii lamparaqui tseecupanž tsjijsnasača, kjuyquiz luzni žoñinacžquiz kjanajo.

³⁴ Žoñž čhujquiqui persun kuz lamparažtakazza. Žoñž čhujqui zumažlaj niiqui nižaza žoñž kuzmi zumazakazza, zuma kjanquiztakaz kamča. Pero žoñž čhujqui ana zumažlaj niiqui, kuzmi ana zumazakazza, zumchiquiztakaz kamča.

³⁵ Zuma kjanquizim kamčhaj niiqui, persun kamaña zumaž cwitazaquiča, ana zumchi kamañchiz cjisjapa.

³⁶ Tsjii žoñiui kjanquiztakaz zumapankaz kamčhaj niiqui, nižaza ana čjul ana waliquiz kamčhaj niiqui, liwj niž kamtanaca zumaž cjequiča, jaknužt tsjii lámpara wali kjančhaja, jalla nuž.

ANA ZUM KUZUZ ŽOÑINACŽ PUNTU

³⁷ Jesusaž chijan, tsjii fariseo žoñiui Jesusa čhjeri luli kjawziča, niž kjuyquin. Pucultanaqui kjuya irantižcu, kjuya luzziča. Nekztan mizquiz julziča.

³⁸ Jesusaqui kjara awjz custurumpi ana cumplichiča ima lujlcan. Jalla nii cheržcu fariseo žoñiui ispantichiča. Jesusaqui persun kuzquiz naychiča fariseo žoñiž ispantita.

³⁹ Nekztanaqui Jesusaqui nižquiz paljaychiča, tuž cjican:

—Tsjii žoñiui tasanaca chuwanaca zawnctankaz awjza, nižaza čhujža. Nižta iratača ančhucqui fariseonaca. Ančhucqui zawnctankaz limpuča. Pero kjuyltanaqui ančuca kuzqui walja cjujchinacchizpanča. Ančuca kuzquiz tjangz zizza, nižaza čjul anawali paazmi zizza.

⁴⁰ ¡Zumzu žoñinaca! Yoozqui curpumi kuzmi paachiča. ¿Jalla ančhucqui anaž nii zizjo?

⁴¹ Ančuca cusasanacquiztan žoñinacžquiz tjaaz waquiziča. Ančucqui tjapa žoñinacžtan okzñi kuzziz cjesaž niiqui, ančuca kuzmi zumapanž cjesača Yooz Ejpž yujcquiziqui, ana kjara awjz cuzturumpi paažcumi.

⁴² ¡Ayii pori fariseonaca! Ančucqui Yoozquin diezmos tjaayiñčucča, nižaza tjapa plantanacquiztanami diezmos tjaayiñčucča. Jalla nuž paa-can walikazza. Pero nuž tjaacanami ančucqui ana lijituma zuma kamañquiz kamchinčucča, nižaza ana Yoozquin kuzzizčucča. Zuma kamzqui, nižaza Yoozquin kuzzizqui, jalla niiča chekanaqui. Pero diezmos tjaazmi zakaz cumpliz waquiziča.

⁴³ ¡Ayii pori fariseonaca! Ajcz kjuyquiziqui tucquin julzkaz pecča, nižaza honorchizkaj cjiw cjiča ančucqui. Nižaza ančucqui jakzi calliranami zuma rispitchizkaž wejr tsaanja cjiča ančucqui.

⁴⁴ ¡Ayii pori fariseonaca! Nižaza ¡ayii pori lii tjaajiñinaca! Ana lijitum kuzzizčucča. Ančuca liiqui cjiča jakziltat tsjii sipultur juntuñ ojkchaja jalla niiqui Yoozquin ana macjatasacha. Jalla nižta irata ančucqui žoñinacžquiz ana Yoozquin macjatskatča. Pero žoñinacaqui ančucaž puntu cjiñča, “Yooz žoñinacača ninacaqui”. Ančucqui ninaca incallča, ana zuma kuzziz cjen. Ančucqui ana pajta sipulturažtakazza.

⁴⁵ Jalla nuž chiitiquiztan tsjii lii tjaajiñiqui kjaaziča, tuž cjican:

–Tjaajiñi Maestro, jalla nuž chiižcu, wejtnacaquiz ana zumam chiiča.

⁴⁶ Nekztanaqui Jesusaqui cjichiča:

–¡Ayii pori lii tjaajiñinaca! Ančucqui parti žoñinacžquin niž jaru niž jaru ch'ama cuzturumpinaca yapchinčucča: kuzi cuntažtakaz jepzinčucča. Ch'ama cuzturumpinaca yapchiž cjenami, ančucqui anaž tsjii loc'anžtanami yanapž pecča, žoñinaca nii cuzturumpinaca cumplajo.

⁴⁷ ¡Ayii! Ančucqui ancha t'akjiriča. Ančuca tuquita atchi ejpnacaqui Yooz taku paljayñi profetanaca conchiča. Ančucpacha nii paljayñinacž sipulturanaca kjuyñicha, niwjctanaqui ančucqui rispittažokaz cjiča. Pero ančucqui anaž ultimu rispitcha.

⁴⁸ Tuquiqui ančuca ejpnacaqui nii Yooz taku paljayñinaca conchiča. Nuž conchi cjenami ančucaquiztan walikazza. Anzimi ančucqui sipulturanaca kjuyča, zuma žoñižtakazza. Pero ultimquiziqui ančucqui ninacaž paljayta Yooz taku anazakaz nonz pecča.

⁴⁹ Jalla nižtiquiztan Yooz Ejpqui ančuca puntuquiztan zuma razun taku chiichiča, tuž cjican: “Wejrqui wejt taku paljayñi profetanacami apostolonacami cuchanžcača. Nekztanaqui yekjapanaca nii Yooz taku paljayñinacžquiztan contaž cjequiča. Yekjapazti kijchtaž cjequiča”.

⁵⁰ Tii muntu kalltiz, niwctanpacha Yooziž cuchanžquita žoñinaca conchiča ančuca tuquita atchi ejpnacaqui. Ančucqui nižta ana wal kuzzizzakazza. Jaziqui Yoozqui jazta timpuquiz žejlñi žoñinacžquiz zakaz casticaquiča.

⁵¹ Tsjii Zacarías cjita žoñiqui altaržtan timplužtan, jalla nii taypiquiz contatača. Abel contiquiztanami Zacarías contiquiztanami nižaza tjappacha contanacquiztanami Yooz Ejpqui jazta timpuquiz žejlñi žoñinacžquiz casticaquiča.

⁵² ¡Ayii pori lii tjaajiñinaca! Liwriiñi Yooz taku liižcu, zizcu, žoñinacžquiz ana nii tjaajinchinčucča. Yooz taku tsjii llave irata tanzinčucča. Nii llave tanžcanpacha ančucmi liwriiñi Yooz jiczquiz ana luzzinčucča. Y nižaza nii llave tanžcu, ana cjetžinčinčucča, liwriiñi Yooz jiczquiz žoñinaca luzajo.

⁵³ –Jalla nuž chiižinžcu Jesusaqui ojkchiča.

Nii lii tjaajiñinacžtan nii fariseonacžtan, jalla ninacaqui muzpa žawjchi cjissiča Jesusiž quintra. Nižaza ninacaqui Jesusižquiz wiltan wiltan pewcziča,

⁵⁴ Jesusiž quintra tsjii ujchiz jwezjapa. Jesusiž kjaaztiquiztan uj tjojtunz pecatča.

12

FARISEO ZOÑINACA

¹ Jesusaž nuž tjaajnan, zmali wacchi žoñinacaqui tjonchiča, waranka waranka. Nižaza zmali porapat tewksascan tewksascan tjonchiča. Primer-aqui Jesusaqui niž tjaajinta žoñinacžquiz paljaychiča, tuž cjican:

–Fariseo žoñinacaqui anaž ultimu Yoozquin kuzzizza. Anaž lijitum Yooz žoñinacača, aunquimi lijitum žoñiztakaz cjicjiñi cjenami. Ninacžquiztan zumpachaž cwit'azaquiča, ana ninaca irata cjisjapa.

² Tsjii noojiqui tjapa chjozakuñ paatami tjeežtaž cjequiča. Nižaza tjapa chjozakuñ pinsitami ziztaž cjequiča. Tsjii noojiqui žoñž ultim kuz tjeežtaž cjequiča.

³ Nižaza jamazit chiitanacami kjana ziztaž cjequiča. Chjozakuñ chitanacami tjapa žoñinacaqui zizaquiča.

¿JECŽQUIN EKS WAQUIZIYA?

⁴ Jaziqui ančhucqui, wejt mazinaca, tuž wejr chiižinuča. Anača eksqui tii curpu alaja conñizquiziqui. Curpu conžcu anaž iya čjulumi payi atasacha.

⁵ ¿Jecžquin antiz ančhucqui eks waquiziya? Yooz Ejpžquin eks waquiziča. Yooz Ejpqui žoñž curpu žeti tucuzinskatžcu žoñž animumi infiernuquin tjojtjapa azzizza. Jalla nižquizza chekanaqui eksqui.

⁶ Tsjii pjijska wežlaqui pizc paažkaz cwističa. Anača juc'ant valorchiz cjen, Yooz Ejpqui zapa wežlallami cjuñča.

⁷ Pero zapa žoñžquiz juc'anti cjuñča. Nižaza ančuca ach charami kanžintača, zintallquiztan zintalla. Anaž ančhucqui tsuca. Nii wežlanacžquiztan ančhucča juc'ant valorchizqui. Yooz Ejpqui ančhuc juc'ant cwitaquiča wežlanacžquiztan.

JESUCRISTUZ FAVORA CJEE

⁸ Ančucaquiz cjiwča: Jakziltat parti žoñž yujcquiz wejt favora cječhaj niiqui, nižaza wejrqui Yooz anjilanacž yujcquiz nii žoñž favorazakal chiyacha.

⁹ Jakziltat parti žoñž yujcquiz wejr ana pajñi nicačhaj niiqui, nižaza wejrqui Yooz anjilanacž yujcquiz nii žoñž quintra ana pajñi zakal cjeeča.

¹⁰ Jakzilta žoñit Yooz Epiž cuchanzquita Žoñž quintra chiyachaj ni-i-qui, pertuntaž cjesača. Pero jakzilta žoñit Yooz Espiritu Santuž quintra chiyachaj niiqui, anapanž wira pertuntaž cjequiča.

¹¹ Wiruñaquei ančhucqui juezanacž yujcquin nižaza jilirinacž yujcquin chjichtaž cjequiča, ajcz kjuyquiz. Jalla nuž chjichtiquiztan ana kuz turwaysi cjequiča, jaknužt chiyachaja, nižaza jaknužt tjurt'azalaja, jalla nii.

¹² Ančuca chiiz ora Yooz Espiritu Santuqui ančuca kuzquiz chiižjapa tjaajznaquiča, jaknužt chiizalaj, jalla nii.

CWITAZA, ZMAŽŇI KUZIZ ANA CJSJAPA

¹³ Tsjii žoñiqui Jesusižquiz paljaychiča, tuž cjican:

–Wejt Tjaajiñi Maestro, wejt jilžquiz chiinalla, wejt parti irinsa tjaa-ajo.

¹⁴ Nekztanaqui Jesusaqui nižquiz cjichiča:

–Jila, ¿kjažtiquiztan amqui wejr jilirižtakaz cheržjo? Anapanž wejr juez partirtqui, ančhuca quija azquitzjapaqui.

¹⁵ Nižaza Jesusaqui ninacžquiz cjichiča:

–Persun kuzquiz naazna, nižaza cwitaza ana zmazñi kuzziz cjisjapa. Zoñž wira kamañiqui anaž niž wacchi cusasanacquiztan yatisinsa.

¹⁶ Jalla nekztanaqui Jesusaqui tii quintu quint'ichiča, tuž cjican:

–Tsji ricach žoñi želatča. Nii žoñž yokquiziqui zkalanacaqui ancha cusa pookchiča.

¹⁷ Jalla nuž pooktiquiztan nii ricach žoñiqui kuzquiz pinsichiča, tuž cjican: “¿Kjažt wejr cjequejo? Wejt yaaz kjuyanacaqui tii ajzta zkal čheri anaž wacasača”.

¹⁸ Jalla nekztanaqui pinsichiča, tuž cjican: “Aaaa. Tuž jazic cjeeka. Wejt zkala yaaz kjuyanaca pajlnaka. Nekztanaqui tsjan pajk kjuyanaca kjuysnaka. Jalla nekz tjappach zkal čheri yaaznaka, nižaza tjapa wejt cusasanaca”.

¹⁹ Jalla nekztanaqui nii ricach žoñiqui niž persun kuzquiz cjichiča: “Aaaa. Wejrqui zmali cusasanaca yaazinča, nižaza zmali čherinaca yaazinča, ažk wata tjurñipacha. Jeejnaka, nižaza cusa lujlsnaka, licsnaka. Nižaza cuntintul cjeeka”.

²⁰ Pero Yoozqui nii žoñžquiz cjichiča, “Zumzu žoñimča amqui. Tižwanpacha amqui ticznaquiča. Am zkal čherimi am cusasanacami nii yaaztanacami inamayaž cjequiča, ¿čjuljapat cjeequi neejo? ¿Jecžtapan cjeequi neejo?”

²¹ Jaknužt nii ricach žoñžquiz watchižlaja, jalla nižta irataž wataquiča persunjapapankaz cusasa juntjapñi žoñinacžquiziqui. Nižta žoñinacaqui Yooz yujcquiziqui poripanž cjisnaquiča.

YOOZ EJPQUI NIIZQUIN KUZIZ ŽOÑINACA CWITICHA

²² Jalla nekztanaqui Jesusaqui niž tjaajinta žoñinacžquiz cjichiča:

–Ančhucaquiz tuž cjiwča. Žoñiqui žejtzjapaqui lujl čheri pecča. Jalla nuž cjenami, ančhucqui anača čherinacžquiz kuzqui llaquizizkatzqui. Nižaza žoñiqui curpu wali cjisjapa zquiti pecča. Jalla nuž cjenami ančhucqui anača zquitinacžquiz kuzqui llaquizizkatzqui.

²³ Žoñž žetiqui čherquiztan juc'anti importiča. Nižaza persun curpumi zquitquiztan ju'canti importiča.

²⁴ Wežlanacžquiz cherna. Anaž zkalami čjacča. Nižaza anaž ajza. Nižaza ana čheri yaaz quetallchizza. Nižaza ana čheri yaaz kjuychizza. Jalla nuž cjenami nii wežlanacžtaqui lujl čherinacami panž žejlča. Yooz Ejpkaž čheri tjača. Pero ančhucqui Yooz yujcquiziqui wežlanacžquiztan juc'antiž importiča. Jaziqui ančhucaquiz zakaz Yoozqui lujl čheri tjaaquiča, žejtzjapaqui.

²⁵ Anaž jec kolta žoñimi persunpacha tsjan lajcha paki atasacha, llaquiziñi kuzziz cjenami ancha lajcha pecñi kuzziz cjenami.

²⁶ Jalla nižta ana atchucažlaj niiqui, ¿kjažtiquiztan lujl čherinacžquizimi zquitinacžquizimi ančhuca kuzqui llaquizizkatjo?

²⁷ Plantanacž pajkallaž cherna. Anaž langza. Anaž kawanča. Yoozqui nii pajkallanacaž pajkkačča. Zmali finu zquiti cujtžcumi anaž jecmi pajkallquiztanami juc'ant c'achalla cjesača. Nižaza finu zquiti cujtžcumi nii ancha ricachu Salomón jiliri qui anača pajkallquiztan juc'ant c'achaqui.

²⁸ Plantanacaqui tsji upacamakaz c'achallača. Nekztanaqui jakatažu kattažu tsji jurnuquiz tjutjunzjapa ujžtača. Jalla nuž cjenami Yooz Ejpkaž nii plantanacami nižta cwitiča. Ančhucča Yoozquin ana tjapa kuzziz

žoñinaca. Ančhuczi Yooz yujcquiziqui čhjul plantaquiztanami juc'antiž importičha. Jalla nižtiquiztan Yoozqui ančhuc juc'anti cwitičha; zquitchiz panž cjequičha.

²⁹ Jalla nižtiquiztan ančhucqui ana ancha llaquiziñi kuzziz ojklaya, čhjul čhjeri kjurzquiztanami.

³⁰ Tii muntuquiz ana Yoozquin criichi žoñinacaqui ancha llaquiziñi kuzziz ojklayčha nižta cusasanaca kjurcan. Ančhucqui anačha nižta llaquiziñi kuzziz ojklayzqui. Werar Yooz Ejpchizčhucčha. Yooz Ejpqui zizza, čhjulul ančhuc pecčhaj, jalla nii. Ančhucqui čhjeri, zquiti, cusasanaca pecčha, zejtzjapa, jalla nii zizza Yooz Ejpqui.

³¹ Nižtiquiztan ančhucqui Yooz Ejpžquinpankaz walja kuzziz cjee. Nižaza niiž mantita zuma kamañquiz kuzziz cjee. Nekztanaqui Yooz Ejpqui ančhucaquiz čhjulumi cawalikaz tjaaquičha.

ARAJPACHQUIN CUSASANACCHIZ ŽOÑINACA

³² 'Nižaza Yooz Ejpqui ančhuca uchaquičha mantiñi puestuquiz. Jalla nužučha Yooz munañpaqui. Tii muntuquiz žejlcan anaž eksna, ančhucqui wejt uuzanacčhucčha, aunqui kolucullami.

³³ Ančhuca cusasa žejlñinaca tuysna. Nekztan t'akjiri kamñi žoñinacžquiz tojna. Tii muntuquiz žejlcan jaknužt ančhucaqui zuma žak quels tjaczaja, jalla nižta irata zuma munaziñi kuz tjacz waquizičha wiñaya zuma kamzjapa. Arajpachquin zuma cuntintu kamzjapa, ančhuca kuz tjaczna, zuma azquicha. Tii muntuquiziqui tjañ žoñiqui ančhuca cusasanaca kjañasačha. Arajpachquin tjañ žoñinaca ana luzasačha. Nižaza tekziqui tjujtami cjurimi ančhuca zquitinaca lulasačha. Arajpachquin tjujtami cjurimi ana želasačha.

³⁴ Jakziltat tii muntuquiz walja cusasanachizlaja, tii muntuquiz kamañ wirquiz kuz tjaačha. Pero jakziltat arajpachquin kamañ wirquiz kuz tjaačhaja jalla niiqui arajpachquin walja cusasanacchiz cjequičha.

KUZ TJACZI CJEE

³⁵ Nižaza Jesusaqui tii quintu quint'ichičha, tuž cjican:

–Arajpachquin ojkzjapa ančhucqui kuz zuma tjaczi tjewžna, tsjii tježta lamaparažtakaz.

³⁶ Tižtažtakaz cjee. Tsjii patruaqui zalsñi pjižstiquin ojkchičha. Piyunanacaqui patrunž cuttižquiz tjewža, niiž irantižquitan kjuy zan chawjcz cjetžinzjapa. Jalla nižta irata ančhucqui Yooz tjonz tjuñi zuma tjewžna.

³⁷ Weraral cjiwčha. Patrunaž tjonz oraqui jakzilta piyunanacat tjaji wajtsi tjewznačhaja, jalla ninacaqui cuntintuž cjee. Jalla nii piyunanacaqui patrunž misquiz julskattaž cjequičha. Nekztanaqui nii patrunapachaž čhjeri tjaaquičha, nižaza ninacžquiz atintaquičha. Jalla nižta irata Yoozqui paaquičha niiž tjonz tjewžñinacžquiz.

³⁸ Chica aramami, kjantatimi, čhjulorakat nii patruaqui irantižquichani. Nii oraqui jakzilta piyunanacat tjaji wajtsi tjewz tjewznačhaja, cuntintuž cjequičha.

³⁹ Tsjiilla zakaz cjiwčha, ančhucaž zizjapa. Tsjii kjuychiz žoñiqui čhjulorat tjañi tjonachaja, jalla nii ora zizaquiz niiqui, tjaji wajtsipan tjewznaquičha, nii tjañi ana luzkatzjapa, nižaza ana tjangskatzjapa. Tjañi tjonz ora zizcu, anapan niiž kjuya nužkaz ecasačha.

⁴⁰ Ančhucmi nižaza Yooz tjonz tjuñi walja listu tjacziž tjewžna. Tiripintit tsjii ana pinsita oraqui wejrqui quejpžcačha. Wejrtčha tsewctan cuchanžquita Yooz Zoñtqui.

PIZC PUNTA PIYUNANACA

⁴¹ Jalla nekztanaqui Pedruqui Jesusižquiz pewcziča, tuž cjican:

—Wejt Jiliri, ¿tii quintu quint'ichamča wejtnacaltajapakazkaya? už ¿tjapa zoñinacžtajapa, jaa?

⁴² Jesús Jiliri qui kjaaziča, tuž cjican:

—Tsji kjuj cwitiñi zoñi želatča zuma cumpliñi, nižaza zuma intintiñi. Nii kjuychiz tuyñuqui zuma zoñž kjarquiz niž kjuya ecchiča, tjapa nii kjuyquiz žejlñinacžtan. Čjjeri tjaa ora čjjeri tjajajo, jalla nuž zakaz ecchiča nii zoñž kjarquiz. ¿Ject nii zuma cumpliñi zoñejo?

⁴³ Jalla tiča nii zoñiqui. Kjuj tuyñu quejpsquizcama jakzilta zoñit niž kjuya zuma cwitican žejlčhaja, jalla niča zuma cumpliñi zoñiqui. Nižaza cuntintuž cjequiča nii zuma cwitiñi zoñiqui.

⁴⁴ Wejrqui weraral cjiwča. Kjuya tuyñuqui cumpliñi zoñž kjarquiz tjapa kjuj cusasanaca ecasača.

⁴⁵ Tsjemata cwitiñi zoñi zakaz želatča. Nii zoñiqui kuzquiz pinsichiča, “Kjuychiz tuyñuqui anaž uri tjonasaž, jaz”, cjican pinsichiča. Jalla nekztanaqui nii kjuychiz luctaka cjiñi maataka cjiñi piyunanaca wjajtñitača. Nižaza nii zoñiqui persun lujlsquin liesquin kuz tjaachiča.

⁴⁶ Tiripintit tsji ana pinsita nooj kjuychiz tuyñuqui quejpžquichiča. Tsji ana zizta ora quejpžquichiča. Jalla nižtiquiztan kjuychiz tuyñuqui nii ana zuma cwitiñi zoñžquiz juc'anti anawaliž casticu tjaaquicha. Nii ana zuma zoñiqui jaknužt ujchiz zoñinacaž castictaž cječhaja, jalla nižtapacha castictaž cjequiča.

⁴⁷ Tsji piyunaqui zumpacha niž patrunaž pecta langz zizziča. Niž patrunž langz zizcanpacha, ana langziča. Jalla nuž zizcanpacha, ana langztiquiztanaqui juc'anti castictaž wjajtzaž cjequiča.

⁴⁸ Nižaza jakzilta piyunat ana niž patrunaž pecta langz zizzaja, jalla nižta cjenpacha ana cumpličhaja, jalla niqui upa casticta cjequiča. Jakzilta zoñžquiz wacchi cusasanaca cwitajo tjaatčhaja jalla nii zoñiqui tjapa nii cusasanacquiztan quint'istanča. Jakzilta zoñžquiz wacchi cusasanaca cwitajo cumpjiita cječhaja, jalla nii zoñiqui cusasanacchiz tuyñužquiz quint'istanča tjapa cumpjiita cusasanacquiztan.

IYA TJAAJINTA

⁴⁹ Tsjiilla zakaz quint'ichiča Jesusaqui, tuž cjican:

—Tekz werjqui tsji uj peksñižtakaz tjonchinča. Nii uj peks oraqui wajiž cjila.

⁵⁰ Wejrqui tsji wali pajk prueba watača bautismužtakaz. Nižaza nii watscama, ancha llaquital cječa.

⁵¹ Werič tjontiquiztan zoñinacaqui anazumquin cjequiča; t'aka t'akaž cjequicha, wejtquiz criichinaca, ana wejtquiz criichinaca, jalla nuž.

⁵² Tii timpuquiztan nawjkchuc tsji famillanacami t'aka t'akaž cjequiča. Tsji famillquiz pjijskaltan cječhani, čjepultanac quintraž cjequiča pucultan zoñžjapaqui.

⁵³ Nižaza ejpžtan persun majchtan quintraž cjequiča. Nižaza majchžtan persun ejpžtan quintraž cjequiča. Nižaza maatan persun tjunmat matatan quintraž cjequiča. Nižaza naa tjunmat matatan persun maatan quintraž cjequiča. Nižaza kjan maatan wazatan quintraž cjequiča. Nižaza wazatan kjanatan quintraž cjequiča. Jalla nuž cjisnaquiča, wejtquiz criichinacžtan ana wejtquiz criichinacžtan.

KUZ CAMPIYA, ANA CASTICTA CJEYAJO

⁵⁴ Jalla nekztanaqui Jesusaqui zoñinacžquiz cjichiča:

–Ančhucqui cjiñchucča, wacchi tsjirinaca tajatan ulanžcaquiž niiqui, “chijnačhani”, nuž cjiñchucča. Nekztan jalla nuž chijñiž watča.

⁵⁵ Nižaza wartan quera queržcaquiž niiqui, “kjutñit cječhani”, nuž cjinčhucča. Nekztan jalla nuž kjutñiž watča.

⁵⁶ ¡Hipócrita cheechi žoñi! Ančhucqui jana lijitum kuzziz žoñinaca! Tjamž puntu tsjirž puntu walja zizñi chiiñchucča. ¿Kjažtiquiztan Yooz siñalanaca ana tantiyasajo? Kuz campiya, ima casticz ora irantan.

⁵⁷ Nižaza ¿kjažtiquiztan kamz puntu ana tantiyasajo, jaača zuma kamčhaja, jaača ana zuma kamčhaja, jalla nii?

⁵⁸ Jakziltat am quijžcu jiliržquin chjichačhaja, jalla niižquiztan pertunam mayizaquiča ana enenžcu, ima jiliržquin irantican. Am quija ana pertunazta cjenacqui, nii jiliriquire policiquire am intirjasača. Nekztanaqui nii policiaqui am carsilquire chawcwasača.

⁵⁹ Nekztanaqui wejrqui cjiwča, carsilquiztanaqui anapanim ulnasača, liwj tjappacha paczama. Anziquire kuz campiya; Yoozquiztan pertuna maya, ana casticta cjeajo.

13

YOOZQUIN KUZZIZ CJEE

¹ Nii orapacha tsjii kjaž žoñinacaqui quintu zjicchiča, Jesusižquiz mazñi. Tuž cjican quint'ichiča. Pilato cjita jiliriquire tsjii Galilea wajtchiz žoñinaca conkatchiča. Nii conta žoñinacž ljocqui animal ljocnacžtan t'ajziča. Tuquiqui animala contkalča, Yoozquin ofrenda tjaazjapa.

² Jalla nuž nonžcu Jesusaqui cjichiča:

–¿Kjažtiquiztan Galilea wajtchiz žoñinacžquiz nuž anawali watchitajo? ¿Parti Galilea wajtchiz žoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

³ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiz juc'ant anawaliž watasacha.

⁴ Jesusaqui quint'ichizakazza, tuž cjican:

–Tsjii tunca quinsakalcuni žoñinacaqui ticziča Siloé cjita wajt campanturi jalla ninacž juntuñ pajlžtiquiztan. ¿Kjažtiquiztan nižta watchitajo? ¿Parti Jerusalén wajtchiz žoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

⁵ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiz juc'ant anawaliž watasacha.

ISRAEL ŽOÑINACŽ PUNTUQUIZTAN

⁶ Jalla nekztanaqui Jesusaqui tsjii quintu zakaz quint'ichiča, tuž cjican:

–Tsjii žoñiqui niiž yokquiz jiws muntinaca čhjacchiča. Tsjii nooj ojkchiča “jiwsa pookchižcaa” cjican, ojkchiča. Irantižcu, muntinacquiz ana čhjul jiws frutanaca watchiča.

⁷ Jalla nižtiquiztan nii yoka cwitiñi žoñžquiz cjichiča: “Chera, čhjep wata jiws frutanaca kjuri tjonchinča. Ana jiws frutanaca pookchikalča. Jaziquire tii muntinaca k'atzna. Inapanikaz žejlča.”

⁸ Jalla nekztanaqui nii yoka cwitiñi žoñiqui patrunžquiz cjichiča: “Wejt patruna, tii watcamakaz žela cjee. Wejrqui yokal zumpacha kjullznača, nižaza wanžtan wanit'ača.

⁹ Jalla nižtiquiztanaqui jiws frutanaca pookz atčhani. Anapan pookaquiž niiqui, nekztanaqui k'atžtaž cjequiča”. –Jalla nuž quint'ichiča Jesusaqui.

TSJAA MAATAK ZONQUI CHJETINTATACHA

¹⁰ Tsjii jeejz tjuñquiziqui, Jesusaqui ajcz kjuyquiz tjaajnatča.

¹¹ Jalla neksz želatča tsjaa laa maatak žon. Tunca quinsakalcun watanaca laatača. Tsjii zajraqui naa žon taj chutu paatkalča. Nižtiquiztanaqui anawira ts'iru tsijsniñtača, ana čhjulu paazjapami.

¹² Jesusaqui naa žon cheržcu, kjawziča, nekztan tuž cjichiča:

–Cullacalla, am laaquiztan liwriita cjequiča.

¹³ Nekztanaqui Jesusaqui niž kjaržtan lanziča naa žonaquiz. Jalla nii orapacha naa žonqui ts'iru cjissinča. Nižtiquiztan Yooz Ejpžquin honora paljaychiñča.

¹⁴ Nii ajcz kjuy jilirizti Jesusižjapa žawjziča, nii jeejz tjuñquiz čhjetintiquiztan. Nekztanaqui nii jiliričiqui zoñinaczquiz cjičhicha:

–Sojta tjuñikaz langz waquiziča. Jalla nii langz tjuñiran laanacaqui tjonsa čhjetintaž cjisjapa. Anača jeejz tjuñquiziqui tjonzqui.

¹⁵ Jalla nekztanaqui Jesús Jiliričiqui nii jiliržquiz cjichiča:

–Ana zum kuzziz žoñinaca. Jeejz tjuñquiziqui tjapa ančhucanacaqui wacami aznumi cutzniñčhucča, kjaz liqui okajo, ¿ana jaa?

¹⁶ Taa maatak žonqui Abrahamž majch maatquiztan tjoniñča. Tunca quinsakalcun wata chututača, Satanás cjita zajraž nuž chutu paañiž cjen. ¿Kjažt tii jeejz tjuñquiziqui taa laa žonqui ana čhjetinta cjesajo? Jeejz tjuñquizmi čhjetinzpanikazza.

¹⁷ Jesusiž nuž chiitiquiztanaqui tjapa niž quintru žoñinacaqui azziquirchiča. Parti žoñinacazti cuntintutača, Jesusaž nuž pajk milajrunaca paachiž cjen.

YOOZ MANTAPARU OJKŃI ZOŃINACŽ PUNTU

¹⁸ Jalla nekztanaqui Jesusaqui cjichiča:

–Tižtača Yooz mantaparu ojkŃi žoñinacz puntučiqui. Jalla nii puntučiqui intintazkatasacha, mostaz cjita semillž puntu chiitiquiztan. Jalla tužuča.

¹⁹ Tsjii mostaza cjita semilla žejlča, ancha zkoltalla. Zoñiž čhjactan, walja pakjiž pajkča, tsjii pajk muntiž, nizta pakji. Nižaza nii mostaz muntiquiz wežlanacaqui tjuraž paasača. Jalla nužupan Yooz mantaparu ojkŃi žoñinaca yapaquiča, mostaz munti pajkŃila, jalla nižta irata.

²⁰ Nižaza Jesusaqui cjichiča:

–Tii takunaczťanzakaz Yooz mantaparu ojkŃi žoñinacz puntu intintazkatasacha. Jalla tužuča.

²¹ Tsjaa maatak žonqui čhjep tupu jac'užtan levaturžtan t'ajzinča. Nekztanaqui tjappacha nii t'anti masaqui t'amchiča. Jalla nižta iratača, tjapa kjutŃi tii muntuquiz žoñinacaqui Yooz mantita kamañchiz cjisnaquiča.

LIWRIITA ZOŃŽ PUNTU

²² Wiruñaquí Jerusalén jiczquiz ojkcan, Jesusaqui tjaajinchiča. Jakziran watatčhaja, jalla nii watjaran jochiran tjaajinchiča.

²³ Nuž tjaajnan, tsjii žoñiqui Jesusižquiz pewczíča, tuž cjican:

–Wejt Jiliri, ¿koluckaz liwriita žoñinacajo?

Nekztanaqui Jesusaqui kjaaziča, tuž cjican:

²⁴ –Ančhucqui tjapa kuz cjee, arajpach ojkŃi zkoz jicz zanquiz luzjapa. Wejrqui ančhucacquiz cjiwča. Casticz tjuñquiziqui tjapa žoñinacaqui luz pecaquiča. Nii oraqui anaž ataquiča. Jalla nižtiquiztan anzičiqui liwriiñi zanquiz luzjapa, tjapa kuz cjee.

²⁵ Tsjii noojiqui arajpach kjuychiz tuyñuqui tsijsnaquiča liwriiñi zana chawjczjapa. Ančhucqui, zawnctan cjiñinaca, nii chawjczta zanquiz t'ok t'okaquiča, tuž cjican: “Wejt jiliri, cjetznalla, cjetznalla”. Kjuychiz žoñiqui

kjaaznaquiĉha, tuŝ cjican: “Anal anĉhuc pajuĉha. ¿Jecnactĉhuckazlaj anĉhucqui?”

²⁶ Jalla nuŝ chiitiquiztan anĉhuczti zakaz chiyaĉhani, tuŝ cjican: “Amtan chica lujlchinĉha. Niŝaza wejtnaca wajt calliran tjaajinchamĉha”.

²⁷ Pero nii arajpach kjuychiz tuyñuqui kjaaznaquiĉha, tuŝ cjican: “Anĉhucqui anapal pajuĉha, cjiwla. Wejtquiztan oka, tjapa anĉhucqui ana zuma kuzzizĉhucĉha”.

²⁸ Nekztan Jesusaqui cjichiĉha:

—Abrahamŝtan, Isaacŝtan, Jacobŝtan, tjapa Yooz taku paljayñi profetanacŝtan, tjappacha ninacaqui arajpach Yooz kjuyquiz ŝelaquiĉha. Anĉhuczti zawnctanpanikaz ŝelaquiĉha. Jalla nuŝ zawnctan ŝejlcan anĉhucqui kaaquiĉha, niŝaza iŝkeŝ jojaquiĉha, ana luzzucaŝ cjen.

²⁹ Tjapa kjuttan criichi ŝoñinacaqui arajpach Yooz kjuyquin luzaquiĉha, uŝatan, wartan, tajatan, tuwantan, nuŝ tjapa kjuttan. Niŝaza nii luzzi ŝoñinacaqui arajpach Yooz kjuyquiz cusa atintitaŝ cjequiĉha. Yooz ĉhjeri luli julznaquiĉha.

³⁰ Niŝaza Yoozqui arajpachquin yekjap tii muntuquiz wirquin cjiñi ŝoñinaca tucquin cjiskataquiĉha. Niŝaza yekjap tii muntuquiz tucquin cjiñi ŝoñinaca wirquin cjiskataquiĉha.

JERUSALEN CJITA WAJTQUIN TICZ PUNTU

³¹ Jesusiŝ taku ŝerŝtan, nii noojpacha, tsjii kjaŝ fariseo ŝoñinacaqui tjonchiĉha, tuŝ cjican:

—Tekztan am oka. Herodes cjita jiliriqui am conz pecĉha.

³² Jalla nekztanac Jesusaqui kjaaziĉha, tuŝ cjican:

—Anĉhucqui nii mañus Herodesquin oka. Niiŝquin chiiŝca, tuŝ cjican: “Tsjii kjaŝ tjuñi tirapal Yooz obranacal paa-uĉha, zajranaca ĉjatkacan, laanaca ĉhjetincan. Nekztan tsjii kjaŝ tjuñquiztan wejt obra ŝerznaĉha”.

³³ Pero wejrqui tsjii kjaŝ tjuñi tiral kamaĉha, Jerusalén wajtquin ticzcama. Jerusalén wajtquin Yooz taku paljayñi profetanacaqui ticstanĉha.

³⁴ ‘Jusalén, Jerusalén wajtchiz ŝoñinaca! Anĉhucqui Yooz taku paljayñinaca coničhucĉha. Niŝaza Yooziŝ cuchanŝquita ŝoñinaca maztan ĉhjaquiñĉhucĉha. Wallpiquei persun ozmachanaca kjarŝ koztan juntiñil, jantey. Jalla niŝta irata wejrqui tii wajtchiz ŝoñinaca juntiz pecuĉha. Anĉhuczti ana wira wejtquin tjonz pequiñĉhucĉha.

³⁵ Jalla niŝtiquiztan anĉhuca wajt yokaqui ana Yooz kjarquiz ŝejlĉha. Niŝaza wejrqui cjiwĉha. Tsjii noojiquei anĉhucqui wejt puntuquiztan chiyaquiĉha, “Honorchiz cjila, tii Yooziŝ cuchanŝquita ŝoñiqui”. Jalla nii oracama, anĉhucqui wejr ana wilta cheraquiĉha.

14

TSJII CURPU TJUUCHI ZOÑIQUI CHJETINTATACHA

¹ Tsjii jeejz tjuñquizei Jesusaqui tsjii fariseo jilirŝ kjuya luli ojkiĉha. Yekja fariseo ŝoñinacaqui Jesusa awayt'atĉha.

² Niŝaza nii kjuyquiz ŝelatĉha tsjii curpu tjuuchi ŝoñi. Jesús ŝcati ŝelatĉha.

³ Nii cherŝcu Jesusaqui fariseo ŝoñinacŝquiz lii tjaajiñinacŝquiz, jalla ninacŝquiz pewcziĉha, tuŝ cjican:

—¿Jeejz tjuñquizei tsjii laa ŝoñi ĉhjetnasaj? uŝ ¿ana ĉhjetnasaj?

⁴ Ninacazti ĉh'ujukaz cjissiĉha. Nekztanaqui Jesusaqui laa ŝoñi kjawŝcu, ĉhjetinchiĉha. Nekztan laa ŝoñŝquiz cjichiĉha:

—Oka amqui —cjicanaqui.

⁵ Nekztanaqui Jesusaqui fariseo ŝoñinacŝquiz tuŝ cjichiĉha:

–Jeejz tjuñquiz cjenami aznumi wacami tujquiz tjojtsiž cjen okžcu, ¿anaž jooznasajo?

⁶ Jalla nuž chiitiquiztanaqui ana jaknuž kjaazñi atchiča.

PJIJZTA PUNTU

⁷ Nekztanaqui Jesusaqui nii kjuyquin lujlcan jalla tižta cherchiča. Kjawžta žoñinacaqui tucquin julz kjuratča, nižaza honorchiz cjis pecatča. Jalla nižta cjicjiñi cheržcu, Jesusaqui, tuž cjichiča:

⁸ –Amqui tsjii zalzñi pjijztiquiz kjawžta cjesaž niiqui, anača tucquinpan julzqui. Am jarupacha tsjii juc'ant jilir žoñiqui tjonasaž niiqui, am tucquin julzpantaž cjesača.

⁹ Jecčhalaj pucultan ančhucqui kjawzi, jalla nii kjawzñi žoñiqui amquiz chiyasača, “Am julz tii juc'ant jiliržquin tjaa”, cjican. Jalla nižtiquiztanaqui amlaqui azanpanti wirquin julz cjesača. Am aziž cjesača.

¹⁰ Ana nižta paa. Antiz tuž cjee. Tsjii zalzñi pjijztiquiz kjawztaž cjesaž niiqui, wirquinpankaz julzqui. Nekztan nii kjawzñi žoñiqui iran-tižcuqui, amquin chiyasača, tuž cjican: “Wejt k'ayi jila, ticchuc watžca, tucquin julžca”. Jalla nuž kjawžcu tucquin tjulžtiquiztan parti žoñinacž čhujcquiziqui honorchizim cjesača.

¹¹ Jakzilta žoñit parti žoñinacžquiz persun honora chii chiyachaj niiqui, wiruñaqi nii žoñiqui ch'ujukaz cjesača. Pero humilde kuzziz žoñizti honorchiz cjiskattaž cjequiča.

¹² Nižaza Jesusaqui nii kjawzñi žoñžquiz cjichiča:

–Chjeri tjaasim pecchaj niiqui, anam kjawznaquiž am persun mazi-nacžquiz, nižaza am persun jilanacžquiz, nižaza am persun famill parintinacžquiz, nižaza am ricach visinunacžquiz, jalla ninacžquiz alaja anam kjawznaquiča. Ninaca čjeri luli kjawznasaž niiqui, ninacaqui am zakaz kjawznasača. Nižtiquiztan amzakam čjeri tanznaquiča. Nižtiquiztan ana gastichim cjequiča.

¹³ Ana nižta paa. Antiz tuž cjee. Chjeri tjaasim pecchaj niiqui, kjawznaquiča pori žoñinaca, zuch žoñinaca, coj žoñinaca, zur žoñinaca, jalla ninacžquiz kjawznaquiča.

¹⁴ Nuž paažcu cuntintum cjequiča. Ninacaqui anaž čhulumi tjepñi atasacha. Yooz zuma kamañchiz žoñinacž jacatatž tjuñiž tjontan, jalla nekzim amqui tjepuntam cjequiča.

¹⁵ Jalla nuž Jesusiž chiita taku nonžcu, tsjii julzi žejlñi žoñiqui Jesusižquiz cjichiča:

–Arajpach Yooz Ejpž kjuyquin lujlñinaca cuntintuž cjequiča.

¹⁶ Jalla nekztanaqui Jesusaqui nii žoñžquiz quint'ichiča, tuž cjican:

–Tsji nooj tsjii žoñiqui pajk pjijzta paachiča. Tuquiqui walja žoñinaca kjawskatchiča pjijztiquiz.

¹⁷ Pjijzta čjeri lujlz ora piyunaqui kjawžta žoñinacžquiz cuchanžquitača, tuž cjejajo: “Tjappacha listu tjacžtača, jaziqui ž-tjona”.

¹⁸ Nekztanaqui kjawžta žoñinacaqui pasinza mayizichiča. Tsjii žoñiqui cjichiča: “Anzilla yoka kjaychinča. Jalla nii cheržquistanča. Jalla nižtiquiztan amqui wejr pasinzt'alla”.

¹⁹ Tsjiizti cjichiča: “Anzilla tunca waca kjaychiñča. Jalla nii waca yanstanča. Jalla nižtiquiztan zumaž pasinzt'alla”.

²⁰ Tsjiizti cjichiča: “Anzilla tjunatan zalzinča. Nižtiquiztan anal oki atasacha”.

²¹ Nii cuchanžquita piyunaqui quejpžcu patrunžquiz tjappacha quint'ichiča, jaknuž žoñinacat kjaaztčaja, jalla nii. Nuž quint'itiquiztan

nii patrunaqui walja žawjchi cjissiĉha. Nižaza piyunžquiz cjichiĉha: “Uri ojklayžca calliran nižaza wajt tjiyaran. Pori žoñinaca zjiyczna, nižaza zuch žoñinaca, cojonaca, zuranaca, jalla ninaca kjawžca”.

²² Wiruñaquii nii piyunaqui mazziĉha tuž cjican: “Wejt patruna, amiž mantitacama ojklaychinĉha. Nižaza iya julz campo žejlĉha”.

²³ Nekztanaqui patrunaqui cjichiĉha piyunžquiz: “Wilta ojklayžca callinacaran jicznacaran. Zoñinaca kjawkjawcan ojklayžca kjuyquiz chjijsnajo. Kjawžta žoñinacžquiz tjonkatžca”.

²⁴ Nekztan Jesusaqui cjichizakazza:

—Wejrqui cjiwĉha. Weriz primira kjawžta žoñinacaqui anapan ĉjeri lulasaĉha wejt arajpach pijztiquiziqui. —Jalla nuž cjichiĉha Jesusaqui.

JESUCRISTUZQUIN KUZZIZ PUNTU

²⁵ Walja žoñinacaqui Jesusa apziĉha. Nekztanaqui Jesusaqui tsijtscu žoñinacž kjutni quejpchiĉha, tuž cjican:

²⁶ —Jakzilta žoñit wejtquin kuzziz cjeĉhaj niiqui, niž persun ejpmi, maami, tjunmi, maatinacami, persun jilanacami, persun cullaquinacami, nižaza niž persun kamañ wirami, jalla ninacžquiztanami wejtquin juc'anti kuzziz cjistanĉha. Anaž wejtquin juc'anti kuzziz cjequiž niiqui, anaž wejt partir žoñi cjichuca cjesaĉha.

²⁷ Jakzilta žoñit wejt partir žoñi cjis pecĉhaj niiqui, tjapa kuztanž wejtquiz cjistanĉha niž persun wira apt'iz cjenami.

²⁸ Tsjilla cjesaĉha. Jequit tsjii campanturi kjuyz pecĉhaj niiqui, primiruqui gasto zumpacha tantiistanĉha, paaz wacata ana wacata, jaknuž nii campanturi tsajczjapa, jalla nii.

²⁹ Ana zumpacha tantižcu kallantaquiž niiqui, nekztan ana tsaqui atchucaž cjesaĉha. Jalla nuž ana tsajcni cheržcu parti žoñinacaqui nii žoñžquiz iñarasaĉha,

³⁰ tuž cjican: “Nii žoñiqui campantur kjuyi kallantichiĉha. Nekztan ana tsaqui atchiĉha. Ana zuma tantiichiĉha”. Jalla nuž tjasaquiĉha.

³¹ Nižaza jakzilta chawc jilirit quira zalz pecaĉhaj niiqui, primiruqui zumpacha tantiistanĉha, niž tunca warank zultatunaca tsjiizuñž paatunc warank quintra zultatunacžquiz atipata, ana atipata, jalla nii.

³² Ana atipchucažlaj niiqui, quintra jiliržquin ažquin cjen cumisiuna cuchansa, nužquiz pasinza paajo, acuerdo luzjapa.

³³ Jalla nižta, ima wejtquiz kuzziz cjen, zumpacha tantiiz waquiziĉha. Jakzilta žoñit ĉhjultakquiztanami anaž wejtquiz juc'anti kuzziz cjequiž niiqui, anapanž wejt parti žoñi cjesaĉha.

³⁴ Yacuqui zumaĉha. Yacuqui lak'ansnasaž niiqui, ĉjaknužt wilta zuma cjesajo?

³⁵ Anapanž cjesaĉha. Anaž yokjapa sirwasaĉha, nižaza anaž yok kulljapa sirwasaĉha. Jalla nuž ana sirwanami tjojtspanikazza. Jakziltažlaj cjuñchiz niiqui, zumpacha nonžna Yooz puntu intintisjapa.

15

KATCHI UUZI QUINTU

¹ Impuesto cobriñi žoñinaca nižaza ujchiz žoñinaca Jesusižquiz macjatžquichiĉha, niž taku nonzjapa.

² Jalla nižtiquiztanaqui fariseo žoñinacžtan lii tjaajiñinacžtan jalla ninacaqui Jesusiž quintra chutchiĉha, tuž cjican:

—Ti žoñiqui ujchiz žoñinacami risiwñipanikazza, nižaza ninacžtan chica ĉjeri lujlñiĉha.

³ Jalla nižtiquiztan Jesusaqui ninacžquiz quint'ichiča tuž cjican:

⁴ –Tsjii žoñiqui patak uuzichiztača. Nekztanaqui tsjiilla katchiča. Jalla nekztanaqui parti uuzinaca ilakz yokquin ecchiča, katchi uuzi wajtzcama. ¿Jakziltat ančhucaquiztan ana nižta paajo?

⁵ Nižaza katchi uuzi wajtžcuqui, azkar juntuñ tjojtžcu, awatiriqui tjonchiča, ancha cuntintu.

⁶ Nižaza kjuya irantižcuqui žcatinta visinunacžquiz nižaza mazinacžquiz kjawziča, tuž cjican: “Wejttan cuntintuž cjee. Wejt katchi uuziqui wajtchinča”.

⁷ Nižaza wejrqui cjiwča, jalla nižta iratača arajpachquinaqui. Tsjii ujchiz žoñiqui Yoozquin kuzziz cjesaž niiqui, arajpachquin žejlñinacaqui ancha cuntintuž cjisnaquiča. Llatunc tunc llatuncani ana Yoozquin kuzziz žoñinaca želačhani: “Wejrnacqui zuma kamok”, cjicanaqui. Pero arajpachquinaqui ninacžquiztan juc'anti cuntintuž cjequiča nii zinta Yoozquin kuzziz žoñiž cjen.

KATCHI PAAZ QUINTU

⁸ Jesusaqui quint'ichizakazza, tuz cjican:

–Nižaza tsjaa tunca paazziz žon želatča. Nekztanaqui tsjii paaz tjatanchinča. Paaz tjanžcu, lámpara pekzinča. Nižaza kjuya pewchinča, zumpacha. Nuž zuma pewcan, katchi paaz wajtchinča.

⁹ Nii paaz wajtžcu, mazinacžquiz nižaza žcatinta visinunacžquiz kjawzinča, tuž cjican: “Wejttan cuntintuž cjee. Wejt katchi paaz wajtchinča”.

¹⁰ Wejrqui cjiwča. Nižaza arajpachquinaqui Yooz anjilanacaqui cuntintuž cjequiča čhjulorami tsjii ujchiz žoñiqui Yoozquin kuzziz cjisnačhaja, jalla nii oraqui.

EJPZQUIZTAN ZARAKCHI MAJCH QUINTU

¹¹ Nižaza Jesucristuqui tii quintu zakaz quint'ichiča, tuž cjican:

–Tsjii žoñi želatča, pucultan lucmajch ocjalchiz.

¹² Nii upañažta majchqui ejpžquiz cjichiča: “Tata, irinsaž wejtquiz tjaall amqui”. Jalla nekztanaqui ejpqui irinsa t'akžinchiča pucultan majchnacžquiz.

¹³ Tsjii kjaž majquiztan upañažta majchqui irinsa tuychiča. Nekztan tjappacha niž cusasanaca juntjapžcu, ažkquin ojkchiča yekja nacionquin. Nekztan nii nacionquin tjappacha niž cusasanaca gastichiča, ana zuma kamcan.

¹⁴ Nužquiz tjappacha cusasanaca miržcuqui, upañažta majchqui ana čhjulchiz cjissiča, žoñi maya. Nižaza nii nacionquiz čhjeri upsiča. Upañažta majchqui čhjerž kjara passiča.

¹⁵ Nekztanac niiqui langz kjuri ojkchiča. Tsjii žoñžquiz langz wajtchiča. Nii patrunaqui jochi mantichiča, cuchi ichajo.

¹⁶ Ancha čhjeri eeczkatichiča nii ejpžquiztan zarakchi majchqui. Ana čhjulu lulimi onantaž niiqui. Jalla nekztanac cuch lulinacami chjajpinacami lujlnatakaztača.

¹⁷ Jalla nekztanaqui kuzquiz pinsiskatchiča, tuž cjican: “Tjappacha wejt ejpž piyunanacaqui cusa čhjerinaca lujlčhani. Nižaza žejtchinacami žejlčhani. Wejrzi tekzi t'akjiri želuča; čhjerž kjara pascu, ticz atučhani.

¹⁸ Quepaž wejrqui, tira wejt ejpžquin. Nižaza wejt ejpžquin cjeeča: ‘Wejt Tata, Yooz quintra am quintra uj paachinča.

¹⁹ Wejrqui anam am maati cjichucača. Kjažllami tsjii am piyunažtakaz uywalla’ ”. Jalla nuž cjican pinsichiča.

²⁰ Nekztanaqui ejpžquin zarakchiča; ejpž kjuy kjutñi ojkchiča. Ažkquin cjen ejpqui niž majch pajchiča. Kuzquiz ancha okziča, ancha k'aasztichiča. Nekztan majch zali zajtchiča. Majch žcojrzcu, chjulziča.

²¹ Nekztanaqui majchqui ejpžquiz cjichiča: “Tatay, wejrqui Yooz quintra, am quintra uj paachinča. Jaziqui wejr am maati anaž cjichuca”.

²² Jalla nekztanaqui ejpqui piyunanacžquiz cjichiča: “Uri, jila walurchiz zquiti jwesanzca. Nii zquitžtan wejt majch tjutžna. Niiž loc'anquiz zurtija majczina. Nižaza zapato tjutžna.

²³ Nekztanac ančhucqui walipunt cjew wacaž zjičzca conzjapa. Pjijztaž paaquiča. Zuma čjeriž lulaquiča.

²⁴ Wejt majch ticzižtakaz katchitača. Jaziqui ticziquiztan jacatatchižtakaz tjonchiča. Nižtami nižtan zalchinča”. Jalla nekztanaqui pjijzta payi kallantichiča.

²⁵ Jalla nuž upaňazta majch tjonz ora, niž jilaqui joch yokquintača. Kjuy žcati irantižcan, pjijzta nonziča, tsajtñi wayliž jora.

²⁶ Jalla nižtiquiztanaqui jilir majchqui tsjii tsjii piyuna kjawziča. Nuž kjawžcu, “¿Chjulut wat?” cjican, pewcziča.

²⁷ Piyunaqui kjaaziča, tuž cjican: “Am lajkqui tjonchila. Wiwusa anazak kjaž cjissi tjonchiča. Nižtiquiztan am ejpqui walipunt cjew wac conkatchiča, pjijzta paazjapa”.

²⁸ Jalla nii quintu zizcu, jilir majchqui walja žawjchiča. Pjijztiquiz ana luz pecatča. Nuž cjen ejpzakazza nii roqui ulanžquichi luzcajo.

²⁹ Nekztanaqui jilir majchqui ejpžquiz cjichiča: “Kjaž watanaca wejrqui am sirwichinča. Nižaza am mantitacama okintača. Jalla nuž cjenami ana wira tsjii cabrallami onanňamtača, wejt mazinacžtan pjijzta paazjapami.

³⁰ Anziqui tii am ana cazñi majchqui tjonchiča. Tiiqui ana zuma kamcan am paaz gastichila, ana zum maatakanacžtan zejlcan. Nuž paata cjenami, nižtajapa tsjii walipunt cjew waca conchamča”.

³¹ Jalla nekztanaqui niž ejpqui kjaaziča, tuž cjican: “Wejt maati, amqui wejt chicaž kamňampanla. Tjapaž wejtac žejl-la, niic amtacamača.

³² Tii am lajkqui ticzižtakaztača. Jaziqui ticziquiztan jacatatchižtakaz tjonchiča. Nižaza katchitača. Jaziqui wažtača. Jalla nižtiquiztan ancha cuntintuž cjen pjijzta paaz waquiziča”.

16

CUSASANACA CWITIÑI PIYUNA QUINTU

¹ Nižaza Jesusaqui niž tjaajinta žoňinacžquiz tsjii quintu zakaz quint'ichiča, tuž cjican:

–Tsjii ricach žoňi želatča. Niiž kjuy cusasanaca cwitajo tsjii piyuna utchiča. Wiruňaqui yekja žoňinacaqui nii patrunžquiz mazziča, tuž cjican: “Tii am piyunaqui am cusasanaca ancha anawali gastiñiča”.

² Jalla nekztanaqui patruaqui piyunžquiz kjawziča, tuž cjican: “¿Chjul quintut am puntuquiztan nonojo? Jaziqui jaknužum amqui wejt cusasa cwitižinchaja, jalla nii wejtquiz quint'alla. Amiž ana zuma cwitichiz cjen anam iya wejt cusasa cwitasača”.

³ Nekztanaqui nii piyunaqui pinsichiča, tuž cjican: “¿Jaziqui kjažt wejr cjisnaquejo? Wejt patruaqui wejrž jakjurpayla nii wejt langzquiztanaqui. Jaziqui ana ancha langziž cjisnula wejrqui. Wejtta azi ana žejlča, žkal yokquiz langzjapa. Nižaza žoňžquiztan tomangz eksnuča, azuča.

⁴ ¿Jalla nuž ana langzñi atchiž cjen, čhjulut paa-as?” Nekztan piyunaqui cjichiča: “Aaaa. Čhjulut paa-as, nii zizuča wejrqui. Nekztan žoñinaca wejr atintiñiž želačan. Wejr kjawznačan ninacž kjuyquizimi”.

⁵ Jalla niiž pinsita jaru piyunaqui zina zina patrunž kajchi žoñinaca kjawziča. Tsjii primira kajchi žoñžquiz pewcziča, tuž cjican: “¿Kjažum wejt patrunžquiz kajchamta?”

⁶ Kajñi žoñiqui kjaaziča, tuž cjican: “Patac turril aceite kajchinča”. Jalla nekztanaqui piyunaqui cjichiča: “Tiž am factura. Uri julzna. Yekja factura paa. Pjijska tunca turril aceitekaz cijjrzna”.

⁷ Wiruñiqui tsjiizuñ kajchi žoñžquiz pewcziča, tuž cjican: “Am, ¿kjažum kajchamta wejt patrunžquiz?” Kajñi žoñiqui kjaaziča, tuž cjican: “Patac quintal tiricu”. Nii piyunaqui cjichiča: “Tiž am factura. Nižaza yekja factura paa, quinsakal tunca quintal tiricukaz cijjrzna”.

⁸ Jalla nii piyunaž nuž paan patrunaqui nii anawal piyuna c'uñchi pajchiča, niiž cusasanaca cwitiñi. Jalla nižtažtakaz anawali kamñi žoñinacaqui tii muntuquiz cusasquin kuzziz kamča. Jalla nuž kamcan ninacaqui c'uñchi tjojnakñiča zuma kamñi žoñinacžquiztan juc'anti.

⁹ Wejrqui cjiwča. Tii ujchiz muntuquiz kamcanaqui žejlñi cusasanaca gastis waquiziča, zuma paacan tsjii zuma amigo tanzjapa. Jalla nekztan tičzcu ančhucqui kjawztaž cjequiča niiž arajpach kjuyquin.

¹⁰ Jakzilta žoñit koluc cusasanaca zumpacha cwit'ačhaj niiqui, nižaza wacchi cusasanaca zumpachazakaz cwit'aquiča. Nižaza jakzilta žoñit koluc cusasanaca ana zuma cwit'ačhaj niiqui, nižaza wacchi cusasanaca ana zuma cwit'ichiž cjequiča.

¹¹ Nižaza jakzilta žoñit tii ujchiz muntuquiz žejlñi cusasanaca ana zumpacha cwit'asačhaj niiqui, jalla nižta ana zuma kamchiž cjen, Yoozqui werar arajpach cusasanaca nii cwitiñijapa ana tjaasača.

¹² Jakzilta žoñit Yooziž tjaata cusasanaca ana zuma cwit'ačhaj niiqui jalla nižta ana zuma kamchiž cjen, Yoozqui arajpach cusasanaca tjaaz cjen pacha ana tjaasača.

¹³ Anaž jakzilta piyunami pizc patruna sirwi atasacha. Piyunaqui tsjii patrunžquizkaz kuz tjaasača. Tsjiiizuñ patrunaž jaytaquiča. Nižaza nii piyunaqui tsjii patrunžquizkaz zumpacha sirwaquiča. Nii tsjii patrunžquiz anapan zuma sirwi atasacha. Yoozmi paazmi žejlča pucultan patrunažtakaz. Pero žoñinacaqui pucultižquiz kuz ana tjaasača. Tsjii patrunžquizpankaz zuma sirwasacha.

¹⁴ Ancha paaz pecñi fariseo žoñinacaqui tjapa Jesusiž chiita taku nonziča. Jalla nuž nonžcu Jesusa iñarchiča.

¹⁵ Jesusaqui nižtiquiztan cjichizakazza:

—Ančhucqui cusa žoñižtakaz ojklayiñchucča žoñž yujcquiziqui. Yoozti ančuca kuz zizza. Tii muntuquiz žejlñi žoñinacaqui ana zuma kuzziz žoninacž honorakaz waytiča. Yooz Ejpzi nii ana zuma kuzziz žoñinaca chjaawjñipanča.

LII PUNTU

¹⁶ Nižaza Jesusaqui cjichiča:

—Juan Bautistaž tjonzcama, Moisés mantita lii azziztača. Nižaza Yooz taku paljayñi profetž tjaajintanacami azziztača, Juan Bautistaž tjonzcama. Nii timpuqui jalla nii mantita takunaca azziztača. Pero Juan Bautistaž tjontiquiztan, liwriñi Yooz taku nižaza Yooz mantita kamañ puntu paljayzqui, jalla niičha tsjan chekanaqui. Jaziqui walja žoñinacaqui Yooz mantita kamañquiz luzjapa tjapa kuz tjaacha.

¹⁷ Jalla nuž cjenami tjuñimi warawarami yokami katasača. Pero tjapa nii arajpach Yooz liizti anaž wira katasača.

JAKJURPAYZ PUNTU

¹⁸ Nižaza Jesusaqui cjichiča:

—Jakzilta žoñit niž maataka jakjurpayžcu yekja maatakžtan zalsnačhaj ni-
iqui, jalla nuž cjenaqui adulterio uj paača. Nižaza jakzilta žoñit jakjurpayta
maatakžtan zalsnačhaj niiqui, adulterio uj zakaz paača.

RICACH ZOÑŽTAN PORI ZOÑŽTAN QUINTU

¹⁹ Nižaza Jesusaqui tsjii quintu zakaz quint'ichiča, tuž cjican:

—Tsjii wali jiru ricach žoñiqui želatča. Zuma finu zquiti cujtžñitača.
Nižaza zapuru pjijztakaz ancha cusa čhjeri lujlchiča.

²⁰ Nii oraqui tsjii pori žoñi želatča Lázaro cjita. Niiž janchiqui walja zkira
cjijtchitača. Zapuru ricach žoñž kjuy zanquiz julzi žejlñitača.

²¹ Nii ricachuqui žejtchi čhjerinaca tjojtñitacha. Nii pori žoñizti tjojtta
žejtchi čhjerinaca lujlz pecñitača. Pacunacaqui pori žoñžquiz macjatžcu
niiž zkiranaca issañitača.

²² Tsjii noojiqui nii pori žoñiqui ticziča. Nekztanaqui Yooz anjilanacaqui
nii chjitchiča Yooz illzta zuma yokquin, Abraham cjita žoñžtan čica
želajo. Wiruñaquu nii ricachu žoñiqui ticzizakazza. Nekztanaqui yokquiz
tjatžtatača.

²³ Nii ricachu žoñiqui infiernuquin sufrican želatča. Nicju sufrican, tsewc
kjutñi cherchiča. Ažquiztan cherchiča Abrahamžtan Lazaružtan.

²⁴ Jalla nuž cheržcu, kjawchiča, tuž cjican: “Abraham tatay, wejr okz-
nalla. Lázaru cuchanžca, niž loc'ana kjaztan t'awžcu, wejt lasquiz lanznajo,
ch'uñkatajo. Tii asñi ujquiz anchal sufruča”.

²⁵ Abrahamzti cjichiča: “Jila, cjuñznalla, muntuquiz kamcan, ancha cusa
kamchamča. Lazaruzti t'akjiri kamchiča. Jaziqui anziqui Lazaruqui
kuztača, ancha cuntintuča. Amzti ancha sufriča.

²⁶ Nižazakaz Yoozqui pajk pal k'awa utchipanča wejtnacquiztanami
amquiztanami. Jaziqui tekztan nawjkchuc ojkz pecñinacaqui anaž okasača.
Nižaza nawjktan tjonz pecñinacaqui anaž tjonasača”.

²⁷⁻²⁸ Jalla nekztanaqui nii ricuqui cjichiča: “Abraham tatay, wejtta pji-
jskaltan jilanaca žejlča. Jaziqui am rocuča, wejt ejpž kjuyquin Lázaro
cuchanžinžcalla, ninacžquiz paljayajo, nižaza tii infiernuquiz ana tjonajo”.

²⁹ Pero Abrahamqui nižquiz kjaaziča, tuž cjican: “Ninacžta žejl-la Moisés
cijirtami nižaza Yooz taku paljayñi profetanacž cijirtami. Nii cijirtanacquiz
cazla, kuz tjaala”.

³⁰ Jalla nekztanaqui nii ricuqui kjaaziča tuž cjican: “Razunam chiiča,
Abraham tatay. Pero tsjii žoñiqui ticziquiztan ninacžquin okačhaj niiqui,
Yoozquin kuzziz cjiskatačhani”.

³¹ Nekztanaqui Abrahamqui cjichiča: “Ninacaqui Moisés mantita taku
nižaza Yooz taku paljayñinacž taku ana criyačhaj niiqui, tsjii ticziquiztan
jacatatchi žoñž takumi ana zakat criyačhani”. —Nuž quint'ichiča Jesusaqui.

17

UJQUIZ TJOJTТА PUNTU

¹ Nekztanaqui Jesusaqui niž tjaajinta žoñinacžquiz cjichiča:

—Ujquiz tjojtскatñi žoñinaca žejlñipantača. Pero Yoozqui nii ujquiz tjojt-
skatñi žoñinacaqui anawaliž watkataquiča.

² Jakzilta zoñit Yoozquin kuzziz zoñi ujquiz tjojtskatačhaj niiqui, nižta ana zum zoñinacaqui koz kot kjazquin tjojttaž waquizičha, tsjii pajk taj maztan jorquiz mokžinta. Jalla nuž tsjan cusaž cjesačha nii ujquiz tjojtskatñi zoñžtaqui.

³ Nižta zoñinaczquiztan ančhucqui walja cwitassa, ana ujquiz tjojtsjapa. Tsjii am jilanaczquiztan am quintra uj paačhaj niiqui, jalla niižquiz žumpacha chiižina, niiž kuz campiita cjeয়ো. Nekztan niiž kuz campiita cječhaja, jalla nii uj paañi zoñžquiz pertunaquičha amqui.

⁴ Zapa wiltami nii am quintra uj paañi zoñiqui pertuna mayizičhaj niiqui, amqui pertunaquičha, tsjii nooj pakallawk wilta am quintra uj paanami.

YOOZQUIN KUZIZ PUNTU

⁵ Wiruñaquí Jesusiž illzta zoñinacaqui Jesusa jiliržquiz paljaychičha tuž cjican:

–Juc'anti Yoozquin kuzziz cjisjapa yanapalla.

⁶ Nuž maytiquiztan Jesusaqui kjaazičha, tuž cjican:

–Tsji mostaz semillaqui aunqui koltallami wali pakji pakñičha. Jalla nižta iratačha ančhucqui. Yoozquin walja kuzzizčhucčhalaj niiqui, milajrunacami zakaz paasačha. Walja Yoozquin kuzziz želanaqui, tii sicómoro cjita muntiquiz cjesačha, tuž cjican, “Tekztan pajlta cjee, nižaza kotquin tjojtta cjee”. Jalla nuž chiitiquiztan nižtapachaž cjesačha.

PIYUNZ PUNTU

⁷ Jesusaqui cjichizakazza:

–Tsjilla chiyasačha. Ančhucquiztan piyunchiz zoñi želasačha. Piyunaqui joch yokquiztan tjonasačha, uywanaca itzcu, nižaza zkala yoka kjullžcu. Jalla nuž langzquiztan tjontanaqui, anapanž ančhucqui cjesačha, “Watžca, julzna, tičha lujlzna” cjicanaqui.

⁸ Ančhucqui antiz piyunžquiz cjesačha, “Chjeriž apura kisna. Nižaza wejr atintisjapa, zumpacha tjaczna. Wejrqui lulačha, licačha. Nekztanž amqui lulaquičha, nižaza licaquičha”. Jalla nuž tsjii piyunžquiz cjesačha.

⁹ Jakzilta piyunat niiž patrunž mantitanaca paačhaj niiqui, patruñaqui sparaquiz cjesajo?

¹⁰ Ančhucqui Yooz piyunažtakazza. Jalla nižtiquiztan tjapa Yooz mantitacama kamcan, ančhucalaqui chiiz waquizičha, tuž cjican, “Wejrnacqui am piyunitčha. Inakaztčha wejrnacqui. Jaknužt paaz waquizičhaja, jalla niikaz paayinčha”.

MOJKCHI JANCHICHIZ ZOÑINACA CHJETINTATACHA

¹¹ Jalla nekztanaqui Jesusaqui Jerusalén watja ojkan, Samaria cjita yoka Galilea cjita yoka nii taypiquin watchičha.

¹² Nekztanaqui tsjii watjallquiz, waj irantawc cjen, tuncaltan mojkchi janchichiz zoñinacaqui Jesusižquin zali tjonchičha. Ažkquiztan Jesusižquiz chiižinchičha.

¹³ Altu tawkžtan tuž cjichičha:

–Jesusa, Jiliri, wejtnacaquiz okznalla!

¹⁴ Jalla nii laanaca cheržcu, Jesusaqui cjichičha:

–Icliz jiliržquin persun janchi tjeežñi oka.

Jalla nuž ojkan, laanacaqui žejtchi quirchičha.

¹⁵ Tsji tsjiuqui persun janchi žejtchi cheržcu cuttichičha, Jesusiž kjutñi, altu joržtan Yooz honora waytican quejpčhičha.

16 Jalla nuž Jesusižquin wilta zalžcu, niž yujcquiz quillziča, nižaza tuzi t'okziča yoka iranta. Jesusižquiz ancha sparaquiž cjichiča. Nii žoñiqui Samaria wajtchiz žoñitača.

17 Nekztanaqui Jesusaqui cjichiča:

—¿Ančhucqui anataj tuncaltanpacha žejtchinčhucjo, tii laaquiztanajo? ¿Jakziqint tsjii partinacajo?

18 Amqui anaž tii wajtchiz žoñila. Am zinakaz quejpžquila Yoozquin honora wayticanaqui.

19 Nekztan Jesusaqui nii žoñžquiz cjichiča:

—Tsijsna, oka. Amiž tjapa kuz critiquiztan, jaziqui čhjetintamča.

YOOZ MANTIZ TJUŇI PUNTU

20 Nekztanaqui fariseo žoñinacaqui Jesusižquiz pewcziča, tuž cjican:

—¿Čhjlorat Yooz Epiž mantiz tjuñi irantižcaquiya?

Nekztanaqui Jesusaqui kjaaziča, tuž cjican:

—Yooz Epiž mantiz tjuñiqui anača cherchuca.

21 Anača “tekzipan” cjican nii tjuñi tjeznasača. Nižaza anača “nii nawjk” cjican nii tjuñi tjeznasača. Yooz mantizqui žoñinacž kuzquizpachača. Jalla nižtiquiztanac Yooz mantizqui anaž cherchuca cjesača.

22 Jalla nekztanaqui Jesusaqui niž tjaajintanacžquiz cjichiča:

—Tsjii sufris timpuquiqui irantižcaquiča ančhucquiz. Jalla nekztanac ančhucqui wejr arajpachquiztan quejpsquiñi cherz pecaquiča, tsjii noojil-lami. Pero weriž arajpachquin želan, anaž wejr cheri atasacha. Wejrqui tsewctan cuchanžquita Yooz Zoñtča.

23 Nižaza nii sufris timpuquiziqui žoñiqui Cristuž puntuquiztan parlaquiča, tuz cjican: “Arajpachquiztan chjijwžquichiča. Tekzi žejlča”. Tsjizti zakaz chiyaquiča, “Nii nacjuča Cristuqui” cjican. Pero ančhucqui anaž nicju okaquiča, nižaza nii chiita taku anaž criyaquiča.

24 Tsjii liwjliwñi rayu cjita tjonñila, jantey, jalla nuz liwjtayžcaquiča, liwjpača irantaž kjanžnaquiča. Jalla nižta irata wejrqui arajpachquiztan wilta tjonacha. Weriž tjonan, tjappacha zizasacha. Jalla nižtaž wejt tjonz tjuñiž cjequiča.

25 Anziqui primiraqui wejrqui walja sufristanča. Nižaza tii timpuquiz kamñi žoñinacžquiztan anapan criital cjeeča. Ana werj cherz pecaquiča.

26 Jaknužt Noež kamta timpuquiz watčhaja, jalla nižtazakaz wataquiča ima weriž tjonan. Wejrqui tsewctan cuchanžquita Yooz Zoñtča.

27 Noež timpuquiz jalla tuž kamñitača žoñinacaqui. Zuma čhjeri lujlñitača, nižaza licñitača. Nižaza zalžnitacha, nižaza zalžjapa tjaañitača. Jalla nuž žoñinacaqui kamchiča asta Noež pajk warcu kjuyquiz luzcama. Yooz kamañquiz kamzqui ana importayñitača. Jalla nekztanaqui kjaz juyzuquiqui tjonchicha. Jalla nii juyzuquiziqui tjappacha anawali kamñi žoñinacaqui ticziča.

28 Nižaza jaknužt Lot cjita žoñž timpuquiziqui watčhaja, jalla nižtazakaz wataquiča ima weriž tjonan. Lujlñitača, licñitača, kjayñitača, tuyñitača, čhjacñitača, y nižaza kjuya kjuyñitača. Yooz kamañquiz kamzqui ana importayñitača.

29 Jalla Lotž Sodoma cjita wajtquiztan ulantan, tiripintit uj azupri chijñi tjonchicha. Nuž chijintiquiztan tjappacha ujžcu ticziča.

30 Wejt tjonz tjuñquiziqui nižta iratazakaz wataquiča. Wejrqui tsewctan cuchanžquita Yooz Zoñtča.

³¹ 'Nii wejt tjonz tjuñquiziqui jakziltat kjuy zawncu želačhaja, anaž kjuy cusasanaca aptiñi luz waquizičha. Nižaza jakziltat joch yokquin želačhaja, anaž wajt kjuya cuttis waquizičha.

³² Lotž tjuna puntuquiztan cjuñzna.

³³ Jakziltat persun kamañquiztan ana jaytačhaja, jalla niiqui anaž arajpachquin kamaquičha. Nižaza jakziltat persun kamañ wira jaytičhaja, jalla niiqui arajpachquin wiñaya kamaquičha.

³⁴ 'Nižaza wejrqui cjiwčha. Weriz tjonan nii arama pucultan tsjii kjuyquiz tjajaquičha. Jalla nuž tjajan, tsjiiqui arajpach kjutñi waytižcu chjichtaž cjequičha, tsjiizti pachpiquiz nii kjuyquiz ectaž cjequičha.

³⁵ Nižaza pucultan maatakanaca chica jawuncan, tsjaaqui arajpach kjutñi waytižcu chjichtaž cjequičha. Tsjaazuñzti pachpiquiz ectaž cjequičha.

³⁶ Nižaza pucultan luctakanaca joch yokquin želan, tsjiiqui arajpach kjutñi waytižcu chjichtaž cjequičha, tsjiizuñzti nii joch yokquinpacha ectaž cjequičha.

³⁷ Jalla nižta tjaajinta takunaca nonžcu, niž tjaajinta žoñinacaqui pewczičha, tuž cjican:

–Wejt Jiliri, ¿jakziquin tižtanaca wataquiya?

Jalla nekztanaqui Jesusaqui kjaazičha, tuž cjican:

–Jakziquin ticzi janchi žejlčhaja, jalla nicju cunturinacaqui muzpa ajcsñičha. Jalla nižta irata jakziquin ana wali paañinacaqui žejlčhaja, jalla nicju ana walinaca wataquičha.

18

ZEW ZONATAN JUEZ JILIRZTAN QUINTU

¹ Nekztanaqui Jesusaqui tjaajinchičha, žoñinacžlaqui Yoozquin mayizizpančha, ana upa kuzcan, jalla nuž tjaajinchičha.

² Tjaajincan jalla tuž quint'ichičha:

–Tsjii juez jiliri tsjii wajtquiz želatčha. Yooz ana rispitičha, nižaza ana čhjul žoñimi rispitičha.

³ Nii wajtquizpacha želatčha tsjaa žew maatak žon. Tsjii nooj naa žonqui juez jiliržquin ojkchinčha, tsjii quija quijsquizjapa, nižaza naaža quintrižtan naa zumpacha azquichajo.

⁴⁻⁵ Ažkapan juez jiliri qui ana naaža quija nonz pecchičha. Niiž wiruñ nižtami pinsichičha, tuž cjican: “Taa žew žonqui tirapanikal quijžtan wejr molističha. Yoozmi žoñimi wejtta anaž importičha. Jalla nuž cjenami taaža quija nonznačha, wejtquiz ana tira molistajo tii quijžtan. Wejrqui ana azquichačhaj niiqui, naaž tjontjonanaqui wejt žawjwat zijcnačhani”.

⁶⁻⁷ Nekztanaqui Jesús Jiliri qui cjichičha:

–Jalla nuž čhičhičha nii anawal juez jiliri qui. Nižaza Yooz Ejpqui niž illzta žoñinacž quijanaca azquichaquičha. Ninacaqui majiñami weenami Yoozquinkaz mayizičha. Ninacž mayizitiquiztan Yoozqui ana enenžcu ninacž quintranaca azquichaquičha.

⁸ Wejrqui cjiwčha, tsjii noojiqui Yooz Ejpqui niž illztanacž quija apuraž atintaquičha. Yooziž tsewctan cuchanžquita Zoñi tjontan, Yoozqui ultimupan niž illztamiž quija azquichaquičha. Nii tjonz tjuñquiziqui, ¿tii yokquiz žejlñi žoñinacaqui Yoozquin kuzziz želasaya?

YOOZQUIN MAYIZIZ PUNTU

⁹ Tsjii žoñinacaqui želatčha, persun honora waytican, nižaza parti žoñinaca iñarcan. Jalla nii žoñinacžquiz tii quintu quint'ichičha Jesusaqui, tuž cjican:

10 —Pucultan zoñinacaqui timpluquin ojkchiča, Yoozquin mayiza. Tsjiiqui fariseo partiquiztantača. Tsjiizuñqui impuesto cobriñi zoñitača.

11 Fariseo zoñiqui tsijtchi mayiziñitača, tuž cjican: “Yooz Tata, amquiz sparaquiz cjiwča. Wejrqui anača nii yekja zoñinaca iratitqui. Ninacača tjañinacaqui, nižaza ninacača ñejonacaqui, nižaza ninacača adulteriuquiz ojklayñinacaqui. Nižaza wejrqui anača tii impuesto cobriñi iratitqui.

12 Wejrqui pizc wilta simanquiz ayunasiñča. Nižaza tjapa weriž cantiquiztan tsjii tunca parti tjaiñča”.

13 Jalla nii impuesto cobriñi zoñizti wirquin acha colzi želatča. Ana tsewcchuc cherzipanž želatča. Jalla nuž persun ujchiz cjen persun tuzi čhajccan želatča. Nižaza cjichiča: “Yooz Tatay, wejr ujchizpantča. Wejr okznalla”.

14 Jaziqui ančhucaquiz cjiwča. Nii impuesto cobriñi zoñiqui Yooz Epiž yujcquiziqui niž ujquiztan liwriitača. Niiž kjuya pertunta ojkchiča. Nii fariseo zoñizti Yooz Epiž yujcquiziqui tira ujchizpantača. Ana pertunta cjissiča. Persun honora waytiñi zoñinacaqui ultimquiziqui azipanž cjesača. Nižaza ultimquiziqui humilde kuzziz zoñinacazti honorchiz cjiskattaž cjequiča.

OCJALANACZ KUZ PUNTU

15 Tsjii nooj zoñinacaqui Jesusižquin ocjalanaca zjijcchiča, kjaržtan lanznajo. Nuž zjiican, Jesusiž tjaajinta zoñinacaqui ocjala zjijcñi zoñinaca ujziča.

16 Nuž nonžcuqui Jesusaqui kjawziča, tuž cjican:

—Ocjalanaca wejtquin tjonaj cjee, ana chiižina. Tii ocjalanacz kuz irata jalla nižta kuzzizza Yooz Epiž mantita kamañchiz zoñinacaqui.

17 Tii razunazakal chiyuča. Ana tii ocjalanacz kuz irata Yoozquin kuzziz-zalaj niiqui, ana Yooz Ejpž arajpach watja luzasača.

LIWRIITA CJIS PUNTU

18 Wiruñaquu tsjii jiliriqiu Jesusižquiz pewcziča, tuž cjican:

—Tjaajiñi Maestro, zumača amqui. Arajpach wajtquin wiñaya kamzjapa, ¿chjulut paasaya?

19 Nekztanaqui Jesusaqui kjaaziča, tuž cjican:

—¿Kjažtiquiztan amqui wejtquiz “zumačham” cjeejo? Anaž jecmi zumaqui, Yoozpankazza zumaqui.

20 Amqui Yooz mantitanaca zizza: “Anača adulteriuquiz ojklayzqui. Anača zoñimi conzqui. Anača tjañi cjisqui. Anača toscarami chiizqui. Am maa ejpča rispitzqui”.

21 Nekztanaqui nii jiliriqiu cjichiča:

—Wejrqui koltallquiztanpacha tjapa nii lii jaru cumpliñča.

22 Jalla nuž nii zoñiž chiita nonžcu, Jesusaqui cjichiča:

—Tsjiillakaz pjaltiča amtaqui. Tjappacha am čhjultak cusasanaca tuysna. Nekztan porinaczquiz nii paaz ona. Jalla nuž onanžcuqui tsewcta arajpachquin juc'ant ricachum cjequiča. Jaziqui nekztan wejttan chica ojklayñi cjesača.

23 Nii oraqui walja ricachutača nii zoñiqui. Jalla nuž Jesusiž chiitiquiztan nonžcu, walja llactazziča.

24 Nii zoñi llaquita cheržcu, Jesusaqui cjichiča:

—Ricahunacztaqui walja ch'amača Yooz kamañ jiczquiz luzqui, Yooz mantita kamañquiz cjisjapaqui.

25 Tsjii camello cjita pajk animalaqui ch'aman acuj cjuñquiz luzasača. Ricahunacztaqui tsjan ch'amača Yooz jiczquiz luzqui, Yooz mantita kamañquiz cjisjapaqui.

26 Jalla nii nonžcu, nonžni žoñinacaqui cjichiča:

—¿Jequit liwriita cjesajo?

27 Nekztanaqui Jesusaqui cjichiča:

—Zoñiqui anaž persunpacha liwrii atasača. Yoozpankazza liwriiñiqui. Yoozqui jecmi liwrii atasača.

28 Nekztanaqui Pedruqui cjichiča:

—Wejt Jiliri, wejrnacqui tjappacha ecchinča, amtan chica ojklajzjapa.

29 Jalla nekztanaqui Jesusaqui kjaaziča, tuž cjican:

—Weraral chiyuča. Jakzilta žoñimi kjuya, maa ejp, jilanaca, cullaquinaca, tjun, maatinaca, jalla ninaca ecčhaj niiqui, Yooz mantita kamañquiz ojklajzjapa,

30 tii muntuquiz žejlcan juc'anti tjaataž cjequiča. Y nižaza arajpachquin ojžcu, Yooztan wiñaya cuntintu kamaquiča.

JESUSAQUI NIIŽ PERSUN TICZ ORA MAZZICHA

31 Nekztanaqui Jesusaqui niž tuncapan tjaajintanaca tsjii latu kjawziča, tuž cjican:

—Jaziqui Jerusalén watjaž ojkla. Wejrqui tsewctan cuchanžquita Yooz Zoñtča. Tuquitanpacha Yooz taku paljayñi profetanacaqui wejt puntuquiztan mazincan cjjrchiča. Jalla nii Jerusalén wajtquin ninacž mazinta taku tjappacha cumplisnaquiča.

32 Yekja wajtchiz žoñinacžquiz intirjital cjeeča. Nižaza ancha iñartal cjeeča; arartal cjeeča. Nižaza llawzižtan tjujtal cjeeča.

33 Nižaza wjajtal cjeeča. Nekztanaqui contal cjeeča. Pero ticžcuqui čhjep majquiztan jacatatača.

34 Jalla nii tjaajinta žoñinacaqui Jesusiž chiita ana zinta intintazatča, čjul puntuquiztan chiičhaja, jalla nii. Nii takuqui ana intintichuc takužtakaztača.

ZUR ZOŃI ČHJETINTA

35 Jalla nekztanaqui Jesusaqui Jericó cjita wajt žcati irantatča. Jalla nuž irantan tsjii zur žoñi jicz latuquiz julzi želatča, niiqui kjaraz čjinchjinatča onajo.

36 Walja žoñinaca watwatni nonžcu, zur žoñiqui pewcziča, tuž cjican:

—¿Kjažtiquiztan tama tama žoñinaca watwat?

37 Nekztanaqui žoñinaca kjaaziča, tuž cjican:

—Jesusa, nii Nazaret wajtchiz žoñiqui watča tii jiczquiz.

38 Jalla nii zizcu, zur žoñiqui altu joržtan kjawchiča, tuž cjican:

—Jesusa, Davidž maati, wejr okznalla! Ana wali želuča.

39 Nii Jesusiž tuqui ojki žoñinacaqui nii zur žoñi ujziča, ch'uj želajo. Zur žoñizti juc'anti altu joržtan kjawchiča, tuž cjican:

—Davidž majch, wejr okznalla!

40 Nekztanaqui altu joržtan chiiñi nonžcu, Jesusaqui tsijtsiča. Zur žoñi zjijqui cuchanchiča. Zur žoñi žcatžinžcu Jesusaqui pewcziča, tuž cjican:

41 —¿Čhjulut amta wejr paaquiya?

Nii zur žoñiqui kjaaziča, tuž cjican:

—Wejt Jiliri, čhjujcuž cjetžinalla!

42 Nekztanaqui Jesusaqui cjichiča:

—Am čhjujcu cjetžtaj cjisla. Amiž tjapa kuz criitiquiztanaqui, čhjetintamča.

43 Nii orapacha zur žoñiqui cherñi cjissiča. Nekztanaqui Jesusižtan chica ojklayatča, Yoozquin honora waytican. Jalla nižta paata cheržcu, tjapa žoñinacaqui Yoozquin honora waytichizakazza.

19

JESUSIZTAN ZAQUEOZTAN

¹ Jalla nekztanaqui Jerusalén wajt kjutñi ojkan Jesusaqui Jericó cjita watja luzziča; nekztan nii wajt taypiquiz watchiča.

² Nicju tsjii ricach žoñi želatča Zaqueo cjita. Nii žoñiqui impuesto cobriñiž jiliritača, ancha ricachutača.

³ Nižaza nii žoñiqui Jesusa pajz pecatča. Kolta žoñitača. Jalla nižtiquiztan wacchi žoñinacž taypiquiz cjen, Jesusižquin anatača cherchuca.

⁴ Nekztan Zaqueoqui tucquin žajtžcu tsjii sicómoro cjita munti yawchiča, Jesusa chertzjapa. Nii munti, jicz latuquiz želatča, Jesusiž watz žcatipan.

⁵ Nii munti nuž watcan, Jesusaqui tsewcchuc cherziča. Nuž cheržcu cjichiča:

–Zaqueo, apura chjijwžca. Tonj tjuñi am kjuyquiz kamstanča.

⁶ Jalla nuž chiitiquiztan Zaqueoqui apura chjijwžquichiča. Ancha cuntintu Jesusa risiwchiča.

⁷ Jalla nii cheržcu, tjappacha nii žoñinacaqui Jesusiž quintra chuchchiča, tuž cjican:

–Jesusaqui nii ujchiz žoñž kjuya kami ojčča.

⁸ Jalla nekztanaqui Zaqueoqui tsijtscu, Jesusa Jiliržquiz cjichiča:

–Wejt Jiliri, tii zizza. Porinacžquiz tjaa-ača chicata wejt cusasa žejlñinaca. Nižaza jakzilta žoñžquiztan wejr incalltučhaja, jalla nii žoñžquiz wejr tjepnača pajkpic wiltiquiztan juc'anti.

⁹ Nekztanaqui Jesusaqui cjichiča:

–Tonj tjuñi tii kjuychiz žoñinacaqui liwriitača, Yooz kamañquiz luzjapa. Tii žoñiqui Abraham cjita majchmaatiquiztanpacha tjonñiča.

¹⁰ Wejrqui tsewctan cuchanžquita Yooz Zoñtča. Wejrqui tii muntuquiz tjonchinča, ujchiz žoñinaca kjawzñi, nižaza ninaca liwrii.

PIYUNANACZQUIZ PAAZ INTIRJITA QUINTU

¹¹ Jerusalén wajtž žcati želan, žejlñi žoñinacaqui pinsichiča, tuž cjican: “Anzilla Yooz mantiz tjuñiqui tjonačhani”. Jalla nuž pinsitiquiztan, nižaza nii žejlñi žoñinaca niž chiita taku nonznan, Jesusaqui tii quintu paljaychiča,

¹² tuž cjican:

–Tsji žoñi želatča rispitta famillquiztan. Nii žoñiqui ažkquin yekja wajtquin ojkiča, chawc jilir nombamiento tanzjapa. Nuž tanžcu quejpžcaquiča.

¹³ Ima ojkan, nii žoñiqui tunca niž piyunanaca kjawziča. Kjawžcu zapa maynižquiz tsjii pajk valorchiz paaz intirjichiča. Nižaza ninacžquiz cjichiča: “Tii paaztan negociož paaquiča, wejt quejpsquizcama”.

¹⁴ Nii žoñž persun wajtchiz žoñinacaqui nii walja chjaawjkatchiča. Jalla nižtiquiztan niž wirquin tsjii cumizuna mantichiča, tuž cjeyajo: “Tii žoñi anaž pecča učum chawc jiliri cjisjapa”.

¹⁵ Nižtami chawc jiliri nombritatača. Nekztan niž yoka quejpcchiča, mantizjapa. Niž irantižcuqui, kjawzñi cuchanchiča niž paaz intirjita žoñinacžquin, jaknužt zapa mayni paaztan cančhaja, jalla nii zizjapa.

¹⁶ Primir piyunaqui prisintichiča, tuž cjican: “Wejt patruna, am paaztan canchinča tunca wiltan wiltan juc'anti”.

¹⁷ Nii chawc jiliriqui nii piyunž honora paljaychiča, tuž cjican: “Ancha waliča. Zuma piyunamča amqui. Nii zkoluc paaztan zumpacha traba-jhamča. Jaziqui amqui jilirim cjequiča, tunca watja mantiñim cjequiča”.

¹⁸ Tsji piyunazti prisintichizakazza, tuž cjican: “Wejt patruna, am paaztan canchinča pjijska wiltan wiltan juc'anti”.

¹⁹ Nii chawc jiliri qui paljaychiča, tuž cjican: “Jazi qui jilirim cjequiča. Pjijska wajtquiztan mantiñim cjequiča”.

²⁰ Nekztanaqui tsjii piyunazti prisintichizakazza, tuž cjican: “Wejt pa-truna, tiž am paazqui. Tsjii pañquiz žcucžcu chjojchinča.

²¹ Amqui walja cumpliskatñi patrunamča. Jalla niztiquiztan am eksinča. Ricujñamča ana amiž nonztaqui. Nižaza ajzñamča ana amiž čhjactaqui”.

²² Nekztanaqui nii chawc jiliri qui chiižinchiča, tuž cjican: “Ana zum piyu-namča amqui. Am persun chiita takuqui am uj tjeeža. Amqui zizzamča, wejrqui kjanapanžlani cumpliskatiñ žoñtni, jalla nii. Ana weriž nonztaqui ricujiñchalani. Ana weriž čhjactaqui ajzniñchalani.

²³ Nižtiquiztanaqui, ¿kjažtiquiztanam amqui wejt paaz ana bancuquiz majczinjo? Bancuquiz majczintiquiztan wejrqui paaz machtanpacha ricu-jtasacha, tekz quejpžcu”.

²⁴ Nekztanaqui nii patrun jiliri qui parti žoñinaczquiz mantichiča, tuž cjican: “Intirjita paaz kjañzna. Nii tunca paazziz žoñžquiz tjaa”.

²⁵ Žoñinacaqui cjichiča: “¡Wejt Jiliri! Tunca paazzizza nii žoñiqui”.

²⁶ Patrun jiliri qui kjaaziča, tuž cjican: “Ančucaquiz tii razunal cjiwča. Jakzilta žoñit niž wacchi tjaata cusasa zuma cwitača, jalla nižquiz juc'anti tjaata cjequiča. Nižaza jakzilta žoñit niž koloculla tjaata cusasa ana zuma cwitačhaja, jalla nižquiztan asta nii zkolocullami kjañtaž cjequiča”.

²⁷ Nižaza nii jiliri qui mantichiča, tuž cjican: “Nii wejt quindra žoñinacaqui ana wejr pecchiča ninacz chawc jiliri cjisjapa. Jazi qui zjijczna ticju. ¡Zjijczcu wejt yujcquiz conzna!” Jalla nuž mantichiča nii jiliri qui.

JESUSAQUI JERUSALENQUIN LUZZICHA

²⁸ Jalla nuž quint'izcu, Jesusaqui Jerusalén watja tira ojkchiča.

²⁹ Betfagé cjita nižaza Betania cjita watjanaca žcatžincan, nižaza Olivos cjita curulla žcati želan, jalla nekztan pucultan niž tjaajinta žoñinaca cuchanchiča,

³⁰ tuž cjican:

–Nii nawjka watja oka. Jalla nicju ančhucqui mokta aznu wačhaquiča. Anaž jecmi nii aznuqui yawchi. Jalla nekztanaqui moktiquiztan jweržcu, tekz zjijca.

³¹ Jalla nuž jweržcu zjijcawc cjen cunamit žoñimiž pewcznačan, “¿Kjažtiquiztan tii aznu jwerjo?” cjicanaqui. Jalla nii puntu pewcztiquiztan ančhucqui kjaaznaquiča, tuž cjican: “Jesusa Jiliriž tii aznu pecča”.

³² Nekztanaqui nii pucultan tjaajintanacaqui ojkchiča. Jaknužt Jesusa chiitčhaja, jalla nuž cjitacama watchiča. Jalla nuž tsjii mokta aznu watchiča.

³³ Jalla nuž jweran, nii aznuž tuyñunacaqui pewczyča, tuž cjican:

–¿Kjažtiquiztan nii aznu jwer ančhucjo?

³⁴ Tjaajintanacaqui kjaaziča, tuž cjican:

–Jesusa Jiliri qui tii aznuž pecča.

³⁵ Nekztanaqui Jesusižquiz chjitchiča. Nekztan zquitinaca jepžcu ni-nacaqui Jesusižquiz yawkatchiča.

³⁶ Nii aznuquiz Jesusaž jiczquiz okan, žoñinacaqui zquiti chjinchiča, zquitinac juntuñ okajo chawc jilirižtakaz.

³⁷ Olivos cjita curulla watan, Jerusalén watja tjenziča. Jalla nekztanaqui tjapa niž tjaajinta žoñinacaqui altu joržtan Yooz honora wayti kallantichiča. Chipchipcan Yooz honora waytichiča, tjapa Jesusiž paata milajrunaca cherčhiz cjen.

³⁸ Nižaza cjichiča:

—¡Chawc Jiliri! ¡Yooz tjuuquiz tjonchi jiliri! ¡Honorchiz cjila! ¡Arajpacha žejlñinaca cuntintuž cjee! ¡Arajpach Yoozquin wali honorchiz cjila!

³⁹ Jalla nuž Jesusižquiz honora waytitiquiztan tsjii žejlñi fariseo žoñinacaqui paljaychiča, tuž cjican:

—Tjaajiñi Maestro, tii am apzñi žoñinaca ujna ch'uj želajo.

⁴⁰ Nekztan Jesusaqui kjaaziča, tuž cjican:

—Ančucaquiz cjiwča, tii žoñinacaž ch'uj cjisnaquila niiqui, tii maznacamiž altu joržtan chiyasača, wejt honora waytizjapa.

⁴¹ Jerusalén watja žcatžincan, jalla nii watja cheržcu, Jesusaqui nii wajtchiz žoñinacaž cjen kaachiča,

⁴² tuž cjican:

—Jerusalén wajtchiz žoñinaca, tonj tjuñquiziqui wejt puntuquiztan intintaz-tasaž niiqui, zuma cuntintuž cjitasacha. Walipankaz kamtasača. Ančuca kuznaca jeejskatz pecuča. Pero wejt puntuquiztan ančucaquiztan čhojžtača. Jaziqui ančucqui Yooz zumanaca anaž cherasača.

⁴³ Wejt puntu ana intintaziž cjen walja anawali tjuñinacaž tjonacuiča. Nii tjuñinacuiquiqui ančuca quintra žoñinacaqui tii wajtž tjiya tsjii pirka quintra paaquiča. Tjapa kjuttanz ančuca wajt muytata quintrarionacaqui želaquiča.

⁴⁴ Nižaza ančuca wajt pirkami k'ala pajltaž cjequiča. Tii wajtchiz žoñinaca ocjalanacžtanpacha contaž cjequiča. Nižaza tjappacha k'ala pampa nonžtaž cjequiča, anaž maz tawkitami želaquiča. Yoozqui anchucaquiz tsjii liwriiñi cuchanzquichiča; ančuczti nii liwriiñiqui ana pajchinčucča. Jalla nižtiquiztan tii wataquiča. —Jalla nuž cjichiča Jesusaqui.

JESUSAQUI TIMPLU PEWZICHA

⁴⁵ Jerusalén watja irantižcu, Jesusaqui timpluquiz luzziča. Timpluquiztan zawncchuc liwj tuyñinacami kjayñinacami tjirkatchiča.

⁴⁶ Ninacžquiz cjichiča:

—Cjijrta Yooz takuqui tuž cjiča: “Wejt kjuyaqui Yoozquin mayiziz kjuyača”. Ančuczti tii wejt kjuya tjañi žoñinacž kjuyažtakaz paachinčucča.

⁴⁷ Jalla nekztanaqui zapuru Jesusaqui tjajnatča timpluquiz. Pero timplu jilirinacami lii tjajjiñi maestrinacami wajt jilirinacami, jalla ninacazti jaknužt Jesusa coni atas, jalla nii kaznatča.

⁴⁸ Pero tjappacha nii wajtchiz žoñinacaqui Jesusiž taku nonzjapa kuz tjaatča. Jalla nižtiquiztan ana jaknužquiztanami nii conz puntuqui asip-tiskatz atatča.

20

¿JEC JESUSIZQUIZ MANTICHI?

¹ Zapuru Jesusaqui timpluquiz žoñinacžquiz tjajnatča, y nižaza liwriiñi Yooz taku paljayatča. Jalla nuž tjajnan, tsjii nooj timplu jilirinaca, lii tjajjiñi jilirinaca, wajt jilirinaca, jalla ninacaqui Jesusižquiz macjatchiča.

² Nuž macjatžcu Jesusižquiz paljaychiča:

—Jaziqui am chiyaquiča. ¿Jec am mantichi tii paazjapajo? Nižaza ¿jec jilirit am utchi jiliriztakaz cjisjapajo?

³ Nekztanaqui Jesusaqui kjaaziča, tuž cjican:

—Wejrmi jazic ančucaquiz zakal pewcznača.

⁴ ¿Jec Juan mantižquichi bautisjapajo? ¿Yoozkaya uz žoñinaca, ja? Kjaazna.

⁵ Jalla nuž chiitiquiztanaqui ninacpora ch'aasi kallantichiča, tuž cjican:

—¿Jaknužum cjeequi? “Yooz mantitača” cjican učum kjaaznaquiž niiqui, “¿Kjažtiquiztan ančhuc nii Juan ana criichinčhuctajo?” jalla nuž cječhan tiicni.

⁶ “Zoñiž mantitacha Juanqui” cjican učum kjaaznaquiž niiqui, tjapa zoñinacaqui učum conačhani maztan čhjaczawi. Tii zoñinacaqui Juanž puntuquiztan cjiñiča, niiqui werarapanča Yooz taku paljayñi profetaqui, jalla nii.

⁷ Nuž palt'izcu nii jilirinacaqui kjaaziča, tuž cjican:

—Wejrnacqui anal zizuča, jequit Juanqui bautisajo mantižquitčhaja, nii.

⁸ Nekztanaqui Jesusaqui cjichiča:

—Nižaza wejrqui ana zakal maznasacha, jec jiliriž mantita paa-učhaja wejrqui, nii.

ANA WAL PIYUNANACA QUINTU

⁹ Nekztanaqui Jesusaqui zoñinaczquiz paljayi kallantichiča. Paljaycan tii quintu quint'ichiča, tuž cjican:

—Tsjii patrún zoñiqui uwasanac zkala čhjaczčiča. Nekztan nii zkala partira tjaachiča piyunanaczquiz. Nekztanaqui ažkquin ojkchiča ažk tjuñi kami.

¹⁰ Uwasa ajz kujicha timpu tjontan patrúnaqui piyuna cuchanzquichiča niž partir zkala ricujzjapa. Nii pachpiquiz partira langzñi zoñinacazti patrúnaž cuchanzquita piyuna kijchcu chjatkatchiča. Ana čhjulchiz cuchanchiča.

¹¹ Nekztanaqui patrúnaqui wilta tsjiižtan piyuna cuchanzquichiča. Nekztan partir yokquiz kamñi zoñinacaqui patrúnaž cuchanzquita piyuna ch'aanchiča, nižaza kijtchiča, nižaza ana čhjulchiz cuchanchiča patrúnžquin.

¹² Nekztanaqui patrúnaqui tsjiižtan cuchanzquichiča. Nii partira zoñinacaqui cuchanzquita piyuna chjojritchiča, nižaza chjatkatchiča.

¹³ Nižtami nii yokchiz patrúnaqui pinsichiča, tuž cjican: “¿Čhjulut wejrr paas? Wejt k'ayi majch cuchnača. Jalla nuž cheržcuqui nii partira zoñinacaqui rispitačhani”.

¹⁴ Pero partira zkala langzñi zoñinacazti cuchanzquita majch cheržcu, ninacpora parlassiča, tuž cjican: “Tiiqui tjappacha tii irinsa tanznačhani. Jaziqui ticž conžla. Nekztan učumž tii zkal yokac tanznaquiča”.

¹⁵ Nuž pinsitiquiztan partira langzñi zoñinacaqui cuchanzquita majch yok tjiya jwescu conchiča.

Jaziqui pewcznuča:

—Nii zkal yokchiz patrúnaqui ččhjulukat nii zoñinacztanac paačhani?

¹⁶ Wejrqui cjiwča. Tjonžcu zkal yokchiz patrúnaqui partira langzñi zoñinaca conaquiča. Nekztanaqui patrúnaqui niž zkal yoka yejkžquin tjaaznaquiča.

Jalla nuž nii quintu nonžcu, zoñinacaqui cjichiča:

—¿Yooz munañpaqui anaj nii cjila!

¹⁷ Jesusaqui ninacz kjutñi cheržcu cjichiča:

—Wejt puntuquiztanaqui cijjrta Yooz takuqui tuž cjiča:

“Kjuy pirkiñinacaqui tsjii maz tjojtchiča. Nekztanaqui tjojtta mazqui isquinquiz cjissiča. Ultimquiziqui tucquin cjissiča”.

¹⁸ Nii maz cjen jakziltat ujquiz tjojtsnačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtsnaquiž niiqui, pulpužtakaz t'oknaquiča.

—Jalla nuž cjichiča Jesusaqui.

TASA PACZ PUNTU

¹⁹ Jesusaqui nii quintu chiyat'cha quintra žoñinacž puntu. Jalla nižtiquiztan timplu jilirinaca, nižaza lii tjaajiñi maestrinaca, jalla ninacaqui Jesusaqui tanz pecat'cha nii orapacha. Pero parti žejl'ni žoñinaca ekskcu, ana tani atchi'cha.

²⁰ Pero nii quintranacaqui Jesusižquiz tiraž awayt'at'cha. Nižaza tsjii kjažt awayt'ini žoñinaca mantichi'cha, Jesusižtan ojklajajo zuma žoñižtakaz. Nuž chica ojklajcan Jesusižquiztan ana zuma taku jwes pecat'cha, uj tjojtunzjapa. Jalla nuž uj jwezanžcu nii wajt chawc jiliržquiz intirjiz pecat'cha.

²¹ Jalla nuž awayt'ican Jesusižquiz pewczi'cha tuž cjican:

—Tjaajiñi Maestro, zizuž wejrnacqui, am werarapan tjaajiñam'cha. Kjažtam parti žoñinacac chiyaj cjee, amqui werarapankaz chiiñam'cha Yooz kamañ puntuqui.

²² Jaziqui tjaajznalla tii puntuquiztan. Wejrnacqui César cjita chawc jiliržquiz tas paaz tjaayiñ'cha. ¿Jalla nuž tas paaz tjaazqui wali cjesaya, uz anaž wali cjesaj?

²³ Pero nuž pewcziquiztan nonžcu Jesusaqui ninacž pizc kuzziz nay-chi'cha. Nekztanaqui cjichi'cha:

—¿Kjažtiquiztan an'chucqui chawc ujquin wejr tjojtskatz pecjo?

²⁴ Tsjii paaz zijca, chertzjapa.

Paaz zijcžcu, Jesusaqui cjichi'cha:

—¿Tii paazquiz jecž yujcta? ¿Nižaza tii paazquiz jecž tjuu cijirtata?

Ninacaqui kjaazi'cha:

—César cjita jilirž yujc'cha, niž tjuuzakazza.

²⁵ Nekztanaqui Jesusaqui ninacžquiz cjichi'cha:

—Chjulumi jiliržta cjenacqui jiliržquiz tjaa. Nižaza čhjulumi Yoozta cjenacqui Yoozquiz tjaa.

²⁶ Anaž jecmi Jesusižquiztan ana wal taku jwesi atasac'ha nii žejl'ni žoñinacž yujcquiz cjicanpachaqui. Jalla nuž Jesusiž kjaaztiquiztanaqui ninacaqui ispantichi'cha; ch'uju cjissi'cha.

ZOÑINACA JACATATZ PUNTU

²⁷ Wiruñacqui tsjii kjažt saduceo cjita žoñinacaqui Jesusižtan zali ojkc'chi'cha. Nii saduceo žoñinacaqui tjaajiñita'cha, ticzi žoñi'qui anapan jacatatasac'ha, nuž cjiñita'cha. Jalla nii jacatatz puntuquiztan Jesusižquiz paljaychi'cha,

²⁸ tuž cjican:

—Tjaajiñi Maestro, Moisesaqui učumnacalta cijirtkal'cha, tuž cjican: “Tsji žoñi ticznasaž ni'qui, niž tjun ana ocjalchiz cjesaž ni'qui, nekztan nii ticzi žoñž jilaqui naa žew žon tjunatan zals waquizi'cha, nii ticzi jilž cuntiquiztan ocjala paazjapa”.

²⁹ Jaziqui pakallak jilazullca želat'cha. Jilir jilaqui zalsi'cha. Nekztan ticzi'cha ana ocjalchiz.

³⁰ Nekztanaqui tsjii taypir jilaqui žew žon tjunatan zalsizakazza. Nekztan ticzizakazza ana ocjalchiz.

³¹ Nekztanaqui yekja taypir jilaqui žew žon tjunatan zalsizakazza. Niž jaru niž jaru naa tjunatan zalsi'cha tjapa nii pakallak jilazullcanacaqui. Nižaza tjappacha ticzi'cha jilazullcanacaqui. Ana ocjala ecchapan'cha.

³² Ultimquiziqui naa maatak žonqui ticzin'cha.

³³ Jaziqui žoñinaca jacatattanaqui, čjakzilta jilž tjunt cjequejo naa žonjo? Tjappacha nii pakallak jilazullcaqui naa žonatan zalsi'cha. —Jalla nuž pewczi'cha saduceo quintra žoñinacaqui.

³⁴ Jalla nižta puntuquiztanaqui Jesusaqui kjaazi'cha, tuž cjican:

–Tii muntuquiz žejlcanaqui luctakami maatakami zalza; nižaza maatinaca zalsjapa tjaača.

³⁵ Jakziltat Yoozquin kuzzizlaj niiqui ticziquiztan jacatatžcu, arajpach wajtquin želaquiča. Nicju žejlcan ana zalznaquiča. Nižaza anaž zalzmi želasača.

³⁶ Arajpachquin žejlcan, žoñinacaqui anjilažtakaz cjequiča; ana ticznasača. Nižaza jalla nuž jacatattiquiztanaqui Yooz žejtñi maatinacapanča.

³⁷ Yooz tawk libruquiz tsjii ujsñi kal quintu žejlča. Nii quintu quint'ican Moisespachača učhum zizkatchi, žoñinaca ticziquiztan jacatatñi, jalla nii. Nii Yooz tawk libruquiz Moisesqui cjiŕchiča, tuž cjican: “Yooz jiliriŕi Abrahamž Yoozza. Nižaza Isaacž Yoozza. Nižaza Jacobuž Yoozza”.

³⁸ Nii žoñinacz curpu ticziž cjenami, žejtča. Yoozqui anača ticzi žoñž Yoozqui. Niiča žejtñi žoñž Yoozqui. Tjapa Yoozquin kuzziz žoñinacaqui žejtchipan žejlča.

³⁹ Jalla nekztanaqui tsjii kjaž lii tjaažiñi maestrunacaqui cjichiča:

–Zuma Tjaažiñi Maestro, walim čiichamča.

⁴⁰ Jesusiž walja zizñi zizñi čiican quintra žoñinacaqui eksiča iya pewczjapaqui. Panž atiptatača ninacaqui.

JESUSAQUI TSJII PEWCZICHA

⁴¹ Nekztanaqui Jesusaqui cjichiča:

–Žoñinacaqui tuž cjiñiča: “Cristučha Davidž Majchqui”. ¿Kjažtiquiztan nuž cjeejo?

⁴²⁻⁴³ Davidpachača cjichi Salmos cjita libruquiz, tuž cjican:

“Yooz Ejpqui wejt chawjc jiliržquiz cjichiča: ‘Am kjojch koztan am quintri žoñinaca t'oksnacha, jalla nii t'okscama wejt žew latuquiz julzi žela amqui’ ”.

⁴⁴ Davidpachača Cristuž puntuquiztan “Wejt chawjc jiliriča” cjican čiichiča. Jalla nižtiquiztan, ¿jaknužt Cristo chawjc jiliri cjicanpacha Davidž majch cjesajo?

JUDIO LII TJAAJIÑI MAESTRUNACZ PUNTU

⁴⁵ Tjapa žoñinacz nonznan, Jesusaqui niž tjaažinta žoñinaczquiz paljayčiča, tuž cjican:

⁴⁶ –Lii tjaažiñi maestrunaczquiztan cwitaza. Ninacaqui tol zquitchiz ojklayz justasñiča, walja honorchiz cjisjapa. Nižaza palazquiz ojklaycan zuma rispitchiž tsaanskatz pecñiča. Nižaza ajcz kjuyquiz tucquin julz pecñiča. Nižaza pjijstiquiz lujlcan ancha tucquin julžcu honorchiz cjiskaz pecñiča.

⁴⁷ Nižaza ninacapacha žew maatakž cusasanaca tanzjapa, incallča. Žoñinaca incallzjapa Yooztan ažka ažka parlitažoka cjiñiča. Yoozquin tjapa kuzziz žoñinacztakaz tjeez pecča. Jalla nižtiquiztan ninacaqui juc'ant tsjan anawaliž castictaž cjequiča.

21

OFRENDA PUNTU

¹ Tsjii nooj timpluquiz žejlcan, Jesusaqui wali jiru ricach žoñinaca cherčiča ofrend cajquiz paaz uchni.

² Nižaza tsjaa poris žew maataka cherčiča. Naa žewqui pizc paazalla utchiñča.

³ Jalla nii cheržcu Jesusaqui cjichiča:

–Tii razunal cjiwča. Taa poris žew žonqui ofrend cajquiz juc'ant jila utchiñča, tjapa parti žoñinaczquiztan.

⁴Parti žoñinacaqui žejtchi paaz utchiča. Naa poris žewzti tjappacha naaža paaz utchiča; ana iya žejlča, čhjeri kjayzjapa.

JUDIUZ TIMPLU PUNTU

⁵Yekjap žoñinacaqui timplu puntuquiztan parlatča, nižaza nii timpluquiz žejlñi c'achja maznac puntuquiztan parlatča, nižaza nii Yoozquiz ofrenda tjaata puntuquiztan parlatča. Jalla nuž nonžcu timplu puntuquiztan Jesusaqui chiichiča, tuž cjican:

⁶–Tsji nooj tjapa tii timplu pajltaž cjequiča. Ana zinta tii maznaca pirkita želaquiča.

TII MUNTU TUCUZINZ PUNTUQUI

⁷Jalla nekztanaqui Jesusižquiz pewcziča, tuž cjican:

–Tjaajiñi Maestro, žčhjulatorat tii amiž chiita wataquejo? Ima amiž chiita takunaca watan, žčhjulut siñalažtakaz cjequejo?

⁸Nekztanaqui Jesusaqui cjichiča:

–Ančhucqui persunpachquiz cwitaza, anača incallskata. Walja žoñinacaqui wejt tjuu aynakanž tjonaquiča, tuž cjican: “Wejrtča Cristutqui”. Nižaza “Wajillaž Cristuž tjonaquiča”. Nuž cjicanž ojklayaquiča. Jalla nuž chiyanami ančhucqui anača criya, nižaza anaž ninacžtan apznaquiča.

⁹Chjulatorat quira zalz quintumi nižaza kichas zalz quintumi želačhaj niiqui ančhucqui wiraž ana tsucaquiča. Nuž: watanami imaž tii muntu tucuzinzqui irjatžcaquiča. Jalla nižta ana walinacača primiraqui watstanqui.

¹⁰Jesusaqui tira paljaychiča, tuž cjican:

–Tsji nacionžtan tsji nacionžtan kichasaquiča nacionpora. Nacionnacquiztan quiranaca zalassaquiča.

¹¹Nižaza pajk terremotonacaž wataquiča, yokaž chjekinskatcan. Nižaza parti yokaran wali chawc mach'a želaquiča. Nižaza parti yokaran anawal cona želaquiča. Nižaza arajpachquin anawali ispantichucanacaž parizaquiča, pajk siñalažtakaz wataquiča.

¹²Pero ima tižtanaca watcan ančhucqui tantaž cjequiča, nižaza kijchtaž cjequiča. Nižaza ajcz kjuyquin chjichtaž cjequiča uj jwesanzjapa. Nižaza carsilquiz chawctaž cjequiča. Nižaza wali chawjc jilirž yujcquin chjichtaž cjequiča. Jalla nižtanacaž ančucaquiz wataquiča, ančucaž wejtquin kuzziz cjen.

¹³Jilirž yujcquiz chjichta cjen, ančhucqui wejt favoraž tjurt'auquiča.

¹⁴Ima jilirž yujcquiz tjurt'ican ančhucqui ančuca kuzquiz ana tantiiz waquiziča, jaknužt tjurt'ačhaja, jalla nii.

¹⁵Tjurt'iñi chiiz oraqui weril zizñi taku tjaažcača ančuca kuzquiz. Nii ančucaž zizñi taku chiitiquiztan anaž jecmi ančuca quintra kjaazñi atasacha. Inakaz cjisnaquiča.

¹⁶Ančhucqui tarasuntaž cjequiča. Maa ejp, jilanaca, famillanaca, mazinaca, jalla ninacžquiztanami tarasuntaž cjequiča ančhucqui. Nekztan yekjap ančucaquiztan contaž cjequiča.

¹⁷Nižaza wacchi tii muntuquiz kamñi žoñinacaqui ančucaquiz chjaawjkataquiča, weriž cjen.

¹⁸Jalla nuž cjenami anaž zinta ančuca ach charami pertiskatta cjequiča.

¹⁹Nižaza sufrichiž cjenami jakziltat zumpacha Yoozquin tjurt'ichi cječhaja, Yooztan wiñaya cuntintu kamaquiča.

²⁰Jesusaqui cjichizakazza:

–Jerusalén watja zultatuž muyuntita cjen, ančhucqui naaznaquiča, ul-timu nii watjaqui t'ezintaž cjeekalaka, jalla nuž cjequiča ančhucqui.

21 Jalla nuž naazcan, Judea yokquin žejlñi žoñinacaqui cur kjutñi zajtcu atipz waquiziča. Nižaza Jerusalén wajtchiz žoñinacaqui wajtquiztan ulanz waquiziča. Nižaza joch yokquin žejlñi žoñinacaqui ana wajtquin quejpsquiz waquiziča, atipz waquiziča.

22 Nii noojiqui Yoozqui Israel žoñinaca casticaquiča. Casticz puntuquiztan tjapa Yooz tawk libruquiz cjiirtaqui cumplisnaquiča.

23 ¡Ic maatakanacajay! ¡Wawa t'ichiñi maatakanacajay! Ancha ana wali sufraquiča. ¡Tjapa tii yokquiz žejlñi žoñinacajay! Ančaž llact'azaquiča, castictaž cjequiča.

24 Žoñinacaqui quirquiz ticziž cjequiča. Yekjap žoñinacacazti tanžcu chjich-taž cjequiča yekja nacionquin. Nižaza yekja wajtchiz žoñinacaqui tii wajtchiz žoñinaca mantaquiča, nii yekjanacž timpu tucuzinžcama, nižaza Yooz munañpa timpucama.

25 'Jalla nekztanaqui tjuñquizimi jiizquizimi warawarquizimi, jalla ninačžquiz siñalanaca wataquiča. Nižaza pajk kot ljojkiž kjawaquiča. Jalla nižtiquiztan tii yokquiz žejlñi žoñinacaqui walja tsucchi kuzziz cjequiča, nižaza turwayžinta kuzziz cjequiča.

26 Arajpachquin žejlñi kjananacami čhjekinskattaž cjequiča. Jalla nii cheržcu žoñinacaqui pinsaquiča, tii muntu kjažt wataquejo, jalla nii. Tii muntu tucuzinz tjewznaquiča. Jalla nižta watan žoñinacaqui tsucscukaz tismayaquiča.

27 Jalla nekztanaqui žoñinacaqui wejr, nii tsewtan cuchanžquita Yooz Žoñi, quejpžquiñi cheraquiča. Walja kjancan wejt azi tjeežcan tsjir taypiquiz tjonača.

28 Jalla nižta anawalinaca wati kallantan, ančhucqui walja Yoozquin kuzziz cjee. Achamiž wayta, tsewcchucča cherna. Wajillaž ančuca ultim liwriiz tjuñi tjonaquiča.

29 Nižaza Jesusaqui tii quintu quint'ichiča tuž cjican:

–Higo muntiquiztan naazna; čhjul muntimi naazna.

30 Ančhucmi tsjii munti ch'ojñapachaž c'ajan tuž zizza, kjutunz timpu žcatžinča, jalla nii.

31 Jalla nižta irataž tii weriž chiitanaca watan, ančhucqui tuž zizaquiča, Yooz mantiz tjuñi žcatžinča, jalla nii.

32 'Tii razunal cjiwča. Ima tjapa tii timpuquiz kamñi žoñinacaž ticznán, tjapa weriž chiitanaca wataquiča.

33 Arajpachami yokami tucuzinžnaquiča. Wejt takuzti anapanž tucuzinžnaquiča, panž cumplisnaquiča.

34 'Ančhucqui persunpachquiz cwitaza. Ančhucqui anaž turpi kuzziz cjee. Ana wali kamz cjen, nižaza licz cjen, nižaza tii wir cusasanacžquiz kuz tjaaž cjen, jalla nuž cjen žoñinacaqui turpi kuzzizza. Ana zuma kaman Yooz tjonz tjuñi tiripintit ančhuc tanaquiča

35 tsjii trampaqui tiripintitž tanža, jalla nižta irataž Yoozqui tii muntuquiz ana wali kamñi žoñinaca tiripintit tanaquiča, casticzjapa.

36 Ančhuczti listu tjaczi tjewzñi cjee. Zapuru ančhucqui Yoozquiztan azziz cjisjapa mayiza, tjapa watñi anawalinacquiztan atipzjapa, nižaza tsewtan cuchanžquita Yooz Žoñž yujcquiz zuma prisintizjapa.

37 Jalla nuž tjaažinčiča Jesusaqui. Majiñqui Jesusaqui timpluquiz tjaažnatča zapuru. Weenqui Olivos cjita curullquin želi okatča.

38 Tjapa žoñinacaqui wentan timpluquiz tjonatča Jesusiž taku nonžni.

22

JESUSA TANZ TANTIITA

¹ Jalla nekztanaqui ana liwaturchiz t'anta lujlz pjijsa irantižcatča. Nii pjijsaqui pascua cjitatača.

² Nii oraqui timplu jilirinacami lii tjaajiñi maestrunacami, “¿Jaknužt Jesusa conas?” cjican kazziča. Pero ninacaqui parti žoñinaca walja ekskū, ana conī atchiča.

³ Jalla nekztanaqui Satanás cjita zajraqui Judas kuzquiz luzziča. Judasqui Iscariote cjitazakaztača. Judasqui parti tuncapan illzta žoñinacžquiztan nekztantača.

⁴ Judasqui timplu chawc jilirinacžtanami, timplu zultatž jilirinacžtanami parli ojkchiča. Ninacžtan zalžcu, parlichiča, jaknužt ninacž kjarquiz Jesusa intirjas, jalla nii.

⁵ Jalla nuž Judas parlitiquiztan quintra žoñinacaqui ancha cuntintutača. Paaz tjaaz compromitchiča.

⁶ Jalla nižtiquiztan Judasqui asiptichiča, “Way” cjican. Nekztanaqui tantiya kallantichiča, jaknužt ana tama žoñi želan Jesusa intirjas, jalla nii.

SANTA CENA PAACHICHA

⁷ Jalla nekztanaqui ana liwaturchiz t'anta lujlz pjijsaqui irantižquichiča. Nii pjijsaqui tsjii uuzi wilana conspantača, pascua pjijsa paazjapa.

⁸ Nekztanaqui Jesusaqui pucultan niž tjaajintanaca cuchanchiča. Pedružtan Juanžtan ninacatača. Ima cuchancan ninacžquiz tuž cjichiča:

—Ančhucquiž oka, učumnacaž pascua čhjeri lujlzjapa, tjaczca.

⁹ Nekztanaqui nii pucultan tjaajintanacaqui Jesusižquiz pewcziča, tuž cjican:

—¿Jakziquin wejrnacqui čhjeri tjacznaquiya?

¹⁰ Jesusaqui kjaaziča, tuž cjican:

—Ančhucqui watja luzcu, tsjii žoñžtan zalaquiča kjaz luuz kuzzi. Nii žoñž wirquiz apznaquiča, jakziquin luzačhaja, jalla nekz.

¹¹ Jalla nekz luzcu nii kjuychiz žoñžquiz paljayaquiča, tuž cjican: “Wejt Tjaajiñi cjiča: ¿Jakziquin visitz kjuya žejlya, wejt tjaajintanacžtan pascu čhjeri lujlzjapaya?”

¹² Nekztanaqui tsewcta pisuquiz tsjii pajk kjuya tjeeznaquiča ančhucaquiz. Nii kjuya listu tjaczta cjequiča. Jalla nekz čhjeri lujlz tjacznaquiča.

¹³ Jalla nekztanaqui nii pucultanaqui ojkchiča. Nekztan Jesusiž chiitacama watchiča. Jaziqui nekziqui pascu čhjeri kissiča.

¹⁴ Pascu čhjeri lujlz ora cjen, Jesusaqui niž illzta žoñinacžtan misquiz julziča.

¹⁵ Jalla nuž julžcu Jesusaqui ninacžquiz cjichiča:

—Wejrqui ančhucatan tii pascu pjijsa čhjeri lujlzjapa ancha pecchinpanča, ima ticzan.

¹⁶ Ančhucaquiz cjiwčha, ančhucatan ana iya tii pjijsa paača, čhjuloracamat Yooz ultimu tjapa mantačhaja, jalla nii oracama. Nekztan tii pjijsa wilta paa-ača.

¹⁷ Jalla nekztanaqui Jesusaqui persun kjaržtan wasu tanziča. Nekztan Yooz Ejpžquin sparaquiž cjichiča. Nekztanaqui niž illztanacžquiz cjichiča:

—Tii wasu tanžna. Ančhuccama tojžcuqui liczna.

¹⁸ Tekztan nawjkchuc wejrqui uwas kjazqui anal iya licača, čhjuloracamat Yooz tjapa mantačhaja, niicama.

¹⁹ Jalla nii liczcuqui, Jesusaqui persun kjaržtan t'anta tanzicha. Nekztan Yooz Ejpžquin sparaquiz cjichicha. Nekztanaqui t'anta kjolžcu niž illz-tanaczquiz tjaachicha, tuž cjican:

–Tiičha wejt curpuž cuntaqui. Tii wejt curpuqui intirjitaž cjequičha ančhuca laycu. Nižaza wejr cjuñžcu, tii lujlznaquičha.

²⁰ Nekztan čhjeri lujlžcu, wasu tanzicha. Nekztan niž tuqui chiita taku irata chiichizakazza, tuž cjican:

–Wejt ljocqui ančhuca laycu tjawktaž cjequičha. Wejt ljocžtan ew žejtz kamaña ut'aytaž cjequičha. Tii wazuquiztan liczqui wejt ljoc cuntiquiztančha.

²¹ 'Wejt quintra tarasunni žoñiqui wejttan chicapachačha tii misquiz.

²² Wejrqui tsewctan cuchanžquita Yooz Zoñtčha. Wejrqui Yooz Epiž munañpi jaru jalla nii kamañ jiczquiz okačha. Wejt quintra tarasunni žoñžquizzti anawaliž cjisnaquičha.

²³ Jalla nuž chiitiquiztan tjaajinta žoñinacaqui ninacpora pewcsassičha:

–¿Jequit wejrnacquiztan nii tarasunni žoñi cjes? –Nuž cjican ninacpora pewcsassičha.

¿JEQUIT TUCQUIN CJEEQUI?

²⁴ Jalla niž wiruñaquei nii tjaajintanacaqui ch'aassičha, ject tucquin naazi cjeequi, jalla nii.

²⁵ Pero Jesusaqui ninaczquiz cjichicha:

–Chawc jilirinacaqui persun wajtchiz žoñinaca mantiñičha anawal patrunažtakaz. Nižaza nii jilirinacaqui mantita žoñinaczquiz jilirž honorakaz waytiskatčha, “walipan paačha tii jiliriquirei”, cjican.

²⁶ Ančhuczti anaž nižta paaz waquizičha. Antiz ančhucqui tižta paaz waquizičha. Jakziltat tsjan chawc jilirižlaj niiquei, tjowažtakaz cjis waquizičha. Nižaza jakziltat mantiñižlaj niiquei, piyunažtakaz cjis waquizičha.

²⁷ ¿Ject tucquin chekan žoñejo? ¿Misquiz julžni žoñej chekanaqui? Už ¿nii misquiz atintiñi žoñej, jaa? Tii razunal cjiwčha: Misquiz julžni žoñičha tucquin chekanaqui. Jalla nuž cjenami wejrqui ančhucaporquiz atintiñi žoñižtakaztčha.

²⁸ 'Ančhucqui wejttan chica žejlchinčhucpančha wejtquiz anawali watanami. Wejtquiztan ana zarakchinčhucčha.

²⁹ Jalla nižtiquiztan wejrqui ančhuc uchačha, mantiñi jilirinaca cjisjapa. Jaknužt wejt Yooz Ejpqui mantiñi jiliri cjisjapa wejr utčhaja, jalla nižta.

³⁰ Jalla nuž cjen ančhucqui arajpach wajtquin wejttan chica želaquičha, nižaza wejttan chica lujlznaquičha. Nižaza nekziquirei wejttan chica jilirž sillquiz julznaquičha tuncapan Israel t'akquiz žoninaca pjalzjapa.

SIMON PEDRUQUI JESUSA ANA PAJÑI CHIYAQUICHA

³¹ Nekztan Jesusaqui cjichicha:

–Simona, Simona, tiim zizaquičha amqui. Satanasqui am pecčha, niž parti cjiskatzjapa. Trigožtakaz layinz pecčha, ujquiz tjojtskatzjapa.

³² Simona, am laycu tjurt'izinčinčha ana juc'anti upa kuzziz cjejajo. Amqui Yoozquin tjapa kuztan quejpžcu am jilanaca yanapaquičha tjup kuzziz tjurt'ajo.

³³ Nekztanaqui Simonaqui cjichicha:

–Wejt Jiliri, wejrqui listučha amtan chica ojkzjapa; carsilquizimi lusasačha; nizaza amtan chicapachami ticsnasačha.

³⁴ Jalla nuž chiitiquiztanacaqui Jesusaqui cjichicha:

–Pedro, amquiz chiyučha, ima wallpaž kjawan, amqui wejt puntuquiztan nicaquičha. Chjep wilta wejr ana pajñim chiyaquičha.

JESUSIZ CHIIZINTA TAKUNACA

³⁵ Jalla nekztanaqui Jesusaqui paljaychiča, tuž cjican:

–Tuquiqui wejrqui ančhuc cuchanchinča ana quelzziz, nižaza ana paazziz, nižaza ana yekjat čhjatchiz. Jalla nuž okan ¿ančhucaquiz čhjulut pjaltichiya?

Nekztanaqui ninacaqui kjaaziča:

–Anaz čhjulumi pjaltichiča, –cjican.

³⁶ Nekztanaqui Jesusaqui ninaczquiz cjichiča:

–Anziqui jakziltat quelzziz cječhaja, nii quelzqui chjicha. Nižaza jakziltat paazziz cječhaja, nii paazqui chjicha. Jakziltat ana armichiz žejlčhaja, persun chaquita tuyžla, arma kjayžjapa.

³⁷ Ančhucaquiz chiyučha. Wejt puntuquiztanaqui Yooz takuqui tuž cjiča: “Castictaž cjequiča anawal žoñinacztan chica”. Wejt persunquiz cumplistanča nii cjiirta Yooz takuqui. Nižaza tjapa cjiirta Yooz takuqui wejt puntuquiztan cumplistanča.

³⁸ Jalla nekztanaqui ninacaqui cjichiča:

–Wejt Jiliri, tekzi pizc arma žejlča.

Jesusaqui kjaaziča:

–Nužquizka cjila, –cjican.

JESUSAQUI YOOZ EJPZQUIN MAYIZICHICHA

³⁹ Jalla nekztanaqui Jesusaqui ulanchiča. Olivos cjita curullquin ojkchiča, jalla nicju ojkñipantača. Tjaajinta žoñinacaqui Jesusižquiz apziča.

⁴⁰ Olivos cjita curulla irantižcu, Jesusaqui cjichiča:

–Yooz Ejpžquin mayiza ana ujquiz tjojtsjapa.

⁴¹ Nekztanaqui Jesusaqui niž tjaajintanaczquiztan žoñiž maz čhjacta, jalla nužullquin ojkchiča. Jalla nicju quillsiča Yooz Ejpžquin mayizizjapa.

⁴² Mayizican cjichiča:

–Yooz Tata, amqui munaquiž niiqui, wejr liwriyalla tii sufrisquiztan. Pero anal wejt kuzcama ojkz pecučha. Jaknuž am kuz munčhaja, jalla niicama ojkz pecučha.

⁴³ Jalla nii oraqui arajpachquiztan tsjii Yooz Epiž cuchanzquita anjilaqui jeczquichiča, Jesusa azi tjaazjapa.

⁴⁴ Jesusaqui jalla nuž ancha llact'azcan, tjapa aztan Yoozquin mayizatča. Jalla nuž mayizan ancha pjalni pjatziča ljocžtakaz čhjujatča yok kjutni.

⁴⁵ Yoozquin mayiziz žeržcu, tsijtsiča Jesusaqui. Nekztanaqui niž tjaajintanaczquiz quejpciča. Ninaca llaquizinpantiž tjajatča. Nuž cjen Jesusaqui tjajni zalchiča.

⁴⁶ Jalla nekztanaqui Jesusaqui cjichiča:

–¿Ančhucqui kjažtiquiztan tjaj-jo? Zaazna, Yoozquin mayiza ana ujquiz tjojtsjapa.

JESUSA PRESO TANTA

⁴⁷ Jesusaž ima parla žerznan, walja žoñinaca tjonchiča. Judas cjita žoñiqui tucquinpan tjonchiča. Judasqui nii tuncapan illzta žoñinacz partiquiztan-tača. Nekztan Jesusižquin macjatchiča chjulzjapa.

⁴⁸ Jesusaqui Judasquiz cjichiča:

–Judas, ¿wejr tsjii chjulžcum amqui tarazunaquiya? Wejrtča Yooz cuchanzquita žoñtqui.

⁴⁹ Jesusižtan žejlni žoñinacaqui jalla nižta cheržcu, pewcziča, tuž cjican:

–Wejt Jiliri, ¿cuchillu armižtan tjurt'aquiya?

⁵⁰ Tsjii nii tjaajintanacžquiztan timplu jilirž piyuna čhjojritchiča, žew cjuñi chjajtžinchiča.

⁵¹ Pero Jesusaqui cjichiča:

—Nužquizkaz cjee. Armižtan ana iya tjurt'aquiča.

Nekztanaqui nii orapacha Jesusaqui nii piyunž cjuñi lanžcu čhjetinchiča.

⁵² Timplu chawc jilirinacami nižaza timplu zultatž jilirinacami, nižaza wajt jilirinacami, jalla ninacami Jesusa preso chjichi tjonchiča. Ninacžquiz paljaychiča Jesusaqui, tuž cjican:

—¿Kjažtiquiztan ančhucqui cuchillu armižtan, nižaza tuñžtan tjonch-inchucta, wejr tanzjapaya? ¿Wejrqui tjañ žoñtkaya?

⁵³ Zapuru timpluquiz kamchinča ančhucatan chica. Nii oraqui wejr ana kjaž cjichinčucča. Pero anziča ančuca tanz oraqui. Ti orakaz zumchiquiz kamñinacaqui mantasača.

PEDRUQUI JESUSA ANA PAJŃI CHIICHICHA

⁵⁴ Jalla nekztanaqui žoñinacaqui Jesusa preso tanchiča. Tanžcu timplu chawc jilirž kjuya chjitchiča. Pedruqui ažkquiztanalla apziča.

⁵⁵ Jalla nii jilirž kjuy patio taypiquiz tsjii uj luminaru taaziča. Žoñinacaqui uj muytata julzi želatča. Nižaza Pedruqui ninacžtan chica julzi želatča.

⁵⁶ Jalla nuž uj kjanquiz julzi želan, tsjaa piyun žonqui Pedro žejlñi cherch-inča. Nekztan naaqui cjichinča:

—Tii žoñiqui nii žoñžtan chica ojklayñitala, niiž tiic, ¿ana jaa?

⁵⁷ Pedruzti nuž cjitiquiztan nicchiča, tuž cjican:

—Cullaca, nii žoñi anal pajuča.

⁵⁸ Jalla niiž wiruñpacha, tsjiizuñ Pedro cherchizakazza. Jalla nuž cheržcu, cjichiča:

—Amqui nii parti žoñimla.

Nekztanaqui Pedruqui kjaaziča; tuž cjican:

—Anapanča wejrqui.

⁵⁹ Tsjii orquiztanaqui yekja žoñiqui paljaychizakazza, tuž cjican:

—Ultim werara, tii žoñiqui nii žoñžtan chica ojklayñipantala. Tiiqui Galilea wajtchiz žoñizakazla.

⁶⁰ Jalla nekztanaqui Pedruqui cjichiča:

—Jila, čhjulukam nižta chiičhani, anal zizuča.

Jalla nuž chiyan nii orapachaqui tsjii wallpi jora kjawchiča.

⁶¹ Jalla nuž wallpi jora kjawan, Jesusaqui Pedruž kjutñi kjutžcu cheržquichiča. Jalla nižtiquiztan Pedruqui, Jesús Jilirž tuqui chiita cjuñziča. Tuquiqui Jesusaqui cjichiča: “Ima wallpaž kjawan, amqui wejt puntuquiztan nicaquiča. Chjep wilta wejr ana pajñim chiyaquiča”.

⁶² Jalla nuž watžcu, Pedruqui ulanchiča. Nuž ulanžcu ancha kaachiča, Jesusa ana pajñi chiižcu.

⁶³ Jesusa itzñi žoñinacaqui walja iñarchiča. Nižaza Jesusa wjajtchiča.

⁶⁴ Nižaza Jesusiž čhjujcu chawjczinžcu yujcquiz kijtchiča, tuž cjican:

—¡Tantiyalla! ¿Ject am kijchjo?

⁶⁵ Nižaza niiž quintra čhjul anawalinacami chiichiča, nuž iñarchiča.

JESUSA JILIRINACZ YUJCQUIZ CHJICHTA

⁶⁶ Tjuñiž tjewctanalla, tjapa judío jilirinacaqui juntassiča, wajt jilirinacami, timplu jilirinacami, lii tjaajiñinacami, jalla ninacami. Jalla nekztanaqui Jesusa chawjc parliz kjuya chjitchiča. Nicju ajczi jilirinacžquin apantichiča. Nekztan jilirinacaqui niižquiz pecunchiča, tuž cjican:

⁶⁷ —Jaziqui am chiya, ¿ampanim Cristumpanikaya?

Jesusaqui kjaaziča, tuž cjican:

—Wejrqui “jesalla” cjež niiqui, anaž wejr criyaquiž ančhucqui.

⁶⁸ Nižaza wejrqui ančhucakuiz pewcznaž niiqui, anaž wejr werara kjaazta cjeeča. Nižaza wejr anaž cujtznaquiča

⁶⁹ Wejrqui tsewctan cuchanžquita Yooz Zoñtča. Tekztanpacha wejrqui tjapa azziz Yooz Ejpž žew latuquiz julzil cjeeča. —Jalla nuž kjaaziča Jesusaqui.

⁷⁰ Jalla nekztanaqui tjapa nii žejlñi žoñinacaqui pecunchiča, tuž cjican:

—¿Am Yooz Majchimpanikaya?

Nekztan Jesusaqui kjaaziča, tuž cjican:

—Wejrpanča, ančhucž pecunča, jalla nužupanča.

⁷¹ Jalla nekztanaqui ninacaqui cjichiča:

—¿Čhjul juc'antiž tisticu tumpasajo? Učhumpachala niiz persun ata chiiñi nonztaqui, ana wali chiichiča, “Yooz Majčča wejrqui” cjican.

23

JESUSIZTAN PILATO CJITA JILIRZTAN

¹ Jalla nekztanaqui tjapa nii žejlñi jilirinacaqui tsijtsiča. Nekztanaqui Jesusa chjitchiča Pilato cjita jiliržquin.

² Jalla nicju uj tjojtñi kallantichiča, tuž cjican:

—Wejrnacqui tii žoñi wajtchinča, tii wajtchiz žoñinacžquiz anawaliž ap-tjapcan zelatča. Jalla nuž wajtchinča. Tii žoñizakaz cjiča: “Učhumqui Romanž jilirž tasa ana tjaz waquiziča” jalla nuž cjiča tiiqui. Nižaza cjiča, “Wejrtča Yooz cuchanžquita Cristutqui”. Nuž cjican, cjiča, “Wejrtča chawc jiliritqui”.

³ Jalla nekztanaqui Pilato cjita jiliri qui tuž pewczyča:

—¿Judío wajtchiz žoñinacž chawc jilirim amya?

Nekztan Jesusaqui kjaaziča, tuž cjican:

—Jalla nužupanča, am nuž chiita, jalla nii.

⁴ Nekztanaqui Pilatuqui timplu chawc jilirinacžquiz, nižaza žejlñi žoñinacžquiz cjichiča:

—Anal tii žoñžquiz čhjul ujmi wačuča.

⁵ Nii žoñinacazti ancha ujquiz tjojtskatz pecatča. Jalla nižtiquiztan cjichiča:

—Tii žoñiqui niiz tjajintižtan waljaž tjojktila tjapa Judea yokquin žejlñi žoñinacaqui. Primiraqui Galilea yokquinž nižta paatča tiiqui. Jaziqui tekzi nižtazakaz paača.

JESUSA HERODIZQUIZ CHJICHTA

⁶ Jalla nuž nonžcu, Pilatuqui pewczyča, tuž cjican:

—¿Tiiqui Galilea yokchiz žoñikaya?

⁷ “Jesalla” cjican kjaaztan, Pilatuqui Herodes cjita Galilea chawc jiliržquin nii Jesusa cuchanchiča. Herodesqui Jerusalén wajtquiz želatča nii ora.

⁸ Jesusa cheržcuqui Herodesaqui ancha cuntintutača. Walja niiz pun-tuquiztan quintunaca nonchiča. Jalla nižtiquiztan ažkanaca Jesusižtan zalz pecatča. Jesusa milajru paañi cherz pecatča.

⁹ Herodesaqui walja pewcñi kallantichiča. Pero Jesusazti ana kjaazñi žejlchiča.

¹⁰ Jalla nicju zakaz timplu jilirinacami lii tjajiniñinacami chicapacha želatča. Ninacaqui walja Jesusiž quintra chiichiča, uj tjojtunzjapa.

11 Herodesaqui zultatunacžtan Jesusa iñarchiĉha. Burla paachiĉha. Zultatunacaqui Jesusižquiz chawc jilirž punchu tjutziĉha. Jalla nekztanaqui Herodesaqui wilta Pilatužquin cuchanžquichiĉha.

12 Nii oraqui Herodestan Pilatužtan amigo pajassitaĉha. Niiž tuquiqui quintrataĉha.

JESUSA PILATUZQUIN CUCHANTA

13 Jalla nekztanaqui Pilatuqui juntjapĉhiĉha timplu jilirinacami wajt jilirinacami, nižaza žoñinacami.

14 Juntjapžcu, ĉjichiĉha:

—Anĉhucqui wejtquiz tii žoñi zjiĉchinĉhucĉha, tuž ĉjican: “Tii žoñiqui žoñinacž aptjapñiĉha”. Nekztanaqui anĉhuca yujcquiz tiižquiz pecunchinla. Jalla nuž pecuntiquiztan tii žoñž ujqui ana watchinpanla, anhucaž tii žoñžquiz uj tjojtuntiquiztanaqui.

15 Herodesaqui nižazakaz ana ĉhjul ujmi watchiĉha. Jalla nižtiquiztan wilta wejtquin cuchanžquitaĉha. Ziza anĉhucqui, tii žoñiqui anapanž ticz waquiziĉha.

16 Jaziqui cunkal casticaĉha, nekztanaqui cutsnaĉha.

17 Nii pjiſtiquiz ĉjenaqui Pilat jiliriĉqui cuzturumpichiztaĉha, tsjii pres žoñi liwrii cuts, jalla nii. Nii cuzturumpi paañitaĉha žoñinacž kuz wali ĉjisjapa.

18 Jalla nuž Pilatuž ĉiitiquiztanaqui tjappacha nii žoñinacaqui kjawi kallantichiĉha, tuž ĉjican:

—¡Panž ĉhjichla tiiĉqui! ¡Antiz Barrabás cutsla!

19 Jalla nii Barrabasqui carsilquiz chawctataĉha, nii wajtquin jilirž quintra žoñinaca aptjaptkalĉha, y nižaza žoñiž contkalĉha. Jalla nižtiquiztan carsilquiz chawjctataĉha.

20 Pilatuqui Jesusa cuts peccan žoñinacžquiz wilta paljayĉhiĉha.

21 Nii žoñinacazti juc'anti altu joržtan kjawĉhiĉha, tuž ĉjican:

—¡Cruzquiz ch'awczna! ¡Cruzquiz ch'awczna!

22 ĉhjep wiltiquiz Pilatuqui paljayĉhiĉha tuž ĉjican.

—Tii žoñi, ĉĉhjul anawali paachejo? ¡Wejrqui tii žoñž uj ana wachula! ¡Anaž ticz waquiziĉha tiiĉqui! ¡Jaziqui cunkal casticaĉha, nekztanac cutsnaĉha!

23 Pero nii žoñinacazti juc'anti kjawĉhiĉha, “Cruzquiz ch'awczna” ĉjican. Timplu jilirinacami žoñinacami ancha kjawĉhiĉha, Pilatuž kuz atipscama.

24 Jalla nuž kjawtiquiztan Pilatuqui ninacž kuzcama paachiĉha. Jesusa cruzquiz ch'awczcajo mantichiĉha.

25 Nižaza Pilatuqui Barrabás ĉjita žoñi cutziĉha žoñinacž kuzcama. Nii Barrabasqui carsilquiztaĉha, jilirž quintra žoñinaca aptjaptiquiztan, nižaza žoñi contiquiztan. Pilatuqui Jesusa intirjichiĉha nii žoñinacž kuzcama wali ĉjeyajo.

JESUSA CRUZQUIZ CH'AWCTA

26 Jalla nekztanaqui zultatunacaqui Jesusa ĉhjitchiĉha, cruzquiz ch'awczjapa. Jalla nuž ĉhjichan tsjii žoñi tanzĉha cruza tjuzjapa. Nii žoñiqui Cirene wajtĉhiztaĉha, Simona ĉjitataĉha. Jochquiztan tjonatĉha. Jalla nuž Simona tanžcu zultatunacaqui Jesusiž cruza tjuzziĉha. Nekztan Jesusiž wirquiz ojkkatchiĉha.

27 Walja žoñinacaqui apznatĉha. Walja maatakanaca kaacan kjawcan ancha llaquita apzicha.

28 Pero Jesusaqui maatakanacžquiz ĉeržcu paljayĉhiĉha, tuž ĉjican:

—Jerusalén wajtĉhiz maatakanaca, wejtquiztan ana kaa. Anĉhuca persunjapa nižaza anĉhuca maatinacžquiztan kaa.

²⁹ Tsjii ora tjonacuiča. Nii oraqui žoñinacaqui sufris cjen chiyaquiča, “Ana majtñi maatakanacaqui cuntintuž cjequiča. Nižaza anaž icchi maatakanacaqui cuntintuž cjequiča. Nižaza anaž piz t'ichiñi maatakanacaqui cuntintuž cjequiča”.

³⁰ Nii ora zakaz žoñinacaqui walja sufris cjen curunacžquiz paljayaquiča, tuž cjican: “Wejtnac juntuñ tjojtžca”. Nižaza lumanacžquiz cjequiča, “Wejrnacž chjojsna, tsjii tjatta cunta”.

³¹ Tsjii ch'ojñi muntiquiz tižta paaquiz niiqui, kjoñ muntiquiz juc'ant ana wali paaquiča. —Jalla nuž paljaychiča Jesusaqui.

³² Zultatunacaqui pucultan tjañinaca cruzquiz ch'awczjapa chjitchiča Jesusižtan chica.

³³ Calavera cjita yoka irantižcu, Jesusa cruzquiz ch'awcchiča. Nižaza nii pucultan tjañinaca cruzquiz ch'awctazakaztača, tsjii tjañizti žew latuquiztan, tsjii tjañizti zkar latuquiztan.

³⁴ Cruzquiz ch'awctan, Jesusaqui cjichiča:

—Yooz Tatay, tii žoñinaca pertuna, čhjulut paačhaja, anaž intintiča ninacaqui.

Nii ora zultatunacaqui Jesusiž zquiti tanzjapa, zurtiyassiča.

³⁵ Jalla nekzi žoñinacaqui walja chekznatča. Jilirinacami ancha burla paachiča, tuž cjican:

—Tiiqui yekjanaca liwriichiča. Ultim werar Cristumčhalaj niiqui, Yooziž illztamčhalaj niiqui, persunpacha liwriyalla.

³⁶ Nižaza zultatunacaqui burla paachiča. Macjatžcu jar vinu tirinchiča.

³⁷ Nižaza cjichiča:

—Amqui judionacž chawc jilirimčhalaj, niiqui, persunpacha liwriyalla.

³⁸ Nižaza cruzquiz Jesusiž ach juntuñ litranaca cijrtatača. Chjep tawkquiztan cijrtatača, griego taku, latín taku, hebreo taku. Jalla tuž cijrtatača: “Tiiča judionacž chawc jiliriqi”.

³⁹ Tsjii ch'awcta tjañi žoñiqui Jesusižquiz ana wal taku chiichiča, tuž cjican:

—Amqui Cristumčhalaj niiqui, persunpacha liwriyalla. Nižaza wejrnacmiž liwriya.

⁴⁰ Tsjii ch'awcta tjañizti nii tjañ mazquiz ujziča, tuž cjican:

—Amqui cruzquiz ch'awctazakazza. ¿Am anam Yooz eks, kjažtatajo?

⁴¹ Učhumqui ujquiztan sufristanča. Cruzquiz ch'awcta cjispanz waquiziča. Tii žoñizti ana čhjul ujchizza.

⁴² Nekztan nii tsjii tjañ žoñiqui Jesusižquiz paljaychiča, tuž cjican:

—Jesusa, čhjulorat amqui mantiz kallantačhaja, jalla nii ora wejr cjuñznalla.

⁴³ Nekztanaqui Jesusaqui kjaaziča, tuž cjican:

—Weraral amquiz cjiwča, tonjtanpacha amqui wejttan chica cjequiča, Paraíso cjita zuma yokquinaqui.

JESUSAQUI TICZICHA

⁴⁴ Nii oraqui taypuruž cjisnatča. Tjapa nii yokaqui zumchi cjissiča, majñakak oracama.

⁴⁵ Tjuñiqui zumchi cjissizakazza. Nižaza pajk timplu cortina chicata wja-jrziča.

⁴⁶ Jalla nekztanaqui Jesusaqui altu joržtan kjawchiča, tuž cjican:

—Yooz Tatay, am kjarquiz wejt animu cumpjiyuča.

Jalla nuž chiižcu, ticziča.

⁴⁷ Jalla nuž watchi cheržcu tsjii romanž zultat jiliriqiu Yooz honora paljay-chičha, tuž cjican:

—¡Ultim weraratakalča, tiiqui lijitum žoñitakalča! Ana ujchiztakalča.

⁴⁸ Nižaza nuž watchi cheržcu tjapa nii cherñi žoñinacaqui ancha llaquita ojkchiča.

⁴⁹ Jesusiž mazinacami nižaza nii Jesusa Galilea wajtquiztan apzi maatakanacami ažkquiztan chekzcan quirchiča. Tsijsucakaz cheksiča nii watñiqui.

JESUSIZ CURPU SIPULTURQUIZ TJATZTA

⁵⁰ Tsjii zuma žoñi želatča José cjita. Yooz mantitacama kamñitača. Judea yokquin Arimatea wajtchiz žoñitača. Judiuž jilirinacž partitača.

⁵¹ Nii zuma Josequi Yooz mantiz tjuñiž tjewsñipantača. Nižaza niiqui anatača Jesusa konz kuzzizqui parti jilirinacžtanaqui.

⁵² Nekztan Pilatužquin ojkchiča Jesusiž curpu mayi.

⁵³ Nekztanaqui Josequi Jesusiž curpu cruzquiztan apakžcu tsjii wali pajk pañužtan capziča. Nekztanaqui sipulturquiz tjaztiča. Nii sipulturuqui wali pajk mazquiz pjettatakalča. Anatakalča yekja almami tjatta niiqui.

⁵⁴ Jeejz tjuñi žcatžintiquiztan, žoñinacaqui tjaczatča jeejz tjuñquiz žejlžjapa.

⁵⁵ Nii Galilea yokquiztan Jesusižtan chica tjonchi maatakaqui Juzquiz apziča, Jesusiž sipulturu cheri, jaknužt tjaztažlaja, nii cheri.

⁵⁶ Jalla nekztanaqui persun kjuya quejpžcu, zuma ulurchiz aceitenaca nižaza tjajlinz cremanaca jalla nii tjacziča. Nekztanaqui jeejz tjuñquiziqui jeejziča, judiuž lii jaru.

24

JESUSAQUI JACATATCHICHA

¹ Tumincuqui simana kalltiznan maatakanacaqui Jesusiž sipultura ojkchiča walja wentan. Tjazta ulurchiz aceitenaca chjitchičha, Jesusiž curpu tjajlinzjapa. Jalla nuž okan yekja maatakanacaqui cumpant'ichizakazza.

² Jalla nicju irantižcu nii sipulturu pjuczta mazqui cjetžta cherziča.

³ Nekztanaqui sipulturquiz luzziča. Pero Jesusiž curpuqui ana wajtchiča.

⁴ Jalla nižtiquiztan ninacž kuz turwayskatatča. Ana jaknužquin zizi atchiča, čjulu paachuca, jalla nii. Nuž želan pucultan luctak žoñižtakaz tsi-jtsi cherziča. Ninacž zquiti walja llijatča. Maatakanacžtan chica cjissiča.

⁵ Jalla nuž cheržcu walja tsucchiča maatakanacaqui. Tuzi t'okziča. Jalla nuž cjen pucultan luctakžtakaz anjilaqui chiižinchiča maatakžquiz, tuž cjican:

—¿Kjažtiquiztam ančhucqui ticzinacporquiz žejtñi žoñi kjurjo?

⁶ Anaž tekz žejlča niiqui. Jacatatchičha niiqui. Ančhucž cjuñzna, Galilea yokquiz ojklayan Jesusaqui nižta mazinchipanla, jalla nii.

⁷ Nicju Jesusaqui mazinchiča, “Yooz Epiž cuchanžquita Zoñtča wejrqui. Ujchiz žoñinacž kjarquiz intirjital cjeeča. Nižaza cruzquiz ch'awcžcu contal cjeeča. Pero čhjep majquiztanaqui jacatatača”. Jalla nuž Jesusaqui mazinchitača.

⁸ Jalla nuž chiyan maatakanacaqui cjuñziča Jesusiž mazintanaca.

⁹ Jalla nekztanaqui sipulturquiztan quejpžcu, tjappacha quint'ichiča niiz tuncamani illzta žoñinacžquiz, nižaza tjapa nekz žejlñi žoñinacžquiz.

¹⁰ Jalla nii quint'iñi maatakanacaqui tižta tjuuchiztača: María Magdale-natača, Juanatača, Jacobuž maatača Mariiqui, nižaza tsjii kjaž yekja maatakanacatača. Jalla ninacaqui Jesusiž illzta žoñinaczquiz quint'ichiča, jaknužt watchi, jalla nii.

¹¹ Jalla nii maatakanacz quint'ita anapan criichiča Jesusiž illzta žoñinacaqui.

—¿Chjulukat lucuratažtakaz chiičhani nii maatakanacaqui? —jalla nuž cjichiča Jesusiž illzta žoñinacaqui.

¹² Jalla nuž ana crižcumi Pedruqui ulanžcu sipulturu cherzñi zajtchiča. Colžcu sipulturu kjuylchuc cherziča. Nii capžta pañunaca tsjii latu chjo-jkžta želatča. Jalla nii cheržcu, walja kuzquiz pinsican ojkchiča, čhjulut watčhaja, jalla nii.

EMAUS CJITA WAJTQUIN OJKTA

¹³ Nii noojpacha pucultan Jesusiž tjaajinta žoñinacaqui Emaús cjita watjaž okatča. Emaús watjaqui tsjii tuncaman kilometrotača Jerusalén wajtquiz-tan.

¹⁴ Jiczquiz ojkcan, ninacpora parllassatča, tjapa Jesusiž puntu watchi-naca, jalla nii.

¹⁵ Nuž parlasan, Jesusapachača žcatžinžquichi. Nekztan ninacžtan chica ojkchiča.

¹⁶ Jesusižtan chica ojkcanami, nii pucultanaqui anapan pajñi cjissiča.

¹⁷ Jalla nekztanaqui Jesusaqui ninaczquiz pewczičha, tuž cjican:

—Jiczquiz ojkcan, ¿čhjul puntu ančhucqui parlasjo? ¿Kjažtiquiztan llaquita ančhuc ojkjo?

¹⁸ Tsjiizuñqui Cleofás cjitatača. Jalla niiqui kjaaziča, tuž cjican:

—Tjapa žoñinacaqui Jerusalén wajtquiz wajtchi quintu zizza. Am nekz žejlcan, ¿nii watchinaca anam ziz, jaa?

¹⁹ Nekztanaqui Jesusaqui kjaaziča, tuž cjican:

—¿Chjulu watchitaya?

Nekztanaqui nii pucultanaqui cjichiča:

—Tii quintu žejlča. Tsjii Jesusa cjita žoñi želatča, Nazaret wajtchiz žoñi. Yooz taku paljayñi profetatača niiqui. Yooz Ejpž yujcquizimi žoñinacz yujcquizimi walja Yooz aztan milajrunaca paachiča. Nižaza Yooz taku zumapan parličičha.

²⁰ Jalla nekztanaqui učhum timplu jilirinacami učhum wajt jilirinacami nii Jesusa intirjichiča cruzquiz ch'awczjapa, conzjapa.

²¹ Wejrnacqui cjetučha, “Niiqui Israel wajtchiz žoñinaca liwriyaa” cjichin-tača. Nižaza tonjtanpacha čhjep majča, tižta watchiqui.

²²⁻²³ Wejtnacaquiztan tsjii kjaž maatakanacaqui wentan Jesusiž sipul-turu cherzñi ojkchiča. Jalla nekztanac “Jesusiž curpu ana žejlča” cji-can tjonchiča. Tjonžcu quint'ichiča, tižta. Sipulturquin anjilanaca chertkalča. Anjilanacaqui cjitkalča “Jesusaqui vivo žejtchiča” cjican. Jalla nuž quint'itkalča maatakanacaqui. Jalla nuž quint'itiquiztan tsucch-inča wejrnacqui.

²⁴ Jalla nii quintu nonžcu tsjii kjažt wejtnaca mazinacaqui sipulturu cherzñi ojkchiča. Nii maatakaž quint'ita, jalla nižtapacha cherziča. Pero Jesusa ana cherchiča.

²⁵ Jalla nekztanaqui Jesusaqui cjichiča:

—Ancha ana intintiñi ančhucqui. ¿Kjažtatajo? ¡Ancha ch'aman criich-inčhucča tjapa Yooz taku paljayñi profetanacz cijjrtaqui!

²⁶ Ima honorchiz mantican, Cristuqui nuž sufrispantaž niic, ¿ana jaa?

27 Jalla nekztanaqui Jesusaqui ninacžquiz tjaajñi kallantichiča, tjapa cijirta Yooz takunaca niž puntuquiztan, jalla nii. Tjaajincan, Moisés cijirta libruquiztan kallantichiča. Nižaza tjappacha Yooz taku paljayñi profetanacž libruquiztan tjaajinchiča niž persun puntuquiztan.

28 Jalla nekztanaqui jakziquin ojktčhaja, jalla nicju irantitan, Jesusaqui tira wajtž cjichitača.

29 Nii pucultan žoñinacaqui Jesusižquiz rocatča, tuž cjican:

–Wejtnacatan žela. Tjuñi zezillaž cjissa, joz zumča.

Nekztanaqui Jesusaqui ninacžtan chica tsjii kjuyquiz želi luzziča.

30 Nekztanaqui tjapa ninacaqui misquiz julziča. Nuž julžcu Jesusaqui t'anta tanzicha niž kjaržtan. Nekztanaqui Yooz Ejpžquin sparaquiž cjichiča. Nekztan ninacžquiz tojziča.

31 Nuž paan nii pucultan žoñinacaqui Jesusa pajñiž cjissiča, čhujqui cjetzintažtakaz. Pero nii orapacha Jesusaqui liwj katchiča.

32 Nii pucultanaqui ninacpora parlassiča, tuž cjican:

–Učhumnacatan jiczquiz okan nižaza Yooz taku tjaajnan, učhumnaca kuzqui ancha zint'atča. Jalla nižtataž, žana jaa?

33 Jalla nekztanaqui ana tjewžcu Jerusalén watja quejpchiča. Jalla nicju Jesusiž tuncaman illzta žoñinacžtan zalchiča, yekja mazinacžtan juntazzi.

34 Ninacaqui cjichiča:

–Ultim werara jacatatchipanča Jesusa Jiliriqiu. Simonaqui zakaz cherchiča.

35 Nekztanaqui nii pucultanaqui zakaz quint'ichiča, jaknužt jicquiz okan, ninacžquiz watčhaja, jalla nii. Nižaza jaknužt Jesusižquiz pajtčhaja t'anta tojznan, nii quint'ichizakazza.

JESUSAQUI TIRIPINTIT PARIZICHICA

36 Jalla nuž parlan, Jesusapachača ninacž taypiquiz tsijtsiqui. Jesusaqui ninacžquiz tsaanchiča, tuž cjican:

–žZuma kuzziz cjee!

37 Ninacaqui ancha ispantichi cjissiča, ancha tsucchiča. Pinsichiča, “Almaž caa” cjican.

38 Pero Jesusaqui cjichiča:

–žKjažtiquiztan ančhucqui tsucchinčhucta? žKjažtiquiztam wejt puntuquiztan ančuca kuzquiz turwaysita?

39 Wejt kjaradž cherna. Wejt kjojčaž cherna. Wejrpachača. Lanzna. Chera. Tsjii alma animuqui ana janchichizza, nižaza ana tsjijchizza. Ančhucqui cherča, wejrtča janchichizmi tsjijchizmi.

40 Jalla nuž chiican, Jesusaqui kjaranaca kjojchanaca tjeeziča.

41 Jalla nekztanaqui nii žejlñi žoñinacaqui kuzquiz pinsichiča, “Jesusaqui žejlča werara, ana werara”, nii. Nižtami cuntintutača. Ispantichi želan, Jesusaqui ninacžquiz cjichiča:

–Ančhucalta žčhjulut lujlžjapa žejl?

42 Nekztanaqui Jesusižquiz tjaachiča ch'iz canca, nižaza mazk'a.

43 Jesusaqui nii čhjeri tanžcu lujlchiča ninacaž cheran.

44 Nekztanac cjichiča:

–Tuquiqui ančhucaltan žejlcan ančucaquiz mazinchintača, jaknužt wejtquiz watstantažlaja, jalla nii. Jaziqui cumplispantača tjapa wejt puntuquiztan cijirta Yooz takunaca. Moisesqui wejt puntuquiztan cijirchiča, nižaza tuquita Yooz taku paljayñi profetanacaqui cijirchizakazza wejt puntuquiztan. Nižaza salmos cjita liwruquiz cijirta zakaztača wejt puntuquiztan. Jalla nii tjapa cumplispantača.

⁴⁵ Jalla nekztanaqui Yooz taku tjaajincan zumpacha intintiskatchičha.

⁴⁶ Nižaza cjichičha:

–Jalla tuž cjiirtatačha. Cristuqui ticspantačha. Nižaza čhjep majquiztan jacatatspantačha.

⁴⁷ Nekztan Cristuž mantita kamañquiz kamcan žoñinacaqui tjapa kjutñi nacionanacaran liwriiñi taku paljaystančha. Jerusalén wajtquiztan liwriiñi taku paljayi kallantistančha. Jalla tuž cjican, paljayaquičha, “Yoozquin kuzziz cjee, nižaza kuznaca campiya, ujnaca pertunta cjisjapa”.

⁴⁸ Ančhucqui jalla nižtapacha paljayaquičha. Tisticunacačha ančhucqui.

⁴⁹ Yooz Ejpqui ančhucaquiz taku compromitchičha ančhuca kuzquiz Espiritu Santu cuchanzjapa. Wejrqui ančhucaquiz wajilla cuchanzcačha nii wejt Yooz Epiž compromitta Espiritu Santo, jalla nii. Nižaza tii Jerusalén wajtquizpachaž kamla, tsewctan cuchanzquita Espiritu Santuž azi tanzcama.

JESUSA ARAJPACHQUIN CHJICHTA

⁵⁰ Jalla nekztanaqui Jesusaqui ninaca chjitchičha wajtž tjiya, Betania cjita watjacama. Jalla nicju kjara waytižcu, ninacžquiz cjichičha:

–Yooz Ejpqui ančhucaquiz zuma yanapla.

⁵¹ Jalla nuž chiižcuqui, Jesusaqui ninacžquiztan zarakchičha. Tsewcchucpacha waytiscu chjichtatačha.

⁵² Nii ecta žoñinacaqui Jesucristuž honora paljayžcu Jerusalén cjita watja ancha cuntintuž cuttižquichičha.

⁵³ Jalla nicju ninacaqui timpluquiz pan žejlchičha, Yooztajapa honora waytican. Jalla nužoj cjila. Amén.

EL SANTO EVANGELIO SEGUN SAN JUAN

YOOZ TAKU CJITACHA JESUCRISTUQUI

¹ Ima tii muntu želan Jesucristo želatča. Jalla niiča Yooz Taku cjita. Nižaza Yooz Ejpžtanča. Niimi Yoozzakazza.

² Primirquiztanpacha niiqui Yooz Ejpžtanpanča.

³ Jalla niž cjen Yoozqui tjappacha paachiča. Tjapa niž paatacamača. Anaž yekjaž paataqui žejlča.

⁴ Jalla nižakazza žeti tjaachiqui. Nižaza žejtcan žoñinacaqui persun kuzquiz zuma kamaña zizasacha. Tsjii kjanažtakaz Jesucristuqui Yooz zuma kamaña žoñž kuzquiz zizkatñiča.

⁵ Jaknužt tsjii kjanaqui zumchiquiz kjančhaja, jalla nižta Jesucristuqui zumchiquiz ojklayñi žoñinacž kuzquiz zuma kamaña zizkatča. Nii zumchiquiz ojklayñi žoñinacača ana zuma kamañchizqui. Pero Jesucristuž cjenpankaz Yooz zuma kamaña zizasacha.

⁶ Tsjii Yooziž cuchanžquita žoñi želatča, Juan cjita.

⁷ Nižaza Jesucristuča zuma kamaña zizkatñiqui. Juanqui Jesucristuž puntuquiztan mazñi tjončiča, tsjii kjanažtakaz. Nižaza testicu cunta Jesucristuž puntu werara mazzinčiča. Tjapa žoñinacžquiz nuž mazzinčiča, Jesucristužquiz criyajo.

⁸ Juanqui anača ultim Yooz zuma kamaña zizkatñiqui. Antiz tsjii testicu cunta tjončiča, nii Yooz zuma kamaña zizkatñiž puntuquiztan mazzinjapa.

⁹ Jesucristuča ultimu Yooz zuma kamaña zizkatñiqui. Jalla niiča zapa žoñinacž kuzquiz Yooz zuma kamaña zizkatñiqui. Nižaza Jesucristuqui tii muntuquiz tjončiča.

¹⁰ Jalla nuž tjonžcu tii muntuquiz kamčiča. Nižaza niiča tjapa tii muntuquiz žejlñinaca paañiqui. Niž paataž cjenami tii muntuquiz žejlñi žoñinacaqui Jesucristo ana pajz pecchiča.

¹¹ Jesucristo Yooz Majchqui niž persun wajtchiz žoñinacžquiz tjončiča. Pero nii žoñinacžti Jesucristo ana pajz pecchiča.

¹² Pero jakziltami nii Jesucristo pajz pecchaja, nižaza nižquin tjapa kuztan cričhaja, jalla ninacaqui ultim Yooz maatinacapanž cjissa.

¹³ Jalla nuž muñčiča Yoozqui. Anaž persun maa ejpž kuzcama, nižaza anaž persun kuzcama, nižaza anaž žoñiž pinsitacama, antiz Yooziž pinsitacama žoñinacaqui Yooz maatinaca cjissa.

¹⁴ Yooz Taku cjita Jesucristuqui tii muntuquiz tjonžcu, žoñž curpuchiz wejtnacatan juntu kamčiča. Jalla tii muntuquiz kamcan Jesucristuqui Yooz zuma okzñi kuz tjeeziča. Nižaza Yooz lijitum kamañ puntunacami werara tjeeziča. Tii muntuquiz kaman, wejrnacqui niž ancha zuma arajpach kamaña cherchinča. Niiča Yooz Ejpž zinta Majchqui. Jalla nižtiquiztan niž tjeežta arajpach kamañaqui niž kamañapankalča.

¹⁵ Juanqui nii Yooz Majch puntu mazzinčiča, tuž cjican:

–Jalla tiiž puntuquiztan tuqui chičinča, tuž cjican: “Tsjiiqui tjonča wejt jarupacha. Jalla niiča wejtquiztan juc'ant chekanaqui. Ima weriž nasan pan želatkalča niiqui”.

¹⁶ Nii Yooz Majchqui tsjan juc'ant zuma kuzziz cjen učumnacaquiz zuma arajpach kamañchiz cjiskatchiča juc'anti juc'anti.

¹⁷ Tuqui timpu Moisesqui lii mantitanaca zoñinacžquiz tjaachiča. Jaziqui Jesucristuqui Yooz zuma okzñi kuz zoñinacžquiz tjeeža. Nižaza zoñinacžquiz Yooz zuma kamañchiz cjiskatča, nižaza Yooz puntunaca zizkatča.

¹⁸ Jesucristučha Yooz Majchqui. Anapanž jec zoñimi Yooz cherchiqui. Niiž zinta Majch alajakazza Yooz cherchiqui. Nii Yooz Majchqui Yooz Ejpžtan tsjii kuzzizpankazza. Jalla nižtiquiztan niičha Yooz puntunacami werara zizkatñiqui.

JUAN BAUTISTAZ CHIITA TAKU

¹⁹ Juanž mazzintaqui Jesucristuž puntuquiztan jalla tužuča. Jerusalén wajtchiz judío zoñinacaqui Juanž puntuquiztan iya ziz pecatča. Nekztan timplu jilirinacami timpluquiz sirwiñinacami Juanžquin pewczñi cuchanžquitatača. Ninaca pewczičha, tuž cjican:

–¿Amqui jequimtaya?

²⁰ Juanqui zumpacha mazzinchiča. Nii pewczñi zoñžquiz ana nicchiča. Mazzincan tuž cjichiča:

–Wejrqui anača Cristutqui, ančhucaž tjewžtaqui.

²¹ Jalla nekztanaqui nii pewczñi zoñinacaqui wilita pewczičha tuž cjican:

–¿Jequimt amjo? ¿Elías cjita profetamkaya?

Juanqui kjaaziča, tuž cjican:

–Anača Eliastqui.

Nekztanaqui ninacaqui pewczičha, tuž cjican:

–Nii profeta tjoniz cjizpacha, ¿niimi amya?

Juanqui kjaaziča, tuž cjican:

–Wejr anača niitqui.

²² Jalla nekztanaqui ninacaqui cjichiča:

–¿Jecpant amjo? Wejrnacqui quintu chjitstanča wejrnac cuchanžquiñinacžquin. Am persun puntuquiztan ¿kjažum cjii?

²³ Nekztan Juanqui tuž kjaaziča:

–Wejrtča alto joržtan ch'ekti yokquin paljajiñtqui. Tuž paljajiñča: “Yooz Jiliržtajapa zuma kamañ jicz tjaczna”. Jaknužt Isaías cjita profeta chiitčhaja, jalla nuž paljajiñča.

²⁴ Nii pewczñinacaqui fariseo zoñinacaž cuchanžquitatača, Juanžquin.

²⁵ Ninacaqui pewczizakazza tuž cjican:

–Nižtaqui amqui anaž Cristumni, nižaza anaž Eliasni, nižaza anaž nii tjonni profetamni. Ana nižta zoñimžlaj niiqui, ¿kjažtiquiztan am judio zoñinaca bautisjo?

²⁶ Juanqui ninacžquiz kjaaziča tuž cjican:

–Wejrqui kjaztankaz bautisiñča. Judío zoñinacžquiztan tsjiiqui žejlča, jalla niiqui ančhucqui anaž pajča.

²⁷ Jalla niiqui wejt jaruž tjonča. Jalla nuž cjenami niičha wejtquiztan juc'ant tsjan chekanaqui. Jalla nii atintizjapa wejrqui anal waquizučha, niž zapat chiqui jwerzinimi, anaž cjichuca.

²⁸ Betábara cjita yokquin nuž Juanžquiz pecuntatača. Betábara cjita yokaqui Jordán cjita pužž tuunača. Jalla nicju Juanqui bautisatča.

UZI WILANAZTAKAZZA JESUCRISTUQUI

²⁹ Jakatažuqui Juanqui Jesusa tjonni cherchičha. Jalla nuž cheržcu, tuž cjichiča:

–Cherzna. Tiiča Yoozquiztan cuchanžquita zoñi, uzi wilanažtakaz. Jalla tiiqui tii muntuquiz žejlñi zoñinacž cuntiquiztan ticznaquiča. Ujchiz zoñinacž laycu ticznaquiča, ninacaž ujnacquiztan ana casticta cjeyajo.

³⁰ Wejrqui tiiž puntuquiztan mazzinchinča tuž cjican: “Wejt wirquin tjonča tsjiiqui. Jalla niiča wejtquiztan juc'ant tsjan chekanaqui. Ima weriž nasan, niiqui želatkalča”.

³¹ Wejrqui persunpacha tii žoñi anal zizaytuča, jecčhalaj, jalla nii. Wejrqui Yooz mantita jaru kjaztan bautisiñča, Israel wajtchiz žoñinacžquiz nii pajkatta cjisjapa.

³² Nižaza Juanqui Jesusiž puntuquiztan tuž chiichizakazza:

–Wejrqui arajpachquiztan Yooz Espiritu Santo palumažtakaz chjijwžquiñi cherchinča. Nekztan nii palumaqui Jesusiž juntuñpacha cjisquichiča.

³³ Tuquiqui wejrqui persunpacha tii žoñi anal zizaytuča, jecčhalaj, jalla nii. Pero Yoozqui wejr mantichiča kjaztan bautisajo. Nižaza wejtquiz tuž cjichiča: “Espiritu Santuqui jeczquiz chjijwžcačhaja, nižaza nižquiz želačhaja, jalla niiča Espiritu Santužtan bautisñiqui. Jalla nii cheržcu nižquiz pajaquiča”.

³⁴ Jaziqui nižtapan cherchinča, jalla nižtiquiztan wejrqui ančhucaquiz maznuča, tiičha werar Yooz Maatiqui, cjican.

ANDRESTAN PEDRUŽTAN

³⁵ Jakatažuqui Juanqui pucultan niž tjaajinta žoñinacžtan tsijtsi želatča.

³⁶ Jesusaž nijcchuc ojklayan, Juanqui nižquin cheržcu tuž cjichiča:

–Cherzna. Tiiča Yoozquiztan cuchanžquitaqui. Uuzi wilanažtakaz cjequiča.

³⁷ Nii pucultan Juanž tjaajintanacaqui jalla nuž chiiñi nonžcu Jesusižquiz apziča.

³⁸ Jalla nekztanaqui Jesusaqui wir kjutñi cheržcu, ninaca apzquiñi naychiča. Ninacžquiz cjichiča:

–¿Čhjuluž ančhuc kjurya?

Nii apzñi žoñinacaqui tuž kjaaziča:

–Rabbí. (Rabbí cjita takuqui Tjaajiñi Maestro cjiča ninacž tawkquiztan.)
¿Jakziquinam am kamyá?

³⁹ Jesusaqui ninacžquiz cjichiča:

–Picha. Wejttan oka, cherzjapa.

Jalla nekztanaqui tjonzñi ojkchiča, jakziquin kamchitažlaja, jalla nicju. Tjuñi zezi cjen nii pucultanaqui Jesusižtan kamchiča nii zeztan ween pakara.

⁴⁰ Tsjii pucultiquiztan Andrés cjitatača, Simón Pedruž lajktača. Jalla niiqui Juanž chiita nonžcu Jesusa apziča.

⁴¹ Pero Andresqui ima Jesusižtan ojklaycan niž Simón cjita jila kjuri ojkchiča. Jalla nižtan zalžcu, tuž mazziča:

–Wejrqui Mesiastan zalchinča. (Ninacž tawkquiztan Mesías cjita tjuuqui Cristuž cjiča. Cristo cjita tjuuqui “Yooz illzta” cjiča.)

⁴² Jalla nekztanaqui Andresqui niž jila Jesusižquiz zjicchiča. Jesusaqui nii cheržcu, tuž cjichiča:

–Amqui Simona cjitamča, Jonás majch. Tekztan najwcchuc Cefas cjita cjequiča. (Cefas cjita tjuuqui Pedro cjiča, ninacž tawkquiztan. Pedro cjita tjuuqui “maz” cjiča.)

FELIPZTAN NATANAELZTAN

⁴³ Jakatažuqui Jesusaqui Galilea yokquin ojcz pinsichiča. Jalla nuž okawk cjen, Felipe cjita žoñžtan zalchiča. Nižquiz tuž cjichiča:

–Wejttanpanim chica ojklayaquiča.

⁴⁴ Nii Felipiqui Betsaida wajtchiz žoñitača. Andrestan Pedružtan nii wajtchiz žoñinacžkaztača.

⁴⁵ Jalla nekztanaqui Felipiqui Natanael kjuri ojkchiča. Jalla niiztan zalzcu cjichiča:

–Tsjii zoñžtan zalchinča. Niiž puntuquiztan Moisesqui cjiirchipantala Yooziž tjaata liy librunacquiz. Nižaza niiz puntu profetanacaqui cjiirchizakaztača. Niiqui Jesusa cjitača, Josež majch. Nazaret wajtchiz zoñičha nii Jesusaqui.

⁴⁶ Jalla nuž nonžcu Natanaelqui tuž cjichiča:

–¿Nazaret wajtquiztan zuma zoñi želasajo? Anaž jaz.

Felipiqui niizquiz tuž kjaaziča:

–Cheržquilaiy.

⁴⁷ Jesusaqui Natanael cjita zoñi macjatžquiñi cheržcu, tuž cjichiča:

–Cheržca. Nii zoñičha ligitum Israel wajtchiz zoñiqui, ana incallñiqui, nižaza zuma kuzzizza.

⁴⁸ Jalla nekztanaqui Natanaelqui Jesusižquiz pewcziča tuž cjican:

–¿Jaknužum am wejr pajjo?

Jesusaqui niizquiz kjaaziča tuž cjican:

–Ima Felipe am kjawznan, wejrqui am cherchinča, higo munti koztan.

⁴⁹ Natanaelqui tuž cjichiča:

–Tjaajiñi Maestro, am Yooz Maatimkalala, Israel zoñinacz chawc Jilirimkalala.

⁵⁰ Nekztanaqui Jesusaqui niizquiz cjichiča:

–Wejrqui chiichinča, am higo munti koztan žejlñi cherchinča, nii. Jalla nižta chiitiquiztan alaja wejtquizim kuzziz cjissamča. Pero wiruñaquijuc'ant pajk obranaca cheraquiča amqui.

⁵¹ Nižaza Jesusaqui cjichizakazza:

–Ančhucaquiz weraral cjiwča. Ančhucqui arajpacha cjetsi cheraquiča, nižaza Yooz anjilanacaqui wejtuntuñ chjiwžquiñi yawžquiñi cheraquiča. Wejrtča tsewctan cuchanzquita Yooz Zoñtqui.

2

ZALZ PJIJZTA

¹ Chjep majquiztan tsjii zalz pjiizta želatča Caná wajtquin, Galilea yokquin. Jesusiž maa nicju želatča.

² Nižaza Jesusaqui niiz tjaajinta zoñinacztanpacha nii zalz pjiiztiquiz kjawžtatača.

³ Jalla nuž pjiizta paan vino upzitača. Jalla nekztanaqui Jesusiž maaqui niizquiz cjichinča:

–Vino upziča.

⁴ Jesusaqui naaquiz tuž kjaaziča:

–Maataka, ¿kjažtiquiztan nii puntu wejtquiz chiijo? Wejt langz ora imaziča.

⁵ Pero naaqui nekz atintiñi sirwizunaczquiz cjichinča:

–Tiiž mantitacama ančhucz paaquiča.

⁶ Jalla nicju sojta pajk maz luuznaca želatča. Judío zoñinacaqui ajunz cutzturumpi paazjapa luuznaca joojooñitača. Zapa luuzquiz quinzakal tunc litro, patac litro, nuž kjaz luzñitača.

⁷ Nekztan Jesusaqui nii pjiizta paañi sirwizunaczquiz mantichiča, tuž cjican:

–Tii luuznacquiz ančhucqui kjaz chjiipznaquiča.

Nekztanaqui luuz joracama kjaznaca chjiipziča.

⁸ Jalla nekztanaqui Jesusaqui cjichiča:

–Jaziqui tsjii zkoluculla coožna. Nekztan pjijzta paañi patrunžquiz chjicha.

Jalla nuž niiž chiitacama chjitchiċha.

⁹ Nii pjijzta paañi patrunaqui mallziċha nii kjazquiztan vino tucchi. Jakziquiztan tjonchi nii vino, jalla nii ana zizatċha. Sirwizunacakaz zizatċha. Ninacaž kjazqui cootkalċha. Jalla nuž nii vino mallžcu pjijzta paañi patrunaqui nii zalzñi tjowa kjawziċha.

¹⁰ Nekztan tuž cjichiċha:

–Chjul žoñimi zuma vino panž tjaaċha primiraqui. Nekztan kjawžta žoñinacaž zuma vino lictan nii jaru ana zuti zuma vino zakaz tjaaċha. Amzti tii oracama tii ancha zuma vino ċhjojcham, ¿kjažtatajo?

¹¹ Jalla niitaċha Jesusaž primer paata milajruqui. Caná de Galilea wajtquiz paachiċha. Jesusaqui nii milajru paacan, niiž arajpach kamañami azimi tjeeziċha. Jalla nižtiquiztan nižtan chica ojklayñi žoñinacaqui nižquizimi tjapa kuz cjissiċha, nižaza criichiċha.

¹² Jalla niiž wiruñ Capernaum wajtquin ojkchiċha. Niiž maatan, niiž lajknacžtan, niiž tjajinta žoñinacžtan, jalla ninacaqui nižtan chica ojkchiċha. Jalla nicju tsjii kjaž maj kamchiċha.

TIMPLU PEWZA JESUCRISTUQUI

¹³ Judío žoñinacž pascua pjijzta wajillataċha. Jalla nižtiquiztan Jesusaqui Jerusalén watja ojkchiċha.

¹⁴ Jalla nicju timplu patiuquiz luzcu, animala tuyñinaca cherchiċha. Vacanaca, uuzinaca, nižaza palumanaca jalla nižtanaca timplu patiuquiz tuyñi cherchiċha. Nižaza paaz campiiñinaca ninacž puestuquiz julzi cherchizakazza.

¹⁵ Jalla nižtanaca cheržcu Jesusaqui poota zkizquiztan lazu paachiċha. Jalla nekztanaqui nii laztan zancchuc liwj tirkatchiċha vacanacami, uuzinacami tjapa nii tuyñinacžtanpacha. Nii paaz campiiñi žoñinacž paazmi k'ala witzinchiċha, nižaza ninacž mizanacami pjokžinchiċha.

¹⁶ Nekztan paluma tuyñi žoñinacžquiz ujziċha tuž cjican:

–Tjapa tinaca jwesa. Wejt Yooz Ejpž kjuya anaċha tuyz kjuya tjaczqui.

¹⁷ Jalla nekztanaqui niiž tjajinta žoñinacaqui cjiirta Yooz taku cjuñziċha. Yooz tawk libruquiz tuž cjiirtkalċha: “Am kjuya rispitta cjiskatz pecuċha. Nuž pectiquiztan akztal cjeeċha”.

¹⁸ Jalla nekztanaqui judío žoñinacaqui nižquiz pewcziċha tuž cjican:

–Jalla nižtanaca paazjapa, ¿ject am mantichejo? Yoozqui am mantichižlaj niiqui, tsjii siñala milajruž tjeežna.

¹⁹ Jesusaqui tuž kjaaziċha:

–Tii timplu pajlžta cjequiċha. Nekztan ċhjep majquiz wilta tsijsnaċha.

²⁰ Jalla nižta chiiñi nonžcu judío žoñinacaqui cjichiċha:

–Tii timplu kjuycanaqui pusi tunc sojtan wata kjuytala pero. ¿Amqui ċhjep majquizkaz tii timplu tsijsnasajo? Anapan niim atasaċha amqui.

²¹ Jalla nuž nii timplu puntuquiztan chiican Jesusaqui niž persun curpu puntuquiztanž chiyatċha.

²² Jesusaž ticziquiztan jacatattan niiž tjajinta žoñinacaqui nii chiita cjuñziċha. Nekztan Yooz takumi criichiċha, Jesusaž jacatatz punto cjiirta. Nižaza Jesusiž chiitanacami criichizakazza.

²³ Pascua pjijztiquiz Jesusaqui Jerusalén wajtquiz želatċha. Jalla nicju želan walja žoñinacaqui nižquin criichiċha. Niiž paata milajrunacami siñalanacami, nii cheržcu criichiċha.

²⁴ Jesusaqui niiz persun kuzquiz zoñinacz kuz, jaknužt cječhaja, jalla nii zizatča. Jalla nižtiquiztan Jesusaqui niiuntuñ criichi zoñinaczquiz ana juyzu paachiča.

²⁵ Jesusaqui persunpacha zoñinacz kuz jaknužt cječhaja jalla nii zizatča. Jalla nižtiquiztan niiqui anaž jec tjaajzñimi pecatča zoñinacz kuz puntuquiztanaqui.

3

JESUSIZTAN NICODEMUZTAN

¹ Tsjii fariseo zoñi želatča, Nicodemo cjita, judío zoñinacz jiliritača.

² Jalla nii Nicodemuqui tsjii ween Jesusižquin tjonzñi ojkchiča. Nekztan Jesusižquin paljaychiča, tuž cjican:

—Tjaajiñi Maestro, zoñiqui ana Yooz poderžtanžlaj niiqui, nekztan ana milajrunaca paasača, amiž paata milajru, nižtanacami. Jalla nižtiquiztan wejrqui zizuča, Yoozquiztan tjonchamča, Yooz obra tjezñi nižaza Yooz puntu tjaajñi.

³ Jalla nekztanaqui Jesusaqui niizquiz cjichiča:

—Amquiz weraral cjeeča. Jequit ana pizc wilta nassi cječhaja, jalla niiqui arajpach Yooz wajtquiz ana kamasacha.

⁴ Jalla nižta chiitiquiztan nii Nicodemo cjita zoñiqui tuž pewcziča:

—Pero, ¿kjaž tsjii zoñiqui wilta majtta cjesajo? Wilta majtta cjisjapa, ¿maa iczquiz wлтаž luzasajo?

⁵ Jesusaqui tuž kjaaziča:

—Ultimu werarapal cjiwča. Jequit kjazquiztanami Espiritu Santužquiztanami ana nassi cječhaja jalla niiqui arajpach Yooz wajtquiz ana luzasacha.

⁶ Jequit maa ejpžquiztankaz nassaja, jalla niiqui zoñž kamañchizkazza. Pero jequit Yooz Espiritu Santuquiztan zakaz nassaja, jalla niiqui Yooz Espiritu Santuž kamañchizza.

⁷ Weriž chiitiquiztan anam am ispantaquiča. Tjapa zoñinacaqui pizc wilta nastanpanča cjiwča.

⁸ Nicjumi ticjumi tjamiqui tjamča. Nii tjamž jora nonžcanami jakziquiztan tjamžquičhaja, jakzitchuc ojkčhaja, jalla nii ana zizzuca. Jalla nižta irataž Yooz Espiritu Santuqui jecz kuzquizimiž luzasacha. Nižaza ana Yoozquin criichi zoñinacaqui criichi zoñinacz kamaña cherča. Pero nii Espiritu Santuž tjaata kamaña ana intintazucača.

⁹ Jalla nekztanaqui Nicodemuqui wilta pewcziča, tuž cjican:

—¿Jaknužupan cjes teejo?

¹⁰ Jesusaqui niizquin tuž kjaaziča:

—Amqui Israel zoñinaczquiz tjaajiñi maestrumla. ¿Jalla tii weriž chiita ana intintazzucakaya?

¹¹ Ultimupan wejr cjiwča. Wejrqui tii puntuquiztan intintazcu chiyuča. Wereraž chiyuča, tii weriž zizta nižaza cherta puntunacami. Jalla nuž cjenami amqui weriž chiita anam catokča.

¹² Tii muntuquiz watñi puntuquiztan chiyan ana intintazza amqui. Jaziqui juc'ant altu razunžtan arajpach Yooz puntuquiztan chiyanami, ¿jaknužt am intintasasajo?

¹³ 'Anaž jecmi arajpachquin yawchiqui. Wejrpankal arajpach Yooz puntuquiztan zumpacha zizuča. Wejrqui arajpachquiztan chjijwžquichinča. Wejrqui arajpachquiztan cuchanžquita Yooz Zoñtča.

¹⁴ Nižaza wejrqui cruzquiz waytital cjistanča. Jaknužt Moisesqui tsjii korquiztan paata zkora pajk tuñquiz waytitčaja, jalla nižta wejrqui waytital cjistanča,

¹⁵ wejtquin criichi zoñinacžquiz ew kamaña tjaazjapa, ninaca Yooztan wiñaya kamajo, ana infiernuquin sufrajo.

YOOZ EJPCHA ZOÑINACŽQUIZ OKZŃIQUI

¹⁶ Yooz Ejpqui tii muntuquiz žejlŃi zoñinacžquiz ancha okžquichipanča. Jalla nižtiquiztan niž zinta Majch cuchanžquichiča, zoñinacžquiz ew kamañchiz cjiskatzjapa. Jakziltat niž zinta Majchquiz criyačhaja, ew kamañchiz cjequiča Yooztan wiñaya kamzjapa ana infiernuquin sufrajo.

¹⁷ Yooz Ejpqui niž Majch tii muntuquiz cuchanžquichiča. Niiž cjen zoñinaca liwriita cjesača infiernuquin ana casticta cjisjapa.

¹⁸ Jakziltat Yooz Majchquiz criyačhaja, jalla niiqui ana infiernuquin castictaž cjequiča. Pero jakziltat Yooz Majchquiz ana criyačhaja, jalla niiqui infiernuquin castictapanž cjequiča, Yooz zinta Majchquiz ana critiquiztan.

¹⁹ Yooz zinta Majchča Yooz kamaña tjeezŃi zuma kjanažtakaz. Jalla nuž cjenauqui tii muntuquiz tjontan, zoñinacaqui ana wali kamañchiz kamzpanž pecatča, zumchiquiz kamzpanž pecatča. Nižaza ninacaž ana wali kamtanacaž cjen Yooz kamañchiz cjis ana pecchipanča. Jalla nižtiquiztan castictapanž cjequiča.

²⁰ Tjapa ana wali kamñinacaqui Yooz kamaña tjeezŃižjapa quintrača. Nižaza Yooz kamaña tjeezŃižquiz anaž chertz pecča, ninacž ana wali kamtanaca ana tjeezta cjisjapa.

²¹ Pero jakziltat werar Yooz kamañ jaru kamz pecčhaja, jalla niiqui Yooz kamaña tjeezŃižquiz macjatžquičha kjanapacha tjeezjapa, niž zuma kamtanaca Yooz aztan kamtača, nii. —Jalla nuž cjichiča Jesusaqui.

JUAN BAUTISTAZ CHIITA

²² Jalla nuž Nicodemužtan parližcu, Jesusaqui tjaajintanacžtan Judea yokquin ojkchiča. Jalla nicju niž tjaajintanacaqui bautiscan žejlchiča.

²³ Nižaza Juan bautiscan zakaz želatča. Salim cjita wajt žcati Enón cjita wajtquin želatča. Jalla nicju wacchi kjaz želatča. Nekztan zoñinacaž tjonatča bautista cjisjapa.

²⁴ Jalla nižtanaca watchiča, ima Juanqui carsilquin chawcta cjen.

²⁵ Jalla nekztanaqui Juanž tjaajinta zoñinacžtan tsjii kjaž judío zoñinacžtan ch'aassiča, ajunz cuzturumpi puntuquiztan.

²⁶ Juanž tjaajintanacaqui nižquin mazŃi tjonchiča, tuž cjican:

—TjaajiŃi maestro, tsjiiqui amtan chica želatča Jordán pujž tuuna. Amqui niž puntuquiztan mazzinchamča. Jalla niiqui tekz žejlča bautiscan. Nižaza tjapa zoñinacaqui nižtan ojkzpanž cjissa.

²⁷ Juanqui ninacžquiz tuž cjichiča:

—Yooz Ejpqui wejtquiz tsjii kamaña tjaachiča; nižaza tsjii puestuquiz wejr utchiča. Jaknužt Yoozqui zoñžquiz kamaña tjaatčhaja, jalla nii jaru zoñi qui kamz waquiziča.

²⁸ Ančhucpacha weriž chiita nonzinčucča. Wejr cjichinča: Anača wejr Cristutqui. Wejrzi niž tuqui cuchanžquita zoñtča.

²⁹ Tsjii zalz pijzti quiz zalzŃi tjowaqui yanapŃi mazinacžquiztan tsjan importantičha. Nii zalzŃi tjowaqui tjunchizza. YanapŃi mazinacaqui jalla nii nonžcu cuntintučha, nižaza chipchipča. Jalla nižta iratača anzi qui. Wejrqui Jesusiž quintu nonžcu ancha cuntintutča.

³⁰ Niiqui juc'anti juc'anti tucquin cjistanča. Wejrzi niižquiztan juc'anti juc'anti wirquin cjistanča.

JESUSACHA TSEWCTAN TJONCHI ZOŃI

³¹ Nii tsewctan tjonchi zoŃiča tjapa zoŃinacžquiztan juc'anti chekanaqui. Tii yok muntuquiz kamŃi zoŃinacaqui tii yokjapakaz kamaŃchizza. Nižaza tii yokjapa kamaŃa puntuquiztankaz parliča. Nii tsewctan tjonchi zoŃizti tjapa zoŃinacžquiztan juc'antiča.

³² Nii tsewctan tjonchi zoŃi qui arajpachquin čhjulut chertčhaja, nonžtčhaja, jalla nii zoŃinacžquiz mazziča. Jalla nii zumanaca maztiquiztanami zoŃinacaqui anaž wira criiz pecča.

³³ Jakziltat niiž mazta criičhaja, niiqui tjurt'aquiča, Yooziž chiita takuqui werarapankalala, cjican.

³⁴ Yooziž cuchanžquita zoŃi qui Yooz takupanž parliča. Yooz Espiritu Santučha niiž kuzquiz žejlŃipan, yanapzjapa. Jalla nižtiquiztan Yooz takupanž parliča.

³⁵ Yooz Ejpqui niiž Majch k'aachiča. Jalla nižtiquiztan tjappacha tjaachiča niiž Majch kjarquiz.

³⁶ Jalla nižtiquiztan jakziltat Yooz Majchquiz criyačhaja, jalla niiqui Yooz-tan wiŃaya kamaquiča. Nižaza jakziltat ana Yooz Majchquiz criyačhaja nižaza ana cazačhaja, jalla niiqui anapanž Yooz-tan kamasučha. Nižaza Yooz Ejpqui cjiča, nii zoŃi qui castictaž cjequiča.

4

JESUSIZTAN SAMARIA WAJTCHIZ MAATAKZTAN

¹ ZoŃinacaqui Jesusižquiz walja tjonchiča niižtan chica ojklayzjapa, Juanžquiztan juc'ant tama. Nižaza Juanžquiztan juc'anti zoŃinaca bautis-siča. Jalla nii quintu ojklayan, fariseo zoŃinacaqui nii quintu nonchiča. Nekztan Jesusižtan quintrazi kallantichiča. Nii zizziča Jesusaqui.

² Jalla nuž nii Jesusiž bautis quintu ojklaychiž cjenami, Jesusaqui anaž bautis-siča. Antiz niiž tjaajinta zoŃinacakaz bautisatča.

³ Pero fariseo zoŃinacaqui Jesusiž puntuquiztan nonžcu, Jesusižtan quintrazi kallantichiča. Jalla nižtiquiztan Jesusaqui Judea yokquiztan zarakchiča, Galilea yokquin quejpžquizjapa.

⁴ Jalla nii jiczquiz ojkan, Samaria yoka nuž watstantača.

⁵ Jalla nuž Samaria yokquin ojkan Sicar cjita wajtquin irantichiča. Tuqui timpu Jacob cjita zoŃi qui niiž José cjita majchquiz tsjii yoka tjaachitača. Nii yok žcati Sicar cjita watja želatča.

⁶ Jalla nicju tsjii kjaz tuj želatča, Jacobž tuj cjitatača. Jesusaqui jiczquiz ojktiquiztan otchiča. Nekztan tuj latuquiz julziča. Nii oraqui taypur wajitača.

⁷⁻⁸ Nekztanaqui niiž tjaajinta zoŃinacaqui watja luzziča lujlz čhjeri kjayz-japa. Jesusaž nuž zinalla želan, tsjaa Samaria wajtchiz maatakqui nii tujquin kjaz cooyi tjonchinča. Jesusaqui naaquiz paljaychiča:

–Kjaz onalla, –cjican.

⁹ Jalla nuž kjaz tomangztiquiztan naa Samaria wajtchiz maatak žonqui cjichinča:

–Amqui judío zoŃimla. Wejrqui Samaria wajtchiz žontča. ¿Kjažtiquiztan amqui wejtquiztan kjaz mayjo?

(Judío zoŃinacžtan Samaria wajtchiz zoŃinacžtan porapat ana parliŃipanla, pero.)

¹⁰ Jalla nekztanaqui naa maatakaž chiitiquiztan Jesusaqui tuž kjaaziča:

–Wejrqui amquiztan kjaz maychinča. Pero amzti wejt puntuquiztanami nižaza Yooziž tjaaz puntuquiztanami intintitasaž niiqui, jalla nekztan wejtquiztan žejtñi kjaz maytasacha. Nižaza nii žejtñi kjaz tjaatam cjitasacha.

¹¹ Jalla nekztanaqui naa maatakqui tuž cjichinča:

–Señor, am anaj kjaz coozizzamla. Tii tuj koziča. ¿Jakzictanam nii žejtñi kjaz tjaasajo?

¹² Učhum Jacob cjita tuquita ejpqui tii tuj ecanchiča. Nižaza tii tujquiztan kjaz licñitača, nižaza niiž maatinacami, nižaza niiž animalanacami. ¿Amqui niižquiztan juc'antim cjes, kjažtatajo?

¹³ Jalla nekztanaqui Jesusaqui naaquiz cjichiča:

–Jakziltat tii tuj kjazquiztan licħhaja, jalla niiqui wлтаž kjaz pecaquiča.

¹⁴ Pero jakziltat weriž tjaata kjaz licħhaja, jalla niiqui anaž iya kjaz pecñiž cjequiča. Weriž tjaata kjazqui niiž persun kuzquiz tsjii jalzurižtakaz cjisnaquiča wiñaya žejtzjapa.

¹⁵ Jalla nekztanaqui naa maatak žonqui niižquiz cjichinča:

–Señor, nii kjaz tjaalla, ana iya kjaz peczjapa, nižaza tii tujquiz ana iya kjaz cooyi tjonzjapa.

¹⁶ Nekztanaqui Jesusaqui naaquiz cjichiča:

–Oka, am luctaka kjawžca. Nekztan wiltam wejtquin tjonaquiča.

¹⁷ Naa maatak žonqui tuž kjaaziča:

–Ana luctakchiztča.

Jalla nuž kjaaztiquiztan Jesusaqui tuž cjichiča:

–Amqui weraram chiiča, “Ana luctakchiztča” cjicanaqui.

¹⁸ Amqui pjijska luctakchiztakalala amqui. Jalla nižtiquiztan anziqum am lucum cjičhaja, jalla niiqui anaž am ultim lucuqui. Jaziqui weraram chiiča.

¹⁹ Jalla nekztanaqui naa maatak žonqui Jesusižquiz tuž cjichinča:

–Señor, amča profetaqui, nuž tantiyuča.

²⁰ Wejtnaca tuquita ejpnacaqui tii curquiz Yooz rispitičhaja. Ančhuc judío žoñinacazti cjiñchucča, Jerusalén wajtquin Yooz respitsa, nii.

²¹ Nekztanaqui Jesusaqui naaquiz tuž kjaaziča:

–Maataka, weriž chiita taku criya. Tsjii tjuñi tjonča. Jalla nii tjuñquiziqui anaž tii curquizimi nizaza anaž Jerusalén wajtquizimi Yooz Ejp respitaquiča.

²² Ančhucqui Yooz ana zuma pajžcu rispitiča. Wejrnaczi Yooz lijituma pajžcu rispitiča. Judío partiquiztanž Yooziž cuchanžquita Liwriiñiqui tjonča.

²³ Nii tjonz tjuñquiziqui, nižaza anzimi, werar Yooz Ejp rispitiñinacaqui kuztanami animužtanami Yooz respitaquiča. Nižaza Yooz Ejpž kuzcama wereraž respitaquiča. Jalla nižta rispitiñinacaž Yooz Ejpqui pecča.

²⁴ Yoozza ana janchichizqui, animužtakaz. Jalla nižtiquiztan niižquin rispitiñinacaqui kuztanami animužtanami nii rispitanča. Nižaza Yooz kuzcama werara rispitanča.

²⁵ Jalla nekztanaqui naa maatak žonqui Jesusižquiz cjichinča:

–Tsjii noojiqui tsjii Yoozquiztan cuchanžquita cjitaqui tjonaquiča. (Mesías, nižaza Cristo cjitazakazza niiqui.) Jalla nii tjonžcu wejtnacaquiz tjapa Yooz puntuquiztan tjaajnaquiča.

²⁶ Nekztanaqui Jesusaqui naaquiz tuž cjichiča:

–Werjtča niitqui, amquiz paljayuča.

²⁷ Jalla nuž parlan Jesusiž tjaajinta žoñinacaqui quejpžquichiča. Nuž Jesusaž tsjaa Samaria wajtchiz žonatan parliñi cheržcu, ispantichiča. Anča ispantižcu tjapa nii tjaajintanacaqui ana pewczñi atchiča, “Naaquiztan

¿chjulum pec?” cjican, uż “¿Kjažtiquiztan naa žonatan parli?” cjican ana pewczñi atchiča.

²⁸ Nekztanaqui naa maatak žonqui kjaz luuz eccu, watja ojkchinča. Nekztan žoñinaczquin tuż quint'ichinča:

²⁹ –Ojklay, tsjii žoñiž cheržquily. Niiqui tjapa weriž kamta puntu zizza. Wejtquiz nii puntu chiichiča. ¿Anaj tii Yooz cuchanžquita Cristo cjesaya?

³⁰ Nekztanaqui žoñinacaqui wajtquiztan ulanžquichiča, jakziquin Jesusa želatčhaja, jalla nicju.

³¹ Ima nii žoñinacaž irantižcan, niž tjaajintanacaqui Jesusižquiz chiižinchiča, tuż cjican:

–Tjaajiñi Maestro, čhjululla mekaz lujlžnalla.

³² Jesusazti ninaczquiz cjichiča:

–Wejttac yekja lujlž žejlča. Jalla nii lujlžqui ančhucqui anaž pajča.

³³ Jalla nuž chiičiquiztan niž tjaajintanacaqui ninacpora pewcsassiča, tuż cjican:

–¿Jequit tižquiz lujlž čhjeri zjičanchi cjesajo?

³⁴ Jesusaqui ninaczquiz cjichiča:

–Wejrqui wejt cuchanžquiniž kuzcama kamuča. Nižaza niž pecta langz cumplučha. Jalla niičha wejta lujlž čhjeri cuntaqui.

³⁵ Ančhucqui cjinčhucča, “Zkala ajzquinaqui pajkpic jiiz pjaltiča”, jalla nuž cjiñčhucča. Pero wejr ančhucacquiz cjiwčha, “Nii žoñinaczquin cherzna. Pookchi zkanacažtakaz ninacaqui. Ricujz pecča.

³⁶ Jakziltat nii pookchi zkanaca ricujačhaja, jalla niiqui pactaž cjequiča. Nižaza nii ricujta žoñinacaqui Yooztan wiñaya kamaquiča. Jalla nižtiquiztan zkala čhjaciñimi ajžñimi nuž chicapacha cuntintuž cjequiča.

³⁷ Tii zkala puntuquiztan chiitaqui werarapanča. Jalla tuż cjiča: “Zkala čhjaciñiqui tsjiičha. Nižaza zkala ajžñiqui yekjača”.

³⁸ Wejrqui ančhuc cuchanžquichinča, ana amiž trabajta zkala ricujzjapa. Yekjanacača nii zkalac trabajchi Yooz taku paljaycan. Ančhucqui nii trabajtiquiz yapzinčhucča, ultimquiziqui Yooztajapa ricujta cjisjapa.

³⁹ Jalla nekztanaqui wacchi Samaria wajtchiz žoñinacaqui nižquiz criichiča, naa maatak žonaž maztaž cjen. “Niiqui tjapa weriž kamta puntu zizza”, jalla nuž cjican mazzinča naaqui.

⁴⁰ Nižaza Jesusižquiz tjonžcu, nii Samaria wajtchiz žoñinacaqui Jesusižquiz rocchiča, tuż cjican:

–Wejtnacatan kamt'alla.

Nekztanaqui Jesusaqui ninacztan puc maj kamchiča.

⁴¹ Jalla nuž niž persuna tjaajintiquiztan iya juc'anti nii žoñinacaqui nižquiz criichiča.

⁴² Ninacaqui naa maatak žonaquiz tuż cjichiča:

–Wejrnacqui criyuča. Anaž amiž maztiquiztankaz criyuča. Antiz niž taku persuna nonžcupan criyuča. Chekapan, tiiqui Yooz cuchanžquita Cristukalča, žoñinaczquiz liwriñiqui. Anzil nii zizuča wejrnacqui, niž tjaajinta taku nonžcu.

TSJII CHJETINTAQUI

⁴³ Puc majquiztan Jesusaqui Galilea yokquin ojkchiča.

⁴⁴ Jalla nekztanaqui Jesusaqui tuż chiichiča:

–Tsjii Yooz cuntiquiztan chiiñi profetaqui niž persun wajtchiz žoñinaczquiz ana rispittača.

⁴⁵ Jalla nekztanaqui Galilea irantitan, nii žoñinacaqui Jesusa zuma risiwchiča. Nii žoñinacaqui Jerusalén ojkchizakaztača, pascua pjijzta payi.

Jalla nicju žejlcan tjapa Jesusaž paatanaca cherchiča. Jalla nižtiquiztan nii žoñinacaqui Jesusa zuma risiwchiča.

⁴⁶ Galilea yokquin žejlcan, Jesusaqui Caná cjita watja wilta ojkchiča. Tuquiqui nii wajtquiz kjazquiztan vino tuckatchiča. Tsjii pajk jilirž secretariuqui Capernaum wajtquiz želatča. Nii secretariuž majchqui laatača.

⁴⁷ Jesusaž Judea yokquiztan Galilea tjonchi quintu zizcu, nii secretariuqui Jesusa roqui ojkchiča niž kjuyquin tjonžcajo, nižaza niž majch čhjetnajo. Niiž majchqui ticzmayatača.

⁴⁸ Jalla nekztan Jesusaqui nižquiz cjichiča:

—Ančhucqui sinalanacami milajrunacami ana cheraquiž niiqui, ana criyasača.

⁴⁹ Nekztan nii secretariuqui cjichiča:

—Señor, ima wejt majch ticznán wejt kjuyquin tjonžcalla.

⁵⁰ Jesusaqui nekztan cjichiča:

—Am kjuya quepa, am majchqui žetaquiča.

Nekztan nii secretariuqui jalla nuž Jesusaž chiitan nii criichiča. Jalla nekztan kjuya quejpchiča.

⁵¹ Jalla nuž niž kjuya okan, niž piyunanacaqui nižquin zalžquichiča, tuž cjican:

—Am majchqui žejtchiča.

⁵² Jalla nuž chiitiquiztan nii secretariuqui pewcziča, čhjulora niž majch žeti kallantichi, jalla nii. Niiž piyunanacaqui cjichiča:

—Zezcu tayıpuruž paztanalla nii kjakñi ch'ujlñiqui apaltichiča.

⁵³ Nii ejpqui cjuñziča, nii orapacha Jesusaqui cjichiča, “Am majchqui žetaquiča”. Jalla nižtiquiztan nii ejpqui tjapa kuztan Jesusižquiz criichiča, tjapa niž kjuychiz žoñinacžtanpacha.

⁵⁴ Judea yokquiztan Galilea quejpžcu, Jesusaqui nii milajru paachiča. Jalla nižtanaqui pizc wilta milajru paachiča.

5

LAA ZOÑI CHJETINTA

¹ Wiruñauqui judío žoñinacaqui pjijzta paatča. Jalla nuž paan, Jesusaqui Jerusalén watja quejpžquichiča.

² Jerusalén wajtquiz tsjii pajk zana želatča, uuzi zana cjita. Jalla nii žcati tsjii žoñiž paata cocha kjazjapa želatča. Nii cochaqui Betesda cjitatača Hebreo tawkquiztan. Nii coch muytata pjijska kjuyallanaca želatča.

³ Jalla nekzi wacchi laanaca želatča, zuranaca, zuch žoñinaca, ana tsi-jtñinaca. Nii laa žoñinacaqui kjaz kizkiz tjewznatča.

⁴ Awiz awizaqui tsjii anjilaqui nii cochquiz tjoñiča kjaz tjarni. Jalla nuž nii kjaz tjarnan, primera kjazquiz luzzi žoñiqui žejtchi cjisñitača, čhjul laaquiztanami.

⁵ Tsjii laa žoñiqui quinsa tunc quinsakalcun wata laa želatča.

⁶ Jesusaqui nii laa žoñi cherchiča. Nekztan Jesusaqui zizzi cjissiča, nii žoñi ažk watanaca laachitača, nii. Jalla nuž zizcu nii laa žoñžquiz pewcziča tuž cjican:

—Žejtchi cjissim pecya?

⁷ Nii laa žoñiqui kjaaziča tuž cjican:

—Señor, anaž jecmi tii kjaz tjarnan wejr luzkatñi žejlča. Luz pecuča, pero yekjakaz wejt tuqui luzza, tii kjazquizqui.

⁸ Nekztanaqui Jesusaqui nižquiz cjichiča:

—Zaazna, am tjajz zquiti apta, ojklaya.

⁹ Jalla nii orapacha žejtchi cjissičha. Niiž tjajz zquiti aptižcu ojkchiča. Jeejz tjuñquiz nii čhjetintaqui watchičha.

¹⁰ Jalla nižtiquiztan judío žoñinacaqui nii čhjetinta žoñžquiz tuž chiižinchiča:

–Jeejz tjuñquiziqui, anača tjajz zquiti joojooz cjitaqui. Lii quintrala niiqui.

¹¹ Nii čhjetinta žoñiqui tuž kjaaziča:

–Jalla nii wejr čhjetiñi žoñiqui wejr mantichiča, tuž cjican: “Tjajz zquiti aptižcu, oka”. Jalla nuž cjichiča.

¹² Nii judío žoñinacaqui pewcziča tuž cjican:

–Ject amquiz nuž cjichejo, “Tjajz zquiti aptižcu oka”, cjicanajo?

¹³ Jesusaqui nii oraqui walja nekz žejlñi žoñinacž taypiquiztan katchičha. Jalla nižtiquiztan nii žoñiqui ana pajchiča, ject nii čhjetinčhaja, jalla nii.

¹⁴ Niiž wiruñ Jesusaqui nii laaquiztan žejtchi žoñžtan zalchiča timpluquin. Nekztan niižquiz cjichiča:

–Jila, amqui žejtchamča. Jaziqui ana wilta uj paaquiča. Uj paaquiž niiqui, amquiz juc'ant anawalim cjisnasača.

¹⁵ Jalla nekztanaqui nii žoñiqui judío žoñinacžquin mazñi ojkchiča, Jesusača nii čhjetiñi žoñiqui, jalla nii mazziča.

¹⁶ Nii Jesusaž nižta jeejz tjuñquiz čhjetintiquiztan judío žoñinacaqui Jesusiž quintra cjissičha; conz pecatča.

¹⁷ Ninacžquiz Jesusaqui tuž cjichiča:

–Wejt Yooz Ejpqui tiraž langža, wejrmi nižtapachal langznuča.

¹⁸ Jalla nižta chiiiquiztan nii judío žoñinacaqui juc'ant žawjchiča, nižaza juc'anti conz pecatča. Jesusaqui jeejz tjuñquiz ana permitta langz mantichiča, judío žoñinacž lii quintra. Nižaza “Yooz Ejpča wejt persun Ejpqui” cjican chiiichiča. Nuž cjican “Wejrmi Yoozakaztča” cjichiča. Jalla nižtiquiztan nii judío žoñinacaqui Jesusiž quintra juc'anti aptichiča, conzjapa.

JESUCRISTUCHA YOOZ MAJCHQUI

¹⁹ Nižaza Jesusaqui tuž cjichiča:

–Ančhucaquiz weraral chiyučha. Wejrtča Yooz Majchqui. Pero persun kuzcama anal paasača. Yooz Epiž tjaata obranacal paa-uča. Jaknužt Yooz Ejpqui obra paačhaja, jalla nužuzakaz wejr Yooz Majchqui obra paa-uča.

²⁰ Yooz Ejpqui wejr k'aachiča, nižaza tjapa niiž paata obranacami wejtquiz tjeeža. Nižaza Yooz Ejpqui juc'anti pajk obranacaz tjeeznaquiča, ančhuc ispantichi cjeajajo.

²¹ Jaknužt Yooz Ejpqui ticzinaca jacatatskatčhaja, nižaza wilta žeti tjaačhaja, jalla nižta zakaz wejrqui žeti tjaača, wejt munañpicama.

²² Yooz Ejpqui persunpacha ana casticu tjaača. Pero wejtquiz tjapa niiž mantiz poder intirjichiča castictu tjaačhaja.

²³ Jalla nuž intirjichiča, tjapa žoñinaca wejtquiz rispitaajo, jaknužt Yooz Ejpžquin rispitchaja, jalla nuž. Jakziltat wejtquiz ana rispitchaja, jalla niiqui wejr cuchanžquiñi Yooz Ejpžquin ana zakaz rispitcha.

²⁴ Ančhucaquiz weraral chiyučha. Jakziltat weriž chiita taku nonžcu tjapa kuztan catokčhaja, nižaza wejr cuchanžquiñižquiz kuz tjaačhaja, jalla niiqui Yooztan wiñaya kamča. Nižaza ana casticta cjequiča. Infiernuquin ojkñi jiczquiz eccu, arajpach ojkñi jiczquiz kamča, Yooztan wiñaya kamzjapa.

²⁵ Ančhucaquiz weraral chiyučha. Tsjii timpu tjonča, nižaza anzimi nii timpuča. Anziqui ticzižtakaz kamñi žoñinacaqui wejt taku nonžcu tjapa kuztan catokačhaja, jalla niiqui ew kamañchiz kamaquiča. Yooz Majchtča wejrqui.

²⁶ Yooz Ejpqui persunpacha žejtkatz poderchizza. Nižaza wejt Yooz Ejpqui nii poder wejtquiz intirjichiča.

²⁷ Wejrqui tsewtan cuchanžquita Yooz Zoñtča. Jalla nižtiquiztan Yooz Ejpqui pjalz puestuquiz wejr utchiča. Jaziqui arajpachquin kamzmi nižaza infiernuquin casticzmi jalla nii mantznaca wejtquiz intirjichiča.

²⁸ Tii weriž chiitiquiztan ana ispanta. Tsjii timpu tjonča. Jalla nii timpuquiz tjapa ticzinacaqui wejt joraž nonznaquiča. Nekztan sipulturquiztanž žaaznaquiča.

²⁹ Zuma kamchinacaqui jacatataquiča Yooztan wiñaya kamzjapa. Ana zuma kamchinacazti jacatataquiča infiernuquin casticta cjisjapa.

YOOZ EJPZTAN YOOZ MAJCHTAN

³⁰ Wejrqui persun kuzquiztanac anal pjalznasača. Jaknužt wejt Yooz Ejp mantičhaja, jalla niicamal pjalznuča. Anal wejt kuzquiztan pjalz pecuča. Antiz wejr cuchanžquiñiž kuzcama pjalz pecuča. Jalla nižtiquiztan weriž pjaltaqui lijitumača.

³¹ Wejrkal persunpacha wejt favora chiyasaž niiqui, weriž chiita taku anaž walasača.

³² Pero yekja tisticu wejt favora žejlča. Jalla niiča Yooz Ejpqui. Niiž wejt puntuquiztan chiita takuqui werarapanča. Jalla nii zizuča.

³³ Ančhucqui Juanžquin pewczñi cuchanžquichinčhucča wejt puntuquiztan. Niiž kjaaztaqui werarapanča.

³⁴ Zoñiž wejt favora werara chiiñiž cjenami, wejtquiz anaž ancha importiča. Yooz Ejpča wejt favora ultim werara chiiñiqui. Nuž cjiwča, ančhuc wejtquiz criyajo, ančhuc liwriita cjisjapa.

³⁵ Juanqui tsjii tjeezta lamparažtakaz kjanatča. Jalla nuž kjančan nii Juanqui wejt puntu kjanzt'ichiča. Nižaza tsjii upacamakaz niiž kjanquiz ančhucqui cuntintu kamchiča.

³⁶ Juanqui wejt favora chiichiča. Pero tsjiiqui žejlča Juanžquiztan juc'anti. Jalla niiča Yooz Ejpqui. Niiqui wejt favora zakaz chiiča. Nižaza wejt Yooz Ejpqui wejr mantichiča obranaca cumplizjapa. Tii obranacquiztan wejr pajtapan cjesača, Yoozquiztan tjonchin, ana Yoozquiztan tjonchin, nii. Tii weriž paata obranaca kjanapacha tjeeža, Yooz Epiž wejr cuchanžquita, jalla nii.

³⁷ Wejr cuchanžquiñi Yooz Ejppacha wejt favora chiiča. Ančhucqui niiž persun jora ana nonznasača nižaza niiž tsiti ana cherasača.

³⁸ Yooz Ejpqui wejr cuchanžquichiča. Pero ančhucqui wejtquiz ana criiča. Jalla nižtiquiztan niiž takumi ančuca kuzquiz ana zakaz catokča.

³⁹ Ančhucqui cijrta Yooz taku ančaž istutiča. Nekztan ančhucqui tantiiča, “Yooz taku istutiichiž cjen wejrnacqui Yooztan wiñaya kamaka,” cijcan. Pero nii cijrta Yooz takunacaqui wejt puntuquiztanž chiiča.

⁴⁰ Jalla nuž istutižcupacha, ančhuczti anaž wejtquiz macjatz pecča, Yooz Ejpžtan wiñaya kamzjapaqui.

⁴¹ Zoñinacaž tjaata honora wejtquiz anaž importiča.

⁴² Ultimu ančhucqui ana Yoozquin kuzzizčhucča. Nii zizuča.

⁴³ Wejt Yooz Ejpž cuntiquiztan tjonchi cjenami, ančhucqui anaž wejr criiča. Pero yekja zoñiqui persun kuzcama ančucaquiz tjonasaž niiqui, niižquiz criyasaž, jaz.

⁴⁴ Ančhucqui ančhucporaž honorchiz cjeyas pecča. Ančhucqui Yooziž tjaata honorchiz cjisjapa anaž importiča. Jaziqui, ¿jaknužt ančhuc wejr criyasajo?

⁴⁵ Ančhucqui Moisés liiquiz kuz tjaachiž cjen, pinsaquiča, Yooztan wiñaya kamaka, jalla nii. Pero nii Moisespacha ančuca ujnacaž tjeznaquiča, Yooz Ejpž yujcquiziqui. Anača wejrqui Yooz Ejpž yujcquiz ančuca ujnaca tjezniñtqui.

⁴⁶ Moisesqui wejt puntuquiztan cjiirchiča. Jalla nižtiquiztan ančhucqui Moisés cjiirta criitasaž niiqui, wejtquiz zakaz criitasača.

⁴⁷ Ančhucqui nii Moisés cjiirtanaca ana criičaj niiqui, ¿jaknuž weriž chitanaca criyasajo?

6

JESUSAQUI CHJERI TJAACHA

¹ Jalla nuž chiižcu Jesusaqui Galilea cjita kotž nawjctuñtan ojkchiča. Nii kotaqui Tiberias, cjitazakaztača.

² Walja žoñinacaqui nižquin apziča, milajrunaca paañi cheržcu nižaza laanaca čhjetinchi cheržcu.

³ Pero Jesusaqui tsjii curu yawchiča niž tjaajintanacžtan. Jalla nicju julziča.

⁴ Nii oraqui judío žoñinacž pascua pijizta žcatitača.

⁵ Acha waytižcu, Jesusaqui walja žoñinaca apžquiñi cherchiča. Nekztanaqui Felipžquiz paljaychiča, tuž cjican:

—¿Jakziquiztan lujlz čhjerinaca kjayžcaqui, tii tama žoñinacžquiz luli tjaazjapaya?

⁶ Jesusaqui nuž chiichiča Felipe yanzjapa, jaknužt kjaazñi, jalla nii. Nii ora Jesusa persun kuzquiz zizatča, jaknužt nii žoñinaca luli tjaachaja, jalla nii.

⁷ Nekztanaqui Felipiqui kjaaziča, tuž cjican:

—Paa patac pajk paaz walurchiz t'anta anaž alcansasača, zapa mayni zkoluccama lujlz cjenami.

⁸ Tsjii tjaajintaqui, Andrés, cjitatača, Simón Pedruž lajk. Jalla niiqui tuž cjichiča:

⁹ —Tekz tsjii uza žejlča, pjijska siwat t'antichiz, pizc ch'izziz. Pero ¿tama žoñinacžquiz wacas teejo?

¹⁰ Nekztanaqui Jesusaqui mantichiča:

—Tjappacha nii žoñinaca, julznajo.

Jalla nii yokaqui walja pastu yokatača. Nekziqui tsjii pjijska warank luctak žoñinaca julziča.

¹¹ Jalla nekztanaqui Jesusaqui nii t'anta tanžcu, Yoozquin gracias cjiican cjichiča. Nekztanaqui tjaajintanacžquin tjaachiča. Jalla nii tjaajintanacaqui partir paychiča nii julzi žoñinacžquiz. Nužuzakaz nii pizc ch'iztan tožžcu, lujlkatchiča, jaknužt zapa mayni pecatčhaja, jalla nuž.

¹² Jalla nuž nii žoñinacaž chjekchiž cjen, Jesusaqui niž tjaajintanaca mantichiča, tuž cjican:

—Nii žejtchi t'unanaca ricuja, ana čhjulumi pertita cjeajo.

¹³ Nekztanaqui žoñinacaž lujlz žeržtan, niž tjaajintanacaqui nii pjijska siwat t'antiquiztan žejtchinaca ricujchiča. Tuncapan canasta chjiipi ricujchiča.

¹⁴ Nekz žejlñi žoñinacaqui Jesusiž paata milajru cheržcu, tuž cjichiča:

—Chekapani, tiikalala nii tjonñi profetaqui.

¹⁵ Jesusaqui ninacž kuzquiz naychiča. Ninacaqui Jesusa pjozaž majkz pecatča, ninacž chawc jiliri cjeajo. Jalla nižtiquiztan Jesusaqui ninacžquiztan zarakžcu cur punt kjutñi yawchiča, zina žejljapa.

JESUSAQUI KJAZ JUNTUÑ OJKCHA

¹⁶ Tjuñiž kattan niž tjaajinta žoñinacaqui kot atquin chjijwžquichiča.

¹⁷ Nii curquiztan chjijwžcu warcuquiz luzziča, Capernaum watja iran-tizjapa. Jalla nekztanaqui kotquiz oki kallantichiča. Ween zumchitača. Jesusaqui imapanž ninacžquin tjonatča.

¹⁸ Kotquiz okan tsjii pjursant tjamiqum tjamžquichiča. Jalla nižtiquiztan kjaz ljojkinacaqui waljaž ljojkinžquichiča.

¹⁹ Tsjii tupu zkoluc jilalla ojkchiž cjen, ninacaqui Jesusaž warcuquin žcatžinžquini cherchiča. Jesusaqui kjaz juntun tjonatča. Pero Jesusižquiz ana pajatča nii zumchiquiz cjen. Jalla nekztan ninacaqui ancha tsucchiča.

²⁰ Nekztan Jesusaqui ninacžquiz tuž cjichiča:

—Werjtča. Anača tsuca.

²¹ Jalla nuž chiitiquiztan ninacaqui Jesusa warcuquiz cuntintu luzkatchiča. Kot taypikuiztača. Pero nii ratupacha kot atquin cjissiča, jakzi wajtquin okatčaja, jalla nicju.

ZOÑINACAQUI JESUSA KJURCHA

²² Jakatažuqui nii kotž nawjctuñtan ecta žoñinacaqui Jesusa ana cherchiča. Zezcu zeztan tsjii warcukaz želatča. Jesusaqui warcuquiz ana luzziča. Niiž tjaajinta žoñinacakaz warcuquiz ojkchiča. Pero jakziquin Jesusaqui želatčaja, ana zizziča nii ecta žoñinacaqui.

²³ Nekztan yekja warcunacaqui irantižquichiča Tiberias cjita wajtquiztan. Jakziquin nii žoñinaca t'anta lujlchižlaja, jalla nicju irantižquichiča. Ima lujlkatcan, Jesús Jiliriqum Yoozquin parličiča gracias cjican.

²⁴ Nekzi ecta žoñinacaqui Jesusami niž tjaajintanacami ana nekz cheržcu warcunacquiz luzziča. Capernaum watja ojkchiča Jesusa kjuri.

JESUCRISTUZ CHIITA TAKU

²⁵ Kot tsjii latuquin irantižcu, žoñinacaqui Jesusižtan zalčiča. Jalla nuž zalžcu nižquiz pewcziča tuž cjican:

—Tjaajiñi Maestro, ¿chjulora tekz irantižquichamtajo?

²⁶ Jesusaqui ninacžquiz tuž kjaaziča:

—Ančucaquiz ultim weraral chiižinuča. Zezcu ančucqui t'anta lujlchinčucča chjekjañcama. Jalla nižtiquiztanž ančucqui wejr kjurča. Weriz paata milajru anaž intintazza ančucqui. Jalla niž intintaztasaz niiqui anaž wejr kjurtasača čjjeri lujlzapakaz. Antiz wejr kjurtasača, Yooz puntu tsjan zizjapa.

²⁷ Anača miranzñi čjjerquinaqui kuz tjaazqui. Tsjii ratujapakazza niiqui. Antis ana miranzñi Yooz čjjerquiñča kuz tjaa. Yooz Ejpžtan wiñaya kamzjapača niiqui. Nii Yooz čjjeriqui wejrqui ančucaquiz tjaasača. Yooz Ejpqui niijapa wejr utchipanča. Wejrqui tsewctan cuchanžquita Yooz Zoñtča.

²⁸ Jalla nekztanaqui nii žoñinacaqui pewcziča tuž cjican:

—¿Chjulu obranacat paaz waquisasaya, Yooz munañpa cumplisjapaya?

²⁹ Jesusaqui ninacžquiz kjaaziča, tuž cjican:

—Yooz cuchanžquita Zoñžquiz kuz tjaa; nižquiz criya. Jalla niiča Yooz munañpaqui.

³⁰ Nekztanaqui ninacaqui cjichiča:

—¿Amqui čjul milajrum tjeeznas, wejrnac cherzjapajo? Nekztan amquin criyasača. ¿Chjul obram paa-as?

³¹ Učhum tuquita atchi ejpnacaqui ch'ekti yokquin maná cjita čjjeri lujlchiča. Nižaza nii puntuquiztan Yooz tawk libruquiz tuž cjirtača: “Moisesqui ninacžquiz arajpachquiztan tjonñi čjjeri tjaachiča”.

³² Jalla nuž chiitiquiztan Jesusaqui tuž kjaaziča:

–Ančhucaquiz ultim weraral chiižinuča. Moisesqui ančhuca atchi ejpnacžquiz čjjeri tjaachiča. Pero Moisesqui anača tjaachiqui ultim werar arajpach t'anta čjjeriqui. Wejt Yooz Ejpča ultim werar arajpach t'anta čjjeri tjaachiqui.

³³ Jalla nii Yooziž tjaata t'antaqui arajpachquiztan chjijwžquichiča. Jalla niičha tii muntuquiz žejlñi žoñinacžquiz arajpach žeti tjaañiqui.

³⁴ Nekztanaqui ninacaqui Jesusižquiz cjichiča:

–Señor, nii t'anta chjeri panž tjaalla.

³⁵ Jalla nekztanaqui Jesusaqui tuž cjichiča:

–Wejrtča arajpach žeti tjaañi t'antitqui. Jequit wejtquin tjonachaja jalla niiqui ana wira čjjeri eeczñiz cjequiča; nižaza jequit wejtquiz criyačhaja, jalla niiqui ana wira kjaz kjara pasñiž cjequiča.

³⁶ Tuqui wejrqui ančhucaquiz chiichinča, “Ančhucqui wejr cheržcumi wejtquiz ana criichinčhucča”.

³⁷ Yooz Ejpqui wejt mantuquiz cjisjapa žoñinaca intirjichiča. Tjapa nii intirjita žoñinacaqui wejtquiz tjonaučiča. Nižaza jakziltat wejtquiz tjonachaja, jalla niiqui ana weriž čjhatkattaž cjequiča.

³⁸ Wejrqui arajpachquiztan ana wejt persun kuzcama payi tjonchinča. Antiz wejrqui wejr cuchanžquiñi Yooz Ejpž kuzcama payi tjonchinča.

³⁹ Jalla tiičha wejt Yooz Ejpž kuzqui. Niiž kuz tuž pecča, wejr ana zinta niiž intirjita žoñinaca pertiskatajo, nižaza ninaca jacatatskatajo.

⁴⁰ Nižaza tiičha wejt Yooz Ejpž kuzqui. Niiž kuz tuž zakaz pecča, jequit wejr pajačhaja, nižaza wejtquin criyačhaja, jalla niiqui Yooztan wiñaya kamaquiča. Nižaza wejrqui ninaca ticziquiztan jacatatskatača ultim juyzu pjalz tjuñquiziqui. Jalla nužuča wejt Yooz Ejpž kuzqui.

⁴¹ Tuqui Jesusaqui chiichiča, tuž cjican:

–Wejrtča arajpachquiztan tjonchi t'antitqui. Jalla nii chiitiquiztan judío žoñinacaqui niiž quintra chutchiča.

⁴² Ninacaqui cjichiča:

–¿Anaj tii Jesusac Jus maatejo? Učhumqui niiž maa ejpžquiz pajla. ¿Kjaž tiizti “Arajpachquiztan tjonchinča” cjican chiyasajo?

⁴³ Jalla nekztanaqui Jesusaqui ninacžquiz cjichiča:

–Ančhucqui anaž nuž wejt quintra chucha.

⁴⁴ Yooz Ejpqui wejr cuchanžquichiča. Nižaza niičha wejtquiz macjatskatñiqui. Jakziltat wejt Epiž macjatskatta cječhaj niiqui jalla ninacakaz wejtquiz tjonasača. Anažlaj wejt Epiž macjatskatžquitaqui, wejtquiz anaž tjonasača. Nižaza jacatatz tjuñquiziqui wejtquiz criichinacaqui jacatatskatača, ninaca Yooztan wiñaya kamzjapa.

⁴⁵ Profetanacaqui tuquitan tuž cjiirchiča: “Yoozqui tjapa niiž partir žoñinacžquiz tjajnaquiča”. Jalla nižtiquiztan jequit wejt Epiž tjajinta nonžaja, nižaza catokčhaja, jalla niiqui wejtquiz tjonča, nižazaž criičha.

⁴⁶ Jalla nuž wejt Yooz Epiž tjajinta cjenami, anaž jecmi persun čjujcztan Yooz Ejp cherchiqui. Wejr alajača Yooz Ejp cherchintqui. Wejrqui Yooz Ejpžquiztan tjonchinča.

⁴⁷ Ančhucaquiz ultim weraral chiyučha. Jequit wejtquiz criyačhaja, jalla niiqui Yooztan wiñaya kamča; nižaza arajpachquin žejtñiž cjequiča.

⁴⁸ Wejrtča arajpach žeti tjaañi t'antitqui.

⁴⁹ Ančhuca tuquita atchi ejpnacaqui ch'ekti yokquin maná cjita t'anta lujlchiča. Pero nii t'anta lujlchiž cjenami, ninacaqui ticzizakazza.

⁵⁰ Wejrtča arajpachquiztan tjonchi t'antitqui. Jequit wejt t'antiquiztan lulačhaja, jalla niiqui Yooztan wiñaya kamaquiča; arajpachquin žejtñiž cjequiča.

⁵¹ Wejrqui arajpachquiztan tjonchinča. Jaziqui wejrpanča žeti tjaañi t'antitqui. Jequit tii t'antiquiztan lulačhaja, jalla niiqui Yooztan chica wiñaya kamaquiča. Tii wejt curpuqui t'anta cuntača. Wejt curpuqui tjaa-ača, tii muntuquiz žejlñi žoñinaca Yooztan wiñaya kamajo.

⁵² Jalla nuž chiitiquiztanaqui nii judío žoñinacaqui ninacpora ch'aazi kallantichiča, tuž cjican:

—¿Kjaž tiiž persun curpu učum lulajo tjaasajo?

⁵³ Jesusaqui nekztanaqui cjichiča:

—Ančhucaquiz weraral chiyuča. Jequit ančhucaquiztan wejt curpu ana lulačhaj niiqui, nižaza wejt ljoc ana licačhaj niiqui, jalla niiqui anapanž ultimu arajpach žejtz wirchiz cjesača. Anapan Yooztan wiñaya kamasacha.

⁵⁴ Jequit wejt curpu lulačhaj niiqui, nižaza wejt ljoc licačhaj niiqui, jalla niiča Yooztan chica wiñaya kamñiqui. Nižaza nii žoñinacaqui tsjii tjonz tjuñquiziqui weriž jacatatskattaž cjequiča, Yooztan wiñaya kamzjapa.

⁵⁵ Wejt curpuqui ultimu arajpachquin žejtkatñi čhjeriča. Nižaza wejt ljocča ultimu arajpachquin žejtzjapa liczqui.

⁵⁶ Jequit wejt žejtkatñi curpu lujlčhaja, nižaza wejt žejtkatñi ljoc licčhaja, jalla ninacača wejttan tsjii kuzzizqui. Nižaza wejrtča ninacžtan tsjii kuzzizqui.

⁵⁷ Wejr cuchanžquiñi Yooz Ejpča arajpach žejtñi kamañchizqui. Wejrmi niž cjen arajpach žejtñi kamañchiztča. Nižaza jequit wejtquiztan lujlčhaja, jalla niiča weriž cjen arajpach žejtñi kamañchizqui.

⁵⁸ Wejrtča nii arajpachquiztan tjonchi t'antitqui. Jalla tii t'antaqui anača nii maná cjita t'anta irataqui. Nii maná t'anta lujlchiž cjenami, ančhuca tuquita atchi ejpnacaqui ticziča. Jequit tii wejt t'anta lulačhaja, jalla niiqui arajpachquin wiñaya žetaquiča.

⁵⁹ Jalla nuž Jesusaqui tjaajinchiča Capernaum wajtquiz ajcz kjuyquiz.

TSJII ZOÑINACAQUI ANAZ CRIICHA

⁶⁰ Jalla nižta tjaajinta nonžcu walja nižquiz apžñinacaqui tuž cjichiča:

—Tii chiitaqui ch'amača intintazqui. ¿Jequit tiiž tjaajintižquiz criyasajo?

⁶¹ Jesusaqui persun kuzquiz zizziča, tsjii apžñi žoñinacaqui niž chiitiquiztan chutchiča jalla nii. Jalla nižtiquiztan tuž cjichicha:

—¿Tii chiitiquiztan chuchya, wejtquiztan zarakz pecya?

⁶² Tuquiqui arajpachquin wejr želatča. Ančhucqui wejr wilta arajpachquin ojkñi cheraquiž niiqui, nekztan ¿jaknužt ančhuc cjeequi?

⁶³ Tsjii žoñiqui animuž cjen žejtča. Niiž curpuqui curpukazza, ana wiñaya žejtñiča. Nižaza weriž chiita takuqui ančhuca animunaca arajpachquin žetñi cjiskatasacha, Yooztan wiñaya kamajo.

⁶⁴ Yekjapanacaqui ančhucaquiztan wejtquiz ana criiča.

Jesusaqui primirquiztanpacha zizziča, jequit nižquin ana criichi cječhaja, jalla nii Nižaza zizziča, jequit niž quintr tarazuna paačhaja, jalla nii.

⁶⁵ Jalla nekztanaqui Jesusaqui tuž cjichiča:

—Wejrqui cjichinpanča, “Yooz Ejppankazza žoñinaca wejtquiz macjatskatñiqui, wejtquiz criizjapa. Jequit wejtquiz macjatžquichi cječhaja, jalla niiqui wejtquiz tjonča, nižaza criiča. Pero jequit ana macjatžquichi cječhaja, jalla niiqui anapan wejtquiz tjonasacha, criizjapa”.

⁶⁶ Jalla nekztanaqui walja nii apzñinacaqui Jesusižquiztan zarakchiča. Niižtan chica ana iya ojklaychiča.

⁶⁷ Nekztanaqui Jesusaqui niiž tuncapan tjaajintanaczquiz pewczyča, tuž cjican:

—¿Ančhuczakaz zarakz pecya?

⁶⁸ Nekztanaqui Simón Pedruqui kjaaziča, tuž cjican:

—Wejt Jiliri, ¿jecžquin wejrnac okasajo? ¿Yooz puntu tjaajinta cjisjapajo? Am takunacakazza werara tjaajintaqui, jaknužt Yooztan wiñaya kamčhaja, nii.

⁶⁹ Wejrnacqui amquiz criichinča. Nižaza zizñi cjissinča, amqui Yooz cuchanžquita Cristumpanča; wiñaya žejtñi Yooz Ejpž Maatimča.

⁷⁰ Jesusaqui nekztan tuž cjichiča:

—Wejrqui ančhuc illzinča, tuncapani. Jalla nižta cjenami tsjii ančhucacquiztan diabluz mantuquiz žejlča.

⁷¹ Jalla nuž chiican Jesusaqui Judas Iscariote, niiž puntuquiztan chiichiča. Simonž majchtača niiqui. Judasqui tuncapan illzta žoñinaczquiztanpachača. Niiqui tarasunažcu, Jesusa intirjaquiča quintra žoñinacz kjarquiz.

7

JESUSIZ LAJKNACAQUI NIIZQUIN ANA CRIICHA

¹ Jalla nekztanaqui Jesusaqui Galilea yokaran ojklaychiča. Judea yokquin ana ojklayz pecatča. Jalla nicju judío žoñinacaqui Jesusa konz pecatča.

² Nii timpuqui tsjii judío žoñinacz pjijztaqui žcatitača. Nii pjijzta paazjapa chjujlla kjuyanaca kjuychiča.

³ Jalla nižtiquiztan Jesusiž lajknacaqui niižquiz paljaychiča, tuž cjican:

—Ana tekz žela amqui. Judea yokquin oka. Jalla nicju am apzñinaca žejlča. Jalla ninaczquiz amiž paata obranaca cherskata.

⁴ Jakziltami žoñinaczquiz persun poder cherskatz pecčhaja, jalla niiqui anaž chjojzacuñ obranaca paača. Jaziqui amqui obranaca paaz poderchiz-zamžlaj niiqui, kjanapacham žoñinaczquiz tjeeznaquiča.

⁵ Jesusiž lajknacami ana niižquin criichiča.

⁶ Nekztan Jesusaqui ninaczquiz cjichiča:

—Ančhucqui čhjulorami pjijzta okasača. Wejt ojkz oraqui imaziča.

⁷ Tii muntuquiz žejlñi žoñinacaqui ančhucatan ana chjaawjkatasacha. Wejtantzi chjaawjkatča. Wejrqui kjanapacha tjeeznuča ninacz ana wali paatanaca. Jalla nižtiquiztan wejtan quintrača.

⁸ Ančhuckaz pjijzta oka. Wejrqui anal okasača. Wejt ojkz oraqui imaziča.

⁹ Jalla nuž chiižcu, nii Galilea yokquin eclichiča.

JESUSAQUI PJIJZTA OJKCHICHA

¹⁰ Niiž lajknacz pjijzta ojktanaqui Jesusaqui chjojzacuñ ojkchizakazza, žoñinaca ana cherajo.

¹¹ Judío žoñinaczti Jesusa kjurchiča nii pjijzta paañi žoñinaczporquiz, tuž cjican:

—¿Jakziquin nii žoñi želasaya?

¹² Wacchi nii pjijztiquin žejlñi žoñinacaqui Jesusiž puntu parlatča. Yekjap žoñinacaqui cjetča: “Niiča zuma žoñiqui”. Yekjap žoñinaczti cjetča: “Niiča ana zuma žoñiqui. Žoñinaczquiz tsjii kjutñi tjaajincan incallñiča”.

¹³ Pero judío jilirinaca eksu, anaž jecmi Jesusiž favora cuza kjana parlatča, antiz jamazitž parlatča.

14 Pjijzta taypi cjisnan, Jesusaqui timpluquin luzcu tjaajinchiča.

15 Jesusaž nuž tjaajnan judío žoñinacaqui ispantichiča, tuž cjican:

—¿Kjaž tii žoñiqui zizñi zizñi tjaajnasajo, ana instutiižcojo?

16 Jalla nuž nii judío žoñinacaž parlitiquiztan Jesusaqui tuž kjaaziča:

—Weriž tjaajintaqui anača wejt kuzquiztan jwesta. Antiz wejr cuchanžquiñiž kuzquiztan tjonča.

17 Jakziltat Yooz kuzcama kamz pecčhaj niiqui, nii žoñiqui zizaquiča, weriž tjaajintaqui Yoozquiztan tjonchiča, nii. Anača wejt persun kuzquiztan tjonchiqi.

18 Jakziltat persun kuzcama tjaajinčhaja, jalla niiqui persun honorakaz waytiz pecča. Pero wejrqui Yooz kuzcama tjaajnuča. Yooz Ejpqui wejr cuchanžquichiča. Jaziqui Yooz honora waytiz pecuča. Weriž tjaajintami kamtami Yooz kuzcamapankazza. Werarapanča. Ana zinta toscara chiyasača.

19 Moisesqui ančhucaltajapa lii ecchiča, ¿ana jaa? Jalla nuž ecchiž cjenpacha, anaž jecmi ančhucaquiztan nii lii jaru kamchinčucča. ¿Kjažtiquiztan ančhucqui wejr conz pecjo, ančhuca lii quintrajo?

20 Jalla nižtiquiztan nii žoñinacaqui kjaaziča tuž cjican:

—Amqui zajraž tantamča. ¿Ject am conz pecjo?

21 Jesusaqui ninacžquiz kjaaziča tuž cjican:

—Tsjii pajk obra paachinča jeejz tjuñquiz. Jalla nižta paatiquiztan ančhucqui ispantichinčucča. Pero weriž paata obra ana intintazzinčucča.

22 Nonžna. Moisesqui janchiquiz chimpuz cuzturumpi ančhucaquiz mantichiča. Primirquiztanpacha ančhuca atchi ejpnacatača nuž mantichiqi. Wiruñaquí Moisés zakaz nuž mantichiča, nii jaru. Jalla nižtiquiztan ančhucqui nii lii jaru žoñž janchiquiz chimpata cjiskatiñčucča, jeejz tjuñquizimi.

23 Moisés lii rispittapanž cjisjapa, ančhucqui jeejz tjuñquiz cjenami žoñž janchiquiz chimpata cjisiñčucča. Jalla nižtiquiztan ¿kjažtiquiztan ančhucqui wejt quintra žawj-jo, weriž jeejz tjuñquiz žoñž curpu čhetintiquiztanajo?

24 Ančhucqui, Yooz kuzmi nižaza žoñž kuzmi ana zizcuqui, anača uj jwez peczqui. Ujchiz jwez peccuqui zuma ujchiz jwezpanča.

¿JAKZIZTAN TJONCHI JESUSAJO?

25 Jalla nekztanaqui yekjap Jerusalén žejlñi žoñinacaqui pewcziča, tuž cjican:

—Tiiča nii conz pecta žoñi, ¿ana jaa?

26 Pero tekz žejl-la, anaž chjozacuñ tjaajinla; kjanaž tjaajinla. Niiž quintra žoñinacaqui ana kjažmi cjila. Jaziqui, ¿jilirinacami pajkay, tiiqui Yooz cuchanžquita Cristokay? Anapanž cjesača.

27 Wejrnaqui zizuča, jakziquiztan tii žoñi tjonchižlaja, jalla nii. Pero Cristuž tjonžcuqui anaž jecmi zizaquiča jakziquiztan tjončhaja, jalla nii.

28 Jalla nekztanaqui Jesusaqui timpluquin tjaajincan, alto tawkžtan tuž cjichiča:

—Ančhucqui cjiñčucča, nii žoñi pajuča, nižaza jakziquiztan tjonchižlaja, nii. Ultimu ančhucqui wejr ana pajča. Wejrqui persun kuzquiztan ana tjonchinča. Antiz cuchanžquita tjonchinča. Nii wejr cuchanžquiñiqui zuma lujitumača. Nižaza ančhucqui nii ana pajča.

29 Pero wejrqui nižquiztan tjonuča. Nižaza niiqui wejr cuchanžquichiča. Jalla nižtiquiztan wejrqui nii pajuča.

³⁰ Jalla nižta chiitiquiztan ninacaqui preso tanz pecatča. Jesusiž preso tanta cjis oraqui imazitača. Jalla nižtiquiztan ana jakziltami tanzni atchiča.

³¹ Jalla nuž tanz pecni žoñinaca želanami walja žoñinacaqui Jesusižquin criichiča. Nii criichinacaqui tuž cjichiča:

–Yooz cuchanžquita Cristo tjonžcuqui, ¿tii žoñžquiztan juc'ant cuza milajrunaca paasajo?

ZULTATUNACA CUCHANTA

³² Jalla nekztanaqui fariseo žoñinacaqui Jesusiž puntu chiitanaca nonžcu, ninacaqui timplu jilirinacžtanpacha Jesusa preso tani zultatunaca cuchanžquichiča.

³³ Jalla nižtiquiztan Jesusaqui cjichiča:

–Wejrqui tsjii kjaž jiizkal ančucatan želača, jalla nekztan wejr cuchanžquiñizquin quepača.

³⁴ Jalla nekztan ančucqui wejr kjuraquiča. Jalla nuž kjurcan anaž wejr wachi ataquiča. Nižaza ančucqui anaž oki atasača, jakziquint wejr želačhaja, jalla nicju.

³⁵ Jalla nekztanaqui nii judío žoñinacaqui ninacpora pewcsassiča, tuž cjican:

–¿Jakziquint tii okas, ana watžta cjisjapajo? ¿Yekja yokquin kamni judío žoñinacžquin nižaza nekz žejlñi žoñinacžquin okas teejo, ninacžquin tjaajinzjapajo?

³⁶ ¿Čhjulut tiiž chiitac cjes? “Ančucqui wejr kjuraquiča, pero wejr ana wachi ataquiča”, cjican. Nižaza “Ančucqui anaž oki atasača, jakziquint wejr želačhaja, jalla nicju” cjican. Jalla nuž chiyanacqui, ¿čhjulut cjes?

³⁷ Jalla nekztanaqui pijzta tucužinž tjuñquiziqui wali chawc tjuñitača. Jalla nii tjuñquiziqui Jesusaqui tsijtscu, alto tawkžtan paljaychiča:

–Jakziltat kjaz kjara passaja, jalla niiqui wejtquiz macjatžca, wejt wiñaya žejtkatni kjaz liczjapa.

³⁸ Jequit wejtquiz criyačhaja, jalla niiž kuzquiztan walja zumanaca ulnaquiča jaknužt tsjii zuma jalzurquiztan zuma kjaznaca ulančhaja, jalla nižta. Jalla nuž Yooz tawk libruquiz cijrtača.

³⁹ Jalla nuž chiican Jesusaqui Espiritu Santuž puntuquiztan chiichiča. Wiruñacqui Yooz Espiritu Santuqui Jesusižquiz criichinacž kuzquiz luzaquiča. Pero Jesusaqui imaž ticznatča, nižaza imaž tsewc arajpacha okatča. Jalla nižtiquiztan imazitača Espiritu Santo tjaataqui.

CRISTUZ PUNTU PARLITA

⁴⁰ Jalla nuž Jesusaž chiita nonžcu yekjap žoñinacaqui cjichiča:

–Chekapan tiiča nii tjonni profetaqui.

⁴¹ Yekjapazti tuž cjichiča:

–Tiiča Yooziž cuchanžquita Cristuqui.

Yekjapanacaqui cjichiča:

–¿Kjaž Galilea žoñinacžquiztan Cristuc nasasajo? Anaž cjesača.

⁴² “Cristuqui Davidž majchmajtquiztan naspanča, nižaza Belén cjita wajtquin nasaquiča. Nii watjaqui Davidž watja cjitača”. Jalla nuž cjiča Yooz takuqui.

⁴³ Jalla nuž parližcu nii žoñinacaqui t'aka t'aka cjissiča, Cristuž puntuquiztan ch'aazcu.

⁴⁴ Yekjapanacaqui Jesusa preso tanz pecatča. Jalla nuž peccanami, ana jaknužumi payi atchiča.

⁴⁵ Timplu zultatunacaqui timplu jilirinacžquinami fariseonacžquinami quejpcchiča, ana Jesusa preso tani atžcu. Nii jilirinacaqui zultatunacžquiz cjichiča:

—¿Kjažtiquiztan ančhuc nii ana zjičjo?

⁴⁶ Nii zultatunacaqui kjaaziča, tuž cjican:

—Anaž jecmi chiiča, jaknužt nii žoñi chiyatčhaja, jalla nužuqui. ¿Yooziž cuchanžquita nii žoñejo?

⁴⁷ Jalla nekztanaqui fariseo žoñinacaqui tuž cjichiča:

—¿Ančhuczakaz incallskatchinčhucž, jaz?

⁴⁸ Tjapa učum jilirinacami nižaza tjapa fariseo žoñinacami niižquinaqui ana criichipanla.

⁴⁹ Tii ana lii pajñi žoñinacaqui, jalla ninacakazza niižquin criichiqui. Ninacaqui Yooziž castictapanž cjequiča.

⁵⁰ Nicodemo cjitatača tsjiiqui ninacžquiztan. Tuquiqui ween chjojzacuñ Jesusižquin zina ojkchiča. Jalla niiqui ninacžquiz cjichiča:

⁵¹ —Učum liiqui tuž cjiča, “Tsji žoñiqui ima casticta cjican, primero kjawžta cjequiča, niž persun razuna nonžta cjisjapa”. Nuž cjiča učum liiqui, ¿ana jaa?

⁵² Nekztanaqui ninacaqui kjaaziča tuž cjican:

—¿Am zakaz Galileauiztanajo? Yooz taku istutiya. Anaž jec profetaqui Galileauiztan tjonasača. Jazim zizaquiž, jaz.

⁵³ Jalla nekztanaqui tjappacha persun kjuya ojkchiča.

8

ADULTERIUQUIZ OJKLAYÑI ZON

¹ Jesusaqui Olivos cjita curulla ojkchiča.

² Jakatažuqui kjantati timpluquin quejžquichiča. Tjapa nekz žejlñi žoñinacaqui niižquin tjonchiča. Jesusaqui julžcu wilta tjajinchiča.

³ Jalla nuž julzi tjajnan, lii tjajinacami fariseonacami tsjaa maatak žon zjičchiča. Jalla naa maatak žonqui adulterio paachiž cjen tanstkalča. Žoñinacaqui jalla nuž tanžcu naa maatak žon Jesusiž yujcquiz zjičchiča. Nižaza nii žejlñi žoñinacž taypiquiz tsijskatchiča naa žonqui.

⁴ Nekztanaqui ninacaqui Jesusižquiz tuž paljaychiča:

—Tjajin Maestros, taa maatak žonqui adulterio paañipacha tanassinča.

⁵ Moisés liiquiz tuž mantitača, “Tižta adulteriuquiz cjičjiñi žoñinacaqui čhajc jawi conz cjitača”. Am, ¿kjažum cjiy?

⁶ Jalla ninacaqui nuž paljaychiča, Jesusa kjaz cjiñit cjes, jalla nii zizjapa. Nižaza Jesusiž chiitiquiztan ujchiz jwez pecatča, niž quintra tsjii uj tjojtunzjapa. Jalla nekztanaqui Jesusaqui pachpiquiz colžcu yokquiz cijiri kallantichiča, niž loc'anžtan.

⁷ Pero ninacaqui tirapanž Jesusižquiz pewcnatča, “Am, ¿kjažum cjii?” cjican. Jalla nekztan Jesusaqui zumpacha acha waytižcu, ninacžquiz cjichiča:

—Ančhucaquiztan jakziltapirižlaj ana ujchiz, niiqui primiru taa maatak žonaquiz maztan čhajczkazza.

⁸ Jalla nuž chiižcu wilta colžcu yokquiz tira cijiratča.

⁹ Jalla nuž Jesusiž chiitiquiztan nii žoñinacaqui persun ujquiztan sint'ichiča. Nekztanaqui mayat mayat ch'uju ulñi kallantichiča. Chawc žoñinacž primiraqui ulanchiqui. Nekztan tjappacha nii žoñinacž ulantan, Jesusaqui naa maatak žonatan, nuž pucultankaz, eclichiča.

¹⁰ Jalla nekztanaqui Jesusaqui wilta acha waytichiča. Anaž jecmi želatča. Naa maataka alajakaztača. Nekztan naaquiz cjichiča:

–Cullaca. ¿Jakziquin amquiz uj tjojtunñi žoñinacajo? ¿Ana jakziltami am castiqui atchikaya?

¹¹ Naa maatak žonqui cjichinča:

–Wejt Jiliri, anaž jakziltami wejr castiqui atchiča.

Nekztanaqui Jesusaqui naaquiz cjichiča:

–Wejrmi anal am ujquiztan casticača. Jaziqui oka amqui, anam iya uj paaquiča. –Nuž pertunchiča Jesusaqui.

KJANAZTAKAZ JESUCRISTO

¹² Wiruñaqi Jesusaqui žoñinacžquiz wilita paljaychiča, tuž cjican:

–Wejrqui tii muntuquiz žejlñi žoñinacžquiz zuma kamaña tjeeznuča, tsjii kjanažtakaz. Jakziltat wejt kamañ jaru kamačhaja, jalla niiqui anawal zumchiquiz anaž kamaquiča. Nižaza nii zuma kamañchiz žoñinacača wiñaya Yooztan kamñinacaqui.

¹³ Jalla nekztanaqui nii fariseo žoñinacaqui cjichiča:

–Am alaja am persunjapa chiča. Jalla nižtiquiztan anaž walča.

¹⁴ Jesusaqui kjaaziča, tuž cjican:

–Tii weriž chiitaqui wejt persunjapa cjenami walča. Wejrqui zizuča jakziquiztan tjontučhaja, nižaza jakzit wejr okačhaja, jalla nii. Anchuczti anaž nii zizza.

¹⁵ Ančhucqui žoñiž pinsita jarukaz wejtquiz uj tjojt pecča. Pero wejt kuz ana zizza. Wejrzi anal nižta uj tjojtinča.

¹⁶ Pero weril tsjii žoñžquiz “Uj paachamča” cjeež niiqui, wejrqui weraral chiyuča nii žoñiž uj paañiž cjen. Anal wejt kuzquiztankaz chiyuča. Wejr cuchanžquiñi Yooz Ejpž kuzcamakal wejrmi chiyuča. Wejrmi wejt Yooz Ejpmi tsjiikaz chiyuča.

¹⁷ Ančuca liiquiz tuž cjiirtača: “Pucultan tistic žoñinacaqui tsjiikaz chiyaquiz niiqui ninacž chiitaqui walča”.

¹⁸ Wejrqui persun puntuquiztan chiyuča. Nižaza wejr cuchanžquiñi Yooz Ejpqui wejt puntuquiztan zakaz chiča. Jaziqui weriž chiitaqui panž walča.

¹⁹ Jalla nekztanaqui ninacaqui Jesusižquin cjichiča:

–¿Jakziqint am Ejpjo?

Jesusaqui tuž kjaaziča:

–Ančhucqui wejr anaž ultimu pajča, nižaza wejt Ejpmi anaž pajča. Wejr ultimu pajčaj niiqui, wejt Ejp zakaz pajasača.

²⁰ Nuž tjaajincan Jesusaqui timpluquiz želatča. Jakziquin ofrenda utz cajanaca želatčhaja, jalla nekž želatča. Nuž želan, anaž jecmi Jesusa preso tanchiča. Jesusa preso tanta cjis oraqui imazitača.

JESUSA OJKZ PUNTU

²¹ Jalla nekztanaqui Jesusaqui wilita ninacžquiz cjichiča:

–Wejr okača. Jalla nekztanaqui ančhucqui wejr kjuraquiča. Pero jakziqint wejr okačhaja, jalla nicju ančhucqui anaž oki atasača. Ančhucqui ticznaquiča persun ujquiztan ana pertunta.

²² Nekztanaqui nii judío žoñinacaqui cjichiča:

–Tiiqui chiča, “Jakziqint wejr okačhaja, jalla nicju ančhucqui ana oki atasača”, cjicanž chiča. ¿Tiiqui persunpacha curpu conasaya?

²³ Nekztanaqui Jesusaqui tuž cjichiča:

–Ančhucqui tii kozta yokchiz žoñčuckazza. Wejrzi tseweta yokchiz žoñtča. Ančhucqui tii yokquiz žejlñi žoñž kuzcama kamiñchucča. Wejrzi ana tii yokquiz žejlñi žoñž kuzcama kamiñča.

²⁴ Jalla nižtiquiztan wejrqui ančucaquiz chiichinča, ančucqui ticznaquiča, persun ujquiztan ana pertunta. Ultimupan ančucqui weriž chiitaqui ana catokaquiž niiqui, ticznaquiča, persun ujquiztan ana pertunta.

²⁵ Jalla nekztanaqui ninacaqui pewcziča, tuž cjican:

—¿Jequimt amjo?

Jesusaqui tuž kjaaziča:

—Jaknužt wejt persun puntuquiztan chiintčhalaja, jalla nižta žoñtpanča wejrqui.

²⁶ Ančuca puntuquiztan wejtta walja chiiz žejlča, ančuca uj tjeezjapa. Pero wejt chiizqui anača wejt kuzquiztanqui. Antiz wejr cuchanžquiñiž kuzcamapankazza. Wejr cuchanžquiñiqui werara chiiñipanča. Wejrqui nižquiztan nonžtanaca maznuča tii muntuquiz žejlñi žoñinacžquiz. Jalla nižtiquiztan weriž chiitaqui ančuca puntuquiztan ultim werarača. —Jalla nuž chiichiča Jesusaqui.

²⁷ Jalla nuž Yooz Ejpž puntuquiztan chiyān, nii judío žoñinacaqui ana intintazziča.

²⁸ Jalla nekztan Jesusaqui cjichiča:

—Wejrqui tsewctan cuchanžquita Yooz Zoñtča. Chjulorat ančucqui wejr tsewcchuc waytita cheračhaja, jalla nii ora ančucqui zizaquiča, werarača wejt persun puntuquiztan chiitaqui, nii. Wejrqui anal wejt persun kuzquiztan kamuča. Antiz wejt Yooz Epiž kuzcama kamuča. Wejt waytiz oraqui jalla niizakaz zizaquiča.

²⁹ Wejr cuchanžquiñiqui wejtta chicaž žejlča. Wejrqui niž kuzcamapan kamuča. Jalla nižtiquiztan wejt Ejpqui anaž wejr zina ecča.

³⁰ Jalla nuž Jesusiž chiitiquiztan muzpa žoñinacaqui nižquin criichiča.

LIWRIIZ PUNTU

³¹ Jalla nekztanaqui Jesusaqui nižquiz criichi judío žoñinacžquiz cjichiča: —Ančucqui weriž chiita tawkquiz tjapa kuztan tjurt'aukiž niiqui, ultim werara wejt partir žoñinaca cjequiča.

³² Nižaza Yooz takuča ultim weraraqui, nii zizaquiča. Jalla nuž werara zizcu liwriitaž cjequiča.

³³ Nii ana criichi judío žoñinacaqui Jesusižquiz kjaaziča, tuž cjican:

—Wejrnacqui Abrahamž majchmajtquiztan tjoniñča. Jaziqui Yooz wajtchiz žoñinactča wejrnacqui. Yekjaž mantuquiz anaž wira žejlchinča. Amzti, ¿kjažtiquiztan chiichamta, “Ančucqui liwriitaž cjequiča” cjicanajo?

³⁴ Jesusaqui ninacžquiz cjichiča:

—Ančucaquiz weraral chiyuča. Jakzilat uj paacan kamčhaja, jalla niiqui ujž mantuquiz kamča.

³⁵ Tsjii mantita piyunaqui patrunž kjuyquiz kamchi cjenami ultimu anaž nii kjuychiz famillž partiquiz želasača. Antiz nii famillž majchqui jalla niiča famillž partiquiz žejlñipanča.

³⁶ Jalla nižtiquiztan ančucqui Yooz Majchiž liwriita cjequiž niiqui ultim werara liwriita cjequiča, Yooz kjuychiz famillquiz cjisjapaqui.

³⁷ Wejr zizuča, ančucqui Abrahamž majchmajtquiztan tjoniñčhucča, nii. Pero jalla nuž cjenami, ančucqui weriž chiitanaca anapan catokča. Jalla nižtiquiztan ančucqui wejr konz pecča.

³⁸ Wejrqui chiyuča, wejt Yooz Epiž chiitanaca, jalla nii. Ančuczti ančuca epiž chiita jaru paača.

³⁹ Ninacaqui tuž kjaaziča:

—Wejtnaca atchi ejpča Abrahamqui.

Pero Jesusaqui ninacžquiz cjichiča:

–Ančhucqui ultimu Abrahamž majchmajtčhuc cjičhaj niiqui, niiž kamta irataž kamčhani.

⁴⁰ Yoozquiztan nonžtanac jaru werara chiichinča. Jalla nuž werara chiitiquiztan ančhuczi wejr konz pecča. Abrahamqui ana nižta paachiča.

⁴¹ Ančhucqui persun epiž kamta irataž kamča.

Nekztanaqui ninacaqui cjichiča:

–Wejrnacqui anača adulteriuquiz kamñi maa ejpžquiztan tjoniñqui. Wejtnaca maa ejpnaca zizuča. Nižaza wejrnacqui tsji arajpach Ejpchizkazza. Yoozza niiqui.

⁴² Jesusaqui nekztan cjichiča:

–Ančuca ejpqui Yoozalaj niiqui, ančhucqui wejttan zuma munazitasacha. Wejrqui Yooz Ejpžquiztanča; niižquiztan tjonuča. Niiž pinsitiquiztan tekz tii muntuquiz želuča. Anal wejt kuzcamakaz tjonchinča. Wejt Yooz Ejpqui wejr cuchanžquichiča.

⁴³ ¿Kjažtiquiztan ančhucqui weriž chiitanaca ana intintzasajo? Ančhucqui weriž chiitanaca anapanž kuztan nonz pecča, nekztan.

⁴⁴ Ančuca ultim ejpqui diabluča. Niiž kuzcama kamz pequiñchucča. Primirquiztanpacha niiča žoñi conñiqui. Nižaza diabluqui werara chizquiztan ana juyzu paañiča. Anapanča werar taku chiiñi niiqui. Niiž ana zum kuzcamapan toscar takunaca chiiča. Niipankazza toscara chiiñiqui. Nižaza niiča toscar chiiñinacž ejpqui.

⁴⁵ Wejrqui ančucaquiz weraral chiyuča. Ančuca diablu ejpchiz cjen, weriž werara chiitanaca ana criiñchucča.

⁴⁶ ¿Ject ančucaquiztan tsji weriž paata uj tjeenasajo? Wejrqui Yooz taku werarapan chiyuča. ¿Kjažtiquiztan wira ana wejtquiz crii ančhucjo?

⁴⁷ Yooz partir žoñinacaqui Yooz takuž nonža. Ančhuczi anapanča Yooz partira. Jalla nižtiquiztan ančhucqui Yooz taku ana nonz pecča.

IMA ABRAHAM ZELAN, JESUCRISTUQUI ZELATCHA

⁴⁸ Nekztan judío žoñinacaqui Jesusižquiz kjaaziča tuž cjican:

–Amqui anawal Samaria wajtchiz žoñimžlani. Zajraž tanta žoñimžlani. Nužupanča.

⁴⁹ Jesusaqui ninacžquiz tuž kjaaziča:

–Wejrqui anača zajraž tantitqui. Wejt Yooz Ejpž honora waytuča. Ančhuczi wejr iñarcan wejtquiz anaž honora tjaača.

⁵⁰ Wejrqui persun honora ana waytiz pecuča. Tsjiiqui žejlča. Jalla niiča wejt honora waytiz pecñiqui. Jalla niiča lijituma pjalzñiqui.

⁵¹ Wejrqui ančucaquiz weraral chiyuča. Jequit weriž chiitacama kamčhaja, jalla niiqui ana ticzñiž cjequiča; Yooztan wiñaya kamaquiča.

⁵² Jalla nuž chiitiquiztan judío žoñinacaqui tuž kjaaziča:

–Jalla nuž amiž chiitiquiztan wejrnacaqui zizzinča, zajraž tantapanimkalal amqui. Abraham ticziča; profetanacami ticzizakazza. Amzti cjiča, “Jequit weriž chiitacama kamčhaja, ana ticzñiž cjequiča”, nii.

⁵³ Amqui wejtnacaž ticzi Abraham ejpžquiztan tsjan jilirim cjes, ¿kjažtatajo? Yooztajapa chiiñi profet žoñinacami ticziča. ¿Chjul žoñipanim amzt cjesajo?

⁵⁴ Jesusaqui tuž kjaaziča:

–Wejt persun honora waytaž niiqui, jalla nuž waytita honoraqui anaž walča. Wejt Yooz Ejpča wejt honora waytiñiqui. Jalla niiž puntu ančhucqui “Wejtnaca Yoozza” cjiñchucča.

⁵⁵ Ančhucqui nii Yoozqui anapan pajča. Wejrkal nii pajuča. “Wejrqui Yooz Ejp anal pajuča”, cjesaž niiqui, wejrqui toscaral cjesača, ančhuc irata. Yooz Ejp pajuča; nižaza niiz chiitacama kamuča.

⁵⁶ Tuquita atchi Abraham ejpqui wejt tjonž tjuñi nonžcu, walja cuntintutača. Nižaza wejt tjonž tjuñi zizcu, walja chipchiča.

⁵⁷ Jalla nuž chiitiquiztan nii judío žoñinacaqui Jesusižquiz cjichiča:
—Amqui imazi pjizka tunc watchizzam pero. ¿Jaknužt amzti Abraham pajcham cjesajo?

⁵⁸ Jesusaqui ninacžquiz tuž kjaaziča:
—Ančhucaquiz ultim weraral cjiwča. Ima Abraham želan, wejrqui žejlchinča.

⁵⁹ Jalla nuž chiitiquiztan judío žoñinacaqui maznaca aptichiča. Jesusa maztan čhajcz pecatča. Jesusazti chjojziča. Nekztan timpluquiztan ulanchiča. Nekz žejlñi žoñinacž taypiquiztan atipassiča.

9

ZUR ZOŇI CHJETINTA

¹ Jalla nekztanaqui Jesusaqui jiczquiz ojkchiča. Nii jicz latuquiz tsjii zur žoñi želatča. Majttiquiztanpacha zuratača.

² Jalla nii žoñi cheržcu Jesusiž tjaajinta žoñinacaqui pewcziča, tuž cjican:
—Tjaajiñi Maestro, ¿kjažtiquiztan zurapan majttata? ¿Niiž maa ejpž ujquiztan nižta zura majtta cjesaya? Už ¿persunž ujquiztan cjesaj?

³ Jesusaqui ninacžquiz tuž kjaaziča:
—Anaž niiz persun ujquiztanami, nižaza anaž niiz maa ejpž ujquiztanami zura majttatača. Antiz zura žejlča, niiz zuržquiz Yooz obra tjeežta cjisjapa.

⁴ Jaknužt žoñinaca majiñ langžaja, jalla nižta irata wejrnacqui tii muntuquiz žejlcan langstanča. Wejt cuchanžquiñiž tjaata obranaca langstanča. Zumz timpu wajillača. Zumchi cjenaqui anaž jecmi langzuca.

⁵ Tii muntuquiz žejlcan wejrqui žoñinacžquiz Yooz zuma kamaña tjeeznuča, tsjii kjanažtakaz.

⁶ Jalla nuž chiižcu, Jesusaqui yokquiz tjujtziča. Nekztan nii tjujtžta llawsa yok pjilžtan tjarziča. Jalla nii aptižcu nii zur žoñž čhujcquiz tjalžinchiča.

⁷ Nekztanaqui nii zur žoñžquiz cjichiča:
—Siloé cjita coch paata kjazquin oka. Jalla nicju čhujqui awjžca.
Siloé cjita tjuuqui “Cuchanžquita” cjiča ninacž tawkquiz. Jalla nekztanaqui nii zur žoñiqui ojkžcu čhujqui awjziča. Nekztan cherñi cjissiča. Cherñi quejpžquichiča.

⁸ Jalla nekztan niiz žcati kamñi žoñinacami nižaza niizquiz pajñi žoñinacami nii žejtchi cheržcu, tuž cjichiča:

—¿Anaj tiiqui nii paaz tomtomangžñi žoñiya? Tuquiqui julzi žejlñitala.

⁹ Yekjapanacaqui cjetča:

—Niipansala.

Yekjapac cjetča:

—Anapanž nii tiiqui. Nižtažtakazla, pero.

Pero nii žejtchi žoñipachača cjichiqui:

—Wejrpantča.

¹⁰ Jalla nekztanaqui niizquiz pewcunchiča:

—¿Kjažum am jazic cher, kjažtatajo?

¹¹ Niiqui ninacžquiz kjaaziča tuž cjican:

—Nii Jesusa cjita žoñiqui llawsiztan yok pjilžtan tjarziča. Jalla nuž tjaržcu wejt čhujcquiz tjalžinchiča, tuž cjican: “Siloé cjita kjazquin oka. Jalla nicju

ajunžca”. Jalla nekztanaqui ojkchinča wejrqui. Chjujui ajunžcu cherñi cjissinča.

¹² Jalla nekztanaqui nii žejtchi žoňžquiz pewczizakazza tuž cjican:

—¿Jakziquin nii žoňiya?

Niiqui tuž kjaaziča:

—Anal zizuča.

¹³ Jalla nekztanaqui jakatažuqui nii zurquiztan čhjetinta žoňiqui fariseo partinaczquin chjichtatača.

¹⁴ Jeejz tjuňquiz Jesusaqui nii milajru paachiča.

¹⁵ Fariseo žoňinacaqui nii zurquiztan čhjetinta žoňžquiz wilta pecunchiča, tuž cjican:

—¿Anziqui kjažtam cherya?

Nii žoňiqui tuž kjaaziča:

—Llawsižtan pjilžtan tjaržcu, wejt čhjujqui tjajlžinčiča. Jalla nekztan wejt čhjujqui ajunžcu, cherñi cjissinča. Jaziqui cheruča.

¹⁶ Tsjii fariseo žoňinacaqui nii Jesusižjapa quintra chiichiča, tuž cjican:

—Nii žoňiqui anaž Yooz partiquiztan cjesača. Niiqui ana jeejz tjuňimi rispitchila.

Yekjapazti cjetča:

—¿Kjažt ujchiz žoňiqui nižta milajrunaca paasajo? Anaž cjesača.

Jalla nižtiquiztan Jesusiž puntuquiztan t'aka t'aka cjissiča.

¹⁷ Jalla nuž t'aka t'aka cjiscu, wilta nii zurquiztan čhjetinta žoňžquiz pecunchiča, tuž cjican:

—¿Amqui kjažum cji, am čhjujqui čhjetiňi žoňž puntu?

Nii žoňiqui tuž kjaaziča:

—Wejrqui cjiwča, jalla niiča Yooz cuntiquiztan chiiňi profet žoňipanqui.

¹⁸ Tuquiqui nii žoňiqui zuratača, jaziqui cherñi cjissiča. Pero nii judío žoňinacaqui nii milajru ana criiz pecatča. Jalla nekztan nii žoňž maa ejp kjawziča, pewczjapa.

¹⁹ Jalla tuž pewcziča:

—¿Tiic am majchkaya? ¿Tiic zurapan majttatakaya? ¿Kjažt tiizti cherñi cjesajo?

²⁰ Nii maa ejpqui kjaaziča, tuž cjican:

—Tiipanča wejtnaca majchqui. Nižaza zurapan majttatača. Jalla niikal chiyasača.

²¹ Anziqui cherñi cjissižlani, jalla nii puntuquiztanaqui anal zizuča. Nižaza jecčhalaj tiiž čhjujqui čhjetinči anal zizuča. Tiika pewcnani. Pajk žoňiča tiiqui. Tiipachaž razunaqui tjaasača.

²² Nii judío žoňinacaqui tsjii acuerduquiz parlassitača, jakziltat Jesusiž puntuquiztan “Tiiča Cristuqui” cjican chiyachaja, jalla niiqui ajcz kjuyquiztan chjatkattaž cjistanča. Jalla nii acuerduquiz parlassitača. Jalla nižtiquiztan nii zur žoňž maa ejpmi ekziča; ana kjanacama chiiz pecatča.

²³ Jalla nižtiquiztan ninacaqui kjaaziča, tuž cjican:

—Tiika pewcnani. Pajk žoňiča tiiqui.

²⁴ Jalla nekztanaqui nii judío žoňinacaqui nii zurquiztan čhjetinta žoňi wilta kjawziča. Nekztan tuž cjichiča:

—Yooz honora wayta. Anača Jesusiž honora waytizqui. Wejrnaca zizuča, nii čhjetinči cjita žoňiqui walja uj paaňipanča.

²⁵ Jalla nekztan nii zurquiztan čhjetinta žoňiqui tuž kjaaziča:

—Wejrqui anal zizuča, uj paaňi ana uj paaňi, nii. Pero wejrqui zuratača. Jaziqui cheruča. Jalla nužupan zizuča.

²⁶ Wilta niižquin pecunchiča, tuž cjican:

—¿Jaknužt paachitajo? ¿Jaknužt am čhujqui čhjetintajo?

²⁷ Nii žoñiqui tuž kjaaziča:

—Ančhucaquiz chiichinsala. Weríž chiita ana nonz pecča. ¿Kjažtiquiztan wilta wilta wejr chiiyaj cjeejo? ¿Ančhucazakaz nižtan chica ojklayñi cjis pecjo?

²⁸ Jalla nekztanaqui nii judío žoñinacaqui nii zurquiztan čhjetinta žoñžquiz ch'aanichiča tuž cjican:

—Amqui nii žoñž jaru ojkča. Wejrnaczi Moisés jaru okuča.

²⁹ Yoozqui Moisesquiz chiichiča. Jalla nii zizuča. Tii žoñžquiztanaqui anal zizuča, jakziquiztan tjončhaja, jalla niimi.

³⁰ Jalla nekztanaqui nii čhjetinta žoñiqui tuž cjichiča:

—Tiiča ispantichuca. Ančhucqui jakziquiztan tjončhaja, nii ana zizza. Wejtquiz pero čhujqui čhjetinžinčiča.

³¹ Učhumqui zizla. Yoozqui ujchiz žoñinacž mayiztaqui anaž nonz-nasača cjiča. Yooz rispiti žoñinacžquizimi nižaza Yooz kuzcama kamñi žoñinacžquizimi, jalla ninacžquiz nonznasača Yoozqui cjiča.

³² Anawira tsjii zur žoñž čhujqui čhjetinta quintu žejlñitala, tuquitan-pachami.

³³ Nii žoñiqui ana Yooz partiquiztanžlaj niiqui, ana čhjul pajk obrami paachani.

³⁴ Jalla nekztanaqui nii judionacaqui tuž cjichiča:

—Amqui ujchizpan majttamtača. ¿Jaziqui wejtnacaquiz tjaajinzim pec, kjažtatajo?

Jalla nekztan nii zurquiztan čhjetinta žoñi ajcz kjuyquiztan chjatkatchiča.

ZURANZ PUNTUQUIZTAN

³⁵ Jalla nuž chjatkattiquiztan Jesusaqui zizziča. Jalla nekztan nii žoñžtan wilta zalžcu, tuž cjichiča:

—¿Tsewctan cuchanžquita Yooz Žoñžquizim criya?

³⁶ Nii čhujqui čhjetinta žoñiqui tuž kjaaziča:

—Señor, maznalla, ¿ject niiqui? Wejrqui nižquin criyasača.

³⁷ Jesusaqui nižquin kjaaziča, tuž cjican:

—Anziqui werim cherča. Niiča wejrtqui, amtan parliñtqui.

³⁸ Jalla nekztanaqui nii žoñiqui Jesusiž yujcquiz rispitan quillziča, tuž cjican:

—Wejt Jiliri. Amquiz criyuča.

³⁹ Jesusaqui nižquiz cjichiča:

—Wejrqui tii muntuquiz tjončiča, žoñinaca pjalzjapa. Tsjii žoñinaca žejlča ana zuma kamañchiz. Pero ninacž ujquiztan kuz zint'iča, “ujchizpanča wejrqui” cjican. Wejrqui tjonchinča ninaca zuma kamañchiz cjiskatzjapa. Tsjii žoñinaca žejlča. Jalla ninacaqui ana zuma kamañchizakazza. Pero “Yooz puntu zuma zizuča” cjiñiča. Jalla nuž chihiyani ninacača zur žoñinacžtakaz. Jalla nii tjeezjapa, tii muntuquiz tjonchinča.

⁴⁰ Jesusaž nuž chiyani yekjap fariseo žoñinacaqui niž žcati želatča. Ninacaqui nii chiita nonžcu, pewcziča tuž cjican:

—¿Wejrnacmi zur žoñinacžtakaz cjesajo? Anaž cjesača.

⁴¹ Jalla nekztanaqui Jesusaqui ninacžquiz tuž cjichiča:

—Ančhucqui persun kuzquiz zur žoñižtakaz naytasaj niiqui, ančhucqui anaž ančhuca ujquiztan casticta cjitasacha. Pero “Wejrnacqui Yooz puntu

zuma zizuča” cjicanž chiila. Jalla nižtiquiztan ančuca ujquiztan casticta cjequiča.

10

UZZANACZ QUINTU

¹ Jesusaqui zakaz cjichiča:

–Ančucaquiz wereral chiyuča. Jakziltat uuzi uyquiz ana zan kjutan luzzaja, yekja latuquiztan chjojzacuñ luzzaja, jalla niča ana wal tjañiqui. Uzanaca kjañzjapa luzza.

² Pero jakziltat uuzi uy zanquiztanpan luzzaja, jalla niča uuzi itzñi awatiriqui.

³ Nižaza uy zana cwitiñi žoñiqui uy zana cjetziñiča nii uuzi awatiri luzjapa. Nižaza nii uuzanacaqui awatirž jora pajča. Nii awatiriqui uuzi tjuucu tjuucu kjawža, nižaza uyquiztan jwessa.

⁴ Jalla nuž tjapa niž uuzanaca jwescu, niž uuzanacz tucquinž ojkča. Nižaza nii uuzanaca niž wirquiz apža, jora pajžcu.

⁵ Tsjii ana pajta žoñž wirquiziqui anaž apža, antiz nii ana pajta žoñžquiztan zajtča, niž jora ana pajžcu.

⁶ Jalla nuž Jesusaqui quint'ichiča. Pero nonžñi žoñinacazti ana wira intintaziča, čjul puntuquiztan chičhaja, jalla nii.

ZUMA AWATIRI

⁷ Jalla nektanaqui Jesusaqui wilita ninaczquiz chiichiča, tuž cjican:

–Ančucaquiz wereral chiyuča. Wejrtča uuzi uy zantqui.

⁸ Ima weriž tjonan, žoñinacaqui tjonchiča, “Yoozquiztan tjonuča”, cjicanaqui. Pero tjañicamača tjapa nii tjonchi žoñinacaqui. Uuzi tjangzñinacača ninacaqui. Pero ninacz wirquiziqui wejt uuzanacaqui ana apziča.

⁹ Wejrtča uuzi uy zantqui. Jakziltat weriž cjen Yooz jamillquiz luzzaja jalla ničiqui liwriitaž cjequiča. Jalla ničiqui Yooz uuzi cuntaž cjequiča. Uuzi uyquiz luznaquiča, zaž ulnaquiča, zuma pastu watzjapa. Liwriitapaž cjequiča.

¹⁰ Tjañi cjicjiñi žoñinacaqui tjonča, cjisñi, coni, nižaza tirkati, jalla nii alaja tjonča. Wejrzi tjonchinča, zuma kamaña tjaazjapa, ančuc anča zuma kamañchiz cjiskatzjapa.

¹¹ Wejrtča zuma awatirtqui. Tsjii zuma awatiriqui niž uuzanacz laycu ticznasača.

¹² Pero yekjapanacaqui paca tanzjapakaz uuzi ichñiča. Jalla ninacaqui tsjii uuzi tanñi animalaž tjonan uuzi eccu zatasacha. Nii uuzi anača persun uuzanaca. Jalla nuž uuzanaca ectan nii anawal animala tjonchiqui uuzanacz tanča, nižaza witča. Anača nižta zuma awatiriqui.

¹³ Nii anawal awatiriqui paca tanzjapakaz uuzi ichñiča. Ana nii uuzanaczjapa juyzu paañiča, čjulunacat watačhaja, jalla nii. Jalla nižtiquiztan uuzanaca eccu, anawal animalquiztan zatasacha.

¹⁴⁻¹⁵ Wejrtča zuma awatirtqui. Jaknužt wejt Yooz Ejpqui wejtquiz pajčhaja, nižaza wejrmi wejt Ejpžquiz pajučhaja, jalla nižtača wejrqui wejt uuzanaczquiz pajuča, nižaza wejt uuzanacaqui wejtquiz pajča. Wejrqui wejt uuzanacz laycu ticznača.

¹⁶ Wejtta zakaz žejlča yekja uuzanaca ana tii uyquiz cjiñiqui. Wejrqui nii uuzanaca ricujquiztanzakaztča. Jalla ninacaqui wejt taku cazaquiča. Tjapa wejt uuzanacaqui tsjii tamaž cjequiča, nižaza tsjii awatirchiz.

¹⁷ Wejt uuzanacz laycu ticznača, nižaza jacatatača. Jalla nižtiquiztan Yooz Ejpqui wejr k'aachiča.

¹⁸ Anaž jecmi wejr ticzkatasacha. Antiz wejrqui persun kuzquiztan ticznača. Nižaza poderchiztča jacatatzjapa. Jalla nii poder wejt Yooz Ejpqui wejtquiz tjaachiča.

¹⁹ Jalla nuž Jesusiž chiita taku nonžcu judío žoñinacaqui wilta t'aka t'aka cjissiča.

²⁰ Tsjii žoñinacaqui cjichiča:

–Zajraž tantala. Lucuratala tiiqui. ¿Kjažtiquiztan tiiž chiita ančhucqui nonžjo?

²¹ Yekjapac cjichiča:

–Tiiqui anaž zajraž tanta žoñizta chiiča. ¿Nižaza zajraž tanta žoñiqui tsjii zur žoñi čhjetnasajo? Anaž cjesača.

TSJII ŽOÑINACAQUI JESUSA ANA NONZ PECCHA

²² Zac timputača. Nižaza Jerusalén wajtquin timplu cumpleañ pjizta paatča.

²³ Jalla nii oraqui Jesusaqui timpluquin ojklayatča, Salomón cjita kjuy patiuran.

²⁴ Jalla nuž ojklayan judío žoñinacaqui Jesusiž muytata ajcziča, tuž cjican: –¿Čhjulorcama amqui wejtnaca kuz turwayskataquejo? Amčhalaj Cristumž niiqui, tsjiika kjanacama chiizna.

²⁵ Jesusaqui ninaczquiz tuž kjaaziča:

–Ančhucaquiz nuž cjichinča. Pero weriž chiitami ana criichinčhucča. Jaknužt wejt Yooz Ejp mantachaja, jalla nii mantita jaru zuma obranacal paa-uča. Jalla nii obranacaz cjen, ančhucqui zizasacha, werjtča Cristo už anažlaj Cristo, nii.

²⁶ Ančhuczi ana wejtquiz criičhucča. Ančhucqui anača wejt uuzažtakazi, jaknužt tuquiqui chiituchaja, jalla nii.

²⁷ Wejt uuzanacaqui wejt jora pajča, nižaza wejrqui wejt uuzanaca pajuča. Nižaza nii wejt uuzanacaqui wejtquiz apžquiñipanča.

²⁸ Wejrqui ninaczquiz zuma kamaña tjaa-uča, Yooztan wiñaya kamzjapa. Anapan infiernuquin okasacha. Nižaza anaž jecmi wejt kjarquiztan ninaca kjañasacha.

²⁹ Wejt Yooz Ejpqui wejt kjarquiz tjaachiča. Jalla niiqui tjappachquiztanami juc'ant azzizza. Jalla nižtiquiztan anaž jecmi Yooz Ejpžquiztan wejt uuzanaca kjañasacha.

³⁰ Wejttan wejt Yooz Ejpžtan tsjii kuzziztča.

³¹ Jalla nuž chiitiquiztan nii judío žoñinacaqui maztan aptižcu wilta Jesusižquiz čhajcz pecatča.

³² Nekztan Jesusaqui ninaczquiz cjichiča:

–Wejrqui Yooz Ejpž aztan zuma obranacal ančhucaquiz tjezinča. Nii zuma obranaca Yooz kuzcama paachinča. ¿Jakziltat nii zuma obranacquiztan wejr maztan čhajcz pecjo?

³³ Nii judío žoñinacaqui tuž kjaaziča:

–Anal am čhacača, zuma obriquiztan. Yooz quintra chiitiquiztan am čhacača. Amqui žoñimkazza. Pero Yooztakam cjiicjiča.

³⁴ Jalla nekztanaqui Jesusaqui ninaczquiz tuž cjichiča:

–Ančhuca liiquizpacha tuž cijirtapanča: “Yoozqui cjiča: ‘Ančhucqui Yooztakazza.’”

³⁵ Cjijrta Yooz takuqui anaž niqui atasach̄a. Jalla nii zizza ućhumqui. Yoozqui niiz̄ taku catokñi žoñinac̄z puntuquiztan cjichič̄a, “Anćhucqui Yooz-takazza”, cjicanaqui.

³⁶ Yoozqui wejr ut'aychič̄a tii muntuquiz cuchanžquizjapa. Jalla nižtiquiztan wejrqui cjichinč̄a, “Wejrtč̄a Yooz Majchtqui”. Jalla nuž chitiquiztan, ¿kjažt anćhucqui Yooz quintra chiiñi cjeejo?

³⁷ Wejrqui wejt Yooz Epiž mantita obranaca ana paayiñ cjitasaž niiqui, wejtquiz criiz ana waquizič̄a.

³⁸ Pero wejt Yooz Epiž mantita obranaca paayiñč̄a. Jalla nižtiquiztan wejtquin criya. Weriž chiitiquiztan anač̄a wejtquiz criyač̄haj niiqui, weriž paata obranacquiztan mekaž wejtquiz criyalla. Wejtquin criyaquič̄ niiqui, anćhucqui intintazaquič̄a, wejttañ Yooz Ejpžtan tsjiikazza, jalla nii. Wejt Yooz Ejpqui wejt kuzquiz žejlč̄a, nižaza wejrqui wejt Yooz Ejpž kuzquiz želuč̄a. —Jalla nuž chiichič̄a Jesusaqui.

³⁹ Nekztanaqui wilta Jesusa preso chjitz pecatč̄a. Pero Jesusaqui ninac̄zquiztan atipassič̄a.

⁴⁰ Jalla nekztanaqui Jesusaqui Jordán pujž tuuna ojkchič̄a. Jakziquin Juanqui primero bautistč̄haja, jalla nicju želatč̄a.

⁴¹ Walja žoñinacaqui nižtan zali ojkchič̄a. Ninacaqui tuž cjichič̄a:
—Chekapan, tjapa Juanž chiita tiž puntuquiztan werarapanč̄a. Ana ćhjul milajru paachi cjenami, Juanqui tiž puntuquiztan werarapan chiiñitakalala.

⁴² Jalla nicju želan walja nekz žejlñi žoñinacaqui Jesusižquiz criichič̄a.

11

LAZARO TICZICHA

¹ Tsjii laa žoñi želatč̄a, Lázaro cjita. Betania wajtchiz žoñitač̄a. María, nižaza naaža cullaqui, Marta, jalla nii pucultanaqui Betania wajtchizzakaztač̄a.

² Mariiqui nii laa Lazaruž cullaquitač̄a. Nižaza Mariiqui Jesusa Jilirž kjojchquiz zuma ulurchiz asiiti alžinchintač̄a. Nekztan naaža persun ach charžtan Jesusiž kjojchanaca chjujžinchintač̄a.

³ Jalla nuž nii pucultan maatakanacaqui Jesusižquiz mazñi cuchanžquichič̄a, tuž cjican:

—Wejt Jiliri, amiž pecta k'aachita amigo laa cjichič̄a.

⁴ Jesusaqui nii mazta nonžcu, cjichič̄a:

—Niž laacjitiquiztan ana ticznaquič̄a. Antiz niž laacjitiquiztan Yooz azi tjeežtaž cjequič̄a. Nižaza Yoozqui honorchiz cjequič̄a. Nižaza Yooz Majchqui honorchiz zakaz cjequič̄a.

⁵ Jesusaqui Martaquiz, naaža cullaqui Mariaquiz, nižaza ninac̄z jila Lazaružquiz, jalla ninac̄zquiz ančaž k'aachichič̄a.

⁶ Jalla nuž cjenami Lazaruž laa quintu nonžcu, Jesusaqui iya puc majžtan kamchič̄a, jakziquin kamatč̄haja, jalla nicju.

⁷ Jalla nii puc majquiztan niž tjaajintanac̄zquiz cjichič̄a:

—Wiltaž Judea yokquin okla.

⁸ Nekztanaqui niž tjaajintanacaqui cjichič̄a:

—Tjaajiñi Maestro, ažk tsjii kjaž majkaz nekzta žoñinacaqui am maztan ćhajcz pecatla, conzjapaqui. ¿Wilta am nicju ojkz pecya?

⁹ Jesusaqui ninac̄zquiz tuž kjaazič̄a:

—Tsjii noojiqui tuncapan orchizza, majiñqui. Jakziltat kjanquiz ojkč̄haja, anaž ezasač̄a. Jalla nižta iratač̄a wejt kjanquiz ojkñi žoñinacaqui. Ima niž ticz ora irantižcan, walikaz cjequič̄a.

¹⁰ Jakziltat ween zumchiquiz ojkčhaja, jalla niiqui ezasača, kjanaž ana želanaqui. Jalla nižtača ana wejt kjanquiz ojkñi žoñinacaqui. Ana Yooz kuzcama kamtiquiztan anawalquiz tjojtsnasača.

¹¹ Nekztanaqui Jesusaqui ninaczquiz cjichiča:

–Učhum Lázaro amiguqui tjajča. Pero wejrqui Lázaro tjajil wajtskatača.

¹² Jalla nekztanaqui niž tjaajintanacaqui cjichiča:

–Jiliri, tjajčhaj niiqui, nuž cjenauqui upallat cjissani; žetaquiž, jaz.

¹³ Niž tjaajintanacaqui tsji kjutñi intintazziča. Jesusaqui Lázaro ticz puntuquiztan chiichiča. Niž tjaajintanacaqui ultimu tjajz puntuquiztan intintazziča.

¹⁴ Jalla nižtiquiztan Jesusaqui kjanapacha chiichiča tuž cjican:

–Lazaruqui ticziča.

¹⁵ Ana nicju žejlchiž cjen wejrqui cuntintuča. Jalla nuž cjenča ančhucaltajapaqui waliqui, wejtquiz juc'anti criichi cjisjapa. Jazic nii cheriž ojkla.

¹⁶ Nekztanqui Tomasaqui, niž mazinaczquiz cjichiča:

–Učhumnac zakaz ojkla, tižtan chica ticzñi.

Tomasaqui “Pacha” cjita žoñizakaztača.

JESUSACHA JACATATSKATÑIQUI

¹⁷ Betania watja irantižcu, Jesusaqui zizziča, Lazaruž ticžtaqui nižaza tjattaqui pajkpic tjuñitača.

¹⁸ Betania watjaqui Jerusalén wajtquiztan pizc kilómetro jilallatača.

¹⁹ Jalla nii žcati želan walja žoñinacaqui Martaquiz nižaza Mariyaquiz kuzñi tjonzitača, ninacz jila ticziž cjen.

²⁰ Martiqui Jesusaž waj irantižquiñi quintu nonžcu, Jesusižquin zali ojkchinča. Mariiqui kjuyquin eclichintača.

²¹ Jesusižtan zalžcu, Martiqui paljaychinča, tuž cjican:

–Wejt Jiliri, am tekz žejltaš niiqui, wejt jilaqui ana ticzi cjitasacha.

²² Jalla nuž cjenami wejrqui zizuča, čhulu amiž Yoozquiztan mayiztami tjaataž cjequiča. –Jalla nuž Jesusižquiz chiichinča Martiqui.

²³ Jesusaqui naaquiz cjichiča:

–Am jilaqui jacatataquiča.

²⁴ Martiqui cjichinča:

–Wejrqui zizuča, tii muntu tucužinžtan, jacatatz tjuñquiziqui jacatataquiča.

²⁵ Nekztan Jesusaqui naaquiz cjichiča:

–Wejrtča jacatatskatiñtqui, nižaza arajpach žeti tjayiñtqui. Jakziltat wejtquiz criyačhaja, ticzi cjenami, wilta žetaquiča.

²⁶ Nižaza jakzilta žejtñi žoñimi wejtquiz criyačhaja, jalla niiqui anaž wira ultimu ticznasača. Arajpachquin wiñaya žetaquiča. ¿Jalla nii crii amya?

²⁷ Naaqui tuž kjaazinča:

–Criyuča, wejt Jiliri. Nižaza criyuča, amqui Cristumča; nižaza Yooz Maatimča tii muntuquiz tjonchiqui. Jalla niiqui criyuča.

MARIAQUI JESUSIZTAN ZALI ULANCHINCHA

²⁸ Jalla nuž chiižcu, Martiqui naža Marii cullaqui kjawzñi ojkchinča. Nekztan Mariaquiz jamazit chiichinča, tuž cjican:

–Tjaajiñi Maestruqui tekz tjonchiča. Am kjawžca cjiča.

²⁹ Jalla nuž nonžcu Mariiqui apura žaazinča. Jesusižquin zali ojkchinča.

³⁰ Jesusaqui imaž watja irantižcatča, jakziquin Marti nižtan zalčhaja, jalla niiranž želatča.

³¹ Lázaro jilaž ticziž cjen, Mariaquiz kuzcan žoñinaca kjuyquin želatča. Jalla ninacaqui María apura žaažcu ulanñi cheržcu wirquizpacha apziča. Ninacaqui cjichiča, “Lázaro jilž sipulturquin kayit ojkčhani” cjican.

³² Jesusižtan zalžcu Marii qui niž yujcquiz quillzinča, tuž cjican:

—Wejt Jiliri, tekzim cjitčhaj amqui, wejt jilaqui anaž ticzi cjitasača.

³³ Jesusaqui naa María kaañi cheržcu, nižaza naatan tjonñi judío žoñinaca kaañi zakaž cheržcu, persun kuzquiz ancha sint'ichiča, nižaza ancha llaquita cjissiča.

³⁴ Jalla nekztan pewcziča, tuž cjican:

—¿Jakziquin tjatchinčhuctaya?

Ninacaqui cjichiča:

—Jiliri, niž cheržinžcalla.

³⁵ Nekztanaqui Jesusaqui kaachiča.

³⁶ Jalla nuž cheržcu žoñinacaqui cjichiča:

—Cherzna. Lázaro jila ančaž k'aachiča.

³⁷ Yekjapa ninacazti cjichiča:

—Tiiqui zur žoñž čhujqui čhjetinčiča. ¿Anaj tiic Lázaro jila čhjetnasaya, ana ticzi cjisjapaya?

LAZARO JACATATSKATTA

³⁸ Jalla nekztanaqui Jesusaqui ancha kuzquiz sint'ican, sipulturquin macjatchiča. Sipulturaqui pajk mazquiz pjetatača. Nižaza pajk maztan pjucztatača, nii sipultur zana.

³⁹ Jesusaqui nekztan cjichiča:

—Nii maz cjewžna.

Martiqui, nii ticzi jilž cullaquiqui, cjichinča:

—Wejt Jiliri, pajkpic tjuñi tiiž ticztaqui. Jalla nižtiquiztan tiiqui chjonančižlani.

⁴⁰ Nekztanaqui Jesusaqui naaquiz cjichiča:

—Amqui wejtquiz criyaquiz niiqui, Yooz azi tjeežtam cheraquiča. ¿Anaj werj nuž amquiz chiichinpanejo?

⁴¹ Jalla nekztanaqui nii sipultura mazqui cjewžtatača. Nekztanaqui Jesusaqui arajpach kjutñi cheržcu, tuž cjichiča:

—Yooz Ejp, weriž mayizta nonžniž cjen gracias amquin cjiwča.

⁴² Weriž mayiztaqui nonžnampanča amqui. Jalla nii zizuča. Tekz tsijtchi žoñinacžtajapa nuž chiyuča, amča wejr cuchanžquichi, jalla nii criyajo.

⁴³ Jalla nuž mayizizcu, Jesusaqui alto tawkžtan mantichiča tuž cjican:

—Lázaro, nekztan ulanžca, ticchuc tjona.

⁴⁴ Nii ticziqui ulanžquichiča, kjarami kjojchami jweržintapacha, nižaza niž yujcmi tsjii pañžtan ch'okžinta. Nekztanaqui Jesusaqui nekz žejlñi žoñinacžquiz mantichiča:

—Nii jweržina. Nekztan ojklajaj cjee.

JESUSA CONZJAPA KAZZICHA

⁴⁵ Jalla nižtiquiztan muzpa judío žoñinacaqui Jesusižquin criichiča. Ninacaqui Mariaquiz cumpanižcu Jesusiž paata milajru cherchiča.

⁴⁶ Yekjap nekz žejlñi žoñinacazti fariseo žoñinacžquin mazñi ojkchiča. Nicju tjapa Jesusiž paatanaca quint'izquichiča.

⁴⁷ Jalla nuž nonžcu fariseo partir žoñinacami timplu jilirinacami tjapa jilirinaca ajcškatchiča. Nekztan jilirinacžquiz pewcziča, tuž cjican:

—Nii žoñiqui ančaž milajrunaca paača. ¿Učhumnacqui kjaža cjeequi nii žoñžtan?

⁴⁸ Jalla nužkaž milajrunaca tira paañizlaj niiqui, tjapa žoñinacaqui niizquincama criyačhani. Jalla nuž cjenacqui roman jilirinacaqui zultatunaca cuchanžcačhani, učum timplu pajljapani, nižaza učum naciona akzjapani.

⁴⁹ Nii watacqui Caifás cjitaqui uchtatača timplu chawc jiliri. Jalla niiqui paljaychiča, tuž cjican:

—Ančhucqui ana zizñi žoñinacžtakaz, ¿kjažtatajo?

⁵⁰ Učum wajtchiz žoñinacžtajapa nii Jesusac ticstanča, tjapa učumnaca ticz cjenquiztanpacha. Jalla nuž waquiziča. Tjapa tii naciona akžinasaz niiqui, jalla niž ana wali cjesača. Nuž ana waquiziča.

⁵¹ Nii timplu chawc jiliričiqui anača persun kuzquiztan čiichičiqui. Timplu chawc jiliriž cjen, Yooza nuž čiikatchi. Jalla nuž čiican, Jesusiž puntu mazinčiča, Jesusaqui nii wajtchiz žoñinacžtajapa ticznaquiča.

⁵² Anazaž nii wajtchiz žoñinacžtajapakaz ticznaquiča. Tjapa žoñinacžtajapa ticznaquiča. Yooz partiquiz kamñi žoñinacaqui tjapa kjutñi tii muntuquiz wichanziča. Jalla ninacaqui Jesusaqui tjapa nacionquiztan ricujaquiča. Tsji Yooz jamillajapa ricujaquiča.

⁵³ Jalla nuž palt'izcu nii noojtanpacha judío jilirinacaqui Jesusa conzjapa kazziča.

⁵⁴ Jalla nižtiquiztan Jesusaqui chjozacuñ ana kjanacama ojklaychiča Judea cjita yokquiz. Jerusalén žcati yokquiztan ojkičiča Efraín wajtquin. Efraín watjaqui ch'ekti yok žcatitača. Jalla nicju niž tjaajintanacžtan kamčiča.

⁵⁵ Judío žoñinacž pascua pijjzta wajillatača. Jalla nižtiquiztan walja žoñinacaqui jochinacquiztanami zkolta watjanacquiztanami Jerusalén watja ojkičiča ima pascua pijjzta tjonan. Ajunz cuzturumpi payi ojkičiča. Ana nii cuzturumpi paaquiz niiqui, ana pascua pijjzta paasača.

⁵⁶ Nii tjonchi žoñinacaqui Jesusa kjuratča. Timpluquin tsijtchi žejlcan ninacpora Jesusiž puntu pewcsassiča, tuž cjican:

—¿Am jaknužum tantii? ¿Tii pijjztičiquiz Jesusac tjonasaya?

⁵⁷ Nižaza fariseo partir žoñinacami timplu jilirinacami ordena tjaachiča, jequit Jesusa cheračhaja, jalla niiqui ninacžquiz maztanča, Jesusa preso tanta cjisjapa.

12

ASIITI TJAJLZINTA QUINTU

¹ Pascua pijjzta wajilla sojta tjuñiz cjen Jesusaqui Betania watja ojkičiča, Lazaruž kjuya. Niiž tuquiqui Jesusaqui ticziquiztan nii Lázaró jila jacatatskatchitača.

² Jalla nicju Jesusižquiz rispitan zuma čhjeri tjaczinčiča. Martiqui čhjeri atintichinča. Lazaruzti mizquiz želatča, Jesusižtan chica lujlcan nii parti žoñinacžtanpacha.

³ Jalla nuž lulan Mariiqui medio litro zuma ulurchiz asiiti zijecchinča. Nii asiitiqui zuma legal nardo cjita asiititača, wali preciuchiztača. Jalla nii asiitižtan Jesusiž kjojchquiz alžcu tjajlžinčinča. Nekztan naaža persun ach charžtan chjujžinčinča. Walja zuma ulurchiztača. Tjapa nii kjuyquiziqui nii zuma ulura chjijpsitača.

⁴ Jalla nuž asiiti alžinñi cheržcu, Judas Iscariote cjita Simonž majchqui chutchiča. Jalla niiqui Jesusiž tjaajinta žoñinacž partiquiztantatača. Nižaza niipacha niž wiruñ Jesusiž quintra tarasunaž paaquiča. Jalla nii Judasqui naa Mariaquiz paljaychiča, tuž cjican:

⁵ —¿Kjažtiquiztan tii aceite ana 300 paazuñ tuytata, pori žoñinacžquiz yanapzjapajo?

⁶ Judaszi anaž porinaca importayatča. Tjañi zaañitača. Niiž kjarquiztača paaz pulsaqui. Nižaza nii utžta paaznacquiztan tjangñitača. Jalla nižtiquiztan nuž chiichiča.

⁷ Jalla nekztanaqui Jesusaqui Judasquiz cjichiča:

—Ana naaquiz nuž cjee. Ima wejt ticz tjuñi tjonan, naaqui wejttajapa tii aceite čhjojchinča, wejr zuma tjatta cjisjapa.

⁸ Tii muntuquiz porisanacac panž žejlča. Wejrzi ančhucatan ana tira želača, tii muntuquiz.

LAZARUZAKAZ CONZ PECCHA

⁹ Walja judío žoñinacaqui Jesusiž quintu zizziča, Betania wajtquin žejlñi, jalla nii. Jalla nekztan nicju ojkchiča, Jesusa chertzñi, nižaza Lázaro chertzñi. Jesusaqui Lázaro ticziquiztan jacatatskatchiča.

¹⁰ Jalla nuž Lázaro jacatatskatta quintu nonžcu timplu jilirinacaqui Lazaruzakaz konz kazziča.

¹¹ Jalla nii Lazaruž jacatattaž cjen, walja judío žoñinacaqui nii jilirinacž chiitanaca ana cazziča. Nekztan zarakžcu, Jesusižquiz apoychiča. Nižaza niižquin criichiča.

JERUSALEN WAJTQUIN LUZTA QUINTU

¹² Walja žoñinacaqui Jerusalén watja tjonžcu, nekz želatča pascua pjijzta paazjapa. Jakatažuqui žoñinacaqui zizziča, Jesusaqui wajtquin wajillaž irantižquiča, jalla nii.

¹³ Jalla nekztan chjañinacžtanpacha ramuza cjita munti itsa kjajpchiča. Jalla nuž nii ramuz itsanac manžcu, wajtž tjija Jesusa risiwi ulanchiča, tuž kjawcan:

—¡Yoozqui honorchiz cjila! ¡Yooz Jilirž tjuuquiz tjonñi žoñi rispittaj cjila! ¡Israel chawjc jiliri rispittaj cjila!

¹⁴ Jesusaqui tsjii aznu cunsicžcu, yawchiča, jaknužt Yooz tawk liwruquiz cijirtčhaja, jalla nuž.

¹⁵ Cjijrta Yooz takuqui tuž cjiča:

—Sión wajtchiz žoñinaca, anaž eksna. Chertzna. Aznuquiz yawchi am chawjc jiliriz tjonča.

¹⁶ Jalla nuž watan nii ora niiž tjaajintanacaqui anaž intintazatča, kjažtiquiztan nižta wat, jalla nii. Jesusa arajpacha ojktan, jalla nekztan ninacaqui intintazzi cjissiča. Jalla nii ora cjuñziča, tuquitan cjijrta Yooz takuqui tjapa nii watchinaca mazinchiča, nii. Nii cijjrtanac jaru, nužcama watchiča.

¹⁷ Niiž tuquiqui Jesusaqui Lázaro ticziquiztan jacatatskatchiča. Nekztan kjawžcu sipulturquiztan ulanskatžquichiča. Jalla nii cherñi žoñinacaqui parti žoñinacžquiz walja parličiča tjapa nii milajru paatiquiztan.

¹⁸ Jalla nižtiquiztan Jesusaž paata milajru zizcu, walja žoñinacaqui Jesusižquin zali ojkchiča.

¹⁹ Jalla nuž chertzcu fariseo žoñinacaqui ninacpora tuž cjichiča:

—Wejrnacqui jazicž cheruča. Tjapa žoñinacaqui niižquin ojczpanž cjiskalala. Nižaza wejrnacqui anaž čhjulumi kjaž cjiyi atchuca cjesaž, jaz.

GRIEGO WAJTCHIZ ZOÑINACA

²⁰ Nii pjijzta ojkchi žoñinacžporquiz tsjii kjaž griego wajtchiz žoñinaca želatča. Ninacaqui Jerusalén watja ojkchizakazza, Yooz rispiti.

²¹ Ninacaqui Felipižquin tjonchiča. Felipiqui Betsaida wajtchiztača, nižaza Galilea yokchiztača. Felipižquiz rocchiča tuž cjican:

—Señor, wejrnacqui Jesusiztan zalz pecučha.

²² Nekztanaqui Felipiqui Andrežquiz mazñi ojkchičha. Nekztanaqui pucultanaqui Jesusizquiz mazñi ojkchičha.

²³ Jalla nuž maztiquiztan Jesusaqui cjichičha:

—Wejrqui tsewctan cuchanžquita Yooz Zoñtčha. Jaziqui wejt ticz ora wajičha. Jalla nekztanaqui wejrqui honorchiz cjeečha.

²⁴ Ančhucaquiz weraral chiyučha. Tsjii čhjacta trigo semillaqui yokquiz tjatžta, katčha. Jalla nižta čhjacta cjen, ew zkala jecža, nižaza pookčha. Ana nižta čhjacta cjequiz niiqui, nužquizkaz žejlčha semillaqui.

²⁵ Jalla nižta iratačha tii chiitaqui. Jakziltat persun kuzcamakaz kamz pecčhaja, jalla niiqui ultim zuma kamaña pertaquičha. Pero jakziltat tii muntuquiz žejlcan persun kuzcama ana kamz pecčhaja, nižaza Yooz kuzcama kamz pecčhaja, jalla niiqui wiñayjapa zuma kamañchiz cjequičha.

²⁶ Jakziltat wejtquiz sirwačhaja, jalla niiqui wejttan chica ojklaysa čhjul sufrizquiztanami. Nekztan jakziquin wejr želačhaja, jalla nicju wejttan chica wejt sirwiñinaca zakaz cjequičha. Nižaza jakziltat wejtquiz sirwačhaja, jalla niizquiz wejt Yooz Ejpqui honoraž tjaaquičha.

JESUSIZ TICZ MAZINTA

²⁷ ‘Anziqui wejt kuzqui ancha turwaysičha. ¿Kjaž cjisnaqui? Yooz Ejp, tii sufrizquiztanž livriyalla. ¿Nuž cjis wali cjesaya? Anačha. Wejrqui tii muntuquiz tjonchinpančha, sufrisjapaqui.

²⁸ Yooz Ejp, am munañpaj cjila; ampacha rispittaj cjila. —Nuž cjichičha Jesusaqui. Jalla nii orapacha arajpachquiztan tsjii joraqui paljayžquichičha, tuž cjican:

—Wejrqui rispittičha, nižaza rispittapan cjeečha, amiž cjen.

²⁹ Nekz žejlñi žoñinacaqui jalla nii chiiñi jora nonžcu, cjichičha:

—Tsjii jorjorñi želatčha —nuž cjichičha.

Yekjapanacaqui tuž cjichičha:

—Tsjii anjilaž paljayžquichila.

³⁰ Jalla nekztanaqui Jesusaqui cjichičha:

—Anaž wejtajapa nii jora chiižquichičha, antiz ančhucaltajapačha.

³¹ Weriž ticztaž cjen tii muntuquiz žejlñi žoñinacaqui pjalžtaž cjequičha. Nižaza tii muntuquiz mantiñi diabluqui atiptaž cjequičha, chjatkattaž cjequičha.

³² Yooz Zoñtčha wejrqui. Jaziqui tii yokquiztan cruzquiz waytital cjeečha. Nekztan tjapa wejt partir žoñinacžquiz wejtquin macjatskatačha, wejtquin criizjapa.

³³ Jalla nuž chiican Jesusaqui jaknužt ticznačhaja, jalla nii chiichičha.

³⁴ Nekz žejlñi žoñinacaqui tuž cjichičha:

—Učhumnacqui učhum liiquiztan zizzičha, Cristuqui wiñaya žetaquičha. ¿Kjaž amqui chiyasajo, Yooz Zoñi cruzquiz waytita cjequičha, cjicanajo? ¿Ject tii Yooz Zoñejo?

³⁵ Jalla nekztanaqui Jesusaqui cjichičha:

—Wejrqui tsjii upacamakal ančhucatan želačha Yooz kamaña tjeežcan, tsjii kjanažtakaz. Jalla nuž wejt kjana želan, ančhucqui zuma kamañchiz kama. Zumchi cjis wajillačha. Nii zumchi cjen, ana tsucaquičha. Jakziltat anawal zumchiquiz kamčhaja, jalla niiqui jakzitchuc ojkčhaja, jalla nii ana zizza.

³⁶ Jaziqui tsjii kjanažtakaz weriž želan, wejtquiz criya, zuma Yooz kamaña tjeežñinaca cjisjapa.

Jalla nuž chiižcu Jesusaqui ojkchičha. Nekztan ninacžquiztan čhjojzičha.

ISAIAS CJIJRTA TAKU CUMPLISSICHA

³⁷ Ninacaž cheran walja milajrunaca paachiča Jesusaqui. Jalla nuž paachiž cjenami parti žoñinacaqui ana nižquin criichiča.

³⁸ Jalla nuž ana criitiquiztan Isaías cjita profetž takunaca cumplissiča. Isaías cjita Yooz cuntiquiztan chiiñi profetaqui tuž cjichiča:

“Yooz Jiliri, ¿ject wejtnacaž chiita taku criijo? Nižaza am azi tjeeznan, žoñinacaqui anapaž intintazza”.

³⁹ ¿Kjažt žoñinacaqui criyasajo? Isaiasqui tuž cjichiča:

⁴⁰ “Yoozqui tii žoñinaca zur žoñižtakaz cjiskatchiča, ana cherñi žoñinacažtakaz cjeyajo. Nižaza chojru kuzziz cjiskatchiča, ana intintazñi kuzziz cjeyajo. Jalla nuž cjen ana wejtquin macjatžcaquiča, liwriita cjeyajo”.

Nuž cjiirchiča Isaiasqui,

⁴¹ tuquitan Jesusaž tjeēžta honora puntu zizcu.

⁴² Jila parti ana criichiž cjenami, muzpa žoñinacaqui Jesusižquiz criichiča, nižaza jilirinacami. Pero fariseo žoñinaca ekscu ana kjanacama cjiicjiichiča. Jamazit criichiča, ana ajcz kjuyquiztan chjatkatta cjeyajo.

⁴³ Žoñinacaž rispitta cjis pecatča, Yoozquiztan cjen juc'anti. Jalla nižtiquiztan jamazit criichiča Jesusižquiz.

JESUSIZ CHIITA TAKU

⁴⁴ Jalla nekztanaqui Jesusaqui altu joržtan chiichiča tuž cjican:

—Jakziltat wejtquiz criiĥaja, jalla niiqui wejr cuĥanžquiñižquiz nužuzakaz criiĥa.

⁴⁵ Nižaza jakziltat wejr cherĥaja, jalla niiqui wejr cuĥanžquiñižquiz nužuzakaz cherĥa.

⁴⁶ Wejrqui tii muntuquiz tjonĥinĥa, Yooz kamaña tjeezjapa, tsjii kjanažtakaz. Jakziltat wejtquiz criiĥaja, jalla niiqui anawal zumĥiquiz ana tira kamaquiĥa.

⁴⁷ Jakziltat weriž chiita nonžcu ana catokaĥaja, jalla niž quintra tii ora anal chiyuĥa. Wejrqui žoñinacž quintra chiizjapa ana tjonĥinĥa. Antiz žoñinaca liwriizjapa tjonĥinĥa.

⁴⁸ Jakziltat wejtquiz ana criiĥaja, nižaza werj ana cherz pecĥaja, nižaza weriž chiita taku ana catokĥaja, jalla niĥa persun quintra cjiicjiiñiĥi. Pjalz tjuñquiziqui weriž chiita taku ana catoktiquiztan jalla nižtiquiztan Yooz Ejpqui ultimquiz ninaca casticaquiĥa.

⁴⁹ Wejrqui anal persun kuzquiztan chiiñĥa. Antiz wejr cuĥanžquiñi Yooz Ejpž mantita jaru chiiñĥa, nižaza niž mantitacama tjaajniñĥa.

⁵⁰ Wejt Yooz Epiž mantitacama kamzqui arajpachquin Yooztan wiñaya kamzjapapanĥa. Jaziqui weriž chiitaqui Yooz Epiž mantitacama chiĥinĥa.

13

JESUSAQUI PIYUNAZTAKAZ KJOJCHANACA AWJZICHA

¹ Ima pascua pjijzta tjonan, Jesusaqui zizziĥa niž ticz ora wajitaĥa, jalla nii. Nižaza zizziĥa, tii muntu eccu niž Ejpžquinž okaquiĥa, nii. Tii muntuquiz žejlcan Jesusaqui niž pecta mazinaca walja k'aachichiĥa, ultim werarapan. Ticzcama k'aachichiĥa.

² Pascua pjijzta paacan, Jesusaqui niž tjaajintanacžtan ĥjjeri lujlĥiĥa. Judas Iscariote cjita Simonž majĥ chicapacha nekz želatĥa. Judas kuzqui diabluz mantuquiz cjiskatchiĥa. Diabluz mantitaž cjen Judasqui tarzuna paaz pinsichiĥa, Jesusa tankatzjapa.

³ Jesusaqui zizziča, Yooz Ejpqui tjapa mantznaca niž kjarquiz tjaachiča. Nižaza niiqui Yooz Ejpžquiztan tjonchiča, nižaza Yooz Ejpžquin quepaquiča. Jalla nii zizziča Jesusaqui.

⁴ Jalla nuž zizziž cjenami, piyunažtakaz cjissiča. Misquiztan tsijtsu, niž juntuña zquiti chjojksiča. Nekztanaqui toalla aptižcu, nižtan tsjaasiča.

⁵ Jalla nekztanaqui tsjii purinquiz kjaz alžcu, niž tjaajintanacž kojcha awjžiñi kallantichiča. Nekztan nii tsjaazta toallžtan kojchanaca chjuzinchiča.

⁶ Nižaza Jesusaqui Simón Pedro cjita žoñžquiz niž kojcha awjžiñi macjatchiča. Nekztan Pedruqui Jesusižquiz cjichiča:

–Wejt Jiliri, ¿amqui wejt kojcha awjžinz pecya? Ana wejt kojcha awjžinz waquiziča.

⁷ Jalla nuž chiitiquiztan Jesusaqui tuž kjaaziča:

–Tii weriž paataqui amqui ana intintazza aniziqui. Tii jarquinam intintazaquiča.

⁸ Pero Pedruqui cjichiča:

–Wejt Jiliri, amqui wejt kojcha anapanim awjžinasača.

Jesusaqui nižquiz kjaaziča, tuž cjican:

–Wejrqui am kojcha anal awjžinaž niiqui, anam wejt partiquiz cjesača.

⁹ Jalla nekztanaqui Simón Pedro cjitaqui tuž cjichiča:

–Wejt Jiliri, ana wejt kojcha alajakaz awjnasača, wejt kjarami achami awjžinalla.

¹⁰ Jesusaqui nižquiz tuž cjichiča:

–Tsjii ajunta žoñiqui anaž wilta wilta ajunz pecča, antiz kojchakaz ajunz pecča. Nekztan limpuž niiqui tjappacha. Ančhucqui limpuča, pero tsjiiqui ana limpuča ančhucqui.

¹¹ Jesusaqui zizziča, jakziltat tarsuna paazcu nii tankatačhaja, nii. Jalla nižtiquiztan nuž chiichiča Jesusaqui, “Tsjiiqui ana limpuča ančhucqui” cjicanaqui.

¹² Nekztan Jesusaqui ninacž kojchanaca awjawjžiñžcu, niž juntuña chjojka zquiti aptichiča. Zquiti cujtžcu wilta misquiz julziča. Nekztan ninacžquiz cjichiča:

–¿Tii weriž paata ančhucqui intintazziñčuckaya?

¹³ Ančhucqui wejr “Tjaajiñi Maestruž” cjiča, nižaza “Jiliriž” cjiča. Jalla nužupanča wejrqui. Jalla nižtiquiztan nužpan chiiz waquiziča.

¹⁴ Wejrtča werara ančuca Jiliritqui nižaza Tjaajiñi Maestruťqui. Jaziqui wejrqui ančuca kojcha ajunžinčinča. Jalla nižta irata ančhucmi piyunanacažtakaz, porapat yanaparassa, nižta kojchanaca ajunz tjepi.

¹⁵ Jazic nižta paachinča, ančhuc nižtapacha paajo.

¹⁶ Ančucaquiz ultim weraral chiyuča. Tsjii piyunaqui niž jiliržquiztan anača juc'anti Nižaza tsjii cuchanžquitaqui niž cuchanžquiñižquiztan anača juc'anti.

¹⁷ Ančhucqui tii puntu intintazzaj niiqui, jalla nii jaru kamz waquiziča. Nekztan cuntintuž cjequiča ančhucqui.

¹⁸ Wejrqui weriž illztanaca pajuča. Nižaza tsjiizuñ pajuča. Niiž puntuquiztan cjirta Yooz takuqui tuž cjiča: “Tsjii wejtta chica lujlñiqui wejt quintraž cjisnaquiča”. Jalla nii cjirta Yooz takuqui cumplisnaquiča. Tjapa ančuca puntuquiztan anal chiyuča.

¹⁹ Pero aniziqui ima tankatan ančucaquiz chiyuča jaknužt wejr tanta cječhaja, nii puntu kjanzt'uča. Jalla nižtiquiztan wejr tantanaqui,

ančhucqui wejtquiz criyaquiča, wejrtča Yoozquiztan cuchanžquitaqui, jalla nii.

²⁰ Ančhucaquiz weraral chiyuča. Jakziltat weriž cuchanžquita zoñinaca risiwčhaja, jalla niiqui wejr zakaz risiwčha. Nižaza jakziltat wejr risiwčhaja, jalla niiqui wejr cuchanžquiñižquiz risiw tazakaz cjequiča.

JESUSAQUI TARAZUNTAZ CJEQUICHA

²¹ Jalla nuž chiižcu Jesusaqui persun kuzquiz ancha llaquita sint'ichiča. Jalla nekztan tuž kjanapacha cjichiča:

–Ančhucaquiz weraral chiyuča. Tsji ančhucaquiztan wejr tankataquiča.

²² Jalla nuž chiitiquiztan niž tjaajintanacaqui porapat chersassiča, kuzquiz pinsican, “¿Jakziltižjapa chiičhaja?” jalla nii.

²³ Tsji ancha k'aayi tjaajinta zoñi Jesusiž latuquiz žcati julzi želatča.

²⁴ Jalla nekztan Simón Pedruqui nii žcati žejlñižquiz kjaržtan paljaychiča. “¿Jecžquiztanpan chii? Maznalla”, cjicanaqui.

²⁵ Jalla nižtiquiztan nii žcati žejlñi zoñi qui Jesusižquiz pewcziča tuž cjican: –Wejt Jiliri, ¿ject am tankatñi zoñi qui?

²⁶ Jesusaqui tuž kjaaziča:

–Jecžquizkat wejrqui čhjer mazquiquiz t'awžcu tii t'anta tjaačhaja, jalla niž cjequiča niiqui.

Jalla nekztanaqui nii t'anta t'awžcu, Judas Iscariotiquiz tjaachiča. Niiqui Simonž majčtača.

²⁷ Jalla nii t'awžta t'anta tanžtanaqui, Satanás cjita diabluqui Judas kuzquiz luzziča. Nekztanaqui Jesusaqui Judasquiz paljaychiča, tuž cjican:

–Chjulum paačhaja, apura paa.

²⁸ Nii parti mizquiz julzi zoñinacaqui ana intintichiča, nii Jesusiž chiita.

²⁹ Yekjapanacaqui tantiyatča, jalla tuž: Judas paaz pulsa tanzñiž cjen, Jesusaqui nižquiz mantichižlani pjizta paazjapa čjulunaca kjayžjapani. Yekjapanacazti zakaz tantiyatča, jalla tuž: Judas paaz pulsa tanzñiž cjen, Jesusaqui mantichižlani, pori zoñinacžquiz paaz onanzjapani.

³⁰ Judasqui nii t'anta tanžcu nii orapacha ulanchiča. Nii oraqui weentača.

EW MANTITAQUI

³¹ Jalla nuž Judas ulantanaqui, Jesusaqui cjichiča:

–Wejrtča Yooz cuchanžquita Zoñtqui. Jaziqui wejrqui wejt Yooz tjaata kamaña tjeeznuča, honorchiz cjisjapa. Nižaza weriž cjen Yooz Ejpqui honorchiz cjequiča.

³² Jalla nižtiquiztan Yooz Ejpqui wejtquiz zakaz honorchiz cjiskataquiča. Jalla niiqui wajillaž wataquiča.

³³ Weriž pecta jilanaca, tsji upacamakaz ančhucatan želača. Nekztan ančhucqui wejr kjuraquiča. Pero jaknužt tuquiqui zoñinacžquiz chitučhaja, jalla nižtapachal anzi qui ančhucaquiz tuž chiyuča: Jakzi quint wejr okačhaja, jalla nicju ančhucqui ana oki atasacha.

³⁴ Wejrqui tsji ew mantita ortina ančhucaquiz tjaa-uča: “Porapat zuma munazizpanča, jalla nii. Jaknužt wejrqui ančhucatan zuma munazitučhaja, jalla nižta ančhucqui porapat zuma munazaquiča”.

³⁵ Ančhucaž nii ortina mantita jaruž kaman, tjapa zoñinacaqui zizaquiča, ančhucča weriž tjaajinta zoñinacapan.

PEDRUQUI K'OTAQUICHA

³⁶ Jalla nekztanaqui Simón Pedruqui nižquiz cjichiča:

–Wejt Jiliri, ¿am jakzim okaquiya?

Jesusaqui niizquiz kjaaziča, tuž cjican:

–Jakziqunt wejr okačhaja, jalla nicju anaž apzñi atasacha anziq. Tii jarquinaqui amqui wejtquin tjonaquiča.

³⁷ Pedruqui cjichizakazza:

–Wejt Jiliri, ¿kjažtiqiztan anzič ana am apzñi atasajo? Anzimi amquiztanami weril ticznasacha.

³⁸ Jesusaqui tuž kjaaziča:

–¿Wejtqiztan ticznasaya? Ultim weraral amquiz cjiwča: Ima quer wallpaž klawan, amqui čhjep wilita wejr ana pajñim toscara chiyaquiča.

14

ARAJPACHA OJKZ PUNTU

¹ Wejt tjaajinta žoñinaca, Yooz Ejpžquin criyiñčhucča nižaza wejtquiz zakaz criya. Ana turwayzi kuzziz cjee.

² Wejt Ejpž arajpach kjuyquin wacchi campu žejlča, kamzjapa. Ana nižta žejltasaž niiqui wejrqui ančhucaquiz maztasacha. Jaziqui wejrqui okača ančhucaltajapa campu tjaczquizjapa.

³ Jalla nuž campu tjaczñi ojkžcu, wital quejžcača ančhuc čhjichi, wejtta kamzjapa. Jakziqunt wejr želačhaja, jalla nicju ančhuc zakaz želaquiča, weriž čhjichtaž cjen.

⁴ Ančhucqui jakziqunt wejr okačhaja, niiqui zizza. Nižaza wejt ojkz jicz zizza.

⁵ Nekztanaqui Tomasqui cjichiča:

–Wejt Jiliri, jakziquinam am okačhaja, anal zizuča wejrnacqui. ¿Kjažt am ojkz jicz zizasaya?

⁶ Jesusaqui niizquiz tuž kjaaziča:

–Wejrtča jicz cuntitqui, arajpachquin irantizjapaqui. Nižaza wejrtča werarapankaztqui. Weriž cjen werar Yooz kamaña zizasacha. Nižaza wejrtča žeti tjaayiñtqui, Yooztan winaya kamzjapa. Weriž cjenpankaz Yooz Ejpžquin iranti atasacha.

⁷ Ančhucqui wejr ultimu pajtasaz niiqui, ančhucqui wejt Yooz Ejp zakaz pajtasacha. Jaztanpacha weriž cjen ančhucqui wejt Yooz Ejp pajča, nižaza weriž cjen ančhucqui Yooz Ejp cherča.

⁸ Nekztanaqui Felipiqui cjichiča:

–Wejt Jiliri, Yooz Ejp cherkatalla, nužquiz niimi bastakal cjeeča.

⁹ Jesusaqui tuž kjaaziča:

–Felipe, ančhucatan ažkpacha žejlčinzala. ¿Anapanim wejr pajjo? Jakziltat wejr cherčhaja, nižaza Yooz Ejp cherča. ¿Kjažt am nuž cjeejo, “Yooz Ejp cherkata”, cjicanajo?

¹⁰ Wejrmi Yooz Ejpmi tsjii kuzzizza. ¿Jalla nii anam crii amya? Weriž ančhucaquiz chiitaqui anaž persun kuzquiztan chiyuča, antiz Yooz Ejpž cuntiquiztan chiyuča. Yooz Ejpqui wejt kuzquiz žejlča. Jalla nižtiqiztan niiz cjen obranacal paa-uča.

¹¹ Wejrmi Yooz Ejpmi tsjii kuzzizza. Jalla nii criyaquiča, jaziqui. Weriž čhiitiquiztan ana criyasaž niiqui, weriž paata obranaca cheržcu mekaz criyalla.

¹² Werarapan ančhucaquiz chiyuča. Jakziltat wejtquiz criican tjapa kuzziz cječhaja, jalla niiqui weriž paata obranaca irataž zakaz paaquiča, nižaza weriž paata obranacquiztan juc'ant pajk obranaca paaquiča, weriž Yooz Ejpžquin ojktiquiztan.

¹³ Wejtquiz tjapa kuzziz cjen, ančhucqui čhjul mayiztami Yooz Ejpžquiztan mayačhaj niiqui, jalla nii mayiztiquiztan wejrkal čhjulumi tjaa-ača. Jalla nuž tjaa-ača, weriž cjen Yooz Ejp juc'ant honorchiz cjisjapa. Werjtča Yooz Majchqui.

¹⁴ Ančhucqui wejtquiz tjapa kuzziz cjen čhjul mayiztami mayačhaja, jalla nii mayiztiquiztan wejr tjaa-ača.

ESPIRITU SANTUZ PUNTU

¹⁵ 'Ančhucqui wejttan tjapa kuztan munazaquič, weriž tjaata ortinanaca cazaquičha.

¹⁶ Wejrqui Yoozquiztan mayača, tsjii tjurt'iziñi cuchanžquizjapa. Nii tjurt'iziñiqui ančuca kuzquiz wiñayaž kamaquičha. Yooz Espiritu Santučha niiqui.

¹⁷ Nii tjurt'iziñiqui werara intintazkataquičha. Ana criichi zoñinacž kuzquiz anaž luzasača. Ninacaqui nii tjurt'iziñi ana cherasača, nižaza ana pajasacha. Nii tjurt'iziñiqui ančuca kuzquiz žejlča. Jalla nižtiquiztan nii pajča ančhucqui. Nižaza wiñaya ančuca kuzquizpacha želaquičha.

¹⁸ Wejrqui ančhuc anal ečača maa ejp wajchallažtakaz. Ančucaquin wilita tjonacha.

¹⁹ Tsjii upacamakaz, nekztan ana criichi zoñinacaqui ana iya wejr cheraquičha. Anchuczti wejr wilita cheraquičha. Nižaza jacatatžcu wiñayjapa žetača. Weriž žejtchiž cjen, ančhuc zakaz wiñaya žetaquičha Yooztan kamcan.

²⁰ Jacatatžtanaqui ančhucqui zizaquicha, wejrqui wejt Yooz Ejpžtan tsjii kuzzizza. Nižaza ančhucqui wejttan tsjii kuzzizza. Nižaza wejrqui ančhucatan tsjii kuzzizza.

²¹ Jakziltat weriž mantita ortinanaca catokčhaja, nižaza cumpličhaja, jalla niiqui ultimuz wejttanž munaziča. Nižaza jakziltat wejttan munazičhaja, jalla nižtan zakaz wejt Yooz Ejpqui munaziča. Nižaza wejrzakal nižtan munazuča. Nižaza wejrqui nii zoñžquiz kjanacama wejt puntu zizkatača.

²² Nekztan Judas (anača Iscariotiqui) tuž pewcziča:

—Wejt Jiliri, ¿kjažtiquiztan amqui wejtnacaquizkaz pajkataquiya, am puntuiztan zuma zizjapaya? Nižaza ¿kjažtiquiztan parti zoñinacžquin am persuna ana pajkataquiya? ¿Kjažtiquiztan nuž cjeejo?

²³ Jesusaqui tuž kjaaziča:

—Jakziltat wejttanpan munazičhaja, jalla niiqui weriž chiita taku cazza, nižaza wejt Yooz Ejpqui nižtan munaziča, nižaza wejrnacqui nižquin tjonučha, niž kuzquiz kamzjapa.

²⁴ Jakziltat wejttan ana munazičhaja, jalla niiqui weriž chiita taku ana cazza. Weriž chiita takuqui anača wejt persun kuzquiztan. Antiz wejr cuchanžquiñi Yooz Ejpž kuzquiztanpanča weriž chiita takuqui.

²⁵ 'Ančhucatan iya žejlcan ančucaquiz tii puntunaca chiyučha.

²⁶ Wejt wiruñ weriž cjen Yooz Ejpqui tsjii tjurt'iziñi cuchanžcaquičha. Yooz Espiritu Santučha nii tjurt'iziñiqui. Jalla niiqui wejt cuntiquiztanž cjequičha. Niiqui ančucaquiz tjapa Yooz puntunaca tjaajnaquičha, nižaza tjapa weriž chiita takunaca cjuñkataquičha.

²⁷ 'Wejrqui ančuca kuznaca jeejzkatučha. Ančuca kuznaca jeejzkatžcuqui okača. Zoñinacaqui anapanž zoñž kuz nižta jeejzkatasača. Ančuca kuznacaqui anača turwaysi cjee, nižaza anača eksna.

²⁸ Ančhucqui weriž chiita nonzinčhucča: Okača, nižazal ančucaquiz wital tjonacha, jalla nii. Ančhucqui wejttan zuma munaztasaz niiqui,

chipchiž cjitasača, nii weriž chiitaž cjen. Wejrqui wejt Yooz Ejpžquin okača. Wejt Yooz Ejpqui wejtquiztan juc'antiča.

²⁹ Ima ojkan ančucaquiz anziqiu mazinčinča, jalla nuž wattan wejtquiz tjapa kuztan criyajo.

³⁰ 'Tii muntuquiz žejlñi žoñinacaž mantiñiqui tjoncha. Jalla nii anawal mantiñi diabluqui Judasquiz cuchanžquičha, wejr tankatzjapa. Jalla nižtiquiztan tsjii upacamakaz ančucatan parluča. Pero nii anawal mantiñiqui wejtquiztan anača juc'ant azzizqui. Jazic niiqui wejr anaž mantasača.

³¹ Wejrqui wejt Yooz Epiž mantitacama okača. Jalla nižtiquiztan tii muntuquiz žejlñi žoñinacaquiz zizaquičha, wejrqui Yooz Ejpžtan zuma munaziča, jalla nii. Jaziqui žaažna. Tekžtan ojkla.

15

UWAS MUNTI PUNTU

¹ 'Wejrtča chekan lijitumtqui, tsjii zuma uwas muntižtakaz. Wejt Yooz Ejpqui nii munti cwitiñičha.

² Nii uwas muntiquiztan skoz uwas piz itzanacaž pajkča. Jakzilta uwas piz itzat ana čherchiz pajkčhaja, nii ana čherñi itzaquic'utžtaž cjequičha. Nižaza nii munti cwitiñiqui čherñi itzanaca zumpachaž azquichaquičha, juc'ant čheri pookajo. Yooz Ejpča nii munti cwitiñiqui.

³ Weriž chiitiquiztan ančucquic'uzma kuzziz cjissinčucča.

⁴ Nižaza wejrqui ančucatan tsjii kuzziztča. Jalla nižta ančucquic'uzma wejt-tan tsjii kuzziz cjee. Tsjii muntiquiztan ojkn'i piz itzaquic'uzma muntiquiztan apakta cjequic'uzma niiqui, ana čherchiz cjisnasača. Antiz nii zuma muntiquiz pajkn'i itzanacakaz čherasača. Jalla nižta nii munti itzanaca irataž ančucquic'uzma. Ančucquic'uzma wejt-tan ana tsjii kuzziz cječhaj niiqui, ana zuma kami atasacha. Antiz wejt-tan tsjii kuzziz cječhaj niiqui, nekzipanž zuma kamaña nižaza zuma obranaca tjeznasača.

⁵ 'Wejrtča nii zuma uwas muntižtakaztqui. Ančuczti nii uwas piz pajkn'i itzanacažtakazza. Jakziltat wejt-tan ultimo tsjii kuzzižlaj niiqui, nižaza wejrmi nižtan tsjii kuzziz cjesaž niiqui, jalla niičha ancha zuma kamaña nižaza zuma obranaca tjeezñiqui. Jakziltat wejt-tan ana tsjii kuzzižlaj niiqui, Yooz yujcquiz ana čjul zum obranacami tjeznasača.

⁶ Jakziltat wejt-tan ana tsjii kuzzižlaj niiqui, Yoozquiztan chjatkattaž cjequičha. Nekztanaquic'uzma zuma kamañchiz cjen kjoñchi itsanacažtakaz cjequičha. Jalla nižtiquiztan nii kjoñchi itsanacažtakaz ricujtaž cjequičha ujquin ujzjapa.

⁷ 'Ančucquic'uzma wejt-tan tsjii kuzzižlaj niiqui, nižaza weriž tjaajinta takunaca catokaquic'uzma niiqui, nekztan wejtquiztan čjulumiž mayasača. Nekztanaquic'uzma amiž mayiztiquiztan tjaataž cjequičha.

⁸ Ančucquic'uzma walja zuma obranaca tjeezñiž cjen, Yooz Ejpqui honorchiz cjequičha. Nižaza ančuca zuma obranacchiz cjen ančucquic'uzma weriž tjaajinta žoñinacčucča, jalla nii kjanapachaž tjeeznaquičha.

⁹ Jaknužt wejt Yooz Ejpqui wejt-tan zuma munazičhaja, jalla nižtapacha wejr ančucatan zuma munazuča. Weriž ančucatan munaziž cjen, jalla niipanž cjuñzna.

¹⁰ Ančucquic'uzma weriž mantita ortinanaca cumplaquičha. Jalla nekztan wejrqui ančucatan tirapan munaziñil cjeeča. Wejrqui wejt Yooz Epiž mantita ortinanaca cazzinča. Jalla nižtiquiztan niiqui wejt-tan tirapanž munaziča. Jalla nižta irata ančucatan wejt-tan cjequičha.

¹¹ 'Jalla nii puntunaca ančhucaquiz chiyučha, wejttan chica cuntintuž cjisjapa, nižaza ančhuca kuznacami ancha cuntintu cjisjapa.

¹² Weriz mantita ortinaqui tužuča, jaknužt wejr amtan zuma munazi-tučhaja, jalla nižta irata ančhucqui porapat munazaquiča.

¹³ Jakziltat persunpacha niž mazinacž laycu ticžaja, jalla niiqui, ancha munaziñi kuz tjeeža. Jalla nižta žoñžquiztan anaž juc'anti munaziñi kuzziz žoñic želasača.

¹⁴ Ančhucqui weriz mantitacama kamaquiz niiqui, nekzipanča ančhucqui wejttan munaziñiqui.

¹⁵ Tekztan najwcchuc anal ančhucaquiz “wejt piyunanacača” cjian cjesača. Tsjii piyunaqui čjulut patruna paačhaja, ana zizza. Wejrqui tjapa wejt Yooz Epiž chiitaqui ančhucaquiz zizkatchinča. Jalla nižtiquiztan tekztan najwcchuc ančhucaquiz “wejt mazinacapanča” cjeeča.

¹⁶ Ančhucqui ana wejr illzinčhucča. Wejrzi ančhuc illzinča, nižaza apóstol puestuquiz utchinča, Yooz taku parli okajo, nižaza walja žoñinaca wejtquiz criiskatajo. Nižaza nii wejtquiz criichi žoñinacaqui wejtquiz tiraž tjurt'aquiča. Wejtquiz kuzziz cjen, čjul mayiztami Yooz Ejpžquiztan mayačhaja, jalla nii mayiztaqui tjaataž cjequiča.

¹⁷ Wilta ančhucaquiz mantuča:

Porapat zuma munazaquiča.

CRIICHI ŽOÑINACAQUI CHJAAWJKATTA CJEQUICHA

¹⁸ 'Ana criichi žoñinacaž ančhucatan chjaawjkatan, cjuñzna, jalla nižta ninacaqui wejttan chjaawjkatchiča.

¹⁹ Ana criichi žoñinacž partiraž cjitasaž niiqui, ančhucqui ninacžquiz munazita cjitasača. Pero wejrqui ančhuc illzinča. Jalla nižtiquiztan anača ana criichi žoñinacž partira ančhucqui. Nižaza nižtiquiztan ančhucqui ana criichi žoñinacžquiz ana munazita cjequiča, nižaza chjaawjtaž cjequiča.

²⁰ Weriz chiitac cjuñzna. Wejrqui cjichinča, “Tsjii piyunaqui niž patrunžquiztan anača juc'anti”. Ana criichi žoñinacaqui wejtquiz sufriskatchiča. Nižaza ninacaqui ančhucaquiz zakaz sufriskataquiča. Weriz tjaajinta taku ana catokchiča. Jaziqui ančhucaž tjaajinta taku ana zakaz catokaquiča.

²¹ Pero ana criichi žoñinacaqui ančhuca quintra cjequiča, ančhucaž wejtquiz kuzziz cjen. Nii quintranacaqui wejr cuchanžquiñi anaž pajča. Jalla nižtiquiztan ančhucaquiz quintraža.

²² Wejrqui ninacžquiz Yooz taku mazñi ana tjontasaž niiqui, ninacaqui ana nii pajk ujchiz cjitasača. Pero wejrqui wejt puntuquiztan kjanapacha ninacžquiz chiichinča. Jalla nižtiquiztan ninacaqui ana čjulumi chiyi atasacha, casticz tjuñquiziqui. Nižaza ninacžquiziqui anaž pertunac želasača.

²³ Jakziltat wejtquiz chjaawjkatchaja, jalla niiqui wejt Yooz Ejpžquiz zakaz chjaawjkatcha.

²⁴ Wejrqui ninacž yujcquiz walja milajru obranaca paachinča, jakzilta wali žoñžquiztanami juc'anti. Pero anapanča wejtquiz criiz pecchiča. Jaziqui pajk ujchiz cjissiča. Jalla nižta obranaca anal paatasaz niiqui, ninacaqui ana nii pajk ujchiz cjitasača. Pero nižta obranaca paachinča. Nižaza ninacaqui weriz paata milajrunaca cherchiča. Jalla nuž cheržcumi, wejtquizimi wejt Yooz Ejpžquizimi chjaawjchipanča.

²⁵ Jalla nuž ninacaž chjaawjtaqui cijirta Yooz taku cumplissiča. Ninacž liiquizpacha cijirta Yooz takuqui, tuž cijča: “Wejtquiz chjaawjchiča ana čjul razunžtan”.

²⁶ 'Wejrqui Yooz Ejpžquiztan ančhucaquiz Yooz Espíritu Santo cuchanžcača. Jalla nii Yooz Ejpžquiztan tjonchi Espíritu Santuqui wejt puntuquiztan wereraž intintazkataquiča, nižaza ančhucaltajapa tjurt'izinaquiča. Jalla nii Espíritu Santuqui tjonžcu wejt puntuquiztan zizkataquiča.

²⁷ Primirquiztanpacha ančhucqui wejttan chica ojklaychinčhucpanča. Jalla nižtiquiztan ančhuczakaz wejt puntuquiztan zizkataquiča.

16

PRUEBANACAZ TJONAQUICHA

¹ 'Tjapa weriž chiitanacaqui ančhucaquiz chiichinča, čhjul sufrisquiztanami tirapan wejtquin kuzziz cjisjapa, nižaza ana wejtquiztan zarakzjapa.

² Jazta timpuquiz ančhucqui ajcz kjuyanacquiztan chjatkattaž cjequiča. Nižaza tsjii sufris ora tjonaquiča. Jalla nii oraqui jecmit ančhuc conačhaja, jalla nii conñi žoñiqui cjequiča, "Wejrtča Yooz sirwintqui. Jalla nižtiquiztan nii žoñi conchinča", nuž cjequiča.

³ Nii ančhuc conñi žoñinacami wejtquizimi wejt Yooz Ejpžquizimi anapan pajča. Jalla nižtiquiztan ančhuc conasača.

⁴ Tjapa weriž chiitanacaqui ančhucaquiz chiichinča, ančhucaquiz yanapzjapa. Nii sufris ora tjontanaqui jalla tii weriž chiitanaca cjuñznaquiča. Primirquiztanpacha tii sufris puntuquiztan ančhucaquiz kjanacama ana chiichinča. Ančhucatan kamiñtača. Jalla nižtiquiztan tii sufris puntu ana chiiz pecchintača.

ESPIRITU SANTUZ PUNTU

⁵ 'Pero anz wajilla wejr cuchanžquiñižquin okača. Ančhucaquiztan anaž jakziltami wejr pewcža, "¿Jakzit okačhaja?" jalla nii.

⁶ Anchucqui ancha llaquita cjissinčhucča, jalla nuž weriž chiiñiž cjen.

⁷ Pero wejrqui werara takunaca chiyuča. Weriž ojktanaqui waliž cjequiča ančhucaltaqui. Wejrqui anal okasaž niiqui, tjurt'iziñi Espíritu Santuqui anaž tjonasača. Pero wejr ojžcuqui nii Tjurt'iziñi cuchanžcača.

⁸ Jalla niiqui tjonžcuqui, ana criichi žoñinacž kuzquiz ninacž persun uj tantiyaskataquiča. Nižaza Yooziž mantita kamañ puntu tantiyaskataquiča, nižaza nii Espíritu Santuqui Yooz casticz puntu tantiyaskataquiča.

⁹ Espíritu Santuqui ana criichi žoñinacž kuzquiz persun uj tantiyaskataquiča, wejtquiz ana criichiž cjen.

¹⁰ Nižaza nii Espíritu Santuqui ana criichi žoñinacž kuzquiz Yooziž mantita kamañ puntu tantiyaskataquiča, weriž Yooz Ejpžquin ojkiž cjen. Jalla nižtiquiztan ančhuc zakaz wejr ana iya cheraquiča.

¹¹ Tii muntuquiz mantiñi diabluqui Yooziž yatisinžtača, ana wali-panča, nii. Jazic niiqui castictaž cjequiča ultim jyuquiz. Jalla nižtiquiztan Espíritu Santuqui ana criichi žoñinacžquiz Yooz casticz puntu tantiyaskataquiča.

¹² 'Iya juc'anti kjažumi ančhucaquiz chiižinznaca žejlča wejttaqui. Pero anziqui ančhucqui anaž nii intintazasača.

¹³ Werar intintazkatñi Espíritu Santuqui tjonžcu, ančhucaquiz tjajnaquiča tjapa weraranaca. Anaž persun kuzquiztan tjajnaquiča, antiz Yoozquiztan nonžtanaca tjajnaquiča. Nižaza tekztan najwcchuc čhjulut watačhaja, jalla nii zakaz tjajnaquiča.

¹⁴ Espíritu Santuqui wejt puntuquiztan ančhucaquiz tjajnaquiča. Jalla nuž tjajinñiž cjen wejrqui honorchiz cjeeča.

15 Tjapa Yooz Epiž chiitaqui wejrpankazza chiiñtqui. Tsjiikaztča wejrnacqui. Jalla nižtiquiztan wejrqui chiichinča, Espíritu Santuqui wejt puntuquiztan ančucaquiz tjaajnaquiča, nii.

CUNTINTUZ CJEQUICHA

16 'Upaquižtancama ančucqui wejr ana cheraquiča. Nekztanaqui tsjii kjaž majquiztan wejr wilta cheraquiča.

17 Nekztanaqui yekjap tjaajintanacaqui porapat pewcsassiča, tuž cjican: –¿Kjažt cjii tjejo, tuž cjicanajo? “Upaquižtancama ančucqui wejr ana cheraquiča. Nekztanaqui tsjii kjaž majquiztan wejr wilta cheraquiča”. Nižaza tiiqui “Wejrqui Yooz Ejpžquin okača”, cjiča. Jalla nuž cjican, ¿kjažt cjii teejo? ¿Ĉjul puntut chii teejo?

18 Ninacaqui cjichizakazza:

–“Upaquižtancama” chiicanaqui, ¿kjažt cjii teejo? Anača intintazzuca tiiž chiitaqui.

19 Jesusaqui persun kuzquiz zizatča, ninacaqui nižquin tsjii pewcz pecatča, jalla nii. Jalla nekztanaqui Jesusaqui ninaczquiz tuž cjichiča:

–Wejrqui chiichinča, tuž cjican: “Upaquižtancama ančucqui wejr ana cheraquiča, nekztanaqui tsjii kjaž majquiztan wejr wilta cheraquiča”. Jalla nuž chiican, ¿kjažt cjii? ¿Jalla niiča ziz pecya?

20 Ultim weraral ančucaquiz cjiwča. Ančucqui llaquita cjequiča, nižaza kaaquiča. Ana criichi zoñinacazti cuntintuž cjequiča. Ančucqui llaquita kuzziz cjenami, tsjii kjaž majquiztan ancha chipchipcan cuntintuzakaz cjisnaquiča.

21 Nonžna. Majtz ora irantižcan tsjaa maatak žonqui janchinaca walja mizkatiñča. Nekztan wawa majtžcuqui, naa maatak žonqui wawchiz cjen ana janchi mizkattami cjuñiñča. Wawchiz cjen, ancha cuntintuča naaqui.

22 Jalla nižta irataž ančucqui anziqui llaquita kuzzizza. Pero wejrqui am wilta cherača. Jalla nii oraqui ančuca kuznaca cuntintuž cjequiča. Nižaza nii ančuca cuntintu cjis kuzqui anaž jecmi wilta nižta llaquita cjiskatasača.

23 'Nii orquiztan najwcchuc ančucqui zizñi cjiscu wejr anaž iya pewcnaquiča. Ančucaquiz weraral chiyuča. Wejtquiz tjapa kuztan cjen, ančucqui Yooz Ejpžquiztan ĉjulumi mayačhaja, jalla nekztan weriž cjen nii mayiztaqui tjaataž cjequiča.

24 Tii oracama ančucqui anaž ĉjulumi maychinčucča wejt tjuuquiz. Mayiza, nekztanaqui tjaataž cjequiča, ančuca kuz juc'anti cuntintu cjisjapa.

JESUSIZ CHIITANACA

25 'Tii oracama wejrqui ančucaquiz ch'aman intintazzuc takunaca chiichinča. Tsjii tjuñiqui tjonča. Jalla nii tjuñquiztan nižta ch'aman intintazzuc takunacami anal iya chiyača. Antiz Yooz Ejpž puntuquiztan jalla niil kjanacama chiyača.

26 Nii oraqui ančucqui wejt tjuuquiz ĉjulquiztanamiž mayizaquiča. Nekztan wejrqui ančucaltajapa anal iya maynača wejt Yooz Ejpžquiztanqui.

27 Ančucqui wejttan munazichinčucča. Nižaza wejtquiz criichinčucča, wejrqui Yooz Ejpžquiztan tjonchi, jalla nii. Jalla nižtiquiztan Yooz Ejppacha ančucatan munaziča.

28 Wejrqui Yooz Ejpžquiztan tii muntuquiz tjonchinča. Nižaza tii muntuquiztan, wejt Yooz Ejpžquin quepača.

29 Jalla nekztanaqui niž tjaajintanacaqui cjichiča:

–Jaziqui ultimu kjanacama chiichamcha, ana ch'aman intintazzuc taku-nacztan.

³⁰ Jaziqui zizuča, amqui tjapa čjulumi zizñampanča, nii. Ampankam wejtnaca kuzmi zizza. Jalla nižtiquiztan wejrnacqui anal iya pewcnasača. Nižaza wejrnacqui ultim chekpacha criyuča, amqui Yooz Ejpžquiztan tjon-chamča, jalla nii.

³¹ Jesusaqui ninacžquiz tuž kjaaziča:

–¿Jaziqui ančhucqui ultim chekpacha criichinčhucjo?

³² Tsjii ora wajiča. Anzpachača nii oraqui. Nii oraqui ančhucqui wichanziž cjequiča, nižaza zina zina wichanziž cjequiča. Wejrqui zinalla ectal cjeeča. Pero wejr zina ecta cjenami, wejrqui ana zina cjeeča. Wejt Yooz Ejpž wejttan chica cjequiča.

³³ Jaziqui tjappacha tii takunaca ančucaquiz chiichinča, wejtquiz kuzziz cjen, cuntintu cjisjapa. Tii muntuquiz žejlcan ančhucqui sufraquiča. Walja tjup kuzzizpan cjee. Wejrqui tjapa liju atipchinča.

17

JESUSIZ YOOZ EJPZTAN PARLITA

¹ Jalla nuž chiižcu Jesusaqui tsewcchuc arajpach kjutñi cherziča. Nekztan Yooz Ejpžtan parlichiča, tuž cjan:

–Yooz Tatay. Wejt sufris ora tjonča. Wejrtča am Majchtqui. Wejtquiz honorchiz cjiskatalla. Nekztan wejrqui amquiz juc'ant honorchiz cjiskatača.

² Tjapa žoñinaca mantizjapa, jalla nii poder wejtquiz tjaachamča. Jakzil-tami amqui wejtquiz intirjičhaja wejt parti cjisjapa, jalla ninacžquiz araj-pachquin wiñaya kamkatača wejrqui.

³ Amča zinta werara Yoozqui. Nižaza wejrtča Jesucristutqui; amiž cuchanžquita Zoñtča. Wejt parti žoñinacaqui amquizimi wejtquizimi pajča. Jalla nižtiquiztan arajpachquin učumtan wiñaya kamaquiča.

⁴ Tii muntuquiz kamcan amquiz honorchiz cjiskatchinča. Nižaza amiž mantita obranaca žerzinča.

⁵ Jaziqui, Yooz Tatay, amquin wilta quejpžcu, arajpachquin amtan chica želaquiča. Nekztan wejtquiz honorchiz cjiskatalla. Ima tii muntu želan, wejrqui amtan chica honorchiztala. Jalla nižta tuquita honorchiz irata wilta wejtquiz honorchiz cjiskatalla.

⁶ Amqui žoñinaca illzamča, wejt partiquiz cjisjapa. Jalla nii žoñinacžquiz intintazkatchinča am puntuquiztan. Ninacaqui amtača. Nižaza wejt parti cjisjapa wejtquiz tjaachamča. Nižaza ninacaqui am takunac jaru kamča.

⁷ Jaziqui wejt partir žoñinacaqui zizza, tjapa weriž chiitaqui amquiztan tjonñicamača, jalla nii.

⁸ Amiž chiita takunacacama ninacžquiz tjaajinčinča. Jalla nekztan ninacaqui weriž tjaajinta catokchiča. Nižaza weriž tjaajinta žoñinacača zizñipanqui, wejrqui amquiztan tjonchinča, jalla nii. Nižaza criichipanča, amqui tii muntuquiz wejr cuchanžquichamča, nii.

⁹ Jaziqui ninacžtajapa amquiz mayizuča. Ana criichi žoñinacžtajapa anal mayizuča. Antiz wejt partir žoñinacžtajapakaz mayizuča, amiž illžñiž cjen.

¹⁰ Amtača tjapa wejt partir žoñinacaqui. Nižaza wejttača ninacaqui. Jalla ninacž cjen wejrqui honorchizza.

11 'Wajilla ana iya tii muntuquiz kamača. Nii wejt partir zoñinacaž eclaquiča. Tii muntuquiz tira želaquiča ninacaqui. Wejrzi amquin quejpžcača. Zuma arajpach Yooz Tatay, tii zoñinaca wejtquiz tjaachamča. Jazi qui am aztan tinaca tirapan cwitalla, tsjii kuzziz cjeyajo, jaknužt učumqui tsjii kuzzizlaja, jalla nižta.

12 Tii muntuquiz tinacžtan kamcan, tii zoñinaca cwitichinča, am aztan. Nižaza tinacžquiztan tsijtsinčinča čjulquiztanami ana kjaž cjisnajo. Tsji iqui pertissipanča. Jalla nuž pertisjapa nii Judas Iscariotiqui žejlkalča. Jalla nuž cjen tuqita cjiirta Yooz taku cumplissiča.

13 'Anziqui wejrqui amquin quejpžcača. Iya tsjii zkolucžtan tii muntuquiz kamcan wejrqui tinacžquiz chiižinuča, wejtquiz criichi zoñinacaž wejržtapacha cuntintu cjeyajo.

14 Wejrqui tinacžquiz am taku tjaajinčinča. Jaknužt wejrqui ana criichi zoñinacž partiquiz ana želatučhaja, jalla nižta irata wejtquiz criichi zoñinacaqui ana žejlča ana criichi zoñinacž partiquiz. Jalla nižtiquiztan ana criichi zoñinacaqui ninacžquiz chjaawjča.

15 Amquiztan ana mayizuča, wejt zoñinacaž tii muntuquiztan chjichtaž cjisjapa. Antiz amquiztan mayizuča, ana wal diabluzquiztan wejt zoñinaca tsijtsinta cjisjapa.

16 Jaknužt wejrqui ana criichi zoñinacž partiquiz ana želatučhaja, jalla nižta irata wejt zoñinacaqui ana žejlča, ana criichi zoñinacž partiquiz.

17 Amiž chiitaqui ultim werarača. Am takuž cjen wejtquiz criichi zoñinaca zuma kamañchiz cjiskata. Čjul ana zuma kamañquiztanami zarakskata.

18 Jaknužt amqui tii muntuquiz žejlñi zoñinacž kjutñi wejr cuchanžquičhaja, jalla nižaza wejrqui tii muntuquiz žejlñi zoñinacž kjutñi wejt zoñinaca cuchnuča.

19 Wejtquiz criichi zoñinacžtajapa ancha kuztanča wejrqui ticzjapa. Nižaza am werar tawk jaru kamtiquiztan tii zoñinaca t'akžinuča amta cjeyajo.

20 'Wejrqui tii tekžta zoñinacžtajapa alaja anal mayizuča, antiz tjapa wejtquiz anzimi wiruñami criichi zoñinacžtajapa mayizuča. Tii tekžta zoñinacaž Yooz taku paljaytiquiztan yekjapanacaqui wejtquiz criyaquiča. Jalla ninacžtajapa zakaz mayizuča.

21 Jalla tjapa ninacžtajapa mayizuča tsjii kuzziz cjisjapa. Yooz Tatay, amqui wejttan tsjii kuzzizza. Nižaza wejrqui amtan tsjii kuzziztča. Jalla nižta irata ninacaqui učumnacaquiz tsjii kuzziz cjila. Jalla nuž mayizuča, tii muntuquiz žejlñi zoñinaca criyajo, am wejr cuchanžquichi, jalla nii.

22 Amiž wejtquiz tjaata arajpach kamaña, jalla nii kamaña ninacžquiz cjiskatchinzakazza, tsjii kuzziz cjeyajo, jaknužt učumqui tsjii kuzzizalaja, jalla nižta.

23 Jaknužt amqui wejttan žejlčhaja, jalla nižtača wejrqui ninacžtan želača, ninaca tsjii kuzzizpan cjeyajo. Jalla nižtiquiztan zoñinacaqui zizaquiča, amqui wejr cuchanžquičiča, jalla nii. Nižaza zoñinacaqui zakaz zizaquiča, amqui ninacžtan munaziča, jaknužt amqui wejttan munazičhaja, jalla nižta.

24 'Yooz Tatay, amqui wejtquiz tii zoñinaca tjaachamča, wejtquiz criyajo. Jalla tinacaqui wejttan chica kamñijapa pecuča, jakziquin wejr želačhaja, jalla nicju. Jalla nužuntu žejlcan tinacaqui wejt arajpach kamaña kjana cheraquiča. Ima tii muntu želan, wejttan munaziñiž cjen amqui wejtquiz nii arajpach kamaña tjaachamča. Jalla nii kamaña cheraquiča wejt partir zoñinacaqui.

²⁵ Ultim lijitum Tatayi ana criichi žoñnacaqui am anaž pajča. Wejrzi am pajuča. Nižaza jalla tinacaqui zizza, amqui wejr cuchanžquichamča, jalla nii.

²⁶ Am puntuquiztan tinacžquiz zumpacha intintazkatchinča. Nižaza wejrqui tiral intintazkatuča, ninacaž zuma munazizjapa, jaknužt učumqui zuma munazičhaja, jalla nižta. Nižaza am puntuquiztan ninacžquiz intintazkatuča, wejr ninacžtan tsjii kuzziz cjisjapa.

18

JESUSAQUI TARAZUNTACHA

¹ Jesusaqui nuž chiižcu niž tjaajintanacžtan ojkchiča. Cedrón cjita k'awž tsjii latuquin ojkchiča. Jalla nicju ch'ojñi muntinaca želatča. Nijchuc luzziča.

² Jesusaqui nii yokquin kjaž wilta ajczñipantakalča niž tjaajintanacžtan. Tarazunñi Judasqui nii yoka pajchiča.

³ Jalla nicju Judasqui zultatunacami, nižaza timplu wijilñi zultatunacami, jalla ninaca chjitchiča. Timplu jilirinacami, fariseo žoñinacami jalla ninacača nii timplu wijilñi zultatunaca cuchanchiqui. Ninacaqui iran-tichiča michanacžtan teyanacžtan pajk cuchillunacžtan, nižaza wjajtz carotinacžtan. Jalla nižtanacžtan irantichiča.

⁴ Jesusaqui čjulut watačhaja, jalla nii tjapa zizatča. Nii tjonchi žoñinacžquiz macjatžcu, pewcziča, tuž cjican:

—¿Jectča kjur ančhucjo?

⁵ Jalla ninacaqui kjaaziča, tuž cjican:

—Wejrnacqui kjuruča Jesusa, nii Nazaret wajtchiz žoñi.

Jesusaqui tuž kjaaziča:

—Wejrtča niitqui.

Judas, nii tarazuñi žoñiqui ninacžtan chica tsijtchi želatča.

⁶ Jesusaž “Wejrtča niitqui” cjitiquiztan nii tanñi žoñinacaqui wir kjutñi atžcu porapat tewksarascu yokquiz tjojtassiča.

⁷ Jesusaqui wilta pewcziča:

—¿Jectpan ančhuc kjurjo? —cjican.

Ninacaqui wilta kjaaziča, tuž cjican:

—Wejrnacqui kjuruča Jesusa, nii Nazaret wajtchiz žoñi.

⁸ Jesusaqui nekztan zakaz cjichiča:

—Wejrtča cjichinsala. Ančhucqui wejr kjurča. Jaziqui tii parti žoñinaca cutznaquiča.

⁹ Jalla nekztan Jesusaž tuqui chiita taku cumplissiča. Tuquiqui Jesusača chiichiqui, jalla tuž: “Yooz Ēpiž wejtquiz tjaata žoñinacaqui ana tsjiimi per-tichinča”.

¹⁰ Simón Pedruqui pajk cuchillchiztača. Jalla nii cuchillu jwescu, Pedruqui timplu jilirž piyunž žew cjuñi pootžcu chjajtžinchiča. Jalla nii cjuñi chjajtžinta žoñiqui Malco cjitatača.

¹¹ Nekztanaqui Jesusaqui Pedružquiz cjichiča:

—Am cuchillu cuchillž žejlžquiz quijtžna. Wejt Yooz Ejpž pinsita kuz jaru wejtlaqui sufristanča. ¿Anaj wejr tii sufrasajo?

JESUSAQUI CHJICHTACHA

¹² Jalla nekztanaqui zultatunacami, zultatž comandantimi, nižaza judío timplu wijilñi zultatunacami, jalla ninacaqui Jesusa tanžcu kjara jweržinchiča.

¹³ Nekztan Anás cjita jilirž kjuyquiz chjitchiča. Anasqui Caifás ajmuž ejptača. Jalla nii wata Caifasqui timplu chawjc jiliritača.

14 Nii Caifasqui tuquiqui tuž cjtikalča: “Učhumnacaltajapa tsjii žoñi ticstanča, tjapa žoñinaca ana conta cjeyajo”.

15 Jesusa chjichan, Simón Pedružtan tsjii tjaajinta žoñžtan Jesusa apziča. Nii tsjii Jesusiž tjaajinta žoñiqui timplu jilirž pajtatača. Jalla nižtiquiztan Jesusižquiz apžcu nii timplu jilirž patiuquin luzziča.

16 Pedruqui ana pajtaž cjen zancu eclichiča. Nekztan nii tsjii luzzi tjaajinta žoñiqui ulanžquichiča, naa ulanz zanquiz cwitiñi žonaquin paljayzjapa. Jalla nuž paljayžcu patiuquiz Pedro luzkatchiča.

17 Nekztan naa cwitiñi žonqui Pedružquiz pewczinča, tuž cjican:

—¿Anaj am zakaz nii žoñžtan chica ojklayñamtajo?

Nekztan Pedruqui chiichiča:

—Anaž wejr, —cjican.

18 Ch'uñuriž cjen piyunanacami timplu zultatunacami uj taaziča carpunžtan. Nekztan nii uj parazquiz tsijtchi kutnatča. Ninacžtan chica Pedruqui tsijtchi zakaz želatča, kutuncan.

TIMPLU CHAWJC JILIRZQUIN APANTITA

19 Jalla nekztanaqui timplu chawjc jiliriQUI Jesusa pecunchiča, niž tjaajinta žoñinacž puntuquiztanami nižaza niž persun tjaajintami.

20 Jesusaqui nižquiz kjaaziča, tuž cjican:

—Tjapa žoñinacž yujcquiz tjaajinchinča. Učhum ajcz kjuyquizimi timpluquizimi tjaajinchinča. Timpluquiz tjapa žoñinaca ajczñiča. Ana chjójzaka tjaajinchinča.

21 ¿Kjažtiquiztan nuž wejr pecunjo? Weriz tjaajinta nonžñi žoñinacžquiz pewczna, čhjulut tjaajintučhaja, jalla nii. Jalla ninacaqui weriz tjaajintanaca zizza.

22 Jalla nuž chiitan, tsjii nekz tsijtchi žejlñi zultatuqui Jesusa yujcquiz kjaržtan tsjajpchiča, tuž cjican:

—¿Jalla nuž timplu jiliržquiz kjaazkaya?

23 Jesusaqui nii zultatžquiz kjaaziča, tuž cjican:

—Wejr ana zuma chiituchaj niiqui, ¿jaknužt cjican ana zuma chiichintajo? Zumal chiyučha. ¿Kjažtiquiztan am wejr tsjajpjo?

24 Jalla nekztanaqui Jesusa kjara jweržintapacha cuchanchiča Caifás timplu chawjc jiliržquin.

PEDRUQUI K'OTCHICHA

25 Jalla nii oraqui Simón Pedruqui tsijtchi želatča nii ujquiz kutuncan. Tsjii tsjii nekz žejlñi žoñiqui Pedružquiz cjichiča:

—Amqui nii žoñžtan chica ojklayñamča, ¿ana jaa?

Pedruqui toscara chiichiča:

—Anača wejrqui, —cjican.

26 Jalla nekztanaqui tsjii timplu jilirž piyunaqui Pedružquiz pewczizakazza. Nii piyunaqui nii cjuñi chjajtžinta piyunž familiatača. Jalla tuž cjican pewziča:

—Nii munti yokquin nii žoñžtan chica am cherchinla, ¿ana jaa?

27 Pedruqui wilta toscara chiichiča. Jalla nuž wilta toscara chiyan, nii orapacha tsjii querwallpi jora kjawchiča.

PILATUZQUIN CHJICHTA

28 Jalla nekztanaqui Caifás cjita žoñžquiztan Jesusaqui chjichtača pajk mantiñiž kjuyquin. Waj kjantatitača. Nii judío žoñinacapacha nii pajk mantiñiž kjuyquin ana luzziča, ninacž cuzturumpi cjen. Jalla nuž luztasaz niiqui, pascua pjijzta čhjeri ana lujtasača.

29 Jalla nižtiquiztan Pilatuqui ninacžquiz paljayi ulanžquichiča, tuž cji-can:

—Ančhucqui, ¿chjul ujž tii žoñž quintra jwes pecya?

30 Žoñinacaqui tuž kjaaziča:

—Tii žoñiqui ana čhjul pajk ujnacami paatasaz niiqui, anal wejrnacqui tii intirjitasacha.

31 Nekztanaqui Pilatuqui ninacžquiz cjichiča:

—Ančhuckaz chjicha, ančuca lii jaruž justicia paažca.

Nii žoñinacaqui kjaaziča, tuž cji-can:

—Wejtnacalta žoñi conzqui lii quintrača.

32 Niiž tuquiqui Jesusaqui chiičkalča, persun ticz puntuquiztan, jaknužt ticznačhaja, jalla nii. Nižaza niiž chiičtaqui cumplisnaquiča.

33 Pilatuqui wilta niiž kjuyquin luzquichiča. Jesusa kjawžcu, niižquiz pewcziča, tuž cji-can:

—¿Judío žoñinacž chawc jilirimkaya?

34 Jesusaqui niižquiz kjaaziča, tuž cji-can:

—¿Amqui jalla nuž persun kuzquiztan wejr pewczya? Už ¿yekja žoñinaca amquiz nuž pewczna cjichi jaa?

35 Pilatuqui tuž kjaaziča:

—Wejrqui judío žoñt, ¿jaa? Am persun wajtchiz žoñinacami nižaza am persun timplu jilirinacami, jalla nii žoñinacača wejtquin am intirjichiqui. ¿Chjul uj paachamt, amjo?

36 Jesusaqui nekztan cjichiča:

—Wejtla mantizqui anača tii muntuquiztan. Tii muntuquiztan wejtla mantiz cjesaz niiqui, wejt piyunanaca kichaskatasacha wejt quintra žoñinacžquiz, ana wejr intirjita cjisjapa. Pero wejtla mantizqui anača tii muntuquiztanaqui.

37 Nekztan Pilatuqui cjichiča:

—¿Nižtaqui amčhalani mantiñi jilirinqui?

Jesusaqui cjichiča:

—Jesalla, wejr mantiñi jilirtchiya, am chiiča jalla nuž. Tii muntuquiz tjonžcu nassinča, werara puntu tjaajinzjapa. Jakziltat nii werara tjaajinta jaru kamčhaja, jalla niiqui weriž chiiča taku nonža.

38 Jalla nuž chiičtiquiztan Pilatuqui cjichiča:

—Werara puntuqui, ¿chjulut neejo?

Jalla nuž pewczcu Pilatuqui wilta ulanchiča judío žoñinacžquin parli. Ninacžquiz cjichiča:

—Wejrqui tii žoñžquiz ana čhjul ujmi jwesi atuča.

39 Pascu pijztiquiz ančhucalta tsjii custurumpi žejlča, wejtla tsjii preso tanta žoñi cutzqui. ¿Tii judío wajtchiz chawjc jiliri cutznaquiya? ¿Jalla nuž cutskatz pecya?

40 Judío žoñinacaqui kjawchiča:

—¡Tii žoñi ana cutzna! ¡Barrabás cutzna! —cji-can. Barrabasqui tsjii anawal tjañi žoñitača.

19

PILATUQUI JESUSA CUTZ PECCHA

1 Jalla nekztanaqui Pilatuqui wilta kjuyłchuc Jesusa majcchiča. Nekztanaqui Jesusižquiz wjajtajo mantichiča.

2 Nekztan zultatunacaqui ch'apquiztan tsjii pillužtakaz paachiča. Jalla nii paatižtan Jesusiž achquiz tewžinchiča. Nižaza jilirž murat zquiti tjutziča.

³ Jalla nuž paažcu niižquin macjatchičha,
 –¡Viva, judío žoñinacz chawjc jiliri! –cjican.
 Nižaza Jesusiž yujcquiz kjaržtan tsjajpchiča.

⁴ Nekztan Pilatuqui judío žoñinaczquin wilta ulanzquichiča. Nekztan ninaczquiz cjichiča:

–Cherzna. Ančhucaž intirjita žoñi ticju jwescača, ančhuc zumpacha intintazajo. Wejrqui tii žoñžquiz anal čjul ujmi jwesi atuča.

⁵ Jalla nekztan Jesusaqui ulanzkatžquichiča. Ch'apquiztan paataqui achquiz tewžinta, nižaza jilirž murat zquiti tjutžta. Nekztanaqui Pilatuqui ninaczquiz cjichiča:

–Tiiča ančhucaž intirjita žoñiqui.

⁶ Timplu jilirinacami, nižaza timplu wijilñi zultatunacami nii cheržcu, alto joržtan kjawcan, chiichiča:

–¡Cruzquizkaz ch'awczna! ¡Cruzquizkaz ch'awczna! –cjican.

Pilatuqui ninaczquiz cjichiča:

–Way, nižtacž chjicha ančhucqui, nižaza cruzquiz ch'awczca. Pero wejrqui ana čjul ujmi tiižquiz jwesi atchinča.

⁷ Nekz žejlñi judionacaqui tuž kjaaziča:

–Wejrnacqui liichiztča. Wejtnaca lii jaru tii žoñic ticstanča, tiiqui “Wejrtča Yooz Majch” cjican ojklaychiž cjen.

⁸ Jalla nii čiita taku nonžcu, Pilatuqui tsjan eksiča Jesusižquiztan.

⁹ Jalla nižtiquiztan Pilatuqui niž kjuya wilta luzziča Jesusižquin pewczjapa. Jalla tuž pewcziča:

–¿Jakziquiztan žoñipant amya?

Jesusazti ana čjulumi kjaaziča.

¹⁰ Jalla nižtiquiztan Pilatuqui niižquiz wilta paljaychiča, tuž cjican:

–¿Kjažtiquiztan am ana wejtquiz kjaazjo? Wejrqui mantasača, am cutzjapa. Nižaza mantasača cruzquiz ch'awczjapa, ¿Jalla nii ana ziz amjo?

¹¹ Jesusaqui niižquiz kjaaziča, tuž cjican:

–Yoozqui amquiz mantiz poder ana tjaatasaz niiqui, amtaqui mantiz poder ana žejltasača. Yooz amquiz mantiz poder tjaachiž cjenkaz wejr mantasača. Jalla nižtiquiztan jecčhalaj amquiz wejr intirjichi, jalla ninacača amquiztan juc'ant ujchizqui.

¹² Jalla nuž nonžcu Pilatuqui Jesusa ančaž jaknužumi cutz pecatča pero nii judío žoñinacazti kjawžcan chiichiča, tuž cjican:

–Tii žoñi cutznaquiž niiqui, am zakaz César tsjan chawjc jilirž quintra paaquiča. Jakziltat “Wejrtča chawjc jiliritqui” cjican čečhaj niiqui, César chawjc jilirž quintraž paača.

¹³ Pilatuqui jalla nuž nonžcu, zultatu mantichiča, Jesusa zancchuc jwescajo. Zancchuc jwesquichiča Gabata cjita patiuquin. Gabata tuž cjiča, maznacžtan curta, jalla nii. Jalla nicju Pilatuqui jusjiiz julzquiz julziča.

¹⁴ Jalla nii tjuñiqui tjacz tjuñitača jaka pascua pjijztaž cjen. Nižaza taypurutača. Nekztanaqui Pilatuqui nii judío žoñinaczquiz cjichiča:

–Tiiča ančhuca chawjc jiliri.

¹⁵ Ninacaqui kjawchiča, tuž cjican:

–¡Ticzla tiiqui! ¡Ticzla tiiqui! ¡Cruzquiz ch'awczla!

Nekztan Pilatuqui ninaczquiz cjichiča:

–¿Kjažt ančhuca tsjan chawjc jiliri ch'awcznas?

Nii timplu jilirinacaqui tuž kjaaziča:

–Wejtnacaltaqui zinta tsjan chawjc jiliri žejlča, César cjiča.

16 Jalla nekztanaqui Pilatuqui ninacž kuzcama Jesusa intirjichiča cruzquiz ch'awcta cjisjapa.

CRUZQUIZ CH'AWCTACHA

17 Jalla nekztanaqui Jesusaqui chjichtatača. Persuna cruza kuzi ojkkatchiča Ach Tsjij cjita tjuuchiz yokquin. Nii yokaqui hebreo tawkquiz Gólgota cjitatača.

18 Jalla nicju cruzquiz ch'awctatača, nižaza nižtan chica tsjii pucultan žoñinaca yekja cruzanacquiz ch'awctazakaztača, Jesusiž porap kjuttan, Jesusazti ninacž taypiquiz.

19 Nižaza Pilatuqui tsjii letrero paakatchiča, tuž cjican: “Jesusa Nazaret wajtchiz žoñi. Judionacž tsjan chawjc jiliri”. Jalla nii paažcu Jesusiž ach juntuñ cruzquiz ch'awczinchiča.

20 Chawc wajt žcati Jesusaqui cruzquiz ch'awctatača. Jalla nižtiquiztan walja judío žoñinacaqui niž letrero liichiča. Nii letreruqui čjep tawkquiztan cjiirtatača, hebreo tawkquiztanami, griego tawkquiztanami, nižaza latín tawkquiztanami.

21 Nii letrero cheržcu timplu jilirinacaqui Pilatužquiz cjichiča:

–Ana cijjra, “Judionacž tsjan chawjc jiliri” cjicanaqui. Antiz cijjra, “Tii žoñiqui cjiča, ‘Wejrtča judionacž tsjan chawjc jiliritqui’”. Jalla nuž cijjra.

22 Pilatuqui tuž kjaaziča:

–Jaknužt cijjrčinžlaja, nužupanikaz cjequiča.

23 Zultatunacaqui Jesusa cruzquiz ch'awczcu niž zquiti ricujchiča. Nižaza pajkpic partiquiz tojziča, nii pajkpaltan zultatunacaqui. Tsjii pajk tol zquitiqui ana ch'ucuchiz watzatača, tsewcchuc kozzuc pakjipacha.

24 Jalla nižtiquiztan nii zultatunacaqui porapat kazassiča, tuž cjican:

–Anačhum wjajrla. Antiz surtiila. Tii zquitiqui jeczquizkat surti cayačhani nižtaž cjequiča.

Jalla nuž paatan cijjrta Yooz takuqui cumplissiča. Cijjrta Yooz taku tuž cjiča: “Ninacžpora wejt zquiti tojziča, nižaza parti zquitquiztan surtiyas-siča”. Jalla nuž paachiča nii zultatunacaqui.

25 Jalla nekz Jesusiž cruz žcati tsijtsiñ želatča, Jesusiž maa; nižaza niiž maa cullaqui; nižaza María (Cleofas tjuntača); nižaza María Magdalena; nii pajkpaltan želatča.

26 Jesusaqui niiž maa cherchiča. Nižaza niiž pecta tjaajinta žoñi naaža žcati tsijtchi želatča. Jalla nuž cheržcu Jesusaqui niiž maaquiz cjichiča:

–Maataka, tiiča am maati cunta.

27 Nekztanaqui nii tjaajinta žoñžquiz cjichizakazza:

–Taača am maaqui.

Jalla nekztanpacha nii tjaajinta žoñiqui Jesusiž maa ricujžcu persun kjuya chjitchiča.

JESUSAQUI TICZA

28 Jalla nekztanaqui Jesusaqui zizziča, tjapa Yooz Epiž tjaata langznaca liwj žeržtapantača, jalla nii. Nekztan cjichiča:

–Kjaz kjaral paznuča.

Jalla nuž cjican, cijjrta Yooz takuqui cumplissiča.

29 Jalla nekzi tsjii ojch želatča jar vinchiz. Jalla nekztanaqui kjaz ch'umñi esponja t'awziča nii vinguiz. Nekztan hisopo cjita munti parquiz chjapžcu, Jesusiž atquin ch'iižinchiča.

30 Jesusaqui nii jar vinu licžcu, nekztan cjichiča:

–Tjapaž cumplissay. –Jalla nuž chiižcu Jesusaqui acha colžcu ticziča.

³¹ Pascua pjiizta tjacz tjuñitača. Niiž jakatažu jeejz tjuñitača, nižaza chawc pjiizti tjuñitača. Jalla nižtiquiztan judío žoñinacaqui nii cruzquiz ticziž curpunaca anaž nuž tsjijptapacha čhjelinz pecatča. Jalla nižtiquiztan nii judionacaqui Pilatužquin maychiča, cruzquiz ch'awcta žoñinacž lis tsjij kjolkjolžinajo, apura ticskatsjapa. Nekztan ticžtan cruzquiztan apakznasača.

³² Nekztan Pilatuqui zultatunaca mantichiča, nii cruzquiz ch'awctanacž lis kjolzjapa. Primir tjañž lismi kjolžinchiča. Nižaza tsjii tjañž lizmi kjolžinchizakazza.

³³ Nekztanaqui Jesusižquiz macjatžcu, nii zultatunacaqui cherziča, ticzi, jalla nii. Jalla nižtiquiztan niiž lismi ana kjolkjolžinchiča.

³⁴ Pero tsjii zultatuqui Jesusiž ch'ill kjuttan chjapžinchiča pajk cuchillžtan. Jalla nuž chjaptan ljocmi kjazmi lewchiča.

³⁵ Wejrpacha jalla nii cherchinča. Jalla nižtiquiztan werara ticlarchinča nii puntuquiztan, ančhuczakaz criyajo. Weriž ticlarta takuqui werarapanča.

³⁶ Jalla tii watchi puntunacquiztan cjiirta Yooz takuqui cumplissiča. Cjiirta Yooz takuqui jalla tuž cjiča: “Anaž jakzilta niiž tsjijmi kjoltaž cjequiča”.

³⁷ Nižaza tsjii cjiirta Yooz takuqui tuž cjicha: “Ninacaqui ninacaž chjapta žoñiqui cheraquiča”.

JESUSAQUI TJATZTACHA

³⁸ Jalla nekztanaqui tsjii Arimatea wajtchiz žoñiqui, José cjita, Pilatužquin mayi ojkchiča. Josequi Jesusiž curpu maychiča tjatzjapa. Josequi chjozaka Jesusiž chiita tjaajintanaca catokchiča, ana jeczquizimi mazcu. Parti judío jilirinacžquiztan eksiča. Jalla nuž maytan Pilatuqui permiso tjaachiča. Jalla nekztanaqui Josequi ojkchiča Jesusiž curpu chjichi.

³⁹ Nižaza Nicodemo cjita žoñiqui Jesusiž curpu tjaczni tjonchiča. Jalla nuž Jesusiž curpu tjaczjapa zjicchiča, tsjii quintala zuma ulurchiz mirržtan aloestan t'ajžta. Niiž tuquiqui Nicodemuqui Jesusižquin ween tjonzitača.

⁴⁰ Josežtan Nicodemžtan Jesusiž curpu tjacziča. Nižaza nii mirržtan aloestan jalla ninacžtan zuma pañunacžtan Jesusiž curpu capziča, jaknužutažlaj nii judío žoñinacž cuzturumpi, jalla nuž.

⁴¹ Jesusiž cruzquiz ch'awcta yokquin muntinaca želatča. Nii muntinac yokquiz tsjii ew sepulturu želatča, ana jec ticzimi tjatžtatača nii ew sepulturquiz.

⁴² Judionacž jeejz tjuñimi pascua pjiizta tjuñimi wajillatača. Pero nii ew sepulturuqui žcatillatača. Jalla nižtiquiztan nii sepulturquin Jesusiž curpu tjatchiča.

20

JESUSAQUI JACATATCHICHA

¹ Semana kalltiznan nii tuming wenz chawjc kjantati María Magdalena sepulturquin ojkchinča. Nekztan cherchinča sepultura pjuczta maz, cjetžtatača.

² Jalla nekztan María Magdalenqui zati pariju ojkchinča, Simón Pedružquin, nižaza nii Jesusiž pecta tjaajinta zoñžquin. (Jalla niiča tii liwru cjiirni Juan cjitaqui.) Jalla naa Mariiqui ninacžquiz paljaychinča, tuž cjican:

—Jesús Jilirž curpu sepulturquiztan chjichtača. Nižaza jakziquin chjichcu tjatžtakazlani anača zizzuca.

³ Jalla nekztanaqui Pedružtan nii tsjii pecta tjaajinta žoňžtan ulanžcu sepultura cherzñi ojkchiča.

⁴ Ninacac pucultan juntu zatatča. Nii tsjiiqui tsjan apura zajtchiča Pedružquiztan. Jalla nuž zajtžcu Pedruž tuqui sepulturquin irantichiča.

⁵ Irantižcu sepulturquiz colžcu chercherziča, nii Jesusiž curpu tejlžta pañunaca nekzikaz cherziča. Pero ana luzziča.

⁶ Niiž wiruñ Simón Pedruqui irantichizakazza. Jalla niiqui sepulturquiz luzziča. Nižaza niiqui Jesusiž curpu tejlžta pañunaca cherziča.

⁷ Jesusiž acha jeržinta pañu morokpachalla tsjii latu nonžtatača. Parti pañunacžtan anatača juntu.

⁸ Jalla nekztanaqui nii tuqui irantiñi žoñi qui sepulturquiz luzzizakazza. Jalla nii pañunaca cheržcu, criichiča, Jesusa jacatatchi, jalla nii.

⁹ Cjijrta Yooz takuqui Jesusaž ticziquiztan jacatatz puntuquiztan chiiča. Pero Jesusiž tjaajintanacaqui nii cjijrta Yooz taku imaž intintazatča.

¹⁰ Jalla nekztanaqui Pedružtan Juanžtan, jalla nii pucultanaqui kjuya quejpciča.

MARIA MAGDALENAZ QUINTU

¹¹ Maria Magdalena cjiti qui sepultur zancu želatča, kaacan. Jalla nuž kaacan sepultur kjutñi colžcu cherzinča.

¹² Nekz sepulturquiz pucultan anjilanaca chiw zquiti cutchi želatča. Jakziquiz Jesusa tjažtatažlaja, jalla nekz julzi želatča. Tsjiiqui ach kjuttantača, tsjiiqui kojch kjuttantača.

¹³ Nii anjilanacaqui naaquiz pewcziča:

—Cullacalla, ¿kjažtiquiztan am kaa? —cjican.

Naaqui tuž kjaaziča:

—Wejt Jilirž curpu chjitchiča. Jakziquin chjitztakazlani, anal zizi atuča.

¹⁴ Jalla nuž chiižcu, kjutzquichinča. Jalla nuž kjutzcu Jesusa tsijtsi cherziñča. Pero Jesusa ana pajchinča nii ratu.

¹⁵ Nekztan Jesusaqui naaquiz pewcziča, tuž cjican:

—Cullacalla, ¿kjažtiquiztan am kaa? ¿Jequim kjurya?

Mariiqui persun kuzquiz pinsichinča: “Munti yoka cwitiñi žoñiž caa”, cjican. Jalla nižtiquiztan nižquiz cjichinča:

—Señor, amqui Jesusiž curpu chjitchamžlaj niiqui, maznalla, jakziquin nii curpu cjichamta. Nekztan wejrqui niž curpu chjichasača.

¹⁶ Jesusaqui nekztan naaquiz cjichiča:

—¡María!

Mariiqui nuž chiiñi nonžcu zumpacha kjutzinča. Nekztan Jesusižquiz chiichinča:

—¡Raboni! —cjican. Nii takuqui hebreo tawkquiz “Maestro” cjiča.

¹⁷ Nekztanaqui Jesusaqui naaquiz cjichiča:

—Wejr cutzna. Wejrqui imazil Yooz Ejpžquin okuča. Jaziqui mazñi okaquiča weriž tjaajinta jilanacžquin. Tuž cjican maznaquiča: “Wejrqui Yooz Ejpžquin okača. Jalla niiqui wejt Ejpča, nižaza ančuca Ejpzakazza. Nižaza niiča wejt Yoozqui, nižaza ančuca Yoozqui”.

¹⁸ Jalla nekztanaqui María Magdalenqui Jesusiž tjaajintanacžquin mazñi ojkchinča, tuž cjican:

—Jesusa Jiliri cherchinča.

Nekztan ninacžquin Jesusiž chiitanaca mazzinča.

JESUSAQUI WILTA PARIZICHICHA

¹⁹ Tumincuqui jalla nii nooj ween niž tjaajintanacaqui tsjii kjuyquiz želatča. Kjuya zuma chawjchitača, quintra žoñinaca eksu. Jalla nuž

cjen Jesusaqui tsijsi ninacž taypiquiz parizichiča. Nekztan ninacžquiz tsaanchiča, tuž cjican:

–Ančhucqui walikaz cjee.

²⁰Jalla nuž tsaanžcu, Jesusaqui ninacžquiz tjeezicha niiž pjetta kjaranacaž, nižaza niiž chjapta ch'illa. Jalla nekztanaqui ninacaqui Jesús Jiliri cheržcu, ancha chipchi cuntintutača.

²¹Jalla nekztanaqui Jesusaqui wilta ninacžquiz tuž chiichiča:

–Walikaz cjee. Jaknužt Yooz Ejpqui wejr cuchanžquichiča, jalla nižta zakaz wejrqui ančhucaquiz cuchanžcača.

²²Jalla nuž chiican, Jesusaqui ninacž kjutñiž pjuziča, tuž cjican:

–Ančhucqui, Yooz Espiritu Santuž tanzna.

²³Jakzilta žoñž ujnaca ančhucqui pertunaquiž niiqui, Yooz Epiž pertuntaž cjequiča. Nižaza jakzilta žoñž ujnaca ančhucqui ana pertunaquiž niiqui, ana pertuntaž cjequiča.

WILTA PARIZICHICHA, TOMAS ZELAN

²⁴Nii oraqi nii tuncapan illzta žoñinacžquiztan tsjiiqui ana želatča, Tomás cjita. Niiž tsjii tjuuqui “Pacha” cjitatača. Jesusa tjonz, nii ora ana želatča.

²⁵Wiruñaqi parti tuncapan tjaajintanacaqui Tomasquiz quint'ichiča, tuž cjican:

–Jesús Jiliri wejrnac cherchinča.

Pero Tomaszi tuž cjichiča:

–Anal criyasača. Wejrqui Jesusiž clawžtan pjetta kjarami ana cheraž niiqui, nižaza nii pjetquiz ana wejt kjar loc'ana chjapznaž niiqui, nižaza niiž ch'ill pjetquiz wejt kjara ana chjapznaž niiqui, jalla nižtiquiztan anal criyasača.

²⁶Quinsakal tjuñquiztan nii tjaajintanacaqui wilta kjuyquin želatča, Tomastanpacha. Kjuy chajwcchiž cjenami, Jesusaqui ninacž taypiquiz tsijsi parizichiča. Nekztan ninacžquiz tsaanchiča, tuž cjican:

–Ančhucqui walikaz cjee.

²⁷Jalla nekztanaqui Tomasquiz paljaychiča, tuž cjican:

–Wejt kjara chertzna. Am kjar loc'ana tekz chjapzna. Nižaza am kjara zjijca, wejt ch'illquiz chjapzna. Anapan tira ana criiñi kuzziz cjee. Antiz criya, wejtquiz kuzziz cjee.

²⁸Tomasqui tuž kjaaziča:

–¡Wejt Jiliri! ¡Wejt Yooz!

²⁹Jesusaqui nekztan niižquiz cjichiča:

–Jaziqui Tomás, amqui wejr cheržcu criichamča. Ana wejr cheržcu criichinacaqui, juc'ant waliž cjequiča.

³⁰Jesusaqui niiž tjaajintanacaž cheran walja milajrunaca paachiča. Parti milajrunacakaz tii libruquiz cijirtatača.

³¹Jalla tekz cijirta milajrunacaqui wejrqui cijirchinča ančhucqui criyajo, Jesusaqui Cristuča, nižaza Yooz Majchča, jalla nii. Nižaza cijirchinča, ančhuc Cristužquin kuzziz cjisjapa, arajpachquin wiñaya kamzjapa.

21

JESUSAQUI WILTA PARIZICHICHA

¹Niiž wiruñ Jesusaqui niiž tjaajintanacžquiz wilta parizichiča, Tiberias kot atquin. Jalla tuž watchiča.

² Nekz želatča, Simón Pedružtan, “Pacha” cjita Tomastan, Caná de Galilea wajtchiz Natanaelžtan, Zebedeož majchnacžtan, nižaza tsjii pucultan iya tjaajintanacžtan. Jalla ninacauntu želatča.

³ Nekztan Simón Pedruqui cjichiča:

–Wejrqui ch'iz tani okuča.

Nii partinacaqui cjichiča:

–Wejrnacmi amtan chical okača.

Jalla nekztan kotquin ojkchiča. Nicju tsjii warcuquin luzziča. Pakara langzcanami ana čjul ch'izmi tani atchiča.

⁴ Kjanžcanalla, Jesusaqui kot atquin parizizquichiča. Nii tjaajintanacaqui ana zizatča, nii Jesusažlaj, jalla nii.

⁵ Nekztanaqui Jesusaqui ninacžquiz cjichiča:

–Jilanaca, čana čjul ch'izmi tanchinčuckaya?

Ninacaqui kjaaziča:

–Ana čjul, –cjican.

⁶ Nekztanaqui Jesusaqui ninacžquiz cjichiča:

–Nii warcuž žew latuquiz ch'iz tanz tjojtzna. Jalla nekz ch'iznaca tanznaquiča.

Jalla nuž tjojtziquiztan wacchi ch'iznaca tanziča. Wacchi ch'iznaca tanchiž cjen, wirataž ana warcuquin joozua.

⁷ Nii Jesusaž ancha k'aachita žoñiqui Pedružquiz cjichiča:

–Niiča Jesús Jiliriqui.

Nuž čiitiquiztan nii orapachalla Pedruqui niž chjojka zquti cutžcu, kot kjazquin luzziča, kjazuntuñ narcán Jesusižquin ojkzjapa. Warcuquiz langzcan, ana zquitchiztača, calzunsillo alaja.

⁸ Parti tjaajintanacaqui warcuquiz ojkchiča ch'iz tanzquiz ch'iznaca joočan. Nii ch'iz tanzqui ch'iznacžtan chjiippachatača. Nii joočan kot atquin macjatžquichiča. Ninacaqui kot atquiztan patac metruž jalla nužquinkaztača.

⁹ Nekztanaqui kot atquin irantižcu, warcuquiztan ulanchiča. Nižaza uj paraza cherchiča, ch'iz tjucta. Nižaza t'anta želatča.

¹⁰ Nekztanaqui Jesusaqui ninacžquiz cjichiča:

–Tsji kjaž ančucaž tanta ch'iznaca zjičca.

¹¹ Jalla nuž maytiquiztan Simón Pedruqui warcuquiz luzcu nii ch'iznaca kot atquin joožquichiča. Nii ch'iz tanzqui pajk ch'iznacžtan chjiipitača, patac pjijska tunca quinsani ch'iznacchiztača. Jalla nuž wacchi tanchiž cjenami, nii ch'iz tanzqui ana wjajriča.

¹² Jesusaqui ninacžquiz cjichiča:

–Picha. Čjeriž lujl-lay.

Ana ultimu pajžcumi anaž jecmi nii tjaajintanacžquiztan pewczni atatča, “čject amya?” cjicanaqui. Ninacaqui “Jesús Jilirižlani” nuž kuzquiz pinsichiča.

¹³ Jalla nekztanaqui Jesusaqui ninacžquin žcatžinžquichiča. T'anta tanžcu, ninacžquiz tjaachiča, nižaza ch'iz zakaz ninacžquiz tjaachiča.

¹⁴ Ticziquiztan jacatatžcu, tii čjep wiltiquiziqui Jesusaqui niž tjaajintanacžquiz parizichiča.

SIMON PEDRUŽQUIZ ČHIČIČA

¹⁵ Jalla nuž čjeri lujltiquiztan, Jesusaqui Simón Pedružquiz pewcziča, tuž cjican

–Simón, Jonás maati, čamqui tii žoñinacžquiztan wejttan juc'anti mu-nazkaya?

Pedruqui tuž kjaaziča:

—Jesalla, wejt Jiliri. Amqui zizza, wejr am pecučha, jalla nii.

Nekztan Jesusaqui nižquiz cjichiča:

—Wejt žoñinacžquiz arajpach čhjeri tjaa. Ninacača uuzanacažtakazqui.

¹⁶ Nekztan Jesusaqui Pedružquiz wilta pewcziča, tuž cjican:

—Simón, Jonás maati, ¿amqui wejttan zuma munazkaya?

Pedruqui tuž kjaaziča:

—Jesalla, wejt Jiliri. Amqui zizza, wejr am pecučha, jalla nii.

Jesusaqui nižquiz cjichiča:

—Wejt žoñinaca cwita. Ninacača uuzanacažtakazqui.

¹⁷ Nekztanaqui Jesusaqui čhjep wiltiquiziqui Pedružquiz pewcziča:

—Simón, Jonás maati, ¿amqui wejr peckaya? —cjican.

Pedruqui jalla nuž čhjep wilta pewcztiquiztan llaquita cjissiča. Jalla nekztanaqui Pedruqui tuž kjaaziča:

—Wejt Jiliri, amqui tjapa zizñampanča. Amqui zizza, wejr am pecučha, jalla nii.

Nekztan Jesusaqui nižquiz cjichiča:

—Wejt žoñinacžquiz arajpach čhjeri tjaa.

¹⁸ Ultim weraral amquiz chiyučha. Amqui tjowa cjicanaqui zquti cujtžcu jakziquinam ojkz pecčhaja, ojkñamtača. Pero chawczcuhti, amqui kjaram waaznaquiča. Yekja žoñiqui am zquti tjutznaquiča, nižaza ana amiž ojkz pecta, jalla nijchuc chjichta cjequiča.

¹⁹ Jalla nuž chiižcu, Jesusaqui mazinchiča, jaknužt Pedro ticstančhalaja, nižaza jaknužt Pedruž cjen Yoozquin honora tjaataž cječhaja, jalla nii. Nekztan nuž chiižcu, Jesusaqui Pedružquiz tuž cjichiča:

—Wejt kamañquizka kama.

TJAAJINTA K'AYI ŽOŃI

²⁰ Nekztanaqui Pedruqui wir kjutñi kjutžcu, Jesusiž tjaaajinta k'ayi žoñž kjutñi cherziča. Nii tjaaajinta k'ayi žoñiqui pascu pjijztiquiz čhjeri lulan, Jesusiž latuquiz želatča. Niiqui Jesusižquiz pewczitača, tuž cjican: “Wejt Jiliri, ¿ject am tankataquiya?”

²¹ Jalla nii tjaaajinta žoñž kjutñi cheržcu, Pedruqui Jesusižquiz pewcziča, tuž cjicha:

—Wejt Jiliri, ¿tii žoñžquiz čhjulut wataquiya?

²² Jesusaqui Pedružquiz tuž kjaaziča:

—Wejt tjonzcama tii žoñž žejtz munaž niiqui, ¿čhjulut amquiz importiya? Wejt kamañquizka kama amqui.

²³ Jalla nuž Jesusaž chiitiquiztan, tii quintu ojkchiča, nii tjaaajinta k'ayi žoñiqui ana ticznaquiča, jalla nii. Pero Jesusaqui ana nižta chiichiča, “Amqui ana ticznaquiča” cjican. Pero Jesusaqui cjichiča, “Wejt tjonzcama tii žoñž žejtz munaž niiqui, ¿čhjulut amquiz importiya?” Jalla nužkaz cjichiča.

²⁴ Wejrpachača nii tjaaajinta k'ayi žoñiqui. Wejrqui tii cartiquiz cijjrtanaca maznuča. Nižaza tii liwruquiz cijjruča. Nižaza criichi žoñinacaqui zizza, weriž mazta taku werarapanča.

²⁵ Nižaza iya juc'anti Jesusaž paatanaca žejlča. Tjapa niž paatanaca cijjrta cjesaž niiqui, nii cijjrta liwrunaca tjapa tii muntuquiz chjijsnasacha. Nižaza iya juc'anti želaquiča. Nužkazza. Amén.

LOS HECHOS DE LOS APOSTOLES

¹ Zuma Teófilo, tuqui wejrqui tsjii libro cjiŕchinča tjapa Jesucristuž puntuquiztan. Jesusiž ojklaytanacami tjaajintanacami cjiŕchinča, nasta tjuñquiztan,

² arajpacha quejpsquiz tjuñicama. Ima arajpacha quejpžcan Jesusižtan Espiritu Santužtan apostolonacžquin mantichiča, jaknužt kamz waquizičhaja, jalla nii.

³ Jesusaqui ticziquiztan jacatatžcu tii yokquiz iya pusi tunc tjuñi žejlchiča niž apostolonacžquiz persuna tjon tjonzjapa. Tjon tjonžcan, kjanapacha tjeeziča, “Jacatatchinča”, cjican. Nižaza jaknužt Yooz mantuquiz kamz waquizičhaja, jalla nii tjaajinchiča.

⁴ Tsjii nooj niž apostolonacžtan juntjapžcu, Jesusaqui ninacžquiz chiižinchiča, tuž cjican:

—Anača tii Jerusalén wajtquiztan ulnaquiča. Tekziča tjewznaquiča ančhucqui, wejt Yooz Epiž chiita taku cumpliscama. Niiqui Espiritu Santo cuchanžcaquiča; jalla niicamaž tjewznaquiča. Tuquitan wejrqui anchucaquiz nii puntu paljaychinpantača.

⁵ Juan Bautistaqui kjaztan bautissipanča. Anziqui tsjii kjaž majquiztan ančhucqui Espiritu Santužtan bautistaž cjequiča. —Nuž cjichiča Jesusaqui.

JESUCRISTUQUI ARAJPACHQUIN QUEJPCHICHA

⁶ Apostolonacaqui Jesusižtan juntjapsi cjen, pewcziča, tuž cjican:

—Wejt Jiliri, ¿anzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejppankazza timpunacaqui mantiñiqui, čhjulatorat tii tii watačhaja, jalla nii. Nižaza Yoozqui ančhucaquiz ana zizkatz munča, čhjulatorat tii Israel žoñinaca liwriita cječhaja, jalla nii.

⁸ Pero Espiritu Santuž ančhuca kuzquiz luztan, ančhucqui tjup kuzziz cjequiča. Jalla nekztan ančhucqui wejt puntuquiztan paljayñi ojklayaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytissiča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenchiča.

¹⁰ Nekztanaqui tsewcchuc cheksnan, pucultan chiw zquitchiz žoñinacažtakaz jeczquichiča ninacž žcati.

¹¹ Nii pucultan anjilanacaqui tuž cjichiča:

—Galilea žoñinaca, ¿kjažtiquiztan ančhucqui tsewcchuc chekžqui? Jesusaqui ančhucaquiztan arajpacha chjichtača. Pero tsjii nooj nii Jesusapacha wilta tii muntuquiz quejpžcaquiča, jaknužt tsjir taypiquiz katčhaja, jalla nuž tsjir taypiquizžakaz jeczcaquiča. Nuž tjonaquiča. —Nuž cjichiča anjilanacaqui.

MATIASQUI ILLZTA APOSTOL CJISSICHA

¹² Jalla nekztanaqui apostolonacaqui Olivos cjita curullquiztan chjiwžquiču, Jerusalén watja quejpchiča. Jerusalén watjaqui nii curullquiztan žcatitača, jeejz tjuñquiz jaknužt judiuž lii jaru ojkz waquizičhaja, jalla nužullquin ojkztača.

¹³ Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača. Nii apostolonacaqui tinacatača: Pedrotiča, Jacobotiča, Juantača, Andrestiča, Felipitāča, Tomastāča, Bartolomitāča, Mateotāča, Jacobo cjita Alfož majčtāča, Simonatāča (niiqui cananista cjita partir žoñitāča), nižaza Judas cjita Jacobož majčtāča. Jalla ninacatača apostolonacaqui.

¹⁴ Tjapa ninacaqui tsjii kuzziz Yoozquin mayizizjapa ajcajczñipantāča. Ninacžtan chica želatāča Jesusiž lajknacžtan, Jesusiž maatan, nižaza yekja maatakanacžtan. Tjappacha Yoozquin mayizican želatāča.

¹⁵ Tsjii nooiqui jalla nuž chicapacha želan Pedruqui tsijtsiča, nii Yoozquin criichi žoñinacž taypiquiz. Nii oraqui tsjii patac paatuncani nužquintakalča nii criichi žoñinacaqui. Pedruqui ninacžquiz cjichiča:

¹⁶ –Jilanaca, cullaquinaca, Judasqui Jesusa tanñi žoñinaca irpichiča. Tuquitan jalla nii Judas puntuquiztan Espiritu Santuqui Davidžquiz maz-inchiča, Yooz tawk liwruquiz cjiirta cjisjapa. Nižaza nii Espiritu Santuž mazintaqui cumplispantāča. Jaziqui cumplissiča.

¹⁷ Judasqui učum partiquiztantāča. Nižaza Yoozta langzñiquiz uch-tatača.

¹⁸ Nii anawali paañi Judasqui Jesusa tarasunta paažtan tsjii yoka kjay-chiča. Nekžtan, kozzuc achchiz tjojtscu, walu pjatsi ticziča.

¹⁹ Tjapa Jerusalén wajtchiz žoñinacaqui nii Judas quintu zizza. Jalla nii quintu nonžcu, Judas kjayta yoka tjuuskatchiča, Acéldama cjican. Acéldama tjuuqui ninacž tawkquiztan “Ljoc Yoka” cjiča.

²⁰ Judas puntuquiztan Salmos cjita liwruquiz tuž cjiirtača: “Niiž kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cjiirtača: “Niiž puestuquiz yekja uchta j cila”.

²¹ Pedruqui tira chiichiča, tuž cjican:

–Jalla nii Yooz takuž cjen učumnacquiztan tsjiiqui illza, Judas puesto tanzñijapa. Jaziqui nii puesto tanzñi žoñiqui tjapa wejrnacaž Jesusižtan ojklayta timpu cumpant'ichi žoñinacžquiztan illzta cjistanča.

²² Juanž bautis timpu jalla nijctanpacha Jesusa arajpacha ojkcama, jalla nii timpu cumpant'ichi žoñinacžquiztan nii žoñiqui illzta cjistanča. Nekžtan nii žoñiqui wejtnacatan chicapacha cjequiča, Jesusaž jacatatta puntu pal-jayzjapa. –Nuž cjichiča Pedruqui.

²³ Nekžtanaqui pucultan žoñi illsiča, tsjiiqui Judas puesto tanzñijapa. Tsjiiqui José cjitatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matías cjitatača.

²⁴ Nekžtan nii ajczñi žoñinacaqui mayizichiča, tuž cjican:

–Jesús Jiliri, amqui tjapa žoñinacž kuz zizza. Jaziqui tii pucultiquiztan amiž illzta apóstol tjeznalla.

²⁵ Niiqui Judas puestuquiz uchtaž cjequiča, amquin sirwiñiž ojklayzjapa. Judasqui nii puestuqui pertichiča anawali uj paažcu. Jaziqui infiernuquin ojkičiča. Jalla nuž niižtaqui waquizichiča. –Jalla nuž mayizichiča.

²⁶ Nekžtanaqui ject Jesusiž illzta, jalla nii zizjapa, zurtiassiča, nii pucultiquiztan jakziltižquiz nii zurti cayačhaja, jalla nii. Jalla nuž zurtiascu, nii zurtiqui Matiasquiz caychiča. Jalla nekžtan Matiasqui nii parti tuncaman illzta apostolonacžtan juntu cjissiča. Lijitum apóstol nužquiz cjissiča.

2

YOOZ ESPIRITU SANTUQUI TJONCHA

¹ Pentecostés cjita pijsta tjuñquiz tjapa Jerusalén žejlñi criichi žoñinacaqui juntassiča tsjii kjuyquizkaz.

² Tiripintit tsewtan tsjii chawc tjamž joražtakaz nonziča. Tjapa nii kjuya zmali kjaazkatchičha.

³ Jalla nekztanaqui uj lastakaz jeczquichiča zapa mayni ninacz juntuñcama t'akžta, yekja yekja. Jalla nuž zapa maynižquiz nii ujnacaqui želatča.

⁴ Jalla nuž tjonžcu Espiritu Santuqui tjapa ninaczquiz luzziča. Nekztan ninacaqui parijunaca yekja yekja taku chiichičiča, jaknužt nii Espiritu Santuž chiikatčaja, jalla nii.

⁵ Nii timpunacaqui Jerusalén wajtquin wacchi judío žoñinaca kamñi želatča, ninacz cuzturumpi jarupan paañi. Nii judío žoñinacaqui tjapa kjuttan ajczquichitača.

⁶ Jalla nii suyniñi jora nonžcu, žoñinacaqui juntassiča. Zapa mayni nii žoñinacaqui persun taku nonziča. Nekztan ana tantiichuca, čjulut watačhaja, nii.

⁷ Jalla nižtiquiztan ninaca ancha kuz turwaysi cjissiča. Ispantichi ninac-pora parlassičha, tuž cjican:

—¿Tjapa nižta chiichiñinacaqui anaj Galilea wajtchiz žoñinacajo?

⁸ Zapa mayni učum persun takuž nonža. ¿Jaknužupan teejo? —Jalla nuž cjichiča.

⁹ Nekz želatča Partia žoñinaca, nižaza Media žoñinaca, nižaza Elam žoñinaca, nižaza Mesopotamia žoñinaca, nižaza Judea žoñinaca, nižaza Capadocia žoñinaca, nižaza Ponto žoñinaca, nižaza Asia yokchiz žoñinaca,

¹⁰ nižaza Frigia žoñinaca, nižaza Panfilia žoñinaca, nižaza Egipto žoñinaca, nižaza Africa žoñinaca, nii Afric yokaqui Cirene yokž nawjktuñtan. Nižaza Roma wajtquiztan tjonñi žoñinaca želatča. Yekjapanacaqui judío maa ejpchiz žoñinacatača. Yekjapanacaqui ana judío maa ejpchiz cjenami judionacz cuzturumpi paañi žoñinacapantača.

¹¹ Nižaza želatča Creta wajtchiz žoñinaca, nižaza Arabia žoñinaca. Nii žoñinacaqui parlassičha, tuž cjican:

—Wacchi watjanacchiz žoñinacala učumtanaqui. Pero zapa mayni učum persun takunacaz nonžla. ¡Nii tjapa takunacžtan chiiñinacaqui Yooziž ispan-tichuca paatanaca quint'ila!

¹² Jalla nuž chiichiiñi nonžcu tjappacha ispantichiča. Kuz turwaysi cjissiča. Nekztan pewcsassiča, tuž cjican:

—Nii puntuquiztanac, ¿kjažt cjeejo?

¹³ Yekjapanacaqui iñarchičha, tuž cjican:

—Aaaa, ninacaqui licchikazza.

PEDRUQUI ŽOÑINACŽQUIZ PALJAYCHICHA

¹⁴ Nekzpacha tsijtsi želatča nii tuncapan illzta apostolonaca. Jaziqui Pedruqui altu joržtan paljaychiča, tuž cjican:

—Judea yokquiz kamñi žoñinaca, nižaza Jerusalén wajtquiz žejlñi žoñinaca, wejt taku zumpacaz nonžna. Čjuluzlaja, jalla niil kjanzt'ača.

¹⁵ Ančhucqui “Tii žoñinaca licchikaz” cjican pinsičha. Pero tii žoñinacaqui anača licchi. Anzic wenzlakača.

¹⁶ Anziqui Joelž cjijrta Yooz taku cumplissa. Nii Joelqui Yooz cuntiquiztan mazinčiča, tuž cjican:

¹⁷ “Yoozqui tuž cjiča, Tii timpu tucuzinžtan wejrqui tii muntuquiz žejlñi žoñinaczquiz wejt Espiritul tjača. Wejt Espiritu Santuž kuzquiz luzziz cjen, ančhuca maatinacaqui lucmajch cjiñi tjunmata cjiñi wejt

takuž parlaquiča. Nižaza Espíritu Santuž cjen tjotjowaqui visionanaca cheraquiča. Nižaza chawc chawcwanacaqui wiyquin chjuuznaquiča.

¹⁸ Jalla nii timpuquiz wejt sirwiñinacžquiz luctaka cjiñi maataka cjiñi wejt Espíritu cuchanžcača. Nii Espírituž cjen, ninacaqui wejt takuž parlaquiča.

¹⁹ Tsewc arajpachquinami tii yokquizimi wejrqui ispantichuca siñalanaca tjeeznača, ljocnaca, ujnaca, tsokchi tsjirinaca, uj žketižtakaz, jalla nuž.

²⁰ Ima Jesucristo Jiliriž tjonan, tjuñiqui zumchi cjisnaquiča. Nižaza jiizmi ljocžtakaz cjisnaquiča. Jalla nižtanaca watan, wajillaž Yooz chawc tjuñiqui tjonaquiča, Yooz wali azi tjeezñi tjuñi.

²¹ Nii timpuquiziqui jakziltat liwriita cjisjapa Yooz Jiliržquin mayizičhaja, jalla niiqui liwriitaž cjequiča”.

Jalla nuž cjiirchiča Joelqui.

²² 'Israel wajtchiz žoñinaca, wejt taku nonžna. Jesusaqui Nazaret wajtchiz žoñitača. Ančuca watjanacquiz ojklaycan Jesusaqui Yooz aztan ispantichucanacami, milajrunacami, siñalanacami, jalla ninaca tjeeziča. Nii tjeežta obranaca ančhucqui zizza. Jalla nii obranacaqui kjanapacha tjeeziča, Jesusaqui Yooz Epiž cuchanžquita žoñipankazza, jalla nii.

²³ Jalla nuž pajk obranaca paachiž cjenami ančhucqui Jesusa conkatchinčhucča. Nekztanaqui ančhucqui uj paañi žoñinacžquiz Jesusa intirjichinčhucča cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatča. Nižaza niž muntacama tii watzjapa mantichiča.

²⁴ Ančhucqui Jesusa conkatchinčhucča. Yooz Ejpzi Jesusa jacatatskatchiča. Anawal ticzquiztan liwriichiča. Nii ticzqui Jesusižquiztanaqui anapantača atipchuca.

²⁵ Tuqui ažk watanaca David cjita jiliriqi Jesusiž puntu cjiirchiča tuž cjican:

“Yooz Jiliri wejttan chica željñipanča. Jalla nuž wejt kuzquiz Yoozquin zint'iñpanča. Yoozqui wejt žew latuquiz žejlča, wejr yanapzjapa, nižaza wejr ana čhjulquiztanami eksnajo.

²⁶ Jalla nižtiquiztan wejt kuzqui wali cuntintutča. Chipchipcan wejt tawkžtan Yoozquin honorat tjaa-uča. Ticz cjenami, Yoozquin kuzziztča, Yooz Ejpqui wejr jacatatskataquiča.

²⁷ Yooz Tata, amqui ticzi žoñinacžtan wejt alma anam ecaquiča. Wejrqui am lijitum sirwiñi žoñtqui. Jaziqi wejt curpuqui anam ecaquiča sipulturquiz mokajo.

²⁸ Nižaza wejtquiz arajpach kamaña tjaajinchamča. Tii muntuquiz amtan chica kamcan ancha cuntintul cjeeča”.

Jalla nuž Jesusiž puntuquiztan cjiirchiča Davidqui.

²⁹ 'Jilanaca, učum David cjita tuquita atchi ejpž puntuquiztan kjanapacha intintiskats pecuča. David jiliriqi ticziča. Nižaza tjattatača. Anzcama niž sipulturuqui učum yokquiz žejlča.

³⁰ Davidqui illztatača Yooz taku chiiñijapa. Yooz Ejpqui nižquiz juramintužtan compromitkalča tuž cjican: “David, tsjiiqui am majchmaatquiztan (Cristo cjita) pajk jiliri cjequiča. Niiqui mantiz puestuquiz uchtaž cjequiča, tii wajtchiz žoñinaca mantizjapa.” Jalla nuž Yoozqui Davidžquiz compromitchiča.

³¹ Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjican: “Cristuž almaqui ticzi žoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča.

³² Jaziqui Yooz Ejpqui nii Jesucristo jacatatskatchiĉha. Jacatattan, wejrnac-pachaĉha Jesucristo cherchintqui. Jaziqui tisticu cjican, nii puntu weraral chiyasaĉha.

³³ Jesucristuqui jacatatĉcu, Yooz Ejpĉ žew latuquiz walja honorchiz cjis-siĉha, Yooz Ejpĉtan chica mantiĉni. Niĉaza Yooz Epiĉ tuquita chiita tawk jaru Jesucristuqui Espiritu Santo žoĉinacĉquiz cuchanĉquichiĉha arajpachquiz-tan. Nii Espiritu Santuĉ tjonchiĉ cjen tii anĉhucaĉ chertanacami nonz-tanacami watchiĉha.

³⁴ Davidqui persun puntuquiztan ana chiichiĉha. Davidĉha tsewc araj-pachquin ana ojkchiqui, Yooztan mantizjapa. Davidpachaĉha tuĉ cjichiqui: “Wejt Yooz Ejp Jiliriqui wejt Yooz Majch Jilirĉquiz chiichiĉha: ‘Honorchiz cjisjapa, wejt žew latuquiz julzna wejttan chica mantizjapa.

³⁵ Tsĉii noojiqui am quintra žoĉinaca k'ala atipĉtaĉ cjequiĉha. Am kjojch koztan tjecĉtaĉtakaz cjequiĉha. Jalla nii oracama wejt žew latuquiz julzna’

³⁶ ‘Anĉhucqui Jesucristo cruzquiz ch'awcchinĉhucĉha. Pero anziĉqui Yooz Ejpqui tii Jesusa tsjan chawc jiliri utchiĉha žoĉinaca liwriizjapa. Jalla nuĉ intintiĉni waquizila tjapa Israel wajtchiz žoĉinacaqui. Ultim weraraĉha tii takuqui. –Nuĉ cjican Pedruqui paljaychiĉha.

³⁷ Jalla nuĉ nonĉcu nii žoĉinacaqui persun kuzquiz ancha zint'ichiĉha. Jalla niĉtiquiztan Pedruĉquizimi parti apostolonacĉquizimi pewcziĉha, tuĉ cjican:

–Jilanaca, ĉkjaĉt cjisnaqui? ĉĉhjulut wejrnac paaqui?

³⁸ Nekztanaqui Pedruqui kjaaziĉha, tuĉ cjican:

–Anĉhucqui persun uj pajĉcu, kuz campiya. Nekztanaqui Jesucristuĉ tju-quiz bautistaĉ cjee. Jalla nekztanaqui anĉhuca ujnaca pertuntaĉ cjequiĉha. Niĉaza Yooz Espiritu Santuqui anĉhuca kuzquiz nuĉkaz luzaquiĉha.

³⁹ Nii compromitta Espiritu Santuqui tjaataĉ cjequiĉha anĉhucaquizimi anĉhuca maatinacĉquizimi, aĉkquin wajtchiz žoĉinacĉquizimi, niĉaza tjapa uĉhum Yooz Jiliriĉ kjawĉta žoĉinacĉquizimi. Jalla ninacĉquizimi Yooz Espiritu Santo tjaataĉ cjequiĉha. –Jalla nuĉ kjaaziĉha Pedruqui.

⁴⁰ Wacchi takunacĉtan Pedruqui ninacĉquiz chiiĉinchiĉha, tuĉ cjican:

–Liwriita cjis waquiziĉha, Cristuĉ quintra uj paaĉni žoĉinacĉtan ana casticta cjisjapa.

⁴¹ Jalla nekztanaqui walja žoĉinacaqui Pedruĉ chiita taku tjapa kuztan catokchiĉha. Jalla nuĉ catoktiquiztan tjapa ninaca bautistaĉ cjissiĉha. Nii noojiqui tsĉii ĉhjep warank žoĉinacaqui yapĉquichiĉha parti Yoozquin criichi žoĉinacĉquin. Jalla nuĉ mirchiĉha.

⁴² Tjapa nii criichi žoĉinacaqui apostonacaĉ tjaajintanacĉquiz walja tjapa kuztaĉha. Ninacaqui tsĉii kuzzizpan cjissiĉha. Chica juntasĉitaĉha Yoozquin mayizizjapa, niĉaza ĉhjeri lujlzjapa.

CRIICHI ŽOĉINACĉ KAMTA

⁴³ Apostolonacaqui walja milajrunacami siĉalanacami paachiĉha. Jalla nuĉ paatiquiztan tjapa žoĉinacaqui ispantichiĉha.

⁴⁴ Tjapa Yoozquin criichinacaquiuntu kamchiĉha. Niĉaza tjapa ninacĉ cusasami tsĉiiquiz juntjapĉitaĉha, zapa mayniĉquiz tojunzjapa.

⁴⁵ Parti cusasa tuyĉcu, nii paaz tojunĉitaĉha, ana želinchiz žoĉinacĉquiz.

⁴⁶ Zapuru timpluquiz ajcĉĉnipantaĉha Yoozquin sirwizjapa. Niĉaza criichi žoĉinacĉ kjuyquiztan kjuya okatĉha,untu ĉhjeri lujlzjapa. Humilde kuzziz zuma cuntintu lujlĉnipantaĉha.

⁴⁷ Nižaza Yoozquin honora tjaañipantača. Jalla nuž nii criichinacaž zuma kamtiquiztan parti žoñinacaqui ninaca zuma rispitiñitača. Zapuru žoñinacaqui criichiča, liwriita cjisjapa. Nekztan parti criichi žoñinaczquiz juntassiča. Jaziqui Jesucristo Jiliriqui criichi žoñinaca mirkatchiča.

3

ZUCH ZOŇI CHJETINTA

¹ Tsjii noojiqui majñakak ora, Pedružtan Juanžtan pucultan timplu kjutñi yawchiča. Nii oraqui Yoozquin mayiziz oratača.

² Nicju tsjii zuch žoñi želatča. Zucha nassipantača. Zapuru timpluquin chjitztatača. Hermosa cjita timplu zanquiz žejlñitača, timplu luzñi žoñinaczquiztan paaz tomangzjapa.

³ Nii zuch žoñiqui Pedružtan Juanžtan timplu luzñi cheržcu, paaz tomangziča.

⁴ Nekztanaqui Pedružtan Juanžtan nii zuch žoñž kjutñi cherziča. Nekztanaqui Pedruqui cjichiča:

–Wejtnaca kjutñi cheržca.

⁵ Jalla nuž chiitiquiztan nii zuch žoñiqui “Paaz onaá” cjican cherziča.

⁶ Pedruqui cjichiča nekztanaqui:

–Anaž wejta paaz žejlča. Antis wejta Jesucristuž azi žejlča, jalla nižtan yanapasača. Jesucristo cjita Nazaret wajtchiz žoñž aztan amquiz cjiwča, tsijsna. Oka.

⁷ Nižaza Pedruqui nii zuch žoñž žew kjarcu tanžcu, tsijskatchiča. Nii tsijskatan nii orapacha niž kjojchanacaqui tsijsni cjissiča.

⁸ Jalla nekztanaqui nii zuch žoñiqui layžcu tsijsiča, nižaza ojklayni cjissiča. Nekztanaqui Pedružtan Juanžtan chica timplu luzziča, ojkan, laylaycan, nižaza Yooz tjuu alawazcan.

⁹ Tjapa timpluquiz žejlñi žoñinacaqui nii zuch žoñi ojklayni cherchiča, nižaza Yooz tjuu alawazni nonziča.

¹⁰ Nekž žejlñi žoñinacaqui nii žoñi pajchiča. Nii žoñipacha zapuru Hermosa cjita timplu zanquiz žejlñitača, paaz tomtomangžcan. Nii čhjetinta žoñi cheržcu ispantichi cjissiča.

PEDRUZ PALJAYTA

¹¹ Nii čhjetinta žoñiqui Pedružquiztan Juanžquiztan anaž eclawk cjetča. Ninaca Portal de Salomón cjita timplu kjuyquiz želatča. Jalla nijcchuc tjapa nii timpluquiz žejlñi žoñinacaqui zati pariju juntassiča. Ispantichiča.

¹² Nekztanaqui Pedruqui nii juntasquiñi žoñinaca cheržcu, ninaczquiz paljaychiča, tuž cjican:

–Israel wajtquiz žoñinaca, ¿kjažtiquiztan ančhucqui ispantiya? ¿Kjažtiquiztan ančhucqui wejrnaca chekžjo? Wejrnacpacha anača tii žoñi čhjetinchintqui. Anal wejtnaca aztan ojklayskati atchinča. Nižaza wejrnacaž persuna zuma kamtiquiztan anal tii žoñi čhjetinchinča.

¹³ Antiz Yoozkaz tii žoñi čhjetinchi. Nii Yoozqui učhum tuquita ejpnacž Yoozza, Abraham, Isaac, Jacobo, ninacž Yoozza. Jalla nii Yoozpacha niž Majch Jesusižquiz pajk honorchiz cjiskatchiča. Nii Jesusaž cjen, tii žoñic žejtchiča. Ančhuczti jilirinaczquiz nii Jesusa intirjichinčhucča. Nekztanaqui Pilatuž cutz tantiižtan, ančhucqui ana cutskatz pecchinčhucča. “Tiiqui anapanča Yooziž cuchanzquitaqui” cjican chiichinčhucča.

¹⁴ Jesusaqui ana čhjul ujchizza. Yooz Ejpž kuzcama kamniča. Nii Jesusa cuts cjenpacha, ančhucqui tsjii pajk ujchiz žoñi cutskatz pecchinčhucča.

¹⁵ Jalla nuž nii žeti tjaañi Jesucristo conchinčucčha ančhucqui. Yooz Ejpzti Jesusa ticztiquiztan jacatatskatchičha. Jalla nii puntuquiztanaqui wejrnacpachača cherchintqui. Jaziqui nii puntu zuma werara chiyasača.

¹⁶ Tii Jesucristučha azzizqui. Jesucristužquiz tjapa kuztan cjican, wejrnacqui Jesucristuž aztan tii ančhucaž pajta žoñi čhjetinčinča. Jesucristužquin tjapa kuzziz cjen tii žoñiqui zumpacha žejtchiča. Jalla nuž ančhucqui tjappachaž cheržcu, nayaquiča.

¹⁷ Jaziqui jilanaca, ančhucmi ančhuca jilirinacami Jesusa conchinčucčha. Jalla nii ora ančhucqui čhjulut paatčhaja anaž zizatča.

¹⁸ Jalla nuž cjenami Yoozqui niž persun taku cumpliskatchičha. Tuquiqui Yoozqui tjapa niž taku chiiñi profetanacžquiz chiikatchičha, tuž cjican, “Yooz cuchanžquita Cristuqui sufristanča”. Nii takuqui cumplissiča.

¹⁹ Jaziqui ančhucqui Yoozquin kuzziz cjee, persun uj pajžcu. Yoozquin quejpžca, ančhuca ujnaca pertunta cjisjapa. Jalla nekztanaqui Yooz Jiliri qui ančhuca kuznaca cuntintu cjiskataquiča.

²⁰ Nižaza Yooz Jiliri qui wilta cuchanžcaquiča Jesucristo ančhucalta uchta liwriiñiqui.

²¹ Ima Jesucristuž wilta tjonan Yooz Ejpqui tjappacha azquichaquiča, jaknužt tuquita zuma kuzziz Yooz taku chiiñi žoñinacaž mazinčhaja, jalla niicama cumpliskataquiča. Jalla nii cumplis oracama Jesucristužlaqui tsewc arajpachquin kamspanča.

²² Moisesqui učhum tuquita ejpnacžquiz cjichiča: “Yooz Jiliri qui ančhucaquiz tsjii Yooz taku chiiñi profeta cuchanžcaquiča. Nii žoñiqui ančhuca wajtchiz žoñinacžquiztanpacha ulnaquiča. Jaknužt Yooz Ejpqui wejr cuchanžquitčhaja, jalla nužuzakaz tsjii cuchanžcaquiča. Ančhucqui nii Yooz Epiž cuchanžquita žoñž taku tjapa kuztan nonžna, čhjulut chiyachaja, jalla nii.

²³ Jakziltat ana niž taku nonznawk cječhaj niiqui, Israel wajtchiz žoñinacžquiztan pjaltaž cjequiča. Nižaza walja castictaž cjequiča”. Nuž cjiča Moisesqui.

²⁴ Nižaza tii timpu puntuquiztan tjapa Yooz taku chiiñi profetanacqui parlichipanča Samuelžquiztanpacha jecchuc.

²⁵ Nii profetanacž taku Yooz Ejpqui ančhucaltajapa chiikatchičha. Ančhucaltazakaz Yooz Ejpqui tsjii zuma taku tjaachiča učhum tuquita ejpnacžquiz. Jalla tuž cjican, Yoozqui Abrahamžquiz taku tjaachiča: “Am majchmaatiz cjen, tjapa tii muntuquiz žejlñi žoñinacžtajapa favora paa-ača wejrqui”.

²⁶ Yooz Ejpqui niž Majch jacatatskatžcu, ančhucaquiz primira cuchanžquichiča, favora paacan. Jazic tjapa ančhuc anawali paaznaca apatatspanča.

4

PEDRUZTAN JUANZTAN

¹ Pedružtan Juanžtan jalla nuž parlan, timplu jilirinacacqui, timplu zultatž jiliržtan saduceo parti žoñinacžtan tjonchiča.

² Pedružtan Juanžtan žoñinaca tjajnatča, tuž cjican:

—Jesusaqui ticziquiztan jacatatchičha. Jalla nuž kjanapacha tjeeža, tjapa ticzi žoñinacacqui jacatataquiča, jalla nuž. —Jalla nižta chiitiquiztan anča žawjchiča nii jilirinacacqui.

³ Jalla nekztanaqui Pedružtan Juanžtan preso chjitžtatača. Nižaza carsilquiz majctatača, jakatažcama. Nii oraqui zeziqueyatača.

⁴ Jalla nuž Pedružtan Juanžtan Yooz puntu chiichiichiz cjen, tama nonžni žoñinacaqui tjapa kuztan Yoozquin criichiča. Luctak criichi žoñinacakaz tsjii pjijska warankatača.

⁵ Jakatažuqui Jerusalén wajtquin ajczitača wajt jilirinacami, timplu jilirinacami lii tjaažiñinacami.

⁶ Nii oraqui timplu chawc jiliritača Anasqui. Niimi ajczitača, nižaza Caifastan, Juanžtan, Alejandružtan. Nižaza tjapa timplu chawc jilirinacž famillanacami ajczitača.

⁷ Jalla nuž ajcziž cjen Pedružtan Juanžtan zjičkatchiča. Nekztanaqui nii jilirinacž taypiquiz apantiskatžcu pewcziča, tuž cjican:

—Ančhucqui, ¿jakzilta jiliriž mantitaž cjen nižta ančhuc paajo?

⁸ Jalla nekztanaqui Espíritu Santuqui Pedružquiz tuž chičkatchiča:

—Israel wajtchiz jilirinaca, timplu jilirinaca,

⁹ wejrnacqui ančhucaž yujcquiz zjičtača, tsjii wali paata zumpacha zizajo. Jaknužt tii zuch žoñi žejtchižlaja, jalla nii ziz pecaquiz niiqui, niil quint'asača.

¹⁰ Wejrnacqui ančhuca yujcquiz weraral chiyača, ančhuc nii quintu zumpacha zizajo; nižaza tjapa Israel wajtchiz žoñinaca zumpacha zizajo. Jesucristuž aztan tii žoñi čhjetinta žejlča tjapa ančhuca yujcquiz tsijtchi. Ančhucqui nii Nazaret wajtchiz Jesucristo cruzquiz ch'awcchinčhucča. Nekztanaqui Yoozqui niipacha ticziquiztan jacatatskatchiča.

¹¹ Ančhucqui kjuy pirkiñinacažtakaz nii zuma maz tjojtchiča, “Ana cusa” cjican. Jalla nii tjojtta mazqui Jesusapanča. Nii tjojtta mazti ancha cusala, isquinquiz nonžta maz irata cjissiča. Yoozqui cjichiča, “Tii mazza tsjan juc'ant chekanaqui”.

¹² Jesucristupankazza Liwriñiqui. Yooz Ejpqui anaž iya jakziltami utchiča liwriñi cjisjapa. Tii muntuquiz žejlñi žoñinacžquiztan ana iya liwriñi žoñi žejlča. Jesucristupankaz učum liwriñi atasacha.

¹³ Jalla nuž Pedruqui chiichiča Juanžtan. Nii pucultanaqui ana istutiñitača, campuquin kamñi žoñikazza. Jalla nuž cjenami Pedružtan Juanžtan tjup kuzziz chiichiča, ana ekscan. Jalla nii nayžcu nii jilirinacaqui ispantichiča. Nižaza pajchipan cjissiča, nii pucultanaqui Jesusižtan chica ojklaychitača, jalla nii.

¹⁴ Nekz chica nii čhjetinta žoñimi tsijtchi želatča. Jalla nižtiquiztan ana čhjul quintrami chii atchiča.

¹⁵ Jalla nekztanaqui nii čhjepultan žoñinaca ajczquiztan ulanskatchiča. Ninacaž ulantan, nii jilirinacaqui ninacpora zmali parlassiča,

¹⁶ tuž cjican:

—¿Čhjul učum tii žoñinacžtan paaquejo? Tjapa Jerusalén žoñinacaqui tinacaž paata milajru zizkalala. Tinacaqui pajk siñala tjeeziča. Anača nicchuca učumqui.

¹⁷ Tii chiitaqui ana iya zizta cjisjapa, učumqui ninacžquiz mantiz waquiziča, ana iya Jesusiž puntu parlajo. “Nižta parlaquiz niiqui, ančhucqui casticta cjequiča” jalla nuž chiižinz waquiziča.

¹⁸ Nekztanaqui nuž parli žeržcu, nii jilirinacaqui Pedružtan Juanžtan kjawziča. Nekztan tuž chiižinčiča:

—Jaziqui ančhucqui anaž iya parlaquiča nii Jesusiž tjuužtan. Nižaza anaž jeczquizimi tjaañnaciča Jesusiž puntuquiztan. —Jalla nuž mantichiča.

¹⁹ Jalla nuž mantitiquiztan Pedružtan Juanžtan kjaaziča, tuž cjican:

—Ančhucpacaž tantiyasa. ¿Čhjulut walikaz Yooz yujcquiziya? ¿Ančhucaž mantita caz wali cjesaya? už ¿Yooz mantita caz wali cjesaja?

²⁰ Wejrnacqui anal weriž chertanacami nonžtanacami parlis jaytasača. Jalla nuž parlispanča wejrnacqui.

²¹ Jalla nekztanaqui nii jilirinacaqui Pedružquiz Juanžquiz zuma ch'aanchičha. Pero nižtami ninacaqui cutztatača. Jalla nužquiz nii jilirinacaqui ana castiqui atchiča. Parti žoñinacami Yoozquin alawazziča, nižaza Yoozquin honora tjaachiča jalla nii milajru paatiquiztan.

²² Nii čhjetinta žoñiqui pusi tunc wata jilchiztača.

CRIICHI ŽOÑINACAQUI MAYIZICHICHA

²³ Nekztanaqui Pedružtan Juanžtan carsilquiztan cutztiquiztan niž maz-inacžquin ojkchiča. Tjapa ninacž ojklaytanaca quint'ichiča, jaknužt nii timplu jilirinacami wajt jilirinacami chiitčhaja, jalla nii liwj quint'ichiča.

²⁴ Jalla nuž quint'itiquiztan, tjapa ninacaqui tsjii kuzziz Yoozquin mayizichiča, tuž cjican:

—Yooz Jiliri, tjapa mantiñi Jiliri. Amqui arajpachami yokami, kot kjazmi, nižaza tjappacha paachamča.

²⁵ Amtan Espíritu Santužtan am David cjita sirwiñi tuž chiikatchamča: “¿Kjažtiquiztan Yooz quintra žawjchi chiichii nacionanacchiz žoñinacaqui?

¿Kjažtiquiztan tii muntu žoñinaca ana zuma tantii?

²⁶ Nižaza tii muntuquiz chawc jilirinacaqui Yooz quintra tsijsa, nižaza chawc jilirinacaqui Yooz Jilirž quintra nižaza niž uhta Jesucristuž quintra parlizjapa juntassa”.

Nuž cjican cjiirchiča Davidqui.

²⁷ Jalla tižta werarača. Herodestan, Poncio Pilatužtan, Israel wajtchiz žoñinacžtan, yekja wajtchiz žoñinacžtan, jalla tjapa ninacaqui tii wajtquin juntassiča wali zuma Jesusiž quintra paazjapa. Pero am Majch utchamča, tsjan chawc jiliri cjisjapa.

²⁸ Jalla nuž juntascu ninacaqui am kuzquiz pinsitacama cumplissiča. Nužquiz cjissiča. Amiž tuquitan pinsita jaru, jalla nužpacha watchičha.

²⁹ Anziqui, Yooz Jiliri, wejtnaca quintra ch'aanita taku am zizza. Jaziqui wejtnacaquiz, amiž mantita ojkñi žoñinacžquiz, zuma tjup kuz tjaažcalla, ana ekscan am taku parlajo.

³⁰ Nižaza am azi tjaažcalla, laa žoñinaca čhjetinzjapa, nižaza zuma obranacami, nižaza siñalanacami, nižaza milajrunacami paazjapa, am zuma Majch aztan. —Jalla nuž chiican Yoozquin mayizichiča.

³¹ Jalla nekztanaqui Yoozquin mayiziz žeržtan jakziquin ajczitažlaja, jalla nii kjuya čhekjinchiča. Nižaza tjapa ninacaqui Espíritu Santuž azi tanzičha ninacž kuzquiz. Jalla nižtiquiztan walja tjurt'iñi kuzziz Yooz taku parličičha.

CRIICHI ŽOÑINACŽ KAMTA

³² Tjapa nii wacchi criichinacaqui tsjii kuzziztača. Nižaza ninacž pinsamintuqui tsjiipanikaztača. Jakzilta žoñit cusasanacchiz želatčhaja, nii žoñinacaqui ana cusasquiztan chiiñitača, “Wejt cusasaž tiic” cjicanaqui. Antis tjapa ninacž cusasanacaqui tsjiiztakaz želatča, tjapa criichi žoñinacžtajapa.

³³ Nii Jesusiž illzta apostolonacaqui Jesús Jiliriz jacatatz puntuquiztan tirapan paljayñitača, zuma atipñi tawkžtan. Zuma wali azziz tawkžtan atipñipantača. Nižaza Yoozqui ninaca walja yanapchiča.

³⁴ Ninacžquiztan anaž tsjii t'akjir žoñi želatča. Jakzilta criichi žoñižlaja yokchizimi kjuychizimi, jalla ninacaqui nii tuyžcu paaz zjičñipanikazza.

³⁵ Nii paaz zjičžcu apostolonacžquin intirjiñipanikaztača. Nižaza ninacaqui nii paazqui chicata tojžñitača ana želinchiz žoñinacžquiz.

³⁶ Nižaza tsjii José cjita levita t'akquiztan žoñi želatča, Chipre cjita isla yokchiz žoñi. Nii José cjita criichi žoñiqui yekja tjuuchizzakaztača Bernabé cjita. Jalla nuž tjuuskatchičha apostolonacaqui. Nii Bernabé tjuuqui tuž cjiča, “Zuma Kuzñi”, jalla nii.

³⁷ Nii Bernabé cjita žoñiqui tsjii yokchiztača. Nekztanaqui nii yoka tuychiča. Nii yoka tuyžcu, paaz zjicchiča. Nekztanaqui apostolonacžquin nii paaz intirjichiča.

5

ANANIAS, NIZAZA SAFIRA UJ PAACHICHA

¹ Yekja žoñi želatča, Ananías cjita. Safira cjiti tjunchiztača. Ninacaqui persun yoka tuychizakazza.

² Nii yok tuyta paazqui t'ecžcu, persunaltajapa parti čhjojchiča. Partillakaz chjitchičha apostolonacžquin, jalla nužuñ yoka tuychižtakaz. Niiž tjunqui nii t'ecžta paaz zizatča.

³ Jalla nekztanaqui Pedruqui cjichiča:

–Ananías, ¿kjažtiquiztan am kuzquiz Satanás luzzita? ¿Espíritu Santužquiz tižta k'otsjapaqui? Nii yok tuyta paazqui t'ecsamča.

⁴ Ima tuycan nii yokaqui amtapantakaya, ¿ana jaa? Tuyžcu, nii yoka tuyta paazqui amtazakaztaž, ¿ana jaa? ¿Kjažtiquiztan tižta ana wali pinsichamtajo? Amqui Yoozquiz k'otchamča; ana žoñžquiz k'otchamča.

⁵ Pedruž nuž chiitiquiztan, Ananiasqui ticzi tjojtsičha. Jalla nižtiquiztan nii quintu nonchi žoñinacaqui ancha eksñi cjissiča.

⁶ Jalla nuž ticstan, tsjii kjažt tjojtjowanacaqui macjatchičha, Ananías ticzi curpu murtajzjapa. Nekztan nii tjojtjowanacaqui tjati chjitchičha.

⁷ Tsjii čhjep orquiztan, Ananías tjunqui tjonchinča. Naaža lucu ticzi quintu ana zizatča.

⁸ Nekztanaqui Pedruqui naaquiz pewcziča, tuž cjican:

–Wejtquiz maznalla. ¿Ančuca yoka tuyta paaz nužullakazkaya?

Nekztanaqui naaqui kjaaziča, tuž cjican:

–Jesalla, nužullapanča.

⁹ Nekztanaqui Pedruqui naaquiz cjichiča:

–Ančhucqui Yooz Espiritu Santo incallz pecatča. ¿Kjažtiquiztan ančhucqui pucultan nuž kaasjo? Nii zancucž tjonča nii am lucu tjažžquiñinacaqui. Nižaza anziqui amzakaz chjichaquiča.

¹⁰ Nii orapacha Pedruž kjojchquiz tjojtžcu ticzinča. Nii tjojtjowanacaqui kjuya luzcu naa ticzin cherchiča. Nižaza jwezcu tjati chjitchičha naaža lucž latuquin.

¹¹ Jalla nižtiquiztan tjapa nii iclizziz žoñinacami, nižaza nii quintu nonchi žoñinacami ancha eksñi cjissiča.

MILAJRUNACA PAATA

¹² Nii tjuñinacquiz apostolonacaqui walja siñalanacami milajrunacami paañitača žoñinacž cheran. Nižaza tjapa criichinacaqui Portal de Salomón cjita kjuyquiz ajczñitača.

¹³ Ana jakzilta ana criichi žoñinacami criichinacžtan mazi pajas, ancha eksnatča. Jalla nuž cjenami žoñinacaqui walja rispitchičha criichinacžquiz.

¹⁴ Nižaza tsjan tsjan žoñinacaqui Yooz Jiliržquin kuzziz cjissiča, luctaka cjiñi maataka cjiñi. Walja žoñinacaqui Yoozquin criichiča.

¹⁵ Nižaza laa žoñinacami callquin jweztatača. Callquin tjajz zquiti chjinžcu, t'apžtatača. Nižaza camillquiz zakaz nonžtatača. Jalla nuž

nonžta žejlcan Pedruž tjonz tjewziča, tsjii kjažta čhjetinta cjeajo. Pedruž siwsallamekaj laa žoñinacz juntuñ wat jaa, cjiñitača.

¹⁶ Nižaza nii wajt vicin watjanacquiztan walja žoñinacaqui tjontjonatča Jerusalenquin. Laanacami zajraž tantanacami zjič zjičatča. Nižaza tjapa laa žoñinacaqui čhjetintatača.

PEDRUZTAN JUANZTAN CARSILQUIZ CHAWJCTA

¹⁷ Jalla nižtiguiztanaqui timplu chawc jiliri qui saduceo parti žoñinacztan anča iñizichiča.

¹⁸ Jalla nuž iñizičcu, apostolonaca preso tanchiča, carsilquiz chawjczjapa.

¹⁹ Jalla nuž carsilquiz chawjctaž cjen ween tsjii Yooz Jilirž anjilaqui tjonchiča. Nižaza carsil zan chawjcz cjetsiča. Cjetžcu, apostolonaca jwessiča tuž cjican:

²⁰ –Timpluquin oka. Jalla nicju tsijtsna. Jesucristuž kamaña puntuquiztan tjapa žoñinaczquiz paljayaquiča.

²¹ Jalla nii anjilaž chiita jaru, jakatažuqui wentanalla timplu ojkchiča. Timpluquin luzcu, tjaajni kallantichiča. Jalla nii orazakaz timplu chawc jiliri qui niž mazinacztan parliz kjuyquiz ajczyča. Tjapa Israel wajtchiz jilirinaca kjawziča. Nižaza zultatunaca mantichiča, nii chawjcta apostolonaca zjičajo.

²² Jalla nuž carsilquin irantižcu, nii cuchanta zultatunacaqui ana čhjulumi wajtchiča. Quejpžcu quint'ichiča,

²³ tuž cjican:

–Wejrnacqui carsilquin irantižcu, zuma chawjcta zalchinča. Nižaza ichni zultatunacaqui želatča carsil zawnctan. Nekztanaqui carsila cjetžcu, luzzinča. Nii kjuyltanaqui cherassinča anaž zinta pres žoñi želatča.

²⁴ Jalla nii quintu nonžcu timplu chawc jiliri mi timplu zultatž jiliri mi nižaza parti timplu jilirinacami, jalla tjappacha ninacaqui zuma kuz turwayzi cjissiča, ¿Kjažt cjequejo? cjican.

²⁵ Jalla nii orazakaz tsjii žoñi qui irantižquichiča, tuž cjican:

–Ančucaž carsilquiz chawjcta žoñinacaqui timpluquin žoñinaczquiz tjajinča. –Nuž cjican quint'ichiča.

²⁶ Nekztanaqui nii guardiñi zultatž jiliri qui ojkchiča zultatunacztan. Nekztan apostolonaca zjičchiča, ana chjojritžcu. “Chjojritžtaž cjesaž ni iqui, parti žoñinacaqui wejrnacž maztan čhjacasaka”, jalla nuž pinsichiča nii zultatunacaqui.

²⁷ Jalla nuž zjičžcu, nii parliz kjuyquin tsijtskatchiča chawc jilirinacz yujcquiz. Jalla nuž želan nii timplu chawc jiliri qui chiižinchiča, tuž cjican:

²⁸ –Wejrnacqui ančucaquiz ana iya parljaj cjichintala. Nižaza nii žoñž puntuquiztanaqui ana iya tjajnaj cjichintala. Jaziqui, ¿čhjululu paachinčuctajo? Ančucqui tjapa tii Jerusalén watja chjijpchinčucča ančuca tjajintiztan. Nižaza nii žoñi contiquiztan wejtnacaquiz uj tjojtunz pecchinčucča.

²⁹ Jalla nekztanaqui Pedružtan parti apostolonacztan kjaaziča, tuž cjican:

–Primiraqui wejrnacqui Yooz castanča. Niiž jarukaz žoñimi cazasača.

³⁰ Ančucqui cruzquiz ch'awcžcu Jesusa conchinčucča. Nekztan učhum tuquita atchi ejpž Yooz tii Jesusa jacatatskatchiča.

³¹ Jacatatskatžcu Yoozqui nii Jesusa pajk honorchiz cjiskatchiča. Niiž žew latuquiz želan, Yooz Ejpqui mantis poder tjaachiča, Jesusa tsjan chawc jiliri cjisjapa. Nižaza Jesusača Liwriñi qui, ti Israel wajtchiz žoñinaca kuz campiiskatajo, ninacz uj pertunta cjeajo.

³² Jalla tii puntunacquiztan wejrnacqui zizuča. Nižaza tisticu cjican wejrnacqui nii chiyučha Espíritu Santužtanpacha. Yoozqui nii Espíritu Santo tjaača niiž kuzcama kamñi žoñinacžquiz. —Nuž cjican cjichiča Pedruqui.

³³ Jalla nii nonžcuqui, nii jilirinacaqui apostolonacžjapa ancha žawjchiča. Conz pecatča.

³⁴ Pero nii jilirinacžquiztan tsjii Gamaliel cjita fariseo želatča. Nižaza lii tjaajiñi maestrutača niiqui. Tjapa žoñinacaqui niižquiz walja rispitiča. Jalla nii Gamaliel cjita žoñiqui tsijtsiča. Nuž tsijtsu mantichiča apostolonaca zancu jwescajo tsjii ratu.

³⁵ Nekztan parti jilirinacžquiz tuž cjichiča:

—Israel wajtchiz žoñinaca, ančhucqui tii žoñinacžquiztan cwitazaquiča. Anaž čhjulum paaz waquiziča.

³⁶ Ančhucž cjuñzna, tsjii tuquiqui Teudas cjita žoñiqui jeczquichiča. Nii žoñiqui “Wejrtča chekan žoñtqui”, tuž cjican ojklaychiča. Jalla nekztanaqui pajcpic patac žoñinacaqui nii apziča. Pero nii Teudasqui contatača. Nekztanaqui nii apzñi žoñinacaqui wichanziča. Nužquiz niiž tjaajintaqui tjatantatača.

³⁷ Niiž wiruñ censo tjuñinacžquiz tsjii Judas cjita žoñiqui jeczquichiča. Galilea wajtchiztača. Žoñinacaqui nii apzquichiča. Ultimquiziqui contazakzatača. Nekztanaqui niiž apzñinacaqui wichanzi cjissiča.

³⁸ Jalla nižtiquiztan nižta wattanaca cjuñžcu, tii žoñinacž quintra anača čhjulum pa. Ana tinacžquiz mitis waquiziča. Tii žoñinacaqui persun kuzcamakat paačhaja, nuž cjenauqui anaž tjurasacha. Orallaž kataquiča.

³⁹ Yooz kuzcamat tii žoñinacaqui paačhaja, jalla nekzi qui tinacaqui anaž tjančuca cjesača. Tinacaqui Yooz parti žoñinacžlaja, jalla nii quintra paasaž niiqui, Yooz quintraž cjesača. Jalla nižtiquiztan tii žoñinacž quintra anaj paala. —Jalla nuž cjican nii žoñinacžquin chiižinchiča Gamaliel cjita žoñiqui.

⁴⁰ Nižtiquiztanaqui tjapa jilirinacaqui naazi cjissiča. Jalla nekztanaqui kjawziča apostolonaca. Kjawžcu, ninaca wajtchiča. Nižaza chiižinchiča ana iya parlajo nii Jesusiž puntuquiztan. Nekztan ninacaqui cutztatača.

⁴¹ Jalla nuž cutztan, jilirinacž yujcquiztan ulanchiča. Yoozqui jalla nuž munchiča, Jesusiž laycu sufrichi ninacaqui, jalla nuž. Jalla nuž cjenauqui ancha cuntintutača apostolonacaqui.

⁴² Nekztanaqui zapuru Jesucristuž puntuquiztan tira tjaajnatča, nižaza tiraž paljayatča timpluquinami kjuyquinami, “Jesusaqui Yooz cuchanžquita Cristučha” cjiñitača.

6

PAKALLAK CRIICHI JILANACA ILLZTA

¹ Nii timpuquiz Yoozquin criichinacaqui waljaž yapatča. Nuž yaptiquiztan tsjii quija žejlchiča. Griego taku chiiñi judionacaqui hebreo taku chiiñi judionacž quintra quijziča, tuž cjican:

—Wejtnaca žew maatakanaca ana cusa atintitača. Zapuru čhjeri tojzquiz upa čhjeri onantača.

² Jalla nuž quijtiquiztan nii tuncapan apostolonacaqui tjapa Yoozquin criichinaca kjawziča. Nekztanaqui tjappacha juntjapžcu ninacžquiz cjichiča:

—Wejrnacqui Yooz taku parli apatatsqui anaž waquiziča, čhjerikaz atintisjapaqui.

³ Jilanaca, pakallak žoñinaca ančhucaquiztan kjurzna. Zuma kuzziz žoñi, nižaza Yooz Espiritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nekztan ninacaqui tii čhjeri atintiz puestuquin uchta cjequiča.

⁴ Wejrnaczi Yoozquin mayiziz, nižaza Yooz taku tjaažinz tiral atintača. Nii langzquiz tiral kuz tjaa-ača.

⁵ Jalla nii parlita jaru tjappacha asiptichiča. Nekztanaqui pakallak zuma žoñinaca illztatača, čhjeri atintisjapa. Primeruqui Esteban illztatača. Estebanaqui Yoozquin tjapa kuzziztača, nižaza Yooz Espiritu Santuž irpita kamñitača. Nižaza illztatača Felipižtan, Procoružtan, Nicanoržtan, Timonžtan, Parmenastan, nižaza Nicolastan. Nicolasqui Antioquía wajtchiz žoñitača. Ima Jesucristužquiz kuzziz cjican Nicolasqui judío cuzturumpichiztača, ana judío žoñi cjenami.

⁶ Jalla nuž illzcu nii pakallak žoñinaca apostolonacžquin chjichtatača. Nekztanaqui apostolonacaqui ninacžta mayizichiča, nižaza ninacž achquiz kjaržtan lanziča, nii puestuquiz cjeyajo.

⁷ Jalla nekztanaqui Yooz taku paljayta cjen, Jerusalén wajtquin criichi žoñinacaqui ančaž miratča. Nižaza wacchi judiuž timplu jilirinacami tjapa kuztan Yooz taku catokchiča.

ESTEBAN PRESO TANTA

⁸ Estebanaqui walja Yooz aztantača, nižaza Yooziž yanaptatača. Jalla nižtiquiztan walja milajrunacami siñalanacami paachiča žoñinacaž cheran.

⁹ Tsžii nooj tsžii kjaž judío cuzturumpi paañi žoñinacaqui Estebanžtan ch'aasi kallantichiča. Nii judío cuzturumpi paañi žoñinacaqui “Liwriita žoñi” cžitatača. Ninacžtan, tsžii kjažt Cirene wajtchiz žoñinacžtan, nižaza Alejandria wajtchiz žoñinacžtan, nižaza Cilicia wajtchiz žoñinacžtan, nižaza Asia yokquin kamñi žoñinacžtan, jalla nii žoñinacaqui Estebanžtan ch'aassiča.

¹⁰ Jalla nuž ch'aascan, Estebanžquiz ana atipi atchiča. Estebanqui Espiritu Santuž tjaažinta taku chiiñipantača.

¹¹ Jalla nižtiquiztan nii quintra žoñinacaqui toscar tisticunacaž taku kjay-čiča, tuž chiican k'otajo:

–Tii Estebanqui ana wali tawkžtan Moisés quintrami nižaza Yooz quintrami chiichiča. Wejrnacqui nuž chiyanacqui nonzinpanča. –Jalla nii takunacžtan tisticunacžquiz tjaažiča.

¹² Jalla nekztanaqui nii Estebanž quintra žoñinacaqui parti žoñinacžquiz walja žawjkatchiča. Žoñinacami, wajt jilirinacami, nižaza judío lii tjaažiñi maestrunacami, tjapa ninacaqui žawjchi cjissiča. Nuž žawjchi cjiscu Esteban tanchiča. Nekztanaqui Esteban tanžcu, pajk parliz kjuya chjitchiča.

¹³ Nižaza toscar tisticunaca apantižquichiča. Nii toscar tisticunacaqui tuž cjichiča:

–Tii žoñiqui tirapan tii Yooz timplu quintra chiiñiča, nižaza Yooz lii quintra chiiñiča. Nužupanž parliñiča.

¹⁴ Nižaza wejrnacqui nonzinča, “Nii Jesús cžita Nazaret wajtchiz žoñiqui tii timplu pajlznaquiča”, nuž cjican tiiqui chiiñiča. Nižaza tiiqui cžiča, “Nii Jesusaqui Moisés tjaata cuzturumpinaca campiyaquiča”. Nuž cžiča tiiqui.

¹⁵ Jalla nekztanaqui tjapa nii julzi jilirinacami Estebanž kjutñi cherziča. Nii oraqui Estebanž yujcqui anjilž yujcžtakaz cherziča.

7

ESTEBANQUI TJURT'ICHICHA

¹ Nekztanaqui timplu chawc jiliriqúi Estebanžquiz pewcziča, tuž cjican:
—¿Ultimu nužupanza amya?

² Nekztanaqui Estebanqui kjaaziča, tuž cjican:

—Wejt jilanaca, ejpnaca, jilirinaca, nonžna. Učhum zuma honorchiz Yoozqui učhum tuquíta atchi ejp Abraham cjita žoňžquiz persuna tjeeziča. Nii oraqúi Abrahamqui Mesopotamia yokquin kamñitača. Imaž Harán yokquin kami okatča.

³ Nii oraqúi Yoozqui Abrahamžquiz cjichiča: “Am yoka eca, nižaza am parintinacami eca. Jakzi yokquinam okačhaja, jalla nicju am tjaajznača”.

⁴ Jalla nižtiquiztan Abrahamqui Caldea yokquiztan ulanchiča, Harán yokquin kami ojkchiča. Nekz kaman Abrahamž ejpqui ticziča. Nekztanaqui tekzi tii učhumž kamz yokquiz Abraham tjonchiča. Yoozza nii irpichiqúi.

⁵ Jalla tekz kaman, Yoozqui ana čhjul yok irinsami tjaachiča. Abrahamžtajapa persun yoka ana želatča. Jalla nuž cjenami Yoozqui taku ecchiča, tuž cjican: “Tii yoka amtapanž cjequiča. Nižaza am ticžtanaqui tii yokaqui am maatinacaž tanznaquiča”. Jalla nuž cjican Yoozqui Abrahamžquiz taku tjaachiča. Nii oraqúi Abraham ana ocjalchiz cjenami, Yoozqui nuž chiichiča.

⁶ Nižaza Yoozqui nižžquiz cjichiča, “Wiruñaqúi am majchmaatinacaqui yekja yokquin kamaquiča, nacjuñta žoňinacažtakaz. Nekziqúi pusi patac wata kamaquiča. Jalla nii yokquin am majchmaatinacaqui yekja žoň mantakaz paaquiča. Nižaza sufrican kamaquiča”.

⁷ Nižaza Yoozqui cjichiča: “Am majchmaatinaca sufriskatchiž cjenauqui, wejrqui nii sufriskatñi žoňinaca casticača. Nekztanaqui am majchmaatinacaqui nii yokquiztan ulanžcaquiča. Ulanžcu tii yokquiz wejr sirwaquiča”.

⁸ Nižaza Yooz Ejpqui tsjii compromiso paachiča Abrahamžtan. Nii compromiso jaru Abrahamqui persun janchiquiz chimpuskatchiča. Nižaza quinsakal tjuñquiztan Isaac majch nastan, Abrahamqui nižž persun majchquiz chimpuchiča. Wiruñaqúi Isaacqui nižž majch Jacobžquiz chimpuchiča. Wiruñaqúi nižazakaz Jacobqui nižž tuncapan lucmajch maatinacžquiz chimpuchiča. Jacobž lucmajch maatinacžquiztan tjonchiča učhum tuncapan t'akanaca.

⁹ Nii Jacobž majchnacaqui učhum tuquíta atchi ejpnacatača. Ninacaqui José cjita lajkž quintra iñiziñitača. Jalla nižtiquiztan ninacž lajk tuychiča. Nekztanaqui nii tuyta lajkqui Egipto yokquin chjichtača. Pero Yooz Ejpqui Josižtan chicapachatača nii oraqúi.

¹⁰ Nekztan sufrichi želan Yoozqui José liwriichiča. Nižaza walja zizñi cjissiča. Jalla nuž cjen Faraón chawc jiliriqúi Josižtan cuntintutača. Nekztanaqui Faraonqui José utchiča, Egipto wajtchiz žoňinaca mantiñijapa, nižaza Faraonž kjuychiz žoňinaca mantiñijapa.

¹¹ Wiruñ tsjii kjaž watquiztan tsjii mach'a žejlchiča, ancha sufrichiča tjapa Egipto yokquin kamñi žoňinacami, nižaza tjapa Canaán yokquin kamñi žoňinacami. Jalla nuž cjen učhum tuquíta ejpnacaqui ana čhjululu lujlsmi nii timpunacac wachatča.

¹² Pero Jacobqui tsjii quintu nonchiča, Egipto yokquin trigo žejlchi. Nuž nonžcu nižž majchnaca cuchanchiča. Niiž majchnacaqui učhum tuquíta ejpnacatača. Jalla niitača primer ojkaqui Egipto yokquinaqui.

¹³ Nekztanaqui pizc wilta ojkžcu, Josequi nižž jilanacžquiz pajkatchiča. Jalla nižtiquiztan Egipto chawc jiliriqúi Josiž familia pajchiča.

14 Jalla nekztanaqui Josequi mantichiča niiž ejp Jacobo zjijcajo, nižaza tjapa familianacžtanpacha. Ninacaqui pakallak tunca pjijskani žoñitača.

15 Jalla nekztanaqui Jacobqui kami ojkchiča Egipto yokquin. Nekzi ticziča Jacobqui. Nii yokquin ticzizakazza učum tuquita atchi ejpnacaqui.

16 Wiruñaquei nii atchi ejpnacž tsjijnaca chjichtatača Siquem cjita yokquin. Nicju tjattatača Abrahamž kjayta yokquin. Abrahamqui nii Siquem yoka paaztan kjaychiča Hamor cjita maatinacžquiztan.

17 'Tuquitan juramintužtan Yoozqui Abrahamžquiz taku tjaachiča, tuž cjican: "Am majchmaatinacžquiz tii yoka tjaača". Nii tjaata taku cumplis ora žcatžinžcan Israel wajtchiz žoñinacaqui waljaž miratča Egipto yokquinaqui.

18 Nii oranaca Egipto yokquinaqui tsjii chawc jiliriqi mantiz kallantichiča, ana José pajñi.

19 Nii jiliriqi učum wajtchiz žoñž quintra pinsichiča. Nekztan anawal quintra paachiča učum tuquita atchi ejpnacžquiz. Nii jiliriqi mantichiča, Israel lucmajch maatinaca majttan zawnc uchla, ticzi cjisjapa.

20 Jalla nii timpu Moisesqui majttatača. Ancha c'achja wawatača niiqui. Yoozqui nii wawžtan wali cuntintutača. Niiž maa ejpqui čhjep jiiž kjuyquiz mantiñchiča.

21 Ana iya nii wawa čhjoj čhjoji atžcu, kjuyquiztan chjitchiča. Nekztanaqui Egipto chawc jilirž persun majtqui nii Moisés wawa wajtchinča. Jalla nuž wajtžcu, persun maatižtakaz uywazzinča.

22 Jalla nižtiquiztan Moisesqui tjapa nii Egipto žoñinacž tjaajintanaca zizñi cjissiča. Nižaza zuma paatiquiztanami nižaza zuma chiitiquiztanami walja rispittatača Moisesqui.

23 'Niiž pusi tunc watchiz cjican Moisesqui parti Israel žoñinacžquin tsjii tjonžni ojkz pecchiča.

24 Jalla nuž tjonžni ojkžcu cherchiča, tsjii Egipto žoñiqui tsjii Israel žoñi wjajtatča, jalla nii cherchiča. Nii Israel žoñžtan cjatžcu kijtchiča. Nekztan nii Egipto wjajtñi žoñžquiz ayni tjepuncan conchiča.

25 Nekztanaqui Moisesqui kuzquiz zizziča, Yoozqui nii utchiča, Israel žoñinaca Egipto žoñinacž mantuquiztan liwriizjapa, jalla nii. Nižaza Moisesqui pinsichiča, Israel žoñinacaqui nižtakaz zizziča. Pero nii Israel žoñinacazti ana nižta naaziča, Moisesqui Yooz uchta liwriiñi, jalla nii.

26 Jaka tažuqui Moisesqui tsjii pucultan Israel žoñinacžtan ch'aasñi zalchiča. Jalla nuž zalžcu, pertunaskats pecchiča, tuž cjican: "Jilanaca, pucultan ančhucqui Israel žoñinacčhucča. ¿Kjažtiquiztan ančhucpora ch'aasjo?"

27 Nekztanaqui ana wal uj paañi žoñiqui Moisés tewkziča, tuž cjican: "¿Ject am jiliri utchejo, wejrnac mantiñijapajo?"

28 Zezcu Egipto žoñi conchamča. ¿Jazic wejrzam konz pecjo?"

29 Jalla nii nonžcu Moisesqui atipassiča Madián yokquin. Jalla nicju kamchiča nacjuñta žoñi cjenacqui. Nicju tjunatan zalžcu, pucultan ocjalchiz cjissiča, nii yokquin kaman.

30 'Pusi tunc watquiztan nekztan tsjii ch'ekti yokquintača Moisesqui, Sinaí cjita cur žcati. Jalla nekz želan, tsjii anjilaqui niižquin jeczquichiča, tsjii kalu ujžtan taaztažtakaz, nii taypiquiz.

31 Jalla nii cheržcu, Moisesqui ispantichiča. Jalla nii uj cheri macjatcan, nonziča Yooz Jilirž jora. Nii joraqui tuž cjichiča:

32 “Wejrqui am tuquita atchi ejpnacž Yooztča. Abrahamž Yooztča, nižaza Isaacž Yooztča, nižaza Jacobž Yooztča”. Nekztanaqui Moisesqui tsucchi kjarcati kallantichiča. Iya ana chertzni atchiča.

33 Nekztanaqui Yooz Jiliri qui cjichiča: “Am čhjata chjojczna. Tii amiž tecžta yokaqui wejt yokača.

34 Wejrqui weriž illzta žoñinacž sufriñi cherchinča nii Egipto yokquin kamni. Nižaza ninacž llaquizan ninaca kjawni nonzinča. Jalla nižtiquiztan ninaca liwrii chjiwžquichinča. Picha, ninaca liwriizjapa am cuchnača Egipto yokquin”.

35 “Tuqui Israel wajtchiz žoñinacaqui Moisesquiz ana rispitchiča. Niižquiz cjichiča: “¿Ject am jiliri utchejo, wejrnaca mantiñijapajo?” Jalla nuž cjenami Yoozqui nii Moisespacha jiliri utchiča, Israel žoñinaca liwriyajo. Israel žoñinaca liwriizjapa, nii taazta kalquiz jeczquichi anjilaqui Moisesquiz yanapaquiča.

36 Jalla nekztanaqui Moisesqui učum tuquita atchi ejpnaca jwessiča nii Egipto yokquiztan. Ima nii yokquiztan ulanskatan milajrunacami Yooz siñalanacami paachiča, nižaza Ljoc cjita kot taypquiz tjakziča, jalla nuž milajru paachiča. Nekztan pusi tunc wata ch'ekti yokquin ojklaycan milajrunacami Yooz siñalanacami paachiča.

37 Jalla tii Moisespacha Israel wajtchiz žoñinacžquiz cjichiča: “Yoozqui wejr cuchanžquichiča ančhuc liwriizjapa. Jalla nižta irata Yoozqui Israel žoñinacžquiztan yekja liwriiñi profeta cuchanžcaquiča. Jalla niiž tjontan ančhucqui niižquiz caza”. Jalla nuž cjichiča Moisesqui.

38 Nižaza Moisesqui Israel žoñinacžtan ch'ekti yokquin žejlchiča, Sinaí cjita cur latuquiz. Jalla nekz tsjii anjilžtan parlichiča. Nižaza učum tuquita atchi ejpnacžquiz palt'izinchiča. Jalla nižtiquiztan Yooz taku tanziča, tjurni Yooz taku. Učumnacaltajapa nii tanziča. Nižaza učumnacaquiz nii taku tjaajinchiča.

39 Učum tuquita ejpnacaqui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča.

40 Jalla nekztanaqui učum tuquita ejpnacaqui Aaronžquiz paljaychiča, tuž cjican: “Yooznaca paažinalla, wejtnaca tucquin chjichñijapa. Nii Moisesaqui wejrnaca ulanskatchiča Egipto yokquiztan. Pero anzi qui anal zizi atuča, čjulukat niižquiz watčhani. Cunamit curquiztan ana quejpžcačhani”.

41 Jalla nekztanaqui nii žoñinacaqui korquiztan tsjii wac chul turu paakatchiča ninacžtajapa, tsjii yooz cjisjapa. Nekztan nii paata yoozquiz wilana conchiča. Nižaza ninacž paata yoozquiztan ancha cuntintutača.

42 Jalla nižtiquiztan Yoozqui ninaca jaytichiča, ninacž persun kuzcamakaz kamajo. Jalla nižtiquiztan persun kuzcama cjičican arajpach tjuñimi, jizimi, warawaranacami sirwichiča. Jalla nii puntuquiztan Yooz taku chiiñi profetanacž cijirta liwruquiz tuž cijirtatača:

“Israel žoñinaca, ančhucqui pusi tunc wata ch'ekti yokquin kamcan, wilana conchinčhucča. ¿Wejtquin sirwisjapa nižta paachinčhucjo?”

43 Anapanča. Antis Moloc cjita žoñiž paata yoozquin jawkchinčhucča nii wilananaca. Nižaza Renfán cjita warawara yooztakaz cherchinčhucča. Jalla nii warawar yoozquin rispitchinčhucča wilana tjaacan. Nižaza ančhuca tuqui nii žoñiž paata yooznaca chjitskatiñchuctača. Ančhucpachaž nižta yooznaca paachinčhucqui, nekz sirwizjapa. Jalla nižtiquiztan ančhuc jwesatča ančhuca kamz yokquiztan. Jalla nuž jwescu Babilonia cjita yokquiztan nawjctuñtan chjichača”.

Jalla nuž Yooz tawk liwruquiz cjiirtatača.

⁴⁴ 'Ch'ekti yokquin ojklaycan učum tuqita ejpnacaqui zkiz simpluchizatača. Yoozqui Moisesquiz nii simplu plano tjeziča. Nekztanaqui Yooz mantita plan jaru, nii simpluqui paatatača. Nekziqui Yoozqui sirwitatača.

⁴⁵ Nii zkiz simplu učum tuqita ejpnacaqui tanziča irinsažtakaz. Josuež irpita, učum tuqita ejpnacaqui nii simplu chjitchiča, Canaán yokquin luzcan. Nekz žejlŋi žoñinacžquiztan nii yoka tanziča. Yooz pacha nii žoñinaca chjatkatchiča, učum tuqita ejpnacžquiz tjaazjapa. Nii yoka tanžcu jalla nekz kamchiča Davidž kamtacama.

⁴⁶ David cjita jiliriqiu Yooziž ancha okžtatača. Jalla nižtiquiztan Davidqui tsjii simplu kjuya kjuyz pecatča Yooz sirwizjapa. Niiž tuqita ejp Jacobqui nii Yooz sirwichizakazza.

⁴⁷ Pero ultimquiziqui Salomón cjita Davidž majch, niča Yooz simplu cjican kjuychiqui.

⁴⁸ Jalla nuž simplu kjuyta cjenami, werar Yoozqui anaž žoñiž kjuyta kjuyquiz želasača. Jalla nuž cjichizakazza tsjii Yooz taku chiiŋi profet žoñiqui. Yooz puntuquiztan jalla tuž cjiirchiča nii profet žoñiqui:

⁴⁹ “Wejt mantis julzza arajpachaqui. Tii yokaqui wejt kjojcha jeejzkatzjapažtakazza. ¿Čhjuluz cheechi kjuya ančucqui wejtajapa kjuyasajo? Jalla nuž cjiča Yooz Jiliriqiu. ¿Jakziqint wejt jeejz yoka žejljo?

⁵⁰ Wejrtča tjappacha paachintqui”.

Jalla nuž Yooz puntuquiztan cjiirtatača.

⁵¹ Nižaza Estebanqui tira chiichiča, tuž cjican:

—Ančucqui ancha chojru kuzzizčucpanča, ana Yoozquin kuzzizčucča. Cjuñchizčucča pero ana Yooz taku nonzinčucča. Nižaza ančucqui Yooz Espíritu Santužquiz anapan caziñčucča. Tuqita ejpž nižtazakazza ančucqui.

⁵² Ančuca tuqita ejpnacaqui Yooz taku chiiŋi profetanacžquiz ana rispitchipanča. Antis sufriskatchipanča. Nii profetanacaqui tsjii tsjan zuma žoñiž tjonz mazinchiča. Ančuca tuqita ejpnacazti ninaca conchiča. Jaziqui nii zuma žoñiqui tjonchiča. Ančuczti nii žoñi preso tankatchinčucča, y nižaza conkatchinčucča.

⁵³ Anjilanacaqui ančucaquiz Yooz lii tjaachiča. Jalla nii tjaata lii ana cazziñčucča. —Jalla nuž Estebanqui paljaychiča.

ESTEBAN CONTA

⁵⁴ Estebanž chiita taku nonžcu, ancha žawjchiča. Nižaza Estebanž quintra ižke jojchiča, ninacaž žawjchi tjeezjapa.

⁵⁵ Estebanžti Espíritu Santuž irpitapankaztača. Nekztanaqui Estebanqui arajpach kjutŋi cherziča. Nekztan Yoozquiztan walja c'ajžquiŋi cherchiča. Nižaza Yooz Ejpž žew latuquiz Jesusa tsijtsi cherchizakazza.

⁵⁶ Nekztan Estebanqui cjichiča:

—¡Arajpach kjutŋi cheržna! Arajpacha cjetzil cheruča. Nižaza Yooz Ejpž žew latuquiz tsijtsi žejlča Jesusa Yooz Maatiqui.

⁵⁷ Ninacazti ana nonžni yujcchiča. Cjuŋi chawcziča. Nižaza altu joržtan kjawcan apura zalchiča tanzjapa.

⁵⁸ Jalla nuž tanžcu, wajtquiztan jwessiča. Nekztan wajtž tjiiquin, maztan čhajcchiča. Nii maz čhajcŋi žoñinacaqui tsjii Saulo cjita tjowžquiz ninacž zquiti cwitižinajo ecchiča.

⁵⁹ Jalla nuž maztan čhajcan, Estebanqui Yoozquin mayizichiča, tuž cjican: —Wejt Yooz Jesús Jiliri, wejt animu chjichalla.

⁶⁰ Jalla nekztanaqui Estebanqui quillziča. Altu joržtan kjawchiča, tuž cjican:

—Wejt Yooz Jiliri, tii žoñinaca tii ujquiztan pertunalla amqui.

Jalla nuž kjawžcu, ticziča.

8

CRIICHI ZOÑINACA WICHANZI

¹ Nekztanaqui nii Saulo cjita tjowaqui Esteban conzjapaqui tjapa kuztača. Jalla nii noojpacha Yoozquin criichinacž quintra juc'anti juc'anti sufriskati kallantichiča Jerusalén wajtquiz. Jalla nižtiquiztanaqui tjapa criichi žoñinacaqui wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča.

² Tsjii kjažultan Yoozquin zuma sirwiñinacaqui Estebanž curpu tjazziča. Nižaza ancha kaachiča niižquiztan.

³ Nekztan nii Saulo cjita žoñiqui criichinacž quintra ancha anawali paachiča. K'ala tjatanz pecchiča. Nižaza kjuyquiztan kjuya ojklaychiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴ Jakziquin nii wichanzi criichinacaqui ojktčhaja, jalla nicju liwriiñi Yooz taku paljayñitača.

⁵ Tsjii wichanzi žoñiqui Felipe cjitatača. Jalla nii žoñiqui tsjii Samaria yokquiz žejlñi watja ojkičiča. Jalla nicju Cristuž puntuquiztan paljayi kallantichizakazza.

⁶ Jalla nuž paljayan žoñinacaqui walja ajcziča. Tjapa nii žoñinacaqui Felipiž paljayta taku tjapa kuztan nonznatča. Nižaza Felipiž paata milajrunaca cheržcu, niž čhiita taku tjapa kuztan catokchiča.

⁷ Walja zajraž tanta žoñinacaqui čhjetintatača. Nii laa žoñinacžquiztan zajraqui kjawcan ulanchiča. Nižaza walja zuch žoñimi cojumi čhjetintazakaztača.

⁸ Jalla nižtiquiztan tjapa nii wajtchiz žoñinacaqui cuntintutača.

⁹ Jalla nii wajtquiz tsjii Simón cjita wayt'ir žoñi želatča. Tuquitanpacha wayt'iri ojklayñi žoñitača, nii Samaria wajtchiz žoñinaca incallcan.

—Wejrtča chekan žoñtqui —cjican ojklayñitača.

¹⁰ Jalla niiž taku walja nonz pecñitača. Nižaza kolta cjiñimi pakji cjiñimi tuž cjiñitača:

—Tii žoñiča walja Yooz aztanaqui. Yooztakazza tiiqui. —Nuž cjican cjiñitača.

¹¹ Ažk watanaca nii wayt'ir žoñiqui žoñinaca incallžcu, walja cazkatñitača.

¹² Jalla nekztanaqui Felipiqui tjonchiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljaychiča. Jalla nuž paljaytiquiztan walja luctaka cjiñi maataka cjiñi tjapa kuztan criichiča Yooz Ejpžquin. Nekztan criitiquiztan bautistatača.

¹³ Nižaza Simonpachača criichiqui, nižaza bautistatača. Jalla nekztanaqui Felipžquiz cumpanti kallantichiča. Felipiž milajrunaca paan, walja ispantichiča nii Simonaqui.

¹⁴ Nekztanaqui Jerusalenquin žejlñi apostolonacaqui quintu nonchiča, Samaria wajtchiz žoñinaca Yooz taku catokchiča, jalla nii. Jalla nuž nonžcu nicju tsjii pucultan cuchanžquichiča, Pedružtan Juanžtan.

¹⁵ Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizichiča, Espiritu Santu tanznajo.

¹⁶ Tuquiqui anaž jakziltižquizimi Espíritu Santuqui luztkalča. Jesucristuž tjuužtan alajakaz bautistatakalča.

¹⁷ Jalla nekztanaqui Pedružtan Juanžtan ninacž juntuñ kjaržtan lanziča. Jalla nižtiquiztan Espíritu Santuqui ninacžquiz luzziča.

¹⁸ Jalla nuž kjaržtan lanztiquiztan Espíritu Santuž luzni cheržcu, Simonaqui paaz tirziča,

¹⁹ tuž cjican:

–Wejtquin zakaz nii am azi tjaalla. Jalla nekztanaqui wejrzakaz kjaržtan lanžcu žoñinacžquiz Espíritu Santo luzkatača.

²⁰ Jalla nekztanaqui Pedruqui Simonžquiz cjichiča:

–Am paazmi amtanpacha k'ala katžla. Yooz onanta Espíritu Santo anaž kjayasača paaztan. ¿Kjažtiquiztan nižta am pinsejo?

²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesača. Yooz yujcquiziqui am kuzqui anača zuma.

²² Jalla nii am anawali pinsisnaca jayta, nižaza apatata. “Wejrqui anawali pinsichinpanča” cjican Yoozquin rocaza, am kuz pinsitanaca pertunta cjisjapa. Nekztan cunami pertunta cjis atčhani.

²³ Amqui ana zuma kuzzizzamča. Anawali pinsiskaz am kuzquiz tjonča. Wejrqui am ana wali int'iskatča.

²⁴ Jalla nekztanaqui Simonaqui kjaaziča, tuž cjican:

–Wejtajapa Yooz Jiliržquin mayiziñalla, ana čhjulumi tii amiž chiita taku-nacquiztan wejtquiz watajo.

²⁵ Nekztanaqui nii apóstol žoñinacaqui Jesucristo Jilirž puntuquiztan zuma chiichiča, nižaza Yooz taku zuma parličiča. Jalla nekztanaqui Samaria yokquiz wacchi kolta watjara liwriñi Yooz taku paljayni ojklayčiča. Jalla nuž ojklayžcu quejpciča Jerusalén watja.

FELIPZTAN ETIOPIA WAJTCHIZ ŽOŇŽTAN

²⁶ Niiž wiruñ tsjii Yooz anjilaqui Felipžquiz cjichiča:

–Zaažna. Jerusalén wajtquiztan warchuc oka, Gaza ojknii jiczquin.

Ch'ekti yoka nuž watča nii jiczqui.

²⁷ Nekztanaqui Felipiqui žaažcu, ojkiča. Nii jiczquiz ojkan tsjii Etiopía wajtchiz žoñžtan zalčiča. Nii žoñiqui eunucutača. Nižaza jilirž cusasanaca cwitiñi žoñitača. Candace cjita žonqui tsjan chawc jiliritača Etiopía wajtquin. Jalla naa chawc jilirž mantuquiztača nii cusasanaca cwitiñi žoñiqui. Nii žoñiqui Jerusalén watja ojkičiča werar Yooz rispitsjapa.

²⁸ Jaziqui persun watja quepi ojkičiča. Niiž persun cawall autuquiz julzi želatča, Isaías cijirta Yooz taku liican. Isaiastača tuquita Yooz taku chiiñi profetaqui.

²⁹ Jalla nekztanaqui Espíritu Santuqui Felipžquiz cjichiča:

–Nii cawall autuquiz macjata.

³⁰ Jalla nuž macjatžcu Felipiqui nonziča, nii žoñiqui Isaías cijirta Yooz taku liiñi, jalla nii. Jalla nuž nonžcu Felipiqui pewziča, tuž cjican:

–¿Nii Yooz taku am intintiya?

³¹ Nii žoñiqui kjaaziča, tuž cjican:

–Anaž wejtquiz jec tjaajiñimi žejlča. ¿Jaknužt wejr intintasajo?

Nekztanaqui nii žoñiqui Felipe kjawziča, nii autu juntuñ yawzcajo, niižquiz julžinžcajo.

³² Jalla nii cijirta Yooz taku tuž cjetča:

“Uuzažtakaz coní chjichtaž cjequiča. Uuzaqui ch'ujukaz žejlpanča tsjii čhjipñi žoňžquiziqui, jalla nižta conz oraqui ch'ujuž cjequiča niiqui. Anaž chiyaquiča.

³³ Zuma kamañchiz cjenami ombrawillta cjequiča. Ana čhjul justiciami wataquiča. Niiž majchmaatquiztan, ¿jequit tii puntu watchinaca quint'izjapa želas? Tii muntuquiz niiž kamz wira tucuzinzaquiča”.

³⁴ Jalla nii liižcu nii jiliriqúi Felipžquiz pewcziča tuž cjican:

—¿Jecz puntuquiztan tii profetaž cjiirta chiijo? ¿Niiž persun puntuquiz-tankaya? už ¿yekja žoňž puntuquiztan, jaa?

³⁵ Jalla nekztanaqui Felipiqui nii liita Yooz taku puntuquiztan tjaajñi kallantichiča. Jesucristuž puntuquiztan niiqui chiyatča. Jalla nii zuma liwriiñi taku tjaajziča.

³⁶ Jalla nekztanaqui tsjii wijiña macjatcan, nii jiliriqúi cjichiča:

—Tekz kjaz žejlča. ¿Anaj tii kjazquiz bautista cjesaya?

³⁷ Felipiqui kjaaziča, tuž cjican:

—Am persun tjapa kuztan criyaquiž niiqui, bautistam cjesača.

Nii jiliriqúi kjaaziča tuž cjican:

—Jesucristuqui Yooz Majchča, jalla nii tjapa kuztan criyuča.

FELIPIQUI YOOZ TAKU KJANZT'ICHICHA

³⁸ Jalla nekztanaqui nii cawall autu tsijtskatchiča. Nekztanaqui pucultan chjiwžquichiča kjaz kjutñi. Nekztanaqui Felipiqui nii jiliri bautissiča.

³⁹ Kjazquiztan ulnan, Yooz Espíritu Santuqui Felipe chjitchiča. Felipiqui ana iya tjenchiča nii jiliržquiz. Jalla nuž cjenami nii jiliriqúi tira ojkchiča cuntintu.

⁴⁰ Felipizti Azoto cjita wajtquin chjichtatača. Nižaza wajtquiztan watja ojklaycan, liwriiñi Yooz taku paljayñi ojkchiča, Cesarea cjita watja irantis-cama.

9

SAULO JESUCRISTUZTAN ZALCHICHA

¹ Jalla nuž Felipe ojklayanaqui Sauluqui Yoozquin criichi žoñinaca tanzjapa nižaza conzjapa tirapan kuz tjaatča. Anapanž jaytiz pecatča. Nekztanaqui timplu chawc jiliri cherzñi ojkchiča.

² Nii chawc jiliržquiztan ortina maychiča. Damasco cjita watja ojkz pecatča. Jalla nicju ajcz kjuyaran ojklayz pecatča, Yooz jiczquiz luzñi žoñinaca kjurzjapa, criichi luctaka cjiñi maataka cjiñi kjurzjapa. Nii criichinaca wajtžcu preso tanz pecatča, Jerusalenquin chjitzjapa. Jalla nižta ojklayzjapa ortina maychiča.

³ Ortina jwescu, ojkchiča Damasco cjita wajt kjutñi. Damasco žcatilla cjen, tiripintit tsjii wali pajk kjanaqui muzpa kjanžquichiča niiž muytata.

⁴ Sauluqui yokquiz tjojtsiča. Jalla nuž tjojtzcu tsjii jora nonziča, tuž cjiñi:

—Saulo, Saulo, ¿kjažtiquiztan am wejt quintramjo?

⁵ Nekztanaqui Sauluqui pewcziča, tuž cjican:

—Wejt Jiliri, ¿ject amya?

Nii tsewctan chiiñi joraqui kjaaziča, tuž cjican:

—Wejrtča Jesusitqui. Amqui wejt quintram paača. Nuž paacan, ampacham quintra paača. Tsjii wacaqui ar parž quintra llawkžcu, persun janchiž quintraž paača. Jalla nižta irata am persun quintram paača.

⁶ Nekztanaqui Sauluqui tsuczcu cjatinzka tjonziča niiž curpuqui. Nekztanaqui cjichiča:

—Wejt Jiliri, ¿chjulu wejr paajum cjee amya?

Yooz Jiliriqúi cjichiča:

—Zaažna. Watja luzna. Jalla nicju amquiz kjana chiita cjequiča čhjulut paasalaja, jalla nii.

⁷ Saulužtan chicapacha ojklayñi žoñinacaqui ancha tsucchiča. Ninacaqui nonzizakazza nii jora chiižquiñi. Pero ana cherchiča jecmi.

⁸ Jalla nekztanaqui Sauluqui žaaziča yokquiztan. Jalla nuž žaažcu čhjuiquiqui cjetziča, pero ana wira cheri atchiča. Jalla nižtiquiztan Sauluž kjarcu tanžcu Damasco watja chjitchiča nižtan chica ojklayñi žoñinacaqui.

⁹ Jalla nii wajtquin čhjep maj ana cherñi žejlchiča. Nižaza ana čjheri lujlñi anaza kjaz licñi žejlchiča.

¹⁰ Jalla Damasco wajtquin tsjii Ananías cjita Yoozquin criichi žoñi želatča. Nii Ananiasquiz Yooz Jiliriqúi jeczquichiča wiiquin, tuž cjican:

—¡Ananías!

Jalla niiqui kjaaziča, tuž cjican:

—Wejt Jiliri, tekziča wejrqui.

¹¹ Nekztanaqui Yooz Jiliriqúi cjichiča:

—Zaažna. Sok'o cjita call kjutñi oka. Nekztan Judas kjuyquiz pewczna, tuž cjican: “¿Saulo, Tarso wajtchiz žoñi anaj žejlya?” Jalla nuž pewcznaquiča. Nii Sauluqui Yoozquin mayizican želaquiča.

¹² Tsjii wiiquin chjuužcan, tižta cherchiča Sauluqui. Tsjii Ananías cjita žoñiqui niižquiz luzziča. Jalla nuž luzcu kjaržtan niž juntuñ lanziča wilta cherajo. Chjuužcan Sauluqui jalla nuž cherchiča.

¹³ Jalla nuž nonžcu, Ananías cjichiča:

—Wejt Jiliri, tii žoñžquiztan wacchi quintunaca nonchinča. Jerusalén wajtquiz juc'anti anawali paachiča amquin criichinacžquiz.

¹⁴ Anziqui tekzpacha tjonzizakazza. Timplu chawc jiliriž tjaata ortinchiz tjonchiča, tjapa amquin rispiti žoñinaca tanžcu preso chjitsjapa.

¹⁵ Pero Jesucristo Jiliriqúi cjichiča:

—Oka amqui. Wejrqui tii žoñi illzinča, wejt puntuquiztan parlajo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaquiča tiiqui.

¹⁶ Jalla niiqui wejt puntuquiztan parliñiž cjen ancha sufraquiča. Wejrqui niižquiz intintiskatača jalla niiž sufris puntuquiztan.

¹⁷ Jalla nekztanaqui Ananiasqui ojkičiča jakziquin Saulo želatčaja, jalla nicju. Saulužquin luzcu, kjaržtan niž juntuñ lanziča, tuž cjican:

—Saulo, jila, amiž jiczquiz tekz tjonan Jesusa Jiliriqúi amtan zalchiča. Jalla nii Jesusa Jiliriqúi wejtquin mantižquiča, am wilta cherkatajo, nižaza Espiritu Santuž am kuzquiz luzajo.

¹⁸ Nii orapacha Sauluž čhjucquiztan ch'iz cjajpažtakaz tjojtsiča. Nekztan wilta cherñi cjissiča. Nekztanaqui Sauluqui žaaziča, nižaza bautista cjissiča.

¹⁹ Jalla nekztanaqui čjheri lujlžcu, wilta azi tanziča. Nekztan tsjii kjaž maj Damasco cjita wajtquin kamchiča Yoozquin criichinacžtan.

SAULUQUI JESUSIZ PUNTUQUIZTAN PALJAYCHICHA

²⁰ Jalla nuž kamcan Sauluqui ajcz kjuyanacquiziqui Jesusiž puntuquiztan paljaji kallantichiča tuž cjican:

—Jesusaqui werar Yooz Majchpanča.

²¹ Nii nonžñi žoñinacaqui ispantichiča, tuž cjican:

—Tii žoñiqui Jerusalén wajtquin ojklaychiča Jesucristužquin rispiti žoñinaca tani. Tekzizakaz tjonchiča Jesucristužquin criichinaca tanažlani.

Nižaza preso chjichažlani, timplu jilirinacžquin intirjizjapa. Jalla nii žoñipančha, ¿ana jaa?

²² Pero Sauluzti juc'anti tjup kuzziz Yooz taku parličičha. Juc'anti juc'anti atipñi takunacžtan parličičha. Zuma kjana intintiskatchičha, Jesusa Yooziž cuchanžquita Cristučha, jalla nii. Jalla nuž intintiskatan, nii Damasco wajtquin kamñi judionacami kuz inakaz turwaysi quirchičha.

SAULUQUI ATIPCHICHA

²³ Tsjii kjaž majquiztan nii žejlñi judío žoñinacaqui palt'ichičha Saulo conz-japa.

²⁴ Nii žoñinacaž conz palt'ita zizzičha Sauluqui. Majiñami weenami wajtž zana tjewsnatčha, čhjolorat wajtquiztan ulnačhaja, jalla nii ora Saulo conz-japa.

²⁵ Pero tsjii ween nii wajtchiz criichinacaqui tsjii pajk canastiquiz yaažcu, Saulo chjijunžquichičha. Tsjii pajk alto murallaž muyuntitatačha nii wat-jaqui. Jalla nii juntuñ chjijunchičha zawncchuc. Jalla nuž atipassičha Sauluqui.

SAULUQUI JERUSALENQUIN QUEJPCHICHA

²⁶ Sauluqui Jerusalén watja quejpžcu Yoozquin criichi žoñinacžtan ajcz pecatčha. Nii criichinacazti Saulužtan ajcz eksičha. “Ana ultimu Yoozquin criichižcaa” cjican kuzquiz pinsichičha.

²⁷ Jalla nuž cjenami Bernabé cjita jilaqui Saulo chjitchičha, apostolonacžtan zalzjapa. Nekztanaqui Bernabequi apostolunacžquin mazzičha, jaknužt Saulo jiczquiz ojkan Jesucristo Jiliržtan zaltčhaja, jalla nii. Nižaza jaknužt Jesucristo Jiliriqui Saulužquiz paljaychichalaja, nii mazñi. Nižaza jaknužt Damascuquin Sauluqui Jesucristo puntuquiztan tjup kuzziz parličhaja, jalla nii mazzizakazza.

²⁸ Nekztanaqui Sauluqui Jerusalén wajtquin ojklaychičha; nižaza hermanonacžtan kamchičha.

²⁹ Jalla nuž žejlcan Sauluqui Jesucristuž puntuquiztan tjup kuzziz paljaychičha. Nižaza griego taku chiiñi judionacžtan ch'aascan parličičha. Nii žoñinacaqui Saulo conz pecatčha.

³⁰ Jalla nii quintu zizcu, nii parti criichinacaqui Saulo chjitchičha Cesarea cjita wajtquin. Jalla niwjctan Tarso cjita watja cuchanchičha.

³¹ Jalla nekztanaqui nii timpuqui walikaz želatčha iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantačha. Yoozquin criichinacami Yooz Jiliri walja tjapa kuzziz cjisnatčha. Rispitñi kuzziz-tačha. Nižaza Espiritu Santuqui ninaca kuzñitačha, cuntintu kamajo. Jalla nižtiquiztan walja yapchičha Yoozquin criichinacaqui.

ENEAS CHJETINTA

³² Nižaza Pedruqui criichi žoñžquiztan žoñi tjontjonžcan ojklayatčha. Nižaza Lida wajtchiz Yooz parti žoñinacžquiz tjonzñi ojkcichičha.

³³ Jalla nicju Eneas cjita žoñžtan zalchičha. Eneasqui quinsakal wata laa zuchu želatčha, tjajz ajpžquiz želatčha.

³⁴ Nekztanaqui Pedruqui nižžquiz cjichičha:

–Eneas, Jesucristuqui am čhjetnaquičha. Zaažna. Am tjajz zquiti zumpacha chjinžna.

Nii orapacha Eneasqui žaazičha.

³⁵ Nekztanaqui nii Lida wajtquiz kamñi žoñinacami nižaza Sarón wajtquiz kamñi žoñinacami nii zuch žoñi čhjetinta cherchičha. Nekztanaqui niž

tuquita ejpnacž cuzturumpinaca eccu, Yooz Ejp Jiliržquin criichiča. Nižaza Yooz kamañchiz cjissiča.

DORCAS CJITI ZON JACATATSKATTA

³⁶ Jalla nii timpuzakaz Jope cjita wajtquin tsjaa Yoozquin criichi žon želatča, Tabita cjiti. Griego tawkquiz Dorcas cjiti tjuuchiztača. Naa maatak žon zuma paatanaca paacan zuma kamiñpantača, nižaza t'akjir žoñinaca okzniñtača.

³⁷ Jalla nii timpu Dorcas cjiti žonqui laa cjiscu, ticzinča. Ima tjatcan naaža curpu awjžcu, tsjii kjuyquiz tsewcta pisuquin chjichtatača.

³⁸ Jope watjaqui Lida žcatillatača. Jalla nii Lida wajtquin Pedruqui želatča. Jalla nuž zizcu nii Jope wajtchiz hermanonacaqui pucultan žoñinaca cuchanchiča Pedružquin rocajo, tuž cjican:

–Apuraj tjonla, ana enenžcu.

³⁹ Nekztanaqui Pedruqui tsijtscu ninacžtan ojkchiča. Jalla nicju iran-tižcu nekztan Pedruqui chjichtatača, Dorcas curpu majcžta kjuyquin. Nii kjuyquin Pedružtan chica žejlcan žew maatakanacaqui kaatča. Nižaza ninacaqui Pedružquiz tjeeziča Dorcas paata zquitinaca, nii.

⁴⁰ Jalla nekztanaqui Pedruqui tjappacha nii parti žoñinaca ulanskatchiča. Ninacaž ulantiquiztan quillžcu Yoozquin mayizichiča. Naa ticzin žona curpu kjutni cheržcu chiichiča, tuž cjican:

–Tabita, žaažna.

Jalla nižtiquiztanaqui naa ticzin žonqui čhjujcqui cjetzinča. Nekztanaqui Pedro cheržcu, julzinča.

⁴¹ Pedruqui naaža kjarcu tanzicha, nekztan tsijtskatchiča. Nuž tsijtskatzcu Pedruqui parti jilanacami nižaza žew maatakanacami kjawziča. Nekztan Dorcas žejtchin tjeeziča.

⁴² Tjapa nii Jope wajtchiz žoñinacaqui nii quintu zizziča. Jalla nižtiquiztan walja Yoozquin criichiča.

⁴³ Pedruqui tsjii kjaž maj nii wajtquiz kamchiča, Simón cjita žoñž kjuyquiz. Nii Simonaqui zkizinaca koñž langzñitača.

10

PEDRUZTAN CORNELIUZTAN

¹ Cesarea wajtquiz tsjii Cornelio cjita žoñi želatča. Niiqui zultatž jiliri-tača, Italian cjita regimientoquiztan.

² Jalla nii jiliriqui niž familianacžtanpacha arajpach Yooz rispitiñitača. Nižaza Yoozquin mayiziñitača. Nižaza pori judío žoñinacžquiz walja paaztan yanapt'ichiča.

³ Tsjii noojiqui majñakak ora chjuužtažokaz tsjii Yooz anjila cherziča, kjanapacha. Nii anjilaqui nižquin tjonžquichiča tuž cjican:

–¡Cornelio!

⁴ Corneliuzti tsucchi anjilž kjutni cherziča. Nekztan pewcziča:

–Wejt Jiliri, žčhjulutaya? –cjican.

Nekztanaqui nii anjilaqui kjaaziča, tuž cjican:

–Amqui Yooz Ejpžquin mayiziñamča. Nuž naychiča Yooz Ejpqui. Nižaza am t'akjir žoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza am cjuñža.

⁵ Jaziqui Jope wajtquin žoñinaca cuchanžca, Simona kjawzjapa. Nii Simonaqui Pedro cjitazakazza.

⁶ Pedruqui yekja Simonžtan alujtača. Nii yekja Simonaqui zkizi koñž langzni žoñiča. Niiž kjuya pajk kot žcati žejlča. Nii Pedruž amquiz

chiyaquičha, čhjulut am paas cječhaja, jalla nii. —Jalla nuž chiichiča nii anjilaqui.

⁷ Nii anjilaž ojktanaqui, Corneliuqui pucultan piyunanaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzzizzakaztača.

⁸ Nekztanaqui Corneliuqui nii kjawžta žoñinacžquiz tjapa quint'ichiča. Jalla nekztan Jope wajtquin cuchanchiča.

⁹ Niiž jaka tažuqui nii čhjepultan cuchanta žoñinaca Jope kjutñi ojkchiča. Jope watja žcatiž cjen, nii oraqui Pedruqui kjuy juntuñta patiuquin yawchiča Yoozquin mayizi. Nii oraqui taypurutača.

¹⁰ Jaziqui Pedruqui ancha čhjeri eecskatatča, lujlz pecatča. Jalla nuž čhjeri kisan, Pedruqui nii tsewcta patiuquin tsjii chjuužtažokaz cherziča.

¹¹ Jalla tuž cherziča: arajpacha cjetzi tsjii pajk mantilažtakaz chji-jwžquichiča yokquin. Nii mantilaqui pajkpic punta žcucžintača.

¹² Jalla nii mantiliquiz tjapaman pajkpic kojchanacchiz animalanacami, zkoranacami, wežlanacami želatča.

¹³ Nekztanaqui Pedruqui tsjii jora nonziča, tuž cjican:

—Pedru, tsijsna. Conžna. Lujlzna.

¹⁴ Pedruzti kjaaziča, tuž cjican:

—Wejt Jiliri, nižta anal paasača. Nii punta animalanaca ana lulasacha. Lii quintrača. Jaziqui nižta anal lulasacha wejrqui.

¹⁵ Jalla nuž kjaaztiquiztanaqui nii joraqui wilta chiižquichiča, tuž cjican:

—Yoozqui amquiz chiichiča, “Zumača niiqui, lujlžjapa” cjican. Jalla nii Yooziž chiita taku anam amqui nicasača, “Ana zumača lujlžjapa. Lii quintrača” cjicanaqui.

¹⁶ Jalla tižta čhjep wilta watchiča. Nekztanaqui nii mantilaqui arajpach kjutñi waytitatača.

¹⁷ Nekztanaqui Pedruž kuzquiz pinsichiča, tuž cjican: “Nii chjuužtakaz cherta žjaknužt cji? Čhjulut Yoozqui wejtquiz intintiskatž pec?” Nii orapacha Simonž kjuya pewcpewczyča Corneliuž cuchanžquita žoñinacaqui. Nekztanaqui Simonž kjuy zanquin irantichiča.

¹⁸ Irantižcu, nii žoñinacaqui altu joržtan pewczyča, tuž cjican:

—¿Simón anaj tekz alujya? Simonž tsjii tjuuqui Pedro cjitača.

¹⁹ Pedruqui tirapanž pinsatča nii chjuužta puntuquiztan. Jalla nuž pinsan, Espíritu Santuqui niiž kuzquiz cjichiča:

—Cheržca, Pedro. Čhjepultan žoñinaca am kjurča.

²⁰ Tsijsna. Chjijwžca. Ana paysnakcan ninacžtan oka. Wejrtča ninaca cuchanžquichintqui.

²¹ Jalla nekztanaqui Pedruqui chjijwžquichiča, nii Corneliuž cuchanžquita žoñinacžtan zali. Ninacžquiz cjichiča:

—Ančhucqui tsjii žoñi kjurča. Wejrtča niitqui. Čhjulquin ančhucqui tjonchinčhuctay?

²² Nekztan ninacaqui kjaaziča, tuž cjican:

—Cornelio cjita zultatž jiliriž cuchanžquita tjonučha wejrnacqui. Niiqui walja rispitta žoñiča. Nižaza niiqui Yooz rispitiñiča. Tjapa judío žoñinacaqui niiž zuma kamañ wira quint'iñiča. Tsjii Yooz anjilaqui niižquin mantichiča, tuž cjican: “Žoñinaca cuchna, Pedro cjitaqui tekz am kjuyquiz kjawžjapa. Pedruž chiita taku nonžna amqui”. Jalla nuž Corneliužquiz cjichiča nii Yooz anjilaqui.

²³ Nekztanaqui Pedruqui kjuyquiz kjawziča atintita cjisjapa. Tsjii arama neks tjažinčiča. Jaka tažuqui Pedruqui ninacžtan ojkčiča. Nižaza tsjii kjaž Jope wajtchiz hermanonacaqui nižtan chica ojkčiča.

²⁴ Niiž kat tažu Cesarea watja irantichiča, Corneliuž kjuyquin. Jalla nicju Corneliuqui tjewznatča niž parintinacžtan, nižaza tsjii zuma mazinacžtan. Corneliuqui ninaca kjawziča, ninacazakaz Pedruž taku nonzjapa.

²⁵ Pedruž kjuyquin luztan Corneliuqui nižtan zalčiča. Nekztan Pedruž yujcquiz quillziča, nii amzjapa.

²⁶ Pedruzti tsijtskatchiča, tuž cjican:

–Tsijsna amqui. Wejrmi am irat žoñizakaztča. Anača Yooztakaztča.

²⁷ Jalla pucultan parlican, luzziča. Nii kjuyquin walja ajczi žoñinaca zalčiča.

²⁸ Pedruqui ninacžquiz cjichiča:

–Ančhucqui zizza. Tsjii judío žoñiqui yekja wajtchiz žoñžtan anaž mazi cjisnasača, anaž ninacžtan ajcznasača. Nižaza yekja wajtchiz žoñž kjuyquin anaž tjonznasača. Jalla nuž judiož lii cjiča. Pero Yoozqui wejr intintiskatchiča. Anziqiu čhjul žoñimi Yooz partiquiz cjesača, nii. Jalla nižtiquiztan wejrqui anal chiiz waquizuča, “Nii žoñiqui ana Yooz partiquiz cjesača” cjicanaqui.

²⁹ Nekztan amiž kjawžtiquiztan wejrqui ana kjaž chiižcu tjonchinča; judionacž lii quintra cjenami ana nicchinča. Pero ziz pecuča, ¿kjažtiquiztan wejr kjawzinčhucta ančhucqui?

³⁰ Jalla nekztanaqui Corneliuqui kjaaziča tuž cjican:

–Ažk pajkpic tjuñi wattan tii majñakak ora wejrqui kjuyquiz želatuča, Yoozquin mayizican, nižaza ayunazcan. Jalla nuž želan, tsjii walja llijñi zquitichiz žoñiqui wejtquiz jeczquichiča.

³¹ Nižaza wejtquiz cjichiča: “Cornelio, Yoozqui am mayizita nonziča. Nižaza amiž t'akjir žoñinacžquiz okztanaca cjuñziča.

³² Jaziqui Jope wajtquin žoñinaca cuchna, Simona zjijcajo. Nižaza niž tsjii tjuuqui Pedro cjitača. Yekja Simonž kjuyquiz alujazi žejlpachača, pajk kot žcati. Nii yekja Simonaqui zkizi koñz langžni žoñiča. Nii Pedruqui tjonžcu, amtanz parlaquiča”. Jalla nuž wejtquiz chiichiča nii anjilaqui.

³³ Jalla nuž nii chiita tawk jaru, apura cuchanchinča am kjuri. Walim tjonchamča. Jaziqui tekzi tjappacha wejrnacqui Yooz Ejpž yujcquiz žejlča. Jaknužt Yoozqui wejrnacalta amquiz cjitčaja, jalla nii tjappacha nonz pecasuča wejrnacqui.

PEDRUZ PALJAYTA TAKUNACA

³⁴ Jalla nekztanaqui Pedruqui paljayi kallantichiča, tuž cjican:

–Jaziqui intintazuča. Ultim wereraž, Yoozqui tii muntuquiz žejlñi žoñinaca anaž yekja yekja illillza.

³⁵ Yoozquin rispitznaquiž niiqui, nižaza Yooz kuzcama kamaquiž niiqui, Yoozqui jakzilta čhjul wajtchiz žoñžquizimi asiptasača. Anziqiu jalla nuž intintazuča.

³⁶ Yooz Ejpqui Israel žoñinacžquiz amigo pajassiča. Nekztan niž zuma kamañ puntu zizkatchiča. Jesucristuž cjen zuma cuntintu kuzziz cjisni atasacha, jalla nii. Jesucristuča čhjulquiztanami chekan Jiliriqui, wali azziz.

³⁷ Ančhucqui zumapanž zizza, jaknužt judío yokquiz watčaja, jalla nii. Primero Juanqui Yooz taku mazmazziča. Nižaza žoñinaca bautissiča. Nekztanaqui Jesucristuqui niž persun Galilea yokquiz obranaca tjeezni kallantichiča.

³⁸ Jesusaqui Nazaret wajtchiz žoñitača. Yooz Ejpqui niižquiz walja Espíritu Santuž azi tjaachiča. Jalla nižtiquiztan ojklaychiča, walinaca paacan, nižaza zajraž tanta žoñinaca liwriican. Jalla nuž paachiča, Yooz Ejpžtan niižtan chicapachaž nuž cjen.

³⁹ Tjapa Jesusaž ojklaytanacami paatanacami cheržcu, jalla nii maz-nasača wejrnacqui, Judea yokaran ojklaytanacami, nižaza Jerusalén wat-jaran ojklaytanacami. Wiruñacqui Jesusaqui cruzquiz ch'awctiquiztan conta ticziča.

⁴⁰ Jalla nuž contiquiztan čhjep majquiztan Yooz Ejpqui Jesusa jacatatskatchiča. Jacatatskatžcu Yoozqui wejtnacaquiz parizizkatchiča.

⁴¹ Jesusaqui parti žoñinacžquiziqui ana parizichiča. Antiz wejtnacaquiz alaja parizichiča. Nižaza jecnacat Yooz Ejp illztčaja, jalla ninacžquiz parizichiča Jesusaqui. Nižaza wejrnacmi Jesusaž jacatattiquiztan niižtan juntu lulassinča, nižaza kjazmi juntu licassinča.

⁴² Nekztanaqui Yooz Ejpqui tii Jesusapacha wali Juez Jiliržquin utchiča. Juez cjen nii Jesús chawc Jiliriqiu žejtñi žoñimi ticzi žoñimi juzjizaquiča. Jalla nii mazmazñijapa wejrnac cuchanžquichiča Jesusaqui.

⁴³ Nižaza tuquitanpacha Yooz taku parliñinacaqui Jesusiž puntuquiztan parlichipanča, tuž cjican: “Jakziltat nii Jesusižquiz tjapa kuztan criyačhaj niiqui ujnacquiztan pertuntaž cjequiča”.

ESPIRITU SANTUZ LUZTA

⁴⁴ Jalla nuž Pedruž chiyan, Espíritu Santuqui tjapa niiž chiita taku nonžni žoñinacžquiz luzziča.

⁴⁵ Jalla nuž cjen nii Pedružtan tjonchi judío žoñinacaqui ispantichi quirchiča, Espíritu Santuqui tjaatazakaztača ana judío žoñinacžquiziqui.

⁴⁶ Espíritu Santo tanžcu, nii žoñinacaqui yekja ana pajta taku chiichiyatča. Nižaza Yoozquin waljaž alawatča. Jalla nižtiquiztan ispantichi cjissiča nii žejlñi judionacaqui.

⁴⁷ Nekztanaqui Pedruqui cjichiča:

—Wejtnacaquiz Espíritu Santo tjaatača. Nižaza tinacžquiz Espíritu Santo tjaatazakazza. Jaziqui tinaca bautista cjisjapa, ¿jec žoñit atajas?

⁴⁸ Jalla nekztanaqui Pedruqui mantichiča, Jesucristuž tjuuquiz tinaca bautista cjeyajo. Nekztanaqui nii žoñinacaqui Pedružquiz rocchiča tsjii kjaž maj ninacžquiz kamt'ajo.

11

PEDRUZ JUDIO ŽOÑINACŽQUIZ MAZTA

¹ Nii Judea yokaran žejlñi illzta apostolonacami, jilanacami, jalla ninacaqui quintu nonchiča, yekja wajtchiz žoñinacaqui Yooz taku catokchiča, jalla nii.

² Pedruqui Jerusalén watja quejžquichiča. Jalla nuž quejptan parti judío criichinacaqui Pedruž quintra chuchchiča,

³ tuž cjican:

—¿Kjažtiquiztan učum lii quintra amqui yekja wajtchiz žoñinacžquin tjonžni ojchamtajo? ¿Kjažtiquiztan učum lii quintra ninacžtan lujlchamtajo?

⁴ Nekztanaqui Pedruqui nii parti judionacžquiz quint'ichiča, jaknužt watchaja primerquiztanpacha Corneliuž puntu, jalla nii. Tuž cjican, quint'ichiča:

⁵ —Wejrqui Jope wajtquin želatuča. Yoozquin mayizican, tsjii chjuužtažoka cherchinča, jalla tižta. Tsjii pajk mantilažtakaz

tsewctan chjiwžquichiča. Niiž pajkpic puntuquiztan žcucžintatača. Jakziquiztažlaj wejrqui, jalla nekz wejr tirichuc irantižquichiča.

⁶ Jalla nuž irantižquitanaqui zumpacha cherzinča, čjulut nii kjuyltan žejl, cjican. Jalla nuž wejrqui cherchinča tjapaman pajkpic kjojchchiz animalanaca, k'it animalanacami, zkoranacami, wežlanacami, jalla nuž cherchinča.

⁷ Nii orazakaz tsewctan tsjii žoňž joražtakaz nonzinča. Wejtquin chižquichiča tuž cjican: “Pedro, tsijtsna. Conžna. Nižaza lujlžna”.

⁸ Wejrzi kjaazinča, tuž cjican: “Wejt Jiliri, nižta anal paasača. Nii punta animala ana luli atasacha, am lii quintrača. Jaziqi nižta anal paasača wejrqui”.

⁹ Jalla nuž kjaaztiquiztanaqui nii joraqui wiltazakaz chižquichiča, tuž cjican: “Yoozqui chiichiča, ‘Zumaž tiiqui lujlžjapa’ cjican. Nii Yooz zuma cjitaqui ana amqui ‘Ana lulasaz’ cjeella. Yooziž chiita taku anam nicz waquiziča, ‘Ana lulasaz. Lii quintrača’ cjicanaqui”.

¹⁰ Jalla nuž čjep wilta watchiča, nekztanaqui nii mantilaqui wayti-tatača tsewchucpacha.

¹¹ Nekztanaqui čjepultan žoňinacaqui weriž alujta kjuyquiz irantižquichiča. Cesarea wajtquiztan cuchantatača wejr kjuri.

¹² Nižaza Espíritu Santuqui wejr mantichiča ninacžtan ana paysnakcan okajo. Nižaza sojtaltan jilanacaqui wejtta chica ojkchiča. Jalla nicju irantižcu, tjappacha wejrnacqui tsjii žoňž kjuyquiz luzazzinča.

¹³ Nižaza nii kjuychiz žoňiqui wejtnacaquiz quint'ichiča, jaknužt niiž kjuyquiz tsjii anjila chertčhaja, jalla nii. Nii anjila tsijtsi cherchiquiča. Nižaza nii anjilaqui niižquiz tuž cjichiquiča: “Jope wajtquin žoňinaca cuchanžca, Simona kjawznajo. Niiž tsjii tjuuqui Pedro cjitača.

¹⁴ Jalla niiqui amquiz chiyaquiča, jaknužt ammi nižaza tjapa am familianacami liwriita cječhaja, jalla nuž”.

¹⁵ Nekztanaqui wejrqui ninacžquiz parli kallantitan, Espíritu Santuqui ninacžquiz luzziča, jaknužt tuquiqui učumnacaquiz luztčhaja, jalla nuž.

¹⁶ Jalla nekztanaqui wejrqui Jesusaž niiž tuqui chiita taku cjuňzinča. Jesucristo Jiliri qui cjichiča, “Juanqui kjaztan bautisňipantača. Ančhucqui antis Espíritu Santužtan bautistaž cjequiča”.

¹⁷ Jesucristo Jiliržquiz criichiž cjen Yoozqui učumnacaquiz Espíritu Santo tjaachiča. Nižta iratapacha Yoozqui ninacžquiz Espíritu Santo tjaachiča. Jaziqi wejrqui anal Yooz quintra cjesača. —Nuž quint'ichiča Pedruqui.

¹⁸ Jalla nii quintu nonztiquiztan nii Jerusalén wajtchiz criichinacaqui ana iya chutchiča. Nužquiz ch'ujquichiča. Yoozquin alawazziča, tuž cjican:

—Nižazakaz yekja wajtchiz žoňinacaqui persun ujnaca pajžcu, nižaza persun kuznaca campiižcu, jalla nekztan ninacaqui persun ujnacquiztan per-tuntazakaz cjequiča. Nižaza wiňaya Yooztan kamaquiča.

CRIICHI ŽOŇINACA WICHANZI

¹⁹ Esteban conžcuqui, yekja Yoozquin criichinaca zakaz walja tanzquin cjissiča. Jalla nuž cjen criichinacaqui yekja watjanacquin atipassiča. Fenicia, Chipre, Antioquía, jalla nii yokanac kjutňi wichanžiča. Jalla nicju liwriiňi Yooz takunaca parličiča. Judío žoňinacžquiz alaja parličiča, ana yekja žoňinacžquiziqui.

²⁰ Yekjapa criichi jilanacaqui Chipre yokquiztan nižaza Cirene yokquiztan ojkchiča. Nekztanaqui nii yokanacquiztan Antioquía watja irantichiča. Nekztan Antioquía wajtquin yekjapa criichinacaqui ana judío žoňinacžquiz parlichizakazza Liwriiňi Jesucristo Jilirž puntu takunacquiztan.

²¹ Jesucristo Jilirž aziqui ninaczquiztača. Nižaza nii parlitiquiztanaqui walja žoñinacaqui tuquita cuzturumpinaca jaytižcu, Jesucristo Jiliržquin tjapa kuztan criichiča.

²² Nekztanaqui Jerusalén iclizziz criichinacaqui nii quintu nonchiča. Jalla nii quintu nonžcu, Bernabé cjita žoñi cuchanchiča Antioquía watja.

²³ Jalla nicju irantižcu, Bernabequi cherchiča, jaknužt Yoozqui nekz žejlñi criichinaczquiz okztčaja, jalla nii. Nii criichinacaqui walja cuntintutača. Jaziqui Bernabequi tjappachquiz chiižinchiča, tuž cjican:

–Yoozquin criichinaca, zuma tjapa kuztan Yooz jiczquiz kamaquiča.

²⁴ Nižaza Bernabequi wali zuma žoñitača. Niiqui Espiritu Santužtan tsjii kuzziztača. Nižaza Yoozquin tjapa kuzziztača. Jalla nuž zuma kamcan walja žoñinaca Yoozquin macjatskatžquichiča Bernabequi.

²⁵ Jalla nekztanaqui Bernabequi Tarso watja ojkchiča Saulo kjuri. Saulo wajtžcu Antioquía chjitchiča.

²⁶ Jalla nicju tsjii wata intiru criichinacztan žejlchiča. Tama žoñinaczquiz Yooz taku tjaajinchiča. Antioquía wajtquiziqui criichinacaqui cristiano tjuuchiz cjissiča. Tuquiqui nižta tjuuchiz ana želatča.

²⁷ Jalla nii timpuqui tsjii kjažultan Yooz taku parliñi žoñinacaqui Jerusalén wajtquiztan Antioquía ojkchiča.

²⁸ Tsjiiqui Agabo cjitatača. Niiqui nii ajczñi criichinacz taypiquiz tsjitsiča. Tsjitscan Yooz Espiritu Santuqui nii Agabo chiikatchiča, tuž cjican:

–Tjapa tii yokquiz wali čhjer mach'a želaquiča.

Jalla tižta watchiča, Claudio cjita chawc jiliriz mantiz timpuqui.

²⁹ Jalla nižtiquiztan nii Antioquía wajtchiz criichinacaqui acuerdo luzziča Judea wajtchiz jilanaczquin tsjii yanapñi cuchanzjapa. Zapa mayniqui jaknužt onanchucažlaja jalla nuž onanchiča, nii Judea wajtchiz criichi jilanaczquin yanapzjapa.

³⁰ Nižaza nii onantanaca apaychiča Judea wajtchiz icliz jilirinaczquin. Bernabežtan Saulužtan nii apayanacaqui chjitchiča.

12

JACOBO CJITA APOSTOL CONTACHA

¹ Jalla nii timpu Herodes cjita chawc jiliri qui yekjap Yoozquin criichi žoñinaca tanchiča.

² Nižaza Herodesqui Jacobo conkatchiča pajk cuchillžtan. Jacobqui Juanž jilatača.

³ Jalla nuž contiquiztanaqui judío žoñinacaqui muzpa chipchipchiča. Jalla nuž nayžcu Herodesqui Pedro preso tanchizakazza. Jalla nii oraqui ana liwaturchiz t'anta lujlz pijjstatača.

⁴ Pedro preso tantiquiztan, carsilquiz chawctatača. Carsilquiz pajkpic t'ak zultatunaca wijilñi uchtatača. Zapa t'akaqui pajkpic zultatuchiztača. Pascua pijjsta pastanalla Herodesqui Pedro jwes pinsichiča, nii Jerusalén wajtchiz žoñinaczquiz tjeezjapa.

⁵ Nuž Pedruqui tirakaz carsilquiz chawcta želatča, zultatuž cwitita. Nii parti Yoozquin criichi jilanaca cullaquinaca niižtajapa walja tjapa kuztan Yoozquin mayizatča.

PEDRO CARSILQUIZTAN LIWRITA

⁶ Jaka tažuqui Herodesqui Pedro jwes pecatča žoñinaczquiz tjeezjapa. Ima jwesan nii ween Pedruqui tjajatča, carinžtan čhejlta pucultan zultatž taypiquiz. Yekja zultatunacaqui carsil zanquiz wijilatča.

⁷ Jalla nii weenpacha tiripintit Yooz anjilaqui tjonchiča. Nižaza nii carsil kjuyltan muzpa waljaž kjančiča. Nekztanaqui nii anjilaqui Pedruž latuquiztan lanziča. Nuž lanžcu tjaji wajtskatchiča. Nekztanaqui Pedružquiz paljaychiča:

—Uri žaažna, —cjican.

Jalla nii orapacha Pedruž kjara čejlta carinaqui jutztoka tjojsiča.

⁸ Nižaza nii anjilaqui cjichiča:

—Cinturuna zumpacha yajkzna. Nižaza am čhjata čhjatzna.

Jalla nuž Pedruž paan, nii anjilaqui cjichiča:

—Am irs irsna. Wejt wirquiz apžca.

⁹ Nekztanaqui Pedruqui anjilž wirquizpacha ulančiča carsilquiztan. Nii ora Pedruqui werara ana werara, ana zuma zizi atchiča. “Chjuuznoka wejrqui” cjican pinsatča.

¹⁰ Jalla nekztanaqui primera wijilni zultatu watchiča. Nekztanaqui nii jaru wijilni zultatu watchizakazza. Nekztanaqui carsil zanquin irantichiča. Nekztan carsil jir chawjczqui jutztoka cjetsiča. Jalla nekztanaqui callquinpacha ulančiča, nižaza ojkchiča. Jalla nuž cjen yekja callquin zina ectača. Anjilaqui nužquiz juttokaz katchiča.

¹¹ Pedruqui nekztan zumpacha naaziča, carsilquiztan liwriita, nii. Nekztanaqui cjichiča:

—Ultim werara liwriitaž wejrqui. Anal chjuuznukalala. Wejt Yooz Ejp Jiliri qui niž anjila cuchanžquichiča wejr liwriizjapa Herodes kjarquiztan, nižaza nii anawali paaz pecni judío žoñinacž kjarquiztan.

¹² Jalla nuž pinsican, Pedruqui María kjuya ojkchiča. Naa Marii qui Juanž maatača. Juanž tsjii tjuuqui Marcos cjitazakaztača. Jalla naaža kjuyquin walja Yoozquin criichi žoñinacaqui ajczitača, nii ora Yoozquin mayizatča.

¹³ Pedruž kjuy patio zana t'okt'okan, tsjaa tur cullaqui Rode cjeti ulanžquichinča, ject tjonchi, cjican.

¹⁴ Pedruž jora čhajzcu, ancha cuntintu zajtchinča partinacžquin mazni, Pedruča tjonchi, cjican. Tjatzintača, nii patio zana cjetzinž.

¹⁵ Nii quintu nonžcu, criichi žoñinacaqui cjichiča:

—¡Amqui lucurata mčha!

Jalla nuž chiyani, naaqui werarapanča cjichinča. Nii partinacazti cjichiča:

—Anaž nii cjesača. Niiž animužlani anjilažlaj.

¹⁶ Pedruzti tira zanquiz t'okžinčiča. Nekztan chawjcz cjetžinčiča. Pedro cheržcu, walja tsucchi cjissiča.

¹⁷ Pero Pedruqui kjaržtan siñala utchiča nii ajczi žoñinaca ch'uj cjeyajo. Jalla nekztanaqui Pedruqui quint'ichiča, jaknužt Yoozqui nii carsilquiztan liwriitčhaja, jalla nii. Nižaza cjichiča:

—Ančhucqui nužuzakaz quint'aquiča Jacob jilžquin nižaza parti criichinacžquin. Wejr okaž, —cjichiča.

Jalla nekztanaqui Pedruqui ulančiča, yekja kjutni ojkzjapa.

¹⁸ Tjuñiž tewjctanalla, Pedro ana žejlni cheržcuqui, nii wijilni zultatunacaqui ancha tsucchiča, nižaza kuz turwayskatchiča. Pedruqui jaknužt ulantčhaja, jalla nii ana wira jaknuž zizi atchiča.

¹⁹ Nekztanaqui Herodesqui Pedro kjuri cuchančiča. Ana wachi atchiča. Jalla nekztanaqui Herodesqui nii wijilni zultatunacžquiz zumpacha pewcpewcziča. Jalla nuž pewc pewczcu, nii zultatunaca conajo mantichiča. Jalla niž wiruñ Herodesqui Judea yokquiztan ojkchiča, Cesarea wajtquin želi.

HERODES TICZICHA

²⁰ Herodesqui žawjchiča Tiro Sidón wajtchiz žoñinacž quintra. Jalla nižtiquiztanaqui ninacaqui acuerdo palt'ichiča Herodes yujcquiz prisintisjapa. Nii Tiro Sidón watjanacchiz žoñinacaqui Herodes tjaata čhjeržtan kamñitakalča. Nižaza tsjii Blasto cjita žoñi želatča. Niiqui Herodes secretariotača. Jalla nii žoñinacaqui Blasto cjita secretario roct'ichiča ninacžta favora tjurt'ižinajo, Herodes ana quintra cjeajo.

²¹ Herodesqui tsjii tjuñi citchiča ninaca nekzi prisinti cjeajo. Jalla nii cita tjuñquiziqui Herodesqui niž wali jilir zquti cujtsiča audiencia watzjapa. Jalla nuž zquti cujtžcu, niž mantiñi sillquin julziča. Nekztanaqui tsjii kjaž takunaca chiichiča.

²² Jalla nuž chiitiquiztanaqui nii nonzñi žoñinacaqui kjawi kallantichiča, tuž cjican:

–Tii chiiñi žoñiqui anača ina žoñi. ¡Antis yoozpanča!

²³ Jalla nuž kjawtiquiztan Herodesqui cuntintutača, nii žoñinacž kjawta taku ana nicz pecatča, “Anača wejrqui Yooztqui” cjicanaqui. Ana werar Yooz Ejpžquin honora tjaachiča. Jalla nižtiquiztan nii orapacha Yooz Ejp Jiliriqi niž anjila cuchanžquichiča, Herodes chawc laa cjisnajo. Jalla nekztanaqui nuž laacjžcu Herodesqui lak'už liwj mirta ticziča.

²⁴ Pero nii liwriñi Yooz takuqui tjapa kjutñi parlita cjissiča. Nekztanaqui tsjan tsjan žoñinacaqui tjapa kuztan nii parlita Yooz taku criichiča.

²⁵ Bernabežtan Saulužtan nii pucultanaqui apayta onantanaca intirjižcu, Jerusalén wajtquiztan Antioquia quejpcichiča. Nižaza Juan chjichcu ojkchiča. Juanqui niž tsjii tjuuqui Marcos cjitazakaztača.

13**BERNABEZTAN SAULUŽTAN CUCHANTA**

¹ Antioquia wajtchiz Yoozquin criichi žoñinacžquiztan Yooz puntu tjaa-jiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjitazakaztača), Lucio (Cirene wajtchiz žoñitača), nižaza Manaén (niiqui junto pajkchiča Herodestan. Herodesqui Galilea kjuttan mantiñitača).

² Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espiritu Santuqui ninacžquiz cjichiča:

–Ančhucqui Bernabé nižaza Saulo yekja t'akžina, weriž munta trabajo paañijapa.

³ Jalla nekztanaqui Yoozquin mayizizcu, nižaza ayunascu, nii Yoozquin criichinacaqui Bernabežtan Saulužtan ninacž juntuñ kjaržtan lanziča. Nekztanaqui nii pucultanaqui cuchanchiča, Yooz trabajo trabajžcajo.

BERNABEZTAN SAULUŽTAN CHIPRE YOKQUIN OJKTA

⁴ Nekztanaqui Espiritu Santuž cuchanžquitan Bernabežtan Saulužtan ojkchiča Seleucia cjita watja. Jalla nicju warcu zalchiča Chipre cjita yoka ojkzjapa.

⁵ Jalla nicju irantižcu Salamina cjita watja luzziča. Jalla nicju judionacž ajcz kjuyanacquiz Yooz taku parli kallantichiča. Juan Marcos ojkchizakazza ninaca yanapi.

⁶ Tjapa nii Chipre cjita yokaran ojklaychiča. Nižtami Pafos cjita watja irantichiča. Jalla nicju tsjii judío žoñžtan zalchiča. Nii žoñiqui Barjesús cjitatača. Nii žoñiqui laykatakalča. Nižaza toscara chiiñitakalča, “Wejrqui Yooz taku chiichiyuča” cjiñitakalča.

⁷ Jalla nii layka žoñiqui chawc jiliri Sergio Paulo cjita niižtan chicatakalča. Jalla nii jiliriQUI cusa zizñi žoñitača. Nii žoñiqui Yooz taku nonz pecatča. Jalla nižtiQUIZtan Bernabežtan Saulužtan kjawskati cuchanchiča.

⁸ Nii layka žoñiqui ninacž quintra chiichiča, nii jiliriQUI ana Yooz taku nonznajo, nižaza Yoozquin ana kuzziz cjeYajo. Nii layka žoñž tsjii tjuuQUI Elimas cjitazakaztača.

⁹ Nižaza Sauluž tsjii tjuuQUI Pablo cjitazakaztača. Nii PabluQUI Espiritu Santuž irpitapantača. Nii layka žoñiž Yooz tawk quintra chiitiQUIZtan, PabluQUI nii žoñž kjutñi zumpacha cherziča,

¹⁰ tuž cjican:

–Amqui anawalimča. Incallñamča. Amqui zajriž maatiMča. Nižaza Yooz kuz quintraMča. Amqui Yooz Ejpž taku tsjii kjutñi intintiskatz pecñampanča. ¿KjažtiQUIZtan nižta amjo?

¹¹ Jaziqui Yooz Ejp JiliriQUI am casticaQUIča. Zuram cjeQUIča. Tsjii kjaž maj tii tjuñ sii anam cheraQUIča.

Jalla nii orapacha zura cjissiča, zumchiquizpan. Ana zinta cheri atžcu, nii layka žoñiqui tsjii žoñi kjurchiča nižž kjarcu tanžcu chjichñijapa.

¹² Jalla nižta cheržcu, nii chawc jiliriQUI Yoozquin criichiča. Yooz taku puntu tjaajintiQUIZtan walja ispantichi quirchiča nii jiliriQUI.

ANTIOQUIA OJKTA

¹³ Jalla nekztanaQUI PabluQUI nižž mazinacžtan warcu zalchiča Pafos watjtQUIZtan ojkzjapa. Nekztan Perge cjita watja irantichiča. Perge watjaQUI Panfilia yokQUINTača. Nekztan JuanQUI ninaca ecchiča, Jerusalén watja quejPžquichiča.

¹⁴ NekztanaQUI ninacaQUI PergeQUIZtan watchiča AntioQUIa watja. AntioQUIa watjaQUI Pisidia yokQUINTača. Jalla nicju tsjii jeejz tjuñQUIZ luzziča tsjii judionacž ajcz kjuyQUIZ. NekztanaQUI luzcu, julziča.

¹⁵ Jalla nuž želan cjiJrta Yooz tawk liwruQUI liitatača, Moisés cjiJrta Yooz takumi, nižaza Yooz cuntiquIZtan chiiñi profetanacaž cjiJrta takumi, jalla nii liitatača. Jalla nuž liižcu ajcz kjuy jilirinacaQUI BernabežQUIZ PablužQUIZ chiyajo nuž cjichiča, tuž cjican:

–Jilanaca, ančhucalta tsjii zuma taku želanaQUI, anzpachaž chiya.

¹⁶ NekztanaQUI PabluQUI tsijtsiča. Nižaza kjara waytižcu ch'uj cjiSkatchiča. Jalla nuž ch'uju želan, paljaychiča tuž cjican:

–Israel wajtchiz žoñinaca, nonžna. Nižaza werar Yooz rispitiñi žoñinaca, nonžna.

¹⁷ Israel wajtchiz žoñinacž Yoozza werar YoozQUI. Jalla nii YoozQUI učhum tuQUITA atchi ejpnaca illziča nižžquin sirwajo. Nii timpuquin Egipto yokquin tirapan kamchiča yekja wajtchiz žoñinacažtakaz. Jalla nižta želanami YoozQUI walja mirkatchiča. WiruñauQUI Yooz EjpQUI nižž azi tjeezcan jwezquichiča nii yokQUIZtan.

¹⁸ Pusi tunc watanaca ch'ekti yokaran ojklayan, YoozQUI ninacž anawali kamzQUIZtan awantichiča.

¹⁹ Nii timpupacha pakallak nacionanacaQUI Canaán yokquin žejlñitača. Jalla tjappacha nii yokQUIZ žejlñinaca tjatanchiča YoozQUI, nižaza ninacž yoka tjaachiča učhum tuQUITA atchi ejpnacžQUIZ, tsjii irinsažtakaz.

²⁰ NekztanaQUI pusi patac pjijska tuncan watanaca juezanaca utchiča učhum ejpnacžQUIZ mantiñijapa, Samuelž timpu irantisquIZcama. SamuelQUI Yooz cuntiquIZtan chiiñi profetatača.

²¹ Jalla nii Samuelž timpuquiz učum ejpnacaqui tsjii pajk jiliri maychiča ninaca irpiñijapa. Jalla nuž maytiquiztan Yoozqui Saúl illziča ninaca mantiñijapa. Nii Saúlqui Cis majchtača, nižaza Benjamín t'akquiztantača. Nii Saúlqui pusi tunc watajapa mantiñitača.

²² Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yooz-pachača tuž cjichiqui: “Wejrqui tii David cjita žoñi nayučha Isaíz majchča. Tii žoñiž cjen ancha cuntintutča. Wejt kuzcamapanikaz kamñipanča tiiqui”. Jalla nuž cjichiča Yoozqui.

²³ Tsjii Davidžquiztan majchmaati ojkñiqui Jesusa cjitača. Tuquiqui Yoozqui taku ecchiča Israel wajtchiz žoñinaca liwriizjapa. Jalla nii taku cumplisjapa, Yoozqui tii Jesusa cuchanžquichiča Israel žoñinacžquiz.

²⁴ İma Jesusaž Yooz langz kalltan, Juanqui tjapa Israel žoñinacžquiz parliñitača, tuž cjican: “Ančhucqui persun ujnaca pajžcu, kuznacaž campiya, nekztan bautistaž cjesača”.

²⁵ Juanž ticz tjuñi žcatžinzcan, Juanqui cjichiča: “Ančhucqui jaknužt wejt puntuquiztan pinsiçhaja, niiqui anača niit wejrqui. Wejt wirquin tjonča tsjiiqui, wejtquiztan juc'ant jiliriča. Nii atintizjapa, anal waquizuča, nižaza wejrqui inakaztča.”

²⁶ Jilanaca, Abrahamž majchmaatinaca, nižaza Yooz rispitsñinaca, ančhucqui nonžna. Ančhucaltajapaž tii liwriiñi Yooz taku žejlča.

²⁷ Jalla nii Jerusalén wajtquiz kamñi žoñinacami, nižaza niž jilirinacami, jecçhalaja Jesusaqui, nii ana zizatča. Zapa jeejz tjuñquiz judionacž ajcz kjuyquin tuquita profetanacž cijrta taku liiñipanča. Jalla nuž liyanami nii taku anaž intintazñipantača. Nii žoñinacapachača tuquita Yooz taku cumpliskatchiqui, Jesusa conta cjiskatchiča, nuž.

²⁸ Nii Jesusižquiz ana çhjul ujmi watchiča, nii conzjapaqui. Jalla nuž cjenami ninacaqui Pilato chawc jiliržquiztan maychiča, nii Jesusa conzjapa.

²⁹ Nekztanaqui Jesusiž puntuquiztan jaknužt tuquitanpacha Yooz tawk liwruquiz cijrtatažlaja, jalla tjapa nii cijrta takunaca cumplissiča. Nii taku cumplistiquiztan Jesusiž curpu cruzquiztan apakchiča. Nekztanaqui niž curpu tjattatača.

³⁰ Yooz Ejpzti Jesusa ticziquiztan jacatatskatchiča.

³¹ Nekztanaqui tsjii kjaž majquiztan Jesusaqui niž mazinacžquiz tjonzonziča. Niiž mazinacaqui nižtan chica ojkchiča Galilea yokquiztan Jerusalén watja. Nižaza ninacaqui anziqui žoñinacžquiz niž puntuquiztan tiraž parliča.

³² Jaziqui Yoozqui učum tuquita atchi ejpnacžquiz taku ecchiča. Wejrnaqui nii cumplista takunaca zjiçchinča ançhucaquiz mazjapa. Jalla nii zuma mazta ançhucaquiz parluča. Yoozqui učum ejpnacžquiz taku ecchiča.

³³ Učumqui nii tuquita atchi ejpnacžquiztan tjonchinča. Učumnacalta Yoozqui niž ecta taku cumplissiča, Jesusa jacatatskatchiqui, nii. Nižaza nižtapacha segundo salmuquiz cijrtatača tuž cjican: “Amqui wejt maatimča. Tonj tjuñi žejtkatchinča”.

³⁴ Nižaza Yooz Ejpqui niž jacatatz puntuquiztan chiichiča, tuž cjican: “Ticziquiztan am curpu jacatatskatača, ana wira sipulurquiz mojkzjapa”. Jalla nii puntuquiztan chiiča cijrta Yooz takuqui, tuž cjican: “Yoozqui Davidžquiz taku ecchiča, jalla nii tawk jaru ançhucaquiz zuma favora paasača Yoozqui”.

³⁵ Jalla nužpan chiiča tsjii salmuquiziqui, tuž cjican: “Am zuma sirwiñiž curpu ana ecta cjesača mokajo”.

³⁶ Jalla nuž werarača. Davidqui niiz timpu žejlñi žoñinacžquiz yanapchiča, jaknužt Yooz mantičhaja, jalla niicama. Nekztanaqui Davidqui ticziča niiz ejpnaca irata. Nekztan niiz ticzi curpu tjattiquiztan mojkchiča.

³⁷ Jesucristuzti Yooziž jacatatskatchiča. Niiž curpuzti ana mojkchiča.

³⁸ Jilanaca, ančhucqui tuž ziz waquiziča. Jesusiž cjen ujnaca pertuntaž cjesača. Jalla nii zuma taku ančhucquiz parluča.

³⁹ Moisés mantita lii jaru kamcanami, ana pertunta cjisñi atča. Jesusižquiz macjatchi cjenacqui jalla nižtakaz tjapa ujnacami pertuntaž cjesača.

⁴⁰ Jaziqui ančhucqui cwit'aza, ana nii tuquita cjiirta casticu sufrisjapa. Tuquitan Yooz taku parliñi profetanacaqui cjiirchiča, tuž cjican:

⁴¹ “Nonžna, Yooztan quintražñinaca, azzucaž ančhucqui, nižaza chjatkatchucaž ančhucqui. Wejrqui Yooz Ejptča. Ančhucacami kamz timpuquiz wali pajk obranaca paachinča. Jalla nuž ančhucquiz quint'ichi cjenami ančhucqui ana criyasača. Jalla nižtiquiztan ispantichi cjisna, nižaza casticta cjequiča, ančhucqui Yooz quintra tjasñinaca”.

⁴² Nuž chiižcu Pabluqui niiz mazinacžtan judionacž ajcz kjuyquiztan ulančiča. Yekjap ana judionacž ejpchiz žoñinaca želatča. Jalla ninacaqui roct'azziča, tuž cjican:

–Tii jar jeejz tjuñquiz tii puntunacquiztan wejtnacaquiz wilita tjaaznalla.

⁴³ Nii ajcz kjuyquiz nii cultu žeržcu walja judío žoñinaca, nižaza judiož cuzturumpi paañinaca, jalla ninacaqui Pablužtan Bernabežtan chica apziča. Nii pucultanaqui zuma taku tjaachiča, tuž cjican:

–Ančhucqui Yoozquin tjapa kuztanž cjee. Nižaza tjurt'iñi kuzziz cjee.

⁴⁴ Jalla nii wiruñta jeejz tjuñquiziqui joz tjapa nii wajtchiz žoñinacaqui ajcziča Yooz taku nonzjapa.

⁴⁵ Jalla nuž ajczi cheržcu, nii judío žoñinacaqui iñizichiča. Nekztanaqui Pabluž quintra chiichiča, niiz taku ana walkatzjapa. Nižaza Pablo iñarchiča.

⁴⁶ Nekztanaqui Pablužtan Bernabežtan ana ekskucchiichiča, tuž cjican:

–Ančhucqui judío žoñinacžhucča. Nižtiquiztan ančhucquiz primeracqui tii liwriiñi Yooz taku chiistanča. Ančhuczti tii Yooz taku anaž nonz pecča. Nižaza Yooziž tjaata wiñaya žeti anaž risiwz pecča, jalla nuž tantiichinčhucča ančhucqui. Jalla nižtiquiztan anzičiqui ana judío ejpchiz žoñinacžquiz tii Yooz taku paljayača.

⁴⁷ Jalla nuž mantichiča Yooz Ejp Jiliriqui, tuž cjican:

“Wejrqui ančhucquiz utchinča, tjapa nacionanacquin žoñinacžquiz wejt puntu kjanzt'ajo. Ančhucacami cjen tjapa kjuttan tii muntuquiz yok tjiiquin kamñi žoñinacami liwriitaž cjequiča”.

⁴⁸ Jalla nuž nonžcu, nii ana judío ejpchiz žoñinacaqui ancha chipchiča. Nižaza Yooz tawk puntuquiztan, tuž cjichiča: “Tii Yooz takuqu zuma panča”. Jakziltat arajpachquin wiñaya kamzjapa Yoozqui illzaja, tjapa ninacaqui nii parlita Yooz taku criichiča.

⁴⁹ Tjapa yokaran Jesucristo Jilirž puntuquini parlitatača.

⁵⁰ Judío žoñinacazti quintra aptazziča. Nekztan ninacaqui tsjii kjaž rispitta judío cuzturumpi paañi maatakanacžtan, nižaza tsjii kjaž wali zuma rispitta wajt jilirinacžtan palt'ichiča. Nii judío žoñinacaz cjen ninacaqui Pabluž nižaza Bernabež quintra aptazzizakazza, nii yokquiztan chjatkatzcama.

⁵¹ Jalla nižtiquiztan Pablužtan Bernabežtan ninacž kjojchquiztan zcatchi pulpu tsajtsiča. Jalla nii tsajtstaqui tsjii siñalažtakaztača nii wajtchiz žoñinacž quintrajapa. Nii yokquiztan ulanžcu, Iconio cjita watja ojkchiča.

⁵² Pero nii Yooz taku catokñi žoñinacaqui ancha cuntintutača. Nižaza Espiritu Santuž irpitapanž cjissiča.

14

ICONIO WATJA OJKTA

¹ Iconio cjita wajtquin kamcan Pablužtan Bernabežtan luzziča nii judionacž ajcz kjuyquin. Nekztan Jesucristuž puntuquiztan parlitiquiztan, walja judío žoñinacžtan, nižaza ana judío žoñinacžtan, walja ninacaqui Yoozquin criichiča.

² Pero nii ana criichi judío žoñinacžti ana criiz pecchipantača. Nekztan ninacaqui parti žoñinaca Yoozquin criichinacž quintra aptazziča, nižaza criichinacž quintra pinsiskatchiča, “Nii Yoozquin criichi žoñinacaqui anawalipanča” cjicanaqui.

³ Jalla nižtiquiztan Pablužtan Bernabežtan ažk tjuñi kamchiča nii wajtquin. Nižaza zuma tjurt'iñi kuzziz paljaychiča. Nižaza Jesucristo Jiliržquin tjapa kuzziztača. Jalla nižtiquiztan Jesucristuqui azi tjaachiča, siñalanacami milajrunacami paajo. Jalla nuž paatiquiztan kjanapacha tjeežtatača, Yooz okzñi takuqui werarača, jalla nii.

⁴ Nii wajtchiz žoñinacaqui pizc partiquin t'akziča. Parti žoñinacžti judío žoñinacžquin apuychiča. Parti žoñinacžti apostolonacžquin apuychiča.

⁵ Jalla nekztanaqui judío žoñinacaqui parti žoñinacžtan, nižaza nii wajt jilirinacžtan, tsjii parla asiptichiča Pablo Bernabé ch'aanjzjapa, nižaza ninaca maztan čhajczjapa.

⁶ Pablužtan Bernabežtan jalla nii quintu zizcu, atipassiča. Listra wajt kjutñi ojkchiča. Nižaza Derbe wajt kjutñi ojkchizakazza. Nii pizc watanacaqui Licaonia cjita yokquintača.

⁷ Tjapa nii Licaonia yokaran zuma liwriiñi Yooz taku parličiča.

PABLO MAZTAN ČHAJCTA

⁸ Nii Listra wajtquin tsjii zuch žoñi želatča. Majttiquiztanpacha nižtapantača, wira ana ojklayñitača. Jalla nicju julzi želatča.

⁹ Nii zuch žoñiqui Pabluž čiita taku nonziča. Nii žoñiqui “Pabluqui wejr čhjetnasaž jaz” cjican pinsichiča. Nižaza Pabluqui niž kuzquiz naychiča, Yoozquin tjapa kuzziz cjeta, jalla nii.

¹⁰ Jalla nižtiquiztan Pabluqui nižquiz zuma chekžcu, altu joržtan chiižinchiča, tuž cjican:

–Sok'opacha tsijtsna, am persun kjojchtan.

Jalla nižta čiitiquiztanaqui nii zuch žoñiqui tsjii layzcu tsijtsiča, nekztan ojklayi kallantichiča.

¹¹ Jalla nii Pabluž paata cheržcu, žoñinacaqui walja kjawi kallantichiča. Licaonia tawkquiztan kjawchiča tuž cjican:

–Yooznacaqui žoñižtakaz tsewctan chjijwžquichiča učumnacaquiz.

¹² Nii žoñinacaqui cjetča, Bernabequi Júpiter cjita yoozza. Pabluqui parliñipantača, jalla nuž cjen nii žoñinacaqui cjichiča, Pabluqui Mercurio cjita yoozza.

¹³ Wajt tjiiquin Júpiter yooz timpluquiz želatča. Nii timplu fabriqueruqui wac turunaca nižaza pjajkjallanaca zjijcchiča, wajt zanzquiz, jalla nekz. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča.

¹⁴ Nekztanaqui Pablužtan Bernabežtan jalla ninacaqui nižta paa-awc cjen naaziča. Jalla nuž naažcu persun zquiti wjajrsiča, anal nii pecuča cjican.

Nižaza nii žoñinacž taypiquin kjawcan luzcu, altu joržtan chiichiča, tuž cjican:

¹⁵ —Žoñinaca, ¿kjažtiquiztan wejtnacaltajapa tižta paajo? Wejrnacqui ančhuca irata žoñizakaztča. Ančhucqui jalla tižta paaz cuzturumpinaca jaytiz waquiziča. Inapanikazza tii ančhuc cuzturumpinacaqui. Werar žejtñi Yoozza tjapa kuztanqui sirwizqui. Jalla nuž cjican ančhucaquiz mazñi tjonchinča. Nii werar Yoozqui paachiča arajpacha, yokanaca, kotanaca, nižaza tjapa žejlñinaca paachiča.

¹⁶ Tuqui timpuqui žoñinacaqui persun kuzcama ojklayñitača. Jalla nuž ojklayan Yoozqui ana kjaž cjiñitača.

¹⁷ Yoozqui chijñi apayžquiča, zuma zkala pookajo. Nižaza Yooz cjen wali čheri žejlča, učumnaca lujlžjapami, nižaza cuntintu kamžjapami. Jalla nuž zumanaca tjaača Yoozqui. Nižtiquiztan žoñinacaqui Yooz pajz waquiziča.

¹⁸ Jalla nuž chiyanami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman tii custurumpinac-quiztan apatatskatchiča. Ultimquiziqui nižtami ana wilana conchiča.

¹⁹ Jalla nekztanaqui tsjii kjaž judionacaqui tjonchiča Antioquía wajtquiz-
tan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinchiča Pabluž quintra. Nekztanaqui maztan Pablo muzpa čhajcchiča. Nekztan nii čhajcñi žoñinacaqui, “Ticziča” cjican Pablo wajtž tjiya joochiča.

²⁰ Wajtž tjiuquin ectaž cjen jalla nekzi criichinacaqui ajcziča Pabluž muy-
tata. Jalla nuž želan, Pabluqui žaaziča. Nekztan wajtquin wilta luzziča. Nekztanaqui jaka tažuqui Bernabežtan Pablužtan ojkchiča Derbe cjita wajt kjutñi.

²¹ Jalla nicju zuma liwriiñi Yooz taku paljaychiča. Jalla nuž paljayan walja žoñinacaqui Yooz taku criichiča. Nekztanaqui Listra Iconio Antioquía nii watjanac kjutñi quejpchiča.

²² Jalla nii watjanacquin Pablužtan Bernabežtan Yoozquin criichi žoñinaca
tjurt'iñi kuzziz cjisjapa walja chiižinchiča, tuž cjican:

—Yoozquin kuzzizpankaz tira kamaquiča. Yooz mantuquiz kamchiž cjen, tii muntuquiz ancha sufrispanča učumnacaqui.

²³ Nižaza zapa iclizquin jilirinaca nombrichiča. Nekztanaqui Yoozquin mayizizu ayunazcu Pabluqui nii nombritanaca Yoozquin cumpjiichiča. Nii nombrita jilirinacaqui Yoozquin tjapa kuzziztača.

PABLUŽTAN BERNABEŽTAN ANTIOQUIA QUEJPCHICHA

²⁴ Jalla nekztanaqui Pabluqui Bernabežtan Pisidia cjita yokaran watchiča. Nekztanaqui Panfilia cjita yokquin irantichiča.

²⁵ Jalla nicju Perge wajtquin Yooz taku paljaychiča. Nekztanaqui Atalia cjita wajt kjutñi ojkchiča.

²⁶ Jalla nicju warcu zalchiča, Antioquía ojkzjapa. Tuquiqui ima okan, Antioquía wajtchiz criichinacaqui Pablužtan Bernabežtan, nii pucultan Yoozquin cumpjiichiča Yooz taku paljayajo. Jalla nuž Yooz taku paljayz trabajo žeržcu, Antioquía watja quejpchiča.

²⁷ Jalla nicju irantižcu, Pabluqui Bernabežtan nii wajtchiz criichinaca juntaskatchiča. Nekztan nii criichinacžquiz quint'ichiča, tjapa Yooz az-
tan paatanaca. Nižaza quint'ichiča, jaknužt yekja wajtchiz žoñinacaqui Yoozquin criichiča; nižaza Yooz jiczquiz luzziča.

²⁸ Nižaza ažk tjuñinaca Pablužtan Bernabežtan nicju žejlchiča criichi-
nacžtan.

15

JERUSALENQUIN AJCZTA PUNTU

¹ Jalla nii timpuqui tsjii kjaž žoñinacaqui Judeaquiztan Antioquía ojkchiča. Jalla nicju ninacaqui Yoozquin criichinacžquin tjaajñi kallantichiča, tuž cjican:

—Moisés mantita cuzturumpinaca paastanča, liwriita cjisjapa.

² Pablužtan Bernabežtan nižta tjaajiñi žoñinacžtan walja ch'ayi ch'ayi parličiča nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacžtan nombrita cjissiča, Jerusalén watja ojkejapa. Jalla nicju nii parlita puntuquiztan wilta parlaquiča apostolonacžtan nižaza icliz jilirinacžtan.

³ Jalla nijapa nii Antioquía criichinacaqui ninaca cuchanchiča. Jalla nuž ojkan, Fenicia yokaran Samaria yokaran watchiča. Jalla nuž wajtcan Pablužtan Bernabežtan quint'ichiča, jaknužt yekja nacionchiz žoñinacaqui ninacž tuquita cuzturumpinaca jaytičhaja, nižaza jaknužt Yoozquin kuzziz cjistčhaja, jalla nii quint'ichiča. Jalla nii quintu nonžcu žoñinacaqui “Ancha cuzala” cjican cjichiča.

⁴ Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapauntu Pablužtan Bernabežtan risiwchiča. Jalla nekztanaqui Pabluqui Bernabežtan quint'ichiča jaknužt ninacaqui Yooz aztan paatčhaja, jalla nii.

⁵ Nekztanaqui yekjap fariseo partiquiztan criichinacaqui tsijtsiča, tuž cjican:

—Nii yekja nacionchiz criichinacaqui judionacž chimpuz custurumpi jalla nii paastanča. Nižaza Moisés mantita liicama kamla.

⁶ Jalla nekztanaqui apostolonacami icliz jilirinacami ajcziča jalla nii puntu parlijapa.

⁷ Jalla nuž ažkpacha ch'ayi ch'ayi parližcu, Pedruqui tsijtsiča, tuž cjican:

—Jilanaca, ančhucqui tižta zizza. Tuquiqui Yoozqui ančhucacuztan wejr illzipanla, yekja nacionchiz žoñinacžquiz nii zuma liwriiñi Yooz taku paljayajo, ninaca nii liwriiñi taku criyajo.

⁸ Nižaza Yooz Ejpqui tjapa žoñinacž kuz zuma zizza. Nii yekja nacionchiz žoñinaca ciiñi kuzziz cjen, Yoozqui ninacžquiz Espíritu Santo luzkatchiča. Jaknužt učumnacaquiz Espíritu Santo luzkattčhaja jalla nužuzakaz. Nižaza Espíritu Santo tjaacan, Yoozqui tjeeziča, yekja nacionchiz criichinaca persun maati cunta ricujchizakazza, jalla nii.

⁹ Yoozqui ninacžtan učumnacatan ana pjalpjalziča. Yoozquin tjapa kuz cjen ninacaqui kuz campiichiča. Nižaza Yoozqui ninaca pertunchiča, zuma kuzziz cjeajo.

¹⁰ Jaziqui Yooz Ejpqui nižta munchiča. Ančhucqui Yooz quintraj cjequičiž niiqui, casticta cjequiča. Ančhucqui nii yekja wajtchiz criichinaca učum cuzturumpi tjuz pecča, tsjii liczi kuzižtakaz. Učumpachaž nii cuzturumpinaca ana tjapa payi atchiča, nižaza učum tuquita atchi ejpnacžquiztanpacha ana tjapa payi atchiča. Jaziqui, ¿kjažtiquiztan nižta ninaca paakatz pecjo?

¹¹ Nii cuzturumpi paañiž cjen anaž jakziltami ujnacuztan liwriita cjesača. Jesucristo Jiliričiqui okzñi kuzziz cjen žoñinacž laycu ticziča. Jalla nižtiquiztan Jesucristužquin criichiž cjen učumnacami ninacami ujnacuztan liwriita cjesača.

¹² Jalla nuž Pedruž chiitiquiztan tjappacha ch'uju cjissiča. Nekztanaqui Pablužtan Bernabežtan ninaca quint'ichiča, jaknužt yekja nacionanacaran ojklaycan Yooz aztan siňalanacami milajrunacami paatčhaja, jalla nii.

¹³ Jalla nuž quint'i žeržtan, Jacoboqui cjichiča:

—Jilanaca, nonžna.

¹⁴ Simón Pedruqui učumnacaquiz quint'ichiča jaknužt tuquiqui Yoozqui persun maati cunta ana judío žoňinaca ricujchižlaja, jalla nii.

¹⁵ Nižaza Yooz taku parliňi profetanacž cijjrta tawk jaručha niiqui. Cjijrta Yooz takuqui tuž cjiča:

¹⁶ “Tii wattanaqui quejpžcača. Davidž kjuyquiztan ojkňi žoňinacaqui pajlzi kjuyažtakaz žejlča. Jaziqui Davidž pajlzi kjuyaqui wital kjuyača. Wital waytača, ew žoňinaca cjisjapa.

¹⁷ Jalla nekztanaqui tjapaman nacionchiz žoňinacaqui Yooz Ejp Jilirž kamaňa pecaquiča. Jakziltat Yooz kjawztažlaja, jalla nii žoňinacaqui Yoozquin tjon-aquiča.

¹⁸ Jalla nuž cjichiča Yooz Jiliriqui tuqui timpuquiztanpacha, žoňinacaž zizajo”.

¹⁹ Jalla nižtiquiztan wejr cjiwča. Nii ana judío žoňinacaqui ana molistis waquiziča. Ninacaqui ninacž tuquita cuzturumpinaca jaytichiča, Yooz kuzcama kamzjapa. Jalla nuž cjenauqui ana kjaž cjis waquiziča, nii učum cuzturumpinaca paaz puntuquiztan.

²⁰ Tiikaz učumqui ninacžquin cijjrasača, tuž cjican: “Žoňiž paata yoozquin wilana jawkta chjizwi anača lujlsqui. Nižaza anača adulteri-uquiz ojklayzqui. Nižaza jora zkenzcu conta animal chjizwimi anača lujlsqui. Nižaza čjul animal ljocmi anača lujlsqui”. Jalla niikaz cumplistanča nii yekja wajtchiz criichinacaqui.

²¹ Tuquitanpacha zapa wajtquiziqui Moisés liiqui parlitatača. Nižaza zapa ajcz kjuyquiz liitatača zapa jeejz tjuňquiziqui.

²² Jalla nekztanaqui apostolonacami icliz jilirinacžtan nižaza tjapa criichinacžtan palt'ichiča, tsjii tsjii ninacžquiztan illzjapa. Nekztan Judas illztatača, niž tsjii tjuuqui Barsabás cjitazakaztača. Nižaza Silas illztazakaztača. Jalla nii pucultanaqui walja zuma jilanaca cjitatača niž mazi jilanacžquiztan. Nekztanaqui nii illzta žoňinacaqui Pablužtan Bernabežtan cuchantatača Antioquía wajtquin, nii cuzturumpi paaz parlita puntu mazjapa.

²³ Jalla ninacžtan tsjii carta apaychiča. Nii cartiquiz tuž cjichiča:

“Wejtnaca jilanaca, wejrnacqui Jesusiž illzta apostolonactča, nižaza icliz jilirinactča, nižaza Yoozquin criichinactča. Wejrnacqui ančucaquin tsaanžnuča. Ančhucqui ana judío žoňinacčhucča. Antioquía wajtchiz žoňčhucča, nižaza Siria yokquin kamiňčhucča, nižaza Cilicia yokquin kaminčhuczakazza.

²⁴ Wejrnacqui tsjii quintu zizzinča. Tekztan tsjii kjaž žoňinacaqui ančucaquin ojtkalča, ana jec jiliriž mantita ojkchiča. Jalla ninacaž čhita taku ančuca kuz turwayskatčhani. Ninacaqui cjičhani, “Judionacž chim-puz cuzturumpi paastanča. Nižaza tjapa Moisés liiqui cumplistanča”. Jalla nuž čhižcu, paysnakňi kuzziz cjissinčhucžlani.

²⁵ Jalla nii quintu zizcu, nii puntuquiztan wejrnacqui zuma palt'ichinča. Nekztanaqui wejrnacqui kazzinča, tsjii pucultan wejtnacaquiztan illzjapa. Nii pucultanaqui illztatača ančhuc cherezňi okajo. Ninacaqui Pablužtan Bernabežtan čhica okaquiča. Nii Pablo Bernabé, jalla ninacaqui anča zuma pecta jilanacača.

²⁶ Nii Pablužtan Bernabežtan Jesucristo Jilirž mantita ojklaycan joz conkatchiča.

²⁷ Nižtiquiztan wejrnacqui Judastan nižaza Silžtan cuchanchinča, ančhucatan tii puntu parlizjapa. Nižaza ančhucaquiz tjapa tii puntuquiztan paljayaquiča.

²⁸ Wejtnacquizimi Espíritu Santužquizimi walikaztača tinacaqui. Wejrnacqui ančhucaquiz anaž tsjii liczi kuzi tjuz waquizasacha, anaž wejtnac liczi cuzturumpi paakatz waquizasacha. Jalla tiikaz paakatz waquiziča.

²⁹ Zoñiž paata yoozquiz wilana jawkta chjizwi anača lujlsqui. Nižaza čhjul animal ljocmi anača lujlsqui. Nižaza jora zkenzcu conta animal chjizwimi anača lujlsqui. Anača adulteriuquiz ojklayzqui, luctaka cjiñimi maataka cjiñimi. Zuma lucutiñipan kamsa. Jalla nuž kamaquiz niiqui, walikaz cjequiča ančhucqui. ¡Zumakaz ojklaya!” Jalla nuž cjiirtatača nii cartaqi.

³⁰ Nekztanaqui nii cuchanta žoñinacaqui cartižtan ojkiča Antioquía watja. Jalla nicju irantižcu, tjapa nii wajtchiz criichi žoñinaca juntazziča. Nekztan nii carta intirjichiča.

³¹ Jalla nii carta ližcu, nii jilanacaqui walja chipchiča, nii zuma takunaca cjiiržquitaž cjen.

³² Nižaza nii Judastan Silžtan Yooz taku paljayñitača. Jalla nuž paljaycan walja žoñinaczquiz kuzziča. Nižaza nii criichinacaqui tjurt'iñi kuzziz cjiskatchiča ninacz tawkžtan.

³³ Jalla tsjii kjaž tjuñinaca nicju kamchiča, Judastan Silžtan. Nekztanaqui ninaca cuhanžquiñi jilanaczquin quejz pecatča. Jalla nuž peccan parti criichinacaqui cjichiča:

—Yooz Ejpžtan ančhucqui zumakaz okalla.

³⁴ Jalla nekztanaqui Judasqui ojkiča. Ultimquiziqui Silasqui eclis tantiichiča.

³⁵ Nižaza Pabluqui Bernabežtan Antioquía wajtquin eclichizakazza. Nekztanaqui parti jilanacztan Yooz taku walja tjaañatča ana criichi žoñinaczquiz, nižaza liwriñi Yooz taku paljayatča.

PABLUQUI WILTA YOOZ TAKU PALJAYI OJKCHA

³⁶ Jalla niž wiruñ Pabluqui Bernabežquiz paljaychiča, tuž cjican:

—Wiltaž jaziqui ojklalla. Jakzi watjanacquin učhumqui liwriñi Yooz taku parlitažlaja, jalla nii jilanaczquin tjontjonžquilalla. Jaknužt kamčhaja jalla niichum cheržquilalla.

³⁷ Bernabequi Juan chjitz pecatča. Juanž tsjii tjuuqui Marcos cjitazakaztača.

³⁸ Niž tuquiqui Panfilia wajtquin žejlcan, Marcosaqui Pablužquiztan Bernabežquiztan quepi zarakchiča. Ana iya chica ojklaychiča Yooz taku parlican. Jaziqui Pabluqui Marcos ana chjitz pecatča.

³⁹ Jalla nižtiquiztan Pablužtan Bernabežtan ch'aassiča. Nekztanaqui jaljtichiča. Bernabequi Marcos chjitzcu tsjii warcu luzziča Chipre kjutñi ojczjapa.

⁴⁰ Pabluzti Silas cjita žoñi illziča nižtan chica ojkiñijapa. Nii žejlñi jilanacaqui Pablužtan Silžtan Yoozquin cumpjiichiča, Yooz zuma yanapajo.

⁴¹ Nekztan ninaca Siria yok kjutñi ojkiča. Siria yokaran nižaza Cilia yokaran ojklaychiča, iclizquiztan icliza ojklaychiča, criichi jilanaca tjurt'iñi kuzziz cjejajo.

16

TIMOTEOQUI PABLO CUMPANT'ICHICHA

¹ Nekztanaqui Pablužtan Silžtan irantižquichiča Derbe Listra cjita watjanacquiz. Jalla nicju tsjii Yoozquin criichi žoňžquiz zalchiča, Timoteo cjita. Niiž maaqui judío žontača, Yoozquin criiňtača. Niiž ejpqui griego žoňitača.

² Nižaza Listra wajtchiz criichi žoňinacami Timoteo rispitchiča. Iconio wajtchiz žoňinacaqui Timoteo rispitchizakazza.

³ Nekztanaqui Pabluqui Timoteo kjutzňi pecatča. Jalla nižtiquiztan Pabluqui judionacž cuzturumpi jaru Timoteo chimpuskatchiča, nii yokaran kamňi judionacaž ana quintra chiyajo. Timoteož ejpqui griego žoňitača, anatača judío. Jalla nuž cjen Timoteoqui ana chimpuchiztača, judionacaž irata. Jalla nii zizziča nii yokaran kamňi judionacaqui.

⁴ Nekztanaqui tjapa watjanaca ojklaycan, Pabluqui niiž mazinacžtan Jerusalén parlita quintu mazziča. Apostolonacami Jerusalén icliz jilirinacami, jalla ninacaž chiita taku quint'ichiča tjapa Yoozquin criichi jilanacžquiz.

⁵ Jalla nižtiquiztanaqui niiran žejlňi criichinacaqui Yoozquin walja tjapa kuzziz cjissiča. Nižaza zapuru Yooz jiczquiz luzatča iya žoňinacaqui. Jalla nižtiquiztan tsjanž yapatča Yoozquin criichi jilanacaqui.

PABLUZ CHJUUZTA

⁶ Jalla nekztanaqui Espíritu Santuqui Pablužquizimi niiž mazinacžquizimi atajchiča, ana Asia yokaran Yooz taku parliňi ojklayajo. Jalla nižtiquiztan ninacaqui Frigia, nižaza Galacia cjita yokanacaran ojklaychiča.

⁷ Jalla nuž ojklayžcu, Misia cjita lintiquin irantichiča. Jalla niwjctan Bitinia yokquin luzquiz pecatača. Jalla nuž pinsan Jesucristužtan Espíritu Santužtan nii yoka luz ana munchiča.

⁸ Jalla nižtiquiztan Bitinia yokquin ana luziča. Antis Misia yokquin watžcu, Troas cjita watja irantichiča. Jalla nii watjaqui pajk kot tjiiquiz želatča.

⁹ Jalla nicju tsjii ween Yoozqui Pablo chjuuzkatchiča. Chjuuzcan jalla tuž Pabluqui cherchiča, tsjii Macedonia wajtchiz žoňi cherchiča. Tsijtsi želatča. Nižaza rocatča, tuž cjican: “Macedonia yok kjutňi kajkžcalla amqui. Yanapt'alla”.

¹⁰ Jalla nuž wiiquin chjuužcuqui Pabluqui tjacziča Macedonia ojkzjapa. Nižazakaz wejrnacmi tjaczinča Pablužtan ojkzjapa. Ultimupanž Yoozqui wejrnaca kjawziča, nawjk ojklayajo liwriiňi taku paljayajo.

PABLUZTAN SILZTAN FILIPOS CJITA WAJTQUIN OJKTA

¹¹ Jalla nekztanaqui Troas wajtquin tsjii warcu zalazzinča. Nekz luzcu ojkchinča. Nii pajk kot taypiquiz tsjii kolta yoka želatča, Samotracia cjita. Jalla nii tirichuc ojkchinča. Niiž jaka tažuqui Neápolis cjita watja irantichinča.

¹² Jalla nekztan ojkchinča Filipos cjita watja. Nii watjaqui tuqitanpacha romano cjita wajtchiz žoňinacaž julžtatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča.

¹³ Tsjii jeez tjuňquiz wajtquiztan ulanchinča, nižaza puj atquin. Jalla nicju žoňinacaqui ajczňitača, Yoozquin mayizi. Jalla nuž žejlcan wejrnacqui julzinča. Nekztanaqui liwriiňi Yooz taku palt'ican, nii ajczi maatakanacžquiz paljaychinča.

¹⁴ Tsjaa maatakqui Lidia cjititača. Naaqui Tiatira cjita wajtchiz žontača. Nižaza naaqui fin murat telanaca tuiñača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž chiita taku catokskatchiča.

¹⁵ Jalla nižtiquiztan naa žonqui bautistatača naaža familianacžtanpacha. Nekztanaqui wejtnacaquiz roct'ichinča, tuž cjican:

—Ančhucqui ultimupan wejrqui Jesucristužquin criichinčhataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazzinča.

¹⁶ Tsjii nooiqui wilta Yoozquin mayiziz yokquin ojkcan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñača. Jalla nižtiquiztan walja paaz ganiñača naaža patrunžjapa.

¹⁷ Naa turqui Pablužquiz nižaza wejtnacaquiz apzñi kallantichinča. Jalla nuž apzcan kjawiñača, tuž cjican:

—Tii žoñinacaqui arajpach Yooz sirwiñiča. Nižaza ančhucacquiz liwriiñi Yooz taku paljayñiča. —Jalla nuž kjawcan chiichinča.

¹⁸ Zapuru nižta kjawcan wejtnacaquiz apzniñača. Jalla nižtiquiztan Pabluqui naažajapa tsjii zkoluc žawjznawcž cjetča. Jalla nuž cjen naaža kjutñi quejpžcu cherziča. Nižaza naa tanñi zajrižquiz chiichiča, tuž cjican:

—Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqi naa turaquiztan ulanchiča.

¹⁹ Jalla nižtiquiztan naa tura patrunanacaqui naaža ariwiñiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacž yujcquin.

²⁰ Juez jilirinacžquin prisintiskatchiča, tuž cjican:

—Tii judío žoñinacaqui učum žoñinaca aptjapča.

²¹ Nižaza ninacž tsjemat cuzturumpinaca tjaajinča. Jalla nii cuzturumpinaca učumqui anaž catokz waquiziča. Nižaza ana niicama kamz waquiziča. Lii quintrača. Učumnacaqui roman žoñinacčhumča.

²² Jalla nuž chiitiquiztan nii wajtchiz žoñinacaqui Pabluž nižaza Silž quintra tjojtichiča. Nižaza nii juez jilirinacaqui mantichiča, ninacž cujtta zquiti chjojkžinajo, nekztan paržtan wjajtajo.

²³ Jalla nuž walja wjajtžcu, carsilquiz chawjcchiča. Nižaza nii carsila itzñi žoñi mantichiča, ninaca zuma wijilajo.

²⁴ Jalla nuž mantitiquiztan, nii carsila itzñi žoñiqui ninaca carsil kjuy majcchiča, nawjk c'utzjati. Jalla nekzi pajk mazu madera želatča, niiqui žoñi castics maderapantača. Nii maderquiz ninacž kjojcha majcžinchiča.

²⁵ Jalla nuž cjenami chica arama Pablužtan Silžtanaqui Yoozquin mayizican želatča. Nižaza Yooz wirsu itscan želatča. Jalla nuž mayizan, nuž itsan, nii parti carsilquiz chawjcta žoñinacaqui nonziča.

²⁶ Jalla nekztanaqui tiripintit tsjii tembloraž tjonchi. Nekztan nii carsil yokanacami pirkanacami liwj chekjinskatchiča. Jalla nuž chekjintiquiztanaqui tjapa nii carsil zananacami justokaz cjetsiča. Nižaza nii preso žoñinacž čejlta carinanacami justokaz jersiča.

²⁷ Jalla nižta watžcu, carsil itzñi žoñiqui tjaji wajtsiča. Nii carsil zananaca cjetsi cheržcu, “Pris žoñinacaqui atipchiž caa” nuž cjican pinsichiča. Jalla nuž pinsiscu, niiz pajk cuchillu jwessiča, cuchillžtan persuna conzjapa.

²⁸ Nekztanaqui Pabluqui kjawchiča, tuž cjican:

—Anam persunpacha čhojrichaquiča. Tjapa chawjcta pris žoñinacami tekz žejlča.

²⁹ Jalla nekztanaqui nii carsila itzñi žoñiqui micha tjeesnaj cjichiča. Nekztanaqui carsil kjutñi zati pariju luzziča, walja tsucchi chekjincan. Nekztan Pabluž Silž kjojchquiz tuzi t'oksiča.

³⁰ Nekztanaqui zancu jwescu, pewcziča, tuž cjican:

—Jilanaca, wejr liwriita cjisjapa, ¿chjulut wejr paaz waquizasaya?

³¹ Pablužtan Silžtanaqui kjaaziča, tuž cjican:

—Jesucristo Jiliržquiz tjapa kuztan criya. Jalla nuž cjenauqui liwriita cjequiča am familianacžtanpacha.

³² Jalla nekztanaqui Pablo Silasqui nižquizimi niž kjuy familianacžquizimi Yooz taku paljaychiča.

³³ Nii weenpacha nii carsila itzñi žoñiqui ninacž čhjojri awjžinchiča. Jalla nekztanaqui niimi tjapa familianacami bautista cjissiča.

³⁴ Nekztanaqui nii carsila itzñi žoñiqui Pablužtan Silžtan jalla ninaca chjitchiča persun kjuya. Niiž kjuyquin čhjeri tjaachiča. Nii žoñiqui familianacžtanpacha walja cuntintutača Yoozquin crižcu.

³⁵ Nii wenziqui juez jilirinacaqui zultat policianaca mantichiča carsilquin, Pablužtan Silžtan cutz ortinžtan cuchanchiča.

³⁶ Ninacaž carsilquin irantitan, nii carsila itzñi žoñiqui Pablužquiz cjichiča:

—Nii juez jilirinacaqui wejtquin ortina apayžquichiča, ančhuc cutznajo. Nižtiquiztan ančhucqui jazic liwriiž okaquiča.

³⁷ Pabluzti nii zultat policianacžquiz paljaychiča, tuž cjican:

—Wejrnacqui roman parti žoñinacžča. Tjapa tii wajtquiz žejlñinacž yujcquiz wejrnaca wjajtchiča, ana wejtnacaquiz zumpacha pewcžcu. Nekztanaqui inapacha wejrnac carsilquiz majcchiča. ¿Jaziqui ančhucqui wejrnaca chjojzaka cuts pecya? ¡Anaž cjesača! Antiz ninacaj persuna wejrnac tii carsilquiztan jwesi tjonla.

³⁸ Nekztanaqui nii policianacaqui ojkžcu nii juez jilirinacžquiz tjapa nii puntuquiztan quint'ichiča. Pablužtan Silžtan roman parti žoñinacquiztan, jalla nii quintu zizcu, ancha tsucchi cjissiča.

³⁹ Jalla nižtiquiztan pertuna mayizi ojkchiča. Nekztanaqui nii jilirinacaqui tjonžcu jwessiča. Nekztan Pablužquizimi Silžquizimi rocchiča, tuž cjican:

—Tii wajtquiztanž ulna.

⁴⁰ Jalla nekztanaqui carsilquiztan ulanžcu Pablužtan Silžtan Lidia kjuya ojkchiča. Jalla nekztanaqui criichi jilanaca cheržcu, “Tjurt'iñi kuzziz cjee ančhucqui” cjican chiižinchiča. Nekztanaqui ojkchiča.

17

ZOÑINACAŽ APTJAPZTA TESALONICA WAJTQUIN

¹ Jalla nekztanaqui wilta ojkchiča, Pablužtan Silžtanaqui. Anfípolis nižaza Apolonia jalla nii yokanaca watchiča. Nekztanaqui Tesalónica cjita pajk watja irantichiča. Jalla nekzi tsjii judionacž ajcz kjuya želatča.

² Nii wajtquin Pabluqui nii acjz kjuyquin ojkchiča, niž cuzturumpi jaru. Tsjii čhjepjeez tjuñinacquiziqui Pabluqui nii ajczñi žoñinacžquiz paljaychiča, nii tuqitan cijrta Yooz tawk jaru.

³ Yooz tawkquiztan tjaajinchiča Jesucristuž puntuquiztan, tuž cjican:

—Jesucristuqui sufrispantača, niž ticzcama. Niiž ticziquiztan jacatatspantača. Nii Jesusapachača Yooziž cuchanžquita Cristuqui. Jalla nuž ančhucaquiz paljayuča.

⁴ Jalla nii paljaytiquiztan yekjap judionacaqui Jesucristužquin criichiča. Nekztanaqui ninacaqui Pablužtan Silžtan juntu cjissiča. Nižaza walja griego parti žoñinacaqui Jesucristužquiz criichizakazza. Tuquiqui Yooz Ejkaz sirwichiča. Nižaza walja rispitta maatakanacaqui Jesucristužquin criichizakazza.

⁵ Jalla nuž cjen ana criiñi judionacaqui ancha iñiziñi cjissiča. Nekztanaqui nii ana criiñinacaqui yekjap ñejo kuzziz žoñinaca juntjapchiča, Pabluž Silž quintra parlizjapa. Nekztanaqui ninacaqui juc'anti žoñinaca juntichiča. Nii žoñinaca juntižcu, žoñinaca aptjapchiča Pabluž Silž quintra. Nekztanaqui tjapa nii quintra aptjapzñi žoñinacaqui Jasonž kjuya ojkchiča. Jalla nuž ojkžcu, nii kjuya muyuntichiča, Pablo Silas kjurcan. Nii pucultan žoñinaca jwes pecatča, parti žoñinacžquiz intirjizjapa.

⁶ Pero Jasonž kjuyquiz Pablo Silas ana watchiča. Nižtiquiztanaqui nii quintra žoñinaca Jasón tanchiča, nižaza yekjap nekz žejlñi jilanacžtan. Nekztanaqui nii criichinacaqui chjichtatača wajt jilirinacž yujcquin. Nii jilirinacž yujcquiz želan, nii quintra žoñinacaqui altu joržtan chiichiča, tuž cjican:

–Tii žoñinacaqui jakziquin ojektčaja, nekz žejlñi žoñinacž kuz turwayskatča. Jalla tinacaqui tekz tjonchizakazza, ana wal kamaña quejpskatzjapa.

⁷ Jasonqui niž kjuyquiz Pablo Silas alujchitakalča. Nižaza tinacaqui cjiča, yekja chawc jiliri žejlča, Jesusa cjita. Nužukaz cjiča tinacaqui. Jalla nuž cjenaqui niiqui ancha učum lii quintrača, nižaza učum roman chawc jilirž quintrača. –Nuž cjican quintra chiichiča.

⁸ Jalla nuž nonžcu, tjapa nii wajtchiz žoñinacami jilirinacami walja žawjchiča.

⁹ Ultimquiziqui Jasonqui niž mazinacžtanpacha tsjii wali printa tjaachiča, ninaca cutta cjeyajo.

PABLUZTAN SILZTAN KAMTA BERA CJITA WAJTQUIN

¹⁰ Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchiča. Nekztan Berea cjita watja ojkchiča. Jalla nicju irantižcu, judionacž ajcz kjuya luzziča.

¹¹ Jalla nii judionacaqui tsjan zuma kuzziztača nii Tesalonic wajtchiz judionacžquiztan. Tjapa kuztan Yooz taku catokñitača. Nižaza zapuru ninacaqui tuqita cjiřta Yooz taku liižcu liižcu zumpacha tantiichiča, nii Pabluž Silas chiita taku, werara ana werara, jalla nii zizjapa.

¹² Jalla nižtiquiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza.

¹³ Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkchiča. Jalla nii quintu zizcu, Berea watja ojkchiča. Jalla nicju ninacaqui žoñinaca žawjwaž zijcanchiča, Pabluž quintra.

¹⁴ Jalla nuž cjen nii criichi jilanacaqui ana enenskatžcu Pablo cuchanžquichiča pajk kot kjutñi. Silžtan Timoteožtan, jalla ninacazti Berea wajtquiz eclichitača.

¹⁵ Nekztanaqui Pablužtan cumpant'iñi žoñinacaqui Pablo chjitchiča Ate-nas cjita watja. Jalla nekztanaqui quejpžquichiča tii takunacžtan: “Silžtan Timoteožtan, jalla ninacaqui Pablužquin apura irantiz waquiziča”, cjican.

PABLUZ KAMTA ATENAS CJITA WAJTQUIN

¹⁶ Nekztan Pabluqui Silas Timoteo tjewsnatĉha. Atenas cjita wajtquiz ŷejlcan, wacchi ŷoñiž paata yooznaca cherchiĉha. Nii wajtquiziqui jakzimi ŷoñiž paata yooznacapanikaz ŷelatĉha. Jalla nuž cheržcu niž kuzquiz ancha sint'ichiĉha.

¹⁷ Jalla nižtiquiztan Pabluqui judionacž ajcz kjuyquin paljaychiĉha. Judionacžquizimi Yooz rispitiñi ŷoñinacžquizimi paljaychiĉha. Nižaza zapuru pajk plazquin paljaychiĉha, ojklayñi ŷoñinacžquiz.

¹⁸ Jalla nii plazquiz tsjii istutiiñinaca ŷelatĉha. Parti nii istutiiñinacaqui Epicúreos t'akquiztantaĉha. Parti nii istutiiñinacazti Estoicos cjita t'akquiztantaĉha. Jalla ninacaqui Pablužquiz paljaychiĉha. Nekztanaqui yekjap istutiiñinacazti cjichiĉha:

—Ĵaknužkat tii ŷoñic chiiĉhani, waljaž chiiĉha pero? Ĵĉhjulut intintiskatz pecjo?

Yekjap istutiiñinacazti cjichiĉha:

—Niiĉha yekja yooznacž puntuquiztan paljayñiqui.

Pabluqui Jesusiž puntuquiztan nižaza ticzquiztan jacatatz puntuquiztan chiiĉha. Jalla nuž chiitiquiztan nii istutiiñinacaqui nižta chiiĉha.

¹⁹ Nekztanaqui nii istutiiñinacaqui Pablo ĉhjitchiĉha tsjii Areópago cjita yokquin. Jalla nicju ajczñitaĉha parlizjapa. Nekztan Pablužquiz chiiĉha tuž cjican:

—Nawjctan amqui tsjii ew tjaa jintanaca zjiĉcĉhamĉha. Jalla nii ew taku ziz pecuĉha wejrnacqui.

²⁰ Amqui tsjemat istrañchuc takunaca chiiĉha. Kjažt cjii nii takunacaya, jalla nii intintaz pecuĉha wejrnacqui.

²¹ Nii Atenas wajtĉhiz ŷoñinacaqui nižaza nii parti wajtquin kamñi ŷoñinacaqui ĉhjul ew takunacami nonzkaz pecatĉha. Nižaza ĉhjul ew takunacami chiiz kaz pecatĉha. Jalla nii ew takunacquizkaz ninacž kuz tjaañitaĉha.

²² Jalla nii Areópago yokquin Pabluqui ninacž taypiquin tsijsiĉha. Jalla nuž tsijsu, tuž cjichiĉha:

—Atenas wajtĉhiz ŷoñinaca, anĉhucqui wacchi yooznaca rispitiñchucĉha, jalla niil cheruĉha.

²³ Tii wajtquiz ojklaycan, wejrqui anĉhucua silunaca cherĉhinĉha. Nižaza tsjii silquin cherĉhinĉha tuž cjirta: “Tii siluqui ana pajta Yooz sirwizjapaĉha”. Nii ana pajta Yooz anĉhucqui rispitiĉha, ana pajžcupacha. Jalla nii ana pajta Yooz puntuquiztan chiyuĉha.

²⁴ ‘Nii Yoozqui tii muntu paachiĉha, nižaza tjapa tii muntuquiz ŷejlñi cusasanaca. Jaziqui arajpachquinami yokquizimiž mantiĉha. Nii Yoozqui ŷoñinacž kjuyta timplunacquiz ana kamĉha.

²⁵ Anaž ĉhjulumu pecĉha, ŷoñiž sirwita paataqui. Niipachaž zapa maynižquiz žeti tjaaĉha, nižaza quera atquiztan jeejsjapa tjaaĉha, nižaza tjappacha tjaaĉha ŷoñinacžquiz.

²⁶ ‘Tsjii lucutiñi ŷoñžquiztan tjapa tii muntuquiz ŷejlñi ŷoñinaca tjonkatchiĉha Yoozqui, tjapa kjutñi tii muntuquiz kamajo. Nižaza ŷoñinacž žejtz timpumi ticz timpumi, jalla nii Yoozpachaž mantiĉha. Nižaza jakziquin tsjii ŷoñiqui kamslaja, jalla niimi zakaz mantiĉha Yoozqui.

²⁷ Jalla nuž mantichiĉha Yoozqui, ŷoñinaca nii kjurajo, nižaza wachajo. Ultimupanĉha Yoozqui uĉhumnacaquiztan anaž ažkquin ŷejlĉha.

²⁸ Yooziž cjen uĉhumqui žejtĉha, nižaza ojklayĉha. Jalla nižtazakaz yekjap anĉhucquiztan cjirĉhiĉha, tuž cjican: “Yooziž paataĉha uĉhumqui”.

²⁹ Nekztanaqui učumgui Yooz paatiquiztan, učumlaqui anaž pinsis waquiziča, tuž cjican: “Ultim Yoozza žoñiž paataqui, korquiztan, paazquiztan, mazquiztan, jalla nižta žoñiž paataqui”.

³⁰ Tuqui timpuqui žoñinacaqui Yooz puntuquiztan ana zumpacha zizziča. Jalla nuž cjen Yoozqui žoñinacž uj awantichiča. Anziqui tjapa tii jazta žoñinacžquiz mantichiča, tuž cjican: “Persun uj pajžcu, kuzza campiya”.

³¹ Nekztanaqui Yoozqui tsjii tjuñi utchiča, tjapa tii muntuquiz žejlñi žoñinaca werara pjalzjapa. Tsjii Yooziž illzta žoñiqui tjapa žoñinaca pjalaquiča, Yooz Ejpž cuntiquiztan. Yoozqui nii illzta žoñi ticziquiztan jacatatskatchiča. Jalla nižtiquiztan Yoozqui kjanapacha tjeeziča, nii žoñiqui illztatača pjalñijapa, jalla nii. Jaziqui nižquin criya. –Nuž paljaychiča Pabluqui.

³² Jalla nii ticziquiztan jacatatchi quintu nonžcu, yekjapanacaqui tjassiča. Yekjapanacazti cjichiča:

–Tii jarquin tii amiž chiita puntuquiztan wilta nonznačani.

³³ Jalla nekztanaqui Pabluqui ninacžquiztan ojkchiča.

³⁴ Yekjapanacazti Pablužquiz apziča, niž taku crižcu. Ninacžquiztan tinaca želatča: Dionisotača tsjiiqui, nižaza niiqui Areópago cjita t'akquiztantača. Nižaza Dámaris cjiti tsjaa maatak žonqui criichintača. Nižaza tsjii kjaž iya žoñinacaqui criichiča.

18

PABLUZ KAMTA CORINTO CJITA WAJTQUIN

¹ Wiruñaquí Pabluqui Atenas wajtquiztan ulanchiča. Corinto cjita watja ojkchiča.

² Jalla nicju tsjii judío žoñžtan zalchiča. Nii žoñiqui Aquila cjitatača. Ponto yokquiztan tjonchitača. Niiž tuquiqui Claudio cjita chawc jiliriqui mantichiča tjapa judío žoñinaca Roma wajtquiztan ulnajo. Jalla nižtiquiztan Aquilaqui Italia yokquiztan ulanspantača, niiž tjunatanpacha, Priscila cjiti. Ninacžquin Pabluqui tjonzñi ojkchiča.

³ Pablužtan ninacžtan tsjii oficiuchiztača, tultu kjuya paañitača. Jalla nižtiquiztan Pabluqui ninacžtan kamchiča junto nii tultu kjuya langzjapa.

⁴ Zapa jeejz tjuñquiz Pabluqui judionacž acjz kjuya ojkñitača. Jalla nicju judionacžquiz Yooz taku paljayñitača, nižaza ana judío žoñinacžquizimi. Zuma razunchiz tawkžtan paljaychipanča ninacaž zumpacha intintazñi cjisnajo.

⁵ Nekztan Silžtan Timoteožtan Macedonia yokquiztan irantizquichiča. Nekztanaqui Pabluqui Yooz takupanž paljayatča. Yekja langzñijapa timpu ana želatča. Nižaza Pabluqui judío žoñinacžquiz kjanacama intintiskatchiča, Jesusaqui ninacaž tjewžta Cristučha, jalla nii.

⁶ Nii judío žoñinacazti quintra cjissiča Pablužjapa. Nižaza niiž quintra anawalinaca chiichiča. Jalla nižta niiž quintra chiitiquiztan Pabluqui niž zquiti tsajttsajtsinchiča, ninacž quintra tsjii siñala cjeyajo. Nižaza cjichiča:

–Ančhucqui infiernuquinž tjojttaž cjequiča, liwriiñi Yooz taku ana nonzinčhucča, nekztan. Jalla nuž castictaž cjen, ana wejtquiz uj tjojtñasacha. Ančhucqui kuzinpan Yooz taku ana criiz pecča. Tonjtan nawjccchuc wejrqui yekja wajtchiz žoñinacžquin okača, ninacžquin liwriiñi Yooz taku paljayžcača.

⁷ Nekztanaqui nii ajcz kjuyquiztan ulanžcu tsjii Justo cjita žoñž kjuya ojkchiča. Nii žoñiqui Yooz sirwiñitača, nižaza ajcz kjuy latuquiz kjuychiztača. Jalla nekz žejlñitača.

⁸ Nii ajcz kjuy jiliriqúi Crispo cjitatača. Niiqúi niiz familianacžtanpacha Jesucristužquin criichiča. Nižaza walja Corinto wajtchiz žoñinacaqúi Yooz taku nonžcu criichiča. Nekztanaqúi bautista cjissiča.

⁹ Jalla nekztanaqúi tsjii ween Yooz Jiliriqúi Pablo chjuuzkatchiča. Nii chjuužtiquiztan Yoozqúi Pablužquíz cjichiča:

–Ana eksna amqúi. Tirapan Yooz taku parla. Yooz taku paljayñi langzquíz-tan ana jayta.

¹⁰ Wejrquí amtan chicapachača. Anaž jakziltami amquíz tani atasacha, ana wali paazjapaqúi. Nižaza tii chawc wajtquíz muzpa žoñinacaqúi wejtquin criyaqúiča.

¹¹ Jalla nuž chjuuzcu Pabluqúi nii Corinto wajtquíz tsjii wata tizuchiz kamchiča, Yooz taku tjaajincan.

¹² Jalla niiz wiruñ judío žoñinacaqúi Pabluž quínta tsjii kuzziz ajczyča. Nekztanaqúi Pablo tanžcu, chawc jilirž yujcquin chjitchiča. Galión cjitatača nii Acay yok jiliriqúi.

¹³ Jalla nuž chjichcu, nii chawc jiliržquíz cjichiča:

–Tii žoñiqúi učumnaca lii quíntaž ojklayča. Tiiqúi žoñinacžquíz ana wal tawkžtan intintiskatča, niiz Yooz sirwizjapa. Pero niiz Yooz sirwizquí učumnaca lii quíntača.

¹⁴ Pabluž chiyawc cjen Galión cjita jiliriqúi judionacžquíz paljaychiča, tuž cjican:

–Judío žoñinaca, tii žoñiqúi ana wejtnaca lii quínta paachiča. Nižaza ana chawc uj paachiča. Tsjii anawali paatasacha, nekztan ančhucaž quijta razuna nonžtasacha.

¹⁵ Tii asuntuqúi ančhuca takucamakazla; nižaza žoñž tjuu puntuquíztan parlakazla; nižaza ančhuca liiquíztankazla. Jaziquí ančhucporaž parlasa; nižaza ančhucporaž kjažmi arreglasa. Wejrquí anal tii ančhuca lii puntuquíztan arreglis želuča.

¹⁶ Jalla nekztanaqúi nii jiliriqúi nii žoñinaca tjirkatchiča niiz oficinquíz-tan.

¹⁷ Nii ajcz kjuya jiliriqúi Sóstenes cjitatača. Jalla niiča quijchiquí. Jalla nuž nii jilirizž tjirkattiquíztan, tjapa nii wajtchiz žoñinacaqúi nii quijñi žoñžtan kichi tansiča, jalla nekzpacha, nii jilirž yujcquízpacha. Nii Galión cjita jilirizti nuž kichjasanami ana importichiča.

PABLUQUI ANTIOQUIA QUEJPCHICHA

¹⁸ Nekztanaqúi Pabluqúi iyapan kamchiča. Nekztan nii criichi jilanacžquíz “Okuča” cjican ulanchiča. Nekztanaqúi tsjii warcu zali ojkičiča, Siria yoka ojczjapa. Priscilatan Aquilžtan chica ojkičiča. Cencia cjita wajtquíz, ima warcuquíz luzcan, Pabluqúi niiz ach chara k'ala murchiča, tsjii compromitta cuzturumpi cumplisjapa.

¹⁹ Nekztanaqúi warcuquíz ojžcu, Efeso cjita watja irantichiča. Jalla nicju Pabluqúi Priscilatan Aquilžtan, jalla ninaca ecchiča. Nekztan Pabluqúi judionacž ajcz kjuya ojkičiča. Jalla nicju nii ajczñi judionacžtan parličiča.

²⁰ Nekztanaqúi nii judionacaqúi Pablo roct'ichiča, iya tsjii kjaž majžtan kam'tajo. Pabluzti ana munchiča.

²¹ Jalla nekztan ima ninacžquíztan ojkan, Pabluqúi cjichiča:

–Jerusalén watja irantistanča, pijista paazjapa. Pero Yooz munanaqúi wejrquí quejpžcača ančhucatan wilita zali.

Jalla nuž chiižcu, warcuquíz luzziča. Nekztanaqúi Efeso wajtquíztan ojkičiča.

²² Nekztanaqui Cesarea cjita watja irantižcu, Pabluqui warcuquiztan ulanchičha. Jalla nuž ulanžcu Jerusalén watja ojkchičha, criichi jilanacžquin zalzjapa. Nekztan Antioquía wajt kjutni ojkchičha.

²³ Jalla nekz tsjii kjaž tjuñi kamžcu, wilta ojkchičha. Galacia nižaza Frigia yokanacaran ojklaychičha. Jalla niiran iclizquiztan icliza ojklaychičha, criichi jilanaca tjurt'iñi kuzziz cjiskatzjapa.

APOLOS CJITA YOOZ TAKU PALJAYÑI

²⁴ Jalla nii timpuqui tsjii judío žoñiqui Efeso cjita watja irantichičha. Apolos cjita tjuuchiztačha. Niiqui Alejandría pajk wajtchiz žoñitačha. Nižaza niiqui Yooz taku walja zuma paljayñitačha. Nižaza cjirta Yooz taku zumaž zizatčha.

²⁵ Nii Apoložquiz Yooz kamañ puntu walja tjaajintatačha. Jaziqui walja tjapa kuztan Yooz taku parliñitačha. Juanž bautistakaz cjenami Jesucristuž puntuquiztan walja kjana tjaajinchičha.

²⁶ Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsijtsičha, Yooz taku paljayzjapa. Niiž paljayta taku nonžcu, Priscilatan Aquilžtan jalla ninacaqui tsjii latu Apolos chjitchičha, Yooz kamaña puntu tsjan kjana tjaajinzjapa.

²⁷ Jalla nekztanaqui Apoložquiz Acaya cjita yokaran ojklayz pecatčha. Jalla nuž cjen jilanacaqui walja apoychičha, nižaza tsjii carta credencial apaychičha nii yokquin žejlñi jilanacžquiz, ninaca zuma risiwajo. Nii yokchiz jilanacaqui Yooz okzñiž cjen criichičha. Acaya irantiscuqui Apolosqui nii criichi jilanacžquiz zuma tjaajinchičha.

²⁸ Nižaza zuma razunquiztan chiican, tjapa žoñinacž yujcquiz nii quintra judionacž pinsitanaca tjeezičha, anapan zumaž ninacž razunaqui. Ninaca atipchičha. Nii quintra judío žoñinacaqui ana kjaž cji atchičha. Cjirta Yooz tawk jaru intintiskatchičha, Jesusaqui ninacaž tjewzta Cristučha, nižaza Yoozquiztan cuchanžquita Cristučha, jalla nii.

19

PABLUZ KAMTA EFESO CJITA WAJTQUIN

¹ Acayquiztan quejpžcu, Apolosqui Corinto wajtquiz želatčha. Pabluzti curunac yoka watžcu, Efeso watja irantichičha. Jalla nicju tsjii kjaž Yoozquin criichi žoñinacžtan zalchičha.

² Jalla nuž zalžcu, Pabluqui pewczičha, tuž cjican:

—¿Ančhuc criiz oraqui Espíritu Santuqui ančhuca kuzquiz luzzikay?

Ninacaqui kjaazičha, tuž cjican:

—Anaž. Nii Espíritu Santo puntuquiztan anawira nonzinčha.

³ Jalla nižtiquiztanaqui Pabluqui pewczičha, tuž cjican:

—Ančhucqui, ¿chjul bautismo tanzinčhuctaya?

Ninacaqui kjaazičha:

—Juanž bautismo tanzinčha —cjican.

⁴ Nekztanaqui Pabluqui cjichičha:

—Walikazza. Juanqui kuz campiiñi žoñinacžquiz bautisñitačha. Pero nii Juanž wirquin tsjiiqui tjonchičha. Jalla niičha Jesusaqui. Niiqui Yooz Ejpžquiztan cuchanžquita Cristučha. Jalla niižquin criiz waquizičha. Jalla nižtazakaz Juanqui žoñinacžquiz chiižničha.

⁵ Jalla nii taku catokžcu, nii žoñinacaqui Jesucristo Jilirž tjuuquiz bautis-tatačha.

⁶ Nekztanaqui Pabluqui ninacž juntuñ kjaržtan lanchičha. Jalla nuž lanznan Espíritu Santuqui tjonchičha. Jalla nižtiquiztan yekja takunacžtan parli kallantichičha. Nižaza Yooziž zizkatta puntunaca parličičha.

⁷ Jalla ninacaqui tsjii tuncapan žoñinacatakalča.

⁸ Chjep jiiž Pabluqui jalla nicju kamchiča. Jalla nuž kamcan ajcz kjuya ojknipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan.

⁹ Yekjap žoñinacazti wira ana criichipanča. Ninacaqui chojru kuzziz cjissiča. Yooz kamañ quintra parličiča. Jalla nižtiquiztan Pabluqui ninaczquiztan zarakchiča. Nižaza criichi žoñinaca chjitchiča tsjii escuel kjuyquin. Nii escuelchiz žoñiqui Tiranno cjita tjuuchiztača. Jalla nicju Pabluqui tjaajinčiča zapuru.

¹⁰ Jalla nuž tjaajincanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriiñi quintu nonchiča. Judío žoñinacami, nižaza ana judío žoñinacami nii quintu nonchiča.

¹¹ Nižaza Yooz aztan Pabluqui wali pajk milajrunaca paachiča.

¹² Jalla nižtiquiztan žoñinacaqui pañumi zquitimi Pablužquiz lanskatčiča. Jalla nuž lanskatžcu, nii pañumi zquitimi chjitchiča, laa žoñinaczquin. Jalla nižtiquiztan nii laanacaqui chjetintatača, nižaza nii žoñinaca tanñi zajranacami ulanskatčiča.

¹³ Tsjii kjaž judío žoñinacaqui ojklayatča, zajranaca chjatkatcan. Jalla nuž chjatkatcan, nii žoñinacaqui Jesusa Jilirž tjuužtan ojklaz pecatča. Nekztanaqui zajranaczquiz cjichiča:

–Zajranaca, ančhuc ulnaj cjiwča, Pabluž parlita Jesús tjuuquiz.

¹⁴ Jalla nižta paachiča pakallawk judío jilazullcaqui. Ninacz ejpqui Esceva cjita tjuuchiztača. Niiqui judiuž timplu chawc jiliritača.

¹⁵ Nii pakallawk jilazullca nižta paan, tsjii žoñi tanñi zajraqui ninaczquiz cjichiča:

–Jesús pajuča. Nižaza Pablo pajuča. Ančhucqui žjectchuctajo?

¹⁶ Jalla nižtiquiztan nii zajra tanta žoñiqui tsjii layžcu ninaczquiz tanziča, kijchjapa. Nii zajraž tanta žoñiqui walja azziztača. Jalla nii aztan ninaca atipchiča. Nižaza k'alapacha chjojritchipanča. Nižtami chjojrichta ana zquitichiz atipassiča nii pakallawk žoñinacaqui.

¹⁷ Jalla nekztanaqui tjapa nii Efeso wajtchiz žejlñi žoñinacaqui nii quintu zizziča, judionacami, ana judionacami. Jalla nekztan walja eksnatča. Nižaza Jesucristo Jilirž tjuu walja alawazziča.

¹⁸ Nižaza walja criichi žoñinacaqui ninacaz tuquita persun uj paatanaca pajžcu, kjanacama mazziča.

¹⁹ Nižaza yekjap žoñinacaqui ima Yoozquin criican, laykican ojklayñitača. Jalla ninacaqui ninacz layka ojklaz liwrunaca zjicčiča. Nekztan k'ala nii liwrunaca ujkatchiča tjapa žoñinacaz cheran. Pjijska tunc waranka pajk ultimu paaz, nuž valorchiztača nii liwrunacaqui.

²⁰ Jalla nekztan nii criichi žoñinacaqui tjapa kjutñi Yooz taku paljayi ojklayčiča. Nekztan tsjan tsjan žoñinacaqui Yooz taku catokčiča.

²¹ Jalla niiž wiruñ Pabluqui niiž kuzquiz Macedonia nižaza Acaya yokanacquin tjonzpanž tantičiča. Jalla nuž wattan Jerusalén watja irantspanž tantičiča. Nižaza Pabluqui cjichiča:

–Jerusalén watja ojžcuqui, wejlaqui Roma watja irantistanča.

²² Jalla nižtiquiztanaqui Pabluqui pucultan yanapñinaca cuchanchiča Macedonia. Nii pucultanaqui Timoteotača, nižaza tsjiiqui Erastotača. Pabluži tsjii kjaž majjapa ecličiča Asia yokquin.

ZOÑINACA APTJAPZTA EFESO WAJTQUIN

²³ Jalla nii timpuqui walja žoñinaca aptjapziča, Yooz kamañ jicz puntuquiztan paljaytaž cjen.

²⁴ Nii aptjapñi achacqui Demetrio cjitatacha. Jalla niiqui paazquiztan yooznaca paañitacha. Jalla nuž paatiquiztan walja paaz canchiča, nižaza parti nižta paañinacaqui. Diana cjiti žoñiž paata yooz timplu irata jalla nii paachiča ninacaqui.

²⁵ Nekztan Demetrio cjita žoñiqui tjapa nii yooznaca paañi žoñinaca juntichiča, nižaza niž langzñi mazinaca juntichizakazza. Nekztanaqui tuž cjichiča:

—Jilanaca, ančhucqui zizza. Tii oficiuquiz langzcan, zuma paaz canča učumnacaqui, zuma kamzjapa.

²⁶ Tii Pabluqui ojklayča, “Žoñiž paata yooznacaqui anača ultim yoozqui”, cjican. Jalla nuž chiyan, walja žoñinacaqui niž taku criiča, tii Efeso wajtquinami, nižaza tjapa tii Asia provincia yokquinami. Niiž taku criižcu, učum yooznacquiztan zarakchiča. Jalla nii quintu nonchinčhucča, nižaza cherchinčhucča.

²⁷ Jalla nižtiquiztan tii učum langznacaqui anat cusa cjisnačhani. Nižaza učumž cansmi pertisnačhani. Anziqiu tjapa tii Asia provincia yokquin žejlñi žoñinacami nižaza tjapa tii muntuquiz žejlñi žoñinacami naa yooz siñuri sirwiñiča. Pero Pabluž cjen, Diana cjiti pajk yooz siñuri timplumi ana rispittat cječhani.

²⁸ Jalla nuž Demetriuž chiita taku nonžcu, walja žawjchi cjissiča. Jalla nuž žawjžcu, kjawchiča tuž cjican:

—¡Viva Diana yooz siñura! ¡Viva tii Efeso wajtchiz yooz! —nuž cjican kjawchiča.

²⁹ Nekztan tjapa nii wajtchiz žoñinacž kuz turwayskatchiča. Nižtiquiztan nii wajtchiz žoñinacaqui Gayžtan Aristarcužtan, jalla ninaca kichi tanziča. Nii pucultanaqui Macedonia yokquiztan Pablužtan chica ojkchitacha. Jalla nii pucultan tanžcu, pajk parliz kjuya chjitchiča.

³⁰ Nižaza Pabluqui nii kjuya luz pecatča, žoñinacžquiz paljayzjapa. Criichi žoñinacazti Pablo atajchiča, ana luzkatajo.

³¹ Nižaza yekjap Asia jilirinaca želatča, Pabluž amigonacatakalča. Jalla ninacaqui tsjii žoñi cuchanžquichiča Pablužquin rocžinajo, nii parliz kjuyquiz ana luzajo.

³² Tampachquiztan juntazcu žoñinacaqui kjawchiča tjapaman razunanaca chiican. Aptjapziž cjen nekztan nižta kjawchiča žoñinacaqui. Ancha pajk ch'awjwa paatča. Jila manka žoñinacaqui čjul puntu ajcztažlaja ana zizziča.

³³ Yekjap žoñinacaqui nii ajczta puntu zumpacha intintiskatchiča Alejandružquiz. Nekztan niiqui tucquin tsijskatchiča, nii judionacžquiztan tjurt'izinajo. Nekztanaqui Alejandruqui kjara waytižcu ch'uj cjeej cjichiča. Nekztanaqui niiqui tjapa žoñinacž yujcquiz tjurt'iziñž tawkžtan chiiz pecatča.

³⁴ Parti žoñinacazti Alejandro judío žoñi cjican zizcu, wila kjawchiča tsjii pizc ora. Tsjii joržtan tuž cjican:

—¡Viva Diana yooz siñura! ¡Viva tii Efeso wajtchiz yooz!

³⁵ Jalla nekztanaqui nii wajt secretariuqui žoñinaca ch'uj cjiskatžcu, paljaychiča tuž cjican:

—Efeso jilanaca, tii pajk yooz Diana siñura timplu tii Efeso wajtchiz žoñinacžquiz cumpjiitacha. Nižaza arajpachquiztan tjojtžquichinča taa yooz siñuriqui. Tsjii maz cheechi tjonžquichinča.

³⁶ Jalla nii puntuquiztanaqui anaž jecmi nicasača. Jaziqui ch'ujča cjee. Ima zuma tantiyazcan anača čjulumi paa.

³⁷ Tii ančuca zjijeta žoñinacaqui ana čhjulumi chiichiča naa Diana siñurijapaqui, anazaž naa quintra čhjulumi paachiča.

³⁸ Demetriuztan niž langžni mazinacžtan quiyz pecčhaj niiqui, niijapa juez jilirinaca žejlča. Nii jilirinacžquinkaz ojkla, nii quija arreglisjapaqui.

³⁹ Tsjii yekja puntu parliz pecčhaj niiqui, zumpachaž ajczcuž parla.

⁴⁰ Tii aptjapzi puntuquiztan učhum chiiz razunanacaqui ana žejlča. Jaziqiu učhum gobiernuqui učumnac quintra uj tjojtNASAča, tii nooj aptjapziquiztan.

⁴¹ Tii parlaqui žeržta cjila, –nuž cjichiča nii secretariuqui.

Nekztanaqui žoñinaca liwj cuchanchiča, persun kjuya okajo.

20

PABLUZ OJKTA MACEDONIA NIZAZA GRECIA

¹ Jalla nekztanaqui nii aptjapzta žoñinacaž ojktan, Pabluqui criichi žoñinaca kjawziča, ninacžquiz tjaajinzjapa. Nekztanaqui Pabluqui “Okaz” cjichiča, Macedonia yoka ojczjapa.

² Jalla nii yokquin ojklaycan, criichi jilanacžquin zuma tawkžtan ancha p'ekinčaychiča, tjurt'iñi kuzziz cjeyajo. Nekztanaqui Grecia yoka irantichiča.

³ Jalla nicju čhjep jiiz žejlchiča. Nekztan warcu zalz pecatča, Siria yoka ojczjapa. Warcu tanawc cjen, Pabluqui quintu zizziča, judionacaqui niž quintra parlassitaquiča, jalla nii. Jalla nižtiquiztan niž warcuquiz ojcz cjitaqui nužquiz tijsiča. Yokaranpacha ojkiča. Nekztan Macedonia yoka irantichiča.

⁴ Nižaza Pablužtan chica ojkičiqui tinacatača: Sopatertača (niiqui Berea wajtchiztača), nižaza Aristarcutača, nižaza Segundutača (niiqui Tesalónica wajtchiztača), nižaza Gayutača (niiqui Derbe wajtchiztača), nižaza Timoteotača, nižaza Tiquicutača, nižaza Trofimutača. (Jalla Tiquicužtan Trofimužtan Asia provinciquiztantacha).

⁵ Jalla nii jilanacaqui wejtnaca tuqui okjayčiča. Jalla nuž okjayžcu Troas cjita wajtquin wejrnac tjewziča.

⁶ Wejrnacqui ana liwaturchiz t'anta lujlz pjijsa paztan, Filipino cjita wajtquiztan zarakchinča tsjii warcuquiz. Tsjii pjijska tjuñquiztan Troas watja irantichinča. Jalla nicju kamchinča tsjii simana.

PABLUZ KAMTA TROAS WAJTQUIN

⁷ Dominguqui wejrnacqui ajczinča, Santa Cena paazjapa. Jalla nuž ajczcu Pabluqui tjaajinčiča criichi jilanacžquiz. Jaka tažu zarakz cjen, chica aramacama tjaajinčiča.

⁸ Wejrnacqui tsewcta pisuquin ajczintača tsjii kjuyquiz. Kjanzjapa wacchi michanaca tjeestatača.

⁹ Nižaza Eutico cjita tjowa ventanquiz julzi želatča. Pabluž ažkapacha chiyan, nii tjowaqui ancha tjaji tjonkatchiča. Nekztan nii ventanquiztan kossuc tjojtsiča, čhjep pisu kjuyquiztan. Ticzi waytitatača nii tjowaqui.

¹⁰ Nekztanaqui Pabluqui chjiwžquichiča. Nii tjowž juntuñ chutjatžcu žcojzriča. Nekztanaqui parti jilanacžquin cjichiča:

–Anača tsucaquiča. Zejtča tiiqui.

¹¹ Jalla nekztanaqui Pabluqui wilta yawchiča tsewcta pisuquin. Nekztan Santa Cena paachiča. Jalla nuž paažcu, Pabluqui tirapan parličiča kjantatscama. Nekztan ojkiča.

¹² Partinacazti zuma kuzta ecličiča. Nii tjowa vivož cjen, cuntintu nii tjowa chjitchiča.

13 Nekztanaqui wejrnacqui warcuquiz okjaychinča Asón yokacama. Pabluzti kjojchuñ ojkz pecatča. Asón wajtquiztan Pablo zakaz warcuquiz ojkz tantiichiča. Jalla nuž cjican kaztatača.

14 Nekztanaqui Asón wajtquin Pablužtan zalzinča. Nekztanaqui Pabluqui wejtnacatan chica warcuquiz luzziča. Nekztanaqui Mitilene kjutñi ojkchinča.

15 Mitilenequiztan ojkcan, jaka tažuqui Quío latuquin watchinča. Kat tažuqui Samos cjita watja irantichinča. Nekztanaqui Trogilio cjita wajtquin jeejsassinča. Niiž jaka tažuqui Mileto cjita watja irantichinča.

16 Jalla nuž ojkchinča, Asia yokquin ana wacchi tjuñi žejlžjapa. Efeso wajtquin ana ojkz pecatča. Antiz Jerusalén watja apura ojkz pecatča Pabluqui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACZQUIN CHIIZINTA

17 Mileto wajtquiz žejlcan, Pabluqui Efeso icliz jilirinaca kjawžquiñi cuchanchiča.

18 Jalla nii jilirinacaž tjontan, Pabluqui ninaczquiz tuž chiižinchiča:

–Weriž Asia yokquiz tjontan, nii tjuñquiztanpacha jaknužt ančucatan chica kamtučhaja, jalla nii ančucqui zizza.

19 Jalla nuž ančucatan kamcan, humilde kuzziz Yooz Jiliržquiz sirwichinča. Nižaza criichi žoñinaczquiztan wejt kuzquiz sint'itiquiztan ancha kaachinča, nižaza ancha pruebanacami sufrichinča.

20 Tsjan zuma kamañchiz cjisjapa ančucaquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančuca persun kjuyquiztan kjuya tjaajinčinča.

21 Nižaza judionaczquizimi ana judionaczquizimi paljaychinča wejrqui, tuž cjican: “Ančucqui persun uj pajžcu, kuznaca campiya. Jesucristo Jiliržquin tjapa kuztan criya”.

22 Anziqqui wejrqui Jerusalén watjal okača. Espíritu Santuž mantital okača. Jalla nicju čhjulut watačhaja, anal zizuča.

23 Jalla tii puntukal zizuča. Tjapa watjaran weriž ojklayan Espíritu Santuqui wejtquiz chiichiča, tuž cjican: “Amqui carsilquiz chawctam cjequiča. Nižaza ancham sufraquiča”.

24 Pero nii mazintiquiztanaqui wejr anal turwasnuča. Tii muntuquiz žejtžjapa anaž importiča wejrqui. Wejt wiraqui anaž chekanaqui. Jesucristo Jilirž tjaata apóstol cargo, jalla nii cumplistanča chekanaqui. Yooziž tjaata kamañ jaru ojklayz pecuča, ticzcama. Liwriiñi Yooz taku parliz pecuča, Yooz zuma okzñiča cjican.

25 Yooz mantuquiz kamz puntuquiztan ančucaquiz mazzinča. Anziqqui ančucqui wejtan anaž iya zalaquiča tekztan nawjčchuc.

26 Jalla nižtiquiztan ančucaquiz chiyuča, tuž cjican: Anaž jecmi ančucaquiztan wejtquin uj tjojtasača, tuž cjican:

27 “Pabluqui anaž tjapa Yooziž tjaata taku tjaajinchiča” cjicanaqui. Wejrqui tjapa Yooziž tjaata takunaca ančucaquiz mazzinča.

28 Jalla nižtiquiztanaqui ančucqui persunpachquiz cwitaza, nižaza parti ančuca iclizziz jilanaca cwitaquiča ančucqui. Espíritu Santuqui ančuc jiliržtakaz utchiča Yoozquin criichinaca cwitajo, nižaza Yooz tawk čhjeri tjaajo. Nii criichi jilanacz laycu Jesucristo Yoozqui niiž persun ljoc tawkchiča, cruzquiz ch'awczcu. Jaziqqui criichi žoñinacača Jesucristužtaqui.

²⁹ Tsjii zakal zizuča. Weriz ojktan, yekja zoñinacaqui ančhucaquin tjon-aquiča ančhuc wichanzjapa, nižaza ančhuca icliza akskatzjapa. Ninacaqui uzi tanñi kitižtakaz luzcaquiča.

³⁰ Nižaza ančhucaquiztan toscara chiiñinaca želaquiča tsjii kjutñi criichi jilanaca chjitzjapa toscar tawkžtan.

³¹ Jaziqui ančhucqui zumpacha cwitaza. Wejrqui čhjep wata intiru majiñami weenami zapa mayni ančhucaquiz tjaajinchinča. Nižaza ančhucaquiz chiichiižincan, ancha kaachinča.

³² Jaziqui jilanaca, ančhucqui Yoozquin cumpjiyuča. Nižaza Yooz zuma taku zumpachaž catoka. Jalla nuž cjen ančhucqui tjurt'iñi kuzziz cjequiča. Nekztan Yoozquiztan irinsa tanznaquiča tjapa Yooziž t'akžta zoñinacžtan.

³³ Wejrpachača paazmi zquitimi anapan pecchintqui jeczquiztanami.

³⁴ Antiz wejrtča persun kjaržtan langziñtqui, čhjulut pecatučhaja, jalla nijapa, nižaza wejttan chica ojklayñi zoñinacžjapami. Jalla nii puntuquiz-tanaqui ančhucqui zumpachaž zizza.

³⁵ Jalla nužupan ančhucqui langz waquiziča, t'akjir zoñinacžquiz yanapz-japa. Jalla nuž kjana tjezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiitaqui: “Onanñi zoñinacaqui juc'ant cuntintuča tanzñi zoñinacžquiztanaqui”.

³⁶ Jalla nuž chiižcu, Pabluqui quillziča, tjapa nii žejlñi hermanonacžtan, Yoozquin mayizizjapa.

³⁷ Jalla nekztanaqui tjapa nii jilanacaqui kaachiča Pabluž ojcz cjen. Pablo žcojrziča, nižaza čjulziča.

³⁸ Pabluqui cjichiča:

—Wejrqui okača, jaziqui anaž iya wejr cheraquiča. —Jalla nižtiquiztan nii jilanacaqui ancha llaquita cjissiča.

Jalla nekztanaqui warcu luzcama chica ojkiča.

21

PABLUQUI JERUSALEN WATJA OJKCHICHA

¹ Jilanaca eccu, warcuquiz luzzinča. Nekztan Cos cjita yok tirichuc ojkinča. Jaka tažuqui Rodas cjita yokquin ojkinča. Jalla niwjctan Pátara cjita watja ojkinča.

² Jalla nii Pátara wajtquiztan tsjii Fenicia kjutñi ojkiñi warcu zalchinča. Nekztan nii warcuquiz luzcu ojkinča.

³ Jalla nuž ojkan Chipre cjita yoka ažkquin cherchinča. Chipre yokaqui zkar latuquintača. Tira ojkinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča.

⁴ Jalla nicju criichi jilanaca kjurchinča, zalañcama. Nekztanaqui ninacžtan kamchinča tsjii simana. Ninacaqui Espiritu Santuž cjen chikatchiča Pablužquiz, tuž cjican:

—Amqui anatača ojczqui Jerusalén watja.

⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi zoñinacaqui maatakanacžtanami ocjalanacžtanami wejt-nacaquiz cumpant'ichiča wajtž tjiya. Jalla nicju tsjii k'ara želatča, kot atquin. Nii k'arquiz quillžcu Yoozquin mayizassinča.

⁶ Nekztanaqui zumpacha kjara tansascu, jaljtassinča “Kjažllami okall” cjican. Nekztanaqui wejrnacqui warcuquiz luzzinča. Ninacazti kjuya quejpchiča.

⁷ Nekztanaqui Tiro wajtquiztan zarakchinča, Tolemaida cjita watja iran-tiscama. Jalla nicju criichi jilanaczquin tsaani ojkchinča. Jalla nekztanaqui tsjii nooj kamchinča nii jilanacztan.

⁸ Niiž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Felipž kjuya ojkchinča. Jalla niitača liwriiñi Yooz taku parliñiqui jalla nii oficiuchiztača. Niiž tuqui Jerusalenquin pakallawk jilanaca illzatača, Yooztajapa langzjapa. Tsjiiqui nii Felipitača. Jalla niiž kjuyquin kamchinča.

⁹ Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliñi profetanacatača.

¹⁰ Jalla ninacz kjuyquin tsjii kjaž maj kamžcu, tsjii Agabo cjita žoñiqui tjonchiča Judea cjita yokquiztan. Nii žoñiqui Yooz taku parliñi profetatača.

¹¹ Jalla nii žoñiqui wejrnac tjonzñi tjonchiča. Nekztanaqui Pabluž jweranta kojch aptichiča. Nii kojchtan persun kojcha kjara jwersiča tuž cjican: –Espíritu Santuqui tuž cjiča: “Jalla nižtapacha Jerusalén wajtquin judío žoñinacaqui tii kojch tuyñi žoñi jwernaquiča. Jalla nuž jweržcu, yekja wajtchiz žoñinaczquiz intirjaquiča”. –Nuž cjichiča Agabo cjita profetaqui.

¹² Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo.

¹³ Pabluzti kjaaziča, tuž cjican:

–¿Kjažtiquiztan ančhuc kaajo? ¿Kjažtiquiztan ančhuc wejr llaquizkatjo? Wejrqui Jesucristuž cjen listuča čhejlta cjisjapami nižaza Jerusalén wajtquin ticzjapami.

¹⁴ Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjichinča:

–Yooz Jilirž munañpaj cjila.

¹⁵ Jalla nekztanaqui ojkzjapa tjaczinča. Nekztan Jerusalén wajt kjutñi ojkchinča.

¹⁶ Nižaza yekjap Yoozquin criichi jilanacaqui wejtnacaquiz cumpant'ichiča. Tsjii ninaczquiztan Mnasón cjita žoñi želatča. Niiqui Chipre cjita wajtchiz žoñitača. Ažk wata Yoozquin criichipantača. Niiž kjuyquin alujazjapatača Jerusalén wajtquin.

PABLUQUI JACOBZQUIZ TJONZICHA

¹⁷ Jerusalén watja irantižcu, Yoozquin criichi jilanacaqui wejrnac ancha cuntintu risiwt'ichiča.

¹⁸ Niiž jaka tažu Pabluqui wejtnacatan Jacobžquin tjonzñi ojkchiča. Jalla nicju tjapa nii Jerusalén icliz jilirinacaqui želatča.

¹⁹ Pabluqui jilanaczquiz tsaanžcu, tjappacha niiž ojklayta quint'ichiča. Yoozqui Pablužquiz wali pajk obranaca paakatchiča ana judío žoñinacz yokaran ojklayan. Jalla nii quint'ichiča Pabluqui.

²⁰ Jalla nii takunaca nonžcuqui, Yooz honora chiichiča. Nižaza Pablužquiz cjichiča:

–Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamča. Nižaza tjapa ninacaqui cjichipanča, “Moisés lii jaru ojkstanča” jalla nii.

²¹ Nižaza ninacaqui nonziča tii quintu: Amqui yekja yokquin kamñi judionaczquiz tjaajinñamča, “Moisés mantita lii ana cumplis waquiziča”, jalla nii. Nižaza ninacaqui am puntuquiztan tuž nonziča: Amqui “Lucmajch wawanaca ana chimputa cjis waquiziča”, cjican tjaajinñamča. Nižaza amqui “Učhum judío cuzturumpinac jaru ana paaz waquiziča”

cjican tjaajinñamča. Jalla nuž am puntuquiztan nonziča tekz žejlñi hermanonacaqui.

²² Anziqui nii hermanonacaqui am tjonchi zizcu ajcznaquiča. Jaziqui, ¿jaknužum cjeequi?

²³ Amqui jalla tužum paačhaj. Tii Jerusalén wajtquiz pajkpaltan žoñinaca žejlča. Ninacaqui compromitta taku cumplistanča.

²⁴ Amtan chica ninaca chjiča. Nekztan ninacžtan chica am učhum cuzturumpi paa. Nižaza ninacž gasto pacna, ninaca persun ach chara k'ala murta cjisjapa. Jalla nižtiquiztan tjappacha intintiskataquiča, amqui učhumnaca cuzturumpi ana quintrača, jalla nii. Jalla nuž chiichiiñinacaqui toscara cjitaž cjequiča. Ampachazakazim učhum lii jaru paača. Jalla nuž intintaquiča tjappachaqui.

²⁵ Nižaza wejrnacqui nacjuñta wajtchiz ana judío criichinacžquiz cijrchinča, tuž cjican: “Žoñiž paata yoozquiz wilana jawkta chjizwi anača lujlsqui. Nižaza jora zkenzcu conta animal chjizwimi anača lujlsqui. Nižaza luctakžtanami maatakžtanami anača adulteriuquiz ojklayzqui”. —Jalla nuž Pablužquiz chiichiča nii icliz jilirinacaqui.

PABLUQUI PRESO TANTATACHA

²⁶ Jalla nekztanaqui Pabluqui nii pajkpaltan žoñinaca chjitchiča. Niiž jaka tažiqui ninacžtan chica cuzturumpi paachiča. Nekztanaqui timpluquin luzziča čhjulatorat nii cuzturumpi paaz tjuñinaca žerznačhaja, jalla nii mazjapa. Nii cuzturumpi paaz tjuñinaca žerztan, Pabluqui persunjapami ninacžtajapami ofrenda tjaastanča. Nii puntu zakaz timpluquin mazñi luzziča.

²⁷ Nii pakallawk cuzturumpi paaz tjuñinaca žeržmayatača. Jalla nii ora tsjii kjažt judionacaqui želatča Asia provinciquiztan tjonchi. Ninacaqui Pablo cherchiča timpluquiz žejlñi. Jalla nuž cheržcu, ninacaqui tjapa žoñinaca aptjapchiča Pabluž quintra. Nižaza Pablo tanzjapa jirchiča.

²⁸ Nekztan kjawchiča tuž cjican:

—Israel wajtchiz žoñinaca. Yanapt'alla. Tiiča anawal žoñiqui. Tiiqui tjapa kjutñi ojklaycan, žoñinacžquiz tjaajiñča učhum nación quintrami, nižaza Moisés lii quintrami, nižaza tii timplu quintrami. Nižaza anziqui tii timpluquiz ana judío žoñinaca chjitchiča. Jalla nižtiquiztan tii Yooz timplu quintraž paača. Učhum alajakazza tii arajpach Yooz timpluquiz luzpanqui. Ana judío žoñinacaqui ana luztanča. —Jalla nuž kjawchiča Pabluž quintra.

²⁹ Niiž tuquilla Pabluqui Trófimo cjita žoñžtan želatča. Trofimuqui Efeso wajtchiz žoñitača. Niiž pucultan chica cheržcu, nii judío žoñinacaqui tuž pinsatča, Pabluqui timpluquin nii Trófimo chjitchizlani, cjican. Jalla nižtiquiztan Pabluž quintra kjawchiča.

³⁰ Tjapa žoñinacaqui Pabluž quintra žawjchi tjojtichiča. Zati pariju tjonchiča timplu kjutñi. Nekztanaqui Pablo tanchiča. Timplu kjuyltan tanžcu zawncchuc joochiča. Nekztanaqui nii timplu zanami chawjcziča.

³¹ Ninacaqui Pablo conzmayatača. Nekztan žoñinaca walja aptjapzi cjen, zultatž jiliržquin maztatača.

³² Jalla nii quintu zizcu, walja apura zultatunaca juntassiča ninacž sargentunacžtan. Nekztan zati pariju jirchiča jakziquin tama žoñinaca želatčhaja, jalla nicju. Nekztanaqui žoñinacaqui nii zultatunaca sargentunacžtanpacha cherchiča. Nuž cheržcu Pablo kijtž cjen nužquiz apatatchiča.

³³ Jalla nekztanaqui nii zultatž jiliriqúi macjatžcu Pablo preso tanchičha. Nižaza mantichiča, pizc carinžtan chelajo. Nekztanaqui žoñinaczquiz pewcziča:

—¿Ject teejo? ¿Chjulu paachita tii žoñejo?

³⁴ Nii žoñinacazti tjapaman puntunaca chiican kjawchiča. Ancha altu joržtan arnan, nii zultatž jiliriqúi ana intintasi atatča. Jalla nižtiquiztan mantichiča, cuartilquin chjicha, cjican.

³⁵ Zultatž cuartil guardanaczquiz macjatžcan, zultatunacaqui Pablo waytižcu chjitchičha, ana nii žoñinaczquiz kijchkatzjapa.

³⁶ Niiž wirquiz tama žoñinacaqui apzquichiča, kjaw jawi:

—¡Ticzla tiiqui! ¡Panj ticzla! —cjican.

PABLUQUI PERSUNA TJURT'ICHICHA

³⁷ Nekztanaqui Pabluqui cuartilquiz makawc cjen zultatž jiliržquiz paljaychiča, tuž cjican:

—Wejrqui tsjii chiiz pecučha. ¿Wejr chiyasaya?

Nekztanaqui nii zultatž jiliriqúi kjaaziča tuž cjican:

—¿Amqui griego taku chiiñam jaa?

³⁸ Jaziqui amqui anaž nii anawal egipt wajtchiz žoñimča. Niiqui ažk tjuñinaca gobiernuž quintra žoñinaca tjojtiskatchičha. Ch'ekti yokquin tsjii pajkpic warank guerrillero juntichiča gobierno niiž puestuquiztan chjatkatjapa. ¿Ana nii egipto žoñimya?

³⁹ Nekztanaqui Pabluqui kjaaziča, tuž cjican:

—Wejrqui judío žoñtča. Cilicia cjita yokquin Tarso cjita wajtquin nassinča wejrqui. Nii pajk wajtchiz žoñtča wejrqui. Jalla nižtiquiztan tii žoñinaczquiz paljayskatalla. —Nuž permiso maychiča.

⁴⁰ Nekztanaqui zultatž jiliriqúi permiso tjaachiča, žoñinaczquiz paljayajo. Nekztanaqui Pabluqui tsijsičha nii gradanac juntuñ. Nižaza kjara waytižcu žoñinaca ch'ujquizkatchičha. Jalla nuž žoñinaca ch'ujquizkatžcu, Pabluqui hebreo tawkquiztan paljaychiča, tuž cjican:

22

¹ —Jilanaca, ejpnaca, wejrqui persunal tjurt'ača. Wejt takuž nonžna.

² Jalla nuž hebreo tawkžtan paljayan, walja ch'uj žejlchiča nii žoñinacaqui. Nekztanaqui Pabluqui paljaychiča, tuž cjican:

³ —Wejrqui judío žoñtča. Nawjc Cilicia cjita yokquin Tarso cjita wajtquin nassinča. Pero tekzi tii Jerusalén wajtquiz pajkchinča. Gamaliel cjita maestruqui wejr tjaajinchiča, učum atchi ejpnacž tuqita lii jarupanča tjaajinchiqúi. Nižaza wejrqui tjapa kuztan Yoozquin sirwiñpanča, jaknužt ančhucqúi tjapa kuztan učum cuzturumpi jaru pačhaja, jalla nuž.

⁴ Tuquiqui wejrqui Yooz jiczquiz ojklayñi žoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatzjapa.

⁵ Nižaza timplu jilirinacami tjapa wajt jilirinacami zizza, weraral chiyučha, nii. Ninacaqui wejtquiz carta credencial tjaachiča, Damasco wajtquin učum judío jilanaczquiz tjeezjapa. Nekztan nicju ojkchinča, Yoozquin criichi žoñinaca tanzjapa. Tekzi Jerusalén wajtquiz zjičcu, casticz pecchinča. Jalla tii weriž ojklayta puntuquiztanaqui tii Jerusalén jilirinacaqui kjanacama declarasača.

PABLUQUI JESUCRISTUZTAN ZALCHICHA

⁶ 'Carta credencial tanžcu, wejrqui Damasco watjal ojkchinča. Nižaza taypur ora irantiz cjen, tiripintit arajpachquiztan tsjii wali pajk ispijužtakaz kjanžquichiča wejt muytata.

⁷ Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: "Saulo, Saulo, ¿kjažtiquiztan am wejt quintramjo?"

⁸ Jalla nekztanaqui wejrqui pewczinča, tuž cjican: "Wejt Jiliri, ¿ject amya?" Jalla nekztanaqui wejtquiz kjaaziča, tuž cjican: "Wejrtča Jesusitqui. Nazaret wajtchiz žoñtča. Amqui wejt quintram paača".

⁹ Wejttan chica cumpant'iñi žoñinacaqui walja tsucchiča. Nižaza nii kjanžquiñi cherchizakazza. Pero nii wejtquiz chiizquiñi jora ana nonziča.

¹⁰ Nekztanaqui wejrqui cjichinča: "Wejt Jiliri, ¿chjulu wejr paajum cji amya?" Nekztanaqui wejt Yooz Jiliri qui kjaaziča, tuž cjican: "Zaažna. Tiraka amqui Damasco watja oka. Jalla nekz amquiz mazinta cjequiča čhjulut paasalaj, jalla nii".

¹¹ Jalla nii kjanaž cjen zuranzinča. Jalla nekztanaqui wejt cumpant'iñi žoñinacaqui wejt kjarcu tanžcu Damasco watja irantizcama chjitchiča.

¹² 'Jalla nii wajtquin tsjii Ananías cjita žoñi želatča. Jalla niiqui Moisés lii jaru walja cumpliñitača. Nižaza tjapa nii Damasco wajtquin kamñi judionacami nii žoñž puntuquiztan "Zumapanča nii žoñiqui" cjiñitača.

¹³ Nekztanaqui Ananiasqui wejtquiz tjonžni tjonchiča. Jalla nuž tjonžcu wejt latuquiz tsijtsiča. Nekztan wejtquiz cjichiča: "Saulo jila, wilta cherñim cjequiča". Jalla nii orapacha wejrqui cherñi cjissinča. Nekztan Ananías kjutñi cherzinča.

¹⁴ Jalla nekztanaqui Ananiasqui wejtquiz cjichiča: "Tuquitanpacha učhum ejpnacž Yoozqui am illziča, niž pinsita zizajo, nižaza niž ancha zuma Majch cherajo, nižaza niž jora nonžnajo.

¹⁵ Nižaza amqui niž puntuquiztan paljayaquiča tjapa tii muntuquiz žejlñi žoñinacžquiz. Nižaza ninacžquiz amiž chertanaca, nižaza amiž nonztanaca declaraquiča.

¹⁶ Jaziqui apura žaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee".

¹⁷ 'Wiruñiqui Jerusalén watja quejpchinča. Jalla nuž quejpžcu, timpluquin ojkchinča Yoozquin mayizizjapa. Jalla nuž mayizican Yoozqui tsjii chjuužtažokaz wejt kuzquiz tjonskatchiča.

¹⁸ Nekztan Yooz Jiliri cherchinča. Nižaza Yooz Jiliri qui wejtquiz cjichiča: "Tii Jerusalén wajtquiztan apura ulna. Amiž wejt puntuquiztan chiita takunaca anaž nonz pecča".

¹⁹ Nekztanaqui wejrqui cjichinča: "Wejt Jiliri, ninacaqui zizza weriž ojklaytanacaqui. Tjapa ajcz kjuyaran ojklayiñitača, amquin criichinaca kjurcan. Jalla nii criichinaca wachtiquiztan, wejrqui ninaca wjajtkatchinča.

²⁰ Nižaza am puntu declarñi Esteban conan, wejrqui nicju tsijtsi želatuča. Nižaza wejt kuzmi tjapa kuztača nii conan. Nižaza nii conñi žoñinacž zquitinaca cwitichinča".

²¹ Pero Yooz Jiliri qui wejtquiz chižinchiča, tuž cjican: "Oka amqui. Ažkquin nacjuñta wajtchiz žoñinacžquin am cuchnača".

PABLUZTAN COMANDANTI JILIRZTAN

²² Jalla niicama žoñinacaqui Pabluž paljayta taku nonziča. Nekztanaqui kjawi kallantichiča, tuž cjican:

—¡Ticzla tii žoñiqui! ¡Ana žejtz waquiziča!

²³ Jalla nuž tirapan kjawcan, persun zquitinaca wewcwewczinchiča, polvo žketinchizakazza.

²⁴ Jalla nižtiquiztan zultatž jiliriqiu mantichiča, Pablo cuartelquin majkžnajo. Nižaza mantichiča, Pablo wjajtžcu mazkatzjapa, “¿Kjažtiquiztan nii žoñinacaqui niž quintra nižta kjaw?” jalla nii puntuquiztan zizjapa.

²⁵ Pablo wjajtjapa čejlžtaž cjen, Pabluqui nekz žejlñi tenientžquiz paljaychiča, tuž cjican:

—Ima zumpacha zizcan, ¿tsjii roman žoñi wjajtž waquiziya? Anapaž waquiziča.

²⁶ Jalla nii taku nonžcu, nii tenientiqui niž comandantžquiz ojkchiča, nii puntu mazjapa. Jalla nekztanaqui tuž cjichiča:

—Tii žoñiqui roman žoñipanžača. Anaž čhjulumi nižtaqui kjaž cjila.

²⁷ Nekztanaqui nii comandante jiliriqiu Pablužquin macjatžquichiča. Nekztan pewczyča, tuž cjican:

—¿Roman žoñim panj amya?

Pabluqui kjaaziča, tuž cjican:

—Jesalla.

²⁸ Nekztan nii comandantiqui cjichiča:

—Wacchi paaz wejrqui pacchinpanča roman wajtchiz žoñi cjisjapaqui.

Nekztan Pabluqui kjaaziča, tuž cjican:

—Wejrqui nastiquiztanpacha roman wajtchiz žoñtča.

²⁹ Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kjutñi atziča. Nižaza Pablo roman žoñi zizcu, nii comandantiqui nii wjajtjapa čejlchiž cjen, tsucchi quirchiča.

PABLUQUI JUDIO JILIRINACZQUIZ PRISINTISKATCHICHA

³⁰ Niiž jaka tažuqui nii comandantiqui ancha ziz pecatča Pabluž puntuquiztan. Ultimu, ¿kjažtiquiztan nii judío žoñinacaqui Pablo conkatž pecatjo? Jalla nekztan Pablo čejlta carina apakžinchiča. Nižaza timplu chawc jilirinacami wajt jilirinacami juntjapznajo mantichiča. Jalla nuž juntjapztiquiztan nii comandantiqui Pablo ninacž yujcquin prisintisjapa chjitchiča.

23

¹ Nekztanaqui Pabluqui nii ajczi jilirinacž kjutñi cherziča. Jalla nuž cheržcu, tuž cjichiča:

—Jilanaca, wejt kuzquiz zizuča, tii noojcama wejrqui Yooz yujcquiziqui walika kamchinča, nii.

² Nuž čhiitiquiztan, Ananías cjita chawc jiliriqiu Pabluž žcati žejlñi žoñžquiz mantichiča Pabluž atquiz kijchnajo.

³ Pabluzti kjaaziča, tuž cjican:

—Pizc kuzziz žoñi, Yoozqui am casticaquiča. Amqui tekz julzamča, učhum lii jaru wejr jusjizjapa. Jaziqui, ¿kjažtiquiztan amqui učhum lii quintra wejr kijchnajo mantichamtajo?

⁴ Jalla nii žejlñi žoñinacaqui kjaaziča, tuž cjican:

—¿Jalla nuž Yooz chawc jiliriqiu chayskazkaya?

⁵ Nekztan Pabluqui cjichiča:

—Jilanaca, anal wejrqui zizatuča tiiqui Yooz chawc jilirižlaja, jalla nii. Cjijrta Yooz takuqui tuž cjicha: “Tsjii wajt jilirž quintraqui anača čhiizqui”.

⁶ Jalla nekztanaqui Pabluqui naaziča, parti ajczñi žoñinacaqui saduceo partiquiztantača, nižaza parti ajczñi žoñinacazti fariseo partiquiztantača. Jalla nižtiquiztan altu joržtan nii žoñinacžquiz paljaychiča, tuž cjican:

–Jilanaca, fariseo parti zoñtča wejrqui. Wejt familiaqui fariseo partizakazza. Tsjii noojiqui ticzi zoñinacaqui jacatataquiča. Jalla nii tjuñi wejrzakal tjewznuča. Jalla nii puntuquiztan ančhucqui wejr jusjiča.

⁷ Jalla nuž chiitiquiztan fariseo partinacžtan saduceo partinacžtan porapat aptjapziča. Nekztanaqui nii ajczñi zoñinacaqui t'akziča.

⁸ Nii saduceo zoñinacazti cjiñitača, “Ticziquiztanaqui anaž wira jacatatašača. Nižaza anaž anjilanacami zajranacami želasča”, nuž cjiñitača. Nii fariseo zoñinacazti jacatatz puntumi anjilanacž puntumi, zajranacž puntumi, tjapa nii puntunaca criñitača.

⁹ Jalla nižtiquiztan altu joržtan ch'aasi kallantichiča. Nekztan tsjii kjaž lii tjaajiñi maestronacaqui tsijtsiča. Ninacaqui fariseo partiquiztantača. Ninacaqui paljaychiča tuž cjican:

–Tii zoñžquiz ana čjul ujmi wachuča wejrnacqui. Cunamit tsjii anjilača Pablužquiz chiižinchini, už ispiritužlaj tižquiz chiižinchi.

¹⁰ Juc'ant juc'ant ch'aascan aptjapsiča. Jalla nuž cjen comandante jiliri qui eksnatča Pablo chjojritžta cječhaj, jalla nii. Nekztan nii comandantiqui zultatunacžquiz mantichiča nii judionacž taypiquiztan Pablo jwescu wila cuartilquin chjichajo.

¹¹ Niž jaka zeztažu nii arama Yooz Jiliri qui Pablužquiz jeczquichiča, tuž cjican:

–Pablo, tjup kuzziz cjee. Jaknuž tii Jerusalén wajtquiz wejt puntuquiztan paljayčhamžlaja, nižaza Rom wajtquin wejt puntuquiztan paljaystanča.

PABLO CONZ KAZTA

¹² Jalla niž jaka tažuqui tsjii kjaž judío zoñinacaqui Pablo conzjapa juramentužtan tsjii acuerduquiz asiptassiča. “Pablo ana ticznaquiž niiqui, wejrnac contal cjeeča”. Nuž cjican asiptassiča. Nižaza ninacaqui palt'assiča ninacpora, tuž cjican:

–Anaž čjul čjerimi lujls, Pablo conañcama, –jalla nii.

¹³ Jalla nii parla asiptiñi zoñinacaqui pusi tunc jilatača.

¹⁴ Nižaza ninacaqui mazñi ojkchiča timplu chawc jilirinacžquinami nižaza wajt jilirinacžquinami. Ninacžquiz mazziča tuž cjican:

–Tsjii acuerduquiz asiptassinča tuž cjican: “Pablo ana ticznaquiž niiqui, wejrnac contal cjeeča”. Nižaza palt'assinča wejrnacpora, tuž cjican: “Anaž jecmi čjul čjerimi lujls, Pablo conañcama”, jalla nii.

¹⁵ Jaziqui ančhucqui parti jilirinacžtanami nii comandante jiliržquiztan nii Pablo mayaquiča, tuž cjican: “Wila Pablo cuchanžcalla wejtnacaquin. Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican Pablo mayaquiča. Wejrnacqui listuž cjeeča Pablo conzjapa. Ima ančhucquiz irantižcan, wejrnacqui nii Pablo conača. –Jalla nuž cjichiča.

¹⁶ Jalla nekztanaqui Pabluž cullaca majchqui Pablo conz puntuquiztan nonziča. Jalla nii nonžcuqui cuartilquin ojkchiča Pablužquiz mazñi.

¹⁷ Nekztanaqui Pabluqui tsjii zultatž teniente kjawziča, tuž cjican:

–Tii tjowa chjicha comandantižquin. Tiiqui quintuchizza.

¹⁸ Nekztanaqui nii teniente nii tjowa chjitchiča tuž cjican:

–Nii Pablo prisita zoñiqui wejr kjawziča. Nekztan wejtquiz chiichiča tii tjowa amquin chjichajo. Tiiqui amquiz quint'iz pecča.

¹⁹ Nekztan nii comandantiqui kjarcu tanžcu nii tjowa tsjii latu chjitchiča. Jalla nekztan pewcziča, tuž cjican:

–¿Čhjulium amqui wejtquiz chiiz pecya?

²⁰ Jalla nekztanaqui tjowaqui kjaaziča tuž cjican:

–Judío žoñinacaqui tsjii acuerduquiz asiptassiča. Jaka wenz amquiztan mayaquiča Pablo chjitzjapa judío jilirinacž yujcquin. Jalla tuž mañžtan mayaquiča, “Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican mayaquiča.

²¹ Amzti ana ninacžquiz juyzu paaz waquiziča. Tsjii pusi tunc jil žoñinacaqui juramentužtan tsjii acuerduquiz asiptassiča, tuž cjican: “Pablo ana ticznaquiž niiqui, wejrnac contal cjeeča”. Nižaza ninacpora palt'assiča, tuž cjican: “Anača čjjeri lujls Pablo conańcama”. Nii žoñinacaqui čhjojiz tjewža Pablo irantisquizcama. Anzpacha listuča, amiž asiptita takukaz tjewža.

²² Jalla nii quintu nonžcu nii comandantiqui nii tjowa cuchanchiča. Nižaza mantichiča:

–Anaž jecžquizimi amiž quint'itaqui chiichiyaquiča, –jalla nuž cjican cuchanchiča.

PABLUQUI FELIX CJITA JILIRZQUIN CUCHANTA

²³ Jalla nekztanaqui nii comandantiqui pucultan teniente kjawziča. Jalla nuž kjawžcu tsjii ortina mantichiča, tuž cjican:

–Zultatunaca tuž tjaczna, paa patac zultatu kjojchiń ojknijapa, nižaza pakallawk tunca zultatu cawallquiz yawchi ojknijapa, nižaza paa patac zultatu lanzižtan ojknijapa. Ispir ora listu tjaczta cjequiča Cesarea watja ojkszjapa.

²⁴ Nižaza tsjii cawallu tjaczinaquiča Pablo yawchi chjitzjapa. Nižaza Pablo chjichaquiča ana čhjulu kjaž cjižcu. Nekztanaqui Félix cjita chawc jiliržquiz intirjaquiča. –Jalla nuž mantichiča nii comandantiqui.

²⁵ Nižaza nii Pablo chjichni zultatunacžtan tsjii carta apaychiča, tuž cjican:

²⁶ “Al señor excelentísimo chawc jiliri Félix: Wejrqui amquin tsaanuča; Claudio Lisias wejrtča.

²⁷ Judío žoñinacaqui tii žońi preso tanchiča. Nižaza conz cjichitakalča. Jalla tiiqui roman žońiča. Jalla nii zizcu, wejrqui zultatunacžtan ojkcchinča, tii liwrii. Wejr irantan, judío žoñinacaqui tii conzmayatača.

²⁸ Wejrqui ziz pecatuča, ultimu kjažtiquiztan nii judío žoñinacaqui tii conkatz pecatjo, jalla nii. Nižtiquiztan judío jilirinacž yujcquin chjitchinča.

²⁹ Nekztanaqui zizzinča nii judionacž lii puntuquiztankaz tii quintra uj tjojtunchiča. Anaž conz razunami nižaza ana carsilquiz chawjcz razunami želatča tii judionacžquiztanaqui.

³⁰ Jalla nekztanaqui nii judío žoñinacaqui tsjii acuerduquiz asiptassitakalča tii Pablo conzjapa. Jalla nii zizcu, nekztan wejrqui amquin apura cuchanžcuča. Nižaza nižta quintra žoñinacžquiz mantichinča, am yujcquiz parlajo, čhjul puntuquiztan quintra aptazaja, jalla nii. Jalla nužukazza”.

³¹ Jalla nekztanaqui ortin jaru zultatunacaqui ween Pablo chjitchiča, Antípatris cjita watjacama.

³² Niiž jaka tažuqui kjojchiń ojknii zultatunacaqui cuartilquin quejpžquichiča. Cawallquiz ojknii zultatunacakaz tira Pablužtan ojkcchiča.

³³ Cesarea watja irantižcu, carta tjaachiča chawc jiliržquiz. Nižaza nii jiliržquiz Pablo intirjichiča.

³⁴ Carta liižcu, nii chawc jiliri qui Pablo pewcziča, jakzi wajtchiz žońitažlaja, jalla nii. Cilicia wajtchiz žońi, nii zizcu,

³⁵ tuž cjichiča:

–Am quintra aptazni žoñinacž tjonchiž cjen, am puntuquiztanaqui wejrqui atintača.

Nekztanaqui nii jiliri qui mantichiča Herodes pajk kjuyquiz Pablo zuma wijilta želajo.

24

PABLUQUI FELIX YUJCQUIZ PRISINTICHICHA

¹ Nekztan pjijska tjuñquiztan, Ananías cjita timplu chawc jiliri qui Cesarea watja irantichiča Jerusalén wajt jilirinacžtanami nižaza tsjii Tértulo cjita tjurt'iziči awjatžtan. Jalla ninacaqui chawc jilirž yujcquin prisintichiča Pabluž quintra chawc uj tjojtunzjapa.

² Tsjii audiencia cjetžtanaqui jilirž yujcquiz Pablo chjichtatača. Nekztan nii Tértulo tjurt'iziči awjatuqui Pabluž quintra chii kallantichiča tuž cjican:

—Wejt excelentísimo chawc jiliri: Walikazza wejt watjaqui, nižaza cuntintu kamasuča. Sparaquiča amquin. Am walja zizñiž cjen zuma irpiñamča wejtnacaquiz. Chjul necesidad žejlčhaja, jalla nii atintichamča.

³ Tjapa watjanacquin amiž uchta obranacquiztan ancha sparaquiž cjiwča, zuma excelentísimo Félix. Nižaza tjapa žoñinacaqui nuž amquiz sparaquiča cjiñipanča.

⁴ Wejrqui am ana ancha molistis pecuča, tii puntuquiztankaz am atintalla. Nižaza tsjii ratu wejt taku nonžnalla.

⁵ Nuc ažka kamcan, wejrnacqui zizzinča, tii žoñiqui wira anawalipanča. Nižaza tjapa kjutni judío žoñinacaž aptjapča, t'aka t'aka. Nižaza tiiqui walja achača nii nazaren cjita t'akquiztan.

⁶ Nižaza wejtnaca timpluquin yekja wajtchiz žoñi luskatz yanchiča. Jalla nižta anawalipanča. Jalla nižtiquiztan wejrnacqui tii preso tanchinča. Nižaza wejtnac lii jaru tii žoñi casticskatz pecatuča.

⁷ Nii Lisias cjita comandantizti fuerzižcu wejtnacaquiz mitissiča. Tama zultatunacžtan tii kjañchiča.

⁸ Nekztanaqui nii comandantiqui wejrnacqui tii žoñž uj tjeezjapa tekzi am yujcquiz tjonkatča. Jazic amza tii pewczna. Jalla nekztanaqui tiižquiztanpacha zizaquiča wejrnaca ultim werara chiichinča, wejtnacaž tjojunta uj puntuquiztan zumpacha zizaquiča. Tii žoñiqui walja ujchizza.

⁹ Nii žejlni judío žoñinacaqui cjichizakazza:

—Tiiž chiita takunaca werarača.

¹⁰ Nekztanaqui nii chawc jiliri qui kjara waytižcu Pablo chiikatchiča. Jalla nuž cjen Pablo paljaychiča, tuž cjican:

—Nuc ažk wata tekz tii nacionquiz amqui jiliri tsijtsamča. Jaziquiz wejrqui ancha cuntintuča am yujcquiz tjurt'izjapaqui wejt puntuquiztan.

¹¹ Ampacham wejt puntuquiztan averiguasača. Tuncapan tjuñikaz weriž irantisquitaqui, nii Jerusalén wajtquin Yoozquin sirwizjapa tjonchintača.

¹² Anaž jec žoñimi wejr žoñžtan ch'assni cherchiqui, nižaza wejrqui ana žoñinaca aptjapchinča, Jerusalén wajtquizimi.

¹³ Tii wejt quintra žoñinacaqui anaž čjul ujmi amquiz tjeezni atča.

¹⁴ Jalla tiiča ultim weraraqui. Wejrqui wejtnac ejpnacž Yoozpacha sirwuča Yooziž tjeežta kamaña jaru. Jalla nii Yooz kamañaqui yekjaž t'aka cjiča tinacaqui. Nižaza wejrqui criyuča tjapa Moisés cjiirta liimi, nižaza tjapa profetž cjiirta Yooz takunacami.

¹⁵ Nižaza criyuča Yoozqui ticziquiztan jacatatskataquiča zuma kamni žoñimi ana zuma kamni žoñimi. Jalla nii jacatatz tjuñi tjewznuča, tinacami nižazakaž tjewža.

¹⁶ Jalla nuž tjewžcan, Yooz yujcquizimi žoñž yujcquizimi wejt kuz zuma iwjt'ican persunpacha cwitasuča, ana ujchiz cjisjapa.

¹⁷ “Tsjii kjaž watanaca yekja nacionaran wejr cjklayžquichinča. Jalla nuž ojklayžcu wejrqui wejt persun yoka quejpcchinča, limosnami ofrendanacami timpluquin uchjapa.

¹⁸ Jalla nuž paan, tsjii kjaž Asia provinciaquiztan tjonchi judionacaqui wejttan zalchiča. Timpluquin žejlchinča judíož cuzturumpi jaru paacan. Timpluquin žoñinacaqui anatača wacchi, nižaza anatača čhjulumi aptazzi.

¹⁹ Jalla nii Asiaquiztan tjonchi judionacaqui jalla ninacžla tekziqi am yujcquiz prisintisquizlani wejt quintraqui, čhjul uj paatučhaja, jalla nii. Ninacaqui tsjii uj tjeeznačhaj niiqui, tekz am yujcquiz tježla.

²⁰ Jalla nii ana atchucažlaj niiqui, tii žejlñi žoñinacaj weriž paata uj kjanacama chiilalla. Wejr judío jilirinacž yujcquiz želan, uj paachinžlaj niiqui kjanaj chiilalla.

²¹ Judío jilirinacž yujcquiz žejlcan, tiikaz altu joržtan chiichinča: “Ticziquiztan jacatatz tjuñi tjewznuča. Jalla nižtiquiztan tonj ančhucqui wejr jusjiča”. Jalla niikazza weriž chiitaqui. —Nuž cjican Pabluqui chiichiča.

²² Jalla nuž nonžcu, Félix chawc jiliriqiui nii cjetžta audiencia nužquiz suspintiskatchiča. Nii jiliriqiui Yooz jicz puntuquiztan zuma zizziča. Jalla nižtiquiztan Pabluž quintra žoñinacžquiziqiui ana juyzu paachiča. Nekztan cjichiča:

—Chjulorat Lisias comandante tjonachaja, jalla nekztanž tii ančuca quijaqui wilta atintita cjequiča. Nii nooj azquitžta cjequiča.

²³ Nekztanaqui Félix chawc jiliriqiui teniente capitanzquin mantichiča Pablo tira kjuyquiz chawjcta cwitajo. Pero Pabluž amigonacžquiz permiso tjaachiča, Pablo atintizjapa.

²⁴ Tsjii kjaž majquiztan Félix chawc jiliriqiui Drusila cjiti tjunatan tjonžquichiča Pabluž taku nonzjapa. Jalla naaqui judioquiztan žontača. Nekztanaqui Pablo kjawzñi mantichiča. Niiž yujcquiz prisintižcu, Pabluqui Jesucristužquin kuzziz puntuquiztan paljaychiča.

²⁵ Nii jiliriž nonznan, Pabluqui parličiča tii čhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz casticz tjuñi puntuquiztan. Jalla nii parlita nonžcu Félix chawc jiliriqiui muzpa tsucchiča. Nekztanaqui cjichiča:

—Oka amqui. Wejttaž timpu želan, wilta am kjawznača.

²⁶ Félix chawc jiliriqiui “paaz pac jaa” cjican jalla nuž Pablužquiztan pecatča. Paaz pactiquiztan Pabluqui cuchtaž cjitasacha. Jalla nižtiquiztan nii jiliriqiui kjaž wilta Pablo kjaw kjawatča, “Cunamiž paaz pacasa jaa” cjican. Pablo kjawžcu, niižtan parličiča.

²⁷ Félix jiliriqiui judionacž kuz wali cjiskats pecatča. Jalla nižtiquiztan Pablo preso ecchiča. Pizc wata nuž watchiča. Jalla nekztanaqui Félix chawc jiliriqiui niiž puestuquiztan ulanchiča. Nii puestuquiz tsjiizuñ luzziča, Porcio Festo cjita tjuuchiztača.

25

PABLUQUI FESTUZ YUJCQUIZ PRISINTICHICHA

¹ Festuqiui chawc jilirž puestuquiz luzcu, niiž čhjep majquiztan Cesarea wajtquiztan Jerusalén watja ojkchiča.

² Jalla nicju timplu chawc jilirinacami walja acha wajt jilirinacami, jalla ninacaqui Pabluž quintra quijchiča.

³ Nižaza rocchiča:

—Tsjii favora paalla —cjican. —Tii Jerusalén watja Pablo cuchanzcalla.

Nii oraqui ninacž kuzquiz pinsichiča, Pablo jiczquiz tjonan conzjapa.

⁴ Nekztanaqui Festo chawc jiliriqúi kjaazičha, tuž cjican:

—Pabluqúi Cesarea wajtquin preso žejlčha. Tsjii kjaž majquiztan wejr-pachal quepačha nicju.

⁵ Jaziqui ančhuca jilirinacaqúi wejttan chica Cesarea ojkla. Jalla nicju nii žoñiqúi ujchizpanžlaj niiqui, jalla niž uj tjeezpanikazza ančhucalaqúi.

⁶ Nii Festo jiliriqúi quinsakal tjuñizlaj už tunca tjuñizlaj, jalla nuž žejlchičha Jerusalén wajtquiz. Jalla nekztanaqui Cesarea watja quejpchičha. Niiž jaka tažuqúi niž jusjiz oficinquiz luzzičha. Jalla nekztan Pablo zjijcajo mantichičha.

⁷ Pablo zjijctiquiztan Jerusalén wajtquiztan tjonchi judionacaqúi jusjiz oficinquiz luzzizakazza. Pabluž muytata tsijtsu, wali chawc ujnaca tjoj-tunchičha. Pero ana čjul uj tjeezni atchičha.

⁸ Jalla nekztanaqui Pabluqúi persuna tjurt'ican takunaca čiichičha, tuž cjican:

—Wejrqui ana čjul ujmi paachinpančha, ana judionacž lii quintrami, nižaza ana timplu quintrami, nižaza ana roman chawc jilirž quintrami. Anapan uj paachinčha.

⁹ Nekztanaqui Festo jiliriqúi judionacž kuz wali cjiskatzjapa tsjii favora paaz pecatčha. Jalla nižtiquiztan Pablužquiz pewczyčha, tuž cjican:

—¿Jerusalén watjam okasaya? Jalla nicju am quintra quijta puntuquiztan atintasachha.

¹⁰ Jalla nižtiquiztan Pabluqúi kjaazičha, tuž cjican:

—Roman chawc jilirž jusjiz oficinquiz želučha. Tekzpacha wejrqui jusjita cjistančha. Amqui zumpacham zizza wejt puntuquiztan. Wejrqui ana čjul ujmi paachinčha tii judionacž quintrami.

¹¹ Jaziqui wejrqui ujchizpančhalaj niiqui, casticta cjis anal jiwjatučha. Nižaza uj paachiž cjen ticz waquizičhaj niiqui, ticzmi anal jiwjatučha. Pero wejt quintra tjojtunta ujnacami ultimu ana tjeezkattačha. Nižtiquiztan anaž nii judionacž kjarquiz wejr intirjita cjesačha. Jaziqui roman chawc jiliržquinpan watz mayučha wejt puntuquiztan zumpacha arreglita cjisjapa.

¹² Jalla nekztanaqui Festo jiliriqúi niž tantiiñinacžtan palt'ichičha. Jalla nuž palt'izcu, Pablužquiz čiichičha, tuž cjican:

—Amqui roman chawc jiliržquin watz maychamčha. Jaziqui jalla nii jiliržquinpankam watačhani.

PABLUQUI AGRIPZ YUJCQUIZ PRISINTICHICHA

¹³ Jalla tsjii kjaž majquiztan tsjii Agripa cjita chawc jiliriqúi Cesarea watja tjonchičha Berenice cjiti tjunatan. Jalla ninacaqui tjonchičha Festo tsaanzjapa.

¹⁴ Jalla nicju tsjii kjaž maj kaman Festo jiliriqúi ninacžquiz quint'ichičha Pabluž puntuquiztan, tuž cjican:

—Tekz tsjii pres žoñi žejlčha, Félix jiliržquiztanpacha.

¹⁵ Wejrqui Jerusalén wajtquiz želan, timplu jilirinacami wajt jilirinacami jalla ninacaqui tii žoñž quintra quijchičha. Ninacaqui wejtquiz tii žoñi conkatz pecatčha.

¹⁶ Jalla nižtiquiztan wejrqui kjaazinčha tuž cjican: “Romanž liiqui tuž cjičha: Quijta žoñžtan quijni žoñžtan pucultan declarskatzpanikazza, čjulut watčhaja, jalla nii. Nekztan nii quijta žoñiqúi persun takunacžtan tjurt'asačha werarquiztanaqui. Nekztan chawc ujchizlaj niiqui, contaž cjesačha”.

¹⁷ Jalla nižtiquiztan ninacaž tiwc tjonchiž cjen, ana timpu pertižcu, niž jaka tažuqui quija atintichinča wejt jusjiz oficinquiz. Nii quijta žoñi zjijcajo mantižcu zuma atintichinča.

¹⁸ Nii quijñi žoñinacaqui prisintichizakazza. Wejrqui pinsichintača, ninacac chawc ujpan nii žoñžquiz tjeeznaa, cjican. Ultimu ninacazti ana čjul chawc ujmi tjeezkati atchiča.

¹⁹ Nii žoñž quintra chiichiča religión puntuquiztankaz. Tsjii Jesusa cjita žoñiqui ticziča. Pabluzti “Zejtča niiqui” cjiñitakalča.

²⁰ Wejrqui nižta quija atintizjapa anal zuma zizatuča. Jalla nižtiquiztan Pablužquiz pewczinča, tuž cjican: “Jerusalén watja okasay? Jalla nicju tii am quintra quij puntuquiztan atintasača”. Jalla nuž chiichinča wejrqui.

²¹ Jalla nekztanaqui niiqui maychiča roman chawc jiliržquin watzjapa. Jalla nižtiquiztan Augusto cjita chawc jiliržquin watajo mantichinča. Nižaza tirapan preso želajo mantichinča, čjulorat chawc jiliržquin mantichuca cječhaja, jalla niicama.

²² Jalla nekztanaqui Agripa jiliri qui Festo jiliržquiz cjichiča:

–Wejrzakal nii žoñž razuna nonz pecuča.

Festo jiliri qui kjaaziča, tuž cjican:

–Jakapacham nonznaquiča.

²³ Niiž jaka tažuqui Agripa cjita jiliri qui Berenice cjiti tjunatan pajk audienca kjuyquin luzquichiča, ancha zuma honorchiz. Zultatž jilirinacžtanami wajt jilirinacžtanami luzzizakazza. Nekztanaqui Festo jiliri qui Pablo zjijcajo mantichiča.

²⁴ Pablo zjijctiquiztan Festo jiliri qui tuž paljaychiča:

–Agripa chawc jiliri, nižaza tekz ajczi zuma žoñinaca. Tekziča tii žoñiqui. Walja judionacaqui tii žoñž quintra chiichiča Jerusalén wajtquinami tii Cesarea wajtquizimi. Jalla ninacaqui wejr rocrocchiča tii žoñi conzjapa, “Tii žoñiqui ana žejtz waquiziča” cjican.

²⁵ Wejrpacha tii zuma pewcpewczcu, anapan čjul uj wači atchinča, ticzkatajo. Nižaza tiiqui roman chawc jiliržquin watz maychiča jusjita cjejajo. Jalla nuž maytiquiztan tantiižcu, watajo mantichinča.

²⁶ Wejrqui roman chawc jiliržquin ččjul puntut tii žoñž puntuquiztanaqui cijiras? Anal zizuča. Jalla nižtiquiztan am yujcquiz prisintiskatuča, señor Agripa, wejt chawc jiliri. Nižaza tjapa ančhucaquiz prisintiskatuča. Jazi qui ančhucqui tii žoñi zumpachaž pewczina. Nekztan wejrqui aptačhani čjul puntut cijiras, nii.

²⁷ Tii pres žoñž quintra puntuquiztan kjanapacha cijirz waquiziča. Ana nižta cijiraquiz niiqui, anapal cuchñi atasacha. –Jalla nuž paljaychiča Festo jiliri qui.

26

PABLUQUI TJURT'INĪ TAKUNACA WILTA CHIICHICHA

¹ Jalla nekztanaqui Agripa jiliri qui Pablužquiz tuž cjichiča:

–Amqui am persunquiztan zuma tjurt'iz taku chiya.

Jalla nekztanaqui Pabluqui kjara chjinžcu paljayi kallantichiča, tuž cjican:

² –Excelentísimo Agripa, chawc jiliri, ancha cuntintuča wejrqui, am yujcquiz wejt puntunaca werara chiizjapa. Judío žoñinacaqui wejt quintra ujnaca tjojtunchiča. Jaknižlaj nii werara chiyasača.

³ Amqui tjappacha učum judionacž cuzturumpinaca zumam zizza. Nižaza učumpora čjul puntu ch'aasaj, nii ch'aastanacami zizza

amqui. Jalla nižtiquiztanaqui wejrqui ancha cuntintučha, am yujcquiz tjurt'izjapaqui. Zuma pasinsistanž nonžnalla.

⁴ 'Tjapa judionacaqui weriž kamta zizza. Wejt yokquiz ojklaytami nižaza Jerusalén wajtquiz ojklaytami jaknuž ocjalquiztanpacha kamiñtažlaja, nii zizza tjapa judionacaqui. Ninacžtan kamiñtača.

⁵ Tjowanstiquiztanpacha fariseo t'akquiz žejlchinča. Nii fariseo t'akaqui učum judionacž lii jarupan walja estricto kamiñičha yekja judionacž t'akanacquiztan cjenami. Jalla nii ažktan zizza nii wejt quintra judionacaqui. Jaziqui ninacakaj declarla, declarz pecčhaj niiqui.

⁶ Tuquiqui Yoozqui učum tuquita ejpnacžquiz taku ecchiča, ticziquiztan jacatatz puntu, jalla nii. Jalla nii jacatatzpan tjewznuča. Jalla nuž weriž tjewztiquiztan, judionacaqui wejt quintra quijchiča.

⁷ Pero Israel wajtquiziqui wejtnac tuncapan t'akanacaqui Yooziž ecta taku cumplis zakaz tjewža. Jalla nižtiquiztan Yoozquin rispitiñičha, nižaza majiñami weenami nižžquin sirwiča. Wejt chawc jiliri, jalla niipan tjewzñiž cjen judionacaqui wejt quintra tjojktichiča.

⁸ Ančhucmi zakaz cričhani, Yoozqui ticziquiztan žoñinaca jacatatzquiča, nii.

⁹ 'Tuquiqui wejrqui pinsiñtača, nii Nazaret wajtchiz Jesusižquin criichi žoñinacž quintra čjul anawalinacami paaz waquiziča.

¹⁰ Jalla nuž wejrqui criichinacž quintra anawalinaca paachinča Jerusalén wajtquin. Učum timplu jilirinacž mantita jaru walja criichinaca carsilquiz chawjcskatchinča. Nižaza criichinaca conajo, wejr zakal taku utchinča.

¹¹ Nižaza kjaž wilta criichi žoñinaca sufriskatchinča, Jesucristuž quintra chiikatjapa, nižaza Jesucristužquiztan quejpskatzjapa. Wejrqui nižtapacha paachinča judionacž ajcz kjuyquizimi. Nižaza walja žawjwiñtača nii criichinacž kjutni. Jalla nuž žawjžcu wejrqui criichinaca tani ojklayiñtača yekja watjaranami.

¹² 'Jalla nijapa Damasco watja ojkinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criichi žoñinaca tanzjapa.

¹³ Jiczquiz okan, taypur ora tiripintit arajpachquiztan tsjii wali pajk ispijužtakaz kjanžquichiča, tjuñ siiquiztan juc'anti. Wejt muytatami wejt cumpant'ini žoñinacž muytatami kjančiča.

¹⁴ Niiž cjen, wejrnacqui yokquiz tsucaña tjojtsinča. Nekztanaqui wejrqui tsjii jora nonzinča. Hebreo tawkquiztan wejtquiz paljayžquichiča, tuž cjican: "Saulo, Saulo, ¿kjažtiquiztan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun jančiž quintra paača, jalla nižta irata am persun quintra paača". Jalla nuž paljayžquichiča nii tsewctan chiiñi joraqui.

¹⁵ Nekztanaqui wejrqui pewczinča, tuž cjican: "Wejt Jiliri, ¿ject amya?" Nekztan Yooz Jiliri qui wejtquiz cjichiča: "Wejrtča Jesusitqui. Amqui wejt quintram paača. Wejrtča niitqui.

¹⁶ Zaažna. Tsijsna. Amqui wejr sirwaquiča. Nižaza tii amiž chertanacami declaraquiča muzpa žoñinacžquiziqui. Wiruñaqu iyam cheraquiča wejt puntuquiztan. Jalla nekztan tjapa wejt puntuquiztan parlaquiča. Jalla nižtajapa am illzinča. Jalla nuž cjen amquiz pariscučha.

¹⁷ Jaziqui am cuchnača ana judío žoñinacžquin wejt puntuquiztan parližcajo. Nekztanaqui amiž parlan, wejrqui am cwitača, judionacžquiztanami, nižaza nacjuñta žoñinacžquiztanami.

¹⁸ Nacjuñta žoñinacžquiz am cuchnača, wejt puntuquiztan parlajo. Jalla nuž amiž parlitiquiztan nii žoñinacž kuzqui cjetžintaž cjequiča wejt puntu

intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquiztan ninacaqui liwriita cjequiča, Satanás cjeta diabluz mantita jaru ana ojklajajo, antiz Yooz mantita jaru ojklajajo. Nižaza wejtquin criyaquiča, ninacz ujnaca pertunta cjisjapa, nižaza Yooz kamaña tanzjapa parti Yooz illzta žoñinacztan”.

¹⁹ Nekztanaqui, Agripa chawc jiliri, nii arajpachquiztan paljayta takunaca catokchinča, nii jaru kamzjapa.

²⁰ Primiraqui Damasco wajtquin žejlñi žoñinaczquiz liwriiñi Yooz taku parli kallantichinča. Nekztanaqui Jerusalén wajtquin nii Yooz taku parlichinzakazza. Niiž jaru Judea yokaran parlichinča. Niiž jaru nacjuñta žoñinaczquin Yooz taku parlichinča. Judío žoñinaczquizimi ana judío žoñinaczquizimi tjappachquiz parlichinča, ninacz kuznaca campiyajo, Yooz sirwiz quejpnajajo, nižaza Yoozquin quejptiquiztan zuma kamaña tjeežnajo.

²¹ Jalla nižta Yooz takunaca parlitiquiztan judío žoñinacaqui wejr preso tanchičha timpluquiz, wejr conajo.

²² Anzcama Yoozqui wejr yanapčha. Jalla nižtiquiztan wejrqui tjurt'iñi kuzziz tii zuma Yooz taku parluča humilde žoñinaczquizimi pajk jilirinaczquizimi. Tuquitan Yooz taku parliñi profetž chiita tawk jaru nižaza Moisés chiita tawk jaru, jalla niicama parluča. Jalla ninacaqui maz-inchiča, tuž cjican:

²³ “Cristuqui sufristanča ticzcama. Nekztan ticziquiztan jacatatstanča. Jalla niiqui primer ticziquiztan jacatatchi žoñičha. Jalla nii Jesucristuž cjen tii zuma liwriiñi Yooz takuqui parlitapantača učum wajtchiz žoñinaczquizimi yekja wajtchiz žoñinaczquizimi”. Jalla nii liwriiñi taku zaka wejr parluča.

PABLUQUI AGRIPZQUIZ CHIIZINCHICHA

²⁴ Pablo jalla nuž tjurt'iñi taku paljayan, Festo jiliri qui altu tawkžtan cjichiča:

—Pablo, ¡lucuratažtakazza amqui! Zmali istutiižcu, jalla nižtiquiztan lucurata cjissamčhalani amqui.

²⁵ Pabluqui kjaaziča, tuz cjican:

—Festo, zuma chawc jiliri. ¡Wejrqui anača lucuratqui! Antiz weriž paljayta takunacača razunaqui, nižaza werarača.

²⁶ Tekzimi Agripa chawc jilirimi žejlča. Niimi zumaž tii puntuquiztan zizza. Jalla nižtiquiztan wejrqui tjup kuztan tiž yujcquiz chiižinuča. Tii Agripa chawc jiliri qui tjapa weriž paljayta puntunacaqui zizzipanča. Nižaza tii puntunacaqui watchičha tjapa žoñinacz zizan, anača tsjii chjo-jzak watchi quintu.

²⁷ Señor Agripa, chawc jiliri, ¿profetaž parlita takum criya? Amqui criiž caa kal cjiwchiya.

²⁸ Agripa chawc jiliri qui Pablužquiz kjaaziča, tuž cjican:

—¿Tsji koluc takunacztankam wejr cristiano cjiskatz pecya?

²⁹ Nekztanaqui Pabluqui cjichiča:

—Tsji kjaž takunacztan už wacchi takunacztan wejrqui ančhuc tuž cristiano cjiskatz pecučha. Ammi nižaza tjapa tonj nonzñi žoñinacami wejr irataj cjisla. Jalla nuž Yooz munañpaj cjeequi. Wejr irata Yoozquin criichej cjisla, pero ana tižta carinžtan mokta.

³⁰ Jalla nuž Pabluž chiitan, tjappacha nii julzi žejlñi jilirinacaqui tsijtsičha, Agripa chawc jilirimi, nižaza Festo jilirimi, nižaza Berenice cjiti tjunmi.

³¹ Nekztanaqui ninacaqui Pabluž puntuquiztan parlizjapa tsjii latu ojkchiča ninaccama palt'i. Jalla nekztanaqui ninaccama kazziča:

–Tii žoñiqui ana čjul ujmi paachiča, conkatajo. Anaž conta cjesača. Nižaza anaž carsilquizimi chawjcta cjesača.

³² Nižaza Agripa chawc jiliriQUI Festo jiliržquiz cjichiča:

–Tii žoñiqui ana roman jiliržquin watz maytasaz niiqui, cutztaž cjitasača.

27

PABLUŽ QUIJAQUI ROMA TJATZTACHA

¹ Jalla nekztanaqui nii jilirinacaqui tantiichiča, Pabluž quija roman chawc jiliržquin tjazjapa. Jalla nižtiquiztan Pablumi parti presonacami intirjitatača tsjii Julio cjita capitanžquiz, Italia watja chjitzjapa. Nii capitanaqui Augusto cjita batalionquiztan jiliriča. Wejrqui Pablužquiz cumpant'ichinča.

² Adramitio cjita wajtquiz tsjii warcu želatča. Nii oraqui nii warcuqui ojkzpachatača Asia kjutni. Jalla nuž cjen nii warcuquiz luzzinča. Nižaza wejtnacatan Aristarco cjita žoñitača. Niiqui Tesalónica wajtchiz žoñitača. Tesalónica watjaqui Macedonia yokquintača.

³ Jaka tažuqui Sidón cjita wajtquin irantichinča. Jalla nicju Julio capitanaqui Pablužquiz tsjii favora paachiča, Pablužquiz permiso tjaachiča niž mazinacžquin tjonznajo atintita cjisjapa.

⁴ Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž cjen.

⁵ Jalla nekztanaqui Cilicia nižaza Panfiliaž niž waruñ chawc kota kajkchinča Mira cjita watjacama. Mira watjaqui Licia cjita yokquintača.

⁶ Jalla nicju zultatž capitanaqui tsjii Italia ojkni warcu zalchiča. Nii warcuqui Alejandria wajtquiztan ulnatča. Jalla nii warcuquiz capitanaqui wejrnac luzkatchiča tira ojkzjapa.

⁷ Nekztanaqui tsjii kjaž maj ojkchinča zumat. Ancha tjamiž cjen ch'aman irantichinča Gnido cjita yokž wartuñtan žcati. Nižaza nii ancha tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkchinča.

⁸ Tjamiž cjen, ch'aman ojkan Creta cjita yok žcati ojkchinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹ Jalla nicju irantizjapaqui walja timpuqui pertitača. Auti timpu iran-tisquiz cjen, tjamiqui tirapan tjamchiča. Jalla nižtiquiztan anawalitača chawc kotquiz ojkzqui. Jalla nižtiquiztan Pabluqui chiižinchiča,

¹⁰ tuž cjan:

–Jilanaca, wilta ojkzqui anawaliž cjequiča. Warcumi cargami per-tisnachani nižaza učhummiž ticznasača.

¹¹ Nii zultatž capitanazti Pabluž chiita ana cazziča. Warcuchiz tuyñumi, nižaza warcuž capitanami, jalla ninacž takukaz nonziča.

¹² Nii wajtquiz auti timpu watzjapa, warcužtaqui anatača cuza. Jalla nižtiquiztan jos tjappacha ninacaqui pinsatča nawjctan ojkz tsjan cusa, nii. Fenice cjita wajtquin irantis pecatča jaknužumi. Fenice watjaqui Creta yokquinzakaztača. Nii wajtquiztan cheržtaqui pajk kota tjenča warutuñtan, užatuñtan. Jalla nicjuñtača waliqui auti timpu watzqui.

PAJK KOTQUIZ ANAWALI WATCHIČA

¹³ Jalla nekztanaqui warutan zuma queržcan ninacaqui pinsichiča, tira ojkzjapa. Jalla nekztan ninacaqui zarakchiča. Creta yok tjiyaranpan ojkchiča.

¹⁴ Tsjii kjaž majquiztan tsjii walja pjursanti tjamiqúi tjonchiča užatan tuwantan cheechi.

¹⁵ Nekztanaqúi tjamiqúi warcu chjitchiča chawc kot mor kjutñi. Tjamž kjutñiqúi anataž wira ojkchuca. Jalla nižtiquiztan jakzichuckat tjamiqúi učum chjichačhani, jalla nicjupankaz okačhani.

¹⁶ Jalla nekztanaqúi Clauda cjita kolta yokž waruñ watchinča. Jalla nicjuñ watan tjamiqúi anatača ancha pjursanti. Tsjii kolta warcuqúi pajk warcuž wirquiz mojkžtatača. Ana ancha tjamiž cjen nii kolta warcuqúi pajk warcuquiz tewziča ch'aman.

¹⁷ Jalla nuž tewžcu, nii pajk warcu kojchnacžtan zumpacha t'ejžtatača, ana cjacsnajo. Jalla niiran yok pjila želatča Sirte cjita. Tjamiž cjen nii yok pjilquiz julz eksnatča. Jalla nižtiquiztan nii pajk pañuz cherchi pajk tultu apakchiča warcu tsewctan. Nekztanaqúi tjamžquiz warcu chjitskatchiča.

¹⁸ Niiž jaka tažquqúi nii tjam queraqúi tira walja pjursantitacha. Jalla nižtiquiztan nii warcuquiz žejlñi kuzinacaqúi pajk kotquiz tjojtatača.

¹⁹ Jalla niipa tažquqúi warcuž cusasanaca kot kjazquiz tjojtchinča wejt-naca kjaržtan.

²⁰ Tsjii kjaž majquiztan ancha ch'orawitacha. Jalla nuž ch'orawiž cjen anaž tjuñimi warawarami tjenatča. Nižaza nuž ch'orawiž cjen wejrnacqúi “Ticznačhani. Anaž jaknužumi liwriyasača”, nuž cjican chičinča.

²¹ Tsjii kjaž maj ana čjjeri lujlchi cjen Pabluqúi ninacž taypiquiz tsijtsiča, tuž cjican:

—Jilanaca, anatača učumqúi Cretquiztan ulansquiz, wejt taku caz-pantača ančhucalaqúi. Nižaza anaž corganacami pertitasača, nižaza učumqúi anaž tižta sufritasača.

²² Anziqui ančhucqúi tjup kuzziz cjisna, anača llaquiza. Tii warcuž katanami, anaž jakziltami ticznaquiča.

²³ Wejrquqúi Yooz sirwuča, nižaza Yooz partitča. Zez ween Yoozquqúi tsjii anjila wejtquiz cuchanžquichiča. Nii anjilaqúi wejtquiz jecžquichiča,

²⁴ tuž cjican: “Pablo, ana eksna amqúi. Roman chawc jilirž yujcquiz prisintistanča amqúi. Jaziqui amiž cjen tjapa amtan chica ojkñi žoñinaca žetaquiča”.

²⁵ Jilanaca, anača llaquiza. Wejrquqúi Yoozquin tjapa kuztanča. Jaknuž nii anjilaqúi chiitčhaja, jalla niicamaž cumplisnaquiča.

²⁶ Kot taypiquiz tsjii kolta yoka žejlča. Jalla nii yoka irantiž cjen warcuqúi yokquiz čhjakžcu, tsijtsnaquiča kjazquizpacha. —Jalla nuž paljaychiča Pabluqúi.

²⁷ Jalla nekztanaqúi pizc simana ojktiquiztan, Adria cjita kot kjazquiz želan, tjamiqúi warcu chjichatča. Jalla nii ween chica arama warcu joojooñinacaqúi pinsichiča, yokquin irantičhani, cjican.

²⁸ Jalla nižtiquiztan kjazquiztan kozzuc yokquin tupžcu, zizziča quinsa tunc sojtan metro. Nižaza tsjii kjažtapacha ojkžcu wilta tupzizakazza. Jalla nuž tupžcu, zizziča paatunc pakallakun metro.

²⁹ Kjaz kostan maz akji želačhani cjican pinsichiča. Nekztan warcu wirquiztan tsjii pajkpic pajk jirunaca quijsiča ana nii maz ajkquin čhjakajo. Ekscan tjuñi tjewks tjewznatča.

³⁰ Jalla nuž tjewžcan, nii warcu joojooñinacaqúi pinsichiča, warcuquiztan atipasjapa. Jalla nuž pinsižcu, nii tewžta kolta warcu kjazquiz chjijwnatča. Jalla nuž chjijuncan nii pajk jirunaca quijtžtažokaž cjetča nii warcuž yujc-quiztan.

³¹ Jalla nuž cheržcu, Pabluqui zultatž capitanžquiz paljaychiča nižaza zultatunacžquizimi, tuž cjican:

—Nii warcu joojooñinacaqui ana tii warcuquiz eclaquiž niiqui, ančhucqui ticznasača.

³² Nuž nonžcuqui zultatunacaqui nii kolta warcu mojka kojchnaca pootžinchiča kolta warcu kjazquin tjojtsnajo.

³³ Jalla nii kjantati Pabluqui taku tjaachiča čhjeri lulajo, tuž cjican:

—Pizc simana tjontača ančhucmi kuz turwayzi ana tjačhi nižaza ana lujlchi.

³⁴ Nižtiquiztan ančhucqui čhjulullamekaz lujlznalla, azi tanzjapa. Anaž jecmi wira apt'isnasača. Nižaza ana zinta čhjojricha cjequiča.

³⁵ Jalla nuž chiižcu Pabluqui tsjii t'anta tanziča. Nižaza Yooz Ejpžquin sparaquiž cjichiča tjapa nii žejlñi žoñinacž yujcquiz. Jalla nekztanaqui nii t'anta kjolžcu lujlchiča.

³⁶ Jalla nižtiquiztan tjapa nii žoñinacaqui lujlsquin kuzziz cjissiča. Nekztan lujlchizakazza.

³⁷ Nii warcuquiz paa patac pakallaww tunca sojtan žoñinacatača.

³⁸ Jaknužt zapa mayni pecčhaja jalla nuž lujlchiča. Jalla nuž lujlžcu nii parti trig kuzinaca kjaz kotquin tjojtchiča nii warcu cježu cjejajo.

WARCU KJAZQUIZ KATCHICHA

³⁹ Tjuñi tjewktanalla, warcu joojooñinacaqui nii yoka cheržcu ana pajatča. Pero tsjii puj atquin pjila iñžta k'ar yoka želatča. Nii yokquin warcu tsijtskatz pecatča.

⁴⁰ Jalla nekztanaqui nii pajk quijtžta jirunacžquiz mojka kojchmi pootchiča. Kjazquizpacha cutziča. Nižaza kochnaca jweržcu, warcu irpiñi maderanaca cutsiča. Nekztan pajk tultu, warcu juntuñ tucquin tsijjpsiča tjami tanzjapa. Jalla nižtiquiztan warcuqui puju iñžta yoka žcatžinchiča.

⁴¹ Jalla nuž žcatžincan, pizc curinti ojkñi kjaz jalla nekz cjissiča. Jalla nižtiquiztan nii warcuqui kjaz koztan yokquiz quijtsiča. Warcu tucquiztanaqui pjilquiz luzzitača. Ana jaknužquin kissiča. Nižaza warcu wirquiztanaqui kjaz ljojkičaž warcu kjolatča.

⁴² Jalla nuž cjen preso itzñi zultatunacaqui preso žoñinaca konz pecatča, ana atipskatzjapa kjazquiz narcan.

⁴³ Zultatž capitanazti Pablo liwriiz pecatča. Jalla nižtiquiztan presonaca conawc cjen atajichiča. Nekztan mantichiča, tuž cjican:

—Kjazquiz narñi zizñi žoñinaca, ančhucqui primiraqui kjazquiz luzna, yokquin irantizjapa.

⁴⁴ Parti žoñinaca, ančhucqui tabla tanžcu kjazquiz zakaz luzna. —Jalla nuž mantichiča nii capitanaqui.

Jalla nuž tjappacha yokquin irantichiča. Ana zinta ticziča.

28

PABLUZ MALTA YOKQUIN KAMTA

¹ Jalla nuž yokquin ulanžcu, nii kolta yokž tjuu zizzinča Malta cji-tatakalča.

² Jalla nii yokquin žejlñi žoñinacaqui wejrnaca ancha wali atintichiča. Nižaza tsjii pajk uj taazinchiča wejrnac kutnajo. Chijniž cjen zaquiž cjen wejtnacaltajapa uj taazinchiča.

³ Nekztanaqui Pabluqui kjoñ žup aptichiča. Nii žup ujquin tjojtan, tsjii zkoraqui uj kjakiž cjen ulanžquichiča Pabluž kjarquin ch'atzi chejchpacha.

⁴ Jalla nuž cheržcu nii yokchiz žoñinacaqui tuž cjeysiča:

—Tii žoñiqui žoñi conñizlani. Kot kjarquiztan liwriitaž cjenami Yoozqui anat munčhani, tiž žejtzmi.

⁵ Pabluqui kjarquiztan zkora tsajtsajtsičha ujquiz. Zkoraž ch'attaž cjenami anapan kjaž cjissičha Pabluqui.

⁶ Tjapa nii žoñinacaqui Pabluž kjarat tjuwačhani cjican chekznatča. Nižaza tsjii ratuquiztan ticzit cjee tiiqui, jalla nuž pinsatča nii žoñinacaqui. Jalla nuž ažk tjewžcu, Pablo ana kjaž cjissi cherziča. Jalla nižtiquiztan pinsita campiižcu, nii žoñinacaqui cjichiča:

—Tii Pabluqui cheka Yoozalani —cjican.

⁷ Ulanta yok žcati nii yokchiz jilirž yokanaca želatča. Nii jiliričui Publio cjitatača. Jalla ničui wejrnaca zuma risiwčiča. Čjep maj wejrnac zuma atintičiča.

⁸ Publiož ejpqui laa želatča, tsjii ch'ujlñi conžtan, nižaza jawžtan. Pabluqui nižquin tjonžni ojkčiča. Nekztanaqui Pabluqui nii laa žoñža Yoozquin mayizičiča, čjetinjapa. Nekztanaqui niž juntuñ kjaržtan lanžcu, čjetinčiča.

⁹ Jalla nižtiquiztan parti nii yokquiz žejlñi laanacaqui tjonchizakazza, jalla ninacami čjetintatača.

¹⁰ Nuž čjetintiquiztan nii žoñinacaqui wejtnacquiz walja rispitchičha. Čjep jizquiztan wilta tsjii warcuquiz luzzinča. Ima nii warcu luzan, nii žoñinacaqui walja zuma žaka cjižinčiča, wejrnaca ojkzjapa.

PABLUQUI ROMA WAJTQUIN IRANTICHICHA

¹¹ Warcuqui nii yokquiz auti timpu watchičha. Alejandría wajtquiztan tjonchitacha. Nii warcuž tucquin pizc yooznacchiztača. Cástor y Pólux cjitatača nii pizc yooznacaqui.

¹² Nekztanaqui warcuquiz ojkcan, Siracusa wajtquin irantichinča. Jalla nicju čjep maj kamchinča.

¹³ Jalla nekztan warcuquiztan tira ojkchinča. Nekztan yok žcatiran ojkcan, Regio cjita wajtquin irantichinča. Niiž jaka tažuqui wartan queržquichiča. Jalla nuž queržcan pucmajquiz irantichinča Puteoli wajtquin.

¹⁴ Jalla nicju tsjii kjažultan Yoozquin criichi jilanacžtan zalchinča. Jalla ninacaqui wejtnacaquiz invitčičha ninacžtan tsjii simana kamajo. Jalla nekztanaqui Roma wajt kjutñi zarakchinča.

¹⁵ Roma wajtchiz Yoozquin criichi jilanacaqui wejtnacaž tjonz quintu zizzitakalča. Jalla nekztan wejtnacatan zali ulanžquichiča. Jalla ninacaž nuž zalzquichiquiztan, Pabluqui Yoozquin sparaquič cjichiča. Nižaza juc'ant tjup kuzziz cjissičha. Wejrnacqui ninacžtan zalchinča Foro de Apio cjita yokquin, nižaza Tres Tabernas cjitazakaztača.

¹⁶ Jalla nekztanaqui Rom watja irantitanaqui nii capitanaqui preso žoñinaca intirjichiča roman zultatž jiliržquiz. Pero nii capitanaqui Pablo kamkatchičha yejkquin tsjii guardiñi zultatžtan.

PABLUZ KAMTA ROMA WAJTQUIN

¹⁷ Čjep majquiztan nuž irantižcu, Pabluqui kjawzkatchičha Roma žejlñi judío jilirinaca. Jalla nuž Pablužquin tjontan, Pabluqui ninacžquin paljayčiča, tuž cjican:

—Jilanaca, wejrqui roman zultatžquiz preso intirjitatača Jerusalén wajtquin, ana čjulumi judionacž quintra paachi cjenami. Nižaza ana čjulumi učum tuquita ejpnacž cuzturumpi quintra paachi cjenami.

¹⁸ Wejr zumpacha pecunžcu, ninacaqui wejr cuts pecatča. Wejt quintra ana čjul ujmi watchičha, wejr conzjapaqui.

¹⁹ Judío partinacazti ana munchičha. Jalla niztiquiztan roman chawc jiliržquin wejt quija tjaznajo maychinča. Jalla nuž cjenami, wejrqui wejt wajtchiz žoñinacž quintra ana čjul uj tjeeskatz pecučha.

²⁰ Jalla nižtiquiztan ančhuc kjawzkatučha ančuca cherzjapa, nižaza ančhucatan parlizjapa. Učhumqui Israel wajtchiz žoñinacčhumča. Jalla učhumqui Yooziž cuchanžquita žoñi tjewža. Jalla nii tjewžta žoñi sirwiñiž cjen wejrqui tii carinžtan čejlta želuča.

²¹ Jalla nekztanaqui nii judionacaqui cjichiča:

–Wejrnacqui am puntuquiztan ana čjul cartami risiwchinča Judea wajtquiztan. Nižaza nii nawjctan tjonchi judío jilanacami anaž am quintra chiiča.

²² Wejrnacqui amiž pinsita takunaca nonz pecučha. Tjapa wajtquizimi tii ew yekja t'akž quintra chiiča. Jalla nuž zizuča.

²³ Jalla nekztanaqui tsjii tjuñi citičha. Jalla nii citta tjuñquiziqui walja žoñinacaqui tjonchiča jakziquin Pablo alujassi želatčhaja, jalla nicju. Jalla nuž žoñinacž tjonžcu Pabluqui ninacžquiz paljayčiča wenstanpacha zezi-cama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liiquiztanami nižaza profetanacž cijirta liwrunacžquiztanami punta punta chiižinčiča, ninaca zuma intintazajo Jesusiž puntuquiztan.

²⁴ Yekjapanacaqui Pabluž nuž chiita takunaca catokčiča. Yekjapanacazti niž takunaca ana nonziča.

²⁵ Jalla ninacpora Jesucristuž puntuquiztan ch'aascan, nužquiz ninacaqui wichanzi kallantičiča. Ima okan, Pabluqui cjichiča:

–Espíritu Santuqui Isaías cjita profetžquiz paljayčiča učhum tuquita ejpnacžjapa. Ančuca puntuquiztan werarapan čiičiča, tuž cjican:

²⁶ “Oka, tii žoñinacžquiz paljayžca, tuž cjican: Ančhucqui nonžneeka nonznaquiča, pero ana intintazasača. Nižaza chekžneeka chekž-naquiča, pero ana cumprintasasača.

²⁷ Jalla nuž cjequiča. Tii žoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana cherzjapaqui. Jalla nižtakaz žejlča ana intintiñi kuzziz cjisjapa. Nižaza ana wejtquin cut'iscaquiča, liwriita cjisjapa”.

²⁸ Jalla tekztan nawjcchuc tii liwriiñi Yooz takuqui parlitaž cjequiča ana judío žoñinacžquin. Jalla nii ziza ančhucqui. Nii yekja wajtchiz žoñinacaqui tii liwriiñi Yooz taku nonznaquiča.

²⁹ Jalla nuž Pabluž chiitiquiztan, judionacaqui ojkčiča, ninacpora ancha ch'aascan.

³⁰ Pabluqui pizc wata intiru nii aquilta kjuyquiz kamčiča. Jakzilta nižquin tjonžni žoñimi zuma risiwñipanikaztača.

³¹ Jalla ninacžquin parličiča Yooz mantita kamañ puntuquiztan, nižaza Jesucristo Jilirž puntuquiztan. Tjapa kuztan kjana tjaajnatča. Nižaza anaž jecmi Pablo atajčiča, Yooz taku ana paljayajo.

LA CARTA DEL APOSTOL SAN PABLO A LOS ROMANOS

¹ Wejr Pabluqui ančhucaquin tii cartal cjiřzcuča. Jesucristuž mantitacama okiñ zoñtča. Yooz Ejpqui wejr kjawžcu apóstol puestuquin utchiča, liwriiñi Yooz taku parlajo.

² Tuquitanpacha Yoozqui tsjii liwriiñi zoñi cuchanžquiz compromitchiča. Jalla nii compromittaqui Yooz cuntiquiztan chiiñi profetanacaqui maz-inchiča zuma Yooz tawk libruquiz.

³ Nii liwriiñi zoñiqui Jesucristo Jiliriča. Yooz Majchča niiqui. Jesucristuqui zoñi cjicanaqui Davidž majch maatinacquiztan tjonñitača.

⁴ Nižaza Jesucristuqui ticziquiztan jacatatchiča; nižaza zuma Yooz Espirituchizza. Jalla nii kjanapacha tjeēza, niiča walja azziz Yooz Majchqui, nii. Jesucristo Yooz Majchča učum Jiliriqui.

⁵ Jesucristuž cjen wejrqui zuma Yooz kamaña tanzinča. Nižaza Jesucristuž cjen Yooz Ejpqui wejr apóstol puestuquiz utchiča, tjapa wajtchiz zoñinaca Jesucristužquin kuzziz cjeyajo, nižaza nižquiz cazajo. Jalla nuž apóstol kamañquiz kamcan, Jesucristužtajapa langznuča.

⁶ Ančhuc zakaz Jesucristužquiz kuzziz cjissinčhucča. Yooz Epiž ančhuca kuzquiz kjawžtan Jesucristuž partiquiz cjissinčhucča.

⁷ Wejrqui tjapa ančhucaquin cjiřzcuča, Roma wajtquin žejlñi zoñinacčhucča. Yooz k'ayi zoñinacaž cjen, Yoozqui ančhucaquiz kjawziča, Yooz zuma kamañchiz cjeyajo. Učum Yooz Ejpmi, nižaza Jesucristo Jilirimi ančhucaquiz zumaj yanapt'ila; nižaza cuntintu kuzziz cjiskatla.

PABLO ROMA WAJTQUIN TJONZ PECCHA

⁸ Jaziqui ančhucaž zuma kamtiquiztan Yooz Ejpžquin ancha gracias cjican chiyučha. Tjapa wajtchiz zoñinacaqui ančhuc puntu chiiča, ančhucqui ancha Jesucristužquin kuzzizza, nii. Jesucristuž cjen Yoozquin gracias cjican chiyučha.

⁹ Wejrqui tjapa kuz Yooz sirwuča, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapuča, nii.

¹⁰ Nižaza Yoozquin mayizuča. Yooz munan, ultimu ančhucaquin jaknužquiztanami tjonzquiz atučhani. Ažka ančhucaquin tjonzquiz pecatuča.

¹¹ Ančhucatan ancha zalz pecučha, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa.

¹² Ančhucmi wejrmi Jesucristužquinkaz kuzzizčhumča. Jalla nižtiquiztan zalžcu porapat chiižinascu, Yoozquin juc'ant kuzziz cjesača učumqui.

¹³ Jilanaca, cullaquinaca, ančhucaquiz zizkatz pecučha, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacquizimi Jesucristužtajapa langz pecučha, zoñinaca nižquin kuzziz cjeyajo.

¹⁴ Wejrqui liwriiñi Jesucristuž puntu parlistanča, k'ar zoñinacžquizimi campuquiz žejlñi zoñinacžquizimi, zizñi zoñinacžquizimi, ana zizñi zoñinacžquizimi. Jalla tjapa zoñinacžquizimi liwriiñi Jesucristuž puntu parlistanča.

¹⁵ Jalla nižtiquiztan wejrqui ančhucaquiz zakaz nii puntu parliz anchal pecučha.

ANCHA AZZIZZA LIWRIIŃI TAKUQUI

¹⁶ Jakziltat liwriiŃi Yooz taku catokačhaj niiqui, liwriita cjequičha. Tuquiqui judío žoŃinacžquiz nii liwriiz puntu parlitatačha. Nekztan yekja wajtchiz žoŃinacžquiz parlitazakaztačha. Jakziltat nii liwriiz puntu catokačhaja, jalla niiqui liwriitaž cjequičha. Nižta azzizza liwriiŃi Yooz takuqui. Jalla nižtiquiztan nii Yooz taku parlizjapa anal azučha; nii ancha zuma taku parlizjapa ancha jutzaznučha.

¹⁷ LiwriiŃi takuqui tuž cjičha; Yoozqui ancha zumačha; nižaza žoŃinacžquiz nižta zuma nižaza ana ujchiz cjiskatasachha. Jalla nuž cjičha nii liwriiŃi Yooz takuqui. Jaknužt žoŃinaca Yooz yujcquiz ana ujchiz, nižaza zuma cječhaja, jalla nii zizkatučha, nii liwriiŃi taku chiican. Jesucristužquiz kuzziz cjen, jalla nii alajakaz Yooz yujcquiz ana ujchiz, nižaza zuma kuzziz cjesačha. Cjijrta Yooz takuqui tuž cjičha: “Jakziltat Yoozquin kuzziz cječhaja, jalla niičha Yooz yujcquiz ana ujchizqui, nižaza zuma kuzzizqui. Nekztan Yooztan wiňaya kamaquičha”.

YOOZ JAYTIZCU ŽOŃINACAQUI UJPAN PAACHA

¹⁸ Arajpachquiztan Yooz casticuqui tjončha tjapa ana Yooz kuzcama kamŃinacž quintra, nižaza anawali paaŃinacž quintra. Jalla nii anazum kamaŃchiz žoŃinacaqui anawali paažnacapan pecčha, Yooz zuma kamaŃa anaž importičha. Nekztan Yooz kuzcama ana kamčha. Yooz puntu werara zizawc cjen, atajčha.

¹⁹ Pero ninacž kuzquiz Yooz puntu zizasachha. Yoozqui žoŃinacžquiz kjana-pacha tjeezičha, niž puntu.

²⁰ Ana Yooz cheržcumi tii mundo paatiquiztanpacha Yooz puntu zizta cjesačha. Niiž paatanaca cheržcu, tjapa žoŃinacaqui Yooz puntu zizasachha, Yoozqui wiňaya azzizza, nižaza werar Yoozpankazza, tii mundo paachi Yoozqui. Jalla nii kjana zizta cjesačha. Jalla nižtiquiztan Yooz kuzcama ana kamcanaqui anazuma kamaŃchiz žoŃinacaqui ana razunchizza.

²¹ ŽoŃinacaqui Yooz puntu persun kuznacquiz zizza. Jalla nuž zizcumi, Yooz ana rispitičha, nižaza ana čjulquiztanami “Gracias, wejt Yooz” cjican chiičha. Nekztan žoŃinacaqui ina kaz pinsitanacchiz cjissičha. Nižaza ninacž chojrju kuzziz cjen ana wali zumchiquiztakaz kamčha.

²² ŽoŃinacaqui “Wejrnacčha ziziŃtqui” cjicanami, zumzužtakaz cjissičha.

²³ Ancha zumapankazza Yoozqui. Pero žoŃinacaqui nii wiňaya žejtŃi Yoozquiz rispitz jaytichičha. Nekztan žoŃinacaqui žoŃiž paata yoozquizkaz rispitičha. Nii žoŃiž paata yooznacaqui ticžŃi curpuchiz žoŃinacž irata paatačha, nižaza wežlanacž irata paatačha, nižaza pajkpic kjojchchiz animalanacž irata paatačha, nižaza zkoranacž irata paatačha. Jalla nižta paatanacquiz rispitičha.

²⁴ Jalla nižtiquiztan Yooz Ejpqui ninacžquiz jaytichičha. Nekztan ninacž anazuma pecŃi kuzcama čjul ujmi paaŃičha. ŽoŃinacpora azzucanaca paachičha.

²⁵ Ninacaqui Yooz puntuquiztan werar razunanaca criichi ecchičha. Nekztan toscar razunanaca criichičha. Jalla nekztan ninacaqui Yoozquin ana rispitičha. Yooziž paata obranacquizkaz rispitičha, nižaza sirwichičha. Pero Yoozqui tjappacha paachičha. Jalla nii tjapa paaŃi Yoozqui wiňaya honorchizza. Jalla nužoj cjila. Amén.

²⁶ Jalla nižta anawali kuzziz cjen Yoozqui ninaca jaytichiča, ninacaž anazum kuzcama azzucanaca paajo. Jalla nuž azzucanaca paacan maatakanacaqui porapat želassiča, jaknužt lucutiñi želas, jalla nižta.

²⁷ Luctakanacaqui nižaza porapat ana wali želassiča, jaknužt lucutiñi želas, jalla nižta. Ninacpora ancha peccu, azzuca ujnaca paachiča. Ancha akñi ujnacquiz tjojtsiča. Jalla nižtiquiztan ninacž persun curpuquizpacha casticu sufriča, nii ana wali paatiquiztan. Nižaza nižta sufris waquiziča ninacaqui.

²⁸ Werar Yooz zizzucatača, pero ninacaqui Yooz ana pajz pecatča. Jalla nižtiquiztan Yoozqui ninaca jaytichiča, ninaca ana zuma pinsiñi kuzziz cjisjapa, nižaza ana zuma cjujchi kamañchiz cjisjapa.

²⁹ Ninacž kuzquiz walja tjapaman ana zumanaca želatča, chjijpipacha. Jalla tižta ana zumanaca želatča; ana Yooz kuzcama kamz, adulteriuquiz ojklayz, žoñž quintra ana wali paaz, yekja žoñžquiztan zmaz, nižaza tjapa ana walimi paaz pecñi kuz želatča. Nižaza ninacž kuznaca tižtača: iniziñi kuz, žoñi coñi kuz, žoñžtan quiija ojklayz kuz, incallñi kuz, ana wal paaz pecñi kuz, nižaza ana wal quintu joojooñi kuz. Jalla nižta anawali kuzziz žoñi žejlča.

³⁰ Ninacaqui žoñž quintra chiiñinacača. Yooz quintra chjaawjkatñiča. Nižaza žoñi inarñiča, nižaza mitarazi kuzzizza, persunpacha honora waytisñiča. Nižaza ana zuma paazjapa tantiiñiča, nižaza maa ejp ana cazñiča.

³¹ Nižaza Yooz puntu ana intintiz pecñiča, nižaza chiižcupacha niiž taku ana cumpliñiča. Nižaza ana jec žoñžtanami munaziñiča. Nižaza ana pertunñiča. Nižaza ana jec žoñžquizimi okzñi kuzzizza.

³² Yoozqui mantichiča, jalla nižta žoñinacaqui ticzpan waquiziča. Jalla nuž Yooz mantita zizcumipacha, nii ana wali žoñinacaqui nižta ana wali paazkaz pecñiča, nižaza yekjaž nižta ana wali paanami, “Walikazza” cjiñiča.

2

YOOZZA LIJITUMA PJALZÑIQUI

¹ Jakzilta žoñit tsjii uj paachi žoñžquiztan “Yooz nii casticla” cjican chiičhaja, jalla nii žoñiqui ana nižta ujpacha paaz waquiziča. Jalla nižta ujpacha paaquizñi niqui, persun casticu chiiča. Nižaza Yooz yujcquiziqui anaž razunchiz cjesača niiž persun paata ujquiztan.

² Yoozqui uj paañinaca lijituma pjalznaquiča, casticzjapa. Jalla nii učhum zizza.

³ Jequit yekja uj paañi žoñž quintra chiičhaja, nižaza nižta uzbekaz persuna paačhaja, jalla niqui anapanž atipasača Yoozquiztan. Panž castictazakaz cjequiča. Uj paažcu, anapan pinsa, “Ana Yooziž casticta cjeeka” cjican.

⁴ Jalla nižta pinsiñi žoñinacaqui Yooz puntu ana zuma intintiča. Yoozqui ancha zumača, nižaza tsjan juc'anti okzñi kuzzizza, nižaza tsjan juc'anti pasinsis kuzzizza. Jalla nii werar razunača. Pero jalla nižta kuzziz cjen, Yoozqui žoñinacžquiz persun uj sint'iskatz pecča. Nuž sint'iskatzcu ujnaca paazqui eca. Jalla nuž pecča Yoozqui. Jalla nii zizza ančhuc, ¿ana jaa?

⁵ Ančhucqui ana persun uj sint'iñiž cjen, nižaza chojru kuzziz cjen, juc'anti castictaž cjequiča Yooziž ultimu pjalz tjuñquiziqui. Jalla nii tjuñquiziqui Yoozqui žoñinacž paata ujnaca tjeeznaquiča; nekztan ultimuz casticaquiča.

⁶ Jalla nii tjuñquiziqui Yoozqui tjapa žoñinaca pjalznaquiča ninacaž paatiquiztan jama.

⁷ Jequit pasinsis kuzziz zuma kamañchiz kamčhaja, jalla ninacaqui Yooztan wiñaya kamaquičha. Jalla nii zuma kamñinacaqui Yooziž tjaata honorchiz cjis pecčha, nižaza Yooziž rispitta cjis pecčha, nižaza Yooztan wiñaya kamz pecčha.

⁸ Pero yekjapanacaqui persun kuzcamakaz kamz pecčha, werar Yooz kamaña anaž pecčha. Anawalinacž mantuquizpanž žejlčha. Jalla ninacž quintra Yoozqui juc'anti žawjžcu casticaquičha.

⁹ Tjapa anawali paañinacžtami sufris želaquičha, nižaza wali llaqui želaquičha. Anawali paañi judío žoñinacaqui juc'anti sufraquičha. Pero tjapa anawali paañi žoñinacaqui zakaz sufraquičha, infiernuquinaqui.

¹⁰ Tjapa zuma kamñinacazti Yooziž tjaata honorchiz cjequičha, nižaza Yooziž rispittaž cjequičha, nižaza llan kuzziz cuntintu cjequičha. Nii zuma kamñi judío žoñinacaqui juc'ant waliž cjequičha. Pero tjapa zuma kamñi žoñinacaqui zakaz waliž cjequičha, arajpachquinaqui.

¹¹ Yoozqui žoñinaca ana illillžcu lijituma pjalznaquičha.

¹² Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquičha; persun uj paatiquiztanjama casticaquičha. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiqiztan jama casticaquičha.

¹³ Jakzilta žoñinacat Moisés lii nonžcu, ana nii lii jaru kamčhaja, jalla niiqui Yooz yujcquiziqui tira ujchizza. Pero jakzilta žoñinacat Moisés lii cazzaja, jalla niiqui Yooz yujcquiziqui ana ujchizza.

¹⁴ Ana judío žoñinacaqui Moisés lii ana zizza. Jalla nuž ana zizcumi, ninacpacha persun kuzquiz zuma paaz zint'asačha, jaknužt Moisés lii zuma paaz mantičhaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui.

¹⁵ Jalla nuž zuma kamcan kjanapacha tjeeža, Yoozqui ninacž kuzquizpacha niiž mantitanaca zizkatcha, nii. Nii Yooziž zizkattacama ana kamtiqiztan casticta cjequičha. Nižaza nii zizkattacama kamchižlaja, nekztan ana casticta cjequičha. Yooz pjalz tjuñquiziqui ninacž kamtanacqiztan jama pjaltaž cjequičha.

¹⁶ Yoozqui Jesucristužquiz žoñinaca pjalkataquičha, chjozjaka paatiquiztanami, nižaza pinsitaquiztanami. Wejrqui niipan chiichinčha liwriiñi Yooz puntu parlican.

JUDIO ŽOÑINACAQUI MOISES LIICHIZZA

¹⁷ Yekjap ančhucaquiztan judío žoñinacčhucčha. Ančhucqui Moisés liichiz cjen “Walikaztčha wejrqui” cjiñchucčha. Nižaza mitarazi kuzziz cjiñchucčha, “Werar Yoozza wejt Yoozqui”, cjicanaqui.

¹⁸ Ančhucqui jaknužt Yooz munčhaja, jalla nii zizza. Ančhucqui Moisés lii tjaajintaž cjen Yooz zuma kamaña panž zizza.

¹⁹ Yooz puntu ana zizñi žoñinaca želan, ančhucqui cjičha, “Nii zuražtakaz žoñinacžquiz tjaajznasak” cjican. Nižaza ana wal zumchiquiztakaz kamñi žoñinaca želan, ančhucqui cjičha, “Nii ana wal kamñi žoñinacžquiz Yooz zuma kamaña tjaajznasak” kaž cjičha; “Werjtčha ninacžtaqui kjanažtakaz” cjican.

²⁰ Nižaza ančhucqui cjičha: “Zumzu kamñi žoñinacžquiz Yooz kamaña sok'o tjaajznasak, ana tsjii kjutñi kamajo”, kaž cjičha. Nižaza ančhucqui cjičha: “Yooz puntu koloculla zizñi žoñinacžquiz tjaajznasak”, kaž cjičha. Yooz puntu razunanacaqui Moisés liiquiz kjana žejlčha. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequičha.

²¹ Jaziqui ančhucqui yekjžquiz tjaajznasaz niiqui, ¿kjažtiquiztan amiž tjaajinta jaru ana kamjo? Nižaza yekjap ančhucaquiztan chiižiniñchucčha, tuž

cjican: “Anača tjañi zaazqui”. Jalla nuž chiižcu, ¿kjažtiquiztan ančucpacha tjañi zaajo?

²² Nižaza ančucqui cjiñchucča; “Anača adulteriuquiz ojklayzqui”. Jalla nuž chiižcu, ¿kjažtiquiztan ančucpacha adulteriuquiz ojklayjo? Ančucqui žoñiž paata yooznaca chjaawjča. Jaziqui, ¿kjažtiquiztan ančucqui simplu cusasanaca cjižjo?

²³ Ančucqui mit kuzziz cjiñchucča: “Wejrnacqui Moisés liichiztča”. Jalla nuž chiižcu, ¿kjažtiquiztan ančucqui nii lii ana cazjo? Ančucqui nižta ana caziž cjen Yoozquiz ana rispitcha.

²⁴ Cjijrta Yooz takuqui razunapanž chiiča. Yooz takuqui tuž cjiča: “Ančucaž uj paachiž cjen yekja wajtchiz žoñinacqui ultim werar Yooz quintraž chiiča”.

²⁵ Tsjii chiižinuča. Ančuc judío jilanacaqui Moisés lii jaru janchiquiz chimputa cjissinčucča. Moisés lii jaru kamchiž cječhaj niiqui, ančucžtaqui nii chimputa walča. Pero Moisés lii jaru ana kamchiž cječhaj niiqui, nii chimputaqui anaž walča.

²⁶ Jaziqui tsjii ana chimputa žoñiqui Moisés lii jaru kamchi cječhaja, jalla niiqui Yooz yujcquiziqui chimputažtakaz cjequiča, niž janchiquiz ana chimputa cjenami.

²⁷ Nižaza jakzilta ana chimputa žoñit Moisés lii jaru kamchi cječhaja, jalla niiqui ančuca uj tjeeža. Ančucqui chimputaž cjenami nižaza Moisés cjijrta liichiz cjenami, jalla nii lii ana cazza.

²⁸ Jakziltat juntučkaz lii jaru paačhaja, jalla niiqui anača ultimu Yooz maatiqui. Nižaza jakziltat janchiquiz alaja chimputa cječhaja, jalla niiqui anača ultimu Yooz maatiqui.

²⁹ Pero jakziltat tjapa kuztan Yooz kuzcama kamčhaja, jalla niiča ultimu Yooz maatiqui. Nižaza niiqui persun kuzquiz ultimu Yooziž chimputača. Tsjii cjijrta lii jaru juntučkaz kamz anača chekanaqui. Žoñž kuzquiztanča kamz chekanaqui, lijituma Yoozquin kuzziz, už ana lijituma Yoozquin kuzziz, nii. Jalla nižta lijitum kuzziz žoñiqui Yooziž tjaata honorchizza. Žoñž tjaata honora anaž importiča.

3

¹ Yooz yujcquiziqui judío žoñinacqui yekja wajtchiz žoñinacžquiztan tsjan walasaž niiqui, ¿čhjuljapat waljo? Nižaza janchiquiz chimputaqui, ¿čhjuljapat waljo?

² Judío wajtchiz žoñinacž cjican, zuma walča. Tužuča primer razunaqui. Judío žoñinacžquiz Yoozqui niž cjijrta taku cumpjiičiča.

³ Nii Yooziž tjaata lii jaru yekjap judío žoñinacqui ana lijituma kamchiča. Jalla nuž ana lijituma kamchiž cjen, ninacaž compromitta taku ana cumplisiča. Jalla nuž cjenami Yoozqui niž persun compromitta taku cumpliča.

⁴ Nužupanča. Yoozqui taku chiižcu panž cumpliča, tjapa žoñinacž chiita taku ana cumpličiž cjenami. Cjijrta Yooz takuqui tuž cjiča:

“Yooz, amiž chiitaqui lijitumača. Jalla nii ziztaj cjila. Žoñinacž am quintra uj tjojtunchiž cjenami amqui lijitumapankaz tjeežtaj cjila”.

⁵ Žoñinacž toscara chiitaqui juc'ant tjeeža, Yoozza lijitumaqui, nii. Jaziqui, ¿kjaž cjeequi? Yoozqui nii toscara chiiñi žoñinaca ana casticz waquiziča. ¿Nuž chiyasajo?

⁶ Anapanča. Yoozqui lijitumapanča. Nižaza Yoozqui uj paañi žoñinaca ana casticaquiž niiqui, inakaz jusjasača.

⁷ Yekjapanacaqui tuž cjiñiča: “Wejt toscara chiitaqui, Yooz lijitumaž, nii tjeeznaquiž niiqui, ¿kjažtiquiztan wejrqui casticta cjesajo? Weriž toscar

chiitiquiztan Yoozqui juc'anti rispitta cjesača". ¿Jalla nuž pinsichinčucjo? Jalla nii razunaqui ancha zumzuča.

⁸ Nižaza yekjapanacaqui cjiñiča: "Anazuma paatiquiztan zuma paaznaca tsjan kjana tježta cjesača. Nekztan nii anazumanaca paaz waquiziča". Nižaza cjiñiča: "Pablo zakaz nuž tjajñiča". Jalla nuž cjican, yekjap žoñinacaqui wejtnac quintra chiiča, wejrnacaž ana rispitta cjeyajo. Jalla nižta chiiñi žoñinacaqui casticta cjis waquiziča.

TJAPA ZOÑINACAQUI UJ PAACHA

⁹ Nekztan, ¿kjaž cji? ¿Učhum judío žoñinacaqui parti žoñinacžquiztan tsjan wali žoñinacajo? Anapanž cjesača. Wejrqui kjanapacha tjezinča, judío wajtchiz žoñinacami nižaza yekja wajtchiz žoñinacami tjappacha ujž mantuquiz žejlča, nii. Tjapa žoñinacami uj paazquin kuz tjaača.

¹⁰ Jalla nižtapacha cjiřta Yooz takuqui cjiča:

"Anaž jec lijitum kamañchiz žoñimi žejlča, ana zintallami.

¹¹ Anaž jec Yooz kamaña intintiñimi žejlča, anaž jecmi Yoozta kamzquin kuz tjaača.

¹² Tjapa žoñinacaqui Yoozquiztan tsjii kjutñi zarakča, nižaza ana zum kuzziz cjissa. Anaž jakziltami zuma paañic žejlča, ana zinta.

¹³ Ninacž joranacquiztan anazuma chiitanaca ulanča, ticzinacž sipultura cjetžtažokaz. Chiican, žoñinaca incallča. Zkorž atquiz žejlñi venenožtakazza ninacaž atquiztan chiitaqui.

¹⁴ Ninacaž chiitaqui žoñž quintrapancha, nižaza žoñžtan chjaawjkatča.

¹⁵ Ninacž kojchaqui apura zajtča, žoñi conzjapa.

¹⁶ Ninacaqui žoñi akz pecča, nižaza žoñžquiz llaquit kuzziz cjiskatča.

¹⁷ Nižaza llan kuzziz kamaña anapan zizza.

¹⁸ Nižaza werar Yooz rispits puntuquiztan anaž pinsiča".

¹⁹ Jakziltat tuquita Moisés lii mantuquiz žejlčhaja, jalla niiqui nii lii jaru kamstanča. Pero tjapa nii liichiz žoñinacaqui ana nii lii jaru kamča. Jalla nižtiquiztan ch'uju cjissiča. Ana chiyasača, "Wejrqui ana ujchiztča" cjicanaqui. Tjapa žoñinacaqui, jaknužt kamčhaja, jalla nii cuenta Yoozquin tjaastanča. Tjapa žoñinacaqui Yooziž casticta cjis waquiziča.

²⁰ Anaž jakziltami Moisés lii jaru zumpacha lijituma kamča. Jalla nižtiquiztan Yooz yujcquiziqui anaž jakziltami ana ujchizza. Moisés lii zizcumi uj paaspanča. Jalla nižtiquiztan nii lii jaru ana kamtiquiztan tjapa žoñinacaqui zizza, panž ujchizza, nii.

¿ŽOÑINACAQUI, JAKNUŽT ANA UJCHIZ CJESAJO?

²¹ Moisés liiquiztan Yoozqui yekjat lii jaru žoñinacžquiz ana ujchiz nižaza zuma cjiskatča. Pero nii puntu Moisés liimi nižaza profetanacaž cjiřta takumi zakaz chiiča.

²² ¿Jaknužt žoñinacaqui ana ujchiz cjesajo? Jalla tužuča. Jakziltat Jesucristužquiz kuz tjaačhaja, jalla niiqui Yooz yujcquiziqui ana ujchiz nižaza zuma cjequiča. Yoozqui žoñinaca ana illillza.

²³ Tjapa žoñinacaqui tsjii pariju ujchizza. Jalla nižta ujchiz cjenauqui Yoozqui ana jecžquizimi honorchiz cjiskatasacha.

²⁴ Pero Jesucristuqui ujchiz žoñinacžta persun wiržtan pacchiča, ninaca ana casticta cjeyajo, nižaza Yooz yujcquiz zuma cjeyajo. Yoozqui Jesucristo cuhanžquichiž cjen žoñinacžquiz pajk favora paachiča. Jalla nuž cjen Yoozqui inat žoñinaca liwriyasača, ninaca ana čhjulu paažcu.

²⁵ Yooz Ejpqui Jesucristo cuhanžquichiča ujchiz žoñinacž laycu ticzjapa. Niiž ticziž cjen jakziltat Jesucristužquin kuz tjaačhaja, jalla niiqui

persun ujquiztan ana castictaž cjequiča. Tuquitan ima Jesucristuž ticznar Yoozqui nižquin kuzziz žoñinacžtajapa pasinsis kuzziztača; ninaca ana casticchiča. Pero Yoozqui uj paañinaca casticstanča. Jalla nuž cjenami Jesucristuž cjen Yoozqui ujchiz žoñinaca pertunasača. Jalla nižtiquiztan Jesucristo cuchanžquichiž cjen Yoozqui, persun kuz zuma lijitumaž, jalla nii tjeeziča.

²⁶ Uj paañi žoñinaca ana castictaž cjenami, Yoozqui lijitumača. Uj paañi žoñinacaqui Jesucristuž ticziž cjen ana castictača. Jakziltat Jesucristužquin kuz tjaachaja, jalla niiqui Yooz yujcquiziqui zuma cjissa, ana ujchiz, Jesucristuž cjen.

²⁷ Jaziqui žoñinacaqui anapanž mitarazi kuzziz cjis waquiziča, “Yooz yujcquin walikaztča wejrqui” cjicanaqui. ¿Kjažtiquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtiquiztan ana lii jaru kamchiž cjen tjapa žoñinacaqui Yooz yujcquiz ujchizza. Jesucristužquin kuz tjaachiquiztan, jalla nužquizkaz Yooz yujcquiz zuma cjesača, ana ujchiz. Jalla nižtiquiztan žoñinaca ana mitaraz kuzziz cjis waquiziča.

²⁸ Wejrqui kjanapacha tjaajinchinča, Jesucristužquin kuz tjaachiž cjen Yooz yujcquiz ana ujchiz nižaza zuma cjesača, jalla nii. Moisés lii jaru kamchiž cjen Yooz yujcquiz anapanča zuma kuzziz cjichuca.

²⁹ ¿Yoozqui judío žoñinacž Yooz alaja cjesajo? Anapanča. Yoozqui parti žoñinacž Yoozzakazza.

³⁰ Zinta Yoozqui žejlča. Jalla niž yujcquiziqui chimputa judío žoñinacami ana chimputa yekja wajtchiz žoñinacami Jesucristužquin kuz tjaachiž cjenkaz zuma cjesača, ana ujchiz.

³¹ Jalla nižtiquiztan nuž tjaajincan wejrqui, “Moisés liiqui anaž walča”, ¿nuž cjican tjaajnojo? Anazal nižta tjaajnuča. Liiqui panž walča, cjiwča.

4

ABRAHAMZ PUNTU

¹ Wejrnacqui Abrahamž majch maatinacquiztan tjoniñchumča. Tuquita atchi Abraham ejpž puntuquiztan, ¿kjaž cji?

² Abrahamqui Moisés lii jaru kamtasaz niiqui Yooz yujcquiz ana ujchiz cjitasača. Nižaza “Wejrtča Yooz yujcquiz zumtqui” cjican chii attasača. Pero ana nuž chii atatča Yooz yujcquiziqui.

³ Cjijrta Yooz takuqui tuž cjiča: “Abrahamqui Yoozquin kuz tjaachiča. Jalla nižta kuz tjaatiquiztan Yooz yujcquiz zumaž cjissiča, ana ujchiz”.

⁴ Tsjii zakal chiyuča. Jakziltat langznačhaja, jalla niiqui paca tanznaquiča. Nii pactaqui anača onanta, pero langztiquiztan nižta pacta cjis waquiziča.

⁵ Pero jakzilta ujchiz žoñinacat ana čhulu paažcu, Yoozquin kuz tjaachaja, jalla niž kuz tjaatiquiztankazza Yooz yujcquiz ana ujchiz, nižaza zuma kuzziz. Ujchiz cjicanpacha kuz tjaatiquiztan Yoozqui cjiča, “Nii žoñž uj pertunuča. Wejt yujcquiz ana ujchizza”.

⁶ Ana čhulu paažcu nii kuz tjaañi žoñiqui ana ujchiz cjissa. Jalla nižta kuz tjaañi žoñž puntu David cjita tuquita ejpqui

⁷ tuž cjičiča:

“Jakzilta žoñinacž ujnacat Yooziž pertunta cječhaja, nižaza ninacž ujnacat Yooziž ana iya tjeežta cječhaja cuntintuž cjila.

⁸ Nižaza jakzilta žoñinacat ujnacquiztan Yooz Jiliriž ana casticta cječhaja, jalla nii žoñiqui cuntintuž cjila”.

9 Nii Davidž chiitaqui ¿jec žoňž puntuquiztantajo? ¿Chimputa žoňinacž puntuquiztan alajakazkaya? ¿Už yekja wajtchiz ana chimputa žoňinacž puntuquiztan jaa? Wejrqui cjiwčha pizcquiztanpachača. Abrahamqui Yoozquin kuz tjaachiž cjen Yooz yujcquiz ana ujchiz cjissiča.

10 ¿Čhjolorquiztanpacha ana ujchiz cjissitaya? ¿Ima chimpuchiz cjen? už ¿chimpuchiz cjen jaa? Wejrqui cjiwčha, anača chimpuchiz cjen Yooz yujcquiz ana ujchiz cjissiqi, pero ima chimpuchiz cjen.

11-12 Ima chimputa cjican Abrahamqui Yoozquin tjapa kuz tjaachiča. Jalla nižtiquiztan Yooz yujcquiz ana ujchiz nižaza zuma cjissiča. Jalla niž wiruñ Yoozqui nii chimputa lii mantichiča tjeezjapa kuz tjaachiž cjen Yooz yujcquiz ana ujchizza, zuma kuzzizza, jalla nii tjeezjapa. Jalla nižtiquiztan Abrahamqui tjapa Yoozquin kuz tjaaňinacžta ejpžtakazza, ana chimputa žoňinacžtami, nižaza chimputa žoňinacžtami. Jalla nuž pinsichiča Yoozqui. Jakziltat kuz tjaachiž cjen Yooz yujcquiz ana ujchiz, nižaza zuma kuzziz cjisnačhaja, jalla ninacaqui Abrahamž ultim majchmaatinaca cjequiča. Učhum Abraham ejpqui ima chimputa cjican Yoozquin kuz tjaachiča. Jakzilta chimputa žoňinacat Abrahamžtapacha Yoozquin kuz tjaačhaja, jalla ninacaqui Abrahamž ultim majchmaatinaca cjequiča. Chimputakaz ana walča, Yooz yujcquiz zuma cjeajajo.

YOOZIZ TJAATA TAKU

13 Yoozqui Abrahamžquizimi niž majchmaatinacžquizimi compromitan taku tjaachiča, tii muntuquiz cuntintuž cjequiča, jalla nii. Abrahamž lii jaru kamtiquiztan Yoozqui ana nižta taku tjaachiča. Pero Yoozquin kuz tjaachiž cjen nižaza zuma kuzziz cjen, Yoozqui nižta taku tjaachipanča.

14 Moisés liichiz kamňi žoňinacaqui tii muntu irinsa tanznačhaj niiqui, jalla nižtiquiztan Yoozquin kuz tjaazqui inakazza. Nižaza Yooziž tjaata taku anaž walkatča. Pero anača nižta. Anaž jecmi nii lii jaru zuma kamasacha.

15 Jaziqui lii jaru ana kamtiquiztan žoňinacaqui casticta cjistanča. Lii ana žejltasacha, nekztan lii quintra ana kamtasacha.

16 Jalla nižtiquiztan Yoozquin kuz tjaatiquiztankaz Yooz yujcquiz ana ujchiz, nižaza zuma kuzziz cjesacha. Nižaza Yoozqui žoňinacžquiz okziž cjen žoňinaca ana ujchiz cjiskatča. Jalla nii wali pajk favora paachiča Yoozqui. Jalla nuž cjen Yooziž tjaata takuqui tirapanž walča tjapa Abrahamž majchmaatinacžtaqui, Moisés liichiz žoňinacžtami, ana Moisés liichiz žoňinacžtami. Yooziž tjaata takuqui walča tjapa Abrahamžtapacha Yoozquin kuz tjaachinacžtaqui. Abrahamqui tjapa učhum Yoozquin kuz tjaachi žoňinacž ejpžtakazza.

17 Jalla nužupanž cijrta Yooz takuqui chiiča, tuž cjican: “Amqui wacchi nacionchiz žoňinacž epim cjequiča”. Jalla nižtiquiztan Abrahamqui učhum ejpžtakazza, Yooz yujcquiziqui. Abrahammi učhumnacami nii zinta Yoozquin kuz tjaachinčhumča. Nii zinta Yoozqui ticzinacami jatatskatča, nižaza ana žejlňinaca žejlžkatča.

18 Abrahamžquiz Yoozqui cjichiča: “Amqui wacchi nacionchiz žoňinacž epim cjequiča”. Jalla nii puntuquiztan zakaz Yoozqui Abrahamžquiz cjichiča: “Jalla nuž amqui wacchi majchmaatinacchiz cjequiča”. Yooz taku criichiž cjen Abrahamqui wacchi majchmaatinaca tjew tjewziča, chawcwacama. Tsji žoňinacž “Amiž tjaata Yooz taku ana cumplita cjesacha” nuž chiiňi cjenami Abrahamzti tira tjewziča, Yooz taku cumplispanž cjican.

19 Abrahamqui jos patac watchiz cjen ticz orquiztača. Ana majchchizpan cjichucatača. Nižaza niž maatakaqui ana zinta majtchucatača. Jalla

nuž pucultan ana majtchuca cjicanami, Abrahamqui Yoozquin anača upa kuzziz.

²⁰ Nižaza ana kuz turwayskatchičha. Yooziž compromitta taku cumplis ora tirapan tjewziča, cumpliscama. Tirapantača Yoozquin kuzziz. Nižaza Yooz honora waytican, juc'anti Yoozquin kuzziz cjissiča.

²¹ Abrahamqui zizziča, Yoozqui niž compromitta taku ultimupan cumpli atasača. Jaziqui tirapan tjewznatča, ana kuz paysnakžcu.

²² Jalla nižtiquiztan nižta Yoozquin kuz tjaatiquiztan Abrahamqui Yooz yujcquiz ana ujchiz cjissiča, nižaza anča zuma kuzziz.

²³ Jalla nuž Yooz tawk liwruquiz cijirtatača. Nii cijirtaqui anatača Abrahamž cjen alajakaz,

²⁴ učumnacaltajapa zakaz cijirtatača. Jakziltat Yoozquin kuz tjaachaj niiqui, Yooz yujcquiz ana ujchiz cjisnasača. Nii Yoozqui učum Jesucristo Jiliri ticziquiztan jacatatchičha.

²⁵ Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujchiz nižaza zuma cjissinčumča, nižquin kuz tjaachiž cjen.

5

YOOZQUIN KUZIZ ZOŃINACA

¹ Jalla nižtiquiztan Yooz yujcquiz ana ujchiz, nižaza zuma kuzziz cjen, Yoozqui anača učum quintra. Jesucristo Jiliriž cjen, nižaza nižquiz kuzziz cjen učumtan Yooztan walikazza.

² Jesucristužquin kuzziz cjen učumqui Yooz partiquiz luzzinčumča. Jalla nii partiquiz učumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa.

³ Nii Yooz zumanaca tjewžcan, učumqui cuntintučumča. Nižaza sufris želanaqui cuntintuzakazza. Sufrisquiztan pasinziz kuzziz cjissa. Jalla niiqui učumqui zizza.

⁴ Nižaza pasinziz kuzziz žejltiquiztan Yoozquin tjurt'iñi kuzzizpan yatisinsa. Jalla nekztan zumquin yatisinžcu, Yooz honora tjaaz ora tjewža.

⁵ Yoozqui niž Espíritu Santo učumnaca kuzquiz luzkatchičha. Nii Espíritu Santuqui učum kuzquiz luzcu, Yooz anča zuma munaziñi kuz učumquiz intintiskatča. Jalla nižtiquiztan Yooziž tjaata honora tjewžcan učumqui zizza, ultimquiziqui panž tanznaquičha, nii. Ana inakaz tjewznaquičha.

⁶ Učumpacha ujquiztan anatača liwriizuca. Jalla nižtiquiztan Yooziž pinsita timpuquiz Cristuqui ujchiz žoñinacž laycu ticziča.

⁷ Anaž jakzilta žoñimi tsjii žoñžtajapa pjasila ticznasača, zuma žoñi cjenami. Cunamit tsjii anča zuma kuzziz žoñžtajapa ticz pecačani.

⁸ Yoozti niž zuma okzñi kuz tjeeziča, jalla tižta. Učumnaca ujchiz cjenami Yoozqui niž Majch Jesucristo cuchanžquichiča, učumnacaltajapa ticzjapa.

⁹ Jalla nižtiquiztan Yooz Majch ticziž cjen anziqui učumqui Yooz Ejpž yujcquiz ana ujchizza, nižaza zuma kuzzizza. Jalla niic zuma razunača. Jaziqui učumqui zuma kuzzizza. Jalla nižtiquiztan tiizakaz zuma razunača: Jesucristuž ticziž cjen učumqui ultim casticz tjuñquiziqui liwriitaž cjequičha Yooz casticzquiztan.

¹⁰ Tuquitan učumnacaqui Yooz quinratača. Jalla nuž Yooz quintra želanami, Yoozqui niž Majch cuchanžquichiča, žoñinacž laycu ticzjapa, žoñinacž pertunta cjeyajo. Jalla niiqui razunača. Nižaza anziqui učumqui Yooz pertuntača. Jalla nižtiquiztan učumtan Yooztan walikazza. Nižaza

Yooz Majch jacatattiquiztan uĥumqui ultimquiziqui tjapa anawalinacquiztan liwriitapanž cjequiĥa, Yooztan wiñaya kamzjapa. Jalla niiqui zuma razunazakazza.

¹¹ Ultimquiziqui liwriitaž cjequiĥa. Nižaza anzimi liwriitazakaz uĥumqui. Jalla nižtiquiztan uĥumqui Yooztan tsjii kuzziz cjican, cuntintuĥa, Jesucristo Jiliriž cjen. Jesucristuž cjen uĥumqui Yooziž pertunta cjissiĥa. Jalla nižtiquiztan uĥumtan Yooztan walikazza.

ADANZTAN JESUCRISTUZZTAN

¹² Tsjiilla cjesaĥa. Tsjii žoñiž cjen uj žejlĥa tii muntuquiz. Nižaza nii ujquiztan ticz žejlĥa. Nižaza tjapa žoñinacami uj paaĥa. Jalla nuž uj paažcu, ticža.

¹³ Moisés liž tuquiqui uj paazqui želatĥa tii muntuquiz. Pero ana liichizlaj niiqui, žoñinacaqui nii lii quintra paata ujquiztan ana castictataĥa.

¹⁴ Adanž timpuquiztanpacha Moisés timpucama žoñinacaqui ticziĥa uj paatiquiztan. Jaknužt Adán primera uj paatĥaja, jalla nii ujpacha ana paachiĥa parti žoñinacaqui. Jalla nuž cjenami yekja ujnaca paachiĥa. Adanqui tjonñi Jesucristužtakaz tjapa tii muntuquiz žejlñi žoñinacžquiz contajiĥa. Jalla nii puntuquiztan Adanžtan Jesucristužtan cassa.

¹⁵ Pero tii puntuquiztan anaž cassa. Adanž uj paatiquiztan anawalinaca žejlĥa. Cristuž ticztiquiztan zimanaca žejlĥa. Tsjii žoñiqui uj paachiž cjen tjapa žoñinacžquiz ticskatĥa. Jalla niiĥa Adanqui. Nižaza tsjii žoñiž cjenkaz walja žoñinacaqui ujquiztan liwriitaĥa. Jalla niiĥa Jesucristuqui. Jesucristuž cjen Yoozqui žoñinaca okziĥa. Žoñinacaž ana okžta cjichuca cjenami, Yoozqui žoñinacžquiz okziĥa. Jalla nuž okztiquiztan Yoozqui Jesucristuž cjen žoñinaca liwriichiĥa niž yujcquiz ujchiz ana cjisjapa. Nužupanĥa.

¹⁶ Adanž uj paatižtan Jesucristuž liwriiñižtan anaž cassa. Punta puntaž žoñinacžquiz contajiĥa. Adanž zinta ujquiztan tjapa žoñinacaqui pjalžtaĥa, casticta cjisjapa. Pero Jesucristuž liwriitiquiztan walja žoñinacaqui Yooz yujcquiz ana ujchiz nižaza zuma cjissa, walja ujnaca paachiž cjenami. Jesucristuž cjenkaz nižta cjissa.

¹⁷ Tsjii žoñž ujquiztan tjapa žoñinacaqui ticstanĥa. Jalla niic razunaĥa. Tiiqui tsjan zuma razunaĥa. Jakzilat Jesucristuž cjen ujquiztan liwriita cjeĥaja, jalla niiqui Yooz yujcquiz ana ujchiz cjequiĥa. Nižaza ujquiztan ticziž cjenpacha, Yooztan wiñaya kamaquiĥa. Nižaza honorchiz cjequiĥa.

¹⁸ Jaziqui tsjii žoñž ujquiztan tjapa žoñinacaqui pjalžtaĥa casticta cjisjapa. Nižaza tsjii žoñž ticztiquiztan tjapa žoñinacaqui ninacž ujquiztan pertunta cjesaĥa, ninacž ujquiztan ana casticta cjejajo, nižaza Yooztan wiñaya kamajo.

¹⁹ Yooz mantita ana cumplichiz cjen Adanqui tjapa žoñinacžquiz ujchiz cjiskatĥa. Jesucristuzti Yooz kuz cumplichiz cjen walja žoñinacžquiz Yooz yujcquiz ana ujchiz, nižaza zuma cjiskatĥa.

²⁰ Yoozqui Moisesquiz tsjii lii tjaachiĥa, žoñinacžquiz persun ujnaca kjanapacha tjeezjapa. Nii lii zizcuqui žoñinacaqui lii quintra juc'anti uj paachiĥa. Jalla nuž juc'anti uj paachiž cjenami, Yoozqui niž okžni kuz žoñinacžquiz juc'anti tjeeziĥa Jesucristuž cjen.

²¹ Uj paažcu žoñinacaqui ticstanĥa, nižaza casticta cjistanĥa. Pero žoñinacaž ujnacquiztan infiernuquin castictaž cjenpacha Yoozqui žoñinaca liwriichiĥa Jesucristo Jiliriž cjen. Žoñinacaqui Jesucristuž cjen Yooz yujcquiz ana ujchiz, nižaza zuma cjisnasaĥa, Yooztan wiñaya kamzjapa.

6

EW KAMAÑA PUNTU

¹ Uj puntuquiztan yekjapanacaqui chiiñiicha. Uchumqui tira uj paaz waquiziicha, Yooz okzñi kuz juc'anti tjeežta cjisjapa.

² Pero wejr cjiwča, anapanž uj paaz waquiziicha. Tuquitan ticzi žoñinacažtakaztača uchumqui, anazum kamañchiz kamcan. Pero uchumž tuquitan anazuma uj paañi kamañquiztan jaytichinčhumča. Jalla nižtiquiztan uj paañi kamañchiz anapanž kamz waquiziicha.

³ Tjapa uchumnacaqui, Jesucristužtan tsjii kuzziz cjissinčhumča. Bautistaž cjen nekz tjezinčhumča. Jesucristuqui ticžcu, tjatzatača. Jalla nižta irata uchumqui anazum uj paaznaca tjatz waquiziicha. Jalla nii uchumnacaqui panž zizza.

⁴ Bautista cjiscu, nižaza Jesucristužtan tsjii kuzziz cjiscu, uchumnacaqui uj paañi kamañquiztan jaytichinčhumča. Nekztan zuma ew kamañchiz cjissinčhumča. Yooz Ejpqui persun aztan Jesucristo ticziquiztan jacatatskatchiicha. Jalla nižta irata Yoozqui uchumnaca anazuma kamañquiztan liwriichiča, zuma ew kamañchiz cjejajo.

⁵ Jakziltat Jesucristužtan tsjii kuzziz cječhaja, jalla niiqui Jesucristužtan ticziča, anazum uj paañi kamañquiztan liwriita cjisjapa. Nižaza jakziltat Jesucristužtan tsjii kuzziz cječhaja, jalla niiqui Jesucristužtan jacatatchiicha, ew zuma kamañchiz cjisjapa.

⁶ Jaknužt Jesucristuqui cruzquiz ch'awcta ticzižlaja, jalla nižta irata uchumqui ticzižtakaz cjissiča uj paaz pecñi kuzquiztan. Jalla nižtiquiztan uchum anazum uj paaz pecñi kuzqui nužquiz ana azziz cjissiča. Nižaza nii uj paaz pecñi kuzqui ana iya mantasača uchum kuzquizpacha. Jalla nii uchumqui panž zizza.

⁷ Jakziltat uj paaz pecñi kuzquiztan ticzi cječhaja, jalla niiqui uj paañi kamañquiztan liwriita cjequiča.

⁸ Nižaza jakziltat Jesucristužtan tsjii kuzziz cjissiž cjen uj paañi kamañquiztan liwriita cječhaja, jalla niiqui ew kamañchiz cjequiča, Jesucristužtakaz. Nižaza Jesucristužtan chica kamaquiča. Jalla nii razuna criichinčhumča.

⁹ Jesucristuqui ticziquiztan jacatatchiicha. Jalla nižtiquiztan ana wilta ticznaquiča, nižtaqui ana iya ticz žejlča.

¹⁰ Jesucristuqui žoñinacz ujquiztan ticziča, tsjii wilta. Ana wilta ticznaquiča. Jaziqui žejtča, nižaza Yooztajapa kamča.

¹¹ Jalla nižtiquiztan ančhucqui cjuñzna, uj paañi kamañquiz liwriitaž, nii. Jaziqui Jesucristo Jiliriž cjen Yooztajapa ew kamañchiz kamla.

¹² Uj paaz pecñi kuzqui ana mantiskata, anazumanaca paajo.

¹³ Nii uj paaz pecñi kuzqui curpu mantis pecčhaj niiqui, panž ewjasa. Pero ančuca curpu zuma paazjapa, nižaza Yooz sirwizjapa kuz tjaa. Ančhucqui anazum uj paañi kamañquiztan liwriita cjiscu ew zuma kamañchiz cjissinčhucča. Jalla nižtiquiztan ančhucqui Yooz kuzcama kamajo Yooz mantuquiz cjee, tjapa curpumi, nižaza kuzmi.

¹⁴ Ančhucqui anača iya Moisés lii mantuquiz. Okzñi Yooz mantuquizza ančhucqui. Jalla nižtiquiztan nii uj paaz pecñi kuzqui ana mantiskata.

YOOZ MANTUQUIZPANKAZ CJEE

¹⁵ ¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, ¿uj paañi kamañchiz želasajo? Anapanž cjesača.

¹⁶ Jakziltat tsjii žoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz

žejlčhaja, ujnaca paasača; jalla nekztan Yooziž castictaž cjequiča. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquiziča. Jalla nekztan tsjan tsjan zuma kamañchiz cjequiča. ¿Nii ana ziz ančhucjo?

¹⁷ Tuquiqui ančhucqui uj paaz pecñi kuz mantuquiz žejlñitača. Nekztan Yooz puntu zuma werar razunanacaqui ančhucacuiz tjaajintatača. Jaziqui jalla nii tjaajintanac jaru tjapa kuztan kamča. Jalla nižta ančuca zuma kamañchiz cjen Yoozquin gracias cijican chiyučha.

¹⁸ Jalla nižtiquiztan nii uj paazquiztan liwriitača ančhucqui. Nižaza zumanaca paazjapa tjapa kuz tjaachinčhucča. Yooz manta paaz cjissinčhucča.

¹⁹ Zoñž wirquiztan punta punta chiyučha, Yooz puntu intintazkatzjapa. Ana nižta chiitasaj niiqui, ančhucqui anaž intintaztasacha. Tuquiqui ančhucqui uj paaz pecñi kuz mantuquiz želatča, ujnaca paacan. Jalla nuž žejlcan juc'anti juc'anti uj paachinčhuctača. Jazizti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquiča.

²⁰ Tuquiqui ančhucqui uj paaz pecñi kuz mantuquiz žejlcan, zumanaca paazjapa ana importičha.

²¹ Jalla nuž kamcan, ančhucaltajapa ¿chjul walitajo? Jaziqui ančucaž tuquita paatanacquiztan ančhucaltaqui azipanča. Jalla nižta anazum kamchi žoñinacaqui wiñayjapa Yooziž castictapanž cjequiča.

²² Pero ančhuczi nii anazum uj paañi kamañquiztan liwriitača. Yooz mantuquiz cjissinčhucča. Jalla nižtiquiztan ančhucqui tsjan tsjan zuma kamañchizza. Nižaza Yooztan wiñayaž kamaquiča.

²³ Jakziltat anazum uj paañi kamañquiz kamčhaja, jalla niiqui Yooziž castictaž cjistanča. Nuž waquiziča. Pero Yoozqui žoñinacžtajapa tsjii pajk favora paachiča, žoñinacaž ana waquizan. Nužukaz paachiča niž zuma okzñi kuzziz cjen. Jaziqui jakziltat Yooziž liwriita cječhaja, jalla niiqui Jesucristo Jiliriz cjen Yooztan wiñayaž kamaquiča.

7

LII PUNTU

¹ Moisés lii zizñi jilanaca, cullaquinaca, ančhucqui zizza, ima ticzcan, žoñinacaqui Moisés lii mantuquiz žejlča.

² Nižaza tsjaa maatakui zalz kamz lii mantuquiz žejlča, naaža lucu ticzcama. Naaža lucuž ticznaquiz niiqui, nekztan naaqui nii lucutiñi kamañ liiquiztan liwriitača.

³ Jaziqui naaža persun lucu žetan, naaqui yekja luctakžtan želaquiz niiqui, jalla naaqui adulterio paača. Naaža lucu ticznaquiz niiqui, jalla nekz lucutiñ kamañ liiquiztan liwriitača. Jalla nižtiquiztan yekja lucžtan zalžnanami, anaž adulterio cjesača.

⁴ Wejt jilanaca, cullaquinaca, jalla nižta iratača Moisés lii puntuquiztanaqui. Jesucristuqui ančuca ujnacquiztan ticziča. Niiž cjen ančhucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisñi atchucatača. Jaziqui ančhucqui ticzi žoñiztakazza nii lii puntuquiztan. Jalla nižtiquiztan yekjaž mantuquiz žejlča, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatchičha, ančucaž Yooztajapa zumanaca paajo.

⁵ Tuquiqui učhum persun kuzcama kamcan, učhum uj paaz pecñi kuzqui učhumnacaquiz mantiñitača, ujnaca paajo. Jalla nižta ujnaca paatiquiztan infernuquin Yooziž casticta cjichucatača. Moisés liiquiz “Anača uj

paazqui” cjanami uĉhum uj paaz pecni kuzqui juc'anti uj paazquin uĉhum ĉjitchiĉha.

⁶ Ima Jesucristuĉquin kuz tjaacan, jalla niĉta kamĉinĉhumĉha. Pero jaziqui uĉhumqui Moisés liiquiztan liwriitaĉha. Tuquita nii liiĉ mantuquiz uĉhum Źelatĉha, preso tanta Źoñiĉtakaz. Anziqui Espiritu Santuĉ mantuquiz Źejlĉha. Niiqui uĉhumnacaquiz ew kamaña tjaachiĉha.

¿JECT WEJR YANAPASAJO, ZUMA PAAZJAPAJO?

⁷ Jaziqui ĉkjaĉu cjeequi? ĉMoisés liiqui anawalejo? Anapanĉ cjesaĉha. Moisés lii mantuquiz ana kamtasaĉ niiqui, wejrqui wejt ujnaca anal pajkat-tasaĉha. Moisés liiquiz “Anaĉha zmazni kuzziz cjee” ĉjiĉha. Nekztan wejt zmazni kuz zuma pajĉinĉha.

⁸ Moisés liiquiz niĉta mantita cjen, wejt uj paaz pecni kuzqui tjapamana zmaz pinsichiĉha. Nii lii quintra anĉha paaz pecatĉha. Pero nii liiqui ana Źejltasaĉ niiqui, jalla niĉtiquiztan nii zmazqui anaĉ pajta ĉjitasakalĉha.

⁹ Ima Moisés lii pajcan, cuntintul kamĉinĉha. Nekztan Moisés lii mantitanaca pajtiquiztan wejt ujnaca pajĉinĉha, niĉaza juc'anti uj paachinĉha. Jalla niĉtiquiztan persun kuzquiz weriĉ paata uj zint'ican, llaquita Źejlĉhintatĉha. Wejt persun uj paatiquiztan Yooz castictal ĉjis waquizuĉha.

¹⁰ Wejrqui Moisés lii jaru zumpacha kamtuĉhaja, jalla nekztan Yooztan cuntintu kamtasaĉha. Pero nii Moisés lii jaru ana zuma kami atĉinĉha. Jalla niĉtiquiztan nii liiĉ cjen wejtquiz tjeeĉtaĉha, wejr castictal ĉjis waquizuĉha, jalla nii.

¹¹ Moisés liiquiz mantitanaca Źejlĉha. Nii mantitanacaqui zizcuqui wejt uj paaz pecni kuzqui juc'ant uj paaz pecchiĉha. Anapan nii lii jaru kami atatuĉha. Incallta ĉjissinĉha. Nii lii jaru ana kamtiquiztan, Yooz casticta ĉjichucataĉha.

¹² Moisés liiqui Yooziĉ mantitataĉha. Jalla niĉtiquiztan anĉha zumaĉha nii liiqui. Niĉaza nii liiquiz mantitami anĉha zumapanĉha, niĉaza Yooz kuzcamaĉha, niĉaza wejtta waliĉha.

¹³ Nii liiqui wejtta wali zumaĉlaj niiqui, ĉkjaĉtiquiztan nii liiĉ cjen Yooz casticta ĉjis waquizasajo? Nii liiqui zumaĉha. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiĉha. Jalla nekztan wejt quintra Yooz casticĉ Źejlĉha. Jalla niĉtiquiztan tjeeĉtaĉha, wejt uj paaz pecni kuzqui ana zumapanĉha, nii. Niĉaza Moisés lii quintra paatiquiztan tsjan juc'ant anazumaĉ ĉjissa wejt uj paaz pecni kuzqui.

¹⁴ Uĉhumqui zizza, Moisés liiqui Yooz Espiritu Santuĉ kuzcamaĉha. Wejrztu persun kuzcama kamz pecuĉha. Jalla niĉta kamcan wejt uj paaz pecni kuz mantuquiz Źeluĉha.

¹⁵ ĉKjaĉtiquiztan niĉta ana zuma paatojo? Anal intintazuĉha. Jesucristuĉquin kuz tjaaĉcu, jalla nekztanpacha zuma paaz pecni kuzziz ĉjissinĉha. Jalla niĉta kuzziz cjanami, uj paaz pecni kuzzizpanĉha. Zuma paaz peccumi, anal zuma payi atuĉha. Ana pecta uj paaznaca, jalla niikal wilita wilita paa-uĉha.

¹⁶ Jalla niĉta paachiĉ cjanaqui, wejrqui pajuĉha, Moisés liiqui zumaĉha, jalla nii.

¹⁷ Ana zuma paacanami wejt kuzquiz zuma paaz pecuĉha. Jalla niĉtiquiztan wejrpacha nii anazuma paatanaca anal iyal paaz pecuĉha. Pero wejt uj paaz pecni kuzqui nii ana zuma paatanaca paakatĉha.

¹⁸ Wejt uj paaz pecni kuzqui ana zumapanĉha. Yooz aztankaz zuma payi atasatĉha. Wejrqui zuma paaz pecanami, wejt persun aztan nii zuma paazqui anal atuĉha. Werĉ kamtiquiztan nii razuna zizni ĉjissinĉha.

¹⁹ Wejrqui weriž zuma paaz pectanacaqui anal paa-uča. Antiz weriž ana paaz pectanacaqui, nii ana zumanacal paa-uča.

²⁰ Jalla nižta ana weriž pectanaca paacan, wejrpacha ana nižta paa-uča. Pero wejt uj paaz pecni kuzqui nižta anazuma paakatča.

²¹ Jalla nižtiquiztan wejtquiz nižtapan žejlča. Zuma paaz pecanami, wejt uj paaz pecni kuzkaz mantiz pecča.

²² Wejt kuzquizpacha Yooz kuzcamapan paaz ancha pecuča.

²³ Jalla nuž cjenami uj paaz pecni kuzziztča. Wejt curpu mantiz pecča. Jalla nižtiquiztan wejt uj paaz pecni kuzqui wejt zuma paaz pecni kuz quintrača. Wejrqui anazuma paacan wejt uj paaz pecni kuz mantuquiz želuča. Nižaza nii uj paaz pecni kuzqui wejt curpu mantiča. Weriž kamtiquiztan nii razuna zizni cjissinča.

²⁴ Ana waliča wejrqui. Jalla nižtiquiztan ¿jequit tii ana zuma paañi curpuquiztan wejr liwriyaquiya? ¿Tii casticzkatni curpuquiztanya?

²⁵ Yoozquin gracias cjican, chiyuča, učum Jesucristo Jiliriča wejt liwriñiqui. Wejrpacha tjapa wejt zuma paaz pecni kuztan Yooz kuzcama kamuča, wejt uj paaz pecni kuz uj paaz pecanami.

8

ESPIRITU SANTO KUZQUIZ ZEJLCHA

¹ Jesucristuž partiquiz žejlñi žoñinacaqui ana Yooziž casticta cjequiča. Ninacaqui Yooz Espiritu Santuž kuzcama kamča; uj paaz pecni kuzcama ana kamča.

² Jesucristuž cjen wejrqui Espiritu Santuž mantuquiz želuča. Espiritu Santuž cjen ew kamañchiz kamuča. Nii Espiritu Santuqui uj paaz pecni kuz mantuquiztan wejr liwriichiča. Uj paaz pecni kuz mantuquiz tira žejltasaž niiqui, Yooziž wiñaya casticta cjitasača.

³ Žoñinacž uj paaz pecni kuz mantuquiz žejlcan, Moisés lii jaru ana kami atchiča. Jalla nižtiquiztan Yoozqui niž persun Majch cuchanžquichiča. Ujchiz žoñiztakaz curpuchiz kamchiča. Pero ana ujchizza niiqui. Žoñž curpuchiz cjican, ujchiz žoñinacž laycu ticziča. Jalla nuž cjen Jesucristuqui ujchiz žoñinacž cuntiquiztan casticta cjissiča, Jesucristužquin kuzziz žoñinaca ana casticta cjejajo.

⁴ Moisés liiquiz Yooz kuzcama kamzqui mantitača. Jakziltat uj paaz pecni kuz mantuquiz kamčhaja, jalla niiqui Yooz kuzcama ana kamča, nižaza Moisés liicama ana kamča. Pero jakziltat Yooz Espiritu Santuž mantuquiz kamčhaja, jalla niiqui Yooz kuzcama kamča.

⁵ Jakziltat persun uj paaz pecni kuzcama kamčhaja, jalla niiqui persun pinsitanacžquizkaz kuz tjaača. Pero jakziltat Espiritu Santuž kuzcama kamčhaja, jalla niiqui Yooz Espiritu Santuž pinsitanacžquiz kuz tjaača.

⁶ Jakziltat uj paaz pecni kuz pinsitanacžquiz kuz tjaačaj niiqui, Yooziz wiñaya castictaž cjequiča. Pero jakziltat Espiritu Santuž pinsitanacžquiz kuz tjaačaj niiqui, Yooz kamañchiz kamaquiča, nižaza Yooztan nižtan walikaz cjequiča.

⁷ Jakziltat persun anazum kuzcamakaz kamz pecčhaja, jalla niiqui Yooz quintrača. Yooz kuzcama anapanž kamz pecča, nižaza anapanž atča.

⁸ Jakziltat persun kuzcamakaz kamz pecčhaja, jalla nuž kamtiquiztan Yoozqui anapanča cuntintu.

⁹ Ančuczti persun kuzcamakaz anaž kamča. Yooz Espiritu Santuž ančuca kuznacquiz žejlchiž cjen, ančucqui Espiritu Santuž kuzcama

kamča. Jakziltat ana Jesucristuž Espirituchizlaja, anača Jesucristuž partichiz žoñiqui.

¹⁰ Jesucristuž ančuca kuznacquiz žejlchiž cjen Yooz yujcquiz ana ujchizčhucča, nizaza zuma kuzzizčhucča. Nižaza ančuca animunacaqui ew zuma kamañchizza. Uj paachiž cjen ančuca curpunacaqui ticznaquiča. Jalla nuž cjenami ančuca animunacaqui Yooztan wiñaya kamča.

¹¹ Yooz Ejpqui niž Espíritu Santuž cjen Jesucristo ticziquiztan jacatatskatchiča. Nii Yooz Espíritu Santuqui ančuca kuzquiz žejlča. Jalla nižtiquiztan Yooz Ejpqui niž Espíritu Santuž cjen ančuca ticzi curpunaca zakaz jacatatskataquiča.

¹² Jilanaca, cullaquinaca, tsjii mantuquiz kamspanča učhumqui. Anača uj paaz pecñi kuz mantuquiz kamzqui, persun kuzcamakaz paazjapa. Pero Yooz Espíritu Santuž mantuquiz kamsa.

¹³ Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequiča. Pero jakziltat Espíritu Santuž mantuquiz žejlčhaja, jalla niiqui uj paaznaca jaytiča. Jalla nuž ujnaca jaytichiž cjen, Yooz kamañchiz kamaquiča.

¹⁴ Jakziltat Yooz Espíritu Santuž irpita cječhaja, jalla niiqui Yooz maatiča.

¹⁵ Ančhucqui Yooz maatinacčhucča. Jaziqqui Espíritu Santuqui ančuca kuznacquiz luzziž cjen, ana Yoozquiztan eksñi kuzzizza. Espíritu Santuž cjen, “Učhum Yooz Tata”,

¹⁶ jalla nuž cjican učhum kuznacaqui chiiča. Nižaza kuzquiz sint'iskatča, učhumča Yooz maatinacaqui, jalla nii.

¹⁷ Nižaza Yooz maatinacaž cjen Yooziž tjaata zuma irinsa tanznaquiča, jalla nii irinsača Yooztan wiñaya kamzqui, Jesucristužtan chica. Tii muntuquiz kamcan Jesucristuqui sufrichiča. Učhumqui Jesucristužquiz sirwichiž cjen zakaz sufraquiž niiqui, nekztan arajpachquin nižtan chica honorchiz cjequiča.

¹⁸ Tii timpuquiz sufrisnacaqui anača ancha. Cjuñzna, Yooziž tjaata honorača ancha zuma. Jalla nuž cjuñznuča wejrqui. Jesucristuž tjonz tjuñquiziqui učumnacaqui zuma honorchiz cjequiča. Jalla nii tjeežtaž cjequiča.

¹⁹ Tjapa tii muntuquiz žejlñinacaqui anchaž tjewža, Yooz maatinacž honora tjeež tjuñi.

²⁰ Adanž uj paatiquiztan tjapa tii muntuquiz čhjultakimi inakaz cjissiča. Yooz munan jalla nuž cjissiča. Anača juyztokaz inakaz cjissiča. Pero tsjii noojiqui tii muntumi tii muntuquiz žejlñinacami anawalinacquiztan liwriitaž cjequiča. Jalla nii tjuñi tjewža.

²¹ Jalla nii noojiqui tii muntumi tii muntuquiz žejlñinacami tjapa ana walinacquiztanami liwriitaž cjequiča. Ticzmi anawali watñinacami ana želaquiča. Liwriitiquiztan tii muntumi tii muntuquiz žejlñinacami liwj zumacama cjiskattaž cjequiča, jaknužt Yooz maatinacaqui zumapan cjiskattaž cječhaja, jalla nižta irata.

²² Adanž timpuquiztanpacha tii timpucama tjapa tii muntuquiz žejlñinacaqui sufriča jaknužt tsjaa ic maataka majtz ora sufričhaja, jalla nižta ancha ayincan žejlča.

²³ Učhum kuzquiz zakaz ancha sufriča, Espíritu Santuchiz cjenami. Nii Espíritu Santuqui tsjii zuma adelanto učhum kuzquiz žejlča. Jalla nuž cjen učhumqui ancha tjewža, juc'ant tsjan zuma kamañchiz cjisjapa. Učhumqui Yooz maatinacaž cjitiquiztan nii zuma kamañchiz cjisnaquiča. Nižaza učhum Yooz maatinaca cjican, ew curpuchiz cjisnaquiča.

²⁴ Jalla nuž učumnacaqui tjewža liwriitaž cjen. Chjulunacat chertčhaja, jalla nii chertanaca ana tjewžta cjequiča. ¿Jec žoñit chertanaca tjewznasajo?

²⁵ Učumnacaqui ana chertanaca tjewža. Yoozquiztan tjonñi zumanaca tjewža. Jalla nižtiquiztan pasinziz kuztan tjewstanča.

²⁶ Jaknužt učum zuma tjewzqui sufris awantizjapa yanapčhaja, jalla nižta irata Yooz Espíritu Santuqui učum yanapča tjurt'iñi kuzziz cjisjapa. Učumqui Yoozquiztan jaknužt mayiziz waquizichaja, ana zizza. Jalla nižtiquiztan Yooz Espíritu Santupacha učumnacalta ancha mayižinñiča, nižaza niipachaž ancha sint'iča učumnacalta. Nii Espíritu Santuž mayižintaqui žoñž tawkžtan ana chiita cjesača.

²⁷ Espíritu Santuqui criichi žoñinacžta mayižinñiča Yooz Ejpž kuzcamakaz. Jalla nuž mayižinan kuzquiz zizñi Yooz Ejpqui nii Espíritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espíritu Santuž učumnacalta mayižintanaca zizza.

YOOZ EJPQUI NIIŽ MAATINACZTAN ANCHA MUNAZICHA

²⁸ Yoozqui niiž pinsitacama žoñinaca kjawziča, niiž maati cjiskatajo. Jalla nii kjawžta žoñinacaqui Yooztan zuma munaziča. Jalla nii munazita žoñinacžta Yoozqui čhjulu cjenami mantiča ninacžta zuma cjisjapa. Učumqui nii zizza.

²⁹ Yoozqui tuquitanpacha zizziča, jecnacat niiž maatinaca cjisnačhaja, jalla nii. Nižaza tuquitanpacha Yoozqui niiž maatinaca utchiča, niiž zinta Majch irata cjisjapa, jalla nižta zuma cjisjapa. Jalla nuž Yoozqui pinsichiča, niiž zinta Majchqui jilir jila cjisjapa, tjapa Yoozquin criichi žoñinacžquiztan juc'ant honorchiz cjisjapa.

³⁰ Yooz Ejpqui jecnacat niiž maatinaca cjisnačhaja, nii pinsichiča. Ninaca kjawzizakazza. Nižaza Yoozqui jecnacat kjawztčhaja, jalla ninaca ana ujchiz cjiskatča. Nižaza Yoozqui jecnacat ana ujchiz cjistčhaja, jalla ninaca juc'ant zuma kamañchiz cjiskatča.

³¹ Tjapa nii puntuquiztan učumqui, ¿kjaž iya cjequejo? Yoozqui učumnacaltajapapanča. Jalla nižtiquiztan ¿ject učum atipasajo? Anaž čhjulumi.

³² Yoozqui niiž zinta Majch ana chjojchiča, antiz učumnacaltajapa utchiča, učum laycu ticzjapa. Jalla nuž niiž zinta Majch utchiž cjen učumnacaquiz tjapa niiž zumanaca zakaz tjaaquiča, juc'ant zuma kamañchiz kamajo.

³³ Nižaza Yooz illzta žoñinacžjapa anaž jecmi uj tjojtNASAča. Yoozpacha ninaca ana ujchiz cjiskatchiča.

³⁴ Jalla nižtiquiztan ¿ject Yooz illzta žoñinacžquiz “Casticta cjistanča” cjican chiyasajo? Anaž jecmi. Jesucristuča ninacž laycu ticziqi. Nekztan ticziquiztan jacatatchiča. Anziqi Yooz Ejpž žew kjarquiz žejlča, tjapa mantican. Jalla nii Jesucristupachača učumnacalta tjurt'ižinñiqui.

³⁵ Chjulunacaž watanami Jesucristuqui učumnacatan munaziča: sufris watanami, llaquinaca watanami, chjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, čhjulunacaž watanami Jesucristuqui učumnacatan munaziča.

³⁶ Cjijrta Yooz takuqui tuž cjiča:
 “Yooz partiquiz žejlčiž cjen učumnacaqui sufrican sufrican zapuru ticzmayaztakaz žejlča. Učum quintra žoñinacaqui tantiiča, criichi žoñinacaž contaj cjila, cjican. Conz uuzanacažtakaz učumnacaquiz nayča”.

³⁷ Pero ċhjulunacaž watanami Jesucristuqui uċhumnacatan panž munaziċha. Nižaza ċhjulunacaž watanami uċhumnacaqui Jesucristuž cjen tjapa nii anawalinacžquiztan atipaquiċha.

³⁸ Anaž ċhjulumi Yooz uċhumnacatan ana munazizkati atasaċha: anaž ticzmi, anaž žetimi, anaž anjilanacami, anaž mantinñinacami, anaž poderchiznacami, anaž anztan žejlñinacami, anaž jaztan žejlñinacami,

³⁹ anaž tsewcta poderanacami, anaž tii yokquiz žejlñi poderanacami, anaž ċhjul paatanacami Yooz uċhumnacatan ana munazizkati atasaċha. Yoozqui uċhumnacatan panž munaziċha, uċhumnacatan Jesucristo Jiliržtan tsjii kuzziz cjen.

9

JUDIO WAJTCHIZ ZOÑINACA

¹ Tsjilla cjesaċha. Jalla tii puntuquiztan wejrqui zuma razunapal cjiwċha. Jesucristužquiz kuzziz cjen razunal chiyuċha, anal toscara chiyuċha. Espíritu Santuqui wejt kuz zizza. Lijituma cjiwċha.

² Ancha llaquizuċha, nižaza wejt kuzquiz anchal cjuñznuċha wejt judío wajtchiz žoñinacžquiz.

³ Wejt judío žoñinacaqui Jesucristuž partiquiz cjiskattasaž niiqui, wejrqui Jesucristužquiztan t'akžtacama cjis pectasaċha. Nižaza wejrqui ninacž laycu infiernuquin castictacama cjitasāċha. Ninacaqui wejt parti žoñinacaċha.

⁴ Israel majchmaatinacquiztan tjonchiž cjen, ninacaqui Yooz illzta žoñinacaċha. Yoozqui judío žoñinacžquiz persun honora tjeeziċha. Nižaza Yoozqui judío žoñinacžtan acuerdunacquiz luzziċha. Nižaza Yoozqui Moisesquiz lii tjaachiċha ninacžtajapa. Nižaza Yoozqui, jaknužt nižquiz sirwiz waquiziċhaja, jalla nii cuzturumpinaca ninacžquiz tjaachiċha. Nižaza tuqui timpuquiz Yoozqui ninacžquiz takunaca tjaachiċha, jaztanaqui tsjii Liwriiñi tjonaquiċha, nii.

⁵ Uċhum judío žoñinacž tuquita atchi ejpnacaqui Yooziž illztataċha. Jaziqui uċhum judío žoñinacž majchmaatinacquiztan tjonñitaċha Cristuqui. Nekztan žoñž curpuchiz cjissiċha. Cristuċha tjapa mantiñi Yoozpachaqui. Nižaza wiñaya honorchiz cjila. Nužoj cjila. Amén.

⁶ Tjapa Israel cjita tuquita ejpž majchmaatinacaqui anaċha ultim lijitum Israel wajtchiz žoñinaca, nižaza anaċha Yooz wajtchiz žoñinaca. Tjapa judío žoñinacami ana Yooz maatinacaž cjenami, Yooz takuqui cumplissiċha.

⁷ Nižaza tjapa Abrahamž majchmaatinacaqui anaċha ultim lijitum Abrahamž familiaqui. Cjijrta Yooz takuqui Abrahamž puntuquiztan tuž cjiċha: “Am ultim majchmaatinacaqui am majch Isaacžquiztan okaquiċha”.

⁸⁻⁹ Jaziqui wejrqui cjiwċha, tjapa Abrahamžquiztan ojknii majchmaatinacaqui anaċha ultimu Yooz maatinaca, nii. Yoozqui Abrahamžquiz taku tjaachiċha, tuž cjican: “Weriž chiita timpuquiz quejpžcaċha, wejt taku cumplizjapa. Jalla nii weriž quejpžquizcama am Sara cjiti tjunqui tsjii majch mataquiċha”. Nekztan Abrahamqui nii taku catokchiċha. Nižaza Yoozqui tjapa niž taku catokñi žoñinacžquiz nayċha, ninacaqui ultim lijituma Abrahamž majchmaatinacaċha, nii.

¹⁰ Tsjilla cjesaċha nii puntuquiztan. Uċhum Isaac tuquita atchi ejpqui Rebeca cjiti tjunchizza. Nii lucutiñiqui pucultan majchnacchiztaċha.

11-13 Nii pucultan ocjalaž ima matan, nižaza ima zuma ana zuma paan, Yoozqui Rebequiz cjichiča, tuž cjican: “Am jilir majchqui niž majchmaatinacžtanpacha niž lajkžquiz piyunanaca cjequiča niž lajkž majchmaatinacžquizpacha”. Nižaza cijirta Yooz takuqui tuž cjiča: “Jacob pecchinča. Esau ana pecchinča”. Jaknužt Yooz pinsitčaja, jalla nuž illziča. Paatanacquiztan jama ana illziča Yoozqui. Pero niž pectacama illziča, nižaza kjawziča niž partiquiz cjisjapa.

14 Jalla nii puntuquiztan ¿kjaž iya cjequejo? ¿Yooz ana lijituma paajo? Anaž cjesača. Yoozqui lijituma panž paača.

15 Yoozqui Moisesquiz cjichiča, tuž cjican: “Wejt munañpacama wejt okzñi kuz tjeeznuča, nižaza wejt munañpacama favora paaznuča”.

16 Ana žoñž munañpacama, nižaza ana žoñž langžtacama Yoozqui okža. Pero Yoozqui persun kuz munañpacama okža.

17 Cjirta Yooz takuqui tuž cjiča: Yoozqui Egipto nación chawc jiliržquiz cjichiča: “Wejrqui am utchinča chawc jiliri cjisjapa. Jalla nuž am utchinča, am quintra wejt azi tjeezjapa, nižaza tjapa tii žoñnacžquiz weriž paata quintu mazta cjisjapa”. Jalla nuž cjichiča Yoozqui.

18 Yoozqui persun kuz munañpacama okža, nižaza persun kuz munañpacama žoñnacž kuz chojruzakaz cjiskatča. Jalla nižta kjanapachača.

19 Cunamit tsjiiqui cječhani, tuž cjican:

—Jalla nižta cjen, ¿kjažtiquiztan Yoozqui žoñnacž ujquiztan casticaquejo? ¿Jec žoñit Yooz pinsita quintra kamasajo?

20 Jalla nižta chiiñžquiz pewcznača, ¿ject amjo Yooz quintra ch'aazjapajo? ¿Tsjii ojchqui niž paañžquiz chuchasajo, “¿Kjažtiquiztan wejr nižta paajo?” cjicanajo?

21 Tsjii ojch paañiqui čhjulum paasača ljocquiztanaqui. Ljocquiztan paasača tsjii ancha c'achja ojchlla pjijztanacžquiz joojoota cjisjapa. Nižaza ana zuma cheechi ojch paasača, zapuru joojoota cjisjapa.

22 Jalla nižta iratača Yoozqui. Yoozqui tsjii žoñnaca utchiča, casticta cjisjapa. Jalla nuž utchiča, niž azi tjeezjapa, nižaza niž uj quintra žawjz tjeezjapa. Jalla nuž tjeezñi peccanami Yoozqui pasinziz kuztan nii ana wal žoñnaca awantiča, casticz tjuñicama.

23 Nižaza Yoozqui yekjap žoñnaca utchiča, niž okžta cjisjapa. Tuquitanpacha nii žoñnaca tjacziča, arajpachquin zuma honorchiz cjisjapa. Nižaza Yoozqui nii žoñnacžtan okzñi kuztan žejlča, niž juc'ant okzñi kuz tjeezjapa.

24 Učhum zakaz Yoozqui kjawziča, niž okžta žoñnaca cjisjapa. Judío wajtchiz žoñnacami ana judío wajtchiz žoñnacami, tjapa učhumqui Yooz okžta žoñnacčhumča.

25 Jalla nii puntuzakaz Yoozqui Oseas cijirta liwruquiz tuž cjiča:

“Ana Yooziž illzta žoñnacaqui Yooziž illzta žoñnaca cjequiča. Nižaza tuqui ana pecta žoñnacaqui anziqui Yooziž pecta cjequiča”.

26 Nižaza tuquiqui judío žoñnacaqui cjichiča: “Ančucča anaž Yooz wajtchiz žoñnacaqui”. Pero tii timpuquiz nii iñarta žoñnacaqui “zejtñi Yooz maatinacaž cjequiča”.

27 Israel žoñnacž puntuquiztan Isaías profetaqui tuž cjichiča: “Israelž majchmaatinacaqui ancha tama želaquiča, kot at pjilažtakaz, jalla nižta miraqiča. Jalla nuž mirchi cjenami, tsjii kjaž žoñnacakaz liwriitaž cjequiča.

28 Yooz Jiliri qui tii muntuquiz žejlñi žoñnacžquiz niž chiita taku cumplaquiča, panž apura cumplaquiča”.

29 Jalla nii puntuzakaz Isaías profetaqui mazinchiča tuž cjican:

“Walja azziz Yooz Jiliriqui tsjii uĉhum majchmaatinaca ana liwriitasaž ni-
iqui, tjappacha ticztasaĉha Sodoma wajtchiz žoñinacažtakaz, nižaza
Gomorra wajtchiz žoñinacažtakaz”.

JUDIO ŽOÑINACAQUI UJQUIZ TJOJ TSA

³⁰ ¿Kjaž cjequejo nekztanajo? Tuquiqui ana judío žoñinacaqui ana im-
portichiĉha Yooz yujcquiz ana ujchiz cjisjapa. Jaziqui Jesucristužquin kuz
tjaachiž cjen Yooz yujcquiz ana ujchiz cjissiĉha.

³¹ Nižaza judío žoñinacaqui Moisés lii jaru kamz pecatĉha, Yooz yujcquiz ana
ujchiz cjisjapa. Pero nii lii jaru ana zumpacha kami atchiĉha.

³² ¿Kjažtiquiztan Yooz yujcquiz ana ujchiz cjisni atatjo? Ninaca persun-
pacha lii jaru kamtiquiztan Yooz yujcquiz zuma cjis pecchiĉha. Pero ana
atchiĉha. Nižaza nii lii jaru kamz peccan, juc'ant ujchiz cjissiĉha, Jesu-
cristužquin ana kuz tjaachiž cjen. Jaknužt tsjii mazquiz tejžcu tjojtsaja, jalla
nižta irata Jesucristužquiztan ujquiz tjojtsiĉha.

³³ Jalla nužpacha cjiirta Yooz takuqui cjiĉha:
“Žoñinaca nonžna; wejrqui Sión cjita wajtquiz tsjii utĉha. Jalla nižquiztan
žoñinaca ujquiz tjojtsnaquiĉha. Tsjii maztakaz nižquiztan žoñinaca
t'eznaquiĉha. Pero jakziltat nižquiz kuz tjaaĉhaja, jalla niiqui ana
inakaz kuz tjaaquiĉha. Ana incallta cjequiĉha”.

10

¹ Jilanaca, cullaquinaca, judío žoñinaca liwriitaj cjila, jalla nužuĉha weriž
kuzquiz pectauqui. Nižaza jalla nužuĉha weriž Yoozquin mayiztaqui.

² Ninacž puntuquiztan wejrqui ticlaraĉha, ninacaqui Yooz sirwiz pecĉha,
nii. Pero Yooz sirwiz puntu ana zuma intintazza.

³ Jaknužt Yoozqui žoñinaca ana ujchiz, nižaza zuma cjiskatĉhaja, jalla nii
Yooz pinsita ana zizza. Ninacaqui persun kuzquiz pinsitacamakaz Yooz yujc-
quiz zuma cjis pecĉha. Jalla nižtiquiztan Yooz pinsitiquiz ana importichiĉha;
nižaza Yooz taku ana nonža.

⁴ Jesucristuqui Moisés lii nužquiz apatatskatchiĉha. Jaziqui jakziltat Jesu-
cristužquiz kuz tjaaĉhaja, jalla niikaz Yooz yujcquiz zuma cjisnaquiĉha, ana
ujchiz.

⁵ Yooz yujcquiz zuma cjis puntuquiztan Moisesqui tuž cjiirĉiĉha: “Jakzil-
tat wejt lii jaru kamĉhaja, jalla niiqui Yooztan kamaquiĉha, lii jaru kamĉiž
cjen”. Pero žoñinacaqui nuž kami anapan atĉha.

⁶ Jaziqui Jesucristužquiz kuz tjaachiž cjenkaz Yooz yujcquiz zuma cje-
saĉha. Jalla nii puntuquiztan tužuĉha. Anĉhuca kuzquiz ana pinsaquiĉha,
tuž cjican: “¿Ject arajpacha yawasay?” (Jalla nuž cjican, Jesucristo ĉhijjwkatz
pecĉha.) Ana ĉhjul žoñimi nižta paasaĉha.

⁷ Nižaza anĉhuca kuzquiz ana pinsaquiĉha, tuž cjican: “¿Ject ticzi
žoñinacžquin okaqui?” (Jalla nuž cjican, Jesucristo ticziquiztan jacatatskatz
pecĉha.) Ana ĉhjul žoñimi nižta paasaĉha.

⁸ Pero ĉhjul žoñimi Yoozquin kuz tjaaĉiž cjen Yooz yujcquiz zuma cjis-
nasaĉha. Yooz yujcquiz zuma cjisqui jalla tužuĉha. Liwriiñi taku anĉhucalta
žejlĉha, Yoozquin kuzziz cjisjapa. Nii taku anĉhuca atžtan parlasaĉha,
nižaza anĉhuca kuztan catokasaĉha. Jalla nii liwriiñi takuqui tužuĉha:
Jesucristužquiz kuz tjaaquiž niiqui, liwriita cjequiĉha, nii. Jalla niipacha
wejrnaĉqui paljajuĉha.

⁹ Anĉhucqui ticlarstanĉha, Jiliripanĉha Jesucristuqui, cjicanaqui. Nižaza
anĉhuca kuzquiz criistanĉha, Yoozqui Jesucristo ticziquiztan jacatatchiĉha,
jalla nii. Jalla nekztan liwriita cjequiĉha.

¹⁰ Zoñinacaqui tjapa kuztan criistanča, nekztan Yooz yujcquiz zuma cjequiča, ana ujchiz. Nižaza persun tawkžtan “Jesucristužquiz kuz tjaa-uča” cjican ticlarstanča, nekztan liwriita cjequiča.

¹¹ Cjijrta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquiča”.

¹² Judío zoñinacžtanami yekja wajtchiz zoñinacžtanami Yooz yujcquiziqui tsjii parijukazza. Yooz Jiliriča tjapa zoñinacžta Jiliriqui. Jakziltat liwriita cjisjapa Yoozquiz mayizichaja, jalla nižquiz Yoozqui okznaquiča; nižaza liwriyaquiča.

¹³ Jalla nužpacha cjijrta Yooz takuqui cjiča: “Jakziltat Yooz Jiliržquiz mayizichaja, jalla niiqui liwriita cjequiča”.

¹⁴ Pero zoñinacaqui Yoozquin ana criyaquiž niiqui, ¿kjažt nii zoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, ¿kjažt Yoozquiz criyasajo? Nižaza Yooz puntu paljayni zoñi ana želaquiž niiqui, ¿kjažt nonžni cjesajo?

¹⁵ Nižaza Yooz puntu paljayni zoñinaca ana cuchanžquitažlaj niiqui, ¿kjažt Yooz puntu paljayta cjesajo? Cjijrta Yooz takuqui tuž cjiča: “Ancha zumača Yooz puntu paljayni zoñinacaqui. Paljayta Yooz taku catokžcu, Yooztan zoñinacžtan wali cjiskatasača”.

¹⁶ Pero wacchi zoñinacaqui paljayta Yooz taku ana juyzu paacha. Jalla nužupan Isaiasqui cjichiča: “Yooz Jiliri, ¿ject wejrnač paljayta takunaca criijo? Tsjii kjažukazza criichiqui”.

¹⁷ Jaziqui Jesucristuž puntu paljaytažlaja, nii puntu nonžta cjesača. Nižaza Jesucristuž puntu nonžcu, zoñinacaqui nižquin kuz tjasača.

¹⁸ Wejr pewcznuča, ¿Judío zoñinacaqui ana nonzejo? Nonzipanča. Yooz takuqui cjiča:

“Tjapa kjutni tii yokchiz zoñinacžquiziqui nii liwriini taku mazmaztača. Nižaza tjapa tii muntuquiz žejlni zoñinacaqui nii taku nonža”.

¹⁹ Tsjižtan wilta pewcznuča, ¿Israel wajtchiz zoñinacaqui ana intintazzikaya? Tuquiqui judío zoñinacž puntuquiztan Moisesqui cjichiča:

“Yoozqui ančucaquiz iñiziskataquiča, yekja wajtchiz zoñinacžquiztan. Nižaza Yoozqui ančucaquiz žawjkataquiča tuquita ana Yooz pajni wajtchiz zoñinacžquiztan”.

²⁰ Nekztanaqui Isaiasqui ana eksu, tuž chiichiča:

“Ana werar Yooz pecñinacaqui ultimquiziqui Yooz pajchiča. Nižaza Yoozqui persunpacha tjeziča tuquita ana nižquiz pecñinacžquiz”.

²¹ Yooz Ejpqui Israel wajtchiz zoñinacž puntuquiztan tuž cjiča:

“Zita zita wejrqui ančhuc kjawznatuča wejtquin tjonajo. Ančhuczi anaž wejt kjawžta cazza, antiz wejt quintrakazza”.

11

CRICHI JUDIO ZOÑINACA ZEJLCHA

¹ Jalla nižtiquiztan wejrqui pewcznuča, ¿Yoozqui niž tuquita illzta zoñinaca chjatkatjo? Anapanž cjesača. Wejrpacha Israel wajtchizta, Abrahamž majchmaatitča, nižaza Benjaminž parti zoñtča.

² Tuquitanpacha Yoozqui Israel zoñinaca illziča. Jalla nižtiquiztan anaž chjatkatasača. ¿Jalla Elías puntuquiztan ana cjuño? Elías puntuquiztan cjijrta Yooz takuqui tuž cjiča: Eliasqui Israel zoñinacž ujnaca Yoozquiz tjeziča, tuž cjican:

³“Yooz Jiliri, ninacaqui amiž cuchanžquita profetanaca conchiča. Nižaza am sirwiz altaranaca pajlchiča. Wejrqui am sirwiñi zinalla želuča. Ninacaqui wejr zakaz konz pecča”. Jalla nuž cjichiča Eliasqui.

⁴Nekztan Yoozqui Eliasquiz tuž kjaaziča: “Wejttajapa pakallawk warank žoñinaca čhjetzinča. Ninacaqui Baal cjita žoñiž paata yooz yujcquiz anapan quillziča”.

⁵Jalla nižta irata tii timpuquiz zakaz tsjii kjaž judío žoñinacaqui Yooz partiquiz žejlča. Yoozqui ninacžquiz okžcu, illziča.

⁶Nii criichi judío žoñinacaqui Yooziž okziž cjenkaz illztača. Jalla nižtiquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷¿Jazic kjaž cji? Israel wajtchiz žoñinacaqui ujquiztan liwriita cjis pecatča. Pero ana liwriitatača. Yooziž illztanacaqui ninaca alajakaz liwriitacha. Parti Israel žoñinacasti chojru kuzziz cjissiča.

⁸Jalla nii chojru kuzziz žoñinacž puntuquiztan cijirta Yooz takuqui tuž cjiča:

“Yoozqui Israel žoñinacžquiz niž puntu ana intintiñi kuzziz cjiskatchiča. Jalla nižtiquiztan ninacaqui Yooz puntu chercanpacha ana cherñižtakaz cjiskatchiča, nižaza Yooz puntu nonzcanpacha ana nonzñižtakaz cjiskatchiča. Anzta tii timpucamaž nižta žejlča”.

⁹Nižaza Davidqui Yooz tawk liwruquiz tuž cijirchiča:

“Yoozquin ana kuzziz žoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatzjapa. Nižaza ninaca t'ezinla, ninacž uj paatiquiztan jama casticta cjisjapa.

¹⁰Zur žoñinacžtakaz žejlcan Yooz puntu ana cherñi cjila. Nižaza ninacž tajqui chutunzižtakaz cjila, ana walinacaž tjonchiž cjen”.

YEKJA WAJTCHIZ ŽOÑINACŽ PUNTU

¹¹Jalla nižtiquiztan wejrqui pewcznuča, Israel wajtchiz žoñinacaqui ujquiz tjojtsiž cjen, ¿wiñaya chjatkatta cjesajo? Anapanž cjesača. Israel wajtchiz žoñinacž liwriiñi tawkquiz ana juyzu paachiž cjen, nii liwriiñi takuqui yekja wajtchiz žoñinacžquiz paljaytača, Israel žoñinacžquiz p'ekinchayzjapa, Yoozquin kuz tjaajo.

¹²Israel žoñinacž liwriiñi taku ana juyzu paachiž cjen parti žoñinacžtajapa zuma cjissiča. Nižaza ninacaž Yoozquiztan jaytiquiztan yekja wajtchiz žoñinacžtajapa wali cjissiča. Jalla nižtiquiztan Israel žoñinaca wilita Yooz partiquiz cjisnan tsjan juc'ant zumaž cjisnaquiča yekja wajtchiz žoñinacžtajapa.

¹³Anziqui ančhuc yekja wajtchiz žoñinacžquiz chiyuča. Wejrqui yekja wajtchiz žoñinacžquiz cuchanžquita apostoltča. Jalla nižtiquiztan wejt apóstol kamaña anchal importayuča,

¹⁴wejt judío sarchiz žoñinaca p'ekinchayzjapa, nižaza tsjii kjažu liwriita cjisjapa.

¹⁵Judío žoñinacž chjatkattaž cjen yekja wajtchiz žoñinacaqui pertunta cjissiča, Yooztan wali cjisjapa. Jalla nižtiquiztan nii judío žoñinacž wilita Yooz partiquiz risiwta cjis cjen, žoñinacaqui ticziquiztan jacatatchi cjisnaquiča.

¹⁶Judío žoñinacž tuquita atchi ejpnacaqui Yooz partiquiz želatča. Jalla nižtiquiztan tsjii tjonñi timpuquiz judío žoñinacaqui Yooz partiquiz wilita cjisnaquiča. Jaknužt primir paata t'antaqui zumažlaja, jalla nekztan tjapa nii t'anti mazaqui zuma zakazza. Nižaza tsjii munti sep'aqui zumažlaj niiqui, nii tsijtñi muntiqui zuma zakazza.

¹⁷ Tsjii judío žoñinacaqui munti itzanacažtakaz ts'ojrtača. Nižaza ančhuc yekja wajtchiz žoñinacaqui tsjii ana pecta munti itzažtakazza. Pero ančhucqui judío žoñinacz cjenpacha apjattača, nii zuma muntiž cjen wali zakaz cjejajo. Nii zuma muntiqui Yooz partiča.

¹⁸ Ančhucqui jalla nuž apjattiquiztan, anaž judío žoñinaca iñaraquiča. Jakziltat iñaračhaja, jalla niiqui tuž cjuñz waquiziča, ančhucqui nii sep'až cjen žetiñčucča. Ana ančucaž cjen nii sep'a žejtča. Nii sep'ača judío žoñinacaqui. Cristučha tsjii judío žoñiqui. Jalla niiz cjen ančhucqui ew žeti tanzinčucča.

¹⁹ Yekjapanacaqui cunamit cječhani, “Nii itsanacaqui ts'ojrtača wejrna apjatžta cjisjapa”.

²⁰ Razunaž niiqui. Ana Yoozquin kuz tjaachiž cjen judío žoñinacaqui chjatkattača. Ančhuczi Yoozquin kuz tjaachiž cjen jalla nii alajakaz Yooz partiquiz žejlča. Jalla nižtiquiztan anača mitarazi kuzziz cjeella. Antiz humilde kuzziz cjee, Yooz rispitan.

²¹ Yoozqui ana kuz tjaañi judío žoñinaczjapa quintra cjissižlaj niiqui, ančucajapa zakaz quintra cjisnaquiča ana nižquiz kuzzizlaj niiqui.

²² Yoozza okzñimi nižaza casticñimi, jalla niiz tantiya. Yoozquiztan zarakñi žoñinaczjapa casticñipanča. Nižaza nižquin kuz tjaañinaczjapa okzñipanča. Ančhucqui tira Yoozquin kuzzizlaj niiqui, nekztan Yoozqui ančhuc tira okznaquiča. Ančhucqui ana tira Yoozquin kuzzizlaj niiqui, nekztan Yoozqui ančucaquiz zakaz chjatkataquiča.

²³ Nii chjatkatta judío žoñinacaqui wilta Yoozquin kuz tjaaquiz niiqui, wilta Yoozqui ninaca ricujaquiča. Yoozqui ricujzmi atča, Yooz partiquiz cjisjapa.

²⁴ Ančhucqui yekja wajtchiz žoñinacača, ana pecta munti itzanacažtakaz. Ana Yooz partiquiz želan Yoozqui ančhuc niiz partiquiz apjatchiča, yekja wajtchiz žoñinacaž cjenami. Jalla nižta watan, judío žoñinacaqui Yooz partiquiz wilta apjatžqui tsjan pjasilača, tuquiqui Yooz partiquiz žejlchiž cjen.

JUDIO ŽOÑINACAQUI YOOZQUIN KUZ TJAAQUICHA

²⁵ Jilanaca, cullaquinaca, tsjii tuquita ana zizta taku ančucaquiz zizkatz pecučha, ana mitaraz kuzziz cjisjapa, “Wejrnacqui ziziñ žoñtča” cjicanaqui. Jalla tuž zizkatz pecučha: Yoozqui yekja wajtchiz žoñinaczquiz niiz partiquiz cjiskatz pecča. Jakziltanaczquiz Yoozqui niiz partiquiz luzkatz pecčhaja, jalla ninacaqui luzaquiča. Tjapa nii Yooziž pecta žoñinaca Yooz partiquiz luzcama, jalla niicama Israel žoñinacaqui chojru ana intintiñi kuzziz cjequiča.

²⁶ Jalla nekztanaqui tjapa nii timpuquiz žejlñi Israel žoñinacaqui liwriita cjequiča. Jalla nuž cijirta Yooz takuqui cjiča: “Sión wajtquiztan tsjii Liwriiñiqui tjonaquiča. Jacobž majchmaatinacquiztan ana zum kamañanaca jaytiskataquiča.

²⁷ Jalla nekztanaqui wejrqui ninacžtan compromitača, ninacz ujnaca pertunača, nii”.

²⁸ Tii timpuquiziqui Israel žoñinacaqui Yooz liwriiñi tawk quintrača, nižaza Yooz quintrača, ančhucalta wali cjisjapa. Jalla ninaca Yooz quintraž cjenami Yoozqui ninacžtan munaziča, ninacz tuquita atchi ejpnaca illziž cjen.

²⁹ Yoozqui tjaacanpacha anaž niiz tjaaquiqui kjañasača. Nižaza Yoozqui illžcupacha, ana chjatkatasacha.

³⁰ Tuquiqui ančhucqui Yooz ana cazziñčucča. Anziqui ančhucqui Yooziž pertuntača, ninacaž ana Yooz cazziž cjen.

³¹ Tii timpuquiziqui Israel žoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequiča, jaknužt ančhucqui pertunta cjistčhaja, jalla nižta. Jalla nižta Yoozqui niž okzñi kuz tjeeznaquiča.

³² Yoozqui tsjii pariju tjapa žoñinacž ujnaca tjeeziča, nižquiz ana cazta, jalla nii. Jalla nuž tjeeziča tjapa žoñinacžquiz tsjii pariju niž okzñi kuz tjeezjapa.

³³ ¡Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi zuma intintasača. Yooz pjalan anaž jecmi nižquiz mitisasača.

³⁴ ¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo?

³⁵ ¿Ject Yooz Jiliržquiz ayñi cjisjapa tjaasajo? Anaž jecmi.

³⁶ Tjapa Yoozquiztan tjonča. Nižaza tjapa niž cjen žejlča. Nižaza tjapa nižtacamača. Yoozqui wiñaya honorchiz cjila. Jalla nužoj cjila. Amén.

12

YOOZ KUZCAMA KAMZ PUNTU

¹ Jilanaca, cullaquinaca, Yooz ančhuc okziž cjen ančhucquiz chiižinuča, ančhuc persun curpu Yoozquin tjaa, tsjii žejtñi wilanažtakaz. Ančhuc persun curpu Yooztajapakaz cjee, ana zinta uj paacan. Nuž cjen Yoozqui cuntintuž cjequiča. Jalla nižtača Yooz ultim lijituma sirwizqui.

² Jaknužt tii muntuquiz ana criichi žoñinaca kamčhaja, jalla nižta ančhucqui ana kama. Antiz ančhucaz pinsitanacaž campiita cjee, Yooz pinsitanacaž irata cjeyajo. Tjapa ančhuc kamaña zuma cjee. Jalla nekztan Yooz kuz zizñiž cjisnaquiča. Yooz kuzqui zumapanča, nižaza Yooz kuzcama kamzqui Yoozquiz cuntintu cjiskatča, nižaza Yooz kuzcama kamcan ančhucqui zumapan cjequiča.

³ Yoozqui wejr okžcu apóstol puestuquiz wejr utchiča. Jalla nižtiquiztan tjapa ančhucquiz chiižinuča, persun puntuquiztan anača pinzizqui, “Wejrqui tsjan zumtča” cjicanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma razunchiz pinziz waquiziča. Cjuñzna, Yoozqui zapa maynižquiz tsjii kamaña tjaachiča, Yoozquin kuzziz cjitiquiztan jama. Jaziqui ana mitarazi kuzziz cjee.

⁴ Tsjii curpuquiz wacchi partinaca žejlča. Punta punta žejlča, cherñi, nonzñi, lanzñi jalla nižta.

⁵ Jalla nižta irata Cristuž partiquiz žejlča. Učhumqui tamaž cjen tsjii pariju Cristuž partiquizkaz žejlča, tsjii curpužtakazza. Cristuž partiquiz žejlcan, učumnacaqui tsjii kuzziz uniru žejlča.

⁶ Yoozqui zapa maynižquiz yekja yekja kamaña tjaachiča, jaknužt munčhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchizlaj niiqui, jalla nii kamañquiz zuma kama, Yoozquiz tjapa kuzquiztan jama.

⁷ Iclizquiz yanapñi kamañchizlaj niiqui, zuma yanapz waquiziča. Yooz puntu tjaajiñi kamañchizlaj niiqui, zumapan tjaajinz waquiziča.

⁸ Yoozquin kamzjapa p'ekinchayñi kamañchizlaj niiqui, zumapan p'ekinchayz waquiziča. Yoozquin cusasanaca tjaañi kamañchizlaj niiqui, tjapa kuztan tjaaz waquiziča. Icliza irpiñi kamañchizlaj niiqui, zumapan irpiz waquiziča. T'akjir žoñinacžquin okzñi kamañchizlaj niiqui, zuma cuntintu yanapz waquiziča.

ZUMAPAN KAMAQUICHA

⁹ Tjapa kuztan porapat lijitum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa.

¹⁰ Porapat oksaspanča. Zuma kuztan parti hermanonacžquiz rispitaquiča, anača tsjiiž rispitskaz tjewzqui.

¹¹ Ana jayrazñi kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

¹² Arajpach zumanaca tjewžcan, cuntintuž kama. Llaquinacaž tjonanami pasinziz kuzziz kama. Yoozquin parlicanpan žela.

¹³ Criichi žoñinacaž t'akjiri želan, panž yanapa. Tjonzñinaca tjonan, panž kjawžna.

¹⁴ Ančuca quintra žoñinacžtajapa Yoozquiztan mayižinaquiča, ninaca zuma cjisjapa. Anaž quintra chiichiyaquiča. Antiz mayižinaquiča.

¹⁵ Cuntintu žejlñi žoñinacžtan cuntintuza cjee. Kaañi žoñinacžtan chicazaž kaazna.

¹⁶ Porapat zuma munazican kama. Anača mitarazi kuzziz tucquin cjis pecsqi. Pero humilde kuzziz wirquin cjican cuntintuž cjee. Anača "Wejrqui zuma ziziñ žoñtča" cjee.

¹⁷ Tsjiiqui ančuca quintra paachiž cjen, ančhucqui anača nižtapacha quintra tjepunzqui. Zumapanž paazjapa tjapa kuz tjaa.

¹⁸ Nižaza ančhucqui tjapa žoñinacžtan zuma kama, attacama.

¹⁹ Pecta jilanaca, cullaquinaca, ančhucpacha anača quintra tanassa. Yoozpachaž ančuca quintranaca casticaquiča. Jalla nuž cjiirta Yooz takuqui cjiča: "Yooz Jiliriqui tuž cjiča, 'Wejrtča quintra žoñinaca castiquiñtqui. Wejr casticača'".

²⁰ Nižaza Yooz takuqui cjiča: "Ančuca quintra žoñinacaž čhjeri eecziž cjen, čhjeri ona. Nižaza kjaz kjara passiž cjen, kjaz ona. Jalla nuž paažcuqui nii žoñinacžquiz azkataquiča".

²¹ Tsjii žoñiqui ančuca quintra paasača. Ančhuczti ana nižtapacha tjepna. Pero nii quintra žoñžquiz zumžtanž paacan jalla nuž atipa.

13

¹ Tjapa žoñinacaqui gobiernuž mantitanaca caz waquiziča. Yoozqui mantiz poder tjaača tižquizimi nižquizimi. Yoozqui jilirinacžquiz poder tjaačiča mantizjapa.

² Jalla nižtiquiztan jakziltat jilirž quintra cječhaja, jalla niiqui Yooziž utžta žoñž quintrača. Nižaza nii quintra žoñinacaqui casticta cjequiča.

³ Zuma paañi žoñinacaqui anaž jilirinacžquiz eksnasača. Antiz ana zuma paañi žoñinacaqui jilirinacžquiz eksnasača. ¿Ančhucqui jilirinacžquiz ana ekscan kamz pecya? Zumapan kama. Nekztan nii jilirinacaqui ančucaquiz walikaz cjican cjequiča.

⁴ Jilirinacaqui zizcumi ana zizcumi Yooz sirwiča, ančhucalta wali žejljapa. Pero ančhucqui ana zuma paaquiz niiqui, eksnasača. Jilirinacaqui casticz poderchizza, anača inakaz nii mantiz puestu tanža. Ninacaqui Yooz sirwiča, nižaza Yooz cuntiquiztan ana zuma paañi žoñinaca castičča.

⁵ Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazpanča.

⁶ Jalla nijapa zakaz ančhucqui impuestonaca pjojkz waquiziča. Mantiñi gobiernuqui Yooz sirwican impuestonaca packatča.

⁷ Tjapa jilirinacžtan zumapan cjee. Tsjii tasa tjaaslaj niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, nižquiz panž rispita. Jakziltižquiz honora waytižinz waquiziž niiqui, nižquiz honora waytižina.

⁸ Ana jecztanami kajchiz žela. Pero porapat zuma munaziz waquiziča. Jakziltat žoñinacžtan zuma munazačhaja, jalla niiqui Yooz mantitanacaž cumpliča.

⁹ Yooz mantita ortinanacaqui tuž cjiča: “Anača adulteriuquiz žejlzqui. Anača žoñi konzqui. Anača tjañi zaazqui. Anača toscara chiizqui. Anača yekja žoñžta cusasa zmazqui”. Jalla nii mantita ortinanacami nižaza tjapa mantitanacami cumplitaž cjequiča, tuž kamcan: “Jaknužta am persun kuztan zuma munazičhaja, jalla nuž žoñinacžtan zuma munaziz waquiziča”.

¹⁰ Jakziltat nižta zuma munazičhaja, jalla niiqui žoñinacž quintru anapan paaquiča. Jalla nižtiquiztan zuma munazican Yooz mantita ortinanaca cumpliča.

¹¹ Jalla nuž kamcan, tii timpu naya. Nii nii žela. Tuquiqui Jesucristužquiz kuz tjaachinčhumča. Anziqui ultimu liwriiz tjuñiqui tsjan žcatžinžquiča.

¹² Tii kamz timpuqui waj tucuzinžnaquiča. Nižaza Jesucristuž tjonz tjuñi žcatžinžquiča. Jalla nižtiquiztan ana zuma paaz kamañquiztan zarakzpan waquiziča. Zuma paaz kamañchiz kamz waquiziča, tsjii zuma armichiz zultatužtakaz.

¹³ Zuma kamcan zuma žoñižta ojklaya, kjanquiztakaz ojklaycan. Anaž pjiistanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza žoñinacžtan ch'aascan ana kama. Nižaza žoñinacžtan iñisican ana kama.

¹⁴ Tsjii zuma armichiz zultatužtakaz Jesucristo Jilirž kuzcama kama. Uj paaz pecñi kuz pinsitanacžquiz ana kuz tjaa, nii jaru kamzjapa.

14

CRIICHI ŽOÑINACAQUI PUNTA PUNTA PINSAQUICHA

¹ Tsjii llajlli kuzziz criichi žoñiqui želan, nižquiz zuma risiwaquiča, pero nižtan ana payznakkatñi puntunaca ch'aas waquiziča.

² Tsjii criichi žoñiqui tantiiča, čhjulumiz lulasača, nii. Yekja criichi žoñiqui tantiiča, chjizwi ana lulasača, nii.

³ Nii čhjulumi lujlñi žoñiqui nii yekja žoñžquiz ana iñarz waquiziča. Nižaza nii ana chjizwi lujlñi žoñiqui nii čhjulumi lujlñi žoñžquiz anaž uj tjojtunz waquiziča. Yoozqui nii čhjulumi lujlñiqui risiwchiča, nižquiz kuzziz cjen.

⁴ Jalla nižtiquiztan nii Yooz sirwiñi žoñžquiz ana uj tjojtunz waquiziča. Niiž persun Yooz Patrunaqui niž uj jwesnaquiča, ana zuma paachižlaj niiqui. Yoozquiz kuzziz cjenaqui ultimquiziqui walikaz cjesača. Yooz Patrunaqui nii žoñžquiz wali cjiskatz atča niž aztanaqui.

⁵ Tsjii puntužtan chižinuča. Tsjii criichi žoñiqui “Tsji tjuñinacaqui chawc tjuñinacača” cjiča. Yekja criichi žoñizti cjiča, “Tsji parijuča tjuñinacaqui”. Zapa mayni persun kuzquiz zumpacha tantiižcuqui, jalla nii tantiita jaru kama.

⁶ Tsji criichi žoñiqui tsji chawc tjuñi wartaquiz niiqui, Yooz honora waytita cjisjapa wartiyaquiča. Tsji criichi žoñizti nii tjuñi ana wartčhaja, jalla niiqui Yooz honora waytita cjisjapa nižta ana wartča. Nižaza tsji čhjulumi lujlñi žoñiqui Yoozquin gracias cjižcu jalla nuž lulaquiz niiqui, Yooz honora waytita cjisjapa lulaquiča. Nižaza yekja criichi žoñiqui ana chjizwi lulaquiz niiqui, Yooz honora waytita cjisjapa ana lujlča. Nižaza ana lujlchiž cjen niiqui Yoozquin gracias cjican chiiz waquiziča.

⁷ Anaž žoñinacaqui inakaz kamča, nižaza anaž inakaz ticža.

⁸ Učhumqui tii muntuquiz kamcan Yooz Jiliržtajapapanž kamča. Nižaza ticzcan Yooz Jiliržtajapapanž ticža. Jalla nižtiquiztan žejtcanami ticzcanami Yooz Jiliržtajapapančhumča.

⁹ Jalla nijapa Jesucristuqui ticziča, nižaza jacatatchiča, žejtñi žoňztami, ticzi žoňztami tjapa žoňinacžta Jiliri cjisjapa.

¹⁰ Jalla nižtiquiztan ěkjažtiquiztan am criichi jilžquiz uj tjojtunjo? Nižaza ěkjažtiquiztan am jilž quintra iñarjo? Tjapa učhumqui Yooz yujcquiz prisintistanča, niž pjalžtaž cjisjapa.

¹¹ Cjijrta Yooz takuqui tuž cjiča:

“Yoozqui ultimupanž cjiča, ‘Wejt yujcquiz zapa mayni žoňiqui quillnaquiča. Nižaza zapa mayniqui wejtquin rispitaquiča; nižaza wejt honora chiyaquiča’”.

¹² Jalla nižtiquiztan tjapa učhumqui Yoozqui quinta tjaastanča.

UJQUIZ ANA TJOJTSKATA

¹³ Jalla nižtiquiztan učhumqui porapat ana iya ujnaca tjojtনারas waquiziča. Pero tjapa učhumqui tuž tantiiz waquiziča, yekja jilžquiz anapanž ujquiz tjojtskatz munzqui.

¹⁴ Čjul cusasami tsjii criichi žoňžquiz ana ujchiz cjiskatasaćha. Jalla nii razuna zizuča, Jesucristo Jiliržquiz kuzziz cjen. Jalla niic nužupanča. Jakziltat “Tii cusasaqui ujchiz cjiskatčha” cjican tantiyačhaja, jalla nižquiz nii cusasaqui ujchiz cjiskatasaćha.

¹⁵ Ančuca lujltiquiztan tsjii criichi žoňž kuz payznakaquič niiqui, nii čheriqui anaž lujlz waquiziča. Jalla nii čheri tira lulaquič niiqui, amqui nii payznakskatñi žoňžtan ana zuma munaziča. Yekja criichi žoňžquiz ana ujquiz tjojtskata, castica cjejajo. Jesucristuqui nižtajapa zakaz ticziča.

¹⁶ Tsjii žoňžtaqui čjulu lujlzmi walikaz cjesaćha. Pero nii lujltaž cjen parti žoňinacaqui, “Ana zuma kamañchizza nii criichi žoňiqui” cječhaj niiqui, nekztan ana lujlz waquiziča.

¹⁷ Yooz mantuquiz kamcan, čherimi liczmi ana importiča. Pero Espiritu Santuž cjen ana ujchiz cjee; nižaza Yooztan ančucatan walikaz cjee; nižaza cuntintu kuzziz cjee. Jalla nužuča chekan zuma kamañaqui.

¹⁸ Jakziltat jalla nuž kamcan Cristužquiz sirwačhaja, jalla niž cjen Yoozqui cuntintuž cjequiča. Nižaza parti žoňinacaqui “Nii žoňiqui walikaz kamča” cjican chiyaquiča.

¹⁹ Učhumnacžtan parti žoňinacžtan zumapanž kamzjapa kuz tjaa. Nižaza parti criichinacžquiz juc'ant zuma kamañchiz cjejajo, jalla nii kamzquiz kuz tjaa.

²⁰ Ančucaž čjulumi lujltiquiztan anača yekja criichi žoňžquiz Yooz zuma kamañquiztan jaytiskatzqui. Ana čjul čherimi ujchiz cjiskatasaćha. Pero nuž čjulumi lujlžcu yekja criichi žoňžquiz ujquiz tjojtskataquič niiqui, jalla nižtiquiztan anaž čjulumi lujlz waquiziča.

²¹ Tsjii criichi žoňiqui ančucaž čjizwi lujltiquiztan, nižaza vinu lictiquiztan, nižaza čjulumi paatiquiztan ujquiz tjojtskatasadž niiqui, jalla nižtanaca paazqui ana waquiziča.

²² Jesucristužquiz tjapa kuzziz cjen čjulu kamañchizlaja, jalla nii kamañ jaru Yooz yujcquiz kamz waquiziča. Yoozquizkaz quinta tjaastanča. Jalla nuž zuma kamcan persun kuzquiz uj ana sint'aquiča. Persun kuzquiz ana zinta uj sint'ican zuma kamaquič niiqui cuntintuž cjequiča.

²³ Pero jakziltat paysnakñi kuztan lujlčhaja, jalla nii paysnakžcu lujltiquiztan persun kuzquiz uj sint'aquiča, “Ujžcaa nii lujlzqui” cjican. Yoozquin ana tjapa kuztanžlaj niiqui, čjulumi ujž cjesaćha. Yoozquin kuzzizpan cjee.

15

PORAPAT YANAPARASAQUICHA

¹ Yekjap uĉhumqui tjapa kuztanpan Yoozquinĉha. Yekjapanacaqui Yooztan kamcan llajlla kuzzizza. Uĉhum kuzquiz pecta jarukaz anaž kamz waquiziĉha. Nii llajlla kuzziz criichi žoñinacaž pinsitanaca panž cjuñzna, zuma kami yanapajo.

² Zapa mayni criichi žoñiqui parti criichi žoñinacžtajapa kamz waquiziĉha, ninaca tsjan zuma kamañchiz cjisjapa.

³ Jesucristuqui nižta kamchiĉha, anaĉha persun kuz wali cjisjapa kamchiqui. Cjijrta Yooz takuqui Jesucristuž puntuquiztan tuž cjiĉha: “Yooz quintra iñarñi žoñinacaqui wejt quintra iñarchiĉha”.

⁴ Yooz takuqui uĉhumnacalta cjijrtkalĉha, uĉhumnacaquiz tjaajinzjapa. Jalla tuž uĉhumnacaquiz tjaajinĉha, zuma tjurt'iñi kuztan, pasinsis kuztan, nižaza p'ekinchayta kuztan, Yoozquin arajpachquin ojkz tjewzjapa.

⁵ Yoozqui uĉhumnacžtan pasinsis kuzzizza; nižaza uĉhumnacaquiz p'ekinchayĉha. Nii Yoozpacha uĉhumnacaquiz yanapt'ila, tsjii kuzziz cjeyajo, nižaza zuma kamajo Jesucristuž munañpacama.

⁶ Jalla nuž tsjii kuzziz kamcan, uĉhumqui tsjii kuzziz Yooz honora waytaquiĉha. Yoozqui uĉhum Jesucristo Jilirž Ejpĉha. Jalla niž honora waytaquiĉha.

CRISTUZ PUNTU

⁷ Jalla nižtiquiztan tsjiimi tsjiimi zumaž risiwžcu munazaquiĉha, jaknužt Cristuqui uĉhumnacatan zuma munaziĉhaja, jalla nuž, Yooz honora waytita cjisjapa.

⁸ Anĉhucaquiz cjiwĉha. Jesucristuqui judío žoñinaca liwrii nižaza yanapñi tjonchiĉha. Nuž tjontiquiztan Yooz niž taku ligituma cumpliñipan, jalla nii tjeziĉha. Yoozqui tuquitanpacha judío žoñinacž atchi ejpnacžquiz taku tjaachiĉha. Jalla nii taku cumplichiĉha, Jesucristuž tjonchiž cjen.

⁹ Nižaza Jesucristuqui tjonchiĉha, yekja wajtchiz žoñinacžquiz Yooz honora waytiskatzjapa. Yooz anĉha okzñi kuzziz cjen niž honora waytitaĉha. Jalla nužupan cjijrta Yooz takuqui chiiĉha, tuž cjican:

“Jalla nižtiquiztan wejrqui yekja nacionchiz žoñinacžtan žejlcan, am honora waytaĉha. Nižaza am honora waytican, itsnaĉha”.

¹⁰ Yooz tawk liwruquiz tuž cjijrtazakazza:

“Yekja nacionchiz žoñinaca, Yooz parti žoñinacžtan chica cuntintuž cjee”.

¹¹ Yooz tawk liwruquiz tuž cjijrtazakazza:

“Yekja nacionchiz žoñinaca, tjapa anĉhucqui Yooz Jilirž honora wayta. Tjapa žoñinacaqui Yooz zuma paatanacquiztan nižquin honora tjaala”.

¹² Nižaza Yooz tawk liwruquiz Isaiasqui tuž cjijrchiĉha:

“Isaiž majchmaatinacquiztan tsjiiqui tjonaquiĉha. Jalla nii tjonžcu yekja nacionchiz žoñinacaž mantaquiĉha. Nižaza niž cjen ninacaqui liwriiñiž tjewznaquiĉha”.

¹³ Yoozza liwriiñi tjewzkatñiqui. Nii Yoozqui anĉhuca kuz anĉha cuntintu cjiskatla. Nižaza Jesucristužquiz kuzziz cjen walikaz cjiskatla. Nekztan anĉhucqui Yooz Espíritu Santuž aztan zumpacha liwriiñiž anĉha tjewznasaĉha.

¹⁴ Wejt jilanaca, cullaquinaca, anĉhucqui anĉha zuma kamañchizza, nižaza Yooz puntu zuma zizza, nižaza tsjiižquizimi tsjiižquizimi Yooz puntu zuma intintiskatĉha. Jalla nužupanĉha anĉhuca kuzqui. Jalla niiqui zumpachal zizuĉha.

15 Jalla nuž cjenami ana jiwjatžcu tsjii kjaž puntunaca cjižcuča, ančucaquiz cjuñkatzjapa. Yoozqui wejtquiz favora paacan apóstol puestuquiz utchiča, tii puestuquiz Jesucristo sirwizjapa. Jalla nižtiquiztan ančucaquiz cjižcuča.

16 Jesucristo sirwican, yekja wajtchiz žoñinaczquiz liwriiñi Yooz taku paljayuča. Jalla nuž Yooztajapa langznuča, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecuča. Nižaza Espíritu Santuž ninaczquiz zuma kamañchiz cjiskatchiž cjen, Yoozqui ninaczquiztan cuntintuž cjequiča.

17 Jesucristo sirwican wejt Yooztajapa langžtiquiztan cuntintuča wejrqui, tama žoñinaca nižquin kuz tjaachiž cjen.

18 Jesucristuž puntuquiztankaz wejrqui chiiz pecuča. Jesucristuqui wejtquiz wacchi zuma obranaca paakatchiča, yekja wajtchiz žoñinaca nižquin kuz tjaakatzjapa. Jesucristuž cjen, wejrqui milajru paatanacami Yooz puntu chiitanacami nii yekja wajtchiz žoñinaca Yooz kuzcama cazkatchinča.

19 Espíritu Santuž aztan ninaca cazkatchinča wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican, wejrqui tjapa kjutñi ojklaychinča, Jerusalenquiztan Ilírico yokaran.

20 Wejrqui kuzquiz tantiichinča, jakziquin Yooz puntu parlitažlaja, jalla nicju ana ojcz pecchinča. Pero jakziquin Jesucristuž puntu ana parlitažlaja, jalla nicjuñ liwriiñi Jesucristuž puntuquiztan parlican ojklayača, yekja žoñž iclizanaca ana mitiscu.

21 Cjižta Yooz takuqui tuž cjiča:

“Tuquiqui Yooz puntu ana nonziča. Jaziqui nii žoñinacaqui Yooz puntu nonžcu catokaquiča. Nižaza ninacaqui Yooz puntu intintazaquiča”.

PABLUQUI ROMA CJITA WAJTQUIN OJKZ PECCHA

22 Jalla nuž ojklaycan wejrqui ančucaquiz ana tjonzní atchinča. Walja tjonz pecayuča, pero anal atchinča.

23 Ažk watanacquiztanpacha wejrqui ančucatan zalz pecayuča. Anziqui tii yokaran ojklayzqui žerzinča.

24 Jalla nižtiquiztan ančucaquin ojcz cjisnuča; España ojkan tjonznača. Tsjii kjaž maj ančucatan cuntintu kaman, ančucqui wejr yanapasača, wila jiczquiz ojczjapa España irantajo.

25 Pero anzpacha wejrqui Jerusalén watja okača, ofrendanaca chjichača nicju žejlñi criichinaca yanapzjapa.

26 Macedonia wajtchiz žoñinacami Acaya wajtchiz žoñinacami kazziča ofrendanaca utzjapa, Jerusalén pori criichinaczquiz yanapzjapa.

27 Jalla nuž ofrendanaca tjaaz puntuquiztan ninacapachača “Waliča niiqui” cjichiqui. Nižaza ninacaqui judío žoñinaczquiz kajažtakazza. Judío žoñinacaqui ninaczquiz Yooz zuma tjaajintanaca tojunchiča, ninaca liwriita cjisjapa. Jalla nižtiquiztan nii yekja wajtchiz žoñinacaqui judío wajtchiz žoñinaczquiz ninacz cusasanaca tojunz waquiziča.

28 Primiraqui tii ojcz cumplistanča ofrendanaca intirjizjapa. Jalla nuž ojkažu ančucaquiz tjonznača, España ojkan.

29 Nekztan liwriiñi Jesucristuž puntuquiztan zumpacha ančucatan parliz pecuča. Jalla nekztanaqui Jesucristuž cjen wejtquizimi ančucaquizimi wali cjequiča. Nužupanž cjequiča.

30 Jilanaca, cullaquinaca, ančucaquiz rocuča učhum Jesucristo Jiliriž cjen, nižaza munaziñi kuz cjiskatñi Espíritu Santuž cjen, oracionžtan yanapalla. Wejrqui ancha Yoozquiztan mayuča,

³¹ Judea wajtchiz quintru žoñinacžquiztan anapan tanta cjisjapa. Nižaza oracionžtan yanapalla, tii weriž chjitzta ofrendanaca wali risiwta cjisjapa. Pecučha, judío criichi žoñinacaqui tii ofrendanaca zuma risiwčhaja, nii.

³² Jalla nuž zuma wataquiž niiqui, ančhucaquin tjonžcača Yooz munan. Wejr cuntintu irantižquizjapa, mayižinaquiča. Nižaza ančhucatan tjonžcu porapat cuntintu kuzziz yanaparasjapa mayižinaquiča. Jalla nijapa oracionžtan yanapalla.

³³ Yoozqui ančhuc walikaj cjiskatla. Jalla nužoj cjila. Amén.

16

PABLUZ TSAANTANACA

¹ Tsjaa criichi cullaquiqui žejlča, Febe cjiti, jalla naa cullaquiqui ancha zumča cjiwča. Naaqui Cencrea iclizquiz Yooztajapa sirwiča.

² Yooz Jiliriž cjen naa cullaqui zuma risiwaquiča. Jalla nuž waquiziča Jesucristužquiz kuzziz jilanacaqui. Jalla naa cullaquiqui yanapaquiča čhjulu pecanami. Naaqui wacchi criichi žoñinacžquiz yanapchinča, nižaza wejtquizimi.

³ Priscilaquizimi Aquilžquizimi tsaanžinalla. Ninacaqui Jesucristužquin sirwiči mazinacača.

⁴ Wejr ticznawc cjen ninacaqui wejr liwriiskatchičha. Jalla nuž liwriiskatcan ninacaqui joz ticzizakazza. Jalla nižtiquiztan ninacaž cjen Yoozquin gracias cjan chiyučha. Nižaza tjapa nacjuŋta jilanacaqui ninacaž cjen Yoozquin gracias cjiča.

⁵ Nižaza Priscila Aquilž kjuyquiz ajczni jilanacžquiz tsaanžinaquiča. Nižaza weriž pecta Epeneto tsaanžinaquiča. Acaya wajtchiz žoñinacžquiztan primirpacha niiqui Cristužquin kuz tjaachiča.

⁶ Nižaza Mariaquiz tsaanžinaquiča. Naaqui ančhucatan žejlcan ancha langzinča.

⁷ Nižaza wejt wajtchiz žoñinacžquiz, Andrónico, nižaza Junias, tsaanžinaquiča. Ninacaqui wejttan chica carsilquiz žejlchi compañerunacatača. Apostolunacazakaz ninaca rispitcha. Weriž ima Jesucristužquiz kuz tjaan, ninacaqui Jesucristužquiz kuz tjaachiča.

⁸ Nižaza Ampliasquiz tsaanžinaquiča. Jalla niičha weriž pecta maziqiu. Niiqui Jesucristo Jiliržquin kuz tjaachizakazza.

⁹ Nižaza Urbanžquiz tsaanžinaquiča. Niiqui Jesucristužquiz sirwiči maziča. Nižaza weriž pecta Estaquizquiz tsaanžinaquiča.

¹⁰ Nižaza Apelesquiz tsaanžinaquiča. Jalla niiqui Jesucristužquiz kuz tjaažcu, Yooz kamaña pankaz kamča. Nižaza Aristóbuluž kjuychiz žoñinacžquiz tsaanžinaquiča.

¹¹ Wejt wajtchiz žoñžquiz, Herodión, tsaanžinaquiča. Nižaza Narcisož kjuychiz Yoozquin criichi žoñinacžquiz tsaanžinaquiča.

¹² Nižaza Trifenaquiz, nižaza Trifosaquiz tsaanžinaquiča. Ninacaqui Yooz Jiliržtajapa sirwiča. Nižaza učhum pecta Persidaquiz tsaanžinaquiča. Naaqui Jesucristo Jiliržtajapa juc'anti langzinča.

¹³ Nižaza Rufžquiz tsaanžinaquiča. Niiqui Jesucristužquiz tjapa kuz tjaažcu, parti hermanonacžquiz respitta cjissiča. Nižaza niž maaquiz tsaanžinaquiča. Naaqui wejt maa cuntitača.

¹⁴ Nižaza tsaanžinaquiča tinacžquiz, Asincritužquiz, Flegontižquiz, Hermasquiz, Patrobasquiz, Hermesquiz, nižaza ninacžtan chica kamni jilanacžquiz.

¹⁵ Nižaza tsaanžinaquiča Filologužquiz, nižaza Juliaquiz, nižaza Nereožquiz, nižaza niž cullacaquiz, nižaza Olimpasquiz, nižaza tjapa ninacžtan kamñi criichi žoñinacžquiz.

¹⁶ Nižaza porapat zuma tsaanassaquiča, tjapa kuztan. Nižaza tjapa Jesucristužquiz kuz tjaañi žoñinacaqui ančhucaquiz tsaanz apayžquiča.

¹⁷ Jilanaca, cullaquinaca, ančhucaquiz rocuča, zumapanž ančhucqui cwitazaquiča, nii t'akt'aksñi žoñinacžquiztan. Nižaza zumpacha cwitazaquiča tsjii kjutñi tjajjiñi žoñinacžquiztan. Nii žoñinacaqui, jaknužt ančhucaquiz Yooz puntu tjajinta cječhaja, jalla nii tjajinta quintra tjajinča. Ninacžquiztan ančhucqui zaraka.

¹⁸ Ninacaqui Jesucristužtajapa ultimu ana sirwiča. Antiz ninacaqui persun kuzcamaž sirwiča. Ninacaqui humilde criichinacžquiz incallča, zuma chiican, žoñinacž kuz wali cjisjapa.

¹⁹ Tjapa žoñinacaqui ančuca puntu zizza, jaknužt ančhucqui Yoozquin cazzaja, jalla nii. Jalla nižtiquiztan wejrqui chipznuča. Nižaza zumanaca paazjapa zizñi zizñi cjee. Ana zumanaca paachucaž cjen, ana mitisa.

²⁰ Jalla nuž zuma kaman, Yoozqui ančhucaltajapa Satanás diablužquiz tječzcu, atipaquiča. Yoozza ančhuc walikaz cjiskatñi. Nižaza učum Jesucristo Jiliriqui ančhucaquiz yanapt'ila. Amén.

²¹ Timoteuqui ančhucaquin tsaanz apayžquiča. Niiqui wejt compañeruča, wejr Yooztajapa langznan. Nižaza wejt wajtchiz žoñinaca, Lucio, Jasón, Sosípater, jalla ninacaqui ančhucaquin tsaanz zakaz apayžquiča.

²² Nižaza wejrqui, Tercio cjita žoñtča ančhucaquin tsaanz zakaz apayžcuča, Jesucristo Jilirž tjuuquiz. Wejrqui Pabluž chiitiquiztan tii cartal cijruča.

²³ Nižaza Gayuqui ančhucaquin tsaanz apayžquiča. Niiž kjuyquiz alujassinča. Nižaza niiqui čjul criichi žoñimi kjawzñipanikazza, niiž kjuyquiz alujazjapa. Nižaza Erastuqui ančhucaquin tsaanz apayžquiča. Jalla niiča wajt paaz tanzñi tesoreruqui. Nižaza učum jila Cuarto cjitaqui ančhucaquin zakaz tsaanz apayžquiča.

²⁴ Učum Jesucristo Jiliriqui tjapa ančhucaquiz zumaj yanapt'ila. Jalla nužoj cjila. Amén.

ZERZ TAKUNACA

²⁵ Ima žerzcan Yooz honora waytuča. Yoozqui ančhuc tjurt'iñi kuzziz cjisnasacha. Nii liwriiñi Yooz puntumi, Jesucristuž puntumi parluča. Jalla nii parlita puntunacaqui Yoozqui ančhucaquiz zizkatchiča. Tuquitan nii puntunaca ana ziztača.

²⁶ Tii timpuquizekaz Yoozqui nii puntunaca zizkatchiča. Nižaza profetanacaqui nii puntunaca cjiřchiča Yooz tawk liwruquiz. Tii timpuquiz wiñay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjajajo, nižaza casajo.

²⁷ Yoozkazza zizñi zizñiqui. Jesucristuž cjen Yooz honoraqui wiñaya wayt-taj cjila. Jalla nužoj cjila. Amén.

PRIMERA CARTA DEL APOSTOL SAN PABLO A LOS CORINTIOS

¹ Wejrqui Pablutcha. Jesucristuž cuchanžquita apostoltcha. Jalla nuž Yoozqui munchiicha, wejr apóstol puestuquiz uchi. Wejrqui Sóstenes cjita jilžtan tii cartal cijržcuča ančhuc criichi žoñinacžquin.

² Ančhucqui Corinto wajtchiz criichi jilanacčhucča. Werar Yooz iclizziz žoñinacčhucča. Jesucristuž cjen Yoozqui ančhuc t'akziča niž zuma kamañchiz cjisjapa. Jalla niijapaqui Yoozqui ančhuc kjawziča. Nižaza Yoozqui tjapa criichi žoñinaca kjawziča niž zuma kamañchiz cjisjapa. Ančhucatan parti criichi žoñinacžtan Jesucristo Jiliržquin sirwiča. Jesucristo Jilirž man-tuquizza ninacami, nižaza učhummi.

³ Učhum Yooz Ejpžtan Jesucristo Jiliržtan, ančhucquiz zumaj yanapla. Nižaza ančhucžtajapa walikaj kamkatla.

YOOZQUI ŽOÑINACŽQUIZ YANAPCHICHA

⁴ Jesucristuž cjen Yoozqui ančhucquiz ancha okziča. Ančhucž okžtaž cjen tirapan Yoozquin gracias cjican chiyučha.

⁵ Jesucristuž cjen Yoozqui ančhucquiz zumpacha yanapchiča, Yooz puntu zuma zizajo, nižaza Yooz taku zuma paljayajo.

⁶ Wejrnačž Jesucristuž puntuquiztan paljaytan ančhucqui persun kuzquiz zumpacha catokchinčhucča.

⁷ Jalla nižtiquiztan ančhucqui tjapaman Yooziž tjaata kamañchizza. Jalla nuž kamcan, Jesucristo Jilirž tjonz tjuñi tjewža ančhucqui.

⁸ Jesucristo Jiliripacha ančhucquiz tjurt'iñi kuzziz cjiskataquiča niž tjonz tjuñicama. Tjurt'iñi kuzziz tjewznan, Jesucristo Jilirž tjonz tjuñiquiziqui ančhucquintra anaž jecmi kjaž cjesača. Yoozqui ančhucquintra anaž jecmi kjaž cjesača. Yoozqui ančhucquintra anaž jecmi kjaž cjesača. Yoozqui ančhucquintra anaž jecmi kjaž cjesača. Yoozqui ančhucquintra anaž jecmi kjaž cjesača.

⁹ Nižaza ančhuc kjawziča niž Majch Jesucristo Jiliržtan tsjii kuzziz cjeyajo. Nižaza Yoozza niž kjawžta taku cumpliñiqui. Niž tawkcama ančhucquiz cwitaquiča Jesucristuž tjonz tjuñicama.

T'AKA T'AKA CH'AASSICHA

¹⁰ Jilanaca cullaquinaca, učhum Jesucristo Jilirž tjuuquiz ančhucquiz rocuča, porapat tsjii kuzziz cjeyajo, nižaza ana pjali cjeyajo. Tsjii kuzziz cjen tsjii pinsamintuchiz cjis waquiziča.

¹¹ Wejt jilanaca cullaquinaca, tsjii kjaž žoñinacaqui Cloé famill žoñinacžquiztan wejtquiz quint'ichiča, ančhucpora ch'aasiñchucquiča, jalla nii.

¹² Ch'aascan, t'aka t'aka chiichiiñchucquiča, tuž cjican: “Wejrtča Pabluz t'akquiztanqui”. Tsjiizti cjiñizakazquiča: “Wejrtča Apolos t'akquiztanqui”. Tsjiizti cjiñizakazquiča: “Wejrtča Pedruž t'akquiztanqui”. Yekjapanacazti cjiñizakazquiča: “Wejrtča Cristuž t'akquiztanqui”. Jalla nužupan ančhucqui ch'aasiñchucquiča.

¹³ Nonžna ančhucqui. Cristuqui anača t'aka t'aka. Ančhuc laycu wejrqui anača cruzquiz ch'awctaqi. Nižaza wejt tjuuquiz anača bautistaqui, wejt t'akquiz cjisjapa.

¹⁴ Crispo, nižaza Gayo, jalla ninaca bautissinča. Walizat ana iya bautis-tučhaja. Jalla nižtiquiztan Yoozquin gracias cjican chiyučha.

¹⁵ Nižaza wejt tjuu ana waytasača, “Pabluqui wejr bautissiča”, cji-canaqui.

¹⁶ Aaa, tsjiilla wejr tjatzinča; Estéfnas familia zakaz bautissinča. Anal iya jec bautistac cjuñuča.

¹⁷ Cristuqui anača wejr bautisajo mantižquichi. Antis liwriiñi Yooz taku paljayajo mantižquichiča. Jalla nuž Yooz taku paljaycan wejrqui anača chawjc takunaca chiichintqui. Chawjc takunaca chiitasaž niiqui, wejtquiz kuz tjaatasacha. Jalla nižtiquiztan ančhucqui anaž učhum laycu conta Jesucristužquiz tjapa kuztan cjitasača. Nižaza Jesucristužquin tjapa kuz ana criitasača.

JESUCRISTO CRUZQUIZ CH'AWCTA PUNTU

¹⁸ Jesucristuqui cruzquiz ch'awctatača. Jalla nii puntu paljaytiquiztan infiernuquin ojkní žoñinacaqui zumzu takunacažtakaz nayča. Liwriita, arajpachquin ojkní žoñinacazti Yooz takupanž nayča. Nii Yooz taku paljaytaž cjen, Yoozqui niž azi tjeeža.

¹⁹ Cjijrta Yooz takuqui tuž cijča:

“Yoozqui tjeeznaquiča, ana criichi žoñinacaž ziztaqui inakazza, jalla nii. Nižaza Yoozqui tjeeznaquiča, ana criichi žoñinacaž intintitaqui tsjii kjutñiča, jalla nii”.

²⁰ Nonžna. Chawjc taku chiiñi žoñinacami, judío cuzturumpinac puntu tjajjiñi žoñinacami, nižaza partir puntu parliñi žoñinacami, jalla ninacaqui inakazza; Yooz puntuquiztan ana zizñinacača. Jalla nuž tjeeziča Yoozqui; ninacž takunacami pinsitanacami zumzukazza.

²¹ Tii muntuquiz žejlñi žoñinacaqui persun kuzquiz pinsican anapan Yooz pajasacha. Jalla nuž Yoozqui munchiča. ¿Jaknužt žoñinacaqui Yooz pajasajo? Jalla tižtača. Wejrnacqui Jesucristuž puntuquiztan paljayuča. Nii paljayta taku catokžcu žoñinacaqui werar Yooz pajasacha. Nižaza liwriita cjesacha. Ana criichi žoñinacaqui nii liwriiñi taku zumzu takužtakaz nayča. Jalla nuž ninacaž zumzu taku nayanami, Yoozqui muncha, paljayta Yooz taku criičcu, žoñinacaqui liwriita cjequiča, nii.

²² Judío wajtchiz ana criichi žoñinacaqui milajrunacakaz pecča. Griego wajtchiz ana criichi žoñinacazti ninacaž pinsita jarukaz liwriita cjis pecča.

²³ Ana walipanča nižta kuzziz žoñinacaqui. Jesucristuqui ticziča, žoñinaca ujquiztan liwriizjapa. Jalla nii Jesucristuž puntuquiztan wejrnacqui paljayuča, žoñinaca liwriita cjejajo. Pero wejrnacaž Jesucristuž ticžta puntu paljaytiquiztan, Judío wajtchiz žoñinacaqui ana criiz pecča, “¿Kjažt niiča liwriiñi cjesajo?” cjicanaqui. Parti žoñinacazti wejrnacaž paljayta takunaca nonžcu zumzu takužtakaz nayča. Pero lijitum liwriiñi takupanča.

²⁴ Jakzilta Judío wajtchiz žoñinacami yekja wajtchiz žoñinacami Yooziž kjawžta nonžaja, jalla ninacaqui Jesucristuž puntu takunaca zumaž nayča. Nižaza Yooz taku nayča, walja zizñiž taku, nii. Nižaza Jesucristuž cjen liwriiñi Yooz aziž pajcha nii Yooziž kjawžta nonžni žoñinacaqui.

²⁵ Ana criichi žoñinacazti Yooz taku zumzu takužtakaz nayča. Pero Yooz takuqui tsjan zumača tjapa zizñi žoñinacž tawkquiztanami. Nižaza Yoozqui žoñinaca ujquiztan liwriizjapa juc'ant azzizza čjul žoñinacžquiztanami. Cruzquiz ch'awctaž cjen Cristo ana azziztakaz nayča ana criichi žoñinacaqui. Pero cruzquiz ch'awctiquiztan Cristuqui žoñinaca ujquiztan liwriyasača. Ana criichi žoñinacaqui persun aztan anaž liwriyasača. Cristupankazza liwriiñi azzizza.

YOOZIZ KJAWŽTA ŽOÑINACA

²⁶ Jilanaca, cullaquinaca, ančhucž cjuñžna. Yoozqui ančhuc kjawziča. Jalla nii kjawžta oraqui jila parti ančhucquiztan ana zizñi žoñinacatača tii

muntuquiz žejlñi žoñinacž yujcquiziqui. Nižaza ana mantiñi žoñinacatača. Nižaza zuma rispitta familianacquiztan anatača jila parti ančhucqui.

²⁷ Yoozqui ančhuc illziča ana zizñi žoñinaca cjenami. Nuž munča ana criichi zizñi žoñinaca azkatsjapa ultimquiziqui. Nižaza Yoozqui ančhuc illziča ana mantiñi žoñinaca cjenami. Nuž munča ana criichi mantiñi žoñinaca azkatsjapa.

²⁸ Nižaza Yoozqui ana rispitta nižaza iñarta žoñinaca illziča, liwriizjapa. Nii žoñinacž puntuquiztan tii muntuquiz ana criichi žoñinacaqui cjiñiča, “Ana čhjuljapa sirwiča”, cjican cjiñiča. Pero ultimquiziqui iñarta žoñinacaž liwriitiquiztan ana criichi rispitta žoñinacaqui inakaz cjiskattaž cjequiča.

²⁹ Jalla nuž Yoozqui žoñinaca illz munchiča, niž yujcquiz anaž jecmi mitarasi kuzziz cjejajo.

³⁰ Yoozqui Jesucristuž cjen ančhucaquiz tsjii ew kamañchiz cjiskatchiča. Nižaza Jesucristuqui učumnacaquiz Yooz zuma pinsitanaca tjeeziča. Jesucristuž cjen učumqui zuma cjissiča Yooz yujcquiziqui. Nižaza Jesucristuž cjen učumqui Yooz kuzcama kamča. Nižaza ultimquiziqui tjapa ana walnacquiztanami liwriitaž cjequiča učumqui. Jalla nužuča Yooz zuma pinsitanacaqui učumnacaltajapaqui.

³¹ Jalla nižtiquiztan cijirta Yooz takuqui tuž cjiča: “Jakziltat honora waytiz pecħaja, persunpachquiziqui honora anaj waytila, antis mañtiñi Yoozquizkaz honoraj waytila”.

2

YOOZ TAKU PALJAYZ PUNTU

¹ Jilanaca, cullaquinaca, wejrqui ančhucaquiz liwriiñi Yooz taku paljayi tjonchinča. Jalla nuž paljaycan ana chawjc tawkžtan paljaychinča, tsjii walja zizñi žoñižtakazzi.

² Ančhucatan želan, Jesucristuž puntuquiztan nižaza Jesucristuž ticžta puntuquiztan jalla niipanikazza weriž paljajtaqui. Jalla nuž wejrqui persun kuzquiz tantičinča, ima ančhucaquiz tjoncan.

³ Ančhucatan žejlcan, wejrqui humilde kuzziztača, nižaza Yooz eksñi kuzziztača.

⁴ Ančhucaquiz Yooz taku paljaycan ana chawjc tawkžtan atips pequiñtača, tsjii walja zizñi žoñižtakaz. Pero paljayan, Espiritu Santuča niž aztan ančhuca kuznaca atipchiqui, Jesucristužquin criyajo.

⁵ Yooz aziž tjeežtiquiztan ančhucaquiz criiskatz pecatuča. Ana chawjc taku paljaytiquiztan ančhucaquiz criiskatz pecatuča.

YOOZ PUNTUQUIZTAN INTINTAZ PUNTU

⁶ Pero tsjii tsjii Yooz puntunacaqui ch'amača intintazqui. Jalla nii puntunacazakaz tjaajinz pecuča. Pero walja Yooz kuzcama kamñi criichi žoñinacakaz nii puntunaca intintazasača. Jalla nii Yooz puntunacaqui anaž tii muntuquiz kamñi žoñinacž kuzquiz pinsitiquiztan tjonča. Nižaza anaž tii muntuquiz mantiñi jilirnacžquiztan tjonča. Jalla ninacaqui kataquiča, ninacaž pinsitanacžtanpacha.

⁷ Ima tii muntu paacan Yoozqui persun kuzquiz pinsichiča, jaknužt žoñinaca liwriyačhaja, jalla nii. Ažk watanaca Yoozqui nii liwriiñi puntu ana kjanapacha intintazkatchiča žoñinacžquiz. Jaziqui tii timpuquizkaz Yoozqui intintazkatča, učum nižtan wiñaya kamzjapa. Yoozpachača liwriiñi puntuquiztan tjaajinchiqui wejtquiziqui. Jalla nii tjaajinta kjanzt'uča.

⁸ Tii timpuquiz mantiñi zoñinacžquiztan anaž jecmi liwriiñi Yooz pinsita intintazziča. Intintaztasaz niiqui zuma honorchiz Jesucristo Jiliri anaž cruzquiz ch'awctasača ninacaqui.

⁹ Cjijrta Yooz takuqui tuž cjiča:

“Yoozqui zumanaca tjaczinchiča nižquin sirwiñi zoñinacžtajapa. Nii Yooz tjaczinta zumanacača anaž jecmi cherchi, nižaza anaž jecmi nonzi, nižaza anaž jecmi persun kuzquiz tantiyi atchiqui”.

¹⁰ Anzimi Yoozqui niž zumanaca Espiritu Santuž cjen učumnacaquiz intintazkatchiča. Espiritu Santuqui Yooz puntuquiztan zumpacha intintazza, tjapa Yooz puntumi. Jalla nižtiquiztan učumnacaquiz intintazkatasacha.

¹¹ Zoñinacaqui persun kuzquiz persun pinsitanacami zizza. Yekja zoñiqui ultimu ana zizza. Jalla nižta irata Yooz Espiritu Santuqui Yooz Ejpž pinsitanacami zizza. Ana čjul zoñimi Yooz pinsitanaca zizi atasacha,

¹² Yoozqui učum kuznacquiz niž persun Espiritu Santo luzkatchiča, niž persun pinsita intintazkatajo. Ana criichi zoñž kuzqui Yooz pinsitanaca anapan intintazkati atasacha. Jalla nižta kuz učumnacaltauqui ana žejlča.

¹³ Wejrnaqui Yooz puntu intintazcu, ančhucaquiz Yooz pinsitanaca tjajinčinča. Zoñiž tjajinta jaru nižaza zizni zoñž chawjc tawk jaru anal tjajnuča. Pero Yooz Espiritu Santuž tjajinta jaru, jalla niil tjajnuča. Jaziqui Yooz pinsitanaca tjajnuča Espiritu Santuž irpita criichinacžquin.

¹⁴ Jakzilta zoñit ana Yooz Espiritu Santuž irpitažlaj niiqui, Espiritu Santuž tjajintanaca anaž catokča. Zumzu tjajintanacažtakaz nayča. Jalla nižtiquiztan ana Espiritu Santuchiz zoñinacaqui anapanž Yooz tjajintanaca intintazasacha. Yooz Espiritu Santuž irpita zoñinacapankaz Yooz puntu tjajintanaca intintazasacha.

¹⁵ Espiritu Santuž irpita zoñinacaqui tjapa tjajintanaca tantiyasacha, Yoozquiztan tjonni taku cjicu, už zoñžquiztan tjonni taku cjicu, jalla nii. ¿Pero ana Espiritu Santuž irpita zoñinacaqui Espiritu Santuž irpita zoñž taku ana tantiyasacha, nižaza criichi zoñinacžquiz Yooz puntu ana tjajnasacha? ¿Kjažtiquiztan nižta cjesajo?

¹⁶ Yoozqui niž Espiritu Santuž cjen učumnacaquiz Cristuž pinsitanaca tjajža. Jaziqui zizza. Cjijrta Yooz takuqui, tuž cjiča: “Anaž jecmi persun kuzquiztan Yooz pinsitanaca zizasacha. Jaziqui anaž jecmi Yoozquiz tjajnasacha”.

3

ANA CRIICHI ZOÑINACAŽTAKAZ ANACHA KAMZQUI

¹ Jilanaca, cullaquinaca, wejrqui ančhucaquiz tjapa Yooz puntu imazil tjajzñi atuča. Ančhucqui imazi zuma intintazasacha. Cristužquiz criichi cjenami Yooz Espiritu Santuž tjajinta jaru ana zuma kamiñchucča. Persun kuzcama kamiñchucča, kolta ocjalanacažtakaz.

² Jalla nižtiquiztan wejrqui Cristuž puntuquiztan tsjii kjaž tjajintanacakaz ančhucaquiz tjajinčinča. Jaknužt tsjii wawaqui lichilicča, nižaza anaž čjeriqui luli atča, jalla nižta irataž ančhucqui. Imazi Yooz tawk čjeri intintazasacha. Imaziča Yooz tawk čjeri lujlžquinaqui ančhucqui.

³ ¿Kjažtiquiztan nižtajo? Ančhucča ana criichi zoñinacažtakazqui. Ančhucpora quintras pequiñchucča, nižaza ch'aas pequiñchucča, nižaza pjali cjicjiz pequiñchucča. Jalla nuž anawali kamcan iyaziča Yoozquin zuma sirwiñinacčhucqui. Nuž anawali kamcan, ana criichi zoñinacažtakazza.

4 Yekjapanacaqui ančhucaquiztan cjičha, “Wejrqui Pabluž t'akquiztančha”. Yekjapanacazti cjičha, “Wejrqui Apolos t'akquiztančha”. Jalla nuž chiichiican ana criichi žoñinacažtakaz kamčha.

YOOZ TAKU TJAAJIÑINACŽ PUNTU

5 ¿Ject Apolosjo? ¿Ject Pablojo? Wejrnacaž Yooz taku paljaychiž cjen ančhucqui Jesucristužquin criichinčhucčha. Wejrnacqui Yoozquin sirwiñkaztčha. Yoozqui zapa mayniž wejtnacaquiz sirwiz langz tjaachičha.

6 Jalla nižtiquiztan Yooz taku paljaychinčha, tsjii zkal čhjaqui kalltažokazzi. Wiruñaquí Apolosqui ančhucaquiz iya Yooz taku paljaychizakazza, jaknužt zkalquiz kjaztan jawiyaz, jalla nižta. Ultimquiziqui Yoozpachačha zuma kamañchiz ančhucaquiz cjiskatchiqui, tsjii zuma zkalažtakaz.

7 Jalla nižtiquiztan nii čhjaciñimi nii jawiiñimi anaž čhjulumi. Yoozpančha chekanaqui. Yoozqui žoñinacž kuzquiz langža, tsjii čhjacta žkalažtakaz zuma pakzjapa.

8 Čhjaciñimi jawiiñimi tsjiikazza ninacaqui. Yoozqui zapa mayñizquiz pacaquičha niž langztiquiztan jama.

9 Wejrnacqui Yooztajapa langžni mazinactčha. Ančhucqui Yooz langžta yok cuntiçhucčha. Nižaza ančhucqui Yooz kjuyta kjuya cuntiçhucčha.

YOOZTAJAPA LANGZ PUNTU

10 Yoozqui niž kuzcama wejr apóstol puestuquiz utchičha. Jalla nekztan Yooz taku paljaychinčha, žoñinaca Jesucristužquin criyajo. Wejrqui kjuya kjuyñi maestružtakaztčha. Yooz kjuy simintu langzinčha. Nekztan Yooziž tjaata langzquiztan jama yekjapaqui Yooz kjuya pirkichičha. Weriz kalltita kjuy simintuntuñ jakziltat pirkačhaja, zumpachaž pirkiz waquizičha.

11 Wejrqui Jesucristuž puntuquiztanpankaz tjaajinčinčha. Jalla nii tjaa-jintaqui Yooz kjuy simintužtakazza. Tsjemat simintuqui anačha Yooz kjuy-japaqui.

12 Nii Yooz kjuy simintuntuñ punta punta pirkitamiž cjesačha. Koržtan, paaztan, zuma maznacžtan, jalla ninacžtan pirkitaž cjesačha. Nižaza pirki-taž zakaz cjesačha tabližtan, cañžtan, pjitžtan jalla ninacžtan.

13 Pero zapa mayniž langžtaqui kjanapacha tjeežtaž cjequičha Yooz pjalz tjuñquiziqui. Yoozqui ujžtanžtakaz tankataquičha. Nii ujžtan zapa mayniž langžta yatizinskataquičha, zuma langžta, ana zuma langžta, jalla nii.

14 Jakziltiž langžtat ujžtan tankattiquiztan tjuračhaja, jalla niiqui zuma pactaž cjequičha.

15 Jakziltiž langžtat ujsnačhaja, jalla niiqui ana pactaž cjequičha. Pero nii žoñž wirakaz infiernuquiztan liwriita cjequičha, niž langžta pertissi cjenami.

CRICHI ŽOÑINACAQUI YOOZ TIMPLU CUNTACHA

16 Ančhucqui Yooz timplu cuntačha. Yooz Espiritu Santuqui ančhuca kuznacquiz kamčha. ¿Jalla nii ana ziz ančhucjo?

17 Yooz timpluqui Yooztajapančha. Ančhucpachačha Yooz timpluçhucqui. Jalla nižtiquiztan jakziltat ančhuc akačhaja, nii ančhuc akñi žoñiqui zakaz akta cjequičha; Yooziž castictaž cjequičha.

ANA CRICHI ŽOÑINACŽ ZIZTAQUI

18 Ančhucqui anaž jeczquizmi incallskata. Jakziltat ančhucaquiztan žoñinacž tjaajintanaca zuma zizñižlaja, jalla niiqui nii tjaajintanacžquiz

anaĉha kuz tjaazqui. Pero Yooz puntuquiztan tjaajintanac̄quizkaz kuz tjaaz waquiziĉha, nekztan lijitum zizñi žoñi cjequiĉha.

¹⁹ Žoñž kuzquiztan ziztaqui zumzu ziztažtakazza Yooz yujcquiziqui. Cjijrta Yooz takuqui tuž cjiĉha: “Jakzilta žoñit žoñiž pinsita jarukaz kamĉhaj niiqui, jalla nižta kamtiquiztan Yooziž tantaž cjequiĉha, casticta cjisjapa”.

²⁰ Nižaza cjijrta Yooz takuqui, tuž cjiĉha: “Tjapa ana criichi žoñinac̄ pinsitanaca inakazza. Jalla nii zizza Yooz Jiliriĉha”.

²¹ Jaziqui anaĉha žoñž kuzquiztan tjaajintaqui kuzquiz sint'izqui, “Jalla nii žoñiqui zumaž tjaajinĉha”, cjicanaqui. Yoozqui tjapa anĉucaquiz tjapa zumanaca tjaaĉha.

²² Tjappachaĉha anĉucaltaqui, Pablumi, Apolosmi, Pedrumi, tii muntuquiz žejlñimi, žetimi, ticzmi, tii anzta žejlñimi, tii jazta žejlñimi, tjappacha anĉucaltaĉha, Yoozquin sirwiz yanapzjapa.

²³ Nižaza anĉucĉha Cristužtajapaqui. Nižaza Cristuĉha Yooz Ejpžtajapaqui.

4

YOOZ SIRWIZ PUNTU

¹ Wejrnacqui Yooz sirwiñi žoñinacakaztĉha. Wejrnac̄ Yooz sirwan, Yoozqui wejtnacaquiz niž tuquita chjozaka pinsitanaca tjaajinĉiĉha, parti žoñinac̄quiz tjaajnajo. Jalla nuž anĉucqui wejtnaca puntuquiztan pinsiz waquiziĉha.

² Jakziltižquiz Yoozqui tjaajinĉhaja, jalla nii tjaajintacama parti žoñinac̄quiz tjaajinstanĉha nii žoñiqui. Jalla nužupan waquiziĉha.

³ Weriž tjaajintaqui yatisinžtaž cjequiĉha. Pero anĉucqui weriž tjaajinta yatisinžnaquiž niiqui, ĉhjul žoñimi weriž tjaajinta yatisinžnaquiž niiqui, wejtquiz anaž importiĉha. Werjpachami ultimu ana yatisinžnasacĉha. Yoozkazza ultimu yatisinſkatñiqui.

⁴ Wejrqui persun kuzquiz ana ĉhjul uj wachuĉhaj niimi, Yooz yujcquiziqui cunamižlani wejr ujchiztni. Ultimquiziqui Yooz Jiliriĉha wejr yatisinſkataquiĉha.

⁵ Jalla nižtiquiztan anĉucqui Yooztakaz anaž yekjapanac̄quiz tantiiz waquiziĉha, ima pjalz tjuñi tjonanaqui, nižaza ima Jesucristo Jiliriž tjonanaqui. Ultimquiziqui Jesucristo Jiliriĉha chjojta anawalinaca kjanapacha tjeeznaquiĉha. Nižaza tjapa žoñinac̄ kuzquiz pinsitanaca tjeeznaquiĉha, zumpacha pjalzjapa. Jakziltami zuma lijituma ulnaĉhaja, jalla niiqui honorchiz cjequiĉha; Yooziž tjaata honoržtan.

MITARAZI KUZIZ ŽOÑINACA

⁶ Jilanaca, cullaquinaca, Apolužtan wejttan jalla nii wejtnaca puntuquiztan chiyuĉha, anĉucaquiz tjaajznajo. Wejtnac̄ tjaajintami nižaza kamtami Yooz tawk jaruĉha. Jalla nuž nayžcu, anĉucmi Yooz tawk jaru kamñi kuziz cjee. Anaĉha mitarazi kuziz cjiicjiisqui, “Wejt Yooz taku tjaajiñiqui juc'ant zumaĉha; am Yooz taku tjaajiñiqui anal pecuĉha”, cjicanaqui.

⁷ ¿Ject anĉuca t'aka parti žoñinac̄quiztan tucquin uchjo? Anĉuca t'akaž juc'ant waližlaj niiqui, Yoozpankaz juc'ant wali cjiskatchiĉha. Anĉucqui anaĉha persunpacha wali cjisnasacĉha. Jalla nižtiquiztan anaĉha atinaru kuziz chiichiizqui, “Juc'ant waliĉha wejt t'akaqui”, cjicanaqui.

⁸ ¿Anĉucqui wejrnac wirquin ecchinĉucjo? ¿Anĉucqui tjapa Yooz puntunaca zizjo? ¿Wali chawjc jilirinac̄takaz anĉucqui kuzquiz sint'ejo? ¿Wejrnac wirquin ecchinĉucjo? Ultimquiziqui anĉucqui anaĉha nižta. Jalla

nižta cjenacqui walipanž cjesača. Neesaj wejrnacmi ančuca partiquiz cjiwčhani, ančucatan chica jilirinaca cjisjapa.

⁹ Ančucacqui nayča, Yoozqui wejrnac apostolonaca wirquin ectača, conta cjisjapa utžta žoñižtakaz, jalla nii. Zoñinacami anjilanacami nižaza tjapa tii muntuquiz žejlñinacami wejtnacaquiz chekža. Ana wali žoñinacažtakaz wejtnacaquiz chekža.

¹⁰ Wejrnacaž Jesucristuž puntuquiztan paljayan ana criichi žoñinacaqui cjiñičha, “Zumzu žoñinacčhucča”. Nuž cjicanž wejtnacaquiz iñarča. Ančucacqui persun puntuquiztan pinsiñchucča, “Cristuž cjen zuma zizñi žoñinacčha wejrnacqui”, cjicanaqui. Wejrnac apostolanacaqui humilde kuzziztča. Ančucacqui persun puntuquiztan pinsiñchucča, “Tjup kuzziztča”, cjicanaqui. Wejrnacqui iñartača. Ančucacqui rispitta žoñižtakazza. Ultimquiziqui ančucacqui anača nižta.

¹¹ Anzama wejrnac apostolanacaqui ancha sufručha čhjerquiztanami kjazquiztanami, nižaza zquitquiztanami. Nižaza wejrnacqui kichtača. Nižaza anača wejrnacqui žejlž kjuychiztqui.

¹² Nižaza persun kjaržtan ochañcama langznuča. Zoñinacaž wejtnacaquiz iñaranami zuma tawkžtan kjaaznuča. Nižaza žoñinacaž wejtnacaquiz ana wali paanami, zuma tjurt'iñi kuzziz awantuča.

¹³ Zoñinacaqui wejtnaca puntuquiztan quintra chiiča. Jalla nuž quintra chiyani, wejrnacqui zuma pazinziz kuzziz chiižinuča. Nižaza žoñinacaqui wejtnacaquiz tsjii cjujchi irataž cherča, nižaza wirquinpanž tewjčža tsjii juc'ant ana zuma kamñi žoñižtakaz. Jalla nuž wejtnacaquiz watča.

¹⁴ Jalla nuž cjiiržcuča ana ančuc azkatzjapa, antiz ančucaquiz chiižinžcuča wejt k'ayi maatinacaž cjen.

¹⁵ Weriz Jesucristuž puntuquiztan paljaytiquiztan, ančucacqui Jesucristužquin criichinčhucča. Jaziqui wejrqui ančuca ejp cuntičha. Kjažtamit ančucaquiz wacchi tjaañinaca, nižaza irpiñinaca želačhani, tsjii ejpchizčhuckazza.

¹⁶ Jalla nižtiquiztan jaknužt wejr zuma kamučhaja, jalla nižta ančucacqui zuma kamz waquiziča.

¹⁷ Jalla nižtiquiztan wejt k'ayi Timoteo cuchanžcuča, ančucaquiz cjuñkatzjapa, jaknužt wejrqui Jesucristo sirwican kamtučhaja, jalla nii. Nižaza tjapa kjutñi tjapa iclizziz žoñinacžquizimi tjajnuča, jaknužt žoñinacžlaqui Cristuž kamañchiz kamzlaja, jalla nii. Jalla nuž Timoteoqui ančucaquiz cjuñkataquiča. Timoteoqui zuma cumpliñi žoñičha. Timoteoqui weriz cjen Jesucristužquin criichiča.

¹⁸ Yekjapanacaqui ančucaquiztan mitarazi kuzziz cjissinčhucča. Tuz pinsichinčhucča, “Pabluqui anapanž tjonzñi tjonasaka”, cjican.

¹⁹ Yooz munan, wejrqui wajillaž tjonacha. Nekztan wejrqui nii mitarazi kuzziz žoñinacaž langžta obra pajača, nižaza jaknižta kamañchizlaja, jalla nii. Nii žoñinacaž chiitami wejtquiz anaž importičha.

²⁰ Yooz mantuquiz kamcan, Yooz aztan zuma kamstanča. Jalla niiča chekanaqui; chiita takunacakazza anaž chekanaqui.

²¹ ¿Jaknužt ančuc pecjo? ¿Ančuc casticzjapa, wejrqui tjonz waquiziya? ¿Už humilde kuzziz k'ayachtican tjonz waquiza ja'? ¿Weriz tjontanaqui kjaž cjiñiž pec ančucjo?

5

ANA WALI KAMTA QUINTU

¹ Jilanaca, cullaquinaca, wejtquin tsjii ana wal quinto tjonchiča, ančucaquiztan tsjiiqui niž wiri maa persun tjun tjacsiquiča. Jalla niiqui juc'ant anawaliča. Ana criichi žoñinacami ana nuž paača.

² Jalla nuž cjenami ančucqui tirapan mitarazi kuzzizčucča. Pero ančucalaqui llaquit kuzziz cjis waquiziča. Jalla nižta ana wali paañi žoñiqui ančucaquiztan jaytitaj cjila.

³ Wejrqui ančucatan ana chica želuča. Jalla nuž cjenami, kuzquiz llaquita sint'izcuča. Nuž sint'izcu wejrqui nii uj paañi žoñž puntuquiztan tantiichinča, ana wali paača, jalla niiqui.

⁴ Ančuczti wejt llaquita kuz cjuñžcan, Jesucristo Jilirž tjuuquiz ajc-naquiča nii uj paañi žoñž puntu tantiizjapa. Jalla nuž ajczcu, Jesucristo Jiliriqui niž aztan ančucatan chicaž cjequiča.

⁵ Nekztanaqui ančucqui nii uj paañiqui Satanasquiz intirjaquiča, niiž curpu t'akjisajo. Niiž curpu t'akjistiquiztan cunamit niž kuzqui azquichta cječhani. Jalla nekztanaqui Jesucristuž tjontanaqui niž animuqui liwriita cječhani.

⁶ Ančuca mita kuzziz cjisqui anawaliča. Jalla tii chiita taku cjuñžna, “Koloculla liwraturaqui tjapa t'anti maza t'amcha”. Jalla nižta iratača nii anawal žoñiqui ančucatan chica kamcan parti žoñinacžquiz anawali cjiskatasacha.

⁷ Tjapa ančuca anawali kamañanaca eca, zuma kamañchizpan cjisjapa. Jesucristuqui učhum cuntiquiztan tsjii wilanažtakaz ticziča, učhum ujquiztan ana casticta cjeyajo. Jalla nižtiquiztan ančucqui ana ujchizza Yooz yujcquiziqui. Tsjii zuma t'anti maza cuntičucča.

⁸ Jaknužt pascua pijjsta paañinaca zuma kamañchiz cjis pecčhaja, jalla nižta irata učhumqui zuma kuzziz cjis waquiziča, nižaza Yooz kuzcama lijituma kamz waquiziča. Anazuma kuzziz, nižaza anazuma kamañchiz, jalla nižta kamz ana waquiziča.

⁹ Tuquiqui cartiquiz cjiyržquichinča tuž cjican: “Adulterio paañinacžquiztan jaytaquiča, nižaza nižta paañinacžtan anaž cumpant'iz waquiziča”.

¹⁰ Jalla nuž cjiyržcu wejrqui ultimupan anal cjiwča, tjapa ana criichi adulterio paañinacžtan ana želajo. Ana criichi žoñinacaqui anawaliž paača, adulteriuquiz ojklayča, nižaza cusanacžquiz kuz tjaača, nižaza tjañi zaača, nižaza žoñiž paata yooznaca sirwiča. Tii muntuquiz nižta anawali paañi žoñinaca panž žejlča.

¹¹ Yekjapanacazti “Yoozquin criyuča” cjican, anawali paača; adulteriuquiz ojklayča, nižaza cusasanacžquiz kuz tjaača, nižaza žoñiž paata yooznaca sirwiča, nižaza anawal takunaca joojooča, nižaza licča, nižaza tjañi zaača. Jalla nižta anawali paacan jakziltat Yoozquin criyuča” cječhaj niiqui, jalla nižta žoñinacžtan ana ojklayaquiča. Nižaza anača nižta paañinacžtanaqui čherimi lujlsqui. Panž ana cumpant'aquiča.

¹² Wejrqui ana criichi žoñinaca anača wejtlaqui tantiistanqui. Antiz učhumqui icliz žoñinaca tantiistanča, ujchiz ana ujchiz, jalla nii.

¹³ Nii uj paañi žoñi jaytitaj cjila. Pero Yoozqui nii ana criichi žoñinaca tantiyaquiča, casticzjapa.

6

QUIJZ PUNTU

¹ Jakziltat tsjii jilž quintra quijačhaja, jalla niiqui ana criichi juez yujcquiziqui anaž quijz waquiziča. Pero criichi jilanacžquin quijspanča.

² Jesucristuž tjontan criichi jilanacaqui tjapa ana criichi žoñinacž puntu jusjisaquiča. ¿Nii ana ziz ančucjo? ¿Tjapa ana criichi žoñinacž puntu jusjisaquiž niiqui, kjažt tsjii quija ana azquichi atasajo?

³ Criichi žoñinacaqui anjilanacž puntu zakaz jusjisaquiča. ¿Nii ana ziz ančucjo? Jaziqui anjilanacž puntu jusjisaquiž niiqui, ¿kjažt tii muntuquiz žejlñi quija ana azquichi atasajo?

⁴ Ančucaquiz quijanaca želaquiz niiqui, ¿kjažt ančucqui ana criichi žoñžquin quiijo? Criichinacžquiztanaqui anaž čhjulumi ninacaqui.

⁵ Jalla nuž tii puntuquiztan chiižinuča ančuc azajo. Ančucaquiz quijanacača anaž cjichuca. ¿Tsjii quija želan, ančucaquiztan anaj azquichi atñi žoñi žejl, kjažtatajo?

⁶ Ana criichi jilirž yujcquiz quijas, ¿kjažtatajo?

⁷ Quija želanaqui, kjanapacha tježa, ančucaquiz ana waliča, jalla nii. Nii criichi jilaž uj paatiquiztanaqui nuž pasinza paachucakazza. Nižaza awantichucakazza.

⁸ Pero ančucpachača persun criichi jilanacž quintra payiñčucqui, ana walinaca paacan nižaza tjañi zaacan, jalla nuž.

ARAJPACHQUIN KAMZ PUNTU

⁹ Ana wali kamañchiz žoñinacaqui anaž arajpach wajtquin Yooztan chica kamasača. ¿Jalla nii ana ziz ančucjo? Jaziqui ančucqui anača in-callta cjisqui. Arajpachquin anaž okaquiča tii žoñinacaqui: adulteriquiz ojklayñinaca, nižaza žoñiž paata yooz sirwiñinaca, nižaza pampa cjcjiñi zultirunaca, nižaza luctakpora tsjii luctakžtan tsjii maatakžtantakaz cjejasñinaca.

¹⁰ Nižaza tjañinaca, nižaza cusasanacquin kuz tjaañinaca, nižaza licchinaca, nižaza quintra chiichiiñinaca, nižaza žoñinacžquiztan kjañž pecñinaca. Jalla tjapa nižta žoñinacaqui arajpachquin anapan okasača Yooztan wiñaya kamzjapa.

¹¹ Ima Yoozquin criicanaqui yekjap ančucqui nižtatača. Anziqui Jesucristo Jiliriz cjen, nižaza Yooz Espíritu Santuž cjen ančuca ujnacaqui pertuntača. Jalla nižtiquiztan ančucqui Yooz partiquiz cjissiča, nižaza Yooz yujcquiziqui walikaz ana ujchiz cjissiča ančuca ujquiztan liwriita.

YOOZTAJAPACHA UCHUMQUI

¹² Jilanaca, cullaquinaca, tsjiilla cjesača. Yekjapa ančucqui chiičhani, criichi žoñiqui liwriitaž cjen čhulu paazmi paasača. Pero čhulu paazmi zuma kamañchiz kamzjapa anaž yanapča. Čhulu paazmi paasača, pero čhjul paazami ana wejt kuz atipskatz pecuča.

¹³ Tužuča razunaqui. Čheriqui pjuchjapača. Nižaza pjuchqui čherijapača. Ultimquiziqui Yoozqui piscpacha liwj tucuzinkataquiča. Tužuzakazza razunaqui, učum persun curpuqui anača adulterio paazjapaqui. Antiz učum curpuqui Jesucristo Jiliržquiz sirwiñijapača. Nižaza Jesucristo Jiliriča učum curpuž mantiñiqui.

¹⁴ Yooz Ejpqui Jesucristo Jiliri jacatatskatchiča. Nižaza Yoozqui niž persun aztan učum curpunaca jacatatskataquiča.

¹⁵ Učum curpunacaqui Jesucristužtajapača. ¿Jalla nii ana ziz ančucjo? Jalla nižtiquiztan ¿kjažt criichi žoñž curpuqui putirii maatakžquin tjaata cjesajo? Anapanž cjichuca.

¹⁶ Jakzilta žoñit putirii maatakžtan adulterio paačhaj niiqui, nuž pucultan tsjii curpuchiztakaz cjissa. Cjijrta Yooz takuqui tuž cjiča: “Luctakžtan maatakžtan lucutiñi cjequiz niiqui, tsjii curpuchiztakaz cjisnaquiča”. ¿Jalla nii Yooz taku ana ziz ančucjo?

¹⁷ Nižaza jakzilta žoñit persun kuz Jesucristo Jiliržquin tjaaquiž niiqui, nuž pucultan tsjii kuzziz cjissa.

¹⁸ Adulterio cjičisqui anapanž pecalla. Jalla nižta paaquiž niiqui, persunažtajapa quintraz paača. Parti paata ujnacaqui, anaž nii adulterio ujžtapachaqui.

¹⁹ Ančuca curpuqui Yooziž tjaata Espíritu Santuž kjuya timplučha. Jalla nižtiquiztan Espíritu Santuqui ančucaquizpacha žejlčha. ¿Jalla nii ana ziz ančhucjo? Ančhucqui patrunchizpanča.

²⁰ Yoozqui ančhuc kjaychiča, wali preciužtan, Jesucristuž ljocžtan. Jalla nižtiquiztan ančuca curpuquiztanami kuzquiztanami Yooztajapa honora waytiz waquiziča. Jalla nuž pizcpacha Yooztajapapanča. Jilanaca, anača uj paazqui.

7

ZALZ PUNTU

¹ Jaziqui amiž cjiirta pewcžtanacquiz kjaaznasača. Jaziqui tii chiižinuča. Ana zalzqui walikazza.

² Jalla nuž cjenami tii timpuquiz zalz waquiziča, ana adulterio ujquiz tjojtsjapa. Jalla nižtiquiztan zapa luctaka tsjaa maatakžtan zalz waquiziča. Nižaza zapa maataka tsjii luctakžtan zalz waquiziča.

³ Tsjii lucuqui zuma lucužta cjispanča persun maatakžtanaqui. Nižaza tsjaa tjunqui zuma tjunažta cjispanča persun luctakžtanaqui.

⁴ Tjuna curpuqui persun lucžtajapapanča. Nižaza lucž curpuqui persun tjunaltajapapanča.

⁵ Nižaza porapat lucutiñi curpu tjaa-asaquiča. Porapat tsjii acuerduquiz luzasaquiž niiqui, tsjii kjažtallaž nicasasača, Yoozquin mayizizquin kuz tjaažjapa. Nii acuerduquiz luzta timpu wattan, nii lucutiñiqui ana iya nicz waquiziča. Tira nicaquiž niiqui persun curpu ana ewjazñi atačhani, nekžtan Satanás diabluqui nii ana ewjazñi attiquiztan nižaza nictiquiztan adulteriuquiz tjojtskatasacha.

⁶ Nekžtan jalla tuž chiižinuča, pero anal ultimu mantuča.

⁷ Wejrqui ana zalzničha. Jalla nižta kamñiž cjičhaj tjapa ančhucqui, jalla nižtal pecučha wejrqui. Pero Yoozqui zalz kamaña, nižaza ana zalz kamaña tjaača. Jalla nižtiquiztan zapa mayni niž persun Yooziž tjaata kamañ jaru kamstanča. Jalla niiqui walikazza.

⁸ Zultiržquizimi, žew luctakžquizimi žew maatakžquizimi tuž chiižinuča ančucaquiz. Wejr irataž cjičhaj ančhucqui, ana zalzñi. Jalla niiqui waliž cjesacha.

⁹ Anchapanž zalz pecčhaj niiqui, zalzna cjichucača. Ana zalzcanpacha nižaza anča maataka peccan želasaž niiqui, ujquiz tjojtnasača. Jalla nuž cjenauqi zalzla cjichucapanikazza.

JALJTIZ PUNTU

¹⁰⁻¹¹ Zalzi žoñinaca, ančucaquiz wejr mantuča, jalla tuž. Tsjaa tjunqui naaža persun luctakžtan ana jaljtiz waquiziča. Nižaza tsjii lucuqui niž persun tjunatan ana jaljtiz waquiziča. Jaljtaquiž niiqui, ana iya yejkžtan zalznasača. Pero nii lucutiñ žoñiqui porapat pertunas waquiziča. Jalla tii mantitaqui anača weriž mantitakazzi, Yooz Jiliriž mantitapanča.

¹² Parti žoñinacžquiz chiižinuča, tii chiižintaqui ana Yooziž mantitača. Tsjii criichi žoñiqui ana Yoozquin criichiñ tjunchizlaj niiqui, nižaza naa tjunqui lucutiñipan kamz pecčhaj niiqui, nii criichi lucuqui ana jaljtiz waquiziča.

¹³ Nižaza tsjii criichi maatakaqui ana criichi lucchizlaj niiqui, nižaza naaža lucuqui lucutiñipan kamz pecħaj niiqui, naa criichiñ tjunqui ana jaljtiz waquiziħa.

¹⁴ Naaža cjen Yoozqui naaža ana criichi lucu cwitiħa. Nižaza Yoozqui ana criichiñ tjun cwitiħa naaža Yoozquin criichi lucchiz cjen. Ana nižta cjequiž niiqui, nii lucutiñ maatinacaqui ana criichi žoñinacž maatinacažtakaz cjesaħa. Pero Yoozqui nii lucutiñ maatinaca cwitiħa.

¹⁵ Pero tsjii ana Yoozquin criichi lucumi už tjunmi jaljtizpanž pecħaj niiqui, tsjiikaj jaljtıla cjichucaħa. Jalla nižta wataquiž niiqui nii Yoozquin criichi lucu cjicu už tjun cjicu jaljtasaħa, porapat zuma kamasajo, ana wali kamchuca cjenagui. Yoozqui uħum criichinaca kjawzicha, zuma kamajo.

¹⁶ ĞCriichi lucuqui niiz ana criichiñ tjun ultimu Yoozquin criiskatasajo? Ana zizzucaħa. ĞNižaza criichiñ tjunqui naaža ana criichi lucu ultimu Yoozquin criiskatasajo? Ana zizzucaħa.

YOOZIZ TJAATA KAMAÑ JARU KAMZ WAQUIZICHA

¹⁷ Zapa mayniqui Yooziž tjaata kamañ jaru kjažtachichimi kamz waquiziħa. Yooziž kjawžtaž cjen tsjii wira kamchinħucħa. Jalla nii wira ana Yooz quintražlaj niiqui, nižta kamzquiz cjesaħa. Jalla nužupan mantuħa tjapa iclizziz žoñinacžquin.

¹⁸ Criiz oraqui jakziltat judío žoñž chimputažlaj niiqui, chimputa žela. Nižaza criiz oraqui jakziltat ana chimputažlaj niiqui, ana chimpuskata.

¹⁹ Chimputami ana chimputami anaž importiħa. Yooz mantitacama kamzqui, jalla niħa importaqui.

²⁰ Yoozquin criižcuqui ħjul žoñimi ħjul kamañchizlaja, jalla nii kamañquiz cuntintu žejlzkazza.

²¹ Criiz oraqui žoñž mantuquiz žejlcanami, amqui ana kuz turwayskataquiħa. Nekztan, jalla nii žoñž mantuquiztan liwriita cjesaž niiqui, pan ulnaquiħa, liwrii cjisjapa.

²² Jakzilta criichi žoñit žoñž mantuquizlaj niiqui, nii žoñž mantuquiz tira žejlcanami, cjuñzna, Jesucristo Jiliriž liwriitaħa, nii. Nižaza jakzilta criichi žoñit žoñž mantuquiz ana žejlħaja, tii cjuñzna, Jesucristuž mantuquiz žejlħa, nii.

²³ Yoozqui anħuc kjaychiħa wali jila preciužtan. Cristuž ljokħa nii preciuqui. Jalla nižtiquiztan žoñž mantuquiz anaħa cjiskatsqui.

²⁴ Yoozquin criižcuqui ħjul žoñimi ħjul kamañchizlaja, jalla nii kamañquiz žejl waquiziħa. Kjažtachichimi cuntintu cjequiħa Yooztan chica kamchiž cjen.

ZALZ PUNTU

²⁵ Yoozqui wejtquiz ana taku tjaachiħa zultirunacž puntuquiztan. Pero, wejrqui tuž chiizinuħa. Nižaza cjuñzna, Yoozqui wejtquiz apóstol kamaña cumpjiichiħa. Nižaza nii apóstol kamañ jaru panž kamuħa. Wejrqui Yooziž illztitħa niizquin sirwizjapa. Jalla nižtiquiztan weriž chiizinta tawkquiz kuz tjaaz waquiziħa.

²⁶ Tuž chiizinuħa. Tii timpuquiz kamzqui ch'amaħa criichi žoñinacžtajapaqui. Jalla nižtiquiztan ħjul kamañchizlaja, jalla nii kamañquiz žejl waquiziħa. Zalzižlaja, zalzi žela; ana zalzižlaja, ana zalz waquiziħa.

²⁷ Jakziltat tjunchiz cjeħaja, anaž persun maatakžtan jaljtiz waquiziħa. Nižaza ana zalzi žoñiqui maataka kjurz ana waquiziħa.

²⁸ Pero jakziltat zalznaħaja, jalla nii zalžtaqui anaħa ujqui. Nižaza jakzilta turt zalznaħaja, jalla nii zalžtaqui anaħa ujqui. Tii ch'ama kamz

timpuquiz zalzñinacžquiz juc'ant llaquinaca cjequiča. Wejrqui anaj niža llaquita kamjaa ančhuc cjiwčhiya.

²⁹ Jilanaca, cullaquinaca, tii walja ch'ama kamz timpuqui ana ažka tju-raquiča. Jalla nižtiquiztan tekztan nawjcchuc tjunchiz žoñinacaqui anaž tjunaquiz juc'anti kuz tjaaquiča. Antiz Yoozquin juc'anti kuz tjaaquiča.

³⁰ Nižaza llaquita žejlñi žoñinacaqui anaž ancha llaquisaquiča. Yooztan kamchiž cjen cuntintu cjequiča. Nižaza čhjulquiztan chipsñi žoñinacaqui anaž juc'anti kuz tjaaquiča chipchipsquiziqui. Yoozquin juc'anti kuz tjaaquiča. Nižaza cusasanaca kjayñi žoñinacaqui anaž juc'anti kuz tjaaquiča kjayta cusasanacquiz.

³¹ Tii muntumi nižaza tii muntuquiz žejlñimi tucuzinznacquiča. Jalla nižtiquiztan jakziltat tii muntuquiz želinchiz cječhaja, anaž nii želinchizquiz kuz tjaaquiča. Antiz Yoozquin juc'anti kuz tjaaquiča.

³² Ančhucqui tii muntu kamcan kuz turwayzquiztanaqui liwriitakaj cjejal cjiwčhiya. Ana zalzñi žoñinacaqui Yooz kamañquizekaz kuz tjaaspanča; Yooz kuz cuntintu cjiskatz pecča.

³³ Zalzñi žoñinacazti Yoozquin sirwicanami tii muntu kamañquiz kuz tjaača, persun tjun cuntintu cjisjapa.

³⁴ Nižaza zalzi maatakž kamañžtan zultir maatakž kamañžtan anača tsjikaz. Ana zalzi maatakqui Yooz kamañquizekaz kuz tjaača. Curpumi kuzmi Yoozquin sirwizquin tjapa kuz tjaača. Pero zalzi maatakzti Yoozquin sirwicanami tii muntu kamañquiz kuz tjaača, persun lucu cuntintu cjisjapa.

³⁵ Tii weriž chiižintaqui ančhucalta wali cjisjapača, anaž ančuca atajzjapa. Nižaza tii weriž chiižintaqui ančucaquiz zuma kami yanapzjapača, nižaza Yoozquinpankaz tjapa kuz tjayi yanapzjapa.

³⁶ Tsjilla cjesača, zalz puntuquiztan zakaz. Jakzilta žoñžtat tsjaa majt želačhaja, zalz irarquiz tjonchiñ, nižaza ancha zalz pecchiñ. Ana chajalztiquiztan niž kuz turwayskatčhaj niiqui, tuž chiižinuča. Niiž tur chjalz wali tantiižcu, chjalznasača. Nii chjalzqui anača ujqui.

³⁷ Tii puntu iyal chiižinuča. Naa tura ejpqui ana chjalz pecčhaj niiqui, ana chjalzucača. Walikaz cjesača. Naa turaž cjen, ana jarita cjesaž niiqui, nižaza niž persun kuzquiz ana chjalz pinsitacamažlaj niiqui, ana chjalzucaž cjesača. Jalla nii ana chjalzqui waliž cjesača.

³⁸ Jaziqui nii chjalzñi žoñiqui walikaz paača. Pero nii ana chjalzñi žoñizti juc'ant walikaz paača.

³⁹ Zalzñi maatakaqui persun lucžtan kamaquiča, čhjulatorat ticznačhaja, jalla niicama. Jalla niiqui liy jaruča. Jalla nuž lucu ticzi cjenaqui naa žew žonqui yekja lucžtan zalznasača, pero Yoozquin criichi žoñizakaz cjesača.

⁴⁰ Pero naa žew žon ana zalznaquiž niiqui, juc'ant cuntintu cjequiča. Jalla nuž pinsuča wejrqui. Nižaza Yooz Espiritu Santuča wejt kuzquiziqui, weriž pinsita zuma cjisjapa.

8

ZOÑIŽ PAATA YOOZNACQUIN TJAATA ČJERI PUNTU

¹ Tsjilla cjesača, žoñiž paata yooznacquin tjaata čjeri puntuquiztan. Ančhucqui cjiča: “Tjapa wejrnacqui nii puntuquiztan zizuča”. Pero wejr cjiwča, jakziltat “Wejrtča ziziñtqui”, cječhaj niiqui, mit kuzziz cječhani. Nižaza jakziltat zuma munaziñi kuzziz cječhaj niiqui, parti criichi žoñinacžquiz yanapstanča zuma kamañchiz cjeyajo.

² Jakziltat persun kuzquiz pinsican: “Ultim weraral zizuča”, cjican cječhaja, jalla niiqui ana zuma zizza. Anapanž ultim werara zizasača.

³ Jakziltat Yoozquin tjapa kuz tjaachaja, Yoozqui nii zoñi pajcha niiz maati cunta.

⁴ Jaziqui nii zoñiz paata yooznacquin tjaata chjeri puntuquiztan, tuž cjiwcha. Zoñiz paata yooznacaqui anapancha ultim Yoozqui. Nižtiquiztan anača chjulumi. Werar Yoozqui zintallapanikaz žejlča.

⁵ Tii muntuquiz žejlñi zoñinacz yooznacaqui wacchiča. Ana criichi zoñinacaqui tii yokquiz žejlñimi nižaza tsewc arajpachquin žejlñimi cjiča, “Niiča Yoozkaz”, nižaza “Niiča učhum Jiliriqui”, panž cjiča.

⁶ Učhumnacalta tsjii werar Yoozkaz žejlča. Tsjii Yooz Ejp žejlča. Niiqui tjapa žejlñinaca paachiča. Nižaza učhumnacaqui nižtajapača. Nižaza tsjii Jesucristo Jilirikaz žejlča. Niiž cjen tjapa žejlñinaca žejlča, nižaza niž cjen učhumnacaltaqui ew žejtz kamaña žejlča.

⁷ Zoñiz paata yooznac puntuquiztan yekjap criichi zoñinacaqui ana zuma intintiča. Tuquita yekjapanacaqui ančhucacuztan zoñiz paata yooznaca sirwiñitača. Jalla nižtiquiztan anziqiu yooznacquiz tjaata chjeri lujlcan, nii paata yooznacquin pinsiča, nižaza persun kuzquiz sint'iča. Jalla nižtiquiztan nii chjeri lujlchiž cjen ultim Yooz quintra uj paača.

⁸ Yooz yujcquiziqui chjeri lujlchi cjenami ana chjeri lujlchi cjenami anaž importiča. Jakziltat chjul chjerimi lujlchaj niiqui, nii chjerquiztan anaž tsjan Yoozquin kuzziz cjesača. Nižaza jakziltat ana tjpaman chjeri lujlchaj niiqui, nii ana tjpaman chjeri lujltiquiztan ana upa Yoozquin kuzziz cjesača.

⁹ Pero zoñiz paata yooznacquin tjaata chjeri lujlzquiztan cwitazaquiča, ana tsjii ana zuma intintiñi criichi jila ujquiz tjojtskatzjapa.

¹⁰ Ančhucqui zizza, zoñiz paata yoozqui anača chjulmi, jalla nii. Nižaza ančhucqui zoñiz paata yooznacquin ana sint'iča. Pero yekjap jilanacazti tirapan zoñiz paata yoozquin kuzquiz sint'iskatča, ultim Yoozquin criichi cjicanami. Jaziqui yekjap ančhucacuztan zoñiz paata yooz timpluquiz chjeri lulasača. Pero tsjii jilaqui ančhuc cheržcu lujlz zakaz pecasača, aunquimi nii zoñiz paata yoozquin sint'icanami. Jalla nižtiquiztan nii zoñiz paata yoozquin sint'iñi jilaqui ultim Yooz quintra uj paasača, nii zoñiz paata yoozquin tjaata chjeri lujlžcu.

¹¹ Jaziqui ančhucadž lujltiquiztan nii criichi jilaqui werar Yoozquiztan zarakskatča. Jesucristuqui nii jilž laycu ticziča, jalla.

¹² Pero ančhucqui nii jilž kuz ana wali cjiskatča. Jaziqui nii jilž quintrami uj paača, nižaza Cristuž quintrami uj paača.

¹³ Jalla nižtiquiztan zoñiz paata yoozquin tjaata chjeri lujlchiž cjen wejt jila ujquiz tjojtskatasadž niiqui, anapan nii chjeri lujlz pecuča. Wejrqui anapan yekja jila ujquiz tjojtskatz pecuča.

9

PABLUZ KAMAÑA PUNTU

¹ Wejrqui liwriitča. Jalla nižtiquiztan chjulu paazmi paasača. Wejrqui Jesucristuž cuchanžquita apostoltča. Nižaza wejrqui persun chjujcztan učhum Jesucristo Jiliri cherchinča. Nižaza weriž Yooz taku paljaytiquiztan, ančhucqui Jesucristo Jiliržquin criichinčhucča. Jaziqui ančhucqui wejt obra cuntača Yooztajapaqui.

² Cunamit yekjapanaca wejr ana apóstol pajčhani. Ančhuczti wejr apóstol pajstanča. Ančhucadž Jesucristužquin criichiž cjen, wejrqui kjanapacha tjeeztitča, ultim werara apóstol, jalla nii.

³ Wejt quintra chiiñinaczquiz kjaaznuča, tuž cjican: Wejrtča lijitum apostoltqui.

⁴ Jalla nižtiquiztan criichi žoñinacaž tjaata čherimi nižaza čjul tjaatami tanznasača.

⁵ Nižaza apóstol kamañquiz ojklaycan criichiñ tjun chjichasača. Jalla nižta chjichñiča parti apostolanacaqui, nižaza Jesucristo Jilirž persun lajknacami, nižaza Pedrumi.

⁶ Wejttan Bernabežtan Yooz taku paljaycan tirapan langznuča, persuna mantinzjapa. Jalla nuž cjenami, tii mantinzjapa langzqui jaytasacha, ančhucqui wejr mantinžinajo.

YOOZ TAKU PALJAYŃI ŽOŃŽ PUNTU

⁷ Tsjiilla cjesača nii puntuquiztan. Zultatunacaqui anaž sirwiča, persuna mantincan. Nižaza zkala langzñi žoñiqui zkal čherquiztan lulasacha. Nižaza uza ichñi žoñiqui uuzi lichiž lिकासacha. Jalla nužupanča tii muntuquiziqui.

⁸ Anača wejt kuzquiztankaz tii chiitaqui. Jalla nuzupanž chiiča Moisés cijrta Yooz takuqui.

⁹ Nii Moisés cijrta liiquiziqui tuž cijča: “Tsji zkala jojñi wacaqui anaž ñujcz waquiziča”. Yoozqui jalla nuž cijcan chiichiča anača wacztajapa,

¹⁰ antiz wejrnacaltajapača. Nijapa nii Yooz taku cijrtača. Zkal yoka kjullñi žoñimi, nižaza zkala jojñi žoñimi tjewznača zkalquiztan tsjižtan tanzjapa.

¹¹ Jaziqui wejrnacqui ančhucaquiz Yooz taku paljaychinča, zkala čjacchižtakaz. Jalla nižtiquiztan wejtnacalaqui ančhucaquiztan mantinzjapa tanzñi cijchuca, zkala langzñi žoñižtakaz.

¹² Yekja Yooz taku tjaajiñi žoñinacaqui ančhucaquiztan mantinzjapa tanchipanča. Wejtnacalaqui ančhucaquiztan juc'anti tanzuca. Wejrnaczi anapan wira mantinz exijcan kamiñča. Wejrnacqui persuna langztiquiztan mantincan kamiñča. Chjulumi awantuča liwriñi Cristuž taku catokz ana atajta cjeajo.

¹³ Timpluquiz langzñi žoñinacaqui timpluquiztan mantiñiča. Nižaza timplu altarquiz wilana jawkñi žoñinacaqui wilana jawkta chjizwiquiztan mantiñitacha. Jalla nii ančhucqui zizza.

¹⁴ Jalla nižtapacha Jesucristo Jiliriqui mantichiča, jakziltat liwriñi Yooz taku paljayačhaja, jalla niiqui nii Yooz taku paljayz langzquiztan manti-nasača.

PABLUQUI YOOZ TAKU PALJAYCHA, PERSUNA MANTINCAN

¹⁵ Wejrqui anapan mantinz exijcan kamiñča. Nižaza anziqui anal ančhucaquin cijržcuča wejr mantinskatzjapa. Ana jakziltižquizimi mantinskatz pecuča. Wejrqui ima žoñžquiz mantinskatzcan ticzkal pecasača. Tii persuna mantinz honora ana wejtquiztan kjañkatz pecuča.

¹⁶ Yooz taku paljaycan wejrqui anal mit kuzziz cjesača. Yoozqui wejtquiz nii kamaña tjaachiča. Jalla nižtiquiztan Yooz taku paljaystanča. Liwriñi Yooz taku ana paljayašaž niiqui, wejrqui castictal cjesača.

¹⁷ Nižaza wejrqui persun kuzcamakaz Yooz taku paljaytasaž niiqui tsji pacz tjewztasača, weriž Yoozquiz yanaptiquiztan. Pero anača wejt kuzcama tii puestuquin kamuča. Yoozqui tii Yooz taku paljayz kamaña wejtquiz tjaachiča. Jalla nižtiquiztan Yooz taku paljaystanpanča wejrqui.

¹⁸ Nižaza liwriñi Cristuž taku paljaycan ana jeczquiztanami cobriñča, wejr mantinžinajo. Antiz persunpacha mantinuča. Jalla nižta ojklayžcu ancha cuntintutča. Jalla niča wejt kuzquiz pactažtakazqui.

¹⁹ Cristuž cjen wejrqui liwriitača. Jaziqúi žoňž kuzquiz pinsita jaru ana kamuča. Jalla nuž liwriitaž cjenami, wejrqui tjapa žoňž kuz jaru paasača, walja žoñinaca Cristužquin kuzziz cjiskatzjapa.

²⁰ Judío žoñinacžtan kamcan, judío žoñinacž cuzturumpi paa-uča, ninaca Cristužquin kuzziz cjiskatzjapa. Nižaza, Moisés liy jaru kamñi žoñinacžtan kamcan, Moisés liy paa-uča, ninaca Cristužquin kuzziz cjiskatzjapa. Ultimquiziqui anal nii Moisés liy mantuquiz kamuča.

²¹ Nižaza ana Moisés liy jaru kamñi žoñinacžtan kamcan, wejrqui zakal Moisés liy jaru ana kamuča, nii žoñinaca Cristužquin kuzziz cjiskatzjapa. Ultimquiziqui wejrqui werar Yooz liy jaru kamuča, nižaza Cristuž liy jaru kamuča.

²² Nižaza čjulquizimi kuz sint'iskatñi žoñinacžtan kamcan, wejrqui nižtakaz kuz sin'tiskattažokaz cjiñča, nii žoñinaca Cristužquin kuzziz cjiskatzjapa. Jalla nižta punta punta kamuča, jaknužumi žoñinaca liwriita cjejajo.

²³ Jalla nižta punta punta kamuča, žoñinacžquiz liwriiñi Yooz taku cri-iskatzjapa. Nižaza jalla nižta kamuča, persunpacha Yoozquiztan zumanaca tanzjapazakaz.

²⁴ Tsjilla cjesača. Ančhucqui tuž zizza. Tsjii zajtñiquiz tjapa zajtñi žoñinacžquiztan tsjiillapankaz ganča. Jalla nuž cjuñžcu ančhucqui Yooz jiczquiz tjapa kuztan zajtz waquiziča, premio ganzjapa.

²⁵ Tjapa piluta uziñinacaqui walja istutiča ima canchiquiz luzcan. Nižaza ana walinacquiztan jaytissa tsjan cusa uzinzjapa. Jalla nižta paača, tsjii čjañquiztan paata royti pillu ganzjapa. Nii premiuqui tsjii upacamakaz tjurča. Ančhuczi Yooz jiczquiz zajtča, tsjii wiñaya tjurñi premio ganzjapa. Jalla nii premiuqui cjiča, Yooztan wiñaya kamz, jalla nii.

²⁶ Wejrqui anal inapampa Yooz jiczquiz zajt zajtcan kamuča. Tsjii pucultan boxsiyasñi žoñinacaqui anaž tsjii kjutñi čhajcz pecča. Antiz panž čhajcza tsjiizuñž yujcquin. Wejrqui jalla nižtakaz anal inapampa kamuča. Antiz liwriiñi Yooz takucama kamuča.

²⁷ Wejrqui persun kuzquizpacha ewjasuča čjul anawalinacami paazquiztan. Wejrqui jalla nuž paa-uča, Yooz wejr ana wirquin tjewcznajo. Yekjapanacžquiz zuma tjaajinžcu wejrqui anal wirquin tjewczta cjis pecuča, wejr ana zuma kamčinž cjen.

10

TUQUITA EJPNACZ KAMTA PUNTU

¹ Tsjilla cjesača. Wejrqui ančhucquiz tuž zizkatz pecuča. Egipto yokquiztan ulanžquichi tuquita ejpnacaqui tsjir koztan kamatča. Moisés irpita kamatča. Nižaza Moisesqui tjapa ninaca Ljoc Kota tjakchiča.

² Jalla nuž irpitaž cjen, nižaza Ljoc Kota tjaktaž cjen, nii žoñinacaqui Moiestan tsjii kuzziztača. Jalla nižtiquiztan tjapa ninacaqui Moisés irpiñi bautistažtakaztača.

³ Nižaza tjapa ninacaqui Yooz tjaata čjjeri lujlchiča.

⁴ Nižaza tjapa ninacaqui tsjii pajk maz ajkquiztan Yooz tjaata kjaz licchiča, curpu mantinzjapa, nižaza ninacž kuz wali mantinzjapa. Nižaza ninacž kuz wali mantinzjapa Cristutača mazquiztan ulanñi kjaztakaz. Jalla nii Cristuqui chicapacha cumpañt'atča ninacaž jiczquiz okan.

⁵ Jalla nuž Cristuž cumpañt'ita cjenami, jila parti nii žoñinacaqui anapan Yoozquin kuzziztača. Jalla nižtiquiztan Yoozqui anatača cuntintu; ninacž quintra žawjchiča. Jalla nižtiquiztan nii žoñinacaqui ch'ekti yokquin ticziča.

⁶ Jalla nii tuquita kamtaqui cjiirtatacha ućhumnaca cjuńajo, niźaza niźta ana walinaca tuquitaźtapacha ana paajo.

⁷ Jaknuźt yekjapa tuquita ejpnaca ۆońiź paata yooznacquin sirwitćhaja, jalla niźtapachaqui anapanź kamz waquizića anćhucqui. Nii tuquita ejpnacź puntuquiztan cjiirta Yooz takuqui, tuz cjića: “Nii ۆońinacaqui ćhjeri lujlćcu licćcu tsajts pijista payi waquintichića.” Jalla niźta irata kamz anaź waquizića.

⁸ Niźaza yekjap tuquita ejpnacaqui adulterio paachića. Jalla niźtiquiztan ticzića 23,000 ۆońinacaqui tsjii noojikaz. Jalla nii cjuńzna. Adulterio anaća paazqui.

⁹ Niźaza yekjap tuquita ejpnacaqui: “Yoozza pazinziz kuzzizqui”, cjichića. Jalla nekztan juc'anti anawalinaca paapaatća. Ultimquiziqui Yooz Ejpqui ninaca casticchića. Jalla nii castictiquiztan walja ۆońinacaqui ticzića, zkoranacaz ćh'atta. Jalla nii cjuńzna. Anaća uj paazqui: “Yoozza pazinziz kuzzizqui”, cjicanaqui.

¹⁰ Niźaza yekjap tuquita ejpnacaqui Yooz quintra chutchića. Jalla niźtiquiztan Yoozqui anjila cuchanźquichića ninaca conzjapa. Jalla nii cjuńćcu, anćhucqui Yooz quintra chuch anaź waquizića.

¹¹ Tjapa tuquita ejpnacaz kamtaqui Yooz tawk libruquiz cjiirtatacha ućhumnacaquiz chiiźinzjapa ana niźta paajo. Tii muntu tucuzinz źcatźinźquićha. Jalla niźtiquiztan tuquita ejpnacaz kamta quintunaca zumpacha cjuńź waquizića, ana niźta kamzjapa.

¹² Jalla tuź cjiwćha. Jakziltat persun kuzquiz “walikaztća wejrqui” cjican pinsićhaja, jalla niiqui panź cwitazaquićha, ana ujquiz tjojtsjapa.

¹³ Čjul pruebanacquizimi anćhuc sufrićhaja, jalla niźta pruebanacquiz zakaz tsjii tsjii criichi ۆońinacaqui sufrića. Čjul pruebanacaz sufriskatta cjenami Yoozqui anchucaquiztan nii pruebanaca ana atipskataquićha. Antiz ultimquiziqui Yoozqui ćhjul pruebanacquiztan anchucaquiz atipskataquićha, anćhuc ana ćhjul ujquiz tjojtsjapa, niźaza tjurt'ińi kuzziz awantizjapa. Ućhum Yoozza zuma yanapńiqui, ućhumnacaz tjapa pruebanaca tjurt'ińi kuzziz watajo.

ZOÑIŹ PAATA YOOZNACQUIZTAN ZARAKA

¹⁴ Weriź pecta jilanaca, cullaquinaca, ۆońiź paata yooznacquiztan zaraka. Anapanź ninacźquiz sirwa.

¹⁵ Anćhucćha zizńi ۆońinacaqui. Anćhucpacha tii weriź chiita taku yatisinz nasaća, werara ana werara, jalla nii.

¹⁶ Cristuqui ućhum laycu ticzića. Jalla nii cjuńznajo Cristuqui cuzturumpi mantichića, uwas kjaz liczmi, niźaza t'anta lujlźmi. Nii uwas kjazza Cristuź ljoc cuntaqui. Niźaza nii t'antaća Cristuź curpu cuntaqui. Nii Cristuź mantita cuzturumpi paacan Yoozquin gracias cjican chiića. Nii uwas kjaz liccan Cristuźtan tsjii kuzziz cjican tjeeźa. Niźaza nii tojźta t'anta lujlcan Cristuźtan tsjii kuzziz cjican tjeeźa.

¹⁷ Tsjii t'anta źejlća, aunquimi t'unapacha kjolźtami. Niźtazakazza ućhummi. Walja tama criichinaca źelanami, tsjii curpuchiztakazza. Tsjii t'antiquiztan tjappacha lujlća, jalla nuź tjeeźa, tsjii kuzzizza tjappacha, cjicanaqui.

¹⁸ Israel ۆońinacźquiztan tii puntu cjuńzna. Jakziltat Yooz altarquin wilana jawkćhaja, jalla niiqui wilanquiztan lujlcan nii altarź Yooztan tsjii kuzziz cjican tjeeźa.

¹⁹ Nonźna, ۆońiź paata yoozqui anaź ćhjulumi. Niźaza ۆońiź paata yoozquin tjaata chjizwimi anaź ćhjulumi, chjizwikazza.

20 Pero jakzilta ana Yoozquin criichi zoñit wilana jawkčhaja, jalla niiqui zajranacžquin wilana onanča, anapanž werar Yoozquin onanča. Jalla nižtiquiztan ančhucqui anaž ninacžtan cumpaňt'iz waquiziča. Cumpaňt'aquiz niiqui zajranacžquiz kuzziz cjican tjeeža.

21 Anaž jakziltami Cristo Jilirž wasumi nižaza zajranacž wasumi tanznasača. Nižaza anaž jakziltami Cristo Jilirž t'antami nižaza zajranacž čhjerimi tanznasača. Anača nižta kuzziz cjichuca. Antiz tsjii Yoozquizpanikaz kuzziz cjesača.

22 Jakziltat zajranacž cuzturumpiquiz mitisaquiz niiqui, jalla nii zoñž quintra werar Yoozqui žawjwaquičha. Jalla nižtiquiztan ančhucqui nuž paaquiz niiqui, castictaž cjequičha. Ančhucqui anača Yoozquiztan juc'anti azziz jalla.

ZOÑIŽ PAATA YOOZNACZQUIZ ANA MITISA

23 Jalla tuž werarača. Tsjii criichi zoñiqui liwriitača. Jalla nižtiquiztan čhjulumi paasača. Pero tjapa paataqui juc'ant Yoozquin kuzziz cjisjapa anaž yanapča. Nižaza čhjul paatami anaž parti criichinacžquinami yanapča zuma kamaňchiz kamajo.

24 Parti criichinacaž zuma kamaňchiz cjisjapača kuz tjaazqui. Anača persun kamaňjapakaz kuz tjaazqui.

25-26 Cjijrta Yooz takuqui tuž cjiča: “Tjapa tii muntuqui Yooz Jiliržtacamača, nižaza tjapa tii muntuquiz žejlñinacaqui Yooz Jiliržtacamača”. Jalla nižtiquiztan mercatquiz kjayta čhjerimi lulasača. Anaž persun kuz turwayskataquičha tuž pinsican, tii čhjerižlan zoñiž paata yoozquiz tjaata čhjeri, už zoñiž paata yoozquiz ana tjaata čhjerižlaj, jalla nii.

27 Nižaza ana werar Yoozquin criichi zoñiqui čhjeri lujljapa am impitasaž niiqui, okasača, ojkz pecasaž niiqui. Jalla nuž okaquiz niiqui, čhjul onanta čhjerimi lujlznaquičha anaž persun kuz turwayskatcan.

28-29 Pero tsjiiqui amquiz maznačhani, tuž cjican: “Tii čhjeriqui zoñiž paata yoozquiz tjaata čhjeričha. Jalla nii čhjeri ana lujlz waquiziča”. Jalla nuz cjenauqui amlaqui anača nii čhjeriqui lujlsinsqui, nii mazni zoñž sint'iñi kuz anawali cjiskatzjapa, nižaza niž kuz ana turwayskatzjapa. Am persun kuzqui walikaz cječhani, ana turwayta. Jalla nuž cjenami amqui nii čhjeri lulasaz niiqui, am jilž kuz turwayskatasacha.

Jalla nii weriž chiižintiquiztan yekjap ančhucquiztan wejtquiz pewcznačhani, tuž cjican: “¿Kjažtiquiztan amqui nižta chiižinjo? Tsjii zoñiž sint'iñi kuzziz cjenami, čhjulumi paaz atučha, Cristuqui wejr liwriičiča.

30 Ima čhjul čhjerimi lujlcan Yoozquin gracias cjican chiyučha. Jaziqui, ¿kjažtiquiztan weriž lujltiquiztan zoñej wejtquin uj tjojtunjo?” Nuž cjican, wejtquiz chiyachani.

31 Ančhucquiz tuž kjaaznuča. Čhjeri lujlzmi, čhjulumi paazmi Yooztajapa honora waytiz waquiziča.

32 Ančhucqui anaž jec zoñimi ujquiz tjojtskata, judío zoñinacami, ana judío zoñinacami, nižaza Yooz iclizziz zoñinacami.

33 Wejrzi kjažllami tjapa zoñinacžquiz yanapuča zuma kamaňchiz kamajo. Anal wejtajapakaz ojklayuča. Antiz parti zoñinacžtajapa ojklayuča, ninaca ujquiztan liwriita cjeajajo.

11

1 Wejrqui jaknužt Jesucristuqui kamtčhaja, jalla nižtazakal kamuča. Nižaza jaknužt wejr kamučhaja, jalla nižtazakaz kama ančhucqui.

ACHA CH'OKCHI CUZTURUMPI PUNTU

² Jilanaca cullaquinaca, ančhucqui tjapa weriž tjaajintanaca cjuñča, nižaza weriž tjaajintacama kamiñchucča. Jalla nižtiquiztan ančhucaquin felicituča. Ultimu anača wejt kuzquiztan nii tjaajintaqui, antiz, wejtquiz tjaajintatača.

³ Jilanaca, cullaquinaca, persun luctakž mantuquiz žejlča maatakanacaqui. Nižaza zapa luctak žoñiqui Cristuž mantuquiz žejlča. Nižaza Cristuqui Yooz Ejpž mantuquiz žejlča. Jalla nii puntuquiztan ančhucaquiz intintiskatz pecuča.

⁴ Iclizquiz ajczcu luctak žoñinacaqui pañžtan acha ch'okchi anapanž cjesača, Yoozquin mayizicanami, nižaza Yooziž tjaata taku tjaajincanami. Acha ch'okchižlaj niiqui, persunjapa ombrowillaž cjesača.

⁵ Nižaza iclizquiz ajczcu, criichi maatakanacaqui panžtan acha ch'okchi panž cjesača, Yoozquin mayizicanami, nižaza Yooziž tjaata taku tjaajincanami. Acha ana ch'okchinžlaj niiqui, persunjapa ombrowillaž cjesača. Acha ana ch'okchinžlaj niiqui ach chara k'ala murtaž cjes, nižtažtakaz cjesača.

⁶ Iclizquiz ajczcu, jakzilta maatakat ana acha ch'okchinžlaj niiqui, naaža persun ach chara k'ala murtaž cjila. Nekztan naaqui acha ch'okznasača. Naaža ach chara k'ala murtaž cjen ombrowillaž cjesača. Jalla nižtiquiztan maatakaqui acha ch'okchinpanž cjis waquiziča.

⁷ Yoozqui niž kuzcama luctak žoñi paachiča niž irata cjejajo. Jalla nižtiquiztan luctak žoñiž cjen Yooztajapa honoraqui tjeeztača. Nižaza maatakaž cjen luctakž honoraqui tjeeztača, jalla nižtiquiztan criichi luctakaqui iclizquiz ajczcu anapan acha ch'okchi cjis waquiziča.

⁸ Tuquita timpuqui Yoozqui luctaka paachiča, nekztan luctakžquiztan maataka paachiča. Luctakaqui ana maatakžquiztan paatača.

⁹ Nižaza maatakaqui luctakžtajapa paatača. Luctakaqui anača maatakžtajapa paataqui.

¹⁰ Jalla nižtiquiztan maatakanacaqui acha ch'okz waquiziča, luctakž mantuquiz cjican tjeezjapa, anjilanacaž cjen.

¹¹⁻¹² Pero tii tantiya. Cristian kamañchiz cjen luctakanacami nižaza maatakanacami tsjiikazza. Yoozqui luctakžquiztan maataka paachiča. Nižaza luctakaqui maatakaž majtñiž cjen žejlča. Pero tjappachaqui Yooziž cjen žejlča. Jalla nižtiquiztan ana maataka žejltčhaja luctakaqui ana žejltasača. Nižaza ana luctaka žejltčhaja maatakaqui ana žejltasača. Nižaza anaj Yooz muntčhaja, anapanž čjulumi žejltasača.

¹³ Ančhucpacha tantiya. Yoozquin mayizican maatakaqui acha ch'okchinžlaj niiqui, ¿wali cjesaya? už ¿anawali cjesaj? Acha ch'okchi walipankazza maatakžtaqui.

¹⁴ Nižaza luctakaqui lajch charchizlaj niiqui persunjapa ombrowillaž cjesača. Jalla nužuča tii wirquiz kamañaqui. Tjapa žoñinacaqui persun kuzquiztan nuž zizza.

¹⁵ Nižaza maatakanacaqui pajk charchizlaj niiqui ninaczquizpacha honoraž cjesača. Pajk charchizqui acha ch'okchi cuntača. Jalla nižtiquiztan pajk charchiz cjisqui walikazza maatakžtaqui.

¹⁶ Jakziltat nii puntu ch'aas pecčhaja, jalla niiqui ziz waquiziča tužu. Wejrnaqui nii cuzturumpi pajzpanča. Nižaza tjapa Yooz iclizziz žoñinacaqui nii cuzturumpi jaru paaspanča.

17 Tsjiiztan zakal chiižinuča. Wejrqui ančhucaquiz zumpacha ewjtis waquiziča. Santa Cena paažcu ančhucqui koluculla akžta kamañchiz ulanča tsjan zuma kamañchiz cjenpacha.

18 Iclizquiz ajczcan, ančhucqui t'aka t'aka cjiicjiiñchucquiča. Nii quintu wejtquiz irantižquichiča. Cunamit nižtapan cjiicjiičhani.

19 Pero jalla nižta t'aka t'aka cjitiquiztan, kjanapacha tjeeža, jecnacat lijitum cristian kamañchiz criichinaca, nii. Jalla nižtiquiztan t'aka t'aka cjichuca cječhani.

20-21 Ančhucqui Santa Cena cuzturumpi paazjapa chjeri luli ajczinčhucquiča. Nekztan chjeri lujlcan zapa mayni ančhucaquiztan persun čhjeri lujlskaz cjissinčhucquiča, ana tojunžcu. Jalla nižtiquiztan koloculla čhjerchiz žoñinacasti čhjeri eecznan žejlchiquiča. Partizti chjeki čhjeri lujlchi žejlchiquiča, nižaza yekjapazti mallzilla žejlchiquiča. Ana wali paachinčhucča. Jalla nižtiquiztan anača Jesucristo Jiliriž mantita Santa Cena cjichuca cjequiča.

22 ¿Ančhuczi lujljzapa liczjapa, ana kjuychizčhuc, kjažtatajo? Nižta ana wali paacan, ančhuqui tjeeža, ančhucaquiz Yooz iclizziz žoñinaca anaž im-
portičha, nii. Nižaza pori criichinacaqui azkatča ana želinchiz cjenaqui.
¿Wejr ančhucaquiz kjažt cjes? ¿Wejr ančhucaquiz “Walikaz” chiyasaya?
Anapan nižta chiyasača.

23 Jesucristo Jiliripachača wejtquiz mantichiqui Santa Cena cuzturumpi paajo. Jalla nii tjaajintacama ančhucaquiz zakal tjaajinchinča. Ima Jesu-
cristo Jiliriž intirjita cjen, jalla nii weenpacha tsjii t'anta tanzičha niž persun
kjaržtan.

24 Jalla nekztanaqui Yooz Ejpžquin gracias cjican cjichiča. Nekztanaqui
t'anta kjolžcu, tojunchičha, tuž cjican: “Tii t'antaqui wejt curpu cuntača.
Wejrqui žoñž curpuchiz cjen ančhuc laycul ticznača. Weriž ticžta cjuñzjapa
tii cuzturumpi wilta wilta paaquiča”.

25 Nekztan čhjeri lujlžcu nižtapacha Jesucristuqui niž persun kjaržtan tsjii
wasu tanzičha, tuž cjican: “Tii wasquiz uwas kjazqui wejt ljoc cuntača. Wejt
ljoc cjen ew acta tjulžtaž cjequiča. Chjulorat tii cuzturumpi paačhaj niiqui,
wejtquiz cjuñž waquiziča”. Nuž mantichiča Jesucristuqui.

26 Chjulorat tii Santa Cena cuzturumpi paachaj niiqui, ančhucqui tjeeža
Jesucristo ticziča ančhuca laycu, jalla nii. Jalla nii cuzturumpi paaz
waquiziča, Jesucristo Jiliriž tjonzcama.

27 Jalla nižtiquiztan jakziltat nii Santa Cena cuzturumpi ana zuma paaquiž
niiqui, Jesucristo Jiliriž ombrawillaž cjequiča. Nižaza Jesucristo Jiliriž quin-
tra uj paaquiča; niž curpuquizimi niž ljocquizimi iñartažokaž cjequiča.

28 Ima Santa Cena paacan, zapa mayni persun kuzquiz amayt'asaquiča,
kjažtiquiztan Santa Cena cuzturumpi paa, jalla nii. Nekztan Santa Cena
cuzturumpi paasača.

29 Nižaza Santa Cena paacan, Jesucristuž učhum laycu ticžta, jalla niičha
zapa mayni persun kuzquiz waljapanž cjuñž waquiziča. Santa Cena paacan
Jesucristo ana cjuñziž cjequiž niiqui, persun casticujapa cjequiča.

30 Santa Cena cuzturumpi ana wali paatiquiztan, walja ančhucaquiztan
laa žejlča, nižaza ana wali žejlča, nižaza yekjapanacaqui ticziča.

31 Ima Santa Cena cuzturumpi paacan učhumnacapacha zapa mayni
persun kuzquiz zuma amayt'as waquiziča. Nekztan pertuna mayiziz
waquiziča. Nekztan Jesucristo Jiliriž anaž casticta cjequiča.

32 Jesucristo Jiliriqui učhum casticaquiž niiqui, azquichjapa panž cas-
ticča, zuma kamañquin cjisnajo. Nekztan ana criichi žoñinacžtan chica ana

wiñaya casticta cjequiča.

³³ Wejt jilanaca, cullaquinaca, čhjeri lujlzapami nižaza Santa Cena paazjapami ajczcu, zapa mayni tjewz waquiziča parti criichi žoñinacaž zumpacha ajczquiscama.

³⁴ Jakziltat čhjeri eeskatčhaja, persun kjuyquin zumpacha lujlznaquiča, ima iclizquin ojkan. Nekztan lujlczu ajczquin okaquiča, Santa Cena zuma paazjapa. Jakziltat Santa Cena ana zuma paaquiž niiqui, Yoozqui nii žoñi casticaquiča. Nužulkazza nii puntuqui. Yekja puntunacaqui wejr azquichača, ančhucaquin chertzni quejpczu.

12

ESPIRITU SANTUZ TJAATA KAMAÑANACA PUNTU

¹ Tsjii zakaz chiižinuča, Espíritu Santuž tjaata kamañanaca puntuquiztan. Jalla nii ančhucaquiz zuma intintiskatz pecuča.

² Tuquiqui ima ančhucaž Yoozquin criican ančhucqui ana criiñi žoñiž paata yooznacžquiz tsjii kjutni irpitatača, jalla nižta irpiskatchinčhucča ančhucqui. Jalla nii ančhucqui zuma zizza.

³ Jakziltat Yooz Espíritu Santuž irpitazlaja, jalla niiqui ana chiyasača: “Jesusaqui laykjita cjila”, cjicanaqui. Nižaza jakziltat: “Jesusaqui Yooz Jiliriča”, cjican chiyachaja, jalla niiqui Espíritu Santuž irpitaž chiyaquiča. Jalla nuž intintiskatz pecuča.

⁴ Jilanaca, cullaquinaca, criichi žoñinacaqui yekja yekja Espíritu Santuž tjaata kamañanacchizza, nižaza poderanacchizza. Pero tsjii Espíritu Santukaz tjapa nii kamañanacami nižaza poderanacami tjaača.

⁵ Nižaza criichi žoñinacaqui yekja yekja Yoozquin sirwiča. Pero tsjii Yooz Jiliržquinkaz sirwiča.

⁶ Nižaza criichinacaqui yekja yekja wali obranaca paača. Pero tsjii Yooz Ejpkaz criichinacžquiz nii obranaca paakatča.

⁷ Jaziqui tjapa criichinacaqui Yooz Espíritu Santuž tjaata kamañchizza, parti criichinacžquiz juc'ant zuma kami yanapzjapa.

⁸ Tižta kamañanacaqui tjaatača: Espíritu Santuqui yekjap criichinacžquiz zuma pinsita razunanacchiz chiikatča. Nižaza Yooz Espíritu Santuqui yekjap criichinacžquiz zizni zizni chiikatča.

⁹ Nižaza Espíritu Santuqui yekjap criichinacžquiz Yoozquin juc'ant tjapa kuzziz cjiskatča, zuma obranaca paazjapa. Nižaza Espíritu Santuqui yekjap criichinacžquiz poder tjaača laanaca čhjetnajo. Pero Espíritu Santuqui tsjiikazza.

¹⁰ Nižaza Espíritu Santuqui yekjap criichinacžquiz poder tjaača wali milajrunaca paazjapa. Nižaza Espíritu Santuqui yekjap criichinacžquiz poder tjaača, Yooziž tjaata takunaca zuma kjanzt'izjapa. Nižaza Espíritu Santuqui yekjap criichinacžquiz zizni kuz tjaača, žoñinacaž čhiita takunaca zumpacha tantiizjapa, Yoozquiztan tjonchižlan už zajrižquiztan tjonchižlaj, jalla nii. Nižaza Espíritu Santuqui yekjap criichinacžquiz ana pajta taku chiikatča. Nižaza nii Espíritu Santupacha yekjap criichinacžquiz zizni kuz tjaača, nii ana pajta čhiita taku parti criichinacžquiz intintiskatajo.

¹¹ Tsjii Espíritu Santukaz tjapa nii yekja yekja poderanaca tjaača. Jaknužt nii Espíritu Santuqui tjaaz munčhaja, jalla niicama tjapa criichinacžquiz tjaača.

CRIICHI ŽOÑINACAQUI TSJIKAZZA

¹² Cristužtan nižquin criichi žoñinacžtan tsjii curpuchiz žoñižtakazza. Tsjii žoñžta žejlča, kjarami, lismi, čhjujcquimi, cjuñimi, jalla nižtanaca žejlča,

pero tsjii zoñikazza. Wacchi cjenami tsjii curpukazza. Jalla nižta iratača Cristužtan criichinacžtan.

¹³ Criichinacaqui yekja yekja žejlča, judionacami, yekja wajtchiz zoñinacami, piyunanacami, ana piyunanacami, jalla nižtanaca žejlča. Pero bautistaž cjistanaqui Espíritu Santuž cjen tjapa nižta criichinaca tsjii zoñž curpu cunta cjissiča. Nižaza Yooz Ejpqui tjapa criichinacž kuzquizimi Espíritu Santo luzkatchiča.

¹⁴ Tsjii zoñžtaqui kjarami lismi achami čhujcquimi cjuñimi jalla nižtanaca žejlča. Punta punta žejlča tsjii zoñž curpuquiziqui.

¹⁵ Jalla nižta iratača Cristužtan nižžquin criichinacžtan. Jalla nižtiquiztan tjapa Cristužquin criichinacaqui tsjiikazza. Jilanaca, cullaquinaca, nonžna. Tsjii zoñž kjojchaqui ana chiiz waquizičha, tuž cjican: “Wejrqui kjojchakazza, anača wejr kjaraqui; jalla nižtiquiztan anaž tii zoñž curpuquiz želasača”. Jalla nižta chižcum, nii kjojchaqui tirapanča nii zoñž curpu partiquizqui.

¹⁶ Nižaza tsjii zoñž cjuñiqui ana chiiz waquizičha, tuž cjican: “Wejrqui cjuñikazza, anača wejr čhujquiqui. Jalla nižtiquiztan anaž tii zoñž curpuquiz želasača”. Jalla nižta chižcum, nii cjuñiqui tirapanča nii zoñž curpu partiquizqui.

¹⁷ ¿Tjapa zoñž curpuqui čhujquicamažlaj niiqui, kjažt nonžnasajo? ¿Nižaza tjapa zoñž curpuqui cjuñicamažlaj niiqui, kjažt mucžnasajo?

¹⁸ Yoozqui zoñž curpuquiz punta punta utchičha, jaknužt munčhaja, jalla nuž. Jalla nižta irata Yoozqui punta punta Espíritu Santuž kamañanacami nižaza poderanacami tjaachičha criichinacžquiz.

¹⁹ Zoñž curpuquiz anaj punta punta žejlčhaja, anaž ultim zoñž curpu cjitasača.

²⁰ Punta punta želanami, tsjii curpukazza. Jalla nižta irata criichinacaqui punta punta poderanacchizza, nižaza kamañanacchizza, pero tjapa criichinacača Yooz partiquiz, nižaza tsjiikazza.

²¹ Jalla nižtiquiztan čhujquiqui kjaržquiz ana chiiz waquizičha, “Amqui anal pecučha”, cjicanaqui. Nižaza achaqui kjojchquiz ana chiiz waquizičha, “Amqui anal pecučha”, cjicanaqui. Nižaza tsjii criichi zoñiqui yekja criichi zoñžquiz ana chiyasača: “Amqui anal pecučha”, cjicanaqui.

²² Zoñž curpuqui punta puntaž pecča. Jaziqui zoñž curpuquiz jallc'a partiqui zaka žejlča. Nii jallc'a partiqui juc'antiž pecča.

²³ Nižaza zoñž curpuquiz ana zuma chercherchiznaca žejlča. Ninacaqui zquitžtan tjutžtača zuma chercherchiz cjisjapa. Nižaza zoñž curpuquiz chjojžta partinaca žejlča. Ninacaqui zquitžtan tjutžtača, učum ana azjapa.

²⁴ Zuma chercherchiznaca tsjii zquiti tjutzqui anaž pecča. Yoozqui zoñž curpu nižta paachičha. Nižaza Yoozqui zoñž kuz peckatchičha, ana zuma chercherchiznaca tsjii zquitžtan zuma tjutzjapa. Jalla nižta iratača iclizziz zoñinacaqui.

²⁵ Jalla nižta munchičha Yoozqui, criichi zoñinacž ana t'aka t'aka cjisjapa. Nižaza Yoozqui nižta munchičha, porapat zuma munaziñi kuzziz yanapasjapa.

²⁶ Tsjii criichi zoñiž sufran, tjapa criichinacaqui kuzquiz sint'ičha. Nižaza tsjii criichi zoñiž honorchiz cjen, tjapa criichinacaqui nižtan chica chipča.

CRIICHI ZOÑINACŽ KAMAÑ PUNTU

²⁷ Jilanaca, cullaquinaca, tjapa Yoozquin criichinacžtan Cristužtanpacha tsjii kuzzizza. Zapa mayni ančhucqui Jesucristuž partiquiz žejlča.

²⁸ Nižtiqiztan Yooz Ejpqui criichinacžquiz yekja yekja kamañanaca tjaača, iclizziz žoñinacžquiz yanapzjapa. Primiraqui Yoozqui yekjap criichinacžquiz apóstol kamaña tjaachiča. Niiž jaru Yooziž tjaata taku paljayz kamaña tjaachiča yekjap criichinacžquiz. Niiž jaru Yoozqui niiž taku tjaajinz kamaña tjaachiča yekjap criichinacžquiz. Nižaza Yoozqui milajru paaz poder tjaachiča. Nižaza Yoozqui poder tjaachiča laanaca čhjetnajo. Nižaza Yoozqui icliz langzquiz yanapz kamaña tjaachiča. Nižaza Yoozqui kamaña tjaachiča iclizziz žoñinacžquiz irpiñijapa. Nižaza Yoozqui poder tjaachiča, ana pajta takunaca chiichiyajo.

²⁹ Anača tjapa ančhucqui apóstol kamañchizqui. Nižaza anača tjapa ančhucqui Yooziž tjaata taku paljayz kamañchizqui. Nižaza anača tjapa ančhucqui Yooz taku tjaajinz kamañchizqui. Nižaza anača tjapa ančhucqui milajru paaz poderchizqui.

³⁰ Nižaza anača tjapa ančhucqui laanaca čhjetinz poderchizqui. Nižaza anača tjapa ančhucqui ana pajta takunaca chiiz poderchizqui. Nižaza anača tjapa ančhucqui nii ana pajta chiita takunaca intintiskatz poderchizqui.

³¹ Ultim zuma kamañquiz kuz tjaa ančhucqui. Nižaza wejrqui ančucaquiz nii juc'ant zuma kamañal tjaajnuča.

13

ZUMA MUNAZIZ KAMAÑAQUI JUC'ANT ZUMACHA

¹ Jalla tužuča juc'ant zuma kamañaqui. Zuma munaziz kamañaqui juc'ant zumača tjapa kamañanacquiztanaqui. Tsjii žoñiqui ana pajta žoñž takunacami nižaza anjilž takunacami chiyasača. Jalla nižta chiichiž cjenami ana zuma munaziñi kuzziz cječhaj niiqui, jalla nii žoñiqui inapachaž chiyaquiča. Ina takukazza nii žoñž takuqui. Tsjii ina wjajtta cazažtakaz cjesača.

² Nižaza tsjii žoñiqui Yooziž tjaata takunaca paljayasača; nižaza tjapa Yooz pinsitanaca ziasača; nižaza tjapa Yooz puntu ziasača. Pero ana zuma munaziñi kuzziz cječhaj niiqui, anaž čhjulumi cjequiča Yooz yujcquiziqui. Nižaza tsjii Yoozquin tjapa kuzziz žoñiqui Yoozquiztan mayizichiž cjen, tsjii curumi kiskatasacha. Pero jakziltat ana zuma munaziñi kuzziz cječhaja, jalla niiqui čhjulu parlizcumi zizcumi paazcumi anaž čhjulumi cjequiča Yooz yujcquiziqui.

³ Nižaza tsjii žoñiqui tjapa niiž želinchiznaca tojnasaž niiqui, nižaza Cristuž cjen persun curpumiž ujta cjisjapa intirjasaž niiqui, pero ana zuma munaziñi kuzziz cječhaja, jalla niiqui čhjulu paazcumi inakaz cjesača nii persunaltajapa.

⁴ Zuma munaziñi kuzziz žoñiqui tižta kuzzizza. Pazinziz kuzzizza, nižaza okžni kuzzizza, nižaza ana iñiziñi kuzzizza, nižaza ana persun kamaña alawasni kuzzizza, nižaza ana mit kuzzizza.

⁵ Nižaza ana atinar kuzzizza, nižaza zuma munaziñi kuzziz žoñiqui ana malcriat kuzzizza. Nižaza persun kuzcamakaz anaž kamz pecča. Nižaza ana žawjñi kuzzizza. Nižaza ana anawal ayñi tjepuns kuzzizza.

⁶ Nižaza tsjii jilaž ujquiz tjojtsi cjenaqui, anaž chipasača zuma munaziñi kuzziz žoñiqui. Antiz tsjii jilaž zuma paachi cjenaqui, nekztan chipsnasača.

⁷ Čjul pruebanaca tjonanami zuma munaziñi kuzziz žoñiqui awantiča. Nižaza zuma munaziñi kuzziz žoñiqui parti criichinacž puntuquiztan persun kuzquiz cjiča; “Zuma kuzzizlan”, cjan. Nižaza zuma munaziñi kuzziz žoñiqui parti criichinacž puntuquiztan persun kuzquiz: “Zuma kamačan”,

cjičha. Nižaza čhjul pruebanacaž tjonanami Yoozquin tjurt'iñi kuzziz cjequičha zuma munaziñi kuzziz žoñiqui.

⁸ Nii zuma munaziz kamañiqui anawira tucuzinznaquičha. Nii Yooziž tjaata taku paljayz kamañiqui tucuzinznaquičha; nižaza nii ana pajta taku chiiz kamañiqui zakaz tucuzinznaquičha. Nižaza nii Yooz puntu zumpacha zizta paljayz kamañiqui panž tucuzinznaquičha.

⁹ Tii muntuquiz žejlcanaqui Yooz puntuquiztan anapanž tjappacha zizi atasačha. Nižaza Yooz puntuquiztan anapanž tjappacha intintiskati atasačha.

¹⁰ Wiruñiqui Yooztan kamcanaqui Yooz puntu tjappacha zizaquičha. Jalla nii timpuqui Yooz puntu tjaažinz kamañanacaqui kataquičha.

¹¹ Jalla tižta iratačha Yooz puntu zizqui. Zoñiqui kolta uza cjicanaqui, ocjal chiichiiz chiiñičha, nižaza ocjal pinsi pinsiñičha, nižaza ocjalž pinsamintuchiz tantiiñičha. Jalla nižta žejltačha ocjala cjicanaqui. Jazizti pajk žoñi cjiscuqui, ocjalažtakaz chiichiiznacami, pinsiznacami jaytitačha. Jalla nižta irataž Yooz puntunaca zizqui.

¹² Zur ispiquiz persun yujcqui ana zuma kjanaž tjenčha. Jalla nižta iratačha anziqui Yooz puntunaca zizqui, ana kjana. Wiruñiqui Yooztan kamcan zuma kjanaž zizaquičha Yooz puntuqui. Anziqui anaž tjappacha zizzuca Yooz puntuqui. Wiruñiqui Yooztan kamcan tjapa Yooz puntunaca zizaquičha, jaknužt Yoozqui učum puntuquiztan zumpacha zizzaja, jalla nižta.

¹³ Ultimquiziqui criichi žoñinacaqui Yoozquin tjapa kuzziz wiñaya cjequičha. Nižaza criichinacaqui Yoozquiztan zumanaca niž jaru niž jaru tjewznaquičha. Nižaza criichinacaqui zuma munaziñi kuzziz wiñaya cjequičha. Pero tsjičha chekan waliqui, zuma munaziñi kuz, jalla nii.

14

YOOZ TAKU PALJAYZ KAMAÑA PUNTU

¹ Jalla nižtiquiztan zuma munaziz kamañquiz kuz tjaa. Jalla nii kamañča juc'ant chekanaqui. Nižaza Yooz Espiritu Santuž tjaata kamañnacquiz kuz tjaa. Yooz taku paljayz kamañquiz juc'anti kuz tjaa.

² Nii anaž pajta taku chiiz kamañiqui anačha chekanaqui. Nii kamañchiz žoñiqui Yoozquizkaz chiičha. Anaž žoñžquiziqui chiičha. Jalla nuž ana pajta taku chiyan parti žoñinacaqui anaž intintazi atčha. Espiritu Santuqui ana zizta chjojžta taku paljayzkatčha nii ana pajta taku chiiñi žoñžquiz.

³ Pero nii Yooz taku paljayñi žoñiqui parti criichinacžquiz paljayčha, juc'ant zuma kamajo, nižaza Yoozquin tjurt'iñi kuzziz cjeyajo, nižaza kuzta cjeyajo.

⁴ Nii ana pajta taku chiiñi žoñiqui persunjapakaz yanapčha Yoozquin juc'anti kuzziz cjisjapa. Nii Yooz taku paljayñi žoñizti parti criichinacžquiz yanapčha Yoozquin juc'anti kuzziz cjeyajo.

⁵ Wejrqui ančhucaquiz cjiwčha, tjapa ančhucqui ana pajta taku chiichiiñi cjičhaja. Pero juc'ant chekanaqui, Yooz takunaca paljayñiž cjičhaja, jalla nižta anchal pecučha. Nii Yooz takunaca paljayz kamañchiz žoñičha juc'ant chekanaqui nii ana pajta taku chiichiiz kamañchiz žoñžquiztanaqui. Jalla nižtiquiztan ana pajta taku chiichiizcu, parti criichinacžquiz intintiskatz waquizičha Yoozquin juc'anti kuzziz cjeyajo.

ANA PAJTA TAWKZTAN PALJAYZ KAMAÑA PUNTU

⁶ Jilanaca, cullaquinaca, ančhucaquiz tjonžcu ana pajta tawkžtan paljayž niiqui, nii paljaytaqui inakaz cjequičha ančhucaquiz. Ana yanapasačha

tsjan zuma kamañchiz cjeyajo. Ančhucaquiz yanapzjapa, wejtlaqui kjanapacha paljaystanča, tsjii Yooziž tjaata ew takumi, tsjii Yooz puntu zizta takumi, tsjii Yooziž intintiskatta takumi, tsjii Yooz puntu catokta takumi, jalla nii. Nekztan ančhucqui yanaptaž cjequiča, Yoozquin juc'anti kuzziz cjisjapa.

⁷ Tsjii pincallu pjujñi žoñiqui čhjakčhjakauiz niiqui, nii pjujta wirsu ana pajta cjequiča. Nižaza pincallu pjujñinacami quitara icñinacami čhjul musicunacami tsjii wirsu ana kjanapacha tejlznaquiz niiqui, parti žoñinacazti čhjul wirsut pjujčhaja, icčhaja, anaž tantiyi ataquiča. Jalla nižta iratača ana pajta tawkžtan chiizqui.

⁸ Tsjii quira zalzjapa trompetaz ana zuma claro tjawunaquiz niiqui, jalla nuž ana zuma tjawuntiquiztan zultatunacaqui anaž listu tjaczi cjequiča nii quirajapaqui.

⁹ Jalla nižta irata zakaz ančhucaquiz watča. Tsjii criichi žoñiqui ana intintazuc takuž paljayaquiz niiqui, ančhucqui ana intintichiž cjequiča, čhjulut chiitčhaja, jalla nii. Jakziltat ana intintazuc takuž chiičhaj niiqui, inakaz chiiča.

¹⁰ Tii muntuquiz tjapaman takunacapanž žejlž, jaz. Nižaza zapa takuqui intintitaž cjesača jakziltižquizimi.

¹¹ Pero wejrqui tsjii chiita taku anal intintasaž niiqui, niwjctanaqui yekja wajtchiz žoñižtakaztča nii chiiñi žoñižquiztanaqui. Nižaza nii yekja taku chiiñi žoñiqui wejtquiztan yekja wajtchiz žoñižtazakazza.

¹² Ančhucaquiz nižtazakazza. Ančhucqui Espíritu Santuž tjaata kamañanacami ancha tanz pequiñchucča. Jalla nižtiquiztan ančhucqui tsjan chekan kamañanacquiz kuz tjaz waquiziča, parti criichinacaž Yoozquin juc'anti kuzziz cjeyajo.

¹³ Jalla nižtiquiztan jakziltat ana pajta taku chiyachaja, Yoozquin mayiziz waquiziča, niž chiita taku zuma intintiskatzjapa parti criichinacžquiz.

¹⁴ Nižaza wejrqui ana pajta tawkžtan Yoozquin mayizaž niiqui, wejt animukaz mayaquiča. Wejt kuzpacha anaž intintiča. Jalla nižtiquiztan inakazza wejt kuzqui. Ana čhjul provechumi jwesasača.

¹⁵ ¿Jalla nuž cjenauki kjažt cjes wejrqui? Kuztanami animužtanami Yoozquin mayiziz waquiziča. Nižaza kuztanami animužtanami Yooz wirsu its waquiziča.

¹⁶ Animukaz ana pajta tawkžtan Yoozquin gracias cjican chiyasača. Pero jalla nuž chiyan parti nonzñi žoñinacaqui anaž intintazi atasacha. Jaziqui: “Amén. Jalla nužoj cjila”, cjican ana kjaazñi atasacha.

¹⁷ Ana pajta chiita orasunaqui walikaz cjesača, Yoozquin gracias cjicanauki. Pero nii orasunaqui parti criichinacžquiziqui anaž yanapča, Yoozquin juc'anti kuzziz cjeyajo.

¹⁸ Wejrqui ana pajta tawkžtan juc'anti chiyučha tjapa ančhucaquiztan. Jalla nižtiquiztan Yoozquin gracias cjican chiyučha.

¹⁹ Jalla nuž cjenami parti criichinacžtan ajcžcu, wejrqui nii parti criichinacžquiz tjaajinz pecučha. Jaziqui ana pajta tawkžtan anal chiiz pecučha. Jalla nuž chiyan parti criichinacaqui anaž tantiyi atasacha. Jalla nižtiquiztan iclizziz žoñinacžtan ajcžcu pjijska intintita takunaca chiiz pecučha, tunca waranka ana pajta takunacquiztan.

²⁰ Jilanaca, cullaquinaca, pruebaž tjonan, anapan uj paa. Antiz zuma pinsiñiž cjee.

²¹ Cjijrta Yooz takuqui, tuž cjiča: “Wejrqui yekja wajtchiz žoñinacžquiz paljayskatača. Ninacaqui ana intintazuc tawkžtan tii wajtchiz

žoñinacžquiz paljayaquiča. Nižta ana pajta taku nonžcanami tii wajtchiz žoñinacaqui anaž wejtquin kuzziz cjequiča. Jalla nuž cjiča Yooz Jiliriqui”.

²² Ana pajta takunaca paljajanaqui jalla nii chiita takuqui ziñalažtakaz cjequiča, ana criichi žoñinacžquizi. Nii ana intintazzuc takunacaqui anača criichi žoñinacžtajapa. Yooziž tjaata takuž jalla niiča criichi žoñinacžtajapaqui. Nii takuqui anača ana Yoozquin criichi žoñinacžtajapaqui.

²³ Tjapa criichi žoñinacžtan ajcziž cjen tsjii ana criichinacaqui luzasača. Nekztan, ana pajta takunacakaz chiiñi nonznaquiž niiqui, ninacaqui criichi žoñinacžquiz chersnaquiča lucurat žoñinacžtakaz.

²⁴ Pero criichinacaqui Yooziž tjaata takunacakaz paljayaquiž niiqui, nekztan nii ana criichi žoñinacaqui persun kuzquiz sint'aquiča. Yooz taku paljaytaž cjen, nii ana criichi žoñinacž ujnaca tjeežtaž cjequiča. Nii criichinacž chiita takunaca nonžcu persun kuzquiz amayt'asaquiča, nekztan persun ana zuma kamtaž pajaquiča.

²⁵ Jalla nuž ninacaž chjozaca uj paatanacaqui tjeežtaž cjequiča. Jalla nižtiquiztan quillžcu, werar Yoozquin macjatasacha, nižquin sirwizjapa. Nekztan chiyaquiča; “Yoozqui ančhucatan kalča”, cjicanaqui.

CULTO PAAZ PUNTU

²⁶ Jilanaca, cullaquinaca, iclizziz žoñinacžtan ajzczan, jalla tuž waquiziča. Yekjapanacaqui Yooz wirsu tjaajnasacha. Yekjapanacazti tsjii zuma taku tjaajnasacha. Yekjapanacazti tsjii Yooziž tjaata taku intintiskatasacha. Yekjapanacazti ana pajta taku paljayasacha. Yekjapanacazti nii ana pajta chiita taku zumpacha intintiskatasacha. Jalla niiqui walikazza. Pero tjapa chiita takunacaqui criichinacžquiz yanapz waquiziča, Yoozquin juc'anti kuzziz cjejajo.

²⁷ Nii ana pajta taku paljayñi žoñiqui tsjii pucultan čhjepultanž nuž cjesacha. Nižaza niž jaru niž jaru turnasasacha. Nižaza ninacž chiita taku intintiskatta cjis waquiziča.

²⁸ Intintiskatñi žoñi ana želaquiž niiqui, nekztan ana pajta takunaca ana chiiz waquiziča. Pero nii ana pajta taku chiiñi žoñinacaqui persun kuzquiz paljayasacha, Yoozquinami.

²⁹ Nižaza nii Yooz takunaca paljayñi žoñinacaqui tsjii pucultan čhjepultanž nuž cjesacha. Parti criichinacaqui ninacž chiita taku zumpacha tantiyaquiča, werara ana werara paljayñi, jalla nii.

³⁰ Yoozqui tsjii julzi žoñžquiz taku tjaaquiž niiqui, nekztan nii ora chiiñiqui nužquiz apatatasacha, niž chiizquiztan.

³¹ Jilanaca, cullaquinaca, paljayñi žoñinacaqui niž jaru niž jaru paljayz waquiziča, parti criichinacaz Yooz taku zumpacha zizajo, nižaza juc'anti Yoozquin kuzziz pek'inchayta cjejajo.

³² Nii Yooz taku paljayñi žoñinacaqui persun kuzquiz zuma ewjas waquiziča, niž jaru niž jaru paljayzjapa.

³³ Iclizquiziqui Yoozqui anaž tsjiiza tsjiiza arañi pecča. Iclizziz žoñinacžtan ajczcu zuma lijituma Yoozquin rispita. Zuma walikaz ajcz waquiziča. Jalla nuž pecča Yoozqui.

Jalla tuž criichi žoñinacaqui ajczñipanča tjapa wajtquiziqui.

³⁴ Nižaza iclizquiziqui maatak criichinacaqui ch'ujupanž želasacha, anaž chiiz waquiziča. Nižaza maatak criichinacaqui luctakž mantuquiz cjis-tanča. Jalla nuž cjiča cijirta Yooz takuqui.

³⁵ Maatakaqui tsjii puntu ana zuma intintiĉhaj niiqui, kjuyquin persun luctakžquiz pewcznaquiĉha zuma intintizjapa. Nii ajcztiquizpacha ana pewcznaquiĉha, criichinacžtajapa ana ombrawillta cjejajo.

³⁶ Anĉhucqui nii tjaajinta jaru kamz waquiziĉha. Yooz takuqui anĉhucaquiztan anaž kalltiĉha. Nižaza anaĉha anĉhuc alajquizkaz Yoozqui taku tjaachiqui. Weriž tjaajintacama kamĉha tjapa iclizziz žoñinacaqui.

³⁷ Jakziltat Yooz taku paljayz kamañchiz cjeĉhaja, nižaza jakziltat Espíritu Santuž tjaata kamañchiz cjeĉhaja, jalla ninacžlaqui tii weriž cijjrta taku pajstanĉha. Jalla tii takuĉha Yooz Jilirž mantitaqui.

³⁸ Jakziltat tii weriž cijjrta taku ana pajz pecĉhaj niiqui, parti criichinacaqui nii žoñžquiz anaž pajaquiĉha. Nii žoñiqui anapanž Espíritu Santuž tjaata kamañchizqui.

³⁹ Wejt jilanaca, cullaquinaca, tužuĉha chekanaqui. Yooz takunaca paljayz kamañquiz kuz tjaa. Pero tsjii žoñiqui ana pajta tawkžtan chiyaquiž niiqui, jalla nii chiiñi žoñžquiz anaž atajz waquiziĉha.

⁴⁰ Jilanaca, cullaquinaca, iclizquiziqui zuma jurmali cultu paaz waquiziĉha, nižaza ajcztiquiz paljayñinacaqui niiz jaru niiz jaru chiiz waquiziĉha.

15

JESUCRISTUZ JACATATTA PUNTU

¹ Jilanaca, cullaquinaca, weriž tjaajinta takunaca cjuñskatz pecuĉha. Wejrqui werar liwriiñi Yooz taku tjaajinchinĉha. Nižaza weriž tjaajintanaca nonžcu anĉhucqui catokchinĉhucĉha; nižaza nii tjaajintacama kamzjapa tjup kuzzizĉhucĉha.

² Nižaza liwriiñi Yooz taku tiraž catokaquiž niiqui, nii liwriiñi Yooz takuž cjen anĉhucqui tsjan tsjan ujnacquiztan liwriita cjequiĉha, tsjan zuma kamzjapa. Juñta kuzquizkaz catokchižlaj niiqui, nii juntuñallakaz catoktiquiztan ultimu ana liwriitaž cjequiĉha.

³ Wejrqui anĉhucaquiz juc'ant chekan takunaca tjaajinchinĉha. Tuquiqui wejtquiz zakaz nii zuma takunacaqui tjaajintataĉha. Jalla tužuĉha nii tjaajinta takunacaqui. Jesucristuqui uĉhum uj laycu ticziĉha. Jaknužt Yooz tawk liwruquiz cijrtatažlaja, jalla nii cijjrta jaru cumplissiĉha.

⁴ Nekztanaqui Jesusiž curpuqui tjažtataĉha. Nekztanaqui nuž tjažtiquiztan ĉhjep majquiztan ticziquiztan jacatatchiĉha. Jaknužt Yooz tawk liwruquiz tuqitan cijrtatažlaja, jalla nii jaru cumplissiĉha.

⁵ Jacatatžcu Jesucristuqui Pedružquiz parizichiĉha. Nekztanaqui niiz illzta apostolanacžquiz parizichizakazza.

⁶ Nekztanaqui niiz wiruñ pjijska patac jilanac ajcziquiz parizichizakazza. Jila parti ninacaqui tira žejtĉha, tsjii kjažta žoñinacakaz ticziqui.

⁷ Niiz wiruñ Jacobžquiz parizichizakazza. Nekztanaqui tjapa niiz illzta apostolanacžquiz parizichizakazza.

⁸ Ultimquiziqui wejtquiz zakaz parizichiĉha. Wejrqui parti apostolanacžquiztan wirwirilla Yooz partiqui luzzinĉha.

⁹ Wejrqui parti apostolanacžquiztan ana anĉha waquizuĉha. Tuquiqui wejrqui Yoozquin criichinacž quintra ojklayiñtaĉha. Jalla nižtiquiztan anataĉha Cristuž apóstol cjita cjichuca.

¹⁰ Yooz wejtquiz okzñiž cjen, wejrqui apóstol kamañquiz uchtitĉha. Pero ana ina Yoozqui wejr utchiĉha. Wejrqui apóstol kamañquiz juc'anti jilacami langzinĉha nii parti apostolanacžquiztan. Nii langztiquiztan wejrqui

ana honorchiz cjichucača, Yoozza honorchizqui. Yoozqui wejtquiz wali yanapchiča, apóstol kamañquiz zuma cumplisjapa.

¹¹ Nužulkazza nii puntuqui. Chekpachača wejrnacqui ančhucaquiz liwriiñi Yooz taku paljaychintqui. Jaziqi ančhucqui nii liwriiñi taku tjapa kuztan catokchinčhucča.

ZOÑINACAQUI JACATATAQUICHA

¹² Jaziqi wejrnacqui tjaajinchinča, Jesucristuqui ticziquiztan jacatatchi, jalla nii. Yekjap ančhuczi chiiñiča: “Zoñinacaqui ticzcu ana jacatatasacha”. ¿Kjažta nižta cjesajo?

¹³ Ticziquiztan ana jacatattasaž niiqui, Jesucristuqui anapaj jacatatchi cječhani.

¹⁴ Nižaza Jesucristo ana jacatatchižlaj niiqui, jalla nižtiquiztan wejrnacaž paljajta liwriiñi taku nuž cjenacqui inapankat cječhani. Nižaza ančhuca Cristužquin criichi kamañacqui inapanzakat cječhani.

¹⁵ Wejrnacqui “Yoozqui Cristo jacatatskatchiča” jalla nuž cjiwchiya. Ana jacatatchižlaj niiqui, wejrnacqui toscar tisticužtakazlani Yooz puntuquiztanani. Ticzi žoñinacaqui ana jacatattasaž niiqui, Yoozqui Jesucristo anapaj jacatatskatchi cječhani.

¹⁶ Ticzi žoñinacaqui ana jacatattasaž niiqui, Jesucristupacha anapaj jacatatchi cječhani.

¹⁷ Nižaza Jesucristuqui anapan jacatatchižlaj niiqui, ančhucaž nižquin tjapa kuztan criitaqui inapankat cječhani. Ančhuca ujquiztan anapan liwriita cječhani.

¹⁸ Nižaza Jesucristužquin criichi ticzi žoñinacaqui ninacž ujchiz cjen casticta cječhani.

¹⁹ Jesucristužquin criichinacaqui ultim liwriiz ora tjewža. Nii tjewzqui inakazlaj niiqui, učhumqui ana criichi žoñinacžquiztan juc'anti incalltaž cječhani.

²⁰ Pero ultim werara Jesucristuqui ticziquiztan jacatatchipanča. Jalla niiča primir ticziquiztan jacatatchi žoñiui, primira pookchi zkala ricujtažtakazza.

²¹ Primirquiztanpacha tsjii žoñiž uj paachiž cjen, tjapa žoñinacaqui ticstanča. Jalla nižtakaz tsjii žoñiž cjen tjapa Jesucristužquin criichi žoñinacaqui jacatataquiča, Yooztan wiñaya kamzjapa.

²² Adán cjita žoñiž cjen tjappachaž ticža, jalla nižtakaz Jesucristo cjita žoñiž cjen tjapa nižquin criichi žoñinacaqui jacatatskatta cjequiča.

²³ Nižaza tjapa criichinacaqui jaknužt Yooz munčhaja, jalla niicama jacatatskatta cjequiča. Jesucristo, niiča primiraqui. Nekztan Jesucristuž tjonz tjuñquiziqui niž parti žoñinacaqui jacatataquiča.

²⁴ Jalla niž wiruñ niž parti žoñinacž jacatattiquiztan, tii muntuquiz tucuzinzaquiča. Nekztan tjapa Jesucristuž quintrajilirinacami, nižaza niž quintrajmantiñinacami, nižaza niž quintrajazzinacami, jalla tjappacha liwj tjatantaž cjequiča. Jalla nekztanaqui tjapa mantizqui Yooz Ejpžquin intirjitaž cjequiča.

²⁵ Pero aniziqui Cristuqui tira mantistanča niž quintrarionaca liwj atipscama. Niiž quintranaca tjewcztažokaz cjequiča.

²⁶ Ultimquiziqui ticzqui atiptaž zakaz cjequiča. Ticzqui ana iya želaquiča.

²⁷ Yoozqui Cristo utchiča tjappacha mantizjapa. Yooz Ejpkazza ana Cristuž mantuquiz žejlča. Jalla nii puntu kjanača. Tjapa nekztanaqui Cristuž mantuquiz žejlča.

²⁸ Yoozqui Jesucristo utchiča, tjappacha mantizjapa. Ultimquiziqui Jesucristo Yooz Majchqui tjapa tii muntuquiz žejlñinacami atipžcu, niipachaž Yooz Ejpž mantuquiz cjequiča. Yooz Ejpča wiñaya juc'ant chekanaqui cjequiča, tjappachquiztanaqui.

²⁹ Tsjilla cjesača, jacatatz puntuzakaz. Ančhucaltaž tsjii cuzturumpi žejlča, criichi žoñiqui ima bautistan, ticziž cjen, žejtñi criichi žoñiqui nii ticzi criichiž cuntiquiztan bautismo tanzñiča. Ticziquiztan ana jacatatchi cječhaja, ¿Kjažtiquiztan nižta paa ančhucjo? ¿Čhjulpapa bautismo tanžjo? ¿Ticzi žoñž cuntiquiztanajo?

³⁰ Nižaza ticziquiztan ana jacatatchi cječhaj niiqui, ¿Kjažtiquiztan wejrnacqui zapuru sufrican Yooz taku paljayz kamañquiz tira ojklayojo?

³¹ Apóstol kamañquiz ojklayan anchucqui Jesucristo Jiliržquin criichinčucča. Jalla nuž cjen cuntintuž wejrqui. Jalla nuž chiican werar razunal chiyuča. Nižaza zapuru wejrqui ticz llaquizican želuča, apóstol kamañquiz ojklaycan. Jilanaca, jalla nuž chiican, werar razunal chiyuča.

³² Wejrqui Efeso cjita wajtquin preso cjicanaqui anawal g'uit animalanacžtan kichjaskattatača. Ticziquiztan anažlaja jacatatñi niiqui, weriž nuž sufritaqui inakat cječhani. Ana criichi žoñž pinsita jaru inapankazza weriž sufritaqui. Ninacaqui tuž cjiñiča: “Lujlžla, licžla, jaka kat učumqui ticznačan”, jalla nuž cjiñiča ana criichi žoñinacaqui. Ticziquiztan ana jacatattasaž niiqui, nuž cjiñi žoñinacaqui zuma razunchiztakat chiičhani. Pero ultimo žoñinacaqui jacatataquiča.

³³ Jaziqui ančhucqui anaž incallskata. Ana zuma kamañchiz mazinacchizčhucčhalaj niiqui, ančhucqui zuma kamañquiztan tsjii kjutñi chjichtaž cjesača.

³⁴ Ančhucqui zuma lijitum razunanacchiz cjisna; nižaza lijituma cjee; anaž uj paa. Yekjap ančhucqui Yooz puntunaca ana zuma zizza. Jalla nii ančhucquiz chiižinuča, ančhuc azajo.

JACATATCHI ZOÑINACŽ CURPU PUNTU

³⁵ Cunamit tsjii žoñiqui pewcznačan, tuž cjican: “¿Jaknužt ticzi žoñinaca jacatataquejo? ¿Čhjuluž cherchi curpuchiz cjequejo?”

³⁶ Zumzu pewczñi pewcziča. Semilla čhjaczcu, nii čhjacta semillaqui ana katchi cjequiz niiqui, ew zkala ana jecznašača.

³⁷ Nii čhjacta semillaqui anaž ew zkalapacha cjesača. Nii čhjacta semillaqui semillakazza, trigo cjenami, yekja cjenami, semillakazza, anaž ew zkalapacha cjesača.

³⁸ Semilla čhjactiquiztan jaknužt Yoozqui munčhaja, jalla nižta ew zkala ulanskatča. Čhjacta semillquiztan jama, punta puntaž ew zkala ulanča. Tjapa zkananacaqui anača tsjiikaz. Punta punta žejlča.

³⁹ Jalla nižta iratača tii muntuquiz žejlñi curpuqui. Zoñinacž curpuqui yekjača. Ch'iznacž curpuqui yekjača.

⁴⁰ Nižaza arajpachquin žejlñinacž curpuqui yekjača. Nižaza yokquiz žejlñinacž curpuqui yekjača. Arajpach curpuqui tsjemata cheechi tježa yokquiz žejlñi curpuquiztan.

⁴¹ Tjuñ kjanaqui tsjematača jiiz kjanquiztan. Nižaza tsjematazakazza warawarž kjanquiztan. Nižaza tsjii warawarž kjanaqui tsjematazakazza yekja warawarž kjanquiztanaqui.

⁴² Jalla nižta iratača jacatatzqui. Ticzi curpuqui tsjematača jacatatchi curpuquiztan. Nii ticzi curpuqui tjatža, nižazaž mojkča. Nii jacatatchi curpuzi ana ticznasača, nižaza ana mokasača.

43 Nii ticzi curpuqui ana honorchizza. Nii jacatatchi curpuzti zuma honorchizza. Nii ticzi curpuqui ana azzizza. Jacatatchi curpuzti walja azzizza.

44 Nižaza ticzzuca curpuqui tii muntuquiz kamzjapa curpukazza. Jacatatchi curpuqui tsjematača, wiñaya kamzjapa. Tii muntuquiz kamcan, žoñinacaqui curpuchizza. Nižta zakaz jacatatzcu curpuchiz zakaz cjequiča, wiñaya kamzjapa.

45 Cjijrta Yooz takuqui tuž cjiča: “Tuquita žoñiqui Adán cjitatača, nižaza žejtñi curpuchiztača, tjapa niiž majch maatinacžtajapaqui”. Cristuqui Adanžtapachazakazza. Jalla niiqui wiñaya žetiž tjaača, tjapa niižquin criichi žoñinacžtajapaqui. Yooztan kamz, jalla niiča wiñaya žetiqui.

46 Tii muntuquiz žoñinacaqui kamča žejtñi curpuchiz. Wiruñiqui jacatatzcuqui žoñinacaqui wiñaya žejtñi curpuchiz cjequiča.

47 Tuquita žoñiqui yok pjilquiztan paatača. Wiruñta žoñiqui, Jesucristo Jiliriqui, arajpachquiztan tjonchiča.

48 Tii yokquiz kamñi žoñinacž curpuqui Adanž curpu iratača. Nižaza Yooztan arajpachquin kamñi criichinacž curpuqui Jesucristuž jacatatchi curpu iratača.

49 Učumnacaqui Adán irata curpuchizza. Pero jacatatzcu Jesucristo irata kamaquiča, ew curpuchiz.

50 Jilanaca, cullaquinaca, jalla tii puntu tjaajnuča, ančhucaquiz zizkatzjapa. Janchichiz nižaza ljokchiz curpuqui arajpach wajtquin ana luzasača. Nižaza tii mojkñi curpuqui anaž wiñaya žetasača arajpachquin.

51 Tsjii zakaz ančhucaquiz zizkatz pecuča. Tjapa criichinacaqui anaž ticznaquiča. Pero tsjii ratullakaz curpunacaqui campiižintaž cjequiča.

52 Tsjii čhjujqui jaknužt č'ipquiñižlaja, jalla nuž tsjii ratulla curpu campiižintaž cjequiča. Arajpach anjilaž trompeta tjawžtan, curpunacaqui campiižintaž cjequiča. Nii trompeta tjawžtan, ticzi žoñinacaqui jacatatskatataž cjequiča, ana iya ticzjapa. Nižaza žejtñi žoñinacž curpunacazakaz campiižintaž cjequiča.

53 Tii yokquiz žejlñi curpuqui anaž wiñaya tjurñi cjesača. Jalla nižtiquiztan učumqui ew curpuž tanstanča wiñaya žejtzjapa. Nižaza učum ticzñi curpuqui anaž wiñaya tjurñi cjesača. Jalla nižtiquiztan učumqui ana ticzñi curpu tanstanča.

54 Učumnacaqui ew wiñaya žejtñi curpuchiz cjequiča, nižaza ana ticzñi curpuchiz. Jalla nuž wattan Yooz takuqui cumplissi cjequiča. Yooz takuqui tuž cjiča: “Ticzqui atipžtaž cjequiča. Jalla nižtiquiztan ana iya ticz želaquiča.

55 Nižaza ticzqui anapanž iya atipaquiča”. Ticzqui anaž iya žoñinacžquiz llaquita cjiskataquiča.

56 Ujchiz cjen ticz žejlča. Nižaza ticzqui žoñinacžquiz llaquita cjiskatča. Nižaza tuquita cjijrta liiqui žoñinacžquin persun ujnaca tjeeža.

57 Wejrqui Yoozquin ancha gracias cjican tjaa-uča. Jesucristo Jilirž cjen učumqui ticzquiztan atipaquiča.

58 Jalla nižtiquiztan, weriž pecta jilanaca, Yoozquin tjurt'iñi kuzziz cjee, nižaza Yoozquin tjup kuzziz cjee, nižaza Jesucristo Jilirž tjaa kamañquin juc'anti juc'anti kuz tjaa. Ančhucqui zizza, Jesucristo Jiliržtajapa langzqui anača inaqi.

16

¹ Tsjii zakal chiižinuča, criichinacžtajapa paaz juntiz puntuquiztan. Jaknužt Galacia provinciquin wejrqui tjapa iclizziz žoñinacžquiz chiižinčinčhalaja, jalla nižta irata ančhucaquiz chiižinuča, paaz juntantiz waquiziča, pori criichinacžquiz yanapzjapa, jalla nii.

² Zapa siman tumincuqui ančhucqui ančhucaž cantiquiztan jama t'akz waquiziča. Jalla nuž t'akžcu chjojwaquiča wejt tjonzcama. Nekztan weriž tjontan, ana žoñ žoñžquiztan apura ojklaycan paaz juntantichuca. Ančhucaž t'akzta paazqui listupachakaz cjequiča.

³ Nižaza ančhucqui tsjii kjaž jilanaca illz waquiziča, nii juntantita paaz chjichñijapa Jerusalén wajtchiz criichinacžquiz. Nižaza ančhucqui nii illzta jilanacžquiz tsjii carta credencialž tjaaquiča. Nekztanaqui wejr tjonžcu, wejrpachal ninaca cuchanžcača Jerusalén watja.

⁴ Wejr ojkchuca cjequiž niiqui wejttan chicaž okaquiča ninacaqui.

TSJII KJAZT PUNTUNACA

⁵ Ima tjoncan, wejrqui Macedonia yokaran ojklayasaj cjiwča. Wiruñuqui Corinto irantasaj cjiwča, ančhucaquiz tjonzjapa.

⁶ Irantižcu tsjii kjaž maj kamačan, uz cunamit nicju sac timpu watačhani. Nekztanaqui ančhucqui wejt ojklayzjapa yanapasača, jakzi ojkz cjenami, jalla nii.

⁷ Wejrqui tsjii upacama watcankaz ana tjonz pecuča. Antiz tsjii kjaž maj ančhucatan kamz pecuča, Yooz Jiliriž munan.

⁸ Pero Efes wajtquin kamača Pentecostes tjuñicama.

⁹ Tii Efes wajtquiz ancha Yooztajapa langz žejlča. Nižaza zumpachapan langznan, walja žoñinacaqui criyačhani. Nižaza walja Yooztajapa langžni quintra žoñinaca žejlča.

¹⁰ Timoteož irantižquitan, ančhucqui Timoteož kuz cuntintupanž cjiskataquiča. Niiqui Yooz Jiliržtajapa langža, wejr irata.

¹¹ Jalla nižtiquiztan anaž jecmi ančhucaquiztan nii Timoteo iñarasača. Antiz ančhucqui juc'antiž yanapaquiča, nii zuma cuntintu tira ojklayajo. Nižaza nii yanapaquiča, wejr chertzni quejpžcajo. Tekzi wejrqui Timoteo tjewznuča parti criichi jilanacžtan.

¹² Apolos jilž puntuquiztan tiil maznuča. Wejrqui ancha niižquiz rocchinča, yekjap jilanacžquiz cumpañt'ajo, ančhucaquin chertzni. Parti jilanacžtan ojkz cjen Apoluqui ana okawk cjichiča. Wiruñ niiqui ančhuc chertzni okačhani, atchucaž cjen.

¹³ Ančhucqui persun kamaña cwitaza. Yoozquin tjurt'iñi kuzziz cjee. Yooz aztan tjup kuzziz cjee.

¹⁴ Chjulu paacanami zuma munaziñi kuzziz cjee.

¹⁵ Jilanaca, cullaquinaca, ančhucqui zizza. Acaya yokquiz Estefanasqui niž jamillanacžtanpacha primira Yoozquin criichiča. Nekztanaqui ninacaqui parti criichi jilanacžquiz yanapzjapa kuz tjaachiča.

¹⁶ Jalla nižta kuzziz žoñinacž tawk jaru kama. Nižaza tjapa nižta criichinacžquiz yanapñinacami, nižaza Yooztajapa langžñinacami rispitaquiča. Nižaza ninacž tawk jaru kama.

¹⁷ Estefanastan Fortunatžtan Acaicužtan jalla ninacaž tjontan, walja cuntintutača wejrqui. Ančhucaž ana wejttanž žejlchucaž cjen, ninacača ančhuc cuntiquiztan wejr yanapchiqui.

¹⁸ Wejttan kamcan ninacaqui wejt kuzquiz amtaychiča, jaknužt ančhuca kuzquiz amtayčhaja, jalla nižta. Nižta žoñinacaqui, rispittaj cjila.

¹⁹ Asia provinciquin žejlñi jilanacaqui ančhucaquin tsaanžquiča. Aquilžtan Priscilatan, nižaza ninacž kjuyquiz ajczñi jilanacžtan, jalla tjapa ninacaqui ančhuc criichinacžquin tsaanžquiča, Jesucristo Jilirž tjuuquiz.

²⁰ Nižaza tjapa criichi jilanacaqui ančhucaquin tsaanžquiča. Nižaza ančhucaquiz porapat zuma kuztan tsaanassnaquiča.

²¹ Wejrqui Pablutča. Persun kjaržtan tii weriž tsaanta litraqui cijjruča.

²² Jakziltat Jesucristo Jiliržquin ana kuzziz cječhaja, nižaza quintra cječhaja, jalla niiqui anawalquiz uchtaž cjequiča. ¡Učhum Jesucristo Jiliri urej tjonla!

²³⁻²⁴ Nižaza Jesucristo Jiliriqui ančhucaquiz zuma yanapt'ila. Nižaza wejrqui tjapa ančhucaquin k'ayichučha Jesucristuž cjen. Jalla nužoj cjila. Amén.

SEGUNDA CARTA DEL APOSTOL SAN PABLO A LOS CORINTIOS

¹ Wejr Pabluqui Jesucristuž illzta apostoltča. Yoozqui niiz munañpi jaru tii apostol puestuquiz wejr utchiča. Jaziqui tii cartal apayžcuča ančhucaquin Corinto wajtchiz žoñinaca. Wejttan Timoteužtan ančhucaquin tsaanžcuča. Nižaza tjapa Acaya yokquin kamñi žoñinacžquin tsaanžcuča. Ančhucqui Yoozquin criichiž cjen Yooz icliz žoñinacžhucča.

² Učhum Yooz Ejpžtan Jesucristo Jiliržtan ančhucaquiz yanapt'ila. Nižaza ančhucaquiz walikaj kamkatla.

YOOZ EJP ANCHA OKZÑI NIZAZA KUZÑI KUZIZ

³ Učhum Jesucristo Jilirž Yooz Ejpžquiz honora waytitaj cjila. Yooz Ejpqui okzñi kuzzizpanča, nižaza sufrita žoñinacžquiz zumpacha kuzñipanča.

⁴ Wejrnacaž sufranami Yooz Ejpqui kuzñipanča, nizatpacha wejrnacaž sufrita jilanacžquiz kuzjapa. Nekztanaqui wejrnacqui sufrita jilanacžquiz maznasača, “Yoozqui amquiz kuznasača”, cjican. Nižaza wejrnacpacha ninacžquiz kuznasača.

⁵ Jesucristužquin criichiž cjen Jesucristuž irata ancha sufruča. Nižaza Jesucristuča wejrnacaquiz zumpacha kuzñiqui.

⁶ Jaziqui wejrnacqui ančhucaquiz tsjan zuma kuznasača. Nižaza Yooz taku paljaycan ančhucaltajapa sufruča, ančhuc liwriyta cjisjapa. Nižaza wejrnacqui Yooziž kuztača. Jaziqui nižtazakaz ančhucaquiz kuznasača. Nekztan ančhucqui kuzta kuzziz cjen sufrisnaca wataquiča, ana ančhuca kuz turwayskatžcu. Jaziqui ančhucqui wejrnac irata sufrican, pasinziz kuztan awantasača.

⁷ Ančhucqui tjurt'iñi kuzzizčhucča. Jalla nužupanča ančhucqui. Ančhucqui wejrnac irata sufriča. Nižaza Yoozqui ančhucaquiz zakaz kuznaquiča. Jalla nužupanž cjequiča.

⁸ Jilanaca, cullaquinaca, tii puntunaca ančhucaquiz zizkatz pecuča. Asia yokaran ojklaycan, ancha sufrichinča. Jalla nuž sufrican azi upzižtakaz cjissintača, ticzmayažtakaztača.

⁹ Jalla nižta sufritiquiztan kuzquiz tantiichinča, ticzucapan, jalla nii. Pero Yoozza ticzinacami jacatatskatñiqui. Jalla nižta sufrichinča, persun azquizimi nižaza pinsitanacquizimi ana kuzziz cjisjapa, antiz Yoozquin juc'anti kuzziz cjisjapa.

¹⁰ Ultimquiziqui Yoozqui wejr liwriichiča, nii ticzmaya ojklayta pruebanacquiztan. Nižaza wilita nižta prueba tjonaquiž niiqui wilita Yoozqui wejr liwriyaquiča. Yoozquin kuzziz cjican, jalla nužupanča wejt razunaqui.

¹¹ Ančhucqui wejtquiz mayizinalla, wejt pruebanacquiztan liwriita cjisjapa. Jalla nuž ančucaž ancha mayizintaž cjen liwriital cjeeča. Jalla nekztan weriž yanaptaž cjen anchucqui Yoozquin gracias cjican chiyasača. Jaziqui wejtajapa mayizinalla.

PABLO CORINTO WAJTQUIN OJKZ PECATCHA

¹² Wejrqui ančhucatan, nižaza tjapa žoñinacžtanami Yooz zuma kamañchiz kamchinča, zuma lijituma. Ana pizc kuzziz kamchinča. Wejt kuzquiz zizuča anal toscara chiyuča, weraral chiyuča. Jalla nižta zuma kamcan, ana žoñiž pinsita jaru kamchinča. Okzñi Yoozqui wejtquiz yanapchiča, nižta zuma kamzjapa. Jalla nižta zuma kamtaž cjen cuntintutča wejrqui.

¹³ Weriž cjiirtaqui zuma werara zakazza. Liican, ančhucqui kjanaž intintasača. Ana incallni kuztan cjiiržcuča.

¹⁴ Yekjapanacaqui ančhucaquiztan wejt kuz pajča. Wejt kuzqui juc'anti zumpacha pajspanča ančhucqui. Nekztan Jesucristo Jiliriž tjonz tjuñquiziqui ančhucqui weriž cjen cuntintuž cjesača, jaknužt wejrqui ančhucaž cjen cuntintul cjeeča, jalla nižta.

¹⁵ Ančhucatan wejttan walikazza. Jalla nužupanča. Jalla nižtiquiztan weriž ojklaytiquiz ančhucaquin wilta tjonz pecaytuča. Nekztan ančhucqui pizc wilta cuntintu cjiskattaž cjitasača, weriž pizc wilta tjonžtiquiztan.

¹⁶ Primiraqui Macedonia cjita provinciquin ojkan ančhucaquiz tjonz pecaytuča. Nekztan Macedoniquin ojkažu wilta ančhucaquiz tjonz pecaytuča. Jalla nuž ančhucqui wejr yanaptasača, Judea yokquin irantizjapa. Nužupan tantiižcu ana atchinča.

¹⁷ Jalla nižtiquiztan yekjap žoñinacaqui wejtjapa chiichiča, Pabluqui p'ajpacužtakaz chiichiča, cjican. Anača werara ninacž tantiitaqui. Wejrqui ana tantiyiñča ana criichi žoñižtakaz. Ana criichi žoñinacaqui p'ajpawc razunchiz chiyasača.

¹⁸ Lijitum Yoozqui zizza, wejrqui anača p'ajpacužtakaz chiichintqui, nii

¹⁹ Silvanužtan, Timoteužtan, wejttan, jalla wejrnacqui anapan p'ajpawc razunanaca chiichintqui. Ančhucatan kamcan Jesucristo Yooz Majch puntuquiztan lijituma chiichinča. Nižaza Jesucristuqui zuma lijitumača. Niiž chiita taku cumpliñipanča.

²⁰ Nižaza tjapa Yooz taku cumpliñipanča. Jalla nižtiquiztan Jesucristuž cjen Yooz tawkuiztan “Nužoj cjila” cjiñča. Nuž cjican Yoozquin honora tjaa-uča.

²¹ Nižaza Yoozza wejtnacquizimi ančhucaquizimi Jesucristužquin tjurt'iñi kuzziz cjiskatñiqui. Nižaza Yoozza wejr utchiqui, niiž apóstol cjisjapa.

²² Yoozqui nii tjeeziča, nižaza wejtnaca kuzquiz niiž Espiritu Santo luzkatchiča. Jalla nižtiquiztan kjana tjeeztača, Yooz žoñinacača wejrnacqui, nii.

UJCHIZ ZOÑI PERTUNTA

²³ Jilanaca, cullaquinaca, Corinto wajtquin tsjii tjonzñi okitača. Pero ana tjonchinča, ančhuc ana ujzjapa. Jalla niiča ana wejr tjonñi razunaqui. Yoozqui zizza, weraral cjiwča wejrqui.

²⁴ Ančhucqui Yooz mantuquiz žejlča, anaž wejt mantuquiz. Pero ančhucaquiz chiižinačaj niiqui, yanapz pecuča, ultimu ančhuc juc'anti cuntintuž cjisjapa.

2

¹ Wejrqui tantiichinča, imazi ančhucaquin wilta tjonzñi. Wilta llaquiskatz anal pecatuča.

² Ančhucaquiz llaquiskatasaz niiqui, anaž čhjulumi wejtquiz cuntintu cjiskatasacha. Ančhucča wejtquiz cuntintu cjiskatñiqui. Jalla nižtiquiztan ančhucaquiz ana wilta llaquiskatz pecatuča.

³ Jaziqui ančhucaquin tjonz cjenpacha tuqui cjiiržquichinča zumpacha ewjt'ican, ančhuc anawalinaca azquichjapa. Nekztan wejrqui ančhucaquin irantizcu, cuntintu cjeeča, ana llaquita. Ančhucča wejtquiz cuntintu cjiskatñiqui, ¿ana jaa? Weriž cuntintu cjen ančhucqui zakaz cuntintuž cjesača. Jalla nužupanž cjesača.

⁴ Tuqui cjiiržquican, ančhucajapa ancha kuzquiz sint'iskatchinča nizaza llaquisinča, kaazcama. Jalla nuž cjiiržquican anal ančhuc llaquiskatz

pecatuča, antiz wejt zuma munaziñi kuz tjeez pecaytuča. Ančhucatan ancha munazuča.

⁵ Nii ana wali kamñi žoñiqui ančhucacquiz ancha llaquiskatchiča. Wejtquiz zakaz llaquiskatchiča; pero ančhucacquiz juc'anti. Cunamit anaž tjapa ančhucacquiz llaquiskatchižlani, pero jila partipan ančhucacquiztan.

⁶ Jila parti ančhucqui nii ana wali kamñi žoñi casticchinčucča, nižaza chjaawjkatchinčucča. Nužquizkaz cjila.

⁷ Anziqui nižquiz pertunz waquiziča, nižaza nižquiz kuz waquiziča, nii žoñi ana juc'anti upa kuz cjisnajo.

⁸ Jaziqui ančhucacquiz rocuča, nižquiz zuma munaziñi kuz wilta tjeezjapa.

⁹ Tuqui tii puntuquiztan ančhucacquiz cjižžquichinča, ančhuc zumpacha yanzjapa, tjapa weriž chiižinta cazzi, ana cazzi, jalla nii.

¹⁰ Nii ujchiz žoñiqui ančhucacquiz pertuntažlaja, jalla niiqui weriž pertuntazakazza. Cristuž yujcquiziqui pertunuča, añchuc juc'ant zuma cjisjapa.

¹¹ Nii ujchiz žoñi pertunta cjis waquiziča, Satanás diablu ana učumnacacquiz atipskatzjapa. Diabluž ana wal mañanaca zizza uchumqui.

QUINTU ANCHA ZIZ PECCHICHA PABLUQUI

¹² Troas watja irantichinča, Cristuž liwriiñi taku paljayzjapa. Nekztan Jesucristo Jilirižtajapa langznan, muzpa žoñinacacqui Yooz taku nonziča.

¹³ Pero Tito cjita jilžtan ancha zalz pecaytuča, ančhuc quintu zizjapa. Jalla nižtiquiztan wejt kuzqui anatača cuza. Jalla nižtiquiztan Troas wajtchiz žoñinacžquiztan eccu, Macedonia yokquin ojkchinča.

¹⁴ Nicju tjapa ančhucž quintu nonzinča, walikazza ančhucqui. Yoozquin ancha gracias cjican chiyuča. Yoozpanča anawalinacacquiztan wejrnacac atipskatchiqui. Nižaza tjapa kjutñi Yooz Ejpqui Cristuž puntuquiztan paljayta cjiskatča wejrnacac cjen. Jaknužt tjapa kjutñi tsjii zuma ulura žkejtčhaja, jalla nižta irata wejrnacac paljayta liwriiñi taku tjapa kjutñiž ojkča.

¹⁵ Wejrnacacqui zuma inzinužtakaz Yoozquiz cuntintu cjiskatuča, Cristuž puntu paljaycan. Liwriita žoñinacžquizimi ana liwriita žoñinacžquizimi Cristuž puntu paljayuča.

¹⁶ Nii ana liwriita žoñinacacqui anapan catoktiquiztan juc'anti casticta cjequiča. Jalla nižtiquiztan weriž paljaytaqui ana wali chjonanchi žketnižtakazza ninacžtajapa. Pero nii liwriita žoñinacaczi weriž paljayta catoktiquiztan juc'ant zumaž cjequiča. Jalla nižtiquiztan weriž paljaytaqui zuma uluražtakazza ninacžtajapa. Jalla nižtiquiztan jequit Cristuž puntuquiztan paljayñi puesto tanznasajo?

YOOZ UCHTA ZONICHA PABLUQUI

¹⁷ Wejrqui Cristuž puntu paljaycan anal negocio paa-uča; nižaza Yooz taku anal queruča yekjap žoñinacacžtakaz. Wejrzi zuma lijituma paljayuča zuma kuzziz. Yooz uchta apostultča. Cristužtan wejtta tsjii kuzziz cjen, Yooz Ejpqui zizza, liwriiñi Yooz taku lijituma paljayuča.

3

¹ Jalla nuž wejt puntuquiztan chiyanaqui, ančhucqui pinsacchani, wejr persunpacha honora waytiñi, jalla nii. Yekjapanacacqui tsjii carta nombramientužtan ojklayča. Nižta carta nombramientuqui wejtta ana pecza, ančhucacquiz prisintizjapa. Nižaza ančhucacquiztan nižta carta anal mayasača.

² Ančhucpachača wejt carta nombramiento cuntaqui. Ančhucqui weriž paljaytiquiztan ew kamañchizza. Tjapa žoñinacaqui nii cherasača, nižaza pajasača.

³ Cristuqui ančhucaquiz ew kamañchiz cjiskatča, weriž paljaytaž cjen. Jaziqui ančuca ew kamañiqui tsjii carta nombramientužtakazza. Jalla nii cartaqui anača čjul tintižtanami cijirtaqui; anača čjul mazquizimi cijirtaqui. Yooz Espiritu Santuqui ančuca kuzquiz luzziča, ew kamañchiz cjisjapa. Jaziqui ančuca ew kamañiqui tsjii carta nombramientužtakazza.

CRISTUZ LIWRIIŇI TAKU PALJAYZ

⁴ Ančhucča kjana tjeežniqui, wejrqui lijitum apostoltqui, nii. Jalla nužupan cjiwča. Cristuž cjen nuž chiyasača Yooz yujcquiz.

⁵ Nuž cjan, zakaz cjiwča: Wejrpacha ana čjul walimi paasača Yooztajapa. Čjul Yooztajapa wali paatami Yooz aztanpankaz paatača. Inakaztča wejrqui. Pero Yoozqui wejr illziča, niž apóstol cjisjapa.

⁶ Yoozpacha wejr utčiča niž ew compromis puntu paljayni ojklajzjapa. Nii ew compromisuqui anača Moisés cijirta liiquiztan, antiz Espiritu Santužquiztanča. Nii cijirta lii cjen žoñinaca infiernuquin okaquiča, castictaž cjisjapa. Espiritu Santuž cjen žoñinacaqui arajpachquin okaquiča, Yooztan wiñaya kamzjapa.

⁷ Nii Moises cijirta liiqui maznacquiz litranacžtan cijirtatača. Nii cijirta lii tanžcu, Moises yujcqui walja c'ajčiča. Jalla nuž Moises yujc walja c'ajan, parti Israel žoñinacaqui niž yujc ana cheržni atčiča. Moises yujcqui jalla nuž c'ajniž cjen, zumat zumat upa c'ajčiča. Yoozqui jalla nižta lii tjaachiča, honorchiz cjisjapa, žoñinaca ana liwriiñi cjenami.

⁸ Yoozqui niž ew compromiso juc'ant honorchiz cjiskatchiča. Ew compromisquiztan Espiritu Santuqui žoñinacžquiz liwriiskatča.

⁹ Nii honorchiz lii ana cumplitiquiztan učhumqui castictajapa cjissinčhumča. Pero ew compromiso catokchiž cjen učhumqui Yooz yujcquiz zuma cjissinčhumča, ana ujchiz. Juc'ant honorchizza nii ew compromisuqui.

¹⁰ Tuquiqui Moisés liiqui honorchiztača. Anzta ew compromisquiztan nii tuquita liiqui ancha upa honorchizza, nii anzta compromisuqui juc'ant honorchiz cjen.

¹¹ Nii liiqui Cristuž tjonzcama mantizjapakaz tjaatatača. Nekztan ana iya walča. Nii ew compromisuzti wiñayaž tjuraquiča. Jalla nižtiquiztan juc'ant honorchiz žejlztanča.

¹² Jalla nii ew compromiso ut'aytaž cjen wejrnacqui uchtača, wiñaya liwriiñi taku paljayzjapa. Jalla nižtiquiztan tjup kuztan kjanacama chiyuča.

¹³ Nii Moises irata anal paa-uča wejrnacqui. Moisesqui niž c'ajni yujc chjojziča, parti Israel žoñinaca ana cherzjapa, nii yujc c'ajni katzcama. Moises yujcqui ana tira c'ajniča. Nii tuž cjiča, liiqui anaž tira walča, apatatta, jalla nii.

¹⁴ Wejrnacqui liwriiñi puntuquiztan kjanacama chiyuča. Pero Israel žoñinacazti nii puntu ana intintazziča. Chojru kuzzizpantača anzcama ana intintazza. Moises lii liižcu nii liiquizkaz pinsiča. Cristužquin kuz tjaaz ana pinsiča. Pero Cristužquin kuz tjaachiž cjenkaz liwriiñi Yooz puntu intintazni cjesača.

¹⁵ Anzcama Moises lii liicanami ana liwriiñi Yooz puntu intintazasača jila parti judío žoñinacaqui.

¹⁶ Jesucristo Jiliržquiz kuz tjaažcu, nekztanž liwriiñi Yooz puntu intintazasača.

¹⁷ Jesucristo Jiliriqui Yooz Espiritužtan tsjii kuzzizza. Nižaza jakziltiž kuzquiz Jesucristuž Ēspírítu žejlčhaja, jalla niiqui liwriitapanž cjequičha.

¹⁸ Jalla nižtiquiztan liwriitaž cjen, tjapa učumqui Jesucristo Jilirž honoraž tjeeža, tsjii ispijužtakaz. Nižaza učumqui zumat zumat Jesucristuž irata juc'ant zuma cjissa. Nižaza niž irata juc'ant juc'ant honorchiz cjissa. Jalla nuž učumnacaltajapa cjiskatčha Jesucristo Jilirž Espirituqui. Nužupančha Yoozqui učumnacaltajapa.

4

YOOZQUI PABLO UTCHICHA APOSTOL PUESTUQUIZ

¹ Jalla nižtiquiztan anal upa kuzziz cjesačha. Yoozqui niž okzñi kuzziz cjen wejr apóstol puestuquiz utchičha.

² Jalla nii puestuquiz kamcan, wejrqui ana wali chjojzaka paaznaca, nižaza azzuca paaznaca ana wirapan paachinčha. Nižaza ana wali paaz mañanaca ana wira paachinčha. Nižaza Yooz taku anal tsjii kjutñi cjiyasachha. Antiz kjanacama werarapanikal chiyučha. Yoozza weriž chiitaqui zizñiqui. Nižaza weriž chiitiquiztan tjapa žoñinacaqui persun kuzquiz zizasachha, wejrtčha lijitum apostoltqui, jalla nii. Nuž cjiwčha, ana wali žoñinacaž wejtquiz uj tjojtnanami.

³ Weriž paljaytaqui zumzu takužtakazza ana criichi žoñinaczjapaqui. Ninacačha infiernuquin ojkñinacaqui.

⁴ Tii muntuquiz mantiñi diabluqui nii ana criichi žoñinacz kuz chojru cjiskatchičha, liwriiñi taku ana intintajo. Zur žoñižtakaz cjiskatchičha, Cristuž liwriiñi kjana ana cherajo, nižaza liwriiñi taku ana catokajo. Nii liwriiñi takučha ancha zumaqui. Ancha zuma Cristuž puntu chiičha. Jesucristučha Yooz Ejpž kuz tjeežñiqui.

⁵ Jilanaca, cullaquinaca, nonžna. Wejrqui Jesucristuž puntuquiztankaz paljayučha. Ultim chawjc Jiliripankazza Jesucristuqui. Nuž cjiwčha. Jesucristuž honora waytučha; anačha wejt persun honora waytučha. Nižaza Jesucristuž mantuquiz ojklaycan wejrqui ančhuc piyunitčha, ančhuc yanapzjapa.

⁶ Tuquitanpacha Yoozqui mantichičha ween zumchiquiz kjana cjeyajo. Nii Yoozpachačha wejt kuzquiz kjanchiqui, liwriini Yooz taku zumpacha intintizjapa, ancha zuma Yoozpan pajzjapa. Jesucristuqui niž ancha zuma kamañchiz cjen Yooz kuzmi nižaza Yooz honora tjeezičha, učum nii zuma intintajo.

PABLUQUI ANCHA SUFRICHICHA

⁷ Jaknužt zumanaca tsjii ljoc mazquiquiz chjojta cječhaja, jalla nižta irataž Yoozqui liwriiñi puntu wejtquiz cumpjiichičha žoñinaczquiz paljayajo. Jalla nuž Yoozqui wejr apóstol utchičha, niž juc'ant zuma azi tjeezjapa. Liwriiñi aziqui Yoozquiztankaz tjončha, anaž wejtquiztan tjončha. Zoñikazza wejrqui.

⁸ Wejtta ancha anawalinaca želanami, ultimquiziqui wejrqui atipačha. Wejt kuz turwayskatanami, anaž wejt kuz llajllasa.

⁹ Zoñinacz wejr chjatkatanami, Yoozqui wejr ana zinalla ecčha. Wejtquiz ancha sufriskatcanami, žoñinacaqui wejr anaž akasačha.

¹⁰⁻¹¹ Jesucristužquin sirwican jakziquinami wejr ojklayučhaja, ancha sufručha, ticzmaya cjenami. Jalla nuž sufrican, Jesucristuž cjen tira žetučha; nižtajapa tii curpuquiz kamučha. Jesucristužquin sirwichiž cjen ancha sufručha. “Waj ticznaa; ticznaa” cjiwčha. Pero tii ticzñi curpchiz žejtcanaqui, Jesucristuž cjen kamučha.

¹² Wejrqui walja sufrisnacial watučha. Wilta wilta ticzmayažtakaztačha, Cristuž puntu paljaycan. Pero weriž paljaytiquiztan ančhucqui Cristuž žeti tanchinčhucča.

¹³ Yooz takuqui tuž cjičha: “Yoozquin kuzziz cjen, wejrqui chiyučha”. Jalla nižta irata wejrqui Yoozquin kuzzizza, sufrita kamcanami. Jalla nižta kuzziz cjen, chiichiyučha, Cristuž puntu paljaycan.

¹⁴ Nuž paljayučha, tuž zizcu: Yoozqui Jesucristo Jiliri jacatatskatchičha, nižaza Jesucristužtan chica wejrmi ančhucmi jacatatskatta cjequičha. Yooz yujcquin chjichtaž cjequičha. Chjulumi sufrican, nii cjuñznučha.

¹⁵ Tjapa wejtquiz watchinacaqui ančhucaltajapačha. Liwriiñi Yooz taku paljayučha, juc'anti juc'anti žoñinaca Yoozquin kuzziz cjiskatzjapa, nižaza ninaca Yooziž yanapta cjiskatzjapa. Jalla nuž cjen tsjan tsjan žoñinacaqui Yoozquin gracias cjican chiyaquičha, nižaza Yoozqui juc'anti honorchiz cjequičha. Jalla nuž pecučha.

¹⁶ Jalla nižtiquiztan wejrqui anal llajllazučha. Kjažtami wejt curpu sufrichani wejt kuz zapuru tsjan tjupi cjissa; juc'anti Yoozquin kuzziztčha.

¹⁷ Tii wirquiz kamcan sufrisqui tsjii ratužtakazza; nekztan watčha. Pero tii muntuquiz sufritiquiztan učhumqui arajpachquin wiñaya honorchiz cjequičha. Ancha sufrižcu, ancha juc'anti honorchiz cjequičha. Arajpachquin ancha zuma kamaquičha.

¹⁸ Nužupanž cjequičha, tii muntuquiz žejlñi cusasanacžquiz anačha kuz tjaazqui. Antiz arajpach zumanacžquin kuz tjaaz waquizičha. Nekztan arajpachquin ancha honorchiz cjequičha. Cherta cusasanaca wataquičha. Arajpach zumanacazti wiñaya tjuraquičha.

5

PABLUQUI ARAJPACHQUIN OJKZ PECCHA

¹ Jalla tuž zizučha wejrqui. Tii žejtñi curpuqui ticziž cjequiž niiqui, Yoozqui ew curpuž tjaaquičha, Yooz paata curpu. Nekztan arajpachquin wiñaya kamačha.

² Tii muntuquiz sufricanaqui anchal pasnučha ayincan. Ew arajpach curpu anchal pecučha, nekz kamzjapa.

³ Wejt kuzqui nii ew curpuchiz ancha pecča, tsjii ew zquti cujtz pecas, jalla nižta. Ana curpuchiz anal cjis pecučha.

⁴ Tii curpuchiz sufrican, aynučha. Tii curpuqui ticznaquičha. Nižaza tii muntuquiz kamtaqui ana wiñayjapačha. Jalla nižtiquiztan ew yekja curpuchiz cjis pecučha. Arajpachquin wiñayjapa kamz pecučha.

⁵ Yoozpachačha nižtajapa wejr utchičha. Nižaza Yoozza niiž Espíritu Santo wejt kuzquiz luzkatchiqui. Jaziqui arajpachquin kamspančha wejrqui.

⁶ Jalla nižtiquiztan wejrqui tjup kuzzizpančha. Tii curpuchiz kamcan, arajpachquin Yooztan chica ima žejlčha. Pero arajpach wajtchiz žoñtčha wejrqui. Jalla niil zizučha.

⁷ Tii muntuquiz kamcan, ana Yooz chercan kamučha. Pero ana cherta Yoozquin kuzzizpan kamučha ana niiž cheranami.

⁸ Jalla nižtiquiztan tjup kuzziz želučha. Tii curpuquiztan ulanžcu, nižaza Yooztan chica arajpachquin kamcan, jalla nii walikaz cjesačha.

⁹ Jaziqui žejtcanami, ticz cjenami, Yoozquin kuzziztčha wejrqui. Weriž kamtiquiztan wejt Yoozquiz cuntintu cjiskatzpan pecučha.

¹⁰ Tjapa učhumnacqui Cristuž yujcquiz prisintistančha, pjalžta cjisjapa. Jaknužt tii muntuquiz kamtčhaja, zuma ana zuma, jalla niit jama pjalžtaž

cjequiĉha. Jalla nuŝ pjalŝtiquiztan zapa mayniŝquiz arajpach kamaña tjaataŝ cjequiĉha.

ZOÑINACŤTAN YOOZTAN WALIKAZ CJESACHA

¹¹ Jalla niŝtiquiztan Jesucristo Jiliri eksca zuma razunŝtan anĉucaquiz chiyuĉha, zuma kamanĉiz kamiñĉha, cjican. Toscara anal chiyuĉha. Wejt kamaña Yooz zizza. Wejr cjiwĉha, anĉucqui zakaz zizza zuma kamañĉiz kamiñĉha, jalla nii.

¹² Jalla nuŝ chiican, persun honora anal waytiz pecuĉha. Antiz wejt puntuquiztan anĉucaquiz intintiskatz pecuĉha, wejtquiztan cuntintu cjisjapa. Jalla nekztanaqui anĉucqui wejt quintra ŝoñinacŝquiz kjaaznasaĉha, zuma razuna tjaacan, “Pabluqui zuma kamiñĉha”, cjican. Wejt quintra ŝoñinacaqui ŝoñinacŝquiztan honorĉiz cjis pecĉha. Ninacŝtajapa zuma kuz anaŝ importayĉha. Tucquin cjis, jalla niikaz importayĉha ninacŝtaqui.

¹³ Wejrŝti zuma kuzziz cjis anĉal pecuĉha. Wejt quintra ŝoñinacaqui cjiñĉha “Lucurataĉha Pabluqui”. Jalla nuŝ chiyanami Yooztajapakal kamuĉha. Yekjap ŝoñinacŝti cjiñĉha, “Zuma razunŝtan chiiĉha Pabluqui”. Anĉucaltajapa zuma razunŝtan chiyuĉha.

¹⁴ Jesucristuqui anĉa okzñi kuzziz cjen tjapa ŝoñinacŝ laycu ticziĉha. Zoñinacŝ cuntiquiztan ticziĉha. Jalla nuŝupanĉha wereraqui. Jalla nuŝ tjapa kuztan criiŝcu, wejrqui Jesucristuŝquin sirwistanĉha, liwriiñi taku paljaycan.

¹⁵ Jesucristuqui tjapa ŝoñinacŝ laycu ticziĉha, ŝoñinacaŝ ana persunjapa kamajo, antiz Cristuŝtajapa kamajo. Jalla niŝtiquiztan jakziltat ew kamañĉiz kamĉhaja, jalla ninacaqui Jesucristuŝtajapa kamz waquiziĉha. Jesucristuĉha ninacŝ laycu ticziĉqui, niŝaza jacatatchiqui.

¹⁶ Jaziqui Jesucristuŝtajapa kamcan, zizuĉha, ŝoñinacŝ kuzza chekanaqui, nii. Tuquiqui pinsatuĉha: Zoñinacŝ cherĉi, pajk puesto ocupĉi, wajt honora tanchi, jalla niŝtanacaĉha chekanaqui, nuŝ cjican pinsatuĉha, Cristuŝ puntuquiztanami. Ana criiĉi ŝoñinacaŝ pinsitakaz pinsatuĉha. Anziĉqui ana iya niŝta pinsuĉha.

¹⁷ Jaziqui tuŝ cjiwĉha: jakziltat Cristuŝtan tŝjii kuzziz cjissaja, jalla niiqui ew kuzzizza, niŝaza ew kamañĉiz. Tuquita kamaña liwj ecta, ew kamañĉizpan kamĉha.

¹⁸ Ew kuzmi niŝaza ew kamañami Yooziŝ tjaatapanĉha. Cristuŝ cjen Yoozqui uĉhumnaca pertunĉiĉha, niŝtan uĉhumnacatan zuma cjisjapa. Niŝaza Yoozqui wejrñaca utĉiĉha parti ŝoñinacŝquiz Yooz pertunz puntu paljayajo, Cristuŝ cjen ŝoñinacŝtan Yooztan zuma cjesaĉha, cjican.

¹⁹ Yooz pertunz puntuqui jalla tuŝuĉha. Yoozqui Cristuŝ cjen tjapa ŝoñinaca pertunasaĉha, niŝtan ninacŝtan zuma cjisjapa. Zoñinaca pertunŝcu, ana ujĉiz cjiskatĉha, ana caŝticta cjisjapa. Niŝaza Yoozqui wejrñacaquiz cumpjiĉiĉha, Yooz pertunz puntu paljayajo.

²⁰ Jalla niŝtiquiztan Cristuŝ cuntiquiztan ojklayuĉha niŝ takunaca paljaycan. Jalla nuŝ ojklayan Yoozqui weriŝ cjen anĉucaquiz paljayĉha. Jaziqui Cristuŝtajapa anĉucaquiz chiiŝzinuĉha, Yoozquin kuz tjaalla, niŝtan anĉucatan zuma cjisjapa. Jalla nuŝ chiiŝzinuĉha.

²¹ Cristuqui ana ĉjul uj paachiĉha. Uĉhum laycu Jesucristuqui Yooz yujcquiz uĉhum ujnacĉiz cjissiĉha, uĉhumqui Yooz yujcquiz ana ujĉiz niŝaza zuma cjisjapa. Jalla nuŝ cjiskatchiĉha Yoozqui, niŝ pinsitacama.

6

¹ Jilanaca, cullaquinaca, wejrqui Yooztan langznuča, žoñinaca Yoozquin kuz tjaajo. Jaziqui ančucaquiz chiižinuča, liwriiñi Yooz takuqui anača inapankaz nonzqui, nii. Anča okzñi kuzziz cjen, Yoozqui ančucaquiz niž liwriiñi taku paljaykatchiča.

² Cjijrta Yooz takuqui tuž cjiča: “Wejrtča okzniñtqui, ančhuc liwriita cjisjapa. Jaziqui tii timpuquiz okzñi kuzziz ančucaž mayizita nonzinča, nižaza tii liwriiz timpuquiz ančucaquiz yanapchinča”. Jaziqui Yoozpanča okzñi kuzzizqui. Anziqui žoñinaca liwriita cjesača.

³ Wejrqui anal jec žoñžquizimi t'ezinz pecuča, ujquiz tjojtjapa. Jaziqui ana jecmi weriž Yooztajapa trabajta iñarasača.

⁴ Yooztajapa trabajcan, jaknuž watanami, zuma Yooz kamañakaz tjeez pecuča. Yoozquin tjurt'iñi kuz tjeez pecuča, čjul sufrisquiztanami, nižaza čjulquiztan t'akjiri žejlžquiztanami, nižaza čjul ch'ama ojklayzquiztanami. Čjulunacaž watanami tjurt'iñi kuz tjeez pecuča.

⁵ Jilanaca, cullaquinaca, tižta sufrisnaca watchinča: wjajttatača, carsilquiz chawctatača; žoñinacaqui wejtnaca quintra aptichiča; nižaza muzpa ch'ama langznaca watchinča otčaň tjepi; nižaza ana tjajchi kamchinča, nižaza čjerž kjara pascan žejlchinča. Jalla nižta sufrisnaca watchinča, tjurt'iñi kuztan.

⁶ Yooztajapa langzcan, zuma Yooz kamaña tjeez pecuča, zuma lijitum Yooz kamañchiz kamcan, nižaza Yooz puntu zuma zizñi nižaza pasinziz kuzziz kamcan, nižaza okzñi kuzziz kamcan, nižaza Espiritu Santuž aztan kamcan, nižaza zuma lijitum munaziñi kuzziz kamcan,

⁷ nižaza lijitum Yooz taku paljaycan, nižaza Yooz aztan kamcan. Jalla nižta kamcan zuma Yooz kamaña tjeez pecuča. Nižaza Yooztajapa kamcan, Yooz zuma razunžtan ojklayuča, tsjii zuma armichiztakaz. Yooz zuma razuna chiican, wejrqui žoñinacžquiz Yooz taku catokskatuča, nižaza quintra žoñinacžquiz Yooz zuma razunžtan kjaaznuča.

⁸ Yooztajapa kamcan, awizaqui wejrqui zuma rispittača. Awizaqui ch'aanitazakazza. Awizaqui žoñinacaqui wejt quintra ana waliž parliča. Awizaqui žoñinacaqui wejt puntu zumaž parliča. Wejt puntuquiztan yekjap žoñinacaqui “Niiča tsjii kjutñi irpiñiqui” cjican chiichiča. Jalla nuž cjenami, wejrtča werera chiiñtqui, nižaza irpiñtqui.

⁹ Yekjapanacaqui wejr ana pajz pecuča. Jalla nuž cjenami, pajtapanikazza wejrqui. Yekjapanacaqui “Nii Pabluqui ticzla”, cjiñiča. Jalla nuž cjenami tiral žetuča. Wejt Yooz Epiž ujžta cjenami, ana contača wejrqui.

¹⁰ Llaquita kuzziz cjenami, Yoozqui wejt kuzquiz cuntintupan cjiskatča. Poriž cjenami, Yooz taku paljaycan walja žoñinacžquiz ricachužtakaz cjiskatchinča. Ana čjulchiz cjenami, tjapa wejtta žejlča, Yooz maatiž cjen.

¹¹ Corinto wajtchiz jilanaca, cullaquinaca, kjanapacha ančucaquiz paljayžcuča. Ančhucatan zuma munazuča, tjapa kuztan.

¹² Anača juntuñalla kuz ančhucatan munazuča. Yekjapanacazti anaž tjapa kuztan wejtta munaziz pecčhani.

¹³ Pero ančhuczti tjapa kuztan wejtta zuma munaziñi cjee. Ančucaquiz chiižinuča, jaknužt tsjii ejp persun ocjalžquiz chiižinčhaja, jalla nižta.

YOOZ ŽOÑINACĀHUCCHA ANCHUCQUI

¹⁴ Tsjiilla chiižinuča. Ana criichi žoñžnacžtan anaž anča pajasa, tii muntuquiz kamcan. Yooz kamañchiz žoñiqui Yooz quintra žoñžtan anapan tsjii kuzziz cjesača. Zuma žoñiqui ana zum žoñžtan anapan zuma pajasasača, tii muntuquiz kamcan.

¹⁵ Jaknužt Cristužtan Satanas diablužtan tsjii kuzzizpan cjesajo? Nižaza jaknužt criichi žoñiqui ana criichi žoñžtan tsjii kuzziz cjesajo? Anapanž tsjii kuzziz cjesača.

¹⁶ Yooz kjuyquiz žoñiž paata yooznacaqui anapanžuntu cjesača. Nižaza učumqui žejtñi Yooz kjuyčumča. Yoozpachača tuž cjichiqui: Ninacž kuznacquiz kamača; ninacžtan chica želača. Ninacž Yooz wejr cjeeča, nižaza ninacaqui wejt wajtchiz žoñinacž cjequiča.

¹⁷ Jalla nižtiquiztan Yooz Jiliriqui tuž zakaz cjiča: Ana criichi žoñinacž kamañquiztan zaraka, nižaza jayta. Ana zum kamañnacchiz anapan kama. Nekztan wejrqui ančhuc zuma risiwača.

¹⁸ Ančuca ejp cjeeča. Nižaza ančhucqui wejt maatinacž cjequiča. Jalla nuž cjiča tjapa azziz Yooz Jiliriqui.

7

¹ Munazita jilanaca, cullaquinaca. Yoozqui učumnacaquiz niž chiita takunaca tjaachiča. Jalla nižtiquiztan učumqui tjapaman ana walinacquiztanami nižaza tjapaman ana zum kamañnacquiztanami jaytistanča, zuma kamañchizpan cjisjapa, curpumi kuzmi zuma cjisjapa. Yoozquin ekscan, nižaza rispitan, tjapa ana walinacquiztan jaytistanča, juc'ant juc'ant walja zuma lijituma cjisjapa, Yooz kamañchizpan cjisjapa.

PABLUZ CHIITA TAKU CATOKTA

² Wejttan zuma munaziñi cjee, tjapa kuztan. Ana jakziltiž quintra čhjulumi paachinča. Nižaza ana jakziltižquizimi tsjii kjutñi chjitchinča. Nižaza ana jakziltižquizimi incallchinča, cusasanaca tanzjapa.

³ Jalla nuž chiican, ančucaquiz uj tjojtunz ana pecuča. Tjapa kuztan ančhucatan zuma munazuča. Tuqui nuž cjetuča. Anača wejr ančuca quintraqui. Ticz cjenami, žejtz cjenami tirapan ančhucatan zuma munazuča.

⁴ Wejr cjiwča, ančhucqui tirapan Yoozquin tjurt'iñi kuzziz cjequiča. Ančucaž cjen anča cuntintuča. Ančuca honora waytuča. Ančuca quintu nonžcu zuma kuztaž wejrqui. Anča sufrita cjenami anchal chipuča ančucaž cjen.

⁵ Macedonia yokquin irantižcu, ana jeejzñi atchinča. Tjapa kjutñi walja sufrisnaca želatča. Tjapa kjuttan quintranaca želatča. Wejt kuzqui turwaysnatča, "Criichi žoñinacaqui quejpsnaa", cjichinča. Llaquita kuzziztača wejrqui.

⁶ Pero Yoozqui llaquita žoñinacžquiz kuzñipanča. Yoozqui wejr kuzziča, Tituž tjontiquiztan.

⁷ Nižaza Titžquiztan ančuca quintu nonžcu, wejrqui zuma kuztatača. Tituqui ančucaž cjen llaquita cjissitača. Nekztan ančucaquiz tjonžcu, nižaza ančucaž zuma kamta cheržcu, kuztatača. Nižaza Tituqui quint'ichiča, ančhucqui wejr anča cherz pecatča, nižaza weriž llaquita cjen ančhucqui llaquitazakaz cjissinčhucča. Nekztan wejtquiz tjurt'ižinčinčhucča. Jalla nii nonžcu juc'anti cuntintu cjissinča.

⁸ Weriz cjiirta cartacqui ančhuc llaquita cjiskatchiča. Jalla nuž cjenami, anziqiu ana llactazzinča. Pero tuquiqui llactazzinča; nii ančucaquiz chiižinta ana cjiirz pecatuča. Pero ančhuc tsjii upacamakaz llaquiskatchinča.

⁹ Ančhucqui llaquiskattiquiztan anazuma kamznaca ecchinčhucča. Jalla nižtiquiztan wejrqui cuntintuča. Ančucaž llactaztiquiztan wejrqui anatača cuntintu. Antiz ančucaž anazuma kamznaca ectiquiztan jalla nekztantača wejrqui cuntintu. Ančucaž anazuma kamtiquiztan Yoozqui

ančucaquiz uj cjuñkatchiĉha. Jaziqui weriž cjen anĉucqui ana ina llaquissinĉucĉha.

¹⁰ Yoozqui Źoñžquiz uj cjuñkatĉha kuz campiita cjeajajo. Jequit kuz campiichajaja, jalla niiqui liwriita cjesaĉha, zuma kamañchiz cjisjapa. Nižaza liwriita Źoñinacaqui cuntintuĉha. Ana criichi Źoñinacaqui ujnaca cjuñžcan nižaza llactazcan ana kuz campiyaquiz niiqui chojru kuzziz cjissa. Ultimu infiernuquin okaquiĉha.

¹¹ Anĉuczti uj cjuñžcu Yoozquin juc'anti kuzziz cjissinĉucĉha; oralla kuz campiichinĉucĉha. Nižaza tjapa kuz tjaachinĉucĉha ana wali kamznaca azquichjapa. Nii uj paañi Źoñž quintra anĉha žawjchinĉucĉha. Nižaza nii ujquiztan tsucchinĉucĉha. Nižaza wejttan anĉha zalz pecchinĉucĉha. Nižaza nii uj paañi Źoñi anĉha casticz pecchinĉucĉha. Nižaza ultimu nii uj paañi Źoñi casticchinĉucpanĉha. Jalla nižtiquiztan anĉucqui kjanapacha tjeezinĉucpanĉha, zuma kuzzizĉucĉha, ana tira ujchiz.

¹² Nii uj paata puntuquiztan nonžcu ančucaquiz c'aripacha cjižžquichinĉha. Anataĉha nii uj paañi Źoñžjapakaz cjižžquichinqui. Nižaza anataĉha nii quintra uj paažinta Źoñžjapakaz cjižžquichinqui. Antiz anĉucajapazakaz cjižžquichinĉha, Yooz yujcquiz ančucaquiz tjeezjapa, anĉucqui wejttan munaziñi kuzzizza, jalla nii.

¹³ Ultimquiziqui tjappacha walikaz cjissiĉha. Jalla nižtiquiztan wejrqui cuntintu cjissinĉha. Ančucaž wilta zuma kamtiquiztan Tituqui wilta llan kuzziz cjissiĉha. Nižaza Tito cuntintu cjissiž cjen, wejr zakaz juc'ant cuntintu cjissinĉha.

¹⁴ Wejrqui Titžquiz ančuca honora waytichinĉha, "Ninacaqui zumaĉha", cjican. Jalla nuž cjican ultimquiziqui ančucaž cjen ana azkatchinĉha. Anĉucatan žejlcan werar razunakaz chiichinĉha. Nižaza Titžquiz chiita razuna werara zakazza ančuca puntuquiztan.

¹⁵ Tituž tjaaajintacama zuma kamchinĉucĉha. Nižaza Tito zuma risiwchinĉucĉha, humilde kuztan, nižaza rispitiñi kuztan. Tjapa nižta cjuñžcu Tituqui ančucaquin juc'antiž munaziĉha.

¹⁶ Ančucaž cjen wejrqui zakaz anĉha cuntintuĉha. Nižaza ančuca puntuquiztan cjiwĉha, anĉha zuma kamañchiz, jalla nii.

8

OFRENDANACA TJAAZ PUNTU

¹ Jaziqui jilanaca, cullaquinaca ančucaquiz tii zizkatz pecuĉha, jaknužt Macedonia yokquiz žejlñi criichinacaqui Yooz zuma kamaña tjeeziĉha, jalla nii.

² Nii criichi Źoñinacaqui anĉha pruebanaca watchiĉha. Anĉha pori cjissiž cjenami ninacaqui anĉha cuntintu želatĉha. Nižaza ricachužtakaz walja ofrendanaca utĉiĉha.

³ Ninacž želinchizquiztan jama utĉiĉha. Wejr cjiwĉha, jilacama utĉiĉha ninacž persun kuzquiztan.

⁴ Ninacaqui t'akjir criichinacžquin ofrenda tjaaž anĉha pecĉiĉha, jaknužt parti criichinacaqui ofrenda tjaatĉhaja, jalla nižtapacha. Nižaza wejtquiz anĉha rocĉiĉha favora paajo, ninacž ofrenda ĉjichajo, jalla nii rocĉiĉha.

⁵ Ninacaqui juc'ant zuma paachiĉha weriž tantiitiquiztanaqui. Tuquiqui Yoozquin tjapa kuz tjaachiĉha. Nekztan Yooz munañpi jaru wejtquiz kuz tjaachizakazza.

⁶ Jalla nižtiquiztan wejrqui Tito rocĉinĉha, ančucaquin wilta okajo. Tuquiqui Tituqui ofrenda tjaaž puntu ančucaquiz ĉižinĉiĉha. Jaziqui Tito wilta rocĉinĉha, ančucaquin wilta okajo, ančuca ofrendanaca

cumpliskatzjapa, jaknužt tuqui ančucqui okzñi kuzquiztan tjaatčaja, jalla nuž.

⁷ Ančucqui ancha zumača; ančucča Yoozquin kuzzizpan, nižaza Yooz puntu zuma zizñi, nižaza zuma tjaajnasacha, nižaza tjapa kuztan zumanaca paayinčucča, nižaza wejttan zuma munaziñi kuzzizčucča. Chjulquizimi ančucqui ancha zumača. Jalla nižtiquiztan ančucqui zuma ofrenda tjaaz zakaz waquizicha, ančuca okzñi kuzquiztan.

⁸ Ančucaquiz anal mantuča, pero zizkatz pecuča, parti žoñinacaqui tjapa kuztan ofrenda utchiča, jalla nii. Jazic ančucqui walja ofrendanaca tjaaquiz niiqui, ančuca okzñi kuz tjeeznasača.

⁹ Učhum Jesucristo Jilirž ancha okzñi kuz zizza ančucqui. Jesucristuqui tjappacha nižtacama žejlchiž cjenami, ančucaž cjen pori cjissiča tii muntuquiz kamcan. Jalla nuž pori cjissiča ančuc ricachužtakaz cjiskatzjapa.

¹⁰ Jalla nižtiquiztan tii ofrenda puntuquiztan ančucaquiz chiižinuča. Waj tsjii wataqui ančucqui t'akjir criichinacžtajapa ofrenda uch pecatča, nižaza ofrenda uchi kalltichinčucča. Jalla nižtiquiztan anziqiu nii ofrenda cumpliskatz waquizicha. Jalla niiqui walipanž cjesača.

¹¹ Tuquiqui ančucqui tjapa kuztan ofrenda uch pecatča. Jalla nuž pectaquí cumpliskatz waquizicha, ančuca želinchizquiztan jama.

¹² Jakziltat tjapa kuztan ofrenda utčaja, želinchizquiztan jama uch waquizicha. Jalla niiqui Yoozquin cuntintu cjiskatasacha. Jakziltat ana zinta želinchiz cječaja, jalla nižquiztan Yoozqui ana ofrenda mayča.

¹³ Wejrqui anal pecuča, yekja criichinacžquiz yanaptiquiztanaqui ančucpacha t'akjiri cjisjapa.

¹⁴ Tuž cjiwča, anziqiu ančucqui juc'ant želinchizza. Jalla nižtiquiztan nii t'akjir criichi žoñinacžquiz yanapasača. Wiruñaquí ninacaqui ančucaquiz yanapačhani, ninacž juc'ant želinchizquiztan jama. Jalla nižtiquiztan tsjii-ikaz cjejuča.

¹⁵ Cjijrta Yooz taku tuž cjiča: “Juc'ant želinchiz žoñiqui anaž čhjetnasača. Nižaza ana želinchiz žoñiqui ana t'akjiri želasača”.

TITZ PUNTU

¹⁶ Yoozqui Tito ančucaquiz ancha cjuñzkatchiča, jaknužt wejrqui ančucaquiz cjuñzniča, jalla nižta. Jalla nižtiquiztan Yoozquin gracias cjican chiyuča.

¹⁷ Weriž roctiquiztan Tituqui “iyaw” cjichiča. Pero niipacha ančucaquiz cjuñziča. Jalla nižtiquiztan persun kuzquiztan ančucaquin tjonžcaquiča.

¹⁸ Titžtan juntu yekja jila cuchanžcača. Tjapa iclizziz criichinacaqui nii jilž puntu zizza, zuma liwriiñi taku parliñi, jalla nii.

¹⁹ Nižaza iclizziz criichinacaqui nii jila utchiča, wejttan chica ojklajajo, nižaza tii ofrenda Jerusalenquin chjitzjapa. Wejrqui tii ofrenda chjitz pecuča, Yooz honora waytizjapa, nižaza wejt yanapñi kuzziz tjeezjapa.

²⁰ Jalla nuž tii ricujta ofrendaqui ancha tažpachača. Jalla nii paaznaca chjichcan wejrnacqui zuma kjana kamz pecuča, žoñinaca wejtnacaquiz ana uj tjojtajajo, “Pabluqui persunjapa ofrendanacquiztan paaz jwessiča”, cjican.

²¹ Yooz yujcquizimi žoñinacž yujcquizimi wejrnacqui zuma lijituma kamz pecuča.

²² Titžtan nii yekja jilžtan tsjii jilžtan zakaz cuchanžcača. Tii jilaqui wejrnacqui wawczinča, zuma lijitum kuzziz čhjultakquiztanami, jalla nii.

Niiqui ančhuca puntuquiztan nonžcu, ančhucaquin tjonzquin ancha pecchiča. Ančhucaž zuma kamtiquiztan nižta kuzzizza.

²³ Titž puntuquiztan tuž cjiwčha. Niiqui wejt cumpañeruča. Nižaza wejttan chica ančhucultajapa sirwiča. Nii yekja pucultan jilanacž puntuquiztan tuž cjiwčha, ninacača iclizquiztan cuchantaqui, nižaza ninacaž cjen Cristuqui ancha honorchizza.

²⁴ Nonžna ančhucqui. Tjapa criichinacžquiz ančhuca zuma okzñi kuz tjeezna. Jalla nuž tjeeznan criichinacaqui zizaquiča, zuma razunžtan ančhucaž kamtiquiztan wejrqui cuntintutča, jalla nii.

9

OFRENDA PUNTU

¹ Tsjižtan zakal chiižinuča Yooz žoñinacžtajapa ofrenda puntuquiztan. Jalla nii puntuquiztan anača ančhucaquin tsji cartami cjižržquichuca.

² Ančhucqui tjapa kuztan tjaz pequiñchucčha. Jalla nii zizuča. Nižaza Macedonia yokquin žejlñi criichinacžquiz cuntintu cjiwčha, ewitanpacha Acaya yokquin žejlñi criichinacaqui ofrendižtan yanapzjapa listutača, jalla nuž chiyučha. Jalla nuž nonžcu tsjan kuzziz cjišičha ofrenda uchjapa zakaz.

³ Nižaza wejrqui tii čhjepultan jilanaca cuchanžcuča, weriž chiita ančhuca puntuquiztan ana toscara cjisjapa, ultimupan ančhuca uchta ofrenda tjacžta cjisjapa, jaknužt wejrqui parti criichinacžquiz cjiučhaja, jalla nuž.

⁴ Cunamit yekjap Macedonia criichinacaqui wejttan chica tjonachani. Ninacžquiz ančhuca ofrenda uch puntuquiztan kjaž wiltami chiižinčinča. Jalla nižtiquiztan ančhuca ofrenda ana listu tjacztažlaj niiqui, wejtnacaltami ančhucaltami aziž cjequiča.

⁵ Ana azi cjisjapa, wejrqui tantiichinča, tii čhjepultan jilanaca roc waquiziča wejt tuqui ančhucaquin tjonznajo. Ninacaqui tjonžcu ančhucaž compromitta ofrenda cumpliskataquiča. Jalla nižtiquiztan ančhuca ofrenda listu tjaczta cjequiča ima wejt tjonan. Zuma okzñi kuzziz cjen ofrenda uch waquiziča, ana weriž chiižintiquiztankaz.

⁶ Ančhucqui tii cjuñzna. Jequit koloculla zkala čhjacačhaja, nižaza koloculla ajznaquiča. Nižaza jequit wacchi čhjacačhaja, nižaza wacchi ajznaquiča.

⁷ Zapa mayni persun kuzquiz tantiižcu, ofrenda uchaquiča. Jequit zuma okzñi kuztan ofrenda utčhaja, jalla niižtan munaziča Yoozqui. Ana pizc kuztan uchasača, nižaza ana žoñiz chiižintiquiztankaz uchasača.

⁸ Tiizakaz cjuñzna. Yoozqui ančhucaquiz wacchi tjapaman wintizunanaca tjaznasača. Jalla nižtiquiztan ančhucqui želinchizkaz cjesača. Nižaza ančhucqui želinchizquiztan ofrenda tjaasača, tjapaman zuma obranaca yanapzjapa.

⁹ Tii puntuquiztan cjižrta Yooz takuqui tuž cjiča: Zuma žoñiqui okzñi kuztan pori žoñinacžquiz tjaača. Nižaza niiž zuma obranaca watay wata cjuñtaž cjequiča.

¹⁰ Yoozza semilla tjaañiqui čhjaczjapa, nižaza čhjeri tjaañiqui lujljjapa. Jalla nižtiquiztan Yoozqui ančhucaquiz želinchiz cjiskataquiča, juc'anti. Nekztan ančhucqui juc'ant ofrenda tjaasača. Ančhucaž zuma tjaatiquiztan zuma obranacchiz cjequiča.

¹¹ Yoozqui ančhucaquiz tjapaman zuma cusasanacchiz cjiskataquiča, ančhuca okzñi kuztan juc'anti tjaazjapa. Ančhucaž uchta ofrenda intirjitiquiztan, nii ofrendižtan yanapta criichinacaqui Yoozquin ancha gracias cjican cjequiča.

¹² Jalla nuž ofrenda tjaacan Yooz sirwiča. Nižaza nii Yooz sirwitiquiztan t'akjir criichinacaqui yanapta cjequiča. Nekztan ninacaqui Yoozquin ancha gracias cjican cjequiča.

¹³ Tii ofrendaqui tjeeža, jaknužt ančhucqui Cristuž liwriiñi tawk jaru kamčhaja, jalla nii. Nižaza ančhucaž zuma kamtiquiztan Yoozquin ancha honorchiz cjequiča. Ančhucqui okzñi kuztan wali chawc ofrenda tjaaquiča. Ninacžtajapa, nižaza tjapa criichi žoñinacžtajapa ančhucqui zuma okzñi kuzzizčhucča. Jalla nižtiquiztan Yoozqui honorchiz cjequiča.

¹⁴ Yoozqui ančhucaquiz ancha zuma okzñi kuzziz cjiskatchiča. Jalla nižtiquiztan nii yanapta žoñinacaqui ančhucaltajapa Yoozquiztan mayižinaquiča. Nižaza ančhucatan juc'anti zuma munazaquiča.

¹⁵ Jilanaca, cullaquinaca. Tiipanž cjuñzna. Yoozqui učumnacaquiz Cristo tjaachiča. Nii Yooziž tjaataqui juc'ant zumača; ana intintazzucača. Yoozquin ancha gracias cjican cjiwča.

10

PABLUQUI CRISTUZ APOSTOLUCHA

¹ Jilanaca, cullaquinaca. Wejr Pabluqui tii cjiyržcuča. Jazic nonžna. Cristuqui humilde kuzzizza. Jalla nižta kuzziz cjen wejrqui ančhucaquiz chiižinžcuča. Yekjap žoñinacaqui tuž cjiča: “Ančhucatan žejlcan, Pabluqui humilde kuzziztača. Pero ančhucatan ana žejlcan, c'aripachača”.

² Ančhucatan wilta žejlcan, ana wilta c'ari cjis pecuča. Yekjapanacaqui wejtnacaquiz uj tjojtunča. “Žoñž kuzcamakaz kamča Pabluqui”, jalla nuž cjiñiča. Jalla ninacžtajapa c'ari cjesača. Pero ančhucqui ninacaž irata ana cjee. Ančhucaltajapaqui anal c'ari cjis pecuča. Cristuž apostoltča wejrqui. Pero wejt persun aztan mantiz anal tjeez pecuča.

³ Wejrqui žoñi cjicanami ana žoñž kuzcamakaz paa-uča, nižaza ana žoñinacžtan kichas pecuča. Pero tjapa Yooz quintranacžtan quiražtakaz zalznasača.

⁴ Nižaza Yooz quintranacžtan zalžcu, ultim arma anal joojoo-uča. Antiz Yooz aztan anawalinacquiztan atipasača, ninacaž anawal azziz cjenami.

⁵ Yooz quintra razunanacami atipasača. Nižaza čjul mit kuzquiztan pinsita razunanacami atipasača, žoñinaca Yoozquin pajkatzjapa. Tjapa žoñinacaž pinsitanacami Cristuž tjaajintanac jaru cjiskatz pecuča.

⁶ Jalla nižtiquiztan wejrqui listuča tjapa Yooz quintra žoñinaca casticzjapa. Ančhucqui Yooz mantuquizpan cjisna, tjappacha. Weriz tjonztan, jakziltat anaž Yooz mantuquizlaja, jalla niiqui casticta cjequiča. Cristuž apostoltča wejrqui.

⁷ Ančhucqui žoñikaz chekža, kjažta tsijtchižlaja nižaza kjažta chiiñižlaja, jalla nii. Jakziltat mit kuzziz “Wejrqui Cristuž partiquiztča” cječhaja, jalla niiqui cjuñž waquiziča, wejrzakaztča Cristuž partiquiz, jalla nii.

⁸ Wejt apóstol puesto puntuquiztan cunamit juc'anti chiyučhani. Jalla nuž cjenami wejrqui anal azasača. Jesucristo Jiliriqui wejtquiz nii apóstol puesto tjaachiča, ančhucalta zuma kamañchiz cjiskatzjapa. Wejtta nii poder ana žejlča, ančhuc akzjapa.

⁹ Cartanaca cjiyržcu anal ančhuc tsucunz pecuča.

¹⁰ Yekjap quintrá žoñinacaqui tuž cjičha: “Pabluž cartanacaqui chawjc jilirž cartanacažtakazza. Pero tekz žejlcan, ana azzizza, nižaza niž razunanaca inakazza”. Nuž cjiñičha yekjapanacaqui.

¹¹ Jalla nižta cjiñi žoñinacaqui zumpacha intintaz waquizičha. Jaknužt wejrqui cartanacquiz cjižžquitučhaja, jalla niicama paasačha ančhucatan žejlcan.

¹² Nii mita kuzziz žoñinacaž irata cjis anal pecučha. Ninacaqui porapat iñarascan ana intintazñi kuz tjeeža. Yooz tawk jarupankaz kamz waquizičha.

¹³ Wejrqui persun puntuquiztan anal juc'ant chiyučha. Yoozpachačha wejtquiz tii apóstol langz tjaachiqui. Nii langzquiztan jama chiyučha. Nižaza nii Yooziž tjaata langzquiztan jama ančhucaquin tjonzinčha, liwriiñi Yooz taku paljayzjapa.

¹⁴ Ančhucaquin ana tjontasaž niiqui, wejrqui Yooziž tjaata langzquiztan jama ana ojktasačha. Parti Cristuž liwriiñi taku paljayñi žoñinacžquiztan wejrtčha primero ančhucaquin tjonchintqui. Yekja žoñiž Yooz taku langtiquiz ana mitisasačha.

¹⁵ Yekja žoñiž Yooztajapa langztiquiztan anapal cjiwčha, “Nii langztaqui weriž langztačha” cjicanaqui. Wejrqui pecučha, ančhucqui juc'anti Yoozquin kuzziz cjeajajo. Jalla nižtiquiztan ančhucaporquiz Yooztajapa juc'anti langz pecučha, Yooz tjaata langzquiztan jama.

¹⁶ Jalla nekztanaqui ančhucaquiztan nawjkchuc yekja wajtchiz žoñinacžquiz zakaz liwriiñi Yooz taku paljayz pecučha. Pero yekja žoñiž Yooztajapa langztiquiz anal mitisis pecučha.

¹⁷ Jakziltat honora waytiz pecčhaja, nižlaqui Yooz honora waytiz waquizičha.

¹⁸ Jakziltat persun honora waytican chiiñižlaja, jalla niž puntuquiztan Yoozqui “ana zumačha” cjequičha. Jakziltat “Yooz alaja zumapankazza” cječhaja, jalla niiqui Yooziž tjaata honorchiz cjequičha.

11

PABLUZTAN ANAZUM TJAAJIÑINACŽTAN

¹ Wejrqui zumzužtakaz tsjii koluc chiyačha. Nii zumzužtakaz chiita taku naca nonžnalla.

² Yoozqui ančhucajapa tsjii silusiñižtakaz wejtquiz cjiskatčha. Weriž Yooz taku paljaytiquiztan ančhucqui Cristužquin kuzziz cjisičha. Cristužtan zalz ora wejrqui ančhuc zuma kamañchiz Cristužquin prisintis pecučha, jaknužt tsjaa zuma tur naaža compromitta tjowžquiz prisintita cječhaja, jalla nuž.

³ Wejrqui ančhuca puntuquiztan turwayznučha; cunamit tsjiiqui ančhucaquiz incallskatačhani, Cristužquin ana tjapa kuz cjisjapani, nižaza Cristužquiztan zarakchi cjisjapani. Ančhucaž pinsitanacaqui tsjii kjutñiž cjisnačhani. Tuquitanpacha nii ana wal zkoražtakaz diabluqui mañužtan Evaquiz incallčičha, cunamit jalla nižta incallta cjisnačhani ančhucqui.

⁴ Wejrqui ančhucaquin tjonchinčha, werar liwriiñi takumi nižaza Jesusiž puntuquiztanami paljayzjapa, nižaza tjonchinčha Espíritu Santuž ančhuca kuzquiz luzskatzjapa. Jaziqui ančhucquiz chiižinučha. Tsjii žoñinacaqui tsjemat liwriiñi taku paljayñiž cjenami, ančhucqui nii incallñi žoñi zuma risiwiñchucquičha. Ninacaž tsjemat tjaajintanaca catokiñchucquičha. Nižaza tsjii žoñinacaqui tsjemat espíritunaca tjaaz pecasaž niiqui, ančhucqui nižta incallñi žoñi zuma risiwiñchucquičha. Nuž nonžcu, ispantichinčha; nižaza llaquita kuzziz cjiskatchinčha.

⁵ Yekjapnacaqui ančhucaquiztan nii incallñi žoñinacž puntuquiztan pinsičha, zuma apostolonacača, jalla nii. Ninacaqui anača werar apostolonacaqui; anača wejtquiztan pajk jiliriqi. Jalla nuž cjiwča.

⁶ Wejrqui anal altu tawkžtan paljaycan ančhucatan kamchinča. Jalla nuž cjenami wejrqui Yooz puntu zuma zizuča. Jalla nii zizñi cjican kjanapacha tjezinča weriž tjapa puntunaca paljaytiquiztan. Tantiya ančhucqui.

⁷ Wejrqui humilde kuzziz ančhucatan kamchinča, ančhuc honorchiz cjisjapa. Nižaza ana paaz paca mayžcu, liwriiñi Yooz taku ančhucaquiz paljaychinča. ¿Jalla nuž anawali paachin wejrjo?

⁸ Yekja iclizziz žoñinacaqui wejtquiz paaz tjaachiča. Jalla nii ofrendanaca tanzinča, ančhucaquin Yooz taku paljayñi ojkzjapa.

⁹ Ančhucatan kamcan ana želinchiz cjissinča. Pero ančhucaquiztan ana čhjulumi maychinča. Macedoniaquiztan tjonchi jilanacaqui wejtquiz onanchičha. Jalla nižtiquiztan anaž čhjulumi wejtquiz pjaltatča. Tuquiqi wejrqui ančhucaquiz ana mayzjapa ancha cwitassinča, ančhucjapa ana ch'ama cjejajo, nižaza jaztanami mayzquiztan cwitasučha.

¹⁰ Jaknužt Cristuqui werarapan chiiñitazlaja, jalla niž cjen nižta werarapan chiyiñzakaztča wejrqui. Jalla nižtiquiztan legali cjican, wejrqui cjiwča, anaž jec Acay wajtchiz žoñiqui wejt puntuquiztan cjesača, “Pabluqui ana želinchiz cjican, wejtquiztan maychiča”, nuž cjicanaqui. Jalla nuž ančhucaquiztan ana čhjulumi maytiquiztan cuntintutča wejrqui.

¹¹ ¿Kjažtiquiztan nižta chiyu wejrjo? ¿Ančhucatan ana zuma munazojo? Anapanž cjesača. Yooz zizza, wejrqui ančhucatan munazuča, jalla nii.

¹² Wejrqui liwriiñi Yooz taku paljayiñča, ana paaz paca mayžcuqui. Nižaza tirapan nužullakaz kamača. Nekztan jakziltat paaz ganzjapa Yooz taku paljayčhaja, jalla niiqui anapanž cjichuca, “Wejrtča Pabluž irata Yooz taku paljayiñtqui”, nuž cjicanaqui.

¹³ Nii paaz tanzjapa paljayñinacaqui falso apostolunacača. Nii žoñi incallñinacaqui Cristuž apostolunacažtakaz ojklayñičha.

¹⁴ Jalla nužupan tii muntuquiz wataquiča. Satanás diablupacha tsjii Yooz anjilažtakaz ojklayča.

¹⁵ Nižazakaz Satanásquiz sirwiñi žoñinacaqui werara Yooz sirwiñinacažtakaz ojklayča. Jalla nižta puntu nayžcu, ana tsucaquiča. Ninacaž nižta ojklaytiquiztan jama castictaž cjequiča.

PABLUQUI ANCHA SUFRISNACA WATCHICHA

¹⁶ Wiltal cjiwča. Jalla nuž chiyanacqui ančhucqui weriž chiita puntuquiztan anača pinsisqui, “Niiqui zumzu taku chiiča” cjicanaqui. Jalla nuž pinsanami, wejr chiyaj cjila tsjii lucurata žoñižtakaz. Wejrqui tsjii koluculla persun honora waytaj cjila.

¹⁷ Jalla nuž chiican wejrqui lucuratu žoñižtakaz chiyača. Anal chiyača Yooz Jilirž ortin jaru, jalla nuž persuna honora waytican.

¹⁸ Walja žoñinacaqui tii muntuquiz čhjulunacquiztanami persun honora waytiča. Jalla nižtiquiztan wejr zakal persun honora koluculla waytača.

¹⁹ Ančhucqui chiiñčhucča, “Ziziñ žoñinactča wejrnacqui”, cjicanaqui. Jalla nuž chiichiž cjenami ančhucqui zumzu žoñinacž takunaca cuntintu nonzniñčhucča.

²⁰ Falso žoñinacaqui ninacž mantuquiz ančhuc cjiskatz pecča. Nekztan ančhucqui nii žoñinacžquiz zuma cassa. Nižaza tsjii falso žoñinacaqui ančhuca cusasanacquiztan paca mayča. Nekztan ančhucqui ninacžquiz zuma tjaacha. Nižaza tsjii falso žoñinacaqui persunaltajapa zuma cjisjapa ančhuc mantiča. Nekztan ančhucqui nižquiz zuma cassa. Nižaza tsjii falso

žoñiqui ančhuc iñarča. Nekztan ančhucqui nižquiz zumakaz awantiča. Nižaza tsjii falso žoñiqui ančuca yujcquiz tsjajpačhani. Jalla nižakaz ančhucqui zuma awantačhani.

²¹ Wejrqui ančhucatan kamcan ana nižta kamchinča; humilde kuzziz kamchinča. ¿Jalla nižtiquiztan wejrqui azasajo? Anapal azasača. Yekja žoñinacaqui čjulquiztan persun honora waytačhaja, jalla nii žoñinacžquiztan juc'antitča wejrqui. Jalla nuž chiicanaqui lucuratažtakaz chiyučha.

²² Yekjapanacaqui cjiñičha, “Hebreo sarchiz žoñinactča wejrnacqui”. Werj zakal cjeeča, “Hebreo sarchiz zoñtča wejrqui”. Nižaza ninacaqui cjiñičha, “Yooz illzta Israel wajtchiz žoñinactča wejrnacqui”. Wejr zakal cjeeča, “Yooz illzta Israel wajtchiz zoñtča wejrqui”. Nižaza ninacaqui cjiñičha, “Abrahamž majchmaatquiztan tjoniñičha”. Wejrmi zakal cjeeča, “Abrahamž majchmaatquiztan tjoniñičha”.

²³ Ninacaqui cjiñičha, “Cristuž sirwiñtča”. Wejrmi zakal cjeeča, “Cristuž juc'ant zuma sirwiñtča”. Jalla nuž chiicanaqui lucuratažtakaz chiyučha. Pero ninacžquiztan juc'anti langzinča Cristužtajapa. Nižaza ninacžquiztan juc'anti wjajttatača. Nižaza ninacžquiztan juc'anti carsilquiz chawwtatača. Nižaza tsjii kjaž wilta ticzmaya želaytuča.

²⁴ Pjijska wilta judío žoñinacaqui wejr casticchiča. Jalla nuž casticcan, quinsa tunca llatuncan lazu wjajtta mutchinča.

²⁵ Chjep wilta wejrqui wjajtz paržtan wjajttatača. Tsjii wilta maztan čhajttatača. Chjep wilta warcuquiz okan nii warcu julskatchičha. Warcu julskatžcu tsjii nooj weentižtan majiñtižtan pajk kot taypiqueiz žejlchinča.

²⁶ Tirapan ojkojkchinča, walja anawalinaca watñiž cjenami. Tižta anawalinaca watchinča, anawal pujunaca, anawal tjañinaca, wejt wajtchiz anawal žoñinaca, yekja wajtchiz anawal žoñinaca, chawjc wajtquiz anawal žejlñinaca, ch'ekti yokquin anawal žejlñinaca, anawal pajk kotanaca, nižaza anawal falso jilanaca. Jalla nižta anawalinacami watchinča.

²⁷ Nižaza ancha langzinča, nižaza zuma ch'amanaca watchinča, kjaž wilta ana tjaji atchinča, nižaza kjaž wilta čherž kjarami kjaz kjarami passinča, kjaž wilta ayunassinča. Nižaza kjaž wilta zakinacquiz ch'uncan sufrichinča, zquitž kjara.

²⁸ Tjapa nižtanaca watchiž cjenami, iyakal sufručha. Zapuru tjapa iclizziz žoñinacžtajapakal cjuñznučha, llaquita kuzziz ninaca zuma kamañchiz cjis-cama.

²⁹ Jakzilat llajllasñi kuzziz cječhaja, wejrqui nižtan chica zakal llaquisučha. Jakzilat ujquiz tjojtskatñi cječhaja, wejrqui nii tjojtskatñi žoñž quintra žawjznučha.

³⁰ Wejrqui persun honora waytaž niiqui, weriž sufritanacquiztanami nižaza inallakaz cjitiquiztanami honoral waytača.

³¹ Anal toscara chiyučha. Jesucristo Jilirž Yooz Ejpqui nii zizza. Yooz Ejpqui wiñaya honorchiz cjila.

³² Damasco wajtquin želan, Aretas cjita chawjc mantiñi jiliriqui ulanz zananacquin guardianaca mantichiča, wejr tanzjapa.

³³ Pero criichi jilanacaqui wejr pajk canastiqueiz yaažcu, pirkiž tsewctan kozzuc tsjii kjuya wintanquiztan wejr chjijunchičha. Jalla nižtiquiztan wejrqui ninacžquiztan atipassinča.

12

¹ Persun honora waytican, anača čjulumu wejttaqui cusaqui. Jalla nuž cjenami tiral wejt puntuquiztan chiyučha. Ančucaquiz tii zakal quint'ača,

Yoozqui niž puntunaca cherkatchiča. Nižaza niž puntunaca zizkatchiča.

² Wejrqui Jesucristužquin kuz tjaachinča. Niiž wiruñ ažk tunca pusin watanaca wejrqui arajpach Yooz wajtquin chjichtatača tsjii upacama. Curpužtanpacha chjichtatažlaja, uż ana curpužtanpacha chjichtatažlaja, jalla nii anal naychinča. Yooz Ejpkaż zizza.

³⁻⁴ Pero wejrqui zizuča, nii zuma wajtquin chjichtatača, jalla nii. Curpužtanami ana curpužtanami, jalla nii anal naychinča. Yoozkaż zizza. Jalla nii zuma wajtquin takunaca nonzinča, jalla nii nonžta takunacaqui anača chiichuca žoñž takunacžtan.

⁵ Jalla nii Yooz puntu nonztiquiztanami chertiquiztanami honora waytasača. Wejrqui persun sufrisnacquiztan honora zakaz waytasača. Persunquiztan anal honora waytiz pecuča.

⁶ Wejrqui persun honora waytiz pectasaž niiqui lucuratažtakaz ana chitasača. Zuma werar razunžtanpan chiyuča. Jalla nuž cjenami, persun honora anal iya waytača. Weriz chiitanacquiztanami paatanacquiztanami jalla nii jarukaz wejrqui rispitta cjesača.

⁷ Nii Yooz puntu ziztanaca, chertanaca juc'ant zuma cuzača. Jalla nižtiquiztan ana mit kuzziz cjisjapa, Yoozqui wejr laa cjiskatchiča. Wejr tsjii ch'apžtan chjapchižtakaz sufriskatchiča. Yoozqui Satanás diablužquiz nii laa cjisjapa permitchiča, wejtquiz nižta sufriskatzjapa.

⁸ Wejrqui čhjep wilta nii laa puntuquiztan Yooz Jiliržquin mayizichinča, wejt curpu laa žetajo.

⁹ Pero Yooz Ejpzti wejtquiz kjaaziča, tuž cjican: Wejrqui amtan zuma munazuča, jalla nižtiquiztan amquiz yanapača. Am inallakaz cjicanaqui wejt aztan amquiz zuma atñi cjiskatača, nižaza čhjulunacquiztanami amquiz zuma atipñi cjiskatača. Jalla nuž cjichiča Yoozqui.

Jalla nižtiquiztan wejrqui sufrisnaca watchiž cjenami, nižaza inallakaz cjenami, cuntintul cjeeča. Nekztan Cristuž aztan wejt kuzmi curpumi yanaptaž cjequiča.

¹⁰ Cristužtajapa sufricanaqui čhjulu watanami cuntintul cjeeča, inallakaz cjenami, iñarta cjenami, ana želinchiz cjenami, sufriskatta cjenami, ch'amanaca watchiž cjenami, čhjulunacaž watanami cuntintul cjeeča. Juc'ant inallakaz cjicanaqui, juc'ant tjupi kuzziztča, Cristuž aztanaqui.

¹¹ Jalla nuž chiican lucuratažtakaz chiichinča. Ančhucpachaž nižta wejr chiikatchiča. Ančhucpacha wejt puntuquiztan zumanaca chiiz waquiziča. Yekjap žoñinacaqui chiiñiča, nii Pablužquiztan juc'ant zuma apostolonactča wejrnaqui, cjican. Jalla nižta cjiñinacžquiztan juc'ant zumtča wejrqui, Yooz yujcquiz inakaz cjenami.

¹² Wejrqui ančhucatan žejlcan ultim werar apóstol puestuquiz ojklaychinča, zuma pasinsis kuztan. Ančhucporquiz wacchi milajrunacami, siñalanacami, ispantichucanacami, jalla nižtanaca paachinča.

¹³ Jaknužt parti iclizziz criichinacžtan kamtučhaja, jalla nižta irata ančhucatan kamchinča. Jalla nuž kamcan ančhucacquiztan ana čhjulumu maychinča, jaknužt parti criichinacžquiztan maytučhaja, jalla nižta. Jalla nii ana čhjulumu maytiquiztanaqui cunamiž ančhucqui žawjčhani. Jalla nekztanž pertunalla.

PABLUQUI CORINTO ŽOÑINACŽQUIZ ANCHA CJUŇČHA

¹⁴ Anziqui wejrqui tjacznuča čhjep wiltiquiziqui ančhucacquin tjonzjapa. Tii wilta zakaz ančhucacquiztan ana čhjulumu mayača. Ančhucac cusasa wejtquiz anaž importiča. Antiz ančhuc alaja importayuča. Ocjalanacaqui

anaž cusasanaca juntasača, maa ejpžtaqui. Antiz maa ejpnacaž cusasanaca juntasača, persun ocjalanacžta.

¹⁵ Jalla nižtiquiztan wejrqui persun gasto gastača ančuca kuznaca zuma cjisjapa. Wejrqui ančucaquiz yanapasača ochañcama. Wejrqui ančucatan juc'ant zuma munaziñi kuzziztča. ¿Ančuczti upa wejttan munaziñi kuzzizčuckaya?

¹⁶ Tsjii žoñinacaqui tuž cjiñiča, Pabluqui wejtnacaquiztan ana čhjulu may cjenami, jalla nuž maña paacan wejtnacaquiz incallchiča. Jalla nuž cjiñiča.

¹⁷ Pero wejrqui pewcznuča, ¿Wejrqui cuchanžquita jilanacžquiz ančuc incallzkatchinjo? Anapanča.

¹⁸ Wejrqui Tito rocchinča ančucaquiz tjonzcajo. Niižtan chica yekja jila cuchanžquichinča. ¿Nii Titžquiz ančucqui incallchinčucjo? Niižtan wejttan nuž pucultan ančucatan zumpacha kamchinča, zuma kuztanami nižaza zuma kamcanami.

¹⁹ Ančucqui cunamit wejt puntuquiztan pinsičani, Pabluqui persun puntuquiztan tirapankaz tjurt'iča, jalla nii. Jalla nižta pinsitaqui anazumača. Weriž pecta jilanaca, cullaquinaca. Yooz yujcquiz Cristuž tjuuquiz chiyuča, ančuca kuznaca juc'ant zuma cjisjapa.

²⁰ Ančucaquin tjonžcu, cunamit wejrqui ančucaquiztan tsjii žoñinacžtan anazuma kamañchiz zalačani. Jalla nii jiwjatuča. Jalla nižta zalaž niiqui, wejrqui ančucaquiz c'aril cjeeča. Jalla nižta c'ari takunacžtan tjonzjapa anaž pecča ančucqui. Cunamit ančucaporquiz ch'aaznaca žejlčani, nižaza iñiziñinaca žejlčani, nižaza čhjaawjkatñinaca žejlčani, nižaza mitarar kuzziznaca žejlčani, nižaza ana zum taku joojooñinaca žejlčani, nižaza žoñž quintra chiichiiñinaca žejlčani, nižaza mit kuzziz žoñinaca žejlčani, nižaza kichjasñi kuzziz žoñinaca žejlčani. Jalla nižtanaca žejlčani. Jalla nižtiquiztan tii cartal cijržcuča, ančucaž ana zuma kamañnacquiztan jaytisjapa.

²¹ Cunamit yekjapanacaqui ana zuma kamañchizlani, nižaza adulteriuquiz ojklaychizlani, nižaza ana walinaca paachizlani. Cunamit yekjapanacaqui ančucaquiztan uj paayiñchuczlani, nižaza ančuca ujquiztan ana pertuna mayizichinčuczlani. Jalla nižtiquiztan ančucaquin tjontan cunamit wejt Yoozqui ančucaž anazuma kamchiž cjen wejr azkatačani. Nižta wataquiz niiqui, llaquita kuzziz cjeeča.

13

ZERZ TAKUNACA

¹ Tiižtan čhjepquiziqui ančucaquin tjonžcuča. Ima tjoncan tiizakal chiižinuča. Tsjii žoñžquiz uj tjojtnaquiz niiqui, ima casticta cjican, pucultan čhjepultan tisticunacžtan ticlarskataquiča nii uj paañi žoñž puntuquiztan.

² Tuquiqui wejrqui uj paañi žoñinacžquiz chiižinčinča, ujnaca eca, cjican. Nižaza tjapa žoñinacžquizimi nižta chiižinčinča. Jaknužt pizc wiltiquiz tjonžcu ninacžquiz chiižinčinča, jalla nižta tii cartiquiz wilta chiižinžcuča, ančucatan ana žejlcanami. Wilta tjonžcu, uj paañi žoñinaca panž casticača.

³ Jalla nuž castictiquiztan ančucqui kjanapacha cheraquiča, Cristužtan wejttan tsjii kuzzizza. Jaziqui Cristuqui wejr chiikatchiča. Cristuqui anača inallakaz ančucaltajapa. Antiz ančucaporquiz niiž azi tjeeža.

⁴ Ina žoñižtakaz cruzquiz ch'awctatača. Pero Yooz Ejpž aztan jatatchiča. Cristužtakaz inallakaz wejrqui. Pero nižaza Cristužtan kamcan, wejrqui Yooz aztan tjeeznasača ančucaltajapa.

⁵ Ančhucqui persunpacha kuz tantiyasa, Cristužquin tira kuz tjurt'iñi, uż ana tjurt'iñi, jalla nii. Persunpacha tantiyasa. Jesucristuqui ančuca kuznacquizza. ¿Jalla nii ana naazjo? ¿Ančhucqui anaj ultim criichinacajo?

⁶ Wejrqui cjiwčha, wejrnacqui anača falso criichi žoñi, antiz ultim werar criiñ žoñčha. ¿Nii ana nayjo?

⁷ Wejrqui Yoozquin mayizučha, ančhuc ana ujnaca paajo. Jalla nuž mayizučha, wejt zuma razuna ana tjeezjapa, antiz ančhucqui zuma cjisjapa. Wejrqui ana zuma razunchiztakal cjež niiqui, anaž importičha.

⁸ Wejrqui werar razun quintra anal paasača čhjulumi. Antiz werar razun jarukaz chiyasača.

⁹ Jalla nižtiquiztan wejrqui inallakaz cjicanami cuntintučha, ančhucqui tjup kuzziz cjequiž niiqui. Wejrqui ančhucaltajapa tira Yoozquin mayizučha, ančhuc juc'ant zuma kamañchiz cjisjapa.

¹⁰ Wejrqui ančhucatan ana žejlcan, jalla tuž tii cartal cjiwržcučha, ančhuc zuma cjisjapa. Wejrqui ančucaquin tjonača Yooz Jilirž apóstolž aztan. Ančucaquin tjonača, ana c'aripacha cjisjapa, antiz ančhuc juc'ant zuma kamañchiz cjiskatzjapa.

¹¹ Jilanaca, cullaquinaca, jalla nuž chiižcu tiizakal chiyučha. Ančucaquiz zumaj cjila. Ančuca kamañanaca zumpacha azquicha. Zuma kamañchiz panž cjisna. Nižaza ančhucqui porapat kuzzasñiž cjee. Tsjii kuzziz cjee. Porapat zuma munaza. Jalla nuž zuma kaman, Yoozqui ančhucatan cjila. Yoozqui ancha zuma okzñi kuzzizza, nižaza niiča llan kuzziz cjiskatñiqui.

¹² Jilanaca, cullaquinaca, porapat zuma tsaanasaquiča.

¹³ Tekzta tjapa Yoozquin kuzziz jilanacaqui ančucaquin tsaanžquiča.

¹⁴ Jesucristo Jiliriqui tjapa ančucaquiz zumanacaj tjaala, nižaza Yooz Ejpqui tjapa ančhucatan zuma munaziñej cjila, nižaza Yooz Espíritu Santuqui tjapa ančuca kuznacquiz cjila. Jalla nužoj cjila. Amen.

LA CARTA DEL APOSTOL SAN PABLO A LOS GÁLATAS

¹ Wejr Pablutcha, anchucaquin tii cartal cjiiržcuča. Jesucristužtan Yooz Ejpžtan cuchanzquita apóstol zoñtcha wejrqui, anača zoñiž cuchanzquititqui. Nižaza anača zoñiž uchtitqui tii apóstol puestuquiz. Antiz Jesucristužtan Yooz Ejpžtan wejr tii apóstol puestuquiz utchiča. Yooz Ejpča Jesucristo ticziquiztan jacatatskatchiqui.

² Wejrqui tjapa wejttan žejlñi jilanacžtan anchucaquin tsaanžcuča. Anchucqui Galacia provinciquin icliz zoñinacchucča.

³ Učhum Yooz Ejpžtan Jesucristo Jiliržtan anchucaquiz zumaj yanapla, nižaza anchucaquiz cuntintu kuzziz walikaj kamkatla.

⁴ Tii muntuquiz kamcan, zoñinacaqui ana zuma kamañchiz kamča. Nii ana zuma kamañquiztan liwriizjapa, Jesucristuqui ticziča. Nižaza učhum ujnac laycu ticziča Yooz Ejpž munañpi jaru. Jalla nii Yoozza učhum yanapñiqui.

⁵ Yooz Ejpqui wiñaya honorchiz cjila. Jalla nužoj cjila. Amén.

TSJIIKAZ LIWRIIÑI TAKU ZEJLCHA

⁶ Wejrqui anchuca puntu nonžcu ispantichinča. Anchucqui ratulla Yoozquiztan zarakquiča. Jesucristuž anchucaquiz okzñiž cjen, Yoozqui anchuc kjawziča, liwriita cjisjapa. Yoozquiztan zarakcan anchucqui yekja tsjemat liwriiñi taku catokquiča.

⁷ Pero anaž yekja liwriiñi takuqui želasača. Tsjii tsjii zoñinacaqui anchuca kuz turwayskatz pecča. Nižaza Jesucristuž liwriiñi taku tsjematquin querz pecča. Wejrnacqui anchucaquiz werar liwriiñi taku paljaychinča. Jalla niic anchucqui zizza.

⁸ Jalla nižtiquiztan jakziltamiž tsjemat liwriiñi taku anchucaquiz tjaa-nasaž niiqui, jalla nii zoñiqui Yooziž castictaj cjila. Wejr mekaj cjila, araj-pachquiztan tjonchi anjila mekaj cjila, jakziltami yekja tsjemat liwriiñi taku tjaa-nasaž niiqui, castictaj cjila.

⁹ Tuquiqui nižtapan chiichinča. Jaziqui wilta nižtapachal chiyuča: Jakziltamiž yekja tsjemat liwriiñi taku anchucaquiz tjaa-nasaž niiqui, jalla niiqui Yooziž castictapaj cjila. Anchucqui werar liwriiñi taku catokch-inchucča. Ana iya žejlča.

¹⁰ Jalla nuž c'aripacha chiican, ¿chjulut pecoj wejrjo? Anal pecuča "Amča zumamqui" cjiñinacaqui. Nižaza anal pecuča zoñinacž kuz wali cjiskatzjapa. Jalla nižta pecaquiz niiqui, Jesucristuž mantuquiz sirwiñi ana cjichucača.

PABLUZ OJKLAYTA QUINTU

¹¹ Jilanaca, cullaquinaca, anchucaquiz tuž tjaa-jinz pecuča. Weriz pal-jayta liwriiñi takuqui anača zoñž kuzquiztan pinsita.

¹² Ana jec zoñžquiztanami nii liwriiñi taku nonzinča, nižaza anaž jec zoñimi wejtquiz nii liwriiñi taku tjaa-jinchiqui. Jesucristupachača wejtquiz tjaa-jinchiqui.

¹³ Tuquiqui wejrqui judío zoñinacž kamañ jaru kamiñtača. Jalla nii nonzinchucča. Tuquiqui Yooz partir zoñinaca tanžcu ninaca walja sufriskatiñtača. Yooz icliz zoñinaca k'ala akz pecaytuča.

¹⁴ Nižaza wejrqui judío cuzturumpinacž puntu juc'anti zizzinča, wejt judío mazinacžquiztan juc'anti. Wejrqui wejt tuquita atchi ejpnacž cuzturumpiquiz tjapa kuztantača. Nii cuzturumpinacž jaru kamzjapa ancha c'unchintača.

¹⁵ Jalla nuž cjenami Yoozqui wejr t'akziča, niiž apóstol cjisjapa. Ima weriž maaquiztan nasan, Yoozqui wejr t'akzjapa tantiichiča. Nižaza Yoozqui wejtquiz ancha okzñiž cjen, wejr kjawziča, liwriita cjisjapa. Chjulorat wejr kjawz tantiitčaja, jalla nii ora wejr kjawziča,

¹⁶ niiž zinta Majch pajzjapa, nižaza niiž apóstol cjisjapa. Nižaza Yoozqui wejr kjawziča, ana judío wajtchiz žoñinacžquin Jesucristuž puntu paljayni cjisjapa. Jalla nuž Yooztan niiž Majchtan pajžcu, ana jecžtanami kazni ojkchinča.

¹⁷ Nižaza ana Jerusalén watjami ojkchinča, parti apostolanacžtan kaznimi. Ninacaqui wejt tuqui apóstol puestuquin luzzitača. Jalla nuž wejt tuqui luzziž cjenami ana ninacžtan kazni ojkchinča. Antiz Arabia yokquin ojkchinča. Wiruñaqu niwjctan Damasco wajtquin quejpžquichinča.

¹⁸ Nekztanaqui čhjep watquiztan Jerusalén ojkchinča, Pedružtan zalzjapa. Jalla nekztan Pedružtan tsjii tunca pjijskan tjuñi kamchinča.

¹⁹ Jalla nicju kamcan, Jesucristo Jilirž lajk Jacobo cjita apostolžtan zalchinča. Ana jakzilta parti apostolonacžtanami zalchinča.

²⁰ Yooz yujcquiz žejlcan, anal toscara chiyuča. Tii weriž cijirtaqui werarača.

²¹ Jerusalén wajtquiztan zarakžcu, Siria yokaran nižaza Cilicia yokaran ojkchinča.

²² Judea yokquin kamni criichinacžtan ima zalchinča. Nii Cristuž partir žoñinacaqui ima wejr paj-kalča.

²³ Ninacaqui wejt puntuquiztan tii quintukaz zizziča: “Nii wejrnacaž sufriskatta žoñiqui niipachaž Jesucristužquin kuztan criichiqui. Tuquiqui liwriiñi Jesucristuž puntu k'ala tjatanz pecñitača. Anziqui niiqui liwriiñi Jesucristuž puntu paljayla”. Jalla nuž cjetča wejt puntuquiztanaqui.

²⁴ Nii criichinacaqui Yooztajapa honora waytichiča wejt puntu nonziž cjen.

2

APOSTOLONACAQUI PABLO ZUMA RISIWCHICHA

¹ Nekztan tunca pusin watquiztan wilta Jerusalén watja ojkchinča Bernabežtan. Nižaza Tito chjitchinča.

² Yooz wejtquiz chiitan, Jerusalén watja ojkchinča. Jalla nicju jaknužt yekja wajtchiz žoñinacžquiz liwriiñi Yooz taku paljaytučaja, jalla nii mazin pecchinča. Primiraqui icliz jilirinacžtan ajčcu ninacžquiz mazinchinča, nekztan parti criichinacžquiz mazinchinča weriž paljayta liwriiñi Yooz taku, jalla nii. Jalla nuž mazinchinča, weriž Yooztajapa langžta ana ina cjisjapa. Nižaza anz weriž Yooztajapa langžtaqui ana ina cjiskatz pecuča. Jalla nižtiquiztan weriž paljaytaqui nii judío criichinacžquiz mazinchinča.

³ Ninacaqui wejr zuma risiwchiča. Nižaza Tituqui wejttan chica želatča. Nii Tituqui griego wajtchiz žoñi cjican, ana janchiquiz chimpuchiztača, judío žoñinacž cuzturumpi jaru. Jalla nuž cjenami judío žoñinacž cuzturumpi ana paakatchiča, nii janchiquiz chimpata cuzturumpi, jalla nii.

⁴ Pero tsjii kjaž žoñinaca želatča, “Wejrnactča criichinacaqui” cjiñi. Jalla ninacaqui anatača lijitum criichinacaqui pero. Criichinacžporquiz chjojzaka luzzitača. Jalla nii ana zum žoñinacaqui awayt'i luzzitača, jaknužt wejrnacqui Jesucristužquin kuzziz cjen Moisés liiquiztan liwriita, jalla nii.

Ninacakaz Titžquiz judío chimpuchiz cjiskatz pecatča. Nižaza ninacaqui wilitaž wejrnac ninacž lii mantuquiz utz pecatča.

⁵ Anapan ninacž munañpi jaru cjiskatchinča. Wejrnacqui pecaytuča, ančhucqui werar liwriiñi Yooz tawk jaru tirapan kamzjapa, jalla nuž.

⁶ Nekz žejlñi pajta jilirinacaqui ana wejtquiz čhjul ew taku tjaačinčiča. Jiliri cjenami ana jiliri cjenami wejtquiz anal importayuča. Yoozquiz žoñinaca ana illillziča. Yooz yujcquiziqui tjapa criichinacaqui tsjii parijuča.

⁷ Jalla ninacaqui wejtquiz ana čhjul ew taku tjaačinčiča. Antiz ninacaqui wejr pajčiča, Yooziž uchta apóstol, nižaza werar liwriiñi taku paljayñi, jalla nii. Wejrqui uchtača yekja wajtchiz žoñinacžquiz liwriiñi Yooz taku paljayajo, jaknužt Yoozqui Pedro utčhaja, judío wajtchiz žoñinacžquiz liwriiñi taku paljayajo, jalla nižtapacha.

⁸ Yoozqui Pedro cuchanchiča, judío žoñinacžquiz liwriiñi taku paljayajo. Jalla nii Yoozpacha wejr cuchanchizakazza, yekja wajtchiz žoñinacžquiz paljayajo. Yoozqui jalla nuž pucultan cuchanchiča nižtajapa langznajo.

⁹ Jalla nižtiquiztan Jacobžtan Pedružtan Juanžtan wejr pajčiča, Yooz amt'ita jaru apóstol puestuquiz uchta, jalla nii. Nii čhjepultanaqui pajta chawjc jilirinacatača. Jalla nuž wejr pajžcu, ninacaqui wejr zuma risiwchiča. Bernabequi risiwtažakazza. Jalla nižtiquiztan wejtnacatan ninacžtan wali cjiyassinča. Wejrnacqui tsjii zuma acuerduquiz kazzassinča, wejrnaca yekja wajtchiz žoñinacžquin paljayi ojkzjapa, nižaza ninaca judío žoñinacžquin paljayi ojkzjapa, jalla nuž.

¹⁰ Nižaza ninacaqui wejtnacaquiz roct'ichiča, pori žoñinacžquin yanapzjapa cjuñznajo. Wejrqui nižtapacha zakaz ancha tantiyuča.

PEDRUŽTAN PABLUŽTAN ANTIOQUIA WAJTQUIN

¹¹ Niiž wiruñ Pedruqui Antioquía watja ojkchiča. Jalla nicju Pedružquiz zumpacha chiižinčinča, niiž yujcquizpacha. Niiž kamtaqui ana zumquintača.

¹² Antioquía wajtquin irantižcu, Pedruqui nii wajtchiz ana judío žoñinacžtan lujlchiča. Nekžtan tsjii kjaž Jacobž partir žoñinacaqui irantichiča. Jalla ninacaqui judío cuzturumpinaca exijñitača. Jalla ninacžquiz ekskcu, Pedruqui nii ana judío žoñinacžquiztan tsjii latu zarakchiča.

¹³ Pedruž nuž zarakčan, parti judío criichinacaqui nižtapacha zakaz tsjii latu zarakchiča. Pero ninacaqui kuzquiz zizatča, nižta zarakz ana wali, jalla nii. Bernabemi ninacžtan chica zarakzkattatača.

¹⁴ Jalla nuž zarakžcu ninacaqui werar liwriiñi Yooz tawk jaru ana kamchiča. Jalla ninaca zarakñi cheržcu wejrqui tjapa žoñinacž yujcquiz Pedružquiz zumpacha chiižinčinča, tuž cjican: —Amqui judío žoñimča. Jalla nuž cjenami amqui ana judío žoñižtakaz kamñamča. Amqui judío cuzturumpinac jaru ana kamñamča. Jalla nižtiquiztan ¿kjažtiquiztan amqui tii ana judío žoñinaca judío žoñinacažtakaz kamkatz pecya? Anapanž zuma niiqui.

JESUCRISTUŽQUIN KUZUZ CEN ŽOÑINACA LIWRIITACHA

¹⁵ Wejrnacqui judío žoñinacžquiztan tjoniñča. Yekja wajtchiz žoñinacžquiztanami, Yooz quintra paañi žoñinacžquiztanami anapan tjoniñča.

¹⁶ Jalla nuž tjonñiž cjenami wejrnacqui zizzinča, anaž jakziltami Moisés lii jaru kamchiž cjen Yooz yujcquiz zuma cjisnasacha. Yooz yujcquiz zuma cjisjapa, žoñinacaqui Jesucristužquin kuzuz cjistanča. Jalla nuž zizzinča.

Wejrnac zakaz Jesucristužquin kuz tjaachinča, Yooz yujcquiz zuma cjisjapa. Anaž jakziltami Moisés lii jaru kamchiž cjen Yooz yujcquiz zuma cjisnasača. Jalla nižtiquiztan wejrnac zakaz Moisés lii jaru kamchiž cjen, Yooz yujcquiz anapanž zuma cjisnasača.

¹⁷ Yooz yujcquiz zuma cjisjapa wejrnacqui Jesucristužquin kuz tjaachinča. Jalla nii kuz tjaaz oraqui, wejrnacqui yekja wajtchiz žoñinaca irata persun uj pajstantača, “Wejrnacmi zakaz ujchiztča”, cjicanaqui. ¿Jalla nuž wejrnacaž persun uj pajchiž cjen, Jesucristuqui wejrnac nižta ujchiz cjiskatjo? Anapanž cjesača.

¹⁸ Yooz yujcquiz zuma cjisjapa, Moisés lii ana walča. Jalla nuž wejrqui tjaajinčinča. Anziqum wejrqui wilta chiitasaz niiqui, “Moisés lii jaru kamchiž cjen Yooz yujcquiz zuma cjisnasača” jalla nižtiquiztan wejrqui juc'anti ujchizpan cjitasača.

¹⁹ Moisés lii mantuquiz kaman nii liiqui kjanapacha wejtquiz tjeeziča, wejrqum ujchizpantča, jalla nii. Jalla nižtiquiztan wejt persun uj pajžcu, Jesucristužquin kuz tjaachinča. Jalla nižtiquiztan Moisés liiquiztan liwriitača wejrqum, Yooztajapa kamzjapa.

²⁰ Jesucristuqui wejt ujnac laycu cruzquiz ch'awcta ticziča. Jalla nuž wejt ujnac laycu ticziž cjen, wejrqum nižtan chica ticzižtakaztča. Wejt tuquita ana zuma kamaña jaytichinča, jalla nižtiquiztan ew kamañchizza wejrqum. Pero anača wejt persun kamañchiz antiz Cristuž kamañchiz kamuča. Jaziqum tii muntuquiz žejtcan ew kamañchiz kamuča. Jesucristo Yooz Majchquin kuz tjaatiquiztan Jesucristuqui wejtquiz okžniž cjen, wejt ticz cuntiquiztan ticziča.

²¹ Yoozqui žoñinacžquiz okžcu, Jesucristo cuchanžquichiča žoñinaca liwriizjapa. Liwriiñi Yooz taku anal nicz pecuča. Moisés lii jaru kamchiž cjen žoñinacaqui Yooz yujcquiz zuma cjiisž cjitasaž niiqui, Jesucristuqui inapankaz ticztasasča. Anapanča nužuqui.

3

LIWRIIZ PUNTU

¹ Galat wajtchiz žoñinaca, ančhucča zumzužtakaz. ¿Jequit ančhuc in-callchejo? ¿Jequit werar liwriiñi tawkquiztan ančhuc tsjii kjutñi chjitchejo? Liwriiz puntu paljaycan wejrnacqui Jesucristuž puntuquiztan kjanapacha ančhucaquiz tjaajinčinča, Jesucristuqui žoñinacž ujnacquiztan cruzquiz ch'awcta ticziča, jalla nii.

² Tsjii pewcz pecuča. ¿Moisés lii jaru kamchiž cjen, Espiritu Santo ančhuca kuzquiz luzzikay? Anapanča. Jesucristužquin kuz tjaatiquiztan, nekztan Espiritu Santuqui ančhuca kuzquiz luzziča. Jalla niiqui nužupanča.

³ ¿Kjažtiquiztan anča zumzu ančhucjo? Espiritu Santuž cjen ančhucqui Yooz kamañquiz kami kallantichinčhucča. ¿Persun kuzcama kamcanaqui Yooztajapa tsjan zuma kamasajo? Anapanča.

⁴ ¿Jesucristužquin criižcu ančhucqui inakaz sufrichinčhuc cjes kjažtatajo? Ana inakaz ančhucqui sufrichinčhucžlani.

⁵ Yoozqui ančhuca kuzquiz niž Espiritu Santo luzkatchiča. Nižaza ančhucaž cheran Yoozqui milajrunaca paachiča. ¿Ančhucaž Moisés lii jaru kamtiquiztan jalla nižta milajrunaca Yooz paachejo? Anapanča. Ančhucqui Jesucristuž puntuquiztan nonžcu catokchinčhucča. Jaziqum ančhucaž Jesucristužquin kuz tjaatiquiztan Yoozqui ančhucaž cheran milajru paachiča.

⁶ Abraham zakaz Yoozquin kuz tjaachitača. Jalla nuž tjaatiquiztan Yooz yujcquiz zuma cjiskattatača.

⁷ Jalla nižtiquiztan jakziltat Jesucristužquin kuz tjaačhaja, jalla niiqui ultim Abrahamž majchmaatiča. Jalla niic werar razunača.

⁸ Yoozqui tuquitanpacha tuž tantiichiča, Jesucristužquin kuz tjaañi žoñinaca Yooz yujcquiz zuma cjiskattaž cjesača, jalla nuž tantiichiča. Jalla nižtiquiztan tuquitanpacha liwriiñi Yooz puntuqui Abrahamžquiz chitatača, tuž cjican: “Amiž cjen tjapa wajtquiztan žoñinaca zumaž cjiskattaž cjequiča”. Jalla nuž cjiča cijjrta Yooz takuqui.

⁹ Jalla nižtiquiztan jakziltat Jesucristužquin kuz tjaačhaja, jalla niiqui Abrahamžtan zuma cjiskattaž cjesača.

¹⁰ Jakzilta žoñinacat Yooz yujcquiz zuma cjisjapa, Moisés liiquiz kuz tjaačhaja jalla ninacaqui Yooziž castictaž cjequiča. Cijjrta Yooz takuqui tuž cjiča: “Jakziltat tjapa Moisés liiquiz mantitanac jaru ana zumpacha kamčhaja, jalla ninacaqui Yooziž castictaž cjequiča”.

¹¹ Anaž jecmi Moisés lii jaru zumpacha kami atasacha. Jalla nižtiquiztan Moisés liiquiz kuz tjaatiquiztan anaž jecmi Yooz yujcquiziqui zuma cjisnasača. Kjanapachača nii razunaqui. Cijjrta Yooz takuqui tuž cjiča: “Jakziltat Yoozquin kuz tjaatiquiztan Yooz yujcquiz zuma cjisnačhaja, jalla niiqui Yooztan kamaquiča”.

¹² Pero Moisés lii jaru kamcan, Yoozquin kuz tjaazqui ana walča. Moisés lii puntuquiztan Yooz takuqui tuž chiča: “Jakziltat Moisés lii jaru kamčhaja, jalla niiqui nii lii jaru kamtiquiztan Yooztan kamaquiča”.

¹³ Pero anaž jecmi nii lii jaru zumpacha kamasacha. Jalla nižtiquiztan tjapa žoñinacaqui Yooziž castictaž waquiziča. Pero Jesucristuqui učhum liwriichiča, Yooziž ana casticta cjeyajo. Jesucristupacha učhum cuntiquiztan casticta cjissiča. Cijjrta Yooz takuqui tuž cjiča: “Jakziltat cruzquiz ticznačhaja, jalla niiqui tjeeža, Yooziž castictaž, jalla nii”.

¹⁴ Jesucristuqui yekja wajtchiz žoñinacž cuntiquiztan zakaz casticta cjissiča, ninaca Abrahamžtan Yooz yujcquiz zuma cjiskatzjapa. Nižaza Jesucristužquin kuz tjaachiž cjen Yoozqui tjapa učhum kuznacquiz niž Espiritu Santo luzkatchiča, niž tuquita chiita takucama.

MOISES LII PUNTU

¹⁵ Jilanaca, cullaquinaca, tsjii puntul chiyača. Tiiž nonžna. Tsjii zuma legali acuerduquiz luzta, nižaza jiliriž sillta, jalla nii documentuqui ana wira campiyasača, nižaza ana nekz yapasača, jiliri sillta jaru.

¹⁶ Anziqui tii puntul chiyača. Yoozqui taku tjaachiča Abrahamžquizimi niž majchquizimi. Yooz takuqui anaž cjiča, “Majchmaatinacžquizimi”, cjicanaqui. Anaž wacchi žoñinacž puntuquiztan chiiča. Antiz tsjii žoñž puntuquiztankaz chiičiča. Jalla nii žoñičha Cristuqui.

¹⁷ Jalla tuž chiyučha: Yoozqui Abrahamžquiz taku tjaachiča. Nekztan pusi patac quinsa tuncan watanacquiztan Yoozqui Moisesquiz niž lii tjaachiča. Jalla nii wiruñ tjaata liiqui nii tuquita Abrahamžquiz tjaata taku anapanž ana walkatasača.

¹⁸ Moisés lii jaru kamchiž cjen Yooz zumanaca tanžtaž cjitasaž niiqui, jalla nižtiquiztan Yooziž Abrahamžquiz tjaata taku anaž waltasača. Pero panž walča. Yoozqui Abrahamžquiz nužukaz taku tjaachiča, žoñinaca liwriizjapa.

¹⁹ Jalla nižtiquiztan, ¿chjuljapat Moisés lii sirwiya? Jalla tužuča. Moisesquiz nii liiqui tjaatatača, žoñinacž ujnaca tjeezjapa. Nižaza nii liiqui

walatcha, Jesucristuž tjonzcama. Jesucristuqui Abrahamž majchmaatquiztan tjonničha. Nižaza niž puntuquiztan chičha nii Yooziž Abrahamžquiz tjaata takuqui. Yoozqui anjilanaca cuchanžquichičha, niž lii Moisesquiz tjaazjapa. Nekztan Moisesqui parti žoñinacžquiz Yooz mantitanaca tjaajinchičha.

²⁰ Moisesqui nii ližtan žoñinacžquiz mantichičha, žoñinaca nii lii cumplajo. Pero Yoozqui niž persun tjaata taku cumplichičha. Yooz alaja cumplichičha.

²¹ Jalla nižtiquiztan, ¿kjaž cji? ¿Moisés liiqui Yooziž tjaata tawk quintra cjesaya? Anapanž cjesačha. Anaž jecmi Moisés lii jaru zumpacha kamasacha, Yooztan wiñaya kamzjapa. Jalla nii lii jaru žoñinaca kamtasaz niiqui, Yooz yujcquiz zuma cjitasacha, nii lii jaru kamtiquiztan.

²² Pero cijirta Yooz takuqui tuž cjičha: “Tjapa žoñinacaqui uj paachiž cjen castictaž cjequičha”. Jalla nuž cjenami, Jesucristužquin kuz tjaañi žoñinacaqui Yooziž tjaata taku tanznasačha, ana casticta cjisjapa, Yooztan wiñaya kamzjapa.

²³ Ima Jesucristuž puntuquiztan zizcan učumqui Moisés lii mantuquiz želatčha. Nižaza nuž žejlchinčhumtačha Jesucristužquin kuz tjaazcama.

²⁴ Jalla nižtiquiztan Moisés lii mantuquiz želatčha učumqui, Jesucristuž tjonzcama. Nekztan Jesucristužquin kuz tjaatiquiztan Yooz yujcquiz zuma cjissinčhumčha, nižaza ana ujchiz.

²⁵ Anziqui žoñinacaqui Jesucristuž puntuquiztan zizasacha. Jalla nižtiquiztan učumnacqui Moisés lii mantuquiz žejlzqui žeržtačha.

²⁶ Jesucristužquin kuz tjaatiquiztan tjapa ančhucqui Yooz partiquiz žejlčha, Yooz maatinacčhucčha.

²⁷ Jakziltat Jesucristužtan tsjii kuzziz cjiscu bautista cječhaja, jalla niiqui Cristuž partiquiz cjissičha. Nižaza ew kamañchiz cjissa.

²⁸ Cristuž partiquiz žejlcan, anaž t'aka t'aka žejlčha. Judío žoñinacami, yekja wajtchiz žoñinacami, žoñž mantuquiz žejlñi žoñinacami, ana žoñž mantuquiz žejlñi žoñinacami, luctakami, maatakami, jalla tjapa žoñinacaqui Jesucristuž partiquiz žejlcan Yooz yujcquiz tsjii parijučha. Nižaza tsjii t'akquizkazza.

²⁹ Nižaza Cristuž partiquiz želaquiz niiqui, ančhucqui Abrahamž ultim lijitum majchmaatinacčhucčha. Nižaza ančhucqui Abrahamž lijitum majch maatinacažlaj niiqui, ančhucqui Yooziž Abrahamžquiz tjaata taku tsjii irinsažtakaz tanznaquičha, Yooztan wiñaya kamzjapa.

4

UCHUMNACAQUI YOOZ MAATICHUMCHA

¹ Nii irinsa puntu tii zakaz chiiz pecučha. Tsjii irinsa tanzñi ocjalaqui žoñi pajkzcama anaž irinsa tanznasačha. Ocjala cjicanaqui nii famillžquiz piyunažtakaz kamčha. Pajkžcu, nekztan tjapa nii famillž cusasanaca nižtacama želaquičha.

² Nii ocjalaqui famillž mantuquiz tjiižta žejlčha, nižaza niž irinsaqui yekja žoñžquiz cwitižinajo cumppiitačha, irinsa tanz oracama.

³ Jalla nižta iratačha učumnacaqui. Tuquiqui učumqui ocjalažtakaz kamcanaqui žoñiž pinsita jarukaz kamatčha.

⁴ Yooziž pinsita timpu irantižcu Yoozqui niž Majch cuchanžquichičha. Nekztan tsjaa maatakquiztan majttatačha, nižaza Moisés lii mantuquiz želatčha.

⁵ Jalla nuž Yoozqui niž persun Majch cuchanžquichičha učumnaca Moisés lii mantuquiztan liwriizjapa, nižaza Yooz maati cunta cjisjapa.

⁶ Ančucaž Yooz maati cjicanaqui Yoozqui niiz Majch Espiritu Santo ančuca kuzquiz cuchanžquichiča. Espiritu Santuqui ančuca kuzquiz Yooz Ejpžquin cjuñzkatča, “Wejt Tata” cjan.

⁷ Jalla nižtiquiztan Yooz cjen ančucqui Moisés lii mantuquiz anaž iya žejlča. Yooz maati cjan, Yooz tjaata irinsa tanznaquiča.

PABLUQUI CRIICHI ZOÑINACŽQUIZ ANCHA CJUÑČHA

⁸ Tuqui ančucqui werar Yooz anaž pajatča. Antiz žoñiz pinsita yooznacž mantuquizkaz želatča. Nii yooznacaqui anaž ultimu Yoozza, žoñiz pinsitiquiztanzkazza.

⁹ Anziqui ančucqui werar Yooz pajča. Primiraqui Yoozqui ančuc maati cunta pajchiča. Jalla nuž Yooz maati cunta cjiscu, ¿kjaž ančucqui žoñiz pinsita yooznacquin wilta cutasajo? ¿Nii yooznacž mantuquiz wilta cjis pecjo? Nii yooznacaqui ana azzizza; nižaza inakazza.

¹⁰ Ančucqui tirapan tjuñinacžquizimi jiiznacžquizimi oranacžquizimi watanacžquizimi rispitiñčucča. Jalla nižta rispitzqui anaž waquiziča.

¹¹ Jalla nuž rispitan wejtla ančucaquiz tjaajinzqui inapankaj cjičhani. Jalla niil jiwjatuča.

¹² Jilanaca, cullaquinaca, ančucaquiz rocuča, wejržtapachaž cjissaja, Moisés lii mantuquiztan liwriita, jalla nižta. Wejrqui ančuc yekja wajtchiz žoñiztakaz cjissinča judío cuzturumpinaca ana paažcu. Ančucqui wejr zuma risiwchinčucča, ana čjul wejt quintra kjaž cjiscu.

¹³ Ančucqui zizza, primeraqui wejr laacjichiž cjen ančucatan kamchinča. Nižaza ančucatan kamcan, liwriiñi Yooz puntu paljaychinča. Jalla nii zizza ančucqui.

¹⁴ Jalla nii cona laacjitaqui wejtajapa tsjii pruebatača. Jalla nižta weriž laacjitiquiztan ančucqui ana wejr iñarchinčucča, nižaza wejr ana jakjurpayz pecchinčucča. Antiz wejr ancha zuma risiwchinčucča, tsjii Yooz cuchanžquita anjilažtakaz. Nižaza Jesucristužtakaz wejr zuma risiwchinčucča.

¹⁵ Weriž ančucatan kamchiž cjen ančucqui zuma cuntintu sint'ichinčucča. Jaziqui ančucaquiz, ¿kjažt cjisjo? Wejrqui declaruča, ančucatan kamcan, ančucqui attasaž niiqui, persun čhujcquimi lecžcu wejtquiz tjaatasača.

¹⁶ Wejrqui ančucaquiz werar razunanaca chiichinča. Jalla nuž chii-tiquiztan, ¿ančucqui wejt quintra cjissinčucjo?

¹⁷ Nii ana werar razuna chiiñi žoñinacaqui ančuc ančaž importayča. Jalla nuž importaycan ninacaqui ančuc ana zuma cjiskatz pecča. Wejtnacaquiztan t'akskatz pecča, ninacž partiquiz cjisjapa, nižaza ninacž honora waytiskatzjapa.

¹⁸ Tsjii žoñiqui yekja žoñžquiz tsjan zuma kamañchiz cjiskatz pecasača. Jalla nuž peccanaqui nii žoñžquiz ancha importayasača. Jalla nižta importayzqui ancha zumača. Tjapa žoñinacaqui ančucaquiz nižtaj paala. Anača wejrkaz, ančucatan kamcanaqui, ančuc importayz waquiziča.

¹⁹ Zuma jilanaca, cullaquinaca, ančucaltajapa wilta wejt kuzquiz ancha cjuñuča. Nižaza wejrqui ančucaltajapa tiral cjuñača ančucaž Cristuž kamañchiz zuma kamzcama.

²⁰ Wejrqui ančucatan chical žejlz pecuča. Jalla nuž ančucatan žejltasaž niiqui, juc'ant zuma carinchiz razuna chiižintasača. Ančuca quintu nonžcu wejrqui kuz turwayskatchinča.

ABRAHAMZ MAATIZ PUNTU

²¹ Ančhucqui Moisés lii mantuquiz kamz pecñinaca, ¿nii lii mantuquiz kamzqui ana intintiya?

²² Cjijrta Yooz takuqui tuž cjičha: Abrahamqui pucultan majchnacchizza. Tsjiiqui Abrahamž mantita piyunaž majttačha. Tsjizti Abrahamž zalžta tjunaž majttačha.

²³ Piyunaž majtta majchqui žoñiž pinsita kuzcama majttatačha. Tjunaž majtta majchzti Yooz tjaata tawk jaru majttatačha.

²⁴ Nii pucultan maatakquiztan tuž cjičha. Yoozqui pizc wilta taku tjaachičha. Tsjiiqui Sinaí cjita curquiz Yoozqui Moisesquiz mantita lii tjaachičha. Jakziltat nii lii mantuquiz žejlčhaja, jalla niiqui nii lii jaru kamstančha. Tsjaa maatakquiztan nii puntu cjičha. Naa maatakaqui Agar cjititačha.

²⁵ Agar cjitiquiztan Sinaí curu cjičha. Sinaí curuqui Arabia yokquin žejlčha. Sinaí curquiztan Jerusalén watja cjičha. Jerusalén wajtchiz žoñinacami, nižaza tjapa judío žoñinacami Moisés lii mantuquiz žejlčha.

²⁶ Učhumzti anaž Moisés lii mantuquiz žejlčha. Yooziž liwriitiquiztan ultim arajpach Jerusalén wajtchiz žoñinacčhumčha. Jalla nii Jerusalenqui Yooz watjačha.

²⁷ Cjijrta Yooz takuqui tuž cjičha:
 “Ana majtñi maataka, cuntintuž cjee. Majtz sufris ana pajžcumi, alto tawkžtan Yooztajapa honora waytila. Ecta maatakaqui juc'ant majchmaatinacchiz cjequičha ana ecta maatakquiztan”.

²⁸ Jilanaca, cullaquinaca, jaziqui učhumqui Yooz tjaata tawk jaru Yooz maatinacčhumčha, Isaac cjita žoñižtakaz.

²⁹ Abrahamž pucultan majchnacžquiz tižta watchičha. Nii žoñiž kuzquiztan pinsita majttaqui quinratačha nii Yooz Espíritu Santuž cjen majtta majchjapa. Anzimi nižta iratazakazza.

³⁰ Cjijrta Yooz takuqui tuž cjičha: “Naa piyuni majchtanpacha chjatkata. Naa piyunaž majtta majchqui anaž irinsa tanznaquičha. Antiz zalžta tjunaž majtta majch, jalla niikaz irinsa tanznaquičha”.

³¹ Jilanaca, cullaquinaca, učhumqui anačha naa piyunaž majtta maatinacažtakazqui. Antiz zalžta tjunaž majtta maatinacažtakazčhumčha. Učhumqui lijitum Yooz maatinacčhumčha.

5

LIWRIIZ PUNTU PALJAYTA

¹ Jesucristuqui učhum liwriichičha, Moisés lii mantuquiz ana iya kamzjapa. Jesucristužquiz tjup kuzziz cjee. Anačha nii lii mantuquiz iya kamzqui.

² Wejr Pabluqui ančhucquiz cjiwčha, ančhucqui judío chimpu cuzturrumpi jaru paaquiž niiqui, jalla nižtiquiztan ančhucaltajapa Cristuqui inakaz cjequičha.

³ Wejrqui tii puntu ticlaručha, jakziltat Yooz yujcquiz ana ujchiz cjisjapa Moisés lii jaru persuna chimpuskatčhaja, jalla niiqui tjapa nii lii mantitanaca cumplistančha.

⁴ Ančhucqui Moisés lii jaru Yooz yujcquiz ana ujchiz cjis pecčhaj niiqui, Cristužquiztan persunpachaž t'aksa. Nižaza liwriiñi Yooz kamañquiztan persunpachaž t'aksa.

⁵ Yooz Espíritu Santuž cjen, nižaza Jesucristužquiz kuz tjaachiž cjen, učhumqui Yooz yujcquiz ana ujchiz nižaza zuma kamañchiz, jalla nii tjapa kuztan tjewža.

⁶ Jesucristuž partiquiz žejlcan žoñinacaqui tsjii parijuča. Judío chimpuchiz cjenami ana judío chimpuchiz cjenami anaž importičha. Antiz Jesucristužquiz kuz tjaaz importičha. Nižaza kuz tjaazcu zuma munaziñi kuzziz cjis importičha.

⁷ Ančhucqui zumaž kamatča. Jalla nuž zuma kaman, ¿ject ančhuc ata- jchejo werar tjaajintanaca ana cazjapajo?

⁸ Jalla nii atajñiqui anača Yoozquiztan. Yoozqui ančhuc kjawziča, liwri- ita cjisjapa.

⁹ Jaknužt tsjii zkoluc liwatura tjapa t'anti maza t'amkatčhaja, jalla nižta irata zkoluc ana zuma tjaajiñinacaqui tjapa ančhuc tsjii kjutñi chjichasača.

¹⁰ Jesucristo Jiliriž cjen wejrqui ančhucquiztan anal kuz turwayskatučha. Ultimquiziqui jaknužt wejrqui Yoozta kamañ puntu pinsučhaja, jalla nužuzakaz ančhucqui Yoozta kamañ puntu pinsaquiča. Nižaza jakziltat ančuca kuz turwayskatčhaja, jalla niiqui casticta cjequiča, jakziltapirimi.

¹¹ Jilanaca, cullaquinaca, tuquiqui ima Jesucristužquiz kuz tjaacan, we- jrqui tjaajinchinča, judío chimpuchiz ana želaquiž niiqui, Yooz yujc- quiziqui anapanž zuma želasača. Jalla nuž tira tjaajintasaž niiqui, ¿kjažtiquiztan wejt quintra ancha tanjo? Jalla nuž tjaajintasaž niiqui, Jesu- cristuž ticz puntuquiztan tjaajincanpacha ana wejt quintra tanasača. Pero jalla nižta ana tjaajinchinča.

¹² Ančuca kuz turwayskatñinacaqui persun janchej pootpootžla.

¹³ Jilanaca, cullaquinaca, Yoozqui ančhuc kjawziča Moisés liiquiztan liwriita cjisjapa. Jalla nuž liwriita cjican, anaž persun kuzcamakaz kamz waquiziča. Antiz zuma munazican porapat yanaparassa.

¹⁴ “Jaknužt persunpachquiz zuma okzaja, jalla nižta irata parti žoñinaczquiz zuma okzpanča”. Jalla nuž kamcan tjapa Moisés liiqui cumplissa.

¹⁵ Pero ančhucqui porapat chjaawjwasaquiž niiqui, nižaza porapat ch'aasaquiž niiqui, jalla nižtiquiztan tsjiimi tsjiimi aksnaquiča.

ESPIRITU SANTUZ IRPITA KAMZ

¹⁶ Wejrqui cjiwča, ančhucqui Yooz Espíritu Santuž irpita kama. Nekztan persun ana zum kuzquiz pectanac jaru ana kamaquiča.

¹⁷ Nii ana zum kamañiqui Espíritu Santuž pecta kamañ quintrača. Nižaza Espíritu Santuž pecta kamañiqui nii ana zum kamañ quintrača. Nii pizc kamañiqui anača tsjiikazqui, antiz pisc punta kamañča, zuma kamaña, ana zuma kamaña, jalla nii. Jalla nižtiquiztan nii ana zuma kamaña pecñi kuzqui ančhuc atajča zuma kamañ jaru ana kamzjapa.

¹⁸ Pero ančhucqui Espíritu Santuž irpitaž cjequiž niiqui, anača lii man- tuquiz žejlzqui.

¹⁹ Nii ana zuma kamaña pecñi kuzqui jalla tižta paaz pecča: adulterio paaz, yekja maatakžtan yekja luctakžtan ana wali paaz, azzucanaca paaz,

²⁰ žoñiž paata yooznacžquiz sirwiz, žoñž quintra laykiz paaz, žoñž quintra chuchas, žoñžtan ch'aas, iñiziz, chjaawjkatas, persun kuzcamapankaz paaz, t'aka t'aka cjiyas, tsjii partiquiztan tsjii partiquiztan quintras,

²¹ zmaz, žoñi conz, licz, ana wira wali pjijsta paaz, jalla nižta ana zumanaca paaz pecča nii ana zuma kamaña pecñi kuzqui. Tuquiqui wejrqui ančucaquiz chiižinchinča, ana nižta paazjapa. Wilta ančucaquiz chiižinuča, anapan nižtanaca paaz waquiziča. Jalla nižta paañi žoñinacaqui werar Yooz mantuquiz ana žejlča.

²² Espíritu Santuž kamañ jaru kamcan, jalla tižtanaca paasa: zuma munaziz, cuntintu cjis, llan kuzziz cjis, pazinziz kuzziz cjis, okzñi kuzziz cjis, zumanaca paaz, lijituma kamz,

²³ humilde kuzziz cjis, ana zuma pecñi kuz persun kuzquiz ewjaz. Jalla nii zuma paatanacaqui anapanča lii quintráqui.

²⁴ Nižaza jakziltat Cristuž partiquiz žejlčhaja, jalla ninacaqui nii ana zuma paaz pecñi kuz mantuquiz ana kamz waquiziča. Nii ana zuma pecñi kuzquiztan ticzi žoñižtakazza. Nižaza nii ana zuma pinsitanac jaru ana kamz waquiziča.

²⁵ Učhumqui Espíritu Santuž cjen liwriitažlaja nižaza ew kamañchizlaja, jalla nižtiquiztan učhumqui Espíritu Santuž cjen nii zuma kamañ jaru pan kama.

²⁶ Jalla nii zuma kamañ jaru kamcan učhumqui ana mitarazi kuzziz cjistanča. Nižaza ana žawjwa zjijcanñi kuzziz cjistanča. Nižaza anaž porapat zmazastanqui.

6

PORAPAT YANAPARAS WAQUIZICHA

¹ Jilanaca, cullaquinaca, yekjap ančhucqui Espíritu Santuž kamañchiz kamiñchucča. Jaziqi ančhucqui tsjii criichi žoñi uj paañipacha cheraquiž niiqui, zuma kuztan chiižinaquiča, nii uj paañi žoñi wilta zuma kamañchiz cjeyajo. Nižaza ančhucqui persun kuzqui zuma cwitaza, ujquiz ana tjojtjapa.

² Pruebanacaž watan, ančhucqui porapat kuzzassa. Jalla nuž kamcan ančhucqui Cristuž lii cumpliča, zuma munaziz, jalla nii.

³ Jakziltat persun puntuquiztan mit kuzziz “Wejrqui zumtča” cjican pinsačhaja, jalla niiqui persunpacha incallča. Anaž zumača niiqui.

⁴ Zapa mayni persun kamtanaca tantiistanča, zuma ana zuma kamta, jalla nii. Jakziltat zuma kamchižlaj niiqui, cuntintuž cjesača, persuna zuma kamtaž cjen. Criichi žoñinacaqui yekja žoñž kamaña iñaržcu, anaž mitarazi kuzziz cjis waquiziča, “Wejrqui juc'ant zuma kamañchiztča” cjican.

⁵ Ultimquiziqui zapa mayni persun kamañquiztan jama Yooziž tantiitaž cjequiča.

⁶ Yooz puntu tjaajinta žoñiqui persun cusasanacquiztan tjaaz waquiziča Yooz puntu tjaajiñinacžquiz.

⁷ Ančhucqui persun kuzquizpacha anača incallzqui. Yoozquiztan ana atipasača. Jaknužt tsjii žoñi kamčhaja, jalla niit jama pjalžtaž cjequiča.

⁸ Jakziltat persun kuzcamakaz kamčhaja, jalla niiqui niž ana zuma kamtiquiztan castictaž cjequiča. Nižaza jakziltat Espíritu Santuž kamañ jaru kamčhaja, jalla niiqui Espíritu Santuž cjen Yooztan wiñayaž kamaquiča.

⁹ Učhumqui zumanaca paazjapa tjurt'ila. Ultimquiziqui pactaž cjequiča, ana jaytasaz niiqui.

¹⁰ Jalla nižtiquiztan čjulora zumanaca payi atchucaž cjequiž niiqui, učhumqui zumaž paala tjapa žoñinacžquizimi. Criichi mazinacžquizimi juc'ant zuma paala.

ZERZ TAKUNACA

¹¹ Anziqui wejt persun kjaržtan cjižržcuča. Tii pajk litranaca chera.

¹² Tsjii žoñinacaqui ančhuc judío chimpuchiz cjiskatz pecča. Jalla ninacaqui nuž pecča, parti žoñinacž kuz wali cjiskatzjapa, nižaza parti žoñinacaž ninacžjapa ana quintrá cjisjapa. Cristuqui cruzquiz ticziča učhumnaca liwriizjapa, judiž irata ana chimputa cjenami.

¹³ Pero nii chimpupa žoñinacapacha Moisés lii jaru ana zumpacha kamča. Ninacaqui ančhuc chimpuchiz cjiskatz pecča, ančuca janchiquiz chimpuchiz cjen persun incantiñi kuzziz cjisjapa.

¹⁴ Wejrqui anača čhjulquiztanami incantiñi kuzziztqui. Jesucristo Jiliriž učum laycu ticziquiztan, jalla nektankazza wejrqui incantiñi kuzziztqui. Jesucristuž ticziž cjen wejrqui liwriitača. Jalla nižtiquiztan tii muntuquiz žejlñinacaqui anaž wejr ancha importayuča. Ninacžquiztan ticzi žoñižtakaztča wejrqui.

¹⁵ Jesucristuž partiquiz žejlcan, judío chimpuchiz cjisqui anaž importiča, nižaza ana chimpuchiz cjismi ana zakaz importiča. Ew kamañchiz cjisqui jalla niikaz importiča.

¹⁶ Jakziltat ew lii kamañ jaru kamčhaja, jalla ninacaqui ultim werar Yooz partir žoñinacača. Jalla ninacžtan Yooztan zumaj cjila, nižaza Yoozqui ninacžquiz okžla.

¹⁷ Tekztan nawjcchuc tii puntunacquiztan ana jecmi wejtquiz molestila. Jesucristo Jiliržtajapa kamčiž cjen wejt janchiquiz chjojrínaca zejlča. Nii chjojrínaca kjanapachaž tježa, “Wejrtča Jesucristuž partiquiztqui”, jalla nii. Anzcama nii chjojrínacaqui wejt janchiquiz cherčučača.

¹⁸ Jilanaca, cullaquinaca, učum Jesucristo Jiliriui ančuca kuznaca walikaj cjiskatla. Jalla nužoj cjila. Amén.

LA CARTA DEL APOSTOL SAN PABLO A LOS EFESIOS

¹ Wejrtča Pablutqui, ančhucaquin tii cartal cjiiržcuča. Wejrqui Jesucristuž illzta apostoltča Yooz munañpi jaru. Ančhucqui Yooz partir zoñinacchucča, Efeso wajtquiz kamñinaca. Nižaza ančhucqui Jesucristužquin kuz tjaachi zoñinacchucča.

² Učhum Yooz Ejpmi, učhum Jesucristo Jilirimi ančhucaquiz zumaj yanapla, nižaza ančhucaquiz cuntintu kuzziz walikaj kamkatla.

YOOZ EJPQUI UCHUMNACALTAJAPA ZUMA PINSICHA

³ Učhum Jesucristo Jilirž Yooz Ejpžtajapa honoral waytuča wejrqui. Učhum Yooz Ejpqui učhumnacaquiz ancha zuma favoranaca paachiča, Jesucristuž partiquiz cjiskatchiž cjen. Učhumqui arajpach Yooz wajtchiz zoñinacchumča. Jalla nižtiquiztan tjapaman favoranaca učhumnacaquiz paachiča Yooz Ejpqui.

⁴ Tuquitanpacha ima tii muntu kalltican Yooz Ejpqui Jesucristuž cjen učhumnac illziča, nižtajapa t'acžta cjisjapa, nižaza niž yujcquiz ana ujchiz nižaza zuma cjisjapa.

⁵ Yoozqui niž okzñi kuzziz cjen, tuquitanpacha tantiichiča, učhumnaca niž partiquiz cjisjapa, niž maatinacjapa. Jesucristuž cjen učhumqui Yooz maatinacchumča.

⁶ Nižaza Yooz Ejpqui niž ancha okzñi kuz tjeeziča, niž persun honora waytita cjisjapa. Niž k'ayi Majchiž cjen učhumnacaquiz nužukaz walja okziča Yooz Ejpqui.

⁷ Jesucristuž ticziž cjen, Yoozqui učhum liwriichiča. Jalla nuž liwriiču učhum ujnaca pertunchiča, niž zuma okzñi kuzquiztan.

⁸ Yoozqui učhumnacaltajapa niž okzñi kuz walja tjeeziča, zuma favoranaca paacan. Jalla nuž zuma favoranaca paacan, Yoozqui učhumnacaquiz tjapa niž puntunaca intintazñi cjiskatchiča.

⁹ Nižaza Yoozqui niž tuquita chjojta pinsitanaca učhumnacaquiz zizkatchiča. Niž kuzcama pinsita jaru, jalla nuž učhumnacaquiz zizkatchiča.

¹⁰ Yoozqui niž pinsita tjuñquiz niž persuna pinsitaqui cumpliskataquiča. Jalla niž pinsita jaru Yoozqui tjapa arajpachquin žejlñinacami, nižaza tjapa tii yokquiz žejlñinacami tjappachaž juntjapaquiča, Cristuž mantuquiz cjisjapa.

¹¹ Jesucristužquin kuzziz cjen wejrnac judío zoñinacaqui t'acžtača. Yoozqui persun kuzcama pinsita jaru nuž wejrnac t'acziča. Yoozqui tjapa niž pinsitacama cumpliskatča.

¹² Wejrnacqui ančhucž tuqui Jesucristo tjewziča. Wejrnacqui t'acžta cjissinča, zuma kamzjapa. Nekztan wejrnacaž zuma kamtiquiztan Yooztajapa juc'anti honora waytitaž cjequiča.

¹³ Nižaza ančhucqui werar Yooz taku nonžcu Jesucristužquin kuz tjaachinčhuczakazza. Jalla nižtiquiztan liwriita cjissinčhuczakazza. Nekztan Cristuž partiquiz želan, Yoozqui niž Espíritu Santo ančhuca kuznacquiz luzkatchiča. Tuquitanpacha Yoozqui niž Espíritu Santo cuchanžquizjapa taku tjaachiča. Nižaza Espíritu Santuqui ančhuca kuzquiz žejltiquiztan, ančhuca kuzquiz Yooziž chimputapanča. Nii kjanapacha tjeeža, ančhucqui Yooz partir zoñinacchucča, jalla nii.

¹⁴ Espíritu Santo učhumnaca kuzquiz cjen, učhumqui zizza, ultimpacha arajpach Yooz irinsa tanznaquiča. Chjulorat tjapa Yooz partir zoñinaca

liwriita cjechaja, jalla nii ora nii irinsa tanznaquiĉha. Tjapa niĉta zumanaca uĉhumnacaltajapa pinsichiĉha Yoozqui, niiĉtajapa juc'ant honora waytita cjisjapa.

PABLUZ MAYIZITA

¹⁵ Jilanaca, cullaquinaca, anĉhuqui Jesucristo Jilirĉquin kuzzizpanĉha, niĉzaza parti criichi Źoĉnacĉtan zuma munaziĉni kuzzizpanĉha. Jalla niĉta zizcu,

¹⁶ wejrqui anĉhucaĉ cjen tirapan Yoozquin sparaquiĉ cjiwĉha. Niĉzaza Yoozquin mayizican anĉhucaltajapa mayizuĉha, anĉhuc Yooz puntu zuma zizĉni cjisjapa.

¹⁷ Uĉhum Jesucristo Jilirĉ Yooz Ejpĉquinpan mayizuĉha. Yooz Ejpqui juc'ant chekan honorchizza. Anĉhucaltajapa mayizuĉha, Yooz anĉhucaquiĉ tsjii zizĉni kuzziz cjiskatajo, niĉzaza mayizuĉha Yooziĉ tjeeĉtanaca intintazĉni kuzziz cjiskatajo. Jalla niĉta kuzziz kamaquiĉ niiqui, juc'anti Yooz puntu-naca zizĉni cjequiĉha.

¹⁸ Niĉzaza juc'anti Yooz puntunaca intintazĉni kuzziz cjequiĉha. Zuma intintazĉni cjequiĉ niiqui, arajpachquin kamz puntu juc'anti zizaquiĉha. Yoozqui uĉhumnaca kjawziĉha, arajpachquin kamzjapa. Jalla nicju kamzjapa uĉhumqui tjewĉa. Arajpachquin Yooztan kamzqui juc'ant ancha zuma wali irinsaĉtakazza. Jalla nii irinsa Yoozqui tjapa niĉĉ partir Źoĉnacĉquiz tjaaquiĉha.

¹⁹ Niĉzaza wejrqui mayizuĉha, anĉhucqui Yooz aziĉ puntuquiztan juc'anti intintazjapa. Uĉhum Yoozqui juc'ant walja azzizza, ĉhjultakquiztanami. Niĉĉ aztan Yoozqui uĉhum kuznaca campiiskatchiĉha, ew kamaĉniĉ quiz kamzjapa. Yoozqui niĉĉ jacatatskatĉni aztan uĉhum kuznaca campiichiĉha.

²⁰ Yooz Ejpqui niĉĉ walja azi tjeeziĉha, Jesucristo ticziquiztan jacatatskatcan. Niĉzaza niĉĉ aztan tjeeziĉha arajpachquin niĉĉ Źew latuquiz Jesucristo tjulĉcan, niĉĉtan chica mantizjapa.

²¹ Yoozqui tjappacha Cristuĉ mantuquiz utchiĉha, tjapa jilirinacami, tjapa mantiĉnacami, tjapa mantiĉni poderchiznacami, tjappacha Cristuĉ mantuquizcama uchtaĉha. Tii timpuquiz Źejlĉnacami, niĉzaza jazta timpuquiz tjonĉni mantiĉnacami tjappacha Cristuĉ mantuquiz uchtaĉha.

²² Yoozqui mantichiĉha tjappacha Cristuĉ mantuquiz cjisjapa. Niĉzaza Yooziĉ mantitiquiztan niĉĉ tjapa mantiĉni Cristuqui niĉĉ icliz Źoĉnacĉtajapaĉha.

²³ Cristuĉ partir Źoĉnacaqui niĉĉtan tsjii kuzziz Źejlĉha, niĉzaza tsjii curpuchiztakazza. Tjapa Cristuĉ partir Źoĉnacaqui Cristuĉ kamaĉchizpankazza. Niĉzaza Cristuĉ cjen tjapa ĉhjultakimi tii muntuquiz Źejlĉha.

2

YOOZ OKĉNI KUZIZ CJEN ZOĉNACAQUI LIWRIITACHA

¹ Jaziqui Yoozqui anĉhucaquiz ew kamaĉchiz cjiskatchiĉha. Tuquiqui anĉhucqui Yooz yujcquiziqui ticzi Źoĉnacaĉtakaz Źelatĉha ujnaca paachiĉ cjen, niĉzaza ana walinaca paachiĉ cjen.

² Jalla nuĉ ana wali ujnaca paacan, anĉhucqui kamatĉha ujchiz Źoĉnacĉ kamaĉ jaru. Niĉzaza ana wali paacan, zajranacĉ jilirĉ kuzcamakaz kamatĉha. Jakziltat ana Yooz kuzcama kamĉhaja, jalla niiqui zajranacĉ jilirĉ kuzcama-pankaz kamĉha. Nii ana wali zajra jiliriĉqui Źoĉnacĉquiz ana wal kamaĉchiz cjiskatĉha.

³ Tuquiqui uĉhumqui ana wal kamaĉchiz zakaz kamatĉha, Yooz kuzcama ana kamcan. Uĉhumqui persun kuzcamakaz kamatĉha. Niĉzaza uĉhum

ana wali pecñi kuz jaru kamatča. Nižaza učum ana wali pinsitanacž jaru kamatča. Jalla nižtiquiztan učumqui Yooz casticta cjichucapantača, jaknužt Yoozqui parti ujchiz žoñinaca casticačhaja, jalla nižta.

⁴ Jalla nižta ana wali kamanami, Yoozti zuma okzñi kuztan učumnacaquiz okziča. Nižaza učumnacatan munaziča.

⁵ Nuž zuma okzñi munaziñi kuzziz cjen, Yoozqui učumnacaquiz Cristužtan zuma kamañchiz cjiskatchiča. Yooz okztiquiztankaz ančhucqui liwriitača. Tuquiqui uj paachiž cjen, učumqui Yooz yujcquiziqui ticzi žoñinacažtakaztača.

⁶ Jaknužt Jesucristuqui ticžcu Yooz aztan sepulturquiztan ulantčhaja, jalla nižta irata učumqui Yooz aztan ana wal kamañnacquiztan ulanchinčumča. Nekztan Cristužtan tsjii kuzziz cjen Yoozqui učumnacaquiz Cristužtan chica honorchiz cjiskatchiča.

⁷ Jalla nuž Yoozqui cjiskatchiča, wiñayjapa niž ancha zuma okzñi kuz tjeezjapa. Jesucristuž cjen Yoozqui učumnacaquiz zuma kuztan munaziča.

⁸ Yooz okzñi kuzziz cjen, nižaza ančhucraž Jesucristužquin kuz tjaachiž cjen, ančhucqui liwriitača. Jalla nii liwriitaqui anača ančhucraž cjenaqui. Antiz Yooz cjenpankazza nii liwriitaqui. Jalla niiča ančhucraž liwriiz tjaachiqui.

⁹ Ančhucraž paata obranacquiztan nii liwriizqui anaž tjonča. Jalla nižtiquiztan anaž jecmi mit kuzziz cjesača.

¹⁰ Učumqui Yooz obranacčumča. Jesucristužquin kuz tjaachiž cjen Yoozqui učum liwriičiča, zuma kamañchiz cjisjapa. Yoozqui jalla nižta zuma kamañanaca učumnacaltajapa tantiižinchiča, ima nižquiz criiñiz cjen. Jalla nii kamañanaca tantiižinchiča, učum zuma obranaca paazjapa.

TUQUI ANCHUCQUI ANATACHA YOOZ ZOÑINACA

¹¹ Ančhucqui jalla tuž cjuñzna. Ančhucqui anača judío žoñinaca. Chimputa judío žoñinacaqui ančhucra puntuquiztanž cjiča, “Ninacaqui janchiquiz ana chimputača. Jalla nižtiquiztan anaž Yooz partir žoñinaca cjesača”. Jalla nuž cjiñiča. Nii judionacača curpuquiz chimputaqui, “Yooz illzta žoñi” cjican tjeezjapa. Žoñiz chimputača nii judío žoñinacaqui.

¹² Nižaza cjuñzna. Tuquiqui ančhucqui ana Cristo pajiñchuctača. Nižaza Israel wajtchiz žoñinacžquiztan yekčhuctača. Nižaza ančhucqui Yooziž tjaata takunaca anaž pajatča. Ujnacquiztan liwriita cjisjapa ana tjewzñi atatča. Tii muntuquiz kamcan ančhucqui anapan werar Yooz pajatča.

¹³ Pero anziqui Jesucristužquin kuzziz cjen ančhucqui Yoozquin macjatchinčhucča. Tuquiqui ančhucqui Yoozquiztan ažkquin želatča. Cristuž ticziž cjen, ančhucqui Yoozquin macjatskattača.

¹⁴ Cristuž cjen učumnacatan Yooztan pajaskatchiča. Nekztan zumanskatchiča. Nižaza učumnacatan parti criichi žoñinacžtan zumanskatchizakazza. Cristuqui judío žoñinacami ana judío žoñinacami tsjii partiquizkaz tjappacha cjiskatchiča, nižquin criichiž cjen. Tuquiqui judío žoñinacaqui yekja wajtchiz žoñinacžtan quintranpanikaztača. Nižaza yekja t'akapanž nayatča. Pero anziqui Yooz partiquiz cjican criichi žoñinacaqui tsjiikazza.

¹⁵ Cristuqui curpuchiz cjican Yooziž mantita lii liwj cumpližcu ticziča. Jaziqui Cristuž ticziž cjen Yoozqui nii tuqui timpuquiztan kamchi lii tuct'ayskatchiča, tjapa niž mantitanacžtanpacha. Jalla nekztan Yoozqui

judío criichi zoñinacami ana judío criichi zoñinacami tjappacha tsjii ew partiquiz cjiskatchiĉha. Nii ew partiquiz Źejlcan, judío zoñinacĉtan yekja wajtchiz zoñinacĉtan ana iya quintrasñi cjesaĉha.

¹⁶ NiŹaza cruzquiz ch'awcta ticziŹ cjen, Jesucristuqui judío zoñinacĉtanami yekja wajtchiz zoñinacĉtanami pertunaskatchiĉha. Jaziqui JesucristuŹ cjenkazza nii pucultan quintrasñi zoñinacĉtan Yooztan zuma cjiskatchiqui. NiŹaza nii pucultan quintrasñi zoñinacaqui tsjii partiquizkaz kamasasĉha, zuma munazican.

¹⁷ NiŹaza JesucristuŹ tjonchiŹ cjen, Yoozquiztan aŹkquin Źejlñinacĉquizimi Źcati Źejlñinacĉquizimi zuma quintunaca paljaytaĉha. Ninacaqui nii paljayta tjapa kuztan catokaquiŹ niiqui, jalla nekztan YooziŹ pertunta cjesaĉha. NiŹaza ninacĉtan Yooztan zumanznaquiĉha.

¹⁸ JesucristuŹ cjen niŹaza Yooz Espíritu SantuŹ cjen judío zoñinacami ana judío zoñinacami, tjapa zoñinacaqui Yooz EjpŹquin macjatz atĉha.

¹⁹ Jalla niŹtiquiztan anĉhucqui anaĉha iya yekja zoñinacĉhucqui, anaĉha iya Yoozquiztan yekja t'akĉhucqui. Antiz Yooz partiquiz kamñi mazinacĉhucĉha parti criichi zoñinacĉtan, niŹaza anĉhucqui Yooz famillquizĉhucĉha.

²⁰ Uĉhumqui tsjii pajk kjuyaŹtakazza Yooztajapaqui. Nii kjuy simintuqui apostolonacaĉha, niŹaza Yooztajapa chiiñi profetanacaĉha. NiŹaza Jesucristupacaĉha juc'ant chekan maz cuntaqui nii kjuyquiziqui.

²¹ JesucristuŹ cjen tjapa criichi zoñinacaqui arubinacaŹtakazza nii kjuya pirkitaqui. Tjapaman criichi zoñinacaŹ cjenami tsjii Yooztajapa kjuyakaz kjuytaĉha. JesucristuŹ yanaptaŹ cjen nii kjuychiz zoñinacaqui tsjan tsjan zuma cjissa, Yooztajapa kamcan.

²² Anĉhuc zakaz nii kjuy pirkita arubinacaŹtakazza parti criichi zoñinacĉtan. Jalla nuŹ uĉhum Yooz kjuyquiz cjissiŹ cjen, Yoozqui uĉhum kuzquiz Źejlĉha niŹ Espíritu SantuŹtan.

3

PABLUQUI YOOZ TAKU PALJAYÑI ZOÑIĉHA

¹ Jalla niŹtiquiztan wejr Pabluqui anĉhucaltajapa mayizuĉha. Wejrqui Jesucristo sirwiñiŹ cjen tii carsilquiz Źeluĉha. NiŹaza anĉhuc yekja wajtchiz zoñinacĉquiz liwriiñi taku paljaytiquiztan zakaz carsilquiz Źeluĉha wejrqui.

² Anĉhucqui wejt puntuquiztan zizzinĉhucŹlani. Yoozqui tii apóstol puestuquiz wejr utĉiĉha, anĉhucquiz Yooz puntu paljayzjapa, jaknuŹt Yoozqui okzñi kuzziz anĉhuc liwriiz pecĉhaja, jalla nii paljayzjapa.

³ NiŹaza anĉhucqui zizzinĉhucŹlani Yoozqui niŹ tuquita pinsita takunaca wejtquiz zizkatchiĉha, jalla nii. Tuquita anapan ziztataĉha nii takunacaqui. Nii wejtquiz zizkatta takunaca tuqui anĉhucquin tsjii koluculla cjiŹrchinĉha.

⁴ NiŹaza tii carta liiŹcu, anĉhucqui tantiyasaĉha, wejrtĉha CristuŹ puntuquiztan zuma intintaziñtqui, jalla nii.

⁵ Tuqui timpuqui Yoozqui anaŹ jecŹquizimi CristuŹ puntuquiztan zuma zizkatchiĉha. Jazikaz Yoozqui CristuŹ puntu zuma zizkatchiĉha, niŹ illzta apostolonacĉquizimi, niŹaza niŹtajapa chiiñi profetanacĉquizimi. NiŹ Espíritu SantuŹ cjen nuŹ zizkatchiĉha.

⁶ Nii tuquita chjojta puntuqui jalla tiiĉha: CristuŹ puntu liwriiñi taku catokchiŹ cjen, ĉhjuluz cherĉi zoñimi YooziŹ liwriitaŹ cjesaĉha. Tsjii irinsaŹtakaz nii liwriiz tanznasaĉha. Ana judio zoñinacami CristuŹ partiquiz

zakaz cjisnasača. Nižaza Cristuž partiquiz žejlcanpacha Yooz tjaata taku tanznasača, liwriita cjisjapa.

⁷ Wejrqui nii liwriiñi taku paljayzjapa apóstol puestuquiz uchtača. Jalla nii puestuquiz cjis anal waquizuča. Yoozqui wejr okžcu nužukaz nii puestuquiz wejr utchiča, niž kuzcama. Yooz poderchiz apóstol kamañ jaru kamuča.

⁸ Wejrqui tjapa Yooz partir žoñinacžquiztan upa honorchiz cjis waquizuča. Jalla nuž cjenami Yoozqui wejtquiz apóstol puestu tjaachiča, ana judío žoñinacžquiz Cristuž puntuquiztan ancha zumanaca paljayzjapa. Cristuž puntuqui ancha zumača. Tjapa nii puntuquiztan ana intintazzuča.

⁹ Yoozza tjappacha paachiqui. Jalla nii Yoozqui wejtquiz niž tuquita chjojta pinsita cumpjiichiča, tjapa žoñinacžquiz kjanzt'izjapa.

¹⁰ Jalla nuž watchiča, tjapa poderchiz espiritunacami tjapa mantiñi espiritunacami zizkatzjapa, jaknužt Yoozqui ancha zizñi zizñi pinsichižlaja, nii. Tuquiqui nii arajpachquin žejlñi espiritunacaqui ana zuma zizziča nii Yooziž pinsita puntuqui. Anziqui criichi žoñinacaž cjen, nii espiritunacaqui Yooz tuquita pinsitaqui zizziča.

¹¹ Tuquitanpacha Yoozqui nuž zizkatz pecchiča. Jaziqui učum Jesucristo Jiliriz cjen Yoozqui niž pinsitaqui zizkatchiča.

¹² Nižaza Jesucristuž cjen učumqui Yoozquin macjati atasača, ana ekscan. Jesucristužquin kuz tjaachiž cjen, učumqui tjup kuztan Yoozquin macjati atasača.

¹³ Jalla nižtiquiztan ančhucaquin tuž chiižinžcuča, weriž ančhucaltajapa sufrichiž cjen, ana upa kuzziz cjee. Jalla nuž ančhucaltajapa sufran, ančhucqui juc'ant honorchiz cjequiča.

CRISTUQUI ANCHA ZUMA MUNAZIÑI KUZZIZ

¹⁴ Nii Yooziž ancha zuma pinsitaqui cjuñzcu, wejrqui učum Jesucristo Jilirž Yooz Ejpžquiztan mayižinuča. Quillžcu, Yoozquiztan mayižinuča.

¹⁵ Yooz Ejpžquiztan tjapa Yooz partiquiz žejlñi familianacaqui tjuuchizza, arajpachquinami yokquizimi.

¹⁶ Yooz Ejpžquiztan mayižinuča, ančuca kuznaca tjupi tjurt'ichi cjisjapa. Yoozqui niž Espiritu Santuž aztanž cjen, ančuca kuznaca tjupi tjurt'ichi cjiskatasača. Yoozqui niž juc'ant zuma kuzquiztan ančuca kuznaca tjurt'ichi cjiskatasača.

¹⁷ Nižaza ančhucaltajapa mayižinuča, Jesucristužquiz juc'ant kuzziz cjejajo. Jalla nuž juc'ant kuzziz cjen, Jesucristuqui ančuca kuznacquiz juc'anti irpaquiča. Jesucristuž irpita cjen, ančhucqui zuma munaziñi kuzzizpanž kamaquiča, tsjii zuma pookñi zkalažtakaz.

¹⁸ Nižaza zuma munaziñi kuzziz kamchiž cjen, ančhucqui Jesucristuž zuma munaziñi kuz juc'antiž pajaquiča. Jalla nuž mayižinuča tjapa criichi žoñinacžtajapa. Wejrqui tuž mayižinuča, tjapa criichi žoñinacaqui Cristuž zuma munaziñi kuz zumpacha pajla cjiwča. Zmali pakjiž cjes, nižaza palaž cjes, nižaza lajčaž cjes, jalla nižta iratača Cristuž zuma munaziñi kuzqui.

¹⁹ Žoñinacaqui Cristuž zuma munaziñi kuz anaž tjapa paji atča. Jalla nuž cjenami Yoozquiztan mayižinuča criichi žoñinaca Cristuž zuma munaziñi kuz zumpacha pajzapa. Jalla nuž pajtiquiztan, ančhucqui Yooz iratapankaz zuma kamañchiz kamaquiča.

²⁰ Jaziqui Yoozqui zuma honorchiz cjila. Yoozqui niž aztan učum kuznacquiz zuma obranaca trabajča. Učumž mayizitiquiztanami nižaza učumž

pinsitiquiztanami juc'anti zuma kamañchiz kami yanapasača ućhum zuma Yoozqui.

²¹ Criichi žoñinacaž cjenami, Jesucristuž cjenami, Yoozqui honorchiz cjila. Wiñay wiñaya watay wata honorchiz cjila. Jalla nužoj cjila. Amén.

4

ESPIRITU SANTUZ CJEN TSJII KUZZIZZA UCHUMQUI

¹ Jesucristo Jiliržquiz sirwiñiž cjen carsilquiz želuča. Wejrqui anćhucacquin chiižinžcuča zuma kamañchiz kamajo, jaknužt Yooz kjawžta žoñinaca kamz waquizičhaja, jalla nižta. Yooz Ejpqui anćhuc kjawziča nižtajapa kamajo. Jalla tuž kamz waquiziča,

² ana mit kuzziz, nižaza humilde kuzziz, nižaza zuma munaziñi kuzziz, nižaza pasinsichiz kuzziz. Jalla nuž kamz waquiziča.

³ Espíritu Santuž cjen, tsjiižtan tsjiižtan zumanskatz waquiziča. Jaziqui tsjii kuzzizpan cjee. Nužquiz tirapan kuz tjaa.

⁴ Tjapa criichi žoñinacaqui Cristuž partiquiz žejlča tsjii curpuchiztakazza. Nižaza tsjii Espíritu Santuchizza. Tjapa anćhucqui Yooz kjawžtiquiztan tsjiikaz tjewža, arajpachquin Yooztan kamz, jalla nii.

⁵ Nižaza tjapa anćhucqui tsjii Jesucristo Jilirchizkazza, nižaza tjapa anćhucqui Jesucristužquin kuz tjaachinćhucča. Jalla nižtiquiztan anćhucqui tsjiikazza. Nižaza tsjii bautismokaz tanzinćhucča.

⁶ Nižaza tjapa ućhumqui tsjii Yooz Ejpchizza. Ućhum Yooz Ejpž mantuquiz tjapa criichi žoñinaca žejlča. Nižaza Yooz Ejpqui trabajča tjapa criichi žoñinacž kuzquiz. Nižaza Yooz Ejpqui tjapa criichi žoñinacž kuznacquiz žejlča.

⁷ Tjapa criichi žoñinacžquiz kamañanaca tjaatača, Cristuž pectacama.

⁸ Jalla nii puntuquiztan Yooz taku tuž cjiča:

“Arajpachquin ojkan, wacchi Cristuž atipta presunaca chjitchiča. Nižaza tii muntuquiz žejlñi žoñinacžquiz kamañanaca tjaachiča”.

⁹ Yooz takuqui “Arajpachquin ojkan” ¿kjažt cji? Jalla tuž cjiča: Primer-
aqui Cristuqui tii muntuquiz chjijwžquichiča.

¹⁰ Jalla nii chjijwžquiñiqui Jesucristupachača. Nižaza niipachača arajpach kjutñi ojchiqui, juc'ant tsewc arajpachquin. (Jalla nuž Jesucristuqui tsewc ojchiča, Espíritu Santuž cjen criichi žoñinacž kuznacquiz niipacha žejljapa.)

¹¹ Jalla tižta kamañanacchizza criichi žoñinacaqui: apostolonaca kamañchiz, nižaza Yooztajapa paljayñi profetanaca kamañchiz, nižaza liwriñi taku parliñinaca kamañchiz, nižaza icliz irpiñinaca kamañchiz, nižaza Yooz puntu tjaajiñinaca kamañchiz.

¹² Jalla nižta kamañanaca tjaachiča Yoozqui, tjapa criichi žoñinaca Yooztajapa zuma kamajo, nižaza Yooztajapa sirwican langznajo, nižaza parti criichi žoñinaca tsjan zuma kamañchiz cjiskatajo. Criichi žoñinacaqui Cristužtan tsjii curpuchiztakazza.

¹³ Nižaza Yooz Ejpqui criichi žoñinacžquiz nižta kamañanaca tjaachiča, Yooz irata zuma cjišcama. Jalla nižta Yooz irata zuma cjican tjapa criichi žoñinacaqui tsjii kuzzizpankaz cjequiča, Jesucristužquiz tjapa kuz tjaacan, nižaza tjapa Yooz Majch puntunaca intintazcan. Jalla nuž Yooz irata zuma cjican, ućhumqui tsjii zuma pajk žoñižtakaz cjequiča. Nižaza jaknužt Jesucristuqui zumapanžlaja, jalla nižta irata ućhumqui zumapanž cjequiča.

¹⁴ Jalla nižta zuma kamñi intintazñi cjican, ućhumqui anaž tsjii ocjalažtakaz cjequiča, čjul ew tjaajintiquizimi criizjapaqui. Nižaza

uĥumqui anaž tsjii kjutņi ĥjichta cjesaĥa. Nižaza uĥumqui nii ana wal mañuz žoñinacžquiz ana incallskataquiĥa. Nii ana wal žoñinacaqui ĥjulumi paaĥa, nižaza chiĥa, parti žoñinaca incallzjapa, nižaza tsjii kjutņi ĥjichjapaqui.

¹⁵ Antiz uĥumqui zuma munaziņi kuztan werarapan chiiz waquiziĥa. Jalla nuž zuma kamcan nižaza zuma chiican, uĥumqui Cristužtan tsjii kuzzizimi tsjii kamañchizimi juc'anti cjisnaquiĥa. Cristupankazza uĥum jilir aĥaqui.

¹⁶ Uĥumqui Cristužtan tsjii curpuchiztakazza. Tsjii curpuquiz yekja yekja žejlĥa. Jalla nuž cjenaqui tsjii curpukazza. Jalla nižta irataĥa Jesucristuž partiquiz žejlņi žoñinacaqui. Yekja yekja želanami, tsjii partiquiz juntjapziĥa, Jesucristuž cjen. Jesucristuqui uĥumnaca juntjapĥiĥa, nižaza tsjii kuzziz cjiskatĥiĥa, nižaza ew kamaña tjaaĥiĥa. Tjapa criichi žoñinacaž zuma kamñiž cjen Cristuž curpuqui tsjan zuma pajktažokazza. Nižaza porapat zuma munaziņi kuzziz kamñiž cjen, tsjan tsjan wali zumaž cjissa.

EW KAMAÑCHIZZA CRIICHI ŽOÑINACAQUI

¹⁷ Jalla nii puntu anĥucaquin chiižinžcuĥa. Jesucristo Jiliržtan tsjii kuzziz cjican wejrqui anĥucaquin tuž cjiwĥa: Ana Yoozquin criichi žoñinacaqui ana zuma kamĥa. Jalla ninacaqui inapankaz persuna pinsitanacž jaru kamĥa. Jalla nižta irataqui anĥucqui anaĥa kamzqui.

¹⁸ Ana criichi žoñinacaqui ana Yooz puntu intintazņi kuzzizza. Zumchiquiz ojklayņi žoñinacaĥa ninacaqui. Ninacž chojrū kuzziz cjen, Yooz puntu ana zizza. Jalla nižtiquiztan ana Yooz kamañchizza.

¹⁹ Ninacaqui ana wali paaznacquiztan ana azņiĥa. Nižaza ana wal kamañquiz kuz tjaaĥiĥa. Tjapaman ana walinaca paazjapa pecņipanĥa.

²⁰ Pero Jesucristuž tjaajintaqui anaĥa nižta. Jalla niž tjaajintaqui zizza anĥucqui.

²¹ Anĥucqui Jesucristuž puntuquiztan nonžcu niž tjaajintaqui catokchinĥucĥa. Niž tjaajintaqui werarapankazza.

²² Anĥuca tuquita ana wal kamaña eca. Anĥuca ana wali pecņi kuz jarutaĥa nii kamañaqui. Ana wal kamañchiz kamcan, žoñinacaqui persunpachaž incallĥa. Ana wal kamaña liwj jayta anĥucqui.

²³ Kuznaca liwj campiya, zuma kamañchiz cjisjapa.

²⁴ Nižaza Yooz tjaata ew kamañchizpankaz cjisna. Nii ew kamañaqui Yooz irata zuma kamañaĥa. Nii ew kamañ jaru kamcan, ana uj paaquiĥa, lijituma zumaž kamaquiĥa.

²⁵ Jalla nuž kamcan, ana toscar takunaca chiya. Antiz zapa mayni porapat zuma werar takunacžtan parlispanĥa. Tjapa criichi žoñinacaqui yekja yekja cjenami tsjii curpuchiztakazza.

²⁶ Tsjii žawjz tjonanaqui, uj paazquiztan cuitaza. Ana zita žawjz peczqui.

²⁷ Anaĥa Satanás diabluž jaru ujquiz tjojtskatz peczqui.

²⁸ Jakziltazlaja tjangz pecņi kuzziz, nii tjaņi zaaz kuz jaytila. Jalla niiqui langz waquiziĥa persun kjaržtan. Nekztan ganžcu, t'akjir žoñinacžquiz onasaĥa.

²⁹ Ana wal takunacžtan ana chiya. Antiz zuma takunacžtan chiya, parti žoñinaca juc'ant zuma kamañchiz cjisjapa. Jalla nuž chiyan nonžņi žoñinacaqui yanapta cjequiĥa, zuma kamajo.

³⁰ Espiritu Santuqui anĥuca kuzquiz žejlcan Yooz chimputapanĥa, ultim liwriiz tjuñicama. Jalla nižtiquiztan Yooz Espiritu Santužquiz ana llaquiziskata, ana wali kamcan.

³¹ Chjaawjkatñi kuz jayta, nižaza culirazñi kuz jayta, nižaza žawjžawjz kuz jayta, nižaza žoñi ararñi kuz jayta, nižaza žoñž quintra ana wali chiiñi kuz jayta, nižaza tjapa ana wali kuznaca jayta.

³² Nižta ana wali kuzziz cjenpacha porapat zuma munaziñi kuzziz cjee. Nižaza porapat zuma okzñi kuzziz cjee. Nižaza porapat pertunñi kuzziz cjee. Jaknužt Jesucristuž cjen Yoozqui ančhucaquiz pertunčhaja, jalla nižta porapat pertunassaquiča.

5

ZUMA KAMAÑANAC PUNTU

¹ Ančhucqui Yooz partiquiz žejlcan Yooz pecta maatinacača. Jalla nižtiquiztan Yooz irata zuma kamañchiz cjee. Yooz kamañchiz yatekaza.

² Zuma munaziñi kuzziz cjee. Jaknužt učumnacatan Cristo munazičhaja, jalla nižta. Učumnacatan munazican, Cristuqui učum laycu ticziča. Jalla nuž ticžcan Cristuqui niž persun curpu Yoozquin tjaachiča, tsjii zuma ofrendažtakaz, nižaza tsjii zuma wilanažtakaz.

³ Ančhucqui Yooz partiquiz cjicanaqui, anača tsjii adulteriuquiz ojklaz pinsisqui. Nižaza anača čjul anawalinacami pinsisqui. Nižaza anača čjultakimi zmazqui. Nižta anawalinaca anapanž pinsis waquiziča.

⁴ Anača azzuc takunaca čiičhiizqui. Nižaza anača ina takunaca čiičhiizqui. Nižaza anača ana zum takunaca čiičhiizqui. Jalla nižta čiičhiiznacauqui anaž učumnaca čiičhiiz waquiziča. Antiz zuma takunacžtan čiičhiiz waquiziča. Yoozquin sparaquiz cjis waquiziča.

⁵ Ančhucqui tuž zizza. Jakziltat adulteriuquiz ojklayñi cječhaja, jalla niiqui anaž arajpach wajtquin luzasača, Cristužtanami Yooz Ejpžtanami čica kamzjapa. Nižaza ana zuma kamñinacami, nižaza zmazñinacami, jalla ninaca zakaz ana arajpach wajtquin luzasača. Ninacaqui Cristuž partiquizimi Yooz partiquizimi anapanž cjesača. Tsjii zmazñi žoñiqui, tsjii žoñiž paata yooz rispitñi žoñi iratača.

⁶ Nižaza ančhucqui ina takunacžtan ana incallskata. Jalla nižta ana wali paañiž cjen Yoozqui nii ana wali paañinaca casticaquiča. Ninacaqui Yooz kuzcama ana kamñiča, antiz Yooz quintra paañiča.

⁷ Jalla nižta ana wali paañi žoñinacžtan čica anača munazizqui.

⁸ Tuquiqui ančhucqui uj paacan ana wal zumchiquizkaz kamatča. Anziqui Jesucristo Jilirž partiquiz cjican, ančhucqui kjanquiz kamča. Jalla nižtiquiztan zuma kamcan kjanquiz kamñi žoñižta cjee.

⁹ Kjanquiz kamcan, ančhucqui zuma kamaquiča, nižaza Yooz kuzcama kamaquiča, nižaza lijituma kamaquiča.

¹⁰ Čjul kamaña Jesucristo Jiliriqui jutzazzaja, jalla nii kamañchiz kamzjapa tjapa kuz tjaa.

¹¹ Ana zuma obranaca paazqui ana nezk mitisa. Zumchiquiz ojklayñi žoñinacakazza nižtanaca paaz pecñiqui. Ninacž obranacaqui ana waliž, jalla nii kjanapacha tjeezna ančhucqui.

¹² Zumchiquiz ojklayñi žoñinacaqui chjozaka ana zuma paañiča. Jalla nii paatanac puntuquiztan parlizqui anča azzucača.

¹³ Jalla nižta chjozaka paatanacaqui kjanapacha tjeežtažlaj niiqui, tjap-pacha zizasača, ana walipan, jalla nii. Werar Yooz kjanaqui čjul paatanacami tjeekatasacha, zuma, ana zuma, nii.

¹⁴ Jalla nii puntuquiztan Yooz takuqui tuž cjičan:
 “Tjajñi žoñinaca, žaazna ančhucqui. Ticziquiztan žaažtažokaz cjee. Cristuqui ančuca kuzquiz kjanzt'aučiča, tsjii zuma kjanažtakaz”.

¹⁵ Jaziqui ančhucqui amayt'aza, jaknužt kamčhaja, jalla nii. Yooz puntu ana zizñinacažtakaz ana kamz waquiziča. Antiz Yooz puntu zizñi žoñinaca irata kamspanž waquiziča.

¹⁶ Tii timpuquiz kamñinacaqui ana wali paača. Jalla nižtiquiztan tii timpuquiz žejlcan ančhucqui parti žoñinaca yanapa, zuma kamajo.

¹⁷ Anača zumzužtakaz cjee. Antiz Jesucristo Jiliriz pecta kuz intintazñiž cjee.

¹⁸ Nižaza anača vinžtan licchi cjisqui. Jalla nuž licasaž niiqui, zuma kamañquiztan tsjii kjutñi chjichta cjesača. Antiz ančuca kuztan Espiritu Santužtan tsjii kuzziz cjee.

¹⁹ Ančhucqui porapat zuma parlaquiča Yooz tawk salmužtan, nižaza Yooz wirsu itsnacžtan. Yoozquin tjapa kuztan itsnaquiča. Nižaza itscan Yoozquin honora tjaa.

²⁰ Chjulu watanami Yooz Ejpžquin tirapan sparaquiz cjequiča, učhum Jesucristo Jiliriz cjen.

CRIICHI FAMILLZ PUNTU

²¹ Jesucristužquin rispitchiž cjen porapatž sirwasaquiča.

²² Maatakanaca, persun luctakž jaru cjee, jaknužt ančhucqui Jesucristo Jilirž jaru kamčhaja, jalla nižta.

²³ Maatakaqui luctakž mantuquiz žejlča, jaknužt icliz žoñinacaqui Cristuž mantuquiz žejlčhaja, jalla nižtača. Icliz žoñinacaqui Cristužtan tsjii curpuchizpanča. Nižaza Cristuqui ninacž achača. Cristuqui nižquin criichi žoñinaca liwriiča.

²⁴ Jaknužt criichi žoñinacaqui Cristuž mantuquiz žejlčhaja, jalla nižta irata tsjii maatakaqui luctakž mantuquiz cjistanča čhjulu cjenami.

²⁵ Luctakanaca, persun maatakžtan zuma munaza. Jaknužt Cristuqui criichi žoñinacžtan zuma munazičhaja, nižaza ninacž laycu ticztčhaja, jalla nižta irata persun maatakžtan zuma munaza.

²⁶ Jalla nižta zuma munazican Cristuqui nižquin criichi žoñinacž laycu ticziča, ninaca zuma kamañchiz cjiskatzjapa. Jalla nižta zuma kamañchiz cjisjapa criichi žoñinacaqui kjaztan ajuntažokaz cjissiča, Yooz taku catokžcu.

²⁷ Cristuqui nižquin criichi žoñinacžquiz zuma kamañchiz cjiskatchiča, nižquizpacha zumapankaz ana ujchiz prisintisjapa. Jaknužt tsjii zuma telaqui ana manchichiz, nižaza ana tjot tjotsi, nižaza ana čhjul ana walinacchiz žejlčhaja, jalla nižtapan criichi žoñinacaqui Cristuž yujcquiz cjequiča, zumapankaz cjequiča.

²⁸ Jalla nižta Cristo irata tsjii luctakaqui persun maatakžquiz zuma munazizpanča. Jaknužt persun curpuquizpacha cuitazñižlaja, jalla nižta persun maataka cuitaz waquiziča. Persun maatakžtan munazican, persunpacha munazitažokazza.

²⁹ Anaž jecmi persun curpujapa quintra paasača. Antiz persun curpuquiz cuitazza, nižaza čhjeriž tjaača. Cristuqui jalla nižta irataž icliz žoñinacžtan cuitiča.

³⁰ Učhumqui icliz žoñinacača, nižaza Cristuž curpu cuntača, yekja yekja cjenami. Jalla nižtiquiztan Cristuqui učhumnacatan cuitiča.

³¹ Yooz takuqui tuž cjiča: “Tsjii luctak žoñiqui persun maa ejpžquiztan zarakaquiča, persun maatakžtan zalzjapa. Persun maatakžtan zalžcu, nii pucultanaqui tsjiikaz cjissa”.

³² Cristužquiz criichi žoñinacaqui Cristužtan lucutjiñižtakazza. Jalla nižta cjenaqui ch'amača intintazqui.

³³ Pero zapa mayni ančhucaquiztan persun maatakžtan zuma munaza, jaknužt persunpachquiz zuma munazaja, jalla nižta. Nižaza maatakaqui persun luctaka rispitsa.

6

¹ Criichi maatinaca, persun maa ejpžquiz caspanča. Jalla nuž cascuqui Yooz pecta kuzcamača.

² Yoozqui tuž mantichiča: “Maa ejpžquiz rispitsa”. Nižaza maa ejpžquiz rispitaquiž niiqui Yoozqui compromitchiča, tuž cjican:

³ “Maa ejpžquiz rispitaquiž niiqui, ančhucqui waliž kamaquiča, nižaza ažk wata žetaquiča tii yokquiziqui”.

⁴ Ejpna, ančhucqui maatinacžquiz ana inapankaz žawjwa zijcna. Oc-jalanacaqui ana wali paaquiž niiqui, zumžtan chižinaquiča zuma kamajo. Nižaza Jesucristo Jilirž tjaajinta tjaajžna.

⁵⁻⁶ Piyunanaca, ančhuca patrunanacžquiz caspanča, rispitan, nižaza ekscan, nižaza tjapa kuztan. Anača cherankaz c'unchikaz tuczqui niiž kuz wali cjisjapa. Antiz tjapa kuztan niižtajapa langznaquiča. Jaknužt ančhucqui Yooz kuzcama tjapa kuztan Cristužquiz sirwičhaja, jalla nuž ančhuca patrunanacžquiz sirwasača.

⁷ Zuma kuztan langznaquiča, Yooz Jiliržtajapa langztažokaz, ana žoñžtajapaqui.

⁸ Ančhucqui zizza, piyunanacami, ana piyunanacami, tjapa žoñinacami Yoozquiztan pactaž cjequiča zuma langztiquiztan jama.

⁹ Patrunanaca, ančhuc zakaz piyunanacžtan zumapan cjee. Ana žawjñi takunacžtan chiichiya. Jalla tuž cjuñžna: ančhucmi, ančhuca piyunanacami, tjappacha arajpach Yooz Patrunž mantuquiz žejlča. Nižaza Yooz Patrunaqui žoñinaca ana illilla.

YOOZQUIN TJURT'IZ PUNTU

¹⁰ Jaziqui jilanaca, cullaquinaca, Yooz wali aztan Jesucristo Jiliržquiz tjurt'iñi kuzziz cjee.

¹¹ Satanás diabluž incallzpanž pecča. Jalla nižtiquiztan tjapa Yooziž tjaata armanacchiz cjee, tjurt'iñi kuzziz cjisjapa.

¹² Učhum wali azziz quintranacaqui anača žoñinacakaz. Antiz ninacaqui ana wal jilir zajranacača, nižaza ana wal poderchiznacača, nižaza ana wal mantiñinacača. Nižaza tjapa ana wal azziznacača učhum ultim quintranacaqui. Jalla ninacaqui zumchiquizkaz ojklayñiča, tii timpuquiz ana walinaca mantican.

¹³ Jalla nižtiquiztan Yooz armanaca tanžna, nii ana walinacž quintra tjurt'izjapa tii ana wal timpuquiz. Yooztajapa tjurt'ican tjup kuzziz žela.

¹⁴ Jaziqui tii Yooz armanaca tanžna. Tsjay cinturuna tanžna. Nii cinturuna tanzqui tuž cjiča, werar Yooz tawkžtan tjurt'ichi žejlž, jalla niča niiqui. Nižaza persun curpu atajñijapa arma tanžna. Nii arma tanzqui tuž cjiča, Yooz kuzcamapankaz kamz, jalla niča niiqui.

¹⁵ Nižaza jaknužt zultatunacaqui quira zalzjapa zuma zapatu cujtžaja, jalla nuž ančhucqui liwriiñi taku paljayzjapa tjaczpanča.

¹⁶ Nekžtan tii arma tanžna. Tii armača juc'ant chekanaqui, escudo cjita. Jalla nii arma tanzqui tuž cjiča, Jesucristužquin kuzziz kamz, jalla niča niiqui. Jesucristužquin kuzziz cjen, ana wal diabluž quintra tjurt'aquiča.

¹⁷ Nižaza tii arma žejlča. Yooziž liwriita cjisqui tsjii tjup scarchiztakazza, acha ana chjojritžta cjisjapa. Nižaza Espiritu Santuž pajk cuchillu tanžna. Jalla nii cuchilluqui Yooz takuča.

¹⁸ Espíritu Santuž ančuca kuzquiz želan, ančucqui Yoozquin tirapan mayiza, nižquin tjurt'ichi cjisjapa. Jalla nuž tjurt'ichi cjisjapaqui, naynay žela, ana llajlli kuzziz cjee. Nižaza tjapa Yooz partiquiz žejlñi žoñinacžtajapa mayizina.

¹⁹ Nižaza wejttajapa mayizina, Yoozqui wejr niž liwriiñi takunaca chii yanapzjapa. Wejrqui tjup kuztan liwriiñi Yooz taku zumpacha paljayz pecuča. Jalla nuž paljayzjapa wejttajapa mayizina.

²⁰ Yoozqui wejr cuchanžquichiča, niž puntunaca paljayzjapa. Jalla nuž weriž paljaytiquiztan anziqúi wejrqui carsilquiz chawcta želuča. Jalla nižtiquiztan wejttajapa mayizina, liwriiñi takunaca tjup kuztan ticlarzjapa, jaknužt wejrqui chiiz waquizučhaja, jalla nii.

ZERZ TAKUNACA

²¹ Tíquico jilaqui ančucaquin tjapa wejt puntunaca quint'aquiča, jaknužt želučhaja, nižaza čhjulut paa-učhaja, jalla nii. Tíquico jilaqui pecta jilača, nižaza wejt zuma yanapñiča, Jesucristo Jiliri sirwican.

²² Jaziqúi tii jila ančucaquin cuchanžcuča, wejtnaca puntuquiztan mazinzjapa, nižaza ančuca kuznacquiz zumpacha p'ekinchayzjapa.

²³ Yooz Ejpžtan Jesucristo Jiliržtan ančucaquiz llan kuzziz cjiskatla, nižaza juc'ant zuma munaziñi kuzziz cjiskatla, Jesucristužquin kuz tjaacan.

²⁴ Učhum Jesucristo Jiliržtan zuma munaziñi kuzziz žoñinacžquiz Yoozqui yanapt'izquila. Jalla nužoj cjila. Amén.

LA CARTA DEL APOSTOL SAN PABLO A LOS FILIPENSES

¹ Wejr Pabluqui Timoteo jilžtan ančhucaquin tii cartal cjiŕžcuča. Wejr nacqui Jesucristuž manta payiñtča. Jaziqui ančhuc Filipos wajtchiz criichinacžquin cjiŕžcuča. Jesucristužquin kuz tjaachiž cjen, ančhucqui Yooz partir žoñinacača. Ančhucaquin tsaanžcuča icliz irpiñinacžquinami, nižaza icliz jilirinacžquinami.

² Učhum Yooz Ejp, nižaza učhum Jesucristo Jiliri ančhucaquiz yanapt'ila. Nižaza ančhucaquiz walikaj kamkatla.

PABLUZ MAYIZITA

³ Čhjulator ančhucaquin cjuñznučhaja, ančhucaž cjen Yoozquin sparaquiž cjican chiyučha.

⁴ Nižaza čhjulator ančhucaltajapa mayizučhaja, cuntintul mayizučha.

⁵ Učhumqui chicapacha langzinčhumča, žoñinaca Yoozquin kuzziz cjiskatzjapa. Ančhucaž criichi tjuñquiztanpacha nižaza anzcama Yooztajapa wejttan chica langzinčhucča.

⁶ Ančhucaž criichi tjuñquiz Yoozqui ančhucaquiz zuma kamañchiz cjiskatz kalltichiča. Nižaza Yooz Ejpqui ančhuca zuma kamaña Jesucristuž kamaña irata juc'anti juc'ant cjiskataquiča, Jesucristuž tjonz tjuñicama. Jalla nužupanča cjiwča.

⁷ Nii ančhuca puntuquiztan pinsitanacaqui zuma lijitumača. Wejrqui persun kuzquiztan ančhucajapa anchal cjuñučha. Yoozqui tjapa ančhucaquizimi wejtquizimi yanapchiča, carsilquiz želanami, nižaza jilirinacž yujcquiz želanami. Jilirinacž yujcquiz liwriiñi Yooz tawk favora chiicanpan tjurt'ichinčhumča. Nižaza “Nii liwriiñi takuqui werar takupanča” cjican ticlarchinčhumča. Jalla nuž chiyen Yoozqui učhum yanapchiča.

⁸ Jaziqui wejrqui persun kuzquiz ančhucajapa anchal cjuñučha, jaknužt Jesucristuqui ančhucajapa zuma cjuñčhaja, jalla nuž. Yoozqui nuž zizza.

⁹ Jalla nižtiquiztan ančhucaltajapa Yoozquin mayizučha, ančhucqui tsjan tsjan zuma munaziñi kuzziz cjisjapa. Nižaza jalla nuž zuma munazan, zakaz mayizučha, ančhucqui Yooz puntu tsjan zizñi cjisjapa, nižaza Yooz puntu tsjan zuma intintazñi kuzziz cjisjapa.

¹⁰ Jalla nuž ančhucqui zuma zizñi nižaza intintazñi kuzziz cjequiž niiqui, zuma kamañanacakaz illznaquiča. Nuž illznaquiž niiqui, Jesucristuž tjonz tjuñquiziqui ančhucqui ana ujchiz zumapan cjequiča. Anaž jecmi ančhuca quintra tsjii ujmi tjojtasača.

¹¹ Nižaza ančhucqui Jesucristuž cjen zuma kamañanacakaz tjeeznaquiča Jesucristuž tjonz tjuñquiziqui. Jalla nižtiquiztan ančhucaž cjen Yoozqui zuma honorchiz cjequiča. Nižaza “Yooz ancha zumača” cjican Yooz honora chiitaž cjequiča.

KAMAÑAQUI CRISTUZ CJENPANCHA

¹² Jilanaca, cullaquinaca, ančhucaquin wejt puntuquiztan zizkatz pecučha. Wejtquiz anawali watchinacaž cjen tsjan žoñinacaqui liwriiñi Yooz taku nonziča.

¹³ Anziqui pajk jilirž kjuyquiz preso želuča. Jalla nuž želan tjapa wejr cuitiñi zultatunacaqui liwriiñi Yooz taku nonziča. Parti žoñinacaqui

nonzizakazza. Tjapa ninacaqui zizza, wejrqui Jesucristuž liwriiñi puntu paljaychiž cjen, preso želuča.

¹⁴ Nižaza weriž preso žejltiquiztan, jila parti criichinacaqui Yooz taku paljayzjapa zumpacha p'ekinchaychiča. Nižaza tjup kuzziz cjissiča Yooz taku paljayzjapa, ana ekscan.

¹⁵ Yekjapanacaqui wejtajapa iñiziñi kuztan Cristuž puntu paljayča. Ninacaqui wejtquiztan juc'ant honorchiz cjis pecča. Partizti zuma kuztan Cristuž puntu paljayča.

¹⁶⁻¹⁷ Ninacaqui zuma munaziñi kuzquiztan Yooz taku paljayča. Ninacaqui zizza, wejrqui tekz carsilquiz želuča, liwriiñi tawk favora tjurt'ichiž cjen. Yekjapanacaqui ana zuma kuzquiztan persun honora tanzjapa Cristuž puntu paljayča. Ninacaqui pinsiča, ninacž quintu nonžcu wejrqui juc'ant llaquisichucača, jalla nii.

¹⁸ Jalla nuž cjen, wejrqui ¿kjažt cjeesa? Jalla tuž cjiwča: zuma kuztan cjenami, ana zuma kuztan cjenami Cristuž puntuqui paljaytača. Jaknužt paljayta cjenami, wejttaqui walipankaz cjesača. Jalla nuž cjenaqui wejrqui chipznuča.

¹⁹ Nižaza juc'anti chipznača. Ančucaž wejtajapa mayiziz cjen, nižaza Jesucristuž Espirituž yanapz cjen, tjapa tii watchinacžquiztan wejrqui walipankal cjeeča. Wejrqui tii carsilquiztan ulnačhani.

²⁰ Jalla nuž anchal pecuča, nižaza tjewznuča. Ultimquiziqui wejrqui ana azkattal cjeeča. Pero Cristuž puntul kjana declarača, zuma tjurt'ichi kuztan. Jaziqui weriž cjen Cristuqui tsjan tsjan honorchiz cjequiča, weriž žetanami, weriž ticznami. Tuquimi anzimi weriž cjen Cristuqui honorchizpanča.

²¹ Tuž cjiwča. Cristužtajapapankaz žetuča. Wejr ticznaž niiqui, wejtajapa tsjan cusaž cjequiča, arajpachquin Cristužtan chica žejlcan.

²² Tii curpuchiz tira žetaž niiqui, Cristužtajapapankal langznasača. Jalla nižtiquiztan, žejtzmi ticzmi jakziltat illz waquizas? Anal atasača.

²³ Tii pizc partiqui ch'amača illzjapa. Tsji kuzqui ticz pecuča, Cristužtan chica žejljapa. Jalla niiqui wejtajapa juc'ant waliž cjesača.

²⁴ Pero ančhucaltajapa wejt tira žejtz waquiziča.

²⁵ Jalla nuž wejr ančucaquiztan kuzquiz zint'ican, wejrqui zizuča: tiral žetuča. Ančhucatan tiral kamuča, ančhucqui Jesucristužquiz juc'ant kuzziz cjisjapa, nižaza juc'ant cuntintu cjisjapa.

²⁶ Nižaza wiruñaquí ančucaquin wilta tjonznača. Jalla nuž weriž tjonz cjen, nižaza Jesucristuž cjen, ančhucqui cuntintuž cjequiča.

²⁷ Jilanaca, cullaquinaca, jalla tužuča chekanaqui. Ančuca cristian kamzqui Cristužquiz honorchiz cjiskatz waquiziča, Cristuž tjaaajinta jaru kama. Jalla nuž kamaquž niiqui, ančuca puntuquiztan zuma quintu okaquiča. Nekztanaqui wejrqui ančucaquin chertzñi tjonznaž niiqui, už ana chertzñi tjoni ataž niiqui, wejrqui ančuca puntuquiztan zuma quintu nonznačhani. Ančhucqui tsji kuzziz tjurt'ichi želačhani. Nižaza tjapa ančhucqui tsji kuzziz Yooz tawk favora langzcan želačhani.

²⁸ Nižaza ančhucqui quintra žoñinacžquiztan anaž jaknužumi tsuctsacačani. Anaž ninacž taku kjayačhani. Jalla nuž quintu nonžcuqui, cuntintul cjeeča. Nižaza ančucaž nuž kaman, kjanapacha tjeežtaž cjequiča, ančuca quintra žoñinaca infiernuquin Yooziž castictaž cjequiča. Nižaza kjanapacha zakaz tjeežtaž cjequiča, ančhucqui ultimu liwriižcu arajpachquin zuma kamañchiz cjequiča. Nii zuma kamaña Yooziž tjaata cjequiča.

²⁹ Yoozqui ančhuc illziča, Jesucristužquin kuz tjaazjapami, nižaza Jesucristuž laycu sufrisjapami.

³⁰ Wejr irata ančhucqui sufrichinčhucča zoñinacaž quintra paan. Tuqui jaknužt wejrqui sufritučhaja, jalla nuž cherchinčhucča. Anzimi zakaz wejt sufrita quintu nonzinčhucča. Anchuc zakaz nižta sufraquičha.

2

CRISTUZ TII MUNTUQUIZ KAMTA PUNTA

¹ Ančhucqui Jesucristužquin kuzziz cjen p'ekinchaytaž cjee. Nižaza Jesucristo ančhucacqui okzñiž cjen, ančhucqui kuzta cjee. Nižaza Espiritu Santuqui ančhucacqui kuzquiz luzziča. Nižaza ančhucqui okzñi kuzzizza.

² Jalla nižtiquiztan ančhucqui tsjii kuzziz cjee, porapat zuma munazican, nižaza zuma kamcan. Jalla nuž ančhucqui kamaquiž niiqui, nekztan wejrqui juc'ant cuntintul cjeeča.

³ Anaž persun kuzcamakaz čjulumi paa. Nižaza anaž čjulumi mit kuztan paa. Antiz humilde kuzziz cjee. Parti criichinacacqui wejtquiztan juc'ant honorchiz waquiziča, jalla nuž cjican pinziz waquiziča.

⁴ Persunalta japa wali cjisjapa, ančhucqui kuz tjayiñčhucča. Nižaza parti criichinacztajapa wali cjisjapa zakaz kuz tjaa.

⁵ Jaknužt Jesucristuqui zuma kuzziz žejltčhaja, jalla nižta irata zuma kuzziz cjee. Jesucristuqui zuma kuzziz žejlcan, ana paachiča persunalta japakaz wali cjisjapa.

⁶ Jesucristuqui Yooz cjicanaqui, arajpachquin žejlñi kamañchizpan želatča. Nii arajpach kamañchiz cjenami ana nii arajpach kamaña jaknužumi tira tanzitača.

⁷ Nii arajpach kamaña ecchiča. Nekztan tii muntuquiz žejlñi kamañchiz cjissiča, zoñinaca sirwizjapa. Nižaza žoñi irata nassiča.

⁸ Zoñž curpuchiz cjican, humilde kuzziz želatča. Yooz manta paacan, Yooz Ejpž kuzcamapan kamatča. Cruzquiz ch'awcta ticz cjenami, Yooz Ejpž kuzcamakaz kamatča. Yooz kuzcama kamzquiztan anapan jiwjatchičha.

⁹ Jalla nižtiquiztan Yooz Ejpqui Jesucristužquiz juc'ant zuma honora tjaachiča. Jesucristužquiz tsjan chawc jiliri utchiča, tjappachquiztanami.

¹⁰ Jalla nižtiquiztan tjappachaž nižquiz quillzcan rispitaquičha. Arajpachquin žejlñimi, tii muntuquiz žejlñimi, yok kos žejlñimi, tjappacha Jesucristužquiz rispitaquičha.

¹¹ Tjappacha ticlaraquičha, tuž cjican:

–Jesucristuqui, werarapan Jilirimča amqui. Jalla nuž cjican, Yooz Ejpžquiz zakaz honora tjaata cjequičha.

CRICHI ZOÑINACAQUI YOOZ ZUMA KAMAÑCHIZZA

¹² Weriz pecta jilanaca, cullaquinaca. Weriz ančhucatan želan, ančhucqui weriz chiita taku cassinčhucpanča. Nižaza jaziqui juc'antiž wejt taku casa, ančhucatan ana želanami. Arajpachquin kamzjapa nižaza ultimu liwriita cjisjapa, ancha kuz tjaa. Nižaza humilde kuzziz cjee Yoozquin ekscan.

¹³ Cjuñzna. Yoozqui ančhucacqui kuzquiz žejlča. Jalla nuž žejlcan, niipachaž niž kuzcama zuma paaz ančhucacqui peckatča. Nižaza Yoozpača nii zuma paaznaca cumplisjapa yanapča.

¹⁴ Čjulu paacanami, ana Yooz quintra chucha, nižaza ana payznaka. Pero tjapa zuma kuztan kama.

¹⁵ Jalla nuž zuma kuztan kamtiquiztan, anaž jecmi ančhucacqui quintra uj tjojtasača. Ana wal ujchiz zoñinacztan kamcanami, anapan ujchiz cjesača, zuma kuztan kamcan. Nekztan ančhucqui kjanapacha tjeeža, Yooz

maatinacčhucča. Zuma kamcan ančhucqui ana wal žoñinacžquiz Yooz zuma kamaña pajkatča, zuma kjanažtakaz.

¹⁶ Nižaza ančhucqui Yooztan wiñay kamz puntu paljaycan Yooz zuma kamaña pajkatča. Jalla nuž ančhucaž zuma kamtiquiztan wejrqui Jesucristuž tjonz tjuñquiz ancha cuntintul cjeeča. Ančhuca zuma kamañchiz kamtiquiztan weriž apóstol puestuquiz Cristužtajapa langžtaqui anača ina.

¹⁷ Ančhucqui Yoozquin tsjii wilana ofrendažtakaz ančhuca zuma kamaña tjaača. Ančhuca ofrenda zuma cumplisjapa, ticznasača wejrqui. Jalla nuž ticzanami wejrqui cuntintul cjeeča. Ančhucaž cjen Yooz sirwican cuntintuča.

¹⁸ Nižaza ančhucqui weriž cjen cuntintu zakaz cjis waquiziča. Jaziqui wejttan chica cuntintuž cjee.

¹⁹ Jesucristo Jiliriž munan, wejrqui ančhucaquin Timoteo jila cuchanžquiz pecuča. Nekztan Timoteož quejpžquiztan, ančhuca puntu wejtquiz maznaquiča. Nekztan wejrqui persun kuzquiz zuma cuntintul cjeeča.

²⁰ Anaž iya jecmi wejr irata pinsiñi žejlča, Timoteokazza. Jalla niiča ančhucalta wali cjisjapa kuz tjaañipankaz.

²¹ Parti jilanacaqui persunaltajapa wali cjisjapa kuz tjaača. Jesucristuž kuzcama ana zuma ojklayča.

²² Ančhucqui Timoteo jilž puntu zizza. Niiqui zuma kuz tjeeziča. Wejttan chica liwriñi Yooz taku paljaycan wejr zuma yanapchiča, jaknužt tsjii majch persun ejp yanapčhaja, jalla nižta irata.

²³ Chjulut wejtquiz carsilquiz watačhaja, jalla nii zizcu, wejrqui Timoteo jila cuchanžquiz pecuča ančhucaquin.

²⁴ Nižaza Jesucristo Jiliriž munan, wejrpacha upaquiztan ančhuc cheržni tjonz pecuča.

²⁵ Tirapan carsilquiz želaž niiqui, Epafrodito jila cuchanžcača. Jalla nuž cuchanžquiz tantiichinča. Epafrodito jilaqui wejt herman jilača, nižaza Jesucristužtajapa langžni maziča, nižaza wejttan chica tjurt'iñi maziča. Ančhucqui Epafrodito jila wejtquin cuchanžquichinčhucča, wejtquiz yanapzjapa. Wejttan žejlcan, wejr zuma atintichiča.

²⁶ Nii jilaž tjapa ančhucaquiz ancha cjuñtiquiztan wejrqui tantiichinča, ančhucaquin nii cuchanzjapa. Ančhucqui Epafrodito jila laaquita quintu nonzinčhucča. Epafrodito jilaqui jalla niiž quintu ančhucaquin irantiquiztan kuz turwaysi cjissiča, ančhuc cjuñžcu.

²⁷ Ultim werara laatača, nižaza ticzmayatača. Pero Yoozqui niižquiz ancha okžcu čhjetinchiča. Yoozqui wejtquizimi okzizakazza. Ana čhjetintaž cjitasaz niiqui, wejttaqui juc'ant llaquiz cjitasacha.

²⁸ Jalla nižtiquiztan wejrqui tii jila juc'ant cuchanžquiz pecuča, ančhucqui tii jila cheržcu cuntintu cjequiča, nižaza wejrzakaz ančhucaž cuntintu cjen, upa llaquisacha.

²⁹ Nii jila zuma cuntintu kuztan risiwaquiča, zuma Jesucristo Jilirižquin criichi žoñiča niiqui. Jalla nižta jilanacžquiz rispitspanča.

³⁰ Tii Epafrodito jilaqui ticzmayapantača, Cristužtajapa sirwican. Jos ticziča, ančhuca cuntiquiztan wejtquiz tii carsilquin atintican. Jalla nižtiquiztan niižquiz zuma risiwaquiča.

3

¹ Jilanaca, cullaquinaca, tsjiilla cjesača. Cristuž mantuquiz žejlcan cuntintuž cjee. Tuqui ančucaquin cartal cjiirchinča, tsjii kjaž puntu-nacquiztan. Jalla nii puntunacquiztan wiltal cjiirz pecuča. Wejtta ana molističa nii wiltal cjiirzqui. Ančucaltajapaqui ancha walipanča jalla nii puntunaca wiltal cjiirzqui.

² Ančucqui ana wal žoñinacžquiztan cwitaza. Ana wal pacužtakazza ninacaqui. Ana wali paañinacača ninacaqui. Chimpuchiz cjisjapa žoñinacž curpu pootniča.

³ Učhumqui lijitum Yooz partir žoñinacača, nižaza učhum kuznacquiz Yooziž chinputapanča. Yooz Espíritu Santuž učhum kuznacquiz luzziž cjen, Yooz rispitiñčumča. Nižaza Jesucristužquin kuz tjaachiž cjen učhumqui cuntintučumča. Učhumqui anača žoñiž pinsita custurumpiquiz kuz tjaachinčumqui, Yooz partira cjisjapaqui.

⁴ Ima Jesucristužquiz kuz tjaacan, wejttaqui razunanaca želatča, “Yooz partiquiz želuča” cjisjapaqui. Jakziltat persun razunanacquiztan pinsiħaja, “Wejrqui Yooz partiquiz želuča” cjicanaqui, jalla nižta chiiñi žoñžquiztan wejttaqui juc'anti razunanaca žejlča, “Yooz partiquiz želuča” cjisjapaqui.

⁵ Jalla tužuča wejt razunanacaqui: maaž majttiquiztan quinsakal tjuñquiztan persun curpuquiz chinputapantača. Wejrqui Israel wajtchiz žoñtča. Benjamin famillquiztantča. Hebreo tawkchiz žoñtča majttiquiztanpacha. Nižaza wejt maa ejpmi hebreo chiiñizakazza. Judío lii puntuquiztan fariseo partir tjaajinta jaru kamiñpantača.

⁶ Ancha tjapa kuztan judionacž lii jaru kamz pecquiñtača. Jalla nižtiquiztan Jesucristužquin criichi žoñinaca sufriskatiñtača. Judionacž lii jaru kamz puntuquiztan wejrqui zuma cumpliñtača. Anaž jecmi wejt puntuquiztanaqui “Amqui anam judionacž lii jaru kamča” cjican chii atchiča. Wejt kamzqui lijituma lii jarupantača.

⁷ Tuquiqui tjapa nii puntunacaqui wejtquiztan ancha walñitača. Anziqui tjapa nii puntunacaqui wejtquiztan ana zinta walča, Jesucristuž tjapa walchiž cjen.

⁸ Jesucristo wejt Jiliri tsjan zuma pajzpanqui, jalla niikaz wejtquiziqui walča, tjappachquiztan juc'anti. Jalla nižtiquiztan tjapa žoñiž pectanaca wejtquiztan ana zumanacažtakal nayuča. Wejtquiztan anaž iya čhjulumi walča. Jesucristuž partiquiz cjisjapa wejrqui tjapa žoñiž pectanaca ana kuz tjaa-uča. Ninaca ecchinča. Jaziqui ana criiñi žoñiž pectanaca cjujchinacažtakal nayuča Cristuž partiquiz žejljapa,

⁹ nižaza Cristužtan tsjii kuzziz cjisjapa. Jesucristupankaz wejtquiztanac walča wejr Yooz yujcquiz ana ujchiz cjisjapa. Wejt persun pinsita jaru kamtasaz niiqui, nižaza judionacž lii jaru kamtasaz niiqui, Yooz yujcquiz tirapan ujchiz cjitasacha. Pero Yooz yujcquiz ana ujchiz cjisjapa, Jesucristužquin ultimpacha kuzziztča wejrqui. Jesucristužquin kuzziz cjen, Yoozqui wejtquiz nayča, ana ujchiz nižaza zuma, jalla nii.

¹⁰ Wejrqui pecuča tužu, Cristo tsjan zuma pajz, jalla niiča. Nižaza Jesucristuqui jacatatcan, ancha aziž tjeeziča. Jalla nižta azziz cjis pecuča. Nižaza jaknužt Jesucristuqui sufritħaja, jalla nuž sufris zakal pecuča, niiz partiquiz cjissiz cjen. Nižaza jaknužt Jesucristuqui ticztħaja, jalla nižtazakaz ticzižtakal žejlz pecuča, ana uj paacan žejljapa.

¹¹ Jalla nuž Cristužtajapakaz kamcan, wejrqui ticžcu tjewznuča, jacatatzjapa, jalla nii.

YOOZ IRATA ZUMA KAMAÑCHIZ CJIS PECCHA PABLUQUI

¹² Tuž cjiwčha. Wejrqui tii muntuquiz žejlcan, Cristužtajapa awisaqui ana zuma kamučha. Imazičha Yooz irata zuma kamañchiz žejlzquinaqui. Jalla nuž cjenami, wejrqui tirapan kuz tjaa-učha, nižaza tjurt'učha, Yooz irata zuma kamañchiz cjisjapa. Jalla nižta wejr cjisjapaqui Jesucristuqui wejr liwriichičha. Nižaza wejr liwriichičha niž mantuquiz cjisjapa.

¹³ Jilanaca, cullaquinaca, wejrqui tuž cjiwčha, wejrqui imazičha Yooz irata zuma kamanchizqui cjicanaqui. Pero tuž cjiwčha, wejt tuqita ana zuma kamaña ecučha. Nižaza ancha tjapa kuztan tjurt'učha, juc'ant zuma kamañchiz cjisjapa.

¹⁴ Tira tjurt'učha, Yooz irata zuma kamañchiz cjisjapa, nižaza Yoozquiztan tsjii zuma premio ganzjapa. Jesucristuž partiquiz žejlčhiž cjen Yoozqui wejr arajpachquin kjawznaquičha. Nekztan juc'ant zuma kamañaž tjaaquičha.

¹⁵ Tjapa ančhuc Yoozquin kuz tjurt'ichinaca wejr irata cjee. Ančhucaž pinsitaqui tsjii puntu ana wejr iratažlaj niiqui, Yoozqui ančhucaquiz nii puntu zizkataquičha lijituma pinzizjapa.

¹⁶ Tii zakal cjiwčha. Anzcama jaknuž Yoozqui učumnacaquiz niž kamañ puntuquiztan zizkatčhaja, jalla nii zizkatta kamañ jaru kamstančha.

¹⁷ Jilanaca, cullaquinaca, weriž kamta irataž kama. Nižaza jakzilta criichinacat weriž kamta irata kamčhaja, jalla ninacžquin yatekaza, juc'ant zuma kamañchiz cjisjapa.

¹⁸ Wejrqui kjaž wilta ančhucaquiz chiižinchinčha, nižaza ancha kuzquiz zint'ican kaacan, wilta chiižinučha, jalla tuž cjican. Wacchi žoñinacaqui Cristuž quintra žejlčha. Cristuž cruzquiz ticziž cjenami, jalla nii liwriiñi ana juyzu paačha.

¹⁹ Ultimquiziqui nii ana Cristužquiz juyzu paañi žoñinacaqui Yooziž castictaž cjequičha. Ninacaž persun kuzquiztan pectanaca rispitcha, tsjii yooztakaz. Azzucanaca paacan, mit kuzzizkazza. Nižaza tii muntu yokquiz žejlñi cusasanacžquizkaz pinsičha.

²⁰ Učhumzti arajpach wajtchiz žoñinacčhumčha. Učhumqui arajpachquiztan učhum Liwriiñi, Jesucristo Jiliri, tjewža.

²¹ Jesucristuqui wilta tjonžcu učhum ana wal curpunaca tsjemataž tuckataquičha, niž irata zuma curpuchiz cjisjapa. Niiž persun aztan učumnaca curpu jalla nižta tsjemata tuckataquičha. Nižaza niž persun aztan čhjultakimi niž mantuquiz cjiskataquičha.

4

YOOZQUIN KUZIZ CJEN CUNTINTUPANZ CJEE

¹ Weriž pecta jilanaca, cullaquinaca, ančhucaquin ancha tjonz pecučha. Ančhucaž cjen, cuntintuž wejrqui, nižaza ančhucaž cjen honorchiz cjeečha. Pecta jilanaca, cullaquinaca, Jesucristo Jiliržquin tjurt'ichi kuzziz cjee.

² Evodia cullaca, nižaza Síntique cullaca, ančhucqui Jesucristo Jiliržquin criichiž cjen tsjii kuzziz cjee.

³ Wejt lijitum Cristužquiz sirwiñi mazi, amquiz rocučha, tii pucultan cullaquinacžquiz yanapt'alla, porapat zuma munaziñi kuzziz kamzjapa. Nii pucultan cullaquinacaqui wejttan chica liwriiñi taku paljaycan langzičha. Nižaza nii cullaquinacaqui Clementižtan, nižaza parti wettan chica paljayñi mazinacžtan langzičha. Tjapa ninacž tjuunacaqui listitačha arajpach žejtz liwruquiz.

⁴ Jesucristo Jiliriz cjen cuntintupanž cjee čhjulorami. Wilta cjiwčha: cuntintuž cjee.

⁵ Tjapa žoñinacaqui ančhuc zuma kuzziz pajla. Jesucristo Jiliriqui wajillaž tjonaquiča.

⁶ Ana čhjulquiztanami llaquita kuzziz cjee. Antiz čhjulu watanami Yoozquizkaz mayiza. Yoozquiztan čhjulumi maya, nižaza sparaquiž cjee.

⁷ Jalla nuž kaman, Yoozqui ančuca kuzquiz cuntintuž cjiskataquiča. Jaknužt Yoozqui žoñinacž kuzquiz cuntintu cjiskatčhaja, jalla nii cuntintu cjiskattaqui ana intintazasača, žoñiž pinsitiquiziqui. Jesucristužtan tsjii kuzziz cjen ančuca kuznacaqui cuntintu cjequiča, Yooz cwititiquiz-tanaqui.

ZUMA PINZIZNACAPANZ WAQUIZICHA

⁸ Jilanaca, cullaquinaca, tii zakal cjiwča. Jalla tižta ultim zuma pinziznaca waquiziča: weraranaca, nižaza rispitsnaca, nižaza Yooz kuzcama kamznaca, nižaza ana uj paaznaca, nižaza tjapa zumapan kamz pecznaca, nižaza zuma quintuchiz cjisnaca. Jalla nižta zumanaca pinza, nižaza tjapa zuma walinaca pinza.

⁹ Weriž tjaaajinta jarumi, nižaza weriž chiita jarumi, jalla nii jarupan kama. Nižaza jaknužt weriž kamta puntuquiztan nonžinčhucčhalaj niiqui, nižaza cherčinčhucčhalaj niiqui, jalla nižta iratapan kama. Jalla nuž zuma kamtiquiztan Yoozqui ančhucatan chicapachaž cjequiča. Nekztan ančhucqui walikaz cjequiča.

PABLUZQUIN PAAZNACA APAYZQUITA

¹⁰ Jaziqui ančhucqui wilta wejtquiz cjuñzinčhucča. Jalla nižtiquiztan anča cuntintučha wejrqui, Jesucristo Jiliriž cjen. Jazic wejrqui anal cjis pecučha, wejr tjazikalak, cjicanaqui. Antiz ančhucqui yanapz peccanami, ana jaknužumi wejtquiz yanapi atchinčhucča.

¹¹ Wejrqui anal cjiwča, “Ancha t'akjiri želuča”, cjicanaqui. Wejrqui aprendichinča, cuntintupankaz žejljzjapa, čhjulu wejtquiz watanami.

¹² Zelinchiz kamcanami, ana želinchiz kamcanami cuntintu želi zizzinča. Čhjulu watanami, čhjerchiz cjicanami ana čhjerchiz cjicanami, walipankaz želi aprendichinča. T'akjirižtakaz žejlcanami, ana t'akjiri žejlcanami walipankaz želi aprendichinča.

¹³ Čhjulu watanami, Jesucristuqui wejtquiz azi tjaañipanča, awantizjapa. Cristuž aztan čhjulum paachuča.

¹⁴ Jalla nuž cjenami, ančhucqui walipankaz paachinčhucča, wejtquiz yanapcan, weriž sufrican žejlchiž cjen.

¹⁵ Tuquiqui weriž liwriiñi taku paljayi kalltitan, nižaza Macedonia yokquiztan ulantan, ančhucqui wejtquiz ofrendanacžtan yanapžquichinčhucča. Ančuca iclizquiztankaz wejtquiz yanapchinčhucča. Wejrqui ančucaquiz zuma Yooz taku paljaychinča, nižaza ančhucqui wejtquiz cusasanaca tjaacan yanapchinčhucča. Jalla tjapa nii zizza ančhucqui.

¹⁶ Nižaza Tesalónica wajtquiz sufrican želan, ančhucqui ofrendanaca wejtquin apayžquichinčhucča, wilta wilta.

¹⁷ Wejrqui ančuca ofrendanacquiz anal kuz tjaa-uča. Ančuca ofrendanacakaz anal pecučha. Pero wejr pecučha, ančhuc arajpachquin juc'ant honorchiz cjisjapa, ančucaž ofrendanaca tjaatiquiztan. Jalla niil pecučha.

¹⁸ Ančucaž yanaptiquiztan juc'anti wejtquiz žejlča, ana iyal necesituča. Epafrodito jilaqui ančucaž apayžquita ofrendanaca wejtquiz intirjichiča. Jalla nižtiquiztan wejtta jilacamača. Jalla nii apayžquita ofrendanacaqui Yoozquiz tsjii zuma ulurchiz inzinužtakaztača. Nižaza Yooz

yujcquiziqui ančhuca ofrendanacaqui tsjii zuma wilanažtakazza. Yoozqui nižtiquiztan cuntintučha.

¹⁹ Chjulorat ančhucqui čhjulunacquiztanami upsi cječhaja, jalla nii oraqui wejt Yoozqui ančhucaquiz juc'anti yanapt'aquičha. Jesucristuž cjen Yoozqui ančhucaquiz yanapt'aquičha, tjapa nižquiz zuma walinaca žejltiquiztanjama.

²⁰ Učhum Yooz Ejpžquiz wiñaya wiñaya honora tjaataj cjila. Jalla nužoj cjila.

²¹ Tsjii cjesačha. Tjapa Jesucristužquin criichi jilanacžquin tsaanžinalla. Nižaza tii wejttan chica criichi jilanacaqui ančhucaquin tsaanžquičha.

²² Tjapa tekžta criichi žoñinacaqui ančhucaquiz tsaanžquičha. Juc'anti ančhucaquiz tsaanžquičha tii Roman chawc jilirž kjuychiz criichi žoñinacaqui.

²³ Učhum Jesucristo JiliriQUI ančhuca kuzquiz zumapaj yanapt'ila. Amén.

LA CARTA DEL APOSTOL SAN PABLO A LOS COLOSENSES

¹ Wejrqui Pablutcha, ančhucaquin cjiyržcuča. Wejrqui Jesucristuž illzta apostultcha, Yooz pectiquiztan. Wejttan Timoteužtan tii carta cjiyržcan ančhucaquin tsaanžcuča.

² Ančhucqui Colosas wajtchiz žoñinacčhucča, nižaza lijitum Yooz parti žoñinacčhucča. Ančhucqui lijitum Jesucristužquin kuzzizčhucča. Jaziqui wejtnac mazinacčhucča. Učhum Yooz Ejp ančhucaquin yanapt'ila, nižaza zuma cuntintu kuzziz cjiskatla.

PABLUZ MAYIZITAQUI

³ Wejrnacqui čhjulatorat Yoozquin parlučhaja, učhum Jesucristo Jilirž Yooz Ejpžquin sparaquiča cjiñpanča ančhuca zuma kamchiž cjen.

⁴ Ančhucqui Jesucristužquin kuz tjaayiñčhucquiča, nižaza parti jilancžtan zuma munaziñčhucquiča. Jalla nuž zizcu, Yoozquin ancha sparaquiž cjichinča.

⁵ Jalla nuž zuma kamcan, ančhucqui tjewžquiča, čhjulut Yoozqui arajpachquin ančhucaltajapa zuma panž tjaczaja, jalla nii. Ančhucqui nii Yooz tjacžta kamz puntu zizzinčhucča, werar liwriiñi Yooz taku nonžcu.

⁶ Nii liwriiñi takuqui ančhucaquiz paljaytatača, nižaza tjapa kjutñi žoñinacžquiz paljaytatača. Jalla nii taku paljaytiquiztan, tjapa kjutñi žoñinacaqui Yooz zuma kamañchiz cjissiča. Nižaza tjapa kjutñi tsjan tsjan žoñinacaqui liwriiñi tawkquiz kuzzizza. Nižaza tsjan tsjan ančhuca wajtchiz žoñinacaqui liwriiñi tawkquiz zakaz kuzzizza. Zuma Yooz taku nonztiquiztanpacha tii orcama tsjan tsjan ančhucqui Yoozquin kuzzizčhucča. Nižaza Yooz taku nonžcu zumpacha zizñi cjissinčhucča, Yoozqui žoñinaca ancha okzñiča, jalla nii.

⁷ Jalla nuž Epafras jilaqui ančhucaquin tjaajinchizakazza. Jalla niiqui učhumž pecta jilača, nižaza niiqui wejttan chica Jesucristo Jiliržtajapa langziča. Nižaza Epafras jilaqui Jesucristužquin sirwiñiča.

⁸ Epafras jilaqui ančhuca puntu wejtnacaquiz quint'ichiča, jaknužt ančhucqui parti criichinacžtan zuma munazichinčhucžlaja, jalla nii.

⁹ Jalla nuž ančhuc zuma kamtiquiztan wejrnacqui ančhucaltajapa Yoozquin mayiziñpanča. Ančhuca puntu nonžcu, Yoozquin mayiziñpanča, tsjan zuma kamajo. Nižaza mayiziñpanča, Yoozqui ančhuc zumpacha zizkatajo, jaknužt niiqui ančhuc zuma kamz munčhaja, jalla nii. Nižaza mayiziñpanča, ančhucqui Yooz kuz zizñi cjisjapa, nižaza Yooz kuz intintazñi cjisjapa.

¹⁰ Jalla nuž zizñi nižaza intintazñi cjequiž niiqui, ančhucqui zuma kamaquiča, jaknužt Jesucristo Jilirž partir žoñinacaqui kamstanžlaja, jalla nii. Jalla nuž ančhucaž zuma kamtiquiztan, Yoozqui cuntintuž cjequiča. Nižaza jalla nuž zuma kamcan, ančhucqui tjapaman walinacaž paaquiča. Nižaza Yooz puntu juc'ant zuma zizaquiča.

¹¹ Jalla nuž ančhucqui zuma kamcan, Yooz aztan kamaquiča, jaknužt Yoozqui zuma tjapa aztančhalaja, jalla nižta aztan. Yooz aztan kamcan, ančhucqui čhjulquiztanami pasinsis kuzziz Yoozquin tjurt'aquiča, nižaza sufricanami cuntintu kuzziz cjequiča.

¹² Nižaza zuma kamcan, ančhucqui Yoozquin sparaquižpanž cjequiča. Yoozqui ančhuc tjacziča, arajpachquin irinsa tanzjapa. Yoozqui tjapa

criichinacžquin tsjii zuma irinsa tjaaquičha. Nii zuma irinsa ančhucaquiz zakaz tjaata cjequičha. Jaziqui Yoozquin ancha sparaquiž cjis waquizičha.

¹³ Yoozqui učum liwriichičha, jalla nižtiqiztan učumqui ana wal Satanás mantuquiz ana iya zejlčha. Yoozqui učum niž pecta Majch Jesucristuž mantuquiz utchičha.

¹⁴ Jesucristuž ticztiqiztan učumqui Satanás mantuquiztan liwriitačha. Nižaza Jesucristuž ticztiqiztan učum ujnaca pertuntačha.

JESUCRISTUZ PUNTUQUIZTAN

¹⁵ Tii muntuquiz kamcan Yooz Majchqui ana cherta Yooz Ejpž kuz kjanacama pajkatchičha. Yooz Majchqui tjappachquiztan tsjan jiliričha.

¹⁶ Niiž cjen tjappacha zejlčha, tjapa arajpachquin zejlñinacami, tjapa yokquiz zejlñinacami, tjapa chertanacami, ana chertanacami, tjapa mantiñinacami, gobiernunacami, jilirinacami, tjapa anjilanacami, tjapa zajaranacami, Jesucristo Yooz Majch cjen, tjappacha zejlčha. Nižaza nižtajapa tjappacha paatačha, nižquiz honora waytizjapa.

¹⁷ Jesucristuqui zejlchičha, primerquiztanpacha, nižaza tjapa zejlñinacž tuquitanpacha. Niiž cjen tjappacha zejlčha.

¹⁸ Nižaza Jesucristuqui Yooz partir zoñinaca mantičha. Jaknužt persun zoñž kuz persun curpu mantičhaja, jalla nižta irata Jesucristuqui niž icliz zoñinaca mantičha. Niiž cjen niž icliz zoñinacaqui Yooz kamañchiz cjissičha. Niičha primera ticžcuqui jacatatchiqui, tjappachquiztan tsjan jiliri uchta cjisjapa.

¹⁹ Yooz Ejpžtan Yooz Majchtan tsjii kamañchizpančha.

²⁰ Nižaza Jesucristuž ticziž cjen, tjappacha pertunta cjesačha, yokquiz zejlñinacami, ana yokquiz zejlñinacami. Jalla nuž Yooz Ejpqui munchičha. Jesucristuž cruzquiz ch'awcta ticziž cjen, Yooz Ejpžtan parti zejlñinacžtan zumanskattaž cjesačha. Jalla nuž munchičha Yooz Ejpqui.

²¹ Tuquiqui ančhucqui Yoozquiztan yekjatačha, nižaza Yooz quintratačha ančhuca kuzquiz. Tuqui ančhucqui ana wali pinsiñchuctačha, nižaza Yooz quintrata ana wali paayiñchuctačha. Jalla nuž ana wali kamta cjenami Yoozqui ančhuc pertunchičha, nižtan ančhucatan wali cjisjapa.

²² Jesucristuž cjen Yooz Ejpqui ančhuc pertunchičha. Jesucristuqui ančhuc irata curpuchiz cjican, ančhuca laycu ticzičha. Ančhuc laycu ticzičha, Yooz yujcquiz ančhuc ana ujchiz Yooz irata zuma kamañchiz prisintiskatzjapa. Jalla nuž Yooz yujcquiz zuma cjican anaž jecmi ančhucaquiz tsjii uj tjojtunz atasačha.

²³ Jalla nuž Yooztan ančhucatan wali cjisjapa, ultimu chekpacha Jesucristužquiz kuzzizpančha. Nižaza ančhucqui Jesucristužquiz tjurt'iñi kuzziz cjistančha, ana wira jaytistančha. Tii muntuquiz liwriiñi tawk jaru kamñi cjistančha, arajpach zuma kamaña tjewžcan. Nii liwriiñi taku nonzinčhucčha. Nižaza nii liwriiñi takuqui tjapa kjutñi tii muntuquiz paljaytatačha. Nii taku paljayzjapa, wejr Pabluqui apóstol oficiuquiz uchtačha.

PABLUQUI APOSTOL KAMAÑCHIZZA

²⁴ Wejt Yooz tjaata oficio cumplican, ančhucaltajapa sufručha. Jalla nuž sufrican wejrqui cuntintutčha. Ančhuc zuma kamañchiz cjisjapa yanapñiž cjen, wejrqui cuntintutčha. Nižtami iya sufristančha. Jalla nuž wejt curpužtan sufrican, Cristuž partir zoñinacaltajapa wejt sufrisnaca cumpližinučha. Cristužquiz kuzziz cjen nižta sufručha. Cristuž partir zoñinacaqui Cristuž icliz zoñinacačha.

²⁵ Wejrqui Cristuž partir žoñinacžquin sirwizjapa, apóstol oficiuquiz uchtača. Yoozqui ančhucaltajapa nii oficiuquiz wejr utchiča. Wejrqui uchtača Yooz taku zumpacha zizkatzjapa,

²⁶ nižaza Yooz pinsita zizkatzjapa. Jalla nii Yooz pinsitaqui tuquitanpacha chjojtatača. Jalla nižtiquiztan tjapa žoñinacaqui ana zizzucatača. Jazikaz Yoozqui niž pinsita zizkatchiča niž partir žoñinacžquiz.

²⁷ Yoozqui niž partir žoñinacžquiz niž tuquita chjojta pinsitaqui zizkatz munchiča. Nii pinsitaqui ancha zumača ana judío žoñinacžtajapaqui. Jalla tiča nii tuquita chjojta pinsitaqui: Jesucristuqui ančuca kuzquiz žejlča. Jalla nižtiquiztan ančhucqui Cristužtan arajpachquin ancha zuma kamaquiča. Jalla nii zuma kamaña tjewža ančhucqui.

²⁸ Jesucristuž puntu paljayuča, tjapa žoñinacžquin chiižincan, nižaza tjaajincan. Jalla nuž chiyā, Yoozqui wejr yanapča zizni zizni chiyajo, tjapa Jesucristužquin kuzziz žoñinaca Yooz irata zuma kamañchiz cjeajo.

²⁹ Nižaza apóstol oficiuquiz ojklaycan, ancha langznuča, tjapa Cristuž tjaata aztan langznuča, tjapa jilanaca Yooz irata zuma kamañchiz cjiskatzjapa.

2

¹ Jalla nuž ančucaquin maznuča, weriž ančhucaltajapa langžta zizkatzjapa. Tjapa kuztan langznuča, ančhucaltajapami, nižaza Laodicea cjita wajtchiz žoñinacžtajapami, nižaza tjapa ana wejr cherchi criichinacžtajapami.

² Jalla nuž tjapa aztan langznuča, Yoozquin criichi žoñinacž kuzquiz zumpacha p'ekinchayta cjisjapa, nižaza tsjii kuzziz cjisjapa, nižaza porapat zuma munaziñi kuzziz cjisjapa. Nižaza langznuča, Yooz chjojta pinsita puntu zumpacha intintizkatzjapa. Jalla nuž zumpacha intintazcu, ančhucqui tjurt'iñi kuzziz cjequiča. Jalla nii tuquitan chjojta Yooz pinsitaqui Cristuž puntuča. Wejrqui Cristuž puntu paljaycan langznuča.

³ Cristupankaz Yooz puntu lituma zizni cjiskatasača, nižaza tjapa Yooz puntu intintazni cjiskatasača.

⁴ Jalla niil ančucaquiz cjiwča, ana jakziltami ančucaquiz incallzjapa, tsjii zuma takužtakaz chiican.

⁵ Ančhucatan ana žejlcanami, wejt persun kuzquiz ančucaquiztan anchal cjuñznuča. Wejrqui ančuca puntu naychinča, tsjii kuzziz kamča, nižaza Jesucristužquin criižcu tjurt'ichi kuzzizčhucča. Jalla nižta nayžcu wejrqui chipznuča.

⁶ Tuquiqui ančhucqui Jesucristuž puntu tjaajintan tjapa kuztan catokchinčhucča. Nuž catokžcu Jesucristuž mantuquiz cjissinčhucča, niiqui ančuca jiliri cjisjapa. Jalla nuž Jesucristuž mantuquiz tirapan kama. Nižaza nižquin tsjii kuzziz cjee.

⁷ Nekztan niž puntu tsjan tsjan zizni cjequiča, nižaza nižquin tjurt'ichi kuzziz kamaquiča. Jalla nuž ančhucqui tjaajintatača. Nižaza čhjulu watanami ančhucqui Yoozquin sparaquižpanž cjis waquiziča.

CRISTUZ CJEN EW KAMAÑA ZEJLCHA

⁸ Ančhucqui cwitazaquiča, tsjii kjutni ana chjichta cjisjapa. Yek-japanacaqui ančhuc incallskatz pecča, zuma razunanacažtakaz chiican, nižaza toscar takunacžtan chiican. Jalla nižta tawkchiz žoñinacaqui Cristuž pinsita jaru anaž chiiča. Pero žoñiž pinsita jarukaz chiiča. Nižaza zajranacž pinsitanac jarukaz chiiča. Jaziqui nižta chiiñi žoñinacžquiztan cwitazaquiča.

⁹ Cristuqui tii muntuquiz kamcan žoňž curpuchiztača. Nižta curpuchiz cjenami, Cristuqui Yoozpankazza, nižaza Yooz kamaňchizpankazza.

¹⁰ Cristužtan tsjii kuzziz cjican ančhucqui Yooz kamaňchizpan žejlča. Nižaza Cristučha wali pajk jiliriqiu tjapa mantiñinacžquiztanami, tjapa poderchiznacžquiztanami.

¹¹ Cristužtan tsjii kuzziz cjican, ančhucqui kuzquiz chimpupa cjissinčhucča. Zoñiqiu ana ančhuc chimpuchiča. Pero Jesucristuqui ančuca kuz chimpuchiča. Nii kuzquiz chimpupaqui tuž cjiča: Yooz partir žoñinacača, jalla nii. Cristuqui niž partir žoñinaca uj paaz pecni kuzquiztan jaytiskatchiča.

¹² Jesucristužquin kuz tjaatiquiztan bautista cjissinčhucča. Bautistaqui tuž cjiča: Jaknužt Cristuž curpu tjažtažlaja, jalla nižta irata ančuca tuquita ana wal kamaña tjažtazakazza. Nižaza jaknužt Jesucristuqui jacatatzcu Yooz kamaña tanžtčhaja, jalla nižta irata zakaz ančhucqui Jesucristužquin kuzziz cjen Yooz kamaña tanzinčhucča. Yoozqui ticzinaca jacatatskatzjapa azzizza. Jalla nii azziz Yoozquin criižcu, Yooz kamaña tanzinčhucča, Yooz kamaňchiz kamzjapa.

¹³ Tuquiqui ančhucqui ana curpuquiz chimpupatača, judío žoñinacž partira cjisjapa. Ana chimpuchiz cjican, nižaza ujnaca paacan, ticzi žoñinacažtakaztača ančhucqui. Jaziqiu Cristužtan tsjii kuzziz cjen Yoozqui ančucaquiz niž ew kamaña tjaachiča. Nižaza tjapa učum ujnaca pertunchiča.

¹⁴ Uj paatiquiztan tsjii acta želatča učum quintra. Jesucristuž učum laycu ticziž cjen Yoozqui nii acta jurkatchiča, tjapa učum quintra puntquiztan. Anulta cjissiča, Jesucristuž cruzquiz ch'awcta ticziž cjen.

¹⁵ Cristuž cruzquiz ch'awcta ticziquiztan, Yooz Ejpqui atipchiča tjapa anawal jilirinacami nižaza poderchiznacami. Yoozqui nii anawal azziz ispiriunaca ana azziz cjiskatchiča. Kjanapacha azkatchiča, prisu tanta žoñinacažtakaz. Yoozpanikazza tjappacha atipchiqui.

ARAJPACH KAMAÑCHIZ CJISPANCHA

¹⁶ Jalla nižtiquiztan anaž jecmi ančucaquiz uj tjojtasača, tuquita mantitanaca jaru ana kamtiquiztan. Tuquitan Yoozqui puntu puntu mantichiča, lujlz puntu, licz puntu, pjijsta puntu, ew jiiz puntu, jeejz tjuñi puntu, jalla nuž.

¹⁷ Tuquitan Yoozqui tjapa nii puntunaca mantichiča, Yooz kuz koloculla tjeezjapa. Pero Cristupankaz ultim werara Yooz kuz tjeeza.

¹⁸ Ančhucqui Jesucristužquin kuzziz cjen, anaž jecžquizimi ančucaquiztan arajpach premio kjankataquiča. Yekjap žoñinacaqui mit kuzziz cjenami, ana mit kuzziz tjeeza. Nižaza anjilanacžquiz rispitažo tjaajža. Nuž tjaajñi žoñinacaqui anchuc incallz pecča, čjuužta puntunaca ancha paljaycan. Ninacaqui inakaz mit kuzzizza. Ana wal pinsita jarukaz tjaajža. Nuž tjaajincan mit kuzziz cjissa.

¹⁹ Ninacaqui Cristo Jiliržquiz ana tsjii kuzziz tjurt'ichi žejlča. Pero Cristupankazza criichinacž jiliriqiu. Niž cjen tjapa criichinacaqui tsjan tsjan zuma kamaňchiz cjisnasača. Nižaza Cristuž cjen tjapa criichi žoñinacaqui tsjan tsjii kuzziz cjisnasača. Jaknužt žoňž curpuqui, yekja yekja cjenami, tsjii curpuchizkazza, jalla nižta irata criichi žoñinacaqui, yekja yekja cjenami, tsjii kuzzizkazza.

²⁰ Ančhucqui Jesucristužquin kuzziz cjen, ujchiz žoñinacž pinsitanacquiztan t'akzinčhucča. Nii ana wal pinsitanacquiz ojklayz cjenpacha, ticzi

žoñinacažtakaz katzinčucča. Jalla nižtiquiztan, ¿kjažtiquiztan ančucqui ujchiz žoñinacaž pinsita jaru wilta kamjo? ¿Nižaza ninacž lii jaru ojklajyo?

²¹ Ninacž liiqui tuž cjiča: Tiinaca ana kjaržtan tanzla, nižaza tiinaca ana lujl-la, nižaza tinaca ana čjul lanžla. Jalla nuž cjiča ninacž liiqui.

²² Nii liinacaqui tii muntuquiz žejlñi cusas puntukazza. Nii cusasanacaqui tucuzinznaquiča. Nii liinacaqui žoñiž pinsita mantita jarukazza.

²³ Ninacž liinacaqui zizñi pinsitažtakazza. Pero ultimquiziqui inakazza. Ana azzizza, žoñinaca zuma kamñi yanapajo. Cuzturumpinaca ijzijcan mantiča, nižaza humilde kuzziztakaz mantiča, nižaza persun curpu sufriskatzjapa mantiča. Jalla nuž mantita liinacaqui zizñi pinsitažtakazza. Pero ultimquiziqui inakazza. Uj paaz pecñi kuz tjonanaqui anaž nižta kuz ewjazi atasacha nii liinacaqui. Jaziqui ančucqui ninacaž inakaz tjaajintaqui anaž nonznaquiča.

3

¹ Ančucqui Yooz kamañchizza. Jaknužt Jesucristuqui jacatatžcuqui Yooz kamaña wilta tanzilajla, jalla nižta irata ančucqui Yooz kamaña tanzinčucča. Jalla nižtiquiztan ančucqui arajpach Yooz kamañquizkaz kuz tjaa. Jalla nicju arajpachquin Cristo žejlča; Yooz Ejpž žew latuquiz julzi žejlča, mantican.

² Ujchiz žoñž kamañquiz ana kuz tjaa. Arajpach kamañquizkaz kuz tjaa.

³ Ančucqui Jesucristužquin kuz tjaachiž cjen, ančuca tuquita ana wal kamaña ecchinčucča. Jaziqui ančuca Yooz kamañaqui Yooztajapa žejlča. Ana criichi žoñinacžtajapa ančuca Yooz kamañaqui chjojžtažtakaz žejlča. Ana wira tintazzucača.

⁴ Cristuqui ančucaquiz Yooz kamaña tjaachiča. Jalla nižtiquiztan čjulorat tjapa žoñinacaqui Jesucristužquiz pajchi cječhaja, jalla nii ora zakaz ninacaqui ančuca Yooz kamaña pajchi cjequiča. Jalla nii oraqui ančucatan Jesucristužtan honorchiz cjequiča.

TUQUITA KAMAÑ PUNTU, JAZTA KAMAÑ PUNTU

⁵ Jalla nižtiquiztan ančuca tuquita ana wal kamaña liwj jayta. Anaž adulteriuquiz ojklayzqui. Anača luctak žoñiqui yekja maatak žonatan ojklayzqui. Anača ančuca ana wal paaz pecñi kuz jaru ojklayzqui. Anača čjul ana walimi peczqui. Anača yekja žoñž čhjultakimi zmazqui. Jalla nuž zmaznaquiž niiqui, žoñiž paata yoozquiz rispitažokazza. Jalla nii anawali paaznacquiztan liwj jayta.

⁶ Nii ana wali paañi žoñinacžquiz Yoozqui ancha casticu tjaaquiča, Yooz kuzcama ana kamtiquiztan.

⁷ Ančucqui tuquita ana wal kamañquiz ojklaycan, nižtanacaž paa-atča.

⁸ Jaziqui ančucqui nii ana wal paaznaca liwj eca. Anača žawjchi kuzziz žejlzqui. Anača culirazzi kuzziz žejlzqui. Anača ana wal paaz pecñi kuzziz žejlzqui. Anača žoñž quintra ana wali taku chiizqui. Anača ana wal tawkžtan chii chiican žejlzqui.

⁹ Anača toscar taku chiizqui. Ančucqui tuquita ana wal kamaña ecchinčucča. Jalla nižtiquiztan ančucqui nii ana wal paaznacquiz ana iya ojklayz waquiziča.

¹⁰ Ančucqui Yooz kamañchiz cjissinčucča. Yoozpacha ančucaquiz Yooz kamaña tjaachiča. Nižaza ančucqui Yooz irata zuma kamañchiz tsjan tsjan cjissa, Yooz zumpacha pajañcama.

¹¹ Yooz kamañchiz cjican, tjapa criichi žoñinacaqui Yooz yujcquiziqui tsjikazza. Tuquita kamañanacaqui anaž walča. Pero Cristo kamañchiz kaz

walča. Tsjii griego walja zizni kamañami anaž walča. Tsjii judío lii jaru kamañami anaž walča. Tsjii curpuquiz chimpota žoñž kamañami anaž walča. Tsjii curpuquiz ana chimpota žoñž kamañami anaž walča. Tsjii k'ar žoñž kamañami anaž walča. Tsjii q'uit žoñž kamañami anaž walča. Tsjii piyunažta žoñž kamañami anaž walča. Tsjii patrun žoñž kamañami anaž walča. Cristuž kamañapankaz walča. Nižaza Cristupankaz tjapa criichi žoñinacž kuzquiz žejlča.

¹² Ančhucqui Yooz illzta žoñinacžhucča. Jalla nižtiquiztan Yooz zuma kamañ jaru kamstanča. Yoozqui ančhucatan zuma munaziča. Yooz partir žoñinaca cjican, jalla tuž kama: Okzni kuzziz, nižaza zuma kuzziz, nižaza ana mit kuzziz, nižaza humilde kuzziz, nižaza pasinziz kuzziz, nižaza

¹³ porapat pertunasni kuzziz. Jalla nižta kamz waquiziča. Tsjii criichi žoñiqui yekja criichi žoñž quintra quijchi cjesaž niiqui, zuma kuztan pertunz waquiziča, jaknužt Jesucristuqui ančucaquiz pertuntčaja, jalla nuž.

¹⁴ Jalla tužuča chekanaqui, porapat zuma munazizza, jalla nii. Jalla nuž zuma munazican, zuma kuzziz zuma kamaquiča, Yooz irata zuma kamaña cumplañcama.

¹⁵ Ančhuc criichinacaqui, Cristuž cjen ančhucqui llan kuzziz cjesača. Jaziqui llan kuzziz cjee, porapat zuma munazican zuma kamzjapa. Jalla nuž porapat zuma kamzjapa, Yoozqui ančhuc liwriichiča. Jalla nuž liwriiču, Yoozqui tjapa ančhuc criichinaca tsjii t'akquizkaz cjiskatchiča. Tsjii curpuchiztakazza ančhucqui. Jalla nižtiquiztan ančhucqui Yoozquin ancha sparaquič jican, mayiziz waquiziča.

¹⁶ Ančhucqui Cristuž puntu zuma zizcan porapat tjaajsarasaquiča, nižaza Cristuž tawkžtan porapat p'ekinchayrasaquiča. Nižaza ančuca kuzquiz Cristuž taku zumpacha catokz waquiziča. Nižaza Yooz takumi, Yooz wirsumi itsnaquiča, ančuca kuzquiz Yooz ancha cjuñcan.

¹⁷ Ančhucqui Cristuž partir žoñinacžhucča. Jalla nižtiquiztan čhjulu paacanami chiicanami, zuma kamañchiz kamz waquiziča. Nižaza čhjulu watanami Jesucristuž cjen Yooz Ejpžquin sparaquič cjican tjaaz waquiziča.

PORAPAT ZUMA KAMZ PUNTU

¹⁸ Maatakanaca, persun luctakanacž mantuquiz cjee. Jesucristo Jiliržquin kuzziz cjican, jalla nuž waquiziča.

¹⁹ Luctakanaca, persun maatakanacžtan zuma munaziñi cjee. Nižaza anaž persun maatakanaca chjaawj chjaawjwa.

²⁰ Maatinaca, persun maa ejpžquiz casa, čhjulu mantanami. Jalla nuž maa ejpž mantita casaquič niiqui, amiž cjen Jesucristo Jiliriqui cuntintuž cjequiča.

²¹ Ejpna, anaž persun maatinaca žawjwa zjicna, upa kuzni ana cjisjapa.

²² Piyunanaca, am persun patruna čhjulu mantanami caspanča. Anača cherankaz c'unchikaz tuczqui. Pero tjapa kuztan nižtajapa langz waquiziča. Yooz patruna cjuñžcu, zuma langz waquiziča. Anača langzqui ančuca patrunž kuz wali cjiskatzjapakaz.

²³ Čhjulu langzcanami tjapa kuztan langznaquiča, Yooz Patrunžtajapa langznaquiča, ana žoñžtajapakaz langznasača.

²⁴ Ančhucqui tuž zizza, Yooz Patrunžquiztan arajpach irinsa tanznaquiča. Ultimu Yooz Patrunaqui ančucaquiz pacaquiča. Nižaza ultimu ančhucqui Jesucristo Patrunžquiz sirwiča.

²⁵ Nižaza jakziltat ana wali paačhaja, jalla niiqui castictaž cjequiča niž ana wali paatiquiztan jama. Yoozqui ana žoñi illilla.

4

¹ Patrumanaca, ančhucqui persun piyunanacžtan zuma lijituma cjis-tanča. Ančhucqui tuž zizza, ančhuc zakazza Patrunchizqui. Jalla niiča arajpach Yoozqui.

² Tjapa criichinaca, ančhucqui mayizicanpan želaquiča. Nižaza Yoozquin mayizican ana tjatzna, Yoozquin sparaquiž cjisjapa.

³ Wejtnacaquiz zakaz mayizican yanapalla, wilta Yooz takunaca paljayñi ojklajzjapa. Cristuž puntuquiztan tuquita chjojta taku paljayz pecuča. Jalla nuž paljaytiquiztan wejrqui carsilquiz želuča.

⁴ Mayizican wejtquiz yanapalla, Cristuž puntu kjanapacha paljayzjapa, jaknužt wejrqui kjana paljayz waquizučhaja, jalla nii.

⁵ Ančhucqui ana criichinacžtan kamcan, walja zizñi zizñi ojklayaquiča. Chjulorat Cristuž puntu paljaychucažlaj niiqui, panž paljayaquiča, ana criichinacžquiz nonzkatzjapa.

⁶ Jalla nuž Yooz taku paljaycan zuma tawkžtan chiyaquiča. Jaknužt yacuqui tsjii lak'a čhjerquiz zuma saborchiz paačhaja, jalla nii irata ančuca zuma takunacaqui Cristuž puntunaca zuma saborchiztakaz paaquiča. Jalla nuž zuma takunacžtan paljaycan, ančhucqui zapa maynižquiz jaknužt kjaaz waquizičhaja, jalla niiqui zizaquiča.

ZERZ TAKUNACA

⁷ Jilanaca, cullaquinaca, učhum pecta Tíquico jilaqui tjapa wejt puntuquiztan ančucaquin quint'aquiča. Tiquicuqui wejtquiz ancha zuma yanapñipanča. Yoozquin tjurt'iñi kuzzizza. Nižaza wejtta chica Yooztajapa sirwichiča.

⁸ Wejt puntuquiztan quint'izjapa ančucaquin nii cuchanžcuča. Nižaza cuchanžcuča, ančuca kuzquiz zumpacha p'ekinčhayzjapa.

⁹ Niižtan chica Onésimo pecta jila cuchanžcuča. Onésimo jilaqui Yoozquin tjurt'iñi kuzzizakazza. Nižaza ančuca wajtchiz žoñiča. Jalla nii pucultanaqui tjapa tekz watchinaca quint'aquiča.

¹⁰ Aristarco jilaqui wejtta chica carsilquiz chawcta maziča. Niiqui ančucaquin tsaanžquiča. Nižaza Marcos jilaqui ančucaquin tsaanžquiča. Marcos jilaqui Barnabež famillžquiztanča. Tuquiqui wejrqui Marcos puntu ančucaquiz chiichinča. Marcos jilaqui ančucaquin tjonaquiz niiqui, ančhucqui zumaž risiwaquiča.

¹¹ Nižaza Jesusaqui ančucaquin tsaanžquiča. Jesusaqui Justo cjitazakazza. Niinacakazza judío criichinacquiztan wejtta chica Yooztajapa langžninacaqui, Yooz mantita kamañ puntu paljaycan. Ninacaqui wejtquiz ancha kuzziča.

¹² Nižaza Epafra jilaqui ančucaquin tsaanžquiča. Epafra jilaqui Jesucristužtajapa sirwiñiča. Jalla niiqui zakaz ančucaquiztanča. Jalla niiqui tjapa kuztan ančhucaltajapa Yoozquin mayiziñipanča, ančhucqui tjurt'ichi kuzziz cjisjapa, nižaza tjapa kuztan Yooz munañpa kamañ jaru kamzjapa.

¹³ Wejrqui Epafra puntuquiztan ticlaruča, niiqui ancha langziča ančhucaltajapami. Nižaza Laodicea wajtchiz criichinacžtajapami, nižaza Hierápolis wajtchiz criichinacžtajapami Epafra jilaqui ancha langziča.

¹⁴ Nižaza Lucas jilaqui Demas jilžtan ančucaquin tsaanžquiča. Lucas pecta jilaqui kullñi medicuča.

¹⁵ Laodicea wajtchiz criichi jilanacžquin tsaanžinalla. Nižaza Ninfas jilžquiz tsaanžinalla. Nižaza niiž kjuyquiz ajczñi criichinacžquiz tsaanžinalla.

¹⁶ Tjapa ančhucqui tii carta ližcu, Laodicea iclizquin apayžcaquiča, nekz liyajo. Wejrqui tsjii carta cjiŕchinča Laodicea criichi jilanacžquin. Ančhuczakaz nii carta liyaquiča.

¹⁷ Ančhucqui Arquipo jilžquiz chiižinaquiča, tuž cjan: “Jesucristo Jiliriqui am tsjii puestuquiz utchiča, nižquiz sirwizjapa. Nii Jesucristuž tjaata puestuquiz žejlcan, zuma cumplistanča”.

¹⁸ Wejr Pabluqui persun kjaržtan tii tsaanta letra cjiŕžcuča. Wejrqui carsilquiz želuča, jalla nii cjužzna. Yoozqui ančucaquiz zumaj yanapla. Jalla nužoj cjila. Amén.

PRIMERA CARTA DEL APOSTOL SAN PABLO A LOS TESALONICENSES

¹ Wejr Pabluqui, Silvanužtan, Timoteožtan, tii cartal cjiiržcuča ančhuc Tesalónica wajtchiz žoñinacžquin. Nii wajtquiz icliz žoñinacčhucča ančhucqui. Nižaza Yooz Ejpžtan Yooz Majčtan tsjii kuzzizčhucča. Jalla nižtiquiztan učhum Yooz Ejpžtan, nižaza učhum Jesucristo Jiliriztan ančhucaquiz yanapt'ila. Nižaza zuma cuntintu kuzziz walikaj kamkatla.

JESUCRISTUŽQUIN ANCHA KUZUZIZ ŽOÑINACA

² Wejrnacqui tjapa ančhucaž cjen tirapan Yoozquin sparaquič cjiwčha. Yoozquin mayizican ančhucaltajapa wiltan wiltan mayizuča.

³ Učhum Yooz Ejpžquin mayizican, cjuñznuča ančhucaž zuma Yooztajapa trabajtiquiztan. Ančhucqui Jesucristužquin kuzziz cjen Yooztajapa tjapa kuztan trabajčha. Nižaza ančhucqui zuma munaziñi kuzziz cjen, Yoozquin zuma sirwičha. Nižaza Jesucristo Jilirž tjonz tjuñi tjewzcan, zuma tjurt'iñi kuzzizčhucča. Jalla nuž ančhucaquin cjuñžcu Yooz Ejpžquin sparaquič cjiwčha.

⁴ Jilanaca, cullaquinaca, Yooziž pectanaca, Yoozqui ančhuc illzičha. Jalla nuž zizcu, wejrnacqui Yoozquin sparaquič cjiwčha.

⁵ Wejrnacqui ančhucaquin tjonžcu, liwriiñi Yooz taku paljaychinča. Anačha žoñž taku alajakaz paljaytaqui; Yooz takupančha paljaytaqui. Yooz Espiritu Santuž aztan paljaychinča. Nižaza werar Yooz tawkquiz tjapa kuz tjurt'ican, Yooz puntu paljaychinča. Nižaza ančhucatan kamcan jaknužt wejrnacqui kamchinžlaja, jalla nii zuma zizza ančhucqui.

⁶ Ančhuczi wejrnaca kamaña irata jalla nižta kamñi žoñi cjissinčhucča. Nižaza Jesucristo Jilirž kamañ irata kamñi žoñi cjissinčhucča. Nižaza ančhucqui wejrnacaž paljayta Yooz taku catoktiquiztan, ancha sufrichinčhucča. Walja sufris cjenami, Espiritu Santuqui ančhucaquiz cuntintu cjiskatchičha. Nižaza sufrisqui ančhucaquiz wejtnacaquiz iratazakaz watchičha.

⁷ Jalla nižtiquiztan ančhuca puntuquiztan zuma quintu ulanchičha tjapa criichi žoñinacžquin, Macedonia yokquin žejlñi criichi žoñinacžquinami nižaza Acaya yokquin žejlñi criichi žoñinacžquinami.

⁸ Ančhucaž cjen Yooz takuqui tjapa kjutñi paljaytačha. Anačha Macedonia yokquizkaz nižaza Acaya yokquizkaz paljaytaqui. Tjapa kjutñi paljaytačha. Nižaza jaknužt ančhucqui Yoozquin kuzziz cjissinčhucžlaja, jalla nii quintu tjapa žoñinacaqui zizza. Jaziqui wejrnacqui ančhuc puntuquiztan anaž iya quint'asačha.

⁹ Ninacapacha wejtnacaquiz quint'iñitačha jaknužt ančhucqui wejtnacaž paljayta Yooz taku catokchinčhucžlaja, jalla nii. Ančhucqui žoñiž paata yooznacquiztan zarakchinčhucča, werar žejtñi Yooz sirwizjapa.

¹⁰ Nižaza ančhucqui Yooz Majch arajpachquiztan tjonz tjuñi tjewža. Yoozqui niž Majch ticziquiztan jacatatskatchičha. Jalla nii Jesusaqui učhum casticunacquiztan liwriičičha. Jalla nuž quint'iñitačha ančhuca puntuquiztan.

2

PABLUZ YOOZ TAKU PALJAYÑI OJKTA

¹ Jilanaca, cullaquinaca, jalla tuž zizza. Wejrnacqui ana ina ančhucaquiz tjonzinčha.

² Ima ančhucaquiz tjoncan Filipos wajtquiz sufrichinča, nižaza wejrqui inartatača. Jalla nuž sufritaž cjenami Yoozqui wejrnaca yanapchiča, ana ekscan tjurt'iñi kuzziz Yooz zuma liwriiñi taku paljayajo. Jalla nuž paljaychinča, žoñinacaž wejtnacatan quintra ancha aptazanami.

³ Nižaza wejtnaca paljaytaqui anatača chekachuc, nižaza anatača ana zuma kuzquiztan, nižaza anatača ančhuc incallzjapa.

⁴ Yooz Ejpqui wejrnaca tantiichiča, walikazza. Jalla nižtiquiztan Yoozqui wejtnacaquiz niiž zuma taku cumpjiichiča. Jalla nii Yooz takupan paljayuča wejrnacqui. Anal paljayuča žoñinacž kuz wali cjeajo kasi. Antiz Yooz kuz wali cjeajo paljayuča. Yoozqui učumnaca kuz zizza, nižaza tantiichiča ultimu.

⁵ Ančhucqui tuž zizza, wejrnacqui anača zuma takunaca paljaychinča wejtnaca partiquiz luzkatzjapa, nižaza persunalta čhjulumi tanzjapa. Weraral chiyuča. Yoozakaz wejtnaca puntuquiztanaqui nii zizza.

⁶ Cristuqui wejrnac apostolunaca cuchanžquichiča. Jalla nižtiquiztan wejrnacqui ančhucaquiz mantiñi cjitasača. Pero ančhuc ana mantichinča, nižaza wejtnaca honora wayt'iziñi anal pecasuča, ančhucmi yekjanacami.

⁷ Antiz wejrnacqui ančhuc zuma cwitican žejlchinča, jaknužt tsjaa maatak žonqui persun wawa cwitassaja, jalla nuž.

⁸ Nižaza ančhuc ancha k'ayachtuča. Jalla nižtiquiztan ančhucaquiz Yooz zuma liwriiñi taku paljaychinča. Nižaza ančhucaltajapa čhjululu paazmi listuča wejrnacqui, ticz cjenami. Jalla nuž ančhuc pecñi cjišiča.

⁹ Jilanaca, cullaquinaca, weriž langžta cjuñzna. Majiñami weenami langzinča ochañcama, wejtnaca persun wira mantinsjapa, nižaza ančhucalta ana ch'ama cjeajo. Jalla nuž kamchinča liwriiñi Yooz taku paljaycan.

¹⁰ Nižaza ančhucatan zuma kamchinča. Yooz kuzcama kamchinča. Nižaza anaž jecmi wejtnaca quintra čhjul ujmi tjeezñi atasacha. Jalla nii ančhucqui zumpacha zizza. Yooz zakaz nii zizza.

¹¹ Ančhucmi zakaz zizza, jaknužt tsjii ejpqui niiž persun maati cwitassaja, jalla nižtapacha wejrnacqui ančhuc cwitassinča. Ančhuc kuzzinča, nižaza p'ekinchaychinča, nižaza chiižinčinča, ančhuc zuma kamajo.

¹² Jaknužt Yoozquin criichi žoñinacaqui zuma kamz waquizičaja, jalla nuž ančhucqui zuma kamz waquiziča. Yoozqui niižquin criichinaca utchiča niižtan chica mantizjapa, nižaza niižtan chica honorchiz cjisjapa. Jalla nižtiquiztan zuma kamz waquiziča.

¹³ Ančhucqui weriž paljayta Yooz taku nonzinčhucča, nižaza catokchinčhucča, tuž cjican: "Tii takuča ultim werar Yooz takuqui. Anača žoñž takukaz". Jalla nuž catoktiquiztan tii zuma Yooz takuqui ančhuca kuznaca tsjan tsjan zuma cjiskatča. Jalla nižtiquiztan tirapan Yoozquin sparaquič cjiwča.

¹⁴ Jilanaca, culluquinaca, ančhucqui walja sufriñchucča ančhuca persun wajtchiz žoñinacaž ana wali paañiž cjen. Jalla nižta irata sufrichiča Judea yokquiz žejlñi criichinacami. Werar Yooz icliz žoñinacaž cjen nižta sufrichiča. Nižaza persun wajtchiz žoñinacaž ana wali paañiž cjen, sufrichiča. Tsjiikaz ančhucaquizimi ninacžquizimi watchiča.

¹⁵ Nii Judea yokquiz žejlñi judionacaqui Jesús Jiliri conchiča. Nižaza niiž tuqui Yooz taku paljayñi žoñinaca conchiča. Nižaza wejrnacqui chjatkatchiča. Nižaza jalla nuž paažcu tjapa žoñinacž quintraž paača. Jalla nuž paatiquiztan Yoozqui ninacž quintra žawjča.

¹⁶ Wejrnacqui liwriiñi Yooz taku paljayz pecatuča ana judío žoñinacžquiz, ninaca liwriita cjeajo. Nii anawali paañi žoñinacazti wejrnac atajchiča.

Jalla nižtiquiztan ninacaqui juc'anti persun ujž yapkatča. Jalla nuž ujnaca yapkattiquiztan Yoozqui wiñayaž wali casticu tjonkataquiča ninacžquiz.

PABLUQUI WILTA TJONZ PECCHA

¹⁷ Jilanaca, cullaquinaca, tsjii kjažtapacha ančhucaquiztan ojkchinča. Jalla nekztan wejrnacqui ančhuc anchal cjuñznuča. Jalla nižtiquiztan ančhuc ancha cherpzal pecaytuča.

¹⁸ Nižaza ančhucaquin irantisquizpan pecaytuča. Wejrnacaž ojkz pecan, Satanasacqui wejrnac atajchiča. Wejrqui wiltan wiltan ojkz cjichintača. Jalla nuž ojkz pectaž cjen, Satanasacqui wejr atajchiča.

¹⁹ Jilanaca, cullaquinaca, Jesucristuqui tjonaquiča. Nekztan niž yujcquiziqui ančhucaž cjen cuntintul cjeeča. Ančhucaž cjen wejrnacqui tjewznača honora tanzjapa. Ančhucaž Yooz taku criichiž cjen, juc'antiž chipznača wejrnacqui.

²⁰ Chekapan ančhucqui wejtnacaquiz cuntintuž cjiskatča, nižaza wejrnac honorchiz cjiskatča.

3

¹ Jalla nuž ančhucaquiztan ojkžcu, ancha ančhuc cjuñchinča. Jalla nekztan Timoteo učum jila cuchanžquichinča, ančhuc chertzni. Parti wejrnaczi Atenas wajtquiz ecliz cjichinča.

² Timoteuqui Yoozquin sirwiñiča, Cristuž liwriiz puntu paljaycan. Jalla nižtiquiztan Timoteuqui cuchanžquichinča ančhuc juc'anti Yoozquin tjurt'iñi kuzziz cjeyajo. Nižaza ančhucaquiz zumpacha Yoozquin criizjapa p'ekinçayajo, cuchanžquichinča.

³ Nižaza Timoteuqui ančhucaquin tjonžquichiča, ančhuca kuz ana turwayta cjisjapa pruebanacaž watchiž cjenami. Ančhucpacha zizza criichinacaqui pruebanacaquiztan sufristanča, jalla nii.

⁴ Tuquiqui ančhucatan žejlcan, wejrnacqui nuž mazinchinča, učum criichinacžquiz pruebanacaž tjonaquiča, cjican. Jalla nižtapacha weriž chiita taku cumplissiča.

⁵ Jalla nuž ančhucaquiz pruebanacaž watan wejrqui quintu ana zizzi atchinča. Jalla nižtiquiztan ana iya awantichinča. Nekztan Timoteo cuchanžquichinča, ančhuca Yoozquin criichi kuz, jaknužt kamčhaja, jalla nii zizjapa. Pinsichinča, “Satanás diablut ančhuc tsjii kjutni cutiskatžcaa”, cjican pinsichinča. Ančhuc cutiskattasaž niiqui, wejtnaca obra inakaz cjitasača.

⁶ Tsjii kjaž majquiztan Timoteuqui quejpžquichiča Tesalónica wajtquiztan. Nižaza zuma quintunaca zjijcchiča tuž cjican: “Nii Tesalónica wajtchiz criichi žoñinacaqui ancha Yoozquin kuzzizpanča, nižaza zumaž munaziča. Nižaza ninacami učumnacž zumapanž cjuñkalča. Nižaza ninacaqui učumnacatan ancha zalz pecča, jaknužt učumqui ninacžtan ancha zalz pecčhaja, jalla nižtazakazza ninacaqui”. Jalla nuž cjican zuma quintunaca zjijcchiča ančhucaquiztan.

⁷ Jilanaca, cullaquinaca, wejrnac zakaz ancha sufrisnacami pruebanacami watuča. Jalla nuž cjenami nii ančhuca puntu zuma quint'itiquiztan wejtnaca kuzqui zuma cuntintutača. Ančhucaž Yoozquin tjapa kuzziz cjen, ancha cuntintutča.

⁸ Jaziqui zizzinča, ančhucqui Yoozquin tjurt'iñi kuzzizpanča. Jalla nuž zizcu wejrnacqui tsjii ew žeti tanžtažokazza.

⁹ Ančhucaž cjen Yoozquin ancha sparaquiž cjiwča. Nižaza ančhucaž cjen Yooz yujcquiz ancha cuntintuž wejrnacqui.

¹⁰ Nižaza majiñami weenami Yoozquin mayizuča ančucatan wejnacatan persunpacha wilta zalzjapa. Nekztan ančucaquiz tjaajznasača juc'ant zumpacha Yoozquin kuzziz cjisjapa. Ančuca kamaña čjulut pjaltičhaja, jalla nii tjaajnasacha.

¹¹ Jaziqui učum Yooz Ejpžtan nižaza Jesucristo Jiliržtan, jalla ninacaqui wejrnaca irpijaal cjiwča ančucaquiz wilta zalzjapa.

¹² Nižaza Jesucristo Jiliriqi ančucaquiz juc'anti zuma munaziñi kuzziz cjiskatla, porapatmi nižaza tjapa žoñinaczquizimi. Jaknužt wejrnac ančucatan zuma munazitučhaja, jalla nižta irata.

¹³ Jalla nuž zuma kamtiquiztan Yoozqui ančuca kuz juc'ant tjurt'iñi cjiskataquiča. Jalla nižtiquiztan ančuca kuzqui Yoozquinpanž cjequiča, Yooz Ejpž yujcquiziqui ana čjul ujchiz cjisjapa. Jalla nuž cjequiča učum Jesucristo Jilirž tjonz tjuñquiziqui. Jalla niiqui tjonaquiča niž partir žoñinacztanpacha.

4

LUCUTJIÑI ZUMA KAMZ WAQUIZICHA

¹ Jilanaca, cullaquinaca, jaknužt zuma kamz waquzičhaja Yooz cuntintu cjisjapa, jalla nuž tjaajinchinča. Nii zuma kamañ jaru kamiñčucča. Nižaza juc'anti niicama kamaquiča. Jalla niijapa ančucaquiz chiižinuča, nižaza rocuča, Jesucristo Jilirž cuntiquiztan.

² Tuquiqui ančucatan žejlcan, wejrnacqui Jesucristo Jilirž cuntiquiztan tjaajinchinča. Jalla nii tjaajintanaca ančucqui zizza.

³ Yooztajapapan zuma kamajo, jalla nižtaž kamñiž pecča Yoozqui. Jalla nuž kamcan, anača adulteriu paazqui, nižaza anača tsjii luctakaqui yekja maatakžquiz pinzizqui.

⁴ Nižaza Yooztajapa kamcan, tjapa criichi žoñiqui ziz waquzičhaja, jaknužt criichinacaqui persun tjunatan zalz waquzičhaja, nižaza zalžcu jaknužt zumapanž kamz waquzičhaja, jalla nii.

⁵ Ana Yoozta kamñi žoñinacazti persun tjunatan ana zuma kamča. Yekja maatakanaczquizpankaz pinsican kamñiča. Jalla nižta irata ančucqui anaž kamz waquzičhaja.

⁶ Anaž jec criichimi yekja jilž maataka kjutñi pinziz waquzičhaja. Nižaza yekja jilž maatakatan adulteriu paaz anaž waquzičhaja. Nižta paaquiz niiqui, jilž quintra uj paača. Jalla nuž ana zuma kamñinaca casticaquiča Yoozqui. Jalla nuž tuquiqui wejrnacqui ančucaquiz chiižinchinča.

⁷ Yoozqui učumnaca kjawziča niž partiquiz cjisjapa, nižaza zuma kamajo, ana yekja kjutñi cjičjeyajo.

⁸ Jalla nii tjaajintaqui anaž žoñž kuzquiztan tjonča, Yooz kuzquiztanpan tjonchiča. Jalla nižtiquiztan jequit nii tjaajinta taku ana pajčhaja, niiqui Yooz ana pajča. Yoozqui ančuca kuzquiz niž Espíritu Santo luzkatchiča ančuc zuma kamajo.

⁹ Tsjiilla wejr cjiwča, criichi jilanacžtan zuma munaziz puntuquiztan. Jalla nižta puntuquiztan Yoozqui ančucaquiz tjaajinchiča porapat zuma munazizjapa. Jalla nižtiquiztan wejrnacqui ančucaquiz nii puntuquiztan ana ancha cjičjrača.

¹⁰ Jalla nuž zuma munaziñčucča tjapa Macedonia yokquiz kamñi criichinacžtan. Jilanaca, cullaquinaca, wejrnacqui ančuc chiižinuča, ančuca kuz juc'anti munaziñi cjisla, jalla nuž cjiwča.

¹¹ Nižaza ančhucqui zuma llan kuzziz cjee. Yekja žoňž asuntuquiz anapan mitiz waquizičha. Pero persun kamaň wirquiz kuz tjaasa. Nižaza persun kjaržtan langznaquičha. Tuquiqui nuž ančhucaquiz mantichinčha.

¹² Jalla nuž ančhuc zuma langztiquiztan ana criichi žoňinacaqui ančhuc rispitaquičha. Nižaza ančhucaquizpacha ana čhjulumi pjaltaquičha.

JESUCRISTUQUI WILTA TJONAQUICHA

¹³ Jilanaca, cullaquinaca, wejrnacqui ančhucaquiz ticzi žoňinacž puntuquiztan tjaajinz pecučha, ana ancha llaquita cjejajo. Ana jacatatz wira tjewzňi žoňinacaqui llaquizičha tsjii ticzi cjenacqui. Ana nižta cjejajo, ančhucaquiz tjaajinz pecučha.

¹⁴ Učhumqui criichinčhumčha, Jesucristuqui ticziquiztan jacatatchičha, jalla nii. Nižaza criichinčhumčha, Yoozqui Jesucristužquin criichi ticzinaca jacatatskataquičha. Nižaza ninaca Jesucristužtan chica tjonkatta cjequičha.

¹⁵ Nižaza tii Jesucristo Jiliriz tjaajinta taku ančhucaquiz tjaachinčha. Jesucristo Jiliriz tjonz tjuňquiziqui primiraqui ticzi criichi jilanacaqui nižtan zalaquičha. Nekztan tii yokquiz žejtchi criichinacaqui tsewcchuc chjitzazakaz cjequičha, Jesucristužtan zalzjapa.

¹⁶ Učhum Jesucristo Jiliripacha tsewc arajpachquiztan chjijwžcaquičha. Nii orapacha criichinaca kjawznaquičha mantiňi joržtan. Nižaza tsjii pajk jilir arc anjilaqui kjawznaquičha. Nižaza Yooz trompeta tjawunznaquičha. Jalla nekztan Cristužquin ticzi criichinacaqui jacatatskattaž cjequičha.

¹⁷ Tii muntuquiz žejtchi criichinacž tuqui jacatatskattaž cjequičha. Nii ticzi criichinacž jacatatskattiquiztan parti criichinacaqui ninacžtan juntupacha chjitzazakaz cjequičha. Nekztan tsewcchuc tsjir taypiquiz Jesucristo Jiliržtan zalaquičha. Jalla nekztanaqui tjapa criichinacaqui tirapanž Jesucristo Jiliržtan wiňaya kamaquičha.

¹⁸ Jalla nii zizcu, nii takunacžtan porapat kuzasnaquičha.

5

¹ Jilanaca, cullaquinaca, čhjulatorat Jesucristuqui quejpžcačhaja, nižaza ima niž quejpžcan čhjulut watačhaja, jalla nii pizc puntuquiztan ančhucaquiz ana anchal cjičručha.

² Ančhucqui nii pizc puntu zumpacha zizza, Jesucristo Jiliričqui tiripintitž tjonžcaquičha. Žoňinacž ana čhjulu pinsita, tiripintit tsjii tjaňiqui luzza. Jalla nižtaž cjequičha Jesucristo Jiliriz tjonzqui.

³ Ana criichi žoňinacž “Walikal kamok” cjenpan, nižaza cuntintu želan, tiripintit Yoozqui ninacžquiz tsucnaquičha casticž tjuňžtan. Jaknužut tsjaa ic maatak žon tiripintit laaquičhaja majtsjapa, jalla nižtaž tiripintit ana criichi žoňinacaqui castictapanž cjequičha. Nii casticz tjuňquiztan ana atipa ataquičha.

⁴ Jilanaca, cullaquinaca, ana criichinacaqui zumchiquiz kamčha. Ančhuczi anaž zumchiquiz kamčha. Jalla nižtiquiztan Jesucristuž tjonzqui anaž ančhuc tsucnaquičha tsjii tjaňižtakaz.

⁵ Tjapa ančhucqui Yooz zuma kjaň jiczquiz kamiňchucčha, anaž zumchiquiz kamiňchucčha.

⁶ Jalla nižtiquiztan Jesucristo Jiliriz tjonz tjuňi ančhucqui listu tjaczi zuma kuzziz tjewznaquičha. Zuma kamcan, listupachaž tjewžna, ana tjažtažokaz. Ana criichi žoňinacaqui ana juyzu paačha Jesucristo tjonz tjuňi puntuquiztan. Ana nižta cjee. Jesucristuž tjonz tjuňi zuma listuž tjewžna, tjaži watsi kuzziztakaz. Nižaza zuma kamzjapa persun wira cwitasa.

⁷ Weenqui zoñinacaqui panž tjačha. Nižaza weenqui zoñinacaqui licčha, panž licčha. Jalla nuž paacan, ana iya čhjulumi pinsičha. Jalla nižtačha ana criichi zoñinacaqui. Jesucristuž tjonz puntuquiztan ana juyzu paačha.

⁸ Ančhucqui ana nižta cjee. Učhumnacaqui Yooz kjan jiczquiz kamiñchumčha. Jalla nižtiquiztan persun kuz zuma Yooz jiczquiz kamzjapa, cwitasa. Yoozquin tjapa kuztan cjee, Yooz ančhuc Satanasquiztan tsijsinajo. Nižaza criichi zoñinacžtan zuma munaziza. Nižaza ančhucqui liwriiz tjuñi zuma listuž tjewžnaquičha. Jalla nuž kaman armichiztakaz cjequičha. Jalla nižtiquiztan Satanasaqui ančhuc ana atipasačha.

⁹ Yoozqui učumnaca ana utchičha casticta cjisjapa. Pero Yoozqui učumnaca utchičha, zuma liwriita wira tanzjapa Jesucristo Jilirž cjenaqui.

¹⁰ Jesucristuqui učum laycu ticzičha, žejtchi criichinacami ticzi criichinacami nižtan chica cuntintu kamajo.

¹¹ Jalla nižtiquiztan porapat p'ekinchayrasaquičha, tjurt'iñi kuzziz cjisjapa. Nižaza porapat yanaparsaquičha, zuma kamañchiz kamzjapa. Anziqiu ančhucqui porapat yanapassa. Jalla nuž tirapan porapat yanaparsaquičha.

PABLUZ CHIZINTA TAKUNACA

¹² Jilanaca, cullaquinaca, ančhucatan Yooz taku paljayñi zoñinaca žejlčha. Jalla ninacžquiz rispitaquičha. Nižaza ančuca irpiñinacžquiz rispitaquičha. Nižaza ančucaquiz zuma tawkžtan chiižini zoñinacžquiz rispitaquičha. Yooz Jilirž uchtaž cjen nii zoñinacž mantuquiz žejlčha ančhucqui. Jalla ninacžquiz rispitaajo rocučha.

¹³ Ančhucqui tjapa nii zoñinacami ancha rispitaquičha ninacaž Yooztajapa langztiquiztan. Ninacžtan zuma munazaquičha. Nižaza ančhucqui porapat zumapanž kamaquičha.

¹⁴ Jilanaca, cullaquinaca, ančucaquiz chiižinžcučha, jayrazñi criichinacžquiz zumpacha trabajzjapa chiižinajo, nižaza ururñi kuzziz criichinaca tjup kuzziz cjejajo, nižaza llajllasñi kuzziz criichinaca tjurt'iñi kuzziz cjiskatajo. Nižaza tjapa criichinacžtanami pasinziz kuzziz cjee.

¹⁵ Tsjii zoñiqui ana wali paatan tsjiizuñiqui ana nižta ayni tjepunz waquizičha. Antiz zuma munaziz waquizičha porapatmi nižaza tjapa zoñinacžtanami.

¹⁶ Chjulu watanami cuntintuž cjee.

¹⁷ Yoozquin tirapanž mayiza.

¹⁸ Chjulu watanami Yoozquin sparaquičha cjee. Jalla nuž ančhucalta Yooz munčha ančhucqui Jesucristužquin kuz tjaachiž cjen.

¹⁹ Espíritu Santuž obra tjeeznan, ana nii ataja.

²⁰ Nižaza Yooz taku paljayñi zoñinaca ana iñara.

²¹ Antiz nii paljayñi zoñinacž taku zumpacha tantiya, werar Yooz taku ana werar Yooz taku, jalla nii. Zuma Yooz takuž cjenaqui, kuzquiz nii taku catokaquičha.

²² Ultimu ana werar Yooz taku cjequiž niiqui, nii taku ana catokaquičha. Chjul ujmi nižaza anawalinacami anapan paa.

²³ Učhum Yoozza cuntintu kuzziz cjiskatñiqui. Jalla nii učhum Yooz ančucaquiz niž kuzcamapankaj kamkatla. Nižaza Yoozqui ančuca kuzmi, animumi, janchi curpumi zumapaj cwitila ana tsjii uj cjejajo, Jesucristo Jilirž tjonzcama.

²⁴ Yoozqui ančhuc kjawzičha niž partiquiz cjisjapa. Yoozza niž taku panž cumpliñiqui.

²⁵ Jilanaca, cullaquinaca, oracionžtan yanapžcalla.

²⁶ Tjapa criichi jilanacžquiz zuma tsaanaquiča, jaknužt ančuca tsaanz cuzturumpi žejlčhaja, jalla nuž.

²⁷ Wejrqui ančucaquiz tjiinuča, tii carta tjapa criichi jilanacžquiz ližinaquiča, jalla nuž.

²⁸ Učhum Jesucristo Jiliriqiu ančucaquiz yanapt'ila. Nužukazza tii cartaqiu. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Wejrnacqui Pablužtan, Silvanužtan, Timoteužtan tii cartal cjiřzcuča ančhuc Tesalónica wajtchiz žoñinaczquin. Nii wajtquiz icliz žoñinaczcuča. Nižaza učhumča Yooz Ejpžquinami Jesucristo Jiliržquinami kuzzizqui.

² Jalla nižtiquiztan Yooz Ejpžtan nižaza Jesucristo Jiliržtan ančucaquiz zumaj yanapt'ila. Nižaza walikaj kamkatla. Nižaza zuma contento kuzziz cjiskatla.

CRIICHI ZOÑINACAQUI SUFRISTANCHA

³ Jilanaca, cullaquinaca, wejrnacqui ančucaž zuma kamtiquiztan tirapan Yoozquin sparaquič jiwča. Jalla nužupan chiiz waquizuča. Ančhucqui juc'anti juc'anti Yoozquin kuzziz cjissa, nižaza juc'anti juc'anti porapat zuma munaziñi kuzziz cjissa.

⁴ Nižaza ančucaž zuma kamtiquiztan wejrnacqui ančuca honora parluča Yooz iclizanacquinami. Ančhucqui walja sufricanami, nižaza žoñinacz chjaawjkatta cjenami awantichinčuča. Ančhucča pasinziz kuztan Yoozquin tira tjurt'iñčučqui. Nižaza Yoozquinča tjapa kuztan tira žejlzqui.

⁵ Jaziqui ančhucqui Yooz partirquiz cjen sufriskattača. Jalla nižta sufritaqui kjanapacha tjeeža, Yooz Ejpqui ančhucjapa tantiichiča, ančhucqui Yooz arajpach wajtquin luzkatz waquiziča, jalla nii.

⁶ Yoozqui nii ančucaquiz chjaawjkatñi žoñinaca legali casticaquiča. Anziqui ninacaqui ančucaquiz sufriskatča. Ultimquiziqui Yoozqui ninaczquiz sufriskataquiča.

⁷ Nižaza ančucaž sufritiqiztan Yoozqui ančucaquiz jeejskataquiča Jesucristo Jilirž tjonz tjuñquiziqui. Nižaza wejtnacaquiz jeejskataquiča. Tsewc arajpachquiztan Jesucristuqui niž walja azziz anjilanacztan jeczcaquiča.

⁸ Tsji ujtakaz kjakaquiča. Jalla nii uj irata ana Yooz pajñinacz quintra cjequiča. Ninacaqui castictaž cjequiča. Nižaza jakziltat učhum Jesucristo Jilirž zuma liwriñi taku ana cazzit cječhaja, jalla ninacami castictaž cjequiča.

⁹ Jalla tjapa nii casticta žoñinacami wiñayaž sufraquiča. Yooz yujcquiztanaqui wiñayaž chjatkattaž cjequiča. Arajpachquin Yoozqui niž zuma azi tjeeznaquiča. Pero nii casticta žoñinacaqui Yooz zumanaca anaž cher-aquiča.

¹⁰ Jalla nii Jesucristo Jilirž tjonz tjuñquiziqui, Yooz partir žoñinacami nižquin honora waytazaquiča. Ančhucqui wejrnacaz paljayta Yooz taku catokchinčuča. Nižaza Jesucristuž tjonz cheržcu, Yooz taku catokchinacaqui ispantichi cjequiča. Pero contintuž cjequiča.

¹¹ Wejrnacqui tirapan Yoozquin mayizuča ančhucaltajapa, ančhuc ultimu liwriita cjeyajo. Yoozqui ančucaquiz kjawziča nižta ultimu liwriita cjeyajo. Jaziqui Yoozqui ančucaquiz liwriita cjis waquizkataquiča. Jalla nuž mayizuča. Yoozqui niž aztan ančucaž zuma pinsitanacami cumplista cjiskataquiča. Jalla nuž zakaz mayizuča. Nižaza Yoozquin kuzziz cjen, ančhucqui zuma obranaca paača. Yoozqui niž aztan tjapa ančuca zuma obranaca cumplista cjiskataquiča. Jalla nuž zakaz mayizuča.

¹² Jalla nekztanaqui ančucaž zuma kamchiž cjen Jesucristo Jiliriqi honorchiz cjequiča. Nižaza Jesucristuž cjen ančhucqui honorchiz zakaz

cjequiča. Tjapa nižtanaca wataquiča učhum Yooz Ejpžtan Jesucristo Jiliržtan učhumnacaquiz okzñiž cjen, nižaza yanapchiž cjen.

2

ANA WALI PAAÑI ZOÑŽ PUNTU

¹ Jilanaca, cullaquinaca, učhum Jesucristo Jilirž tjonanaqui, učhumqui juntjapznaquiča, nižtan zalzjapa. Jalla nii puntuquiztan ančhucaquiz intintiskatz pecuča.

² Yekjap žoñinacaqui ančhucaquiz incallzkatz pecča, “Jesucristuqui tjonchikalča” cjican. Jalla nižta chiita taku nonžcu, anaž ančhucqui tsuca. Nii takunaca ana juyzu paa. Nižaza anaž kuz turwayskata. Ninacaqui cjiča, “Yoozqui Pablužquiz nii taku tjaachiquiča. Nekztan Pablupacha wejtquiz quint'ichiča, ‘Jesucristuqui tjonchikalča’, jalla nii. Nižaza Pabluqui nuž tsjii cartiquiz cjičičiča”. Jalla nuž cjiča nii toscara chiiñi žoñinacaqui. Jalla nižta chiita taku nonžcu, ana criyaquiča.

³ Ana jaknužumi nii Jesucristuž tjonz puntuquiztanami incallta cjee. Ima Jesucristuž tjonan, walja žoñinacaqui juc'ant Yooz quintra cjistanča. Nižaza tsjii juc'ant ana wal žoñiqui jeczcaquiča. Wiruñiqui nii žoñiqui wiñaya casticta cjequiča.

⁴ Jalla niiqui čjul yooznacquiztanami juc'ant tucquin cjis pecaquiča. Nižaza ultim werar Yooz quintrami, nižaza žoñiž paata yooz quintrami aptasaquiča. Nižaza tjapa tii muntuquiz amtitanaca quintra aptasaquiča. Nižaza nii ana wal žoñiqui, “Wejrtča chekan Yooztqui” cjequiča. Werar Yooz timpluquinpankaz julznaquiča Yooztakaz.

⁵ Ančhucatan žejlcan, jalla nižtapan paljaychinča. ¿Ana cjuñž ančhucjo?

⁶ Tii zakaz nonžna ančhucqui. Nii juc'ant ana wali paañiqui atajtača. Wiruñiqui Yooziž pinsita timpu niiqui parizaquiča.

⁷ Anziqui ana wali paañinaca žejlča. Nižaza ana walinaca paača. Nii ana walinaca paañinaca atajtača, čjul ana walimi ana paajo. Wiruñiqui nii atajñiqui ana iya atajaquiča. Nekztan čjul ana walimi paata cjesača.

⁸ Jalla nii ana atajanaqui nekztan nii juc'ant ana wali paañiqui jeczcaquiča. Nekztanaqui Jesucristo Jiliriqui tjonžcu, persun tawkžtan nii ana wali paañi conaquiča. Nižaza walja aztan tjonžcu nii ana wali paañi liwj akznaquiča Jesucristo Jiliriqui.

⁹ Satanás cjita diabluqui nii juc'ant ana wali paañi žoñi jecskataquiča. Nižaza Satanás aztan ispanchuc milajrunacami siñalanacami paaquiča žoñinaczquiz incallzjapa.

¹⁰ Niiž ana wal kuzcama kamcan tjapaman milajrunaca paaquiča, nižaza tjapaman takunaca parlaquiča, incallzjapa. Jalla nuž ojklaycan incallaquiča infiernuquin ojkn'i žoñinaczquiz. Jalla nii žoñinacaqui Yooz werar taku ana catokz pecchiča, liwriita cjisjapaqui.

¹¹ Jalla nižtiquiztan Yoozqui ninaca jakjurpaychiča, incallta cjeyajo werar Yooz taku ana criiñiž cjen. Nižaza nii ana liwriita žoñinacaqui toscar takupan criyaquiča.

¹² Ninacača ana wali paatanacapankaz jurtasñiqui, jalla nižtiquiztan tjapa nii Yooz taku ana criichi žoñinacaqui casticaž cjequiča.

ILLZTA ZOÑINACAQUI LIWRIITA CJEQUICHA

¹³ Yooz k'ayi jilanaca, cullaquinaca, wejrnacqui ančhucaž cjen tirapan Yoozquin sparaquiž cjistanča. Tuqui timpuquiztanpacha Yoozqui ančhuc illzipanča liwriita cjisjapa. Nižaza ultimupan liwriitaž cjequiča Espiritu Santuž cjen, nižaza werar taku criichiž cjen. Nii Espiritu Santuqui

ančucaquiz ancha zuma yanapča, ančuca kuz ultimu zumapankaz cjisjapa.

¹⁴ Jalla niijapa Yoozqui ančhuc kjawziča. Wejrnacaž zuma liwriiñi Yooz taku paljaytaž cjen, Yoozqui ančhuc kjawziča, Jesucristo Jiliržtan ančhucqui zuma honorchiz cjisjapa.

¹⁵ Jaziqui jilanaca, cullaquinaca, tirapan tjurt'iñi kuzziz cjee. Wejrnacqui ančucaquiz tjaajinchinča, chiita takunacžtanami nižaza cjiirta takunacžtanami. Jalla nii tjaajinta takunaca anapan tjazna. Nii tjaajinta jaru panž kama.

¹⁶ Učhum Yooz Ejpqui učumnaca okziča, nižaza niiča wiñayjapa cuntintu cjiskatñi. Nižaza učumnaca okžcan, ančucaquiz tjewskatča, arajpachquin niižtanpan zuma kamz, jalla nii.

¹⁷ Yooz Ejpžtan učhum Jesucristo Jiliržtan, jalla ninacapacha ančuca kuznaca p'ekinchayaquiča. Nižaza ninacacqui ančucaquiz juc'ant tjurt'iñi kuzziz cjiskataquiča tjpaman walinaca paajo, nižaza tjpaman wali takunaca parlajo. Jalla nuž ančhucaltajapa mayizuča.

3

¹ Jilanaca, cullaquinaca, tiicamakal chiižinača. Wejtnacalta Yoozquin mayiza, Yooz taku tjapa kjutñi paljayajo, nižaza mayiza nii paljayta Yooz taku tjapa kuztan catokta cjeyajo. Jalla nižta ančhucqui Yooz taku catokchinčucča.

² Nižaza Yoozquin mayiza, ana wal kuzziz žoñinacžquiztan wejrnac tsijsinajo. Yekjap žoñinacacqui anača Yoozquin kuzziz.

³ Jesucristo Jiliriča cumpliñiqui. Jalla nižtiquiztan niiqui ančuca tjurt'iñi kuzziz chejlnaquiča, nižaza anawalinacquiztanž zumapanž cwitaquiča.

⁴ Ančucaž Yooz Jiliržquin kuzziz cjen, wejrnacqui tantiichinča, ančhucqui wejrnacaž mantitacama kamiñchucča, nižaza niicama tira kamcan želaquiča, jalla nii. Jalla nužupan cjequiča.

⁵ Jesucristo Jiliričiqui ančuca kuz irpila, Yooz irata jilanacžtan zuma munazajo, nižaza Jesucristuž irata pasinziz kuzziz cjeyajo. Jalla nuž mayizuča.

ANA JAYRAZCU LANGZ WAQUIZICHA

⁶ Jilanaca, cullaquinaca, Jesucristo Jilirž tjuuquiz ančucaquiz mantuča. Jayrazñi jilanacžquiztan zarakaquiča. Jalla ninacacqui wejrnacaž tjaajintacama ana kamča.

⁷ Jaknužt wejrnacqui kamučhaja, jalla niicama ančhucalaqui kamsa. Wejtnacaž kamaña yatekaza. Wejrnacqui ančhucatan žejlcan walja langzinča.

⁸ Nižaza kjayžcu t'antami čherimi lujlchinča. Majiñami weenami walja langzniñča ochañcama, ančhucalta ana ch'ama cjeyajo.

⁹ Ančhucaltan žejlcanaqui wejrnacqui ančucaquiztan čheri mayiñ cjichuca cjitasacha. Ultimquiz anal maychinča. Antiz langzinča, tsjii kamaña tjeezjapa. Jalla niwjctanaqui tsjii zuma kamaña tjeez pecchinča, ančhucqui nii kamañquiz jaru kamzjapa. Jakziltat lujlz pecchaja, langz waquiziča.

¹⁰ Ančhucatan žejlcan, chiižinchinča. “Jakziltat ana langz pecchaja, jalla niiqui anaž lujlz waquiziča yejkž čherquiztan”.

¹¹ Pero tsjii quintu nonzinča. Yekjap ančucaquiztan ana langžcu kamiñiquiča. Ana langžcu, ana persun luraña paažcu, jayrazcan yekja žoñž asuntunacquiz mitisñiquiča.

¹² Jalla nižta žejlñi žoñinacžquiz mantuča ana nižta cjisjapa. Učhum Jesucristo Jilirž tjuuquiz ninacžquiz chiižinuča, zuma kuzziz nižaza ana mitisñi kuzziz langznaquiča persun wira mantinzjapa, jalla nii.

¹³ Jilanaca, cullaquinaca, zuma paazjapa anaž oçhlla.

¹⁴ Jakziltat tii weriž cartiquiz cjiirta taku anapanž catokz pecçhaja, jalla nii zumpacha cheraquiçha, jecçhalaj nii. Nižta žoñžquinaqui anapançha tjonzqui, nižaza anapançha nižtan ojklayzqui, nii žoñipacha azajo niž anawal kamañquiztan.

¹⁵ Anaza nižjapa quintra cjee, antiz nii criichi jilžquiz zuma tawkžtan chiižina.

¹⁶ Jesucristo Jiliriçha cuntintu kuzziz cjiskatñiqui. Jalla nii zakaz ançhuca kuz walikaj cjiskatla zapurumi nižaza çhjulu cjenami. Nižaza Jesucristo Jiliriçqui ançhucatan chicapachaj kamla.

¹⁷ Wejrçqui Pablutçha. Anziçqui tii ançhucaquin tsaanz letranaca persun kjaržtan cjiiržcuçha. Jalla nužupan zapa cartiquiz wejt firmapan firmuçha.

¹⁸ Uçhum Jesucristo Jiliriçqui tjapa ançhucaquiz zumaj yanapla. Nužukazza. Amén.

PRIMERA CARTA DEL APOSTOL SAN PABLO A TIMOTEO

¹ Wejrtča Pablutqui. Timoteo jila, amquin tii cartal cjiiržcuča. Jesucristuž illzta apostultča wejrqui. Jalla nii apóstol puestuquin učum Liwriiñi Yooz Ejpqui Jesucristo Jiliržtanpacha wejr utchiča. Jesucristo Jiliriž tjonz tjuñi tjewža učumqui.

² Timoteo jila, amquin tii cartal cjiiržcuča. Weriž Yooz taku paljaytaž cjen amqui tjapa kuztan Yoozquin criichamča. Jaziqui wejt maati cuntamča. Amča lijitum criichi žoñiqui. Yooz Ejpžtan učum Jesucristo Jiliržtan amquiz zumaj yanapla, nižaza amquiz okzla, nižaza walikaj kamkatla.

ANA WALI TJAAJIÑINACA TJONAQUICHA

³ Tuquiqui ima Macedonia yokquin ojkan wejrqui amquiz rocchinča, Efeso wajtquin želajo. Anziqui wilta rocuča nicju tiraka želajo. Jalla nicju žejlcan, amqui tsjii žoñinacžquiz chiižinz waquiziča. Jalla ninacžquiz amqui mantaquiča, Yooz taku ana iya tsjii kjutñi tjaajnajo.

⁴ Nižaza mantaquiča žoñiž pinsita quintunacquizimi ana kuz tjaajo. Nižaza tuquita atchi ejpnacž tjuunac puntuquizimi anapanča nijcchucqui kuz tjaazqui. Jalla nuž amqui mantaquiča. Jalla nižta parlanacaqui panž inakazza, kuznaca turwayskatñi alajača. Nižta parlanacaqui anapanž učumnacaquiz yanapča, Yooziž tjaata kamañquiz juc'ant zuma kamajo. Yooz kamañquiz kamcan, Yoozquin kuzziz cjicjiñi, jalla niž walča.

⁵ Jalla nuž wejrqui mantuča, criichi žoñinacaž porapat zuma munazajo. Zuma kuzzizpan, nižaza ana čjul ujmi cjuñžcu, zuma munaziz waquiziča. Nižaza tjapa kuztan Yoozquin criican, jalla nižta kuzziz žoñinacaqui zuma munaziz waquiziča.

⁶ Jalla nižta zuma kamañquiztan tsjii žoñinacaqui chekachuc ojkiča. Jaziqui parleeka parlis pecñiča, ana čjulquiz waquiziñi.

⁷ Nižaza walja zizñi Moisés lii tjaajiñi cjis pecča. Ninacazti tjaajinžcupacha, persuna chiita ana intintassa. Nižaza “Tužupanča werar razunaqui” cjiscupacha, ana panž niž persuna tjaajintaqui intintazasača.

⁸ Yooziž Moisesquiz tjaata liinacaqui zumača, Yooz kuz jaru lijituma tjaajintaž niiqui.

⁹ Nižaza lii puntuqui tužuča: Moisés liinacaqui anatača ut'ayta zuma kamñi žoñinacžtajapa. Antiz ana zuma kamñi žoñinacžtajapa ut'aytatača. Zuma paaznaca ana juyzu paañi žoñinacžta, nižaza Yooz kuzcama ana kamñi žoñinacžta, nižaza ana Yooz sirwiñinacžta, nižaza uj paañinacžta, nižaza Yooz kamañ jicz ana pecñinacžta, nižaza ana Yooz rispitiñinacžta, nižaza persun maa ejp conñinacžta, nižaza žoñi conñinacžta,

¹⁰ nižaza adulteriuquiz ojklayñi žoñinacžta, nižaza luctakpora ana wali paasñinacžta, nižaza žoñi tanñinacžta, nižaza toscara chiiñinacžta, nižaza toscar juramentužtan chiiñinacžta, nižaza tjapa zuma tjaajintanacž quintr paañinacžta, jalla ninacžta ut'aytatača Moisés liinacaqui.

¹¹ Zuma tjaajintanacaqui zuma liwriiñi Yooz tawk jaruča. Yooz takuqui azzizza, žoñinaca liwriizjapa. Walja zuma Yoozqui wejtquiz nii liwriiñi taku zizkatchiča, nižaza wejtquiz cumpjiichiča, žoñinacžquiz paljayajo.

JESUCRISTUQUI PABLUZQUIZ ANCHA OKZICHA

¹² Yooz taku paljayajo, Jesucristo JiliriQUI wejtquiz yanapchiča. Jalla nižtiquiztan Jesucristužquin sparaquiz cjiwča. Jesucristuqui wejr

cumpliñipan cherziča. Jalla nižtiquiztan apóstol puestuquiz wejr utchiča nii sirwajo.

¹³ Tuquiqui wejrqui Jesucristuž quintra chiiñtača, nižaza niž quintra iñariñtača. Nižaza Jesucristužquin criichi žoñinacž quintra payiñtača. Jalla nuž paanami nižaza chiyanami, Yoozqui wejtquiz okziča. Ima Jesucristužquin criican, jalla nuž ana wali ojklaychintača ana ultim werara zizcu. Jalla nižtiquiztan Yoozqui wejtquiz ancha okziča.

¹⁴ Učhum Yooz JiliriQUI wejtquiz walja zuma okziča. Jaziqui Jesucristuž cjen, Yoozquin tjapa kuztan cjissinča wejrqui, nižaza Yooztan ancha munaziñi kuzziz cjissinča.

¹⁵ Jesucristuqui tii muntuquiz tjonchiča, ujchiz žoñinaca liwriyi. Jalla nii takuča ultim razunaqui. Nižaza tjappachaqui nii taku catokz waquiziča. Tjapa ujchiz žoñinacžquiztan wejrtča juc'ant ujchiztqui cjiwča.

¹⁶ Jalla nuž cjenami, Yoozqui wejr zumapan okziča, Jesucristuž zuma pasinziz kuz tjeezjapa. Weriž cjen, tjappacha zizaquiča, Jesucristo ancha zuma pasinziz kuzziz, jalla nii. Tjapa ujchiz žoñinacžjapa Jesucristuqui zuma pasinziz kuzzizza. Cristužquin criyaquiž niiqui, čjul žoñimi Yooztan wiñaya kamaquiča.

¹⁷ Jalla nižtiquiztan tjapa mantiñi Yooz honoraž wiñayjapa waytitaj cjila. Yoozqui wiñaya žejlča, nižaza ana ticznasača, žoñž čhjujquiz anaž cherta cjesača. Tsjiillapanikazza Yoozqui, nižaza niipanča juc'ant tjappacha zizñiqui. Jalla nii Yooz honora wiñay wiñaya tirapan waytitaj cjila. Jalla nužoj cjila. Amén.

¹⁸ Timoteo jila, wejt maati cuntamča. Zuma zultatužtakaz Yoozquin tjurt'iñi kuzziz cjee. Nižaza Satanás partiranacž quintra cjee. Tuquiqui tsji criichi jilanacaqui am puntuquiztan Yooziž tjaata taku chiichiča. Nii takunaca cjuñzna. Jalla nii tawk jaru amqui Yooz sirwiz puestuquiz utžtača. Jaziqui amquin tii chiižinuča.

¹⁹ Tirapan Yoozquin tjapa kuzziz cjee, nižaza zumapan kama. Zuma kamcan, am kuzquiz ana ujnaca cjuñznaquiča. Yekjapaqui persun kuzquiz ujnaca cjuñzcu, ana juyzu paachiča, nii ujquiztan ana jaytichiča. Jalla nižtiquiztan ninacaqui ana uj tantiyasñi kuzziz cjissiča, nekztan Yooz kamañ jiczquiztan zarakchiča.

²⁰ Jalla nižta paachiča Himeneužtan nižaza Alejandružtan. Jalla ninaca Satanás kjarquiž intirjichinča, ana Yooz quintra iya chii zizajo.

2

YOOZQUIN MAYIZIZ PUNTU

¹ Tsjižtan cjiwča. Primeraqui chiižinžcuča jalla tuž: Tjapa žoñinacžta Yoozquin mayizaquiča, nižaza zuma kuztan Yooztan parlaquiča, nižaza tjapa žoñinacžtajapa Yoozquiztan roct'ižinaquiča, nižaza Yoozquin sparaquiž cjequiča. Jalla nuž mayiziz waquiziča tjapa žoñinacžtami,

² nižaza tjapa pajk mantiñi jilirinacžtami, nižaza tjapa jilirinacžtami. Jalla nuž mayiziz waquiziča, walikaz kamajo. Jalla nuž kamcan, Yoozquin sirwiñi kuzziz cjee, nižaza nižta kuzziz kamcan jilirinacžquiz rispitiñi kuzziz cjee.

³ Jalla nižta kamaquiž niiqui, walikazza. Nižaza jalla nižta kamz cjen, učhum Liwriiñi Yoozqui cuntintuž cjequiča.

⁴ Učhum Liwriiñi Yoozqui tjapa žoñinaca liwriita cjis, jalla nii pecča. Nižaza tjapa žoñinaca werar taku pajñi cjis, jalla nii zakaz pecča.

⁵ Tsjii Yoozpanikaz žejlča. Nižaza žoñinacaltajapa tsjii Yoozquiz pjalt'iziñi žejlča. Jalla niičha Jesucristuqui. Učhum irat žoñi cjiscu,

⁶ tjapa tii muntuquiz žejlñi žoñinacž laycu ticziča. Jalla nuž ticžcu ninacž ujquiztan pacchiča. Yooz pinsita timpu tjonžcu, jalla nekztan nii zuma liwriiñi quintuqui žoñinacžquiz paljaytatača.

⁷ Jalla nii Jesucristuž žoñinacž laycu ticzi quintu wejrzakaz paljayuča. Nižta paljayajo, Yoozqui wejr apóstol puestuquiz utchiča. Wejr utchiča werar liwriiñi Yooz taku tjaajnajo ana judío žoñinacžquin. Ninacžquin Yooz taku paljayiñča, ninaca Jesucristužquin kuzziz cjejajo. Wejrqui Jesucristužquin criichiž cjen weraral chiyuča. Ana toscaral chiyuča.

⁸ Tjapa kjutñi žoñinacaqui Yoozquin mayiziñi cjičhaj cjiwča. Jalla niil pecuča. Zuma kuzziz, nižaza ana žawjchi kuzziz, nižaza ana ch'aazñi kuzziz, nižaza zuma kuztan kjara waytizcu, jalla nuž mayiziñi cjičhaj cjiwča.

MAATAKZ PUNTU

⁹ Nižaza maatakanacami zuma kuzziz cjispanča. Zuma zquitinaca anaž juc'anti cujtzni cjičhaj cjiwča. Anača iziwiri maatakažtakaz cujtzqui. Nižaza anača ricachužtakaz cujtzqui. Anaž ancha ist'asaquiča. Nižaza maatakanacami anača persun ach charquiz ancha quitsnacchiz cjequiča. Nižaza anaž ancha čjul alajanacchiz cjequiča. Nižaza anaž ancha zquitinaca cujt cutaquiča. Jalla nižta zquitinacquizimi nižaza cusasanacquizimi ana kuz tjaa.

¹⁰ Antiz zuma kamzquin kuz tjaa. Zuma kamz waquiziča Yoozquin kuzziz criichi maatakanacami.

¹¹ Nižaza maatakanacami ch'uju žejlcan tjaajinta takunaca catokspanča, ana čjulu chiizcu.

¹² Nižaza žoñinaca cheran maatakanacami luctakanacžquiz anaž tjaajinz waquiziča; nižaza anaž mantiz waquiziča. Nižaza maatakanacžlaqui ch'uju žejlcan luctakanacž takunaca nonspanča.

¹³ ¿Kjažtiquiztan nižta cjesajo, maatakanacž puntuquiztanajo? Jalla tužuča niiqui. Tuquiqui Yoozqui Adán paachiča. Nekztan Eva paachiča.

¹⁴ Nižaza Adanžquiz anatača incallta. Antiz Evaquiztača incallta. Incallskattiquiztan Evaqui ujquiz tjojtsinča.

¹⁵ Maatakanacami maatakž kamañquiz kamz waquiziča, maatinaca majtcan. Nižaza Yoozquin kuzziz, nižaza zuma munaziñi kuzziz, nižaza ana ujchiz zuma kamañ kuzziz, nižaza humilde kuzziz, jalla nižta kuzzizpan kamaquiz niiqui, liwriita cjequiča maatakanacami.

3

ICLIZ JILIRZ PUNTU

¹ Jakziltat icliz jilirž puestuquiz luz pecčhaja, jalla niiqui zuma Yooztajapa langz pecñiča niiqui. Jalla nii takuqui ultim werarača.

² Jalla nižtiquiztan jakziltat icliz jilirž puestuquiz luzaja, jalla niiqui zuma kamañchiz žoñi cjispanča. Jalla nižtiquiztan žoñinacaqui niž puntu cjiñiča, “Zuma žoñipancha, ana ujchiz” cjicanaqui. Niiqui tsjaa tjunchizpanikaz cjispanča. Nižaza ewjazñi kuzziz cjispanča. Nižaza zumapan kamñi kuzziz cjispanča. Nižaza zuma kamtiquiztan rispittaž cjispanča. Nižaza tjonžñi žoñinacžquiz kjawžñi kuzziz cjispanča. Nižaza zuma tjaajiñiz kuzziz cjispanča.

³ Nižaza anapan licni kuzziz cjispanča. Nižaza ana kichjasni kuzziz cjispanča, antiz pasinziz kuzzizpan cjispanča. Nižaza anapan ch'aazni kuzziz cjispanča. Nižaza paaz pecni kuzziz anapan cjispanča.

⁴ Nižaza niž kjuychiz žejlñi žoñinaca zuma irpiñi cjispanča. Nižaza niž maatinacami zuma cazni nižaza walja rispitiñi, jalla nižta kuzziz cjispanča.

⁵ Tsjii icliz jiliriqiu niž persun kjuy žoñinaca ana zuma irpiñi atchucažlaj niiqui, jalla nižtiqiztan, ¿jaknužt Yooz icliz žoñinaca zuma irpasajo?

⁶ Nižaza tsjii icliz jiliriqiu anaž uzca criichi žoñi cjesača. Uzca criichi cjesaž niiqui, mitarazi kuzziz cjisnasača, nekztanaqui ujquiz tjojtnasača. Nižaza jaknužt diabluqui niž ujquiztan casticta cječhaja jalla nižta irata ni žoñiqui uj paatiquiztan casticta cjequiča.

⁷ Nižaza icliz jilirinacaqui tjapa žoñinaczquiz rispittaž cjispanča, criichi žoñinacami, ana criichi žoñinacami. Ana criichi žoñinacaqui nižquiz ana rispitaquiž niiqui, juc'anti nižquin ujnacaž tjojtnasača. Jalla nižtiqiztan diabluqui ni žoñžquiz ujquiz tjojtskatasasača.

⁸ Jalla nižta zuma kamañchiz zakaz cjispanča iclizquiz yanapni žoñinacaqui. Jalla ninacaqui zuma rispitta kamañchiz cjispanča. Nižaza ninacz chiita taku cumpliñi kuzziz cjispanča. Nižaza anapan licni kuzziz cjispanča. Nižaza paaz pecni kuzziz anapan cjispanča.

⁹ Tuquiqui Jesucristuž puntumi nižaza nižquin kuzziz puntumi ana tjapa ziztatača. Anziqui kjanacama paljaytača. Nii Jesucristuž puntu zuma zizni kuzziz cjispanča. Nii iclizquiz yanapni žoñinacaqui ana uj paañi kuzziz cjispanča.

¹⁰ Tsjii žoñiqui iclizquiz yanapz puestuquiz luzasaž niiqui, primeraqui niž persun kamaña zumpacha tantiitaž cjispanča. Nekztan zuma kamañchiz cjequiž niiqui, iclizquiz yanapz puestuquiz luzasača.

¹¹ Jalla nižta zuma kamañchiz cjispanča iclizquiz yanapni maatakanacami. Nii maatakanacami walja rispitta kamañchiz cjispanča. Nižaza anapan ana wal quintu joojooñi kuzziz cjispanča. Nižaza ewjazni kuzziz cjispanča. Nižaza tjapa cumpliñi kuzziz cjispanča.

¹² Nižaza iclizquiz yanapni žoñinacaqui tsjaa tjunchiz alajakaz cjispanča. Nižaza niž persun maatinacami kjuy žoñinacami zumapanž irpiñi cjispanča.

¹³ Jakziltat iclizquiz yanapz puestuquiz zuma cumplačhaja, jalla niiqui zuma honorchiz cjequiča, nižaza juc'ant tjup kuzziz cjisnaquiča, Jesucristužquin criiz puntuquiztan paljayzjapa.

¹⁴⁻¹⁵ Wajilla wejrqui amquin ojcz pecuča. Pero anat uri tjonz atučhani. Jalla nižtiqiztan tii takunaca amquin cjižžcuča. Tii takunacaž cjen amqui zizaquiča, jaknužt Yoozquin criichi žoñinacaqui parti Yooz maatinacztan kamz waquizičhaja, jalla nii. Yooz maatinacača werar žejtñi Yooz iclizaqui. Yooz icliz žoñinacaqui werar Yooz tawkuizimi tjurt'iñi kuzzizpanča.

¹⁶ Anaž jecmi kjaž cjesača tii puntuquiztan. Tuquiqui Jesucristuž puntumi, nižaza Yooz kamañ puntumi ana tjapa ziztatača. Anziqui nii puntunacami kjanacama ziztača. Tii Jesucristuž puntunacača chekanaqui. Jesucristuqui učum irat curpuchiz tjonchiča tii muntuquiziqui. Jacatatiquiztan Yooz Espiritu Santuqui ticlarchiča niž puntuquiztan, lijituma Yooz kamañchizza, jalla nii. Nižaza Yooz anjilanacaqui Jesucristo cherchiča. Nižaza tjapa tii muntuquiz žejlñi žoñinaczquiz Jesucristuž puntuquiztan paljaytača. Nižaza tjapaman žoñinacaqui nižquiz criichiča. Nižaza Jesucristuqui tsewc arajpachquin wilta quejpchiča. Jalla nii puntunacača chekanaqui.

4

ZUMA TJAAJINTA TAKUNACA

¹ Tsjii puntu cjesača. Yooz Espíritu Santuqui kjanapacha intintazkatchiča jalla tužu: Ima Jesucristuž wilita tjonan, yekjap criichinacaqui Yoozquin criizquiztan zarakaquiča. Tsjii kjutñi irpitaž cjequiča incallñi zajranacaž cjen, nižaza nii ana wal zajranacž tjaajintaž cjen.

² Nii zajranacaž mantita žoñinacaqui incallñi kuzziz cjican toscar takunaca paljayaquiča. Nižaza ninacž toscar takunaca nonžcu, yekjap werar Yoozquin criichinacaqui Yoozquiztan tsjii kjutñi zarakaquiča. Nii zajranacaž mantita žoñinacaqui ujquiztan ana sint'iñi kuzziz cjequiča, nižaza ana uj naazñi kuzziz cjequiča.

³ Nii ana wal žoñinacaqui anapanž lucutjiñi zalzqui cjican mantaquiča. Nižaza tsjii čherinaca lujlzi, anapanž lulzqui, cjican mantaquiča. Nii incallñi žoñinacaqui jalla nuž cjequiča, pero Yoozqui nii čheri tjaachiča, žoñinacaž lulajo. Jalla nižtiquiztan Yoozquin criichinacami werar Yooz tawkquiz criichinacami nii čheri lulasača Yoozquin sparaquiž cjižcu.

⁴ Tjapa Yooziž tjaata čherinacaqui walipankazza. Yoozquin sparaquiž cjižcu lulasača. Anapanča “Lujljapača anawaliqui” cjižqui.

⁵ Yoozquin sparaquiž cjižcu, nižaza Yooz taku čiižcu, čjul čherimi walipankaz cjesača, lujljapa.

⁶ Jalla nii weriž tjaajinta takunaca criichi žoñinacžquiz tjaajnaquiča amqui. Nekztan amqui Jesucristužtjapa zuma sirwiñim cjequiča. Yooz tawk jaru, nižaza Yooz puntu zuma tjaajintanac jaru zuma kamčamča. Nižaza zuma tjaajnaquiž niiqui, juc'ant zuma kamañchiz cjequiča.

⁷ Ana wal quintumi nižaza zumzu žoñinacž quintumi anapan nonz-naquiča. Antiz Yooz kuzcamapankaz kamzquinča kuz tjaazqui.

⁸ Curpu ejercicio paakatzqui curpuquizkaz yanapča. Yooz kuzcama kamzqui curpuquizimi kuzquizimi tjappachquizpanž yanapča. Nižaza tii muntuquiz kamz žejtquizimi arajpach muntuquiz kamz žejtquizimi yanapča.

⁹ Jalla werar razunača nii takuqui. Jalla nižtiquiztan catokz waquiziča.

¹⁰ Učhumqui žejtñi Yoozquin criichiž cjen tjewznaquiča arajpachquin Yooztan kami ojkzjapa. Jalla nuž tjewžcan, učhumqui Yoozta anča langža nižaza sufriča. Jalla nii žejtñi Yoozza ultim werar Liwriiñiqui. Niižquin criichinacaqui liwriita cjequiča. Nižaza tjapa žoñinacaqui liwriita cjesača, niižquiz criyaquiž niiqui.

¹¹ Jalla nii puntu tjaajintanaca mantaquiča, nižaza tjaajnaquiča amqui.

¹² Amqui tjowaž cjenami žoñinacžquiz rispitskataquiča, amiž zuma kamtiquiztan. Amqui zumapan kamaquiča, nižaza zumapan čiyaquiča, nižaza žoñinacžtan zuma munazaquiča, nižaza Yoozquin tjapa kuzzizpan cjequiča, nižaza lijitum kamañchiz cjequiča. Nekztan jaknužt amqui zuma kamčaja, jalla nii cheržcu, parti criichi žoñinacaqui am iratapacha zakaz zuma kamasacha.

¹³ Nižaza wejť tjonzcama, parti criichi žoñinacžquin Yooz taku liizinzjapa kuz tjaaquiča. Nižaza Yooz taku liižcu parti criichi žoñinacžquin zumpacha čiižinaquiča. Nižaza ninacžquiz tjaajnaquiča.

¹⁴ Tuquiqui icliz jilirinacaqui kjaržtan am juntuñ lanziča. Nižaza am puntuquiztan tsjii Yooziž tjaata taku čiičiča, “Yooz tjaata kamañchiz cjequiča” cjicanaqui. Nekztan jalla nižta Yooz kamañchiz amquiz cjiskatchiča. Amqui nii Yooz kamaña ana cutznaquiča.

¹⁵ Jalla nii am kamañ puesto cumplisjapa, tjapa kuz tjaaquiĉha. Nii kamañ jaru kama. Jalla niĉta kamz cjen, amqui juc'ant juc'ant zuma kamaquiĉha. Niĉzaza parti criichinacaqui am juc'ant zuma kamñiĉ cjen nayaquiĉha.

¹⁶ Jaziqui am persun kuzquizimi niĉzaza amiĉ tjajintanacquizimi cuitaza, zumapan cjisjapa. Weriĉ chiĉzintanaca tirapan cjuĉzna. Jalla nuĉ zuma cjuĉznaquiĉ niiqui, ultimquiziqui liwriitam cjequiĉha. Niĉzaza amiĉ tjajinta catokĉi ŉoĉinacaqui liwriitaĉ zakaz cjequiĉha.

5

ZEW MAATAKANACZ PUNTU

¹ Tsjilla cjesaĉha. Irarchiz ejpnacĉquiz ana ancha ujznaquiĉha. Antiz persun ejpĉtakaz zuma tawkĉtan chiĉzinaquiĉha, niĉĉ ana wali paatiquiztan jaytiskatzjapa. Niĉzaza parti luctak ŉoĉinacĉquiz persun jilanacĉquiz chiĉzintaĉokaz chiĉzinaquiĉha.

² Niĉzaza irarchiz maatakanacĉquiz persun maaĉtakaz zuma rispitchiz razunĉtan chiĉzinaquiĉha. Niĉzaza parti maatakanacĉquiz persun cullaquinacĉquiz chiĉzintaĉokaz chiĉzinaquiĉha, zuma kuztan. Maatakanacĉquiztan zumapan pinsaquiĉha.

³ Niĉzaza ultim t'akjir ŉewanacĉquiz okznaquiĉha.

⁴ Tsjaa ŉew ŉonqui maatinacĉhiz niĉzaza ajlchinacĉhiz cjesaĉ niiqui, jalla ninacaqui naa ŉew maaquiz okz waquiziĉha. Jakziltat Yoozquin criichiĉljaj niiqui, persun famillĉquiztan ŉew maatakanacĉquiz yanapz waquiziĉha. Nii ŉew maatakanacaqui famill ocjalanaca jwesi yanapĉhizlani. Zew maatakanacĉquiz yanapzpanĉ waquiziĉha persun familiaqui. Jalla nuĉ Yooz yujcquiziqui walipanikaz cjequiĉha.

⁵ Jakzilta t'akjir ŉew ŉonmi zinalla ŉejlĉhaj niiqui, jalla naaĉha werar ŉewqui. Naaqui Yoozquin kuzziz cjenacqui arajpachquin kami ojcz, jalla nii tjewĉa. Niĉta tjewĉcan naaqui majiĉnami weenami Yoozquin ancha mayizinĉha.

⁶ Jakzilta ŉew ŉonmi tii muntuquiz kamzquinkaz kuz tjaaĉhi ŉejlĉhaja, jalla naaqui criichi ŉoĉĉ cuzturumpi paachi cjenami, ana Yoozquin kuzziz zuma kamĉha.

⁷ Persun famillĉ ŉewnacĉquiz okz waquiziĉha. Jalla nuĉ mantaquiĉha amqui, ŉewanacami ninacĉ familianacami ana ujchiz cjisjapa.

⁸ Persun famillĉquiztan tsjii t'akjiri ŉejlĉhaj niiqui, famillĉquiztan mantinta cjis waquiziĉha. Ana mantintaĉljaj niiqui, nii famillĉhiz ŉoĉinacaqui Yooz kuzcama kamz ana cumpliĉha. Niĉzaza niĉta ŉoĉinacaqui tsjan ana zuma kuzzizza ana criichinacĉquiztanami.

⁹ Jakzilta ŉew maatakanacĉ tjuumi icliz listiquiz ŉejlĉhaja jalla ninacaqui yanapta cjesaĉha. Niĉzaza nii ŉew maatakanacaqui yanapzjapa sojta tunc wata jilchiz cjistanĉha. Niĉzaza tsjii luctakĉtan panikaz zalsintaĉha naa ŉewqui.

¹⁰ Niĉzaza ŉoĉinacaqui naaĉa zuma kamtiquiztan pajta cjistanĉha. Niĉzaza naa ŉewqui maatinaca zuma irpiĉntacha. Niĉzaza tjonzĉni ŉoĉinacĉquiz zuma atintiĉni kuzziz cjispanĉha. Niĉzaza criichi ŉoĉinacĉ kjojcha humilde kuzziz ajwsinintaĉha. Niĉzaza sufriĉni ŉoĉinacĉquiz zuma yanapĉni kuzziz cjispanĉha. Niĉzaza tjapaman wali paatanacĉquiz kuz tjaaĉni cjispanĉha. Jalla niĉta zuma kuzziz ŉew maatakanacaqui iclizquiztan yanapta cjesaĉha.

¹¹ Ima sojta tunca watchiz cjen ŉew maatakanacaqui anaĉ icliz listiquiz apuntita cjesaĉha, yanapta cjisjapa. Listiquiz apuntita cjisjapaqui, ŉew maatakanacaqui tsjii icliz jilirinacĉ acuerduquiz luztanĉha. Tur ŉew

maatakanacaqui wilta zalz pecačhani. Wilta zalaquiž niiqui, nii acuerduquiztan ulanspanča. Jalla nuž ulantiquiztan Cristuž quintražtakaz cjequiča.

¹² Nii primero acuerduquiztan ulantiquiztan ujchiz cjequiča.

¹³ Nižaza turapacha žew maatakanacaqui kjuyquiztan kjuya ojklayasaž niiqui, jayraž cjesača. Nižaza ana wali quintu joojooñiž cjesača. Nižaza yekja žoñž parliquiz mitisni cjesača. Jaziqui ana zuma takunaca chichiyačhani. Nižta chiichiizqui inapankazza. Anapan waquiziča.

¹⁴ Jalla nižtiquiztan tur žew maatakanacaqui zalz waquiziča. Zalzcu, ocjalchiz cjesača. Nižaza kjuya luraña cwitiñi cjesača. Jalla nižta zuma kamañ quintra žoñinacaqui icliz žoñinacžquiz anaž iñarasača.

¹⁵ Yekjap žew maatakanacazti Yoozquiztan zarakchiča, nižaza Satanás diabluz kuzcama ojkča.

¹⁶ Jakzilta criichi luctakami maatakami persun famillžquiztan tsjaa žew žon žejlčhaja, naa žew žon yanapz waquiziča, icliz žoñinacžta ana ch'ama cjeyajo. Jalla nižtiquiztan ultim t'akjir chawc žew maatakanacžquiz icliz paažtan yanapta cjesača.

ICLIZ JILIRZ PUNTU

¹⁷ Jakzilta icliz jilirit zumpacha irpačhaja, parti criichi žoñinacaqui nii jiliržquin zuma honora tjaaž waquiziča, nižaza zuma pacz waquiziča. Nižaza Yooz taku paljayni jiliržquizimi, nižaza Yooz taku tjajini jiliržquizimi juc'ant honora tjaaž waquiziča, nižaza juc'anti pacz waquiziča.

¹⁸ Tuquitanpacha cjiirta Yooz takuqui tuž cjiča: “Tsji trigo jojni aznuqui ñujcžtan ana ñucasača ana lulajo”. Nižaza cjiirta Yooz takuqui tuž cjiča: “Jakziltat langžnižlaja, jalla niiqui pacta cjis waquiziča”.

¹⁹ Nižaza tsji žoñikaz icliz jiliržquiz uj tjojtasaž niiqui, jalla nii žoñž chiitaqui anača nonzqui. Antiz tsji pucultan čhjepultan tisticu žoñinacž ujchizpanča cjesaž niiqui, ninacž chiitaqui nonznaquiča.

²⁰ Nižaza jakzilta icliz jilirit uj paañi žejlčhaja, jalla nižquiz ujsnaquiča parti criichi jilanacž yujcquiz. Jalla nižtiquiztan nii parti žoñinacaqui uj paaž jiwjataquiča.

²¹ Jaziqui Yooz Ejpžtan nižaza Jesucristužtan nižaza Yooziž illzta anjilancžtan, jalla ninacž yujcquiziqui amquiz mantuča, nii weriž tjajintanac jaru kamajo, nii. Nižaza jalla nuž kamcan anapanča pjali cjicjisqui. Nižaza tjapa žoñinacžtan tsji kuzziz cjis peca.

²² Nižaza ima icliz jilirž puestuquiz uchan, nii žoñž kuz zumpacha tantiižinaquiča. Ana zumpacha tantiyaquiž niiqui, tsji amiž uchta icliz jiliri qui ujquiz tjojtasnasača. Nekztan parti žoñinacaqui amquiz zakaz uj tjojtasnasača. Jaziqui ima uchcan zumpacha tantiiz waquiziča. Nižaza am persun kuzquiz cuitasa ana ujquiz tjojtšjapa.

²³ Amiž walu ancha laa laa cjenauqui, anam kjaz alaja licača. Tsji kulla cunta koluc vinulla licsnasača.

²⁴ Yekjap žoñinacž uj paatanacaqui kjanapacha tježta cjissa ima casticta cjisnan. Yekjap žoñinacž uj paatanacazti chjojžta cjesača, casticz tjuñicama. Nekztan tježtaž cjequiča.

²⁵ Jalla nižtapacha yekjap žoñinacž zuma paatanacaqui kjanapachača. Yekjap žoñinacž zuma paatanacazti ana chertača. Pero anaž tirapan chjojžta cjequiča. Pjalz tjuñquiziqui tježtaž cjequiča.

6

¹ Criichi žoñinacžquiz chiižina, tuž cjican: Patrunž mantuquiz kamñi piyunanacaqui persun patrunžquiz rispítla, parti žoñinacaž werar Yooz quintra ana chiyajo, nižaza tjaajinta Yooz taku ana iñarajo.

² Nižaza jakzilta piyunanacat criichi patrunchizlaj niiqui, juc'anti rispítla, ana quintra chiila, nii patrunaž criichiž cjen. Antiz juc'anti nii patrunžta langžinspanča. Am patrunchača criichi maziqúi. Jalla nižtiquiztan zuma k'ayi jilača niiqui. Jalla nii puntunaca chiižinaquiča, nižaza tjaajnaquiča.

ANA WALI TJAAJINIČA PUNTU

³ Tsjii žoñiqui tsjemat pinsita takunacžtan tsjii kjutñi tjaajnačhani. Jalla nižta ana wali tjaajnaquiž niiqui, Jesucristo Jiliriž zuma tjaajintanacquiztan tsjemataž tjaajinča. Nižaza nii žoñiqui Yooz mantita kamañquiztan tsjemata kamaña tjaajinča.

⁴ Jalla nižta tjaajiñi žoñiqui mit kuzzizza. Yooz puntunaca ultim werara ana zizza. Nižaza nižta tjaajiñi žoñiqui ana wali kuzziz cjen žoñinacžtan ch'aazkaz pecča. Čjul taku puntuquiztan ch'aazkaz pecča. Jalla nuž ch'aazcan čjaawjkatas žejlča, nižaza t'aka t'akaž cjissa, nižaza žoñinacaqui quintra chiyas žejlča. Nižaza porapat uj tjojtassa.

⁵ Nižaza nii millk'u kuzziz žoñinacaqui porapat ana tucuziñi ch'aasñiča. Ninacaqui Yooz pinsitanacami zuma werar razunanacami ana zizza. Tii muntuquiz wali jiru kamz cjis pinsican, Yooz jiczquin luzza. Nii wali jiru kamzqui, "Jalla nii kamzkazza waliqui", cjican pinsiñiča. Jalla nii ana wal pinsitanacchiz žoñinacžtan ana munazaquiča.

⁶ Pero tsjiikaz cjiwča. Yooz jiczquiz kamzqui ancha waliča, wali jiru kamzquiztan juc'anti. Yoozquinkaz kuzziz cjican žoñinacaqui cuntintu cjequiča.

⁷ Tii muntuquiz nascuqui učumqui ana čjulchiztača. Nižta irata ticžcuqui tii muntuquiztan ana čjulchiz okaquiča.

⁸ Jalla nižtiquiztan tii muntuquiz žejlcan, čjherchizimi zquitichizimi cuntintu cjistanača.

⁹ Jakziltat wali jiru cjis pecčhaja, ujquiz tjojtasnasača, nižaza ana wal jiczquiz lusasača. Nekztan zumzu pinsamintuchiz cjesača. Nižaza persun quintra ana wal kamzquizkaz pecasača. Nekztan nii ana wal kamtiquiztan tjappacha pertaquiča. Liwj akztaž cjisnaquiča nii žoñiqui.

¹⁰ Paazquin kuz tjaazqui tjapaman ana walinacquiz cjiskatča. Paazquin kuz tjaacan yekjap criichi žoñinacaqui Yoozquiztan tsjii kjutñi čjichta cjisiča. Nekztan persunpacha wira ancha sufriskatča.

TIMOTEOZQUIZ CHIIZINTA TAKUNACA

¹¹ Timoteo jila, amqui Yooz žoñimča. Jaziqui ana walinacžquiz anapan kuz tjaaquiča. Antiz zuma kamzquin kuz tjaaquiča. Yooz kuzcama kama. Nižaza Yoozquin kuzzizpan cjee. Nižaza zuma munaziñi kuzziz cjee. Nižaza pasinziz kuzziz tjurt'a. Nižaza humilde kuzziz cjee.

¹² Zuma zultatužtakaz Yoozquin tjurt'iñi kuzziz cjee, nižaza Satanás diabluz partiranacž quintra cjee. Nižaza arajpachquin Yooztan wiñaya kamzjapa, kuz tjaaquiča. Arajpachquin wiñaya kamajo Yoozqui am kjawziča. Nižaza nuž kjawztan, amqui walja žoñinacž yujcquiz ticlarčamča, "Yoozquinkaz kuzziztča wejrqui" cjican.

¹³ Timoteo jila, Yoozqui tjapa tii muntuquiz žejlñinacžquiz žeti tjaača. Nižaza Jesucristuqui Poncio Pilatuž yujcquiz Yooz Ejpžquinkaz kuzziztača.

Jaziqui Yooz yujcquizimi Jesucristuž yujcquizimi wejrqui amquin man-
tuča,

¹⁴ Yooz kamañquizkaz kama, jalla nii. Nekztan žoñinacaqui Yooz kamaña
quintra ana čjul chiyasača, nižaza Yooz kamañaqui zumapankaz tježta
cjequiča, Jesucristo Jiliriž tjonz tjuñicama.

¹⁵ Yooz Epiž pinsita timpuquiz Jesucristuqui wilta tjonaquiča. Yooz
Ejpqui zinta zuma Yoozza. Jalla niiča tjappachquiztanami chekanaqui.
Nižaza Yoozqui tsjan pajk jiliriča čjul jilirinacžquiztanami. Nižaza niiča
juc'ant azziz mantiñiqui čjul mantiñinacžquiztanami.

¹⁶ Yoozpankazza wiñay žejtchizqui. Nižaza anaž jec ujchiz žoñimi Yoozquin
macjati atasacha juc'ant zuma kjañquiz kamchi, nekztan. Jalla nižtiquiztan
anaž jec žoñimi Yooz cherchiča, nižaza ana cherasača. Yoozqui wiñaya
honorchiz cjila. Nižaza wiñaya mantiñej cjila. Jalla nužoj cjila. Amén.

¹⁷ Amqui tii muntuquiz wali jiru kamñi žoñinacžquiz mantaquiča, ancha
cusasanacchiz cjenami ana mita kuzziz cjeyajo. Anaž wiñaya nižta wali jiru
kamasacha. Jalla nižtiquiztan cusasanacquiz anača kuz tjaažqui. Antiz
Yoozquinkaz kuz tjaa. Nii žejtñi Yoozpankaz učumnacaquiz tjapaman
wintizunanaca tjaača, učumnaca cuntintu kamzjapa.

¹⁸ Nižaza nii wali jiru kamñi žoñinacžquiz mantaquiča tuž kamajo. Ni-
nacaqui zuma obranaca paaz waquiziča. Nekztan zuma obranacaž paachiž
cjen ultim werar wali jiruž cjequiča Yooz yujcquinaqui. Nižaza ninacaqui
zuma kuztan ninacž cusasanacžtan žoñinacžquiz yanapž waquiziča. Ana
zkutu kuzziz cjis waquiziča.

¹⁹ Jalla nuž zuma obranaca paatiquiztan arajpachquin ultim werar
cusasanaca juntaquiča. Nuž juntitiquiztan, ultimupan Yoozqui araj-
pachquin ninacžquiz zuma kamkataquiča, wiñaya. Jalla nii arajpachquin
wiñay kamzquin kuz tjaaž waquiziča. Nii kamzqui juc'ant zumača. Jalla
nuž wali jiru žoñinacžquiz mantaquiča amqui.

²⁰ Timoteo jila, wejrqui amquiz tjapa Yooz puntunacquiztan tjaajinch-
inča. Jalla nii tjaajintanaca zumpacha cjuñzna, nižaza nii jaru kama. Nižaza
ina žoñž takunaca ana nonžna. Ana Yooz takunacača ninacž takunacaqui.
Nižaza zuma tjaajintanac quintra chiitaqui ana nonžna. Yekjap žoñinacaqui
tsjii kjutñi chiižcuqui, “Zuma zizta takuča weriž chiitaqui”, cjiñiča.

²¹ Nižaza yekjap criichi žoñinacaqui nii ana wal taku catokžcu Yoozquiztan
tsjii kjutñi zarakchiča. Ana zuma kuzziz cjissiča.

Yoozqui am wintijla. Jalla nužoj cjila. Amén.

SEGUNDA CARTA DEL APOSTOL SAN PABLO A TIMOTEO

¹ Wejrtcha Pablutqui. Yooz muñañpi jaru Jesucristuž illzta apostoltcha. Yoozqui Jesucristuž cjen žoñinacžquiz taku tjaachiča, Jesucristužquin kuz tjaañi žoñinacžquiz wiñaya arajpachquin kamkatzjapa. Jalla nii wiñaya kamz puntuquiztan paljayajo wejrqui apóstol puestuquiz uchtitcha.

² Timoteo jila, amqui wejt k'ayi maati cuntamcha. Jalla nekztanaqui tii cartal cjiyržcuča. Učhum Yooz Ejpžtan nižaza učhum Jesucristo Jiliržtan, jalla ninacaqui amquin zumaj yanapla, nižaza amquin okžla, nižaza zuma cuntintu kuzziz kamkatla.

TIMOTEOZQUIZ CHIIZINTA TAKU

³ Wejrqui majiñami weenami Yoozquin mayizican, am cjuñučha. Am cjuñžcu, wejrqui amiž cjen tirapan Yoozquin sparaquiž cjiwčha. Yoozquin tjapa kuztan lijituma sirwuča. Jaknužt wejt tuquita atchi ejpnaca Yoozquin zuma sirwitčhaja, jalla nuž Yoozquin sirwuča.

⁴ Wejrqui cjuñučha, amiž wejtquiztan kaazñiž cjen. Nižaza wilta am cherez anchal pecučha. Nekztan cuntintul cjeeča.

⁵ Nižaza cjuñučha, amqui tjapa kuztan Yoozquin criichamcha, jalla nii. Primeraqui am Loida cjiti matilliqui Yoozquin kuzziz cjissintača. Nekztan am Eunice cjiti maa Yoozquin kuzziz zakaz cjissintača. Nižazakaz amqui ultimupan Yoozquin kuzziz cjissamcha.

⁶ Yoozqui amquiz tsjii zuma kamaña tjaachiča, weriž am juntuñ kjaržtan lanžtan. Jalla nižtiquiztan amquin chiižinuča, nii zuma kamañquiz tira kamajo.

⁷ Yoozqui učhumquiz eksñi kuzziz ana cjiskatchiča. Antiz tjup kuzziz cjiskatchiča, nižaza zuma munaziñi kuzziz cjiskatchiča, nižaza zuma pinsiñi kuzziz cjiskatchiča.

⁸ Jaziqui amqui anapanim azaquiča, učhum Jesucristo Jilirž favora paljaycan. Wejrqui Jesucristuž cjen carsilquiz chawjctitča. Jalla nuž cjenami amqui ana wejtquiztan azaquiča. Amqui Yooz zuma liwriiñi taku paljayñiž cjen zakam sufriča. Nii sufrisquiztan ana jiwjatalla. Yoozqui amquiz azi tjaažcaquiča tjurt'izjapa.

⁹ Nii azi tjaañi Yoozza učhum liwriichiqui. Nekztan učhum kjawziča nižquin tjapa kuztan kamzjapa. Yoozqui učhum ana kjawziča učhumnacaž zuma paatiquiztan. Antiz Yoozqui učhum kjawziča niž persun kuz munañpi jaru, nižaza niž persun okžni kuzziz cjen. Ima tii muntu želan Yoozqui tantiichiča, Jesucristužquin kuzziz žoñinacžquiz niž okžni kuz tjeeznaquiča, nii.

¹⁰ Jazizti Yoozqui učhum Liwriiñi Jesucristuž tjonchiž cjen niž okžni kuzziz tjeeziča. Jesucristuqui ticz liwj atipchiča persunaltajapami nižaza nižquin criichi žoñinacžtajapami. Nižaza liwriiñi Yooz taku paljaytiquiztan, jaknužt žoñinacaqui Yooztan wiñaya kamčhaja, jalla niiqui kjanzt'itača.

¹¹ Jalla nii zuma quintu paljayajo Yoozqui wejr utchiča apóstol puestuquiz. Nižaza wejr utchiča ana judío žoñinacžquiz tjajajajo.

¹² Jalla nižtiquiztanpacha wejrqui ancha sufručha tii carsilquiz chawjck-atzcam. Jalla nuž cjenami wejrqui anapan azučha, werar Yooztan tsjii kuzziz cjen. Werar arajpach Yoozquinpanž kuz tjaachinča. Nižaza tuž cjiwčha, wejt Yoozqui walja azzizza. Jaziqui niiqui weriž cumpjiita wira cuitaquiča Jesucristo tjonz tjuñicama. Jalla niiča zuma werar razunaqui.

¹³ Werjqui amquiz zuma tjaajinchinča. Jalla nii tjaajintacama amqui tirapan tjapa kuztan kamaquiča. Yoozquin kuzzizpan cjequiča, nižaza žoñinacžtan zuma munaziñi kuzziz cjequiča. Jalla nuž kamaquiča Jesucristužtan tsjii kuzziz cjen.

¹⁴ Yoozqui amquin niž zuma tjaajintanaca tjaachiča. Jalla nii zuma taku cuitaquiča. Učhum kuzquizpachača Espíritu Santuqui. Jalla niiqui amquiz yanapaquiča nii Yooz taku zuma lijituma tjaajnajo.

¹⁵ Tjapa nii Asia provinciquiztan tjonchi žoñinacaqui wejr zinalla ecchiča. Jalla ninacquiztan Figelo, nižaza Hermógenes, jalla ninacaqui wejr ecchizakazza. Nii zizza amqui.

¹⁶ Onesiforožti ancha wejr kuzziča wiltan wiltan. Nižaza weriž carsilquiz chawjctaž cjen ana azziča. Jalla nižtiquiztan zuma okzñi kuzziz Yooz Jiliriqi nižquiz zumaj yanapla, niž familianacžtanpacha.

¹⁷ Roma cjita wajtquiz želan, nii Onesiforo jilaqui wejr ancha kjurchiča zalañcama.

¹⁸ Jesucristo Jiliriž pjalz tjuñquiziqui Yooz Jiliriqi nii Onesiforožquin okzñi kuzziz cjequiča. Efeso wajtquin želan, Onesiforoqui jaknužumi criichi žoñinacžquin yanapchiča, jalla nii amqui zuma zizza.

2

JESUCRISTUZ ZULTATUZTAKAZ CJISPANCHA

¹ Timoteo jila, wejt maati cuntamča. Tjup kuzziz cjee. Jesucristuqui amquiz yanapaquiča.

² Wejrqui walja žoñinacaž želan Yooz taku tjaajinchinča. Ninacžtanpacha amqui weriž tjaajintanaca nonzamča. Jalla nii tjaajinta takunaca amqui tjaajnaquiča zuma cumpliñi kuzziz žoñinacžquizimi. Nekztan nii žoñinacaqui yekjanacžquizimi tjaajnasača.

³ Amqui Jesucristužquin sirwiñiž cjen sufraquiž niiqui, nii sufrizquiztan ana jiwjata. Jalla nuž sufrican, Jesucristužquin tjurt'aquiča walja tjup zultatužtakaz.

⁴ Jakzilta zultatut servicio militarquiz žejlčhaja, jalla niiqui militar asuntunacquiz tjapa kuz tjaacha. Ana panž civil asuntunacquiz kuz tjaasača. Niiž comandantiž mantuquiz cjissa, nii comandantiž kuz wali cuntintu cjiskatzjapa. Jaziqui zultat lii jaruž kamča, anapanž civil lii jaruž kamča.

⁵ Jalla nižta irata jakziltat pelota uzinčhaja, pelot uzinz lii jaru uzinžtanča. Ana pelot uzinz lii jaru uznaquiž niiqui, anapanž premio ganasacha.

⁶ Nižaza jakzilta langzñi žoñit zkala langžaja, jalla niiqui primeraž zkal čhjerquiztan lulasacha.

⁷ Jalla nii weriž chiita puntuquiztan tantiya. Jalla nekztan Yooz Jiliriqi tjapa nii puntuquiztan zumpachaž intintiskataquiča.

⁸ Nižaza Jesucristuž puntu cjuñzna. Jesucristuqui David cjita tuquita jilirž majchmaatinacquiztan tjonñiča. Jesucristuž ticziquiztan jacatatchi puntu cjuñzna. Jalla nii liwriiñi takupacha paljayuča.

⁹ Jalla nuž paljaytiquiztan wejrqui carsilquiz chawjcta sufruča, criminal žoñižtakaz. Jalla nuž weriž carsilquiz chawjcta želanami, liwriiñi Yooz takuqui anača chawjcta. Jalla nižtiquiztan Yooz takuqui tirapanž paljaytača.

¹⁰ Jalla nižtiquiztan wejrqui walja sufruča Yooziž illzta žoñinacažquiz juc'ant wali cjiskatzjapa. Sufruča ninacami wejrmi ultimu liwriita cjisjapa. Jesucristužquiz kuzziz cjen ninacami wejrmi wiñayaž liwriita cjequiča, nižaza arajpachquin wiñaya honorchiz cjequiča.

¹¹ Jesucristuqui učum laycu ticziča. Jalla niiča ultim werar razunaqui. Učumqui tuquita ana wal kamañquiztan ticzi žoñinacažtakaz cjissinčumča, nii ana wal kamañquiz ana iya kamajo. Jaziqui ew kamañchiz cjissinčumča. Jalla nižtiquiztan Jesucristužtan kamča.

¹² Nižaza Jesucristužquiz sirwiñiž cjen sufračhaj niiqui, tjurt'ichi kuzziz kamz waquiziča. Nekztan tjurt'ichi kuzziz tirapan cjequiž niiqui, učumqui nižtan chica mantaquiča. Učumqui Jesucristužquiz nicaquiž niiqui, niiqui nižaza učum nicaquiča.

¹³ Jaziqui učumž Jesucristužquiz criiz ana cumplichiž cjenami, nii Jesucristuqui tirapanž niž ecta taku cumplaquiča. Niiqui persun taku anapanž nicasača.

YOOZTAJAPA ZUMA LANGZPANCHA

¹⁴ Amqui criichi jilanacžquiz nii puntu cjuñskataquiča. Nižaza Jesucristo Jilirž tjuuquiz ninacžquiz zumpacha chiižinaquiča, jalla tužu: Anaž ch'aazaquiča ina žoñž takunac puntuquiztan. Jalla nuž ch'aazqui anaž čjuljapa sirwiča. Nižaza nii ch'aazta taku nonžñi žoñinacaqui Yooz jiczquiz kamzquiztan tsjii kjutñi chjichtaž cjesača.

¹⁵ Amqui Yooztajapa tjapa kuztan langzna, Yooz yujcquiziqui zuma langzñi žoñi pajta cjisjapa. Jalla nižtiquiztan Yooz yujcquiz žejlcan amqui ana čjulquiztan azasača. Nižaza Yooztajapa langžcan, niž werar liwriiñi taku legali paljaya.

¹⁶ Ina žoñž takunacaqui anača chiizqui. Jalla nii ina takunaca chiyasaž niiqui, tsjan tsjan tsjii kjutñi žoñinacžquiz irpaquiča.

¹⁷ Nii ana wal chiizqui zuma kamañanaca ana wali cjiskataquiča, jaknužt tsjii laa cjiñi tjapa curpu ana wali ch'ujlkatchaja, jalla nižta. Jalla nuž watchiča Himeneožtan Filetužtan, jalla ninacžquiz.

¹⁸ Jalla ninacaqui werar Yooz tawkquiztan tsjii kjutñi tsjemat taku parličiča, “Jacatatz tjuñiqui watchiča”, cjican. Jalla nuž chiitiquiztan yekjap criichinacž kuznacaqui turwayskatžcu, Yooz jiczquiztan zarakskatchiča.

¹⁹ Jalla nuž cjenami Yoozqui nižquin kuzziz žoñinaca yanapča tjurt'iñi kuzziz cjejajo. Jalla nižtiquiztan Yooz icliz žoñinacaqui tirapan tjuraquiča. Jalla nii puntuquiztan Yooz takuqui tuž cjiča, “Yooz Jiliričiqi niž illzta žoñinacaž pajča”. Nižaza, “Tjapa Jesucristužquin kuzziz žoñinacaqui ana wal kamañquiztan zarakstanča”. Jalla nužupanča.

²⁰ Tsjilla cjesača. Tsjii ricach žoñž kjuyquiziqui tjapaman cusasanaca žejlča, korquiztan paata, nižaza paazquiztan paata, nižaza tabliquiztan paata, nižaza ljocquiztan paata, jalla nižta cusasanaca žejlča tsjii kjuyquiziqui. Parti cusasaqui zuma visitanaca atintizjapa žejlča. Parti cusasazti zapuru kamzjapa žejlča.

²¹ Jalla nižta iratača žoñinacaqui. Yooz Jiliriz atintizjapa, nižaza zuma honorchiz cjisjapa, zuma kamstanča. Nižaza nii ana wali chiiñi žoñinacžquiztan cuitasaquiča. Yooz Jiliržtajapa sirwiñipankaz cjee. Nekztan Yooz Jiliričiqi am ocupasača. Nižaza listu cjesača čjul wali paazjapami.

²² Tjotjowanacaqui ana wali pinsizcu, ana wali ojklayasača. Amqui nižta anawali kamzquiztan cuitasaquiča. Yooz kuzcama kamaquiča, nižaza Yoozquinkaz kuzziz cjequiča, nižaza zuma munaziñi kuzziz cjequiča, nižaza parti žoñinacžtan zuma kamaquiča. Amtan tjapa Jesucristo Jiliržquin kuzziz žoñinacžtan zuma kamz waquiziča.

²³ Nižaza zumzu ana zizñi žoñinacaž ch'aaz puntunaca parlanaqui, ana mitisaquiča. Nii ch'aaz puntu parlaquiž niiqui, ultimupan juc'anti aptjapznasača. Jalla nii zizza amqui.

²⁴ Jesucristo Jiliržquin sirwiñi žoñiqui anaž ch'aaz waquiziča. Antiz tjapa žoñinacžtan zuma munaziñi kuzziz kamz waquiziča. Nižaza zuma tjaajiñi kuzziz cjis waquiziča. Nižaza pasinziz kuzziz cjis waquiziča.

²⁵ Nižaza Yooz tawk quintra žoñinacžquiz chiižinaquiča zuma humilde kuztan. Jalla nuž chiižinan Yoozqui cunamit ninacž kuz campiiskatačhani, werar Yooz tawk jaru wilta kamajo.

²⁶ Anziqwi ninacaqui diabluž kjarquiz žejlča, tsjii presužtakaz, diabluž mantita jaru ojzjapa. Amiž humilde kuztan chiižintiquiztan Yoozqui cunamit diabluž kjarquiztan ninacžquiz liwriita cjiskatačhani.

3

ANCHA ANA WALI ŽOÑINACA ZELAQUICHA

¹ Jalla tižta zakaz intintazkatz pecuča. Ima Jesucristuž tjonan ch'amaž cjequiča zuma kamzjapa.

² Žoñinacaqui persun kuzcama kamzkaz pecaquiča. Nižaza paazquiz kuz tjaaquiča. Nižaza persun honorchiz cjis pecaquiča. Nižaza mit kuzziz cjequiča. Nižaza Yooz quintra chiiñi cjequiča. Nižaza maa ejpž takunaca ana casñi cjequiča. Nižaza ana jecžquizimi sparaquiž cjiñi cjequiča. Nižaza Yooz kamañ puntu ana rispitaquiča.

³ Nižaza ana okzñi kuzziz cjequiča. Nižaza ana jecžtanami zuma kamaquiča. Nižaza žoñinacž quintra takunaca joojowaquiča. Nižaza jaknužt persun kuz pinsičhaja, jalla niicama ojklayñi cjequiča. Nižaza žoñi sufriskatz pecñi kuzziz cjequiča. Nižaza zuma žoñinacž quintrapan cjequiča.

⁴ Nižaza tarasuna paañi kuzziz cjequiča. Nižaza ana eksñiž malcreados cjequiča. Nižaza persun honorchiz cjis pecñi kuzzizkaz cjequiča. Nižaza persun kuzcama kamzquinkaz kuz tjaaquiča. Yooz kuzcama kamzquin anapan kuz tjaaquiča.

⁵ Ninacaqui Yoozquin criichiž cuzturumpi jaru ojklayñiž cjenami, ultimquiziqui persun kamañ wira kaz paaquiča, anaž Yooz kamañ jaru cjequiča. Yooz aztan ana kamaquiča zuma kamzjapa. Jalla nižta kamñi žoñinacžtan anača ancha amigo pajasqui.

⁶ Nižaza yekjapanacaqui nii ana wal kamñi žoñinacžquiztan maatakžtan kjuyquiz luz pecča, nii kjuychiz uj paañi maatakžquiz incallzjapa. Nižta maatakanacaqui uj paazquiztan ana atipasača. Nižaza juc'ant juc'ant ujchiz cjissa. Persun kuz ana ewjasñi atča. Jaziqui nii maatakanacaqui čjul ana wali pinsitanacž jaru ojklayča.

⁷ Zizñi cjis peccu, čjul tjaajintanacami catokča. Pero anawira werar Yooz taku intintazñi cjis atasača.

⁸ Jalla nižtakaztača pucultan yatirinacaqui, Janes cjita žoñžtan nižaza Jambres cjita žoñžtan. Jalla ninacaqui Moisés quintra paachiča. Jalla nižta irata nii ana wal kamñinacaqui werar Yooz tawk quintra paača. Nižaza nii ana wal kamñi žoñinacaqui ana zum pinsamintuchiz tsjii kjutñipan chiiñiča "Yoozquin kuzziztča" cjicanaqui. Pero zumpacha tantiita cjequiča. Nekztan ninacž ana zuma kuz kjanapacha tjeežta cjequiča, tjapa žoñinacž ninacž puntuquiztan werara zizajo.

⁹ Ninacaqui tsjii ratupanikaz ninacž taku walkatasacha. Nekztan žoñinacpachaž ninacž taku zuma tantiižcu ninacž ana zuma razunanaca nayaquiča. Jalla nižta watchiča Janetan Jambrestan.

PABLUZ KAMTANAC PUNTU

¹⁰ Amzti weriž tjaajintanaca zumpacha catokchamča, nižaza weriž kamtanacami zumpacha zizzamča, nižaza weriž kuzquiz tantiitanacami, nižaza weriž Yoozquin kuzziz kamtanacami, nižaza weriž zuma pasinziz kuzziz kamtanacami, nižaza weriž zuma munaziñi kuzziz kamtanacami, nižaza weriž tjurt'iñi kuzziz kamtanacami,

¹¹ nižaza žoñinacaž wejtquiz chjaajwkatcan kamtanacami, nižaza weriž sufrican kamtanacami. Jalla tjapa weriž kamtanacami zizzamča. Nižaza amqui zumpacha zizza, jaknužt wejtquiz watčhaja Antioquia wajtquizimi, Iconio wajtquizimi, Listra wajtquizimi. Jalla nii watjanacquiziqui ancha sufrichinča. Jalla nuž sufrichiž cjenami Yooz Jiliriqi wejr liwriichiča tjapa nii sufrisquiztan.

¹² Jalla nižta sufraquiča tjapa criichi žoñinacaqui. Jakzilta criichi žoñinacat Jesucristuž kuzcamapan zuma kamz pecčhaja, jalla nižta sufraquiča tjapa ninacaqui.

¹³ Nižaza ana wal kamñi žoñinacami nižaza incallñi žoñinacami tsjan juc'anti ana waliž kamaquiča, žoñinaczquiz incallaquiča, nižaza ninacaqui incallta zakaz cjequiča.

¹⁴ Amzti amiž zizta Yooz tawk jaru kamcan tirapan tjurt'iñi kuzziz cjequiča. Nižaza amqui zizza jecčhalaj amquiz tjaajinchi, jalla nii. Nii tjaajintanaca zumpacha tantiižcu, legali Yooz takucamača nii tjaajintanacaqui, jalla nii tantiyazzamča.

¹⁵ Koltallquiztanpacha amqui cijjrta Yooz taku zizzamča. Nii Yooz takuž istutiican, amqui liwriiñi puntu ancha zizñi cjissamča. Yooz takuqui tjaajža, jaknužt liwriita cječhaja, Jesucristužquiz criichiž cjen, jalla nii.

¹⁶ Tjapa nii cijjrta Yooz takuqui Yoozquiztancama ulanchicamača. Jalla nižtiquiztan Yooz takuča zuma tjaajiñipanqui, nižaza uj tjeezñiqui, nižaza zuma Yooz jiczquiz ojklajajo azquichñiqui, nižaza tjapa Yooz kuzcama tjaajiñipanqui.

¹⁷ Jalla nužupanča Yooz takuqui. Yooz taku zumpacha catokžcuqui, Yoozquin kuzziz žoñinacaqui zumpacha zizñi cjissa Yooz kamañquizkaz zuma kamzjapa. Nižaza Yooz taku catokžcuqui Yoozquin kuzziz žoñinacaqui zumpacha tjaczi cjissa, tjapaman walinaca paazjapa.

4

PABLUZ CHIIZINTA TAKU

¹ Jesucristo Jiliriqi mantizjapa tjonaquiča. Jalla nuž tjonžcu ticzimi žejtñimi pjalznaquiča. Jalla niiž yujcquizimi Yooz Ejpž yujcquizimi am chiižinuča, Yooz taku paljayaquiča amqui.

² Nižaza timpuchiz cjicanami ana timpuchiz cjicanami tirapan Yooz tawkžtan žoñinaczquiz chiižinaquiča. Nižaza žoñinaczquiz intintiskataquiča Yooz taku werarača, jalla nii. Nižaza uj paañi žoñinaczquiz Yooz tawkžtan ujznaquiča. Nižaza zumpacha amtayaquiča. Jalla nuž chiižincan, zuma pasinziz kuzzizpan tirapan tjaajnaquiča.

³ Tsjii timpuž tjonaquiča. Jalla nii timpuquiz žoñinacaqui zuma Yooz taku tjaajintanaca anaž nonz pecaquiča. Antiz jakzilta tjaajiñit ninacz persun kuz wali cjiskatačhaja, jalla nii tjaajiñinaca nonzkaz pecaquiča. Ninacz persun ana wali razun jaru, jalla nižta tjaajintanaca pecaquiča.

⁴ Werar Yooz taku anapanž nonz pecaquiča. Ina žoñž parlakaz nonz pecaquiča.

⁵ Amzti zuma werar razunanac jaru tirapan lijituma kamaquiča. Sufricanami zuma tjurt'iñi kuzziz cjequiča. Nižaza zuma liwriiñi Yooz

taku paljayzquin kuz tjaaquiča. Nižaza amqui Yooziž tjaata kamaña cumplaquiča.

⁶ Wejrqui tsjii wilanažtakaz contal cjeeča. Wejt ticz tjuñiqui wajillača.

⁷ Zuma zultatužtakaz wejrqui Yoozquin zuma tjurt'iñi kuzzizpan žejlčinča. Nižaza werjqui wejt apóstol oficio zuma cumplichinča. Nižaza tirapan Yoozquin tjapa kuztan criyuča.

⁸ Jaziqui arajpachquin ojkžcu weriž Yooz kuzcama kamtiquiztan, tsjii zuma premiužtakaz gansjapa tjewznuča. Jesucristo Jiliriča lijituma pjalñiqui. Jalla niiqui niž pjalz tjuñquiz nii premio wejtquiz tjaaquiča. Anaž wejtquizkaz premio tjaaquiča. Tjapa nižquin kuzziz žoñinacžquiz premio tjaaquiča. Ninacazakaz niž tjonz tjuñi ancha tjewža, ancha chertz pecča.

PABLUQUI ZINALLA CARSILQUIZ ZEJLCHA

⁹ Timoteo jila, tsjiillakaz cjesača. Tsjii wiltallami wejr chertzñipan tjonz pecall amqui. Wajilla tjonalla.

¹⁰ Demaszi wejr zinalla ecchiča. Tii muntuquiz žejlñi cusasanaca juc'anti pecča. Jalla nekztan wejtquiztan ojkchiča Tesalónica watja ojkzjapa. Nižaza Crescentiqui Galacia yokquin ojkchiča. Nižaza Tituzti Dalmacia yokquin ojkchiča. Jaziqui wejtquin tjonalla.

¹¹ Lucaskazza wejtta chicaqui. Jaziqui Marcos kjurznaquiča. Nuž wajtžcumi zijcaquiča amtan. Marcosqui wejtquiz zuma yanapasača Yooztajapa langzquiztan.

¹² Tiquico wejrqui cuchanchinča Efeso wajtquin.

¹³ Amqui tjoncan wejt irs caputi zijcnaquiča. Wejt irs caputi ecchinča Carpos kjuyquiz Troas wajtquin. Nižaza librunaca zijcnaquiča. Tsjan chekanac wejt papilanaca zijcnaquiča.

¹⁴ Alejandro, nii cobre jirunaca paañiqui ancha wejt quintra paachiča. Jalla niž paatiquiztan Yooz Jiliriqui nii casticaquiča.

¹⁵ Amqui nižquiztan cuitasaquiča. Niiqui učum paljayta Yooz taku ancha quintrača.

¹⁶ Weriž jilirnacž yujcquiz primera tjurt'iñi tawkžtan chiyan, anaž jecmi wejtquiz tjurt'i yanapchiča. Tjapa wejr zinalla ecchiča. Ninacaz ectiquiztan Yoozqui ninaca anakaj casticla.

¹⁷ Yooz Jiliriqui wejtquiz yanapchiča. Nižaza wejtquiz zuma tjup kuzziz cjiskatchiča, jalla nižtiquiztan wejrqui liwriiñi Yooz taku tirapankal paljayuča, tjapa ana judío žoñinaca nonznajo. Nižaza wejr konz cjen Yoozqui wejr liwriichiča.

¹⁸ Nižaza tjapa ana walinacquiztan wejr liwriyaquiča, nižaza Yoozqui wejr cuitaquiča niž arajpach wajtquin cjisjapa. Zuma Yoozqui wiñaya wiñaya honorchizkaj cjila. Amén.

¹⁹ Tsaanžinalla Priscaquin, nižaza Aquilžquin, nižaza Onesíforuž familianacžquin.

²⁰ Erasto cjita jilaqui Corinto wajtquin eclichiča. Trófimo cjita jila jalla nii laa ecchinča Mileto wajtquin.

²¹ Ima zac timpu luzan tjonžquizpan pecalla. Nižaza amquin tsaanžquiča Eubulo cjita jilami, nižaza Pudente cjita jilami, nižaza Lino cjita jilami, nižaza Claudia cjiti cullacami, nižaza tjapa criichi jilanacami.

²² Jesucristo Jiliriqui amtan chicaj cjilalla, nižaza tjapa ančucaquiz zumaj wintijla. Amén.

LA CARTA DEL APOSTOL SAN PABLO A TITO

¹ Wejrtča Pablutqui, Yooz mantitacama okiñ zoñtča, nižaza Jesucristuž cuchanžquita apostoltča. Jesucristuqui wejr apóstol puestuquiz utchiča criichi zoñinacžquiz Yoozquin juc'ant kuzziz cjiskatzjapa, nižaza Yooz kamañ puntu ultim werara zizkatajo,

² nižaza arajpachquin Yooztan wiñaya kamz tjewzkatajo. Yoozqui ana toscara chiyasača. Jalla niiqui arajpachquin wiñaya kamzjapa taku tjaachiča tuqui timpuquiztanpacha.

³ Nekztan niž pinsita timpuquiz Yoozqui nii kamz puntuquiztan kjana-pacha kjanzt'ichiča paljayta liwriiñi Yooz tawkquiztan. Nii liwriiñi taku paljayajo, učhum Liwriiñi Yoozqui wejtquiz mantichiča. Jalla nižtiquiztan wejrtča liwriiñi taku paljayñi kamañchizqui.

⁴ Tito jila, jaziqui wejrqui amquin tii cartal cjiřzcuča. Wejt maati cuntamča. Amqui Yoozquin kuz litjuma tjaachamča. Jaziqui pucultan učhumqui Yoozquin kuzzizčhumča. Yooz Ejpžtan nižaza Jesucristo učhum Liwriiñižtan, amquiz yanapla, nižaza amquiz okzla, nižaza walikaj kamkatla.

ICLIZ JILIRINACAQUI ZUMA KAMZPANCHA

⁵ Creta yokquin wejrqui am ecchinča, criichi zoñinacžquiz juc'ant zuma kamañanacchiz cjiskatajo, nižaza weriž mantitacama zapa wajtquiz icliz jilirinaca uchajo.

⁶ Icliz jilirinacaqui zuma kamzpanča: Zuma kamañchizlaj niiqui, ana jakziltami čjul ujmi tjeeznasača. Icliz jilirinacaqui tsjaa tjunatanpanikaz cjispanča. Nižaza niž maatinacaqui Yoozquin criiñi cjispanča. Nižaza niž maatinacaqui zuma kamañchiz cjispanča, ana malcreado. Nižaza maa ejp cazñi kuzziz cjispanča.

⁷ Jakzilta icliz jilirit Yooz icliz cwitiñi puestuquiz uchta cječhaja, jalla niiqui zuma kamañchizkaz cjispanča, jalla nižtiquiztan ana jakziltami nižquiz čjul ujmi tjeeznasača. Nižaza ana persun kuzcamakaz pecñi cjispanča. Nižaza ana oralla žawjñi kuzziz cjispanča. Nižaza ana licñi kuzziz cjispanča. Nižaza ana kichjasñi kuzziz cjispanča. Nižaza ana ancha paaz pecñi kuzziz cjispanča.

⁸ Nižaza čjul tjonzñinacžquizimi zuma kjawzñi kuzziz cjispanča. Nižaza zumanacapan pecñi kuzziz cjispanča. Nižaza zuma pinsamintuchiz cjispanča. Nižaza Yooz kuzcamapankaz kamñi kuzziz cjispanča. Nižaza Yoozquin tjapa kuz sirwiñi cjispanča. Nižaza persun kuz zuma ewjazñi cjispanča, čjul uj paaz cjenami.

⁹ Nižaza apostoluž tjaajinta jaru ultim werar Yooz tawkquiz tjurt'ichi kuzziz cjispanča. Nižaza werar Yooz taku zuma tjaajincan, criichi zoñinacžquiz p'ekinchayasača, nižaza Yooz tawk quintra chiiñinacžquiz ninacž ana zuma pinsamintunaca tjeeznasača.

¹⁰ Creta yokquin walja ana zuma zoñinaca žejlča, ana jiliri cazñi. Nižaza ina razunanacaž chiiñiča. Nižaza criichinacžquiz incallča. Nižaza ninacaqui judío cuzturumpinac jaruzakaz kamz pecñiča. Ninacaqui juc'anti nižta ana waliž kamča.

¹¹ Nii ana zum zoñinacaqui ana wali tjaajinča, paaz gansjapakaz. Jalla ninacž ana zuma chiiñi ataquí chawjcsinsa, ana nižta tjaajnajo. Ninacaqui

ana wali tjaajincan, kjuychiz familianaca intiru quejpskatča. Jalla nižta ana wali tjaajinz ana waquiziča.

¹² Tsjii Cret wajtchiz žoñiqui ariwiñitača. Nii Cret žoñipacha cjichiča: “Cret wajtchiz žoñinacaqui toscar žoñinacapanča, nižaza malcreado žoñinacača, nižaza walja lujlñi žoñinacača, nižaza jayranacača”. Jalla nuž cjichiča nii Cret žoñiqui.

¹³ Jalla nii žoñiqui razuna chiichiča. Jalla nižtiquiztan Cret wajtchiz anawal criichinacžquiz zumpacha ujnaquiča, Yoozquin tjapa kuzziz werar Yooz tawkquiz tjurt'ajo.

¹⁴ Nižaza chiižinaquiča judío quintunaca ana juyzu paajo. Yekjap žoñinacaqui werar Yooz taku anaž catokz pecča. Jaziqi Cret žoñinacžquiz chiižinaquiča nii Yooz tawk quintra žoñinacž mantitanaca ana juyzu paajo.

¹⁵ Jakziltat Yooz kuzcama zuma kamčhaja, jalla niiqui čhjulu paacanami Yoozquin kuzzizpanča. Pero ana zuma kamañchiz ana criichinacaqui čhjulu paacanami ana Yoozquin kuzzizza, persun pecta kamzquinkaz kuzzizza. Ninacača ana zuma pinsamintuchizkazqui. Nižaza persun uj paažcumi ana naažniča.

¹⁶ Ninacaqui cjiñiča, “Yooz pajuča” cjican. Ultimquiziqui ana zuma kamañiž cjen Yooz quintranpanikaz kamča. Yoozqui ninacaž ana zuma kamtiquiztan anaž jutztaza. Ninacaqui Yooz kuzcama ana cažničanča. Nižaza ninacaqui ana čhjul zuma paazmi atasacha.

2

ZUMA TJAAJINTA PUNTU

¹ Tito jila, amqui zuma tjaajinta jaru tjaajnaquiča, jalla tužu:

² Chawc žoñinacaqui zuma ewjazñi kuzziz cjispanča. Nižaza rispitta kamañchiz cjispanča. Nižaza zuma pinsamintuchiz cjispanča. Nižaza Yoozquin tjapa kuzziz cjispanča. Nižaza zuma munaziñi kuzziz cjispanča. Nižaza tjurt'iñi kuzziz cjispanča.

³ Jalla nižta irata zakaz cjispanča chawc maatakanacami. Zuma kamañchiz cjispanča, jaknužt Yooz yujcquiz zuma kamz waquizičhaja, jalla nižta. Nižaza ana čhjul ana wal quintumi joojooñi cjispanča. Nižaza ana licñi kuzziz cjispanča. Nižaza parti maatakanacžquiz zumanaca tjaajiñipan cjispanča.

⁴ Nižaza parti maatakanacžquiz chiižinasacha, persun luctakžtanami maatinacžtanami zuma munaziñi cjisjapa.

⁵ Tur maatakanacaqui zuma pinsamintuchiz cjispanča. Nižaza anapanž yekja luctaka pinsispanča. Nižaza kjuya zuma cwitiñi cjispanča. Nižaza okžni kuzziz cjispanča. Nižaza luctakž jaru cjispanča. Jalla nižta zuma kamtiquiztan anaž jecmi Yooz tjaajinta tawk quintra chiyasacha. Jalla nižta tjaajnaquiča chawc maatakanacaqui.

⁶ Nižaza tjowa luctakanacžquiz zakaz chiižinaquiča nižta zuma kamañchiz kamajo. Nii tjowa luctakanacaqui ewjazñi kuzziz cjispanča, ana čhjul uj paazjapa.

⁷ Ampacha zumapankaz kamz waquiziča. Jalla nižtiquiztan tjowa luctakanacaqui am zuma kamañi cheržcu, nižta iratazakaz zuma kamasacha. Nižaza amqui tjaajincanaqui zumapan tjaajnaquiča zuma kuztan, nižaza humilde kuztan.

⁸ Jalla nuž amiž zuma tjaajintiquiztan anaž jecmi amquiziqui uj tjojt-nasacha, “Ana wali tjaajinchamž amqui” cjicanaqui. Nižaza amiž zuma

tjaajintiquiztan quintra žoñinacaqui azkataquiča. Ana čhjulumi am quintra uj tjeežni atasacha.

⁹ Amqui criichi piyunanaczquiz chiižinaquiča, ninacz patrunž mantita jaru cjeajajo. Nižaza čhulu paacanami patrunžquiz cuntintu cjiskatasacha, anapanž chayni kuzziz cjispanča.

¹⁰ Nižaza anača tjañi cjispanqui, antiz lijitumapanž cjispanča, zuma cumpliñi. Jalla nižta piyunanacaz kamtiquiztan, žoñinacaqui učum Liwriiñi Yooz tjajinta puntuquiztan “Walipanča” cjican chiyasacha.

¹¹ Yoozqui tjapa žoñinacalta Jesucristo cuchanzquichiča. Jaziqui jakziltat Jesucristužquiz kuzziz cječhaja liwriita cjesacha. Jalla nuž cuchanzquitaž cjen Yoozqui niž okzni kuzziz tjeeziča.

¹² Nii okzni kuzziz Yoozqui učumnacaquiz tjajža, Yooz tawk quintra paatanaca ecajo, nižaza ana wal kuzquiztan pectanaca ecjo. Nižaza Yoozqui tjajža, tii muntuquiz žejlcan persun kuz ewjazpanča čhulu uj paaz cjenami, nižaza čhulu ana wal chiiz cjenami. Nižaza Yooz kuzcama kamsanča. Nižaza Yoozquin tjapa kuz sirwispanča. Jalla nuž tjajža Yoozqui.

¹³ Učum Liwriiñi Jesucristuča pajk Yoozqui. Jalla niiqui zuma pajk obra tjeežcan tii muntuquiz wilta tjonaquiča. Jalla niž tjonz tjuñquiziqui cuntintuž cjequiča tjapa criichinacaqui. Jalla nižtiquiztan zuma kamcan niž tjonz tjewznaquiča. Jalla nižta tjewz waquiziča, jalla nii tjajža Yoozqui.

¹⁴ Nii tjonžni Jesucristuqui učum laycu ticziča, tjapa ana walinacquiztan liwriizjapa. Ana walinacquiztan učum liwriichiča, niž partir žoñi cjiskatzjapa, nižaza učumnacaquiz tjapaman zumanaca paaz ancha pecni kuzziz cjiskatzjapa.

¹⁵ Jalla nii tjajintanaca amqui zakaz tjajinstanča, zumpacha chiižincan, nižaza p'ekinčaycan. Nižaza nii tjajintanaca panž mantaquiča žoñinacaz nii tjajinta jaru kamajo. Jilir puestuchiz cjen nižta mantaquiča. Nekztan amiž tjajintiquiztanaqui anaj jecmi am iñarla.

3

PABLUZ CHIIZINTA TAKUNACA

¹ Criichi žoñinaczquiz cjuñskataquiča jalla tužupan: Ninaczlaqui gobierno mantiñi žoñinaczquizimi jilirinaczquizimi jalla ninacz mantuquiz zuma kamz waquiziča. Nižaza ninacaz mantitanaca caz waquiziča. Nižaza listupan cjispanča zuma obranaca langzjapa.

² Nižaza anaž jakziltižquizimi chjaawjkatasacha. Nižaza ana ch'aasni kuzziz cjispanča. Nižaza llan kuzziz cjispanča. Nižaza tjapa žoñinacztan humilde kuzziz cjispanča.

³ Tuquiqui učumqui ana criichi žoñinacazakaztača. Yooz puntuquiztan zumzu ana zizni kuzziztača. Nižaza ana Yoozquin cazni kuzziztača. Nižaza tsjii kjutni cjicjiñchumtača. Nižaza učumqui persun kuzcama ojklaiñchumtača, jaknužt učum ana wal kuz pecthaja, jalla nuž. Nižaza ana wal kuzziz kamiñchumtača. Nižaza tsjii želinchiz žoñiztakaz cjis peguiñchumtača ana wali zmazni. Nižaza učum ana wali kamtiquiztan žoñinacaqui učum quintra žawjñitača. Nižaza žoñinacztan porapat chjaawjkatni kuztan ch'aasiñchumtača.

⁴ Jalla nuž učumnacaz ana zuma kaman učum Liwriiñi Yoozqui niž zuma kuzmi nižaza niž okzni kuzmi tjeeziča.

⁵ Jalla nižta okzñi kuzziz tjeežcu Yoozqui učum liwriichiča. Učumnacaqui tsjii lii jaru kamtiquiztan ana liwriitatača. Pero učum ana zum kuz awjžintaž cjen, nižaza Yooz Espíritu Santuqui učumnac kuznacquiz luzziž cjen, Yoozqui učum liwriichiča. Nekztan ew zuma kamaña tjaachiča.

⁶ Učum Liwriiñi Jesucristuž cjen Yoozqui tjapa učumnacaquiz niž Espíritu Santo ancha zuma kuztan tjaachiča.

⁷ Yooz Ejpqui niž okzñi kuzziz tjeežcu učumnacaquiz nii favora paachiča, niž yujcquiz zumapan cjisjapa. Nižaza Yoozqui učumnacaquiz arajpach irinsa tanzñinaca cjskatchiča. Nižta irinsa tanzñinacaž cjen učumnacaqui tjewznača Yooztan chica wiñaya kamzjapa.

⁸ Ultim werarača Yoozquiztan tjaajintaqui. Nižaza zumpacha tjurt'iñi kuztan nii tjaajintanacquiz panž tjurt'aquiča, Yoozquin criichinacaž zuma kamzquin kuz tjaajo. Jalla nii tjaajintaqui ancha zumapanča, tjappach žoñinacžta. Nižaza zumapanž yanapča Yooz kamañquiz juc'ant zuma kamzjapa.

⁹ Zumzu ch'aazñinacžquiz ana mitisa, nižaza zarakaquiča nii zumzu ch'aazñinacžquiztan. Nižaza tuquita atchi ejpnacž puntu parlita nonzquiztan zarakaquiča. Nižaza Moisés lii puntuquiztan ch'aasnan jalla nižtanaca nonzquiztan zarakaquiča. Tjapa nii ana wali parlitanacaqui inakazza. Zuma kamañchiz kami anapanž yanapča.

¹⁰ Jakzilta icliz criichinacat pjali t'akačhaja, jalla nii žoñi kjawznaquiča. Nekztan chiižinaquiča tsjii wiltami pizc wiltami. Amiž chiižinta anaž nonznaquiž niiqui, iclizquiztan chjatkattaž cjequiča.

¹¹ Niiž ana nonžtiquiztan amqui zizzaquiča, nii žoñiqui ana zuma kuzzizpanča, nižaza tsjii kjutñi chjichta kuzzizpanča, jalla nii. Persunpacha niž uj paata naaznasača. Ancha ujnaca paaz pecñi kuzziz cjen castictaž cjequiča.

¹² Wejrqui amquin Artemas už Tíquico cuchanžcača. Jalla niž iran-tižqitan, amqui wejtquin uri tjonz pecalla. Wejrqui Nicópolis wajtquin želača. Jalla nicju awti timpu watz tantiichinča.

¹³ Nii tjurt'ižiñi Zenas awjatu, nižaza Apolos, jalla nii pucultan žoñinaca zumpacha despachaquiča amqui, ninaca ana čjulumi pjaltizjapa. Nižaza zumpacha žaka cjižinaquiča ninaca ojkzjapa.

¹⁴ Nižaza učum criichinacaqui zuma kamznacquiz kuz tjaaz waquiziča. Nekztan t'akjir criichi žoñinacžquiz yanapaquiča. Nižaza wacchi zuma obranaca tjeeznaquiča.

¹⁵ Tjapa wejtta chica kamñi žoñinacaqui amquin tsaanžquiča. Nižaza wejrmi amquin tsaanžcuča. Nižaza amqui wejtnaca k'ayi criichinacžquiz tsaanžinaquiča. Yoozqui amquiz nižaza tjapa nekz žejlñi criichi žoñinacžtan zumapaj yanapla. Jalla nužoj cjila. Amén.

LA CARTA DEL APOSTOL SAN PABLO A FILEMON

PABLUQUI FILEMONZQUIZ CARTA APAYCHICHA, ONESIMUZQUIZ ZUMA RISIWAJO

¹ Wejrtcha Pablutqui. Jesucristužquin sirwiñiž cjen carsilquiz chawjctitcha. Filemón jila, amqui Yoozquin sirwiñi mazimcha, nižaza pecta jilamcha. Wejttan Timoteo jilžtan amquin tii cartal cjižcuča.

² Nižaza cjižcuča am kjuyquiz ajczñi criichi žoñinacžquin. Nižaza cjižcuča Apia cullacaquin, nižaza Arquipo jilžquin. Arquipuqui zuma zultatužtakaz tjurt'iñi kuzziz Yoozquin sirwiča.

³ Učhum Yooz Ejpžtan nižaza učhum Jesucristo Jiliržtan, ančucaquiz zumapaj yanapla, nižaza walikaj kamkatla.

FILEMON ANCHA ZUMA TJAPA KUZZIZZA

⁴ Yoozquin mayizican am cjuñznuča. Amiž cjen wejrqui tirapan Yoozquin sparaquič jiwča.

⁵ Amqui zuma munaziñi kuzziz kamñamča tjapa criichi jilanacžtan. Nižaza amqui Jesucristužquin tjapa kuzziz criichamča. Jalla nii am puntu zizcu, Yoozquin sparaquič cjichinča.

⁶ Ammi parti Jesucristužquin kuzziz žoñinacami Yooz zuma kamañchizza. Jesucristužquin kuzziz cjen učumnacalta ancha Yooz zumanaca žejlča. Amiž zuma kamz cjen žoñinacaqui Yooziž tjaata zumanaca puntuquiztan juc'anti intintazñi cjissiča.

⁷ Filemón jila, amiž cjen criichi jilanacž kuznacaqui cuntintu cjiskattača. Wejrqui zakaz nižaza cuntintu cjissinča, am zuma munaziñi kuzziz cjen.

PABLUQUI TSJII FAVORA MAYCHICHA

⁸ Wejrqui Cristuž illzta apostultča. Jalla nižtiquiztan wejrqui jaknužt am kamz waquizichaja, jalla nii amquiz mantasača.

⁹ Pero amquin ana mantača. Antiz amquiztan tsjii favora mayuča. Wejrtcha chawcalla, nižaza Jesucristužquin sirwiñiž cjen carsilquiz preso želuča. Amtan zuma munazican, amquiz rocž pecuča Onesimužquiz tsjii favora paajo.

¹⁰ Tii carsilquiz žejlcan, wejrqui Onesimužquiz Yooz taku paljaychinča. Nekztan Onesimuqui Yoozquin criichiž cjen wejt maati cunta cjissiča.

¹¹ Niiž tuquiqui Onesimuqui ana wal kamañquiz luzzitača. Anziqui zuma kamañquiz luzziča. Jaziqiuñi amtami wejtami walipanča.

¹² Jaziqiuñi wilta amquin cuchanžcuča. Nižaza niiž irantižcu amqui zuma risiwaquiča, jaknužt wejr risiwchamča, jalla nuž.

¹³ Tekz wejttan chica ecličaj cjiwča. Carsilquiz želan Onesimuqui am cuntiquiztan wejtquiz sirwasacha. Wejrqui Yooz taku paljaytiquiztan tii carsilquiz želuča.

¹⁴ Pero amtan ima zumpacha parlican, wejrqui anal Onésimo ecliskatz pecuča. Amquiz anal ancha mantiz pecuča, wejtta tsjii favora paazjapa. Onésimo wejttan chica tira kamasacha. Pero am persun kuzquiztan nuž tantiitaž niil pecuča.

¹⁵ Tsjii timpuqui Onesimuqui amquiztan zarakchiča. Cunamit nižta katčani, amtan chica tsjii criichi jila watay wata cjisjapa.

¹⁶ Jaziqui anača piyunakazqui. Antiz Yoozquin criichi k'ayi jilazakazza. Wejrqui nižquin k'ayachuča. Walikazza niiqui. Amzakaz Onesimužquiz k'ayachaquiča am zuma žoñiž cjen, nižaza Yoozquin criichi jilažta cjen.

¹⁷ Nižaza amqui wejtquiz zuma amigumžlaj niiqui nekztan Onésimo zuma risiwaquiča, wejt cunta cjenaqui.

¹⁸ Tuquiqui Onesimuqui amquiz ana wali paachizlaj niiqui, weril respontača. Nižaza Onesimuqui amquiz čhjulu kaja cjenami, wejtquizkam cobraquiča.

¹⁹ Wejrpacha tii litranaca persun kjaržtan cijržcuča, wejrqui tjapa pacača. Pero wejr am cjuñskatasacha, weriž cjen amqui Yoozquin criichamča.

²⁰ Wejt jila, jalla nii favoraž paalla, Yoozquin criichi jilažta. Wejr kuznalla, Cristužquin criichi jilažta.

²¹ Yooz kuzcama kamñamča. Jaziqui nayuča, amqui tii weriž mayta favorquiztan juc'anti paaquiča, nii. Jalla nužupanž cjequiča.

²² Nižaza wejtta tsjii alujamintu tjacžinalla. Wejrqui ančhuc chertzni tjonz pecuča. Yooz munan nižaza ančucaž mayizitaž cjen wejrqui tjonacha, ančhuc chertzni. Jalla nii ojkzjapa tjewznuča.

²³ Epafrasqui amquin tsaanžquiča. Niiqui wejttan chica carsilquiz žejlča, Jesucristužquin sirwiñiž cjen zakaz.

²⁴ Marcustan, Aristarcužtan, Demastan, nižaza Lucastan, jalla ninacaqui amquin zakaz tsaanžquiča. Ninacača wejt mazinacaqui, Yooz sirwiñi langžniča.

²⁵ Učhum Jesucristo Jiliriqui amquiz zumaj yanapla. Jalla nužoj cjila. Amén.

LA CARTA A LOS HEBREOS

YOOZ MAJCH PUNTU

¹ Tuqui timpuqui Yoozqui niiz puntunaca zizkatchiicha uĥum tuquita atchi ejpnacĥquiz. Yoozqui niiz cuntiquiztan chiiñi profetanacĥquiz jaknuĥquiztanami wiltan wiltan niiz taku zizkatchiicha. Nekztan nii profetanacaqui uĥum tuquita atchi ejpnacĥquiz parlichicha.

² Anziqui tii timpuquiz Yoozqui niiz Majch cjen uĥumnacaquiz juc'ant zizkatchiicha niiz puntunaca. Yooz Majchta tjapa Źejlñinacaqui. Yooz Ejpqui niiz Majch cjen tjappacha paachiicha. Nekztan niiz Majch mantuquiz tjappacha utchiicha.

³ Yooz Majchtan Yooz Ejpĥtan tsjii kuzzizpanĥa, jalla niĥtiquiztan Yooz Majchkazza Yooz Ejpĥ juc'ant zuma kuz tjeezñiqui. Niĥaza Yooz Majch kjarquiz tii muntu Źejlĥa. Niiz chiitaĥ cjen tii muntu Źejlñipanĥa. Walja azzizza niiz chiitaqui. Nii Majchpacha uĥum ujnacquiztan ticziicha, uĥum pertunta cjisjapa. Jalla nekztan arajpacha ojkiicha. Jalla nicju arajpach Yooz Ejpĥ Źew latuquiz julziicha, mantiñijapa.

⁴ Nii Yooz Majchqui tjapa anjilancĥquiztan tsjan chawc jiliriicha. Niĥaza tjapa anjilanacĥquiztan tsjan zuma puesto tanzicha.

⁵ Yooz Ejpqui ana jakzilta anjilĥquizimi tuĥ chiichiicha:

“Amĥa wejt Majchqui. Jaziqui amquin wejt kamañal tjaa-uĥa”.

Jalla nuĥ cjican, ana jakzilta anjilĥquizimi chiichiicha. Antiz niiz zinta Majchquiz alajakaz nuĥ chiichiicha. Niĥaza Yooz Ejpqui niiz Majch puntuquiztan cjichizakazza:

“Wejrqui niiztajapa niiz Ejp cjeeĥa. Niiqui wejttajapa wejt Majch cjequiĥa”.

⁶ Wiruñ Yooz Ejpqui niiz zinta Majch tii muntuquiz cuchanĥquiz pinsiscu tuĥ chiichiicha:

“Tjapa wejt anjilanacaqui wejt Majchquiz rispitle”.

⁷ Yoozqui anjilanacĥ puntuquiztan tuĥ chiichiicha:

“Wejrqui wejt anjilanaca cuchniñĥa tsjii apura ojkiñi tjamiĥtakaz. Niĥaza wejrqui wejtquiz sirwiñi anjilanacĥquiz cjiskatuĥa tsjii uj peekstaĥtakaz”.

⁸ Pero niiz Majch puntuquiztan Yooz Ejpqui tuĥ cjichiicha:

“Amĥa Yoozqui. Am mantiz puestuqui wiñayjapa cjequiĥa. Am mantizqui lijitumapankazza.

⁹ Amqui zuma lijituma mantiz pecñampanĥa. Yooz kuz quintrā paañinaca panĥ chjaawjñamĥa amqui. Wejrtĥa am Yoozqui. Amquiz juc'ant honorchiz cjiskatchinĥa, ĥjul Źejlñinacĥquiztanami”.

¹⁰ Yooz Ejpqui niiz Majch puntuquiztan cjichizakazza:

“Amqui Jilirimĥa, tuqui timpuquiztanpacha amqui anaĥ ĥjulquiztanami tii mundo paachamĥa. Niĥaza am kjarĥtan arajpacha paachamĥa.

¹¹ Amqui wiñayjapam Źelaquiĥa. Pero nii paata arajpachami yokami tucuzinznaquiĥa. Tsjel zquitiĥtakaz tucuzinznaquiĥa.

¹² Piiĥta zquitiĥtakaz tsjii latu ectaĥ cjequiĥa. Liwj campiitaĥ cjequiĥa. Amzti ana niĥta campiyaquiĥa. Amqui wiñay wiñayjapa cjequiĥa”.

¹³ Yoozqui niiz Majchquiz tuĥ cjichizakazza:

“Wejt Źew latuquiz julzna, am quintranaca kjojchtan tjeczcama”.

Jalla nuž Yooz Ejpqui cjichiča niž Majchquiz. Ana wira tsjii anjilžquiz nuž chiichiča.

¹⁴ Tjapa anjilanacača ana cheraña ojklayñiqui, Yooztajapakaz sirwiñiča. Yoozqui ninaca cuchanča, liwriita zoñinaczquiz yanapi.

2

LIWRIIÑI TAKU IMPORTIČHA

¹ Jilanaca, cullaquinaca, Yooz puntu tjaajintanaczquiz juc'anti kuz tjaaz waquiziča, werar zuma kamañquiztan tsjii kjutñi ana chjitzta cjisjapa.

² Tuquiqui anjilanacaqui zoñinaczquiz chiichiča. Jalla nii chiitaqui walñitača. Jakziltat nii chiita jaru ana kamtčhaja, uj paachiča. Nekztan nii uj paañinacaqui ninacz ana zuma paatiquiztan jama castictapan cjissiča.

³ Nižaza tii timpuquiziqui zuma liwriiñi takuqui učumnacaquiz zumpacha kjanzt'itača. Jalla nii liwriiñi taku ana catokaquiz niiqui, ¿kjaž Yooz castictiquiztan atipasajo? Anapanž nii castictiquiztan atipi atasača. Primeraqui nii liwriiñi takuqui Jesucristo Jiliriž paljaytatača. Nekztanaqui Jesucristuž tjaajinta zoñinacaqui nii liwriiñi takupacha učumnacaquiz lijituma paljaychiča.

⁴ Jalla nuž paljayan Yoozqui zuma pajk obranacami nižaza ispantichucanacami, nižaza tjapaman milajrunacami paachiča. Nižaza Yoozqui criichi zoñinaczquiz niž munañpacama niž Espiritu Santuž tjaata kamañanaca tojunchiča. Jalla nižta Yoozqui tjeeziča, nii liwriiñi takumi lijitumača, jalla nii.

JESUCRISTUQUI ZOÑI CJISSIČHA

⁵ Yoozqui niž wiñayjapa mantiz puestuquiz anjilanaca ana utchiča. Jalla nii puntuquiztan cjižcuča.

⁶ Tsjii cjižta Yooz takuqui tuž cjiča:

“Zoñiča anaž čjulumi. Yooz Ejp, ¿kjažtiquiztan amqui zoñinaca cjuñjo? ¿Kjažtiquiztan zoñinaczquiz honorchiz cjiskatjo?”

⁷ Tii kjaž watanaca anjilanacaqui zoñžquiztan tsjan jilir puestuquiz žejlča. Jalla nuž Yoozqui munchiča. Nekztanaqui Yoozqui zoñžquiz juc'ant honorchiz cjiskataquiča anjilanaczquiztan. Nižaza juc'ant zuma kamzqui zoñžquiz tjaataž cjequiča.

⁸ Yoozqui zoñž mantuquiz tjapa tii muntupacha utča”.

Jalla nuž chiichiča Yooz takuqui. Jaziqui Yoozqui zoñž mantuquiz tjapa tii muntu žejlñinaca utchiča. Jalla nižtiquiztan zoñž mantuquiz tjappachapankaz cjequiča. Imazipanča tjappacha zoñž mantuquiz žejlča.

⁹ Pero Jesucristuž puntu naya. Niiqui tsjii kjažtapacha anjilanaczquiztan upa jilir puestuquiz cjiskattatača, zoñinacz laycu ticzjapa. Yooz zoñinaczquiz okzñiž cjen Jesucristuqui tjapa zoñinacz laycu ticziča. Jalla nuž ticztiquiztan Yoozqui nižquiz juc'ant zuma honora tjaachiča; nižaza Jesucristuqui juc'ant zuma kamaña tanziča.

¹⁰ Yooz cjen tjappacha žejlča, nižaza nižtajapa žejlča. Zuma Yoozqui pinsichiča, tjapa niž maatinacaqui pruebanaca watžcu, nižtan čica honorchiz cjequiča. Jalla nii pinsichiča. Jalla nižtiquiztan Yooz Ejpqui pinsichizakazza, Jesucristuqui sufrisnaca watžcu, ancha zuma Liwriiñi cjisnaquiča, jalla nii. Jesucristupankazza zoñinaca Liwriiñiqui. Jalla nii liwriiñi pinsitaqui ancha zumača.

¹¹ Jaziqui Jesucristuqui zoñinaczquiz Yooz irata zuma kamañchiz cjiskatasacha. Nii zuma kamančiz cjiskatñimi, nižaza nii zuma kamañchiz

cjiskattanacami tsjii Yooz Ejpchizkazza. Jalla nižtiquiztan Yooz Majchqui liwriita žoñinacžquiz “Wejt jilanaca” cjican chiizjapa anaž azza.

¹² Yooz tawk liwruquiz Jesucristuqui tuž cjiča:

“Wejrqui wejt jilanacžquiz Yooz puntu chižinača. Yooz partir žoñinacžtan žejlcan Yoozquin honora tjaacha”.

¹³ Cristuqui zakaz cjiča:

“Wejrtča Yoozquinkaz kuzziztqui”.

Wilta zakaz cjiča:

“Yoozqui wejtquiz žoñinaca tjaachiča, maatinacažtakaz. Yooz Tata, tekz žejlča ninacami wejrmi”.

¹⁴ Jesucristuž liwriita žoñinacaqui curpuchizza, nižaza ljocchizza. Jalla nižtiquiztan Jesucristuqui curpuchiz nižaza ljocchiz zakaz cjissiča. Jalla nižta curpuchiz cjiscu, ticziča ana wal diablu tjatanzjapa. Nii diabluqui konz poderchizza. Pero ticžtiquiztan Jesucristuqui diabluž poder atipchiča.

¹⁵ Žoñinacaqui ticz ekskcu diabluž mantuquizpan žejlča. Nii žoñinaca liwriizjapa, Jesucristuqui ticziča.

¹⁶ Jesucristuqui tii muntuquiz tjonchiča, ana anjilanacžquiz yanapzjapa antiz Abrahamž majchmaatinacžquiz yanapzjapa. Jakziltat Jesucristužquin kuz tjaachaja jalla ninacaqui Abrahamž majchmaatinacažtakazza.

¹⁷ Žoñinaca liwriiñi cjisjapa, Jesucristuqui žoñinaca iratpacha cjistanča. Jalla nuž žoñinaca irata cjican, Jesucristuqui žoñinacžtajapa zuma lijitum palt'iziñi cjissiča Yooz yujcquiziqui. Okzñi kuzzizza učhum palt'iziñi. Žoñinacžtajapa palt'iziñi cjican Jesucristuqui Yoozta zuma wilanažtakaz ticziča. Jalla nižta ticziča, ujchiz žoñinacž laycu.

¹⁸ Jesucristupacha sufrichiča, nižaza diabluqui Jesucristo yanziča ujquiz tjojtskatzjapa. Pero sufrisquiztanami diabluž yanžtanami atipchiča. Jalla nuž tjapa atipžcu Jesucristuqui žoñinacžquiz yanapi atasača, ana ujquiz tjojtzkatzjapa.

3

JESUCRISTUQUI MOISESQUIZTAN TSJAN JILIRIČHA

¹ Yooz kamañchiz jilanaca, cullaquinaca, Yoozqui ančucaquiz kjawziča Jesucristužquin kuzziz cjisjapa. Jalla nižtiquiztan arajpach wajtchiz mazinaca cjissinčucča. Ančucqui Jesucristuž kuz zumpacha naya. Jalla niiqui učhumnacalta tsjan jilir apóstol cuntača, Yooz puntu zuma tjaajinchiž cjen. Nižaza učhumnacalta timpluquiz langzñi pajk jiliri cuntača, učhumnacatan Yoozta zuma cjiskatchiž cjen.

² Tuquiqui Yoozqui Moisés utchiča tsjii puestuquiz. Moisesqui nii puesto zuma cumplichiča, Yooz kjuychiz žoñinacžquiz sirwican. Jalla nižta irata Yoozqui Jesucristo tsjii puestuquiz utchiča. Jesucristo zakaz nii puesto zumapan cumplichiča Yooz kjuychiz žoñinacžtajapa.

³ Tsjii kjuy kjuyñi zoñiqui nii kjuyquiztan tsjan honorchizza. Jalla nižta irata Jesucristuqui Moisesquiztan tsjan honorchizza. Jalla nuž waquizichiča.

⁴ Zapa kjuyaqui tsjii zoñiž kjuytača. Pero Yoozza tjappacha paataqui.

⁵ Yooztajapa sirwiñi Moisesqui niž puestuquiz zuma cumpliñi kamchiča, tjapa Yooz kjuychiz žoñinaca irpican. Moisesqui Yooz puntunaca tjaajinchiča. Jalla nižta tjaajincan Moisequi Yoozquin sirwichiča. Wiruñiqui nii Yooz puntunacaqui tsjan kjana tjaajintatača.

⁶ Jesucristuzti anača Yoozquin sirwiñikazza. Antiz Yooz Majchpanča. Jalla niiqui niž puestuquiz zuma cumpliñi kamchizakazza, Yooz kjuychiz

žoñinacžquiz mantican, tsjii jilir maatižtakaz. Nižaza učumnacača Yooz kjuychiz žoñinacaqui. Jakziltat tirapan Yoozquin tjurt'ichi kuzzizlaja, jalla niičha ultimu Yooz kjuychiz žoñiqui. Jesucristuqui taku tjaachiča, Yooz žoñinacaqui arajpachquin niiztan chica kamaquiča, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niičha ultimpacha Yooz kjuychiz žoñiqui.

ANA CHOJRU KUZZIZ CJEE

⁷ Jalla nii puntuquiztan Yooz Espíritu Santuqui Yooz tawk liwruquiz tuž cjiča:

“Anztan Yooz kjawžta nonžcu,

⁸ anaž chojru kuzziz cjee. Ančhuca tuquita atchi ejpnacaqui ch'ekti yokquin žejlcan, chojru kuztan Yooz quintra cjissiča. Chojru kuztan persun kuzcamakaz kamz pecchiča, Yooz žawjwa zjijquinzjapa.

⁹ Pusi tunc watanaca ninacaqui Yooz pajk obranaca cherchiča. Jalla nuž cheržcumi, tirapan Yooz žawjwa zjijquinz pecchiča. Anapan criyatča.

¹⁰ Jalla nižtiquiztan nii žoñinacž quintra žawjziča Yoozqui. Ninacž puntuquiztan Yoozqui tuž cjichiča: ‘Ninacž kuzqui tsjii kjutñipan pinsiča. Wejt zuma kamaña ana pajz pecča’. Nuž cjichiča Yooz Ejpqui.

¹¹ Jalla nižtiquiztan Yoozqui ninacž quintra žawjžcu, tsjii juramentužtan chiižinchiča, tuž cjican: ‘Anapan wejt famillquiz luzkatača, wejttan chica jeejzjapa’ ”.

¹² Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequiž niiqui, ultim žejtñi Yoozquiztan zarazkatta cjequiča.

¹³ Tii timpuquizkaz Yoozqui žoñinaca kjawznaquiča, jaziqui zapurupan porapat p'ekinchayasaquiča, Yoozquin nonznajo. Anapanž ančhucqui persun uj paažcu incallskataquiča, Yooz quintra paazjapa. Jalla nižta anawali paažcu chojru kuzziz cjisnasača ančhucqui. Nekztan Yooz kjawžta ana nonžñi atasača. Ančhucqui jalla nižta anazum kuzziz ana cjisjapa, porapat p'ekinchayasaquiča.

¹⁴ Tuquiqui učumqui Jesucristužquin kuz tjaachinčumča. Jakziltat tirapan ticzcama Jesucristužquin tjurt'ichi kuzziz kamčhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anztan Yooz kjawžta nonžcu, anaž chojru kuztan Yooz quintra cjee. Jaknužt ančhuca tuquita atchi ejpnaca chojru kuztan Yooz quintra želatčhaja, anaž nižta cjee”.

¹⁶ Egipto yokquiztan Moisés irpita žoñinacaqui, jalla ninacatača Yooz quintranacaqui. Yooz taku nonžcupacha ninacatača chojru kuzzizpan.

¹⁷ Nekztan Yoozqui pusi tunc wata ninacžtajapa žawjchiča. Ninacž uj paatiquiztan žawjchiča. Nekztan ninacaqui ch'ekti yokquin walja ticziča.

¹⁸ Nižaza Yoozqui tsjii juramentužtan chiižinchiča, “Anapan wejt famillquiz luzkatača ančhucqui wejttan chica jeejzjapa”, cjican. Jalla ninacača Yooz taku ana cazñinacaqui.

¹⁹ Jalla ninacaqui ana criichiž cjen, Yooz wajtquin ana luzi atchiča. Jalla nii kjanapacha intintita cjesača.

4

YOOZ FAMILLQUIZ LUZA, NIIZTAN JEEJZJAPA

¹ Tuquiqui Yooz Ejpqui taku ecchiča tuž cjican, “Jakziltat weriž kjawžta nonžaj niiqui, wejttan chica jeejznaquiča, nižaza liwriita cjesača”. Nii

Yooz ecta takuqui tirapan walcha. Jaziqui ućhumqui persun kuz cuitila. Persun kuz ana cuitaquiž niiqui, ana Yooztan chica jeejnaćhiani.

² Ućhumnacaquizimi tuquita ejpźquizimi nii zuma liwriińi Yooz taku paljaytataća. Pero ninacaqui inakaz nonzića, ana criichiž cjen.

³ Ućhumqui nii liwriińi taku catokźcu criichinćhumća. Jalla niźtiquiztan liwriitaž cjen Yooztan chica jeejža. Pero ninacž puntuquiztan Yoozqui cjichića:

“Ninacž quintra žajwźcu, wejrqui tsjii juramentuźtan chiichinća, tuž cji-can: ‘Ninacaqui wejttan chica ana jeejnaquića, anapan wejt familquiz luzkataća’ ”.

Yoozqui tii muntu paaźcu, nii langz źerzića; sojta tjuńinacakaz langzića.

⁴ Pakallak tjuń puntuquiztan tsjii Yooz takuqui tuž cjića:

“Pakallak tjuńquiziqui Yoozqui tjapa niiž muntu paaz langzquiztan jeejzića”.

⁵ Tsjii zakaz Yooz takuqui cjića:

“Nii uj paańi žońinacaqui anapan wejttan chica jeejznasaća, wejt famillquiz cjisjapa”.

⁶ Nii tuquita ejpnacaqui liwriińi taku nonźcu ana Yooz famillquiz cjissića, Yooz tawk jaru ana kamchiž cjen. Jalla niźtiquiztan anziqui iya žońinacaqui Yooz famillquiz cjesaća.

⁷ Yoozqui anzta timpuqui sitchića, žońinaca wilta kjawzjapa. Ažk watanaca nii tuquita ejpnacźquiz chiiźcu Yoozqui Davidźquiz chiikatchića, tuž cji-can: “Anzta žońinacami, niźaza jazta žońinacami, Yooz taku nonźcu, ana chojru kuzziz cjee”.

Jalla nii Yooz takuqui tuquitanpacha chiiźintaća.

⁸ Josuequi žońinacźquiz ultimu jeejskattasaž niiqui, Yoozqui ana chiitasaćha, iya timpu želaquića žońinacāž Yooz famillquiz jeejzjapa.

⁹ Jalla niźtiquiztan anzta timpuquizzakaz Yoozquin kuzziz žońinacaqui Yooz famillquiz luzasaća, Yooztan jeejzjapa.

¹⁰ Jakziltat Yooz famillquiz luzzaja, jalla niiqui ch'aman kamznacquiztan jeejža, jaknužt Yoozqui niiž mundo paaz langztiquiztan jeejztćhaja, jalla niźta.

¹¹ Jalla niźtiquiztan ućhumnacaqui Yoozquin tjapa kuz tjaaz waquizića, Yooztan jeejzjapa, niźaza Yooz famillquiz kamzjapa. Ućhum tuquita atchi ejpnacaqui ana criichiž cjen ana Yooz famillquiz luzzića, antiz castic-tataća. Jalla ana niźta casticta cjisjapa, ućhumqui criizpanž waquizića.

¹² Yooz takuqui žejtńi Yooz azzizza, žońinacž kuzquiz zuma, ana zuma, jalla nii tjeezjapa, niźaza cjuńskatzjapa. Niźaza nii Yooz takuqui tsjii porap latu archiz cuchillužtakazza. Pero tsjan arića. Yooz takuća žońž animquizimi kuzquizimi uj cjuńskatńi. Tsjii žońž kuzqui parti žońinacźquiztan chjo-jta cjesaž niimi, jalla nii kuzquiz Yooz takuqui uj cjuńskatasaćha. Niźaza Yooz takuqui žońž kuzquiz pinsitanacami tantiitanacami kjanapacha tjeeža, zuma ana zuma, jalla nii.

¹³ Yoozqui tjappacha paachića. Jalla niźtiquiztan anaž jakziltami niižquiztan chjojzńi atasaćha. Ultim pjalz tjuńquiziqui tjappacha persun kamań puntuquiztan, niźaza kjažtat kamtćhaja, jalla nii puntunacquiztan cuenta tjaastanća. Tjapa žońinacāž kamta puntunacquiztan Yoozqui liwzizza, niižquiztan ana tsjii takumi chjojzńi atasaćha.

JESUCRISTUCHA UCHUM PALT'IZIÑIQUI

¹⁴ Jesucristuća Yooz Maatiqui. Jalla niićha ućhum chawjc timplu jiliri cuntaća. Niźaza niiqui arajpachquin Yooz yujcquin luzzića,

učumnacaltajapa tsjii wali palt'iziñi cjisjapa. Jalla nižtiquiztan učumqui Jesucristužquin kuzziz kamcan jalla nii kamzquiz tjurt'ichi kuzziz cjila.

¹⁵ Učumqui Yooz irata zuma kamzjapa panž pjaltičha. Pero Cristuqui zuma okzñi kuztan učum criichinacžquiz cjuñča, nižaza yanapasacha. Učum irata Jesucristuqui pruebanaca watchičha. Ana uj paacan tјapaman pruebanaca watchičha. Jalla nižtiquiztan, Jesucristuqui zuma okzñi kuztan učumnacaltajapa palt'izinasacha.

¹⁶ Jalla nižtiquiztan čhjul pruebanaca watanami učumnacaqui okzñi Jesucristužquin tјapa kuztan cjee. Yooz yujcquin macjatz ana jiwjataquiča, učum ujnaca pertuna mayizizjapa, nižaza pruebanaca želan, Yoozquiztan mayizaquiča nii pruebanaca zuma watzjapa.

5

¹ Tјapa timplu jilirinacaqui žoñinacžquiztan illztatača, žoñinacžtajapa Yoozquin palt'izinajo. Nižaza nii timplu jilirinacaqui žoñinacž wilananacami Yooz yujcquiz timplu altarquiz nonžñitača, žoñinacž ujnaca pertunta cjisjapa. Nižaza žoñinacžtajapa ninacž ofrendanaca Yooz yujcquiz tjeežñitača.

² Timplu jilirinacapacha pruebanaca sufriča, parti žoñinaca irata. Nižaza uj paača parti žoñinaca irata. Jalla nižtiquiztan nii jilirinacaqui pasinziz kuzziz cjesača ana zizñi žoñinacžtajapami, nižaza tsjii kjutñi cjicjiñi žoñinacžtajapami.

³ Ujchiz zakaz cjicanaqui nii timplu jilirinacami persun ujnacquiztanami nižaza parti žoñinacž ujnacquiztanami Yoozquin wilana tjaastanča, pertunta cjisjapa.

⁴ Nižaza anaž jakziltami timplu jilirž puestuquiz persun kuzcama luzasacha. Yoozqui žoñinaca kjawža, nii puestuquiz utzjapa. Jaknužt Yoozqui Aarón cjita žoñi utčhaja, jalla nižta.

⁵ Nižaza Cristuqui anaž persun kuzcama palt'iziñi puestuquiz luzziqui. Yoozpankazza nii honorchiz puestuquiz utchiqui. Nižaza Yoozqui Cristuž puntuquiztan tuž cjichiča:

“Amča wejt persun maatumqui. Amquiz wejt kamañal tјaa-uča”.

⁶ Cristuž puntuquiztan Yoozqui zakaz cjiča:

“Amča žoñinacžtajapa palt'iziñi jiliriqui wiñay wiñayajapa. Jaknužt Melquisedec cjitaqui zuma palt'iziñi jiliri uchtatažlaja, jalla nižta”.

⁷ Tii muntuquiz kamcan Jesucristuqui Yooz Ejpžtan parličičha, nižaza Yooz Ejpžquin rocchiča, tjurt'iñi kuzzizpan kami yanapzjapa. Altu tawkžtan chiican nižaza kaacan Yoozquin jalla nuž mayizichiča. Yoozqui Jesucristo liwrii atatča, ana cruzquiz ticzjapa. Pero Jesucristuž ticquiztan ana liwriitaž cjenami Yooz Ejpqui nižquiz yanapchiča, Yooz kuzcamapankaz kamzjapa. Jesucristuqui Yooz Ejpžquin kuzziz cjen yanaptatača.

⁸ Cristuqui Yooz Majch cjenami sufrichiča. Jalla nižta tii muntuquiz sufrichiž cjen Yooz Ejpž kuzcamapankaz kamchiča.

⁹ Jalla nuž tii muntuquiz sufrichiž cjenami, jalla niiča Yooz kuzcamapankaz kamñiqui. Jalla nižtiquiztan žoñinaca liwriiñiqui cjissiča. Jakziltanacat nižquiz cazzaja, jalla tјapa ninacaqui wiñayjapa liwriitaž cjequiča.

¹⁰ Yooz Ejpqui Cristo utchicha žoñinacžtajapa liwriiñi nižaza palt'iziñi cjisjapa. Jaknužt Melquisedec cjita žoñiqui palt'iziñi jiliri uchtatažlaja, jalla nižtapacha.

PERSUN KUZ CUITASAQUICHA

¹¹ Jalla nii puntuquiztan waljaž takunacaž žejlča. Pero ch'amača ančhucaquiz intintiskatzqui.

¹² Ažk watanaca ančhucqui criichinčhucča. Jaziqui Yooz puntu tjaajiñi maestrunaca cjichuca cjiwča. Pero wiltakaz ančhucqui tjaajinta cjis pecča Yooz tawk pjasilanaca zizjapa. Ančhucqui wawanacažtakaz lichikaz pecča Yooz tawk čjjeri lujlzquiztanaqui.

¹³ Lichten mantinasñi wawažtakazza ančhucqui. Jaziqui lijitum Yooz kamaña ana zuma kamiñčhucča.

¹⁴ Čjjeri lujlzqui pajk žoñinacžtača. Jalla nižta irata ch'aman intintazuc puntunaca zuma criichi žoñinacžtajapača. Jalla ninacaqui zuma kamčiž cjen zumpacha tantiyasača kamañ puntunaca, zuma, anazuma, jalla nii.

6

¹ Pjasil Yooz puntunacquiztan zizñi, cjee. Jesucristuž puntuquiztan tjaajintanaca zizzinčhucča. Jalla nižtiquiztan ančhucqui nii puntunacquiztan anaž iya tjaajinz pecasača, jalla. Ančhucqui zizzinčhuctača, casticu zjijcñi paaznaca puntuquiztanami nižaza kuz campiiz puntuquiztanami, nižaza Yoozquin kuz tjaaz puntuquiztanami,

² nižaza bautismo puntuquiztanami, nižaza kjaržtan lanz cuzturumpi puntuquiztanami, nižaza ticziquiztan jacatatz puntuquiztanami, nižaza ultim pjalz tjuñi puntuquiztanami. Jalla nižtanaca zizzinčhuctača ančhucqui.

³ Yooz munan, iya Yooz puntunaca tjaajnasacha, juc'ant zuma kamañchiz cjisjapa.

⁴ Jakziltat kjanzt'ita Yooz taku catokčhaja, jalla nuž catokzpacha Yooz quintra quejpsaja, jalla niiqui ana wilta liwriita cjesača. Jakziltat Yooz taku catokčhaja, jalla niiqui Yooz kamañquiz luzzičanča, nižaza Espiritu Santuqui niž kuzquiz luzziča.

⁵ Nižaza ninacaqui Yooz taku zuma nayžcu catokchiča. Nižaza arajpachquiztan tjonñi azi pajchiča persun kuzquiz.

⁶ Jalla nižta Yooz taku catokchi žoñinacaqui Yooz quintra quepsnaquiž niiqui, anaž wilta kuz campii atasacha zumquinaqui. Ninacž kuzqui chojrupan cjissa. Jalla nižta cjiscu, ninacapacha Jesucristo Yooz Majch wilta cruzquiz ch'awctažokazza, niž quintra žoñinacž yujcquiz cjičjiñiča.

⁷ Tii quintu nonžna. Tsjii yokaqui zkala čjacža. Jalla nekztan chijñiž tjonča. Jalla nekztan nii zkalaqui zuma čjjeriž tanča. Nižazaž pookča, nii zkala čjacñi žoñinacžtajapa. Nii yokaqui Yoozqui wintijchiča.

⁸ Pero nii yokaqui ch'apinacchizkaz cjisnasaž niiqui, inakaz cjequiča. Jalla nižtiquiztan pjalžta cjequiča, ana zuma. Jalla nekztan ujquin tewjkžnaquiča. Jalla nižtaž nii Yooz taku catokzpacha quejpsñi žoñiqui.

YOOZQUIN KUZIZPAN CJEE

⁹ Pecta jilanaca, cullaquinaca, jalla nuž chiižcumi ančuca puntuquiztan anača nižta cjiwčiya. Ančhucqui liwriita cjiscu ultimpacha ančhucqui zuma Yooz kamañchiz kamaquiča. Jalla niiqui nužupanča.

¹⁰ Yoozqui ancha zumapanča. Ančucaquiztan anaž tjatznasača, ančucaž zuma kamčiž cjen, nižaza ančucaž Yooztan zuma munaziñi kuzziz cjissiž cjen. Ančhucqui jalla nižta kamañchiz cjen parti criichi jilanacžquiz sirwichinčhucča Yooztajapaqui. Tuquimi anzimi zakaz ančhucqui nižta zuma kamañchizza.

¹¹ Zapa mayni ančucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Ančhucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecuča.

¹² Ančhucqui ana jayrazñi kuzziz cjee. Antiz zuma Yoozquin kuzziz žoñinacžquiz yatekasa. Nižaza pasinziz kuzziz žoñinacžquiz yatekasa. Nižta kamñi žoñinacaqui Yooz chiita zumanaca tanznaquiča, tsjii irinsažtakaz.

¹³ Yoozqui Abrahamžquiz tsjii zuma taku tjaažcu, persun ačtan juramento paachiča. Niižquiztan tsjan jilir juramento tjaačatñi ana želatča. Jalla nekztan persun ačtan juramento paachiča,

¹⁴ tuž cjican: “Ultimpacha wejrqui amquin zumanacal tjaažcača, nižaza am majchmaatinaca walja mirkatača”.

¹⁵ Abrahamqui Yoozquin kuzzizpan tjewžcu, nii Yooziž tjaata taku tanziča.

¹⁶ Tsjii juramento tjaañi žoñiqui nii juramento tanzñi žoñžquiztan tsjan jiliriča. Tsjii juramento paažcu, anaž iya parliz želasča. Jalla nii puntuiztan žeržtača.

¹⁷ Jaziqui Yoozqui tsjii juramento paažcu taku tjaachiča. Nekztan Yoozqui nii tjaata taku tanzñi žoñinacžquiz kjanapacha tjeez pecchiča, niiž tjaata taku panž cumpliskataquiča, jalla nii. Yoozqui niiž chiita taku ana campiyasača.

¹⁸ Yoozqui taku tjaachiča, učumqui niižtan chica kamaquiča, jalla nii. Nekztan juramento paachiča. Jalla nii pizc taku anapan campiyasača tsjii tsjii chiicanaqui. Yoozqui ana toscara chiyasača. Učumqui Yoozquin macjatchinčumča, niiž cuitita cjisjapa. Učum cuitiñi Yoozza taku cumpliñiqui. Jalla nižtiquiztan Yooz taku cumpliz ora tjewžcan p'ekinčayta kuzzizpan cjesača učumqui.

¹⁹ Jalla nii cumpliñi Yooziž chiita taku cjuñžcupan učum kuz tjurt'ichi cjiskatča, ana kuz turwayskatchuca. Nii taku cumpliñi Yoozqui warcu anlažtakaz, učum kuz tjurt'ichi cjiskatča. Jesucristuž cjen Yoozqui niiž tjaata taku cumplaquiča. Jesucristuqui arajpachquinpacha Yooz yujcquiz luzziča.

²⁰ Učumž tuqui luzziča, učumnacaltajapa palt'izinjapa. Jesucristuqui zuma palt'iziñi cjissiča, jaknužt Melquisedec palt'iziñi cjitčaja, jalla nižta. Jalla nižtiquiztan učumnacaltajapa ultimu palt'iziñi puestuquiz luzziča.

7

MELQUISEDECZ PUNTU

¹ Nii Melquisedec cjita palt'iziñiqui Salem wajt jiliritča, nižaza niiž puestuquiz zinta arajpach Yooziž uchtatača. Melquisedecž timpuquiz Abrahamqui quintra reynacžtan tsjii quira zalchiča, ninacž zultatunacžtanpacha. Nekztan Abrahamqui liwj atipchiča. Jalla nuž Abrahamž atipžtan Melquisedecqui Abrahamžtan zalchiča. Nekztanaqui Melquisedecqui Abrahamžtajapa Yoozquin palt'izinchiča, Abrahamžquiz Yooziž yanapta cjisjapa.

² Nekztan Abrahamqui Melquisedecžquiz tjapa niiž cantiquiztan diezmo tjaachiča. Melquisedec tjuuqui tuž cjiča, Yooz kuzcama zuma mantiñi, jalla nii. Nižaza Salem tjuuqui tuž cjiča, žoñinaca walikaz žejlča, jalla nii. Melquisedecž puntu cjiča, niiž mantichiž cjen, žoñinaca walikaz žejlča.

³ Yooz takuqui anaž chiiča, Melquisedecž maa ejpž puntuiztanami, niiž atchi ejpnacžquiztanami, niiž majttiquiztanami, niiž ticzquiztanami. Jalla nižtiquiztan palt'iziñitača Yooz Majch irata.

⁴ Jaziqui Melquisedecqui pajk jiliriča. Nii naya ančhucqui. Učum tuquita ejp Abrahamqui quira atipžcu Melquisedecžquiz tsjii tunca parti niiž cantiquiztan tjaachiča. Jalla nižtiquiztan Melquisedecqui Abrahamžquiztan juc'ant jiliriča.

⁵ Moisés lii jaru Leví cjita majchmaatquiztan tjoñi zoñinacakaz timplu jilirž puestu tanznasača, zoñinacžtajapa Yoozquin palt'izinzjapa. Jalla nii timplu jilirinacaqui parti zoñinacžquiztan ninacž želinchizquiztan diezmo cobriñitača. Aunquimi nii cobrita zoñinacaqui timplu jilirinacž famili-atača. Tjapa ninacaqui Abrahamž ejpžquiztan tjoñitača. Jalla nižtiquiztan Melquisedecqui nii timplu jilirinacžquiztan juc'ant jiliriča.

⁶ Melquisedeczi ana Leviž majchmaatquiztan tjoñitača. Pero Abrahamqui nižquiz diezmo tjaachiča. Nižaza Melquisedecqui Abrahamžquiz wintizuna tjaachiča, Yooz Abrahamžquiz taku tjaachiž cjenami.

⁷ Wintizuna tjaañi zoñiqui tsjan jiliriča wintizuna tanzñi zoñžquiztan. Anaž jakziltami nii razuna nicasača.

⁸ Tii muntuquiz kamcan zoñikazza učumnacaquiz diezmo cobriñiqui. Zoñinacača ticzñiqui. Pero Melquisedecž puntuquiztanaqui Yooz takuqui niž ticz puntuquiztan ana chiiča, wiñayjapa žejtzjapažtakazza.

⁹ Melquisedecž timpu wattan Leviž majchmaatquiztan tjonñi timplu jilirinacaqui diezmo cobriñitača. Nii cobriñi zoñinacapacha Abrahamž majchmaatquiztan tjonchiča. Jalla nižtiquiztan Abrahamž diezmo Melquisedecžquiz pactiquiztan, ninacazakaz pactažokazza.

¹⁰ Abrahamž curpuquiz niž majchmaatinaca želatča, ima majttatača. Jalla nižtiquiztan Abrahamž Melquisedecžquiz diezmo pactiquiztan, Leviž majchmaatquiztan tjoñi timplu jilirinacaqui zakaz pactažokazza.

¹¹ Leviž parti timplu jilirinacaqui Israel wajtchiz zoñinacžquiz Moisés lii jaru kamkatchiča. Nižaza nii jilirinacaqui parti zoñinacžta Yoozquin palt'iziñitača. Nii Leviž parti zoñinacaqui Aaronž majchmaatquiztan tjonñitača. Jaziqui ninacaqui parti zoñinacžquiz Yooz yujcquiz zuma-pankaz cjiskattasaž niiqui, anaž iya palt'iziñi pectasača. Nii wiruñ tjonñi palt'iziñiqui anaž Aaronž majchmaatquiztan tjonñiča. Antiz Melquisedecž partiquiztan tjonchiča.

¹² Palt'iziñi timplu jilirinacaqui campiitaž cjenauqui, lii zakaz campiitaž cjistantača.

¹³ Nii wiruñ tjonñi palt'iziñiqui Jesucristo Jiliriča. Jesucristuqui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača.

¹⁴ Timplu jilirinacž puntuquiztan Moisesqui anaž čjulumi chiichiča Judaž parti zoñinacžquiz. Judaž parti zoñinacaqui anapan timplu jilirž puestuquiz luzasača. Pero kjanapachača Jesucristuqui Judaž partiquiztan tjoñi.

¹⁵ Jalla nižtiquiztan kjanapachazakazza Moisés lii campiitaqui. Melquisedecžtakaz Jesucristuča tsjemat timplu jiliričiqui, zoñinacžtajapa Yoozquin palt'izinzjapa.

¹⁶ Moisés liiqui cjiča, ticzñi timplu jilirinacaqui Leviž majchmaatquiztan tjonñi zoñinacapankaz cjequiča. Jesucristuqui anaž nii lii jaru timplu jiliri cjišiča. Antiz niž wiñayjapa žejtñi kamañquiztan timplu jilirž puestuquiz uchtača, wiñayjapa zoñinacžtajapa Yoozquin palt'iziñi cjisjapa.

¹⁷ Jesucristuž puntuquiztan Yooz takuqui tuž chiiča:
“Amqui wiñayjapa timplu jiliri cjequiča zoñinacžtajapa palt'iziñi. Melquisedecž partiquiztan cjequiča”.

¹⁸ Tuquita liiqui nužquiz apatatziča. Nii liiqui ana azzizza zoñinaca zuma-pan kamkatzjapa. Jalla nižtiquiztan ana iya walča.

¹⁹ Nii Moisés lii jaru kamtiquiztan anaž jakziltami Yooz yujcquiz zuma-pankaz cjiskattaž atasacha. Jaziqui tsjii ew lii žejlča; učumnacaltajapa

juc'ant zumača. Nii lii jaru Jesucristuqui Yoozquin palt'iziñi puestuquiz luzziča. Jesucristuž cjen učumqui Yoozquin macjatasacha.

²⁰ Yoozqui juramentužtan Jesucristo utchiča palt'iziñi puestuquiz.

²¹ Tuqita palt'iziñi timplu jilirinacaqui ana juramentužtan nombritatača. Pero tii Jesucristo timplu jilirizti juramentužtan nombritatača. Yooz takuqui tuž cjiča:

“Yooz jiliriqiu juramentužtan tuž mantichiča: Amqui wiñayjapa timplu jilirim cjequiča zoñinacžtajapa palt'iziñi, Melquisedec partiquiztan. Jalla nuž mantižcu, Yooz kuzquiz pinsitaqui wira ana campiyasacha”.

²² Nii Yooz chiitaž cjenacqui Jesucristuča tuqita timplu jilirinacžquiztan zoñinacžtajapa juc'ant zuma Yoozquin palt'iziñiqui. Jalla nižtiquiztan zoñinacaqui wiñaya liwriitapan cjequiča. Nii ew liiqui tuqita liinacquiztan juc'anti zumača.

²³ Nii tuqita timplu jilirinacaqui tamatača. Ninacžquiztan anaž jakziltami wiñaya timplu jilirž puesto tanzñi atchiča. Ninacaqui tjapaž ticža.

²⁴ Pero Jesucristuzti wiñaya žetaquiča. Jalla nižtiquiztan wiñayjapa timplu jiliriapanž cjequiča, zoñinacžtajapa Yoozquin palt'iziñijapa.

²⁵ Jalla nižtiquiztan Jesucristuqui ultimupan wiñayjapa zoñinaca liwriyasacha. Jakziltat niž cjen Yoozquin macjataquiž niiqui, wiñayjapa liwriita cjequiča. Nižaza Jesucristuqui wiñaya žejtcan liwriita zoñinacžtajapa tirapan Yoozquin pjalt'izinaquiča.

²⁶ Jalla nižta palt'iziñipanž pecča učumnacaqui. Jalla nii Jesucristuqui Yooz irata zumapankaz kamañchizza. Anaž jakziltami nižquiz tsjii uj tjojt nasacha. Niiqui ana zinta ujchizza. Ujchiz zoñinacžquiztan tsjematača. Arajpachquin Yooztan chica honorchizza.

²⁷ Jesucristuqui parti timplu jilirinaca ana iratača. Nii parti timplu jilirinacaqui zapuru wilanapan tjaañitacha, persun ujnacquiztanami parti zoñinacž ujnacquiztanami. Jesucristuqui anapan nižta paasacha, ana ujchizza niiqui. Jesucristuqui tsjii wiltapankaz wilana tjaañiča. Wilana cunta niž persun curpu intirjichiča.

²⁸ Moisés lii jaru ujchiz zoñinacaqui palt'iziñi puestuquiz uchtatača. Nii liinacquiztan wiruñ Yoozqui tsjii juramento paachiča, niž Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñayjapa.

8

EW LII ZEJLCHA

¹ Weriz chiitanacquiztan jalla tiča chekanaqui, učumnacaltajapa tsjii zuma palt'iziñi žejlča, Jesucristupacha. Jalla niiqui arajpachquin Yooz Ejpž žew latuquiz julzi žejlča, Yooz Ejpžtan chica mantican.

² Niča ultim Yooz kjuychiz jiliriqiu, učumnacaltajapa palt'iziñjapa. Nii ultim Yooz kjuy timpluqui anaž zoñiž paatača. Nižaza anača tii muntuquiz. Antiz Yooz Jilirž arajpach kjuyapankazza.

³ Zapa timplu jiliriqiu niž puestuquiz kamcan, ofrendanacami wilananacami jalla ninaca tjaañiča. Jalla nižtiquiztan Jesucristo zakaz tsjii tjaažjapa necesitča.

⁴ Jesucristuqui tii yokquizkaz kamñi zoñi cjitasaž niiqui, anaž timplu jilirimi cjitasača. Tii yokquizpachača Moisés lii jaru timplu jilirinaca panž žejlča. Jalla ninacaqui tirapanž wilana tjaača Moisés lii jaru.

⁵ Pero ninacaqui ultim Yooz kjuy timpluquiz anaž sirwiča. Arajpachquin žejlča nii ultim Yooz kjuy timpluqui. Jalla nii timplu cunta tii yokquiz

tsjii paata timplu žejlča tsjii fotožtakaz. Tuqui timpuqui Moisesqui Yooz cjitacama tsjii zkiz timplu paakatchičha. Ima paakatcan Yoozqui nižquiz mantichiča, tuž cjan: “Sinaí curquin amquiz tjezinča, jaknužt wejt timpluqui paaztančhalaja, jalla nii. Jalla nii jarupankaz timplu kjuya kjuys-tanča”. Jalla nuž mantichiča Yoozqui.

⁶ Pero Jesucristuzti žoñinacžtajapa tsjan zumaž palt'izinasacha. Jalla niiča tuquita palt'iziñinacž kamañquiztan juc'ant zuma kamañchizqui. Nižaza tuquita liiquiztan tii anzta liiqui učumnacalta tsjan zumača. Jesucristuž cjen tii anzta liiqui žejlča. Nižaza nii liiž jaru tsjii tsjan zuma kamañaqui compromittacha.

⁷ Tuquita tjaata liiqui juc'ant zuma cjitčhaj niiqui, anaž iya liiqui pec-tasača.

⁸ Yoozqui tuquita lii jaru kamñi žoñinacžquiz ana zuma naychiča. Jalla nii puntuquiztan Yooz takuqui tuž cjiča:

“Yooz Jiliriqui tuž cjiča: Wiruñta timpuquiztajapa wejrqui tsjii ew lii tjaa-ača Israel wajtchiz žoñinacžquizimi, nižaza Judá wajtchiz žoñinacžquizimi.

⁹ Nii ew liiqui tuquita ejpnacžquiz tjaata liiquiztan tsjemataž cjequiča. Tuquiqui wejrqui ninacž tuquita ejpnaca jwessinča Egipto yokquiztan. Nii timpuquizpacha wejt lii ninacžquiz tjaachinča; pero ninacazti wejt lii jaru ana cumplichiča. Jalla nižtiquiztan wejrqui ninaca jaytichinča. Jalla nuž cjiča Yooz Jiliriqui.

¹⁰ Wiruñta timpuquiz Israel žoñinacžtajapa tsjii ew lii tjaa-ača, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatača, kuzquiz cijrtažtakaz. Nekztan wejrpacha ninacž Yooz cjeeča. Nižaza ninacaqui wejt partir žoñinaca cjequiča.

¹¹ Jalla nii wiruñta timpuquiz kamñi žoñinacaqui anaž porapat tjaaj-narasasacha, ninacž mazinacžquizimi, nižaza ninacž jilanacžquizimi. Anaž tjaajnasacha, “Yooz Jiliržquin paja” cjan. Antiz zapa mayni Yooz Jiliri-pankaz pajaquiča, tsjii zkoltiquiztanpacha asta pajk žoñicama.

¹² Nižaza ninacž ujnaca pertunača, wejt okžni kuzziz cjen. Nižaza ninacž ujnacquiztan tjatznača wiñajapa”. Jalla nuž cjiča Yooz takuqui.

¹³ Yoozqui nii ew lii puntuquiztan chiižcu nii tuquita lii apatatchičha. Nii tuquita liiqui watchiž cjen, inakazza. Wajilla liwj tjatzaž cjequiča.

9

YOOZ ZKIZ TIMPLU

¹ Nii tuquita liiqui cuzturumpinacchizza, Yooz rispitzjapa. Nii cuzturump-inacaqui tii muntuquiz žejlñi Yooz timpluquizkaz paatatača.

² Primeraqui zkiz timplu želatča. Nii timpluquiz pizc kjuya želatča. Tsjii kjuyaqui ‘Yooztajapa T'akžta Kjuya’ cjitatača. Nii kjuyquiziqui tsjii pajk candelabra želatča, nižaza mesa želatča, Yooztajapa t'akžta t'anta nonzjapa.

³ C'uchquin tsjii kjuya želatča, ‘Yooztajapa Juc'ant T'akžta Kjuya’ cji-tatača. Nii pizc Yooz kjuy tayıquiz tsjii pañ cortina želatča.

⁴ C'uchquin tsjii kor altara želatča, incienso ujzjapa. Nižaza tsjii caza želatča, Yooz tjaata lii chjojzjapa. Nii cazaqui kjuyltanami zawnctanami koržtan tjalžtatača. Nii caj kjuyltan tsjii kor ojch želatča maná cjita čhjerchiz. Nižaza Aaronž wara želatča. Nii waraqui ch'ojña c'ajchiča tsjii žejtñi muntiztakaz. Nižaza nii caj kjuyltan Yooz lii cijrtanaca želatča.

⁵ Nii caj juñtun querubines cjita želatĉha anjila irata paata. Nii querubinanacaqui wežlaž cherchi kjarchiztaĉha; nii caj juntunĉha kjara waazitaĉha. Nižaza nii caj juntunĉha ljocžtan tjawkz tabla želatĉha, jalla niiqui ujnaca pertunta cjisjapataĉha. Jaziqumii puntunacquiztan ana iya chiiz pecuĉha.

⁶ Jalla nuž tjacžcu timplu jilirinacaqui zawncchuc kjuyquiz luzluzñitaĉha, lii jaru cuzturumpinaca paacan.

⁷ C'uchquin žejlñi kjuyquiz tsjii watquiz tsjii wilita luzñitaĉha timplu chawjc jiliriqumii. Nii alajakaz jalla nekziqumii luzasaĉha. Jalla nuž luzcan wilana conta ljoc chjichñitaĉha, persun ujnaca pertunta cjisjapami, nižaza parti žoñinacž ujnaca pertunta cjizjapami.

⁸ Jalla nižta liiquiztan Espiritu Santuqumii zizkatchiĉha, ima Moisés lii apatatcan, nii Yooz kjuy timpluquiz paaz cuzturumpinacaqui walatĉha, nii. Nižaza jalla nuž walan ĉhjul žoñimi anapan c'uchquin luztaĉha.

⁹ Nii tuqumii liiqui Yooz puntunaca chiiĉha tii timpuquiz kamñi žoñinacžtajapa. Nii lii jaru žoñinacaqui ofrendanacami wilananacami tjaachiĉha. Jalla nuž tjaachiž cjenami nii žoñinacaqui Yooz yujcquiz ana ujchiz nižaza zuma kuzziz ultimu ana cjiskatta cjesaĉha. Ninacaqui tirapan ujchiztaĉha.

¹⁰ Jalla nii tuqumii cuzturumpinacaqui jalla tižtakaztaĉha: ĉhjeri tjaazmi, licz tjaazmi, kjaztan ajunzmi. Jalla nižta cuzturumpinacaqui žoñž curpu zawnc tankazza. Jalla nuž cjenami lii campiizcama nii cuzturumpinacaqui walatĉha.

¹¹ Wiruñ nekztan Cristuqumii tjonchiĉha. Jazic niĉha Yooz timplu chawjc jiliriqumii; Yooz zumanaca tjaazjapa tjonchiĉha. Timplu chawjc jiliri cjican Yooz kjuyquiz sirwiĉha. Anaž tii yokquiz paata Yooz kjuyquiz sirwiĉha. Antiz arajpachquin Yooz lijitum kjuyquin sirwiĉha. Jalla niĉha ultim Yooz kjuya. Tii yokquiz paata Yooz kjuyquiztan juc'ant zumaĉha.

¹² Cristuqumii arajpachquin ultim Yooz kjuyquiz luzziĉha. Jalla nuž luzcan ana cabranacž ljocmi nižaza ana vac toronacž ljocmi chjitchiĉha. Antiz persun ljocžtan luzziĉha, žoñinaca wiñaya liwriita cjisjapa. Jalla nuž persun ljocžtan tsjii wiltakaz luzziĉha tjapa tižtajapa.

¹³ Tuqumii liiqui tužutaĉha: Cabranacž ljocžtanami, vac toronacž ljocžtanami ujchiz žoñinacžquiz tjawkñitaĉha. Nižaza ujta vacanacž kjupžtan ujchiz žoñinacžquiz llump'aczt'iñitaĉha. Jalla nižta cuzturumpinaca zawnc tankazza; ana poderchiztaĉha, ana ujchiz cjiskatzjapa.

¹⁴ Cristuž ljocžti ancha juc'anti poderchizza. Nii ljocž cjen žoñinacž kuznacaqui zuma cjiskatasasĉha. Wiñay žejtñi Espiritu Santuž cjen Cristuqumii tsjii zuma wilana cunta persunpacha ticziĉha. Ana ujchiz cjican, niž ljoc Yoozquin tjaachiĉha, ujchiz žoñinaca pertunta cjisjapa. Jalla nižtiquiztan Cristuqumii žoñinaca liwriyasasĉha. Cristuž cjen nii liwriita žoñinacaqui ninacž tuqumii ana zuma kamañanaca jaytasasĉha, nižaza zuma kamañchiz Yoozquin sirwasasĉha.

¹⁵ Jalla nižtiquiztan Jesucristuž cjen Yoozqui ew lii ut'aychiĉha, žoñinaca ultimu liwriita cjisjapa. Žoñinacaqui primer lii mantuquiz cjican, ujnaca paañitaĉha. Pero Jesucristuqumii ticziĉha, nii paata ujnacquiztan liwriizjapa. Jalla nižtiquiztan jakziltat Yooz kjawžta cjeĉhaja, jalla niiqui Yooz compromitta irinsa tanznaquiĉha; jalla niiqui wiñayjapa Yooztan chica kamaquiĉha.

¹⁶ Tsjii žoñiqui testamento paachiž cjen, niž cuzazanaca tanñi žoñinacžquiz ut'ayĉha. Pero ticžtankaz nii testamentuqumii walĉha.

¹⁷ Nii testamento paañi žoñiqui tira žetan, nii testamentuqumii anaž walĉha. Antiz ticžtan, jalla nekztanž nii testamentuž walasasĉha. Ticžtankaz niž cuzazanaca tanñi žoñinacaqui ultimu niž cuzazanaca tanznasasĉha.

¹⁸ Jalla nižtiquiztan tuquita liiqui ut'aytatača, conta animal ljocžtan.

¹⁹ Moisesqui tjapa Yooz mantita liinaca kjanapacha paljayžcu nii liinaca ljocžtan ut'aychiča. Moisesqui tsjii chupic choma tanžcu, hisopo cjita parquiz tjerchiča. Nekztan ljocžtan kjaztan t'ajžcu, jalla nekc nii para ch'iižcu, sucarpayñitača, žoñinacžquizimi, liichiz libruquizimi.

²⁰ Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa.

²¹ Jalla nižtazakaz Moisesqui nii ljocžtan Yooz kjuyquizimi, Yoozquin sirwiz cuzananacquizimi sucarpayñitača.

²² Nii tuquita lii jaru jos tjapa cuzanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesača.

JESUCRISTUQUI ZOÑINACŽ LAYCU TICZICHA

²³ Tuquita lii jaru nii Yoozquin sirwiz cuzanacaqui Yooz yujcquiz wali cjisjapa jalla nižta cuzturumpinaca paastantača. Tii yokquiz žejlñi cuzanacaqui fotožtakazza. Anača arajpachquin ultimu želasača. Arajpach Yooz zuma kamañchiz cjiskatzjapa, nii animal ljocnacaqui anaž atasača.

²⁴ Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqui niiča učumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan.

²⁵ Zapa wata timplu chawjc jiliriqui animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta.

²⁶ Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasača. Tuquita timpu tucuzinta cjiscu tsjii wiltakaz Jesucristuqui parizquichiča. Nekztan niž ljoc tjawkžcu ticziča, tjapa ujnacquiztan žoñinaca liwriizjapa.

²⁷ Tjapa žoñinacaqui tsjii wilta ticstanča tii yokquiz. Jalla nekztan pjalžta cjequiča, Yooz yujcquiz zuma, anazuma, nii.

²⁸ Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu. Pero wiruñ wilta tii muntuquiz tjonaquiča. Nekztan žoñinacž ujnacquiztan ana ticznaquiča. Antiz nižquiz tjapa kuz tjewžni žoñinaca ultimu liwriyaquiča.

10

MOISES LIIQUI PJALTICHA

¹ Moisés liiqui Yooz zumanaca tsjii kolucullakaz tjeeziča. Ana ultimu kjana tjeeziča. Nii liiqui tuž cjiča: Wiruñ tjapa Yooz zumanaca tjonaquiča, jalla nii. Nižaza nii liiqui anaž ultimpacha Yooz yujcquiz zuma cjiskatasacha, Yoozquin macjatñi žoñinacžquiziqui. Nii lii jaru watay wata wilanakaz contača. Jalla nuž paažcumí, žoñinacžquiz anaž ultimpacha Yooz yujcquiz zuma cjiskatta cjesača.

² Nii lii jaru paacan, žoñinacaqui ultimpacha Yooz yujcquiz zuma cjiskatasazaž niiqui, anapanž wilana tira onantasača. Nii wilana tjaañi žoñinacaqui ultimu ana ujchiz cjitasazaž niiqui, zumapan cjitasacha, nižaza persun kuzquiz ana iya cjuñtasacha čjul ujquiztanami.

³ Pero nii wilana tjaaz liiqui watay watapanž ujnaca cjuñkatča.

⁴ Vac toronacž ljocmi cabranacž ljocmi tjaatiquiztanami anapanž ujnacquiztan liwriyasača.

⁵ Jalla nižtiquiztan Cristuqui tii muntuquiz tjonžcu Yooz Ejpžquin tuž cjichiča:

“Amqui animal wilananacami ofrendanacami ultimu ana pecasača. Antiz wejtajapa žoňž curpu tjaczinčamča, žoňinacž ujnac laycu ticzjapa.

⁶ Ujta animalanacami uj paatiquiztan tjaata ofrendanacami ultimu am ana cuntintu cjiskatasača.

⁷ Jalla nižtiquiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejt puntuquiztan Yooz tawk liwruquiz cijrtažlaja jalla nii cumplizjapa tjonchinča”.

⁸ Jesucristuqui cjichiča, “Yooz Ejpqui anaž pecča nižaza anaž jutztaza jalla tinaca: animal wilananacami, ofrendanacami, nižaza ujta animalanacami, nižaza uj paatiquiztan tjaata ofrendanacami. Tuquita liiqui nižtanaca tjaaz mantichiča. Jalla nuž mantita cjenami, Yoozqui anaž niikaz ultimu pecča”.

⁹ Nekztan Jesucristuqui cjichizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqui Jesucristuqui nii tuquita liinaca apatatskatchiča, nii lii cuzturumpinacžtanpacha. Nekztan ew lii ut'aychiča. Nii lii jaru Jesucristuqui wilana cunta intirjitatača.

¹⁰ Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoňinacž ujquiztan ticzjapa. Jalla nižtiquiztan Yoozqui učumnacaquiz zuma kamaňchiz cjiskatchiča.

¹¹ Timplu jilirinacaqui zapuru ninacž puestuquiz atintichiča. Zapuru wiltan wiltan wilananaca Yoozquin tjaañitacha. Pero nižta wilananacaqui ujnacquiztan anapan žoňinaca liiwriyasača.

¹² Jesucristuzti tsjii wiltakaz persun curpu wilana cunta intirjichiča, žoňinacž ujquiztan ticzjapa. Jalla nuž ticžcu, arajpachquin Yooz Ejpž zew latuquiz julziča, nižtan chica mantiñi cjisjapa.

¹³ Jalla nicju tjewžcan žejlča, niž quintranaca liwj atiptacama cjisjapa, niž kjojch koztan tjecžtažtakaz.

¹⁴ Jalla nuž žoňinacžtajapa tsjii wilta ticžcu, Jesucristuqui Yooz partiquiz žejlñi žoňinacžquiz wiňayjapa Yooz yujcquiz ancha zuma cjiskatchiča.

¹⁵ Nižaza nii puntuquiztan Espíritu Santuqui chiiča, tuž cjan:

¹⁶ “Tuquita lii apatatžcu, wejrqui žoňinacžquiz tsjii ew lii tjaa-ača. Jalla nuž cjiča Yooz Jiliriqi. Wejrqui ninacž kuzquiz wejt liinaca zizkatača, nižaza intintazkatača”.

¹⁷ Nekztan cjichizakazza:

“Ninacž paata ujnaca ana iya cjuňznača. Nižaza ninacž ana wali cjičitanacami liwj tjatznača.

¹⁸ Jalla nižta ujnacquiztan pertuntažlaj niiqui, ana iya čjul wilanami pecasača”.

YOOZQUIN MACJATSPANZ WAQUIZICHA

¹⁹ Jilanaca, cullaquinaca, jaziqui Jesucristuž ticziž cjen učumqui ana jiwjatcan Yooz yujcquiz luzasača.

²⁰ Ew kamaňchiz kamcanaqui ana jiwjatcan Yooz yujcquiz luzasača. Jalla nii ew kamaňaqui Jesucristuž tjaatača. Persun curpu wilana cunta tjaažcu, Jesucristuqui arajpachquinpacha Yooz yujcquiz luzziča, nii c'uchquin žejlñi cortina cjetžtažokaz.

²¹ Jesucristuča Yooz kjuychiz žoňinacžtajapa Yoozquin palt'iziñiqui. Jaziqui učumnacaltajapa palt'izinaquiča.

²² Jalla nižtiquiztan tjapa kuztan Yoozquin macjatz waquiziča. Nižaza Jesucristužquin kuzziz cjen ana jiwjatcan Yoozquin macjatz waquiziča. Jesucristuqui učumnacaž paata ujnaca pertunchiča, učumnac kuzquiz

ana iya uj cjuñzjapa. Nižaza učhum curpunacaqui tsjii zuma kjaztan awjz-tažokazza.

²³ Yoozquin macjatžcu Yooz famillquiz luzzinčhumčha. Jaziqui ana jiwjatcan tirapan Yoozquin tjurt'ichi kuzziz cjequičha. Nekztan Yooztan chica kamaquičha. Nii Yooztan kamzqui, jalla nii Yoozqui učhumnacaquiz compromitchičha. Nižaza nii compromitchi Yoozza taku cumpliñiqui.

²⁴ Jalla nižtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, nižaza zuma obranaca paazjapa.

²⁵ Nižaza yekjap criichi žoñinacaqui zapa domingo ana ajcajczñičha. Ana nižta irata kama. Antiz učhumqui porapat zumpacha p'ekinchayasa, zuma kamzjapa. Jesucristuž tjonz tjuñi žcatžinžquičha. Jalla nižtiquiztan juc'anti učhumqui porapat p'ekinchayastančha.

²⁶ Werar Yooz taku catokžcupacha nekztan kuzinpan Yooz quintra quepsnaquiž niiqui, ana pertunta cjesačha.

²⁷ Pero nižta cjicjiñinaczquiz Yoozkaz casticaquičha. Yoozqui niž quintranaca wiñaya casticaquičha infiernuquin.

²⁸ Jakziltat Moisés lii ana cazzi cjitčhaja, nižaza pucultan čhjepultan testicunaca nii ana cazta puntu declartčhaja, jalla nekztan nii uj paañi žoñiqui ana okžcu conzpanikaztačha.

²⁹ Jalla nižtiquiztan jakziltat Yooz Majch quintrapan quepsnačhaja, nižaza Yooz Majch liwriñi ljoc tjawkta puntuquiztan iñaračhaja, nižaza okžñi Yooz Espiritu Santužquiz žawjwa zjijcčhaja, jalla nižta paañinacaqui juc'anti castictaž cjequičha, nii Moisés lii quintra paañi žoñinaczquiztan cjen. Jalla nižta casticzpan waquizičha nižta žoñinacztaqui.

³⁰ Učhum pajta Yooz JiliriQUI tuž cjichičha: “Wejrtčha castiquiñtqui. Wejrqui žoñinaczquiz casticačha, ujnaca paatiquiztan jama”. Jalla nuž cjichičha Yooz JiliriQUI. Nižaza Yooz takuQUI tuž cjičha: “Yooz JiliriQUI niž kjuychiz žoñinacz paatanaca pjalznaquičha”.

³¹ Jakziltat Yooz quintrapan kamchižlaja, jalla niiqui werar žejtñi Yooziž tantaž cjequičha. Jalla nuž Yooz tantaž cjequiž niiqui, nižtanaczquiz ancha ana waliž cjequičha.

³² Ančhucaž Yooz famillquiz luztaž cjuñzna. Paljayta Yooz taku catokžcu, ančhucqui pasinziz kuztan ancha sufrichinčhucčha, quintranaca ancha žejlchiž cjen.

³³ Yekjap ančhucqui ch'aanitatačha, nižaza wjajttatačha tjapa žoñinacaž cheran. Nižaza yekjap ančhuca jilanacaž nižta sufran, ančhucqui “Jesalla, wejt jilačha niiqui” cjican declarchinčhucčha.

³⁴ Ančhucqui tsjii criichi žoñinaca preso tanta cjen okžñi kuztan yanapchinčhucčha. Nižaza ančhucaž cusasanaca kjañta cjenami, cuntintu kuzziz žejlchinčhucčha. Arajpachquin ančhucaltajapa juc'ant zumanaca žejlčha, wiñayjapa tjurñi. Jalla nii cjuñzcu, ančhucqui cuntintu kuzziz žejlchinčhucčha.

³⁵ Tjurt'ichi kuzziz cjican, jalla nii zuma kuzquiztan ana jayta. Ticcama tjurt'ichi kuzziz cjequiž niiqui, Yoozquiztan pacta cjequičha juc'ant zumanacztan.

³⁶ Ančhucqui pasinziz kuzziz cjee, Yooz kuzcama zuma kamzjapa. Jalla nekztan ančhucqui Yooziž compromitta zumanaca tanznaquičha.

³⁷ Yooz takuQUI tuž cjičha:

“Wajilla nii tjonñiqui tjonaquičha, anaž ancha ažk katasačha.

³⁸ Jakziltat wejtquiz kuzziz cjen wejt yujcquiz ana ujchiz cječhaja, jalla niiqui arajpachquin wejttan chica zumapan kamaquičha. Pero jakziltat

wejt quintra quepačhaja, jalla nii žoňičha ana waliqui. Niižtan ancha anal jutzazučha”.

³⁹ Pero učumnacačha anapan Yooz quintra quejpnĩiqui. Jalla nuž quejpn-nasaž niiqui, Yooziž ancha ana waliž castictaž cjequičha. Antiz učumčha tirapan Yoozquin kuzzizqui. Jalla nuž kamcan učum persun animu zumaž čhjelinčha, liwriita cjisjapa.

11

YOOZQUIN KUZZIZ ZOÑINACA

¹ Yoozquin kuzziz cjen, učumqui ultimupan zizza, Yooz taku cumplitapanž cjequičha, jalla nii. Nižaza Yoozquin kuzziz cjen učumqui zizza, anza timpuquiz ana cheržcumi Yooz žejlpančha, nižaza Yooz zumanaca ultimupan žejlčha, nii.

² Učum tuquita atchi maa ejpnacaqui Yoozquin kuz tjaachičha. Jalla nuž Yoozquin kuzziz cjen Yoozqui ninacž puntuquiztan “Zumačha ninacaqui” cjichičha.

³ Yoozqui tawkžtankaz chiican tii muntu paachičha. Yoozquin kuzziz cjen jalla nii zizza, ultim werara jalla nužupan paata, jalla nii. Yoozqui ana chertanacquiztan tii muntuquiz žejlñinaca paachičha.

⁴ Yoozquin kuzziz cjen Abelqui tsjii zuma ofrenda wilana Yoozquin tjaachičha. Cainžquiztan juc'ant zuma ofrenda Yoozquin tjaachičha. Abelž Yoozquin kuzziz cjen, Yoozqui Abelž tjaata ofrenda risiwchičha. Nižaza Abelž puntuquiztan Yoozqui chiichičha “Zumačha niiqui” cjican. Abel ticziž cjenami učumqui zizza, niiqui Yoozquin zuma kuzziztačha, jalla nii. Jalla nii zizcuqui učumqui Abelž zuma kamaña yatekasa.

⁵ Yoozquin kuzziz cjen Enocqui arajpachquin ana ticzi chjichtatačha. Ana iya tii muntuquiz žejlchičha. Yoozpantačha chjitchi. Yooz takuqui Enocž puntuquiztan tuž cjičha: Ima arajpachquin chjichtaž cjen, Yoozqui Enoc zuma kamañquiztan cuntintu cjissičha. Jalla nuž cjiirtačha Yooz tawk liwruquiz.

⁶ Jakziltat ana Yoozquin kuzziz cječhaja, jalla niižquiztan Yoozqui anapanž cuntintu cjesačha. Jakziltat Yoozquin macjatz pecčhaja, jalla niiqui criistančha, Yoozqui žejlčha, jalla nii. Nižaza criistančha, Yoozqui niižquin macjatz pecni žoñinacžquiz zumanaca tjaaquičha, jalla nii. Jalla nižta criichi žoňžquiztan Yoozqui cuntintučha.

⁷ Nižaza Yoozquin kuzziz cjen Noequi kjaz juyzuquiztan liwriitatačha. Ima kjaz juyzu tjonan Yoozqui Noežquiz chiižinchičha, “Kjaz juyzul cuchanzcačha”, cjican. Jalla nii Yooz chiižintaqui Noequi catokchičha. Nekztan Yooz chiita jaru tsjii pajk warcu kjuya irata kjuychičha, niiž familiarnacžtanpacha liwriita cjisjapa. Jalla nuž Yoozquin kuzziz cjen Noequi tjeezičha, parti žoñinacaqui ancha ujchizza, jalla nii. Nižaza Yoozquin kuzziz cjen Noequi Yooz zuma kamaña tanchičha, tsjii irinsažtakaz.

⁸ Nižaza Abrahamqui Yoozquin kuzziz cjen, Yooz mantita ana jayrazcu cazzičha. Yoozqui Abrahamžquiz cuchanzjapa kjawzičha, yekja yokquin okajo. Nižaza Yoozqui Abrahamžquiz tuž cjichičha: “Wiruñ wejrqui amquiz nii yoka tjačha, irinsa cunta”. Yooz mantita jaru ojkchičha. Jakziquin ojektčhaja, jalla nii ana zizatčha. Jalla nuž cjenami Abrahamqui Yooz tawk jaru ana jayrazcu ojkni želatčha.

⁹ Abrahamqui Yoozquin kuzziz cjen Yooz mantitacama nii Yooz tjeežta yokquiz kamchičha. Yekja žoňž yoka cjenami, Yoozqui Abrahamžquiz nii yoka compromitchičha, “Wiruñ tii yoka amta cjequičha”, cjicanaqui. Jalla

nii yokquizpacha kamcan, zkiz kjuy tultunacchiz kamñitača Abrahamqui. Jalla nižta zakaz Isaacžtan Jacobžtan zkiz kjuychiz kamñitača. Nii pucul-tanaqui Abrahamž irata tjewzizakazza Yooziž chiita taku cumpliscama.

¹⁰ Ultimu Abrahamqui arajpach wajtquin ojkz tjewziča, wiñaya tjurñi watja. Yoozqui nii zuma watja pinsichiča, nižaza paachiča. Jalla nii zuma wajtquin ojkz tjewziča Abrahamqui.

¹¹ Nižazakaz Sarqui Yoozquin kuzziz cjen ica cjissinča, chawcwa cjican-pacha. Tsji majchchiz cjissinča, Yoozquin criichiž cjen. Sarqui tantiichinča, Yoozqui niž compromitta taku panž cumplisnaquiča, nii.

¹² Jalla nižtiquiztan Abrahamqui ticz irarchiz cjenami tsji majchchiz cjissiča. Jalla nii majchquiztan walja tama mirchiča, walja tama arajpach warawaranacažtakaz nižaza walja tama kot at pjilanacažtakaz, jalla nižta mirchiča. Ancha tamaž cjen, anača kanchuca Abrahamžquiztan tjonñi majch maatinaca.

¹³ Tjapa nii žoñinacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisan. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niž taku wiruñtajapa panž cumplaquiča. Jalla nuž kuzquiz zizcu cuntintutača. Tii muntuquiz žejlcan ninacaqui “Yekja wajtchiz žoñtča”, cjiñitača.

¹⁴ Jalla nižta chiiñinacaqui kjanapacha tjeeža, ninacaqui arajpach wajtquin ojkz pecchiča, nii.

¹⁵ Ninacaž ulanžquita yoka cjuñtasaž niiqui, nii yokquin cuttiñi attasača.

¹⁶ Ninacazti tsjan cusa yokaž pecatča, arajpach yokquin irantiz pecatča. Jalla nižtiquiztan Yoozqui anaž azkatča, ninacaž “Wejt Yoozza”, cjican cjenaqui. Yoozqui ninacžtajapa tsji zuma watja tjacžinchiča.

¹⁷ Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niž zinta majch wilana cunta tjaakatzjapa. Nii zinta majchqui Isaac cjitatača. Nekztan Abrahamqui niž zinta majch wilana cunta conijochiča. Nekztan conzmayatača. Pero Yoozqui nii conz apatatskatchiča, Abrahamž zuma cazñi kuz zizcu. Niiž tuquiqui Yoozqui Abrahamžquiz cjichiča:

¹⁸ “Isaacž cjen amqui majchmaatinacchiz cjequiča”. Jalla nuž taku tjaachi cjenami Abrahamqui niž zinta majch wilana cunta conijochiča.

¹⁹ Abrahamqui persun kuzquiz tantiichiča, Yoozza ticzinacami jacatatskatñiqui, jalla nuž tantiyatča. Abrahamqui persun kuzquiz persun majch conz cjichipantača. Jalla nižtiquiztan Isaac majchqui ticziquiztan jacatatchižtakaz cjissiča.

²⁰ Nižaza Isaacqui Yoozquin kuzziz cjen Jacobžtan Esaužtan, jalla ninacžquiz mazinchiča, wiruñtajapa ninacžta zumanaca cjequiča, nižaza Yooz yanapta cjequiča, jalla nii.

²¹ Nižaza ticz ora Jacobqui Yoozquin kuzziz cjen Josež maatinacžquiz mazinchiča, Yoozqui ninacžquiz zumanaca tjaaquiča, jalla nii. Nižaza Jacobqui atztan tjurt'ižcu Yoozquin rispitchiča.

²² Nižaza Josequi Yoozquin kuzziz cjen ticz ora mazinchiča, Israel žoñinacaqui Egipto yokquiztan ulnaquiča, nii. Nižaza mantichiča, persun curpu tsjijnaca Egipto yokquiztan chjichajo.

²³ Nižaza Moisés maa ejpqui Yoozquin kuzziz cjen Moisés nastiquiztan čhjep jiiz chjojziča. Ninacaqui cherchiča, ancha c'achja nii wawa, jalla nii.

Tuquiqui Egipto chawjc jiliriqúi mantichiča, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriž mantita ana eksičha. Moisés wawa ana conchiča.

²⁴ Nekztan Faraón chawjc jilirž majtqui nii Moisés wawa uywassinča. Jalla nuž uywastiquiztan nii wawaqui pajkchiča. Jalla nekztan pajkžcu Moisesqui Yoozquin kuzziz cjen Faraonž maati cunta cjis anapan pecatča.

²⁵ Antiz Moisesqui Yooz illzta Israel žoñinacžtanpacha sufriz tantiichiča, uj paañi žoñinacžtan tsjii ratukaz cuntintu žejlz cjenpacha.

²⁶ Niiž kuzquiz tantiichiča, “Egipto cusasanacžtan cuntintu kamz cjenpacha, Cristužtajapapankaz sufrasača. Jalla nuž sufrichi kamchiž cjen ultimquiziqui juc'ant cusal cjeeča, ricachu kamzquiztan”. Jalla nuž cjan, Moisesqui Yooz compromitta zumanac kjutñi pinsatča.

²⁷ Nižaza Moisesqui Yoozquin kuzziz cjen Egipto yokquiztan ulanchičha, chawjc jilirž žawjta ortina ana ekskú. Niiž kuzquiz tantiita jaru tjurt'ichi žejlchiča, niiž kuztan Yooz cherchiž cjen.

²⁸ Nižaza Moisesqui Yoozquin kuzziz cjen Yooz mantita jaru zapa kjuyquiz pascua wilana konz mantichiča. Nekztan nii wilan ljocžtan zapa kjuy zanzquiz sucarpayz mantichiča Israel žoñinacž primer maatinaca ana conta cjisjapa, ticzkatñi anjilžquiz.

²⁹ Nekztan Yoozquin kuzziz cjen Israel žoñinacaqui Mar Rojo cjita pajk kota kajkchiča, kjoñ yokažtakaz. Nekztan Egipto quintra žoñinacaqui nii kjoñiranpacha nii pajk kota zakaz kakatča. Jalla nuž taypiquiz kajkžcan tjapa nii Egiptonacaqui kjazquiz ticziča.

³⁰ Yoozquin kuzziz cjen Israel žoñinacaqui Jericó wajt muytata žejlñi pirkanaca pajlkatchičha, pakallak tjuñi muytata ojklajžcu.

³¹ Nižaza Yoozquin kuzziz cjen Rahabqui ana ticzinča parti Jericó wajtchiz žoñinacžquiztan. Naaqui Israel wajtchiz awayt'iñinaca zuma risiwchinča. Jalla nižtiquiztan ana ticzinča. Tuquiqui putirii žoñtača. Nekztan Yoozquin kuz tjaachinča. Pero parti Jericó wajtchiz žoñinacaqui Yooz mantita ana cazziča, werar Yoozquin ana kuz tjaachiča.

³² Yoozquin kuzziz puntuquiztan iya quintunaca žejlča. Pero timpuž pjaltičha. Jalla nižtiquiztan ana chii atasača Gedeónž puntu, Baracž puntu, Sansónž puntu, Jeftez puntu, Davidž puntu, Samuelž puntu, nižaza profetanacž puntu. Jalla nii Yoozquin kuzziz žoñinacž quintunaca žejlča pero.

³³ Ninacaqui Yoozquin kuzziz cjen quintra žoñinaca atipchiča, nižaza zuma mantiñi cjissičha, nižaza Yooz compromitta taku tanzičha, nižaza ana wal leonanacž atanaca chawczinchiča.

³⁴ Nižaza ana wal uj asñinaca tjessinchiča, nižaza atipchiča, ninaca ana pajk cuchillžtan conta cjisjapa. Nižaza ana azziz žoñinacaqui azziz cjissičha Yoozquin kuzziz cjen. Nižaza quira zalcan walja azziztača, jalla nižtiquiztan quintra žoñinaca tjiranchičha.

³⁵ Yoozquin kuzziz cjen Yoozqui yekjap maatakanacžtajapa ticzinaca jacatatskatchičha.

Yoozquin kuzziz cjen yekjap žoñinacazti sufriskattača. Pero ninacaqui ana Jesucristo nicchiča, sufrisquiztan liwriita cjisjapa. Antiz tirapan tjurt'ichiča, ticz cjenami. Jalla nuž ticziča, jacatatžcu juc'ant zuma kamañchiz cjisjapa.

³⁶ Yekjap žoñinacaqui Yoozquin kuzziz cjen iñartatača. Nižaza wjajtatača. Nižaza carinžtan maktatača. Nižaza carsilquiz chawctatača.

³⁷ Nižaza Yoozquin kuzziz cjen yekjap žoñinacaqui maztan čhajcžcu contatača. Nižaza yekjapanacaqui taypiquiz pootžcu contatača. Yekjapanacaqui sufriskattatača, werar Yoozquiztan quejpskatajo. Pero nii

criichi žoñinacaqui ana quejpsiča. Yekjapanacaqui Yoozquin kuzziz cjen cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi cujtžta ojklaychiča. Ana iya zquitchiztača. Nižaza Yoozquin kuzziz cjen yekjap žoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojritžtapan awantichiča.

³⁸ Ana criichi žoñinacaqui nii Yoozquin kuzziz žoñinacžtan ana kamz waquiziča. Ana criichi žoñinacaqui ana zumapanča. Nii Yoozquin kuzziz žoñinacžti ancha zumača. Jalla nuž cjenami tii muntuquiz sufrican awantichiča, ch'ekti yokaran ojklaycan, curunacaran ojklaycan, maz pjet ajkquiz kamcan, nižaza yok pjetquiz kamcan.

³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan ticlarchiča, “Ninacača wejtquin kuzzizqui” cji-canaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanziča.

⁴⁰ Učumnaca cjuñzcu, Yoozqui juc'ant zumanaca pinsichiča. Jalla nižtiquiztan ninacžtanami učumnacatanami chicapacha, nižaza tjapa Yoozquin kuzziz žoñinacaqui Yooz irata ancha zuma kamañchiz cjequiča.

12

YOOZ KAMAÑCHIZ CJEE

¹ Yoozquin kuzziz žoñinaca, jaziqui wacchi tuquita žoñinacaqui učumnacaquiz tjeeziča, Yoozquin kuzziz kamaña, jalla nii. Ninacaqui učumnaca muytatažtakazza. Ninacž zuma kamaña cjuñzla. Jalla nekžtan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekžtan Yooziž tjaata kamañquiz tjurt'iñi pasinziz kuztan kamla.

² Nižaza učumqui Jesucristuž kamaña cjuñzla. Niiž cjen učumqui Yoozquin kuz tjaachinčhumča. Nižaza niiqui učumnacaquiz juc'ant Yoozquin kuzziz cjiskataquiča, ancha zuma Yooz kamañchizkaz cjisjapa. Jesucristuqui cruzquiz ticžcan sufrichiča. Cruzquiz ticžqui azzucatača. Pero Jesucristuqui ana turwayziča nii ticžjapa. Jalla nižtiquiztan arajpachquin Yooz žew latuquiz julzi žejlča, cuntintu. Jalla nuž cuntintu žejlz zizcu, nii sufrisnaca awantichiča.

³ Jesusaž kamta cjuñzna. Niiqui ujchiz žoñinacž kjarquiz ancha sufrichiča. Jalla nii Jesusaž kamta cjuñzcu Yooz kamañchiz kamcan anapan ocha, tjup kuzziz cjee.

⁴ Ančhucqui imaziž contača ujchiz žoñinacž ančhucaquiz walja sufriskatanami.

⁵ Yoozqui ančhucaquiz chiižinchiča, niiž maatinacažtakaz. Jalla nii ewjt'iñi chiižinta ana tjatzna. Yooz takuqui tuž ančhucaquiz chiižinča: “Wejt maati, Yooz Jiliriž ewjt'iñi chiižinta ana chjaya. Nižaza niižquiz casticta cjenami ana llajlla kuzziz cjee.

⁶ Yooz Jiliri qui niiž k'aayi maatinaca ewjt'iča; nižaza persun maatinaca azquichñi casticu tjaaža, wilta zuma cjičiyajo”.

⁷ Jalla nižtiquiztan ančhucqui pasinziz kuztan Yooz azquichñi casticu awanta. Yooz Ejpqui ančhucaquiz irpiča. Tjapa ejpnacaqui persun maatinacapanž ewjt'iča. ¿Tsjii ana nižta ewjt'iñi ejp želasajo? Anaž cjesača.

⁸ Jaknužt Yoozqui tjapa niiž maatinaca ewjt'ičhaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasadž niiqui, ana lijitum Yooz maatinaca cjitasacha. Ančhucqui pamparan maatinacažtakaz cji-tasača. Ana ultim Yooz famillchiz žoñinaca cjitasacha.

⁹ Ančhuc cjuñzna, ocjala cjicanaqui ućhum persun maa ejpqui ewjt'iñitača. Nižaza ninacžquiz rispitchinćhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquiziča, zuma kamañchiz kamzjapa.

¹⁰ Ućhum persun maa ejpqui tsjii timpujapakaz ućhumnacaquiz ewjt'ichiča, ninacaž tantiitacama. Yooz Ejpzti ućhumnacaltajapa ewjt'iñiča, ućhum tsjan zuma kamañchiz cjisjapa, niž irata ancha zuma cjisjapa.

¹¹ Azquichñi casticunacquiztan ućhumqui sufrićhumča. Casticz ora llaquita kuzzizćhumča. Pero jakziltat castictiquiztan tsjan zuma kamañchiz cjissizlaja, jalla niiqui ultimu cuntintu cjisnaquiča. Nižaza zuma kuzziz Yooz kuzcama kamaquiča.

YOOZQUIN TJAPA KUZ CJISPANCHA

¹² Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa.

¹³ Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz irpita cjesača. Ančhucaž zuma kamtiquiztan ninacaqui zuma kamañchiz cjisnaquiča.

¹⁴ Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiž niiqui anaž Yooz Jiliržtan kamasacha.

¹⁵ Yoozqui ančhucquin yanapz pecča. Nii zuma yanapta ana chjaya. Yoozquiztan anapan zaraka. Ana wal jar muntižtakaz ana cjee. Jalla nuž ana wal muntižtakaz cjequiž niiqui, ančhucatami parti jilanacžtami ana wali kamañchiz cjesača.

¹⁶ Nižaza nii ana zuma kamañchiz Esaúžtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsiztan tsjii lujlž ćhjeržtan campiichiča.

¹⁷ Nekztan wiruñ Esauqui ejpžquiztan jilir majch irinsa tanz pecatča. Niiž ejpqui Jacobžquiz tjaachitaž cjen Esaúžquiz ana tjaas atchiča. Niiž irinsa tjaatapanča. Wiruñ Esaúqui ancha kaacanami, ana jaknužumi irinsa tanzñi atchiča.

¹⁸ Ančhucqui Yoozquin macjatžquichinćhucča. Ančhucqui anača Israel žoñinacažtakaz Sinaí curquin macjatžquichinćhucqui. Nii curquiz žoñinacaqui ojklayča, nižaza lanža. Pero Yoozquin ana lanžñi atasača. Tuqui timpuqui Israel žoñinacaž Sinaí curquin macjatan nii curuqui ujnatača, nižaza tsokchi tsjiržtan weeztatača. Nižaza jorjorñimi lliwjlliwjñimi želatča.

¹⁹ Nekz žejlcan trompet jora nonziča. Nižaza Yooz jora nonziča, ninacžquin paljayžquiñi. Nii jora nonžñi žoñinacaqui roct'ichiča, ana iya chiižcajo.

²⁰ Nii joraqui tuž mantichiča: “Jakziltat tii curquiz macjatžcačhaja, maztan ćhajc jawi contaž cjequiča, už pajk cuchillžtan contaž cjequiča. Žoñinacami animalanacami nižta macjatžcaquiž niiqui, contaž cjila”. Jalla nuž chiižinžquitiquiztan Israel žoñinacaqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo.

²¹ Ancha ispantichucanacatača nii chertanacaqui. Jalla nižtiquiztan Moisespachača tuž cjichiqui: “Wejrqui anchal tsucuča, nižaza kjarkatuča”.

²² Pero ančhucqui Sinaí curquin ana macjatžquichinćhucča. Ančhuczti arajpach žejtñi Yoozquin macjatchinćhucča, nižquin kuz tjaachiž cjen. Jaziqui ančhucča arajpach Jerusalén wajtchiz žoñinacaqui. Nižaza Sión cjita

curquiz macjattažokazza. Nii Sión cjita curuqui cjiča, arajpach Jerusalén watja, jalla nii. Arajpach Yooz wajtquin warank waranka anjilanaca žejlča, Yoozquin rispitzjapa ajczni.

²³ Nižaza Yooz wajtquin anjilanacžtan chica Yooz wajtchiz žejlñinacaqui ajcža, Yooz wajtchiz žoñinacžtanpacha. Jalla nii žoñinacž tjuunacaqui arajpach listiquiz cjiřtača. Nižaza ančhucqui Yooz Jiliržquizpacha macjatchinčhucča. Nii Yoozza tjapa pjalñiqui. Nižaza ančhucatan zuma kamañchiz žoñinacž animunacžtan Yooz wajtchizza. Yoozqui ninacžquiz niž irata ancha zuma kamañchizkaz cjiskatchiča.

²⁴ Nižaza ančhucqui Jesusižquin macjatchinčhucča. Niiča ew acta ut'aychiž cjen žoñinacžta tjurt'ižiniqui. Zoñinacžtajapa ticziča. Nižaza žoñinacž laycu niž ljocžtan sucarpaytažokaz cjichiča animal ljocžtakaz. Jesusiž ljoc tjawkchiž cjen, žoñinacaqui liwriita cjesača. Abelž ljocqui žoñinaca ana liwriyasača. Jalla nižtiquiztan Jesusiž ljocqui Abelž ljocquiztan tsjan cusača.

²⁵ Jalla nižtiquiztan ančhucqui Yooz chiita taku anaž nicaquiča, panž catokz waquiziča. Tuqui timpuqui Yoozqui Sinaí curquiztan Israel žoñinacžquiz chiichiča. Nekztan ninacaqui nii chiita taku ana juyzu paachiča. Jalla nižtiquiztan ninacaqui castictatača. Anziqiu Yoozqui arajpachquiztan učumnacaquiz chiižinžquiča. Nii chiižinta ana juyzu paaquiz niiqui, panž castictaž cjequiča. Yoozquiztan anapan atipi atasacha.

²⁶ Tuqui timpuqui Yooz joraqui yokanaca chjekinskatchiča. Anziqiu cjiča: "Tsjiižtan yokanacami arajpachami chjekinskatača".

²⁷ "Tsjiižtan" cjicanaqui Yoozqui zizkatča, Yooz paata yokanacami arajpachanacami liwj kataquiča. Nekztan ana chjekinskattanaca, niikaz želaquiča.

²⁸ Yooz watjaqui ana tjabatadž cjesača, panž želaquiča. Učhumča nii wajtchiz žoñinacaqui. Nižaza učhumqui Yooztan chica mantaquiča. Jalla nižtiquiztan učhumqui Yoozquin gracias cjizpan waquiziča. Nižaza tjapa kuztan, nižaza humilde kuztan Yoozquinž zuma rispita, Yooz tsucchuca azi tjeezniž cjen, nii cjuñžcu. Jalla nuž rispitan Yoozqui cuntintu cjequiča.

²⁹ Cjuñžna. Učhum Yoozza tsjii anawalinaca ujžni ujztakazqui. Jalla niiča anawali žoñinaca casticniqui.

13

CHIIZINTANACA

¹ Jilanaca, cullaquinaca, porapat tirapan zuma munaziñi kuzziz cjee.

² Nižaza tjonžni žoñinacžquiz zuma pan kjawžna. Jalla nuž kjawžcuqui yekjap žoñinacaqui anjilanacžquiz atintichiča, ana zizcu.

³ Carsilquiz chawcta jilanaca panž cjuñžna. Ančhucazakaz persun kuzquiz ninacaž chawctiquiztan sint'iz waquiziča. Nižaza sufriskatta jilanacžquiz cjuñžna. Ančhucqui curpuchiz cjicanaqui zakaz sufriskatta cjesača.

⁴ Tjapa ančhucqui lucutjiñi zalžcu, zuma lijitumaž cjicjiya. Tjunatan zalžcu zuma lijitumaž kama, ana yekja maatakžtan ojklayasača. Jakziltat adulteriuquiz ojklayčhaja, jalla nižquiz Yoozqui casticaquiča.

⁵ Ančhucqui anaž paazquin kuz tjaa. Zejlñi cusasanacžtan cuntintukaz cjee. Yoozqui tuž cjichiča: "Wejrqui ančhuc anal jaytača, nižaza anal ečača".

⁶ Jalla nižtiquiztan učhumqui ana jiwjatcan chiyasača, tuž cjican: "Yooz Jiliriča wejtquiz yanapniqui. Zoñinacaž wejtquiz čhulu paachi cje-nami anal eksnasača".

⁷ Ančhucqui icliz irpiñinaca cjuñzna. Ninacaqui ančhucaquiz Yooz taku paljaychiča. Jaknužt ninacaqui tjurt'ichi kuzziz ticzičaja, jalla nii cjuñzna. Ninacaž Yoozquin kuzziz kamta jalla nižta irataž kama.

⁸ Jesucristuqui tuquitanpacha, anzimi, jaztanami tsjii kuzzizpanikazza, jalla niiča ana kuz campiiñiqui.

⁹ Nižaza ančhucqui tјapaman tsjemata tјaajintanacžquiz anaž incallskata. Cjuñzna, Yoozqui ančhucaquiz yanapaquiča, tјup kuzziz cјisjapa. Jalla niiqui tsjan yanapča, čhjeri lujlz cuzturumpiquiztanaqui. Jakziltat nii čhjeri lujlz cuzturumpinac jaru kamčaja, jalla ninacžtaqui anaž yanapča juc'ant zuma kamañchiz cјisjapa.

¹⁰ Učhumnacaltaqui anača animal wilana žejlča. Tsjemat wilana žejlča, Jesucristupacha. Tuquita timplu jilirinacaqui anapanča nii wilana lujlchuca.

¹¹ Tuquita lii jaruqui timplu chawjc jiliriқi conta wilan ljoc chјitchiča c'uchquin žejlñi Yooz kјuyquin, Yoozquin ofrenda tјaazjapa, ujnaca pertunta cјisjapa. Nii wilanž curpunacaqui wajt tјii pampiquin uññitača.

¹² Jalla nižta irata Jesusaqui wajt tјiiquin ticziča, niž persun ljoc cjen žoñinacžquiz Yooz ancha zuma kamañchiz cjiskatzjapa.

¹³ Ančhucqui ana wal kamaña eccu, Jesucristužquin macjatz waquiziča. Nekztan učhum listuž cјee, sufrizjapa.

¹⁴ Tii muntuquiz kamcan ana wiñaya tјurñi wajtchizčhumča. Pero učhumqui arajpach watjaž oјkzjapa ancha tјewža.

¹⁵ Jalla nižtiquiztan Jesucristužquin sirwican učhumqui tirapan Yoozquin honora tјaaz waquiziča. Jalla nuž honora tјaacan wilana cuntaž cјequiča. Jaziқi učhumqui persun atžtan “Yoozqui honorchizkaj cјila”, cјican chiiz waquiziča.

¹⁶ Nižaza ančhucqui zuma paaznaca panž paa. Nižaza parti jilanacžtan ančuca želinchizquiztan jama tojna. Nekztan ančucaž zuma kamtiquiztan cuntintu cјequiča Yoozqui.

¹⁷ Ančhucqui icliz irpiñinaca cazpanča, nižaza ninacž jaru cјee. Ninacaqui ančhuc cuitiñiča. Nižaza nii icliz irpiñinacaqui, jaknužt criichi žoñinaca cuitiñizlaja, jalla nii Yooz yujcquin cuenta tјaastanča. Ančhuc zuma kaman, irpiñinacaqui cuntintuž ančhuc cuitaquiča, ana llaquizcu. Ančhucqui ančuca irpiñinacžquiz llaquiskataquiž niiqui, anapanž cusa cјesača ančhucaltajapaqui.

¹⁸ Wejtnacaltajapa Yoozquiztan mayizina. Wejrnacqui zuma kuztanpan kamuča. Jaziқi wejtnaca kuzquiz ana zinta uj cjuñuča. Chјulu paa-canami zuma lјituma kamz pecuča.

¹⁹ Nižaza wejtnacaltajapa mayizinalla, ančucaquin wilta apura tјonzjapa, ana iya atajta cјisjapa.

²⁰⁻²¹ Yoozza žoñinacž kuznaca walikaz cjiskatñiqui. Jalla niiqui učhum Jesucristo Jiliriž ticziquiztan jacatatskatchiča. Jesucristuča učhum chawjc Awatiriқi uuzanaca itzñižtakaz. Niiqui persun ljocžtan ew acta ut'aychiča wiñayjapa.

Jalla nižtiquiztan Yoozqui ančucaquiz zuma kamañchizpankaj cjiskatla, niž kuzcama kamzjapa. Nižaza Jesucristuž cjen Yoozqui učhum yanapla, zuma obranacami paazjapa, nižaza zuma kamzjapa. Ančucaž zuma kamtiquiztan Yoozqui cuntintu cјequiča. Jaziқi Jesucristuqui wiñayjapa honorchiz cјila. Jalla nužoj cјila. Amen.

²² Jilanaca, cullaquinaca, ančucaquiz rocuča, weriž chiižinta taku zuma kuztan nonznaquiča. Tsjii kjaž takunaca tii cartiquiz cјijrchinča.

²³ Učhum Timoteo jilaqui carsilquiztan liwriitača. Jalla nii ančucaquiz maz pecuča. Timoteoqui tekz waj tjonaquiž niiqui, nižtan wejttan ančucaquin chertzni okača.

²⁴ Tjapa icliz irpiñinaczquin tsaanžinalla. Nižaza tjapa Yoozquin cri-ichi žoñinaczquiz tsaanžinalla. Nižaza Italiaquiztan tjoñi jilanacaqui ančucaquin tsaanžquiča.

²⁵ Yoozqui tjapa ančucaquiz zumapanj yanapt'ila. Jalla nužoj cjila. Amén.

LA CARTA DE SANTIAGO

¹ Wejrtča Santiaguqui. Wejrqui Yooz Ejpž, nižaza Jesucristo Jilirž man-titacama okiñ žoñtča. Ančhucqui Israel wajtchiz žoñinacaqui tjapa nacionquin wichanziča. Ančhucaquin saludos apayžcuča tii cartiquiz.

PRUEBANACZ PUNTU

² Yoozquin criichi jilanaca, cullaquinaca, tii muntuquiz kaman tjapaman pruebanacaž žejlča. Chjulorami tsjii prueba tjonaquiž niiqui, ancha cuntintuž cjee.

³ Yoozquin tirapan kuzziz cjen, čjul pruebanacami atipaquiča. Nižaza Yoozquin juc'anti kuzziz cjisnaquiča. Nekztan juc'anti Yoozquin tjurt'iñi kuzziz cjisnaquiča.

⁴ Nižaza tirapan Yoozquin tjurt'aquiž niiqui, Yooz irata ancha zuma kamañchiz cjisnaquiča. Zuma ljitum žoñipan cjisnaquiča.

⁵ Pruebanacaž amquiz tjonaquiž niiqui, nekztan am kuz turwayznaquiž niiqui, Yoozquin juc'anti mayiza, Yooz jicz puntu zuma zizni cjisjapami, nižaza nii pruebanaca atipzjapami. Yoozqui ancha zumača. Jakziltat mayizaja, jalla nii žoñžquiz Yoozqui zuma yanapasacha. Niiž okzni kuzziz cjen, ana ujžcu yanapasacha, pruebanaca atipsjapa.

⁶ Yoozquin mayizican tjapa kuztan mayizizpanča. Ana paysnakni kuzziz mayiziz waquiziča. Paysnakni kuzziz cjesaž niiqui, tjamiž chjichta kjaz ljojkiztakaz cjesača, awizaqui Yoozquin kuzziz, awizati ana Yoozquin kuzziz.

⁷⁻⁸ Nii payznakni žoñiqui pizc kuzzizza. Jalla nižtiquiztan pizc kuzziz mayizan, ana nonžta cjesača. Yoozqui nii žoñžquiz ana yanapasacha. Nižaza nii pizc kuzziz žoñiqui anaž pinziz waquiziča, “Yoozqui wejtquiz yanapaquiča”, cjicanaqui.

⁹ Jilanaca, cullaquinaca, yekjapa Yoozquin criichi žoñinaca porinacača. Nii žoñiqui Yoozquin criichiž cjen, Yooz maati cjissiča. Nižaza arajpachquin okaquiča, walikaz kamzjapa. Jalla nižtiquiztan cuutintupanž cjis waquiziča.

¹⁰ Jakzilta Yoozquin criichi žoñit ricachuquiztan porilla cjisnasaž niimi, cuntintupankaz cjis waquiziča. Nii žoñiqui tirapan Yooz maatiča. Tsjii pastuqui tsjii pacamakazza zuma pjajkjallchizqui. Nekztan niiž pjajkjallaqui k'alaž chooča. Pjajkjallažtakaz tsjii timpupankaz ricachu cjesača žoñiqui.

¹¹ Tjuñiž kjaki siyanaqui pastu pjajkjallanacaqui k'ala chooča. Nekztan nii pjajkjallanacaqui katča. Anaž iya c'ajča. Nižtazakaz ricach žoñinacaqui tsjii timpukaz ricu kamča. Ricachu kamcan tiripintit porinsnasača.

UJ PAAZ PUNTU, YOOZ PUNTU

¹² Čjul prueba tjonanami Yoozquin tjurt'iñi kuzziz cjee. Nižta tjurt'aquiž niiqui, cuntintuž cjequiča. Yoozqui nii zuma tjurt'iñi kuzziz žoñinacžquiz ancha zuma kamaña tjaača. Nuž Yoozqui compromitchiča niižtan munazican sirwiñi žoñinacžquin.

¹³ Jakziltat uj paaz pecčhaj niiqui, anapanž Yoozquin culpasača, “Yoozqui wejtquiz ujquin tjojtskatz pecča” cjicanaqui. Yoozqui ana jakzilta žoñimi ujquiz tjojts munča. Nižaza Yoozqui uj paazqui anapanž persuna pecča.

¹⁴ Žoñinacž persun kuzqui ana zuma uj paaz pecča. Nekztan uj paazquin ojčka.

¹⁵ Chjulorami žoñinacaqui ana zuma kuzcama kamčhaj niiqui, ujquinpanž chjichtača. Nižaza jakziltami uj paañipan kamčhaj niiqui, wiñaya castictaž cjequiča.

¹⁶ Wejt k'ayi jilanaca, cullaquinaca, ana incalltaž cjee.

¹⁷ Yoozqui zumapanča, nižaza lijitumapanča čhjulquiztanami. Tjapacha zumanacaqui Yoozquiztanž tjonča, tjapa zumanacača tsewcta Yooz Epiž tjaataqui. Yoozqui tjuñimi jiižmi paachiča. Ninacž kjanaqui awisac zuma kjanča, awisac tsjirquiz weeztača. Yoozti anača nižta, zuma pankazza. Anapan žoñi ujquin tjojtskatz pecča.

¹⁸ Yoozqui zuma kuztan učumnacaquiz niiž maati cjiskatchiča. Yooz werar taku criichiž cjen, učumnacaqui Yooz maatinaca cjissinčumča. Jalla nižtiquiztan učumnacaqui parti criichi žoñinacž tuqui Yooz maatinaca cjissinčumča. Jalla nužupanča Yooziž pinsitaqui.

YOOZ TAKUNACA CATOKZPANCHA

¹⁹ Wejt k'ayi jilanaca, cullaquinaca, nonžna. Yooz taku nonzjapa listu cjee. Ančuca kuzquiz čhjulu chiizmi tjonžaja, jalla nii chiizqui zumpacha tantiižcu, chiiz waquiziča. Tiizakaz cjiwča, anača orallac žawjzqui.

²⁰ Oralla žawjñi žoñinacaqui parti žoñinacžquiz anaž yanapi atasača Yooz kuzcama kamajo.

²¹ Jaziqi ančuqui ana zuma kamañanacquiztan jayta. Anča uj paaznaca žejlča. Tjapa uj paaznacquiztan jayta. Nekztan humilde kuzziz Yooz tjaažinta taku zumpacha catoka. Nii Yooz takuqui ančucž liwriyasača.

²² Yooz takuqui anača nonžneeka nonzqui, antiz catokspanča, ana persunpachquiz incallta cjejajo.

²³ Yooz taku nonžcu jakzilta žoñit nii Yooz tawkcama ana kamčhaja, jalla niiča ana zuma žoñiqui. Tižtaž nii žoñiqui. Nii žoñiqui ispiwjquiz persun yujc cheržcu,

²⁴ ojkča. Nekztan nii cheržta yujc tjažta. Nižtaž nii Yooz taku nonžneeka nonžni žoñiqui. Yooz taku nonžcu, Yooz taku tjažta; ana nii Yooz tawkcama kamča.

²⁵ Yekjap žoñinacazti tjapa kuz nonža Yooz zuma liwriiñi taku. Kuzquiz chjojča. Nonžcu, ana tjažta, niicamaž kamča. Jalla niiž zuma kamtiquiztan Yoozqui nii žoñžquiz wintissa, tsjan walikaz kamajo.

²⁶ Jakzilta žoñit “Yooz tawkcama zuma kamiñ žoñtča wejrqui” chiičhaj niiqui, niiž atquiztan chiichiiz cuitazla. Anaž niiž ata cuitasaquiž niiqui, persunpachaž incallča. Inapankaz cjiča, “Yooz tawkcama zuma kamiñ žoñtča wejrqui”.

²⁷ Jakzilta žoñit Yooz tawkcama zuma kamčhaj niiqui, t'akjir wajchalanacami žewallanacami yanapaquiča. Nižaza ujchiz žoñi irata anaž kamasacha. Jalla nii žoñiča Yooz tawkcama zumaž kamñiqui. Jalla nii žoñiča Yooz Ejpž yujcquiziqi ana ujchizqui.

2

JILANACZQUIZ ANACHA PJALI PJALI CJISQUI

¹ Wejt jilanaca, cullaquinaca, Jesucristo Jiliriča anča honorchiz Yoozqui. Ančucqui nii Jesucristo Jiliržquiz kuzziz kamcan, tjapa jilanacžtan kuz chicata chjits pecsa. Anača pjali pjali cjisqui.

² Jalla tuž nonžna. Ančucaž ajcziž cjen pucultan žoñinacaqui tjonačhani. Tsjiiqui ricachuča, kor surtijanacchiz, nižaza anča zuma zquitchiz. Tsjiizti porillača, tsjel zquitchiz.

³ Nekztanaqui ančhucqui ricachukaz zuma atintačhani, “Tucquin julzna” cjican. Nii porill žoňžquizzti, “Nekzillakaz tsijsna” cjičhan, už “Zana latul-lakaz julzna” cječhaj.

⁴ Nuž cjequiž niiqui, niwjctanaqui pjaliž cjiicjiičha. Tjapa jilanacažtan ana chicata kuz chjitčha. Ana zuma kuzziz cjen, nižta cjiicjiičha ančhucqui.

⁵ Nonžna, wejt k'ayi jilanaca, cullaquinaca. Tii muntuquiz Yoozqui pori žoňinaca illzičha, niižquin ancha kuzziz cjejajo. Nižaza Yoozqui tsjii taku tjaachičha, tuž cjican: “Wejtquin kuzziz žoňinacaqui wejtčan chicaž kamaquičha. Nižaza jilirižtakaz wejtčan chicaž mantaquičha”. Jalla nii taku tjaachičha, niižtan zuma munaziňi žoňinacžquiz. Jaziqiu nii Yoozquin kuzziz pori žoňinacaqui nii tjaata taku tanznaquičha.

⁶ Ančhuczti pori žoňinaca ana rispitičha. Ricachukaz rispitičha. Pero ricachu žoňinacaqui ančhuc juc'anti langzkatčha. Nižaza jilirinacž yujcquiz ančhuc chjitčha, multanaca pacajo.

⁷ Nižaza ricachunacaqui Jesucristuž quintra ana zuma čhiichiičha. Pero zuma Jesucristuž cjen učhumqui cristiano cjita tjuuchizčhumčha.

⁸ Jilanaca, cjiirta zuma Yooz takuqui tuž cjičha: “Jaknužt persunpachquiz okzňamžlaja, jalla nižta okzňi kuzziz cjistančha žoňinacžquizimi, lijitum mazižtakaz”. Niicama kamcanaqui zuma kamsa.

⁹ Pero pjali cjiicjiiňinacazti uj paačha. Yooz tawk quintra paačha. Jalla nii kjanapacha zizkatčha Yooz takuqui.

¹⁰ Jakzilta žoňit tsjiillapan Yooz mantita ana cazzaj niiqui, ujchizpančha. Parti mantitanaca cazziž cjenami Yooz lii quintra paachičha. Jaziqiu castictaž waquizičha.

¹¹ Yoozqui tuž mantičha: “Anačha adulterio paazqui”. Nižaza nii Yooz-pacha mantičha: “Anačha žoňi konzqui”. Adulterio ana paachi cjenami, jakzilta žoňit žoňi cončhaj niiqui, uj paačha. Yooz lii quintraž paačha.

¹² Yooz takuqui Cristuž puntu zakaz čhičha. Cristučha učhum liwriiňi. Liwriita žoňinacaqui čhjulu paacanami čhiicanami zuma munaziz waquizičha. Jakzilta žoňit ana nuž kamčhaj niiqui, casticta cjequičha.

¹³ Nižaza jakziltat ana okzňi kuzziz kamčižlaj niiqui, casticta cjequičha. Yoozqui niižquiz ana zakaz okznaquičha. Pero jakziltat okzňi kuzziz kamčižlaj niiqui, juyzuquiz liwriita cjequičha, ana casticta cjequičha.

YOOZQUIN KUZIZ KAMZ PUNTU

¹⁴ Wejt jilanaca, cullaquinaca, jakzilta žoňit ana zuma kamčhaja, niiqui inakaz čhičha, “Yoozquin kuzziztčha wejrqui” cjican. Nuž ata alaja čhiyan, ana liwriita cjesačha.

¹⁵ Nonžna. Tsjii jila cjicu už tsjaa cullaqui cjicu ana zquitchizlaja, nižaza ana čhjerchizlaja, jalla niižquiz yanapz waquizičha.

¹⁶ Nii t'akjir žoňi cheržcu tsjiiqui ančhucaciztan cječhani, “Walika okalla amqui, am curpu anam čh'uňuri naykataquičha; nižaza anam čhjeri eskataquičha” cjican. Pero ana čhjulumii nii t'akjir žoňžquiz yanapčhaj niiqui, ina čhiita tawkžtankaz okža. Nii pori žoňi pacha t'akjirikaz žejlčha.

¹⁷ Pori žoňžquiz ana yanapčhaj niiqui, inapanikazza Yoozquin criitaqui. Nii ana yanapňi žoňi ana Yooz kamaňchizqui. Inakaz pinsičha, “Yoozquin kuzziz žoňtčha wejrqui” cjicanaqui.

¹⁸ Yekjap žoňinacaqui cječhani, “Tsjiičha Yoozquin kuzzizqui. Tsjiizti zuma kamaňanacchizqui”. Pero wejrqui cjiwčha, ana zuma kamčhaj niiqui, žaknužt Yoozquin kuzzizqui tjeeznasajo? Anapanž tjeezňi atasachha. Zuma kamcan, Yoozquin kuzzizqui tjeeznasachha.

¹⁹ Zinta Yoozpankaz žejlča. Ančhucqui nii zinta Yoozquin criičha. Nii walikazza. Pero zajranacami “Zinta Yoozpankaz žejlča” jalla nuž zakaz zizza. Jalla nuž zizcu, Yooz casticz tjuñi eksñičha. Pero Yoozquin eksñi cjenami ana Yooz mantitacama kamz peccha nii zajranacaqui.

²⁰ Ana zuma kamcan, jakziltat “Yoozquin kuzziztčha” cjican chiičhaja, jalla niiqui inakaz nižta chiičha. Zumzučha niiqui. Yoozquin kuzziz puntu zizñi cjisjapa, tuž nonžna.

²¹ Abraham, učum tuquita atchi ejpqui, Yooz mantitacama ojkchičha. Tsjii nooj Yoozqui Abrahamžquiz mantichičha tuž cjican: “Abraham, am zinta majch, Isaac cjita, wilanažtakaz jawkwaquičha”. Yoozqui nuž mantichiz cjenacqui, Abrahamqui niž kuzquiz nii mantita payitačha. Pero niž majch Yoozquin wilana ljoktawk cjen, Yoozqui Abrahamžquiz atajchičha, nii zinta majch ana conajo. Jalla nuž Yooz mantitacama kamtiquiztan, Abrahamqui Yooz yujcquiziqui ana ujchiz nižaza zuma cjissičha.

²² Abrahamqui Yoozquin kuzziz cjen, Yooz mantitacama zuma kamchičha. Nižaza zuma kamchiz cjen Abrahamqui tjeezičha, Yoozquin kuzzizpanča, nii. Nekztan Yooz mantita cazziž cjen, juc'anti Yoozquin kuzziz cjissičha.

²³ Cjijrta Yooz takuqui tuž cjičha: “Yoozquin kuzzizpanča Abrahamqui. Nekztan Yooz yujcquiziqui Abraham ana ujchiz nižaza zuma cjissičha”. Abrahamž kamtiquiztan učumqui zizza, nii Yooz takučha zuma razunaqui. Nižaza Abrahamqui “Yooz amigo” cjita tjuuchiztačha.

²⁴ Jaziqui ančhucqui zizza, zuma kamcan, Yooz yujcquiziqui ana ujchiz cjesačha, nii. Ana zuma kamcan, ata alajakaz chiičha, “Yoozquin kuzziztčha” cjicanaqui. Juñta kuzllakaz criyanaqui Yooz yujcquiziqui tira ujchizpanikaz žejlča.

²⁵ Nii puntuquiztan tsjiillazakaz cjiwčha. Naa Rahab cjiti putirii maatakž puntuquiztan cjuñzna. Naaža wajtquiziqui pucultan Israel žoñinacaqui cuchanžquitatačha awayt'izjapa. Naa žonqui nii pucultan Yooz partir žoñinaca zuma atintichiñča. Nekztan ana conta cjejajo nii žoñinaca yekja jiczquin cuchanchiñča. Atipasñi yanapchiñča. Jalla nižtiquiztan Yooz yujcquiziqui ana ujchiz cjissinčha, nižaza zuma kuzziz, naaž zuma kamchiz cjen.

²⁶ Tsjiiillazakaz cjiwčha. Tsjii žoñiqui ticžcu, animu ojkčha, janchi inakazza. Nižtapachaž tsjii ana zuma kamñi žoñiqui ticzižtakaz žejlča. Ana žejtz wirchizza. Inakaz chiičha, “Yoozquin kuzziztčha” cjicanaqui.

3

ATZTAN CHIIZ PUNTU

¹ Wejt jilanaca, wacchi žoñinaca anaž tjaajiñi cjis waquizičha. Tjaajiñi žoñinacaqui Yoozquiz cuenta tjaastančha. Nekztan ana zuma tjaajinchižlaja, niiqui yekja žoñžquiztan juc'anti castictaž cjequičha. Nii zizzinčucčha ančhucqui.

² Tjapa žoñinacaqui ujnaca paačha. Jakzilta žoñit persun chiitiquiztan ana ujchizlaja, jalla nii žoñičha ancha zumapanqui. Persun chiiz zumpacha ewjasaquiž niiqui, jalla nekztan tjapa niž curpuzakaz ewjasñi atasachha, ana uj paazjapa.

³ Nonžna. Tsjii frenžtan cawalluqui irpita cjesačha, yawchi žoñž pecta jaruqui.

⁴ Nižtazakaz žoñinacaqui tsjii kolta tuñžtan pajk warcumi chjitsa, pjursanti tjamiž cjenami. Tsjii warcu joojooñi žoñimi jakzi pecanami tuñžtan nii warcu chjichasačha. Kjažta kolta tuñžtanami pajk warcumi joojowasačha.

⁵ Nižtazakaz tsjii kolta ujmi wacchi muntinaca tjapznasača. Nižtazakaz ućhum chiiñi atami kjažta koltalla cjenami, niž chiiťquiztan ancha mantiz atasača.

⁶ Tsjii uj peekztažtakazza tii ataqui. Tii ataqui ćhjul anawalinacami chiyasača. Tii ataž cjen persunpacha ana zuma kamča. Nižaza tii ataž cjen yekja žoñinacžquiz ana zuma kamkatča. Tii atazakaz ajriž jaruqui chiiča.

⁷ Tjapa animalanacami nižaza tjapa wežlanacami žoñž mantuquizpanikaz cjesača.

⁸ Antiz anaž jec žoñimi persun chiiñi ata manti atasača. Tii ana wal ataqui anaž jaknuž mantichuca. Tii ataqui ana wali chiiz pecñipanča. Tsjii wininožtakazza tii ućhum ataqui.

⁹ Ućhumqui tii atžtan chiican Yooz Ejpž tjuu aynakiñćhumpansa. Yooz Ejpqui žoñi paachiča niž irata kuzziz. Nižaza tii atžtanpacha chiican Yooziž paata žoñinaca laykiñizakazza.

¹⁰ Tii atača zuma ana zuma chiiñiqui. Jilanaca, cullaquinaca, jalla nižta chiićhiizqui anawalipanča.

¹¹ Tsjii zuma wijiñquiztan zuma kjaztan nižaza ćhjonanchi kjaztan anaž lewasača. Anapanž tsjii wijiñquiz pizc punta kjaz želasača.

¹² Nižtazakaz tsjii tujquin mazk'a kjaztan nižaza ćh'uyi kjaztan, jalla nii pizc punta kjaz ana želasača. Nižtazakaz tsjii muntiquiz tsjii punta frutapankaz pookñiča. Pizc punta fruta anaž pookasača. Nižaza tsjii ćh'uyi tuquiztan mazk'a kjaz ana cooznasača.

¿JECT YOOZ TAWK JARU KAMŃI ZOŃI?

¹³ Jaziqui jakziltat Yooz taku zuma zizzaj niiqui, zumaž kamspanča. Nii zizñi žoñiqui humilde kuzziz zuma kamaña tjeez waquiziča.

¹⁴ Jakzilta žoñit anawal iñiziñi kuz tjeezaja, nižaza persunpacha tucquin ćjis pecñi kuz tjeezaja, jalla niiqui mit kuzzizpanča. Nižaza nii ana zum žoñiqui “Yooz taku zizintča” ćjicanami, Yooz tawk jaru ana kamča.

¹⁵ Nii žoñž kamañiqui anača Yoozquiztanaqui. Antiz žoñžquiztanpankazza. Žoñž kuzquiz pinsitanac jaruča nii kamañiqui. Zajražquiztan tjonča.

¹⁶ Jakzilta žoñit anawal iñiziñi kuzzizlaja, nižaza tucquin ćjis pecñi kuzzizlaja, jalla nii žoñiž cjen ćh'aasnacami nižaza tjapaman ana wali kamznacami žejlča. Nižaza jakzilta žoñit Yooz Epiž kamañchizlaja, jalla niiqui zumapankaz kamča.

¹⁷ Nižaza niiqui pasinziz kuzziz cjen, žoñinacžtan zuma kamča. Nižaza parti žoñž razunanaca nonža. Nižaza nii zuma kamañchiz žoñiča okzñi kuzzizqui. Jalla nii žoñiqui zuma kamañanac jarupanž kamča. Nii žoñiqui ana pjali ćjiicjiiñi kuzzizza. Antiz zuma kuzzizza.

¹⁸ Jakzilta žoñit pasinziz kuzziz žoñinacžtan kamćhaja, jalla niiqui zuma kamča, nižaza parti žoñinacžquiz zuma kami yanapča.

4

MAYIZIZ PUNTU

¹ ¿Jequiž cjen ćhjaawjkatas žejljo? ¿Jequiž cjen ćh'aas žejljo? Anćhuc ana zuma kuzziz cjen žejlča niiqui. Anćhuca ana zuma pecñi kuzqui mantiz pecča.

² Anćhucaž pectanaca ana žejlča. Nekztan anćhucqui kichassa, žoñi conañcama. Nižaza yekja žoñž cusasa zmassa. Nii zmasta cusasa ana cunsiqui atžcu, nekztan ćhjaawjkatassa, nižaza kichassa. Anćhucaž

pectanaca cunsiczjapaqui, Yoozquiztan ana mayiziñchuccha. Jalla nižtiquiztan ančhucaž pectanaca ana žejlcha ančhucalta.

³ Nižaza ana zuma mayizan, ančhucaž mayizitaqui ana nonžtača. ¿Kjztiquiztan ana nonžtajo? Ančhucqui ana zuma kuzquiztan mayizichinčhuccha. Persun kuzcamakaz kamzjapa mayizichinčhuccha. Nekztanaqui anapan nonžtatača.

⁴ Yoozquiztan quejpsñi kuzziz jilanaca. Ana nižta cjee. Ujchiz žoñž kamañquiz kuzzizlaj niiqui, Yooz quintrača ančhucqui. ¿Nii ana ziz ančhucjo? Jakzilta žoñit ujchiz žoñž kamañquiz kuzzizlaj niiqui, Yooz quintraž cjissiča nii žoñiqui.

⁵ Anaž inapampa tuquita Yooz cjiirta takuqui tuž cjiča, “Yooz Ejpqui uchum kuzquiz niž Espiritu Santo cuchanžquichiča. Nii Yooz Espiritu Santuqui ancha pecča, uchumqui Yoozquin alaja kuzziz cjisjapa, jalla nii”.

⁶ Anchucaž Yoozquin juc'anti kuzziz cjisjapa, Yoozqui juc'anti yanapasača. Nižaza Yooz takuqui cjiča, “Yoozqui humilde kuzziz žoñžquiz yanapñipanča. Pero mita kuzziz žoñž quintrapanča Yoozqui”.

⁷ Jaziqui Yoozquin kuzziz cjee. Niiž mantuquiz cjee. Zajraž ančhuc ujquiz tjojtscatz pecanami, Yoozquin tjurt'ichi kuzziz cjee. Nekztanaqui ančhucaquiztanaqui zarakaquiča nii zajraqui.

⁸ Yoozquin macjata. Nižaza Yoozqui ančhucaquiz macjatžcaquiča. Uj paañinaca, anchucqui uj paaz eca. Pizc kuzziznaca, Yoozquin tjapa kuzziz cjee.

⁹ Nižaza uj paažcuqui, llaquita cjee. Kaacan ančhucaž paata uj paja. Uj paažcuqui, anača chipsqui. Juc'ant llaquizziza. Anača cuntintu cjisqui.

¹⁰ Yooz Jilirž yujcquiziqui humilde kuzziz cjee. Nekztan Yoozqui ančhucaquiz honorchiz cjiskataquiča.

ANACHA JILANACZ QUINTRA CHIICHIIZQUI

¹¹ Jilanaca, cullaquinaca, tsjižquinami tsjaaquinami anača quintra chiizqui. Nižaza anača quintra chuchqui. Jakziltat jilanacž quintra chiyačhaja, už cullaquinacž quintra chiyačhaja, jalla niiqui Yooz mantita jaru ana kamča. Yooz mantitaqui tuž cjiča, “Porapat zuma munazizza”. Nii mantitacama ana kamaquiž niiqui, nii mantitaqui ana waližtakaz nayaquiča. Nižaza nii Yooz mantita anal pecuča cjiča.

¹² Tsjiipankazza ultim mantiñi taku tjaachiqui. Yoozza niiqui. Jalla niizakazza ultim juezqui. Jaziqui nii Yoozqui žoñinaca arajpachquin chjichasača. Nižaza infiernuquin chjatkatasacha. Jaziqui anchuczti anaž jecmi arajpachquinami infiernuquinami ojkkatasacha. Jaziqui ančhuca jilanaca anača pjalz peczqui.

TII MUNTUQUIZ ŽOÑŽ ZETI PUNTU

¹³ Tsjiilla cjesača. Nonžna. Yekjap žoñinacaqui anchucaquiztan ancha chawjcwama amtiñiča, tuž cjican: “Tonji jakat watja okača. Nii watja irantižcu, cusasa campiyan, paaz cancan zumal kamača tsjii wata intiru”. Nuž cjiñiča.

¹⁴ Nižta chiižcumi, anapanž zizza nii žoñiqui, jaknužt kamačhaja, čjulut watačhaja, jalla nii. Yoozpankazza tjappacha mantiñiqui. ¿Čhulu iratat ančhuca žejtz? Kuyižtakazza žejtzqui. Tsjii kuyiqui jecžcu tsjii upacamapankaz tjenča. Nekztanž katča. Nižtapachazakazza žoñiqui. Tsjii upacamapankaz tii yokquiz žejtča.

¹⁵ Jaziqui tuž chiiz waquiziž, “Yooz munanaqui, žetača. Nekztan Yooz munanaqui langznača, nižaza čhjulumi paača, nižaza ojklayača”. Jalla nuž chiiz waquiziča.

¹⁶ Antiz yekjapaqui ančhucaquiztan chawjewa amtiñi kuzziz chiiča, ana tjapa čhjulumi zizcu. Jalla nižta mit kuzquiztan chiizqui ana walipanča.

¹⁷ Jakziltat Yooz kuz zizzaj niiqui, Yooz kuzcama kamz waquiziča. Ana nii Yooz kuzcama kamčaj niiqui, uj paača.

5

RICACHU ZONINACZ PUNTU

¹ Ricachunaca, nonžna. Ančhucaquiz ana walinacaž tjonaquiča. Nii zizcu, kjawcan kaacan žejlz waquiziča.

² Ančhuca cusasanacaž mokaquiča. Ančhuca zuma zquitinaca kjuriž lujltaž cjequiča.

³ Ančhuca juntjapta korinacami paaznacami inapankaz cjequiča. Ančhucqui ančhuca wacchi paaznaca ana gastichinčhucča, zuma kamtanaca paazjapa. Jaziqui ančhuca ana okzñi kuzziz cjen casticta cjequiča. Nižta cjenami ančhucqui tira juc'anti paaznaca juntjapča.

⁴ Ančhuc ricachu patrunanacaqui ančhuca piyunanaca juc'anti langskatchinčhucča. Ančhuca pastunaca zkalanaca ajzkatchinčhucča, “Cusa pacaž” cjican. Ultimquiziqui koloculla pacchinčhucča. Nii incallta piyunanacaqui ančhuca quintra quijchiča. Yoozpachača nii piyunanacz quijta nonziqui. Jalla Yoozza walja azzizqui.

⁵ Ančhuc ricachu patrunanacaqui, tii muntuquiz ancha cusasanacchiz kamiñčhucča. Chjuluž pectanacami žejlča ančhucaltaqui. Jaziqui tsjii cjew animalažtakaz cjissinčhucča. Zoñiqui cjew animala illza conzjapa. Nižtapacha Yoozqui ančhuc illziča casticta cjisjapaqui.

⁶ Ančhucqui ricachu patrunanaca, ana ujchiz žoñinaca kuzinpan casticchinčhucča, conañcama. Nii žoñinacazti anatača ančhuca quintraqui.

PASINZIZ KUZUZ PUNTU

⁷ Jilanaca, cullaquinaca, učum pajk arajpach Jiliriž tjonzcama pasinziz kuzziz cjee. Zkal puntuquiztan cjuñzna. Tsjii zkala čhjacchi žoñiqui chijñi tjonz tjewža, primer chijñi, taypi chijñi. Pasinzižtan tjewža, ima zkala ajz timpu irantižcan.

⁸ Nižtakaz ančhucqui pasinziz kuzziz cjee. Arajpach Jiliriž tjonz tjuñiqui wajillača. Nekztan ana walinacquiztan liwriita cjequiča. Nii cjuñžcan, Yoozquin tira tjurt'ila.

⁹ Jilanaca, cullaquinaca, porapat anaž chuchasaquiča. Jakzilta žoñit chuchačaj niiqui, Yooziž azquichtaž cjequiča. Nii azquichñi Yoozqui wajillaž tjonaquiča.

¹⁰ Jilanaca, tuquita Yooztajapa chiiñi žoñinacaž puntu cjuñzna. Kjažta sufriz cjenami, Yoozquin tjurt'ichiča pasinziz kuztan. Nižtapacha cjee.

¹¹ Učumqui tuž cjiñčhumča, sufriz cjenami, “Yoozquin tjurt'ichi žoñinaca cuntintuž cjequiča”. Tuquiqui Job cjita jila želatča. Niiž quintu zizza učumqui. Jobqui pasinziz kuztan sufrichiča. Nižaza Yoozquin tirapan tjurt'ichiča. Jalla nii sufriz wattan, Yoozqui niiž zuma pinsita cumplichiča nii Job cjita žoñztajapa. Nižtapankazza Yoozqui žoñinaczquiziqui, ancha okzñi kuzzizpanča.

¹² Jilanaca, cullaquinaca, tiča chekanaqui. Anača inapampa Yooz tjuuqui chiichiizqui. Anapanča “Juro por Dios” cjican, chiichiizqui. “Iyaw”

cjižcuqui, cumplispanča. “Anača” cjižcuqui, anača cjispanča. Werar chiizpanča, ana Yooziž casticta cjisjapa.

¹³ Jakziltat sufračhaja, jalla niiqui Yoozquin mayiziz waquiziča. Nižaza cuntintu kamñi žoñimi Yooz wirsu itz waquizizča.

¹⁴ Nižaza tsjii laa žoñi želan icliz jilirinaca kjawz waquiziča. Nii jilirinacaqui asiitižtan kullcan, Jesucristo Jiliržquiz mayizaquiča, laa žoñi žetajo.

¹⁵ Yoozquin tjapa kuztan mayizaquiž niiqui, nii laa žoñi čhjetnaquiča. Jesucristo Jiliriqui nii laa žoñi žaazkataquiča. Nižaza nii laa žoñiqui ujchiz želaquiž niiqui, pertuntaž cjequiča.

¹⁶ Jakziltat žoñž quintra uj paačhaja, jalla niiqui nii uj maztanča, “Am quintra tii uj paachinpantča” cjican. Nekztan Yoozquin porapat mayizaquiča. Nekztan ančhucqui čhjetintaž cjequiča. Yoozqui tsjii zuma žoñiž tjapa kuztan mayizitaqui nonža. Jalla nekztan Yoozqui tjaaquiča nii mayizitacama.

¹⁷ Cjuñzna, Elías cjita jilž puntu. Učhum iratača nii jilaqui, žoñikazza. Pero Yoozquin tjapa kuztan mayizichiča, ana chijnajo. Nekztan čhjep wata chicatchiž ana chijinchiča.

¹⁸ Wiruñaqi Elías cjita jilaqui wilta mayizichiča, chijñi apayžcajo. Nekztan Yoozqui chijñi apayžquiichiča. Chijnan, zkananacaqui wilta pookchiča.

¹⁹ Jilanaca, cullaquinaca, tsjii žoñiqui Yooz jiczquiztan zarakachani. Nekztan Yooz jiczquiztan zarakchi žoñžquiz tuž paljayz waquiziča, “Ana zarakalla. Yooz jiczquiz cut'iscalla” cjican.

²⁰ Nekztan nii zarakchi žoñiqui niž uj paaznaca ecaquiž niiqui, nižaza Yooz jiczquiz wilta quejpžcaquiž niiqui, jalla niž wacchi ujnacquiztan pertuntaž cjequiča. Infiernuquin ana okaquiča nii žoñiqui. Jalla nii zizza ančhucqui.

PRIMERA CARTA DEL APOSTOL SAN PEDRO

¹ Wejrtča Pedrutqui, Jesucristuž uchta apostoltqui. Jalla nižtiquiztan ančhucquin tii cartal cjiŕžcuča. Ančhucqui persun wajtquiztan wíchan-inčhucča wacchi yekja provincianac kjutñi, Ponto, Galacia, Capadocia, Asia, Bitinia, jalla nii provincianacquin ojkchinčhucča. Jakziqunt ojektčhaja, jalla nicju kamča; ana persun wajtquiz kamča ančhucqui.

² Yooz Ejpqui ančhuc illziča, niž partiquiz cjisjapa. Niiž tuquita pin-sita jaru ančhuc illziča. Nižaza Espíritu Santuqui ančhucquiz zuma kamañchiz cjiskatchiča, ančhuc Jesucristuž kuzcama kamajo. Jesucristuž ticziž cjen ančhuc ujnacaqui pertuntača. Jaziqui ančhucča Yooz wajtchiz žoñinacaqui. Yoozqui ančhucquiz zumaj yanapt'ila, nizaza ančhucquiz walikaj kamkatla.

EW KAMAÑCHIZ PUNTU

³ Učhum Jesucristo Jilirž Yooz Ejpqui honorchizkaj cjila. Yooz Ejpqui zuma okzñi kuzziz cjen učumnacaquiz ew kamaña tjaachiča. Jesucristuž ticžcu jacatattiquiztan Yoozqui učumnacaquiz ew kamaña tjaachiča. Ew kamañchiz cjican učumqui tjewža arajpachquin Yooztan chica kamzjapa.

⁴ Nižaza ew kamañchiz cjican učumqui Yooz tjaata irinsa tanznaquiča arajpachquin. Učhum irinsača arajpachquin Yooztan kamzqui. Anaž čjul anawalinacami nekz želasča. Nii Yooz irinsaqui učumnacaltajapa chjojtacha. Jalla nižtiquiztan nii irinsaqui anaž jecmi akasača. Tsjii ew zquitiqui manchita cjesača. Nižaza tsjii c'achja pjajkjallaqui chooča. Ančhuc arajpachquin chjojt irinsaqui ana nižta cjesača.

⁵ Arajpachquin ančhucaltajapa tsjii ancha zuma kamzqui tjacžtača. Jesucristuž tjonz tjuñquiziqui nii zuma kamzqui tjeežta nižaza tjaata cjequiča. Pero anziqumi tii muntuquiz želan, nižaza ančhuc Yoozquin kuzziz cjen, Yoozqui niž aztan ančhuc cuitaquiča.

⁶ Jalla niztiquiztan ančhucqui zuma cuntintu kuzzizčhucča. Pero tii anza timpuquiz ančhucaltaqui anawalinacaž tjonchiž cjen llaquisaquiča. Tii muntuquiz želan ančhucqui pruebanaca watča. Nuž cjenami Yooz Ejpča ančhuc cuitiñiqui, nižaza liwriiñiqui. Jaziqui cuntintuž cjee.

⁷ Ančhuc kuzqui pruebanacžtan yanztača, ultimu Yoozquin kuzziz, ultimu ana Yoozquin kuzziz, jalla nii tjeežta cjisjapa. Jakziltat pruebanacžquiztan sufranami tirapan Yoozquin tjurt'ichižlaja, jalla nižta kuzziz žoñiqui ancha valorchizza, c'achja kor paazquiztan cjen juc'anti. Čjul c'achjanacami anaž tjurča, akzñipanikazza. Korimi ujquiz t'azinta cjenaqui, jiñipanikazza. Nekztan pjalzñiča ana walinaca. Pero zuma pjalžta korimi ana tjurñipanikazza. Yoozquin kuzzizpan žoñinacaqui anača nižtažtakaz. Antiz tjurñipanikazza. Ančhucča Yoozquin lijitum kuzzizqui. Jalla nižtiquiztan Yooz Ejpqui ančhuc zuma risiwaquiča, nižaza honoraž tjaaquiča, Jesucristo wíla tjonz tjuñquiziqui.

⁸ Ančhucqui Jesucristužtan munaziča, kjažta ana cheržcumi. Nižaza ana cheržcumi nižquin kuzzizza. Jalla nižtiquiztan ančhucqui ancha cuntintuž chipža. Zoñž takunacžtan učum cuntintu kuz puntuquiztan ana zuma intintaskati atasča. Nižta cuntintu kuzqui Yoozpachaž chipskatcha.

⁹ Ančhucqui Yoozquin kuzzizpanča. Jalla nižtiquiztan ancha zuma kamañchizza. Wiñaya Yooztan walikaz kamča.

¹⁰ Yoozqui niiž okzñi kuzziz cjen ančhucaquiz yanapčha niižtan zuma kamajo. Učhumnacaltajapačha nii Yooziž yanaptaqui. Jalla nii Yooziž yanaptaqui mazinchičha tuqita profetanacaqui. Nii Yooztajapa chiiñi profetanacaqui Yooztan kamz puntu walja istutiichičha nii puntu iya iya zizjapa. Walja kuzquiz pinsichičha tsjan zuma intintajo.

¹¹ Cristuž Espíritu Santuqui profetanacž kuzquiz zizkatchičha, jalla tuž: Yooziž cuchanžquita Cristuqui sufraquičha; nižaza sufrizcu walja honorchiz cjequičha. Jalla nii puntunaca profetanacaqui zizkattatačha. Pero tsjan kjana ziz pecatčha, čhjulorat Cristo tjonaquejo, nižaza jaknužt niiž tjonz wataquejo? Jalla nii zizjapa ancha pinsatčha.

¹² Espíritu Santuqui tuqita profetanacžquiz Yooz pinsitanaca zizkatchičha, učhumnacaquiz maznajo. Anatačha ninacžtajapakaz nii zizkattaqui, antiz učhumnacaltajapazakaz. Jaziqui anzta timpuquizkaz nii tuqita mazintaqui kjanapacha kjanzt'ičha. Liwriiñi Yooz taku paljayñi žoñinacačha nii puntunaca kjanzt'iñinacaqui. Espíritu Santuqui arajpachquiztan cuchanžquitačha, kjanzt'iñi žoñinaca yanapzjapa. Jalla nii kjanzt'ita puntuquiztanaqui arajpachquin žejlñi anjilanacami juc'ant intintazñi pecčha.

¹³ Jalla nii puntunacquiztan chiižcu, jalla tuž ančhucaquin chiižinz pecučha. Zumpacha tantiya, zuma razunžtan. Ewjt'iñi kuzziz cjee. Tjapa kuztan tjewža, Yooz irata zuma kamañchiz cjisjapa. Jalla nižta zuma kamaña ančhucaquiz tjaaquičha Yoozqui, Jesucristuž tjonz tjuñquiz.

¹⁴ Ančhucčha Yooz zuma cazñi maatinacaqui. Jaziqui zuma kamañchiz cjee. Ima Yooz maati cjican, tuqita ana wali paaz pecñi kuz jaru kamchinčhucčha. Yooz kamaña ana pajchinčhucčha.

¹⁵ Jaziqui, Yooz maati cjican, nižta ana wali pecñi kuz mantuquiz ana cjiskata. Anziqui čhjulu paacanami zuma kamañchizkaz cjee, jaknužt ančhuc kjawzñi Yoozqui zuma kamañchizpanžlaja, jalla nižta.

¹⁶ Yooz tawk liwruquiz Yooz Ejpqui tuž cjičha: “Wejrqui zuma kamañchizpankaztčha. Jalla nižtiquiztan ančhuczakaz zuma kamañchiz cjee”.

¹⁷ Ančhucqui, Yooz maatinaca cjican, mayizičha, “Wejt Ejpčha” cjican. Ančhucqui, nižquinkaz rispitan, tii muntu yokquiz zuma kamzpan waquizičha, arajpachquin ojkcama. Yooz Ejpqui ana illillžcu pjalznaquičha. Zapa mayniqui paatiquiztan jama pjalžta cjequičha.

¹⁸ Cjuñzna ančhucqui. Tuquiqui ančhucqui tuqita ejpnacž tjaajinta kamañchiztačha. Inapankaz kamchinčhucčha. Jalla nii ana walñi kamañquiztan liwriitačha. Nii liwriiñiž puntuquiztanaqui tantiya. Anaž čhjul koržtanami, nižaza anaž paaztanami, nižaza anaž čhjul tucuziñi cusasanacžtanami pacžcu, liwriitacha ančhucqui.

¹⁹ Antiz Jesucristuž ancha walurchiz ljocžtan liwriitačha. Jesucristuqui conta cjissičha, walipunt uuza wilanažtakaz, zuma llumpaka. Jalla nižta zuma ljocžtan ančhucqui liwriitačha.

²⁰ Ima tii muntu paacan Yoozqui Jesucristo utchičha, tii mantuquiz žejlñi žoñinaca liwriizjapa. Anzta timpuquizkaz Jesucristuqui tjonchičha; ančhucaltajapa žoñi tucchičha.

²¹ Jesucristuž cjen ančhucqui Yoozquin kuzziz žejlčha. Yoozqui Jesucristo ticziquiztan jacatatskatchičha; nekztan zuma honorchiz cjiskatchičha, ančhuc nižquin kuzziz cjisjapa, nižaza arajpachquin kamz tjewzñi kuzziz cjisjapa.

²² Jaziqui ančhucqui lijitum Yooz tawkquiz cassinčhucčha Espíritu Santuž yanapchiž cjen. Jalla nuž Yooz tawkcama kamtiquiztan ančhuca kuznacaqui

ana ujchiz cjissiča Yooz yujcquiz. Nižaza parti criichñinacžtan zuma munaziñi kuzziz cjissiča. Jalla nižtiquiztan tirapan porapat ancha tjapa kuztan zuma munaza.

²³ Ančhucqui užca nassi wawažtakaz ew kamañchizza. Ančuca ew kamañcaqui anača ticzi ejpnacžquiztan. Antiz žejtñi Yooz Ejpžquiztanča, niž taku catoktiquiztan. Yooz takuča ew kamañchiz cjiskatñi; nižaza Yooz takuqui wiñayjapa tjuraquiča.

²⁴ Jalla nii puntuquiztan Yooz takuqui tuž cjiča:
 “Tjapa žoñinacaqui pastunacažtakazza. Tjapa žoñinacaž pajk obranacaqui pastunacž pjajkjallažtakazza. Tsjii timpukaz tjurasacha. Jaknužt pastunacaqui tsjii timpukaz žejlčhaja, jalla nižta tsjii kjaž watanacakaz žoñinacaqui kamča; nekztan ticža. Nižaza pastunacž pjajkjallanacaqui ratulla choočha, jalla nižta irataž žoñiž paata pajk obranacaqui anaž tjurasacha.

²⁵ Pero Yooz Jilirž takuzti wiñayjapa tjuraquiča”.
 Jalla nii Yooz takuča liwriiñi takuqui. Jalla nii liwriiñi taku ančucaquiz paljaytatača.

2

¹ Jalla nii taku catokžcu zuma kamañchizpan cjee. Tjapaman ana wali paaznaca eca. Nižaza pisc kuzziz cjicjijnaca eca. Nizaza ana incallz pecñi kuzziz cjee. Nižaza ana zmazñi kuzziz cjee. Nižaza anawali chiichiiznaca eca.

² Ančhucqui Yooz taku ancha pecz waquiziča, jaknužt tsjii užca nassi wawaqui piz itz pecčhaja, jalla nižta Yooz taku pecñi kuzziz cjis waquiziča. Nekztanaqui Yooz taku juc'anti zizñi zizñi kuzziz cjen, juc'ant zuma kamañchiz cjisnaquiča.

³ Jesucristo Jiliriqúi zumapanča. Jalla nii naazinčhucča. Jaziqui Yooz taku juc'ant juc'ant zizñi cjee.

JESUCRISTUCHA CHEKAN MAZTAKAZ

⁴ Jesucristo Jiliržquiz macjata. Niiča ew kamaña tjaañiqui. Jesucristuča žejtñimi, nižaza žejtkatñimi. Jalla niiča, žejtñi maz cjitaqui. Žoñinaca nii maz ana pecchiča. Yoozti nii maz illziča; nižtajapa ancha walurchizza.

⁵ Nii žejtñi maz cjita Jesucristuž cjen, ančhuczakaz Yooz žeti tanzinčhucča. Jaziqui ančhuczakazza žejtñi maznacažtakaz. Jaknužt maznacžtan kjuya pirkičhaja, jalla nižta Yoozqui ančhucatan niž kjuya kjuytažokaz cjiča. Ančhucča Yooz kjuychiz žoñinacaqui. Nižaza ančhucqui t'akžtača Yooztajapa sirwiñi. Nižaza ančhucqui persun kuznaca Yoozquin tjaača ofrendanacažtakaz. Nižaza Jesucristuž cjen Yoozqui ančucaž tjaata kuznaca asiptasača.

⁶ Jesucristuča maz cjitaqui. Jalla nii puntuquiztan cijirta Yooz takuqui tuž cjiča:

“Wejrqui tsjii simint maz tjulznuča Sión cjita arajpach wajtquin. Jalla nii mazqui juc'ant chekanča tjapa parti maznacquiztan. Nii mazqui Yooziž illžtača, nižaza Yooztajapa wali walurchizza. Jeqit nii walurchiz maz cjita Jesucristužquin kuz tjaačhaja, jalla ninacaqui anapanž amulasaquiča. Anapanž inapankaz cjesača”.

⁷ Maz cjita Jesucristuqui walja walurchizza, ančhuc criichinacžtaqui. Pero ana criichi žoñinactaqui nii maz ana walurchiztakaz nayča. Cijirta Yooz takuqui tuž cjiča:

“Kjuyñi žoñinacaqui tsjii maz ana pecchiča. Jalla nii ana pecta mazpacha zuma chekan maz cjissiča”.

⁸ Nižaza cjiirta Yooz takuqui tuž cjiča:

“Nii maz cjen žoñinacaqui t'ejžcu, ujquiz tjojtsnaquiča”.

Ana criichi žoñinacaqui Yooz taku ana juyzu paača. Nekztan sufriskattapanž cjequiča. Jalla nižtajapa Yoozqui ninaca utchiča.

⁹ Pero ančuczti anača nižta. Antiz ančucqui Yooziž illztača. Jaziqui ančucča Yooz maatinacaqui. Yooz Jiliržquiz sirwizjapa, t'akžtača. Ančucča Yooz wajtchiz žoñinacaqui. Jalla nuž cjisjapa illztača ančucqui. Nižaza ančucqui illztača Yooz ispantichuca obranaca paljayzjapa. Anawal zumchiquiz kaman Yoozqui ančuc kjawziča, niž ancha zuma jiczquiz luzkatzjapa, niž kjanquiz kamzjapa.

¹⁰ Tuquiqui ančucqui anatača Yooz watja. Anziča Yooz wajtchiz žoñinacaqui. Tuquiqui ančucqui Yooziž ana okžtatača. Anziča Yooziž okztaqui.

JILIRINACZQUIZ RISPITA

¹¹ Pecta jilanaca, cullaquinaca, tii muntuquiz kamcan ančucqui istrañiñchucča. Yooz wajtchiz žoñinacača ančucqui. Jaziqui chiižinžcuča, anawali pecni kuz ana juyzu paa. Nii anawali pecznacaqui ančuca persun kuz animu quintracha.

¹² Ana Yooz pajni žoñinacžtan kamcan, ančucqui zumapan kama. Ana Yooz pajni žoñinacaqui ančuca quintrachiyačhani. Nižaza uj paañinacžtakaz ančuc nayačhani. Jalla nižta quintracjiiacijyanami, ančucqui zuma kamz waquiziča, ninaca ančucaž zuma paatanaca chertzjapa. Jalla nuž cheržcuqui ninacaqui Yoozquin honora tjaaquiča ultim pjalz tjuñquiziqui.

¹³ Jilanaca, cullaquinaca, nonžna. Jesucristo Jiliržquiz sirwican tjapa žoñiž nombrita jilirinacžquiz casa. Chawc mantiñi jiliržquiz casa.

¹⁴ Nižaza niž cuchanžquita jilirinacžquiz casa. Nii jilirinacaqui cuchanžquitača, anawali paañi žoñinaca casticajo, nižaza zuma paañi žoñinacžquiz honora tjaažo.

¹⁵ Yoozqui pecča, ančuc zuma kamzjapa. Jalla nižta zuma kamcan, ančucqui zumzu anawali kamañchiz žoñinacžquiz ch'ujuž cjiskataquiča.

¹⁶ Yooz liwriita žoñinaca cjicanaqui zuma kama. Pero liwriita cjicanaqui anača pinzizqui ana walinaca paaznacžquiz. Antiz zuma kama Yooz piyunažta.

¹⁷ Tjapa žoñinacžquiz rispita. Tjapa criichi žoñinacžtan zuma munaza. Yoozquin rispita. Nižaza chawc mantiñi jiliržquiz honora tjaa.

SUFRICAN YOOZQUIN KUZIZ CJEE

¹⁸ Piyunanaca, ančucqui patrunanacž mantuquiz cjee, ninacžquiz rispitan. Zuma kuziz, nižaza okžni kuziz patrunchizlaj niiqui, niž mantuquiz cjee. Nižaza ana zuma patrunchizlaj niiqui, niž mantuquiz zakaz cjee.

¹⁹ Tsjii piyunaqui zuma langžni cjenami wjajtaž cječhani. Pero pasinziz kuztan awantiz waquiziča. Jalla nii piyunaqui nuž sufrican cjuñž waquiziča, niča ultimu Yooz piyunaqui, jalla nii. Jalla nuž sufrizcu zuma kuz tjeeža; nekztan Yooz yujcquiz ancha cuza cjitaž cjequiča.

²⁰ Tii muntuquiz kamcan ančucqui anawali paatiquiztan castictaž cječhani. Pasinziz kuztan awantaquičž niiqui, ėhjul honorat tjaata cjesajo? Pero zuma paatiquiztan sufriskattaž cjequičž niiqui, nižaza ančucqui pasinziz kuztan awantaquičž niiqui, Yooz yujcquiz honorchiz cjequiča.

²¹ Jalla nižta pasinziz kuziz sufraquičž niiqui, kjana tjeeža, Jesucristuž žoñinacžchucča, nii. Yoozqui ančuc kjawziča, zuma kuz tjeezjapa. Cristuqui ančuc laycu sufrichizakazza. Cristuqui sufrican ancha pasinziz

kuz tjeeziča. Nižta irata ančhucqui sufrican, nižtazakaz pasinziz kuz tjeez waquiziča.

²² Jesucristuqui ana zinta uj paachiča. Nižaza čjul anawal takumi ana chiichipanča.

²³ Cristuqui žoñinacaž ch'aanita cjenami, anapan chjaychiča. Nižaza Cristuqui sufrichi cjenami, anapan žoñi kitz pecchiča. Jalla nižta sufrican Cristuqui zizziča, Yooz Ejpqui nii anazuma žoñinaca legali casticaquiča, jalla nii. Jesucristuqui zizziča, anawali cjičjiñinacaž paatiquiztan jama casticta cjequiča, nii. Nižaza Yooz Ejpqui zuma kuzziz žoninacžquiz honora tjaaquiča.

²⁴ Jesucristupachača persun curpuquiz učhum ujnacquiztan sufrichiqui, cruzquiz ch'awcta. Jalla nuž učhumnacalta laycu ticziča, učhumnaca anawali ujnaca ecajo, nižaza Yooz tjaata zuma kamañchiz cjeyajo. Jesucristuqui chjojrichta cjissiča, ančhuc čhjetinta cjisjapa ančuca ujnacquiztan.

²⁵ Tuquiqui ančhucqui pasta uuzanacažtakaz ojklayatča. Anziqui ančhucqui Arajpach Awatiržquiz quejpchinčhucča, ančuca kuz niž cuitita cjisjapa.

3

LUCUTJIŇI KAMZ PUNTU

¹ Maatakanaca, ančhucqui persun luctakž jaru kama. Tsjii luctakanacaqui Yooz taku ana criičha, nižaza Yooz tawk jaru ana kamča. Pero ančhuc criichin maatakanacaqui zuma kamaña tjeez waquiziča. Ančuca zuma kamaña tjeeztiquiztan, ančuca ana criichi luctakanacaqui Yooz taku criičiž cječhani, ančhuc ana ancha tawkžtan atipchiž cjen.

² Nižaza ančuca luctakanacaqui criyačhani ančuca zuma kamtiquiztan, nižaza ančuca rispitiči kamtiquiztan.

³ Zawntan zquiti ist'asnacquiz anača kuz tjaazqui. Persun c'achja chjijcžta ach charquiz, nižaza zquiti ist'asnacquiz, nižaza ancha c'achja zquitinacquiz, jalla nižtanacquiz anača kuz tjaasqui.

⁴ Antiz zuma c'achja kamañanacquiz kuz tjaa. Humilde kuzziz, nižaza llan kuzziz cjee. Jalla nižta kamañanacaqui Yooz yujcquiziqui walja walurchizza. Ni zuma c'achja kamañaqui tsjii zuma tjurñi walurchiztakazza.

⁵ Tuqui timpuqui Yooz partir maatakanacaqui nižta c'achja kamañchiztača. Nii maatakanacaqui Yoozquin kuzziztača. Nižaza luctakž jaru cjiicjiñitača.

⁶ Jalla nižta Sara cjita cullaquiqui Abraham cjita lucžquiz cassinča, nižquiz “wejt jiliri” cjan. Ančhucqui nižta zuma kamañchiz cjequiž niiqui, Sara cullaca maatinacažtakaz cjequiča. Ana čjulquiztanami ančuca kuz turwayskata.

⁷ Luctakanaca, ančucaquin zakaz chiižinžcuča. Ančhucqui persun maatakanacžtan zuma intintazni munaziči kuzziz kamaquiča. Yoozqui pucultan ančucaquiz niž zuma kamaña tjaachiča. Jalla nižtiquiztan jaknužt persun maatakžquiz rispitz waquizičhaja, jalla nuž rispitaquiča. Cjuñzna, luctakaqui maatakžquiztan juc'ant azzizza. Persun maatakžtan zuma kamz waquiziča, ančucaž Yoozquiztan mayizitanaca ana ina cjeyajo.

SUFRIS PUNTU

⁸ Tsjižtan zakal cjesača. Tjapa ančhucqui tsjii kuzziz kamaquiča. Nižaza criichinacpora zumaž munazaquiča. Nižaza okžni kuztan kamaquiča. Nižaza humilde kuztan kamaquiča.

⁹ Tsjiizuñ ančucaquiz anawali paachiž cjen ana nižtapacha anawali tjepnaquiča. Nižaza tsjiizuñ ančuca quintra ch'aananami, ana nižtapacha niiž quintra ch'aaquiča. Antiz nižtajapa Yoozquiztan mayizinaquiča, nii zuma cjiskatzjapa. Yoozqui ančhuc kjawziča, zumanaca tanzjapa. Jalla nižtiquiztan ančuca quintra žoñinacžtajapami Yoozquiztan mayizinaquiča, Yooz wintižta cjisjapa.

¹⁰ Yooz takuqui tuž cjiča:

“Jakziltat zuma kamañchizpan pecčhaja, nižaza cuntintupan kamz pecčhaja, jalla niiqui persun chiiñi ata ewjt'istanča, anawal taku ana chiizjapa, nižaza ana incallñi toscar taku ana chiizjapa.

¹¹ Nižaza jakziltat cuntintupan kamz pecčhaja, anawali paaznacquiztan zarakstanča; nekztan zumapan paastanča. Parti žoñinacžtan wali kamzjapa, jalla nižtiquiz kuz tjaastanča.

¹² Yooz JiliriQUI zuma kamañchiz žoñinaca cuitičha. Nižaza ninacaž mayizitanaca nonža. Pero Yooz JiliriQUI anawali paañi žoñinacž quintrača.

¹³ Ančucaž zuma kamznacquiz kuz tjaachiž cjen, ¿ject ančuca quintra paasajo?

¹⁴ Pero ančhucqui zuma kamcan sufraquiž niiqui, cuntintuž cjee. Yoozqui ančucaquiz honora tjaaquiča. Nii quintra žoñinacžquizimi ana eksna. Nižaza anaž jeczquiztanami kuz turwayskata.

¹⁵ Cristupankazza ultim JiliriQUI. Jalla nižtiquiztan Cristužquiz ančhucqui rispitanča. Nižaza ančhucqui listu tjaczi žela, ančucaž Yooztajapa kamz puntuquiztan chiizjapa. Tsji žoñi nii puntu pewcznaquiž niiqui, zuma razunžtan kjaaz waquiziča. Humilde kuzziz nižaza rispitiñi kuzziz kjaaz waquiziča.

¹⁶ Zumaž kamaquiča. Nekztan ančuca kuzquiz anaž čjul ujmi cjuñznaquiča. Cristužquin kuzziz zumaž kama. Jalla nekztanaqui žoñinacaqui anaž ančuca quintra chiyi atasacha. Ninacaqui ančuca quintra chiyauiz niiqui, ultim azaquiča ančuca zuma kamtiquiztan.

¹⁷ Ančhucqui walikaz Yooz munañpi jaru kamcan sufračhaja, wintižta cjequiča. Ana zuma kamtiquiztan sufraquiž niiqui, jalla niiča ana waliqui; anaž Yooz munañpi jaručha niiqui.

¹⁸ JesucristuQUI učhum ujnac laycu ticziča. Jalla nižtiquiztan učhum ujnac laycu ana iya ticz pecča. Zuma kamañchiz CristuQUI ana zuma kamañchiz žoñinacž laycu ticziča, ninacžquiz Yoozquin macjatskatzjapa. Curpuchiz cjican contatača pero niiž animuQUI tirapan žejtča.

¹⁹ Niiž espíritu animuQUI chawctažtakaz espíritu animunacžquin ojkchitača Yooz puntu kjanzt'izjapa.

²⁰ Jalla nii chawctažtakaz espíritu animunacaqui tuquitanpacha Yoozquin ana cassičha. Noež kamta timpuquiz Yoozqui pasinziz kuzziz želatča nii tuquita anawali žoñinacžtajapa. Jalla nuž žejlcan Yoozqui Noežquiz tsjii pajk kjuyaž cherchi warcu kjuykatchičha. Nekztan Yoozqui nii warcuquiz tsjii quinsakal žoñinaca luzkatchičha, wacchi kjazquiztan žejtkatzjapa.

²¹ Jalla nii kjazqui bautismožtakaztača. Ančhuczakaz bautista cjican liwriitača. Ultim bautismuQUI anaž curpu ajunča, antiz ultim bautismučha Yoozquin tjapa kuztan cjisqui, ujnacquiztan pertunta cjisjapa, paata ujnacquiztan ana iya cjuñzjapa. Jilanaca, cullaquinaca, Jesucristuž jacatatchiž cjen učhumQUI liwriita cjesača.

²² JesucristuQUI jacatatžcu arajpacha ojkchičha. JaziQUI nicju Yooz Ejpž žew latuquiz julzi žejlča. Nekz žejlcan anjilanacami, nižaza jilirinacami nižaza poderchiznacami Cristuž mantuquiz žejlča.

4

¹ Cristuqui žoňž curpuchiz kamcan sufrichiča. Jalla nižtiquiztan ančhuczakaz sufrisjapa listo cjis waquiziča. Ančhucqui Cristužquiz kuzziz cjen sufraquiz niiqui, nižquin juc'anti macjataquiča. Nižaza uj paaznacquiztan juc'anti zarakaquiča.

² Jaziqui zuma kamaquiča, tii muntuquiz žejlcan. Yooz munañpi jaru juc'anti kamaquiča; anawali pecni kuz jaru ana kamaquiča.

³ Ančucaquiz cjiwča, ančuca tuquita kamtaqui ana walitača. Nužquizkaj cjila nii anawal kamtaqui. Jalla nižta anawal kamtaqui ana criichi žoñinacaqui jutztaza. Ančhucqui zuma zizza nii anawal kamta puntu. Tuquiqui ančhucqui anawal kuz pinziz jaru ojklayatča; nižaza adulteriuquiz ojklayatča; nižaza čjul kuz pecta jarumi paatča, nižaza kuz katchi licatča, nižaza ancha pjistanaca paatča, nižaza mazinacžtan licz pecatča. Nižaza žoňž paata yooznacquiz rispitatča. Werar Yooz mantita quintrača niiqui.

⁴ Yoozquin kuzziz cjen, ančuca kamtaqui anača iya nižtaqui. Jalla nižtiquiztan ančuca tuquita mazinaca ančucaquiztan istrañča, ančucaž ana iya cumpant'ichiž cjen. Nekztan ančucajapa iñarča.

⁵ Pero ultim pjalz tjuñquiz ninacaqui persuna anazuma kamtiquiztan Yoozquin cuenta tjaastanča, Yoozqui ticzi žoñinacami žejtñi žoñinacami ultimquiziqui pjalznaquiča, tii yokquiz jaknužt kamtčhaja, jalla niit jama. Yoozqui listo žejlča žoñinaca pjalzjapa.

⁶ Tii muntuquiz žejlñi žoñinacžquiz liwriiñi Yooz takuqui paljaytatača, ninaca criyajo, nižaza liwriita cjejajo. Žoňž curpuchiz cjen criichinacaqui tjapa žoñinaca irata ticža. Pero ninacž animunacaqui Yooziž arajpachquin kjawžta cjen zumapan kamča Yooz irat kamañchiz.

⁷ Jilanaca, cullaquinaca, tii timpuqui otča, wajillaž tjappacha čhultakinacami tucuzinznaquiča. Pero ana kuz turwayzita cjee. Zuma pinsiñi cjee. Nižaza persuna kamz ewjazñi cjee, Yoozquin mayizican.

⁸ Jalla tužuča chekanaqui, porapat zuma munaziñi kuzzizpankaz cjee. Zuma munazican, parti žoñinacž ujnac puntuquiztan ana ancha cjuñasača.

⁹ Porapat ančuca kjuyquiz zumapanž risiwasaquiča, ana paysnakžcu.

¹⁰ Yoozqui criichi žoñinacžquiz tjapaman zuma kamañanaca tjaača. Nii kamañanacchiz porapat yanapasaquiča, juc'ant zuma kuzziz cjisjapa. Nižta pecča učum Yooz Jiliriui.

¹¹ Jakziltat paljayz kamañchiz žejlčhaja, panž Yooz taku paljayz waquiziča. Jakziltat yanapñi kamañchiz žejlčhaja, panž Yooz tjaata aztan yanapz waquiziča. Tjapa ančhucqui čjul kamañchizimi Yooz honora juc'ant waytiskatča, Jesucristuž cjen. Yoozqui wiñayjapa honorchiz cjila. Nižaza Yoozqui wiñayjapa mantiñej cjila. Jalla nužoj cjila. Amén.

PRUEBANACAZ TJONANAMI CUNTINTUZ CJEE

¹² Pecta jilanaca, cullaquinaca, anawal pruebanacaž tjonan ana tsuca. Ančhuc yanzjapakaz tjonča, Yoozquin zuma tjurt'iñi kuzziz, ana tjurt'iñi kuzziz, jalla nii yanzjapa. Nižta pruebanacaqui panž želaquiča. Anaž istraña.

¹³ Jaknužt Jesucristuqui sufritčhaja, jalla nižtazakaz ančhucqui sufraquiča. Jalla nižtiquiztan nižta pruebanaca tjonchiž cjen, cuntintuž cjee. Nižaza Jesucristuž tjonz tjuñquiz ančhucqui juc'anti cuntintuž cjequiča. Nekztan Jesucristuqui niž aztan niž honora tjeeznaquiča.

¹⁴ Cristužquin kuzziz cjen ančuca quintra ch'aanita cjequiča. Pero ančhucqui cuntintuž cjee. Zuma Yooz Espiritu Santuqui ančuca kuzquiz

žejlča. Ančuca quintra žoñinacaqui Cristuž quintra chiiča. Ančuczti Cristuž honora waytiča.

¹⁵ Nonžna ančucqui. Anača žoñi conzqui. Anača tjañi zaazqui. Anača uj paazqui. Anača yekja žoñž asuntuquiz mitizizqui. Nižta ana walinaca paaquiči, sufračhani. Pero nižta ana walinaca anapan paaquiča.

¹⁶ Zuma cristiano cjican sufraquiči, ana azasača. Antiz Yoozquin panž honora tjeeznaquiča, Cristuž partiquiz žejltiquiztan.

¹⁷ Yoozqui niž famillchiz žoñinaca jusjiñi kalltiča, azquichta kamañchiz cjisjapa. Učhumqui tii muntuquiz žejlcan sufraquiči, ¿kjažt ana criichi žoñinacžtajapa wataquejo? Ninacaqui Yooz liwriñi taku anapanž cassa. Jalla nižtiquiztan infiernuquin wiñayjapa sufraquiča.

¹⁸ Zuma kamañchiz žoñinacaqui ch'aman anawalinacquiztan liwriitača. Jalla nižtiquiztan ana criichi žoñinacžquiz nižaza uj paañi žoñinacžquiz kjaž cjitat cjequejo? Infiernuquin wiñayjapa sufraquiča.

¹⁹ Jalla nižtiquiztan tii muntuquiz kamcan criichi žoñinacaqui Yooz mu-nañpi jaru sufriča. Jalla nižta sufrican Yoozquin kuzzizpan cjee, niž cuitita cjisjapa. Tii muntu paañi Yoozza lijituma cuitiñiqui. Anča zumapanča.

5

CRIICHI ŽOÑINACŽQUIZ CHIIZINTA TAKU

¹ Icliz jilirinaca, ančucaquin zuma tawkžtan chiižinžcuča. Wejrqui icliz jilirizakaztča. Persunpacha Jesucristo sufriñi cherchinča. Nižaza wejrqui parti criichi žoñinacžtan chica honorchiz cjeeča, Jesucristo wilta tjonž tjuñquiz.

² Tjapa ančucqui Yoozquin criichi žoñinaca zuma cwitaquiča, zuma uuza awatirižtakaz. Tjapa kuztan nižaza zuma kuztan cuitiz waquiziča. Jalla nižta pecča Yoozqui. Anača paaz ganzjapakaz iclizziz žoñinaca cuitaquiča, pero Yooz sirwican tjapa kuztan cuitiz waquiziča.

³ Anača tsjii ana zum patrunažtakaz cjiicjisqui, ančuca icliz žoñinacžtaqui. Antiz parti criichi žoñinacžquiz zuma kamaña tjeezna, ninaca nižta iratapacha zuma kamkatzjapa.

⁴ Nekztan chekan jilir Awatiriqui tjonžcu ančucaquiz zuma honoraž tjaquiča, zuma premiožtakaz. Tsjii chjañiquiztan paata premiuqui rat-ulla tucuzinznasača. Ančuca honora ana tucuzinznasača. Ančucqui Yoozquin criichi žoñinaca zuma cuititiquiztan jalla nižta honora tanz-naquiča.

⁵ Ančucqui tjetjowanaca, icliz jilirinacž jaru cjee. Nižaza tjapa ančucqui porapat humilde kuztan rispitasquiča. Yoozqui mita kuzziz žoñinacž quintrača. Pero humilde kuzziz žoñinacžquiz yanapča.

⁶ Jalla nižtiquiztan tjapa azziz Yooz Jilirž mantuquiz humilde kuzziz cjee, nekztan Yoozqui ančucaquiz honorchiz cjiskataquiča.

⁷ Yoozqui ančuc cuitiča. Jalla nižtiquiztan čjul llaquinacami nižaza kuz turwayskatñinacami nižquin kuzziz cjee.

⁸ Pinsiñi kuzziz cjee. Nižaza naynay žela. Ančuc quintra diabluqui ojklayča, anawal leona ajuticanžtakaz. Nii anawal diabluqui ančucaquiz atipz pecča. Nižaza criichi žoñinaca Yoozquiztan zarakskatz pecča.

⁹ Jalla nižtiquiztan niž quintra tjurtichi žela. Jesucristužquin kuzziz tjurt'ichi žela. Ančucqui zizza, tii muntuquiz kamcan tjapa criichi jil-anacaqui sufristanča. Jalla nižta zizcu, Jesucristužquin tjapa kuzziz cjen tjurt'ichi žela.

¹⁰ Ančhuc tsjii zkoloc sufritan, Yoozqui ančhucaquiz yanapaquiča, juc'ant zuma kamañchiz cjisjapa. Nižaza Yoozqui ančhucaquiz tjurt'iñi kuzziz cjiskataquiča, nižaza tjup kuzziz cjiskataquiča, čjul ana walquiztanami atipajo. Nii Yoozza zuma yanapñiqui. Niiqui učhum kjawziča, Jesu-cristužtan chica arajpachquin kamzjapa, wiñayjapa honorchiz cjisjapa.

¹¹ Nii Yoozqui wiñayjapa honorchizkaj cjila. Wiñayjapa mantiñej cjila. Jalla nužoj cjila. Amén.

¹² Wejrqui ančhucaquin tii kolta cartal Silvanužquiz cijrskatuča. Silvano jilaqui zuma lijitum jilača, cjiwča. Tii cartiquiz ančhucaquin chiižinžcuča, nižaza Yooz lijitum okzñi kuz puntu paljayžcuča. Jalla nii puntunaca zizcu tira tjurt'iñi kuzziz cjee.

¹³ Babilonia wajtquin icliz žoñinacaqui ančhucaquin tsaanžquiča. Ninacaqui Yooz illzta žoñinacazakazza. Nižaza Marcos ančhucaquin tsaanžquiča. Marcossa wejt maatižtakaz.

¹⁴ Ančhucqui porapat zuma munaziñi kuztan tsaanasaquiča. Tjapa ančhucqui, Cristuž partiquiz žejlñinaca, walikaj cjila. Jalla nužoj cjila. Amén.

SEGUNDA CARTA DEL APOSTOL SAN PEDRO

¹ Wejr Simón Pedruqui ančhucaquin cjiřžcuča. Wejrqui Jesucristuž manta payiñ zoñtča. Niiž uchta apostoltča. Yooztan Jesucristo Liwriiñiztan zoñinacžquiz anaž illillza; legaliz niiqui. Jalla nižtiquiztan ančhucmi wejrmi Jesucristužquin kuzziz cjen Yooziž tjaata kamaña tanzinčhumča. Ancha zumača nii kamañaqui.

² Yoozquiz nižaza učum Jesucristo Jiliržquiz juc'ant zuma pajz waquiziča. Nekztan ančhucqui juc'anti Yooziž yanapta cjequiča, nižaza tsjan walikaz kamaquiča Yooziž cjen.

CRIICHI ZOÑINACŽ KUZ PUNTU

³ Yoozqui učum kjawziča, nižtan chica honorchiz cjisjapa, nižaza nii irata zuma kamañchiz cjisjapa. Jaziqumi Yoozqui niiž aztan ančhucaquiz yanapča, niiž kuzcama zuma kamñi atñijapa. Ančhucqui Yooz puntu zizñi zizñiž cjen Yooz yanaptaqui tanznasača.

⁴ Yoozqui niiž ancha zuma walurchiz tawkžtan compromitchiča, učum yanapzjapa. Nii compromitta taku cumplissiča. Jaziqumi ančhucqui Yooz kuz irataž cjisnaquiča. Nižaza ančhucqui tii muntuquiz žejlñi ana walinacquiztan atipaquiča. Tii muntuquiz ancha ana walinaca žejlča zoñinacaž ana zuma pinsiñiž cjen.

⁵ Jalla nižtiquiztan ančhucqui Yoozquin tjapa kuztan cjee juc'anti juc'anti zuma cjisjapa. Jesucristužquin kuzziz cjen lijituma zuma kamz waquiziča. Nekztan zuma kamcan, zizñi nižaza intintiñi kuzziz cjis waquiziča.

⁶ Nekztan zizñi kuzziz cjican, persun kuzquiz ewjazñi kuzziz cjis waquiziča. Nekztan persun kuzquiz ewjazcan, zuma tjurt'iñi kuzziz kamz waquiziča. Nekztan tjurt'iñi kuzziz kamcan, Yooz kuzcamakaz kamz waquiziča.

⁷ Nekztan Yooz kuzcamakaz kamcan, criichi zoñinacžquiz okzñi kuzziz cjis waquiziča. Nekztan okzñi kuzziz cjican, tjapa zoñinacžquiz zuma munaziñi kuzziz cjis waquiziča.

⁸ Ančhucqui jalla nižta ancha zuma kuzzizčucčhalaj niiqui, juc'anti juc'anti zumaž cjequiča. Nižaza ančhucaž zuma kamtaqui anaž ina cjequiča. Nižaza ančhucaž Jesucristo Jilirž puntunaca ziztaqui anaž ina cjequiča. Jesucristuž puntunacquiztan zizñi zizñi cjican, walja zuma obranacchiz cjisnaquiča.

⁹ Jakzilta zoñit nižta zuma kamañchiz ana žejlčhaja, jalla niiča tsjii zur zoñižtakaz. Nižaza niiča ana zizñi zoñiqui. Niiž ujnacaqui pertunzqui tjatzača.

¹⁰ Ančhucqui, anača nižta cjee. Yoozqui ančhuc illzcu kjawziča. Jalla nii kjawžta zumpachaž catoka. Nižaza niižquinpan kuz tjaaquiča. Jalla nuž zumpachaž kamaquiž niiqui, anapanž Yoozquiztan zarakasača.

¹¹ Nekztan ančhucaž zuma kamtiquiztan arajpach wajtquin zuma risiwtaž cjequiča. Nii arajpach wajtquin Liwriiñi Jesucristo Jiliriqumi wiñayjapa mantiča.

¹² Jalla nižtiquiztan wejrqui ančhucaquin tirapan nii puntunaca cjuñzkatača. Ančhucqui nii puntunaca zizza. Nižaza ančhucqui werar Yooz taku catokžcu Yoozquin tjurt'ichi žejlča.

¹³ Jalla nuž cjenami wejrqui tuž tantiichinča. Wejr iya žejtcan, ančhucaquiz cjuñzkatz pecuča, tii chiižintanacžtan. Nii walikaz cjiwča.

¹⁴ Učhum Jesucristo Jiliriqui wejtquiz zizkatchiča, wajillaž tii curpu eccu arajpach wajtquin okača, nii.

¹⁵ Jalla nižtiquiztan tii puntunacquiztan cijrz pecuča. Nekztan weriž ticžtan ančhucqui čhjolorami tii puntunaca liyasača, zuma cjuñajo.

JESUCRISTUZ PUNTUQUIZTAN TJAAJINTA

¹⁶ Ančhucacquin tjaaajincan, wejrqui učhum Jesucristo Jilirž puntuquiztan tjaaajinchinča, jaknužt walja aztan wilta tjonachaja, jalla nii. Jalla nii tjaaajintaqui anaž wejt kuzquiztan ulanchiča. Nii tjaaajintaqui anača mañžtan tantiita quintuqui. Antiz wejrqui persun čhjujčžtan Jesucristuž honora cherchinča.

¹⁷ Wejrqui cherchinča, Yooz Ejpqui Jesucristužquiz zuma honora tjaaachiča. Nižaza Yooz Ejpž ispantichuc joraqui chiižquichiča tuž cjan: “Jalla tiiča wejt k'ayi Maatiqui. Tiiž cjen ancha cuntintuča”.

¹⁸ Jalla nuž cjiñi taku nonzinča arajpachquiztan tjonñi. Nii oraqui wejrqui Jesucristužtan chica žejlchinča Yooziž illzta curquin.

¹⁹ Jaziqui wejrqui cjiwčha tuquita Yooztajapa chiiñi profetž takuča werar takuqui, nii. Jesucristuž tjonzcama nii profetaž chiitaqui učhumnacaltajapa kjanazt'iča tsjii zuma lamparažtakaz. Jalla nižtiquiztan nii profetaž chii-tiquiz kuz tjaaaz waquiziča. Nii walikaz cjiwčha. Wentan kjantati chawcwa tewczcan, anaž iya lampara kjañi pecasača. Jalla nižta irata Jesucristuž tjontan, profetaž chiitanacaqui anaž iya pecasača.

²⁰ Jalla tii zakaz intintaz waquiziča. Nii cijjrta profetaž chiitanacaqui Yooz takuča. Jaziqui profetaž chiitami žoñž kuzquiztankaz ana intintazta cjesača. Yoozpanikazza profetaž chiita intintazkatñiqui.

²¹ Profetanacaqui anača persun kuzcama nižtanaca chiichiqui. Antiz Yooz Espiritu Santuqui ninacžquiz Yooz taku chiikatchiča.

2

FALSO TJAAJIÑINACŽ PUNTU

¹ Tuqui timpuqui toscara chiiñi profetanacaqui Israel wajtchiz žoñinacžquiz jecziča. Jalla nižta irata zakaz ančhucacquiz toscar tjaaajiñinacaqui jecznaquiča. Ninacaqui persuna pinsitaquiztan chjozkaž tjaaajnaquiča, žoñinaca turwayskatzjapa, nižaza Yoozquiztan zarakskatzjapa. Jalla nuž anawali tjaaajincan Jesucristo Jiliri ana pajñi chiyaquiča. Pero Jesucristuqui ninaca liwriizjapa ticziča. Jalla nuž anawali tjaaajintiquiztan ninacpachaž wajilla castictaž cjequiča.

² Nižta anawali tjaaajintiquiz walja criichi žoñinacaqui kuz tjaaquiča. Nekztan anazuma kamaquiča. Jalla ninacaž anazuma kamtiquiztan žoñinacaqui werar Yooz kamañ quina iñaraquiča.

³ Ancha paaz paca peccu, nii anawali tjaaajiñi žoñinacaqui toscar tawkžtan ančhucacquiz incallaquiča. Nekztan ančhucac paaz tanznaquiča. Jalla nuž cjen ninacaqui ultimupan tantaž cjequiča. Tuquitanpacha Yoozqui ninaca utchiča casticta cjisjapa.

⁴ Yoozqui uj paachi anjilanacžquiz ana pertunchiča. Antiz infiernuquin tjojtchiča. Zumchiquiz chawctažtakaz nekz chjojta žejlča, ultimu pjaz tjuñicama.

⁵ Nižaza tuquita timpuqui Yoozqui uj paachi žoñinaca ana pertunchiča. Antiz kjaz juyzu mantižquichiča nii anazuma kamañchiz žoñinaca ticznajo. Noé cjiitaqui žejtkatchiča niž pakallak familianacžtan. Noequi nii timpuquiz kamañi žoñinacžquiz cjichiča: “Zuma kamañchiz cjee” cjan. Pero žoñinacaqui Noež chiita tawkquiz ana juyzu paachiča.

⁶ Nižaza Yoozqui ana wal Sodoma wajtchiz žoñinacami nižaza Gomorra wajtchiz žoñinacami ujžtan ujchiča, kjup tuczama. Jalla nuž Yoozqui liwjtatanzjapa mantichiča. Jalla nuž casticcan Yoozqui wiruñ tjonñi anawal kamñi žoñinacžquiz chiižinz pecchiča, “Anača nižta kamzqui” cjican.

⁷ Nii pizc ujzi watjanacquiztan Lot cjita žoñiqui alajakaz liwriitača. Jalla niitača zuma kamañchizqui. Parti žoñinacaqui tjpaman ana walinaca paachiča. Jalla nižtiquiztan Lot cjitaqui nii anawali kamñi žoñinaca cheržcu ancha llactazñitača.

⁸ Nii zuma žoñiqui zapuru niž kuzquiz ancha zint'iñitača, nii parti žoñinacž Yooz lii quintra paachiž cjen. Lot cjita žoñiqui zapuru ninacž anawali paatanaca cherchiča, nižaza nonziča. Jaziqui nii anawali paañinacžtan kamcan, niž kuzquiz ancha zint'iñitača.

⁹ Ultimquiziqui Yoozqui Lot jwessiča nii wajtquiztan. Yooz Jiliri qui pruebanacžquiztan zuma kamañchiz žoñinaca liwriiñiča. Nižaza Yooza anazuma kamñinaca pjalzñiqui, nižaza chjoññiqui casticz tjuñicama.

¹⁰ Yoozqui juc'anti casticaquiča jalla tižta žoñinaca, persun anawali pecni kuzcama kamñi žoñinacami, nižaza jilirinacžquiz ana rispitñinacami. Jalla nižta žoñinaca juc'anti castictaž cjequiča. Ninacaqui ancha lisuča, nižaza mit kuztan anawali paañiča. Ninacaqui poderchiz arajpachquin žejlñinacžquiz ana ekskuc ararñiča.

¹¹ Yooz zuma anjilanacazti nii poderchiz arajpachquin žejlñinacžquiz ararzjapa eksa, azziz anjilanacaz cjenami. Nižaza zuma anjilanacaqui Yooz yujcquiziqui nii anawal žejlñinacž quintra ana uj tjojtunz pecča.

¹² Jalla nii anawal kamñi žoñinacaqui animalažtakazza ana intintazñi kuzziz. Persun kucamakaz ojklayñiča, Yoozquin ana juyzu paañi. Q'uit animalanacaqui žejlča, tanžta cjisjapa, nižaza conta cjisjapa. Jalla nižtaž nii žoñinacaqui. Ana zizta puntuquiztan quintra chiiča. Anawali kamcan nii anawali kamtiquiztan animalanacažtakaz ticznaquiča.

¹³ Nižaza ninacaqui parti žoñinacžquiz sufriskatchiž cjen, zakaz sufraquiča. Nižaza anawal pjijztanacquiz kamcan, “Cuntintutča wejrnacqui” cjican chiiñiča. Ančhucqui ninacžtan žejlzqui azipanča, nižaza ninacž cumpant'izmi ančhucaltajapa ana waliča. Ninacaqui ančhucacquiz incallz ancha jutztaza, ančhuc criichinacžtan chica žejljzjapa.

¹⁴ Nii anawali žoñinacaqui tsjii maataka cheržcu, pañ adulterio paaz pecča. Nižta anawali paaznacquiztan anapan ochñiča. Incallchuc maatakanacžquiz adulterio kjutñi chjichñiča. Jalla nižta žoñinacaqui adulteriuquiz ojklayñi, nižaza paaz tanzñi nižaza čjul uj paazmi ancha atñipanikazza. Jalla nižta cjiicjiñinacaqui infiernuquin ojkn žoñinacača.

¹⁵ Yooz jiczquiztan zarakchiča. Nekztan uj paacan ojklayñiča. Tuquitan tsjii anawali profeta želatča, Balaam cjita, Beorž majch. Jalla niiqui anawali paatiquiztan paaz ganz pecchiča. Jalla nii Balaam cjitaž iratača ninaca ojklayñiqui.

¹⁶ Tsjii ana chiiñi aznuqui Balaamžquiz ujziča žoñž tawkžtan, Balaam anawali paaz pecchiž cjen. Jalla nižta ujžñiž cjen Balaamqui atajtatača niiž anawali pinsita jaru ana paazjapa.

¹⁷ Wejr cjiwča, nii anawali tjaajiñi žoñinacaqui ana kjazziz tujžtakazza. Ancha taku tjaacha, pero anawira cumpliča. Nižaza ninacača ana chijñichiz tsjirižtakaz, tjami chjichta tsjirižtakaz. Ninacaqui wiñayjapa casticta cjequiča anawal tsokchi zumchiquiz chjatkatžcu.

¹⁸ Nii anawalinacaqui mitarazzi tawkchiz inapankaz chiiñiča. Anawali paaznaca tjaajincan, nižaza anawali pecznaca tjaajincan užca anawal kamañquiztan zarakchinacžquiz wilta anawal kamañchiz kamkatž pecniča.

19 Wejtnac jaru cjee, cjiñičha. Wejtnac jaru cjican, čhjulu paaznacami walikazza cjiñičha. Pero ninacapacha anazum kamañanac jaru cuztumrazzičha. Jakziltat anawal kamañ jaru cuztumrazačhaja, jalla niičha nii anawal kamañ mantuquiz žejlñiqui.

20 Učhum liwriiñi Jesucristo Jiliržquin criižcu, yekjap nii anawal tjaajñinacaqui liwriitačhani anawali paatanacquiztanami, nižaza anazuma kamtiquiztanami. Liwriita cjiscu wilta anazum kamañquiz mitisačhaja, nižaza anazuma kamaña cuztumrazačhaja, niž tuquita anawal kamañquiztan juc'anti anawaliž cjequičha.

21 Ninacaqui Yooz zuma kamaña ana pajtasaz niiqui, ninacžtaqui tsjan cusaž cjitasačha. Pero ninacaqui Yooz zuma tjaajinta catokchičha. Jaziqui Yooz zuma kamaña pajžcu, quejpsičha. Jalla nižtiquiztan ninacžtaqui juc'ant anawira waliž cjequičha.

22 Ninacaqui Yooz tawk jaru ojklaychitačha. Nekztan Yoozquiztan quejpsičha ninacaqui. Jaziqui nii quejpsñi žoñinacaqui pacunacažtakazza. Pacunacaqui jotžcu persun joti lujlža. Nižaza tsjii ajunta cuchiqui wilta lja-jzpiquizpacha zumt'ičha. Jalla nižtačha nii anawal tjaajñinacaqui.

3

JESUCRISTUZ TJONZ PUNTU

1 Pecta jilanaca, cullaquinaca, jalla tiižtan pizc wilta cartal ančhucaquin cijržcučha. Jalla tii pizc cijrta cartaz cjen ančhucaquiz werar razunžtan pinsiskatz pecučha.

2 Tuquitan Yooztajapa chiiñi zuma profetanacaqui Yooz puntu maz-inchičha. Nižaza wejtnac apostolonacaqui liwriiñi Jesucristo Jiliriž mantinaca ančhucaquiz tjaajinchinčha. Jaziqui tjapa nii tjaajintanaca cjuñzna.

3 Profetaž mazinta timpuž tjontan žoñinacaqui tjonaquičha. “Yooz puntu tjaajintanaca inapanikazza” cjican burlasaquičha. Nii burlasñi žoñinacaqui persun anawal kuzcama ojklayaquičha, nižaza persun kuzcama kamaquičha. Ančhucqui jalla nii zumpacha ziz waquizičha.

4 Ninacaqui pewcznaquičha, tuž cjican: “¿Kjažt cjisit Cristojo tjonaquičha cjetla pero? Učhum tuquita atchi ejpnacaqui kamchičha; nekztan ticzičha. Tii muntu kalltiquiztanpacha tjapa nižtapankaz watčha. Cristuc anaž tjonasačha”. Nuž cjicanž chiyaquičha ninacaqui.

5 Pero tuquita timpuquiztanpacha arajpachaqui Yooz chiitiquiztanpacha paatačha. Jalla nii Yooz paatami, ninacaqui anaž naaza. Nižaza Yooz mantitiquiztanpacha tii yokaqui kjazquiztan jeczičha.

6 Nižaza kjaz juyzu tjontiquiztan nekztanpachaž tii muntu yoka kjazquiz katžcu pertissičha.

7 Tii muntuquiz žejlñi yokami pachanacami ujžtan ujzjapa chjojta žejlčha. Yooz mantita jaru zakaz nižta wataquičha. Jalla nii ujqui ultimu pjalz tjuñquiz ujaquičha. Nii pjalz tjuñquiz zakaz anazum kamañchiz žoñinaca castictaž cjequičha nii ujquizpacha.

8 Pecta jilanaca, cullaquinaca, tiizakaz anaž tjatzna. Yooz Jiliržtajapa tsjii noojiqui warank watanaca cuntačha. Nižaza warank watanacaqui tsjii nooj cuntačha. Yooztajapa timpunacaqui niztačha.

9 Yekjap žoñinacaqui tuž cjičha, Yooz Jiliriqui niž tjaata taku ana uri cumpličha. Jilanaca, jalla nii chiitaqui anazuma razunačha. Antiz Yoozqui ančhucaltajapa pasinziz kuzziz žejlčha. Yoozqui anaž jakziltami castic pecčha. Antiz tjapa žoñinaca “ujchizpantčha” cjican chiikatz pecčha, ninaca liwriita cjisjapa. Jalla nižtiquiztan ana uri tjončha.

¹⁰ Pero Jesucristo Jiliriž tjonz tjuñiqui tiripintitž tjonacuiča, tsjii tjañitakaz. Jalla nii tjuñquiziqui tii muntu pachanacui tsjii tsucchuc jorjorñižtan tucuzinžnacuiča. Tjuñimi jizmi warawarami liwj katacuiča; ujta cjequiča. Nižaza tii muntu yokami tjapa žejlñinacžtan pacha ujžtan tankattaž cjequiča.

¹¹ Jalla nižta liwj tjatantaž cjequiča. Jalla nižtiquiztan ančhucqui Yooz kuzcama juc'anti kamz waquiziča, nižaza Yooz irata zuma kamañchiz cjis waquiziča. Jalla nižta kamañchiz waquiziča ančhucqui.

¹² Yooz tjonz tjuñi tjewžna, nižaza zumapan langžna, Yooz apura tjonzjapa. Nii tjonz tjuñquiziqui tii muntu pachanacami ujžtan tankattaž cjequiča. Nižaza tjuñi jizmi warawarami ujquiz liwj jiñkattaž cjequiča; nekztan liwj katacuiča.

¹³ Pero učumzti ew arajpachami yokami tjewža, Yooz chiita tawk jaru. Nii ew arajpachquinami yokquinami tjappacha Yooz irata zumacamaž cjequiča. Ana zinta anawaličui cjequiča.

¹⁴ Pecta jilanaca, cullaquinaca, Yooz tjonz tjuñi tjewžcan, zuma kamañquiz kuz tjaa, niž yujquiz ana ujchiz cjisjapa. Nekztan Yooztan učumnacatan walikaz cjequiča.

¹⁵ Jalla tii cjuñzna. Yooz Jiliričui ančhucaltajapa pasinziz kuzziz žejlča, ančhuc liwriita cjisjapa. Jalla nii puntuquiztan zakaz Pablo jilačui ančhucaquin cjičriča. Yoozčui nižquiz zizni zizni nižaza zuma intintazni kuzziz cjiskatchiča. Jalla nii ziztanac jaru učumž pecta Pablučui ančhucaquin cjičriča.

¹⁶ Weriž chiita puntunacquiztan Pabluzakaz čiichiča tjapa niž cjičrt cartanacquiz. Parti Pabluž cjičrtanacui ch'aman intintazzucača. Jalla nižta ch'aman intintazzucanacui ana zizni žoñinacami, nižaza pizc kuzziz žoñinacami tsjii kjutniž intintazza. Nižaza parti Yooz takunaca zakaz tsjii kjutniž intintazza. Jalla nuž tsjii kjutniž intintazcu, ninacui ninacžtajapa juc'ant ana zumquiz cjičsa; nekztan castictaž cjequiča.

¹⁷ Pecta jilanaca, cullaquinaca, ima tii muntuquiz tižtanaca watan tii puntunaca ančhucaquiz zizkatchinča. Jazičui anawali incallni žoñinacui želačuiča. Nii anawali incallni žoñinacui Yooz mantitanaca anapan cassa. Jalla nižtiquiztan ninacžquiztan cuit'aza, ana tsjii kjutni čjichta cjisjapa. Anawalinac kjutni čjichta cjequičui ničui, ančhucui ana tjurt'i ni kuzziz cjequiča.

¹⁸ Ančhucui učum liwriini Jesucristo Jiliržquiz juc'ant zumaž pajaciča. Nižaza niž puntu juc'ant zizaciča. Nižaza juc'ant zuma kamañchiz cjee. Učum Jesucristo Jiliričui honorčizkaj čjila anztajapami wiñayajapami. Jalla nužoj čjila. Amén.

PRIMERA CARTA DEL APOSTOL SAN JUAN

JESUCRISTUQUI TII MUNTUQUIZ TJONCHICHA

¹ Wejrqui Jesucristuž puntul ančucaquin cjiřzcuča ančuc wali cuntintu cjisjapa. Tuqui timpluquiztanpacha Jesucristuqui žejlñipantakalča, ima tii muntu želan. Tii muntuquiz tjontanaqui wejrnacqui Jesucristužtan kamchinča; wejtnaca čhjučžtan nii cherchinča; nižaza niž taku nonzinča. Jacatattanaqui wilta cherchinzakazza; nižaza wejtnaca kjaržtan nii lanzinča. Jazimi tirapanž žejtča Jesucristuqui. Nižaza jakziltat Jesucristuž taku criyačhaja jalla niiqui Yooztan wali cuntintupankaz cjequiča.

² Nii zeti tjaañi Jesucristuqui tjonchiča tii muntuquiz. Nekztan wejrnacqui nii pajchinča, nižaza cherchinča. Nekztan wejrnacqui nii Jesucristuž puntuquiztan žoñinacžquizimi, ančucaquizimi paljaychinča. Tuqui timpluquiztanpacha žejtñipantakalča nii Jesucristuž puntuquiztan žoñinacžquizimi, kamñitakalča. Nekztan tii muntuquiz tjonžcu, žoñi tucchiča.

³ Jaziqui nii chertanaca nii nonžtanaca ančucaquin quint'uča, wejtnacatan ančucatan tsjii kuzziz cjejajo. Wejtnacatan Yooz Ejpžtan nižaza Yooz Majchtan tsjii kuzzizpanča, jalla nižtapacha wejtnacatan ančucatan cjisjapa.

⁴ Wejrqui tii cartal cjiřzcuča ančucaquin wali cuntintu cjisjapa.

YOOZQUI ZUMA KJANQUIZ KAMCHA

⁵ Jesucristuqui wejtnacaquiz tjaañinchiča. Jaziqui nii tjaañintanaca ančucaquin cjiřzcuča. Yoozqui zuma kjanquiz kamča. Yoozqui zuma-pankazza, jalla nuž cjiča nii kjanquiz kamz puntuqui. Nižaza Yoozqui anapanž zumchiquiz kamča. Yoozqui ana čhjul ujchizza, jalla nuž cjiča nii ana zumchiquiz kamz puntuqui.

⁶ Tsjii uj paañi žoñiqui zumchiquiz kamča. Nuž kamcanaqui “Yooztan wejttanaqui tsjii kuzzizza”, cjičhaj niiqui, toscaraž chiiča nii žoñiqui. Anaž werar Yooz jiczquiz ojklayča.

⁷ Yekjapazti kjanquiz kamča; Yoozqui kjanquiz kamča, jalla nižtapacha. Jakzilta žoñinacat nuž kamčhaj niiqui, Yoozquin criichinacžtan tsjii kuzzizza. Nuž kamcanaqui, tjapa niž ujquiztan pertuntača, Jesucristuž ticziž cjen.

⁸ Jakzilta žoñit “Ana ujchiztča”, cjičhaj niiqui, persunpachaž incallča; toscaraž chiiča. Ana zum kuzzizza nii žoñiqui.

⁹ Pero jakzilta žoñit Yoozquin pertuna mayizaj niiqui, niž ujqui pertuntaž cjequiča. Nižaza ana ujchiz cjequiča. Jalla nuž cjiča Yoozqui. Anaž wira toscara chiyasača Yoozqui; niž taku cumpliñipankazza.

¹⁰ Yoozqui cjiča, “Tjapa žoñinacami ujchizza”. Jaziqui jakzilta žoñit “Ana ujchiztča”, cjičhaj niiqui, Yooz toscara chiitažokaž nayča nii žoñiqui. Nižaza niž kuzquiz Yooz taku anaž catokča.

2

JESUCRISTUCHA UCHUM TJURT'IZIÑIQUI

¹ Wejt jilanaca, cullaquinaca, wejrqui tii cartal cjiřzcuča, ančuc ana uj paajo. Jakziltat uj paačhaj niiqui, Jesucristužquiztan mayizaquiča. Niiča učum tjurt'iziñiqui. Nekztan Jesucristuqui Yooz Ejpžquin mayizinaquiča.

Jesucristuqui ana čhjul ujchizza, zumaž kamčha. Jaziqui nii tjurt'iziñiqui zuma mayizinasacha.

² Učhumž uj paatiquiztan Yooz Ejpqui učhum casticz waquiziča. Jesucristuž ticzi nekztan Yooz Ejpqui učhum pertunasača. Ana ujchiz Jesucristuqui učhum laycu učhumnaca ujquiztan ticziča. Jaziqui Jesucristužquin tjapa kuztan cjenagui čhjul uj paañi žoñinacami pertunta panikaz cjesača.

³ Jakzilta žoñit Yooz mantita jaru kamčhaj niiqui, Yooz pajča. Jalla niiča werarapan.

⁴ Jakzilta žoñit ana Yooz mantita jaru kamčhaj niiqui, anaž chii atasača “Yooz pajuča”, cjcanaqui. “Yooz pajuča”, cjesaž niiqui, toscaraž chiiča. Anazum kuzzizza nii žoñiqui.

⁵ Jakzilta žoñit Yooz tawk jaru kamčhaj niiqui, Yooztan ancha zuma munaziñi kuzzizza. Yoozquin tjapa kuzzizpanča. Jilanaca, tii zuma cjuñzna.

⁶ Jakzilta žoñit “Yooztan tsjii kuzziztča wejrqui”, cjičhaj niiqui, zuma kamzpanž waquiziča, Jesucristuqui zumaž kamčha, jalla nižta.

EW MANTITA

⁷ Jilanaca, cullaquinaca, wejrqui anal jazta mantita cijržcuča. Tuquitanpacha tii mantitac zizzinčucča ančhucqui, porapat zuma munaziz, jalla nii. Tuquitanpacha tii mantitac nonzinčucča.

⁸ Pero tii mantita cijržcuča, jazta mantitažtakaz. Jesucristuqui tii mantitacama kamčiča tii muntuquiz. Ančhuczakaz tii mantitacama kamčha. Nuž kamcan, zuma munazican, ana zumchiquiz kamčha, werar kjanquiz kamčha, Yooz takucama. Jalla nužupanča niiqui.

⁹ Jakzilta žoñit “Kjanquiz kamuča”, cjičhaj niiqui, jilanacžtan porapat zuma munaziz waquiziča. Jilanacžtan tira chjaawjkatčhaj niiqui, pachpa zumchiquizpanž kamčha.

¹⁰ Jakzilta žoñit jilanacžtan porapat zuma munazaja, jalla niiqui kjanquizpankaz kamčha. Jaziqui Yooz jicz cherchucača, ana ujquiz tjojtjapa.

¹¹ Jakzilta žoñit jilanacžtan chjaawjkatčhaja jalla niiqui zumchiquiz kamčha. Jakzitchuc ojkčhaj niiqui, ana zizza. Jaziqui Yooz jicz ana cherchucača; zur žoñižtakazza nii žoñiqui.

¹² Jilanaca, cullaquinaca, ančhucaquin cijržcuča. Jesucristuž ticzi nekztan ančuca uj pertunchiča Yoozqui.

¹³ Ejpnača, ančhucaquin cijržcuča. Jesucristuqui tuqui timpuquiztanpacha žejlñipantakalča. Nii Jesucristužtan kamčha ančhucqui. Tjotjowanaca, turtakanaca, ančhucqui Satanás atipchinčucča. Jaziqui ančhucaquinzakaz cijržcuča.

Jilanaca, cullaquinaca, ančhucqui Yooz Ejpžtan kamčha. Jaziqui ančhucaquinzakaz cijržcuča.

¹⁴ Ejpnača, Jesucristuqui tuqui timpuquiztanpacha žejlñipantakalča. Nii Jesucristužtan kamčha ančhucqui. Jaziqui ančhucaquin cijržcuča. Tjotjowanaca, turtakanaca, ančuca kuzquiz Yooz taku chjojchiñčucča. Nekztan Yoozquin tjurt'iñi kuzziz cjen, ančhucqui Satanás atipchinčucča. Jaziqui ančhucaquinzakaz cijržcuča.

¹⁵ Tjappacha ančhucqui, nonžna. Anača tii muntuquiz žejlñi cusasanacžquin kuz tjaazqui. Anača anawali paaznacquiziqui kuz tjaazqui. Jakzilta žoñit anawali paaznacquiz kuz tjaachaj niiqui, anaž Yooz Ejpžquin kuz tjaacha.

¹⁶ Tii muntuquiziqui tižta anawali paaznaca žejlčha: persun kuzcama kamz pecznaca, persun čhujquiz cherta pecznaca, tucquin cjis pecznaca. Jalla nižtanaca pecchaj niiqui, diabluž jaru ojklajčha.

¹⁷ Tii muntuquiz žejlčinacaqui liwj tucuzaquičha, tjažtaž cjequičha. Nižaza tii muntuquiz žejlčinaca pecznacami tucuzaquičha. Pero Yooz kuzcama ojklajčinacazti Yooztan wiñaya kamaquičha.

WERAR TAWKZTAN, TOSCAR TAWKZTAN

¹⁸ Jilanaca, cullaquinaca, tii timpumiž ojtčha. Tsji Jesucristuž quintraqui tjonaquičha, nii quintu zizza ančhucqui. Nižaza anziqumuzpa Cristuž quintra žoñinacaqui jecža. Nekztan učumqui zizza tii timpumquičha.

¹⁹ Nii quintranacaqui učumquiztan zarakchičha. Anatačha učumtan tsjii kuzziz ninacaqui. Učumtan tsjii kuzziz cjitasaž niiqui, tira učumtan kamtasachha. Ninacaž zaraktanacqui, kjanapacha cjissičha, anatačha učum tsjii kuzziz ninacaqui.

²⁰ Ančhuczti ana nižtičhucčha. Ančuca kuzquizzti Yooz Espiritu Santo kamčha. Jaziqui ančhucqui tjapa werara zizzinčhucčha.

²¹ Werar taku zizniž cjen ančucaquin cjižcučha. Nižaza Yooz takuqui anaž čjul toscarami čhičha.

²² ¿Ject toscar žoñejo? Jakziltat “Jesusačha ana Yooziž cuchanžquita Cristuqui” cjičhaja, jalla ničha toscara čhiñiqui. Cristuž quintračha ninacaqui. Nii žoñinacaqui Yooz Ejpžquin nižaza Yooz Majchquin ana pajz pecčha.

²³ Jakziltat ana Yooz Majchquin pajz pecchaja, jalla niiqui ana Yooz Ejpžtan kamasachha. Jakziltat “Jesucristuqui werar Yoozza” cjičhaja, jalla niiqui Yooz Majchtan kamčha; Yooz Ejpžtan zakaz kamčha.

²⁴ Nii tuqui nonžta Yooz taku persun kuzquiz chjojwa ančhucqui. Nii Yooz taku chjojžcu, Yooz Majchtan Yooz Ejpžtan ančhucatan tsjii kuzziz wiñaya kamaquičha.

²⁵ Yooz Majchqui čhičhičha, tuž cjan:

—Wiñaya Yooztan kamaquičha ančhucqui.

²⁶ Yekjap žoñinacaqui ančhuc incallz pecčha. Jaziqui cjižcučha nii puntuquiztan.

²⁷ Jesucristuqui Yooz Espiritu Santo ančuca kuzquiz cuchanžquičhičha. Jalla nižtiquiztan nii Espiritu Santuqui ančucaquiz tjaajinčha. Jaziqui yekja tjaajiñi espiritu anaž pecsa ančhucqui. Yooz Espiritu Santuž chekan weraraqui tjaajinčha. Anaž toscanaca tjaajnasachha. Cristužtan tsjii kuzziz kama; jalla nuž tjaajinčha Espiritu Santuqui. Nižtaqui niž tjaajintacama kama.

²⁸ Jilanaca, cullaquinaca, Cristužtan tsjii kuzziz kama ančhucqui. Nekztan Cristuž tjontanaqui, učumqui anaž eksnaquičha, nižaza anaž azaquičha.

²⁹ Jesucristuqui zuma kuzzizpančha. Nii zizza ančhucqui. Jakziltažlaj zuma kuzziz niiqui, Yooz maatičha. Jalla nižakaz zizza ančhucqui.

3

YOOZ MAATINACA

¹ Tjappacha ančhucqui nonžna. Yooz Ejpqui učum zumaž k'ayacht'ičha. Nižaza Yoozqui učum illzičha, niž maati cjisjapa. Yooz maatičhumčha učumqui. Jalla nižtiquiztan učum kuzqui ana pajčha ana Yooz criichinacaqui. Yooz kuzmi anazaž pajčha ninacaqui.

² Jilanaca, cullaquinaca, učumqui Yooz maatičhumča. Wiruñaquí jaknužkačhum cjisnačan, učumqui ana zizza. Pero Jesucristuž tjon-tanaquí, nii cheraquíča učumqui. Nekztanaquí Jesucristuž irata cjis-naquíča učumqui. Jalla nii tjaajinta zizzinčhumča.

³ Jakziltat Jesucristo tjewžaja, jalla niiquí čjul uj paaznacami ecča, ana ujchiz cjisjapa; Jesucristuquí ana ujchizza, jalla nižtapacha cjisjapa.

⁴ Jakzilta žoñizlaj uj paañi, jalla niiquí Yooz mantitanaca anaž cazza. Uj paazquí Yooz taku quintrača.

⁵ Jesucristuquí tii muntuquí tjonchiča, žoñinacž uj pampatzjapa. Ana čjul ujchizza niiquí. Jalla nii zizza ančhucquí.

⁶ Jakzilta žoñizlaj Cristužtan tsjii kuzziz, jalla niiquí ana uj paañiča. Uj paañi žoñinacaquí anaž naaza Cristuž puntuquíztanaquí. Nižaza anaž kamča Cristužtanami.

⁷ Jilanaca, cullaquinaca, ana jeczquizimi incallskata ančhucquí. Wali kamñi žoñinacaquí zuma kuzzizza, Cristužtakaz.

⁸ Satanás cjita diabluquí tuquí tinguíztanpacha uj paañipankaztakalča. Jaziquí nižaza tira uj paañiča. Nekztan uj paañi žoñinacaquí Satanás diabluž maatinacača. Jesucristuzti tii muntuquí tjonchiča, Satanás diabluž paatanaca akkatzjapa.

⁹ Yooz maatiquí ana kuzin uj paañiča. ¿Kjažtíquiztan nii ana kuzin uj paañitajo? Yooz maatiča, nekztan kuztan ana uj paapaasača. Yooz Ejpž kuz cherchi kuzziz kamñiča. Jalla nekztan tjapa kuztan uj ana paasača.

¹⁰ ¿Jakziltat Yooz maatejo? ¿Jakziltat diabluž maatejo? ¿Jaknužža nii zizas učumjo? Jalla tuž ziasača. Jakziltažlaj kuzin uj paañi, jalla niičha ana Yooz Ejpchizquí. Nižaza jakziltažlaj niž jilanacžtan čjaawjkatñi, jalla niičha diabluž maatiquí.

PORAPAT ZUMA MUNAZIZA

¹¹ Porapat zuma munaziza. Tii mantitaquí tuquítanpacha nonzinčhucča.

¹² Tsjii žoñi želatča, Caín cjita. Jalla nii Cainquí niž lajk conchiča. ¿Kjažtíquiztan conchit niijo? Jalla niž paatanacaquí anawalinacatača; niž lajkž paatanacazti walinacatača. Jalla nekztan niž lajk conchiča. Cainquí diabluž maatitača. Ana nii Cainž kuz cherchi kuzziz cjee ančhucquí.

¹³ Jilanaca, cullaquinaca, tii muntuquí žejlñi žoñinacž ančhuc čjaajwanaquí, ana istraña, ana upa kuzziz cjee.

¹⁴ Tuquíquí ana zuma munazan, jalla nekztan infiernuquin okaj cjitatakalča učumqui. Jaziquí Yoozquin criičuquí arajpach watjaž okaquíča; wali cuntintu cjequíča. Jalla nekztan učumqui Yoozquin criiči jilanacžtan porapat zuma munazizza. Nii zizza učumqui. Jakziltat ana jilanacžtan porapat zuma munazičhaja, jalla niiquí infiernuquinž okaquíča.

¹⁵ Jakziltat niž jilžtan čjaawjkatčhaja, jalla niiquí žoñi conchiž cjes, jalla nižtaž ninacaquí. Nižaza žoñi conñinacami ana Yooz kuz cherchi kuzzizza. Anaž wiñaya Yooztan kamasacha.

¹⁶ Cristuquí učum laycu ticziča. Nekztan jaknuž munazizlaja, jalla nii učumqui zizza. Učumqui Yooz criiči jilanacžtan zuma munazizpanča, ticzama.

¹⁷ Tsjii tjapa cusasanacchiz žoñiquí tsjii t'akjir jila cheraquíž niiquí, okzpanča. Anaž okznasaž niiquí, ¿kjažt Yooz cherchi kuzziz cjesajo? Anapanž Yooz cherchi kuzzizza.

¹⁸ Jilanaca, cullaquinaca, anača atžtan taku mayaka okzquí. Paatanacžtanaquí okza. Nekz tjeeža učumž okžtaquí. Niičha werar okzquí.

YOOZQUIZTAN ANA PAYZNAKZCU MAYAQUICHA

¹⁹ Jilanaca zuma okzcan, učumqui zizza, werar Yooz maatičhumpanča, jalla nii. Nekztan llajlla kuzzizlaj niiqui, tjup kuzziz cjee. Yooz yujcquiz Yooz maatinacčhumča.

²⁰ Yoozza juc'ant chekanaqui učum kuzquiztan cjenaqui. Yoozqui tjapa učum kuz zizza, ana walinacami, walinacami, tjappacha. Nii anawalinaca zizcumi, Yoozqui tirakaž učum okža.

²¹ Jilanaca, cullaquinaca, čhjlorat učumž kuz walika cječhaj niiqui, Yoozquiztan ana ekscu mayasača.

²² Učumqui Yooz mantitacama kamtiquiztan, nižaza Yooz kuzcama kamtiquiztan učumž mayiztac nonžtaž cjequiča.

²³ Yooz mantitanacaqui tužuča: Yooz Majch Jesucristužquin tjapa kuztan cjee. Nekztanaqui jilanacžtan zuma munaza. Jalla nuž mantichiča Yoozqui.

²⁴ Jakziltat nii mantitacama kamčhaja, jalla niiqui Yooztan tsjii kuzzizza. Nižaza Yooztan tsjii kuzzizza nii žoñinacžtan. Yooz tjaata Espiritu Santuqui učum kuzquiz žejlča. Jalla nekztan zizza učumqui, Yooztan učumtan tsjii kuzziz, jalla nii.

4*ESPIRITU SANTUŽTAN CRISTUŽ QUINTRA ESPIRITUŽTAN*

¹ Jilanaca, cullaquinaca, nonžna. Jakziltat “Tii takuqui Yooz takučha”, cječhaj niiqui, nii žoñiž chiita taku zumpacha tantiyaquiča, Yooz taku chiiñi, ana Yooz taku chiiñi, jalla nii. Anača čhjul takumi pjazila criizqui. Tii muntuquiz muzpa toscara chiiñi žoñinaca žejlča; Yooz taku chiitažokaž cječha.

² ¿Jaknužt žoñiž chiita taku paji atas učumjo? ¿Yooz Espiritu Santuž chiikatka? ¿Uz ana Yooz Espiritu Santuž chiikatja? Jalla tuž paji atasacha učumqui. Tii muntuquiz Jesucristuqui žoñž curpuchiz kamchiča. Jakziltat nižtapan chiičhaja, jalla niičha Yooz taku chiiñi.

³ Nižaza jakziltat Jesucristuqui anača žoñž curpuchiz kamchiqui, cjecan chiičhaja, jalla niičha ana Yooz takucama chiiñi. Cristuž quintra espiirituqui nii chiikatča. Nii Cristuž quintra espiirituqui tjonaquiča; tuquitan ančhucqui jalla nii nonzinčhucča. Anziqiu tii muntuquiz nižta Cristuž quintra chiiñinaca žejlča.

⁴ Pecta jilanaca, cullaquinaca, ančhucqui Yooz maatinacčhucča. Nii toscar taku joojooñinacaqui diabluž mantitaž ojklajča. Ančhuczi Yooz Espiritu Santuž mantitaž ojklajča. Yooz Espiritu Santuqui juc'anti azzizza nii diablužquiztan cjenaqui. Nekztan ančhucqui nii toscar taku joojooñinaca atipasača.

⁵ Ninacaqui diabluž maatinacača. Nii žoñinacaqui ana Yooz takucama chiiñiča, diabluž taku chiiñiča ninacaqui. Nii diabluqui tii muntuquiz ančaž mantiča. Jaziqiu Yoozquin ana criichi žoñinacaqui diabluž taku criičha.

⁶ Učumzi Yooz maatinacčhumča. Jaziqiu werar Yooz takuž chiyan Yoozquin criichi žoñinacaqui nii werar takuž catokča. Ana Yoozquin criichi žoñinacaqui nii werar taku anaž catokča. Nužquiz werar taku chiiñi žoñinacami, nižaza toscar taku chiiñi žoñinacami pizcpacha pajasača učumqui.

YOOZQUI ANCHA MUNAZIÑI KUZZIZZA

⁷ Pecta jilanaca, cullaquinaca, Yoozpankazza uĥum porapat zuma munazkatñiqui. Jaziqui uĥumqui tjappacha porapat zuma munazizpanĥa. Jakziltat zuma munaziĥaja jalla niiqui Yooz maatiĥa. Niżaza Yooz pajĥa.

⁸ Yoozqui ancha munaziñi kuzzizza. Jaziqui jakziltat ana munaziñi kuzzizlaja, jalla niiqui ana Yooz pajĥa.

⁹ Yooz Ejpqui tii muntuquiz niż zinta Majch cuĥanżquichiĥa uĥum Yooztan wiñaya kamzjapa, wali cuntintu. Jalla nuż cuĥanżquitiquiztan Yoozqui uĥumquiz niż munaziñi kuz tjeeziĥa.

¹⁰ Yoozqui ultimu zuma munaziñi kuzzizpanĥa. Yooz Ejpĥa uĥum k'ayachichiĥi. Nekztan niż Majch cuĥanżquichiĥa. Yooz Majchqui uĥum uj laycu ticziĥa, uĥum ana casticta cjisjapa. Nekztan zuma munaziñi kuzqui jaknużt cjeĥaja, nii zizza uĥumqui.

¹¹ Pecta jilanaca, cullaquinaca, uĥumtan ancha munaziĥa Yooz Ejpqui. Jaziqui uĥum niżtazakaz porapat zuma munazizpanĥa.

¹² Anaż jakzilta Źoñimi Yooz cherĥa. Ana Yooz cherżcumi zuma munaziĥaja, jalla nii Źoñiqui Yooztan tsjii kuzzizza. Niżaza Yooz munaziñi kuz, jalla niżta kuzzizza nii Źoñiqui.

¹³ Yooz Ejpqui niż Espiritu Santo uĥumquiz tjaachiĥa. Jalla nekztan Yooztan uĥumtan tsjii kuzzizza, nii zizza uĥumqui.

¹⁴ Yooz Ejpqui niż Majch cuĥanżquichiĥa Źoñinaca liwriizjapa. Nii Yooz Majch cherĥinĥa wejrnacqui. Nekztan anĥucaquiz nii puntu tjaajinchinĥa.

¹⁵ Jakziltat “Yooz Majĥĥa Jesucristuqui”, cjiĥaja, jalla niĥa Yooztan tsjii kuzzizqui. Niżaza Yoozqui niżtan tsjii kuzzizza.

¹⁶ Yoozqui uĥumtan ancha munaziĥa, jalla nii zizza uĥumqui. Niżaza nii criiĥa uĥumqui. Yoozqui munaziñi kuzzizza. Jaziqui jakziltat munaziñi kuzzizpanżlaja, jalla niĥa Yooztan tsjii kuzzizqui. Niżaza Yoozqui ninacztan tsjii kuzzizza.

¹⁷ Nuż kamcan juc'ant juc'ant munaziñi kuzziz cjissa uĥumqui, Jesucristuż irat kuzziz cjiscama. Jalla nekztan juyzuquiz ana eksnaquiĥa uĥumqui.

¹⁸ Munaziñi kuzziz Źoñinacaqui ana Yoozquin eksñiĥa. Zuma munaziñi kuzziz Źoñinacaqui anaż ĥjulumi eksnasaĥa. Jalziltat eksñi kuzzizlaja, jalla niiqui Yooz casticz eksa. Jalla niżtiquiztan anaż zuma munaziñi kuzzizza nii eksñi Źoñinacaqui.

¹⁹ Yoozqui uĥumtan zuma munaziĥa. Jalla nekztanaqui uĥumqui Yooztan munaziĥa.

²⁰ Jakziltat “Wejrqui Yooztan zuma munaziñi kuzziztĥa”, chiiĥaja, jalla niiqui niż jilanacztan ana ĥjaawjkatñipanĥa. Niiż jilanacztan ĥjaawjkatĥaja, jalla niiqui anaż Yooztan zuma munaziñi kuzzizza. Inapankaz “Wejrqui Yooztan zuma munaziñi kuzziztĥa” cjiĥa. Toscara chiiĥa. Nii Źoñinacaqui cherta jilanacztan anazuma munaziĥaja, jalla niiqui ĥjaknużt ana Yooz cherżcu Yooztan munaziñi kuzziz cjesajo? Anapanż cjesaĥa.

²¹ Yoozqui uĥum mantichiĥa tuż cjan:

—Jakziltat Yooztan munaziñi kuzzizlaja, jalla niiqui niż jilanacztanami zuma munaziñi kuzzizakaz cjis waquiziĥa.

5

UCHUMQUI ANAWALINACA ATIPCHA

¹ Jesusaĥa Yooziż cuĥanżquita Cristuqui. Jakziltat nii Jesucristużquin criiĥaja, jalla niĥa Yooz maatiĥa. Tjapa Yooz maatinacami Yooz Ejpztan

munaziñi kuzzizza. Nižaza Yooz Ejpžtan munaziñi kuzzizalaj niiqui, Yooz Ejpž maatinacžtan munaziñi kuzzizakazza.

² Nižaza jakziltat Yooztan munaziñi kuzzizalaja, jalla niiqui Yooz mantitanacaž cazza. Jalla nekztan Yooz maatinacaqui porapat zumaž munaziča. Niiž zizza učumqui.

³ Yooztan munaziñi kuzziz žoñiqui Yooz mantitanaca cazza. Nii Yooz mantitanacaqui anača ch'ama.

⁴ Yooz mantita cazcu, Yooz maatinacaqui anawalinaca atipča. Jakzilta žoñit Yoozquin tjapa kuz criičhaja, jalla niiqui anawalinaca atipča.

⁵ ¿Jakziltat anawalinaca atipjo? Jakziltažlaj Jesús cjita Yooz Majchquin tjapa kuztan, jalla ninacaž atipča anawalinacaqui.

YOOZ MAJCHCHA JESUCRISTUQUI

⁶ Jesucristuqui tii muntuquiz tjontan, kjaztan bautistatača. Jalla nekztan cruzquiz ch'awcta ticziča. Kjaztan bautistaž cjen, jalla niiča tisticuqui, Yooz Majchča Jesucristuqui, cjican. Cruzquiz ch'awcta ljoc tjawkchiča. Jalla nii zakazza tisticuqui, Yooz Majchča Jesucristuqui, cjican. Yooz Espíritu Santuqui tisticuzakazza: Yooz Majchča Jesucristuqui, cjican. Nii Espíritu Santuča werarapan chiiñiqui.

⁷ Arajpachquinaqui čhjep tisticunaca žejlča, Yooz Ejp, nižaza Taku cjita tjuuchiz Yooz Majch, nižaza Yooz Espíritu Santo. Nii čhjepultanaqui tsjiikaz chiiča.

⁸ Nižaza tii muntuquiziqui čhjep tisticunacazakaz žejlča, Yooz Espíritu Santo, nižaza kjaztan bautis, nižaza cruzquiz ljoc tjawkz. Nii čhjepqui tsjiikaz chiiča: Jesucristuča Yooz Majchqui, cjican.

⁹ Zoñž taku weraražlaja niiqui, Yooz taku juc'ant werarača. Werara chiiñi Yooz Ejpqui chiiča, tuž cjican:

—Jesucristuča Wejt Majchqui.

¹⁰ Jakziltat Yooz Majchquin criičhaja, jalla niiqui persun kuzquiz zizza, Jesucristuča Yooz Majchqui, nii. Jalla niizakaz Yooz Ejpqui chiiča. Jakziltat Yooz taku ana criičhaja, jalla niiqui Yooz toscara chiitažokaz nayča. Yooz takuqui chiiča: Jesucristuča Yooz Majchqui, cjicanaqui. Jalla nii anaž criiz pecča yekjap žoñinacaqui. Jalla nekztan Yooz toscara chiitažokaz nayča nii ana criiñinacaqui.

¹¹ Nižaza Yoozqui cjiča:

—Wejt Majchqui ančuca ujquiztan ticziča. Jalla nekztan ančhucqui wejtan wiñaya kamaquiča, wali cuntintu.

¹² Jakziltat Yooz Majchtan tsjii kuzziz kamčhaja, jalla niiqui Yooztan wiñaya kamaquiča. Nižaza jakziltat Yooz Majchtan ana tsjii kuzziz kamčhaja, jalla niiqui Yooztan ana wiñaya kamasacha.

ZERZ TAKUNACA

¹³ Ančhucqui Yooz Majchquin criičha tjapa kuztan. Jalla nekztan Yooztan wiñaya kamaquiča, wali cuntintu. Nii zizjapa, ančucaquin cjiiržcuča wejrqui.

¹⁴⁻¹⁵ Učumqui Yooz kuzcama mayizaquiz niiqui, nonžtaž cjequiča. Učumž mayizta nonžtaž cjequiž niiqui, tjaataž cjequiča. Jalla nužupanča. Weraraž niiqui.

¹⁶⁻¹⁷ Tjapa anawalinacami ujpanča. Tsjii jilaqui uj paaquiz niiqui, Yoozquiztan mayizinspanča, pertunta cjeejo. Pero tsjii juc'ant anawal uj paaz kuzzizalaj niiqui anaž pertunta cjesača. Niižta ana Yoozquiztan mayizina, pertunta cjeejuqui. Yekja ujnacami Yoozquiztan mayizinasacha, pertuntaž cjeajo.

¹⁸ Yooz maatinacami anaž kuzin uj paasača. Yooz maatinaca walja kjaradž cuitičha Yooz Majchqui. Nii anawal Satanás diabluqui Yooz maati Yooz kjarquiztan ana kjañi atča. Nii zuma zizza ančhucqui.

¹⁹ Yooz maatinacčhumčha učhumqui. Ana Yoozquin criichi žoñinacaqui, tjappacha Satanás diabluž mantuquiz žejlčha. Učhumqui nii zakaz zizza.

²⁰ Yooz Majchqui tjonchičha učumnaca zuma intintazkatajo, nižaza werar Yooz pajajo. ¿Ject werar Yoozjo? Jalla niičha Jesucristo Yooz Majchqui. Jaziqumi učhumqui nii werar Yooztan tsjii kuzziz cjissinčhumčha. Niižtan kamcan, wiñaya niižtan kamaquičha.

²¹ Jilanaca, cullaquinaca, ančhucqui žoñiž paata yooznacquiztan zaraka, ana iya nekz macjata ančhucqui. Jalla nužupančha.

SEGUNDA CARTA DEL APOSTOL SAN JUAN

WERAR TAKU, MUNAZIÑI KUZ

¹ Wejrqui Juan cjititča. Icliz jiliritča wejrqui. Jaziqui tii cartal cji-jržcuča Yooz illzta cullacaquin tjappacha naaža maatinacžquin. Wejrqui ančhuc werara k'ayachuča. Nižaza tjapa Yooz taku criichinacaqui ančhucž k'ayachiča.

² Učhum kuzquiziqui werar Yooz taku žejlča, nižaza wiñaya želaquiča.

³ Nižaza zuma munaziñi kuzziz kaman, Yooz Ejpžtan nižaza Jesucristo Yooz Majchtan učhum yanapča. Nižaza učhum okžcu, llan kuzziz cjiskatča.

⁴ Yekjap am maatinaca cherchinča, Yooz takucama kamñi. Nužupan, mantichiča Yoozqui. Nuž kamñi cheržcu, ancha chipchinča wejrqui.

⁵⁻⁶ Cullacalla, anziqiu am roct'uča, porapat zuma munaza. Nii mantitaqui anača anztakaz. Tuquitanpacha učhumqui nuž mantitapanča. Jakziltat zuma munaziñi kuzzizlaja, jalla niiqui Yooz mantitanacacama kamča.

Tuquitanpacha Yooz mantita nonzinčhucča, zuma munaziñi kuzziz cjee, jalla nii.

INCALLÑI ZOÑINACA

⁷ Tii muntuquiz muzpa žoñinacaqui ojklayča, žoñi incallcan. Ninacaqui anaž criiča, Jesucristuž žoñž curpuchiz kamchiča tii muntuquiz, nii. Jalla ninacača incallñinacaqui. Nižaza Cristuž quintranacača.

⁸ Ančhucqui nonžna. Ančhucqui Yooztajapaž langža. Nii langžta cuitaquiča, ana pertiznajo, arajpachquin zumanaca tanzjapa.

⁹ Jakziltat Jesucristuž tjaajinta yapzaja, jalla niiqui anaž Yooztan tsjii kuzziz kamča. Nižaza jakziltat Jesucristuž tjaajintacama ana kamčhaja, jalla niiqui anazakazza Yooztan tsjii kuzzizqui. Pero jakziltat Jesucristuž tjaajintacama kamčhaja, jalla niiča Yooz Ejpžtan nižaza Yooz Majchtan tsjii kuzzizqui.

¹⁰ Jakziltat ančhucquiz tjonžcu Cristuž tjaajinta ana niicama tjaajinčhaj niiqui, anaž Yooztan tsjii kuzziz nii jilaqui. Ančhucqui nii žoñi ana kjuyquiz kjawznaquiča. Anazaž tsaanaquiča.

¹¹ Jakziltat nii anawal žoñžquiz tsaanačhaj niiqui, nii žoñž anawal langz yanaptažokaz cjiča.

ZERZ TAKUNACA

¹² Zumsira wacchi takunaca wejtta žejlča. Pero tjappachaqui anal cijjrz pecuča. Ančhucquain tjonz pecuča, učhum pora parlizjapa, porapat cuntintu cjisjapa.

¹³ Am cullaqui illzizakazza Yoozqui. Naaža maatinacaqui saludos apayžquiča. Jalla nužukazza.

TERCERA CARTA DEL APOSTOL SAN JUAN

GAYO CJITAQUI ZUMACHA

¹ Wejrqui Juan cjitit'cha. Icliz jilirit'cha wejrqui. Gayo, amquin cjiyr'cu'cha. Yooz takucama kamcan, am k'ayachu'cha.

² Jila, amtal mayizinu'cha tjappacha walicama cje'yajo, ni'zaza am curpu zuma žejt'ni cje'yajo. Am kuz walikazza, nii zizu'cha wejrqui.

³ Yekjap jilanacaqui wejtquiz tjonzi'cha. Am puntu wejtquiz quint'ichi'cha, tuž cjican:

–Nii Gayuqui werar Yooz takucamaž kam'cha.

Jalla nuž zizcu ancha chipchin'cha.

⁴ Wejt jilanacaž werar Yooz takucama kamñipan zizcu, anchal cuntintu'cha wejrqui. Anaž čjulumi wejr juc'ant cuntintu cjiskatñiqui žejl'cha.

⁵ Jila, walikam am paa'cha, jilanaca yanapcan, ana pajta jilanacami.

⁶ Yekjap amiž yanaptanacaqui iclizquiz mazzi'cha, tuž cjican:

–Nii Gayo cjita jilaqui ancha zuma'cha. Ana pajta jilanacami yanapñipankazza. Ni'zaza okzñipankazza.

Gayo jila, jalla nužupan amqui tira yanapaqui'cha. Jilanacaž jiczquin okanami yanapz waquizi'cha. Jalla niic walikazza; jalla nuž cjenacui Yooz kuzqui wali cuntintuž cjequi'cha.

⁷ Nii jilanacaqui Yooz sirwican ojklayñi'cha. Ninacaqui ana Yooz criichinacžquiztan ana čjul yanapñimi pecñi'cha.

⁸ Jaziqui u'chumqui nii Yooz sirwiñi jilanaca yanapz waquizi'cha, ninaca werar Yooz taku parlajo.

DIOTREFES CJITAQUI ANAWALI PAAÑI'CHA

⁹ Tuquiqui iclizquin cjiyrchin'cha. Tsjii žoñiqui weriž cjiyrta anaž nonz pec'cha. Wejrqui icliz jilirit'cha. Pero nii žoñiqui anaž wejr jilirižtaka nay'cha. Diótrefes cjita tjuuchizza nii žoñiqui. Niikaz jilanaca juc'antiž mantiz pec'cha.

¹⁰ Wejrqui an'chucaquin tjonachaj niiqui, jalla nekztan nii žoñiž anawali paatanaca paljaya'cha an'chucaquiz. Nii Diótrefesqui toscaranaca parlich'cha wejtnaca quintra. Iya anawalinaca paachizakazza. Ni'zaza jilanacaž tjonznunami, ana risiwz pecñi'cha. Yekjap criichinacazti wali quiyas pec'cha. Nii Diótrefeszti cjiñi'cha:

–Anapanž nii jilanacžtan zumaž risiwaqui'cha.

Ni'zaza zuma risiwñi jilanaca iclizquiztan chjatkatñi'cha.

¹¹ Jila, jaziqui ana'cha nižta cjisqui. Nii žoñiž paatanaca ana yatekaza. Amzti, walikam paa'cha. Jakziltat walinaca paa'chaja, jalla niiqui Yooz cherchi kuzziz kam'cha. Jakziltat anawalinaca paa'chaja, jalla niiqui anaž Yooz paj'cha, ana Yooz cherchi kuzzizza.

DEMETRIO CJITAQUI WALI PAACHA

¹² Tjappach žoñinacaqui Demetriuž puntu cji'cha:

–Zuma'cha nii Demétrio cjita jilaqui. Niiž paatanacami werar tawk jarupankazza.

Ni'zaza wejrnacmi chiyu'cha, Demetriuqui zuma jila'cha, nii. An'chucqui zizza, wejrnacqui werar takul chiyiñ'cha, nii.

¹³ Zumsira wacchi takunacaqui wejtta žejl'cha cjiyrzjapa. Pero tii cartiquiz anal iyal cjiyrz pecu'cha.

¹⁴ Wajilla amquin tjonzquiz pecučha. Jalla nekztan učhumporaž palt'aquičha.

¹⁵ Llan kuzziz cjee. Tekzta jilanacaqui saludos apayžquičha. Nižaza amqui wejtnaca jilanacžquiz tsaanžinaquičha, zapa maynižquiz. Jalla nužukazza.

LA CARTA DEL APOSTOL SAN JUDAS

¹ Wejr Judasqui Jesucristuž manta payiñ zoñtča nižaza Jacobž lajkča. Wejrqui ančucaquin cjiřzcuča. Yooz Ejpqui ančhuc kjawziča, niž maati cjeajo. Nižaza Yooz Ejpqui ančhucatan zuma munaziča. Nižaza ančhuc anawalinacquiztan cuitiča, Jesucristuž tjonzcama.

² Yoozqui ančucaquiz juc'antej okžla, nižaza juc'ant walikaj kamkatla, nižaza ančhucqui Yooziž ancha munasitaj cjila.

TOSCARA TJAAJIÑINACŽ PUNTU

³ Pecta jilanaca, cullaquinaca, wejrqui ančucaquin anchal cjuñchinča. Jalla nuž cjuñzcu liwriiñi puntuquiztan ančucaquin anchal cjiřz pecuča. Ančhucatan wejttan liwriita zoñinacača. Anawal tjaajiñinacž ančucaquiz incallz pecchiž cjen tii cartal urgente apayžcača, ančucaquiz chiižinzjapa. Yoozquin kuz tjaaz puntu werara tjaajintatača. Tsjemata tjaajintanacaqui anača werara niiqui. Werar tjaajintanacžquizkaz tjurt'iñi kuzziz cjee.

⁴ Yekjap ana lijitum criichi zoñinacaqui ančucaquiz jamazit luzziča, ana kjanapacha. Ninacaqui ana wal zoñinacača. Yooz partiquiz luzcu, Yooz okžni kuz tsjii kjutni intintazza. Ninacaqui cjiñiča, “Yoozqui učum okzpanča, jaziqui čjul paatami walikazza”. Jalla nuž kamcan učum Jesucristo Jiliržquiz anapan pajča. Pero criichi zoñinacž pajk Patrunača Jesucristuqui. Yekjat ana iya želasača. Jaziqui ninacaqui Yooz kamañquiz anapan kamča. Tuquiqui profetanacaqui nižta kamñinacž puntuquiztan cjiřchiča, “Yoozqui ninacžquiz casticaquiča”, jalla nuž cjican.

⁵ Ančucaž zizziž cjenami, ančucaquiz zumpacha cjuñkatz pecuča tii puntuquiztan. Tuqui Yooz Jiliriui Egipto yokquiztan Israel wajtchiz zoñinaca jwessiča. Nekztan jwessiž cjenami ana criichinacžquiz ticzkatchiča.

⁶ Nižaza tii cjuñzna. Yekjap anjilanacaqui Yooziž tjaata puesto ana iya wacaychiz pecchiča, nižaza arajpach puestuquiztan zarakchiča. Jalla nižtiquiztan Yoozqui ninaca presužtakaz čhjelinča. Wiñayjapa zumchiquiz chawctažtakaz žejlča Yooz pajk pjalz tjuñicama.

⁷ Nižaza Sodoma wajtquiz žejlñinacami Gomorra wajtquiz žejlñinacami, nižaza žcatinta wajtquiz žejlñinacami jalla nii ana wal anjilanacažtapacha ancha uj paachiča. Ninacaqui adulteriuquiz ojklaychiča. Nižaza tsjemata adulterio paachiča. Jalla nižtiquiztan Yoozqui ninaca casticchiča, wiñaya infiernuquin. Jalla nuž kjanapacha chiichiča, Yoozqui ana walinaca casticspanča, jalla nii.

⁸ Jalla nii Yooz casticz puntu zizcumi, ana zuma tjaajiñi zoñinacaqui chjuužta jaru ojklayča, “Yoozqui nižta wejtquiz tjaajinchiča, tsjii chjuužtiquiz” cjican. Nekztan adulteriuquiz ojklayča, nižaza Yooz Jiliriž mantita anaž cassa, nižaza poderchiz zajranacžquiz ararča. Jalla nuž chjuužta jaru anawali kamča.

⁹ Tsjii pajk arcángel Miguel cjita žejlča, walja poderchiz. Jalla nii anjilaqui diablužtan ch'aassiča Moisés curpu puntuquiztan. Jalla nuž ch'aascan, Miguel anjilaqui diablužquiz ana ararchiča; “Casticta cjee”, cjican. Antiz tiikaz chiichiča, “Yooz Jiliriui amquiz ujžla”. Jalla nižtakaz chiichiča.

¹⁰ Pero nii ančhucatan kamni anawali zoñinacaqui ana intintazni kuzzizza. Poderchiz zajranacž quintra chiican, chjaawjkatcha. Animalažtakaz persun

kuzcamakaz ojklayñiċha. Jalla nuż ojklaytiquiztan persunjapa casticu zji-jċċha.

¹¹ Ninacżtaqui ana wali cjequiċha. Cainż irata Yooz kamañquiz ana kamz pecċha. Paaz ganz peccu, Balaam irata tsjii kjutñi ojklayċha. Niżaza Coreż iratażtakazza casticu zjiċċha. Korequi Yooz uchta žoñinacż quintra paażcu ticziċha.

¹² Anċhucqui Yooztajapa pjiistanaca paaċha. Anċhucaż cristian pjiista paan, ninacaqui azipanċha anċhucalta. Pjiistiquiz anċha anazuma lujlñi, niżaza licñi, niżaza ana zuma kamñiċha. Ninacaċha Yooz ana rispitiñi. Persunjapakaz importiċha. Anaċha yanapċhuc, anċhucaż zuma kamajo. Ninacaqui ana ċhiñiċiz tsjiriżtakazza, niżaza tjamiż ċhjichta tsjiriżtakaz. Niżaza ninacaqui anazuma frutchiz muntinacażtakaz. Ćajlżta muntinacażtakaz, žejtz wira anapan žejlċha ninacżtaqui.

¹³ Tjamiż ċhjichta kjaz ljojkjinacażtakazza. Ninacaż azzuca paatanacaqui kot anazum ċ'utunacażtakazza. Niżaza ninacaqui tsjii kjutñi pertissi warawaranacażtakazza. Anawal zumċiquiz wiñayjapa castictaż cjequiċha. Casticta ċjisjapa, nii anawal tjaajiñinacaqui ċhjojtċha.

¹⁴ Tsjii žoñiqui Enoc ċjitataċha. Adanżquiztan pakallak wilta majċmajċquiztan tjonñitaċha. Jalla nii Enocqui Yooztajapa ċhiċiċha tuż ċjican: “Yooz Jiliriċqui warank warank anjilanacżtan tjonaquiċha, tjapa žoñinaca pjalzjapa.

¹⁵ Jalla nuż pjalżcan Yooz Jiliriċqui tjapa anawal žoñinacż ujnaca tjeznaquiċha; tjapa ninacaż anawali paatanaca tjeznaquiċha. Niżaza Yoozqui tjapa niż quintra anawali ċhiitanaca tjeznaquiċha”. Jalla nuż mazinċiċha Enoc ċjitaqui.

¹⁶ Nii anawali žoñinacaċha quijakaz pecñinacaqui. Niżaza iñarcan ċhuchkaz pecñinaca; niżaza ninacaż kuz pecta jaru ojklayñiċha. Niżaza mitarazzi takunacżtan ċhiñiċha. Niżaza žoñinacż kuz wali ċjisjapa ċhiñiċha, nii žoñinacżquiztan cusasanaca ganzjapa.

CRIICHI ŽOÑINACŻQUIZ ĆHIIZINTA TAKU

¹⁷⁻¹⁸ Pecta jilanaca, cullaquinaca, jalla tii puntuquiztanż ċjuñzna. Uċhum Jesucristo Jilirż apostolonacaqui ultim timpu puntuquiztan anċhucacquiz mazinċiċha, tuż ċjican; “Ima tii muntu tucuzinznan, anawal žoñinacaqui jecżnaquiċha, Yooz kamañ puntunacż quintra ċhiican. Ninacaqui persun anawal pecta kamañ jaru kamaquiċha”. Jalla nuż mazinċiċha apostolonacaqui.

¹⁹ Jalla niżta anawali žoñinacaqui žoñi t'akñiċha, niżaza porapat quintra tanaskatñiċha. Yooz Espiritu Santuqui ninacż kuzquiz ana žejlċha. Ninacaqui persun kuzcamakaz kamċha.

²⁰ Pecta jilanaca, cullaquinaca, Yooz puntunaca tjaajintanacżquiz tjurt'iñi kuzziz ċjee. Niżaza Espiritu Santuż aztan Yoozquin mayiza, ċuc'ant zuma kamañċizpan ċjisjapa.

²¹ Niżaza zuma kama, Yooz anċhucatan tira zuma munazizjapa. Niżaza uċhum Jesucristo Jilirż tjonz tjuñi tjewżna. Nii tjuñquiziqui Jesucristuqui niż okzñi kuzziz ċjen arajpachquin Yooztan wiñaya kamñijapa anċhucacquiz ċjiskataquiċha.

²² Turwayzi kuzziz žoñżquiz zumpacha paljaya, zuma tjaajintanacquiz tjurt'iñi kuzziz ċjisjapa.

²³ Infiernuquin tjojtsnak ċjenpacha kjawżna, liwriita ċjisjapa. Niżaza ujċiz žoñinacżquiz okzñi kuzziz ċjee. Anawal žoñinacżquiz okżcan, persun kuzquiz cuitasaquiċha, zuma kamañquiztan tsjii kjutñi ana ċhjichta ċjisjapa.

Anĉhucqui ana zuma kamañchiz žoñinacžtan ojklaycan nižta ana zuma kamañchiz cjesaĉha. Jalla nižtiquiztan anawal žoñinacžquiz okžcan, cuitasa ninacž irata ana cjisjapa.

²⁴⁻²⁵ Yoozqui zinta Yoozza. Niiĉha Jesucristo Jiliriž cjen uĉhum Liwriiñiqui. Niiĉha anĉha azzizqui, uĉhumnaca cuitizjapa, nižaza anĉhuc ana ujquiz tjojtzjapa, nižaza niiž yujcquiz ana ujchiz prisintizjapa. Jalla nekz, Yooz yujcquiz žejlcan, anĉhucqui anĉha cuntintuž cjequiĉha. Anztajapami wiñayajapami Yoozqui honorchizkaj cjila, nižaza niiž arajpach watjaqui zumapaj cjila, nižaza tjapa azzizkaj cjila, nižaza tjapa mantiñej cjila. Jalla nužoj cjila. Amén.

APOCALIPSIS O REVELACION A SAN JUAN

¹ Yoozqui tii liwruquiz cjiirta puntunaca Jesucristužquiz mazinchiča, Jesucristo niž sirwiñi žoñinacžquiz maznajo. Tii puntunacaqui waji wataquiča. Jesucristuqui niž sirwiñi Juanžquin anjila cuchanžquichiča, tii liwruquiz cjiirtanaca zizta cjeajajo.

² Wejr Juanqui tjapa nii zizta puntunacžquiztan cjiiruča, jaknužt wejr nii zizzinžlaja, jalla nužupan. Jaziqui Yooz takumi nižaza Jesucristuž maztami chiyuča. Nižaza tjapa weriž chertanacami chiyuča. Tjappacha werarapan cjiiruča.

³ Jakziltat žoñinacžquiz tii Yooziž tjaata takunaca ličhaja, jalla niiqui cuntintuž cjequiča. Nižaza jakziltat tii Yooziž tjaata takunaca nonžaja, nižaza niž jaru kamčhaja jalla niiqui zakaz cuntintuž cjequiča. Tii puntunaca cumplis timpunaca žcatžinžquiča.

JUANQUI ICLIZANACZQUIN CJIJRCHA

⁴ Wejr Juanqui pakallawk Asia yokquin žejlñi iclizanacquin cjiiruča. Yoozqui ančhucaquiz zumpachaj yanapt'ila, nižaza Yoozqui ančhucaquiz walikaj kamkatla. Yoozqui tuquitanpachami anzimi jaztanami wiñayjapa tirapan žejlča. Yooz mantiz julz yujcquiz pakallawk zuma ispiritunaca žejlča. Ninacaqui ančhuc walikaj kamkatla.

⁵ Nižaza Jesucristuqui ančhuc walikaj kamkatla. Jesucristuča lijitum chiiñiqui. Nižaza primir ticziquiztan jacatatchi žoñiča. Nižaza Jesucristupanča tjapa tii muntuquiz žejlñi mantiñi reynacžquiz mantiñiqui. Cristuqui učum ancha okziča. Nekztan učum ujnacquiztan ticziča. Jalla nuž ticžcu, učum liwriichiča, niž ljok tjawkchiž cjen.

⁶ Nekztan Jesucristuqui učum utchiča, nižtan chicapacha mantiñijapa, nižaza Yooz Ejpžquiz rispitiñijapa. Jalla nii Jesucristuqui wiñayjapa honorchiz cjila. Nižaza wiñayjapa mantiñej cjila. Jalla nužoj cjila. Amén.

⁷ Cjuñzna. Tsjii nooj Jesucristuqui tsjir taypiquiz tjonaquiča. Jalla nuž tjonan tjapa žoñinacaqui nii cheraquiča; Jesucristo quintra paañi žoñinacami nii zakaz cheraquiča. Nekztanaqui tjapa wajtchiz ana criiñi žoñinacaqui kaaquiča, ninaca casticz ora tjonchiž cjen. Jalla nužoj cjila. Amén.

⁸ Yooz Jiliriqi tuž cjiča: “Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitča wejrqui tjappachtajapa”. Jalla nuž cjiča tjapa aztan mantiñi Yooz Jiliriqi. Niiqui anzimi, tuquitanami, jaztanami žejlča.

⁹ Wejr Juanqui ančhucaquin cjiiržcuča. Wejrqui ančhuca jiltča, Jesucristužquin kuz tjaatiquiztanaqui. Učumqui Yooz mantuquiz kamchiz cjen, sufriča. Pero čhjul sufritami žejlčhaja, Jesucristuqui učumnacquizimi pasinsis kuzziz cjiskatča. Wejrqui kot taypiquiz kolta yokquiz želuča, Patmos cjita tii yoka. Jalla ticju preso želuča, Yooz taku parlitiquiztan, nižaza Jesucristuž puntuquiztan maztiquiztan.

JESUCRISTUZ CHERTA

¹⁰ Tsjii Yooz tjuñquiziqui Yooz Espíritu Santuqui wejt kuzquiz ancha tjonchiča. Tjonžcu jalla tii watchiča. Tsjii alto jora nonzinča wir kjutñi, trompetž pekz joražtakaz nonzinča.

¹¹ Nii joraqui tuž cjičiča:

–Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantichaja, nižaza “Z”quin žerzaja, jalla nižtitča wejrqui tjappachtajapaqui”. Jaknužt amqui cheračhaja, jalla nii chertanaca cijra. Nekztan nii libro pakallawk iclizanacquin apaya, Efeso iclizquin, nižaza Esmirna iclizquin, nižaza Pérgamo iclizquin, nižaza Tiatira iclizquin, nižaza Sardis iclizquin, nižaza Filadelfia iclizquin, nižaza Laodicea iclizquin. Jalla nii Asia cjita provinciquin žejlñi iclizanacquin nii cijrtaqui apaya.

¹² Jalla nekztanaqui wir kjutñi kjutzinča chertzjapa, jectpan nižta paljayzqui, nuž cijan. Jalla nuž kjutzcu tsjii pakallawk kor cantilero chertzinča.

¹³ Nii cantiler taypiquiz tsjii žoñižtakaz tsijtchi želatča. Niiqui tol zquitčiztača, nižaza quecquiz tsjii pal kor sinturunchiztača.

¹⁴ Nižaza niž ach charami chiwitača, chiw chomažtakaz, nižaza chiw kjatñižtakaz. Niiž čhujcquinacaqui ujžtakaz c'ajatča.

¹⁵ Niiž kjojchanacaqui zuma llijatča jurnuquiz tjiñanta korižtakaz. Niiž joraqui wacchi kjaz pujquiz kjawñižtakaztača.

¹⁶ Niiž žew kjarquiz pakallawk warawaranaca tanzitača. Niiž atquiztan pajk ar cuchillužtakaz ulnatča, porap kjuttan archiz. Niiž yujcqui zmali tjuñižtakaz c'ajatča.

¹⁷ Jalla nii cheržcu, niž kjojchquiz tjojtsinča, ticzižtakaz. Niizti wejr lanziča žew kjaržtan. Jalla nuž lanžcu tuž cjichiča:

–Wejr ana eksna amqui. Primirquiztanpacha asta wiricama želuča. Wejrtča juc'ant chekanaqui tjappachquiztanami.

¹⁸ Wejrtča žetiñtqui. Wejrqui ticzinča. Pero wejtquiz chertzna. Wiñayjapa žetuča. Nižaza wejrqui mantuča ticzmi, nižaza ticz yokami.

¹⁹ Jaziqui cijraquiča jaknužum cherčhaja, jalla nii. Cjijraquiča tii timpu watchinacami, nižaza jazta timpu tjonanami, nii.

²⁰ Wejt žew kjarquiz pakallawk warawaranaca žejlča. Jalla nii cherchamča, nižaza pakallawk cantilerunaca cherchamča. Ninaca tuž cjiča: nii pakallawk warawaranacaqui pakallawk iclizanacž irpiñinacača. Nii pakallawk cantilerunacaqui pakallawk iclizanacača.

2

EFESO ICLIZQUIZ CHIITA TAKUNACA

¹ Efeso icliz irpiñižquin tuž cijra: “Tsjiiqui žew kjarquiz pakallawk warawara tanža, nižaza pakallawk kor cantiler taypiquiz ojklajča. Jalla niiqui tuž cjiča:

² Ančucaž paatanacami pajuča. Ančucqui wejttajapa anča langža. Nižaza sufrichiž cjenami ančucqui tjurt'iñi kuzzizza. Nižaza ančucqui ana zum kamañchiz žoñinaca ana chertz pecča. Nižaza jakziltat ‘apostultča wejrqui’ cijan ojklajčhaja, jalla ninaca wawczinčucča ančucqui, werara ana werara jalla nii. Jalla nižtiquiztan jecnacat ana werar apóstol ojklajčhaja, jalla nii zizzinčucča.

³ Wejrqui zizuča, ančucqui pasinsis kuztan sufričha, wejtquiz criican. Nižaza wejtquiz kuzziz cjen walja awantichinčucča. Nižaza wejttajapa walja langzinčucča, ana ocha nayžcu.

⁴ Pero tsjii ujchizza ančucqui. Jaknužt ančucqui primero tjapa kuz wejttan anča munazitčhaja, jalla nižta ana tira munaziča. Anz wejttan upa munaziča.

⁵ Cjuñzna, jaknužt ančhucqui primero ancha zuma munaziñi kuzziz cjistčhaja. Nižaza cjuñzna jaknužt anziqúi upa munaziñi kuzziz cjistčhaja. Jalla nii cjuñzcu, ‘ujchizpantča wejrqui’ cjis waquiziča. Nekztan wíltá ancha zuma munaziñi kuzziz cjee, wíltá zuma kamzjapa. Ana wíltá zuma munaziñi kuzziz cjequiž niiqui, am cantileruqui kjañtaž cjequiča; nekztan ančuca icliza tjatanta cjequiča.

⁶ Pero ančhucaltajapa tsjii zuma obra žejlča, ančhucqui ana wal nicolaítas parti žoñinacž quinrajapa chjaawjkatča, jalla nii. Wejrqui ninacž quinrajapa zakal chjaawjkatuča.

⁷ Jakziltat nonžni cjuñchiz cječhaja, nonžla Espíritu Santuž iclizziz žoñinacžquiz chiitaqui. Jakziltat anawalinacquiztan atipačhaja, jalla nižquiz wejrqui permiso tjaa-ača, žeti tjaañi muntiquiztan lulajo. Yooz zuma yokquin žejlča nii zuma muntiqui”.

ESMIRNA ICLIZQUIZ CHIITA TAKUNACA

⁸ Esmirna icliz irpiñizquin tuž cjjra: “Tsjiiqui primirquiztanpacha wiricama žejlča. Jalla niiča juc'ant chekanaqui tjappachquiztanami. Niiqui ticziča, nižaza wíltá žejtñi cjissiča. Jalla niiqui tuž cjiča:

⁹ Wejrqui zizuča, ančhucqui ancha sufriča, nižaza t'akjiri žejlča. Pero ricachužtakazza ančhucqui, Yooz wajtchiz žoñinacž cjican. Judío žoñinacaqui ančuca quintra ancha anawal takunaca chiiča. Ninacaqui anača ultim werar judionacaqui. Ninacača Satanás diabluž partiquiziqui.

¹⁰ Jaknužt ančhucqui sufračhaja, nuž sufrisquiztan ana tsuca. Cwítasa, diabluqui yekjapanaca ančucaquiztan carsilquiz chawckataquiča, ančucaž ujquiz tjojtskatzjapa. Ančhucqui tunca tjuñi intiru ancha sufraquiča. Ticzcama wejtquiz tjurt'iñi kuzziz cjee. Nekztanaqui wejrqui ančucaquiz wiñayjapa žeti tjaa-ača, tsjii premiužtakaz.

¹¹ Jakziltat nonžni cjuñchiz cječhaja, jalla niiqui nonžla, Espíritu Santuž iclizziz žoñinacžquiz chiitaqui. Jakziltat ana walinacquiztan atipačhaja, jalla niiqui infiernuquin castictiquiztan liwriitaž cjequiča. Infiernuquin casticzqui curpumi animumi wiñaya sufriča. ‘Pizc ticz’ cjitača nii infiernuquin sufrisqui”.

PERGAMO ICLIZQUIZ CHIITA TAKUNACA

¹² Pergamum icliz irpiñizquin tuž cjjra: “Tsjiiqui porap kjuttan ar cuchillužtakaz žejlča. Jalla niiqui tuž cjiča:

¹³ Wejrqui pajuča, tjapa ančucaž paatami. Jakziquin Satanás diabluqui mantičhaja, jalla nicju ančhuc žejlča. Jalla nižta žejlchiz cjenami tirapanž wejtquiz tjurt'iñi kuzzizza. Wejtquin kuz tjaažqui ana jaytiča, ancha sufrichiz cjenami. Nii ancha sufris timpuquiz tsjiiqui ančucaquiztan Antipas cjitaqui contataquiča. Antipasqui wejt puntuquiztan tisticu cjicanaqui zuma ticlarñiča, nižaza wejtquiz kuz tjaañipanča. Jakziquin Satanás diabluqui mantičhaja, jalla nicju Antipas contataquiča.

¹⁴ Nonžna; tsjii kjaž ujnaca ančhucž quintra tjeeznuča. Yekjap ančucaquiztan anawal tjajintanaca catokchinčhucča. Nii tjajintanacaqui Balaamž cjita tjajintažtakazza. Tuquita timpuqui nii Balaamqui Balak cjita žoñžquiz tjajziča, jaknužt Israel žoñinaca ujquiz tjojtskatchucažlaja, jalla nii. Nekztanaqui Balak cjitaqui Israel žoñinaca ujnacquiz tjojtskatchiča. Jaziqui Israel žoñinacaqui adulterio paachiča, nižaza žoñiz paata yooznacquiz tjaata čjjeri lujlchiča. Jalla nižta ujnacquiz tjojtskatchiča Balak cjitaqui.

¹⁵ Nižaza yekjap ančucaquiztan nicolaítas tjajintanaca catokchinčhucča. Ninacž tjajinta quinrajapa chjaawjkatuča.

¹⁶ Ančucaž anawali ujnaca paatiquiztan ‘ujchizpantča’ cjis waquiziča; kuz campiiz waquiziča. Ujnacquiztan ana jaytaquiž niiqui, ančucqui castictaž cjequiča. Wejrqui ančucaquiz wajilla tjonāča, ujchiznacž quintra paazjapa. Wejt atquiztan ulanñi ar cuchillžtan ninacž quintra paa-ača.

¹⁷ Jakziltat nonžñi cjuñchiz cječhaja, nonžla, Espíritu Santuž icliz žoñinacžquiz chiitaqui. Jakziltat anawalinacquiztan atipačhaja, jalla nižžquin ana pajta maná tjaa-ača, lujlzjapa. Nižaza nižžquin tsjii chiw maz tjaa-ača. Nižaza chiw mazquiz niž ew tjuu cjižrtāž cjequiča. Nii ew tjuuqui ana jakziltami zizza, nii tanzñi žoñikaz zizaquiča”.

TIATIRA ICLIZQUIZ CHIITA TAKUNACA

¹⁸ Tiatira icliz irpiñižžquin tuž cjižra: “Tsjiiqui žejlča, ujžtakaz c'ajñi čhjujčchiz, nižaza niž kjojchanacaqui jurnuquiz tjiñanta korižtakazza. Jalla niičha Yooz Majchqui. Niiqui tuž cjiča:

¹⁹ Wejrqui ančucaž paatanacami pajuča. Ančucqui zuma munaziñi kuzzizza, nižaza wejtquiz tjapa kuztan criičha, nižaza wejtquiz tjapa kuztan sirwičha, nižaza pasinsis kuztan sufričha. Ančucaž primir paata obranacquiztan ančucaž anzta paata obranaca juc'ant zumača.

²⁰ Wejrqui cjiwčha, tii ujchizza ančucqui. Tsjaa anawal maataka žejlča, Jezabel cjiiti maatakažtakaz. Naaqui cjiñčha, ‘Wejrtča Yooz taku parliñtqui’. Jalla nuž cjican, wejtquiz sirwiñinacžquiz incallčha. Naaža incalltiquiztanaqui criichi žoñinacaqui adulteriuquiz ojklayčha; nižaza žoñiž paata yooznacquiz tjaata čhjerinaca lujlčha. Jalla nuž ana zuma tjaajnan, ančucqui naaža puntuquiztan ana kjaž cjiñčhucčha. Pero nii anawal tjaajintaž quintra chiiz waquiziča.

²¹ Wejrqui pasinsis kuz tjewzinčha, naaqui ‘ujchizpantča’ cjican ujnacquiztan jaytizjapa. Pero naaqui uj paaznacquiztan anapan jaytiz pecčha; uj paaz pecčha.

²² Jalla nižtiquiztan naa sufriskatačha. Nižaza jakziltat naatan chica wejt quintra ujnaca paačhaja, jalla ninacazakaz ancha sufriskatačha. Naaža tjaajinta anawalinaca paazquiztan ana jaytaquiž niiqui, panž sufriskattaž cjequiča.

²³ Naa irat ana zum kamañchiz žoñinaca conačha. Jalla nekztan tjapa iclizanacquiz žejlñi žoñinacaqui naaznaquiča, wejrqui čhjul žoñiž kuzquiz pinsitami zizučha. Nižaza paata obranacquiztan jama zapa maynižquiz zumanacal tjaa-ača.

²⁴⁻²⁵ Parti ančuc Tiatir criichinacaqui naaža tjaajinta ana catokchinčhucčha. Satanás diabluž chjojzaka tjaajintanaca ana mitisñi cjissinčhucčha. Ančucaquiz tuž cjiwčha, jaknužt ančucqui wejt tjaajintanaca catokčhaja, jalla nižta tirapan catokaquiča, wejr tjonzcama. Ana iya mantučha.

²⁶ Jakziltat anawalinacquiztan atipčhaja, nižaza tii muntu tucuzinzcama wejt munañpi jarupanž kamčhaja, jalla nižžquiz wejrqui mantiz poder tjaača nacionanacchiz žoñinacžquiz mantizjapa.

²⁷ Jaknužt wejt Yooz Ejpqui mantiz poder wejtquiz tjaatčhaja, jalla nižta irata wejrqui mantiz poder ninacžquiz tjaa-ača. Jalla nižtiquiztan ninacaqui anawali paañi žoñinacžquiz zuma c'aripacha mantaquiča, tsjii ljoc mazca t'unapacha kjolsnas, jalla nižta.

²⁸ Nižaza wejrqui ninacžquiz zumanacal tjaa-ača wenzta chawc warawaražtakaz.

²⁹ Jakziltat nonžñi cjuñchizlaja, jalla niiqui nonžla, Espíritu Santuž icliz žoñinacžquiz chiitaqui”.

3

SARDIS ICLIZQUIN CHIITA TAKUNACA

¹ Sardis icliz irpiñizquin tuž cjiira: “Tsjiižta pakallawk Yooz ispiritunaca žejlča, nižaza pakallawk warawaranaca žejlča. Jalla niiqui tuž cjiča: Ančucaž paata obranaca pajuča. Zoñinacaqui ančuca puntuquiztan cjiñiča, ‘Zuma kamañchizza’ cjiñiča. Jalla nuž chiichiž cjenami, ultimu ana zum kamañchizza; ticzihtakazza ančucqui.

² Ančucqui ana zuma kamañanaca eca. Zuma kamañquiz tjurt'iñi kuzziz cjee. Tira anawali kamañchizlaj niiqui, castictaž cjequiča. Wejrqui ančuca paata obranaca yatisinziča, Yooz yujcquiz anawaliča, nii.

³ Cjuñzna ančucqui, tuqui catokta tjaajintanacami, nižaza nonztanacami panž catoka. Jaziqi nii jaru wilta zumapan kama; nižaza ančuca ujnaca paaznacquiztan jayta, ‘ujchizpantča’, cjican. Ančucqui ana zuma kamañquiztan ana ecaquiž niiqui, castictaž cjequiča. Wejrqui tiripintit tjonača, tsjii tjañižtakaz. Ana pinsita orquiz tjonača, ančuc casticzjapa.

⁴ Tsjii kjaž ančuc Sardis zoñinacaqui zuma kamañchizza. Ančucča zuma ana ch'izlli zquitchiztakazqui. Jalla nižtiquiztan ančuc zuma zoñinacaqui wejtta chicaž juc'ant zuma kamaquiča zuma chiw limpu zquitchiztakaz. Jalla nuž waquiziča ančucaltaqui.

⁵ Jakziltat anawalinacquiztan atipačhaja, jalla ninacaqui zuma kamañchiz cjequiča zuma chiw limpu zquitchiztakaz. Nižaza ninacž tjuunaca anal akznača žejtñi zoñinacž tjuu apuntita liwruquiztan. Nižaza wejt Yooz Ejpž yujcquiz, nižaza Yooz anjilanacž yujcquiz ninacž puntuquiztan ticlarača, ‘Wejt partiquizza tinacaqui’ cjicanaqui.

⁶ Jakziltažlaja nonžni cjuñchiz, nonžla, Espíritu Santuž icliz zoñinacžquiz chiitaqui”.

FILADELFIA ICLIZQUIZ CHIITA TAKUNACA

⁷ Filadelfia icliz irpiñizquin cjiira: “Tsjiiča juc'ant zumaqui; nižaza lijitumača. Niiča David jilirž mantiz poderchizqui. Nii zoñiqui Yooz partiquiz luzkatasaz niiqui, anaž jecmi nii zoñiž luztiquiz atajasača. Nižaza Yooz partiquiz ana luzkatasaz niiqui, anaž jecmi luzkatasacha. Jalla niiqui tuž cjiča.

⁸ Wejrqui ančucaž paata obranaca pajuča. Ančucaltajapa trabajo tjaachinča wejtta langzjapa. Anaž jecmi ančuc atajasača. Ančucqui ana suti azzizza. Jalla nuž ana zuti azziz cjenami, ančucqui wejt taku tirapanž catokchinčucča, nižaza ančucqui wejt puntuquiztan ana k'otchinčucča, ‘Jesucristo anal pajuča’ cjicanaqui.

⁹ Nonžna. Yekjap zoñinacaqui cjiñiča, ‘Wejractča Yooztajapa judío zoñinacaqui’. Jalla nuž chiican, k'otča. Ultimu ana Yooztajapača nii zoñinacaqui. Pero Satanás diabluz partiquiz kamñi zoñinacača. Nonžna. Wejrqui ančuca yujcquiz ninaca quillskatača, ančucaquiz rispitzjapa. Nižaza wejrqui ninaca zizkatača, ančucatan wejtta zuma munaziz, jalla nii.

¹⁰ Wejt mantita ortin jaru kamcan, ančucqui pasinsis kuztan sufrichinčucča. Jalla nižtiquiztan wejrqui ančuc liwriyača juc'ant sufris timpuquiztanaqui. Nii timpuqui tjonaquiča. Nekztan tjapa tii muntuquiz žejlñi zoñinacaqui ancha sufraquiča, wawcžta cjisjapa. Jalla nii sufris timpuquiztan ančuc liwriyača.

¹¹ Nižaza wejrqui wajillal tjonača. Yooz tjaajintanaca tirapan catokaquiča. Nekztan Yoozqui ančucaquiz zumanaca tjaaquiča,

tsjii zuma premiužtakaz. Ančhucqui ana jec žoňžquizimi tsjii kjutñi irpiskataquiča nii zumanaca ana pertisnajo.

¹² Jakziltat anawalinacquiztan atipačhaja, jalla niižquiz uchača Yooz kjuyquiz jilirižtakaz. Nižaza nii žoňinacaqui Yooz kjuychizpan cjequiča. Wejt Yooz Ejpž tjuu niižquiz cjižžinača, Yooz kjuychiz žoňipan tjeezjapa. Nižaza wejt Yooz Ejpž wajtž tjuu niižquiz cjižžinača. Wejt Yooz Ejpž wajtž tjuuqui ew Jerusalén cjiča. Yoozqui arajpachquiztan nii watja chjijunžcaquiča. Nižaza wejt ew tjuu niižquiz cjižžinača, wejt jila cjan.

¹³ Jakziltažlaj nonžñi cjuňchiz niiqui, nonžla, Espiritu Santuž icliz žoňinacžquiz chiitaqui”.

LAODICEA ICLIZQUIN CHIITA TAKUNACA

¹⁴ Laodicea icliz irpiňižquin tuž cjiira: “Tsjiiča juc'ant lijitumaqui. Jalla niiqui zuma razunžtanpan lijituma chiiča Yooz puntu. Primirquiztanpacha niž cjen tjapa Yooz paatanaca paatača. Jalla niiqui tuž cjiča:

¹⁵ Wejrqui ančucaž paata obranaca pajuča. Ančhucqui ana ancha wejt quintra paachinčhucča, nižaza ana ancha wejtajapa paachinčhucča. Wejrqui pecuča, ančhucqui ancha wejt quintra paazjapa, už ancha wejtajapa paazjapa, jalla nuž pecuča.

¹⁶ Jaziqui ana zumača ančuca kamzqui. Jalla nižta kamtiquiztan ančhuc chjatkatasuča, tsjii ana zuma jottažokaz.

¹⁷ Ančhucqui cjiňchucča, ‘Ricachuča wejrnacqui. Jaziqui walikal želuča, ana čjulumi pecuča’. Jalla nuž cjiňchucča. Jalla nuž chiichiž cjenami ančhucqui ana naazinčhucča, t'akjirižtakaz ančhucqui, nižaza poričtakaz, zur žoňinacažtakaz, nižaza ana zquitchiz žoňinacžtakazza. Ul-timu nižta kamaňchizza ančhucqui.

¹⁸ Jalla nižtiquiztan wejrqui ančucaquiz chiižinuča, wejtquiz kuzziz cjejajo. Ujquiz tjiňanta korižtakaz jalla nižta c'achja kamaňa ančhucqui wejtquiztan mayz waquiziča, ultim ricachu cjisjapa. Nižaza chiw zquiti-nacažtakaz jalla nižta zuma kamaňa wejtquiztan mayz waquiziča, ančuca azzuca ujnaca ana cherta cjisjapa. Nižaza čhujc kullažtakaz wejtquiztan mayz waquiziča, ančuca ujnacquiztan čhjetinta cjisjapa, nižaza ančhuc Yooz puntu intintiñi cjisjapa.

¹⁹ Jakziltižtan wejrqui zuma munazičhaja, jalla niižquiz chiižinača. Nižaza zuma ewjt'uča, niž kamaňa azquichta cjejajo. Jalla nižtiquiztan weriž chiižintiquiztan, ančhucqui ‘ujchizpantča’ cjis waquiziča. Nižaza wejtquiz tjapa kuztan cjis waquiziča.

²⁰ Nonžna. Wejrqui ančuca kuzquiz macjatžcu, kjawznuča. Jakziltat weriž kjawžta nonžaja, nižaza cazaja, jalla ninacž kuzquiz luzasača, nižaza ninacžtan chica zuma cjeeča. Nižaza ninacaqui wejtan chica zuma cjequiča.

²¹ Jakziltat anawalinacquiztan atipačhaja, jalla niižquiz zuma honora tjaa-ča, wejtan chica mantiñi cjisjapa. Jaknužt wejrqui tjapa anawalinacquiztan atipžcu, wejt Yooz Ejpžtan chica mantiñi cjissaja, jalla nižta ninacaqui wejtan chica mantiñi cjequiča.

²² Jakziltažlaja nonžñi cjuňchiz, jalla niiqui nonžla, Espiritu Santuž icliz žoňinacžquiz chiitaqui”.

4

ARAJPACHQUIN CHERTANACA

¹ Jalla nekztanaqui wejrqui tsewc kjutñi cherchinča. Arajpachquin tsjii zana cjetzi, cherchinča. Nižaza tsjii jora nonzinča, trompet pekz joražtakaz. Jaknužt primero nonžta jora, jalla nižta irata. Nii joraqui wejtquiz paljaychiča, tuž cjican:

–Tekz tjonžca. Wejrqui amquiz tjeeznača, jaknužt nekztan watačhaja, jalla nii.

² Nii orapacha wejrqui Espíritu Santuž mantiz poderquiz želatuča. Jalla nuž žejlcan, arajpachquin tsjii chawc mantiz julz cherchinča. Nižaza nii julzquiz tsjii julzi želatča.

³ Nii julzi žejlñi žoñitača c'achja tsijtchiz, c'achja maznacažtakaz c'ajatča, jaspe cornalina nižta maznacažtakaz. Nižaza niiž mantiz julz muytata cumari arco iris cherchinča, esmeralda maztakaz c'ajatča.

⁴ Jalla nii chawc mantiz julz muytata paatunc pusin mantiz puestunaca cherchinča, zapa puestuquiz tsjii žoñi julzi želatča. Nižaza ninacatača chiw tol zquti cutchi; nižaza ninacž achquiz kor pillužtakaz tewžinta.

⁵ Nii chawc mantiz julzquiztan liwjliwjñižtakaz ulanchiča, nižaza nii julzquiztan rayu jorjorñižtakaz joranaca nonzinča. Nii chawc mantiz julz yujcquiz pakallak ujñi teyas pekžtatača. Nii pakallak teyasnacaqui pakallak Yooz ispiritunacača.

⁶ Nižaza nii chawc mantiz julz yujcquiz kota želatča, ispijužtakaz c'ajatča.

Nižaza nii chawc mantiz julz muytata pajkpic latuquiztan pajkpic žejtñinaca želatča. Jalla nii žejtñinacaqui yujcquiztan tajquiztan tama čhujcquinacchiztača.

⁷ Nii primir žejtñiqui león animalažtakaztača. Tsjii žejtñižti wac turužtakaztača. Tsjii žejtñižti žoñž yujcchiztača. Tsjii žejtñižti layñi aquilažtakaztača.

⁸ Nii pajkpic žejtñinacaqui zapa mayni sojta wežlaž kjaražtakaztača, nižaza tjapa kjuttan čhujcquinacchiztača. Majiñami weenami tirapan Yooz wirzu tuž itscan želatča:

“Juc'ant zuma, juc'ant zuma, juc'ant zuma, Jalla nižtapanča tjapa azziz Yooz Jiliriqui. Yooz Jiliriqui tuquitanami, anzimi, jaztanami žejlča”.

Jalla nuž itsiča.

⁹ Nii žejtñinacaqui chawc mantiz julzquiz julzita mantiñižquiz honora tjaachiča, nižaza niižquiz rispitchiča, nižaza niižquiz gracias tjaachiča. Wiñayjapača nii chawc mantiñiqui.

¹⁰ Čhjulorat žejtñinacaqui nižta paatčhaja, nekztan nii paatunc pusin jilirinacaqui mantiñiž yujcquiz quillziča, nižaza niižquiz rispitchiča. Nii chawc mantiz julzñiqui wiñayjapa wiñayača. Jalla niiž yujcquiz nii tuncapan pusin jilirinacaqui ninacž kor pillužtakaz nonžinchiča, tuž itsñi cjican:

¹¹ “Učhum Yooz Jiliri, amqui honorchizkaj cjila. Nižaza amqui rispittaj cjila. Nižaza amča tjapa azzizqui. Jalla nii pajtaj cjila. Amqui tjapa žejlñinaca paachamča. Amiž munañpa jaru tjapa žejlñinacaqui paatatača, nižaza žejlča”.

5

TJUUZTA LIWRU CJETÑIQUI

¹ Nižaza nii julzi žejlñi mantiñiž žew kjarquiz tsjii liwru tjuužta želatča. Nii tjuužta liwruqui porap latu cijržtatača. Nižaza nii liwruqui pakallak estampillžtan zcatžtatača. Jalla nuž cherchinča.

² Nekztanaqui cherchinča, tsjii walja azziz anjila. Jalla nii anjilaqui altu joržtan pewcznatča, tuž cjican:

–¿Jequit waquizas tii tjuužta liwru cjetzjapa? ¿Nižaza tii zcatžta estampillanaca wjajrznas? –Jalla nuž pewcznatča.

³ Arajpachquinami tii muntuquizimi, tii muntu koztanami anaž jecmi cjetz waquiziča, nii liwruquiz cjiirtanaca chertzjapa.

⁴ Jalla nuž cjetz waquiziñi ana žejlchiz cjen, wejrqui kaacan ancha llaquizatuča.

⁵ Jalla nekztanaqui tsjii jiliriQUI wejtquiz paljaychiča, tuž cjican:

–Ana iya kaa. TsjiiQUI nii tjuužta liwru cjetñi waquizichiča. NiiQUI Judá cjita žoñiž majchmaatiquiztan tjonñiča. Juc'ant azziz cjen, León cjitača. Nižaza niiQUI Davidž majchmaatiquiztan tjonñiča. Jalla niiQUI tjappacha atipchiž cjen nii liwru cjetz waquiziča, nižaza nii liwruž estampillanaca wjajrzñi.

⁶ Nekztanaqui tižtanaca cherchinča. Nii chawc mantiz julžtan, nii žejtñinacžtan, nii jilirinacžtan, jalla ninacž taypiquiz tsjii Uuzažtakaz tsijtchi cherchinča. Wilana jawkta Uuzažtakaz, jalla nii cherchinča. Nižaza nii UuzaQUI pakallak wajranacchiztača, nižaza pakallak čhujcquinacchiztača. Niiž pakallak čhujcquinacaQUI pakallak Yooz ispiritunacča. Jalla nii Yooz ispiritunacaQUI tjapa kjutñi tii muntuquiz cuchantača.

⁷ Jalla nii UuzaQUI tjuužta liwru tanziča, julzi mantiñiž žew kjarquiztan.

⁸ Nii liwru tanžtan nii pajkpic žejtñinacami nižaza nii paatunc pusin jilirinacami nii Uuzažtakaz chawc jilirž yujcquiz quillziča. Zapa mayni nii jilirinacaQUI pajk guitaražtakaz arpa cjita tanzitača. Nižaza kor chuwanaca chjichatča insinsuchiz chjippi. Nii insinsuchiz chuwanacaQUI Yoozquin criichinacž oracionanaca cjetča.

⁹ NinacaQUI ew wirsu itsatča, tuž cjican:

“AmQUI waquizichamča nii tjuužta liwru cjetñijapa, nižaza nii liwruquiz zcatžta estampilla wjajrzñijapa. AmQUI contatača. Ticziž cjen am ljokžtan Yooztajapa sirwiñi žoñinaca liwriichamča. Amiž liwriita žoñinacača tjapa zarchiz žoñinacami, nižaza tjapaman takunacchiz žoñinacami, nižaza tjapaman watjanacchizimi, nižaza tjapaman nacionacchizimi.

¹⁰ AmQUI amiž liwriita žoñinaca mantiñijapa utchamča. Nižaza amQUI nii žoñinaca Yooztajapa sirwiñijapa utchamča, Amiž liwriita žoñinacaQUI tii yokquiz mantaquiča”.

Jalla nuž cjichiča nii itsñinacaQUI.

¹¹ Jalla nekztanaqui nonzinča wacchi anjilanacž jora. Nižaza cherchinča mantiz julž muytata, nižaza žejtñinacž muytata, nižaza jilirinacž muytata, jalla ninacž muytata muzpa waranka waranka waranka anjilanaca želatča.

¹² Nii anjilanacaQUI altu joržtan cjichiča:

“Nii conta UuzaQUI waquiziča, mantiz poder tanzjapa, nižaza tjapa zuma cusasanaca tanzjapa, nižaza tjapa zizjapa, nižaza tjapa azziz cjisjapa. Nižaza nii waquiziča honora tanzjapa, nižaza rispitta cjisjapa, nižaza honora waytižinta cjisjapa. Jalla nužoj cjila. Nuž waquiziča nii conta UuzaQUI”.

¹³ Nekžtan tjapa arajpachquin žejlñinacžtan, nižaza tjapa tii muntuquiz žejlñinacžtan, nižaza tjapa tii yok koztan žejlñinacžtan, nižaza tjapa kotquiz žejlñinacžtan, jalla nuž tjappacha niiž puntu cjichiča:

“Nii chawc mantiñizquizimi nii Uuzizquizimi wiñayjapa honora waytizintaj cjila; nižaza nii pucultizquiz wiñayjapa honorchiz cjila; nižaza wiñayjapa rispittaj cjila; nižaza tjapa azziz cjila watay wata”.

¹⁴ Nekztan nii pajkpic žejtñinacaqui cjetča:

—Jalla nužoj cjila. Amén.

Nižaza nii paatunc pusin jilirinacaqui quillžcu nii watay wata žejtñizquiz rispitchičha.

6

ESTAMPILLANACA WJAJRTA CHERCHINCHA

¹ Nekztanaqui wejrqui cherchinča, jalla tužu: Uuzažtakaz žoñiqui tsjii estampilla wjajrziča. Nižaza nonzinča tsjii žejtñiqui jorjorñižtakaz joržtan kjawchiča:

—Pichay. Cheržca.

² Nekztan wejrqui cherchinča, jalla tužu: Tsjii chiw cawallu tjonchiča. Nii cawallž juntun yawchi žoñiqui flech arcu armichiz tanchičha. Niižquiz tsjii atipz poder tjaatača, tsjii coronažtakaz. Jalla nižtiquiztan atipñi ulanchičha, tirapan atipzjapa.

³ Nekztanaqui nii Uuzažtakazqui segunda estampilla wjajrziča. Jalla nuž wjajrtan, segundo žejtñiqui cjichiča:

—Pichay. Cheržca.

⁴ Nekztan yekja cawalluqui ulanchičha, ljok cawallu. Nii cawallž juñtun yawchi žoñiqui poder tjaatača, žoñinacpora kichanasjapa, nižaza porapat conasjapa. Niižquiz tsjii pajk cuchillu tjaatača.

⁵ Nekztanaqui nii Uuzažtakazqui tercer estampilla wjajrziča. Jalla nuž wjajrtan, nonzinča tercer žejtñiqui tuž cjican:

—Pichay. Cheržca.

Nekztan cherchinča tsok cawallu. Nižaza nii cawallž juñtun yawchi žoñiqui balancichiztača niiž kjarquiz.

⁶ Nekztanaqui žejtñinacž tayıpıquiz tsjii jora nonzinča. Nii joraqui tuž cjichiča:

—Pajk paaztan tsjii kilo trigo kjayasača. Nižaza pajk paaztan čhjep kilo siwatu kjayasača. Aceitimi vinumi tira želaquiča.

⁷ Nekztanaqui nii Uuzažtakazqui cuarto estampilla wjajrziča. Jalla nuž wjajrtan nonzinča cuarto žejtñiqui tuž cjican:

—Pichay. Cheržca.

⁸ Jalla nekztanaqui wejrqui cherchinča, tsjii k'ill cawallu želatča, yawchi žoñchiz. Jalla nii yawchi žoñiqui Ticz cjitatača. Niiž wiruñ Ticz Yoka cjita apziča. Ninacžquiz poder tjaatača, cuarta parte tii muntuquiz žejlñi žoñinaca conzjapa. Ninacaqui žoñinaca conaquiča pajk cuchillžtan, mach'anacžtan, conanacžtan, nižaza anawal animalanacžtan.

⁹ Jalla nekztanaqui nii Uuzažtakazqui quinta estampilla wjajrziča. Jalla nuž wjajrtan wejrqui cherchinča arajpach altarž koztan almanaca želatča. Nii almanacž curpunacaqui Yooz taku parlitiquiztan contatača. Ninacaqui tii muntuquiz kamcan Yooz puntu ticlarchičha. Jalla nižtiquiztan contatača.

¹⁰ Nii almanacaqui altu joržtan kjawcan tuž cjichiča:

—Zuma lijitum Jiliri. Ampanča taku cumpliñiqui. Jaziqui ¿čhjulorcamat žoñinaca pjalznaquiya? ¿čhjulorcamat wejrnac conñi žoñinaca casticaquiya? —Jalla nuž cjichiča nii almanacaqui.

¹¹ Jalla nekztanaqui almanacaqui chiw tol zquiti tjaatača. Nižaza ninacžquiz cjitača, tsjii kjaž tjuñikaz jeejnaquiča. Primiruqui iya Cristužquiz sirwiñinacaqui conta cjistanča, jaknužt tuquiqui almanacž curpunaca contažlaja, jalla nižta. Nii containaca pjojkzcama, almanacaqui jeejnaquiča.

¹² Jalla nekztanaqui nii Uuzažtakazqui sexta estampilla wjajrzyča. Jalla nuž wjajrtan, wejrqui cherchinča, yoka ancha chekjinskatatča. Nižaza tjuñimi tsokchi cjissiča, lut zquitižtakaz. Nižaza jüzmi ljok cjissiča.

¹³ Nižaza warawaranacami yokquin tjojtsquichiča, jaknužt pjursant tjamiqúi higo frutanaca tjojtskatčaja, jalla nižta.

¹⁴ Nekztanaqui pachaqui katchiča tjuužta papilažtakaz. Nižaza tii muntuquiz tjapa curunacami tjapa kot tayıquız žejlñi yokanacami kizkatatača.

¹⁵ Nekztanaqui tii muntuquız mantiñinacami, jilirinacami, zultatž jilirinacami, ricachunacami, azziz žoñinacami, mantita žoñinacami, ana mantita žoñinacami, tjappacha chjojziča pajk maz pjetanacquizimi, nižaza cur akjinacquizimi.

¹⁶ Jalla ninacaqui kjawchiča, tuž cjican:

–Curunaca, maznaca, wejtnaca juntuñ tjojtžca. Wejrnac chjojzna, julzi mantiñiž yujcquiztan. Nižaza wejrnac chjojzna nii žawjchi Uuzažtakazquiztan, ana casticta cjisjapa.

¹⁷ Ultim casticz tjuñi tjonča. ¿Ject Yoozquiztan atipas? –Jalla nuž kjawchiča ninacaqui.

7

144,000 ZOÑINACA CHIMPUTA

¹ Jalla nekztanaqui wejrqui cherchinča, pajkpic anjilanacaqui tii muntuž pajkpic latuquıztan tsijtsi želatča. Jalla nuž žejlcan pajkpic puntu tjaminacaqui atajatča, ana zinta tjamzjapa yokquızimi kotquızimi muntinacquizimi.

² Nekztanaqui tsjii anjila cherchinča, tuwanchuctan tjonñi. Nii anjilaqui žejtñi Yooz mantita ortinžtan tjonchiča. Jalla nižtiquıztan nii anjilaqui altu joržtan kjawcan paljaychiča pajkpic anjilanacžquiz. Nii pajkpic anjilanacaqui poder tjaatatača, yokami kotami anawali cjiskatzjapa.

³ Jalla nižtiquıztan nii Yooz tjaata ortinžtan anjilaqui ninacžquiz cjichiča: –Yokami, kotami, muntinacami ana anawali cjiskata, učhum Yooz sirwiñinaca chimputa cjiscama. Yooz sirwiñinacaqui ninacž yujc ayquız chimputa cjequiča.

⁴ Nekztanaqui nonzinča patac pusi tuncan pusin waranka žoñinaca chimputatača, tjapa Israelž familianacquiztan.

⁵ Tuncapan waranka Judáž familiaquıztan chimputatača. Tuncapan waranka Rubénž familiaquıztan chimputatača. Tuncapan waranka Gadž familiaquıztan chimputatača.

⁶ Tuncapan waranka Aserž familiaquıztan chimputatača. Tuncapan waranka Neftalíž familiaquıztan chimputatača. Tuncapan waranka Manasés familiaquıztan chimputatača.

⁷ Tuncapan waranka Simeónž familiaquıztan chimputatača. Tuncapan waranka Levíž familiaquıztan chimputatača. Tuncapan waranka Isacarž familiaquıztan chimputatača.

⁸ Tuncapan waranka Zabulónž familiaquiztan chimputatača. Tuncapan waranka Joséž familiaquiztan chimputatača. Tuncapan waranka Benjamínž familiaquiztan chimputača.

CHIW ZQUITCHIZ ZOÑINACA

⁹ Jalla nekztanaqui cherchinča, muzpa tama zoñinacaqui chawc mantiz puesto yujcquizimi, nažaza Uuzažtakaz zoñž yujcquizimi želatča. Nii zoñinacaqui tjapa nacionanacquiztantača, nižaza tjapaman zarchiz zoñinacžquiztantača, nižaza tjapaman watjanacquiztantača, nižaza tjapaman takunacchiz zoñinacžquiztantača. Muzpa tamatača, jalla nižtiquiztan ana wira kanchucatača. Jalla nii zoñinacaqui chiw tol zquti cutchicamatača. Nižaza ninacž kjarquiz munti itzanaca tanzicha, čjanžtanpacha.

¹⁰ Jalla nii zoñinacaqui altu joržtan tuž chiyatča:

“Učhum Yoozkazza Liwriiñiqui. Niiča chawc mantiz puestuquiz julzñiqui. Nižaza nii Uuzažtakaz zoñžakazza Liwriiñiqui”.

¹¹ Nižaza chawc mantiz puestu muytatami, jilirnacž muytatami, pajkpic žejtñinacž muytatami, jalla ninacž muytata tjapa anjilanacaqui tsijtchi želatča. Ninaca zakaz chawc mantiz puestuž yujcquiz yokquiz puct'ichi Yooz rispitatča.

¹² Nii anjilanacaqui Yooz rispitan tuž cjichiča:

“Jalla nužoj cjila. Učhum Yooztajapa watay wata honora waytižintaj cjila, nižaza wiñaya rispittaj cjila. Učhum Yoozza zizñi zizñipanqui. Niižquiz wiñaya gracias cjila. Nižaza niižquiz honora waytižintaj cjila. Učhum Yoozqui wiñayjapa tjapa azziz cjila, nizaza poderchiz. Jalla nužoj cjila. Amén”.

¹³ Jalla nekztanaqui tsjii jiliričiqui wejr pewczicha, tuž cjican:

—¿Jecnacat tii chiw zquti cujtchinacaya? Nižaza ¿jakziquiztan tjonchi nincataya?

¹⁴ Wejrqui niižquiz kjaazinča, tuž cjican:

—Jiliri, anal zizuča.

Nekztan niičiqui cjichiča:

—Tinacaqui juc'ant sufris timpu watchiča. Nižaza tinacaqui ujnacquiztan liwriitača, Jesucristo Uuzažtakaz cjen. Cristuž ticziž cjen, jalla nižtiquiztan tinacaqui chiw ajunta zquitčizza.

¹⁵ Jalla nižtiquiztan tinacaqui Yooz mantiz puesto yujcquiz žejlča. Tinacača majiñami weenami Yooz kjuyquiz sirwiñinacaqui. Nižaza nii chawc mantiz puestuquiz julzñiqui tinaca cwitačiči. Niižtan tinacžtan watay wata chica želačiči.

¹⁶ Tinacaqui ana iya čjjeri eeskatačiči, nižaza anaž iya kjaz kjara pasnačiči. Nižaza sii kjakimi ana tinaca laacjiskatačiči, nižaza čjul kjakimi.

¹⁷ Jesucristuči mantiz puesto žcatipacha žejlñiqui. Jalla nii Uuzažtakaz Jesucristuči tinacž awatiri cječiči. Nižaza Jesucristuči tinacžquiz zuma kamañchizpan irpačiči, jaknužt zuma awatiriči niiž uuzanaca zuma jalzurquiz kjaz liquinčhaja, jalla nižta. Nižaza Yoozpacha tjapa tinacž kaaj chjužinačiči.

8

SEPTIMA ESTAMPILLA WJAJRTA

¹ Jalla nekztanaqui Uuzažtakaz Cristuči séptima estampilla wjajrziča. Jalla nuž wjajrtan, tsjii media ora tjapa ch'uju žejlčiči arajpachquin.

² Nekztan cherchinča, pakallawk anjilanaca želatča. Nii anjilanacaqui Yooz yujcquiz tsijtñitača. Jalla ninacžquiz pakallawk trompet pekz tjaatatača.

³ Nekztanaqui tsjii anjilaqui tjonžcu, altar yujcquiz tsijtsiča, tsjii kor insinsarchiz. Jalla nekztanaqui nižquiz wacchi insinsunaca tjaatatača, criichinacž oracionanacžtan t'ajzjapa. T'ajžta insinsužtan oracionanacžtan kor altarquiz nonžtatača chawc mantiz puestu yujcquiz.

⁴ Nii Yooz anjilž kjarquiztan criichinacž oracionanacžtan insinsužtan t'ajžta žketi waytichiča Yooz yujcquiz.

⁵ Jalla nekztanaqui nii anjilaqui insinsaru tanžcu, altarquiz uj parazižtan chjijpziča. Nekztan nii uj parazižtan chjijpi insinsaru tii muntu yokquiz tjojtchiča. Jalla nižtiquiztan ancha pjursanti liwjljwchiča, nižaza ancha pjursanti jorjorchiča, nižaza yoka chekjinchiča.

TROMPETCHIZ ANJILANACA

⁶ Jalla nuž watžcu pakallawk trompetchiz anjilanacaqui tjacziča trompetanaca tjawunzjapa.

⁷ Primir anjilaqui niž trompet pekz tjawunchiča. Jalla nuž tjawunžcu caranuz chijñižtan ujtžtan, nižaza ljokžtan t'ajžta tii muntu yokquiz cutz-inchiča. Jalla nižtiquiztan tercer parti tii muntu yoka ujsiča, nižaza tercer parti muntinaca ujsiča, nižaza tercer parti pastunacami ujsiča.

⁸ Nekztan segundo anjilaqui trompet pekz tjawunchiča. Jalla nuž tjawunžcu uj peksi pajk curužtakaz pajk kotquin tjojtchiča. Nekztanaqui tercer parti kot kjazqui ljok cjissiča.

⁹ Nekztan tercer parti kotquiz žejlñi animalanacaqui ticziča, nižaza tercer parti kotquiz ojklayñi warcunacaqui akžtatača.

¹⁰ Tercer anjilaqui trompet peks tjawunchiča. Jalla nuž tjawunžcu pajk warawara arajpachquiztan tjojtsiča, uj peksi teyažtakaz. Nii warawaraqui tjojtsiča tercer parti pujunacquizimi, nižaza tercer parti tujnacquizimi nižaza wijiñanacquizimi.

¹¹ Nii warawaraž tjuuqui Ajenjo cjitača. Ajenjo cjitača tsjii jar muntiqui. Jalla nii warawaraž tjojtiquiztan tercer parti kjazqui ajenjožtakaz jaru cjissiča. Nii jar kjaz cjen walja žoñinacaqui ticziča.

¹² Cuarto anjilaqui trompet pekz tjawunchiča. Jalla nii tjawunžcu tercer parti tjuñimi jiizmi warawarami zumchi cjissiča. Nekztanaqui tercer parti majiñaqui ana kjančiča, nižaza tercer parti weenami ana kjanchizakazza.

¹³ Jalla nekztanaqui wejrqui cherchinča, nižaza nonzinča, tsjii anjilaqui tseewc arajpach taypiquiz laycan altu joržtan čiichiča, tuž cjican:

—Muntu yokquiz žejlñi žoñinacžtajapa ana wali, ana wali, ana wali cjisnaquiča. Chjep parti anjilanacaqui trompet pekz tjawunzmayacha. Jalla ninacž tjawnan juc'ant ana wali cjisnaquiča.

9

QUINTO ANJILAQUI

¹ Jalla nekztanaqui quinto anjilaqui trompet pekz tjawunchiča. Jalla nuž tjawuntiquiztan tsjii warawaražtakaz cherchinča arajpachquiztan tii yokquiz tjojtsi. Jalla nii warawaražta anawal jiliržquiz poder tjaatača, anawal koz tuj cjetzjapa.

² Jalla nekztanaqui nii anawal jiliriqi koz tuj cjetziča. Jalla nuž cjetziquiztan jurnu žketižtakaz ulanchiča. Jalla nii koz tuj žketiqui tjuñimi pachami zumchi cjiskatchiča.

³ Jalla nii žketquiztan langosta animalanaca ulanchičha tii yokquiz laylayzjapa. Jalla nii animalañacžquiz anawali paazjapa poder tjaatatačha, jaknužt tsjii yek'achunca ana wali yek'antičhaja, jalla nižta cjisjapa.

⁴ Nižaza nii animalanacaqui mantitatačha, anačha yokquiz žejlñi pastunacžquizimi tjapa ch'ojña pajkñinacžquizimi anawali paajo. Pero yujc ayquiz ana Yooz chimputa žoñinacžquiz ana wali paasačha.

⁵ Pjijaska jiižcama nii anawali paañi animalanacaqui ana chimputa žoñinacžquiz sufriskatzjapa nižta poder tjaatatačha. Sufriskatcanami ticzkatta poder ana tjaatatačha. Jalla nuž sufriskatan, nii žoñinacaqui ancha ayinčičha, jaknužt tsjii žoñi yek'antitiquiztan ancha ayiñizlaja, jalla nižta.

⁶ Jalla nižta sufris timpuquiz žoñinacaqui ticz pecaquičha, pero anaž ticžñi ataquičha. Jalla nuž ticz peccanami, ana wira ticz tjonaquičha.

⁷ Nii langosta cjita animalanacaqui quira tjacžta cawallunacažtakaztačha. Ninacž achanacžquiz kor pillunacchiztakaztačha. Nii animalanacž yujcnacaqui žoñinacž yujcnacažtakaztačha.

⁸ Nižaza ninacž charaqui maatakanacž charažtakaztačha. Nižaza ninacž izkenacaqui león animalanacž izkenacažtakaztačha.

⁹ Nižaza ch'iztakaz kjajpchiztačha. Nii kjajpanacaqui jiružtakaztačha curpunaca chjojžjapa. Laylaycan, nii animalanacaqui ančaž arnatčha, jaknuž cawallunacaqui tsjii quirquiz zalzcan arančhaja, jalla nižta.

¹⁰ Nii animalanacž kjurznacaqui yek'achuncaž kjurztakaztačha. Ninacž kjurznacžtan yek'antasačha žoñinaca sufriskatzjapa nii pjijaska jiiž intiru.

¹¹ Nii animalanacž mantiñi jiliriqui nii koz tuj cjetñipachačha. Nii jilirž tjuuqui Abadón cjitačha hebreo tawkquiziqui. Griego tawkquiz Apolión cjitačha. Apolión cjičha, akžñiqui, nii.

¹² Jalla nižta watžcu primir anawaliqui watchičha. Nonžna. Imaziž iya pizc anawalinacaqui tjončha.

¹³ Jalla nekztanaqui sexto anjilaqui trompet pekz tjawunchičha. Jalla nuž tjawuntiquiztan tsjii jora nonzinčha. Yooz yujcquiz žejlñi kor altarquiztan nii joraqui ulanchičha. Pajkpic wajrichiztačha nii kor altaraqui.

¹⁴ Nii joraqui sexto trompetchiz anjilžquiz tuž cjichičha:

—Pajk Eufrates cjita pujquiz pajkpic anjilanaca čhejlta žejlčha. Jalla nii pajkpic anjilanaca cutzna, —jalla nuž cjetčha.

¹⁵ Nekztanaqui nii pajkpic anjilanacaqui cutstatačha, čhjep parti žoñinaca conzjapa. Jalla nižta paazjapa tjacžtatačha, nii ora, nii tjuñi, nii jiiž, nii wata, jalla nii timpujapa nižta paazjapa tjacžtatačha.

¹⁶ Žoñinaca conzjapa wacchi žoñiž yawchi cawallunaca želatčha, paa patac millonanacatačha. Jalla nuž wacchi nonzinčha.

¹⁷ Nii cawallunacatačha jalla tižta cherchiqui. Nii yawchi žoñinacaqui queca weezinacchiztačha. Nii queca weezinacaqui tižta culuranacatačha, ljok, larama, k'illu, jalla nižta culuranacatačha. Nii cawallunacaqui león animalanacž achanacchiztačha. Jalla nii cawallunacž atquiztan uj, žketi, azupri ulanchičha.

¹⁸ Jalla nii čhjep anawalinacatačha anawali paachiqui. Jalla nii uj, žketi, azupri ulantiquiztan čhjep parti žoñinaca contatačha.

¹⁹ Nii cawallunacž sufriskatz poderaqui ninacž atquiztačha, nižaza ninacž kjurzquiztačha. Nii cawallunacž kjurznacaqui zkoraztakaztačha. Nii zkoranacaqui ch'atñi achchiztačha, žoñinaca sufriskatzjapa.

²⁰ Nii anawalinacaž ana conta žoñinacazti Yoozquin anapanž kuz tjaachičha. Žoñiž paata yooznacžquin rispitzquiztan anapan jaytichičha. Tirapan rispitchičha zajranacžquizimi nižaza žoñiž paata yooznacžquizimi.

Ninacž yooznacaqui paatatača korquiztan, paazquiztan, mazquiztan, tabliquiztan, jalla nižtanaca. Nii žoñiž paata yooznacatača ana cherñimi, nižaza ana nonzñimi, nižaza ana ojklayñimi.

²¹ Nii parti žoñinacaqui anawal kamtiquiztan anapan jaytichiča. Tira-pantača žoñi conzqui, nižaza yat'iri ojklayzqui, nižaza adulteriuquiz ojklayzqui, nižaza tjañizaz ojklayzqui.

10

TSJII LIWRUCHIZ ANJILA ZELATČHA

¹ Nekztanaqui pajk azziz anjila cherchinča, arajpachquiztan tjonñi. Nii anjilaqui tsjir taypiquiz tjonchiča, tsjii arcu iris cumari niž ach juntuñ. Nii anjilž yujcqui tjuñižtakaz c'ajatča. Lisnacaqui uj asñižtakaztača.

² Niiž kjarquiz tsjii cjetžta liwru tanziča. Niiž žew kjojchaqui pajk kotquiz tjecziča, niiž zkar kjojchaqui yokquiz tjecziča.

³ Nii anjilaqui altu joržtan kjawchiča, león animalažtakaz. Nekztanaqui pakallawk wilta jorjorchiča.

⁴ Jalla nuž jorjortan, wejrqui cjiirzmayatača. Pero cjiirzmaya cjen arajpachquiztan tsjii joraqui wejtquin chiižquichiča, tuž cjican:

—Nii pakallawk jorjorñiž chiitaqui chjojzna. Ana nii puntu cjiira.

⁵ Jalla nekztanaqui nii kotquizimi yokquizimi tjeczi anjilaqui žew kjara waytichiča arajpach kjutñi.

⁶ Žew kjara waytižcu, juramintu paachiča Yooz tjuu chiican.

—Watay wata žejtñi Yoozqui paachiča arajpachami, yokami, kotami; nižaza arajpachquiz žejlñinacami, yokquiz žejlñinacami, kotquiz žejlñinacami, tjappacha paachiča. Jalla nii zinta Yooz tjuu chiican juramintu paachiča, tjapa Yooz puntu parliñi profetanacaž chiitanacaqui ana enenžcu cumplisjapa.

⁷ Chjulorat séptimo anjilaqui trompet pekz tjawznačhaja, jalla nii timpu Yooz chjojzaka tantiita taku cumplisnaquiča. Tuqui timpuqui Yoozqui niž sirwiñi profetanacžquiz nii chjojzaka taku mazinchiča.

⁸ Jalla nekztanaqui nii arajpachquiztan chiižquiñi joraqui wilta wejtquiz paljayžquichiča, tuž cjican:

Nii kotquizimi yokquizimi tjeczi anjilž kjarquiztan cjetta liwru tanzñi oka. Jalla nuž wejtquiz mantichiča.

⁹ Jalla nekztanaqui anjilžquin liwru mayi ojkchinča, wejtquiz nii liwru tjajo. Nii anjilaqui wejtquiz cjichiča:

—Tanzna, nižaza lujlzna. Am atquiz zuma mazk'až cjequiča. Pero am pjuchquiziqui jaruž tucaquiča.

¹⁰ Nekztan anjilž kjarquiztan liwru tanžcu lujlzinča. Wejt atquiz ancha mazk'atača. Jalla nuž lujltiquiztan wejt pjuchquiz jaru cjišiča.

¹¹ Nekztanaqui wejtquiz cjichiča:

—Wilta amqui Yooziž chiita taku paljaystanča, nacionacž puntuquiztanami, tjapaman sarchiz žoñinacž puntuquiztanami, tjapaman takunachiz žoñinacž puntuquiztanami, mantiñinacž puntuquiztanami.

11

YOOZ TAKU PALJAYÑI ŽOÑINACA

¹ Jalla nekztanaqui wejtquiz tsjii caña tjaatatača tupz paražtakaz. Nekztanaqui tsjiiqui wejtquiz mantichiča tuž cjican:

—Zaazna. Yooz kjuya mirižca, altaržtanpacha. Nižaza nekz žejlñi Yooz rispitiñinaca kanzna.

² Yooz kjuy patiuqui ana miriizaquiĉha. Jalla nii patiuqui yekja wajtchiz ŷoñinacŷquin intirjitaĉha. Jalla nii ŷoñinacaqui Yooz zuma watja akznaquiĉha pusi tunc paani jiiznaca.

³ Wejrqui cuchanŷcaĉha pucultan tisticu wejtquiztan paljayajo. Lut zquiti cujtĉhi ojklayaquiĉha, 1260 tjuñicama. –Jalla nuŷ wejtquiz mantichiĉha.

⁴ Pizc olivo cjita muntinacami, niŷaza pizc cantilirunacami tii yok mantiñi Yooz yujcquiz ŷejlĉha. Jalla nii muntinacami, niŷaza cantilirunacami pucultan tisticu cjiĉha.

⁵ Jakzilat Yooz taku paljayñi ŷoñinacŷquiz sufriskatz yanznaĉhaja, jalla ni-iqui contaŷ cjequiĉha. Nii pucultan tisticunacŷ atquiztan asñi uj ulnaquiĉha ninacŷ quintra ŷoñinaca liwj ujzjapa. Nekztan ninacŷquiz sufriskatz pecñinacaqui contaŷ cjequiĉha.

⁶ Poderchizza nii pucultan tisticunacaqui ana chijinskatajo. Yooz taku paljaycan, jalla nii timpu ana chijinskataquiĉha. Niŷaza nii pucultan tisticunacaqui kjaz ljok tuckatz poderchizzakazza. Niŷaza tii yokquiz ŷejlñi ŷoñinacŷquiz tjapaman anawalinacŷtan sufriskatz poderchizzakazza. Chjulora peccanami ŷoñinaca sufriskatasacĉha.

⁷ Jalla nii pucultan tisticunacaqui Yooz taku paljayz ŷerŷcu, contaŷ cjequiĉha. Tsjii anawal animalaŷtakaz anawal koz tujquiztan ulnaquiĉha. Yooz taku paljayñinacŷ quintra cjequiĉha. Niŷaza nii pucultiquiztan atipaquiĉha, niŷaza conaquiĉha.

⁸ Nekztanaqui ninacŷ ticzi curpunacaqui jakowasaquiĉha, Jerusalén wajt callquiz. Nii pajk wajtquiz Jesucristuqui cruzquiz ch'awctataĉha. Niŷaza Jerusalén watjaqui Sodoma cjitaĉha tsjii parabolaŷtakaz. Niŷaza Egipto cjitazakazza, tsjii parabolaŷtakaz.

⁹ Chjep maj chicatchiz tisticunacŷ ticzi curpuqui callquiz ŷelaquiĉha. Jalla nuŷ ŷelan ŷoñinacaqui ticzi curpunaca cheraquiĉha, tjapa nacionanacchiz ŷoñinacami, tjapa watjanacchiz ŷoñinacami, tjapaman takunacchiz ŷoñinacami, tjapaman saranacchiz ŷoñinacami, jalla ninaca. Nii cherzñi ŷoñinacaqui anaŷ nii ticzi curpunaca tjatkataquiĉha.

¹⁰ Nii pucultan tisticunacaqui tii yokquiz ŷejlñi ŷoñinacŷquiz ancha sufriskatchitaĉha. Jalla nuŷ ticŷtiquiztan tii yokquiz ŷejlñi anawal ŷoñinacaqui cuntintuŷ cjequiĉha, niŷaza pjijzta paaquiĉha, niŷaza porapat onantanaca onarassaquiĉha.

¹¹ Nekztan ĉhjep maj chicatquiztan Yoozqui nii pucultan tisticunaca jacatatskataquiĉha, wilita ŷeti tjaacan. Jacatatŷcu tsijtsnaquiĉha. Nekztan nii ticziquiztan jacatatchinaca cherŷcu, ŷoñinacaqui ancha tsuctsucacquiĉha.

¹² Jalla nekztanaqui arajpachquiztan tsjii altu joraqui nii pucultizquiz paljayaquiĉha, tuŷ cjican:

–Tsewc yawŷca anĉhucqui. Tekz ŷelaquiĉha.

Jalla nekztanaqui quintra ŷoñinacaŷ cheran, nii pucultan tisticunacaqui arajpachquin waytitaŷ cjequiĉha tsjir taypiquiz.

¹³ Nekztan cherchinĉha tuŷu. Jalla nii orapacha ancha yoka chekjinchicĉha. Jalla nuŷ yoka chekjintiquiztan tunca parti Jerusalén watjaqui pajlsiĉha. Nii yoka chekjintiquiztan pakallawk warank ŷoñinaca ticziĉha. Parti ŷejtñi ŷoñinacaczi ancha tsuctsucchiĉha. Jalla niŷtanaca wattiquiztan parti eclichi ŷoñinacaqui Yooz honora waytichiĉha.

¹⁴ Jalla nii anawali wattan, pizc anawalinacaqui watchiĉha. Niŷaza wajilaŷ tjonĉha tercer anawaliqui.

¹⁵ Jalla nekztanaqui séptimo anjilaqui trompet pekz tjawunchiċha. Jalla nuż tjawuntiquiztan arajpachquin altu joranaca chiiñi nonzinċha. Jalla tuż chiichiċha:

“Tjapa tii muntuqui uċhum Yooz Jiliriż mantita cjissiċha. Niżaza Yooz Epiż uchta Jesucristuż mantita cjissiċha. Jalla ninacaċha watay wata wiñaya mantiñiqui”.

¹⁶ Jalla nekztanaqui nii paa tunc pusin jilirinacaqui Yooz yujcquiz yokquiz puct'ican, Yooz rispitchiċha. Jalla ninacaċha Yooz yujcquiz mantiz puestunacquiz julzñiqui.

¹⁷ Yooz rispitan, tuż cjichiċha:

“Tjapa azziz Yooz Jiliri, amċha anzimi tuquitani žejlñiqui. Am juc'ant azi tjezamċha, niżaza anziqi tjapa mantiñi kalltichamċha. Jalla niżtiquiztan amquin gracias tjaa-uċha.

¹⁸ Nacionanacchiz žoñinacaqui am quintra žawjchiċha. Pero ninaca castic tjuñi tjonċha. Niżaza ticzi žoñinaca pjalz tjuñi tjonċha. Niżaza amquiz sirwiñinacžquiz zumanaca tjaaz tjuñi tjonċha. Amquiz sirwiñinacami, am taku paljayñinacami, amquiz rispitiñinacami, amquiz kuz tjaañinacami, jalla tjapa ninacžquizimi zumanaca tjaataž cjequiċha pjalz tjuñquiziqui. Niżaza tii yoka akñinacami, tii yoka žejlñi žoñinaca akñinacami, jalla ninaca akskattaž cjequiċha. Jalla nii tjuñiž tjonċha”.

Nuż cjichiċha nii paa tunc pusin jilirinacaqui.

¹⁹ Jalla nekztanaqui Yooz arajpach kjuya cjetžtataċha. Kjuy kjuyltan tsjii cajuna chertataċha. Yooziž tjaata takutaċha nii cajunquiziqui. Niżaza arajpachquin rayunaca želatċha, niżaza jorjorñinaca želatċha. Niżaza yoka chekjinskatñi želatċha. Niżaza pjursanti caraniza želatċha.

12

TSJAA MAATAKATAN TSJII ANAWAL ANIMALZTAN

¹ Jalla nekztanaqui arajpachquin tsjii pajk siñala parizichiċha. Nii siñalaqui tižtataċha. Tsjaa maataka želatċha. Naa maataka zquitiqui tjuñižtakaztaċha. Niżaza naaža kojch koztan jiiz želatċha. Naaža achquiz tuncapan warawara tewžintataċha, tsjii pillužtakaz.

² Naa maataqui iċtataċha. Nuż cjen, ancha aynatċha, majtzjapa.

³ Jalla nekztanaqui tsjii siñala parizichizakazza arajpachquin. Tsjii juc'ant anawal pajk ljok animala želatċha. Jalla niiqui dragón cjitataċha. Pakallaw achchiztaċha, niżaza tunca wajrichiztaċha. Niżaza zapa achquiz mantiñi žoñž pillunacžtan tewžintataċha.

⁴ Niiž pajk kjurz wewcžcu, ċhjep parti warawaranaca tjojtskatchiċha yokquin. Jalla nii dragonqui maataka yujcquiz tsijtsiċha, naa maataka majtz ora tjewžcan. Jalla nuż tsijtsiċha, naaža majtta wawa lujlzjapa majttiquiztanpacha.

⁵ Nekztanaqui naa maataqui lucmajch wawa majtchinċha. Nii lucmajchqui tjapa nacionquiz žejlñi žoñinaca c'aripacha mantiñiž cjequiċha. Pero jalla nuż majttiquiztan nii lucmajch wawaqui Yoozquin waytitataċha, Yooziž tjaata puestunaca tanzjapa.

⁶ Naa maatakzi ch'ekti yokquin atipassinċha. Jalla nicju Yoozqui naa maatakaltajapa tsjii yoka tjaczinchiċha. Jalla nicju 1260 tjuñinaca watzcama ċhjerchiz cjequiċha naaqui.

⁷ Jalla nekztanaqui arajpachquin quira zaltissiċha, Miguelžtan niiž mazi anjilanacžtan dragonž quintra quira zaltissiċha. Nii dragonžtan niiž mazi nacžtan ancha kichjassiċha.

⁸ Pero atipta cjissiĉha. Jalla niŝtiquiztan arajpachquin ana iya želasaĉha.

⁹ Jalla niŝtiquiztan nii dragonŝtan niiŝ mazi anjilanacŝtan tii yokquiz chjatkatzquitataĉha. Nii dragonqui Satanás diablupantaĉha. Niiĉha tuquita ŝkoraŝtakaz incallñiqui. Tuquitan nii diabluqui Evaquiz incalltiquiztan tjapa tii muntu incallĉiĉha anawali cjiskatzjapa.

¹⁰ Jalla nekztanaqui wejrqui arajpachquin tsjii altu jora nonzinĉha, tuŝ cjiñi:

–Jaziqui ultim liwriiz tjuñi tjonĉha, niŝaza Yooz azi tjeez tjuñi tjonĉha, niŝaza uchum Yooz tjapa mantiz tjuñi tjonĉha. Niŝaza Yooziŝ uchta Jesucristuŝ mantiz tjuñi tjonĉha. Uĉhum criichinacŝ quintrariunacaqui chjatkatta cjequiĉha. Majiñami weenami nii anawaliqui Yooz yujcquiz criichinacŝ quintra uj tjojtuñitaĉha.

¹¹ Pero criichinacaqui anawal diablu atipĉiĉha, Uuzaŝtakaz Jesucristuŝ ticziŝ cjen, niŝaza Yooz taku paljaychiŝ cjen. Niŝaza nii criichinacaqui Yooz taku paljaycan ana jiwjatchiĉha ticzuca cjenami.

¹² Arajpacha, niŝaza arajpachquin kamñinaca, cuntintuŝ cjee. Yokquiz kamñinaca, kotquiz kamñinaca, anĉhucaquiz anawali cjiskataquiĉha. Diabluqui chjatkatzquitiquiztan ancha ŝawjziĉha. Jalla niiqui zizza, muntuquiz kamz timpuqui zkoluckazza.

¹³ Jalla nekztanaqui nii dragonqui yokquiz chjatkatzquita nayŝcu, naa lucmajch maatiñ maatakaquiz apziĉha tanzjapa.

¹⁴ Nekztan naa maatakaquiz pizc pajk aquilŝ kjara tjaatkalĉha, ch'ekti yokquin laycan zkoraŝtakaz diabluŝquiztan atipzjapa. Yoozqui nii yoka tjacziĉha, maatakaquiz ĉhjep wata chicatchiz ĉhjerchiz cjisjapa. Jalla nii yokquin maatakqui layñi atipĉinĉha.

¹⁵ Nekztanaqui ŝkoraŝtakaz diabluqui persun atquiztan wacchi kjaz jotĉiĉha, pujuŝtakaz, kjaztan nii maataka tjuzjapa.

¹⁶ Nekztan yokaqui maatakaquiz yanapzjapa, c'acĉiĉha. Jalla nii c'actiquiz dragonŝ jotta kjazqui luzziĉha.

¹⁷⁻¹⁸ Nii cherŝcu, dragonqui maatakajapa juc'anti ŝawjĉiĉha. Jalla nekztanaqui diabluqui naaŝa majchmaatinacŝ quintra quira zali ojkĉiĉha. Naa maataka majchmaatinacaqui tiŝtanacaĉha. Jakziltat Yooz mantitanac jaru kamĉhaja, niŝaza Jesucristuŝ tjaajinta jaru kamĉhaja, jalla ninacaqui naa maataka majchmaatinaca cuntaĉha. Nii diabluqui quira zali ojkŝcu, kot atquiz tsijtsiĉha.

13

PIZC ANAWAL ANIMALANACA CHERCHINCHA

¹ Jalla nekztanaqui chawc kot kjazquiztan tsjii anawali pajk animala ulanŝquiñi cherĉinĉha. Jalla nii animalaqui pakallawk achĉiztaĉha, niŝaza tunca wajrichiztaĉha, niŝaza zapa wajriquiz mantiñi ŝoñŝ pillunacŝtan tewŝintataĉha. Niŝaza achanacquiz Yooz quintra tjuu cjiirtataĉha.

² Jalla nii weriŝ ĉherta animalataĉha tigriŝtakaz tsijtĉi. Niŝaza niiŝ ataqui leonŝ ataŝtakaztaĉha. Jalla nekztan dragonŝtakaz diabluqui nii anawal animalŝquiz niiŝ poderĉiz puestu tjaachiĉha, walja azziz mantizjapa.

³ Tsjii aĉaqui nii animalŝ pakallawk achanacquiztan ticskatzmaya ĉjorriĉtaŝtakaztaĉha. Pero ana ticziĉha. Antiz ŝejtĉiĉha. Nekztanaqui ispantiŝcuqui tjapa tii muntuquiz ŝejlñi ŝoñinacaqui anawal animala apziĉha.

⁴ ŝoñinacaqui nii dragón diabluŝquiz rispitchiĉha, Yoozquiztakaz. Niŝaza nii dragonqui anawal animalŝquiz niiŝ mantiz poder tjaachiĉha. Jalla niŝtiquiztan ŝoñinacaqui nii animalŝquiz rispitchizakazza, tuŝ cjican:

—¿Jakziltat tii animalžquiztan juc'ant azzizqui? ¿Jequit tii animala atipasajo?

⁵ Nekztan nii anawal animalaqui mit takunacami Yooz quintra chiita takunacami chiizjapa permitta cjissičha. Nižaza puzi tunc paan jiiznaca watzcama mantiz poderchiz cjequičha.

⁶ Jalla nekztanaqui anawal animalaqui Yooz quintra chiichičha, Yooz tjuu quintrami, nižaza Yooz timplu quintrami, nižaza arajpachquin kamñinacž quintrami. Jalla nižta quintra chiichičha.

⁷ Nižaza anawal animalaqui Yoozquin criichinacž quintra quira zalajo permittatačha, ninaca atipzcama. Nižaza nižquiz mantiz poder tjaatatačha, tjapa zaranacchiz žoñinacžquizimi, tjapa watjanacchiz žoñinacžquizimi, tjapa takunacchiz žoñinacžquizimi, tjapa nacionanacchiz žoñinacžquizimi, jalla tjapa nii ana criichi žoñinacžquizimi mantizjapa.

⁸ Yoozquin ana criichiž cjen žoñinacaqui anawal animalžquiz rispitchičha, Yoozquiztakaz. Nii animalžquiz rispiti žoñinacž tjuunacaqui anaž cjiir-tačha, Uuzažtakaz Jesucristuž liwruquiz. Liwriita žoñinacž tjuunaca Jesucristuž liwruquiz cjiir-tačha. Jalla ninacž laycu ticzičha Jesucristuqui. Ima tii muntu kalltan, jakziltižquiz Jesucristuqui wiñay žeti tjaačhaja, jalla ninacž tjuunaca cjiir-ričha arajpach liwruquiz.

⁹ Jakziltat nonžni cjuñchizlaja, nonžla.

¹⁰ Jakzilta žoñit preso chjichta cječhaj niiqui, panž chjichtaž cjequičha. Nižaza jakzilta žoñit pajk cuchillžtan conta cječhaj niiqui, panž conta cjequičha. Jalla nižtiquiztan Yooz wajtchiz žoñinacaqui Yoozquin tjapa kuztan cjis waquizičha, nižaza pasinsis kuztan cjis waquizičha, sufrisnaca watzjapa.

SEGUNDO ANAWAL ANIMALA

¹¹ Jalla nekztanaqui yekja anawal animala cherchinčha yokquiztan ulanñi. Jalla nii animalaqui pizc wajrichiztačha, uuzažtakaz. Pero dragonžtakaz chiyatčha.

¹² Jalla nii segundo anawal animalaqui tjapa nii primir animalž poderchiz mantichičha, primir animalžtan chica žejlcan. Nižaza segundo animalaqui tjapa tii muntuquiz žejlñi žoñinaca primir animalžquiz rispitskatchičha. Primir animalatačha ticzmaya chjojrichtiquiztan žejtchiqui.

¹³ Nižaza segundo animalaqui pajk milajrunaca paachičha. Tsewctan yokquiz uj tjojtskatchičha žoñinacaž cheran.

¹⁴ Jalla nižta milajrunaca payi permittatačha, primir animalaž želan. Jalla nižta milajrunaca paachiž cjen, tii muntuquiz kamñi žoñinacžquiz incallchičha. Nižaza žoñinaca mantichičha, chjojrichtiquiztan žejtchi animalž irata tsjii yooz paajo. Nekztan mantichičha, nii yooz rispitaajo. Nii primir animalatačha pajk cuchillžtan chjojrichtaž cjenami, wilta žejtchi cjissiqui.

¹⁵ Segundo animalaqui primir animalž irata paata yooz žejtñi cjiskatchičha. Nižta poderchiz cjissičha segundo animalaqui. Jalla nuž žejtñi cjican, nii paata yoozqui chiiñi cjissičha. Nižaza jakziltat nii yooz ana rispitchaja, jalla niiqui contaj cjila, mantichičha žejtñi chiiñi yoozqui.

¹⁶ Nižaza segundo anawal animalaqui mantichičha, tjapa žoñinacž yujc ayquizimi už žew kjarquizimi chimputa cjisjapa. Koltanacami, pajkinacami, ricachunacami, porinacami, žoñž mantuquiz cjiñinacami, ana žoñž mantuquiz cjiñinacami, liwj mantichičha, chimputa cjejajo.

¹⁷ Ana chimputa cjenaqui ana kjaychucatačha, nižaza ana tuychucatačha. Nii chimpuqui tužutačha, žoñž ayquiz anawal animalž tjuužtan už anawal animalž numeružtan cjiirtatažlaja, jalla nii.

¹⁸ Jalla nii intintisjapaqui walja zizñi cjistanča. Jakziltat zizñi cječhaja, jalla niiqui anawal animalž número tantiiz waquiziča. Nižaza nii numeruqui žoñinacž numeručha. Jalla nii numeruqui sojta patac sojta tuncan sojtani, jalla niičha.

14

144,000 ZOÑINACA CHERCHINCHA

¹ Jalla nekztanaqui Sión cjita cur kjutñi cherchinča. Jalla nicju Uuzažtakaz Jesucristuqui tsijtchi želatča. Niižtan chica 144,000 žoñinaca želatča. Nii žoñinacž ayquiz Jesucristuž tjuumi, niiž Ejpž tjuumi, jalla nii tjuunaca cijrtatača.

² Jalla nekztanaqui arajpachquiztan tsjii jora nonzinča, wacchi pujunacž kjaz joražtakaz, nižaza pjursanti jorjorñiž joražtakaz. Nižaza nii weriž nonžta joraqui suyniñitača, jaknužt wacchi arpa quitaranaca suyniçhaja, jalla nižta.

³ Jesucristužtan žejlñi žoñinacaqui ew wirsu itsiča. Nii mantiz puestuž yujcquiz nižaza nii pajkpic žejtñinacž yujcquiz, nižaza nii jilirinacž yujcquiz itsiča. Anaž iya jakziltami nii ew wirsu catoki atatča; nii 144,000 jalla nii alaja nii wirsu catokchiča. Nii 144,000 žoñinacaqui yokquiztan liwriitatača.

⁴ Jalla ninacaqui ana zalzi nižaza ana čjul maatakatan adulteriužtakaz paachiča. Jalla ninacaqui Uuzažtakaz Jesucristo apziča, jakziquin ojektčhaja, jalla nii. Nižaza ninacatača žoñinacžquiztan primero liwriita žoñinacaqui. Yooztajapami Uuzažtakaz Jesucristužtajapami liwriitatača.

⁵ Jalla ninacatača ana zinta toscara chiichiqui, nižaza ana čjul ujchiztača.

CHJEP ANJILANACA CHERCHINCHA

⁶ Jalla nekztanaqui arajpach taypiquiz tsjii anjila layñi cherchinča. Nii anjilaqui liwriiñi tawkchiztača, tii muntuquiz kamñi žoñinacžquiz parliñijapa. Nii liwriiñi takučha wiñayjapa werar razunaqui. Nii liwriiñi takuqui tjapa žoñinacžtajapa, tjapa nacionanacchiz žoñinacžtajapami, nižaza tjapa zaranacchiz žoñinacžtajapami, nižaza tjapa takunacchiz žoñinacžtajapami, nižaza tjapa watjanacchiz žoñinacžtajapa, jalla ninacžtajapatača.

⁷ Jalla nii anjilaqui altu joržtan tuž chiichiča:

–Yoozquin rispitiñiž cjee. Niižquin honora waytiñiž cjee. Niiž ultim casticz ora tjonča. Niiqui arajpachami, yokami, kot kjaznacami, nižaza kjaz jalzurinacami paachiča. Jalla nižtiquiztan niižquiz rispitiñiž cjee.

⁸ Jalla nekztanaqui yekja anjilaqui apžquichiča, tuž cjican:

–Babilonia, nii pajk watjaqui akziča, akziča. Nii watjaqui parti watjanacchiz žoñinacžquiz anawali kamañchiz cjiskatchiča, jaknužt adulteriuquiz ojklayñinacaqui ana zuma kamañchizlaja, jalla nižta.

⁹ Jalla nekztanaqui tercer anjilaqui apžquichiča, altu joržtan tuž cjican:

–Jakziltat nii anawal animala rispitičhaja, nižaza nii žoñiž paata yooz rispitičhaja, jalla niiqui castictaž cjequiča. Nižaza jakziltat niiž ayquiz anawal animalž chimputa cječhaja, už kjarquiz anawal chimputa cječhaja,

¹⁰ jalla niiqui Yooziž castictaž cjequiča. Jalla nii ana ultim Yooz rispitiñi žoñinacž quintra Yoozqui ancha žawjwaquiča. Yoozqui ninaca ancha casticaquiča. Ninacaqui infiernuquin nižaza asñi azupriquiz ancha t'akjizaquiča Yooz zuma anjilnacž yujcquizimi, Uuzažtakaz Jesucristuž yujcquizimi.

¹¹ Infiernuquin wiñayjapa sufran, uj žketiqui žketaquiča watay wata. Nii sufriñi žoñinacača majiñami weenami jeejzqui ana žejlchuca. Ninacaqui

anawal animala rispittiquiztanami nižaza nii paata yooz rispittiquiztanami jalla nižta ancha sufraquiča. Nižaza ninacaqui nii anawal animalž tjuužtan chimpataž cjen nižta ancha sufraquiča.

¹² Jakziltat Yooz partiquiz žejlčhaja, nižaza Yooz tawk jaru kamčhaja, nižaza Jesucristužquin kuz tjaačhaja, jalla ninacaqui tii muntuquiz pruebanaca watcan pasinsis kuzziz tira tjurt'ichej cjila.

¹³ Jalla nekztanaqui wejrqui arajpachquiztan tsjii jora nonzinča. Nii joraqui tuž cjichiča:

—Jalla tiic cjiira: “Tekztan nawjcchuc jakziltat Yooz Jiliržquiz tjurt'ichi kuzziz ticznačhaja, jalla niiqui cuntintuž cjequiča”. Espíritu Santuqui tuž cjiča: “Ninacaqui ninacž langzquiztan jeejnaquiča. Nižaza ninacž zuma obranacquiztanami nižaza kamtiquiztanami pactaž cjequiča. Jalla nižtiquiztan cuntintuž cjequiča”.

ZOÑINACA RICUJTA CUJICHAZTAKAZ

¹⁴ Jalla nekztanaqui tsewc kjutni cheržcu, chiw tsjiri cherchinča. Nii tsjir juntuñ tsjii zoñižtakaz julzi želatča, kor pillu achquiz tjewzi, nižaza kjarquiz cuchillu tanzi.

¹⁵ Nekztanaqui tsjii anjilaqui arajpach Yooz timpluquiztan ulanchiča altu joržtan kjawcan. Nii tsjir juñtuñtan julzi žoñžquiz paljaychiča, tuž cjican:

—Tii muntuquiz žejlñi kujich ora tjonchiča. Cujichaqui zuma pookchiča. Jalla nižtiquiztan am cuchillžtan pootzna, kujicha ricuja. —Nuž cjichiča anjilaqui. Tii muntuquiz žejlñi criichi žoñinacača kujichažtakazqui.

¹⁶ Jalla nekztanaqui nii tsjir juñtuñtan julzi žoñiqui cuchillžtan tii muntuquiz žejlñi kujicha ricujchiča. Jalla nižtiquiztan Yoozquin criichi žoñinacaqui ricujta cjissiča.

¹⁷ Nekztanaqui tsjii yekja anjilaqui arajpach Yooz timpluquiztan zakaz ulanchiča, cuchillžtan zakaz.

¹⁸ Nekztanaqui tsjii anjilaqui arajpach Yooz altarquiztan ulanchizakazza. Nii anjilaqui akzjapa poderchizza. Nekztanaqui nii anjilaqui segundo cuchillžtan anjilžquiz paljaychiča, altu joržtan tuž cjican:

—Am cuchillžtan uwas kujicha ricuja. Uwasnacaqui zuma pookchiča. Jaziqui nii ricuja. —Nuž cjichiča anjilaqui. Tii muntuquiz žejlñi ana criichi žoñinacača uwas kujichažtakazqui.

¹⁹ Jalla nekztanaqui nii anjilaqui cuchillžtan ana Yoozquin criichi žoñinaca kujichažtakaz pootchiča, nižaza ricujchiča. Nekztan nii ricujta žoñinacaqui uwas kujich uyquiztakaz tjojtatača, Yooz casticta cjisjapa.

²⁰ Jalla nekztanaqui jaknužt ricujta uwasanaca tjecančhaja, jalla nižta nii ricujta žoñinacaqui castictatača Yooz wajtž tjiiquin. Jalla nuž castictaž cjen, ancha ljoc ojkchiča, cawallunacž freno irantizcama. Quinsa patac kilómetro larcuquin nižta ljoc ojkchiča.

15

PAKALLAWK ANAWALINACA

¹ Jalla nekztanaqui arajpachquin tsjii siñala cherchinča. Nii pajk siñalaqui ancha ispantichucatača. Pakallawk anjilanacaqui želatča, pakallawk anawalinacchiz. Jalla nii anawalinaca wattan Yooz casticz žerzta cjequiča.

² Nižaza llijni kota cherchinča, ispijužtakaz ujžtan t'ajžta. Nižaza nii ispijužtakaz kot atquin žoñinaca tsijtchi želatča. Nii žoñinacaqui Yooz arpi gitara tanzi želatča. Nii žoñinacaqui tii muntuquiz kamcan, anawal animalquiztan atipchiča, nižaza niž paata yoozquiztan atipchiča. Nižaza nii anawal animalž tjuužtan ana chimpotatača.

³ Jalla nii žoñinacaqui Yooz sirwiñi Moisés itsñi itsatča, nižaza Uuzažtakaz Jesucristuž itsñi itsatča, tuž cjican:

“Tjapa azziz Yooz Jiliri, amiž paata pajk obranacača ancha zumanacaqui, nižaza ispantichucača. Am kamañaqui zuma lijitumča, werarapanča. Amča tjapa nacionchiz žoñinaca mantiñamqui.

⁴ Yooz Jiliri, ¿ject amquin ana eksnasa? ¿Ject amquin honora ana tjaasa? Am alaja ancha zumampanča. Amča zuma lijituma pjalzñamqui, jalla nižtiquiztan tjapa nacionquiztan žoñinacaqui tjonaquiča, am rispitzjapa”.

⁵ Jalla nekztanaqui arajpachquin cherchinča timplu kjuyltan. Jakziquizlaj Yooz lii, jalla nekz Yooz žejlž kjuya cjetzi cherchinča.

⁶ Nekztan cherchinča, timpluquiztan pakallawk anjilanacaqui pakallawk anawalinac casticchiz tjonchiča. Ancha zuma llijñi tol zquitchiztača, nižaza kor tsjaychiztača, quecanaca jweržinta.

⁷ Jalla nekztanaqui tsjiiqui pajkpic žejtñinaczquiztan zapa mayni pakallawk anjilanaczquiz kor chuwa tjaachiča. Nii chuwanacaqui wiñay žejtñi Yooz casticunaca chjijpžtatača.

⁸ Nii timpluqui uj žketžtan chjijpžtatača, Yooz juc'ant azziz cjen, nižaza juc'ant honorchiz cjen. Nižaza anaž jecmi nii timpluquin luzi atasacha, nii pakallawk anjilanacz anawalinaca watzcama.

16

ANAWALINACA CUTZTA

¹ Jalla nekztanaqui tsjii alto chiiñi jora nonzinča. Timpluquiztan nii joraqui pakallawk anjilanaczquiz paljaychiča, tuž cjican:

—Oka. Ančhucaqui nii intirjita anawalinaca cutzna. Nii anawalinacztan Yoozqui žoñinaca casticaquiča. —Jalla nuž paljaychiča nii joraqui.

² Jalla nuž paljaytiquiztan primir anjilaqui ojkchiča niižquiz intirjita anawalinaca tii muntu yokquiz cutzjapa. Jalla nekztanaqui jakziltat anawal animalž chimputažlaja, nižaza nii anawal animalž žoñiž paata yoozquiz rispitchaja, jalla tjapa ninacaqui anawal llajanacztan llajchiča. Nižaza ancha kjawcan aynatča.

³ Jalla nekztanaqui segundo anjilaqui ojkchiča niižquiz intirjita anawalinaca tii muntu kotquiz cutzjapa. Nii kot kjazqui ticzi žoñž ljocnacažtakaz tucchiča. Jalla nižtiquiztan tjapa kotquiz zejlñi animalanacaqui ticziča.

⁴ Jalla nekztanaqui tercer anjilaqui niižquiz intirjita anawalinaca cutziča pujunacquizimi jalzurinacquizimi. Tjapa kjazqui ljoc tucchiča.

⁵ Jalla nekztanaqui kjaz mantiñi anjilaž chiita nonzinča. Nii anjilaqui tuž cjichiča:

—Ancha zumamča Yooz Jiliri. Amqui tuquitanami jaztanami žejlča. Amqui lijitumakaz pjalžcu, casticča.

⁶ Nii casticta žoñinacaqui am parti žoñinacami, nižaza am parti parliñi žoñinacami conchiča. Jaziqui amqui nii žoñinaczquiz ljoc lickatchamča. Jalla nužupan ninaczta waquiziča.

⁷ Nižaza altarquiztan tsjii chiižquiñi jora nonzinča, tuž cjican:

—Tjapa azziz Yooz Jiliri. Amqui ultim werara pjalzamča; nižaza lijitumapan pjalzñamča. Jalla nužupanča.

⁸ Jalla nekztanaqui cuarto anjilaqui niižquiz intirjita anawali cutziča tjuñquiz. Jalla nuž cutžtiquiztan, tjuñiž siiqui žoñinaca ujsiča, zmali jakcan.

⁹ Jalla nižtiquiztan žoñinacaqui tjuñiž ujta cjissiča. Jalla nuž ujtiquiztan, žoñinacaqui ana persun uj paaznacquiztan jaytichiča, “Ujchizpantča”

cjican. Nižaza Yoozquin ana honora tjaachiča. Antiz Yooz tjuu quintra chiichiča, Yooz nii anawalinaca mantižquichiž cjen.

¹⁰ Jalla nekztanaqui quinto anjilaqui niizquiz intirjita anawali cutziča, jakziquin nii anawal animalaqui mantiñi julzičhaja, jalla nicju. Jalla nekztanaqui nii mantita yokaqui ancha zumchi cjissiča. Jalla nuž cjen žoñinacaqui persun las ch'atsiča; ancha t'akjizichiča.

¹¹ Jalla nuž sufrichiž cjenami, ana jaytichiča anawali paaznacquiztan, “Ujchizpantča”, cjicanaqui. Pero arajpach Yooz quintra chiichiča, ninacaž nuž ayinskatñi llajacama cjenaqui.

¹² Jalla nekztanaqui sexto anjilaqui niizquiz intirjita anawali pawk Eufates cjita pujquiz cutziča. Jalla nuž cutztiquiztan, nii pujuqui kjonchiča, tuwantan tjonñi jilirinaca kjakžquizjapa.

¹³ Nekztanaqui cherchinča anawal dragonž atquiztan anawal ispiritu ulanchiča. Jalla nižtazakaz ulanchiča anawal animalž atquiztanami, nižaza falso profetž atquiztanami. Nii čhjep ulanchi ispiritunacaqui zcaranacažtakaztača.

¹⁴ Nii ispiritunacaqui zajra ispiritunacatača. Milajrunacaž paa-atča. Nižaza tjapa tii muntuquiz mantiñinacaž juntatča, quira zaltisjapa. Tjapa azziz Yooz Jiliriž uchta timpu pawk quira želaquiča.

¹⁵ Nonžna. Jesucristuqui tuž cjiča: “Wejrqui tjañižtakal tiripintit tjonacha. Jakziltat naazñi kuzziz cječhaja, cuntintuž cjequiča. Zquitchizpan cjee; nekztan ana k'ala okasača, žoñinacaž ombrawillta cjisjapa”.

¹⁶ Jalla nekztanaqui mantiñi jilirinacaqui juntantitaž cjissiča, tsjii yokquiz. Nii yokaqui hebreo tawkquiz Armagedón cjitača.

¹⁷ Jalla nekztanaqui séptimo anjilaqui intirjita anawali querquiz cutziča. Jalla nuž cutztiquiztan altu joraqui arajpach timpluquiz mantiz puestuquiztan chiichiča, tuž cjican:

–Yooz casticz obranaca cumplita cjissa.

¹⁸ Jalla nekztanaqui rayunacami, arañinacami, jorjorñinacami želatča. Nižaza juc'anti yoka chekjinchiča. Yooziž žoñi paatiquiztan jalla nii timpuquiztan anzama tii yokaqui ana wira juc'anti chekjinchiča. Walja tsucuñi cheknatča.

¹⁹ Jalla nuž yoka chekjinžcu, Jerusalén pawk watjaqui čhjep parti t'akžtatača. Nižaza nacionanacž capitalanacaqui k'ala pajlsiča. Nižaza Yoozqui Babilonia pawk watja cjuñziča. Yoozqui Babilonia wajtž quintra žawjžcu, juc'anti casticchiča, jaru vinžtan liquintažtakaz.

²⁰ Jalla nuž castican tjapa kot taypiquiz žejlñi yokanacami, nižaza curunacami katchiča.

²¹ Nižaza arajpachquiztan žoñinacž juñtuñ pawk caranuzat tjojtžcu, ojkchiča. Tsjii caranuzaku quintal jilatača, ancha liczitača. Nekztanaqui žoñinacaqui Yooz quintra chiichiča nii caranuzaz nuž ojktiquiztan. Jalla nii anawaliquiztan ancha sufrichiča.

17

PUTIRII MAATAKA CHERCHINCHA

¹ Jalla nekztanaqui tsjii nii pakallawk ana walinacchiz anjilanacžquiztan wejtquiz tjonchiča, tuž cjican:

–Pichay. Putirii maataka amquiz tjeeznača. Naa putirii maatakaqui pawk watja cjiča. Jaknužt nii pawk watja casticta cječhaja, jalla nii zakal tjeeznača. Jalla nii anawal watjaqui wacchi kjaznacaran žejlča. Juc'ant anawali putirii maatakažtakazza nii watjaqui.

² Tii yokquiz mantiñi jilirinacaqui naa putiriyatan adulteriuquiz ojklaychiča. Naa irat kamañchiz peczcu, Yoozquiztan ancha zarakchiča nii mantiñinacaqui. Jaknužt vinžtan licchi žoñiqui tsjii kjutñi ojčkaja, jalla nižta cjissiča.

³ Jalla nekztanaqui Espíritu Santuqui wejr cherkatchiča jalla tižta. Tsjii anjilaqui wejr chjitchiča ch'ekti yokquin. Jalla nicju tsjaa maataka cherchinča. Jalla naa maataqui ljoc animalž juntuñ yawchi želatča. Jalla nii animalaqui persun curpuquiz Yooz quintra tjuunacchiztača. Nižaza pakallaw achchiztača, nižaza tunca wajrichiztača.

⁴ Naa maataqui morat ljoc zquiti cujtchintača. Nižaza koržtan, c'ajñi mazllanacžtan, c'achanacžtan, jalla ninacžtan alajitača. Nižaza naaža kjarquiz kor wazu tanzinča. Nii kor wazuquiz anawalinacžtan nižaza ana zuma kamañanacžtan chjijpžtatača.

⁵ Nižaza naaža ayquiz tii ana intintazzuca tjuu cjiirtatača: “Pajk Babilonia, putirii maatakanacž maa, nižaza tii yokquiz ana zuma kamañanacchiz maa”. Jalla nuž cjiirtatača.

⁶ Nekztanaqui wejrqui naa maatak cherchinča licchižtakaz. Naa maataqui wacchi Yoozquin criichinaca conchinča. Jesucristužquiz kuz tjaachiž cjen contatača nii criichinacaqui. Ninacž ljocžtan licchižtakaz cjistkalča. Jalla naa maataka cheržcu, wejrqui ancha ispantichinča.

⁷ Weriž ispantitiquiztan anjilaqui wejtquiz paljaychiča, tuž cjan:

—¿Kjažtiquiztan am ispantejo? Wejrqui naa maatakaž ana intintazzuca puntu amquiz maznača. Nižaza nii pakallaw achchiz, tunca wajrichiz animalž ana intintazzuca puntu amquiz maznača.

⁸ Maatakaž yawta animala cherchamča. Jalla nii animala tuqitan tii muntuquiz želatča. Nekztan ana želatča. Wiruñ wilita želaquiča, koz anawal tujquiztan ulanžcaquiča. Ultimquiziqui infiernuquin chjatkattaž cjequiča. Tuqitan tii muntu paatiquiztanpacha Yoozquin ana criichi žoñinacž tjuunacaqui anaž Yooz liwruquiz cjiirtatača. Jalla nii žoñinacaqui anawal animala cheržcu ispantaquiča. Nii animalaqui žejlchiča, nekztan ana želatča, nekztan wilita žejlča. Jalla nižtiquiztan ana criichi žoñinacaqui ispantaquiča.

⁹ Jalla nii intintizjapa intintiñi kuzziz cjis waquiziča. Nii anawal animalž pakallaw achcaqui pakallaw curunaca cjiča. Nii curunacž juntuñ tsjii watja julzi žejlča. Putirii maatakažtakazza nii watjaqui.

¹⁰ Nii pakallaw achanacaqui pakallaw mantiñi jilirinaca cjiča. Pjijzkaltan mantiñinacaqui ezziča; katchiča. Tsjii mantiča anziqi. Nii tsjiiqui ima tjonča. Jalla nii tjonžcu upacamakaz mantaquiča.

¹¹ Nii tuqui žejlñi, nekztan ana žejlñi animalaqui octavo mantiñi jiliriča. Pero nii pakallaw mantiñinacž partiquiztankača. Nižaza ultimquiziqui infiernuquin chjatkattaž cjequiča.

¹² Nižaza nii amiž cherta tunca wajranacaqui tunca mantiñi jilirinaca cjiča. Nii tunca mantiñinacaqui imaž mantiz poder tanža. Nii anawal animalžtan chica tsjii orakaz mantaquiča.

¹³ Nii tunca mantiñinacaqui tsjii kuzzizza; ninacž mantiz poder tjaaquiča anawal animalžquiz.

¹⁴ Nii anawal mantiñinacaqui Uuzažtakaz Jesucristuž quintra quira zaltayskataquiča. Pero Uuzažtakaz Jesucristuqui criichi žoñinacžtan ninacžquiz atipaquiča. Jesucristuqui jiliric jiliripanča, rey mantiñic mantiñipanča. Criichi žoñinacaqui nižtan chica želaquiča. Criichi žoñinacača Yooziž kjawžta, nižaza illzta, nižaza Yoozquin tjurt'iñi kuzzizpan.

¹⁵ Jalla nekztanaqui nii anjilaqui wejtquiz cjichizakazza:

—Nii amiž cherta kjaznacaqui, jakziquin naa maataka julzinžlaja, jalla nii kjaznacaqui žoñinaca cjiča. Nii žoñinacaqui tjapaman watjanacchiztača, nižaza nacionanacchiztača, nižaza takunacchiztača.

¹⁶ Nižaza nii amiž cherta tunca wajranacažtakaz mantiñinacaqui anawal animalžtan naa puturii maatak quintra chjaawjkataquiča. Nekztan naa maataka akznaquiča, nižaza ana zquitchiztakaz cjiskataquiča. Nižaza naaža curpu lujlznaquiča. Nižaza ujžtan ujznaquiča.

¹⁷ Jalla nuž nii mantiñinacaqui naa maatakaquiz paaquiča. Yoozqui ninacž kuznacquiz nuž peckatchiča, Yooz muntacama paa-ajo. Jalla nuž Yooz muntacama paacan ninacaqui tsjii kuzziz cjequiča, anawal animalžquiz ninacž mantiz poder tjaazjapa, Yooz chiitacama cumpliskatzjapa.

¹⁸ Nižaza amiž cherta maatakqui pajk watja cjiča. Nii watjača tii yokquiz žejlñi mantiñi jilirinacžquiz mantiñiqui.

18

BABILONIA CJITA WATJA EZZICHA

¹ Jalla nekztanaqui wejrqui tsjii anjila arajpachquiztan chjijwžquiñi cherchinča. Nii anjilaqui walja mantiz poderchiztača; nižaza walja kjanatča. Nuž kjanan tii yokaqui majiñažtakaz cjissiča.

² Nekztanaqui nii anjilaqui altu joržtan kjawchiča, tuž cjican:

—Babilonia pajk watja ezziča, ezziča. Nii wajtquiz zajranacaqui watja chassiča, tjapaman anawal ispiritunacžtan, nižaza tjapaman chjaawjkatta wežlanacžtan.

³ Nii Babilonia watjaqui tjapa nacionanaca Yoozquiztan zarakskatchiča, licchinacažtakaz. Nižaza nii watjaž cjen tjapa tii yokquiz mantiñi jilirinacaqui ana zuma kamañchiz cjissiča. Nižaza nii wajtchiz žoñinacžquiz tjapaman cusasanaca tuytiquiztan, tuyñi žoñinacaqui ricachu cjissiča.

⁴ Jalla nekztanaqui wilta tsjii jora nonzinča, arajpachquiztan chiižquiñi. Nii joraqui tuž cjichiča:

—Wejt parti žoñinaca, nii wajtquiztan ulna, ana nii wajtchiz žoñinacažtapacha uj paazjapa, nižaza nii wajtchiz žoñinacžtanpacha ana casticta cjisjapa.

⁵ Nii wajtchiz žoñinacž ujnacaqui juc'anti muntunacžtakaz yapchiča arajpacha irantizcamažtakaz. Juc'anti ujnaca paachiča. Jaziqui Yoozqui ninacaž paata ujnaca naychiča.

⁶ Jaknužt nii wajtchiz žoñinacaqui yekja žoñinacžquiz anawali paatčhaja, jalla nii anawal paatiquiztan jama castictaj cjila. Ninacaž ujnaca paatiquiztan pizc wilta juc'anti castictaj cjila. Jaknužt yekja žoñinaca anawali cjiskatčhaja, jalla nižta irata pizc wilta juc'anti ana wali cjiskattaj cjila.

⁷ Jaknužt nii wajtchiz žoñinacaqui ancha persun honora waytitčhaja, nižaza jaknužt ninacaqui persun kuzcama kamtčhaja, jalla nuž anawali kamtiquiztan jama sufriskattaj cjila. Ninacž kuzquiz tuž cjiñitača: “Wejrnacqui juc'ant zumtča. Anawalinaca wejtquiz anapan cjisnasača. Anal wira tsjaa žewažtakaz kaaznasača”.

⁸ Jalla nižtiquiztan nii wajtchiz žoñinacžquiziqui casticu tiripintit tjon-aquiča. Ninacžquiz ancha anawalinaca tjonaquiča. Jaziqui žoñinaca ticznaquiča; nižaza llacjizaquiča; nižaza čhjerž kjara paznaquiča; nižaza ujquin ujžtaž cjequiča. Muzpa azziz Yooz JiliriQUI nii žoñinaca pjalžcu casticaquiča. Jalla nižtiquiztan nižta anawalinaca tjonaquiča.

⁹ Jalla nii cheržcu jakzilta mantiñinacat nii wajtchiz žoñinacžtan ana zuma kamañchizlaja, nižaza persun kuzcama kamchizlaja, jalla ninacaqui nii wajtchiz žoñinacž castictu cheržcu, kaaquiča, nižaza llacjizaquiča. Nii watja ujznan, nii mantiñi jilirinacaqui uj žketñi cheraquiča. Nekztan kaaquiča.

¹⁰ Jalla nuž cheržcu, nii watja nuž castictaž cjen, ažkquin tsijtchi želaquiča; ana macjatžcaquiča. Castictaž cjen tsucaquiča, tuž cjican: — ¡Ay! ¡Ay! Babilonia pajk watja. Muzpa azziz cjenacui, anawali cjissila. Tsjii ratukaz casticta cjissila.

¹¹ Nii watja castictaž cjen, tii muntuquiz žejlñi tuyñinacazakaz kaaquiča, nižaza llacjizaquiča. Ninacž cusasanaca kjayñimi ana iya želaquiča.

¹² Ninacž cusasanacaqui tižtanacača: kori, paaz, llijñi maznaca, c'achjanaca, zuma pañu, murat pañu, ser pañu, ljoc pañu, tjapaman zuma ulurchiz tablanaca, zuma marfila cjita maznaca, jila walurchiz maderanaca, korinaca, jirunaca, zuma marmol cjita llijñi maznaca,

¹³ canelanaca, zuma ulurchiznaca, insinsunaca, zuma ulurchiz mirra cjitanaca, zuma ulurchiz asitinaca, vinunaca, asitinaca, chiw llamp'u jac'unaca, trigonaca, kuzñi animalanaca, uuzanaca, cawallunaca, autunaca, tuyzjapa piyunanaca. Jalla tjapa nižtanaca tuytatača.

¹⁴ Nii tuyñinacaqui nii wajt puntuquiztanž cjequiča:

—Nii wajtquiziqui anaž iya tjapaman zumanaca želaquiča, nii ancha juztažta zumanacaqui. K'ala pertissiča, wiñayjapa. Walurchiz cusasanacaqui pertissiča, nižaza wajtquiz honora tjaañi cusasanacaqui pertissiča wiñayjapa. —Nuž chiyaquiča.

¹⁵ Nii cusasanaca tuyñinacaqui ricachu cjissiča nii wajtchiz žoñinacž kjaychiž cjen. Jaziqui tuyñinacaqui nii watja casticu cheržcu, eksñi kuztan ažkquin tsijtchi želaquiča. Nižaza altu joržtan kjawcan, kaaquiča, nižaza llacjizaquiča.

¹⁶ Nižaza ninacaqui tuž cjequiča: —¡Ay! ¡Ay! Anawali cjissila tii pajk watjaqui. Tsjaa ricach maatakažtakaz želatča, iñarato zquitchiz cujtchin, zuma pañ zquitchiz, murat pañ zquitchiz, ljoc pañ zquitchiz. Zuma iñarato želatča, koržtan, zuma walurchiz maznacžtan, zuma c'achjanacžtan.

¹⁷ Tsjii ratukaz tjapa nii wajtquiz walja walurchiz cusasanaca pertissiča. —Jalla nuž cjequiča.

Jalla nii watja casticu cheržcu, warcu joojooñinacami, warcuquiz ojk-layñinacami, warcuquiz langzñinacami, tjapa kot warcužtan langzñinacami ažkquin tsijtchi želaquiča.

¹⁸ Jalla nii wajtquiztan uj žketñi cheržcu, kjawaquiča, tuž cjican:

—¿Jakzilta watjat tižta chawc watjažtapacha žejljo?

¹⁹ Jalla nekztanaqui ninacaqui persun achanacquiz pjilžtan tjatznaquiča, ancha kaacan, nižaza ancha llacjizcan. Nižaza tuž cjequiča:

—¡Ay! ¡Ay! Ana wali cjissila nii chawc watjaqui. Nii wajtquin cusasanaca chjitchiž cjen, tjapa warcužtan langzñi žoñinacaqui cusa ricachu cjissiča. Nižaza tsjii ratulla akžtala.

²⁰ Arajpachquin žejlñinacazti, nii watja akžtaž cjen, cuntintuž cjee. Yoozquin criichi žoñinaca, cuntintuž cjee. Nii wajtchiz žoñinacaqui ančhucaquiz anawali paachiča. Yooz parti žoñinaca, nižaza Yooz uchta apostolonaca, nižaza Yooz puntu parliñinaca, tjapa ančhucaltajapa Yoozqui nii watja casticaquiča. Jaziqui ančhucaltajapa Yoozqui nii watja casticaquiča.

²¹ Jalla nekztanaqui tsjii walja azziz anjilaqui tsjii pajk maz tjajžtakaz waytižcu kotquiz tjojtchiča, tuž cjican:

—Tii maz tjaaj tjojttažokaz Babilonia chawc watja tjojttaž cjequiča. Anaž wira iya cherta cjequiča.

²² Tii wajtž calliran anaž wira iya itsni jora nonžtaž cjequiča, arpi guitar jorami, itsni jorami, pincall jorami, trompet pekz jorami. Nižaza tii wajtquiz anaž wira iya oficiuchiz langžninacami želaquiča. Nižaza tii wajtquiz anaž wira iya žoñinaca tjaajžtan jawunni jora nonžtaž cjequiča.

²³ Nižaza tii wajtquiz micha pekžta anaž iya cheraquiča. Nižaza anaž iya zalzni pjijzta ch'ajwiñi nonznaquiča. Tuqui tii wajtquiz tuyñinacaqui žoñinacz yujcquiz pajk žoñitača. Maña paacan, tii wajtchiz žoñinacaqui tjapa nacionanacchiz žoñinaczquiz incallchiča.

²⁴ Nižaza tii wajtchiz žoñinacaqui Yooz parti žoñinaca, nižaza Yooz puntu parliñinaca conchiča. Tjapaman žoñinaca contača.

19

ARAJPACHQUIN YOOZQUI HONORCHIZZA

¹ Jalla nekztanaqui arajpachquin wacchi žoñinacz jora nonzinča, tuž cjican:

“¡Aleluya! Učhum Yoozza livriñiqui, walja azzizza, walja honorchizza.

² Učhum Yoozza lijituma pjalzñiqui. Jalla nuž Babilonia wajtchiz žoñinaca lijituma casticchiča. Nii žoñinacaqui tjapa wajtchiz žoñinaczquiz ana wali kamañchiz cjiskatchiča. Jalla nižtiquiztan casticta cjissiča. Nižaza Yoozquin sirwiñi žoñinaca conchiž cjen, Yoozqui nii žoñinaca casticchiča”.

³ Wilta nii arajpachquin žejlñinacaqui altu joržtan chiichiča, tuž cjican:

—¡Aleluya! Nii wajtquiztan uj žketi wiñaya žketaquiča.

⁴ Nekztanaqui arajpachquin paa tunc puzin jilirinacztan pajkpic žejtñinacztan yokquiz quillžcu, puct'ichiča. Nižaza Yoozquiz rispitchiča. Yoozqui niž mantiz puestuquiztača. Rispitcan tuž cjichiča:

—¡Nužoj cjila! ¡Aleluya! ¡Amén!

⁵ Nekztanaqui mantiz puestuquiztan tsjii jora nonzinča tuž chiižquiñi: “Tjapa Yoozquin sirwiñinaca, Yoozquiz honora waytila. Koltami pakjimi tjapa Yoozquin rispitiñinacami, Yoozquiz honora waytila”.

⁶ Nekztan wejrqui wacchi žoñinacz jora nonzinča. Wacchi kjaz pujquiz kjawñižtakaztača. Nii joranacaqui tuž cjichiča:

“¡Aleluya! Učhum tjapa azziz Yooz Jiliriqui tjapa mantiz kallantichiča.

⁷ Jalla nižtiquiztan ančaž chipžla učhumqui, cuntintuž cjila. Yoozquin honoraž tjaala. Uuzažtakaz Jesucristužtan niž parti žoñinacztan juntu kamz ora irantižquichiča, tsjii zalz pjijsta oražtakaz. Jesucristuž parti žoñinacaqui listu tjacziča, zalziñ turažtakaz.

⁸ Finu zquitinacztan cujtziča; anča limpu, nižaza llijñitača”.

Nii finu zquitinacztan cujtchi tuž cjiča, Yoozquin criichinacaž zuma kamañanacchiz, jalla nii. Jalla nuž zquitinacztan cujtzkatchiča Jesucristuž parti žoñinaczquiz.

⁹ Jalla nekztanaqui tsjii anjilaqui wejtquiz paljaychiča tuž cjican:

—Jalla tuž cijira: “Uuzažtakaz Jesucristuž zalz pjijztiquiz invittanaca cuntintoj cjila”.

Nižaza wejtquiz cjichiča:

—Jalla tii weriž chiita takunacaqui Yooz zuma werar razunanacača.

¹⁰ Jalla nižtiquiztan wejrqui nii anjilž kjojchquiz quillžcu puct'ichinča, nii rispitzjapa. Nižti wejtquiz chiižinchiča, tuž cjican:

—Ana niŕta paa. Wejrqui Yooz sirwiñtĉha, amtan chica, niŕzaa am jilanaĉŕtan chica. Tjapa anĉhucĉha Jesucristuŕ puntuquiztan parliñinacaqui. Yoozquin alaja rispita amqui.

Jakziltat Jesucristuŕ puntuquiztan mazinĉhaja, jalla niiĉha werar Yooz taku parliñiqui.

CHIW CAWALLQUIZ YAWCHI ZOÑI

¹¹ Jalla nekztanaqui arajpacha cjetzi cherchinĉha. Jalla nicju tsjii chiw cawallu jecŕquichiĉha. Calwallquiz tsjii zuma ŕoñi yawchi cherchinĉha. Nii ŕoñiqui Zuma Lijituma cjitaĉha, niŕzaa Werar Razunchiz cjitaĉha. Jalla nii ŕoñiĉha zuma lijituma pjalzñiqui, niŕzaa ultim werar razunquiztanĉha quira zaltiñiqui.

¹² Nii ŕoñĕ ĉhujcquinacaqui ujĕtakaz c'ajatĉha. Niiŕ achquiz wacchi mantiñi ŕoñinacĕ pillunacchiztaĉha. Niŕzaa niiŕquiz tsjii tjuu cjiŕtataĉha. Nii tjuuqui niikaz zuma intintiĉha.

¹³ Nii ŕoñiqui ljocĕtan tinta tol zquitichiztaĉha. Niiŕ tjuuqui Yooz Taku cjitaĉha.

¹⁴ Niiŕquiz apzcatĉha arajpach zultatunaca; chiw finu zquitichiznacataĉha, niŕzaa limputaĉha. Nii zultatunacataĉha chiw cawallunacquiz yawchi.

¹⁵ Nii zuma ŕoñĕ atquiztan tsjii pajk ar cuchillu ulanchiĉha, nacionanacchiz ŕoñinaca casticzjapa. Tjapa nacionanacchiz ŕoñinacĕquiz mantaquiĉha, tjapa anawali paatiquiztan jama casticcan. Jaknuŕt tsjii uwas kujichñi ŕoñiqui uwas kjaz pjijtzjapa tjecanĉhaja, jalla niŕta irata nii zuma ŕoñiqui Yooztajapa quintra ŕoñinaca tjecnaquiĉha. Tjapa azziz Yoozza anawali ŕoñinacĕ quintra ŕawjchipan. Anziqui ninaca casticta cjissa.

¹⁶ Nii tjecanñi ŕoñĕ tol zquitquizimi niiŕ lizquizimi tii tjuu cjiŕtataĉha: “Tjapa mantiñi reynacĕquiztan tsjan reyĉha. Niŕzaa tjapa jilirinacĕquiztan tsjan jiliriĉha”.

¹⁷ Jalla nekztanaqui cherchinĉha, tsjii anjila tjuñquiz tsijtchi. Alto jorĕtan arajpachquin laylayñi weŕlanaca kjawziĉha, tuŕ cjican:

—Tekhuc picha. Niŕzaa tekz ajcsca, Yooz tjaata ĉhjeri lujljapa.

¹⁸ Tekz ajcsca, mantiñi reynacĕ janchi lujljapa, niŕzaa zultatu mantiñinacĕ janchi lujljapa, niŕzaa tjup kuzziz ŕoñinacĕ janchi lujljapa, niŕzaa cawallunacĕ ĉhjizwimi nii yawchi ŕoñinacĕ janchimi lujljapa, niŕzaa tjapaman ŕoñinacĕ janchi lujljapa, ŕoñĕ mantuquiz cjicjiñi ŕoñinacĕ janchimi, ana ŕoñĕ mantuquiz cjicjiñi ŕoñinacĕ janchimi, kolta ŕoñinacĕ janchimi, pajk ŕoñinacĕ janchimi; tjapaman ŕoñinacĕ janchi lulaquiĉha. —Nuŕ cjichiĉha anjilaqui.

¹⁹ Jalla nekztanaqui cherchinĉha, nii anawal animalĕtan yokquiz mantiñi reynacĕtanami ninacĕ zultatunacĕtanami ajcsitaĉha, chiw cawallquiz yawchi ŕoñĕ quintra kichjasjapa, niiŕ zultatunacĕtanpacha.

²⁰ Quira zaltiŕcu, nii anawal animalaqui preso tanta cjissiĉha, falso profetĕtan chica. Jalla nii falso profetaqui animalĕ yujcquiz milajrunaca paachiŕ cjen, nii animalaŕ chimputa ŕoñinaca incallchiĉha; niŕzaa nii animalĕ ŕoñiŕ paata yoozquiz rispitiñi ŕoñinaca incallchizakazza. Jalla nii pucultan anawalinacaqui azupri infiernuquin tjojtataĉha, ŕejtñi sufrisjapa.

²¹ Nii chiw cawallquiz yawchi ŕoñiqui parti quintra ŕoñinaca pajk cuchillĕtan conchiĉha. Nii pajk cuchilluĉha nii ŕoñĕ atquiztan ulanchiqui. Jalla niŕtiquiztan tjapa nii ajcsi weŕlanacaqui ninacĕ janchiŕtan, ĉhjizwinacĕtan ancha ĉjekchi cjissiĉha.

20

WARANK WATA PUNTU

¹ Jalla nekztanaqui tsjii anjila cherchinča, arajpachquiztan tjonñi. Nii anjilaqui kjarquiz llawi tanziča; nižaza pajk carina tanziča. Nii llawiqui koz anawal tuj llawitača.

² Nekztan nii anjilaqui dragón tanchičha. Dragonqui žkoražtakaz Satanás diabluča. Jalla nii diabluqui warank wata watzcama čhejltača.

³ Nekztan nii anjilaqui diablu tjojtžcu, koz tuj chawjcchiča. Nižaza tsjii estampillžtan žcatžinchiča, diabluž nacionanacchiz žoñinacžquiz ana iya incallajo, warank wata watzcama. Jalla nii warank watanaca wattanaqui, wilta cuchta cjistanča tsjii upacamakaz.

⁴ Jalla nekztan mantiz puestunaca cherchinča. Jalla nii puestunacquin julzi žoñinacaqui pjalzjapa poderchiztača. Nižaza acha muržinta criichinaca cherchinča. Nii criichinacaqui contatača, Yooz taku parlitiquiztan, nižaza Jesucristuž puntuquiztan ticlartiquiztan. Ninacaqui anawal animalžquizimi nižaza niž paata yooznacžquizimi ana rispitalča. Nižaza anatača anawal animalž chimputa, ana yujc ayquizimi, ana kjarquizimi. Jalla nii conta criichinacaqui jacatatchi cherchinča. Warank watanaca Cristužtan juntu mantaquiča.

⁵ Jalla niičha primiru jacatatzqui. Parti ticzi žoñinacaqui ana jacatatchičha nii warank watanaca watzcama.

⁶ Nii primiru jacatatchinacaqui cuntintuž cjequiča. Ancha zuma kamañchiz cjequiča. Nii segundo ticzqui ninacžtaqui ana želaquiča. Nii segundo ticzqui tuž cjiča, infiernuquin chjatkatta wiñayjapa casticta cjisjapa. Pero nii jacatatchinacaqui Cristužtan juntu mantaquiča warank watanaca. Ninacaqui Yooztajapami Cristužtajapami sirwiñinaca cjequiča.

⁷ Jalla nii warank watanaca wattiquiztan Satanás diabluqui cuchtaž cjequiča koz tujquiztan.

⁸ Jalla nuž cutztiquiztan Satanás diabluqui ulnaquiča tjapa tii yokquiz žejlñi nacionanaca incallzjapa. Gog cjita naciona, nižaza Magog cjita naciona nižaza tjapa nacionanacžquiz incallžcu, quira zalzjapa ajcskataquiča. Jalla nii nacionanacchiz zultatunacaqui walja tamača, kot at pjilažtakaz. Nuž cherchinča.

⁹ Nii zultatunacaqui walja campuquin ojkchiča, Yooz parti žoñinaca muyuntizjapa, nižaza Yooziž pecta watja muyuntizjapa. Jalla nuž muyuntan, Yoozqui arajpachquiztan uj cutzinžquichiča, ninaca k'ala ujjjapa.

¹⁰ Nekztanaqui incallñi diabluqui azuprižtan asñi uj kotquin tjojtatača. Jalla nicju tuquiqui anawal animalžtan toscar profetžtan tjojtatača. Jalla nicju majiñami weenami sufraquiča watay wata.

PAJK CHIW MANTIZ PUESTU

¹¹ Jalla nekztanaqui tsjii pajk chiw mantiz puestu cherchinča. Nižaza nii puestuquiz tsjiiqui julzi želatča. Jalla nii julzi mantiñiž nuž želan, niž yujcquiz arajpachami yokami k'ala katchičha. Nekztan ana iya arajpachami yokami želatča.

¹² Nekztan ticzi žoñinaca cherchinča, koltami pakjimi, mantiñi Yooz yujcquiz tsijtchi. Jalla nekztanaqui Yooz liwrunaca cjetžtatača. Nižaza yekja liwru cjetžtatača; liwriita žoñinacž tjuu listichiz liwrutača. Nii Yooz liwrunacquiz tjapa žoñinacž paatanacaqui apuntitatača. Ticzinacaqui apuntita paatiquiztan jama pjalžtatača.

¹³ Jakziltat pajk kotanacquiz ticztčhaja, jalla ninacaqui Yooz yujcquiz intirjitatača. Nižaza jakziltami ticztčhaja, nižaza ticzi žoñiž yokquin žejltčhaja, jalla ninacaqui Yooz yujcquiz intirjitatača. Jalla nekztanaqui tjapa žoñinacaqui ninacž paatiquiztan jama pjalžtatača.

¹⁴ Ticzmi nižaza ticzi žoñinacž yokami ana iya želaquiča. Asñi ujquin tjojtatača. Nii asñi uj kotquin sufrisqui segundo ticz cjiča.

¹⁵ Jakziltiž tjuuqui liwriita žoñinacž tjuu listiquiz ana žejlčhaja, jalla niiqui asñi uj kotquin tjojtazakaztača.

21

EW ARAJPACHA EW YOKA

¹ Jalla nekztanaqui ew arajpachami ew yokami cherchinča. Primir arajpachami primir yoka katchicha, nižaza kotami.

² Nekztanaqui wejr Juanqui ew Jerusalén watja cherchinča, Yooz arajpachquiztan tjonñi. Jaknužt tsjaa zalzin turqui persun tjowažtajapa tjacz-inžlaja, jalla nižta zuma tjacztača ew watjaqui.

³ Nekztan arajpach mantiz puestuquiztan tsjii jora nonzinča. Altu tawkžtan tuž cjichiča:

—Cheržca. Yoozqui žoñinacž taypiquiz kamča. Yoozqui ninacžtan chica kamaquiča, nižaza nii žoñinacaqui Yooz wajtchiz žoñinaca cjequiča. Jalla nižtiquiztan Yoozqui ninacžtan chicaž cjequiča.

⁴ Yoozqui ninacž kjaz kaajmi chjujžinaquiča. Nižaza ninacžta anaž iya ticz želaquiča, nižaza iya kaazmi, llaquizmi, sufrismi anaž želaquiča. Jalla ninacaqui k'ala watchiča.

⁵ Nekztanaqui nii mantiz puestuquiz julžñiqui tuž cjichiča:

—Cheržca, wejrqui tjappacha ew paa-uča. Tii cijira. Tiicha werar takunacaqui, nižaza lijitum takunaca.

⁶ Jalla nekztanaqui cjichiča:

—Tjappachaž jazic žeržta. Wejrtča primirquiztanpacha, nižaza wiricama, jaknužt tsjii litranacaqui “A”quiztan kallantičhaja, nižaza “Z”quin wiricama žerzaja, jalla nižta. Jakziltat kjaztakaz zuma kamaña ancha pecčhaja, jalla niižquiz nužullakaz zuma kamaña tjaata cjequiča, jalzurquiztan žejtñi kjaztakaz. Wejrqui nii zuma kamaña tjaa-ača.

⁷ Jakziltat tjapa anawalinacquiztan atipačhaja, jalla niižquiz irinsažtakaz tii zumanaca weriž tjaata cjequiča. Wejrqui ninacžtajapa Yooz cjeeča. Ninacaqui wejt maatinaca cuntaž cjequiča.

⁸ Ana wejtquin kuzziz žoñinacžti azupri uj kotquin chjatkattaž cjequiča. Jalla tižta kamañchizza nii žoñinacaqui: Yooz nicñinaca, Yoozquin kuz ana tjaañinaca, ana zuma kamañchiz žoñinaca, žoñi conñinaca, adulteriuquiz ojk-layñinaca, yat'irinaca, žoñiž paata yooznaca sirwiñinaca, toscara chiiñinaca. Jalla ninacaž asñi ujquin castictaž cjequiča. Jalla nii asñi uj infiernuquin ojkzqui segundo ticz cjiča.

EW JERUSALEN CJITA WATJA

⁹ Tuquiqui cherchinča pakallawk anawalinacaqui pakallawk anjilanacžquiz intirjitatača. Jalla nekztanaqui nii pakallawk anjilanacquiztan tsjiiqui wejtquin tjonchiča. Jalla tuž cjican, chiichiča:

—Pichay. Amquiz tjeeznača, Uuzažtakaz Jesucristuž tur.

¹⁰ Jalla nekztanaqui Espiritu Santuqui wejtquiz tuž cherkatchiča. Wejrqui pajk curquiz chjichtatača. Jalla niwjtcan pajk zuma Jerusalén watja wejtquiz tjeeziča, arajpachquiztan Yoozquiztan tjonñi.

¹¹ Nii watjaqui Yooz honorchizza; nižaza llijatča Yooztakaz. Llijñi maztakaztača llijñatča jasje maztakaz, nižaza ispijužtakaz.

¹² Nii wajt muytata pajk pirka želatča, tuncapan zanchiz. Zapa zanquiz tsjii anjila želatča. Nižaza zapa zanquiz tsjii tjuu cijirtatača. Nii tuncapan tjuunacaqui Israel žoñinacž t'akanacž tjuutača.

¹³ Nii pirkatača tuwanchuc čhjep zanchiz, užachuc čhjep zanchiz, warchuc čhjep zanchiz, tajachuc čhjep zanchiz.

¹⁴ Nii wajt muytat pirkaqui tuncapan maz simintuchiztača. Nii tuncapan maz simintuquiz tuncapan Jesucristuž apostolunacž tjuunaca cjiirtatača.

¹⁵ Jalla nii wejtquiz chiiñi anjilaqui kor miriis parchizza, nii watja miriisjapa, zanami pirkanacami.

¹⁶ Nii watjaqui isquinatutača, porap kjuttan igualatača. Anjilaqui kor paržtan watja miriichiča, 2,200 kilometrotača, tsewcchuc altu kjutñi, nižaza latuquin igualatača.

¹⁷ Nekztan pirka miriichiča. Nii muytat pirkaqui sojta tunc pusin metro miriichiča, žoñiž metružtan miriita, jalla nuž.

¹⁸ Muytat pirkaqui jaspe maztan pirkitatača. Watjaqui kori puru kjuyanacchiztača, limpu ispijužtakaz.

¹⁹ Nižaza wajt muytat pirkiž simintunacaqui c'achja maznacžtan alajitatača. Primiruqui jaspe maztan, segunduqui zafiro maztan, terceruqui ágata maztan, cuartoqui esmeralda maztan,

²⁰ quintuqui ónice maztan, sextuqui cornalina maztan, septimuqui crisólito maztan, octavuqui berilo maztan, novenuqui topacio maztan, decimuqui crisoprasa maztan, unodecimuqui jacinto maztan, duodecimuqui amatista maztan.

²¹ Nižaza nii tuncapan zanaqui tuncapan perla maznacžtan paatatača. Zapa zanaqui tsjii perližtankaz paatatača. Wajt chawc calliqui kori puru paatatača, limpu ispijužtakaz.

²² Wajtquiz ana timplu cherchinča. Tjapa azziz Yooz Jiliržtan Uuzažtakaz Jesucristužtan, jalla ninacaqui wajt timplu cuntača.

²³ Nižaza nii wajtquiz kamcan, anaž tjuñimi jiiizmi pecasača, kjanzjapa. Yoozpachaž kjanča, Jesucristužtanpacha.

²⁴ Nacionanacquiztan liwriita žoñinacaqui Yooz kjanquizkaz ojklayaquiča wajtquiz kamcan. Nižaza yokquiz mantiñi reynacaqui nii wajtquin honora zjiicaquiča.

²⁵ Majiñ zita zana cjetžtaž želaquiča. Nižaza anaž ween želaquiča.

²⁶ Tjapa nacionanacž honora chjichtaž cjequiča nii wajtquin.

²⁷ Jalla nii wajtquizqui anaž anawali kamañchizqui luzasača. Nižaza Yooz chjaawjkatta žoñinacami ana luzasača, nižaza incallñi žoñinacami ana luzasača. Jakziltiž tjuut Uuzažtakaz Jesucristuž liwruquiz cjiirtažlaja, jalla ninacakaz Yooz wajtquiz luzasača.

22

¹ Nekztanaqui nii anjilaqui wejtquiz tsjii limpu puju tjeeziča. Nii puj kjazqui žeti tjaañi cjiča. Nii kjazqui ispijužtakaztača. Yooz mantiz puestuquiztanami, Uuzažtakaz Jesucristuž mantiz puestuquiztanami ulnatča.

² Nii puj kjazqui wajt chawc call taypizquiz okatča, puj porap kjuttan žeti tjaañi munti pakatča. Jalla nii muntiqui tuncapan wilta tsjii watquiz pookča, nižaza tuncapan frutchizza. Zapa jiiizquiz fruta pookča. Nižaza nii munti chjañinacaqui watjanacchiz žoñinaca čhjetinzjapača.

³ Nižaza nii wajtquiz kamñinacaqui ana iya casticz cheraquiča. Yooz Jiliriz mantiz julzmi, Jesucristuž mantiz julzmi nii wajtquiztača. Ninacž sirwiñinacaqui nii pucultižquiz rispitaquiča.

⁴ Nižaza Yooz wajtchiz žoñinacaqui Yooz cheraquiča. Nižaza Yooz tjuuqui nii žoñinacž ayquiz cjiirtaž cjequiča.

⁵ Nii wajtquiz ween ana želaquiča. Nižaza anaž sir kjanami, anaž lampar kjanami, anaž tjuñ kjanami pecasača. Yooz Jiliripachaž ninacžtajapa kjana

cjequiĉha. Niĉaza Yoozqui nii wajtquiz kamñinacaqui watay wataĉ zuma mantaquiĉha.

JESUCRISTUZ TJONZ TJUÑI WAJILLACHA

⁶ Jalla nekztanaqui nii anjilaqui wejtquiz cjichiĉha:

–Tii chiita takunacaqui weraraĉha, zuma lijitumapanĉha. Tuquitan Yooz Jiliriqui niĉ z puntu parliñinacĉquiz chiikatchiĉha. Jalla nii Yoozpachaqui niĉ anjila cuchanĉquichiĉha, niĉ sirwiñinacĉquiz tjeezjapa, ĉhjulut wajilla wataquiĉha, jalla nii.

⁷ Jesucristuqui wajillaj tjonla.

Jakziltat tii liwruquiz cjiĉrta Yooz taku catokaĉhaja, jalla niiqui cuntintuĉ cjequiĉha.

⁸ Wejr Juanqui jalla tinaca cherchinĉha, niĉaza nonzinĉha. Jalla nii nonĉcu, cherĉcu, nii wejtquiz tjeezñi anjilĉ yujcquiz quillzinĉha, niĉquiz rispitzjapa.

⁹ Jalla nekztanaqui nii anjilaqui wejtquiz chiiĉzinchiĉha, tuĉ cjican:

–Ana niĉta paa. Wejrqui Yoozquin zakal sirwuĉha, am irata, niĉaza Yooz parti parliñi jilanacaĉ irata, niĉaza tii liwruquiz cjiĉrta Yooz taku catokñinacaĉ irata. Jalla niĉtiquiztan Yoozquinkaz rispita.

¹⁰ Nekztanaqui wejtquin cjichizakazza:

–Tii liwruquiz cjiĉrta Yooz taku ana ĉhjoĉzaka joojoowa. Wajillaĉ tii taku cumplis tjuñi ĉcatĉzinĉquiĉha.

¹¹ Jalla nii timpu tjonan, jakziltat anazuma paacan ĉejlĉhaja, jalla niiqui anazuma kaj paala. Niĉaza jakziltat anazuma kuzziz ĉejlĉhaja, jalla niiqui anazuma kuzziz kaj kamla. Niĉaza jakziltat zuma kamañĉhiz ĉejlĉhaja, jalla niiqui zuma kamañĉhiz kaj cjila. Niĉaza jakziltat Yoozquinkaz kuzziz ĉejlĉhaja, jalla niiqui Yoozquinkaz kuzziz kaj cjila.

Nekztan tsjii joraqui cjichiĉha:

¹² –Nuĉupan wejrqui wajillal tjonaĉha. Jalla nuĉ tjoncan premiuchiz tjonaĉha. Zapa mayniĉquiz tjaa-aĉha, ninacaĉ kamtiquiztan jama.

¹³ Wejrtĉha primirquiztanpacha wiricama, niĉaza wejrtĉha kalltiñtqui, niĉaza ĉerzniñtqui, jaknuĉt tsjii litra “A”quiztan kalltiĉhaja, niĉaza “Z”quin ĉerzaja, jalla niĉta.

¹⁴ Jakziltat persun ujnacquiztan pertuntaĉlaja, jalla ninacaqui limpu ajunta zquitchiztakazza. Jalla nii pertunta ĉoñinacakaz cuntintuĉ cjequiĉha. Niĉaza ĉeti tjaañi muntiz frutunacquiztan lulasaĉha. Niĉaza ew wajt zanquiztan luzasaĉha.

¹⁵ Pero wajt zancu jalla tiĉta ĉoñinacaĉ eclaquiĉha: tsjii kjutñi kuz tjaañi ĉoñinaca, yat’irinaca, adulteriuquiz ojklayñinaca, ĉoñi conñinaca, ĉoñiĉ paata yooznacĉquin rispitiñinaca, niĉaza tjapa incallñinaca, niĉaza tjapa toscar taku pecñinaca. Jalla nii anazuma ĉoñinacaĉ wajt zancu eclaquiĉha.

¹⁶ –Wejr Jesucristutĉha. Wejt anjila cuchanĉquichinĉha, tjapa icliz ĉoñinacĉquiz tii takunaca ticlarzjapa. Wejtquiztan David jiliriqui tjoniñĉha. Niĉaza Davidĉ majchmaatinacĉquiztan wejrqui tjoniñĉha. Wejrtĉha weenzlak kjantat llijñi warawaraĉtakaz.

¹⁷ Espiritu Santuqui Jesucristuĉquiz kuzziz ĉoñinacĉtan “Jesucristuqui tjonla” cjiĉha.

Niĉaza jakziltat tii chiita taku nonznaĉhaja, jalla niizakaz “Jesucristuqui tjonla” cjila.

Jakziltat kjaztakaz Yooz zuma kamaña ancha pecĉhaja, picha, Yoozquiztan zuma kamaña tanzjapa. Nuĉullakaz tanznasaĉha. Zuma ĉeti tjaañi kjaztakazza nii zuma kamañaqui.

¹⁸ Jakziltat tii liwruquiz cjiirta Yooz taku nonžaja, jalla niižquiz chiižinžcuča, tuž cjican: Jakziltat tii cjiirta Yooz taku yapačhaja, jalla ninacžquiziqui tii liwruquiz cjiirta anawalinacaž wataquiča.

¹⁹ Nižaza jakziltat tii liwruquiz cjiirta Yooz taku t'upznačhaja, jalla niiž tjuu Yooz liwruquiztan jurtaž cjequiča; nižaza zuma Yooz wajtquiz anaž luzasača; nižaza tii liwruquiz cjiirta zumanaca ana niižtajapa cjequiča.

²⁰ Jalla tii takunaca ticlarñiqui tuž cjiča:

—Ultimupan wejrqui wajillal tjonacha.

Wejrzakaz cjiwča:

—Jalla nužoj cjila. Amén. Jesucristo Jiliri, jalla nuž tjona.

²¹ Učhum Jesucristo Jiliri qui tjapa ančucaquiz zumaj cjiskatla. Nužoj cjila. Amén.